

মানবজমিন

শীর্ষেন্দু মুখোপাধ্যায়



ସାମାଜିକ ସିନ୍ଧୁ

ଶ୍ରୀକୃଷ୍ଣ ମହୋପାଧ୍ୟାୟ



আকারেই শুধু বড়-মাপের উপন্যাস নয়
'মানবজমিন', প্রকারেও ব্যাপ্ত, বিশাল,
বৈচিত্র্যময় । এ-যুগের অন্যতম শক্তিমান কথাকার
শীর্ষেন্দু মুখোপাধ্যায়ের এ-যাবৎকাল প্রকাশিত যাবতীয়
প্রধান রচনার প্রবল এক প্রতিস্পর্ধী এই মহান
উপন্যাস, আধুনিক বাংলা কথাসাহিত্যের তাবৎ স্মরণীয়
কীর্তিমালাও । ঐতিহ্যের সঙ্গে শিকড়ের যোগ এই
দূর্লভ সৃষ্টির, সাম্প্রতিকের সঙ্গে আত্মার, আগামীর
দিকে বাড়ানো এর কুঁড়ি-ধরানো ডালপালা ।
অসংখ্য ঘটনা, অজস্র চরিত্র, অফুরান সমস্যা এই
উপন্যাসে । তবু কোথাও জট পাকায়নি । পরিণত
লেখকের দক্ষ হাতের সুঠাম নিয়ন্ত্রণে প্রতিটি চরিত্র ও
কাহিনী সুস্থির, স্বতন্ত্র, লক্ষ্যাভিমুখী । লোভ, ঘৃণা,
প্রেম, রিপূর তাড়না, বাঁচার ইচ্ছে, উচ্চাকাঙ্ক্ষা—এমন
যে-সব কিছুর দ্বারা কুণ্ঠীপাকে নিয়ত সিদ্ধ হচ্ছে মানুষ,
তারই উপর ভিত্তি করে গড়ে উঠেছে এই উপন্যাস ।
গড়ে উঠেছে মানুষে-মানুষে সম্পর্কের ভাঙচুর ও
জোড়-মেলাও নিয়ে ।
অসংখ্য চরিত্রের ঘাত-প্রতিঘাতে দ্বন্দ্বময় এই
উপন্যাসের অন্যতম নায়ক দীপনাথ, যাবতীয় চরিত্রের
মধ্যে এক সাধারণ যোগসূত্রের মতো যে কিনা
অব'র্তিত, যার লড়াই চলেছে কর্মক্ষেত্রে । এক
সওদাগরি আপিসের বিগ বসের পি. এ. দীপনাথ,
আসলে এক বেতনভোগী ভূত্য । এই দীপনাথের
সঙ্গেই তার বসের বউ মণিদীপার এক বিচিত্র সম্পর্ক
গড়ে উঠল । আপাতভাবে রাগের, কিন্তু অন্তঃশীল
অনুরাগের । বস তাকে বিয়ে করার প্রস্তাবও
দিয়েছিল । কিন্তু দীপনাথ কি সে-প্রস্তাব গ্রহণ করতে
পারবে ?
এ-উপন্যাসের আরেকটি প্রধান চরিত্র তৃষা । মৃত
ভাসুর তৃষাকে সব সম্পত্তি লিখে দিয়ে গেছে । লোকে
বলে, তৃষার একমাত্র পুত্রের জনক তার ভাসুর ।
এমন-কি তৃষার স্বামীও । তৃষার বিরুদ্ধে তাই স্বামীর
লড়াই ।
দুরারোগ্য ব্যাধির বিরুদ্ধে যার প্রতিমুহূর্তের একলা যুদ্ধ,
সেই প্রীতম, দীপনাথের ভগ্নীপতি, এ-উপন্যাসের
আরেক প্রধান চরিত্র । প্রীতমের স্ত্রী স্বামীর প্রতি
সেবাপরায়ণা, কিন্তু আগে থেকেই অরুণ নামে এক
যুবকের সঙ্গে তার সম্পর্ক ।
মুখ্যত এই তিন চরিত্রের লড়াই 'মানবজমিন' । আর
লড়াইয়ের অবসানে তিন রকমের যে-পরিণতি, তার
মধ্যেই ফুটে উঠেছে অসামান্য এই উপন্যাসের অমোঘ
সেই বার্তা, মানবজমিনে যা করতে শেখায় নতুন
আবাদ, ভালবাসা ও বিশ্বস্ততার সোনা-ফলানো
আবাদ ।

মানবজমিন

শীর্ষেন্দু মুখোপাধ্যায়



সাহিত্যম্ ॥ ১৮বি শ্যামাচরণ দে স্ট্রীট, কলকাতা-৭০০ ০৭৩

প্রথম প্রকাশ
ডিসেম্বর ১৯৬৫

প্রকাশক :
নির্মলকুমার সাহা
সাহিত্যম্
১৮বি শ্যামাচরণ দে স্ট্রীট
কলকাতা ৭০০ ০৭৩

মুদ্রাকর :
প্রদীপকুমার সাহা
লোকনাথ বাইন্ডিং অ্যান্ড
প্রিন্টিং ওয়ার্কস
২৪বি কলেজ রো
কলকাতা ৭০০ ০০৯

“রা - স্বা”
শ্রীদিবোন্দু মুখোপাধ্যায়
শ্রীমতী মালবিকা মুখোপাধ্যায়
করকমলেষু

মা ন ব জ মি ন

পুতুলরাণী হাপিস হয়ে যাওয়াতেই হাফ-খরচা হয়ে গেল নিতাই। কৌপীন খরল, জটা রাখল। কপালে মস্ত সিদুরের টিপ। লোকে নাম দিল ক্ষাপা নিতাই।

ক্ষাপা নিতাই এখন ঐ বসে আছে শিমুল গাছের তলায়। রক্তাশ্বরের কৌচড়ে পো দেড়েক মুড়ি। সকাল থেকেই আজ রোদ আব বাতাসের বড় বাড়াবাড়ি। উত্তরে হাউড় বাতাস এসে কলকল করে কথা বলছে গাছের পাতার সঙ্গে, মাঝে মাঝে টানা দীর্ঘশ্বাস ভুলে যাচ্ছে ডালপালায়। খসিয়ে দিয়ে যাচ্ছে শালের শুকনো পাতা। নিতাইয়ের চারদিকে থিরিক থিরিক নেচে নেচে কয়েকটা শালিখ আর কাক অনেকক্ষণ ধরে মুড়ির ভাগা চাইছে। এক মুঠ মুড়ি মুখে ফেলতে গিয়ে হঠাৎ একটা ভাবনা এল মাথায়। সামনেই শোলায় হ্যাট মাথায় সাইকেলে ঠেসান দিয়ে দাঁড়িয়ে মদন ঠিকাদার নতুন রাস্তা তৈরির কাজ তদারক করছে। দূরমুস করা মাটির ওপর ইট সাজানো শেষ হয়েছে। এখন বুড়ি বুড়ি পাথরকুচি ঢালছে কামিনরা।

নিতাই ভাবল, শালারা করছেটা কি? তার হাঁ-করা মুখের দরজায় কোষভরা মুড়ি থেমে ছিল অসাবধানে, অনামনস্কৃতায়। পাজী বাতাস এসে এক থাবায় বারো আনা মুড়ি উড়িয়ে নিয়ে ছড়িয়ে ফেলল চারদিকে। নিতাই বেকুবের মতো চেয়ে কাণ্ডটা দেখল, তারপর মুঠোভর যেটুকু মুড়ি ছিল তাও উড়িয়ে দিয়ে বলল—খা শালারা পঞ্চভূত। বাকি মুড়ি কোমরে বেঁধে উঠে গেল নিতাই। সামনের গড়ানে জমি ধরে নেমে গিয়ে মদনের দু-তিন হাত পিছনে দাঁড়িয়ে পড়ল। কোমরে হাত রেখে মাতব্বরের মতো উত্তর-দক্ষিণে টানা নতুন রাস্তাটার ঘেয়ো চেহারা দেখল। অবশ্য কাজ শেষ হলে এতটা ঘেয়ো দেখাবে না। তখন গাড়ি যাবে, মানুষ, গরু, কুকুর হাঁটবে। গলা খাঁকারি দিয়ে সে খুব নরম গলায় বলল—মদনবাবু, এই এত এত রাস্তা তৈরি করা কি ভাল হচ্ছে?

মদন ঠিকাদার আলকাতরার মতো কালো, লম্বা। মস্ত গৌফ আছে তার। ভীষণ রাগী চেহারা। একবার ফিরে তাকাল মাত্র। চোখে আগুন।

নিতাই তাতে ভয় খায় না। সেও সাধক, তান্ত্রিক। বলল, দুনিয়াময় যদি রাস্তাই বানায় মানুষ, কেবল বাড়িঘর বানিয়ে বানিয়েই যদি জায়গা ভরাট করে তবে চাম্বাসই বা হবে কোথায়, মানুষ খাবেই বা কি? কথাটা ভেবে দেখবেন একটু? আমি ক্লাস এইট পর্যন্ত পড়েছি, একেবারে মুখ্য নই।

মদন একটি কথারও বাজে খরচ করে না। ভারী গম্ভীর মানুষ। যারা কম কথা বলে, যারা প্রয়োজনের চেয়েও কম কথা বলে তাদের লোকে কি জানি কেন একটু ভয় পায়। মদন কখনো কাউকে মারেনি ধরেনি, গালাগালও করেনি বড় একটা, তবু কুলি-কামিন থেকে বহুলোক পর্যন্ত তাকে একটু খাতির দেখিয়ে চলে। ক্ষাপা নিতাইয়ের কথারও কোনো

জবাব দেয় না মদন। চোখ ফিরিয়ে নিয়ে আবার কাজ দেখতে থাকে।

মদন জবাব না দিল তো বয়েই গেল নিতাইয়ের। কিন্তু সাহস করে একটা মস্ত তত্ত্ব কথা যে মদন ঠিকাদারকে বলতে পেরেছে সে তাতেই ভারী খুশী হল। ফের ঢিবির ওপর উঠে শিমূলের ছায়ায় জমিয়ে বসল সে। একটা কাকের দিকে চেয়ে বলল, নিতাই কাউকে উচিত কথা বলতে ছাড়ে না, হ্যাঁ।

আজ সকালে খুব ঘন কুয়াশা ছিল। শেষ রাত থেকে বাঁদুরে টুপি আর তুষের চাদরে জাম্বুবান সেজে দক্ষিণের টানা বারান্দায় কাঠের ভারী চেয়ারখানায় বসে আছে শ্রীনাথ। তার চোখের সামনেই কুয়াশার আড়ালে রোগা-ভোগা ন্যাড়া মাথা কমজোরী সূর্যের উদয় হল। তারপর অবশ্য কুয়াশা কেটে ঝাঁ ঝাঁ রোদ ফুটেছে। শ্রীনাথ টুপি আর চাদর খুলে ফেলেছে অনেকক্ষণ। বাগানে উবু হয়ে বসে বসে এ গাছ সে গাছের পায়ে ধরে, গায়ে হাত বুলিয়ে বাবা-বাবা বলে সেবা দিচ্ছে। রোদের তাপে আর পরিশ্রমে গেল্লি ভিজে ঘাম ফুটে উঠল। ফর্সা রঙ এখন টমেটোর মতো টুকটুকে। কনুই পর্যন্ত মাটি মাথা, সারা মুখে ধুলোবালি। শেষ শীতে পালঙেব শীষ হঠাৎ লাফিয়ে ঢ্যাঙা হয়ে উঠেছে হাত দেড়েক। তারই আড়াল থেকে দেখতে পেল, বারান্দার সামনের দিকে কোণে একটা সাদা কাপ ডিশ দিয়ে ঢেকে রেখে গেছে কে যেন। দু হাতে তালি বাজিয়ে মাটি ঝাড়তে ঝাড়তে উঠে আসে শ্রীনাথ। বারান্দার নীচে চায়ের কাপটার তলাতেই একটা মস্ত গো-হাড় কামড়াচ্ছে ক্ষ্যাপা নিতাইয়ের কুকুর ইম্পাত। বাটা চায়ের কাপটা! ঠুঁকেটুকে দেখেনি তো। চা রেখে গেছে, কিন্তু তাকে ডেকে দিয়ে যায়নি। শ্রীনাথ চায়ের কাপে জ্বর দেখাব মতো হাত ঝুঁইয়ে দেখল, নিমঠাণ্ডা। এব চেয়ে বেশী এ বাড়ির লোকের কাছে সে আশাও করে না। আস্তে আস্তে ঠাণ্ডা চা-ই খেয়ে নেয় শ্রীনাথ। অভিমান বা রাগ করে লাভ নেই। বউ, মেয়ে, ছেলে, এরা সবাই তার আপনজনই তো। আদরযত্ন করার ইচ্ছে থাকলে এমনিতেই করত। এখন এই বিয়াল্লিশ বছর বয়সে সে কিছুই আর নতুন করে ঢেলে সাজাতে পারবে না।

নিতাইয়ের কুকুরটা কুঁই-কুঁই করে এখন তার পায়ের ফাঁকে মুখ গুঁজে আদর কাড়বার চেষ্টা করছে। গো-হাড় চিবোচ্ছিল, ঘেঁলায় পা তুলে বসে শ্রীনাথ। কিন্তু নেই আঁকড়া কুকুরটা কি তাতে ছাড়ে? শ্রীনাথ বলল, হাড়টা তো এনে ফেলেছো বাপ, কিন্তু আবার যে সেটা বাইরে গিয়ে রেখে আসবে সে বুদ্ধি নেই। সাধে কি কুকুর বলেছে।

ফটক ঝল বদ্বী ঢুকল। গায়ে জহর কোট, পাজামা, হাতে ফোলিও ব্যাগ, চতুর গৌফ। সোজা এসে রোদে তাতা বারান্দায় পা বুলিয়ে বসল। ব্যাগ খুলে কাগজপত্র বের করতে করতে বলল—প্রমথবাবুর জমিতে বর্গা রেজিস্ট্রি হয়ে আছে। ওঠানো যাবে না। তবে বর্গার দরুন দাম কিছু ছাড়তে রাজী আছেন।

শ্রীনাথ বলে, আমি নিজে চাষ করাব। বর্গাদার দিয়ে হবে না।

সে আপনি করুন না। বর্গাবি আইন তো তাতে পালটে যাচ্ছে না। চাষ আপনি করালেও সেই তে-ভাগাই হবে। বর্গা পাকা ঘুটি।

শ্রীনাথ সবই জানে। গভীর শ্বাস ফেলে বলল, এ তো ধান চাষ নয়। আমি করব ভেষজের চাষ।

উকিলবাবুকে সব বলেছি। উনি বললেন, হওয়ার নয়।

বর্গাদার কে? দেখা করেছিলি তার সঙ্গে?

সে এক তেরিয়া ধরনের ছেলে। তবে বলছিল, প্রমথবাবুর কাছ থেকে হাজার পাঁচেক

টাকা পেলে আদালতে গিয়ে বলবে যে, চাষ সে করত না । কিন্তু উকিলবাবু সেই ফাঁদে পা দিতে নিষেধ করেছেন । ওরা যখন তখন কথা পালটায় । টাকা খাওয়ার পর আদালতে দাঁড়িয়ে উলটো কথা বললে কিছু করার থাকবে না ।

শ্রীনাথ খানিক ভেবে বলে, তুই বরং কোনো চাষীর জমি দ্যাখ, যে নিজে চাষ করে । বর্গার গন্ধ যেন না থাকে ।

বদ্রী মাথা নেড়ে বলে, সে দেখব । কিন্তু কাছেপিঠে হবে না ।

দূরেই যাবো ।

অনেক দূর হলেও যাবেন ? সেখানে নিজে গিয়ে চাষ করানো মানেই স্থায়ীভাবে থাকা । থাকতে তো হবেই ।

চাষ করাবেন বলছেন, তার মানে তো আবার সেই বর্গার খপ্পরেই পড়ে গেলেন ।

চাষ করাব না । ভাবছি নিজেই করব ।

হাল গরু সব কিনবেন ? তার ওপর বলদের দেখাশোনা, লাঙলের মেরামতি, আরো কত কী সব করতে হবে । চাকরি করে কি পারবেন অত সব ?

পারব । চাকরি করার ইচ্ছে থাকলে আর জমি করতে যেতাম নাকি ? ভেষজের চাষে লাভও যেমন, তেমনি লোকের উপকারও হবে ।

বদ্রী চারদিক দেখে নিয়ে নীচু গলায় সাবধানে বলে, বৌঠান সঙ্গে যাবেন বলে তো বিশ্বাস হয় না । সেখানে একা থেকে অসুখে পড়লে ?

শ্রীনাথ চায়ের খালি কাপটা প্লেটের ওপর উপুড় করে ঘোরাতে ঘোরাতে হেসে বলে—এখানে অসুখ করলেই বা দেখছেটা কে ? এখানেও একা, সেখানেও একা । তুই দ্যাখ ।

দুধের মধ্যে সর ভাসলে ভারী ঘেন্না পায় সজল । রোজ তার দুধ হাঁকনিতে ভাল করে ঠেঁকে দেওয়া হয় । আজও তাই দিয়েছিল মেজদি মঞ্জুলেখা । তবু এক কুচি সর কিভাবে রয়ে গিয়েছিল তাতে । ওয়াক তুলে খুব চোঁচামেচি করেছে সজল । তাইতেই মায়ের হাতে প্রচণ্ড মার খেয়েছে মেজদি ।

শোওয়ার ঘরের মন্তু বিছানাটা বলটান দিয়ে রাখা হয়েছে । পাহাড় প্রমাণ উঁচু সেই বিছানা আর খাটের বাজুর মধ্যে যে খাঁজটুকু, সেইখানে উপুড় হয়ে পড়ে কাঁদছে মঞ্জুলেখা । মায়ের চিমটিতে তার ডান গাল ফুলে লাল হয়ে লক্কাবাটার মতো জ্বলছে । এই গাল নিয়ে সে লোকের সামনে বেরোয় কি করে এখন ? তাই এক পুকুর দুঃখের মধ্যে ডুবে কাঁদছে মঞ্জুলেখা । এ সময়ে খিচ করে চলে একটা টান পড়ল । একবার । দুবার । দূর থেকে সজল ছিপ ঘুরিয়ে ঝড়শি মারছে চলে । মুখটা তুলে মঞ্জুলেখা বলল—মরিস না কেন তুই ?

সজল ছিপটা সামলে নিয়ে হি-হি করে হেসে বলল, মাকে গিয়ে বলে দেবো ? বল গে যা । কচু করবে ।

যাচ্ছি তাহলে । বলব, মেজদি আমাকে বলেছে, তুই মর ।

সজল ঘর থেকে বেরিয়ে যেতেই বিছানার খাঁজ থেকে উঠে পড়ল মঞ্জুলেখা । তাড়াতাড়ি এলো চলে খোঁপা বেঁধে নিল । চুপিসাড়ে বেরিয়ে এল ঘর থেকে । তারপর মন্তু বাগানের গাছপালার মধ্যে পালিয়ে গেল ।

সজল মায়ের কাছে নাশিশ করবে বলে ঘর থেকে বেরিয়ে এসেছিল উঠানে । উঠান পেরিয়ে রান্নাঘরে যেতে যেতে আকাশের ঘন নীলের দিকে চাইল । দেখল শীতের অফুরান

রোদে ঘর ছেড়ে বেরোনের ডাক। আস্তে আস্তে শ্রুত হয়ে গেল তার পা।

বাগানের চারধারে শক্ত বেড়া আছে। উঠোনের চারধারে আছে নীচু ঘেরা-পাঁচিল। ফটক ঠেলে ক্ষ্যাপা নিতাই ঢুকে এল। বাগান থেকে সদ্য তুলে আনা একটা মস্ত রাঙা মূলো তার হাতে। সঙ্গে ইম্পাত। চোঁচাতে চোঁচাতে-বলছে, গরম রুটি ডাল আর কাঁচা মূলো...ডাল রুটি কাঁচা মূলো, এর ওপর কথা হয় না।

নিতাইয়ের ওপর এ বাড়ির কেউ খুশী নয়। একটা বাড়তি লোক খামোকা ঘাড়ের ওপর বসে খায়, থাকে। মন করলে কিছু কাজে আসে, পাগলামি চাড়ান দিলে কেবল বুসে বকবক করে। রোজ রাতে পুতুলরাণীর একটা ছবি আঁকে কাগজে। তারপর মন্ত্র পড়ে বাণ মারে।

নিতাইকে ভারী ভাল লাগে সজলের। এই একটা লোক যার কোনো সময়েই কোনো কাজ থাকে না, যাকে যখন খুশী ডাকলেই পাওয়া যায়, যার কাছে মনের কথা যা খুশী বলা যায়। সংসারে আর সবাই ভাবী ব্যস্ত, সকলেরই ভারী তাড়া, নিজের গস্তীর বাবার কাছে কখনোই প্রায় ঘেঁষতে পারে না সে। সবচেয়ে ভালবাসে যে মা সেও চৌপার দিন সংসারের হাজারো কাজে ব্যস্ত থাকে বলে তেমন পান্তা দিতে চায় না। সে শুনেছে যখন তারা খুব গরীব ছিল তখন বড়দি চিত্রলেখাকে পুষি নিয়েছিল মেজমাসী। বড়দি সেই মাসীর কাছে এলাহাবাদে থাকে। তাকে ভাল করে দেখেইনি সজল। আর দুই দিদির সঙ্গে ভাল বনিবনা নেই সজলের। মেজদি আর ছোড়দি দুজনেই হিংসুটির হৃদ। মা সজলকে কিছু বেশী ভালবাসে বলে ওরা তাকে সহ্য করতে পারে না। তবে ভয় পায়।

ক্ষ্যাপা নিতাইয়ের খিদে পেয়েছে। রান্নাঘরের দিকে হনো হয়ে যেতে যেতে একবার ঘাড় ঘুরিয়ে সজলকে দেখে বলল, আজ মদন ঠিকাদারকে খুব বকে দিয়ে এসেছি। পালপাড়ার জমি গায়েব করে রাঙা বানান্ছিল।

সজল সঙ্গ ধরে বলল, আজ কোথাও নিয়ে যাবে নিতাইদা ?

নিতাই আড়চোখে চেয়ে বলে, যাবে কোথায় ? চারদিকে ট্যাম-গোপাল বসে আছে। ধরবে।

হি হি করে হাসে সজল। ট্যাম-গোপালের গলায় মস্ত ঘ্যাঘ। তাই দেখে সজল ভয় পেত বরাবর। ঐ ঘ্যাঘের জন্যই গোপালের নাম হয়েছিল ট্যাম-গোপাল। তার নাম করে সজলকে এতকাল ভয় দেখিয়ে যা করার নয় তাই করিয়ে নিয়েছে বাড়ির লোক। কিন্তু সজল যে আর অত ছোটো নেই তা সবাই এখনো তেমন বুঝতে পারে না। সে বলল, ট্যাম-গোপালের সঙ্গে আমার কবে ভাব হয়ে গেছে। চালাকি করো না নিতাইদা, আজ নদীর ধারে কাঁকড়া খুঁজতে যাবে।

হবে হবে। বলে নিতাই রান্নাঘরমুখে হাঁটা দেয়। সঙ্গে ইম্পাত, হাতে মূলো।

বাগানে একটা ছোট্ট পুকুর আছে। গাছে জল দেওয়ার জন্য বাবা কাটিয়েছিল। এখন তাতে কিলবিল করে আমেরিকান কই মাছ। এ বাড়ির কেউ এই মাছ খায় না। সজলের কাজ না থাকলে এসে চুপচাপ ছিপ ফেলে মাছ ধরে। পরে লুকিয়ে সেগুলো বাইরে ফেলে দিয়ে আসে। কাজ নেই বলে সজল ছিপ হাতে পুকুর পাড়ে গিয়ে বসল। আটার টোপ ফেলে মাছের জন্য অপেক্ষা করতে লাগল।

বস্ত্রী চলে গেলে শ্রীনাথ উঠল। অফিসে যাওয়ার সময় হয়েছে। বেশ একটু দেরিতেই যায়, রাত করে ফেরে।

বাইরের দিকে নিজের এই আলাদা ছোট্ট ঘরখানা শ্রীনাথের একার। এ ঘরে কদাচিৎ

কেউ আসে। দাদা মল্লিনাথ এ বাড়ি বানিয়েছিল নিজের পছন্দমতো। এই ঘরটা ছিল ভাবন-ঘর। চিন্তা-ভাবনা করার জন্য যে বাড়িতে একটা আলাদা ঘর থাকা দরকার এটা একমাত্র তার মাথাতেই আসতে পারে যার মাথার স্কু কিছু ঢিলে। বলতে নেই মল্লিনাথের মাথার কলকজা কিছু ঢিলেই ছিল। বেশী বয়স পর্যন্ত ব্যাচেলর থাকলে যা হয়। অবরুদ্ধ কাম গিয়ে মাথায় চাড়া দেয়, নারীসঙ্গহীনতার মনটা হয় ভারসাম্যহীন। পৃথিবীতে মেয়ে এবং ছেলে এই দুই জাতের সৃষ্টি যখন হয়েছে তখন তার পিছনে একটা কারণও থাকার কথা। এককে ছেড়ে আর একের কি পুরোপুরি চলে? শেষ দিকটায় মল্লিনাথের খুব সেবা করেছিল শ্রীনাথের বউ তৃষা। সেই কৃতজ্ঞতাতেই মল্লিনাথ তার গোটা বাড়ি সম্পত্তি সব তাকে উইল করে দিয়ে গেল। আর সেই থেকেই এ বাড়িতে পর হয়েছে শ্রীনাথ।

মল্লিনাথের এই ছোট ভাবন-ঘরে সে থাকে। তার জাগতিক যা কিছু আছে সবই এই ঘরটুকুর মধ্যে। তাও সব কিছু তার নিজের নয়। ঐ ইজিচেয়ারটা মল্লিনাথের। লেখার ডেসকটাও তারই। দিশী মিস্ত্রী দিয়ে বানানো মজবুত চৌকিটার মালিক অবশ্য শ্রীনাথ। কিন্তু বইয়ের আলমারিটা মল্লিনাথের। এই ঘরে এই বাড়িতে বাস করতে গিয়ে প্রতি মুহূর্তেই শ্রীনাথের মনে হয়, সে পরের ঘরে বাস করছে। প্রতি মুহূর্তেই সে বোধ করে, এ বাড়ির দখল নিয়ে তারা ঠকাচ্ছে কাউকে।

মল্লিনাথের বিষয়সম্পত্তির দাবিদার আরো দুজন আছে। শ্রীনাথের ছোটো দুই ভাই দীপনাথ আর সোমনাথ। দীপ অন্য ধরনের মানুষ। পৃথিবীর বিভিন্ন ঘটন ও অ ঘটনের দিকেই তার বোঁক, কে কোথায় ক' বিঘে জমি নিয়ে বসে আছে তা তার মাথাব্যথার বিষয় নয়। দীপ অতিশয় জটিল চরিত্রের মানুষ, তাকে একদম বুঝতে পারে না শ্রীনাথ। কিন্তু ছোটো সোমনাথ জটিলতার ধার ধারে না। মানুষের সহজ সরল লোভ হিংসা প্রবৃত্তির বশে সে চলে। অর্থাৎ সোমনাথ খুবই স্বাভাবিক। উপরন্তু তাব ভাবের বিয়ের বউ আর শাশুড়ি তাকে বুদ্ধি পরামর্শ দেয়। সুতরাং, সে প্রথম প্রথম এসে বড়দার সম্পত্তির ভাগ নিয়ে শ্রীনাথ আর তৃষার সঙ্গে একটা রফা করার কথা বলত। শ্রীনাথ এ সম্পত্তি চায় না, তার আগ্রহ বা কৌতুহল নেই। সে থাকত চুপচাপ। সোমনাথের সঙ্গে লড়ত তৃষা একা। কিন্তু একাই সে একশ'। প্রথম প্রথম সোমনাথ নরম গরম কথাবার্তায় তৃতীয়ে পাতিয়ে সম্পত্তি ভাগ করাতে চাইত, পরে সে নরম ছেড়ে গরম হল। রবিবার বা ছুটির দিনে এসে সে তুমুল ঝগড়া বাঁধাত তৃষার সঙ্গে। প্রায় সময়েই সঙ্গে করে আনত তার অল্পবয়সী প্রায়-বালিকা বউকে। সে বউটিও গলার জোবে কিছু কম যায় না। কোনো পক্ষকেই কোনোদিন হার মানতে বা ক্লান্ত হয়ে পড়তে দেখেনি শ্রীনাথ। ছুটির দিন এলে পারতপক্ষে সে নিজে আর এ বাড়িতে থাকত না। দূরে কোনো গ্রামগঞ্জে চাষ-আবাদ দেখাব নাম করে চলে যেত।

খুব অপ্রত্যাশিতভাবেই একদিন সোমনাথের আসা-যাওয়া বন্ধ হয়ে গেল। গত বছর শীতকালে এক রবিবারে এসে সারা দিন সোমনাথ আব শমিতা থেকেছিল এ বাড়িতে। দফায় দফায় প্রবল ঝগড়াবাঁটি হল দু পক্ষে। সন্ধ্যাবেলা যখন স্বামী-স্ত্রী কলকাতার ট্রেন ধরতে স্টেশনে যাচ্ছে তখন বাড়ির চৌহদ্দি পেরিয়ে দু শো গজ যেতে না যেতেই নির্জন রাস্তায় দুটো লোক এসে ধরল তাদের। একজন শমিতাকে রাস্তার ধারে ঝোপঝাড়ের মধ্যে টেনে নিয়ে গিয়ে গয়নাগাটি কেড়ে বদ মতলবে মাটিতে পেড়ে ফেলেছিল। অন্যজন লোহার রড দিয়ে চ্যাঙা-ব্যাঙা করে পিটিয়েছিল সোমনাথকে। হাতব্যাগ, ঘড়ি, মানি ব্যাগ হাপিস করেছিল। শমিতা অবশ্য চরম লজ্জাকর ঘটনাটা ঘটতে দেখেনি। তার প্রবল প্রতিরোধ আর আঁচড় কামড়ে ধর্ষণকারী লুণ্ঠেরাটি নিবৃত্ত হয়। কিন্তু সোমনাথকে দিন

তিনেক হেলথ সেন্টারে পড়ে থাকতে হয়েছিল। পুলিশ সেই ঘটনায় কাউকে আজও ধরতে পারেনি। সোমনাথকে যে লোকটা পিটিয়েছিল সে লোকটা নাকি ছিল বেশ লম্বা আর দশাসই চেহারার। আর শমিতাকে যে ধরেছিল সে নাকি ছিল নরম-সরম শরীরের ছোটোখাটো মানুষ। দুজনেরই মুখে ভূষো কালি মাখা ছিল বলে ওদের ভাল বর্ণনা দিতে পারেনি শমিতা আর সোমনাথ। তবে শমিতা বলেছে, তাকে যে ধরেছিল তার মুখে পচা মাহের মতো প্রবল এক দুর্গন্ধ পেয়েছে সে। কিন্তু এই অস্পষ্ট বিবরণ থেকে কাউকে চেনা মুশকিল। শ্রীনাথ অনেক ভেবেছে, কিন্তু এ অঞ্চলের কোনো মানুষকেই এ দুই বদমাস বলে মনে হয়নি। তবে সোমনাথ স্পষ্টই তাকে বলেছে, এ কাজ করিয়েছে তৃষা।

শ্রীনাথের কোনো পক্ষপাত নেই। তৃষা এ কাজ করালেও করাতে পারে। তৃষার হাতে লোকের অভাব নেই। ঘরামী, মাটিকাটা মজুর, রাজমিস্ত্রী, দালাল, পলিটিকসওয়ালা, পুলিশ দারোগা সকলের সঙ্গেই তৃষা সস্তাব রেখে চলে। শুধু ছিনতাই করার জন্যই যদি সোমনাথ আর শমিতাকে ধরেছিল ওরা তবে খামোখা সোমনাথকে অত মারল কেন? সোমনাথ মার খাওয়ার পর অবশ্য শ্রীনাথ তৃষাকে ভাল করে লক্ষ করে দেখেছে। কোনো ভাবান্তর চোখে পড়েনি। কিন্তু শ্রীনাথ এও জানে, মুখের ভাবে ধরা পড়ার মতো কাঁচা মেয়ে তৃষা নয়। এই পুরো জমিজমা, সম্পত্তি একা হাতে সামলাচ্ছে তৃষা। সোমনাথ মার খেয়ে ফিরে যাওয়ার কিছুদিনের মধ্যেই দাদার সম্পত্তির ভাগ দাবি করে মামলা টুকেছে। সেই মামলাও একা চালাচ্ছে তৃষা। আদালতে গিয়ে উইলের প্রোবট বের করেছে। উকিলের বাড়ি যাতায়াত করছে। দরকারমতো উকিলকে পরামর্শ দিচ্ছে। এরকম বউ থাকলে মেনিমুখো মানুষের গৌরব হওয়ার কথা।

ঘরে এসে গা থেকে ঘামে-ভেজা গেঞ্জিটা খুলে সেটা দিয়েই গা মুছে নিল শ্রীনাথ। প্রায় সাড়ে নটা বাজে। ইজিচেয়ারে বসে চোখ বুজে রইল একটু। মাথায় অজস্র চিন্তার ভিড়। কোনোটাই কাজের চিন্তা নয়। মল্লিনাথের এই ভাবন-ঘরের চারদিকেই অজস্র জানালা। আলোয় হাওয়ায় ঘরে ভাসাভাসি কাণ্ড। ভারী সুন্দর ঘর। কিন্তু সারাক্ষণ একটা অস্বস্তির কাঁটা বিধে থাকে শ্রীনাথের মনে। এ বাড়ি দাদা বানিয়েছিল, এখন এর মালিক তার বউ তৃষা। এ সব তার নয়, সে এ বাড়ির কেউ নয়।

গোলপানা একটা মুখ উঁকি দিল দরজায়। আবছা একটা ফোঁপানির শব্দ। আধবোজা চোখেই মুখখানা নজরে এল শ্রীনাথের। তার মেজো মেয়ে মঞ্জু।

শ্রীনাথ সোজা হয়ে বসে বলল, কী রে? কাঁদছি নাকি?

কোনো জবাব নেই। খানিকক্ষণ চুপচাপ থেকে অবশেষে মঞ্জু আড়াল থেকে বেরিয়ে কপাটে ঠেস দিয়ে দাঁড়াল। মুখ নীচু। খোলা চুল নেমে এসে খানিকটা আড়াল করেছে মুখখানা।

আগে ছেলেমেয়ের ওপর বড় মায়ী ছিল শ্রীনাথের। বাড়ি ছেড়ে দূবে যেতে পারত না। এখন কেন যেন আর বৃকের মধ্যে তেমন ব্যাকুলতা নেই, টান নেই। ছেলেমেয়েদের দেখলে, হঠাৎ যেন মনে হয়, অন্য কারো ছেলেমেয়ে। আগে খুব মিশত ওদের সঙ্গে শ্রীনাথ, আজকাল গা বাঁচিয়ে থাকে। পারতপক্ষে ওরাও আজকাল তার কাছে ঘেঁষে না। মেয়ে দুটো তবু মাঝে মাঝে একটু-আধটু ডাক-খোঁজ করে, কিন্তু ছেলের সঙ্গে প্রায় পরিচয়ই নেই শ্রীনাথের। ছেলে সজল পুরোপুরি তার মায়ের সম্পত্তি। এইভাবে বন্ধনমুক্তি শ্রীনাথের খুব খরাপও লাগছে না।

শ্রীনাথ আর কিছু বলছে না দেখে মঞ্জু এলোচুল খোঁপায় বাঁধল, চোখ মুছল, তারপর খুব

সঙ্কোচে সাবধানী পায়ে ঘরে এসে চৌকির বিছানায় বসে বলল, তোমার এ ঘরের চাবিটা আজ আমাকে দিয়ে যাবে বাবা ?

বিরক্ত হয়ে শ্রীনাথ বলে, কেন ?

আমি এখানে দুপুরটা থাকব ।

তাই বা থাকবি কেন ? ঝগড়া করেছিস নাকি কারো সঙ্গে ?

ভাই ভীষণ পাজী । সারাদিন মাকে নালিশ করে মার খাওয়ায় । আজো মা কিরকম মেরেছে দেখ । গাল এখনো ফুলে আছে দেখেছো ?

দেখল শ্রীনাথ । তুষা এরকমই মারে । শ্রীনাথ উঠে দড়ি থেকে গামছাটা টেনে নিয়ে বলল, এ ঘরে তোকে ঝুঁজে পাবে না নাকি ?

মঞ্জু সঙ্কোচের গলায় বলে, ভাই তো তোমাকে ভয় পায় । এ ঘরে আসতে সাহস পাবে না ।

এ কথায় একটু থমকাল শ্রীনাথ । এ বাড়ির কেউ তাকে ভয় পায় এটা নতুন কথা । সজল কেন তাকে ভয় পায় তা বুঝতে চেষ্টা করেও পারল না । মাথাও ঘামাল না বিশেষ । বালতি মগ আর সর্বের তেলের শিশি নিয়ে ঘরের পিছন দিকে টিউবওয়েলে যেতে যেতে বলল, চাবি রেখে দিস, কিন্তু জিনিসপত্র ঘাঁটিস না ।

বিশাল উঠান পার হয়ে রান্নাঘরের দাওয়ায় নিকোনো শানের মেঝেয় পরিপাটি গালচের আসনের সামনে বাড়ি ভাত আর ঢাকা-দেওয়া জলের গেলাসটি সাজিয়ে রাখার দৃশ্যটি দেখলে তখনো তার সেই একটি কথাই মনে আসে । এ বাড়িতে সে বড় বেশী অতিথির মতো । তুষার কাজ নয়, এ হচ্ছে রাঁধুনী বামনীর যত্ন-আত্তি । পিছনে অবশ্য তুষার হুকুম আছে । কিন্তু এক কালে গরীব অবস্থার সময়ে কলকাতার শ্রীগোপাল মল্লিক লেনের ভাড়াটে বাসায় তুষা নিজের হাতে রেঁধে তাকে খেতে দিত তখনো কোনোদিন এত যত্নে ভাত বেড়ে দেয়নি ।

তবে তুষা ভাত বেড়ে না দিলেও আজ কাছেপিঠেই ছিল । শ্রীনাথ খেতে বসার পরই সামনে এসে বসে বলল, কতদিন হয়ে গেল বিলুর চিঠি এসেছে । প্রীতমবাবুর অত অসুখ, তোমার একবার দেখতে যাওয়া উচিত ছিল না ? রোজই তো কলকাতা যাচ্ছে । একদিন অফিসের পর গিয়ে ঘুরে আসতে কী হয় ?

ভগ্নীপতির অসুখের খবর একটা কানে এসেছিল বটে শ্রীনাথের । অতটা গুরুত্ব দেয়নি । এখন বলল, কী অসুখ ? খুব খারাপ কিছু নাকি ?

তুষা বলল, অত ভেঙে তো লেখনি । শুধু লিখেছে বিছানা ছেড়ে উঠতে পারে না পর্যন্ত ।

শ্রীনাথ ভূ কোঁচকাল । কতকাল হল সে বিলুর খবর রাখে না ? বছরখানেক হবে ? তা হবে বোধ হয় । গতবার বিলু ভাইফোঁটায় ডেকেছিল । সেবারই শেষ দেখা । এবার ভাইফোঁটায় বিলুও ডাকেনি, শ্রীনাথেরও ব্যাপারটা খেয়াল হয়নি । কিন্তু প্রশ্নটা হল, এতকাল মায়ের পেটের বোনকে একেবারে ভুলে সে ছিল কী করে ? শ্রীনাথ পাতের দিকে ঝোঁক রেখেই বলল, চিকিৎসার ব্যবস্থা কী করেছে ?

কী আবার করবে ? স্বামীর অসুখ হলে স্ত্রীরা যেমন করে তেমনই ব্যবস্থা করেছে । নিজে গিয়ে দেখে এলেই তো হয় ।

উদাস উদার গলায় শ্রীনাথ বলল, যাবো ।

আজই যেও পারলে । দেৱী করা ঠিক নয় ।

আজই ? বলে ভাবল একটু শ্রীনাথ । কী হয়েছে তার আজকাল, কোথাও যেতে ইচ্ছে করে না । অভ্যস্ত জীবনের বাইরে এক পা হাঁটতে হলেও কেন যে জড়তা আসে ! কেন, আজ কি কোনো কাজ আছে ?

শ্রীনাথ বলে, অফিস ছুটির পর বাসে ট্রামে বড্ড ভীড় । তার চেয়ে কোনো ছুটির দিনে— তৃষা মাথা নেড়ে বলে, তা তুমি কি যাবে ? ছুটির দিনে মানুষকে আলিসার ভূতে পায় । ব্যাপারটা ফেলে রাখলে আবার বছর গড়িয়ে যাবে । যেতে হলে আজই যাও । বিলুকে বোলো আমি মামলা-মোকদ্দমা নিয়ে বড্ড ব্যস্ত । নইলে আমিও যেতাম ।

॥ দুই ॥

দাওয়াতে দাঁড়িয়েই ঘটিভরা জলে আঁচাতে আঁচাতে খুব সাবধানে চোখের মণি বাঁয়ে সরিয়ে শ্রীনাথ তার বউ তৃষাকে দেখল । বয়স ষয়ত্রিশ ছত্রিশ হবে । বেশ লম্বা, প্রায় শ্রীনাথের সমান । গায়ে মেদ নেই, কিন্তু তেজালো একটা শক্তি সামর্থ্যের ভাব আছে । গায়ের রং শ্যামলা । মুখখানাকে সুন্দর বলা যায়, কিন্তু একটু বন্যভাব আর লোভ আর হিংস্রতা মেশানো আছে । এ বাড়ির বি চাকর মুনীশ খামোখা ওকে ভয় খায় না । ভুয় পাওয়ার মতো একটা থমথমে ব্যক্তিত্ব আছে তৃষার । এ মেয়ের বর হওয়া খুব স্বস্তির ব্যাপার নয় । শ্রীনাথ কোনোদিন স্বস্তি পায়নি । কি করে তবে এর কাছে স্বস্তি পেয়েছিল মল্লিনাথ ? তৃষার মুখে যে মধুর আত্মবিশ্বাস আর নিজের ধ্যানধারণার ওপর অগাধ আস্থার ভাব রয়েছে সেটা লক্ষ করলেই বোঝা যায়, সোমনাথ মামলায় হেরে যাবে । তৃষার সঙ্গে কেউ কখনো জেতেনি ।

ভাবতে ভাবতে রোদে-ভরা উঠোন পেরোতে থাকে শ্রীনাথ । সোমনাথের দুরবস্থার কথা চিন্তা করতে করতে আপনমনে হাসে । চাকরির জমানো টাকা খরচ করে দেওয়ানী মামলা লড়তে গিয়ে ফতুর হয়ে যাচ্ছে বেচারি । তৃষার ধান-বেচা অগাধ টাকা তো ওর নেই । যখন মামলায় হারবে তখন মাথায় হাত দিয়ে বসবে । বেচারি ! সোমনাথ মরীয়া হয়ে এমন কথাও বলে বেড়াচ্ছে মল্লিনাথকে ভুলিয়ে ভালিয়ে সম্পত্তি বাগাবার জন্য তৃষা তার ভাসুরের সঙ্গে অবৈধ সম্পর্ক পাতিয়েছিল ।

এ কথাও কি উড়িয়ে দিতে পারে শ্রীনাথ ? রোদ থেকে বাগানের ছায়ায় পা দিয়েই সে থমকে দাঁড়ায় । অবৈধ সম্পর্কের কথাটা মনে হতেই তার শরীর গরম হচ্ছে । রক্তে উথাল পাথাল । সুস্পষ্ট নির্লজ্জ কাম ভাব । আশ্চর্য এই, তৃষাকে সে সন্দেহ তো করেই, তার ওপর সেই সন্দেহ থেকে একটা তীব্র আনন্দও পায় ।

পুকুরপাড়ে একটা ছেলে দাঁড়িয়ে আছে না ? সজল কি ? কয়েক পা এগিয়ে গেল শ্রীনাথ । চোখের দৃষ্টি এখন আগের মতো তীক্ষ্ণ নেই । তবু মনে হল সজল । মাছ ধরছে । নিঃসাড়ে এগিয়ে যায় শ্রীনাথ ।

জলের খুব ধারে দাঁড়িয়ে আছে সজল । সাঁতার জানে না । পাশে ঘাসের ওপর কম করেও পাঁচ ছটা মাছ পড়ে আছে । কেউ খায় না । ধরছে কেন তবে ?

খুবই রেগে গেল শ্রীনাথ । এমনিতেও তৃষার আসকারা আর আদরে বেহেড এই ছেলেটাকে তেমন পছন্দ করে না শ্রীনাথ । একটু আগেই মঞ্জু বলছিল, মাকে বলে দিদিদের মার খাওয়ায় ছেলেটা ।

শ্রীনাথ আচমকা পিছন থেকে গম্ভীর গলায় বলে ওঠে, কী করছো ?

একটা মস্ত দুর্ঘটনা ঘটে যেতে পারত। চমকে কেঁপে উবু হয়ে পড়ে যেতে যেতে কষ্টে সামলে নিল সজল। ভয়ে সাদা মুখ ফিরিয়ে তাকাল। তার সামনে খাড়াই পাড় ছিল। অন্তত সাত আট ফুট নীচে জল। পড়লে খুব সহজে ওঠানো যেত না। পুরো ব্যাপারটা বুঝে নিয়ে শ্রীনাথ একটু লজ্জিত হয়। ঠাণ্ডা গলায় বলে, মাছ ধরতে কে বলেছে ? সজল আস্তে করে বলে, কেউ বলেনি।

ছেলের সঙ্গে কথা বলার অনভ্যাসের দরুন কী বলবে তার ভাষা ঠিক করতে পারে না শ্রীনাথ। গম্ভীর মুখে বলে, কাজটা ঠিক হচ্ছে না। তুমি কি সাঁতার জানো ? না।

তা হলে পুকুরের ধারে আর কখনো এসো না।

ঘাড় কাৎ করে ভাল মানুষের মতো সজল বলল, আচ্ছা। তারপর ছিপ গোটাতে লাগল। শ্রীনাথ হঠাৎ জিজ্ঞেস করল, তুমি মানুষের কাছে দিদিদের নামে নালিশ করো ? সজল সেই রকমই ভয়ানক মুখে বাবার দিকে খানিকক্ষণ চেয়ে থেকে বলে, না তো ? আজই করেছে।

সজল মৃদুস্বরে বলে, দুধে সর ছিল। তাই বলেছিলাম।

তুমি দুধের সর খাও না ?

সজল মাথা নাড়ে। না।

শ্রীনাথ একটু হেসে বলে, সর তো ভাল। পুষ্টি হয়।

ঘেমা লাগে।

শ্রীনাথ একটু চেয়ে থেকে কী বলবে ভাবে। তারপর শ্বাস ছেড়ে বলে, যারা রোজ দুধ খায় তারা বুঝবে না একটুখানি ঘেমার সর কত ছেলের কাছে অমৃতের মতো।

সজল কথাটা হযতো বুঝল না, কিন্তু টের পেল যে, বাবা তার ওপর খুশি নয়। তার মুখে-চোখে ডাইনী বড়ি দেখার মতো অগাধ অসহায় ভয়। শ্রীনাথের মনে পড়ল, এক সময়ে ট্যাম-গোপালের নাম করলে সজল ভয় পেত খুব ! আজ তার বাবাই তার কাছে সেই ট্যাম-গোপাল।

শ্রীনাথ জিজ্ঞেস করে, আমার সম্পর্কে তোমাকে কি কেউ ভয় দেখিয়েছে ?

না তো ! তেমনি ভয়ে ভয়েই বলে সজল।

তবে ভয় পাচ্ছে কেন ?

সজল হাতের ছিপটার দিকে চেয়ে থাকে মাথা নীচু করে।

শ্রীনাথ একটু মজা করার জন্য বলে, আমার তো শিং নেই, বড় বড় দাঁত নেই, থাবা নেই। তবে ?

সজল এ কথায় একটুও মজা পেল না। তার মুখ রক্তশূন্য, চোখে কোনো ভাষা নেই। এই অসহায় অবস্থা থেকে ওকে মুক্তি দেওয়ার জন্যই শ্রীনাথ বলে, যাও। তোমাকে কিন্তু আমি বকিনি। সাবধান করে দিয়েছি মাত্র। ঐ মাছগুলো এখন কী করবে ?

কিছু করব না।

বিরক্ত হয়ে শ্রীনাথ বলে, কিছু করবে না তো কি ফেলে দেবে ? বরং ক্ষ্যাপা নিতাইকে দিও। সে রেখে খাবেখন। নইলে গরীব-দুঃখী কাউকে দিয়ে দিও। যাও।

সজল চলে গেলে নিজের ঘরের দিকে যেতে যেতে ইম্পাতের আনা সেই গো-হাড়টা নজরে পড়ে শ্রীনাথের। কাঁচা হাড়। এখনো মাংস লেগে আছে। ঘেমায় গা বিরিয়ে ওঠে। আর সেই সঙ্গেই আবার গুপ্ত কাম-ভাবটা মাথা চাড়া দেয়।

ঘরটা হাট করে খোলা । মজু নেই । শ্রীনাথ তার ইজিচেয়ারে বসে খানিক বিশ্রাম করে ।
তাবপর উঠে জামাকাপড় পরতে থাকে ।

শ্রীনাথের চাকরিটা খুবই সামান্য । এত ছোটো চাকরি যে, নিজেকে নিয়ে একটু অহংকার থাকে না । একটা মস্ত বড় নামী প্রেসে সে প্রুফ দেখে । বেতন যে খুব খারাপ পায় তা নয় । কিন্তু এ চাকরিতে কোনো কর্তৃত্ব নেই, উন্নতির সম্ভাবনা নেই, উপরন্তু সারা বছরই প্রচণ্ড খাটুণী ।

তারা সব ক'জন ভাই-ই ছিল ভাল ছাত্র । শ্রীনাথ একান্ন সালে ফার্স্ট ডিভিশনে অঙ্ক আর সংস্কৃতে লেটার পেয়ে ম্যাট্রিক পাস করে । আই এস-সিতে লেটার না পেলেও ডিভিশনটা ছিল । বি এস-সিতে পাসকোর্সে ডিস্টিংশন পায় । কিছু লোক আছে যাদের পাথরচাপা কপাল । বি এস-সি পাস করে কিছুদিন মাস্টারী করবেছিল শ্রীনাথ । তখন মনে হত, একদিন নিশ্চয়ই সে এ সব ছোটোখাটো পরিমণ্ডল ছেড়ে মস্ত কোনো কাজ করবে । মফঃস্বল ছেড়ে কলকাতাবাসী হওয়ার জন্য একদা মাস্টারী ছেড়ে প্রেসের চাকরিটা নিয়েছিল সে । তখনো ভাবত, এ চাকরিটা নিতান্তই সাময়িক । বড় চাকরি পেলে এটা ছেড়ে দেবে । সেই ছাড়টা আব হয়ে উঠল না । একটা জীবন বড় কষ্টে কেটেছে । দাদা মল্লিনাথ ছিল মস্ত ইঞ্জিনিয়ার । কিন্তু একটু ক্ষমাপাটে স্বভাবের দরুন এক চাকরি বেশীদিন করত না । তারপর একদিন খেয়ালের বশে মারকিনী কয়দায় র্যানচ বা খামারবাড়ি বানিয়ে চাষবাস কবে একটা বিপ্লব ঘটানোর জন্য এইখানে চলে এল । উন্মাদগামী ও অসম্ভব সুপুরুষ মল্লিনাথকে ভালবাসত সবাই । সে বিবাহে বিশ্বাসী ছিল না, কিন্তু একটু হয়তো মেয়েমানুষের দোষ ছিল । প্রচণ্ড মদও খেত । খুব খাটত, অনিয়ম করত, শরীরের যত্ন নিত না । ছুটির দিনে শ্রীনাথ সপরিবারে বেড়াতে এলে মল্লিনাথ তাদের ছাড়তে চাইত না । তৃত্যাকে এটা ওটা রান্নার ফরমাস কবত । তৃত্য সেই পাগল লোকটার মনস্তত্ত্ব বুঝতে পেরেছিল জলের মতো । স্বামীর চেয়েও বেশী যত্ন কবত তাকে । এমনও হয়েছে ছেলেমেয়ে সহ তৃত্যাকে এখানে চার পাঁচ দিনের জন্য বেখে কলকাতায় ফিরে গেছে শ্রীনাথ । সেই সব দিনের কথা ভাবতে চায় না সে এখন আর । ঐ সব দিনগুলি তার বুকে বিশাল বিশাল গর্ত খুঁড়ে রেখেছে । কালো বহসো ঢাকা গহ্বর সব । আজো সে একা বসে বসে সেই সব কথা ভাবে আর শিউরে ওঠে গা । তখন ব্যাপাবটা অসম্ভব মনে হত না কেন যে ! এখন মনে হয়, কী সামাজিক ভুলটাই সে করবেছিল । তখন গরীব ছিল সে । বড়ই গরীব । মল্লিনাথ দেদার সাহায্য করত । ছেলে-মেয়েবা এখানে এলে ভাল খাওয়া পেত, পরিষ্কার জলবায়ু পেত । অন্য দিকটা তখন কিছুতেই চোখে পড়ত না শ্রীনাথের ।

কাজে আজ মন লাগছিল না শ্রীনাথের । মাঝে মাঝে এক রকম হাঁফ ধরা একঘেয়েমির মতো লাগে । মাইনের টাকাটা এখন আর দিতে হয় না তৃত্যকে, তার নিজের খাই খরচও নেই । সুতবাং টাকাটা জমে বেশ মোটা অঙ্কে দাঁড়িয়েছে । বস্ত্রী যদি খোঁজ দিতে পারে তবে সে নিজস্ব আলাদা জমি কিনে ভেষজের চাষ করবে । চাকরি করবে না, সারাক্ষণ দাদা মল্লিনাথের বাসায় বাস কবাব অপবাধবোধ থেকেও মুক্ত হবে ।

প্রুফ রিডার হলেও প্রেসে তার কিছু খাতির আছে । খাতিরটা ঠিক তার নয়, পয়সার । সবাই জানে শ্রীনাথবাবুর পয়সা হয়েছে । সেই খাতিরটুকু মাঝে মাঝে ভাঙায় শ্রীনাথ । বিকেল পাঁচটা পর্যন্ত টেনে-মেনে কাজ করে সুপারভাইজারকে গিয়ে বলল, আমার ভগ্নীপতির বড্ড অসুখ । একটু যেতে হবে । সুপারভাইজার বোসবাবুর সঙ্গে খুবই খাতির তার । বোসবাবু হেসে-টেসে বলেন, গেলেই হয় । ভগ্নীপতির অসুখের কথাটা বোধ হয়

বিশ্বাস হল না বোসবাবুর। শ্রীনাথের মনে খিচ থেকে গেল একটু। বিশ্বাস না করলেও বোসবাবুকে দোষ দেওয়া যায় না। মাঝে মধ্যেই আলতুফালতু অজুহাত দেখিয়ে সে অফিস থেকে কেটে পড়ে।

বাইরে শীতের ক্ষণস্থায়ী বেলা ফুরিয়ে সঙ্গে নেমে এসেছে। বেশ শীত। শরীরের মধ্যে সকাল থেকে জিওল মাছের মতো ছটফট করে দাপাচ্ছে অদম্য সেই কামের তাড়না। তুষার সঙ্গে সম্পর্কের জটিলতার দরুন শরীরের ব্যাপারটা বড় একটা হয়ে ওঠে না। তুষার প্রতি তাব যেমন নিষ্পহতা, তার প্রতি তুষারও তাই। কিন্তু তা হলে চল্লিশ বিয়াল্লিশে তার পুরুষত্ব তো আর মরে যায়নি ?

প্রীতমকে একবার দেখতে যাওয়া উচিত, এটা রাস্তায় দাঁড়িয়ে মনকে বোঝাল সে। এই মধ্য-কলকাতা থেকে ভবানীপুর যে খুব একটা দূর তাও নয়। কিন্তু গণ-বিক্ষোভের কলকাতার রাস্তাঘাট এত গিজগিজে, ট্রাম-বাসের এমনই আসন্নপ্রসবার চেহারা এবং এত ধীর তাদের গতি যে কোথাও যেতে ইচ্ছেটাই জাগে না।

ইচ্ছে অনিচ্ছেব মধ্যে খানিক হেঁটে সে গিরীশ পার্কের পিছনের এলাকায় চলে এল। এখানে সে যে নিয়মিত আসে তা নয়, তবে মাঝে মধ্যে কাম তাড়া করলে চলে আসে। মেয়েমানুষের দরদাম ঠিক কবতে পারে না সে। যা চায় প্রায় দিয়ে দেয় এবং বোধ হয় খুব ঠিকে যায়। এ পর্যন্ত যে তিন-চার জন বেশ্যার কাছে সে গেছে তাদের মধ্যে সবচেয়ে কম বিপজ্জনক মনে হয়েছে দীনা নামে ত্রিশ বত্রিশ বছরের একটি মেয়েকে। একটু বেশী কথা বলে, একটু বোকাও, কিন্তু কেমন একটু ধর্মভাব আছে তার।

সাড়ে পাঁচটাও বাজেনি ভাল করে। এটা ঠিক সময় নয়। তবু এ সময়টাই ভাল। অবাবহাত মেয়েদের পেতে হলে একটু আগে আসা ভাল।

এ পাভাতেও গিজ গিজ করছে লোকজন। বেশীর ভাগই মতলববাজ লোক। মেয়ের দালাল, গুণ্ডা, মাতাল, কামুক। সে এদেবই একজন, এ কথা ভাবতে তার অহংবোধে লাগে। কিন্তু বাস্তববোধ তার কিছু কম নয়। মুখটা কুমালে সামান্য আড়াল করে সে গলি থেকে আবো গহীন গলির অন্ধকারে ঢুকে যেতে লাগল।

দোতলা বাড়িটার ভাঙা সিঁড়ি বেয়ে উপরে উঠে হাঁফ ছাড়ে সে। কিছু ক্লান্তি আর উদ্বেগে শরীরটা অস্থির। বুকে হৃৎপিণ্ডের শব্দ শোনা যাচ্ছে। দীনা তার ঘরের বাইরে পাবান্দায় দাঁড়িয়ে আছে। মুখচোখের অবস্থা ভাল নয়। বোধ হয় মন খাবাপ। ওর একটা বছর দশ-বারের মেয়ে আছে। তার কিছু হয়নি তো ? হলে আজ জমবে না।

দীনা তাকে চিনতে পারল। ডাকতেই মুখ ফিরিয়ে ভূঁ কঁচকে দেখল তাকে। তারপর ভূঁ সহজ হয়ে গেল। বলল, অনেক দিন পর না ?

তুমি ভাল আছো ? জিজ্ঞেস করে শ্রীনাথ।

ভাল আর কি ? আসুন।

ভিতরে ঢুকে দীনা কপাট ভেজিয়ে দিয়ে বলে, কী কাণ্ড শুনবেন ?

কী ?

সে এক কাণ্ডই। বলে দীনা হেসে ফেলে। দেখতে ভাল কিছু নয় মেয়েটা। সাদামাটা গোঁয়ো চেহারা। বং কালো। মাঝারি লম্বা, মাঝারি গড়ন। কিছু বৈশিষ্ট্য নেই। তাই খন্দেরেও বোধাবোধ নেই। হেসে ফের গভীর হয়ে গিয়ে বলল, খুব রাগ হচ্ছে আমাব, হাসিও পাচ্ছে। দুটো ইস্কুলে-পড়া ছেলে এসেছিল আজ জানেন ?

বটে ? শ্রীনাথ তেমন আগ্রহ দেখায় না। ইস্কুল কলেজের ছেলেরা আজকাল হরবখত

বেশ্যা পাড়ায় যায় । কিছু অস্বাভাবিক নয় ।

দীনা চৌকির বিছানায় বসে খুব চিন্তিত মুখে বলে, চৌদ্দ পনেরোর বেশী বয়স নয়, গায়ে ইন্ধুলের পোশাক পর্যন্ত রয়েছে । ঠিক দুপুরে কড়া নাড়তেই দরজা খুলে দেখি দুই মূর্তি । প্রথমে ভেবেছিলাম পথ ভুল করে এসেছে বা জলতেষ্টা পেয়েছে বলে ঢুকে পড়েছে । তারপর দেখি তোতলাচ্ছে, আগড়ম বাগড়ম বলছে । বলতে গেলে ছেলের বয়সী । যখন বুঝতে পারলুম মতলব অনা রকম, তখন এমন রাগ হল । ঝেঁটে ছাতটা হাতের কাছে পেয়ে সেইটে দিয়ে পয়লা ছেলেটাকে দিলুম কষে ঘা কতক । দুটোয় মিলে এমন পড়ি মরি করে পালাল না । দীনা হেসে খুন হতে লাগল বলতে বলতে । তারপর ফের গম্ভীর হয়ে বলল, কিন্তু অন্য একটা কথা ভেবে ভারী ভয় হয়, জানেন ! ভাবি, আজ না হয় তাড়ালুম । কিন্তু রোজ যদি ওরকম সব ছেলেরা আসে ? একদিন হয়তো আব তাড়াব না ।

শ্রীনাথ কিছু বিরক্ত হয়ে বলে, আজই বা তাড়ালে কেন ? ওরা তো কারো না কারো কাছে যাবেই । মাঝখানে তোমার রোজগারটা গেল ।

দীনা ঠোঁট উন্টে বলে, কাটা মাঝি বোজগারের মুখে ! বেশ্যা বলে কি ঘেন্নাপিণ্ডি নেই ?

শ্রীনাথ দার্শনিকের মতো একটু হাসে । বেশ্যা বলে নয়, আজকাল এই দুনিয়ায় কোনো মানুষেরই ঘেন্নাপিণ্ডি খুব বেশীদিন থাকে না ।

প্রীতমকে দেখতে যাওয়া হল না । বাড়ি ফিরতে বেশ একটু রাত হয়ে গেল শ্রীনাথের । স্টেশনে নেমে শীতে অন্ধকারে বাড়ির দিকে হাঁটতে হাঁটতে ভাবছিল, এই বাতে গিয়ে কোন অজুহাতে স্নানের জন্য গরম জল চাইবে । স্নান না করলেই নয় । যতবার বেশ্যাপাড়ায় গেছে ততবার ফিরে এসে স্নান করতেই হয়েছে তাকে । নইলে ভাবী খিতখিত করে ।

বাড়িটা ভারী নিঃশব্দ । অন্ধকারে নিবিড় গাছপালার ছায়ায় আর কুয়াশায় যেন মিশে গেছে চারপাশের সঙ্গে । শুধু বাগানের মধ্যে এক জায়গায় শুকনো কাঠকুটো দিয়ে আগুন জ্বলে বসে আছে ক্ষ্যাপা নিতাই । প্রতিদিন এই নিশুত রাতে মাটিতে একটা শলা দিয়ে পুতুলরাণীকে আঁকে সে । তাবপব মস্ত্র পড়ে বাণ মারে । এতদিনে বাণের চোটে পুতুলরাণীর মুখে বস্তু উঠে মরাব কথা । কিন্তু শ্রীনাথ যতদূর জানে পুতুলরাণী গুসকরায় রসবড়া ভাজছে । মাঝখান থেকে এ ব্যাটাই তান্ত্রিক-মাস্ট্রিক সেজে ক্ষ্যাপাটে হয়ে গেল ।

নিতাই নাকি বে ? ডাকল শ্রীনাথ ।

ডাক শুনে নিতাই উঠে আসে, কিছু বলছেন ?

তোর আগুনটায় আমায় এক ডেকচি জল গরম করে দে তো !

ও মাড়িয়েছেন বৃদ্ধি ? স্নান করবেন ?

ঠিক ধরেছিস । আমার ঘর থেকে ডেকচি নিয়ে যা । আব শোন, তোর কুকুরটা একটা গো-হাড এনে ফেলেছিল এইখানে । ওটা তুলে ফেলে দিস ।

বলে টচ জ্বলে বাবান্দাব তলায় দেখাল শ্রীনাথ । হাড়টা পড়ে আছে এখনো ।

নিতাই বিন্দুমাত্র দিধা না কবে বাঁ হাতে হাড়টা তুলে নিয়ে বলল, দিচ্ছি ফেলে ।

ব্যাটা চামার ! গাল দেয় শ্রীনাথ, এত রাতে হাড়টা ছুঁতে গেল ?

নিতাই অন্ধকাবে জটাজুট নিয়ে মিলিয়ে যায় । একটু বাদে ডেকচি নিতে ফিরে আসে ।

এই শীতে খোলা জায়গায় টিউবওয়েলের ধারে গরম জলে স্নান কবতে গিয়েও শীতে থবথবিযে কাঁপছিল শ্রীনাথ । স্নানের পর যখন গা মুছেছে তখন হ্যাঁবিকেনের সামনে একটা মস্ত হায়া এসে পড়ল ।

চোখ তুলে দেখল, তুষা । আব একবার আপনা থেকেই কেঁপে উঠল শ্রীনাথ ।

তৃষা গম্ভীর মুখে বলে, তুমি কি আজ সজলকে বকেছো ?

আমি ? বলে ভাববার চেষ্টা করে শ্রীনাথ । ভেবে-টেরে বলে, বকিনি । তবে পুকুরের ধারে দাঁড়িয়ে মাছ ধরছিল । সাতার জানে না । বিপদ হতে পারে সাবধান করে দিয়েছিলাম ।

তৃষা কোনো তর্ক করতে আসেনি । বিমর্ষ মুখে বলল, ছেলেটার বিকেল থেকে খুব জ্বর । ভুল বকছে । জ্বরের ঘোরে বার বার বলছে, বাবা বকেছে । বলেছে মারবে । ভীষণ মারবে ।

বেকুরের মতো চেয়ে থেকে শ্রীনাথ বলে, মারবো বলিনি তো ! মারবো কেন ? তৃষা একটু অবাক গলায় বলল, তুমি কি রোজ রাতে স্নান করো ? সাধুটাধু হলে নাকি ? না, ঐ নিতাইয়ের কুকুরটা একটা গরুর হাড় এনে ফেলেছিল । সেটা পায়ে লেগেছে । ও । বলে তৃষা চলে গেল ।

সজলকে একবার দেখতে যাওয়া উচিত কি না তা বুঝল না শ্রীনাথ । বাবা হিসেবে হয়তো উচিত । কিন্তু সে তো ঠিক স্বাভাবিক বাবা নয় ।

স্নান করে ঘবে ফিবে এসে বালতি রেখে দড়িতে গামছা টাঙাচ্ছে, এমন সময় মঞ্জু এল চুপিসাড়ে ।

বাবা !

আবাব কী চাই ?

ভাইয়ের জ্বর হয়েছে কেন জানো ?

না তো । কেন ?

ভাই বলেছে, তুমি নাকি ওকে আজ খুব মেরেছো । মারতে মারতে পুকুরের জলে ফেলে দিয়েছিলে । তাই !

শ্রীনাথ রাগে স্তম্ভিত হয়ে মেয়ের দিকে চেয়ে থাকে । অনেকক্ষণ বাদে বলে, সজল একথা বলেছে ?

নিজের কানে শুনেছি বাবা । আমার সামনেই মাকে বলল ।

আমি মেরেছি ? বলে দিশেহারা শ্রীনাথ নিজের দুটো হাতের দিকে যেন সন্দেহবশে চেয়ে দেখল একটু । তারপর রাগে গরগর করে বলল, আচ্ছা মিথ্যাবাদী ছেলে তো ! ওকে চাবকানো দরকার ।

* শুনে খুশি হল মঞ্জু । বলল, আমাদের নামেও বলে ।

থমথমে মুখে শ্রীনাথ জিজ্ঞেস করে, ওর জ্বর এখন কত ?

একশ চার । ওকে কিছু বলব বাবা ?

না, এখন থাক । যা বলাব আমিই বলব ।

সেই রাগ নিয়েই গিয়ে রান্নাঘরে খেতে বসল শ্রীনাথ । সেই রাগ নিয়েই শুল রাত্রে । ঘুম আসতে চাইল না । পৃথিবীটা বড্ড পচে যাচ্ছে যে ! সেই পচনের দুর্গন্ধ পাওয়া যাচ্ছে স্পষ্ট । নিজের ছেলে জলজ্যাস্ত এমন মিথ্যে কথাটা বলল কেমন করে ?

শেষরাতে ঘুমিয়ে পড়েছিল শ্রীনাথ । স্বপ্ন দেখল, সজল একটা মস্ত সুন্দর দীঘির ধারে মাছ ধরছে । আসলে মাছ নয়, পুকুর থেকে ছিপের টানে উঠে আসছে নানা রঙের ঘুড়ি । পিছন থেকে চুপিচুপি গিয়ে শ্রীনাথ ওর পিছনে দাঁড়াল । দেখল দীঘির জল খুব গভীর । সজল তার পিছনে বাবার উপস্থিতি টের পায়নি । শ্রীনাথ হাত বাড়িয়ে আচমকা সজলকে ঠেলে ফেলে দিল জলে ।

শিলিগুড়ির হোটেল সিনক্রয়ার থেকে দুপুরের বোদে ঝকঝকে কাঞ্চনজঙ্ঘা দেখা যাচ্ছিল। দূর প্রসারিত নীলবর্ণ পাহাড়ের আডাল থেকে সাদা কাঞ্চনজঙ্ঘার দিকে হঠাৎ তাকালে মনে হবে যেন শূন্যে ভেসে আছে। যেন বা কাপোলি মেঘ। বহুবাব দেখেছে দীপনাথ। আবারও দেখছে।

রওনা হতে আব বেশী দেরী নেই। হোটেলের লাগোয়া ইনডিয়ান এয়ারলাইনসের অফিসেব লাউঞ্জে একটু আগেই সে দেখে এসেছে এ কে বোসের নামেব লেবেল মারা একটা বেডিং আব দুটো ঢাউস বিদেশী ফাইবাব গ্লাসের সুটকেশ নামানো হয়েছে। সে বুঝতে পারছে না মালপত্রগুলো নিয়ে তাকেই এয়াবলাইনসের গাড়িতে যেতে হবে কি না। এয়ারলাইনসের লাউঞ্জে মালপত্র বাখার অর্থটা তাই দাঁড়ায়। বোস আর তার স্ত্রীর জন্য রাস্তাপানি টি এস্টেটের অ্যামবাসাডার গাড়ি এসে গেছে। দীপনাথ বুঝতে পারছে না বাগডোগরায় সে নিজে যাবে কিসে। অ্যামবাসাডারে না এয়াবলাইনসের গাড়িতে? বস্তুত আজকাল এসব সিদ্ধান্ত নেওয়াব অধিকার তার নেই। সিদ্ধান্ত নেয় বোস। বোসের ইচ্ছাই তার সিদ্ধান্ত। তবে এ ব্যাপারগুলো নিয়ে আব ভাবে না দীপনাথ। মেনে নিতে নিতে মন ভোঁতা হয়ে গেছে।

পবশু গ্যাংটকে কাপেট কেনা নিয়ে বোস ও তার স্ত্রীব মধ্যে একচোট ঝগড়া হয়ে গেছে। ভদ্রমহিলার খরচের হাত সাজ্জাতিক। সেই ঝগড়ার জের এখনো চলছে কি না কে জানে। যদি চলে তবে বোস স্বভাবতই চাইবে দীপনাথ তাদের সঙ্গে অ্যামবাসাডারেই এয়াবপোর্টে যাক। সেক্ষেত্রে বোস বসবে সামনেব সীটে, ডাইভারের পাশে, দীপনাথকে বসতে হবে শ্রীমতী বোসের পাশে একটু জডোসঁডো হয়ে পিছনের সীটে, এবং পুরো বাস্তাটাই কোন কথাবার্তা হবে না। বড় জোর শ্রীমতী বোস বলবে, যাই বলুন গ্যাংটক ভীষণ নোংরা, তাব চেয়ে কালিমপং অনেক ভাল। কিংবা, আপনি কিন্তু এবাবও শিলিগুড়ির হংকং মার্কেট দেখালেন না।

হোটেলের লাউঞ্জে বসে না থেকে দীপনাথ দুপুরের বোদে বাইরে দাঁড়িয়ে ক্ষণেক কাঞ্চনজঙ্ঘা দেখে নিচ্ছে। ছেলেবেলায় বহুবাব দেখেছে সে। তাব বড় ভাই শ্রীনাথ আর ছোটো সোমনাথ যখন মা-বাবার কাছে মানুষ হচ্ছে তখন বড় পিসী তাকে এনে বেখেছিল শিলিগুড়িতে। তখন সাবাদিন কাঞ্চনজঙ্ঘা জেগে থাকত ঠিক এইভাবে। তার যৌবন নেই, জরা নেই। কিংবা হয়তো আছে। কিন্তু পাহাড়ের যৌবন বা জরা এতটাই দীর্ঘস্থায়ী যে মানুষের আয়ুতে বেড পায় না। কিন্তু আজও সে বাল্যকালের সেই যৌবনোদ্ধত পাহাড়টিকে দেখে খুব আনন্দিত হয়। সবকিছুব চেয়ে আজও তার বেশী প্রিয় পাহাড়। উঁচু, একা, মহৎ।

দীপনাথ নিজে পাহাড়ের ঠিক বিপরীত মানুষ। কোনো উচ্চতা নেই, মহত্ত্ব নেই। কলকাতার এক কৌটো তৈরির ছোট্ট কারখানায় সে প্রায় বছর আষ্টেক ম্যানেজারি করেছে। বাঙালীর সেই প্রতিষ্ঠানটি প্রথম থেকেই ধুকছিল। মালিক তেমন গা করত না। শ্রমিকরা ছিল ভয়ংকর তেড়িয়া। অ্যাসিস্ট্যান্ট ম্যানেজার ছিল দীপনাথের চিরশত্রু এবং মালিকের স্পাই। দীপনাথের খবরদারির মধ্যেই কারখানায় নিয়মিত চুরি হত। এ সবই সহ্য করে মুখ বুজে পড়ে ছিল সে। এমন কি অ্যাসিস্ট্যান্ট ম্যানেজারের উসকানিতে সে একবার শোলো ঘণ্টা ঘেরাও হয়ে থাকে, আর একবার তিন-চারজন ওয়াকারের হাতে তাকে মারধোর খেতে

হয়। কিন্তু শেষ পর্যন্ত টেকা গেল না। কারখানার বুড়ো মালিক ডেকে বললেন, তোমার হাতে দিয়ে এতোদিন তো দেখলাম, এবার ছেড়ে দাও, নতুন কারো হাতে দিয়ে দেখি যদি চালাতে পারে। দীপ জানে কারখানায় নতুন করে টাকা না ঢাললে, আপাদমস্তক ঢেলে না সাজালে কিছুতেই কিছু হওয়ার নয়।

বছরখানেক আগে চাকরি খুঁিয়ে সে ফ্যা ফ্যা করে ঘুরে বেড়াল খানিক। তারপর জুটল বোসের সঙ্গে। মস্ত এক গুজরাটি ফার্মের ব্রাঞ্চ ম্যানেজার বোস অতি ধূর্ত ও অভিজ্ঞ। দীপনাথ যে কাজের লোক নয় সেটা বোধহয় সে এক নজরেই বুঝে নিয়েছে। কিন্তু সেটা স্পষ্ট করে বলেনি আজও। তবে দীপনাথকে যে সে সঙ্গী এবং সাহায্যকারী হিসেবে খুবই পছন্দ করে তাতে সন্দেহ নেই। কোম্পানি থেকে দীপনাথ ভাউচারে মাসিক ছয় থেকে সাতশো টাকা পায়। তাকে খাতায় সই করতে হয় না, অফিসে বসতে হয় না, ডিউটি আওয়ার্স বা ছুটির দিন বলেও কিছু নেই। অর্থাৎ তাকে কোম্পানির চাকরিতে বহাল করা হয়নি। কেবল ফুরনের লোক হিসেবে পোষা হচ্ছে। বোসকে বিস্তর টুর করতে হয়, সঙ্গে থাকে দীপনাথ। এসব খবচ অবশ্য কোম্পানিই দেয়। বোস কারো সঙ্গে পরিচয় করিয়ে দেওয়ার সময় দীপনাথের যে পদের উল্লেখ করে সেটাও গোলমালে। বোস তাকে নিজের সেক্রেটারি বলে চালায়। ধৈর্যশীল এবং উপায়স্বরহীন দীপনাথ তবু বোসের সঙ্গে লেগে আছে। সর্বদিন তো সমান যায় না। কৌটোর কারখানার ম্যানেজার হিসেবেও সে ছয় সাতশো টাকার বেশী পেত না। কোনোদিন চুরি করেনি এক পয়সাও। করলে মাসিক আয় বেড়ে হাজার দুয়েকে দাঁড়াতে পারত। চুরি দীপনাথ এখনো করে না। আর সেটা জানে বলেই বোধহয় বোস তাকে এখনো খাতির করে। আপনি-আজ্ঞে করে কথা বলে।

কাল গ্যাংটক থেকে ফিরে দীপনাথ বোস এবং তার বউকে হোটেলে পৌঁছে দিয়ে নিজে ফিরে গিয়েছিল হাকিমপাডায়, পিসীর বাসায়। বছরখানেক আগে পিসী মারা গেছে। অতিবৃদ্ধ পিসেমশাই আর পিসতুতো ভাইরা আছে। দীপনাথ গেলে বাড়ির সবাই আন্তরিক খুশি হয় এখনো। কাল অনেক রাত পর্যন্ত ভাইদের সঙ্গে আড্ডা দিয়েছে। সব ব্যর্থতার গ্লানি ফুৎকারে উড়ে গিয়েছিল গানে, গল্পে, ঠাট্টায় আর পুরোনো দিনের কথায়। ছেলেবেলার কয়েকজন বন্ধুও এসে জুটেছিল। এসেছিল প্রীতমের মেজো ভাই শতম। কয়েকটা ঘণ্টা বড় আনন্দে কেটেছে। আজ দুপুর থেকে আবার সে বোসের রহস্যময় সেক্রেটারি। অর্থাৎ ফাইফরমাশ খাটার লোক, ফুরনের ভবিষ্যৎহীন খাটনদার।

শতম তার জীপগাড়িতে সিনক্রয়ার হোটেলে পৌঁছে দিয়ে গেল দীপনাথকে। চলে যাওয়ার আগে হঠাৎ বলল, মেজদা, আমার দাদার জন্য কিন্তু বউদিই দায়ী। দাদা বোধহয় বাঁচবে না, এই শেষ সময়টায় যদি আমাদের কাছে তাকে আসতে দিত বউদি তবে দাদা বোধহয় একটু আনন্দে মরতে পারত। তুমি বউদিকে একটু বুঝিয়ে বোলো।

পিসতুতো ভাইরা দীপনাথকে মেজদা বলে ডাকতো। সেই থেকে সে প্রায় সকলেরই মেজদা। এই ডাকের ভিতরে পুরোনো দিনের গন্ধ আছে, জড়িয়ে আছে আত্মীয়তা। মেজদা ডাকের মধ্যে আজও গভীর ভালবাসা খুঁজে পায় দীপনাথ।

মনটা খারাপ হয়ে আছে সেই থেকে। বিলুর সঙ্গে প্রীতমের বিয়ের সম্বন্ধ এনেছিল পিসীমাই। কিন্তু প্রীতমের মতো সাদা সরল ভাল মানুষের সঙ্গে বিলুর মতো বারমুখো মেয়ের যে মিল হয় না সেটা প্রথম থেকেই বুঝেছিল দীপ। কিছু বলেনি তবু। গরমিল কতটা হয়েছিল তা হিসেব করার অবশ্য অবসর হল না। তার আগেই, জীবনের শুরুতেই আস্তে আস্তে নিভে যাচ্ছে প্রীতম। এখনো একবার শিলিগুড়িতে আসার জন্য সে ছটফট

করে। কিন্তু বিলু আসতে দেয় না। শেষ চেষ্টা হিসেবে প্রীতমের এখন আকুপাংচার চলছে। একটি উন্নতি হয়তো দেখা যাচ্ছে, কিন্তু সেটুকুর ওপর ভরসা রাখতে ভয় পায় সবাই।

দীপ আর একবার লাউঞ্জে ঢুকে খোঁজ নিল বোস সাহেবদের কতদূর। যদি এয়ারলাইনসের গাড়ি ছেড়ে যায় তবে তাকে বোসের সঙ্গে অ্যাম্বাসাডারেই যেতে হবে। কিন্তু এখন কিছুটা সময় সে বোসের সঙ্গে এড়িয়ে চলতে চায়। সঙ্গে গেলেই হাজারো কথার জবাব দিতে হবে। একা থাকলে মুখ বুজে কিছুক্ষণ চিন্তা করার অবকাশ পাবে সে।

রিসেপশনিস্ট বোসের ঘরে ফোন করল। তারপর দীপনাথকে বলল, আপনি মালপত্র নিয়ে এয়ারলাইনসের গাড়িতেই চলে যান। দীপনাথ একটা শ্বাস ছাড়ল। তাহলে বোধহয় দাম্পত্য ঝগড়া মিটেছে। সে কিছুক্ষণ একা হতে পারবে।

বস্তুত হোটেলের রিসেপশনিস্ট থেকে এয়ারলাইনসের কর্মচারী পর্যন্ত সবাই দীপনাথের চেনা। কারণ বোসের টিকিট কাটা, হোটেল বুক করা, গাড়ি ভাড়া করা থেকে যাবতীয় অনভিপ্রেত কাজ তাকেই করতে হয়।

দীপনাথ এয়ারলাইনসের অফিসের দিকে আসতে আসতেই দেখল এয়ারলাইনসের গাড়ি ছেড়ে গेट দিয়ে বেরিয়ে যাচ্ছে। দীপনাথ 'দন্ত ! দন্ত !' বলে দু হাত তুলে চৈচাতে চৈচাতে দৌড়োতে লাগল। যেন তাঁর সর্বস্ব চলে যাচ্ছে।

দন্ত বোধহয় গাড়ির আয়নায় দেখতে পেয়েছিল তাকে। চেনা লোক। জানালা দিয়ে মুখ বাব করে পিছু ফিবে হাসল। তারপর গাড়িটা ধীরে ধীরে ব্যাক করিয়ে আনল।

দন্তর চোখে গগলস, মুখখানা দারুণ সুন্দর। দুদান্ত স্মাট ছেলে। বলল, আমি তো আপনাকে এতক্ষণ খুঁজছিলাম। উঠে পড়ুন।

দীপনাথ লাউঞ্জে ঢুকে প্রকাণ্ড ভারী সুটকেসগুলো প্রায় ছেঁচড়ে নিয়ে এল নিজেই। এটুকু পরিশ্রমেই হাফাচ্ছিল। দন্ত বিরক্ত গলায় পোর্টারদের হাঁক দিয়ে বলল, ক্যা দেখ রহে হো ? সাবকা মাল উঠা দো।

দীপনাথের কাছে একস্ট্রা খরচের পয়সা নেই। অন্য দিন থাকে। আজ নেই। স্বামী-স্ত্রীর ঝগড়া হওয়ার পর থেকেই বোস গোমরামুখো হয়ে আছে, অনেক কিছু করণীয় কাজও করছে না। কাজেই পোর্টারদের মাল তোলার ব্যাপারে একটু ভয় খেল দীপ। টিপস দিতে হবে নিজের গাঁট থেকে।

গতকাল পিসীর বাড়ি যাওয়ার সময় দশ টাকার মিষ্টি নিয়ে গিয়েছিল। দীপের কাছে আজকাল দশ টাকা মানে অনেক টাকা। সে যে ফুরনের কাজ করে তা তো কেউ জানে না। পিসতুতো ভাইরা বা পিসেমশাই জানে, সে একটা বড় ফার্মের ব্রাঞ্চ ম্যানেজারের সেক্রেটারি। গালভরা কথা।

পোর্টারদের অবশ্য ঠেকাতে পারল না দীপ। তারা হাতাহাতি করে মালগুলো বাসের পিছনে তুলে দিল ফটাফট। চোখ বুজে তিনটে টাকা দিয়ে দিতে হল। এয়ারলাইনসের কুলিভাড়া সাজঘাতিক। এক পীস মালে এক টাকা।

বাসে কুল্লো দশ পনেরোজন যাত্রী। তার মধ্যেও তিন-চারজন এয়ারলাইনসেরই লোক। বাস ছাড়বার আগে কেতাদুরস্ত দন্ত হাসিমুখে এগিয়ে এসে বাসের টিকিট দেয়। চারটে টাকা। দীপনাথ চোখ বুজে টাকাটা দিল। এসব খরচের হিসেব দিয়ে বিল করলে টাকাটা সে পেয়ে যাবে ঠিকই। কিন্তু এসব ছোটোখাটো হিসেব বিল করতে তার লজ্জা করে।

জানালা ধারে বসে বাইরে চেয়ে থাকে দীপ। সামান্য একটা কুয়াশার ভাপ উঠে কাঞ্চনজঙ্ঘা আবছা হয়েছে। প্রচণ্ড ঠাণ্ডা বাতাস চলন্ত বাসের জানালা দিয়ে এসে এফোঁড় ওফোঁড় করছিল তাকে। তবু জানালাটা বন্ধ করল না দীপ। এই জায়গার বাতাসটাও তার প্রিয়। এই জায়গা প্রিয় প্রীতমেরও। প্রীতম কি শেষ হয়ে যাওয়ার আগে কোনোদিন ফিরে আসতে পারবে এখানে?

বহুকাল আগে হাকিমপাড়ার কাঁচা নর্দমার ধারে তার হাতে ঘুষি খেয়ে মুখ খুবড়ে পড়েছিল প্রীতম। বয়সে কয়েক বছরের ছোটো ছিল প্রীতম। রোগা এবং দুর্বল। কী নিয়ে ঝগড়া হয়েছিল তাদের তা আজ মনে নেই। শুধু মনে আছে মাটিতে পড়ে প্রীতমের প্রাণান্তকর চৈতানি। অসহায় আক্রোশে প্রীতম কাঁদতে কাঁদতে তাকে বলছিল, তুই আমার বাঁ হাতটা খা, আমার বাঁ পাটা খা। প্রীতম খারাপ গালাগাল জানত না। কোনোদিন সে 'শালা' কথাটাও বলেনি। তাদের পারিবারিক শিক্ষাই তার জিভকে শুদ্ধ রেখেছিল। কিন্তু সেদিন প্রীতমের সেই গালাগাল শুনে হেসে বাঁচেনি দীপ। ও কি একটা গালাগাল হল? বাঁ হাত খা! বাঁ-পা খা!

আজ বহুকাল পরে সেই কথা মনে পড়ায় চোখে জল আসছিল দীপের। নাকি ঠাণ্ডা বাতাস লেগে চোখ জলে ভরে আসছে। একজন দয়ালু যাত্রী পিছন থেকে হাত বাড়িয়ে জানালার কাচটা টেনে বন্ধ করে দিল। দীপ আর কাচটা খুলল না। দত্ত প্রায় এরোপ্লেনের মতোই জোর গতিতে গাড়িটা উড়িয়ে নিয়ে যাচ্ছে। এত বাতাস সহিবে না।

এয়ারপোর্টে নামতেই আবার ব্যস্ততা। দার্জিলিঙে ববফ পড়ছে এবার। প্রচণ্ড শীতে মুহাম্মান উত্তরবঙ্গ। এয়ারপোর্টে ভীড় তাই তেমন নয়। সে মালপত্র ওজন করাল, কেবিন টিকিট নিল। প্লেনে মাত্র একটি সারিতেই রয়েছে দুটো সীট। সাধারণত বোস সস্ত্রীক সেই দুটো সীটেই জায়গা নেয়। কিন্তু মালপত্র ওজন করানোর সময় দীপের হঠাৎ মনে পড়েছে গ্যাংটকে দেড় হাজার টাকার কেনা কাপেটিটা মালপত্রের সঙ্গে নেই। এয়ারলাইনসের অফিসে ফোন করে জানল যে, সেটা লাউঞ্জের পড়ে নেই। মহার্ঘ কাপেটিটার গতি কী হল তা বুঝতে পারছিল না দীপ। ঝগড়ার মূলেও সেটাই। কাপেটিটা ভাঁজ করে স্যুটকেস বা বেডিংয়েও ঢুকবে না। ঢুকলেও তা টের পেত দীপ। কারণ এই বেডিং বা স্যুটকেস তাকে বহুবার গোছাতে হয়েছে। তাই সে আন্দাজ করল কাপেটিটা ওরা সঙ্গে নিচ্ছে না। রাগ করে হয়তো ফেলে রেখেই যাচ্ছে। তার মানে, ওদের ঝগড়া মেটেনি। তাই যদি হয় তবে দুই আসনের সারিতে ওরা কিছুতেই পাশাপাশি বসবে না। দীপকে হয় বোস বা শ্রীমতী বোসের সঙ্গে বসতে হবে।

বোসরা এখনো আসেনি। লাউডস্পীকারে জানান দিচ্ছে, প্লেন আসতে দেবী হবে। কলকাতা থেকেই ছাড়বে পঁয়তাল্লিশ মিনিট দেবীতে। একটু বিরক্ত হয় দীপ। এই পঁয়তাল্লিশ মিনিট বেড়ে বেড়ে শেষ পর্যন্ত দু'ঘণ্টায় দাঁড়াতে পারে। এই অভিজ্ঞতা তার আছে। তার খুব ইচ্ছে আজ কলকাতায় ফিরেই প্রীতমকে দেখতে যায়। অবশ্য বোস যদি সময়মতো তাকে অব্যাহতি দেয়।

দীপ এক কাপ কফি খাবে বলে রেস্টুরেন্টে ঢুকল। বেশ কয়েকজন সাহেব-মেম বসে বীয়ার খাচ্ছে। সামনের দিকে কয়েকজন সাহেব-মেমের খুব জটলা আর উঁচু গলার কথা শোনা যাচ্ছিল। তাদের মাঝখানে একজন শ্রীট নেপালী দাঁড়িয়ে। তার গায়ে বিদেশী জার্কিন, পরনে কর্ডের প্যান্ট, চোখে গগলস। প্রথমটায় চিনতে পারেনি দীপ। একবার তাকিয়েই চোখ ফিরিয়ে নিয়েছিল। কফি এলে গভীর তৃপ্তিতে চুমুক দিল সে। কিন্তু মনটা

খচ খচ করছে। আবার তাকাল এবং সঙ্গে সঙ্গে সমস্ত স্মৃতি মথিত করে উঠে এল পরিচয়। তেনজিং নোরকে !

তেনজিং যখন এভারেস্টে উঠেছিল তখন দীপ বোধহয় স্কুলের বেশ নীচু ক্লাসে পড়ে। শিলিগুড়িতে সে বছর তেনজিংকে দেখেছে। দুটি কিশোরী মেয়েকে নিয়ে তেনজিংকে তখন চারদিকে সংবর্ধনা নিতে ছুটেতে হচ্ছে। জন্মগত বিনয় ও অহংকারহীনতা তেনজিংকে ভারী জনপ্রিয় করেছিল। আজও তাকিয়ে সে তেনজিং-এর মুখে সেই সরল হাসি দেখতে পায়। এই লোকটা এক মস্ত পাহাড়ে উঠেছিল। দীপ কোনোদিন সেইসব দুরারোহ পাহাড়ে উঠবে না। তার গতি নীচের দিকে। নীচের দিকে।

সমস্ত কৈশোরকাল তার সমস্ত রং আর গন্ধ নিয়ে ঘিরে ধরে দীপকে। সে উঠে কোটের পকেট থেকে ছোটো নোটবই আর ডটপেন বের করে এগিয়ে যায়। সাহেব-মেমেরা রাস্তা দিল। সোজা গিয়ে তেনজিংয়ের সামনে, খুব কাছাকাছি দাঁড়ায় দীপ। হাত বাড়াতেই তেনজিং শক্ত পাঞ্জায় চেপে ধরে তার হাত। এ লোকটা পাহাড়ে উঠেছিল। খুব উঁচু, একা মহং এক শুভ্র পাহাড়ে। বাঁ হাতের নোটবইটা বাড়িয়ে যখন দীপ বলল, 'অটোগ্রাফ প্লীজ' তখনই বুঝতে পারল রুদ্ধ আবেগে তার গলা বসে গেছে।

তেনজিং খুব বিনয়ের সঙ্গে সই দিয়ে দেয়। কিছু বলার ছিল না দীপের। সে ফের এসে টেবিলে বসে। কফি ঠাণ্ডা হয়ে এসেছে। সে এক চুমুকে সেটা খায়। নোটবইটা খুলে একবার সইটা দেখে। এইভাবে সই নেওয়ার অভ্যাস তার কোনোকালে নেই। তেনজিং বিখ্যাত মানুষ বলেও নয়। কেবল সেই শৈশবের দারুণ সুন্দর স্মৃতি আর পাহাড়ে ওঠার এক অসম্ভব স্বপ্নই তাকে এই কাজে প্ররোচিত করেছে। পাহাড়ের মতো সুন্দর আর কী আছে পৃথিবীতে? কে আছে তাব মতো সুখী যে পাহাড়ে ওঠে?

একদিন দীপ তাব সব কাজকর্ম ফেলে বেখে একা বেড়িয়ে পড়বে। হাঁটতে হাঁটতে চলে যাবে কোনো মস্ত দুরাবোহ পাহাড়ের পাদদেশে। তারপর শুরু করবে তার ধীর ও কষ্টকর আরোহণ। কোনোদিনই শীর্ষে পৌঁছাবে না সে। অনাহারে, শীতে, পথশ্রমে একদিন ঢলে পড়বে পাহাড়েরই কোলে। বড় একা, নিঃসঙ্গ মৃত্যু ঘটবে তার। কিন্তু বড় সুখী হবে সে।

আচমকাই বোস কাচের দবজা ঠেলে হনহন করে তার টেবিলে চলে এল। একা। বসেই বলল, বীয়াব চলবে ?

না। দীপ স্বপ্নভঙ্গের পব কিছুটা নরম স্ববে বলে। তারপর ভদ্রভাবে জিজ্ঞেস করে, মিসেস বোস কোথায় ?

বোস তার বীয়ারের অর্ডার দিয়ে বলে, স্টলে বোধহয় কিছু কিনছে। শী ইজ অলওয়েজ বায়িং অ্যাণ্ড বায়িং। হেল।

গোস ছ ফুটের ওপব লম্বা। কিন্তু চেহারাটা শক্তিমানেব নয়। বরং খানিকটা ভুঁড়ি এবং যথেষ্ট চর্বিওলা দশাসই চেহারাটা দেখলে একটু মায়াই হয়। মনে হয় এত বড়সড় চেহারাটা টানছে কি কবে লোকটা? বোসের বয়স দীপের মতোই ত্রিশ পেরোনো। অর্থাৎ যথেষ্ট যুবক। তবু আরাম আমোদ এবং উচ্ছৃঙ্খলতার দকন তার চুলে পাক ধরেছে, চোখের দৃষ্টিতে একটা ঘোলাটে ভাব এসেছে। লোকটা প্রচণ্ড অহংকারী। হালকা শেপারব্যাক ছাড়া আর কিছু পড়ে না বলে ওর মানসিকতাও এক জায়গায় থেমে আছে।

টৌ করে বীয়ারের গ্লাস শেষ করে বোস। তারপর বলে, প্লেন লেট শুনছি!

হ্যাঁ। পঁয়তাল্লিশ মিনিট বলছে। তবে বেশীও হতে পারে।

বোস অন্য দিকে চেয়ে থাকে ভূঁ কুঁচকে বলে, আপনি দমদমে নেমে ওকে বাড়ি পৌঁছে

দিয়ে যাবেন। আমি অফিস হয়ে যাবো।

দীপ স্বস্তির শ্বাস ছাড়লো। মিসেস বোসকে বাড়ি পৌঁছে দিয়েও সে প্রীতমের কাছে যাওয়ার যথেষ্ট সময় পাবে।

রেস্টুরেন্ট থেকে লাউঞ্জে ঢুকবার আগে পকেট থেকে এম্বার্কেশন কার্ডগুলো বের করে ব্রু কঁচকে খানিকক্ষণ দেখে দীপ। সমস্যা একটা থেকেই যাচ্ছে। দুটো সীট পাশাপাশি, একটা আলাদা। ভাবসাব দেখে মনে হচ্ছে বোস এবং তার বউ কিছুতেই পাশাপাশি বসবে না। সেক্ষেত্রে তাকে হয় বোস বা তার বউয়ের সঙ্গে বসতে হবে। একা চুপচাপ বসে কিছুক্ষণ আপনমনে থাকার কোনো আশাই নেই।

লাউঞ্জে খুব একটা ভীড় নেই। সব মিলিয়ে ষাট সন্তরজন লোক হবে। বড়সড় বোয়িং ৭৩৭ বিমানটি আজ ফাঁকই যাবে। তবু একা আলাদা বসার কোনো সুযোগই পাবে না দীপ। ভেবে তাব মনটা ভার লাগছিল। ক্লিছুই নয়, মাত্র পঁয়তাল্লিশ মিনিট সময়, তবু ঐ সময়টুকু নিজের জন্য চুরি করার যেন বড় প্রয়োজন ছিল। প্লেনটা যখন উঠবে তখন কয়েক পলক এক অসম্ভব অবিশ্বাস্য অ্যাপ্সেল থেকে সে আর একবার প্রাণমন ভরে দেখে নেবে কাঞ্চনজঙ্ঘাকে। দেখবে বিপুল কালো শরীরের মহিষাসুর পাহাড়গুলিকে। তারপর চোখ বুজে পাহাড়ের কথা ভাববে বাকিটা সময়।

ওপাশের স্টলে কয়েকজন দাঁড়িয়ে। পিছন থেকেও নির্ভুলভাবে মিসেস বোসকে চিনতে পাবে দীপ। ইদানীং তদ্রমহিলা কিছু উগ্র হয়েছেন। পরনে তোলা প্যান্ট এবং গায়ে খুব আঁটোসাঁটো একটা লাল পুলওভার। গলায় জড়ানো কালো নকশাদার একটা স্কার্ফ। বব চুলের ওপর একটা মস্ত বেতের টুপি। কাছাকাছি এগিয়ে যেতেই একটা অসম্ভব সুন্দর সুগন্ধ পায় দীপ। গন্ধটা মোহাচ্ছন্ন করে ফেলার ক্ষমতা বাথে।

মিসেস বোস চকোলেট থেকে পেপারবাক্স পর্যন্ত বিস্তার জিনিস ইতিমধ্যেই কিনে ফেলেছেন। হাতের মস্ত হাতব্যাগটা খুলে অত্যন্ত অসাবধানে এবং অগোছালো হাতে অন্তত গোটা কুড়ি পঁচিশ একশ টাকার নোট এক খামচায় বের করে এনে দাম দেওয়ার চেষ্টা করছিলেন। কিন্তু টাকাগুলো গোছানো অবস্থায় ছিল না বলে দীপ একটা নোট পড়ে গেল মেঝেয়। মিসেস বোস নীচু হয়ে কুড়োতে যাচ্ছিলেন, দীপ তা করতে দিল না। অত্যন্ত স্মার্ট ভঙ্গীতে নিজেই কুড়িয়ে দিল। নীচু অবস্থায় খুবই কাছাকাছি হল দুজনের মুখ। মিসেস বোস বললেন, থ্যাংক ইউ।

দীপ সোজা হয়ে দাঁড়িয়ে খুব দয়ালু হাতে মিসেস বোসের নোটগুলো সাজিয়ে ভাঁজ করে দেয় এবং বলে, প্লেন লেট। কফি খাওয়ার সময় আছে।

আমি এখন খাবো না। ঐ গরিলাটা আগে বেরোক তারপর দেখা যাবে।

মিসেস বোস লম্বায় প্রায় সাড়ে পাঁচ ফুট। অর্থাৎ দীপের চেয়ে মাত্র ইঞ্চি তিনেক খাটো, বংটা তেমন পরিষ্কার নয়, কিন্তু ভারী ঢলঢলে আত্মদী এবং সুশ্রী চেহারা। বয়স নিতান্তই কম বলে একটা সতেজ আভা শরীর থেকে বিকীর্ণ হয়। দীপ জানে মিসেস বোসের অনেকগুলো মারাত্মক দোষ আছে, কিন্তু গুণের মধ্যে এই সতেজ ভাবটুকু অবশ্যই ধরতে হবে। যতবারই সে এই মেয়েটির কাছাকাছি হয় ততবারই তার অনুভূতি হতে থাকে, হাতের নাগালে একটা সামাজিক হাই ভোল্টেজ বৈদ্যুতিক তার দুলছে। ঝুলেই ছাঁত করে মেঝে দেবে। দীপ তার নিজের শ্বাসের পরিবর্তন টের পায়। শ্বাস কিছু গাড় ও ঘন এখন। সে বলল, উনি এখনই বেরোবেন বলে মনে হয় না, বীয়ার নিয়ে বসেছেন। কিন্তু রেস্টুরেন্টে একজন খুব ইণ্টারেস্টিং লোক রয়েছে। তেনজিং নোরকে। দেখবেন তাঁকে?

দ্যাট এভারেস্ট হিরো ? ওঃ, ওকে আমি দেখেছি। বলে মিসেস বোস তার মস্ত হাতব্যাগটা খুলে কেনা জিনিসগুলো ভরবার চেষ্টা করতে থাকেন। স্বভাবতই দীপকে হাত লাগাতে হয়। মিসেস বোসের হাতব্যাগে জিনিস ভরে দিতে দিতে সে আনমনে তেনজিং-এর কথা ভাবছিল। বহু বছর আগে পৃথিবীর উচ্চতম পর্বতে উঠেছিল লোকটা। আজ পরের প্রজন্মের ছেলেমেয়েরা ব্যাপারটাকে অতটা গুরুত্ব দিয়ে দেখছে না। তেনজিং-এর পর এভারেস্টে আরো অনেকে উঠেছে। কে তেনজিং-এর কথা অত করে মনে রাখবে ? এভারেস্টের সেই মহিমাও তো আর নেই।

মিসেস বোস লাউঞ্জের একটা চেয়ারে বসে বলেন, এর আগের বার যখন এসেছিলাম, মনে আছে ? আমাদের সঙ্গে প্লেনে বিশ্বের তিন-চার জন ফিলমস্টার ছিল ? শিলিগুড়ির কোন ফাংশনে আসছিল যেন !

দীপ পাশের চেয়ারটা ফাঁক রেখে পরের চেয়ারটায় বসেছে। বলল, শিলিগুড়িতে ওরা প্রায়ই আসে। এখানে বছরে দশ বারোটা ফাংশন হয়। কলকাতায় চেয়েও বিশ্বের ফিলমস্টারবা শিলিগুড়িতে বেশী আসে।

ও। তাহলে এবার তারা নেই কেন ?

এবারও আছে। তিলক ময়দানে বিরাট ফাংশন হচ্ছে।

ইস, তাহলে আর একদিন থেকে গেলে হত।

মিস্টার বোসকে বলুন না !

ঠোঁটটা খুব তাচ্ছিল্যের ভঙ্গীতে উল্টে মিসেস বোস বলে, ওকে বলতে বয়ে গেছে। অদ্ভুত আনসোশ্যাল লোক একটা। আপনিই দেখলাম ওর সঙ্গে মানিয়ে চলতে পারেন, আমার তো আড্ডাস্ট করতে ভীষণ অসুবিধে হয়।

দীপ খুব উদার গলায় বলে, কেন, মিস্টার বোস তো বেশ লোক।

মিসেস বোস চকোলেট বারের রাংতা খুলতে খুলতে বলেন, পুরুষদের কাছে পুরুষরা তো ভাল হবেই। খারাপ যত মেয়েরা।

ঠিক তা বলিনি, দীপ একটু দ্বিধার ভাব দেখায়।

মিসেস বোস টুকুস করে এক টুকরো চকোলেট দাঁতে কেটে বলেন, পুরুষদের আসল চেহারা বোঝা যায় বেডরুমে। বাইরে সে যত বড় একজিকিউটিভই হোক না কেন, বেডরুমে তার মুখোশ খুলে যায়। বাইরের লোক তো সেটা দেখতে পায় না।

কথাটা হয়তো ঠিকই। দীপ তাই এই বিপজ্জনক প্রসঙ্গ আর ঘাঁটে না। চুপ করে থাকে। বোসের অল্পবয়সী সুন্দরী স্ত্রীটি চকাস-টকাস শব্দ করে চকোলেট খান বটে, কিন্তু তাঁর মুখ দেখে বোঝা যায় চকোলেটের স্বাদ উনি একটুও উপভোগ করছেন না। ভদ্রমহিলার আসল ভূ বলতে কিছু নেই। লোমগুলো খুবই নিপুণভাবে উপড়ে ফেলা হয়েছে। কপালের দিকে উঁচু করে কৃত্রিম ভূ আঁকা। ফলে চোখের ওপরে অনেকটা মাংসের ডেলা বেরিয়ে আছে। কাছ থেকে দেখলে দৃশ্যটা তেমন সুন্দর নয়। যাহোক, মিসেস বোস এখন তাঁর আঁকা ভূ কুঁচকে খুব বিরক্তির সঙ্গে সামনের দিকে চেয়ে কিছু ভাবছেন। বোধ হয় মিস্টার বোস সম্পর্কে খুবই খাবার ধরনের কিছু কথা। দীপ একবার কাপেটিটার খোঁজ নেবে কি না ভাবল। কিন্তু জিজ্ঞেস করতে ঠিক সাহস পেল না।

লাউডস্পিকারে ফ্লাইট টু টুয়েন্টি টুর যাত্রীদের সিকিউরিটি এনক্লেজারে যেতে অনুরোধ জানানো হচ্ছে। অর্থাৎ প্লেন আর খুব বেশী দেরী করবে না। ঘোষণাটি খুব নিরুত্তাপ মুখে শুনলেন মিসেস বোস, কিন্তু নড়লেন না। অবশ্য তাড়াহুড়ো নেই, হাতে এখনো অটেল ২৮

সময় আছে ।

দীপ নিঃশব্দে উঠে গিয়ে বাইরে দাঁড়ায় । ওপাশের রানওয়ে দিয়ে পর পর এয়ারফোর্সের চারটে ন্যাট গৌঁ গৌঁ করে বিদ্যুতের গতিতে ছুটে উড়ে গেল । তারপর ফাঁকা রোদে মাথা মস্ত মাঠটা পড়ে রইল উদ্ভোম হয়ে । উত্তরে নীল বর্ণ বিশাল পাহাড়ের সারি । কাঞ্চনজঙ্ঘার রঙ ধূসর সাদাটে হয়ে আকাশের পিঙ্গলতায় প্রায় মিশে গেছে । তবু তার ভাঙাচোরা শীর্ষদেশের একপাশে একটা সমতল ধারে সোনালী রোদ ঝলকাচ্ছে আয়নার মতো । মুহূর্তে সব ভুলে গেল দীপ । তার ভিতর থেকে আর একজন দীপ বেরিয়ে গিয়ে আস্তে আস্তে পাহাড়ের দিকে দীর্ঘ চলা শুরু করল ।

একটা দীর্ঘশ্বাস ছাড়ে দীপ । পিঙ্গল আকাশে হঠাৎ রূপোলি প্লেনটা দেখা যায় । লাউডস্পিকারের শেষবারের মতো সিকিউরিটি চেক-এর জন্য যাত্রীদের ডাকা হচ্ছে । দীপ লাউঞ্জে এসে দেখে তার কীটবাগটা অন্যদরে পড়ে আছে চেয়ারের পাশে । মিসেস বা মিস্টার বোসকে দেখা যায় না । সে একবার রেস্টুরেন্টে উঁকি দিল । নেই । সিকিউরিটির বেড়া ডিঙিয়ে ওরা সামনের লাউঞ্জে চলে গেছে নিশ্চয়ই । নিশ্চিত হয়ে সে সিকিউরিটির কাঠের খাঁচায় গিয়ে ঢোকে ।

প্লেনে উঠে বোস আর তাব বউ একটু ইতস্তত করছিল । তারপর যা হওয়ার তাই হল । বোস গিয়ে আলাদা সীটে বসল । দীপকে বসতে হল মিসেসের পাশে । স্বভাবতই মিসেস বোস জানালা দখল করেছেন ।

যাত্রীর সংখ্যা খুবই কম । প্লেনের অর্ধেক সীটও ভরতি হয়নি । প্লেনের ভিতরে মৃদু সুবাস ভেসে বেড়াচ্ছে । লাউডস্পিকারে একঘেয়ে ঘোষণার শেষে নিয়মমাফিক মিউজিক বাজতে থাকে এবং খাবারের ট্রে হাতে আসে হোসটেস । ঠিক পয়তাল্লিশ মিনিটের মাথায় প্লেন নিয়মমাফিক নামবে দমদমে । এই একঘেয়েমি বহু হাত থেকে র্কটিং মুক্তি পায় মানুষ । এই যে কয়েক হাজার ফুট উঁচুতে আকাশের হৃদয়ে ঢুকে পড়া তা'মানুষ টেরই পায় না এইসব আধুনিক বিমানে । মিউজিক, এয়ার হোসটেস, খাবার, চা বা কফি, নরম কুশন ইত্যাদি দিয়ে কেবলই অনামনস্ক করে রাখা হয় যাত্রীদের । এক-আধবার নিয়ম ভেঙে প্লেনে আগুন লাগে ইঞ্জিন বিগড়ায়, আর তখন মৃত্যুভয়ে হিম হয়ে যায় মানুষ । কিংবা কখনো-সখনো বেপরোয়া কোনো হাইজ্যাকার বন্দুক বার করে প্লেনকে নিয়ে যায় কোন অচেনা দূর দূরান্তে । সে সব বিরল ঘটনা । নইলে দুনিয়াভর অধিকাংশ বিমানই নিয়ম মাফিক ওড়ে এবং নামে । নিয়ম ভেঙে আজ অন্তত একজন হাইজ্যাকার উঠে দাঁড়াক বন্দুক হাতে । বলুক, এ প্লেনকে সোজা নিয়ে চলো কাঞ্চনজঙ্ঘার দিকে ।

এক কাপ কফি ছাড়া দীপ আর কিছুই খেল না । কফি ভাল করে শেষ হওয়ার আগেই পায়ের নীচে চলে এল কলকাতা । দিগন্তে আর কোনো পাহাড়ের চিহ্নও রইল না ।

এয়ারপোর্টে বোসের বশংবদ ড্রাইভার সহ গাড়ি অপেক্ষা করছিল । কিন্তু গাড়িতেও ওরা স্বামী-স্ত্রী নিজেদের ঝগড়াকে জানান দিতে আলাদা বসে । সামনে বোস, পিছনে তার বউ আর দীপ । দীপের মাথা থেকে পাহাড় খসে গেছে, এমন কি বোসের বউয়ের গা থেকে আসা সুবাসটিও সে টের পাচ্ছে না ! টুলি থেকে লাগেজ বুটে মাল তোলার সময় সে লক্ষ করেছে মস্ত ফাইবার গ্লাসের বিদেশী স্যুটকেসটার একটা কজা ভাঙা । আজকাল প্লেনে মাল নেওয়াটাই আহাম্মকি । এয়ারপোর্টের পোর্টাররা দুমদাম করে সেগুলো আছড়ে ফেলে বা তোলে । কোনো -মায়াদম্মা দায়িত্ববোধ নেই । কজা ভাঙার জন্য সে দায়ী নয় বটে কিন্তু স্যুটকেসটা সারানোর দায়িত্ব তার ওপর পড়তে পারে ভেবে একটু তটস্থ বোধ করছিল

দীপ । এসব ছোটোখাটো জিনিস-লক্ষ করাই-আসলে তার কাজ । দীপ আজকাল ধরেই নিয়েছে, সে হল বোসের মোসাহেব, হেড চাকর, বাজার সরকার এবং স্বামী-স্ত্রীর মধ্যে সংযোগ রক্ষাকারী দালাল । তবু নিজের ওপর তেমন কোনো গভীর ঘেমা হয় না দীপের । কারণ সে জানে, একদিন এই সব তুচ্ছতা থেকে সে মুক্তি পাবে । যেদিন পাহাড় ডাকবে ।

বোস গণেশ অ্যাভেনিউয়ে অফিসের সামনে নেমে গেল ।

দীপ একবার ভাবল, সামনের সীটে গিয়ে বসবে । কিন্তু সেটা কেমন দেখাবে তা বুঝতে না পেলে তাব নড়তে চড়তে সাহস হচ্ছিল না । বোস নেমে যেতেই মিসেস বোস চাপা স্বরে বলেন, হামবাগ । কাজ না আরো কিছু । জাস্ট অ্যাভয়েড করার জন্য অফিসের নাম করে কেটে পড়ল ।

দীপ কথা বলে না । বলাব নেই । মাঝে মাঝে তাকে কেবল শুনে যেতে হয় । কলকাতায় পা দিয়েই বোসের বউ একটা মস্ত রোদ-চশমা চোখে দিয়েছেন । বাইরের দিকে চেয়ে থেকেই দীপকে উদ্দেশ্য করে বললেন, আপনার কি অন্য কোনো কাজ জোটে না, দীপনাথবাবু ? এ গরিলাটার সঙ্গে লেগে থেকে নিজের ফিউচারটা নষ্ট করছেন কেন ? হি উইল ডু নাথিং ফর ইউ ।

দীপ চালাক হয়েছে । সে জানে এসব দুর্বল মুহূর্তের সুযোগ নিয়ে মিস্টার বোস সম্পর্কে একটিও নিম্নের কথা তার বলা ঠিক হবে না । একদিন বোস আর তার বউ আমে দুধে মিশে যাবে, আব সেদিন এই নিম্নের কথা বাঁশ হয়ে ফিবে আসবে । তাই সে খুব উদাসভাবে বলে, বোস সাহেবের ওপর আপনি খুব চটেছেন । বেগে গিয়ে কাউকে ঠিক বিচার কবা চলে না ।

একটু অধৈর্যের গলায় মিসেস বলেন, প্লীজ ! আমার লাইফটা নষ্ট হয়েছে, আপনারটাও নষ্ট করবেন না ।

দীপ কাঁচুমাচু হয়ে বলে, আসলে দেশে চাকরির খুব একটা স্কোপও তো নেই দেখছেন ।

ওসব বাজে কথা । ভাববেন না যে, আমি একজন হামবাগ মানিসেন্ট্রিক একজিকিউটিভের স্ত্রী বলে কোনো খবর রাখি না । ইন ফ্যাক্ট আমি নিতান্ত মধ্যবিত্ত ঘরের মেয়ে । সোসাইটিতে কি হচ্ছে না হচ্ছে সব খবর রাখি । মাত্র কয়েক বছর আগেও আমি লেফটিস্ট ছিলাম, অ্যাকটিভ পলিটিকস করতাম ।

দীপ একটু অবাক হয়ে নতুন করে মিসেস বোসের দিকে তাকায় এবং কথাটা মিলিয়ে নেওয়ার চেষ্টা করে :

মিসেস বোসের রোদচশমাটির জন্য তেমন কিছু বুঝতে পারছিল না দীপ । খুব কৌতূকের সঙ্গে সে প্রশ্ন করে, এসব কথা কি মিস্টার বোস জেনেন ?

গেঁট উলটে মেয়েটা বলে, আমি ওকে কিছু বলিনি । জানলে জানে । আমি পরোয়া করি না । কিন্তু আমার প্রশ্ন, আপনি এভাবে ওর সঙ্গে লেগে আছেন কেন ? আফটার অল আপনার তো কাজের কিছু এক্সপেরিয়েন্স আছে বলে শুনেছি ।

দীপ মৃদু স্বরে বলে, আমি একটা কৌটো তৈরির কারখানায় কাজ কবতাম । টেকনিক্যাল কাজ নয়, অ্যাডমিনিস্ট্রেশনের । খুবই ছোটো লুজিং কনসার্ন । সেই অভিজ্ঞতার তেমন কোনো দামও নেই ।

মিসেস বোস খুব দৃঢ় স্বরে বলেন, টেকনিক্যাল নো হাউ-ই আসল জিনিস । যদি আপনি সেটা শিখে নিতেন তাহলে আজ এই গরিলাটাকে তোয়াজ করে চলতে হত না । আজকাল একটা সামান্য ইলেকট্রিক মিস্ত্রি বা থার্ড গ্রেড ছুতোয়ও বসে থাকে না । যে সামান্য তালাচাবি সারাতে পারে, ঝালা দেওয়ার কাজ জানে, ছুরি কাঁচি শান দেয় বা লেদ চালায়

ভারও কাজের অভূত নেই। একটুখানি টেকনিক্যাল কাজের জ্ঞান আর বেঁচে থাকার ইচ্ছে থাকলেই হল। আপনার কি কোনোটাই নেই ?

দীপ একটু হাসে। মাথা নেড়ে বলে, বেঁচে থাকার ইচ্ছেটা তো জৈব জিনিস। সেটা হাড়তে পারিনি বলেই এখনো মিস্টার বোসের সঙ্গে লেগে আছি।

কিন্তু তাতে বাঁচবেন না। ও নিজেই আমাকে অনেকবার বলেছে, দীপনাথ ইজ গুড ফর নাথিং। ওর উন্নতি করার ইচ্ছেটাই নেই। তার মানে ও আপনাকে অলরেডি কানসেল করে রেখেছে। আর আপনি যতটা মনে করেন ওর ততটা ক্ষমতাও নেই। গুজরাটীরা অত্যন্ত কানিং বিজনেসম্যান। তাই ওর হাতে রিক্রুটিং পাওয়ার তেমন কিছু দিয়ে রাখিনি। ব্রাঞ্চ ম্যানেজার কথাটা খুব গালভরা, কিন্তু পাওয়ার বলতে কিছু নেই, ডিসিশন বা পলিসি মেকিং নেই, অ্যাডভাইস দেওয়ার ক্ষমতা নেই। আপনি অনর্থক এখানে চাকরির আশা করছেন।

দীপ বোসের বউকে আর একটু ভাল করে দেখল। কম বয়স, বামপন্থী চিন্তাধারার অবশিষ্ট কিছু রেশ, কিছু আবেগ, স্বামীর ওপর রাগ এবং তার ওপর করুণা এই সব মিলিয়ে এ মেয়েটা এখন যা বলছে তা নিজেও বিশ্বাস করে না। দীপ এই সমাজকে খুব ভাল না চিনলেও খানিকটা বুঝে নিয়েছে। সে জানে মিস্টার বোস চাকরি দেওয়ার মালিক না হলেও তাঁর কথার দাম আছে। গুজরাটীরা ভাল ব্যবসায়ী বলেই বোসকে কখনো চটাবে না। বোস ইস্টার্ন জোনে কোম্পানির কোমরের জোর অনেকখানি এনে দিয়েছে। বোসের বউ সেটা স্বীকার করুক বা না করুক। সে তাই মৃদু স্বরে বলে, বোস সাহেবের ক্ষমতা নেই এমন কথা আপনাকে কে বলল ? কথাটা পুরোপুরি সত্য নয়। তাছাড়া নতুন করে টেকনিক্যাল নো হাউ শেখার বয়সও আমার নেই !

আপনার বয়স কত ?

ত্রিশের কিছু ওপরে। সঠিক হিসেব নেই, উইদিন থার্টিথ্রি।

ওটা কোন বয়স নয়। আপনি তো খুব ফিট দেখতে।

তবু বয়সটা ফ্যাক্টর। শেখার পক্ষে ফ্যাক্টর।

বাড়িতে কে কে আছে ?

অলমোস্ট কেউ না।

স্ত্রী ?

বিয়ে করিনি।

তাই বলুন। একটা বয়স পর্যন্ত বিয়ে না করে থাকলে পুরুষরা একটু স্ক্যাপাটে হয়ে যায়।

আমি কি স্ক্যাপাটে ?

নয়তো কী ? প্লেন থেকে নামবার সময় আমি লক্ষ করেছি আপনি মিস্টার বোসের অ্যাটাচি কেসটা হাত থেকে প্রায় কেড়ে নিলেন। আপনার আত্মমর্যাদাবোধ নেই কেন ? ওর অ্যাটাচি আপনি কেন বইবেন ?

দীপ খুব হাসে। হাসতে হাসতে বলে, আপনি মিস্টার বোসের ওপর খুব চটেছেন আজ ?

মিসেস বোস একটু চুপ করে থাকেন। কমনীয় মুখশ্রী এখন আর ততটা কমনীয় দেখাচ্ছে না। চোয়ালে যথেষ্ট দৃঢ়তা। খুব আস্তে করে বলেন, আই অ্যাম স্টিল ডেডিকেটেড টু মাই আইডিয়ালস। আমি কোনো বড়লোককেই সহ্য করতে পারি না।

বিশেষ করে ওর মতো হামবাগ স্নেহ একজিকিউটিভদের। আমি ওকে জাংকারপট করে ছাড়ব। আর কিছু না পারি ওর সমস্ত সেভিংসকে উড়িয়ে দেওয়ার পথ আমার খোল আছে। আমি ওকে ভিথিরি করে ছেড়ে দেবো।

দীপ টের পায় মিসেস বোসের কোমল অঙ্গ থেকে একটা অস্বাভাবিক তাপপ্রবাহ আসছে। ভারী অস্বস্তি বোধ করে সে। এবং খুবই ঠাণ্ডাভাবে বসে থাকে।

॥ চার ॥

এই শীতে অন্ধকার বারান্দায় মেয়েকে কোলে নিয়ে দাঁড়িয়ে আছে বিলু। গলি থেকে চোখ তুলে দৃশ্যটা দেখে দীপ। নিঃশ্বাস হয়ে দাঁড়িয়ে আছে বিলু, যেন কিছু দেখতে পাচ্ছে না, কিছু শুনতে পাচ্ছে না। ঘর থেকে আবছা আলোর আভাস এসে পড়েছে ওর গায়ে আবছা দেখাচ্ছে মুর্তিটা। দোতলার ঐ বারান্দায় উত্তরের বাতাস হু-হু করে বয়ে আসে বিলুর শীতবোধও কমে গেছে বৃষ্টি।

বিলু গলির আবছা আলোতেও দীপকে দেখতে পেয়েছিল ঠিকই। দীপ দোতলার সিঁড়ি ভেঙে উঠে আসতেই দরজা খুলে পর্দা সরিয়ে দেয় বিলু।

আজকাল বিলুব কথা কমে এসেছে খুব। দরজা খুলে একবার ক্লান্ত দৃষ্টিতে চেয়ে মুখ ফিরিয়ে নেয়। চলে যাচ্ছিল ভিতরের দিকে। দীপ বাইরের ঘরের সোফায় বসে জুতো ফিতে খুলতে খুলতে খুব সাবধানে মৃদু স্বরে বলল—এখন খুব হিম পড়ে। রাস্তাটাকে নিয়ে বারান্দায় যাস কেন?

বিলুর সঙ্গে সবাই আজকাল সতর্কভাবে কথা বলে। কখন বোমা ফাটবে তার কিছু ঠিক নেই। সামান্য কথাতেই কখনো খুব রেগে যায়, কখনো ফুপিয়ে কাঁদতে থাকে।

বিলুর চুল কক্ষ, ম্যাডম্যাডে হলুদ রঙের শাড়িটা রং-চটা ময়লা। গায়ের চামড়ায় খতি উডছে, ঠোঁট দুটো ভীষণ শুকিয়ে মামড়ি দেখা যাচ্ছে। দীপের কথার জবাব না দিয়ে ভিতরের ঘরে চলে গেল।

দীপ একটা ঠোঙায় মহার্ঘ কাঠ-বাদাম, কিছু মুসুখি আর আপেল এনেছে। কাঠ-বাদাম খুব ভালবাসে প্রীতম।

জুতো খুলে মেঝের দাঁড়াতেই মোজার ভিতর দিয়ে ডিসেম্বরের ঠাণ্ডা উঠে এল শরীরে এই কয়েকটা দিনই যা একটু শীত কলকাতায়। শীতের শিহরণটুকু শরীরে স্রোতের মতো বয়ে যেতেই মনের মধ্যে একটি দৃশ্যান্তর ঘটে গেল। মনে পড়ল, হাকিমপাড়ার মস্ত কাঁচ ড্রেনের পাশে দীপের হাতে অকারণে মার খেয়ে মাটিতে গড়াচ্ছে আর প্রাণপণে চেঁচিয়ে কাঁদছে। দীপের সমান গায়ের জোর ছিল না প্রীতমের, বয়সেও অনেকটা ছোটো। রাগে দুঃখে অপমানে উঠে দাঁড়িয়ে চোখ ভরা জল আর শরীর-ফেটে-পড়া রাগ নিয়ে প্রীতম চিৎকার করে দীপকে বলেছিল—আমার বাঁ হাতটা খা। আমার বাঁ পাটা খা। তখন খু হেসেছিল দীপ। আজকাল যতবার মনে পড়ে ততবার হাসির বদলে চোখে জল আসবে চায়।

দীপ ভিতরের ঘরের পর্দা সরাতেই দেখল, প্রীতম প্রাণপণ চেষ্টায় একা একাই উঠে লেপটা সরিয়ে পাজামা পরা পা দুটো খাট থেকে নামানোর চেষ্টা করছে। কাঠির মতো শুকিয়ে এসেছে পা, হাত দুটোও কমজোরী হয়ে আসছে ক্রমে। শরীরটা এখন ভারী বে-চপ দেখায়। আচমকা দেখলে লোকে ভাববে মানুষটা বঁচে আছে কি করে?

শুধু মুখটাতে এখনো অসুস্থতা স্পর্শ করেনি প্রীতমকে । চোখের দৃষ্টি এখনো সজীব । পা
ঝুলিয়ে স্বাভাবিক সুস্থ মানুষের মতো বসবার চেষ্টা করতে করতে প্রীতম তার ব্যথা-ভরা
সুন্দর মুখ-টেপা হাসিটা হাসে ।

টিনের চেয়ার বিছানার ধারটিতে টেনে নিয়ে বসে দীপ জিঞ্জেরস করে, আকুপাংচারের
তারিখ কবে ছিল ?

আজই । এই তো ঘণ্টা দুয়েক আগেই ফিরেছি আমরা ।

ডাক্তার কী বলল ?

ভাল । অনেক ইমপ্রুভমেন্ট হয়েছে । আজ ছাঁটা কি সাতটা ছুঁচ দিয়েছিল । তাই না বিলু ?
বলে বিলুর দিকে একবার ফিরে তাকানোর চেষ্টা করল প্রীতম । বিলু পিছন দিকে ড্রেসিং
টেবিলের সামনে দাঁড়িয়ে খুব দ্রুত তার রুম্ম চুলে চিরুনি চালাচ্ছিল । কিন্তু জটধরা চুলে
চিরুনি চলতে চাইছে না । বিলুর রাগের হাত জটসুদ্ধ চুল ছিড়ে আনছে মাথা থেকে ।
প্রীতমের কথার জবাব দিল না বিলু ।

প্রীতমের বালিশের পাশে ফলের ঠোঙটা রেখে দিয়েছিল দীপ । প্রীতম তার সরু
একখানা হাত বাড়িয়ে ঠোঙটা ঝুল, তৃপ্তির চোখে চেয়ে দেখল একটু । তারপর লাজুক
গলায় বলে—এসব এনেছো কেন ? আমি কি এখন আর আগের মতো খেতে পারি, বলো ।
আজ অরুণবাবুও ডাক্তারের কাছ থেকে আসার সময় একগাদা ফল কিনে আনলেন । কত
বারণ করলাম ।

বিলু ঘর থেকে চলে গেল রান্নাঘর আর ডাইনিং স্পেসের দিকে । খুব সতর্ক নীচু গলায়
দীপ জিঞ্জেরস করল—আজ কি তুই অরুণের সঙ্গে ডাক্তারের কাছে গিয়েছিলি ? বিলু সঙ্গে
যায়নি ?

প্রীতম মাথা নাড়ে । যায়নি । মুখে সেই অসম্ভব ভালমানুষের হাসি । দুটো হাতের পাতা
কোলের ওপর জড়ো করা । হাড়ের ওপর চামড়া বসে যাচ্ছে খাঁজে খাঁজে । আঙুলের গিট
জেগে উঠেছে, কংকালসার হয়ে যাচ্ছে হাতের পাতা । সেদিকে মস্তমস্তের মতো চেয়ে থাকে
প্রীতম । নিজের কররেখা দেখে । তারপর মুখ তুলে বলে—অরুণ বড় ভাল ছেলে । ও
এলে বাড়িটা জমজম করে । বিলুরও মনটা ভাল থাকে ।

এ কথায় দীপ খুব কুঁচ চোখে প্রীতমের মুখখানা দেখে । না, প্রীতমের মুখে কোনো ছায়া
নেই । দরজার ওপরে সাঁইবাবার একটা ছবি টাঙানো, সেই দিকে চেয়ে আছে ।

অরুণ হয়তো ভালই । তবে একটু আবেগহীন, বাস্তববাদী । প্রীতমের এই অসুখটা আজ
পর্যন্ত কোনো ডাক্তার ধরতে পারেনি ঠিক মতো । প্রথম দিকে একজন বড় ডাক্তার ভুল
চিকিৎসা করে রোগটাকে আরো গাড়িয়ে তোলে । পরে অন্যান্য ডাক্তার বিস্তর কসরৎ করার
পর হাল ছেড়ে দিয়ে বলেছে, এক ধরনের ইন্টারন্যাল ইনফেকশন । এ রোগের পরিণতি কী
হতে পারে তা তারা কেউ স্পষ্ট করে বলেনি । তবে বুঝে নেওয়া যায় সবার আগে সেটা
বুঝেছিল অরুণ । সে উপযাচকের মতোই প্রীতমকে বুঝিয়ে-সুঝিয়ে কোম্পানি থেকে
ডিসমিটারি রিটায়ার করাল । তাতে এক কাড়ি টাকা পেয়ে গেল প্রীতম । এল আই সি-র
একজন চেনা এজেন্টকে ধরে-করে অরুণ প্রীতমের একটা সম্ভর হাজার টাকার পলিসি
করিয়ে দিয়েছে । ব্যাংকে প্রীতমের অ্যাকাউন্টকে বিলুর সঙ্গে জয়েন্ট অ্যাকাউন্ট করিয়েছে ।
আত্মীয়-স্বজন যখন রোগ নির্ণয় এবং চিকিৎসার ব্যাপার নিয়ে মাথা ঘামাচ্ছে তখন ঠাণ্ডা
মাথায় এই জরুরী কাজগুলি সেরে রেখেছে অরুণ । সে লোক ভাল হতে পারে, তবে তার
মনে কোনো ভাবাবেগ নেই । পরোক্ষে সে কি প্রীতমকে তার পরিণতিটা জানিয়ে দিতে

সাহায্য করেনি ?

দীপ অন্য একটা কথাও মাঝে মাঝে ভাবে, অরুণ কি এসব প্রীতমের জন্যই করেছে ? কি বিলুর জন্য ? এখনো বিলু অরুণকে ডাকনামে বুধু বলে ডাকে। বিলুর পোশাকী না অনন্যা। অরুণ ওকে ডাকে অন্যা বলে। এই বুধু ও অন্যার রহস্য বিলুর দাদা হয়ে ভে কবতে চায় না দীপ।

দীপ ভাবে, প্রীতমের মনে যখন পাপ নেই তখন তার মনেই বা থাকবে কেন পাশের ডাইনিং স্পেসে অনেকক্ষণ ধরে সুরু গলায় লাবু ঝিয়ের কাছে কী একটা বায়ন করছিল। মেয়েটা এমনিতে মিষ্টি, ভীতু, ঠাণ্ডা, কিন্তু কখনো কখনো খুব ঘ্যানায়। আ যখনই ঘ্যানায় তখনই ধৈর্যহীন বিলু নির্মম হাতে মেরে মেয়েটাকে পাট-পাট করে দেয় বিলুর ভয়ে মেয়েটা সব সময়ে কেমন বিবর্ণ হয়ে থাকে। লাবুর সবচেয়ে বড় আশ্রয়টা সে গেছে। শরীরের কাবণেই বাবার কাছে আসা তার বারণ।

প্রীতম খুব উৎকর্ষ হয়ে মেয়ের গলার স্বর শোনে আর কিসের জন্য যেন অপেক্ষা করে আচমকাই পর্দার ওপাশে বিলুর চাপা গর্জন শোনা যায়, চূপ করলি অলঙ্ঘী মেয়ে ? গর্জনে সঙ্গে সঙ্গেই চটাস পটাস চড়-চাপড়ের শব্দ হতে থাকে। বিলুর শ্রান্ত গলা শোনা যায় আমাকে শেষ না করে ছাড়বি না তোরা ! প্রীতম কেমন কঁজো হয়ে চোখ বুজে সিটিং থাকে। যেন মারটা তার পিঠেই পড়ছে।

আরো মারের ভয়ে লাবু কঁদতে পারে না। কঁদা বারণ, বারণ না মানলে বিলু আরে মাববে। তাই প্রাণপণে কান্না চেপে রাখার চেষ্টায় ক্রমান্বয়ে হেঁচকি উঠছে লাবুর। পর্দা ওপাশ থেকে সেই হেঁচকির শব্দ এসে এ ঘরে হাতুড়ির ঘা মারে। প্রীতম বিবর্ণ মুখে চে থাকে দীপের দিকে। খুব চেষ্টা করে একটু হাসে। মাথা নেড়ে বলে, বিলুর দোষ নেই। পেবে উঠছে না। সারা দিন ঘরে আটকে থাকে, ওর মেজাজ খারাপ তো হতেই পারে

অজুহাতের দরকার ছিল না। দীপ সবই জানে। এও জানে লাবু হচ্ছে প্রীতমের প্রাণে প্রাণ। সেই লাবু পাশের ঘরে মার খেয়ে কঁদছে এটা শরীর বা মন দিয়ে কিছুতেই সহ কবতে পারছে না প্রীতম। কিন্তু এই একটা জায়গা ছাড়া প্রীতমেব আশ্চর্য সহনশীলতা কোনো তুলনা নেই। নিজের বোন হলেও বিলুকে কোনোদিন তেমন পছন্দ করে না দীপ ওর ধৈর্য বলতে কিছু নেই, অল্প কারণেই ভয়ংকর রেগে যায়, তা ছাড়া অলস, অগোছাটে এবং বেশ কিছুটা স্বার্থপর। অরুণের সঙ্গে ও বহুকাল ধরে একটা ব্যাখ্যাহীন রহস্যম সম্পর্ক বেখে চলেছে। এসব মিলিয়ে প্রীতমের বিবাহিত জীবনটা খুব সুখের নয় নিশ্চয়ই তবু প্রীতমকে কদাচিৎ দুঃখিত বা বিষন্ন দেখেছে দীপ।

বিলু ঘবে নেই, তাই ফাঁক বুঝে দীপ চাপা স্বরে জিজ্ঞেস কবে, শিলিগুড়িতে যার প্রীতম ?

প্রীতম উদাস চোখে তাকিয়ে বলে, গিয়ে কি হবে ?

তোর ইচ্ছে করে না যেতে ?

আগে করত : এখন ইচ্ছে-টিচ্ছে কিছু নেই। বিলু বলে, কলকাতা ছাড়া চিকিৎসা ভাব হবে না।

আমি আসার আগে শতমের সঙ্গে দেখা হয়েছিল।

ও। বলে চূপ করে থাকে প্রীতম। দীপের কথায় ওর মন নেই। পর্দার ওপাশ থেকে এখনো লাবুর হেঁচকি তোলার শব্দ আসছে। কান খাড়া করে সেই শব্দ শুনেছে প্রীতম। যে কিছুক্ষণ চূপ করে শুনে প্রীতম আস্তে করে বলল, আমি যে ভাল হয়ে উঠব এটা ওরা বিশ্বাস

করে না।

কারা ? দীপ অবাক হয়ে জিজ্ঞাস করে।

আমার বাড়ির সবাই। ওদের ধারণা আমি শিগগিরই মরে যাবো। তাই আমাকে শিলিগুড়িতে নিয়ে যেতে চায়। বিলুকে এরকম ধবনের চিঠিও লিখেছিল বাবা। আবার তুমিও শিলিগুড়ি যাওয়ার কথা বলছ।

দীপ একটু মুশকিলে পড়ে গিয়ে বলে, দূর বোকা ! তোব অসুখ সারবে না বলে শিলিগুড়ি যাওয়ার কথা বলেছি নাকি ? আসলে ওখানকার জলহাওয়া তো ভাল, আত্মীয়স্বজনদের কাছে মনটা ভাল থাকে।

খুব যেন অভিমানভরে মাথা নাড়ে প্রীতম। বলে, ওসব কথার কথা। আসলে তোমরা বিশ্বাসই করো না যে, আমি আর বেশীদিন বাঁচব।

প্রীতমকে এ ধরনের কথা কোনোদিন বলতে শোনেনি দীপ। তাই অবাক হয়ে কী বলবে ভেবে না পেয়ে চুপ করে থাকে। বিলু নিঃশব্দে ঘবে এসে দীপের হাতে এক কাপ চা দিয়ে চলে যায়।

ধীরে ধীরে প্রীতম শুয়ে চোখ বুজল।

দীপ চায়ে চুমুক দিয়েই হরিণঘাটার স্ট্যান্ডার্ড দুধের বোঁটকা গন্ধ পায় এবং মুখ বিকৃত করে। সে প্রাণপণে প্রীতমের অসহায়তা, তার বোগভোগের যন্ত্রণা, মৃত্যুচিন্তা এবং বেঁচে থাকার ইচ্ছার অহনিশ লড়াই, লাভুর প্রতি তার প্রগাঢ় ভালবাসা ইত্যাদি বুঝবাব চেষ্টা করত থাকে। ভাবতে গেলে প্রীতমের সমস্যার শেষ নেই। সবচেয়ে বড় সমস্যা হল, মরবার আগে প্রীতম কিছুতেই নিশ্চিন্তে জেনে যেতে পারবে না যে, বিলু শেষ পর্যন্ত বিধবা থাকবে, না কি অক্লণকে বিয়ে করে বসবে। যদি তাই হয় তবে লাভুর দশা কী হবে ! ভেবে-চিন্তে প্রীতমের জন্য এক বুক দুঃখ উথলে উঠছিল দীপের। তাই সে চায়ে দুধের বোঁটকা গন্ধটা আর তেমন টের পেল না।

পর্দা সরিয়ে মেয়ে কোলে বেবিয়ে এসে বিলু বলল, তুমি একটু বোসো মেজদা। আমি পাশের ফ্ল্যাট থেকে ঘুরে আসছি।

বিলু চলে যাওয়ার অনেকক্ষণ বাদে প্রীতম চোখ খুলে বলে, মেজদা, আমি খুব বেঁচে থাকার চেষ্টা করছি।

দীপ আত্মবিশ্বাসহীন গলায় বলে, তুই বাঁচবি নাই বা কেন ?

খুব কষ্টে প্রীতম উঠে বালিশে ঠেস দিয়ে বসে। বলে, এগুলো খুব বাজে ব্যাপার। এই অসুখ-টসুখ মোটেই ভাল জিনিস নয়। মন দুর্বল হয়ে যায়, মাথার ঠিক থাকে না। এই সময়ে তোমরা আমার কাছে এসে এমন কোনো কথা বোলো না যাতে মরবার কথা মনে হয়। আমি দিনের মধ্যে চব্বিশ ঘণ্টা বেঁচে থাকার চিন্তা করি। কাজটা সোজা নয়, তবু করি।

দীপ একটা ঢৌক গিলে বলে, আমি তোর অনেক ইমপ্রুভমেন্ট দেখছি প্রীতম।

প্রীতম বড় বড় চোখে চেয়ে বলে, ইচ্ছাশক্তিকে খুব কম জিনিস বলে মনে কোবো না। উইল পাওয়ার অনেক অঘটন ঘটাতে পারে।

নিশ্চয়ই। দীপ তেমনি আত্মবিশ্বাসহীন গলায় বলে।

আমি কখনো কাউকে বলিনি যে, আমি মরে গেলে লাভু আর বিলুকে দেখো। কেন বলব ? ওসব তো হাল ছেড়ে দেওয়ার কথা ! আমার তো মনে হয় না কখনো যে, আমি মরে যাবো !

সে কথা কেউই ভাবছে না। তুই অকারণে সবাইকে সন্দেহ করিস।

তবে বাড়ির লোক আমাকে শিলিগুড়ি নিয়ে যেতে চায় কেন? ওরা কি জানে না সেখানে কলকাতার মতো চিকিৎসা হবে না? এ কথাটা প্রীতম খুব আশ্বে করে গাঢ় স্বরে বলল। কোনো রাগ বা অভিমান নিয়ে নয়। নিষ্পলক কয়েক সেকেন্ড দীপের দিকে তাকিয়ে থেকে হঠাৎ কয়েক পদা নিচু স্বরে বলে, শোনো মেজদা, আমি শিলিগুড়ি গেলেও বিলু কিছুতেই যাবে না। শ্বশুরবাড়ির কাউকেই ও দু'চোখে দেখতে পারে না। জানো তো জানি।

কিন্তু আমি বিলুকে কলকাতায় একা রেখে যেতে ভয় পাই।

দীপ জুয়াড়ির মতো মুখের ভাব ঢেকে বাখার চেষ্টা করে বলে, কেন?

কেন তা আব বলল না প্রীতম। সামান্য একটু বিচিত্র সুন্দর হাসি হাসল মাত্র। দীপ জানে, মরে গেলেও কথাটা আব প্রীতমের মুখ দিয়ে বোনাবে না। ও কেবল সুন্দর করে হাসবে।

দীপ তাই চাপাচাপি না করে বলল, ইচ্ছে না হলে যাবি না। কেউ তো জোর করছে না।

তা ঠিক। তবে জোর কবছে আমার ভিতরের একটা ইচ্ছে। মাঝে মাঝে আমি ডানপাশের ঐ জানালাটা দিয়ে শিলিগুড়ির পাহাড় দেখতে পাই। প্রায় ডাকঘরের অমলেব অবস্থা। কিন্তু জানি শিলিগুড়িতে গেলে আমি আব বাঁচব না। চিকিৎসার অভাবে নয়, শিলিগুড়িতে গেলেই আমার মন নরম হয়ে গলে যাবে, ইচ্ছাব শক্তি যাবে কমে।

দূর পাগল!

প্রীতম হাসছেই। এতটুকু সিরিয়াস ভাব নেই মুখে, বিষণ্ণতাও নেই। যেন ঠাট্টা ইয়ার্কি করছে এমন ভাবে বলে, ওখানে গেলেই সেই ছেলেবেলায় সব কথা এসে ঘিবে ধরবে। সে ভারী সুখের ব্যাপার, কিন্তু ওগুলো মনকে দুর্বল করে দেয়। তার ওপর সকলে বুক বুক করে যত্ন-আত্তি শুরু করবে, সিমপ্যাথি দেখাবে। বাস অর্মান আমার লড়াইয়ের মনটাই যাবে নষ্ট হয়ে। এখানে তো তা নয়। এখানে প্রতি মুহূর্তেই কক্ষ বাস্তবতাব সঙ্গে লড়ে বেঁচে থাকতে হচ্ছে। কিন্তু এটাই আমার পক্ষে ভাল কেন জানো? আমাকে প্রতি মুহূর্তে জাগিয়ে রাখছে। সাবধান রাখছে, হাল ছাড়তে দিচ্ছে না, জেদ ধবিয়ে দিচ্ছে। যদি আমাকে বাঁচাতে চাও মেজদা কখনো শিলিগুড়ির কথা বোলো না।

দীপের স্বভাব হল যখনই কেউ কোনো কথা আন্তরিকভাবে বলে তখনই সে তা গভীরভাবে বিশ্বাস করে ফেলে। শিলিগুড়িতে গেলে প্রীতম কেন মরে যাবে তাব যুক্তিসিদ্ধ কারণ থাক বা না থাক দীপ তা বিশ্বাস করল এবং শিউবে উঠে বলল, না না ওসব আব বলব না প্রীতম। তোর যাওয়ার দরকার নেই।

কিছুক্ষণ চুপচাপ থাকে দুজন। প্রীতম তাব দুর্বল হাত চোখের সামনে ধরে চেয়ে থাকে, যেন আয়নায নিজের মুখ দেখছে। অনেকক্ষণ বাদে বলে, তুমি সিগারেট ছেড়ে দিয়েছে; না মেজদা?

দীপ একটু অবাক হয়ে বলে, হ্যাঁ। অনেকদিন।

বেশী দিন নয়। মাত্র দু তিন মাস বোধ হয়।

তাই হবে। দীপ বলে, কেন বল তো!

আগে তুমি অনেক সিগারেট খেতে। দিনে অন্তত চল্লিশটা।

ঈ। দীপ বুঝতে পারে না প্রীতম কী বলতে চায়।

অত সাম্প্রতিক নেশা ছাড়লে কি করে?

দীপ উদাস হয়ে বলে, ছেড়ে দিলাম।

কষ্ট হয়নি ?

খবর। ভীষণ কষ্ট হয়েছিল। পাগলের মতো লাগত।

প্রীতম তাব সুন্দর হাসিটা মুখে মেখে বলে, তোমার ভীষণ বোঝ আছে মেজদা।
মাজ্জাতিক রোখ।

দীপ স্নান একটু হাসে। ছিল, কোনোদিন তাব মতো একটু ইম্পাতের মিশেল ছিল।
একটু ছিল হয়তো বিলুর মাধোও। ছিল বড়দা মল্লিনাথেরও। কিন্তু দীপের ভিতরকার সেই
ইম্পাত জীর্ণ হয়ে গেছে আজকাল। বিকেলেই মিসেস বোস তাকে বলেছিলেন, আপনার
প্রাথম্যাদারোহ নেই কেন ?

প্রশ্নটা এখানে পাথরের মতো বকের ভিতরে ঝুলে আছে।

দীপ ছুটফুট করে উঠে বলে, বিলু কোথায় গেল বল তো।

পাশের ফ্ল্যাটের বাচ্চাটির আজ জন্মদিন। এফুর্নি এসে পড়বে। বোসো।

দীপ ঘড়ি দেখে। সাতটা। তাব কোথাও যাওয়ার নেই। এখান থেকে সে সোজা
মেসবাড়িতে ফিরে যাবে। কারো সঙ্গেই কোনো কথা বলবে না। চূপচাপ খেয়ে গিয়ে শুয়ে
পড়বে সিঙ্গল বেডের বিছানায়। জীবনে অনেককাল কিছু ঘটেনি।

সে উঠে দাঁড়ায়। বলে, না বে, অনেক ব্যত হয়ে গেল।

প্রীতম ককণ মুখ করে চেয়ে বলে, চলে যাবে ? ব্যত খেয়ে যাও না। মেসে তো
বঁচিবি খাবার খাও বোজ।

দীপ মাথা নেড়ে বলে, আজ নয়।

তুমি মাঝে মাঝে এসে আমাকে একটু জোব দিয়ে যেও। তোমার মনের জোরটা
আমাকে দিতে পারবে না ?

দীপ খুব গম্ভীর মুখে বলে, তোব মনের জোব আমার চেয়ে কিছু কম নয়। প্রীতম।

প্রীতম মুখ তুলে বলে, শোনো, শতম কলকাতায় এলে যেন আমার সঙ্গে দেখা না করে।
একে দেখলেই সেইসব পুরোনো কথা, মায়াটোয় এসে পড়ে আমার পক্ষে ওড়লো ভাল
য। ও যেন ভুল না বোঝে। ওকে বাবল করে দিও।

দীপ মাথা নেড়ে বলল, আচ্ছা।

প্রীতম এমন কাঙালের মতো চেয়ে আছে যে, দীপ চট করে মুখ ঘুরিয়ে চলে যেতে
পারছিল না। তার বড় মায়া, তার বড় ভালবাসা এই ছেলেটির প্রতি।

দীপ তাই নিঃশব্দে আবার বসে। বলে, মেজদা বা সোমনাথ তোকে দেখতে আসে ?

প্রীতম মাথা নেড়ে বলে, না। সোমনাথ একবার এসেছিল বর্ষদিন আগে। শ্রীনাথদা
আসেনি।

দীপ গম্ভীর হয়ে বলে, আসা উচিত ছিল।

প্রীতম ক্রান্ত স্বরে বলে, তুমি মাঝে মাঝে এসো, তাহলেই হবে। আর কেউ না এলেও
ক্ষতি নেই। বরং আত্মীয়দের আহা, উহু শুনলে আমার খাবার রি-অ্যাকশন হয়। সিমপ্যাথি
দেখানোর লোক আমি চাই না।

দীপ একটু হেসে বলে, তবে কী চাস ? সেই পুক বাজার মতো দাঁবের প্রতি বীরের
বাবহার ?

প্রীতম ক্ষীণ হাসে। বলে, ঠিক তাই।

দীপ শ্বাস ছেড়ে বলে, আমার রোখের কথা বলছিলি প্রীতম, কিন্তু তুই রোখা কিছু কম

নোস । তুই পারবি মনের জোরে এসব কাটিয়ে উঠতে ।

প্রীতম চুপ করে থাকে কিছুক্ষণ । তারপর বলে, শিলিগুড়িতে নয়, কিন্তু অন্য কোথাও গাছপালার মধ্যে, নদীর ধারে আমাকে কিছুদিন নিয়ে যেতে পারো না ? বিলুকে বলেছি, কিন্তু ও তেমন গা করে না । বলে, বাইরে চিকিৎসা হবে না ।

দীপ গম্ভীর হয়ে বলে, মেজদার ওখানে গিয়েই তো অনায়াসে থাকতে পারিস ।

শ্রীনাথদা ? ও বাবা, শ্রীনাথদার বউ ভারী কড়া লোক শুনি । সোমনাথ বিলুকে বলেছিল, বউদিই নাকি গুণ্ডা ভাড়া করে ওকে মার দিয়েছে ।

বাজে কথা । বউদি তেমন লোক নয় । বরং মেজদাই কিছু কাছাকাড়া লোক, তাই বউদি সম্প্রতি আগলে রাখে । তুই গেলে কত যত্ন করবে দেখিস ।

তুমি কখনো গেছ ওখানে ?

অনেকবার । বউদা তখন বেঁচে । আমি গেলেই মুগী কাটা হত । শ্রীনাথদার আমলেও গেছি । আবার সম্প্রতি বেড়েছে । ওরা বেশ ভাল আছে । তুই যাবি ?

প্রীতম স্নান মুখে বলে, কিন্তু ওরা না ডাকলে যাই কি করে ? বিলু চিঠি লিখেছিল, শ্রীনাথদা জবাব দেয়নি । এখানেই তো রোজ চাকরি কবতে আসে, একবার দেখাও তো কবতে আসতে পারত । সেধে যেচে যাওয়াটা কি ভাল দেখাবে ?

দীপ গভীর একটা দীর্ঘশ্বাস ছাড়ল ! ভাই কত পব হয়ে যায় । বন্ধের সম্পর্ক কথাটাই কি তাহলে এক বিকট ভুল ?

মনটা খারাপ ছিলই তার । আবার একটু খারাপ হল মাত্র ।

॥ পাঁচ ॥

তুষা বিছানা ছাড়ে শেষ বাত্রে । শীতকাল বলে এখন ঘুটঘুটি অন্ধকার থাকে । আকাশভরা জমকালো তাবার ঝিকিমিকি । কখনোসখনো ক্ষয়ি চাঁদের ফ্যাকাসে জ্যোৎস্নাও । পাখি ডাকে কি ডাকে না । এত নিঃশব্দ যে, নিজের শ্বাস বা হৃৎপিণ্ডের শব্দ স্পষ্ট শোনা যায় ।

বন্দা ঘরের দবজা জানালা খুলে ঘব আব বাবান্দা ঝটিতে থাকে আর গুন গুন করে প্রভাতী গায়—ভজ গৌরাস্ক কহ গৌরাস্ক, লহ গৌরাস্কের নাম রে... । এমন পাষণ্ড কে আছে যার ভোরবেলার ছাঁকা নির্জনতায় ঐ আপনভোলা নদীর মতো বয়ে যাওয়া সুরের প্রভাতী ভাল না লাগবে । যার ভক্তি নেই সেও ঐ গান শুনে মাঝে মাঝে প্রশ্নের সামনে দাঁড়ায় । তুষার কোনোকালে ভক্তি ছিল না, আজকাল হয়েছে কি একটু !

তামাক দিয়ে দাঁত মাজতে মাজতে তুষা কলঘরে চলে যায় । প্রাতঃকৃত্য সেরে এই মারুনে শীতে লোহার মতো ঠাণ্ডা জলে আকণ্ঠ স্নান করে সে । তামাকের ধ্বক ঐ স্নান পর্যন্ত গলায় আটকে থাকে তার । স্নান করতে করতেই শুনতে পায় বাগানে ফুলচোরদের আনাগোনার শব্দ । নিচু দেয়াল উপক্কে লাফিয়ে নামছে ছোটো ছোটো পা, ফুল ছিঁড়ে পুট পুট কবে, চাপা গলার কথা । কুয়ার ধাবে স্থলপদ্ম গাছটার ওপরেই ওদের নজর বেশী ।

এই ভোরবেলায় মনে কোনো রাগ সহজে ওঠে না । তুষা কান পেতে শোনে একটু । বাড়িবাড়ি টের পেলে গম্ভীর গলাটা একটু উঁচুতে তুলে বলে, কে রে ? বন্দা, দ্যাখ তো !

ওইতেই কাজ হয়ে যায় । বুপ ঝাপ করে ফুলচোরেরা পালাতে থাকে । স্ক্যাপা নিতাইয়ের কুকুরটা মাঝে মাঝে তাড়া করে উপরন্তু । ঝড়ু পাহারাদার অবশ্য ফুলচোরদের

নিয়ে মাথা ঘামায় না। সারা রাত পাহারা দিয়ে তৃষা উঠবার পর সে ঘুমোতে চলে যায়। এ সময়টায় তাই বাড়ির তেমন প্রতিরক্ষা নেই। কিন্তু তৃষা একাই একশো।

কলঘর থেকে বেরোতে একটু সময় লাগে তৃষার। নিজের যত্ন বলতে তার এই ভোরে স্নানটুকু। তাই সে সময় নেয়। এই সময়েই সে নিজের কথাও একটু ভাবে। দিনের মধ্যে বলতে গেলে এই একবারই।

কলঘর থেকে বেরোলেই দেখে পূব আকাশে ফিকে ফিরোজা রঙ ধরেছে। মিলিয়ে যাচ্ছে তারার আলো। ভোরের হয়তো বা একটা সৌন্দর্য আছে। তৃষা তা কোনোদিনই তেমন টের পায় না। মস্ত দুই টিন-ভর্তি খেজুর রস বারান্দায় নামিয়ে রেখে যায় লক্ষ্মণ। হোস মুরগির ঘর থেকে ডিমের ঝাঁক এনেও বারান্দা-সই করে দিয়ে যায় সে। নিতাই কাঠকুটো কুড়িয়ে এনে উঠোনের পশ্চিম ধারে ডাই করে। রেলবাবুদের বাড়ি থেকে দুধ নিতে ছোটো ছোটো ঘটবিাটি হাতে নিয়ে কচি কাঁচা বুড়ো মন্দারা এসে জুটে যায়। চতুর্দিকে চোখ বাখতে হয় তৃষার।

গোটা সাতেক দুধেল গরুর পনোবো ষোলো সের দুধ দুইয়ে মংলু গয়লা একটা মস্ত গ্যালুমিনিয়ামের ড্রামে ঢেলে দিয়ে যায়। ড্রামের মধ্যে তৃষার কিছু কারচুপি থাকে। দু-তিন সের পরিষ্কার জল আগে থেকেই ড্রামে ভরে রাখে সে। অন্য গয়লারা যেমন গরুকে জাঁক দেয় বা দুধে মিশ্র পাউডার, চক খড়ির ঠুড়ো বা হাবিজাবি মেশায় তৃষা তা কখনো করে না। তার বাড়ির দুধ খায় বহু বাড়ির আদর যত্নের বাচ্চারা। হিসেব করলে তিন টাকা সের দরে সে যথেষ্ট খাঁটি দুধই দেয়। অতটা দুধে এই সামান্য জল মেশানোটা ধর্তব্যের মধ্যেই নয়। তৃষার অন্তত কিছু মনে হয় না। শ্রীনাথ টের পেয়ে একদিন খুব রাগ দেখিয়েছিল, ভদ্রলোকের মেয়ে হয়ে কেমন করে যে তুমি এত নীচে নামতে পারলে। যদি এই কাজই কববে তবে সাবা জীবন গয়লাদের সঙ্গে দুধে জল দেওয়ায় জন্য খিটিমিটি করে এলে কেন?

শ্রীনাথের রাগ অবশ্য বাওয়া ডিমের মতো। সারবস্তু নেই। সংসারে সে হচ্ছে বেঁটা আলগা ফল। যে কোনদিন খসে পড়বে। তৃষা কথাটায় কানই দেয়নি। সামান্য মাইনের প্রফরীডারের সংসার চালায়ে সে জীবনের অনেক সত্য ও সারবস্তু চিনে গেছে। ব্যক্তিগতভাবে তৃষার নিজের তেমন কোনো লোভ নেই। সে সোনার গয়নার জন্য হেঁদিয়ে মরে না, শাড়ি বা রূপটানের জন্য আকস্মিক কোনো অর্জাপ্ত নেই। সে শুধু চায় একটা ছোটো-খাটো রাজত্বের ওপর নিরঙ্কুশ প্রভুত্ব করতে।

বাড়ির জন্য আলাদাভাবে দু-তিন সের দুধ দোয়ানো হয়। ফেনিল, ঘন, নরী ওঠা সুস্বাদু বালতি ভরা সেই দুধ দেখে কোনোদিন এক চুমুকও খাওয়ার কথা মনে হয় না তৃষার। দুধের গ্লাস মুখের কাছে আনার কথা ভাবলেও পেট গুলিয়ে ওঠে। কয়েকবার চেষ্টা করে পারেনি। সকালে সে তাই বড় পাথরের গ্লাস ভর্তি চা খায়। রোদ ভাল করে ফোটান আগেই বৃন্দা তার জন্য মাটিব হাঁড়ি করে ফেনাভাত নামিয়ে দেয়। খাঁটি ঝাঁঝালো সর্ষের তেল, ঝাল লঙ্কা আর ডিম সেক্ষ দিয়ে তৃষা জলখাবার খায়। ভাত ছাড়া আর কিছু খাওয়ার আছে সংসারে এ তার মনেই হয় না।

কুটনো কোটা বা রান্না করার মতো মেয়েলী কাজ তৃষা আজকাল করে না। তার জন্য লোক আছে। সকালের দিকে রোদ উঠলে সে উঠানে জলঢৌকি পেতে বসে। কোলে থাকে তার নিজস্ব হিসাব/নিকাশের খাতা। কে কত পাবে, কার কাছে কত পাওনা, কাকে কোন কাজ দেওয়া হবে, কাকে রাখবে, কাকেই বা ছাড়াবে তা সব ঐ খাতায় লেখা। বঙ্করী

খণের একটা মন্ত হিসেবও রয়েছে তার। সোনা-রূপোর গয়না থেকে ঘাটি-বাটি এমন কি গরু পর্যন্ত বাঁধা রাখে সে। কখনো এক পয়সা ছাড়ে না।

ছেলেমেয়েরা কোনোদিনই খুব একটা ঘেঁষে না তার কাছে। তবে ওর মধ্যে সজলই তবু একটু সাহস রাখে। একটু মা-ন্যাওটাও সেই। কিন্তু সজল যখন সুন্দর নখরকাস্তি শিশু ছিল তখনো তাকে তুষা কোনোদিন হামলে আদর করেনি। আজও এক কঠোর শীতল শাসনের দুরত্ব বজায় আছে।

কয়েকদিন জ্বরে ভুগে উঠে সজল এখন ভারী রোগা আব দুর্বল! বেলায় ঘুম থেকে উঠে একটা র্যাপার জড়িয়ে উঠোনের রোদে এসে গুটি গুটি বসেছে। তুষার জলচৌকি থেকে অল্প দূরে।

তুষা এক পলক তাকিয়ে বলল, পায়ে চাটি নেই কেন?

ভুলে গেছি।

যাও পরে এসো।

সজল উঠল না। দুর্বল ঘাড়ের নলীতে মাথাটা খাড়া রাখতে না পেরে কাৎ কবে মায়েব দিকে চেয়ে বলে, একটু খেজুর রস খাবো মা?

না। সারা রাত হিম পড়ে রস এখন বরফ হয়ে আছে। জ্বাল দিলে গুড থেও। বেশী নয়, কৃমি হবে।

সজল চুপ কবে মায়েব দিকে চেয়ে থাকে।

তুষা একবার ছেলের দিকে চেয়ে বৃন্দাকে ডেকে ওব চটিজোড়া দিয়ে যেতে বলে।

সজল উদাস চোখে আকাশের দিকে চেয়ে ছিল। হঠাৎ বলল, বাবা কাল রাতে বাড়ি ফেরেনি মা?

তুষা সব জানে। তার অজান্তে কিছুই ঘটে না। গভীর বাতে ক্ষাপা নিতাই তার জানালায় টোকা দিয়ে খবরটা দিয়ে গেছে, শেষ গাড়ি চলে গেল মা। বাবু কিন্তু ফেরেনি আজ।

খবরটা শুনে তুষা কিছুক্ষণ জেগে ছিল। বলতে নেই, শ্রীনাথের জন্য তার খুব একটা দুশ্চিন্তা হচ্ছিল না। তার সন্দেহ শ্রীনাথ আজকাল বাইরে ফুটি কবার স্বাদ পেয়েছে। তুষাব খুব ভুল হয়েছিল শ্রীনাথের সঙ্গে জয়েন্ট অ্যাকাউন্ট খুলে। প্রথম থেকে শ্রীনাথ দু হাতে টাকা তুলত। তুষা সাবধান হয়েছে এখন। জয়েন্ট অ্যাকাউন্টের টাকা যতদূর সম্ভব টেনে নিয়ে ডাকঘরে রেখেছে। কিছু টাকা তার বন্ধকীর বাবসাতে চলে এসেছে। তবু যা টেনে নিয়েছে শ্রীনাথ তাও ফ্যালনা নয়। বন্দীর মারফত জমিজমা কেনাব চেষ্টা করছে, এ খবর মদন ঠিকাদারের কাছে শুনেছে তুষা। শ্রীনাথের কথা খুবই যেন্নাব সঙ্গে ভাবতে ভাবতে রাতে ঘুমিয়েছে তুষা:সকালে আর ব্যাপারটা মনে ছিল না। ছেলের দিকে চেয়ে বলল, তোমার বাবা কাজে আটকে পড়েছে তাই আসেনি।

সজল এ কথায় জবাব দিল না, আর জানতেও চাইল না কিছু। কিন্তু তুষা জানে এই বয়সের ছেলেমেয়েরা মুখে যতই না-বোঝার ভাব দেখাক, ভিতরে ভিতরে অনেক কিছু বোঝে।

পাশদোলানী চালে তুষার হাঁসের পাল লাইন ধরে ধপধপে ফর্সা উঠোন পেরিয়ে পুকুরের দিকে যাচ্ছে। তার মধ্যেই একটা হাঁস টপ করে দুলদুলে একটা ডিম প্রসব করে ফেলল মাটিতে, আর সঙ্গে সঙ্গে আর একটা হাঁস কপ কপ করে সেটা খেয়ে নিল। দশাটা গভীর চোখে দেখল তুষা। নন্দব কাছে ডিম বাবদ আড়াই শো টাকার মতো পাওনা। তাগাদার ভয়ে তিন-চারদিন হল সে আর এ তন্নাট মড়ায় না। তিন-চার দিনের ডিম ডাই হয়ে জমে

আছে। বেশী দিন জমা থাকলে দু-চারটে করে পচতে শুরু করবে। আজকালের মধ্যেই নতুন লোক না দেখলে নয়। নন্দ অবশ্য পালাতে পারবে না। টাকা তাকে দিতেই হবে, নইলে যে ঘোর বিপদ তা সে জানে। তুষার যখন প্রথম এখানে আসে তখন কাঙাল ভিখিরি প্রার্থীদের খুব আনাগোনা ছিল। কাছাখোলা বাস্তুবুদ্ধিহীন এবং লোকচরিত্র সম্পর্কে অজ্ঞ মল্লিনাথ তাদের দু হাতে বিলোতো। তুষা হাল ধরার পর সব বন্ধ হয়। বিনা কাজে ফালতু একটি পয়সাও সে কাউকে দিত না। ভিখিরি-টিখিরি এলে সে বলত, কাজ দিচ্ছি করলে পয়সা পাবে, ভাত পাবে। নইলে রাস্তা দেখ। তুষার পাল্লায় পড়ে কিছু কিছু নিষ্কর্মা মাগুনে লোক এখন শুধরেছে। তুষা তাদের খাটিয়ে পয়সা দেয়। নন্দ তাদেরই একজন। তুষার টাকা মেরে দেওয়ার মতো অকৃতজ্ঞ হলেও সে হতে পারে কিন্তু প্রাণের ভয়েই সে তা কববে না। সুতরাং তুষার দৃষ্টিস্তা নেই।

তার পায়ের কাছে সজলের মাথার ছায়াটা পড়ে ছিল এতক্ষণ। হঠাৎ তুষা চেয়ে দেখে, সজল নেই। কোথাও উঠে গেছে। হয়তো বাপের খোঁজ করতেই গেল। অবশ্য বাপের জন্য এক পয়সার টান নেই ওব। থাকবে কেন ? তুষা তো জানে, শ্রীনাথ ওকে কী চোখে দেখে। সজলও সেই বিষ মনোভাব টেব পায। শুধু শ্রীনাথ নয়, মল্লিনাথ ও তুষার সম্পর্ক নিয়ে আরো অনেকেই অনারকম ধারণা আছে। তুষা সে সব ধারণা ভেঙে দেওয়ার কোনো চেষ্টাই করেননি। নিষ্পেষ হাওয়াকে কথতে নেই। চুপ করে থাকলে তা একদিন আপনিই কেটে যায়। গেছেও অনেকটা।

চারদিকে তাকিয়ে দেখলে এই সাদা রোদে যে নিরুদ্ধেগ সম্পন্ন গৃহস্থালির দৃশ্যটা দেখা যায় তার সবটা অত সরল গল্প নয়। তুষা তার মেধা, বোধ কটবুদ্ধি দেহ ও মনকে যতদূর সম্ভব নিঃড়ে এ শাখা-প্রশাখাময় ছায়াঘন সংসারবৃক্ষটিতে সার ও সেচ জুগিয়েছে। উদামহীন, আড্ডা ও অবসরপ্রিয়, হতদরিদ্র শ্রীনাথের ঘব কবতে গিয়েই সে টের পেও, সতীত্ব বা এককেন্দ্রিক জীবন কত না অর্থহীন। কতই না হাস্যকর শব্দ ভালবাসা। রাজার আমলের টাকার মতোই তা অচল। তাই মল্লিনাথের সংস্পর্শে এসে সে যখন দারিদ্র্য মোচনের পথ দেখল তখন কোনো মানসিক বাধাই তাকে আটকে বাধেনি। লোকে বলে অবৈধ সম্পর্ক। কিন্তু তাই কি ? তুষা কোনো পুরুষকেই ভালবাসে না বটে, কিন্তু তবু তার যেটুকু স্নেহ এখনো বৃকের তলানিতে পড়ে আছে তার যোগ্য পুরুষ সাবা জীবনে ঐ একজনকেই পেয়েছিল তুষা। সে মল্লিনাথ। ঐ একজনকেই তার হেমন পরপুরুষ বলে মনে হয়নি কোনোদিন। বরং ঐ একজনের প্রতি মানসিক বিশ্বস্ত তাই তাকে খানিকটা সতীও বা ঐ ধরনের কিছু দিয়েছে। শরীরের কোনো বোধই কোনোদিন ছিল না তুষার। কিন্তু আজও সে দেখতে শুনতে অতীব লোভনীয় এক যুবতী। হয়তো তরুণী নয়, কিন্তু জোয়ারী যুবতী। লম্বা মজবুত চেহারা তার। শরীরে হাড় বেশ চওড়া এবং শক্ত। যথেষ্ট পুরুষালী ভাব রয়েছে তার চেহারায় এবং চালচলনে। চোখের দৃষ্টিতে মেয়েমানুষী লম্বা বা কমনীয়তা নেই। এতগুলো ছেলেমেয়ে হওয়া সত্ত্বেও তার বৃকের আকার প্রকারে কোনো লম্বা ভাব নেই, মাতৃস্নেহের আর্ত স্নেহশীলা নম্রভাবও নেই তার মধ্যে। এখনো সে হাঁটে গেলে মনে হয়, এই মেয়েটি কোনো পার্শ্ব সম্পর্কে আবদ্ধ নয়। এ একা।

তুষা বাস্তবিকই তাই। এত সুন্দর লোভনীয় চেহারা থাকার সত্ত্বেও তুষার দেহের কোনো চাহিদা নেই। কোনোদিনই তার যৌন মিলনের কোনো আকাঙ্ক্ষা ছিল না। বিয়ের পর সে অত্যন্ত নিরুদ্ভাব ভাবে এবং খানিকটা বিরক্তির সঙ্গে দৈনিক মিলনটা মেনে নিয়েছিল মাত্র। তবে কোনোদিনই নিজের সাগ্রহে অংশ নেয়নি। কোনোদিন ওতে কোনো ভূপ্তিও বোধ

করেনি সে। এ যেন স্বাস্থ্য রক্ষার জন্য প্রতিদিন ব্যায়াম করার মতোই একটি কর্তব্য-কাজ। কিন্তু মেয়েমানুষের শরীরের যে বিপুল চাহিদা জগতে বিদ্যমান সে সম্পর্কে তার জ্ঞান ছিল টনটনে। তাই কাম সম্পর্কে অতি শীতল মনোভাব সত্ত্বেও এই দেহ সে কাজে লাগিয়েছে কখনো সখনো। তেমনি মনোভাব নিয়েই সে মল্লিনাথকে প্রশ্রয় দিয়েছিল। দেহের শীতলতার জন্যই সে দেহের সতীত্ব সম্পর্কে উদাসীন। মল্লিনাথকে সে তাই বাধা দেয়নি। এমন কি দেহ দিয়ে মল্লিনাথকে খুব বেশী কিছু দেওয়া হয়েছে বলে কখনো ভাবেওনি সে। উপরন্তু তাই সে অবিবাহিত মল্লিনাথকে দিয়েছিল স্নেহ, সেবা ও সঙ্গ। শেষ জীবনটা মল্লিনাথ তার দয়ায় উদ্ভাসিত আনন্দে কাটিয়ে গেছে। মল্লিনাথের বিষয় সম্পত্তি ভোগ করতে তাই কোনো সংকোচ নেই তুষার। সে জানে মল্লিনাথের আপনার জন বলতে ছিল একমাত্র সেই। লোভী শকুনরা ছৌঁ মারতে চেয়েছিল বটে, কিন্তু তুষার অধিকার অনেক বেশী গভীর।

তাই চারদিকে চেয়ে সংসারের সম্পন্ন দৃশ্যগুলি দেখে তুষা নিশ্চিত থাকে না, তৃপ্তি বোধ করে না। গল্পটা তো অত সরল নয়। কিন্তু লড়াইটা সে খুব উপভোগ করে।

মুরগির ঘর থেকে লক্ষ্মণ বিমুনি রোগে ধরা তিনটে লেগহর্ন মুরগি বেব করে এনে বলল, এ তিনটির হয়ে গেছে মা, আরো গোটা পাঁচেক কাল-পরশুই যাবে।

তুষা নিরাসক্ত গলায় বলে, পাঠশালাব মাঠে গর্ত খোঁড় গে। আমি যাচ্ছি।

লক্ষ্মণ মুরগি তিনটির পা বেঁধে তুষার অদূরে উঠানে ফেলে রেখে শাবল নিয়ে চলে যায়। তুষা আবার তার হিসেবের খাতায় ঝুঁকে পড়ে। মুরগিগুলো নড়ে না, শুধু বাসে বাসে বিমোয়।

হিসেব শেষ কবে উঠে পড়ে তুষা। কাজের অন্ত নেই। কাজ ছাড়া থাকতে ভালও বাসে না সে। খাতাটা ঘবে বেখে আসতে না আসতেই লক্ষ্মণ এসে পড়ে।

গর্ত হয়ে গেছে, মা। চলুন।

পাঠশালা বলতে আসলে এখন কিছুই নেই। মল্লিনাথ ভাল ভেবে তার জমির মধ্যেই পাঠশালা খুলতে জায়গাটা ছেড়ে দিয়েছিল। বাঁশের বেড়া আর টিনেব চালওলা খানকয়েক ঘরও উঠেছিল এবং জনা বিশ-চল্লিশ পড়ুয়া আর তিন-চারজন মাস্টারমশাইকে নিয়ে একটা পাঠশালা চালুও হয়েছিল। তবে পাঠশালাব জমি কতটা হবে তা চিহ্নিত করে রাখেনি মল্লিনাথ লিখিত কোনো দলিলও ছিল না। তুষা সাকসেসন পাওয়ার পর পাঠশালাব জমি নিয়ে দাঙ্গা লাগার উপক্রম। মাস্টারমশাই বা ছাত্ররা নয়, কোমর বেঁধে বাগড়া দিতে এল স্থানীয় লোকজন। তাদের পাশা ছিল অল্পবয়সী এক ছোকরা রাজনৈতিক নেতা। তার তেজ দেখবার মতো। ছোকরা আলটিমেটাম দিয়ে বলল, তিন বিঘে জমি ছেড়ে দিতে হবে। নইলে ও জমি আপনি কোনো কাজে লাগাতে পারবেন না। আদালতের রায় পেলেও না। গুণ্ডগোল আরো গাঢ় হয়ে উঠল ক'দিনের মধ্যেই। সমস্ত এলাকার লোক তুষার বিরুদ্ধে। এমন কি পাঠশালাব পাশ দিয়ে বাড়ির লোকের যাতায়াতের পথ একদিন কাঁটাতারের ব্যারিকেড তুলে বন্ধ করে দিল বিরুদ্ধপক্ষ। পুলিশের কাছে গিয়ে কোনো লাভ হয়নি।

এখন এই সকালের রোদে জারুল আর শিমুলেব দীর্ঘ ছায়া, লম্বা ঘাসের জমির স্নিগ্ধ শ্যামল গালিচা, ইঙ্কুল ঘরের নিস্তব্ধতা যে শান্তির ইঙ্গিত দেয় গল্পটা অত সরল নয় মোটেই। দুঃসহ মানসিক জ্বালা, বাগ, বিদ্বেষ, অসহায় অপমান কতদিন ধরে নীরবে সহ্য করতে হয়েছিল তাকে। সে তবু গোঁ ছাড়েনি, হাল ছাড়েনি, প্রতিপক্ষের কোনো দাবিই মেনে

নেয়নি। শুধু ঠাণ্ডা মাথায় চিন্তা করে, বিশ্লেষণ করে মনে মনে স্থির করল, ছোকরা বাজটৈনিক নেতাটিকে হাত করতে পারলেই বোধ হয় হবে। সেটাও একটা দূরন্ত ঝুঁকি বটে। জল এত দূর গড়িয়েছিল যে, একজনকে হাত করলেই সেটা মিটেবে এমনটা মনে হচ্ছিল না। তবু ঝুঁকি নিয়েছিল তৃষা।

মদন ঠিকাদারই ছিল একমাত্র নিরপেক্ষ লোক। খুট খামেলায় নেই, আপমনমনে কাজ কবে, টাকা কামায়, গম্ভীর, শাস্ত, নিরুদ্বেগ মানুষ। হয়তো তৃষাদের প্রতি তার খানিকটা অগ্রকাশ্য সহানুভূতি ছিল। তাকে দিয়েই একদিন ছোকরা নেতা শুভংকরকে নেমস্তন্ন করাল তৃষা। পোলাও, মুরগি, পাকা মাছ দিয়ে এলাহি খাওয়া। ছোকরা নির্লঙ্কের মতো এল এবং খেল। যাওয়ার সময় যে পাঁচশ টাকা একটা ন্যাকড়ার থলিতে ভরে হাতে দিল তৃষা তাও নিল নির্বিবাদে, যেন পাওনা টাকা। হাসিমুখে চলেও গেল। তৃষার মন বলল, চালে ভুল হল না তো ? ভুলই হয়েছিল। কারণ গুণগোল মিটল না। কোনো ফয়সালা হল না। সেই ছোকরা সামনা-সামনি আর তড়পাত না বটে, কিন্তু আড়াল থেকে উদ্ভাসিত। আবার সে নেমস্তন্ন খেতে এল এবং যাওয়ার সময় বেশ স্পষ্ট গলাভেই বলল, হাজারখানেক দিন। পাটিফান্ডের জন্য চাইছি। এবার কথা দিচ্ছি, মিটে যাবে।

দাঁতে দাঁত চেপে তাও দিয়েছিল তৃষা। ফলে সামনাসামনি লড়াই বন্ধ হয়ে গেল বটে, কিন্তু জমির গুণগোল মিটল না। শুভংকর অত্যন্ত উগ্র এবং ঘোড়েল। এখানকার সব লোক, মায় পুলিশ পর্যন্ত তাকে ভয় খায়। মাঝে মাঝেই সে আসত এবং নির্লঙ্কের মতো টাকা নিত। দিতেও হত তৃষাকে। তবে তৃষা প্রতিটি দেওয়া পয়সার হিসেব রাখত। সুযোগ পেলে সুদে আসলে উসূল করবে বলে। যারা খুব দাপের সঙ্গে চলে তারা অন্যায্য করলেও লোকে কিছু বলতে সাহস পায় না। শুভংকর যা করত অত্যন্ত তেজ ও জোরের সঙ্গে করত। কারো পরোয়া করত না। বেশ বডসড় অনুকারীদের একটা দল ছিল তার। এ জায়গা শাসন করত তারাই। আশ্চর্যের বিষয়, তৃষার কাছ থেকে শুভংকর যে টাকা নিত তা ঠিকঠাক তার পাটি ফান্ডেই জমা দিত। এক পয়সাও এদিক ওদিক করত না। চুল থেকে পা পর্যন্ত সে ছিল রাজনীতির মানুষ। তার ব্যক্তিগত কোনো দুর্বলতা আছে কিনা তা অনেক খুঁজেছে তৃষা। আর কিছু না হোক কাঁচা বয়সেব ছেলেদের মেয়েমানুষ সম্পর্কে কৌতূহল তো থাকেই।

সেবার মাসীর বাড়ি এলাহাবাদ থেকে বহুকাল বাদে দু'মাসেব জন্য মা-বাবার কাছে এসে ছিল চিত্রলেখা। এমনিতেই চিত্রা দেখতে সুন্দর, তাব ওপর মাসীর কাছে সে একদম মেমসাহেবী কেতায় থাকে। দীঘল, ফরসা, যৌবনাক্রান্ত ঢলঢলে কিশোরী। বব চুল, দারুণ সব পোশাক, চলাফেরার কায়দাই অন্য রকম। কাউকেই মানুষ বলে গ্রাহ্য করে না তেমন। সে এই জায়গায় পা দিতেই চারদিকে যেন চাপা শোবগোল পড়ে গেল। শুভংকরকে সেই সময় পর পর কয়েকদিন নেমস্তন্ন করে খাওয়াল তৃষা। গেল নদীর ধারে সপরিবারে পিকনিক করতে, সঙ্গে শুভংকর। চিত্রলেখাকে শুভংকরের সঙ্গেই একদিন পাঠাল কলকাতা দেখতে। গৈয়ো জায়গার কাঁচা ছেলের মাথা কাঁহাতক ঠিক থাকে ? ততদিনে শুভংকর হয়ে গেছে তৃষার একান্ত বাধা, ভীষণ রকমের পোষমানা। সুতরাং নদীর ধারে কাঠা পাঁচেক সস্তা জমি কিনে পাঠশালাকে একটা দানপত্র লিখে দিয়ে তৃষার পক্ষে ঘরের কোণে যোগের বাসা তুলে দিতে বেশী বেগ পেতে হয়নি। পাঠশালা নিয়ে ষয়ঃ শুভংকর তখন তৃষার পক্ষে জান দিতে প্রস্তুত। পাঠশালা নদীর ধারে উঠে যাওয়ার সঙ্গে সঙ্গেই তৃষা জায়গাটা ঘিরে ফেনল দেয়াল দিয়ে। চিত্রলেখা এলাহাবাদে ফিরে যাওয়ার আগে একদিন তৃষাকে বলল, ঐ বৃদ্ধ

ছেলেটার সঙ্গে তোমাদের এত মাখামাখি কেন ? তুষা কিছু বলেনি। চিত্রলেখা এলাহাবাদে ফিরে যাওয়ার পর থেকেই শুভংকর তুষাকে মা বলে ডাকতে থাকে। রোজ আসত। দেখ করত। এলাহাবাদে চিঠিপত্রও লিখত বলে শুনেছে তুষা। শুভংকরকে আর তেমন খাতিঃ করত না সে, তবে চটাতও না। চিত্রলেখার প্রেমে পড়েই কিনা কে জানে, ক্রমে ক্রমে শুভংকরের সেই দীপ্ত তেজ আস্তে আস্তে নিভে আসছিল। মাস ছয়েক বাদে আসানসোলে একটা চাকরি পেয়ে সে চলে যায়। এলে তুষার সঙ্গে দেখা করে যায়, মা বলে এখনে ডাকে। কিন্তু পুরোটাই নখদস্তহীন হয়ে গেছে শুভংকর।

পাঠশালার মাঠের নরম শিশিরে সিক্ত ঘাসের জমিতে পা দিয়ে চারদিকের মনোরম নির্জনতা দেখতে দেখতে তুষা ভাবে, এতটা সরল নয় এই জমিটুকুর ইতিহাস।

একটা শিমুল গাছের নীচে হাত দেড়েক গভীর গর্তের ধারে তিনটে ঝিম-ধরা মুরগিবে শাবলের ঘায়ে এক এক করে মারল লক্ষ্মণ। এই মুরগি মারার ব্যাপারটা সব সময়ে আজকাল তুষা নিজেই তদারক করে। এর আগে লক্ষ্মণ বহুবীর ঝিমুনি মুরগি নিয়ে গিয়ে বাজারে বেচে এসেছে। লোকে খেয়ে অসুখে পড়লে তুষার বদনাম হবে।

মুরগি তিনটের মৃতদেহ দূর থেকে নিরাসক্ত দৃষ্টিতে দেখে তুষা। রক্ত, জেঁড়া পালক ঘাড় গোঁজা ঐ অসহায় মৃত্যুর দৃশ্য দেখে তার ভিতরটা একটুও নাড়া খায় না। এই সব দুর্বলতা নেই বলে সে খুশি।

লক্ষ্মণ পা দিয়ে ঠেলে মুরগি তিনটেকে গর্তের মধ্যে ফেলে মাটি চাপা দেয়। কবর হয়ে গেল। তুষা গিয়ে চটি পরা পায়ে আলগা মাটি চেপে দেয় আরো একটু।

এমন সময় লক্ষ্মণ চাপা স্বরে হঠাৎ বলে ওঠে, বাবু ঐ আসছে, মা।

তুষা শুনল কিন্তু পথের দিকে তাকাল না। অন্য বউরা হলে তাকাত। কিন্তু তার আর শ্রীনাথের সম্পর্ক ততটা সরল নেই আর। শ্রীনাথ আসছে আসুক। তার কি ?

সজল দাঁড়িয়ে ছিল পুকুরের ধারে। দু পাকেটে চার পাঁচটা ডিম। লম্বালম্বি একটা ডিমকে দু হাতের চাপে কিছুতেই ভাঙা যায় না, বলেছিল ছোটিন নন্দী। এখন সে ডিম নিয়ে পরীক্ষাটা করছিল। তার শরীর ভাল নেই। জ্বর থেকে উঠে খুব একটা জোব পাচ্ছে না হাতে পায়ে। তবু প্রাণপণে ডিমে চাপ দিয়ে দেখছিল, বাস্তবিকই ভাঙে না। ইলিপস্ বা উপবৃত্তে যে-কোনো চাপই কাটাকুটি হয়ে যায়, বিজ্ঞানের বইতে সে এমন কথা পড়েছে। তবু বইতে যা লেখা থাকে তার সবই তো সত্যি না হতে পারে ! তাই সে পরীক্ষা করে দেখছিল। আসলে সকালে এক বুড়ি ডিম চোখের সামনে দেখলে আজকাল তার ভারী রাগ হয়। এত ডিমের কোনো মানেই হয় না। রোজ সকালে বিকেলে ডিম খেয়ে খেয়ে এখন ডিম দেখলে তার ঘেন্না হয়। আব এত অফুরন্ত ডিম দেখলে কার না ইচ্ছে করে দু-চারটে নষ্ট করতে ?

ডিমগুলো হাতের চাপে ভাঙল না ঠিকই, তবে সজল একটার পর একটা ডিম বুড়ো একটা মহানিমের গায়ে ছুঁড়ে মারল। ফনাক করে ফেটে কুসুম আর কাথ গড়িয়ে পড়ছে কাণ্ড বেয়ে। দু-তিনটে কাক তাই দেখে লাফিয়ে কাছে এসে 'খা খা' করতে থাকে। পুকুরে হাঁসগুলো ভাক ভাক করছিল, তাদের দিকেও একটা ডিম ছুঁড়ে দিল সে। ডিমটা ভাসল, ডুবল, ভাসল এবং ডুবে গেল।

তারপর হঠাৎই বাবাকে দেখতে পেল। উসকোখুসকো চুল, বাসি দাড়ি, তুসের চাদর গায়ে বাবা বাড়ির ভিতরে ঢুকছে। সজল চট করে সরে আসে একটা গাছের আড়ালে। সাবধানে দেখে। কিছুই দেখার নেই অবশ্য। বাবা বাড়ি ফিবছে, এইমাত্র ঘটনা। এত

বেলায় যখন ফিরল, তখন আজ আর অফিসে যাবে না। তার মানে সারা দিনের মতো একটা দুশ্চিন্তা, ভয় আর অস্বস্তি থাকবে সজলের। তাকে বাবা দু চোখে দেখতে পারে না। ঘুরতে ঘুরতে সজল ক্ষাপা নিতাইয়ের ঘরে এসে হানা দেয়। নিতাই নেই। ইম্পাতকে নিয়ে কোথায় গেছে। ঘরের দরজা হাঁ হাঁ করছে খোলা। চুরি যাওয়ার মতো কিছুই নিতাইয়ের নেই। তবু অনেক কিছু আছে। বাঁশের মাচানে একটা কব্বলের বিছানায় সে শোয়। মাথার কাছে একটা কুলঙ্গিতে কালীমূর্তি তেল-সিদুরে বীভৎস নোংরা হয়ে আছে। মেঝের এক ধারে পঞ্চমুণ্ডির আসন। সামনে মাটিতে একটা চক্ৰ আঁকা। নিতাই কামারের তৈরী কাঠের বাঁটওলা পাকা লোহার কয়েকটা ছুঁবি পড়ে আছে পাশে। নিতাই রোজ রাতে বিভিন্ন লোককে বাণ মারে। সবচেয়ে বেশী মারে তাব বউ পুতুলরানীকে উদ্দেশ্য করে।

এ সবই সজল জানে। নিতাই একদিন তাকে খুব গুমোব কবে বলেছিল, তোমাব যদি কাউকে বাণ মারার থাকে তো আমায় বোলে। মেবে দেবো।

সজল সঙ্গে সঙ্গে আলটপকা বলে ফেলেছিল, আছে। মারবে ?

বোলে। ঠিক মেরে দেবো। লোকটা কে ?

লোভী মুখে সজল বলেছিল, বাবা।

শুনে নিতাই খুব গম্ভীর হয়ে গেল। বলল, ছিঃ ছিঃ। দাঁড়াও, বাবাকে বলে দেবো।

তখন খুব নিতাইয়ের হাতে পায়ে ধরেছিল সজল।

এখন নিতাইয়ের ঝোপড়ায় সে একা পঞ্চমুণ্ডির আসনে বসে ছুরি কটা হাতে তুলে নেয় এবং মন দিয়ে ছকটা দেখতে থাকে। মংলু, লক্ষ্মণ, বামুনদি, বন্দা সকলেরই বিশ্বাস ক্ষাপা নিতাই মারণ উচাটন বশীকরণ জানে। আবার মদনকাকা বলে, ওটা একটা ফ্রড। পাঠশালা নিয়ে গুণগোলের সময় ক্ষাপা নিতাইয়ের কুকুব ইম্পাত একটা ছেলেকে কামড়ে দিয়েছিল। কোথায় তার জন্য ক্ষমা চাইবে, বরং উল্টে সেই ছেলেটার ওপর গিয়ে তর্কী করে এল। ফলে শুভংকরদা খুব মেবেছিল নিতাইকে। এবার সেই রাতেই ক্ষাপা নিতাই শুভংকরদাকে বশীকরণ বাণ মাবে। বাণের গুণ কিছু আছেই। নইলে তার পর থেকেই শুভংকরদা ওরকম অন্য মানুষ হয়ে গেল কেন ?

বাণ মারা না জানলেও সজল আপনমনে ছুঁবিগুলো ছকটার মতো সজোরে ঠুঁড়ে ঠুঁড়ে গাঁথতে লাগল। আপনমনে বলতে লাগল, মর, মর, এ বাড়ির সবাই মরে যা।

দূর থেকে খুব চোঁচিয়ে ভীষণ রাগের গলায় বাবা ডাকছে, সজল ! এই সজল !

সজল নিশ্চুপ হয়ে বসে থাকে কিছুক্ষণ। এ ডাককে অগ্রাহ্য করতে খুব একটা সাহস পায় না সে। ইচ্ছে করছিল দৌড়ে পালিয়ে যেতে। কিন্তু এখন এই দুর্বল বুকে অতটা দম নেই।

সে একটা ছুরি প্যাণ্টের পকেটে নিয়ে উঠে পড়ে।

বেরিয়ে দূর থেকেই দেখতে পায়, বাবা ভাবন-ঘরের বারান্দায় দাঁড়িয়ে আছে। গালে দাড়ি কামানোর সাবানের ফেনা, হাতে খোলা জার্মানি ক্ষুর। দৃশ্যটা দেখেই সে বুঝতে পারে, কেন তাকে এই তলব।

জড়ানো পায়ে ধীরে ধীরে কাছে যেতেই শ্রীনাথ গলা ফাটিয়ে বলে ওঠে, কে আমার ঘরে ঢুকেছিল ?

সজল জবাব দিতে পারে না। বুক খুকখুক করছে।

কে আমার ক্ষুরে হাত দিয়েছিল ?

সজল চুপ করে থাকে। মধ্যস্থ কথাবলতে পারে বটে, কিন্তু ঐ বিকট রাগের মুখে

সেটুকুও সাহস হয় না।

বলো, কে হাত দিয়েছিল ?

আমি জানি না। কোনো রকমে বলল সজল।

জানো না ! জানো না ! বলতে বলতে শ্রীনাথ বারান্দা থেকে দু ধাপ সিঁড়ি নেমে এসে প্রকাণ্ড একটা চড় আকাশ সমান তুলল।

উঠানের দিক থেকে মা আসছে, টেব পাচ্ছিল সজল। চড়টা পড়ার আগেই তৃষা একটু তফাত থেকে চোঁচিয়ে বলল, খবরদার ! রোগা ছেলেটাকে মারবে না।

চড়টা পড়ল না। কেমন একটু নিভে গেল শ্রীনাথ। কোনো জবাব না দিয়ে ধীরে ধীরে ফিরে গেল ঘরে। তৃষা কলারোপ পর্যন্ত এসেছিল। তারপর আর এগিয়ে এল না।

সজল মার খেল না। বুঝতে পারল, মা-বাবার মধ্যে আবার একটা ঘোরালো ঝড় পাকিয়ে উঠছে বোম্ব হয। যদি কিছু হয় তবে সজল বাবাকে ছাড়বে না। যতই ভয় পাক সে, একদিন কিন্তু ঠিক প্রতিশোধ নিয়ে নেবে।

বাবা ঘরে গেল। মাও ফিরে গেল উঠানে। একা সজল দাঁড়িয়ে দাঁড়িয়ে শরীবে ভয়ের কাঁপনি টের পেতে লাগল।

ভাবন-ঘর সম্পর্কে তার অগাধ কৌতুহল। ঘরে বই আছে, পুরোনো দেবোজে আছে অনেক টুকটাকি জিনিস, আছে ভাঙা দূববীন, একটা বহু পুরোনো ইনজিনিয়ারিং টুল বক্স, আছে জমি-জবিপের যন্ত্রপাতি, মাপজোখ করার জন্য গোল চামড়ার খাপে ইস্পাতের লম্বা ফিতে, লোহা কাটার করাত, বৈদ্যুতিক তুরপুন, আরো কত কী। বেশীর ভাগই জ্যেষ্ঠর জিনিস, এখন আর কেউ ব্যবহার করে না।

শ্রীনাথের শাসনের ভয় সত্ত্বেও মাঝে মাঝে, সে চুরি করে ঢোকে সেই ঘরে। জিনিসপত্র নাড়াচাড়া করে। করাত দিয়ে লোহা কাটে, ডেসকের পায়া কাটে। জবীপের যন্ত্রপাতি বের করে বাগানটা মাপবার চেষ্টা করে। কাল সন্দের কিছু আগে সে ঘরে ঢুকে বাবার ক্ষুব দিয়ে হাতের নরম লোম চেঁচেছিল। তারপর ধার পরীক্ষা কবতে কয়েকটা ফুল গাছেব ডাল কেটে দেখেছিল। গাছের কষে ক্ষুরটার ছোপ ধরতেই সে ধাব দেওয়ার চামড়ার টুকরোয় অনেকক্ষণ ঘষেছিল বটে, কিন্তু দাগ ওঠেনি।

এ বাড়ির মধ্যে ভাবন-ঘরটাই তার সবচেয়ে প্রিয়। পুরোনো জিনিস তো আছেই। তা ছাড়া চারদিকে নিবিড় সবুজ গাছপালার ঘেরাটোপের মধ্যে নিঃস্বপ্ন ঠাণ্ডা ঘবখানি। ভারী খোলামেলা। সারাদিন পাখির ডাক ঝরে পড়ে, সারাদিন নিবিড় হাওয়া খেলা করে, খুব স্পষ্ট শোনা যায় ট্রেনের আওয়াজ।

একদিন সে এই ঘরখানা দখল করে থাকবে।

মনে মনে সে জানে, বাবা এই সংসারে বেশীদিন থাকতে পারবে না। এসব জিনিসপত্র, বাড়িঘর সব মায়ের। বাবা বসে বসে খায়। বাবাকে দু চোখে দেখতে পারে না মা। আর মা যা চায় তাই হয়। মা বাবাকে ইচ্ছে করলেই বাড়ি থেকে বের করে দিতে পারে। দেবেও একদিন। মাকে সে বাবার অনেক খবর দেয়, যাতে মা চটে যায় লোকটার ওপর। অনেক কথা সে বানিয়েও বলে। মা সব কথা বিশ্বাস করে না, কখনো চুকলির জন্য বকে, কিন্তু তবু বাবার ওপর মা চটেও যায় ঠিকই।

সজল এসে পুকুরের ধারে দাঁড়ায়। কালো গভীর জলের দিকে চেয়ে থাকে। হাঁসগুলো উঠে গেছে। জল এখন নিধর। ভারী ভাল লাগে এই পুকুরের ধারটা। চারদিকে ঝোপঝাড়ে একটা বুনো গন্ধ উঠছে রোদের তাপে। এই পুকুরটার ধারে এসে দাঁড়ালে তার

মনে হয়, কেউ তাকে ডাকছে, টানছে। নইলে আর কারো টান সে কখনো টের পায় না।

বাবা মা দিদিরা কাউকেই তেমন গভীরভাবে ভালবাসে না সে। মাকে একটু। আর কাউকে এক বিন্দুও নয়। সবচেয়ে দূর আর পর হল বাবা।

বাবা ? সজল মুখ টিপে আপনমনে হাসে। সে শুনেছে শ্রীনাথ তার বাবাও নয়। তার আসল বাবা হল জ্যেষ্ঠ।

জ্যেষ্ঠই বাবা ? ভাবতে এক রকম রোমহর্ষ আর আনন্দ হয় তার। লম্বা চওড়া ছল্লোড়বাজ ঐ লোকটার কথা মনে হলেই তার ভাল লাগে।

হে ভগবান, জ্যেষ্ঠই যেন তার আসল বাবা হয়।

॥ ছয় ॥

মালদা থেকে গভীর রাতে দার্জিলিং মেল ধরল সরিৎ। ট্রেনে অসম্ভব ভীড়। এই শীতে সাধারণত ভীড় এত হয় না কলকাতা-যাত্রীদের। তার কপালে হল। টিকিট কেটে ট্রেনে ওঠবার অভ্যাস বহুকাল হল তার নেই। দরকারও হয় না। সব লাইনেই আজকাল রেলের রানিং স্টাফ একটা প্যারালেল ব্যবস্থা চালু রেখেছে। সেকেন্ড ক্লাস টিকিটের প্রায় অর্ধেক খরচে দিবা যাতায়াত করা যায়। মালদার রেলের লোকেরা প্রায় সবাই সরিতের চেনা বা মুখচেনা। স্টেশনের চ্যাটার্জিদাকে ধরতেই রেটটা আরো কিছু কমে গেল। চ্যাটার্জিদা বললেন, থ্রি টায়ারে উঠে কন্ডাকটর গার্ডকে দুটো টাকা দিও, আরামে শুয়ে যেতে পারবে।

কিন্তু সরিতের কাছে দুটো টাকাও অনেক টাকা। দু প্যাকেট চার্বমিনার আর দেশলাই হয়েও বেশী থাকবে। ফালতু ঘুমোনের জন্য গচ্চা কে দেয় ? ভেবেছিল থ্রি টায়ারে উঠবেই না। কিন্তু ট্রেনের অস্বাভাবিক ভীড়ের জন্য উঠতে হল। পাঁচ সাতজন বন্ধু তুলে দিতে এসেছিল স্টেশনে। তারাও বলল, ওঠ।

কন্ডাকটর লোকটা মহা ফ্যাচালে পার্টির। কেবল খ্যাচ খ্যাচ করে যাচ্ছিল, নেমে যান, নেমে যান। আজ কোনো অ্যাকোমোডেশন নেই। বলে লোকটা মালদা স্টেশনেই জি আর পি ডেকে আনল। মহা কামেলা।

সরিৎ বেগতিক দেখে নেমে পড়েছিল। পিছন দিকে একটা মিলিটারি কামরা মোটামুটি ফাঁকা এবং দরজা খোলা দেখে আরো দশ বারোজন যাত্রীর সঙ্গে সেটাতে উঠে পড়ে সরিৎ। ঘুমন্ত আধঘুমন্ত মিলিটারিরা প্রথমে কিছু বলেনি। তারপরই হঠাৎ দশ বারোটা কালো কালো গোল্ডি আর হাফপ্যান্ট পরা জওয়ান তেড়ে এসে হুমহাম করে ভারতের অচেনা কোনো ভাষায় প্রচণ্ড ধমক দিতে লাগল। ধমক শুনে ভয় খেলেও ট্রেন ছাড়ার সেই শেষ মুহুর্তে কারো নামবার ইচ্ছে ছিল না। তখনই হঠাৎ বিনা নোটিশে মিলিটারিগুলো কিল চড় আর লাথি চালাতে শুরু করে। কে মার খেল আর কে খেল না তা দেখার জন্য দাঁড়ানি সরিৎ। মালদা শহরে সে মস্তানী করে বেড়ায় বটে, কিন্তু মিলিটারি কামরায় হুজুতি করলে যে জল কত দূর গড়াবে তার ঠিক নেই বলে ঝট করে নেমে পড়ল। কিন্তু অপমানটা পুরো এড়াতে পারল না। নামবার মুহুর্তে পাছায় একটা কেডস পরা পায়ের প্রবল লাথি হজম করতে হল।

বন্ধুরা দৃশ্যটা হয়তো দেখেনি, এই যা ভরসা। ট্রেন তখন চলতে শুরু করেছে, সরিৎ দৌড়ে গিয়ে ফের থ্রি টায়ারে উঠে পড়ল। আবার কন্ডাকটরের খ্যাচ খ্যাচ, ভীতি প্রদর্শন এবং যাত্রীদের দিক থেকেও প্রবল প্রতিবাদ।

সরিং জানে, বোবার শত্রু নেই। তাই চুপ করে কিটব্যাগটা কাঁধে বুলিয়ে দাঁড়িয়ে রইল দরজা ঘেঁষে। কন্ডাকটরকে দুটো টাকাই দিতে হবে, না কি কিছু কমসম দিলেও হবে তা বুঝতে পারছিল না। দুজন আর্মড পুলিশও কামরা পাহারা দেওয়ার জন্য উঠেছে। ডাকাত উঠলে আটকাবে। তবে তারা সরিৎকে কিছু বলল না। আরো জনা তিন চার সরিৎের মতোই ফালতু যাত্রী বাথরুমের গলিতে জড়োসড়ো হয়ে দাঁড়িয়ে আছে। কন্ডাকটর অবশ্য আর বেশী খ্যাচ খ্যাচ করল না। খানিক বাদে যাত্রীরা যে যার ঘুমিয়ে পড়লে দরজার প্যাসেজে দাঁড়িয়ে একটা কাগজের দিকে খুব আনমনে চেয়ে থেকে গম্ভীর গলায় বলল, কোথায় যাবেন?

সরিং পকেট থেকে একটা আধুলি বের করল। কন্ডাকটর আড়চোখে আধুলিটা দেখে বলল, ওতে হবে না। এক টাকা।

সরিং পয়সা বাঁচানোর জন্য মবিয়া হয়ে বলল, জায়গা করে দিতে পারলে দু টাকা দিতাম। জায়গা তো নেই, মেঝেয় বসে যাবো না হয়।

আবার খ্যাচ খ্যাচ। তবে কন্ডাকটর তার নিজের ববাদ লম্বা বেঞ্চটায় সিপাইদের পাশাপাশি সব ক'জন ফালতু যাত্রীর বসার ব্যবস্থা করে দিয়ে এক টাকা করেই নিল। কিছুক্ষণ বাদে সিগারেট-টিগারেট দেওয়া-নেওয়া এবং গল্পসল্পও হতে লাগল।

সরিং অবশ্য বড়ো কন্ডাকটর বা বয়স্ক যাত্রীদের সঙ্গে জমাল না। একা বসে চোখ বুজে রইল, ঘুম আসবে না জানা কথা। মিলিটারির লাথিটা মাজায় জমে টনটন করছে। ফালতু ঝামেলা যত সব। ভাবতে গেলে অপমানে গায়ের ভিতরে জ্বালা ধরে যায়। তবু এত অপমান অনাদরের পরেও যে বসার জায়গা পেয়েছে সেটাই একমাত্র তৃপ্তি।

সেজদি এতকাল তাদের বিশেষ পাত্তা দেয়নি। পয়সা হলে কে কাকে পাত্তা দেয়? সেজদি অবশ্য উন্টেটা কথা বলে। তার যখন পয়সা ছিল না তখন নাকি বাপের বাড়ির লোকেবাই তাকে তেমন পাত্তা দিত না! সংসারের এই সব কুটকচালে ব্যাপার অবশ্য সরিৎ অত তলিয়ে বোঝে না। এতকাল পবে সেজদি যে তার বেকার ছোটো ভাইকে ডেকে পাঠিয়েছে সেইটেই ঢের। সেজদির গরু চরাতেও সে রাজি আছে, পয়সা পেলে। তারপর কলকাতায় একটা কিছু জুটে যাবে ঠিকই। কলকাতা তো আর মালদা নয়।

বড়দা মালদার সিভিল হাসপাতালের ডাক্তার। কান, নাক আর গলার স্পেশালিস্ট। কিন্তু ই এন টি-র ডাক্তারের তেমন প্রাইভেট প্র্যাকটিস থাকে না। বড়দারও নেই। তার ওপর লোকটা ঘরকুনো এবং ব্রিজ খেলার পাগল। যেখানেই বদলী হয়ে যায় সেখানেই ঠিক তার ব্রিজের বন্ধু জুটে যাবেই। ঐ খেলাই বড়দার কাল হয়েছে। ডাক্তারীর ব্যাপারটাকে আদৌ গুরুত্ব না দিতে দিতে রুগীদের কাছে এখন আর তার আদর নেই। পসার না থাকায় বাঁধা মাইনেয় সংসার চালাতে হয়। মধ্যপ্রদেশে মেজদার কাছে মা বাবা থাকে, সরিৎ আর তার ছোড়দি পড়ে আছে বড়দার ঘাড়ে। বউদি প্রথম প্রথম খারাপ ব্যবহার করত না। ছোড়দি এই সংসারে রান্নাবান্না থেকে যাবতীয় কাজ বুক দিয়ে করে। তবু ইদানীং বউদি বস্তিবাড়ির মেয়েদের মতো জঘন্য সব গালাগাল দিয়ে ছোড়দির ভূত ভাগিয়ে দিচ্ছে। মুশকিল হল, ছোড়দিটার বিয়ে হওয়ার চানস খুব কম। ওর কী একটা মেয়েলী রোগ থাকায় ডাক্তার বিয়ে দিতে বারণ করেছে। তবু হয়ে যেত হয়তো, কিন্তু ছোড়দি দেখতে খুব খারাপ। রোগা, কালো, তার ওপর মুখটা এমন ভাঙাচোরা যে, বউদির মতো দেখায়। সুতরাং ছোড়দির আর গতি নেই, বড়দার আশ্রয় ছাড়া। সেইটে সার বুঝে বড় বউদি ছোড়দির ওপর সাত জন্মের শোধ তুলে নিচ্ছে। নিক, তাতে সরিৎের তেমন আপত্তি নেই।

ছোড়দিও বড় কম যায় না, যখন মুখ ছোঁটায় তখন দিনকে রাত করে দিতে পারে। কিন্তু সরিতের বিপদ নিজেকে নিয়ে। বি এস-সি পাশ করে বহুদিন বসে আছে। বয়স ছাব্বিশের কাছাকাছি। বড়দা বউদি খাওয়াচ্ছে বটে, কিন্তু খুশী মনে নয়। সরিৎ সংসারে বাজার হাট করা থেকে জল তোলা পর্যন্ত সবই করে দেয়, তবু হাত খরচ চালাতে তিন চারটে টিউশানি করতে হয় তাকে। বড়দা খাওয়া ছাড়া আর কিছু দেয় না। ইচ্ছে থাকলেও বউদির জন্য দেওয়া সম্ভব নয়।

বেকার জীবনের একটা শূন্যতা আছে। সর্বদাই একটা খাঁ-খাঁ করা ভাব বুকের মধ্যে। মমে হয়, ভিতরের অনেক আগুন কাজে না লেগে আস্তে আস্তে নিভে আসছে। চাকরির জন্য সরিৎ পলিটিকস করেছে, এমপ্লয়মেন্ট একসচেঞ্জ নাম লেখানো থেকে শুরু করে নানাবিধ পোস্টাল ট্রেনিং নিয়েছে, শর্টহ্যান্ড আর টাইপ শিখে রেখেছে। কিছুতেই কিছু হয়নি। সরকারী চাকরির বয়স পার হতে চলল। এখন কেমন যেন একটা নেতিয়ে পড়া ভাব, 'কিছু হবে না' গোছের একটা ধারণার কাছে আত্মসমর্পণের বোঁক এসেছে। শুনেছিল তার গরীব সেজদিব অনেক টাকা হয়েছে, ভাসুরের সম্পত্তি পেয়েছে বিস্তর, তা ছাড়া নগদ টাকাও। কিন্তু তখন তার কাছে যাওয়া বা তার সাহায্য চাওয়াটা ভারী লজ্জার ব্যাপার হয়ে দাঁড়িয়েছিল। কারণ সম্পত্তি পাওয়ার কিছুকাল আগেই সেজো জামাইবাবুর প্লুরিসির চিকিৎসার জন্য ভাইদের কাছে কিছু টাকা হাওলাত চেয়েছিল সেজদি। কেউই টাকাটা দেয়নি। ঘরের ঘটিবাটি গয়না বিক্রি করে সেজদিকে সে যাত্রা সামাল দিতে হয়। অভাবের সংসার থেকে বড় মেয়ে চিত্রাকে পাচার করতে হয়েছিল সেজদিকে মেজদির কাছে, এলাহাবাদে। তখন সেজদিকে সবাই সাহায্য করার ভয়ে এড়িয়ে চলত। সেই সেজদি হঠাৎ বড়লোক হওয়ার পর তার সঙ্গে ঘনিষ্ঠ হতে যাওয়াটা কি লজ্জার নয়?

বহুকাল বাদে সেজদি হঠাৎ একটা চিঠিতে সরিৎকে তার কাছে যেতে লিখেছে। সরিৎ বড়দার সংসার থেকে পালাতে পারলে বাঁচে। সেজদির কাছেও হয়তো তেমন আদর হবে না। না হোক। আদব ভালবাসা কেমন তা ভুলেই গেছে সরিৎ। মধ্যপ্রদেশে মেজদার কাছেও আর আশ্রয় নেই। মেজদা একটা খনিতে কাজ করে। সামান্যই পায়। মা বাবা তার ঘাড়ে থাকায় সে আর কোনো দায়িত্ব নিতে নারাজ। বউদি কেরানীর ঘর করে নিউ কুচবিহারে। কারো সঙ্গে সম্পর্ক রাখে না। মেজদি অবশ্য বড়লোক। কিন্তু বাপের বাড়ির সঙ্গে তারও বিশেষ সম্পর্ক নেই। মেজদিকে ভাল করে চোখেই দেখেনি সরিৎ। বড়লোক বলে ভয়ও পায়। সরিতের কাছে সব দরজাই বন্ধ ছিল। এখন হঠাৎ সেজদির দরজাটা খুলেছে। আদরের কথা সে আর ভাবে না, শুধু একটা আশ্রয়ের কথা ভাবে।

গাড়ি ফরাক্কা ব্যারেজ পার হচ্ছে গুমগুম শব্দ করে। প্রচণ্ড শীত। মাফলারের অভাবে সরিৎ রুমালটা দু'ভাঁজ করে কান ঢেকে কপালে গেরো দিয়ে বসল। পুরোনো পুলওভারে শীত মানতে চায় না। হাত পা অবশ-করা শীত থেকে পরিত্রাণ পেতে সে অনেক হিসেব করে একটা সিগারেট ধরাল। টাকার অভাব তো অনেক বড় জিনিস, তার চেয়েও ছোটো জিনিস আধুলিটা সিকিটা নিয়ে সরিৎকে অনবরত মাথা ঘামাতে হয়। ছোটো জিনিস নিয়ে মাথা ঘামাতে ভিতরের মানুষটাও কি ছোটো হয়ে যায় না?

বাঁ পাশে দুটো পুলিশ, ডানধারে ফালতু যাত্রীরা। যাত্রীদের মধ্যে ঠিক পাশে বসা লোকটাকে সরিৎ মালদার বাজারহাটে দেখেছে। সঠিক পরিচয় না জানলেও মুখচেনা। লোকটা হঠাৎ বলল, আপনি ডাক্তারবাবুর ভাই না?

ই। গস্তীর গলায় আওয়াজ দেয় সরিৎ।

কলকাতায় যাচ্ছেন কি ইন্টারভিউ দিতে নাকি ?

না। দিদির বাড়ি বেড়াতে।

অ। মলিনকে চেনেন ? মলিন সাহা ?

মলিনকে চেনে সরিৎ। তারই বয়সী ছেলে। খুব ফাঁটে একটা স্কুটার হাঁকিয়ে বেড়ায়, পরনে সবসময়ে দারুণ সব জামা প্যান্ট। শুনেছে বড়লোকের ছেলে। মলিনের বোন মলিনা বিখ্যাত সুন্দরী। তার জন্য কলেজের পথে বিস্তর ছেলে লাইন দেয়। সরিৎ দিয়েছে। সরিৎ বলল, চিনি। কেন বলুন তো !

আমি মলিনের বাবা।

শুনে সিগারেটটা ফেলে দেওয়া উচিত হবে কি-না ভাবছিল সরিৎ। ভারী অবাধ হচ্ছিল সে। মলিনের বাপ বলে লোকটাকে বিশ্বাসই হয় না। কালো একটা তুসের চাদর আর মাফলার জড়িয়ে দীনহীনের মতো বসে আছে। কিন্তু দীনেন সাহা যে ডাকের বড়লোক এ সবাই জানে। লোকটা মালদায় স্থায়ীভাবে থাকে না। থাকলে চিনতে পারত সরিৎ। শুনেছে, লোকটার চারটে মিনিবাস চালসা, শিলিগুড়ি, ফাঁসিদেওয়া অঞ্চলে চালু আছে। আর আছে হরিশ্চন্দ্রপুরে আমবাগান, শিলিগুড়িতে ঠিকাদারী। লক্ষ লক্ষ টাকার মালিক দীনেন সাহা বিনা টিকিটে এইভাবে যাচ্ছে দেখে ভারী অবাধ হল সে।

সবিৎ ভেবেচিন্তে সিগারেটটা হাতের আড়াল করেই ফেলল। উঠে বাথরুমে গিয়ে খেয়ে আসবে।

দীনেন সাহা কিন্তু নিজেই পকেট থেকে বিড়ি বের করে বলল, আপনার ম্যাচিসটা একটু দিন তো।

দেশলাইটা দিতে পেরে আর সংকোচ রইল না সরিতের। মুখটা একটু নীচু করে সিগারেটে আর একটা টান দিল।

দীনেন সাহা ম্যাচটা ফিরিয়ে দিয়ে বলল, ট্রেন লেট আছে।

ই, আওয়াজ শুন্য সরিৎ। মনে মনে বলে, হাঁ বে শালা স্বশুর, লেট আছে।

খুব বিষয়ী চোখে সরিৎকে আর একবার দেখে নিয়ে দীনেন সাহা বলল, রেলগাড়ির যা অবস্থা হয়েছে আজকাল, বলার নয়। গত দশ বছর আমি টিকিট কেটে কোথাও যাই নি। বাবস্থা যখন আছে, টিকিট কেটে যাবোই বা কেন ? যাদের ফলতু পয়সা আছে তারা যাক।

সরিৎ সিগারেটটা শেষ করে বাঁচল। লোকটা যদি সত্যিই কোনোদিন তার স্বশুর হয় ?

দীনেন সাহা জিজ্ঞেস করে, আপনি চাকরি-বাকরি করেন নাকি ?

না। চেষ্টা করছি।

মলিনটার তো কাজকারবারে মন নেই। খুব বাবুগিরির দিকে নজর।

সরিৎ একটু হাসে মাত্র। মনে মনে বলে, আমাকে জামাই করলে তোমার কাজকারবারে বিনে মাইন্ডে খটবো, বুঝলে হে স্বশুরমশাই ?

দিদির বাড়ি কলকাতার কোথায় ? দীনেন জিজ্ঞেস করে।

কলকাতায় ঠিক নয়। কাছেই রতনপুর নামে একটা জায়গা। হাওড়া থেকে যেতে হয়।

অ। তা হলে আপনি বর্ধমান নেমে হাওড়ার লোকাল ধরবেন তো ? আমিও তাই। আমি যাবো দশপুরে। জামাইবাবু কী করে ?

চাকরি। সংক্ষেপে জবাব দেয় সরিৎ। খামোখা ভাজর ভাজর করতে ভাল লাগে না। বয়স্ক লোকরা বড় বেশী হাঁড়ির খবর নেয়। তবু এ লোকটা মলিনার বাবা বলেই জবাব দিয়ে যাচ্ছে সরিৎ।

দীনের সাহা বলে, আজকালকার ছেলেমেয়েগুলো হয়েছে তাঁদড়। কথাবার্তা শুনেতে চায় না। দাশপুরে গিয়ে মালটা নিয়ে আসতে বাবুর কোনো অসুবিধেই ছিল না। তা বলে কি জানেন? ফার্স্ট ক্লাসের ভাড়া চাই, আর কলকাতায় সাত দিন থাকার জন্য পাঁচশো টাকা হাতখরচ। শুনেছেন কখনো এমন তাজ্জব কথা! এই তো আমি ছ টাকায় ম্যানেজ করছি। শীল লেনে বোনের বাড়িতে থাকব। সব মিলিয়ে পঞ্চাশ ষাট টাকার বেশী খরচ নয়। মলিনের সঙ্গে দেখা হলে ওকে একটু বুঝিয়ে বলবেন তো, এভাবে চললে দুদিনের বাজারে পাথে গিয়ে দাঁড়াতে হবে।

সরিং ঢুলছিল। তবু মনে মনে বলল, তোমার টাকায় মলিন একদিন পেছাপ করবে, স্বশুরমশাই। তার চেয়ে আমাকে জামাই করো, সব দেখে শুনে রাখব। আজ মেলা বোকো না আর। গুড নাইট ফাদার ইন ল।

স্টেশন থেকে রতনপুর আধ মাইলের ওপর রাস্তা। রিকশা যায়। কিন্তু সরিং রিকশাব কথা ভাবতেও পারে না।

স্টেশনের কাছে চায়ের দোকানে জিজ্ঞেস করে রাস্তাটা বুঝে নিয়ে হাঁটা দিল। মনের মধ্যে নানারকম হচ্ছে। সেজদি কেন ডেকে পাঠিয়েছে, কেমন ব্যবহার পাবে, আশেপাশে ফুটফুটে মেয়েরা আছে কি-না, চাকরির সুবিধে হবে কি-না, দিদিরা কতটা বড়লোক এইসব ভাবছিল।

রাস্তা ফুরিয়ে গেল কয়েক মুহূর্তে। বিশাল বাগান আর গাছে ঘেরা বাড়ির ফটকে ঢুকতেই খাউ খাউ করে তেড়ে এল একটা কুকুর। কুকুরের পিছনেই এক কাপালিক।

ভয় পেয়ে সরিং ফটকের বাইরে ফিরে এল আবার। গেটটা চেপে ধরল সতর্কতামূলক ব্যবস্থা হিসেবে।

কাপালিকটা বলল, কাকে চাই?

শ্রীনাথ ব্যানার্জি।

এই বাড়ি। সোজা ভিতরে ঢুকে যান। কুকুর কিছু বলবে না।

খুব ভয়ে ভয়ে, দৃষ্টিভ্রান্ত, অনিশ্চয় এক মন নিয়ে সেজদির বাড়ির সীমানায় ঢুকল সরিং।

মুড়ি চিবোতে একদম উদাস লাগছে নিতাইয়ের। রোজ মুড়ি কি ভাল লাগে?

যতদিন জ্ঞান হয়েছে ততদিন থেকে এই এক মুড়িই দেখে আসছে সে। শুকনো খাও, ভিজিয়ে খাও। তরকাবি বা তেল মেখে খাও। তাও যে বরাবর জুটেছে ঠিকঠাক তাও নয়। প্রায়ই তার মুড়িটায় ভাতটায় টান পড়েছে। টান পড়লেই আদর বাড়ে। দু দিন ফাঁক গেল তো তিন দিনের দিন এক কৌচড় মুড়ি পেলে মনে হয়, এর কাছে অমৃত কোথায় লাগে!

আজ তবু মুড়ি বড় উদাস লাগে।

নিতাইয়ের মন ভাল নেই। অমল নন্দী গুসকরায় তার স্বশুরবাড়ি থেকে ঘুরে এসে কালই খবর দিয়েছে পুতুলরানী ইয়া মোটাসোটা হয়েছে। দুটো ছেলেপুলের মা। অমল নন্দী নিতাইয়ের কথা তুলেছিল। তাতে নাকি পুতুলরানী বলেছে ওটা তো বন্ধ উন্মাদ।

সে কারণে নয়। আসলে মন খারাপ তার বাণ বশীকরণে, মারণ উচাটনে কাজ হচ্ছে না বলে। প্রতিদিন যাকে মোক্ষম মোক্ষম বাণ মারা হচ্ছে সে মোটা হয় কি করে?

যে তাস্ত্রিকটা শিখিয়েছিল সেটা আসলে চারশ-বিশ। সব কিছুতেই যখন ভেজাল তখন তাস্ত্রিকই বা ভেজাল হবে না কেন ?

আজ সকাল থেকে নিতাই ভাবছে, হিমালয়ে চলে যাবে। সেখানে পাহাড়ে কন্দরে ঝুঁজে আসল সিদ্ধাই কাউকে ঝুঁজে বের করবে। যদি আসল লোককে পেয়ে যায় তবে আর ফিরবে না নিতাই। যেমন তেমন করে হোক পুতুলরানীব গলা দিয়ে রক্ত তুলতেই হবে।

পালপাড়ায় সদর রাস্তার ধারে বাড়ি হাঁকড়াচ্ছে রঘু কর্মকার। শালারা দুনিয়াটাই শান বাঁধিয়ে ফেলছে আস্তে আস্তে। একদিন কি লোকে ঘরের মধ্যেই হালচাষ করবে বাবা ? না হলে জমিই বা পাবে কোথায় ?

রঘু হাঁটুর ওপর কাপড় তুলে রাজমিস্ত্রিদের কাজ দেখছে। নতুন বাড়ির লাগোয়া তার পুরোনো টিনের ঘর। রঘুর মেয়ে এসে বাপকে এক কাপ চা দিয়ে গেল। বঘু রোদে দাঁড়িয়ে চা খাচ্ছে।

নিতাইয়ের এখন একটা চা-তেষ্টা পেয়েছে ঠিকই। সে দাঁড়িয়ে গেল। ইম্পাত একটা এগিয়ে রঘুর দিকে মুখ তুলে ধমকচমক করছে। কুকুরটা লোক চেনে। সোনা চুরি করে বঘুর পয়সা হয়েছে। এ কে না জানে।

নিতাই বলল, চা খাচ্ছে নাকি রঘুবাবু ? বাড়িটা তো খুব সুন্দর হচ্ছে গো। তা তোমার বন্ধির বলিহারী যাই, পশ্চিমমুখো সদর করে কেউ ? এ বাড়ি যে গরম হবে খুব।

বঘু ফিরে দেখে বলল, তাই নাকি ? তবে তো বড় ভুল হয়েছে রে সম্বন্ধীর পুত !

তা একটা হয়েছে। অত গবম চা খেও না। ফুঁইয়ে ঠাণ্ডা করে খাও। বেশী গরম খেলে পেটে ক্যানসার হয়।

বলে নিতাই ঘুরে ঘুরে বাড়িটা দেখে। বলে তিনতলার ভিত গেথেছো মনে হয়।

তাতেও কোনো ভুল হল নাকি ?

না, ভাবছি রঘু স্যাকরার কত পয়সা হয়েছে।

রঘু দীর্ঘশ্বাস ফেলে বলে, আমার আবার পয়সা। আব পয়সাটাই সব রে, নিতাই ? তোর মতো মারণ উচাটিন শিখতে পারলে কত কাজের কাজ হত ! তা শুনলাম তোব বউটা এখনো নাকি মরেনি ?

নিতাই মৃদু হেসে বলে, আস্তে আস্তে মরবে। ভুগে ভুগে। পট করে মরে গেলে কর্মফল ভোগ হবে কি করে বলো।

তা বটে। তবে আমি বলি কি, তুই একদিন গুসকরায় গিয়ে সামনাসামনি বাণ মেরে আয় না। তাতে অনেক কাজ হবে।

ও বাবা ! পুলিশে ধরবে না ? ফাঁসি হয়ে যাবে।

তখন পুলিশকে বশীকরণ করবি।

ইয়ার্কি হচ্ছে ?

রঘুর বউ বেরিয়ে এসে উঁকি দিয়ে দেখে বলল, এই সাত-সকালে ক্ষাপাকে বাগাচ্ছে কেন ? কু-বাকি বলবে যে নামতা পড়ার মতো।

রঘু বউকে বলে, কু-বাকি না বলছে কে ? তোমারটা তো পুরোনো হয়ে গেছে, এর কাছে একটা নতুন রকম শুনি না হয়।

আহা, আমার কথা আলাদা। আমি ঘরের লোক বলি সে একরকম। তা বলে নিতাই বলবে কেন ?

বঘু খুব ভাবকের মতো বলে, কু-বাকি শোনা কিছু খারাপ নয়। তাতে মন মেজাজ

পরিষ্কার হয়ে যায়, মনের ময়লা কেটে যায়, শরীরটাও চনমনে হয়ে ওঠে। বলরে, নিতাই !
জিভ কেটে রঘুব বউ ঘবে ঢুকে যায়।

নিতাই এখন সেয়ানা হয়েছে। কোমরে হাত দিয়ে রঘুকে বলে, আমাকে দিয়ে মেহনত
করাবে তো বাপ ! তোমার চালাকি জানি। তুমি হচ্ছো সেই স্যাকবা যে নিজের মায়ের
সেনা চুরি করে। আগে বলো চা খাওয়াবে, তবে বলব।

খাওয়াবো। রঘু বলল। তারপর সামনের একটা মস্ত জামরুল গাছের তলায় গিয়ে ঠাং
ছড়িয়ে শুড়িতে ঠেসান দিয়ে বলল, শুরু কবে দে।

নিতাই অমনি শুরু করল, তুমি শালা শুয়োরের বাচ্চা..

এমন মুখ ছোটাল নিতাই যে রাজমিস্ত্রিবা পর্যন্ত কাজ থামিয়ে হাঁ করে শুনছিল। বাপ মা
চৌদ্দপুকখ ধরে সে কি গালাগাল। 'রঘু চোখ বুজে বসে মাথা নাড়ে আর মিটি মিটি হাসে।
মাঝে মাঝে বলে ওঠে, বহোত আচ্ছা'। চালাও।

নিতাই একটু ঝিমিয়ে পড়েছিল। আবাব চনমনে হয়ে রঘুর বউ মেয়ে থেকে শুরু করে
মা মাসীর কেছা গাইতে শুক কবে দিল।

আধ ঘণ্টাখানেক ঝিম ধরে বসে শুনল রঘু।

দৌটের কোণে ফেনা তুলে নিতাই থেমে দমা নিতে নিতে বলল, এবার চা খাওয়াও
মাইবি। বোজ রোজ বিনিমাগনা তোমাব ভূত ঝেড়ে দিই, কিছু চেয়েছি কখনো ?

রঘু তাব মেয়েকে ডেকে নিতাইকে চা দিতে বলে দেয়। ফুড়ুক ফুড়ুক হাসছে রঘু।
একটু আগের ম্যাড়ম্যাড়ে চেহারাটায় এখন যেন একটু জলস খুলেছে। বলল, আহা, কী
শোনালি রে নিতাই ! এমন বহুকাল শুনিনি।

এক গ্লাস চা রোজগার করে ভারী খুশি হয় নিতাই ! গাছের তলায় বসে রক্তাষরে
পেঁচিয়ে গরম পেতলের গ্লাসটা ধরেছে সাপটে। ইম্পাত মাঝে মাঝে কোলে লাফিয়ে উঠে
গ্লাসেব গন্ধ শুকছে।

রঘু মিস্ত্রিদের কাজ দেখতে দেখতে বলে, ও বাড়িব খবরটবব আছে নাকি রে কিছু ?

নিতাই উদাস গলায় বলে, খবর আব কি ? বাবু আর গিন্নির মুখ দেখাদেখি নেই।

সে তো পুরোনো কেছা।

আজ এইমাত্র একটা নতুন ছোকবা এসে ঢুকল। কাঁধে ব্যাগ। দেখে মনে হয়, বাড়িতে
সেধিয়ে গেল পাকাপাকি। ছোটো মামাবাবুর আসার কথা ছিল। বোধ হয় সেই।

মামাবাবু কাকাবাবু অনেক আসবে এখন। নবক গুলজার হবে। চোখ কান খোলা
বাখিস। কাল রাতে বাবু বাড়ি ফিরেছিল ?

ফিরেছিল।

কদিন ফিরছে না খেয়াল রাখিস।

চায়ে চিনি কম হয়েছে রঘুবাবু। তোমার মেয়েকে একটু চিনি দিয়ে যেতে বলো।

চিনি সস্তা দেখলি ? এক ডেলা শুড় নে বরং।

তাই দাও। হাত আসুক।

এক জায়গায় বসে থাকলে নিতাইয়ের কাজ চলে না। গুড়ের ডেলাটা মুড়িব কৌচড়ে
ভরে চা-টা তলানি পর্যন্ত খেয়ে উঠে পড়ল নিতাই।

পথে নামতেই মুখোমুখি কালো এবং গম্ভীর প্রকৃতির মদন ঠিকাদারের সামনে পড়ে
গেল। এ লোকটাকে কেন যেন একটু ভয় খায় নিতাই। মাঝে মাঝে মদনকেও বাণ মাঝে
সে।

মদন ভূ কঁচকে গম্ভীর গলায় বলে, এতক্ষণ ও সব অসভ্য কথা বলে কাকে গালাগালি করছিলি ?

তা আমি কি করব ? সাকরা শুনতে চায় যে ।

শখ করে কেউ গালাগাল শোনে ?

শোনে কিনা রঘুকেই জিজ্ঞেস করো না । দেখা হলেই আমাকে খোঁচায় বলার জন্য ।

মিছে কথা বলবি তো মুখ ভেঙে দেবো । বলতে বলতে মদন ধূষি পাকিয়ে এক পা এগোতেই ভারী আত্মসম্মানে ঘা লাগে নিতাইয়ের । এটা কেমন কথা যে, যার তার হাতে সে বরাবর মারধর খাবে, আর অপমান সহ্য করবে ?

নিতাই দু পা পিছিয়ে গেল বটে, কিন্তু আঙুল তুলে শাসিয়ে বলল, খবরদার মদন ! বদন বিগড়ে দেবো কিন্তু !

কিন্তু মদনটা চিরকালে ডাকাবুকো । লাফিয়ে এসে এক খামচায় জটা ধরে ফেলল । নিতাই দেখল, গায়ের জোরে পারবে না । টানতে গেলে জটাও ছিঁড়বে । সুতরাং সে দু হাত ওপরে তুলে নাচতে নাচতে বিকট সুরে চৈচাতে থাকে, বোম কালী ! বোম কালী ! মহাকালী প্রলয়ংকরী ! ভাসিয়ে দে মা ! ডুবিয়ে দে মা ! জ্বালিয়ে দে মা ! কানা করে দে । ঠ্যাং ভেঙে দে । শেষ করে দে মা !

মদন ঠিকাদার কালী দুর্গা মারণ উচাটনে বিশ্বাসী নয় । নিতাইয়ের জটা আব দাড়ির কিছু ক্ষয়ক্ষতি হল । মদনের কিলগুলো সাজঘাতিক, চড়ও ভয়ঙ্কর । ফলে নিতাইয়ের কবের দাঁতের গোড়া টনটন করতে লাগল, মাজায় বিষফোঁড়ার যন্ত্রণা । আরো ব্যথা পেত, কেবল নাচানাচির ফলে মদন তেমন জমিয়ে মারতে পারেনি বলে ।

মার দেখতে কিছু লোক জুটে গিয়েছিল । শেষমেষ তাদের মধ্যেই দু'একজন এসে ছাড়িয়ে দিল । মদন শাসিয়ে গেল, শ্রীনাথের ছেলেকে তুইই তাহলে অসভ্য গালাগাল শেখাচ্ছিস । কোনোদিন আর মুখ খরাপ করতে শুনলে জ্যান্ত পুড়িয়ে মারব ।

মদন চলে গেলে হিঁ হিঁ করে হাসে নিতাই ক্ষাপা । সকলের দিকে চেয়ে বলে, লাগেনি মোটেই । বাহুবন্ধ বাণ চালিয়ে দিয়েছিলাম তো, মদনের হাতে আর শক্তি ছিল না । মারগুলো যেন বাতাসে ভেসে গেল ।

মুখে যাই বলুক, নিতাইয়ের চুলের গোড়া থেকে মাজা পর্যন্ত জ্বালা আর ব্যথা করছে খুব । ভাল করে হাঁটতে পারছে না । দিনটা ভাল করে গড়ায়নি, এর মধ্যেই যে যার বরাদ্দ তুলে নিচ্ছে । বিড়বিড় করে নিতাই বলতে থাকে, একটাই তো নিতাই বাপ, রয়েসয়ে মারলেই হয় । এই নিতাই হিমালয়ে চলে গেলে কেরদানিটা কার ওপর দেখাবে ?

মদন শালা লোকও অদ্ভুত । মল্লিবাবুর সে ছিল জিগির দোস্ত । দুজনের একই সঙ্গে খানাপিনা, একই মেয়েমানুষের কাছে যাতায়াত । মদন ঠিকাদার ছাড়া মল্লিনাথ কারুকে চোখেও দেখতে পেত না । আর মদন ছিল মল্লিনাথের পোষা জীব, এই যেমন ইম্পাত হল ক্ষাপা নিতাইয়ের । মল্লিনাথেরও এরকম হঠাৎ হঠাৎ রাগের পারদ লাফিয়ে একশ দশ ডিগ্রিতে উঠে যেত । মল্লিবাবু কত লোককে যে ঠেঙিয়েছে ! কিন্তু মদন ঠিকাদার নিজে কখনো মারপিট করত না । তার হয়ে মারপিট করার লোক আছে । কিন্তু আজ হঠাৎ মদনার কি যে হল ! নিতাই সহসা বাড়ি ফিরতে সাহস পেল না । মদন যদি গিল্লিমার কাছে গিয়ে লাগিয়ে থাকে যে, সে সজলখোকাকে খরাপ কথা শেখায় ?

আসলে দোষ তো নিতাইয়ের নয় । সজলখোকাবাবু নিজেই এসে শিখতে চায় যে । খরাপ কথা শুনলে খুব খুশি হয়, হেসে গড়িয়ে পড়ে । এই যেমন রঘু সাকরা । নিতাইয়ের

তা হলে দোষটা হল কোথায় ?

নদী পেরিয়ে গরুবাথানের জঙ্গলে গিয়ে ইস্পাতকে নিয়ে অনেক ঘোরাফেরার পর বেলা গড়িয়ে নিতাই ফিরে আসে। কৌচরের মুড়ি যেমন কে তেমন থেকে নিউড়ে গেছে। গুড়ের ডেলাটা বের করে খেয়ে জল খেল নিতাই। তারপর কঞ্চল গায়ে দিয়ে শুয়ে পড়ল।

টের পেল, জ্বর আসছে। বাথার তারসে আসে ওরকম। শুয়ে শুয়ে সে পুতুলরানীর কথা ভাবে। ভারী নাকি মোটাসোটা হয়েছে। তাহলে দেখতে এখন ভালই লাগে নিশ্চয়ই। মহাকালী ভয়ঙ্করী ! শক্তি দে মা। শক্তি দে। মন্ত্রের জোর দে।

যন্ত্রণায় পাশ ফিরে শোষ নিতাই। হিমালয়ে যেতেই হবে। আসল বিদ্যে শিখে আসতে হবে।

১২ সাত ৥

প্রীতমের ঘুম ভাঙে খুব ভোববেলায়, যখন সূর্য ওঠে না, যখন চারদিক এক ভূতুড়ে আবছায়ায় নিঃশব্দ হয়ে পড়ে থাকে। তখনই কি প্রথম ঘুম ভাঙে প্রীতমের ? তা তো নয়। সাবা বাত আরও বহু বার ঘুম ভেঙে যায় তার। খুব তুচ্ছ সব কারণে। কখনো রান্নাঘরের ঐটো বাসনে ধেড়ে ইঁদুরের শব্দ, আবশোলার পাখার আওয়াজ, কখনো বা নিছকই স্বপ্ন দেখে, কখনো এমনিই।

ঘুম ভাঙলেই বড় একা। ভীষণ একা। পাশের ঘরে এক খাটে বিলু আর লাবু, খাওয়ার ঘরের মেঝেয় বিন্দু নামে নতুন কিশোরী ঝি। তাদের ঘুম খুব গাঢ়। প্রীতমের কোনোদিনই গাঢ় ঘুম ছিল না। আর বরাবরই সে ঘুম ভেঙে একাকিত্বকে হাড়ে হাড়ে, মজ্জায় মজ্জায় টের পেয়েছে।

এখন প্রীতম আরো একা। সামান্য সর্দিজ্বর বা ইনফ্লুয়েঞ্জা হলেও বরাবর বিলু ছোঁয়াচ বাঁচিয়ে চলেছে প্রীতমের। এখন দীর্ঘ রোগভোগের কালবেলা চলছে। এখন তার নীরেট নিশ্চিহ্ন একা থাকা একা হয়ে যাওয়া।

কিন্তু মনকে দুর্বল হতে দেয় না প্রীতম। জানে, একবার ভয়কে প্রশ্রয় দিলে আর পরিত্রাণ নেই। মৃত্যুর চেয়েও বহু গুণ ভয়ংকর মৃত্যুভয় ধারেকাছে তরুণ উৎসাহী চিতাবাঘের মতো অপেক্ষা করে আছে। প্রীতম তার অঙ্ককাব নড়াচড়া চোখের নীল আঙুন সব টের পায়, দেখতে পায় তার শরীরের কটাশে ছাপচক্কর। এক মুহূর্তে হাল ছেড়ে দেওয়ার ভাব দেখলেই লাফিয়ে পড়বে।

ঘুম ভাঙলে তাই প্রীতম একা বোধ করা থেকে নিজের পরিত্রাণ খুঁজছিল প্রাণপণে। সে জানে তার বহু বহু দূর পরিধির মধ্যেও কোনো মানুষ নেই। বউ না, আত্মীয় না, ডাক্তার বা বন্ধুও না। সে একা, আর তার শরীরের অজস্র জীবাণু।

এই সব রহস্যময় জীবাণু কি রকম, কোথা থেকে এল তা জাঁহাবাজ ডাক্তারেরাও জানে না। তারা শুধু জানে হাড়ে-মজ্জায় কোন গোপন অদ্ভুত রক্তগথে জীবাণুরা দিনরাত অবিরাম কাজ করে চলেছে।

একদিন তারা মেরুদণ্ডের হাড়ের জোড়গুলি পেরিয়ে মগজে পৌঁছে যাবে। আজও অবশ্য ততদূরে পৌঁছয়নি তারা। প্রীতমের চিন্তাশক্তি আজও পরিষ্কার। থট প্রসেসে কোনো গোলমাল নেই। মাঝে মাঝে সে এখনো জটিল কুটিল সব এনট্রি দুবার না ভেবেই করতে পারে। হায়ার অ্যাকাউন্টেনসিস কয়েকটা বই তার শিয়রের কাছে থাকে, সব সময়ে পাশে

খাতা, ডটপেন।

তবু প্রীতম জাগে এবং কিছুক্ষণ একা বোধ করে। এই বোধের সঙ্গে তার লড়াই চলছে দীর্ঘ কয়েক মাস ধরে। প্রায় হারতে হারতেও লড়াইটা টিকিয়ে রেখেছে সে। বাঘের চোখ রোজ অন্ধকারে দপ দপ করে জ্বলে উঠে তাকে দেখে নেয়।

কিন্তু এক বিপুল গভীর অন্ধকারের বাঁধভাঙা শ্রোত জানালা দরজার সব রক্তপথ দিয়ে ছড়ছড় করে ঘরে ঢুকে আসে। বর্ণ গন্ধ আকারহীন সে এক নিষ্ঠুর অন্ধকারের বিপুল সমুদ্র। এই আবছা ভোরে ভয় ভয় করে। কাছে এগিয়ে আসে কি বৈতরণী? প্রীতম তখন খুব খেলোয়াড়ের মতো চোখ বুজে নিজের শরীরের ভিতরে চিরজাগ্রত অবিরাম ক্রিয়াশীল নিদ্রা ও বিশ্রামহীন জীবাণুদেরই ডাকতে থাকে। বলে, তোমরা তো আছো। তোমরা তো আছো! আমি তো একা নই! মৃত্যু পর্যন্ত তোমরা তো থাকবেই সঙ্গে! তাবপর একসঙ্গেই মরণ আমাদের।

কথাটা কতদূর ঠিক কে জানে। তবে প্রীতম টের পায় যখনই সে ডাকে তখনই শবীরের ভিতরে ঝাঁকে ঝাঁকে কী যেন জেগে ওঠে, সাড়া দেয়। সে কেমন? যেন শরীরের ভিতরে ভিতবে এক রোমাঞ্চ, এক সচেতনতা, এক চনমনে ভাব।

তখন নিশ্চিত হয় প্রীতম। একা কথা বলছে দেখলে বিলু হয়তো তাকে পাগল ভাববে। কিন্তু মাঝরাতে বা খুব ভোরের বেলায় কেউ তাকে দেখার জন্য জেগে থাকে না। তাই প্রীতম একা একা কথা বলে, তোমাদের দোষ নেই। তোমাদের কাজ তোমরা করছ মাত্র। জীবাণুরাই কি শুধু মারে মানুষকে? মানুষ নিজেও কি মারে না? কষ্ট দেয় না? তোমাদের তাহলে দোষ কি বলো? আমার তাতে কোনো দুঃখ নেই। শরীরটাই তো শুধু আমি নয়। এই হাত, এই পা, এই চোখ, কান, এগুলো আলাদা ভাবে কোনোটাই তো আমি নয়। তবে আমি কেন তোমাদের শত্রু ভাববো? তোমরা একটা বাসা দখল কবেছো মাত্র, তোমরা জোগাড় করছ বেঁচে থাকার রসদ। অন্যায় ভাবেও তো নয়। বেঁচে থাকার জন্য মানুষও তো কত কি করে। শুঁবু বলি, আমাকে তোমরা ছুঁতে পারো নি আজ পর্যন্ত। কি করে পারবে? দেহটাই তো আব আমি নয়। এর ভিতরেই কোথাও আছে আব এক আমি, তাকে স্পর্শ করা যায় না।

খুবই আন্তরিকভাবে কথাগুলি বলে প্রীতম। আর তখন তার পূর্বের জানালার অন্ধকার ক্রমে ফ্যাকাসে হতে থাকে। ভবানীপুরের এই গলির মধ্যে সরাসরি জানালার ওপর সূর্যের আলো এসে পড়ে না প্রথমেই। একটু সময় নেয়। ততক্ষণ এবং যতক্ষণ বিলু না ওঠে এবং চতুর্দিকের কাজকর্ম যতক্ষণ না শুরু হয় ততক্ষণ চোঁট অবিরাম নড়ে যায় প্রীতমের। ততক্ষণে সে এক ভয়াবহ লড়াই চালিয়ে যায়। এবং টিকে থাকে একের পর এক দিন।

একটা দিনের বাড়তি আয়ু পাওয়া, আর একটা দিনের সূর্যের আলো দেখাই কি এখন যথেষ্ট বেশী আহ্লাদের বিষয় নয়?

তাই সকালের দিকে প্রীতম ক্লান্ত থাকলেও মনটা একরকম শক্ত সমর্থ হয়ে যায়। চোখে বুজে সে মৃদু মৃদু একটু হাসতেও থাকে। যতক্ষণ না বিলু এসে মশারি তুলে উঁকি দেয়।

মাঝে মাঝে মশারির মধ্যে এক-আধটা মশার গুণগুণ শুনে মাঝরাতে চোখ মেলে চায় প্রীতম। খুব কান পেতে শোনে। বেড সুইচ টিপে আলোও জ্বালায়। অবশ্যই মশা মাঝরাতে জন্ম নয়। সে সাধা তার নেই। হাঁটু গেড়ে বোসো, সাবধানে মশাটাকে খুঁজে বের করো, সেটাকে কোথাও নিশ্চিত্তে বসতে দাও তারপর এগিয়ে গিয়ে দু হাতে চটাস করে মারো। না, এত সব প্রীতমের কাছে বিরাট বিরাট কাজ। মারবার কথা তার মনেও হয় না।

ঘুম ভেঙে সে মশারির মধ্যে কোনো মশার অস্তিত্ব টের পেলে চুপ করে শব্দ শোনে, তারপর ফিসফিস করে বলতে থাকে, তোমরা অন্য জগতের। তোমরা এক চিন্তাশূন্য কর্তব্যের জগৎ থেকে আসা জীব। সুখীও নও, দুঃখীও নও। জেগে থাকো, আমার সঙ্গে জেগে থাকো।

বিলু মশারি তুলে উঁকি দিয়ে জিজ্ঞেস করে, তুমি জেগেছো ?

হঁ।

বাথরুমে যাবে এখন ?

একটু পরে।

পরে আবার কেন ? এখনই সেরে নাও। গরম জল বসিয়ে এসেছি। ওঠো। বলে হাত বাড়িয়ে পাজিকালে করে প্রীতমকে বসায় বিলু। প্রীতম তখন বিলুর শরীরে বাসী জামাকাপড়ের গন্ধ পায়। বিলুর শরীরে কোনো উৎকট গন্ধ নেই। গ্রীষ্মকালেও বিলুর ঘাম হয় না। তবু সব শরীরেই যেমন একটা না একটা গন্ধ থাকে তেমনি বিলুরও আছে। প্রীতম গন্ধটা ভালই বাসে।

দাঁড় কবানোর সময় বিলুর মুখ প্রীতমের মুখের কাছাকাছি এসেছিল। বিলু বলল, আজ ভাল কবে তোমার দাঁত মেজে দিতে হবে। মুখে দুর্গন্ধ হচ্ছে।

দাঁড়ানোটা ভারী কষ্টকর প্রীতমের কাছে। তবু এখনো বিলুর ওপর শরীরের পুণো ভব ছেড়ে দিয়ে দাঁড়াতে পারছে। বিলু বলল, কতবার বলি বাথরুমে যাওয়ার দবকার নেই। বিছানাতেই তো প্লাস্টিকের গামলায় মুখ ধোওয়া যায়।

আমার ঘেন্না করে।

ঘেন্না করলে চলবে কেন ? যেমন অবস্থা তেমনি তো ব্যবস্থা হবে।

এখনো পারছি।

কষ্টও হয় তো ! বিলু বলল।

আমার চেয়ে তোমার কষ্টই বেশী।

আমার কষ্ট। আমার আবার কষ্ট কি !

সকালের দিকে বিলুর মন ভাল থাকে। এই সময়টায় বিলুর শরীরটা যেন মায়ের শরীরের মতো নম্রতা ও সূক্ষ্মতা ভরা থাকে।

বিলুর শরীরে ভর দিয়ে হাঁটি হাঁটি পা-পা করে বাথরুমে যায় প্রীতম। বিলু খুবই সাবধানে তাব বগলের নীচে কাঁধ দিয়ে, কোমরে হাত জড়িয়ে ধবে থাকে তাকে।

বাথরুমে বাচ্চা ছেলের মতো তাকে ধরে থেকে হিসি করায়, তাবপর একটা বেতের চেয়ারে বসিয়ে মাথাটা বুকের সঙ্গে চেপে ধবে গুড়ো মাজনে আঙুল দিয়ে খুব যত্নে তার দাঁত মেজে দেয়। কোষে জল নিয়ে কুলকুচো কবায়।

এসব করতে করতেই বলে, আজ স্নান করাবো তোমাকে।

ভাল লাগে না। বড্ড ঝামেলা।

স্নান না করলে শরীর কষে যাবে।

আজকের দিনটা থাক।

রোজই তো থাকছে। ডাক্তার বলেছে সপ্তাহে তিন দিন স্নান করতে।

আবার ধরে ধরে নিয়ে এসে চেয়ারে বসিয়ে চিরুনিতে চুল পাট করে দেয়। বাসী জামাকাপড় বদলে দেয়। বিছানার চাদর, বালিশের তোয়ালে পালটে দেয়। রোজই চাদর আর তোয়ালে পাল্টানো হয়, ডেটল জলে কাচা হয়। বেডসোর যাতে হতে না পারে তার জন্য

পাঠে সময়ে একটা ওষুধ দেওয়া পাউডার ছড়িয়ে দেয়।

এইসব প্রাতঃকৃত্যের পর শরীরের ভার অনেক কমে যায় প্রীতমের। বিলু তাকে সকালের ঠাণ্ডা থেকে বাঁচাতে জামার ওপর গরম সোয়েটার পরিয়ে দেয়, হালকা শাল টেনে দেয় গলা অবধি।

তারপর বিছানায় হাত রেখে মুখের কাছে ঝুঁকে জিজ্ঞেস করে, আজ কী খাবে ?

এই সময়ে রোজ প্রীতমের মনে হয় বিলু এখন খুব আলতো আমাকে চুমু খেলে কত ভাল হত ! এরকম অবস্থায় খাওয়াই তো নিয়ম। খাবে কি ?

কিন্তু বিলু কখনোই তা করে না। প্রীতমও কোনোদিন এবকম কোনো প্রস্তাব মুখ ফুটে করতে পাবেনি।

প্রীতম বলে, যা খেতে দেবে তাই খাবো।

কোনো বায়না নেই তো ?

প্রীতম স্নিগ্ধ হেসে বলে, না। কোনোদিন বায়না করেছি ? বলো !

বিলু হাসে না। ভূ কঁচকে কেমন একটু আনমনা হয়ে যায়। আব ঠিক এই সময় প্রীতমের মনে হতে থাকে, এবার বিলু একটা দীর্ঘশ্বাস ফেলবে। নিশ্চয়ই ফেলবে।

কিন্তু বিলুর দীর্ঘশ্বাস নেই। কোনোদিনই দীর্ঘশ্বাস ফেলে না বিলু।

প্রীতম বলে, আজকাল ডিমে বড় আঁশটে গন্ধ লাগে। আজ আমি ডিম খাবো না।

এই তো বায়না করছ ! করো না বলে ?

এটা তো না খাওয়ার বায়না। একে বায়না বলে না।

এটাও বায়না। বিলু বলল, কিন্তু হাসল না। অথচ এবকম কথায় একটু হাসটাই কি নিয়ম নয় ?

বিলু বলল, ঠিক আছে, মাখন দিয়ে ডিমের পোচ করে দিচ্ছি, তাহলে অতটা আঁশটে গন্ধ লাগবে না।

দাও। আর জানালার কাছে ইজিচেয়ারটা পেতে দাও। একটু বাইরেটা দেখি।

বিলু লোহার ইজিচেয়ারটা পেতে দেয়, ধরে ধরে নিয়ে গিয়ে বসায়, সময়ে গলা পর্যন্ত চাপা দিয়ে দেয়।

প্রীতম বিলুর দিকে চেয়ে বলে, সকালে উঠে রোজ একটু ফিটফাট হয়ে নাও না কেন ? চুল উড়ছে, সিঁদুর লেপটে আছে, ওরকম চেহারা দেখতে কি ভাল ?

আমাব এখন সাজবারই সময় কি-না !

প্রীতম ভূ কঁচকে বলে, কেন ? তোমার কি দুঃসময় চলছে ?

তবে কি সুসময় ?

তাও নয়। কিন্তু তোমাকে দেখে মনে হয়, তুমি সব হাল ছেড়ে দিয়ে বসে আছো।

বিলু মৃদু স্বরে আত্মবিশ্বাসহীন গলায় বলে, হাল ছাড়ার কি আছে ! ঘরে কণী থাকলে কার সাজতে ইচ্ছে করে বলো তো !

প্রীতম ঘুনঘুনে নেই-আঁকড়া স্বরে বলে, না, ওরকম দেখতে ভাল লাগে না। ও ভাবে কখনো আমার সামনে এসো না। আমার খারাপ লাগে।

আচ্ছা। বলে বিলু চলে যায়।

জানালা দিয়ে কিছুই দেখার নেই প্রীতমের। ইজিচেয়ারে আধশোয়া হয়ে রাস্তা দেখা যায় না। শুধু কয়েকটা বাড়ির তিন বা চারতলা আর আকাশ দেখা যায়। কিন্তু প্রীতমের কোনো অনামনস্কতা নেই। যেটুকু দেখে সেটুকুই যথাসাধ্য চেতনা আর প্রখর অনুভূতি

দিয়ে গ্রহণ করে অভ্যস্তরে ।

বিলু খাবার নিয়ে আসে । শ্রীতমের গলায় বাচ্চাদের মতো একটা ন্যাপকিনের বিপ বেঁধে দেয় । তারপর পাশে একটা টুলে বসে আস্তে আস্তে খাইয়ে দেয় তাকে । খাওয়া জিনিসটা বরাবরই শ্রীতমের কাছে খুব বিরজিকর ছিল । খেতে হবে বলেই তার খাওয়া । বরাবর সে খায় ছড়িয়ে ছিটিয়ে এবং খুব তাড়াতাড়ি । বিলু এখন তা হতে দেয় না । শ্রীতমও বুঝেছে খাওয়াটা খুবই জরুরী ব্যাপার । যদি বেঁচে থাকতে হয়, যদি লড়াই চালাতে হয় তবে যথেষ্ট রসদের দরকার ।

শ্রীতম মুখ ফিরিয়ে বলে, আজকাল আমার খাওয়া কি খুব বেড়ে গেছে বিলু ?

অন্য বউ হলে বলত, ছিঃ ছিঃ, ওসব কথা কি বলতে আছে ? বিলু গম্ভীর মুখে বলল, আরো একটু বাড়লে ভাল হয় ।

শ্রীতম লক্ষ করল, বিলুর চুল এখনো কঁক্ষ, এলোমেলো, কপালে সিঁদুর লেপটানো । এ নিয়ে আর বলতে গেলে সকালের নরম-সরম বিলু আর নরম-সরম থাকবে না । বেগে যাবে, ঠাণ্ডা কঠিন এক ব্যবহার দিয়ে সারাদিন প্রতিবাদ জানিয়ে যাবে ।

খাওয়া শেষ হলে শ্রীতম মুখ তুলে ফের জানালা দিয়ে বাইরে চেয়ে থাকে । ও-ঘরে লাবু ঘুম ভেঙে মাকে ডাকতে থাকে, মা ! ও মা ! মা ! ও মা ! মা ! ও মা ! ঠিক নামতা পড়ার মতো । বিলু বোধ হয় বাথরুমে । সাড়া দিচ্ছে না । কিন্তু যতক্ষণ না সাড়া দেবে ততক্ষণ এক সুরে, এক গলায় একঘেয়ে ডেকেই যাবে লাবু ।

মেয়েকে পারতপক্ষে ডাকে না শ্রীতম । বড় মায়া । এই বাসায় এই এক পুকুর ভালবাসার ডুবজল অপেক্ষা করে আছে তার জন্য । বড় গভীর জল । একবার পা বাড়ালে তলিয়ে যেতে হবে । এখন ভালবাসায় ভেসে যেতে নেই । মন নরম হবে, মৃত্যুভয় এসে যাবে তবে । শ্রীতম তাই কান খাড়া করে মেয়ের ডাক শোনে, কিন্তু নিজে তাকে ডাকে না বা সাড়াও দেয় না । লাবুর সঙ্গে তাব এখন আড়ি ।

ঝিটা বাড়িতে নেই, দোকানে গেছে । শ্রীতম লাবুর ঐ অবিকল পাখির স্বরের ডাক সহিতে পারছে না । ছটফট করে ভিতরটা । আপনা থেকেই শরীরটা দাঁড়িয়ে পড়তে চায় । সরু হাত তুলে সে কপাল টিপে ধবার এক অক্ষম চেষ্টা করে ।

বাথরুম থেকে বন্ধ দবজা ভেদ করে বিলুর ক্ষীণ স্বর এল এই সময়ে, আসছি-ই ।

লাবু শোনে এবং চুপ করে । মেয়েটা কেমন একরকম হয়ে যাচ্ছে দিন দিন । মাকে ছেড়ে এক মুহূর্ত থাকতে চায় না । সারা দিন খাওয়া নিয়ে বিলু ওকে মারে, বকে । বিলুকে ভয়ও পায় ভীষণ, আবার অবাধ্যতাও করে যায় অনবরত । মার খেলে মায়ের কাছ থেকে সরে যায় না, পালায় না । একই জায়গায় দাঁড়িয়ে অসহায় ভয়ে আর বাথায় চিৎকার করতে থাকে ।

যত ভাববে তত মায়ার পলি জমবে মনের মধ্যে । তাই প্রাণপণে নিজের অনুভূতির অন্য জগৎজাগিয়ে তুলতে চেষ্টা করে শ্রীতম । আগে উদাস ছিল শ্রীতম, এখন সে অনেক অনুভূতিপ্রবণ হয়েছে । কীট পতঙ্গ জীবাণুদের জগৎকে সে আজকাল স্পষ্ট টের পায় । বাড়িময় যে সব আরশোলা ওড়ে, যে একটা দুটো ইঁদুর বা ছুঁচো আনাগোনা করে তাদের গতিবিধি, সময়জ্ঞান ও চরিত্র সম্পর্কে সে অনেক অভিজ্ঞ হয়েছে ইদানীং । একটা দুধের শিশু বেড়াল অনেক তাড়া খেয়েও এই ফ্ল্যাটের আনাচে কানাচে নাছোড়বান্দা হয়ে ঘুরে বেড়াত । তাকে দু চোখে দেখতে পারত না শ্রীতম । এখন সেই বেড়ালটা বড় হয়েছে । সারা দিন পাড়া বেড়ায়, কিন্তু মাঝে মাঝে এসে শ্রীতমকে দেখা দিয়ে যায় ঠিকই । আর

রোজ রাতে নিয়মিত এসে প্রীতমের খাটের তলায় শুয়ে থাকে। কখন শুতে আসবে বেড়ালটা তার জন্য ঘুমের আগে উন্মুখ হয়ে থাকে প্রীতম, এলে নিশ্চিত হয়।

মানুষ কিভাবে বেঁচে থাকবে তার তো কোনো বাঁধাধরা ছক নেই। প্রীতম এইভাবে বেঁচে আছে, সুতরাং যতদূর সম্ভব এই বাঁচাটাকে সে সইয়ে নেয়। খুব কঠিন কাজ কিন্তু প্রীতমকে পারতেই হবে।

লাবু ছিল তার প্রাণ। যতক্ষণ বাসায় থাকত প্রীতম ততক্ষণ লাবু ঐটুলির মতো লেগে থাকত তার সঙ্গে। মেয়ের প্রতি তার ভালবাসা ছিল একবুক তেষ্টার মতো, সহজে মিটতে চাইত না। মেয়েকে ছুঁয়ে না থাকলে রাতে ঘুমোতে পারত না প্রীতম। অসুখ হওয়ার পর বিলু লাবুকে সরিয়ে নিয়েছে। সরিয়ে নেওয়া নয়, যেন ছিড়ে নেওয়া। প্রথম দিকে লাবুকে ছাড়া খাঁ খাঁ শূন্য লাগত বুক। তারপর সয়েও গেছে। আগে আগে লাবু বাবার কাছে আসতে না পারায় ভীষণ কাদত, নিষেধ মানতে চাইত না, ফাঁক পেলেই এসে ঝাঁপিয়ে পড়ত কোলে। কিন্তু ক্রমে সেও দূরত্ব রক্ষা করে চলতে শিখল তো! পারতপক্ষে প্রীতমও আর মেয়েকে ডাকে না কথা বলে না। তাও সইল তার।

বিলুব সঙ্গে বরাবরই একটু দূরত্ব ছিল প্রীতমেব। ঝগড়াঝাঁটি নয়, মন কষাকষিও নয়, ঠাণ্ডা লড়াইও বলা যায় না। তবে বিলু একটু অন্যরকম, কোনোদিনই প্রীতমেব কাছে নিজের মনটা সবটুকু খুলে দেয়নি সে। বিয়ের পর প্রথম ভাব হলে মানুষ কত আগড়ম্ব বাগড়ম্ব বলে, কত তুচ্ছ কথার পাহাড় বানায়। বিলু কোনোদিন সেরকম ছিল না। কথা বরাবর কম বলত। কিন্তু একথাও বলা যাবে না যে, বিলুর প্রীতমের প্রতি ভালবাসা নেই। বললে খুব মিথ্যা বলা হবে, ভুল বলা হবে। গড়পড়তা বাঙালী বউরা যা করে বিলু তার চেয়ে এক রঙি কম করে না তার জন্য। কিন্তু তার ঐ সেবাব মধ্যে কোথায় যেন দক্ষ নার্সের পটভূতি আছে, কোনো আবেগ নেই। অন্য কারো স্বামীর এবকম শক্ত অসুখ হলে চৌদ্দবার কেঁদে ভাসাত, বিলু একদিনও চোখের জল ফেলে নি। কিন্তু যারা কেঁদে ভাসায় তারাও হয়তো ওষুধ দিতে এক-আধবার ভুল করে, রুগীকে সেবা করতে কবতে হয়তো বা কখনো বিরক্তি প্রকাশ করে ফেলে। বিলুর সেরকম ভুল হয় না, বিরক্তির প্রকাশও তার নেই। তবে বিলুর মুখ সর্বদাই গম্ভীর, বিষম। যে স্থায়ী বিরক্তির ছাপ বিলুর মুখে আছে তার সঙ্গে প্রীতমের অসুখের কোনো সম্পর্ক নেই।

বিয়ের আগে বিলুব সঙ্গে ভাব ছিল না প্রীতমেব। তবে শিলিগুড়িতে বিলু মাঝে মাঝে তার পিসি বাডি বেড়াতে যেত। তখন দেখেছে। বিলুব হাতে কখনো এক গ্লাস জল বা এক কাপ চা খেয়েছে প্রীতম। দুটো চারটে কথাবার্তাও হত তখন। পবে সেই পিসিই বিয়ের সম্বন্ধ আনে এবং বিয়ে হয়েও যায়। মনে আছে, প্রথম রাতে বিলু তাকে বলেছিল, তুমি খুব শান্ত স্বভাবের। আমার শান্ত মানুষ খুব ভাল লাগে।

এটা কি ভালবাসার কথা নয়?

আজকাল ঘরবন্দী প্রীতম প্রায়ই ভালবাসার কথা ভাবে। কিন্তু ভালবাসার কথা ভাবলে কখনোই তার বিলুর মুখ মনে পড়ে না, কি আশ্চর্য! মনে পড়ে বনগন্ধ ভবা শিলিগুড়ির মাঠঘাট, আকাশ উপড় করা শীতের ঢালাও রোদ, নীলবর্ণ মেঘের মতো দিগন্তে ঘনীভূত পাহাড়, মহানন্দার সাদা চর, মনে পড়ে তাদের ভবা সংসারের কলরোল। ভালবাসা ছিল ঝুমকো ভোরে ফুল চুরি করতে যাওয়ায়, ভালবাসা মাথা থাকত জোহা চালের ফেনা ভাতে গলে-যাওয়া ঘিয়ের গন্ধে, হাইস্কুলের নরেশ মাস্টার মশাইয়ের বিজবিজে কাঁচা পাকা লাড়িওলা মুখে ভালবাসার নিবিড় একটা ছায়া দেখেনি কি? প্রীতম, শতম, রূপম আর মরম ৬০

এই চার ভাইয়ের মধ্যে ছিল অবিরাম খুনোখুনি ঝগড়া, বিছানায় বালিশকে গদা বানিয়ে প্রবল মারপিট, খাওয়া নিয়ে, খেলা নিয়ে, জামাকাপড় নিয়ে বরাবর রেষারেষি। এখন মনে হয় তার মধ্যেই ভালবাসার কীট গোপনে গোপনে সুড়ঙ্গ খুঁড়ে এর হৃদয়ের সঙ্গে ওর হৃদয়ের পথ করে দিয়েছিল। আর মা ? বাবা ? কোনোদিন তারা কেউ তো মুখ ফুটে বলেনি, প্রীতম তোকে বড় ভালবাসি। কিংবা, তুই বড় ভাল ছেলে। জ্ঞান বয়সে তাদের মুখে কখনো আদরের কথা শোনেনি প্রীতম, তবু সেই বাড়ি বুকসমান ভালবাসার জলে ছিল আধডোবা। চিরদিনই কলকাতা ছিল প্রীতমের কাছে নিষ্ঠুর প্রবাস। আজও তাই আছে। ভবানীপুরের এই ফ্ল্যাটটা তার কাছে নিতান্তই এক বাসাবাড়ি, মেসবাড়ির মতো, হাসপাতালের মতো একটা নিরাপদ আশ্রয় মাত্র। এখানে ডুবজলে স্নান নেই।

যখনই শিলিগুড়ির কথা, ভালবাসার কথা মনে পড়ে তখনই বৃকের মধ্যে নাটবন্টু ঢিলে হয়ে একটা কপাট যেন ভেঙে পড়তে চায়। ভাবী ঘুনঘুনে এক নেই-আঁকড়া ভাব আসে মনে, শিশু হয়ে যেতে ইচ্ছে জাগে। সেই দুর্বলতাকে প্রশ্রয় দেয় না প্রীতম। কাগজ খাতা ডটপেন নিয়ে অঙ্কে ডুবে যাওয়ার চেষ্টা করে।

আচমকাই কলিং বেল বেজে ওঠে বি-বি করে।

প্রীতম তখনো আনমনে ভালবাসাব কথাই ভাবছে। ভাবছে, তুমি কি অকৃতজ্ঞ নও প্রীতম ? বিলু কি তোমার জন্য নিজেকে নিংড়ে দিচ্ছে না ? দিচ্ছে তো ? শুধু সকালে মুখের কাছে মুখ এনেও চুমু খায়নি বলেই কি এ বাড়িতে ভালবাসা নেই ? এ কেমন ইল্লতে কথা ?

কে গিয়ে দবজা খুলে দিল সদরের। হঠাৎ একটা আফটার শেভ লোশনের সুগন্ধে ভরে গেল। শুধু আফটার শেভ নয়, সঙ্গে হয়তো আরও কোনো সুগন্ধ আছে।

এ গন্ধ চেনা প্রীতমের। মুখে হাসি নিয়ে চোখ তুলে সে বলল, আসুন।

আজ ভালই আছেন মনে হচ্ছে ! নইলে এই সাতসকালে কেউ কি আকাউন্টস নিয়ে বসে ? বলতে বলতে অরুণ ইজিচেয়ার টেনে এনে বসে।

প্রীতম লক্ষ করল, অরুণ জুতো সুদ্ধ ঘরে ঢুকেছে। প্রীতম এ নিয়ে কাউকে কিছু বলতে পাবে না কখনো। কিন্তু বিলু পারে। অরুণের এ ধরনের ভুল প্রায়ই হয় এবং বিলু বকলে ফের গিয়ে জুতো ছেড়ে আসে। আজও বিলু ওকে বকবে ঠিক।

প্রীতম কিছুতেই অরুণের জুতো জোড়া থেকে চোখ তুলতে পারে না। কী সাজঘাতিক দামী এবং ঝকঝকে উঁচু হীলের জুতো ! জুতো থেকে চোখ তুললে গাড় খয়েরী রঙের ঢোলা প্যান্ট এবং তার ওপর ডাবল ব্রেস্টেড কোট, কোটের ফাঁকে গাঙ্গ্রীপূর্ণ টাই চোখে পড়বে। তার ওপর অরুণের সুন্দর গোলপানা ফর্সা মুখখানা। বেড়ালের মতো একটু কটা চোখ, সামান্য লালচে এক ঝাঁক চুল, চোখ দুখানা বিশাল। অভিজাত্যের স্থায়ী ছাপ তার সর্বঙ্গে। হাতের আঙুলগুলো দেখ, কী মোলায়েম, লাল টুকটুকে পেলব।

প্রীতম হাসছিল। বলল, আজ একটু ভালই।

অরুণ খুব চোখা হেসে বলল, খুব ভাল কি থাকবেন আজ ! ডাক্তার যে আজ বিকেলে আবার গোটা দশ বারো হুঁচ ফোটাবে। আমি ঠিক ছটায় গাড়ি নিয়ে চলে আসব।

প্রীতম অস্বস্তি বোধ করে বলে, আপনার আসার কী দবকার ? বিলুই ঠিক নিয়ে যেতে পারবে। এতদিন তো নিয়ে গেছে।

বিলু পারবে না, বলিনি তো ! তবে কষ্ট হবে। দিন দিন কলকাতার কনভেয়ান্স কেমন ডিফিকাল্ট হয়ে দাঁড়াচ্ছে জানান তো ! ঠিক সময়ে ট্যাকসি না পেলে ? ডেটটা মিস হওয়া

কি ভাল ?

প্রীতম কৃতজ্ঞতাবোধে অস্বস্তি বোধ করে সবচেয়ে বেশী । একটা লোক নিজের পেটল পুড়িয়ে গাড়ি নিয়ে আসবে, নিয়ে যাবে, ফের দিয়েও যাবে—এতটা কি পাওনা প্রীতমের ওর কাছে ? অথচ অরুণের জন্য কিছু করারও নেই তার ।

হতাশ হয়ে প্রীতম বলে, ঠিক আছে তাহলে ।

ঠিকই আছে । খামোকা আমার অসুবিধের কথা ভেবে নিজেকে বাস্তব করেন কেন ? আমার অসুবিধে হচ্ছে না ।

অরুণ এরকম । কোনো জড়তা নেই, অকারণ বেশী ভদ্রতাব ধার ধারে না । সবদিক দিয়েই ঝকঝকে প্রকৃতির মানুষ । ভীষণ ধারাল । উচিত কথা বলতে বা কথো দাঁড়াতে ভয় খায় না প্রীতমের মতো ।

রান্নাঘর থেকে এলোচুল দু হাতে পাট করতে করতে তডিং পায়ে বিলু ঘরে ঢুকতেই প্রীতমেব বুক কেঁপে ওঠে । এইবার ঠিক অরুণের পায়ের জুতোজোড়া নজবে পড়বে বিলুর । সে চোখ কঁচকে উদাত মারের অপেক্ষা করতে থাকে ।

বিলু খুব ঝাঁঝালো গলায় অরুণকে বলে, আমার কমলা রঙের উলের কী হল ? কবে থেকে বলছি, মেয়েটা জানুয়ারি থেকে স্কুলে যাবে ! ওর ইউনিফর্ম লাগবে না ?

অরুণ বিন্দুমাত্র অপ্রতিভ না হয়ে অন্য দিকে চেয়ে বলে, কমলা রঙ কাকে বলে তাই তো আমি বুঝি না । আমি একটু রঙকানা আছি ।

তা জানি । কানা শুধু নয়, ঢাসাও । কতবাব জুতো নিয়ে কগীর ঘরে ঢুকতে বাবণ করেছি ?

॥ আট ॥

বিয়ের পর যখন অরুণ এ বাড়িতে আসত তখন প্রীতম ওর সঙ্গে বিলুর সঠিক সম্পর্কটা জানত না । আজও জানে কী ? আসলে মানুষে মানুষে সঠিক সম্পর্ক বলে তো কিছু নেই । সম্পর্ক পাল্টে যায় ।

সাহস করে একদিন তবু প্রীতম জিজ্ঞেস করেছিল বিলুকে, অরুণের সঙ্গে তোমার বন্ধুত্বটা কেমন ছিল ? খুব গাঢ় ?

বিলু খুব একটা সংকোচ বা লজ্জা বোধ করেনি প্রশ্ন শুনে । তবে চোখের পাতাটা একটু নত করেছিল । কয়েক সেকেন্ডের দুর্বলতা মাত্র । তারপর বলল, আমরা একসঙ্গে স্কটিশ চার্চে পড়তুম বলিনি তোমাকে ?

বলেছো ।

অরুণ ছিল আমার দু বছরের সিনিয়র । এমন পাজি না, একদিন ওর পোষা বেজীটাকে এনে ছেড়ে দিয়েছিল করিডোরে । মেয়েদের মধ্যে সে কী চটচটে আর আতঙ্ক ! আমি তো একটা জানালায় উঠে বসে রইলুম ।

সেই থেকে তোমাদের ভাব ?

সেই থেকেই । তবে আরও অনেক কাণ্ড আছে । শুধু যে ইয়ার্কি করে বেড়াত তা নয় । ইয়ার্কিটা ওর মুখোশ । ভিতরে ভিতরে ভীষণ সিরিয়াস ।

অরুণ তোমার চেয়ে বয়সে বড়, ছাত্র হিসেবেও সিনিয়র । তবু ওকে তুমি তুমি করে ডাকো কেন ?

ঠোট উটে বিলু বলল, ওকে আপনি বলতে যাবে কে ? মেয়েরা সবাই ওকে নাম ধরে
তুমি তুমি করে বলত। তুমি কি অরুণ সম্পর্কে জেলাস ফিল করো প্রীতম ?

না, না, তা নয়। লজ্জা পেয়ে প্রীতম বলেছিল, আসলে আমি মানুষের সম্পর্কে জানতে
ভালবাসি।

বিলু মৃদু হেসে বলল, তুমি কী জানতে চাও জানি। তুমি খুব শাস্ত, ভালমানুষ। কিছু
মনে করবে না তো ?

না, কী মনে করব ? মনে করার কিছু থাকলে কবেই তা বলে ফেলতাম।

বিলু একটু যেন আধোগলায় বলল, ওর সঙ্গে আমার ভাব ছিল। খুব ভাব। হয়তো
বিয়েও করতুম।

করলে না কেন ?

একটা কথা ভেবে।

কী কথা ?

ও ভীষণ মেয়েদের সঙ্গে মিশত। বাছবিচাব ছিল না। ওরকম পুরুষ একটু
আনফেইথফুল হয়। জানো তো, পুরুষের প্রকৃতির নিয়মেই পলিগেমাস। তারা কখনো
একজন মহিলাকে নিয়ে খুশি নয়। তার ওপর অরুণ আবার ভীষণ ফ্রী ওয়াল্ড তরঙ্গ
বিশ্বাসী। ও বিয়ে, বন্ধন, সংসার, সম্ভান ইত্যাদি রেসপনসিবিলিটি একদম জানে না। আমি
বাপু অতটা আধুনিক নই। তাই ভেবেচিন্তেই ওকে বিয়ে করিনি, তোমাকে করেছি।

সেজনা আজ তোমার দুঃখ হয় না বিলু ?

ধূস, দুঃখ কিসের ? আমার অত সেন্টিমেন্ট নেই। যা করেছি তা হিসেব করেই করেছি।

আমার সঙ্গে অরুণকে কখনো তুলনা করতে ইচ্ছে হয় না তোমার ?

যাঃ ! নেভার। তুলনা করব কেন ? ও একবকম তুমি অনারকম।

প্রীতম হাসিঠাট্টার হালকা চালটা বজায় রেখেই বলল, ধরো আমি তো বেশ রোগা, আর
অরুণ কত স্বাস্থ্যবান। অরুণ আমার চেয়ে অনেক ফর্সা। ও প্রচণ্ড বড়লোক আর দুর্দান্ত
স্মার্ট—যে গুণগুলো আমার নেই।

তেরনি তুমি আবার শাস্ত, দায়িত্বশীল, গভীর মনোব মানুষ। সকলের তো সব গুণ থাকে
না। শোনো তুমি কি অরুণ সম্পর্কে সত্যিই জেলাস নও ?

প্রীতম হাসিমুখে মাথা নেড়ে বলল, না, নই বিলু। বরং অরুণকে আমার বেশ পছন্দ।

বিলু খুব গভীর মনের মেয়ে নয়, প্রীতম জানে। তবু সেদিন বিলু খুব গভীর অতল এক
চোখে প্রীতমের মুখখানা মন দিয়ে অনেকক্ষণ দেখল। তারপর শুকনো গলায় বলল,
অরুণের এ বাড়িতে আসা যদি তোমার পছন্দ না হয় তবে বলে দিও, আমি ওকে বারণ করে
দেবো। তাতে ও কিছু মনেও করবে না।

ছিঃ বিলু !

বিলু নতমুখ হয়ে বলল, তুমি অত করে জানতে চাইছিলে বলে আমার মনে হচ্ছিল, তুমি
বোধহয় ব্যাপারটা ভাল চোখে দেখছ না।

প্রীতম খুব স্পোর্টসম্যানের মতো কলার-উঁচু করা গলায় বলে, আমার কাছে ব্যাপারটা
নিতান্তই মজার। মফস্বলের ছেলে তো, আমরা জানি, প্রাক্তন প্রেমিকরা তাদের হাতছাড়া
প্রেমিকাদের মুখোমুখি বড় একটা হয় না। তাহলে আর জীবনে ট্রাজেডি বলতে কিছু থাকে,
বলো ?

এ কথায় বিলু হেসে ফেলল। বলল, দেব-দানবের যুগ তো এখন আর নেই।

ফলে এ বাড়িতে অরুণের যাতায়াত বহাল থাকল। ঢাকা চাপার কিছু রইল না।

এখন বিলুর ধমক খেয়ে এই যে অরুণ উঠে গেল বাইরের ঘরে, জুতো ছেড়ে আসতে, তার মধ্যেও যেন অরুণের ওপর বিলুর গভীর অধিকারবোধ ফুটে উঠল। বকের মধ্যে সামান্য চিনচিন করে ওঠে প্রীতমের। এত অধিকারবোধ নিয়ে আর এত জোরের সঙ্গে বিলু কোনোদিন তাকে কোনো ছকুম করেনি।

কিন্তু মানুষে মানুষে স্থায়ী সম্পর্ক বলেও তো কিছু নেই। প্রেমিকা চিরকাল প্রেমিকা থাকে না, স্ত্রীও থাকে না স্ত্রী। এইসব সম্পর্ক ভাঙচুর করতে কবতে পৃথিবী খুব দ্রুত এগোচ্ছে।

মোজা পায়ে অরুণ ফিরে এসে বসে এবং বলে, তোমার বড় নীচু নজর বিলু, আজ আমি এত সুন্দর পোশাক পাবে এসেছি, তবু তুমি আমার জুতো জোড়াই দেখলে ?

বিলু একটু কঠিন গলায় বলে, এটা রুগীর ঘব মনে রেখো।

সে কথা ঠিক। ভুলে যাই। বলে একটু লজ্জাব হাসি হাসে অরুণ।

প্রীতম লক্ষ করে, সব কিছু অরুণকে মানাল। ওব ওঠা, হাঁটা, হাসি, লজ্জা এ সবকিছুই যেন বহুকাল ধরে বিহাসাল দিয়ে যত্নে রপ্ত করা।

আবার একটু চিনচিন করে প্রীতমের।

বিলু কথার ফাঁকেই গিয়ে মেয়েকে বাথরুমে পৌঁছে দিয়ে ফিরে এসে অরুণকে বলে, সবকিছুই তো আজকাল তুমি ভুলে যাও। একটা হইল চেয়ারবের কথা বলেছিলাম, মনে আছে ?

ভুলিনি। কিন্তু প্রীতমবাবুর সঙ্গে আমার কথা হয়েছে, উনি হইল চেয়ার পছন্দ করেন না।

বিলুর মুখ থমথমে হয়ে যায়। প্রীতমের দিকে চেয়ে মৃদু স্বরে বলে, হইল চেয়ার হলে তোমার একা থাকতে তেমন কষ্ট হবে না।

বলতে নেই, আগের তুলনায় তার ধৈর্য ও স্বৈর্য বেশ কমে আসছে। যেমন বিলুর এই হইল চেয়ারের ব্যাপারটায় এখন হল। অত্যন্ত তেতো স্বরে সে বলল, না না, ওসব আমি পছন্দ করি না। ঘরে একটা জবরজং জিনিস ঢুকিয়ে জঙ্গল বানাতে হবে না।

যদি এরকম স্বরে অরুণ কিছু বলত তাহলে বিলু ওকে তেড়ে মারতে যেত। কিন্তু প্রীতমের সঙ্গে বিলুর ব্যবহার অন্যরকম। কথাটা শুনে বিলু নিজের নখের দিকে চেয়ে রইল কিছুক্ষণ, তারপর বলল, তুমি না চাইলে অন্য কথা। হলে তোমার সুবিধেই হত।

আমার কোনো সুবিধে হবে না বিলু। কেন কথা বাড়াচ্ছে ? বালিশে এলিয়ে চোখ বোজে প্রীতম। চোখের পাতাটা পুরো বন্ধ হওয়ার আগেই এক পলকের দৃশ্যটা চোখে পড়ল। অরুণ হাতের ইশারায় বিলুকে সরে যেতে বলছে।

বাথরুম থেকে লাবুও ডাকছিল। বিলু নিঃশব্দে চলে যায়।

অরুণ চেয়ারটা বিছানার আরও একটু কাছে টেনে এনে বসে। নরম গলায় বলে, ঘরে বসে থেকে থেকে তো পড়ে গেলেন মশাই ! একটা কথা বলব ? একদিন চলুন দিল্লি বা বম্বে রোড ধবে খানিকটা বেড়িয়ে আসি। এবছর ওয়েদারটাও ভাল।

ইচ্ছে করে না যে ! শরীরে অত শক্তিও নেই।

দূর মশাই ! এই মনোবল নিয়ে আপনি লড়ছেন ? শক্তি কারো শরীরে, কারো মনে। মনটা শক্ত করুন, ঠিক পারবেন।

ভাল লাগে না ।

তবে কী ভাল লাগে ? ঘরে বসে থাকতে ?

শ্রীতম ক্ষীণ হেসে বলে, ঘর আমার খারাপ লাগে না । বাইরেই তো যত গোলমাল ।

বিলু ঠিকই বলে, আপনি ভীষণ ঘরকুনো এবং ঘোর সংসারী । সেইজন্যই কি বউকে চাকরি করতে দিতেও চান না ?

মেয়েদের চাকরি করা আমাদের পরিবারে কেউ পছন্দ করে না ।

সে তো বুঝলাম । বলে হঠাৎ কিছুক্ষণ চুপ করে থেকে অরুণ আবার বলল, কিন্তু এখন বিলুর চাকরি করা একটু দরকারও যে ।

কেন ? বুলেটের মতো প্রশ্নটা বেরোয় শ্রীতমের মুখ থেকে ।

অরুণ মৃদু স্বরে বলে, আপনি নিজে অ্যাকাউন্ট্যান্ট, আপনাকে আমি আর কী বোঝাবো ?

শ্রীতমের চিন্তার স্রোত খুব ধীরে ধীরে খাত বদল করে । সে আবার চোখ বুজে নিঃস্বাস হয়ে শুয়ে মনে মনে খুব দ্রুত হিসেব করে দেখে নেয় । ভলান্টারি রিটায়ারমেন্টের দরুন সে এক লাখ ত্রিশ হাজার টাকার মতো পেয়েছিল । সেই টাকার ওপরেই এতদিন সংসার চলছে । বসে খেলে রাজার ভাঁড়ারও শেষ হয় ।

অরুণ মৃদু স্বরে বলে, খরচও তো কম নয় । মেয়েদের চাকরি করা হয়তো স্বাভাবিক পরিস্থিতিতে ভাল না হতে পারে আপনার কাছে । কিন্তু জরুরী প্রয়োজন হলে নিশ্চয়ই তাতে আপনার আপত্তি হবে না ?

বিলু তো আমাকে কিছু বলেনি ।

বিলু আপনাকে বলতে তেমন জোর পাচ্ছে না ।

শ্রীতম দাঁতে ঠোঁট কামড়ায় । বিলু তাকে বলতে জোর পাচ্ছে না, তবে অরুণকে বলছে কিসের জোরে ? শ্রীতম বিরক্তির গলায় বলে, বলতে জোবের দরকার কি ?

অরুণ আরও একটু কাছে এগিয়ে আসে এবং খুবই নীচু গলায় বলে, আপনি যতটা শাস্তিশিষ্ট দেখতে, ঠিক ততটাই কি ডেনজারাস নন ? বিলু বলে, শ্রীতমের মুখোমুখি হলে ওর ঠাণ্ডা গভীর চোখের দিকে চেয়ে আমার বুকের মধ্যে গুড়গুড় করে ।

কথাটার মধ্যে খুশি হওয়ার মতো কিছু একটা ছিল বোধহয়, নইলে শ্রীতমের ভিতরে একটা বিদ্রোহ খেলে গেল কেন ? চোখ খুলে সে বলল, আমি ডেনজারাস হতে যাব কেন ? বিলু ওসব বলে বুঝি !

অরুণ হাসিমুখে চেয়ে থাকে । তার চোখে সপ্রশংস দৃষ্টি । চাপা গলাতেই বলে, ডেনজারাস বলতেই তো আর মারদাঙ্গাবাজ লোক নয় । আপনাবি বিপজ্জনকতার উৎস হচ্ছে স্ট্রং লাইকস্ অ্যান্ড ডিসলাইকস্ । আপনি মুখে কিছু তেমন বলেন না, কিন্তু একটু নাকের কুণ্ডল বা ঠোঁট ওপ্টানো কিংবা চোখের এক ঝলক দৃষ্টি দিয়ে অনেক কিছু বুঝিয়ে দেন । যারা কম কথা বলে এবং যারা চাপা স্বভাবের, তাদের সবাই ভয় পায় ।

শ্রীতম নিজের এত গুণের কথা জানত না । কথাগুলো যে সত্যি নয় তাও সে একটা মন দিয়ে বুঝতে পারে । সে জানে তুখোড় বুদ্ধিমান অরুণ তাকে তেল দিচ্ছে । একটা উদ্দেশ্য নিয়েই দিচ্ছে । তবু অন্য একটা অবুঝ মন এই এত সব মিথ্যে গুণের কথা হাঁ করে গিলল । নিজের খুশির ভাবটা চাপা দেওয়ার জন্য সে একটা কৃত্রিম দীর্ঘশ্বাস ছেড়ে বলে, আমাকে কারো ভয় পাওয়ার কিছু নেই ।

শ্রীতমকে এক মোহময় সম্মোহনে আচ্ছন্ন করে দিতে দিতে বড় আন্তরিকভাবে অরুণ বলে, আছে । আপনি তা হয়তো টের পান না । বিলু পায় ।

প্রীতম একটু অন্যমনস্ক থেকে বলে, ব্যাংকের টাকা কি ফুরিয়ে এসেছে ?

তা নয় । এখনো অনেক আছে । হয়তো দু-চার বছর চলেও যাবে । কিন্তু তারপর একদিন ফুরাবে ।

কত আছে ?

বিলু বলছিল কত যেন !

আমাকে বললে পারত । প্রীতম আবার চোখ বোজে । গৌ আঁকড়ে ধরে থেকে লাভ নেই সে জানে । চোখ খুলে আবার তাকায় এবং বলে, লাভুর কি হবে ? বিলু চাকরি করতে গেলে ওকে দেখবে কে ?

আয়া থাকবে । আপনিও তো রয়েছেন । লাভুর জন্য চিন্তা নেই । যে-সব বাড়ির স্বামী স্ত্রী দুজনেই চাকরি করে তাদের ছেলেমেয়েও তো মানুষ হচ্ছে ।

প্রীতম মাথা নেড়ে বলে, ঠিক মানুষ হচ্ছে বলা যায় না । মায়ের সঙ্গে না পেলে বাচ্চারা ভীষণ রাগী, অভিমাত্রী, জেদী আর হিংসুটে হয়ে ওঠে ।

কথাটা স্বীকার করে অরুণ মাথা নাড়ে । সাদা একটা হাসিতে প্রীতমের মাথা গুলিয়ে দিয়ে বলে, লাভু তার বাবাকে তো পাবে । লাভু তো বাবা ছাড়া কিছু বোঝে না ।

প্রীতম স্নিগ্ধ হয়ে গেল । দুর্বল হয়ে গেল । মোহাচ্ছন্ন হল । আনমনা গলায় বলল, বিলু কি কোথাও চাকরি পেয়েছে ?

একটা ব্যাংকে অ্যাপ্লাই করেছিল । পেয়ে গেছে ।

আমাকে বলেনি । দুঃখের সঙ্গে বলে প্রীতম ।

অরুণ কথাটার জবাব দেয় না । শুধু হাসে ।

অরুণ চলে যাওয়ার পর প্রীতম বিলুকে ডেকে বলে, তুমি চাকরি পেয়েছো, আমাকে বলোনি কেন ?

বিলু প্রীতমের দিকে খুব সহজ চোখে তাকাল, আর সেই দৃষ্টি দেখেই প্রীতম বুঝল, বিলু কন্সিনকালেও তাকে ভয় খায় না । অরুণ এমন সুন্দর সাজিয়ে বানিয়ে মিছে কথা বলে !

বিলু জবাব দেয়, বললে তো তুমি খুশি হবে না । কিন্তু চাকরির এখন দরকার ।

অ্যাকাউন্ট্যান্ট প্রীতম টাকার হিসেব জানে । তাই রোগা দুর্বল হাতে মাথার লম্বা চুল একটু পাট করতে করতে বলে, সেটা বুঝি । কিন্তু লাভু আর একটু বড় হওয়া পর্যন্ত অপেক্ষা করলে না বিলু ?

ততদিন কি আমারই চাকরির বয়স থাকবে ? নাকি হচ্ছে করলেই এই বাজারে চাকরি পাওয়া যাবে ?

চাকরি নেওয়ার আগে আমাকে জিজ্ঞেস করলে না একবার ?

বিলু হুঁ কুঁচকে বলে, এখনো নিইনি । তোমার অসুবিধে হলে না হয় নেবো না ।

কথাটায় ঝাঁঝ ছিল । প্রীতম কিছুটা দুর্বল হয়ে পড়েছিল, ভাবাবেগ আসছিল । সেটা সামলে নিতে পারল । বলল, রাগ করো না । টাকার হিসেব আমি কারো চেয়ে কম বুঝি না । আমার জন্যও অনেক খরচ হচ্ছে । জমানো টাকা আর কত আছে ?

খুব বেশী নেই । বিলু অন্যদিকে চেয়ে বলল, যা আছে তা দিয়ে একটা ছোটোখাটো বাড়ি একটু শহরের বাইরের দিকে হয়ে যেতে পারে ।

তুমি বাড়ি করার কথা ভাবছ ?

তুমি বারণ করলে ভাবব না । কিন্তু এইবেলা কিছু না করলে টাকাটা খরচ হয়ে যাবে ।

বাড়ি করার কথা আমি কখনো ভাবিনি।

কেন ভাবেনি? সবাই তো এসব ভাবে।

শিলিগুড়িতে আমাদের একটা বাড়ি তো আছে।

বিলু কথার জবাব দিল না। কিন্তু মুখে একটা কঠিন ভাব ফুটে উঠল।

প্রীতম সবই জানে। বিলু কোনোদিন শিলিগুড়ি যাবে না। ও বাড়টাকে সে নিজের বাড়ি বলে ভাবতেও পারে না। প্রীতম একটা সত্যিকারের দীর্ঘশ্বাস ছেড়ে বলে, জমিটমি দেখেছো?

দেখিনি। তবে দু-একটা খবর পেয়েছি। অরুণের ছুটির দিন দেখে তোমাকে নিয়ে একসঙ্গে সবক'টা দেখে আসব ভেবে রেখেছি।

আমি জমির কিছু বুঝি না। তোমরা থাকবে, তোমাদের পছন্দ হলেই হল।

কেন, সেই বাড়িতে তুমিও তো থাকবে!

প্রীতম এই কথায় বিলুর দিকে বড় বড় চোখে তাকিয়ে দেখে। হঠাৎ মনে হয়, তাকে ভুলিয়ে রাখার জন্য বিলু আর অরুণ আড়ালে কোনো ষড়যন্ত্র করছে না তো! প্রীতমের চোঁটে জবাবটা ঝুলছিল, যদি ততদিন পৃথিবীতে থাকি। কিন্তু অত সহজ ভাবপ্রবণতার কথা বলল না প্রীতম। ভাবের ঘোরে ভেসে গিয়ে লাভ নেই। তার বড় শক্ত লড়াই।

তাই প্রীতম স্বাভাবিকভাবে বলে, ঠিক আছে। যাবো।

বিলু একটু যেন সংকোচের সঙ্গে বলে, এসব টাকা-পয়সা বা বাড়ির কথা বলতে আমার খারাপ লাগে। তুমিও হয়তো খুশি হও না। কিন্তু ভাল না লাগলেও তো ভবিষ্যতের কথা ভাবতে হয়।

এত ভাড়াভাড়া ভবিষ্যতের কথা ভাবতে হবে তা কখনো চিন্তা করিনি।

বিলু কঠিন মুখে চুপ করে থাকে।

প্রীতম হাসে একটু। আশপাশ থেকে রেডিওতে দুরাগত একটা ক্রিকেট খেলাব ধারাবিবরণীর শব্দ আসছে। প্রীতম নিজের পাজামায় ঢাকা পা দুখানা দেখতে থাকে। ইডেনে টেস্ট খেলা দেখে দু' বছর আগেও সে হেঁটে ভবানীপুর ফিরেছে।

বিলু মৃদু স্বরে বলল, আমি লাবুকে নিয়ে কেনাকাটা করতে বেরোচ্ছি। বিন্দু রইল।

প্রীতম চোখ বন্ধ করে হুঁ দিল।

ভালবাসা থাক বা না থাক, বিলু বাড়িতে না থাকলে প্রীতমের বড় ফাঁকা আর নিরর্থক লাগে।

বিলু চলে গেলে প্রীতম বিন্দুকে ডেকে খবরের কাগজটা চাইল। কাগজ মুখের সামনে মেলে ধরে শূন্য চোখে চেয়ে রইল খানিকক্ষণ। কিছুতেই মন দিতে পারল না।

পা দুটো ঝিন ঝিন করছিল। আজকাল প্রায়ই এটা হয়। অনেকক্ষণ ধরে কুঁচকি থেকে পাতা পর্যন্ত পা দুটোয় ঝিঝি ছাড়তে থাকে। প্রীতম তার অস্থশব্দের জন্য হাত বাড়ায়। নিরন্তর শরীরের সঙ্গে তার লড়াই। তাকে তো বাঁচতেই হবে। অসহনীয় ঝিনঝিন অনুভূতিটাকে সহনীয় করতে সে প্রাণপণে চোখ বুজে সেতারের বাজনার শব্দ মনে আনতে থাকে। বহুক্ষণের চেষ্টায় শরীরের ঝিনঝিনকে সে সেতারের ঝালার সঙ্গে মিলিয়ে নিতে পারে। তাতে অস্থস্থি কমে যায় না, কিন্তু খানিকটা সহনীয় হয়। সেতার হয়ে যাওয়ার একটা অন্যরকম অভিজ্ঞতাও হতে থাকে তার।

এ বাড়িতে কেউ গানের তেমন ভক্ত নয় বলে রেকর্ড প্লেয়ার কেনা হয়নি। প্রীতম ভাবল বিলুকে একটা সস্তার রেকর্ড প্লেয়ার কিনতে বলবে। আর অনেক সেতার সরোদের

রেকর্ড । তার অস্ত্র চাই ।

বিলু তার জন্য হুইলচেয়ার কেনার কথা ভাবছে, চাকরি করার কথা ভাবছে, ভবিষ্যৎ চিন্তা করছে । আসলে এ সবের পিছনে প্রীতমের অনন্তিত্বের কথাই কি ভাবা হচ্ছে না ? বুকের মধ্যে ঘুমিয়ে থাকা ভয় হঠাৎ চিনচিন করে ব্যথিয়ে ওঠে, ককিয়ে ওঠে । মরে যাবো নাকি ?

বে-খেয়ালে হাত মুঠো পাকায় প্রীতম, চোখ বুজে দাঁতে দাঁত চেপে প্রাণপণে বিড়বিড় করে বলতে থাকে, ভাল আছি । ভাল আছি । ভাল আছি । ভাল আছি । এবার থেকে যখনই কেউ জিজ্ঞেস করবে, কেমন আছেন ? তক্ষুনি খুব হোঃ হোঃ করে হেসে আনন্দে ভেসে যেতে যেতে প্রীতম বলবে, ভাল আছি ।

রাস্তা পার হওয়ার জন্য ফুটপাথের ধার ঘেঁষে দাঁড়িয়ে ছোট্ট লাবু মুখ তুলে মায়ের দিকে চাইল । সে কিছু বলতে চায়, কিন্তু ভরসা পায় না । মা মারবে ।

বিলু আনমনে দাঁড়িয়ে আছে । ভূ কোঁচকানো । ভাবছে । লাবু আবার মুখ তুলে মায়ের মুখটা দেখে । তারপর ডাকে, মা !

উ !

লাল আলো জ্বলে গেছে । পেরোবে না ?

ঈ । চলো । বিলু শব্দ মুঠিতে মেয়ের হাত ধরে রাস্তা পার হয় ।

আনমনে হাঁটছিল বিলু । লাবু হঠাৎ হাত টেনে ধরে বলে, মা ! জল !

বিলু বিরক্ত হয় । দেখে মাংসের দোকান থেকে অটেল রক্তমাখা জল ফুটপাথ বেয়ে বয়ে যাচ্ছে । হঠাৎ দাঁড়িয়ে পড়ায় পিছন থেকে একটা লোক বিলুর ওপর হুমড়ি খেয়ে পড়তে পড়তে কোনোরকমে সামলে পাশ কাটিয়ে বেরিয়ে গেল । বিলু মেয়ের চুল টেনে দিয়ে বলে, কতবার বলেছি না, রাস্তায় সভা হয়ে চলবে । জল তো কী হয়েছে ?

লাবু মায়ের দিকে চেয়ে ভয়ে কাঠ হয়ে যায় । আশ্তে কবে বলে, জুতোয় লাগবে তো !

জুতোয় নোংরা লাগেই, তাতে কি ?

লাবু আর জবাব দেয় না । টুকটুক করে মায়ের পাশে পাশে হাঁটে । আবার হঠাৎ ডাকে, মা ।

আবার কী ?

ফিতে ।

তোমার অনেক ফিতে আছে । আর নয় ।

চশমা ?

তাও নয় । বায়না করবে না একদম ।

লাবু ঘাড় হেলিয়ে রাজি হয়ে গেল ।

তাড়াতাড়ি হাঁটো লাবু । বাবা একা রয়েছে ।

পায়ে লাগছে ।

কী হয়েছে পায়ে ?

লাবু থামে এবং হেঁট হয়ে নিজের পায়ের জুতো খুলতে চেষ্টা করে । পারে না । অসহায় মুখে মার দিকে চেয়ে থাকে ।

উবু হয়ে স্ট্যাপটা খুলে বিলু জুতোর ভিতর থেকে একটা কমলালেবুর বিচি বের করে ফেলে দেয় । বলে, কতবার শিখিয়েছি জুতো পরার আগে ঝেড়ে নিয়ে পরবে ! মনে থাকে

না কেন ?

বিলু দোকান থেকে ঠুঁড়ো সাবানের প্যাকেট, মাখন, বিস্কুট ইত্যাদি কেনে। তারপর লাবুকে বলে, তুমি একটু বাইরে গিয়ে দাঁড়াও তো লাবু। বেশী দূরে যেও না। সিঁড়িতে রোদ আছে, ওখানে গিয়ে দাঁড়িয়ে রাস্তা দেখ।

লাবু বাধ্য মেয়ের মতো সিঁড়িতে গিয়ে দাঁড়ায়, কিন্তু ঘাড় ঘুরিয়ে চেয়ে থাকে মায়ের দিকে। মা যতক্ষণ টেলিফোনে কথা বলবে ততক্ষণ তাকে দূরে দাঁড়িয়ে থাকতে হবে। সে জানে।

বিলু ফোনে অরুণকে পেয়ে বলে, ওর আ্যাটিচুড কেমন দেখলে ?

খারাপ কিছু নয়। মেনে নেবে।

তুমি চলে আসার পর ও চাকরি নিয়ে আবার কথা তুলেছিল। তাবী অব্যবস্থাপনা করে। বলে, লাবু বড় হলে চাকরি করো। *তাই কি হয় ?

তুমি রাগ-টাগ দেখাওনি তো !

আমি বুঝি শুধু রাগই দেখাই ? তোমরা আমাকে কী ভাবো বলো তো ?

এই তো আমার ওপর রাগ দেখাচ্ছে।

তোমার কথা আলাদা।

আলাদা কেন ? আমি রিঅ্যাকট করি না বলে ?

ঠিক তাই। তোমার মতো কম বিঅ্যাকশনারি আমি বেশী দেখিনি।

অরুণ হাসল। বলল, তাহলে আমি তোমার রাগের জিম্মাদার বইলাম। প্রীতমবাবুকে অনুরাগটুকুই দিও।

ছি ছি।

হঠাৎ ছিছিকার কেন ?

এত বাজে অনুপ্রাস বহুকাল শুনিনি। তুমি না স্মার্ট ছিলে ? রাগের সঙ্গে অনুরাগ মেলানো কি তোমাকে মানায় ? শোনো, ও জমি দেখতে রাজি হয়েছে। তুমি কবে ফ্রি হবে বলো তো ! গাড়ি নিয়ে সব ক'টা জমি একদিনে ঘুরে দেখতে হবে।

বিলু, জমি কেনার ডিসিশনটা পাস্টাও আবার বলছি। কে তোমার বাড়ি তৈরির খবরদারি করবে ? তার চেয়ে ফ্ল্যাট কেনো।

ফ্ল্যাটেই যদি থাকব তবে তা কিনতে যাবো কেন ? ভাড়া দিয়েই তো থাকতে পারি।

ফ্ল্যাট কিনলে ভাল পাড়ায় যে মেট্রিয়ালের তৈরি বাড়িতে থাকতে পারবে, জমি কিনে বাড়ি করলে সেটা তো পাবে না। খরচ বেশী, ঝামেলা বেশী।

তবু আলাদা বাড়িই আমার পছন্দ।

তোমার যে এস্টিমেট তাতে জমি কেনার পর দুখানা ঘর তৈরির টাকাও থাকবে না।

চাকরি করলে টাকা হবে। ধীরে ধীরে করব।

অরুণ একটু চুপ কবে থেকে বলে, তুমি হয়তো পারবে। তুমি চিরকালই অন্যরকম ছিলে।

ছাড়ছি। ফোন রেখে বিলু দেখে, লাবু হাঁটুর কাছে দাঁড়িয়ে মুখ তুলে চেয়ে আছে। তাকাতাই বলল, একটা পাগল আমাকে ডাকছিল। বিলু সামান্য একটু লজ্জা পেল কি ?

লাবু ঘরে ঢুকেই ধমকে গেল। বাবা কাত হয়ে শুয়ে আছে। বালিশ থেকে মাথাটা নীচে পড়ে গেছে। বাবার শরীরের ওপর মস্ত পাতা খোলা খবরের কাগজটা পড়ে আছে।

মা বাথরুমে ঢুকে যেতেই খুব আস্তে আস্তে হেঁটে বাবার বিছানার কাছে আসে লাবু। সে জানে, মানুষ মরে গেলে শ্বাস ফেলে না।

লাবু বাবার নাকের কাছে ছোট্ট হাতটা বাড়িয়ে দিল। খুব জোরে জোরে শ্বাস পড়ছে বাবার। সম্ভূর্ণে খবরের কাগজটা টেনে আনে লাবু। ছোট্টো হাতে অত বড় বড় পাতা ভাঁজ করতে পারে না। কোনো রকমে ঘুচুচু করে দলা পাকিয়ে টেবিলে সরিয়ে রেখে দেয়।

একটু ছোঁবে বাবাকে? ভয় করে। কত রোগা না লোকটা, এত রোগা কেন? এত অসুখ কেন?

শ্রীতমের একটা রোগা হাত খাট থেকে বেরিয়ে ঝুলে আছে। লাবু খুব ভয়ে ভয়ে একবার হাতটা ছোঁয়। ভয় করে। হাতটা ঠাণ্ডা। কত বড় বড় নখ বাবার হাতে! ভয় করে।

বাবা চুল কাটে না কেন মা? ভাত খেতে বসে লাবু মাকে জিজ্ঞেস করে।

বিলুর খেয়াল হয়, তাই তো। অনেকদিন শ্রীতমেব চুল ছাটানো হয়নি। সে লাবুর দিকে তাকিয়ে বলে, ও মেয়ে! বাবার দিকে তো খুব নজর তোমার!

॥ নয় ॥

দীপের ঘুম ভাঙল কানের কাছে 'শুয়োরের বাচ্চা' কথাটা শুনে। তার বিছানা ঘেঁষেই জানালা এবং জানালার পাশেই রাস্তা। এখনো ভাল করে আলো ফোটেনি। একেই শীতকাল, তার ওপর বাইরে কিছু কুয়াশা থাকতে পারে। শীতকালে ঘরের জানালা বন্ধ থাকে, মাথার জানালাটা কিছু তফাতে বলে খোলা। কিন্তু কোনোটা দিয়েই আলো বা হাওয়া আসে না তেমন। অতিশয় ঘিঞ্জি গলির মধ্যে এই ঘর। এখান থেকে সব সময়ে মনে হয়, বাইরে মেঘ করে আছে কিংবা সন্ধ্যা হয়ে এল।

ঘুম ভাঙলেই রোজ আঁষটে, কট্ট একটা গন্ধ এসে নাকে লাগে। জানালার ধারেই পাড়ার রাজ্যের তরকারির খোসা, মাছের আঁশ, ঐটোকাটা জমা হয়ে থাকে। করপোরেশনের টিনের ঠেলাগাড়ি একটু বেলায় এসে নিয়ে যায়। ততক্ষণ গন্ধটা বেশ তীব্র, তারপরও গন্ধ একটা থাকেই। একতলার ঘব নলে এইসব অস্বস্তি। তবে এখন আর অতটা টের পায় না দীপ। সয়ে গেছে। শুধু এই সকাল বেলায় ঘুম ভাঙলে এখন কয়েকটা শ্বাসে গন্ধ পায়।

দীপনাথ বেশ ভোরেই বিছানা ছাড়ে। আজও গা থেকে কন্ডলটা একটু আলসেমীভরে সরিয়ে উঠে পড়ল। কাজ আছে। সাতসকালে রাস্তায় কে কাকে 'শুয়োরের বাচ্চা' বলল সেটা বড় কথা নয়, কিন্তু কথাটা শুনে ঘুম ভাঙল বলে দীপনাথের মন থেকে সহজে গেল না সেটা।

কন্ডলটা ভাঁজ করে রাখতে গিয়ে দীপনাথের একটু কষ্ট হল মনে। দাদা মল্লিনাথ তাকে এই বিলিতি কন্ডলটা দিয়েছিল। ওয়াড় কবে ছিড়ে গেছে, উদোগহীন মল্লিনাথ আর ওয়াড় করায় নি। অযত্নের ব্যবহারে গায়ের ঘষটানিতে রোঁয়া উঠে ভিতরের বুনাট বেরিয়ে পড়েছে কয়েক জায়গায়, তেলচিটে ময়লা ধরায় সবুজ আর হলুদ চৌখুপীগুলো আবছা হয়ে এসেছে। আর একটা বা দুটো শীতের পরই ভিথিরি-কন্ডল হয়ে যাবে।

কেন কোনো জিনিসেই তার যত্ন নেই? একথা ভাবতে ভাবতে দীপনাথ নিজের ওপর বিরক্ত হয়। শিয়ালদার মোড় থেকে কিনে আনা তেতো ও রসাল নিমকাঠি দিয়ে দাঁতন

করতে করতে কলঘরে যাওয়ার আগে সে দুজন চিত ও কাত হয়ে পড়ে থাকা রুম মোটকে দেখে নেয়। একটি নিতান্তই বাচ্চা ছেলে, কলেজে ফার্স্ট ইয়ারে ভর্তি হয়েছে। অনাজন ফুড ডিপার্টমেন্টের মধ্যবয়সী ইনস্পেকটর। দীপনাথের সঙ্গে কারোরই খুব একটা ভাব নেই। লেপের তলায় দুজনই এখন নিথর। ছাত্রটি উঠবে সাতটা নাগাদ, ইনস্পেকটর আবও পরে। এখন বাজে পৌনে ছটা মাত্র।

ভিতরে একটু দরদালান মতো। দরদালানের শেষে একটু চৌখুপী কাটা একধাপ নীচু করে বাঁধানো চৌবাচ্চার চাতাল। জলের চাপ কম বলে সকলেই আজকাল গ্রাউন্ডলেভেলের নীচে চৌবাচ্চা বানায়।

চৌবাচ্চা ধাবে অবশ্য যেতে পারল না দীপ। সেখানে ম্যানেজারের বউ তার ছোটো ছেলেকে বড বাইরে করাতে বসেছে। দীপ সূতরাং দবজায় দাঁড়িয়ে দাঁতন চিবাতে থাকে। ম্যানেজারের বউয়ের মুখখানা কোনোদিনই দেখেনি দীপ। বউটি লম্বা ঘোমটা দিয়ে থাকে। কিন্তু আন্দাজ করা যায় বউটি তরুণী এবং দেখতে ভালই। গায়ের রং বেশ ফর্সা। তবে এর মতো নিষ্ঠুর প্রকৃতির মহিলাও হয় না। দু'ঘরেব মাত্র ছ-জনকে নিয়ে এই ছোট্ট বোর্ডিং-এর লোকদের ম্যানেজার এমনিতেই যাচ্ছেতাই খাবার দেয়, তার ওপর এই বউটি ইচ্ছে করেই এত খারাপ বাঁধে যে মুখে দেওয়া যায় না। ফলে কেউই পুরোপেট খেতে পারে না। প্রতিদিনই থাকে রসুন দেওয়া শাক, কলাইয়ের ডাল আর তেলাপিয়া মাছেব একটি গাদার টুকরো। দীপনাথ খাওয়ার সময় প্রতিদিনই বমি বমি ভাব টের পায়। এ দিয়েও হয়তো খাওয়া যেত কিন্তু এই বউটি তা হতে দেয় না। কলাইয়ের ডাল ফোডন ছাড়া রোধে দেয়, যা খাওয়া সম্ভবই নয়। সর্ষে বাটা আর গুঁড়োমশলা দিয়ে রাঁধা মাছটিও গলা দিয়ে নামানো শক্ত। দীপনাথ প্রায়দিনই বাইরে খেয়ে নেয়। বউটির ঘোমটার আবরু আছে বটে কিন্তু মানবিক লজ্জাবোধটুকু নেই।

দীপনাথ দাঁতন কবতে করতে দরজার চৌকাঠে দাঁড়িয়ে কঠোর দৃষ্টিতে বউটিকে দেখছিল। সে যে অপেক্ষা করছে তা টের পেয়েছে। একবার মুখ ঘুরিয়ে ঘোমটার আড়াল থেকে চকিতে দেখে নিল তাকে, তারপর ন্যাংটো এবং ভেজা ছেলটাকে দুহাতে আলগা করে শূন্য ভূলে হরিণের পায়ে পালাল।

প্রাতঃকৃত্যের পর, রুমমেন্টের ঘুম থেকে ওঠার আগেই দীপনাথ তার ব্যায়াম সেরে নেয়। নিজেকে ফিট রাখতে হলে এটুকু অবশ্যই দরকার। গোটা ষাটেক বেঠক আর গ্রিশটা বুকডন, কয়েকটা যোগাসন এবং বুলওয়াকবি নিয়ে একটু পেশী খেলানো। চল্লিশ মিনিট থেকে এক ঘণ্টা যায়। তা যাক। দীপনাথ জানে, শরীরকে সক্ষম রাখতে গেলে ব্যায়াম ছাড়া পথ নেই। বসিয়ে রাখলেই শরীরে ঘণ ধরে, আজ গ্যাস অস্বল, কাল রক্তচাপ, হার্টের ব্যামো দেখা দেবেই। শরীরের যত্ন নিতে দীপনাথ ঠেকে শিখেছে। এর আগে মেস বোর্ডিং-এ বার দুয়েক সে শক্ত টাইফয়েড আব হাইপার অ্যাসিডিটিতে ভুগে বিছানা নিয়েছিল। ফলে শৌখিন শরীর হলে তার চলবে না। দুভাগ্যবশত তার আপনজন বলতে কেউই নেই। দাদা, ভাই বা বোন আছে বটে কিন্তু তাদের সঙ্গে এক সাথে বেড়ে ওঠেনি বলে সম্পর্ক তেমন গাঢ় হয়নি। ফলে অসুখ বা বিপদ ঘটলে ভাই-বোনদের কাছে ধবনা দিতে তার লজ্জা করে। নিজের দায়িত্ব তার একেবারেই নিজের। অসুখ হয়ে পড়ে থাকা তার পোষায় না।

ব্যায়ামের পর কাচের গেলাসে ভেজানো কাবলি ছোলা খেয়ে স্টেটসম্যানটা খুলে বসে দীপ। ঝুটিয়ে ঝুটিয়ে পড়ে এবং আড়চোখে ঘড়ি দেখে। অফিসটাইমের আগেই বোসের

ফাইবার গ্লাসের সুটকেসটা সারাতে চাঁদনী চওক যেতে হবে। সুটকেস সারিয়ে বাড়িতে পৌঁছে দিয়ে অফিসে যাবে। অফিসে তার বাঁধাধরা কাজ নেই। গেলেই হয়। আসলে সে বোস সাহেবের চব্বিশ ঘণ্টার চাকর।

পৃথিবীর খবর খুব ভাল নয়। খবরের কাগজগুলো সেই নিরানন্দ ছবিই তুলে ধরে বারবার। এনার্জি ক্রাইসিস, ইনফ্লেশন, পৃথিবী জুড়ে উগ্রপন্থীদের উৎপাত, দুর্ঘটনা। খবরের কাগজ ভাঁজ করে রেখে দীপ উঠে পোশাক পরে নেয়। চোকির তলা থেকে সুটকেসটা বের করে টেনে। ওজনে হালকা হলেও বেশ বড়সড় জিনিস। বাসে ট্রামে নেওয়া কষ্টকর। বোস এটার জন্য ট্যাকসির ভাড়া দেয়নি।

কৌতূহলবশে সুটকেসটা খুলল দীপ। ভিতরটা ভেলেভেটের মতো নরম কাপড় দিয়ে ঢাকা, গভীর বেগুনি তার রং, অনেকগুলো পকেট রয়েছে নানা মাপের। দীপনাথ লোভী নয়, চোর নয়। তবু তার আঙুল প্রতিটি পকেটের ভিতর খুঁজতে লাগল। কী খুঁজছে তা সে জানে না। একেবারে সামনের দিকে লম্বা পকেটটাতে তার আঙুল একটুকবো কাগজ চিমটি দিয়ে তুলে আনল।

একটু অবাক হয়ে দীপনাথ দেখে মিসেস বোসের সই করা একটা বেয়ারার চেক। টাকার অঙ্ক লেখা আছে আড়াই হাজার। কে একজন স্নিগ্ধদেব চ্যাটার্জির নামে লেখা হয়েছে। চেকটা অবশ্য ব্যাংক থেকে ফেরত দিয়েছে। লাল কালি দিয়ে আগাগোড়া চেকটাকে আক্রোশভরে কেটে দিয়েছে কেউ। দীপনাথ চেকটা পকেটে রেখে দিল।

সকালের দিকে বোস সাহেবকে তাঁর বাড়িতে রোজ একটা ফোন কবান নিয়ম আছে। কোনো কাজ থাকলে বোস সাহেব তা ফোনেই বলে দেন।

আমহাস্ট স্ট্রীট পোস্ট অফিস থেকে দীপ ফোন করতেই মিসেস বোসের গলা পাওয়া গেল। গলাটি মিষ্টি বটে, কিন্তু বেশ ঝাঁঝালো।

দীপনাথ সবিনয়ে বলে, আমি দীপ।

বুঝেছি। মিস্টার বোস এইমাত্র বাথরুমে গেলেন।

দীপনাথ আড়চোখে ঘড়ি দেখে। এ সময়ে বোস সাহেবের বাথরুমে যাওয়ার কথা নয়। ঘড়ির কাঁটায় চলা মানুষ। বাথরুমে থাকেন আটটা থেকে সোওয়া আটটা। এখন সাড়ে আটটা বাজছে প্রায়।

দীপ মৃদুস্বরে বলে, আজ যেন একটু ইররেগুলার হলেন মিস্টার বোস!

ওপাশে মিসেস বোস থমথমে গলায় বললেন, হ্যাঁ। কয়েকজন ভিজিটর এসে পড়েছিল বলে দেবী। আপনি কি একটু ধরবেন?

দীপনাথ সংকোচের সঙ্গে বলে, আমি ডাকঘর থেকে ফোন করছি। এখানে তো বেশীক্ষণ লাইন আটকে রাখতে দেবে না।

উঃ, আপনার যে কত প্রবলেম দীপনাথবাবু! ঠিক আছে, আপনি না হয় পরে ফোন করবেন।

শুনুন মিসেস বোস, আপনাদের সুটকেসটার মধ্যে একটা জিনিস ছিল।

কি জিনিস? দামী কিছু?

না। স্ক্র্যাপ একটা চেক। স্নিগ্ধদেব চ্যাটার্জির নামে দেওয়া আপনার সই করা চেক।

হঠাৎ খুব কঠিন হয়ে গেল মিসেস বোসের কণ্ঠস্বর। বললেন, আপনি সুটকেসটা খুলেছিলেন কেন?

দীপনাথ একটু হাসল আপনমনে। বলল, সারাতে হলে মিস্ট্রিও তো খুলবে। তাই

আমি আগেভাগে দেখে নিচ্ছিলাম, ভিতরে কিছু রয়ে গেছে কি-না।

ও। ঠিক আছে।

চেকটা কী করব ?

ক্যাপ চেক যখন, ফেলে দিন। বলেই পরমুহূর্তেই মিসেস বোস হঠাৎ তীক্ষ্ণ গলায় বললেন, না, না। শুনুন, চেকটা আপনি নিজে নিয়ে এসে আমাকে দেবেন। প্রীজ, হারিয়ে ফেলবেন না।

আচ্ছা।

ফোন রেখে রাস্তার মোড়ের কাছে স্টার সেলুনে দাড়ি কামিয়ে নিতে বসে নির্মালিত চোখে আয়নায় নিজের সাবানের ফেনায় অর্ধেক ঢাকা মুখের দিকে চেয়ে দীপ ভাবে, মিসেস বোস খুব সাবধানী মেয়ে। চেকটা দীপ নষ্ট করে নাও ফেলতে পারে এবং সেটা দিয়ে কোনোদিন মিসেস বোসকে ব্ল্যাকমেল করতেও পারে। এই ভয়েই না ফেরত চাইল ! আজকাল মানুষ মানুষকে একদম বিশ্বাস করে না।

দীপ স্নিগ্ধদেব চ্যাটার্জির একটা কাল্পনিক চেহারা ভাবতে চেষ্টা করল। নামটাই এমন মোলায়েম এবং দেবত্ব ভরা যে, যতবার চোখ বুজল ততবার শিবনেত্র এক জটাধারী পুরুষকে দেখতে পেল। নিশ্চয়ই ও-রকম নয় আসল স্নিগ্ধদেব। সম্ভবত পায়জামা পাঞ্জাবী পরা দাড়িওলা, রোগা ও রগচটা এবং ভীষণ পড়াশুনো জানা কোনো উগ্রপন্থী যুবাই হবে। মিসেস বোসের একটা পলিটিক্যাল লাইন আছে, সে জানে। কিন্তু কিছুতেই স্নিগ্ধদেবকে মিসেস বোসের গোপন প্রেমিক বা জার বলে মনে হয় না। কারণ, মিসেস বোস ও-রকম নয়। গোপনতার ধারণা ধারে না। যা চায় তা মুখ ফুটে চাইতে জানে। দরকার মতো স্বামীকে ছেড়ে চলে যাওয়ার মতো যথেষ্ট হিম্মৎ আছে। না, মিসেস বোসের চরিত্রের সঙ্গে গুপ্ত প্রেম ব্যাপারটা একদম খাটে না। তবু কোথাও একটা গোপনীয়তা আছেও। নইলে শেষ মুহূর্তে চেকটা অত আকুলভাবে ফেরত চাইত না।

দীপ যখন চাঁদনী চওকে পৌঁছোলো তখন বেলা সাড়ে নটা। নানু মিয়ার দোকানে স্যুটকেসটা জমা করে বেরোলো আবার ফোন কবতে। মিস্টার বোস এতক্ষণে অফিসে এসে গেছেন।

ফোন ধরেই মিস্টার বোস বলেন, আজ শনিবার খেয়াল আছে তো !

হ্যাঁ।

আপনি বেলা একটাল মধ্যে রোসের মাঠে পৌঁছে যাবেন। আজ অফিসে আসার দরকার নেই। আর শুনুন মিসেস বোস নিউ মার্কেটে গেছেন। যদি অসুবিধে না হয় তাহলে গো দেয়ার অ্যান্ড ট্রাই টু বি সাম হেলপ টু হার।

আচ্ছা। বলতে গিয়ে দীপ অনুভব করে একটা অদ্ভুত আনন্দে তার গলাটা হঠাৎ কাঁপছে।

বোস ফোনেই একটু প্লেয়ের হাসি হেসে বলেন, বেটার ট্রাই টু রেসট্রেন হার ফ্রম বায়িং থিংস। ও কে ?

ও কে।

বোস ফোন রেখে দেন।

চাঁদনী চওক থেকে নিউ মার্কেটে লম্বা পায়ে এক লহমায় পৌঁছে যায় দীপ। কিন্তু ভারী হতাশ হয়ে দেখে, নিউ মার্কেটে ঘুটঘুট করছে অঙ্কার। লোডশেডিং-এর মধ্যে টিমটিমে মোম জ্বলছে মাত্র। এই আলোয় কাউকে চিনে বের করা খুবই মুশকিল।

দীপ পরিস্থিতিটা একটু ধীর স্থিরভাবে বুঝে নিল। নিউ মার্কেটের গোলকধাঁধায় কীভাবে, কোন প্ল্যানমাফিক এগোলে মিসেস বোসকে খুঁজে বের করা অসম্ভব হবে না সেই স্ট্যাটেজিটা ঠিক করে শিকারী বেড়ালের মতো লঘু সতর্ক পায়ে এগোতে লাগল।

দীপের ভিতরে যে আর একটা দুর্মুখ, দুর্বারা টাইপের দীপ বাস করে সে ঠিক এই সময়ে প্রকট করল, মিসেস বোসকে খুঁজে বের করার পিছনে তোমার আসল স্বার্থটা কি বলো তো বাপ ! নিছক ডিউটি না অন্য কিছু ?

দীপ ধমক দিয়ে বলে, চোপ শালা ! ওসব বললে মুখ ভেঙে দেবো। জানো না, আমি চব্বিশ ঘণ্টার চাকর ! ডিউটি করছি।

ডিউটি ? নাকি রথ দেখা আর কলাবেচা। ভাঁড়িও না বাপ, সব বুঝি। এই ঘুটঘুটে লোডশেডিং-এ খড়ের গাদায় সূচ খোঁজার যে জোস দেখছি তোমার, তার পিছনে কেবল ডিউটি আছে বললে ঘোড়ায় পর্যন্ত হাসবে।

দূর গাড়ল। মিসেস বোসকে নিয়ে ভেবে ফালতু লাভ কি ? একে বড়লোকের বউ, তার ওপর চাবকের মতো তেজী মেয়ে। আমার মতো ম্যাস্তামারাকে পাত্তা দেবে নাকি ? স্বপ্নের পোলাও আমি খাই না হে।

রাখো রাখো ! মেয়েছেলে ইজ মেয়েছেলে। সে যেমনই হোক, আব যারই বউ হোক। পুরুষের আবার অত কাণ্ডজ্ঞান থাকে নাকি ? যার থাকে তার থাকে, কিন্তু তোমার অন্তত নেই।

আমার মন অত নরম নয়। এই তো দেখলে সেদিন দশ-বারো বছরের পুরোনো সিগারেটের নেশা, কেমন ছেড়ে দিলাম। ভিতরের ইম্পাতে একটুও মরচে পড়েনি।

যত যাই বলো, আমার খুব ভাল ঠেকছে না। মেয়েছেলেটাও ইদানীং তোমাকে একটু একটু নজর কবছে। চাকরির কথা ভেবে সাবধান থেকো। গ্যাড়াকলে পড়ে গেলে বোস তোমাকে ফোল খাইয়ে ছাড়বে।

আরে না না। বলতে বলতে দীপ আবছায়ায় একটা মুঠো গয়নার দোকানের সামনে মিসেস বোসের মতো একজনকে দেখতে পেয়ে খুব কাছে এগিয়ে গিয়ে প্রায় ঘাড়ে শ্বাস ফেলে বলল, মিসেস বোস ?

মহিলা মুখ ফেরালেন।

দীপ বলল, সরি।

গলির পর গলি খুঁজে যাচ্ছে দীপ। পাচ্ছে না।

তার ভিতরকার দুর্বারাটা অক্লুর-সংবাদ দিল, লোডশেডিং বলে কেটে পড়েনি তো ? খামোখা নাকাল হচ্ছে খুঁজে খুঁজে।

উহু ! দীপ মাথা নেড়ে ভাবে, অন্ধকারে ভয় খাওয়ার মেয়ে নয়।

মার্কেটের মাঝমধ্যখানে গোল চত্বরটায় দাঁড়িয়ে দীপ চারদিকে গলির মুখের দিকে চিন্তিত চোখে চায়। স্ট্যাটেজি ভাবে।

ভিতরকার দীপ খুব হাসে, মিসেস বোসকে খোঁজার জন্য যে পরিমাণে হামলে পড়েছে তাতে মনে হচ্ছে না পেলে হাটফেল করবে। তবে আমি তোমাকে বরং একটা টিপস দিই বুদ্ধুরাম। বাইরে গিয়ে কার পার্কটা খোঁজো। যদি বোসের অফিসের গাড়িটা দেখতে পাও তবে সেখানে একদম স্ট্যাচু হয়ে দাঁড়িয়ে দাঁড়িয়ে নিজের নাড়ীটা বরং দেখ।

দীপ লম্বা পায়ে দক্ষিণের ফটকের দিকে এগোলো। তড়িঘড়িতে কোনোদিকে নজর করছিল না। কিন্তু ভাগ্য সহায়। আচমকাই একটা হ্যাজাকের আলোয় সামনের দোকান

থেকে হাতে মস্ত বেতের বাস্কেট ঝুলিয়ে বেরিয়ে এলেন মিসেস বোস। পরনে জিন্স আর কামিজ।

দীপের বুকের মধ্যে একটা ব্যাঙ হঠাৎ তার স্থবিরতা বেড়ে ফেলে মস্ত এক লাফ মারল।

মিসেস বোস! দীপের গলা কাঁপছে।

আরে! আপনি এখানে?

আপনার খোঁজেই।

মিসেস বোসের হাত থেকে বাস্কেটটা নেওয়ার জন্য হাত বাড়ায় দীপ। উনি বাস্কেটটা সরিয়ে নিয়ে বলেন, আই নীড নো হেলপ। আমার খোঁজে আপনাকে কে পাঠাল? মিস্টার বোস নাকি?

আর কে! দীপ যতদূর সম্ভব অধস্তনের মতো বিনয়ী হেসে বলে।

অঙ্ককারটা দীপের চোখে সয়ে গেছে। হাজাকের আলোটাও খুব বেশী চোখ খাঁধাচ্ছে না। কাজেই আলো অঙ্ককারের সমস্যায় দীপ আর পীড়িত নয়। মিসেস বোসের ভ্রুর ভাঁজ স্পষ্টই দেখতে পেল সে। এবং ভয় পেল।

তবে হুঁ কুঁচকেও মিসেস বোস হেসে ফেললেন। বললেন, এটা স্পাইং নয় তো! ফিনানসিয়াল অফেন্স ধরার জন্য মিস্টার বোস হয়তো আপনাকে লাগিয়েছেন।

না, না। আমি জাস্ট হেলপ করতে এসেছি।

মিসেস বোস মাথা নেড়ে বলেন, আমার হেলপ দবকার নেই। আমি ওয়ার্কিং উওম্যান। নিজেকে আমি শ্রমিক বলে মনে করি।

দীপ বলল, তাহলে মিস্টার বোসকে সেই কথাই বলব তো? আপনি আমার সাহায্য নেননি।

যা খুশি বলবেন। সেটা আপনার ভাববার কথা।

মিসেস বোস চোখে পরকলাটা পরেননি। পরলে ভাল হত। বাগডোগরার পর থেকে মিসেস বোস সম্পর্কে খুব সচেতন হয়ে পড়েছে দীপ। এককাল তেমন লক্ষ করেনি, কারণ মিসেস বোসও লক্ষ করেননি তাকে। এখন দীপ টেব পায়, মিসেস বোসের চোখে একটা অত্যন্ত শানিত এবং সৌজন্যহীন কঠিন দৃষ্টি রয়েছে। ইচ্ছে করলে উনি খুবই অভদ্র হতে পারেন।

দীপ একটু নিভে যায় মনে মনে। স্নান মুখে বলে, শ্রমিক তো আমিও।

মিসেস বোস হাতের বাস্কেটটা দোলাতে দোলাতে দক্ষিণের ফটকের দিকে হাঁটছিলেন। পিছনে পিছনে বশংবদের মতো দীপ। মিসেস বোস মাথা ঝাঁকিয়ে বব চুলের ঝাপটা মেরে বললেন, কক্ষনো আপনি শ্রমিক নন। খাঁটি শ্রমিক হলে আপনাকে শ্রদ্ধা করতাম। আপনি হলেন মিস্টার বোসের কোট জেস্টার, যাকে পারিষদ বলে।

রাগ অভিমান ইত্যাদি বহুকাল হল দীপের নেই। তার আদ্যন্ত চিন্তা হল টিকে থাকার। নানা ঘঘটানিতে তার অনেক ফালতু জিনিস ভেঁতা হয়ে গেছে। কাজেই এ কথায় সে অপমান বোধ করল না। বলল, কথাটা হয়তো ঠিক। কিন্তু আমার পজিশনে না থাকলে আমার প্রবলেমটাও বোঝা যাবে না মিসেস বোস।

মিসেস বোস ঘাড় ফিরিয়ে দীপের দিকে তীক্ষ্ণ নজরে এক ঝলক তাকালেন। তারপর গম্ভীরভাবে বললেন, যদি আমাকে নিতান্তই সম্বোধন করতে হয় তবে দয়া করে আমার নাম ধরে ডাকবেন। আমার নাম মণিদীপা। নিজেকে আমি মিসেস বোস বলে ভাবতে ভালবাসি

না। আমাকে যারা চেনে তারা সবাই মণিদীপা বলে ডাকে। মিসেস বোস বলে নয়।

দীপ একটু থমকায়। তারপর আস্তে করে বলে, আমার পক্ষে সেটা একটু বাড়াবাড়ি হয়ে যাবে না কি? মিস্টার বোসই বা কি ভাববেন? মণিদীপা কঠিন স্বরেই বলেন, আপনি শ্রমিক নন, ব্রেন্ড। বণ্ডেড লেবারার। শ্রমিকদের আত্মমর্যাদা আপনার চেয়ে হাজার গুণ বেশী। তবু আপনাকে বলে দিচ্ছি, যদি মণিদীপা বলে ডাকতে পারেন তবেই ডাকবেন। নইলে সম্বোধন করার দরকার নেই।

অঙ্ককার থেকে বাইরের উজ্জ্বল রোদে এলে মণিদীপার চেহারাটা যেন আরো ক্ষুরধার হয়ে ওঠে। পরনে রঙচটা নীল জিনস, গায়ে একটা হলদেটে খাটো টি-শার্ট, বাঁ হাতে গালা দিয়ে তৈরি মোটা একটা বালা, ডান হাতে ঘড়ি। কিন্তু এই নির্মোকের ভিতরে মণিদীপাকে সুন্দর না কুৎসিত দেখাচ্ছে সে বিচার এখন দীপের কাছে বাছল্য মাত্র। পোশাকের চেয়ে এখন বহুগুণ বেশী আক্রমণাত্মক হয়ে দাঁড়িয়েছে মেয়েটির ব্যক্তিত্ব।

দীপ তার অসফল জীবনের ব্যাকগ্রাউন্ড নিয়ে দাঁড়িয়ে মেয়েটির চোখে চোখ রাখারই সাহস পাচ্ছিল না। আড়চোখে দেখে, শ্যামল দীঘল চেহারা ও কমণীয় সুশ্রী মুখের মেয়েটি যেন তার যাবতীয় বাঙালীযানা আর মেয়েলীপনা ঝেড়ে ফেলে বেপরোয়া দাঁড়িয়ে আছে। এত নির্ভয় হাবভাব দীপ কোনো মেয়ের মতো দেখেনি।

মার্কেটের চাতালে কয়েক মুহূর্ত দাঁড়িয়ে ভূঁকুচকে চারদিকে চাইলেন মণিদীপা। কার পার্কে বোস সাহেবেব পুরোনো মরিস গাড়িটা ধুলিধূসর হয়ে দাঁড়িয়ে আছে। ওপেক রাষ্ট্ররা তেলের দাম বাড়ানোর পর থেকে বোস নিজের গাড়ি আর গ্যারাজ থেকে পারতপক্ষে বের করেন না। অফিসের গাড়িই ব্যবহার করেন। মণিদীপা বাস্তা পেরিয়ে গিয়ে গাড়ির লক করা দরজা খুললেন।

ভদ্রতাবশে দীপ কাছে গেল। দাঁড়িয়েও রইল। কিন্তু কিছু বলার ছিল না বলে কথী বলল না।

মণিদীপা একরকম কঠিন মুখ কবে সামনেব দিকে চেয়ে থেকে গাড়ি ছাড়লেন।

আস্তে আস্তে হেঁটে দীপনাথ চাঁদনীর দিকে ফিরে আসে। হঠাৎ খেয়াল হয়, মিসেস বোসকে চেকটা দেওয়া হল না। উনিও চাইলেন না।

ভারী অন্যান্সক বোধ করে দীপ। রাস্তাঘাট কিছুই খেয়াল করে না। এক রিমোট কন্ট্রোলে চালিত হয়ে সে বিপজ্জনক রাস্তাঘাট পেরোয় এবং নানু মিয়্যার দোকানে এসে কাঠের টুলে বসে অপেক্ষা কবতে থাকে। সুটকেসটা সারাই করতে আবে একটু সময় লাগবে।

দীপ ভারতে ভাবতে হঠাৎ বুঝতে পারে, মিস্টার বোস তাকে হয়তো খামোকা শুধুমাত্র তাঁর বউকে হেল্ল করার জন্য নিউ মার্কেটে পাঠাননি। তাকে দেখে মণিদীপাও খামোখা রেগে যায়নি। এই দুইয়ের মধ্যে তার বোধের অগম্য কোনো যোগসূত্র থাকতে পারে।

চাউস সুটকেসটা নিয়ে প্রায় দমসম হয়ে রেসের মাঠে ঢোকান সঙ্গে সঙ্গেই দীপ লম্বা দৈতোর মতো বোস সাহেবের মুখেব বিরক্তিতা লক্ষ করে। গেটের কাছেই ধৈর্যহীনভাবে দাঁড়িয়ে আছেন। দীপের দিকে একবার অবহেলায় চেয়ে দেখে বললেন, ফার্স্ট রেস এখন শুরু হবে।

দীপ দুঃখিত মুখে বলে, সারাই করতে অনেক সময় লাগল। বাসেও ভীড় ছিল।

ট্যাকসি নিলেই তো পারতেন।

খুঁজেছি। পেলাম না। কথাটা ডাহা মিথো। ট্যাকসি খুঁজলে হয়তো সতিই পাওয়া যেত

না। কিন্তু দীপ ট্যাকসির চেষ্টাই করেনি। কারণ, ট্যাকসি ভাড়া কে দেবে সেটা স্পষ্ট নয়। এমনকি গ্র্যান্ড স্ট্যান্ডে ঢোকান টিকিটের দামটা নিয়েও সে দুশ্চিন্তা করছে।

বোস হিপ পকেট থেকে আনকোরা নতুন এক বান্ডিল দশ টাকার নোট আর একটা প্যাডের কাগজ বের করে দীপের দিকে বাড়িয়ে দিয়ে বলে, খুব তাড়াতাড়ি করুন। বেটিং কাগজে লেখা আছে, একটু দেখে কাটবেন।

দীপ এ কাজে নতুন নয়। মাথা নাড়ল এবং সুটকেসটা নিয়েই কাউন্টারের দিকে দৌড়োলো। লাইনে দাঁড়িয়ে কাগজটা আড়চোখে দেখে নেয় সে। সব কটা রেসেই আলাদা করে উইন আর প্লেস খেলছেন বোস সাহেব। ট্রেন-টোট আর জ্যাকপটের বাছাই রয়েছে পাঁচটা করে। টাকা থাকলে কী দেবার ওড়ানো যায়।

সরু চ্যানেলে সুটকেসটা নিয়ে ভারী অসুবিধে হচ্ছিল। সামনেব ও পিছনের লোকেরা তাকাচ্ছে। বিরক্তও হচ্ছে। কিন্তু দীপের কিছু করার নেই। সে পরিষ্কার বুঝে গেছে, লোকলজ্জা জিনিসটার কোনো মানেই হয় না। তার যা কাজ তা তাকে কারো পবোয়া না রেখেই করে যেতে হবে।

দীপ বোস সাহেবের কাগজ দেখে টিকিট কাটল। তারপর পকেট থেকে টাকা বের করে নিজের জন্যও একটা উইন কাটল। দু নম্বর ঘোড়ার নাম মালকা। নামটা পছন্দ হল দীপের। নইলে ঘোড়ার সে কিছুই বুঝে না।

বোস সাহেবের সঙ্গে এখন আব দেখা কবাব দবকাব নেই। একদম রেসের পব দেখা হলেই হবে। তাকে শুধু কাগজ দেখে টিকিট কেটে যেতে হবে।

রেস দেখাব জন্য স্ট্যান্ডে গেল না দীপ। মজবুত সুটকেসটা এক জায়গায় দাঁড় কবিয়ে তার ওপর বসে একটু দম নিল। এই শীতের দুপুর আর তেমন শীতল নয়। তার বেশ ঘাম হচ্ছে। নিজামে ঢুকে রোল খেয়েছিল সস্তায়, এখন সেই রোলের উদগার উঠল একটা। কিন্তু বস্তৃত তার পেটে এখনো যথেষ্ট খিদে আছে। দুপুরে ভাত না খেলে সে কোনোদিনই স্বস্তি বোধ করে না।

প্রথম রেসের ঘোড়াগুলিকে দেখতে পেল না দীপ। ভীড়ের মাথা উপকে জর্কিদের টুপিগুলিকে ছুটে যেতে দেখল শুধু। প্রচণ্ড চোঁচানিতে কান ঝালাপালা। নিস্তেজ হয়ে বসেই রইল দীপ। শুনতে পেল, কিং আরথার বাজী মেরেছে। সে জেতেনি, বোস সাহেবও নন।

দ্বিতীয় রেসের টিকিট কাটতে গিয়ে নিজের জন্য আবাব দু-নম্বরই কাটে দীপ। ঘোড়ার নাম স্পার। স্পার কথাটার মানেই জানে না সে। তবু সেই অচেনা নামের ঘোড়ায় সে তার মহার্ঘ টাকা বাজী রেখে মনে মনে বলল, কোনো ঘোড়াই তো চিরকাল হেরে যায় না। একদিন না একদিন একবার হলেও জেতে।

কিন্তু স্পার জিতল না। তবে বোস সাহেবের উইন লেগে গেল এবার।

তৃতীয় রেসেও দু নম্বর ঘোড়ায় নিজের বাজী ফেলল দীপ। যা থাকে কপালে, আজ লাগাতার দু নম্বরেই খেলে যাবে। এবার দু নম্বরের নামটাও সুন্দর। ফ্লোরা। লাইনে তার সামনের লোকটাও বোধ হয় ফ্লোরাই কাটবে। কাবণ সেই লোকটার সামনে আর একটা মুখ ফিরিয়ে বলল, ফ্লোরার ওপর ধরছিস! ওব কি আগের দিন আর আছে। ফ্লোরার টাকা অনেক খেয়েছি, কিন্তু আর ও টাকা দেবে না।

কিন্তু তাতে দীপের কিছু যায় আসে না। সেই ফ্লোরাতেই বাজী ধরল। এবং জিতল না। বোস সাহেবের ঘোড়াও আর সে মেলায় না। রেসের পর টাকা নেওয়ার সময়েই দেখবে।

চতুর্থ বাজীতে টিকিট কাটতে গিয়ে একটু দ্বিধায় পড়ল দীপ। দু নম্বরের নাম লাকি

ডিপ । কিন্তু পাঁচ নম্বরের নাম মণিদীপ । আশ্চর্য ! কিন্তু পাঁচ নম্বর না কেটে দীপ করেই বা কি ! মণিদীপারা যে ভারী তেজী হয় ।

দীপ স্যুটকেস সামলে চ্যানেল থেকে বেরিয়ে এল । এবং খানিকটা অবাক হয়ে দেখল, একটা চেনা মুখের লোক হাঁ করে তাকে দেখছে । কে লোকটা ?

পরমুহূর্তেই ভারী লজ্জা পায় দীপ । এ যে মেজদা শ্রীনাথ । কতকাল দেখা নেই ।

॥ দশ ॥

রেসের মাঠে অবশ্য চেনা লোককেও চেনা দেওয়ার নিয়ম নেই । এই সত্যটা মিস্টার বোসের সঙ্গে রেসের মাঠে এসে এসে বুঝেছে দীপনাথ । তাই সে শ্রীনাথকে দেখে মুখ ফিরিয়ে নেয় । এবং আড়চোখে দেখে, শ্রীনাথও অন্য দিকে চলে যাচ্ছে ।

এইভাবেই তারা দুই ভাই দুই দিকে আলাদা হয়ে চলে যেতে পারত এবং দীর্ঘকাল আব তাদের হয়তো দেখা হত না । কিন্তু পরের রেসে টিকিট কাটতে গিয়ে দীপনাথ আর শ্রীনাথ একেবারে আগুপিছু পড়ে গেল । বস্তৃত দীপনাথের শ্বাস শ্রীনাথের ঘাড়ে পড়ছে ।

তবু কথা বলছিল না দীপ । অন্য দিকে চেয়ে ছিল । টিকিট কেটে বেরিয়ে আসার পর হঠাৎ শ্রীনাথই মুখোমুখি হয়ে জিজ্ঞেস করল, কত নম্বরে ধরলি ?

দুই । খুব লজ্জার সঙ্গে দীপনাথ বলে ।

গাধা । শ্রীনাথের উত্তর ।

একটু ভ্যাবাচ্যাকা খেয়ে দীপনাথ বলে, বাজে ঘোড়া নাকি ?

ঘোড়াই নয় । বললাম তো, গাধা । এসব না বুঝেসুঝে পয়সা নষ্ট করতে আসিস বুঝি ?

দীপনাথ মাথা নেড়ে বলে, আমি আসি না । বসের সঙ্গে আসতে হয় ।

পরেরগুলো অমল আনতাবড়ি খেলিস না । টিপস দিচ্ছি, টুকে নে ।

দীপনাথ দ্বিধা করতে থাকে । তার এমন অনেক টাকা নেই, যে নষ্ট করবে । টিপস নেওয়াই হয়তো ভাল । শ্রীনাথ এসব হয়তো তার চেয়ে বেশীই বোঝে । সে বলল, টুকেতে হবে না । বলো, আমার মনে থাকবে ।

শ্রীনাথ সে কথায় কান না দিয়ে একটা বাতিল টিকিটের পিছনে ডট পেন দিয়ে কয়েকটা নম্বর লিখে তার হাতে দেয় । বলে, বিলুদের খবর কি ? শ্রীতমের নাকি অসুখ ! তোর বউদি বলছিল ।

খুব অসুখ । হয়তো বাঁচবে না ।

কথাটা শুনে শ্রীনাথ একটু কেমন হয়ে যায় যেন । বলে, কী অসুখ ? ক্যানসার নাকি ?

না । হাড়ের ভিতরে আর নার্ভে ইনফেকশন । ডাক্তার কিছু ধরতে পারছে না ।

চিকিৎসার কী হচ্ছে ?

যা হওয়ার সবরকম হচ্ছে । আকুপাংচারও ।

পরের রেসটা শুরু এবং শেষ হল । তুমুল হটগোলেও দুই ভাই তেমন উত্তেজিত হল না । কিন্তু বোর্ডে নম্বর উঠলে দুজনেই পুতুলের মতো টিকিটের নম্বর মিলিয়ে নিল । দীপ জেতেনি । কিন্তু শ্রীনাথের মুখে সামান্য হাসির ফুসকুড়ি গলে যাওয়ায় দীপ বুঝল, মেজদা জিতেছে । সে বলল, শ্রীতমকে কোথাও একটু চেনজে নিয়ে যাওয়া দরকার । কাছেপিঠে হলেই ভাল হয় ।

এতক্ষণ আড়চোখে দীপনাথের হাতের স্যুটকেসটা বারবার দেখছিল শ্রীনাথ । হঠাৎ

বলল, কোথাও যাচ্ছি নাকি ? হাতে স্যাটকেস কেন ?

না, এটা সারানো হল ।

শ্রীনাথকে একটু অনামনস্ক লাগছিল দীপনাথের । কোনো দিকেই যেন ঠিক মন নেই অথবা বহু দিকেই মন দিতে হচ্ছে । কথা বলতে বলতে ভিড়ের মধ্যে কার দিকে চেয়ে যেন একটু চোখের ইশারাও দিল ।

দীপনাথের মনে হয়, শ্রীনাথের কোথাও একটা গুঢ় পরিবর্তন ঘটেছে । চালচলতির মধ্যেই একটা উড়ু-উড়ু ভাব ।

শ্রীনাথ আনমনে কী একটু ভেবে হঠাৎ বলল, ওদের টাকা-পয়সা কিরকম ?

সেটা এখনো কোনো দৃষ্টিভঙ্গির বিষয় নয় । অফিস থেকে প্রীতম বেশ কিছু টাকা পেয়েছে ।

শ্রীনাথ ভূ কুঁচকে বলল, গত বছরই তো ভাইফোঁটা নিয়ে এলাম । বিলু সেবার মস্ত মস্ত গলদা চিংড়ি আনিয়েছিল, চল্লিশ না পঞ্চাশ টাকা কেজি । তখনো খারাপ কিছু দেখিনি প্রীতমের ।

গত বছর ! ভুল বলছ । গত বছর নয়, তার আগের বার ।

তাই নাকি ? হতে পারে । বিলুর সদ্য একটা মেয়ে হয়েছিল তখন । সেটা তখনো খুব ছোটো। আর কিছু হয়েছে তার পরে ?

না । তুমি বহুকাল যাও না বিলুর বাসায ।

এবাব একদিন যাবো ।

দীপ একটু রাগ করে বলল, রেসের মাঠ পর্যন্ত আসতে পারলে বিলুর বাসা আর কত দূর ! এখন থেকে ভবানীপুর তো হেঁটেই যাওয়া যায় ।

শ্রীনাথ একটু হাসল । একসময়ে সে সুপুরুষ ছিল । বয়েসকালে আবার চেহারাটা জেঞ্জা দিচ্ছে । তবে বড়ই নরম পৌরুষহীন চেহারা । কিন্তু হাসলে চেহারার জেঞ্জা ভেদ করে একটা বিষমতা যেন ফুটে বেরোতে চায় । বলল, এই পথটুকু পার হওয়া যে কত শক্ত !

পুতুলের মতোই নিজেদের অজান্তে পরের রেসটার জন্য টিকিট কাটতে কাউন্টারে এসে দুই ভাই দাঁড়ায় । দীপনাথ বলে, ওটা কোনো কাজের কথা নয় । একটা লোক মরতে চলেছে, তাকে এই বেলা একবার শেষ দেখাও তো দেখে আসতে হয় মেজদা । নইলে কথা থাকবে ।

যেতেই হবে ! দীর্ঘশ্বাস ফেলে শ্রীনাথ বলে ।

দীপনাথ শ্রীনাথকে নিশ্চিত করার জন্য খুব সাবধানে বলল, ওদের টাকা-পয়সার বা অন্য কোনোরকম হেলপ দরকার নেই । জাস্ট মাঝে মাঝে গিয়ে একটু মনোবল বাড়িয়ে আসা আর কি ! প্রীতমটা বেঁচে থাকার জন্য কত যে আকুলি-বিকুলি করে ।

শ্রীনাথ আবার একটু হাসে । বলে, টাকাপয়সার দরকার হলে দিতে ভয় পাবো নাকি ? আমি সেভাবে বলিনি ।

দূর বোকা ! আমিও সেভাবে বলছি না । আসলে আমার যেটুকু আছে তা নিতান্তই আমার । সে অবশ্য সমানাই । দাদার টাকা তো আর আমান নয় । তোর বউদির । আমারটুকু আমি দিতে পারি ।

এই একটা রহস্য থেকে গেল চিরকাল । কেন যে বড়দা মল্লিনাথ তার যাবতীয় বিষয়-আশয় ভাইয়ের বউকে লিখে দিয়ে গেল তা কে বলবে ! দীপনাথের কোনো লোভ নেই বটে, কিন্তু ব্যাপারটা মনে পড়লে তাঁর খুব ধাঁধা লাগে । কিছু কুখ্যাও শুনেছে সে

মল্লিনাথ আর বউদিকে নিয়ে। কথাগুলো সুখশ্রাব্য নয়। গায়ে জ্বালা ধরে যায়।

দীপনাথ বলল, বলছি তো, ওদের টাকার দরকারটা আদপেই প্রধান নয়। ওদের যেটা নেই সেটা হল আপনজন।

কথাটা শ্রীনাথের বোধ হয় মনোমত হল। ওপর নীচে বুঝদারের মতো মাথা নেড়ে বলল ঐটেই তো সবচেয়ে বড় সমস্যা। আপনজন পাওয়াই সবচেয়ে কঠিন। জন থাকলেও তারা আপন হতে চায় না। তুই নম্বর দেখে টিকিট কাট।

তাই কাটে দীপনাথ।

বাইরে এসে শ্রীনাথ জিজ্ঞেস করে, এখন কী করছিস ?

একটা গুজরাটি কোম্পানির ব্রাঞ্চ ম্যানেজারের সেক্রেটারি।

কত দিচ্ছে-থুচ্ছে ?

দেয় একরকম। চলে যায়।

ওটা কোনো কাজের কথা নয়। পে স্কেল আছে তো ?

না। চাকরিতে সদ্য ঢুকেছি, ওসব এখনো ঠিক হয়নি।

বিয়ে করে বসিসনি তো ?

না।

করিস না। ও ঝামেলায় না যাওয়াই ভাল।

শ্রীনাথের মুখে এ কথা শুনবে বলে আশা করেনি দীপনাথ। বউদির সঙ্গে কি তা হলে ওর বনিবনা হচ্ছে না !

শ্রীনাথ নিজেই বহস্য পরিষ্কার করে দিয়ে বলল, চাবদিকে এত থিকথিকে মানুষজন দেখে আমাব বিয়ের ওপর বিতৃষ্ণা এসে গেছে। আর লোক বাড়িয়ে লাভ কি ? তা ছাড়া আজকালকার মেয়েরা যত্নাঙ্গিও জানে না। ঘাড়ে চেপে বসে বসে খায় আর রক্ত শোষে।

কথাগুলো নীরবে শুনল দীপ। মনে মনে হাসল। দীপনাথের ভালমন্দ ভেবে এত কথা বলেনি মেজদা। ঠুঁ নিজের কথা ভেবে বলছে। দুনিয়ার সব মানুষই আজকাল নিজের নিজের ব্যক্তিগত অভিজ্ঞতা দিয়ে আর পাঁচটা লোকের ভালমন্দ বিচার করে।

শ্রীনাথ আর দীপনাথ দুজনেই এই রেসটায় মার খেল। শ্রীনাথের টিপস মেলেনি। তবে দীপ অনামনস্কতার মধ্যেও চমকে উঠে দেখল, এই রেসে বাজি মেবেছে দু নম্বর ঘোড়া। তারও আজ আগাগোড়া দু নম্বরে বাজি ধবারই সংকল্প ছিল। ধরলে ঠকতে হত না।

শ্রীনাথ নিজের টিকিটটা দুমড়ে ছুঁড়ে ফেলে দিয়ে বলল, তোর মেসের ঠিকানাটা দিয়ে রাখিস তো। একবার দিয়েছিলি, সেটা বোধ হয় হারিয়ে গেছে।

দীপ বলে, হারিয়ে ভালই হয়েছে। সেই বোর্ডিংয়ে আমি আর থাকি না। এখনকার ঠিকানা আলাদা। অনেকদিন আমার কোনো খোঁজ রাখো না মেজদা !

তুই নিজেই কি রাখিস !

রতনপুরে সবাই ভাল আছে ?

আছে ভালই। সবজি, ডিম, মাছ সব বাড়িতে বা জমিতে হচ্ছে। খাঁটি সব জিনিস পাচ্ছে, ভাল না থাকার কি ?

সজল কত বড় হল ?

ঐচড়ে পাকা।

অনেকদিন আগে ওকে চিড়িয়াখানা দেখাবো বলে কথা দিয়েছিলাম। সেটা আর হয়নি।

চিড়িয়াখানা বহুবার দেখেছে। চিন্তা নেই। তা ছাড়া নিজেদের বাড়িতেই তো

চিড়িয়াখানা । কত পাগল, ছাগল, সাধু, বদমাশের আনাগোনা ।

শ্রীনাথের কথার ভিতর একটা ভয়ংকর বিদ্রোহ আর ঘৃণা ফুটে বেরোচ্ছে । ঠিক অনুশাবন করতে পারছে না দীপনাথ । তবে আঁচটা গায়ে লাগছে । শ্রীনাথ কখনো বোধ হয় কাউকে সুখী করেনি, সুখী সে নিজেও হয়নি ।

পরের রেসগুলিতে একের পর এক দু নম্বর ঘোড়া বাজিমাৎ করে গেল । শ্রীনাথের একটা টিপসও মিলল না । সেজন্য শ্রীনাথকে দোষ দিয়ে লাভ নেই । স্বধর্ম মরাও যে ভাল এই আপ্তবাক্যটা যে মনে রাখেনি দীপ ! নিজের সংকল্পে অচল থাকলে সে আজ বহু টাকা জিততে পারত ।

শ্রীনাথ দাঁড়াল না । রেস শেষ হতেই বলল, চলি রে ।

ভিড়ের ভিতর দূর থেকে মেজদাকে লক্ষ করছিল দীপনাথ । তার কেন যেন মনে হচ্ছিল, রেসের মাঠে মেজদা একা আসেনি । দীপনাথের সঙ্গে কথা বলতে বলতে মাঝে মাঝে ভিড়ের মধ্যে কাকে যেন চোখের ইশারা দিচ্ছিল ।

দীপনাথের অনুমান মিথ্যে নয় । শ্রীনাথ পেমেন্ট কাউন্টারের কাছ বরাবর পৌঁছেলে একটা কালো মতো বদমাশ চেহারার লোক আর ফর্সা মতো একটা মেয়ে তার সঙ্গ নিল ।

গ্র্যান্ড স্ট্যান্ড থেকে বোস নেমে আসে । সঙ্গে তার সমপর্যায়ের কয়েকজন বন্ধুবান্ধব এবং তাদেব দুজনের দূরকম সুন্দরী দুটি স্ত্রী । সবাই খুব হাসছে । প্রায় সবাইকেই চেনে দীপ ।

ক্রাইন ওয়ালকটের পি আর ও দত্ত দীপকে দেখে বলে উঠল, হ্যাঁমো ' হাউ ইজ লাইফ ?

দত্তর মুখটা রক্তাভ । আলগা একটা চকচকে ভাব তার চোখে । অটেল বীয়ারের প্রভাব । দীপ মৃদু হেসে বলল, টেবিফিক ।

তার হাতের সুটকেসটা সবাই দেখছে, তবে ভদ্রভাবে কেউ জিজ্ঞেস করছে না কিছু । সবাই ফটকের দিকে হাঁটছে । দীপ বুঝতে পারছে না উইনিং টিকিটের পেমেন্টগুলো কে নেবে ! সে জানে, বোস নিজে পেমেন্ট নিতে ভালবাসে । আজও নিজেই নেবে কি ? সুটকেস নিয়ে দলের পিছু পিছু হাঁটতে হাঁটতে এই ছোটো সমস্যাটা আবার ভাবিয়ে তুলল তাকে । কোনো ব্যাপারেই সে সিদ্ধান্ত নিতে পারে না । ফলে দ্বিধাগ্রস্ত ও সমস্যাপীড়িত মন নিয়ে সে মহিলা দুজনের সৌন্দর্যও ভাল করে উপভোগ করতে পারছে না ।

ফটকের কাছাকাছি এসে অবশ্য বোস তাকে সমস্যা থেকে মুক্তি দিয়ে বলল, দীপবাবু, আপনি বরং পেমেন্টটা নিয়ে আসুন । আমরা বাইরে অপেক্ষা করছি ।

সুটকেস দুলিয়ে দীপ দৌড়লো । বোস প্রায় হাজার দুয়েক টাকা জিতেছে । টাকায় টাকা আনে । বেশী টাকা না খেললে এ টাকাটা উসূল করতে পারত না বোস । দীপ নিজে একটির বেশী দুটি টিকিট কাটার সাহস পায়নি । সামনেব লাইনে দু-চারজনের মুখে খুব ফ্যাকফেকে হাসি । একজন চেঁচিয়ে বলছে, আজ ছিল দুইয়ের দিন ।

দীপ একটু অন্যমনস্ক হয়ে যায় । মেজদার সঙ্গে দেখা না হলে সে আজ দুই নম্বর ঘোড়াগুলোর ওপর খেলত । কিছু অশ্রুত জিতেও যেত । কিন্তু এই অনিশ্চয়তার নামই তো ঘোড়দৌড় ।

পেমেন্ট নিয়ে দীপ বাইরে এসে দেখে, বোসের গাড়িতে বসার জায়গা নেই । বন্ধু ও বন্ধুর স্ত্রীরা জায়গা জুড়ে বসে আছে । বোস দীপকে বলল, সুটকেসটা লাগেজবটে দিয়ে দিন ।

টাকাটা ? দীপ জানালায় ঝুঁকে চাপা স্বরে জিজ্ঞেস করে ।

আপনার কাছে থাক । একটা ট্যাকসি নিয়ে আমার ফ্ল্যাটে চলে আসুন ।

গাড়ি ছেড়ে দেয় ।

দীপ তার প্যাণ্টের গুপ্ত পকেটে টাকার বাউলটা অনুভব করতে করতে অস্বস্তিতে পড়ে যায় । তার বিশ্বস্ততা সম্পর্কে বোসের কোনো সন্দেহ নেই, তা সে জানে । কিন্তু ভয়, কলকাতার চালু পকেটমারদের । টাকাটা মার গেলে শোধ করার সাধ্য তার নেই ।

রেসের মাঠ থেকে শেয়ারের ট্যাকসি ছাড়া গতি নেই ।

রেসে হারা চারজন গোমড়ামুখো লোকের সঙ্গে একটা ট্যাকসিতে জায়গা পেল দীপ । সামনের সীটে ড্রাইভার আর তার অ্যাসিস্ট্যান্ট এবং আব একজন যাত্রীর মাঝখানে খুবই ঠাসাঠাসি করে বসতে হয়েছে তাকে । শীতকাল বলে অতটা কষ্ট হচ্ছে না । কিন্তু ভারী আড়ষ্ট লাগছে । পিছনে হেরো রেসুড়েরা বলছে, কে জানত লাইটনিং জিতবে ? পুরো গট আপ কেস ।...আমি নিজে দেখেছি টপ স্কোরারকে বাঁকের মুখে ইচ্ছে করে জকি টেনে রাখছিল ।...মন্দাকিনী বোধ হয় জীবনে এই প্রথম জিতল ।...স্টেটসম্যান ওটাকে ফুকে রেখেছিল...

দীপ অত্যন্ত সজাগ হয়ে বসে আছে । তার সমস্ত মনপ্রাণ কেন্দ্রীভূত হয়ে আছে গুপ্ত পকেটের দু হাজার টাকার ওপর । হাত দিয়ে ঝুঁয়ে টাকাটা আছে কি-না দেখতে ইচ্ছে করছিল তার । কিন্তু সেটা ভারী বিপজ্জনক হয়ে উঠতে পারে । লোকে জেনে যাবে, টাকা আছে ।

তারাতলায় নেমে আব বাস-টাস ধরল না দীপ । সোজা হাটা দিল । নিউ আলিপুরের ও ব্লক অনেকটা দূর । তবু হাটাই ভাল ।

শীতের অঙ্গকার দেখতে না দেখতে নেমে আসে । দীপের যেমো শরীরে উত্তরের হাওয়া লেগে সিরসির করতে থাকে । তবু একটু রোমাঞ্চও আছে কোথাও । মনের গভীরে কি সত্যিকারের পাপ আছে তার ? তবে কেন বোস সাহেবের ফ্ল্যাটে যেতে তার একবকম তীব্র সুখের অনুভূতি হচ্ছে ? এখনো সেই কাটা চেকটা তার বুক পকেটে । স্নিগ্ধদের চাটার্জির নামটা সে একটুও ভুলে যায়নি ।

বোসের ফ্ল্যাটে পৌঁছে দীপ দেখল, বোস এখনো আসেনি । সাদা উদ্দিপরা একজন বেয়ারা দরজা খুলে দিয়ে ড্রয়িং কাম ডাইনিংয়ের মাঝখানে প্লাস্টিকের ফুলছাপ পদাটি টেনে দিল । ড্রয়িংরুমের ফাঁকা নির্জনতায় বসে দীপ টের পাচ্ছিল ডাইনিং হলে আজ কোনো ভোজের আয়োজন হচ্ছে । অস্তুত দু-তিনজন বেয়ারা নীচু স্বরে কথা বলতে বলতে টেবিল সাজাচ্ছে । প্লেট আর চামচের শব্দ হচ্ছে টুং টাং ।

বড়লোকদের ড্রয়িংরুম যেরকম হয় বোসেরটাও তাই । ভাল সোফাসেট, পেতলের ছাইদানী, মেঝেয় কার্পেট, কাচের স্লাব বসানো সেন্টার টেবিল, ঘোমটা দেওয়া স্ট্যান্ডের আলো, টি ভি সেট এবং অপরিহার্য বুক কেস ।

মিসেস বোস বা মণিদীপার কোনো সাড়াশব্দই পেল না দীপ । ভদ্রমহিলা আদৌ বাড়িতে আছেন কি-না তাও বুঝতে পারছে না । এ বাড়িতে তার যাতায়াত বেশ কিছু দিনের । কিন্তু এখনো সে ড্রয়িংরুমের সীমানা পার হতে পারে নি ।

খবর না দিলে মণিদীপা হয়তো খবর পাবেন না ভেবে দীপ উঠে গিয়ে পর্দা সরিয়ে একজন বেয়ারাকে বলল, মেমসাহেব বাড়িতে নেই ?

আছেন । ড্রেস করছেন ।

তাকে একটু সেলাম দেবে ? বলো, দীপনাথবাবু এসেছেন ।

বেয়ারা তেমন গা করল না যেন । তবে মাথা নাড়ল ।

দীপ আবার এসে সোফায় বসে এবং একটি ইংরিজি ফ্যাশনের পত্রিকা তুলে নিয়ে ছবি দেখতে থাকে ।

মণিদীপা নিঃশব্দে এলেন না । এলেন চাকর-বাকর বা বেয়ারাদের কাউকে অনুচ্চস্বরে বকতে বকতে । কারো কোনো দোষ হয়ে থাকবে ।

ড্রয়িংরুমের পর্দা সরিয়ে ভিতবে এসে চুপ করে দাঁড়ালেন মণিদীপা । ‘কি খবর’ বা ‘এই যে, কখন এলেন’ গোছের কোনো প্রশ্ন করলেন না । দাঁড়িয়ে খুব খরচাশে দীপকে দেখছিলেন । পরনে একটা কাপতান । জাপানী কিমোনো ধরনের ভারী ঝলমলে পোশাক । মুখে রূপটান মাখা শেষ হয়েছে । মস্ত মৌচাকের মতো করে বাঁধা খৌপা । দীপের যতদূর মনে পড়ে, গুঁর মাথার চুল বব করা । তবু খৌপাটা কি করে সম্ভব হল তা ভেবে পায় না সে । মণিদীপার গা থেকে ভারী মোহময় একটা সুবাসও আসছিল । সম্ভবত ফরাসী সেন্ট ।

দীপ মুখ তুলে বলল, সকালে সেই চেকটা দেওয়ার কথা একদম ভুলে গিয়েছিলাম ।

মণিদীপা একটু যেন বিরক্ত হয়ে বললেন, ওটা নিয়ে আপনি অত মাথা ঘামাচ্ছেন কেন ? খুব ইমপর্ট্যান্ট কিছু নয় ।

দীপ বুকপকেটে চেকটা খুঁজতে খুঁজতে বলে, আপনার কাছে না হলেও আমার তো একটা দায়িত্ব আছে । আপনিও চেয়েছিলেন ।

বুকপকেট থেকে রেসেব বাতিল টিকিট, ঠিকানা লেখা কাগজ এবং ভাউচার ইত্যাদি একগাদা কাগজ বেরোলো বটে, কিন্তু চেকটা নেই । নেই তো নেই-ই । পোশাকে যে কটা পকেট ছিল সবই হাঁটকে ফেলল দীপ । মুখ লাল হয়ে উঠছে তার, কান মাথা ঝাঁ ঝাঁ করছে । চেকটা তার সঙ্গে হঠকারিতাই করে বসেছে শেষ পর্যন্ত ।

মিসেস বোস নিঃশব্দে ব্যাপারটা লক্ষ্য করছিলেন । মুখে মৃদু জ্বালাভরা হাসি । দীপের খৌজা এবং না-পাওয়ার পালা শেষ হলে বললেন, খামোখা ব্যস্ত হচ্ছেন । আমিই তো বলছি চেকটাব কোনো দাম নেই ।

দীপ নিভে গিয়ে বলে, আমি কিন্তু পকেটেই বেখেছিলাম । বোসের মাঠে হয়তো—

আপনি নিশ্চিন্তে বসুন । ওটা কেউ পেয়ে থাকলেও ব্যস্ত হওয়াব কিছু নেই । আমাকে ব্র্যাকমেল করা অত সহজ নয় ।

দীপ শিউরে ওঠে । আজ সকালে সেও ব্র্যাকমেলের কথাই ভেবেছিল না কি ? সে তাড়াতাড়ি বলল, না, ব্র্যাকমেলের কথা নয় ।

তবে আর কিসেব ভয় ? চেকটা এমন ভাবে কাটা হয়েছে যে ওটা আর কাশ কবা সম্ভব নয় । তা ছাড়া ব্যাংকে আমার অত টাকাও নেই । স্নিগ্ধ বেচালা খামোখা ব্যাংকে গিয়ে হযরান হয়েছিল ।

দীপ চুপ করে বসে থাকে । ভারী লজ্জা করছে চেকটা হারিয়ে ফেলায় । উনি হয়তো ভাবছেন, চেকটা সেই রেখে দিয়েছে । প্রয়োজনমতো কাজে লাগাবে ।

মণিদীপা অতিরিক্ত স্নেহের সঙ্গে বললেন, মিস্টার বোস বোধ হয় রোসের পর কোথাও বসে বীযাব-টিযাব খাচ্ছেন । আপনাকে বসতে হবে । একটু চা বলে দিই ?

চা ! বলে দীপ একটু ভাবে, তারপর মাথা নেড়ে বলে, দরকার নেই । আমি বরং উঠে পড়ি । উইনিং টিকিটের টাকাটা যদি আপনি রেখে দেন—

বলতে বলতে দীপ উঠে প্যাণ্টের গুপ্ত পকেটের দিকে হাত বাড়ায় এবং ভাবে, হায়,

ভগবান ! চেকটার মতো টাকাগুলোও যদি এতক্ষণে ম্যাজিকের মতো গায়েব হয়ে গিয়ে থাকে !

মণিদীপা মাথা নেড়ে বললেন, আমাকে বোস সাহেব অত বিশ্বাস করেন না দীপনাথবাবু । আমি বিশ্বস্তও নই । টাকাটা আমার হাতে এলে আমি নিশ্চয়ই খরচ করে ফেলব । তখন আপনি খুব মুশকিলে পড়বেন । বরং একটু বসুন, মিস্টার বোস এসে যাবেন ।

দীপ সূতরাং বসে পড়ে । বলে, টাকাটা যে আপনার হাতে দেওয়া যাবে না এমন কথা কিন্তু মিস্টার বোস আমাকে বলেননি ।

মণিদীপা হেসে বলেন, ও কখনো বলবে না । কিন্তু এইসব ছোটোখাটো ঘটনার ভিতর দিয়ে আপনার বুদ্ধিকে ও পরীক্ষা করবে । নাড়ুগোপালের মতো চেহারা দেখে ওকে বোকা ভাববেন না । ও শেয়ালের মতো চালাক । পরীক্ষায় আপনি পাশ করলেই যে ও আপনাকে কোনো চানস্ দেবে তাও ভাববেন না । মানুষকে নানাভাবে পরীক্ষা করাটা ওর হবি । আমাকেও অনবরত পরীক্ষা দিতে হচ্ছে । বলে মণিদীপা ইংগিতপূর্ণভাবে চুপ করে থাকেন ।

দীপ বোঝে, এটাও একটা পরীক্ষা । মণিদীপা দেখছেন, সে ওঁদের স্বামী-স্ত্রীর ব্যাপারে কোনো আগ্রহ প্রকাশ করে কি-না । সে ইদানীং চালাক হয়েছে, তাই ওসব কথার ধার দিয়েই গেল না । বলল, টাকাগুলো যতক্ষণ সঙ্গে থাকবে ততক্ষণই অস্বস্তি ।

টাকার কিছু হাজার্ডস তো আছেই । বলে মণিদীপা একটু হাসলেন । এতক্ষণ দাঁড়িয়েছিলেন, এবার পাশের কৌচে বসে বললেন, কত টাকা জিতেছে ও ?

প্রায় দু হাজার ।

মণিদীপা ভুঁ কুঁচকে একটু ভেবে বললেন, টাকা আয় করা কারো কারো কাছে কত সোজা !

তা ঠিক ।

মণিদীপা একটা দীর্ঘশ্বাস ছেড়ে বললেন, আপনিও রেস খেললেন নাকি ?

আমার ভাগ্যটা একদম কানা । চল্লিশ টাকার মতো হেরে গেছি ।

কোনো দিন জিতেছেন ?

না ।

তা হলে আপনাকে ভাগ্যবানই বলতে হয় ।

কেন ?

জিতলে রেসের মাঠের নেশা আপনাকে ভূতের মতো পেয়ে বসত । আমিও প্রথম প্রথম ওর সঙ্গে খুব যেতাম । কিন্তু প্রত্যেকবার হেরে হেরে বিরক্তি ধরে যাওয়ায় আর যাই না । কিন্তু টের পেতাম যারা এক-আধবার জেতে তারা আর নেশাটা কিছুতেই ছাড়তে পারে না ।

দীপ একটু হেসে বলল, আমার প্রবলেমটা তা নয় । আমি যে-কোনো নেশাই ছাড়তে পারি ।

মণিদীপা মাথা নেড়ে বলেন, ইউ আর নট একসেপশন ।

দীপ হঠাৎ টের পায় তার নামের সঙ্গে মণিদীপার নামের একটা আশ্চর্য মিল আছে । সে দীপনাথ, আর মিসেস বোস মণিদীপা । এতক্ষণে এ মিলটা তার মনে পড়েনি তো ! আশ্চর্য !

দীপ বলল, আসলে আমি কোনো কিছুতেই তেমন ইন্টারেস্ট পাই না । আমার আগ্রহ

শুধু কোনোক্রমে বেঁচে থাকার।

মণিদীপা উদাসভাবে বললেন, আমারও কি তাই নয়? সকলেরই তাই। তবু মানুষের ইন্টারেস্টেরও তো শেষ নেই। রেসের মাঠে আমি আমার স্কুলের একজন পুরোনো মাস্টারমশাইকে দেখতে পেয়েছিলাম, যাকে সবাই সাধুসন্ত বলে মনে করত।

মণিদীপা চায়ের কথা বলেননি, কিন্তু তবু চা এল। ট্রে ভরতি চায়ের পট, দুধের পাত্র, চিনির বোল, একটা মস্ত প্লেটে নিউ মার্কেটের ভাল কেকের একটা বড় টুকরো, দুটো বড় সন্দেশ আর একটা কাটলেট গোছের জিনিস। এ বাড়িতে দীপ কদাচিৎ আপ্যায়িত হয়েছে। এতটা তো কোনোদিনই নয়। সে বলল, এত?

আমার বাপের বাড়িতে লোক এলে চা আব খাবার দেওয়ার নিয়ম। গরীবদের বাড়িতেই ওসব নিয়ম থাকে। বড়লোকরা খুব কাঠ কাঠ ডিসিনিমে চলে, তাই অতিথি আপ্যায়ন না করলেও বলার কিছু নেই। তবে মাঝে মাঝে পাটি দিতে হয়। আজ যেমন।

দীপ চুপ করে রইল। চুপ করে থাকার চেয়ে বড় কুটনীতি তার জানা নেই। অল্পস্বল্প খাচ্ছিলও সে। তবে খুব সংকোচের সঙ্গে।

মণিদীপা হঠাৎ খুব হেসে উঠে বললেন, সত্যিই আপনার কোনো ব্যাপারে ইন্টারেস্ট নেই দেখছি!

দীপ কৌতূহলে মুখ তুলে বলে, কেন?

একবারও তো জিজ্ঞেস করলেন না স্নিগ্ধদেব লোকটা কে!

দীপ গম্ভীর হয়ে বলে, আমার জানার দবকার তো নেই।

দরকার নেই, সে তো ঠিকই। কিন্তু কৌতূহলও কি হয় না?

দীপ কেকটার তেমন স্বাদ পাচ্ছিল না, ভালই হওয়ার কথা। বলল, কেউ একজন হবেন। হয়তো আপনার ভাই-টাই।

কী বুদ্ধি! আমি বোসের বউ হলে আমার ভাই চ্যাটার্জি হয় কি করে?

অসবর্ণ তো হতে পারে।

মোটাই না। আমার বাপের বাড়ি মিত্র।

ও। তা হলে বন্ধু?

মণিদীপা মস্ত এক শ্বাস ছেড়ে বললেন, শুনলে হাসবেন। স্নিগ্ধদেবের বয়স চল্লিশের ওপর। রং কালো, চেহারা রোগা এবং দেখতে মোটেই ভাল নয়। মাথার চুল পাতলা হয়ে টাক পড়ে এল প্রায়। তার স্ত্রী এবং দুই ছেলেমেয়ে আছে। স্কুলমাস্টার এবং বেশ গরীব।

গরীবকে সাহায্য করতে চেয়েছিলেন?

না। টাকাটা ওকে দিছিলাম, ও পাটি ফান্ডে জমা দেবে বলে।

রাজনীতির লোক নাকি?

ভীষণ। এবং এত গাটসওয়াল লোক এ দেশে দুটো নেই। আপনি যদি ওর সঙ্গে দশ মিনিট কথা বলেন তা হলেই আপনার লাইফ-ফিলজফি পালটে যাবে।

দীপ খুব চালাকের মতো বলে, তা হলে দেখা না করাই ভাল।

আসলে দীপ ব্যক্তিপূজা ভালবাসে না। এলেমদার যে-কোনো লোককে বিগ্রহের আসনে বসাতে সে রাজী নয়।

মণিদীপা বললেন, আপনি ওকে চেনেন না।

দীপ লক্ষ করে মণিদীপার চোখে হঠাৎ স্বপ্নের সুদূর ফুটে উঠল।

এখানে দু কাঠা চার ছটাক জমি আছে। দাম পঁচিশ হাজার।

বড় বেশী। নাকতলায় এত বেশী জমির দাম নয়।

নাকতলা কি আগের নাকতলা আছে বউদি? জমির সামনে যোলো ফুট চওড়া রাস্তা হবে।

সে যখন হবে তখন দাম বেশী দেবো।

আসলে জমিটা পছন্দ নয় বিলুর। বড় ঘিঞ্জি পাড়ার মধ্যে, চারধারে বড় বড় বাড়ি। বাস্তাও ভাল নয়। কাঁচা ড্রেন থেকে ঝাঁঝালো কটু গন্ধ আসছে। সে নাকে রুমাল চাপা দিয়ে একটু পিঁছিয়ে এল। পাশেই একটা দোতলা বাড়ি থেকে একটা বউ তাকে লক্ষ্য করছে।

দালাল লোকটা মরিয়া হয়ে বলল, দুটো প্লট ছেড়ে পরেব প্লটে একজন ফিল্ম স্টার থাকে।

কৌতূহলে বিলু জিজ্ঞেস করে, কে?

দালাল যার নাম বলল সে আসলে পডতি অভিনেত্রী। বিলু তাই আগ্রহী হল না। বলল, গলফ ক্লাবেব একটা প্লটের কথা বলেছিলেন যে।

দালাল খন্দেরের খাত বুঝে একটু অবহেলার স্বরে বলে, সে বিক্রী হয়ে গেছে। আরও বেশী দাম ছিল।

এই শীতেও পরিশ্রান্ত বোধ করে বিলু। সকাল থেকে এ পর্যন্ত গোটা চারেক প্লট দেখল। বেহালা, কসবা, গড়িয়া আব নাকতলা। সবই কলকাতার বাইরের অঞ্চল। কিন্তু কোথাও তেমন খোলামেলা নেই আর। অব্যবহৃত মাঠঘাট নেই। আবার লোকবসতি বেশী বলে তেমন ফ্যাশনদুবস্ত্র বাজারহাট বা দোকান-পসারও তেমন হয়নি। ভবানীপুরে থেকে থেকে অভ্যাসটাই খারাপ হয়ে গেছে।

খাড়িটা অনেক দূরে রাখতে হয়েছে। এত দূরে গাড়ি আসেনি। হয়তো আসত, কিন্তু দালালই সাহস পায়নি রাস্তা ভাল নয় বলে।

বিলু একটু উদ্ভাব সঙ্গে বলে, পছন্দসই একটা জমিও কিন্তু আপনি দেখাতে পারলেন না।

দালাল লোকটি আত্মবিশ্বাসের সঙ্গে বলে, কোনোটা তো অপছন্দের নয় বউদি। এই জায়গাগুলো সবই ডেভেলপ করবে, তখন দেখবেন প্লটটা নিয়ে রাখলেন না বলে দুঃখ হবে।

ডেভেলপ করিনি বলছেন, তা হলে দামই বা অত বেশী কেন? এসব জায়গার দাম আরও কম হওয়া উচিত।

দালাল মাথা নেড়ে বলে, পঁচিশ হাজার আজ বলছে। এক মাস পরেই দেখবেন, ত্রিশ উঠে গেছে। আর জমির দাম একবার উঠলে আর কখনো নামে না। ঐ একটা জিনিস কেবল উঠেই যাবে।

শীতের রোদ বলে রোদেব তেজ কম নয়। মাথা বাঁচাতে ঘোমটা দিয়েছে বিলু, চোখ বাঁচাতে গগলস্। এখন বেলা বাড়ায় একটু গরমও লাগছে। হেঁটেছে অনেকটা।

দালাল শেষ কথা বলল, জমির তো আর সাপ্লাই বাড়বে না। ও ভগবান যা মেপে দিয়ে রেখেছেন তাই চিরকাল থাকবে। কিন্তু চাহিদা বেড়েই যাবে, দামও চড়বে। যত সব বড়

ফ্যামিলি ভেঙে টুকরো টুকরো হচ্ছে, আর সঙ্গে সঙ্গে জমির জন্য হন্যে হয়ে উঠছে লোক । বাপ নিজে বাড়ি করল তো তার তিন উপযুক্ত ছেলে তিনটে বাড়ি হাঁকাল, কেউ কারও সঙ্গে থাকতে চায় না আজকাল । প্রত্যেকেই চায় আলাদা সংসার, আলাদা বাড়ি । তা ছাড়া বাড়িওয়ালারা হুড়ো দেয় বলেও লোকে নিজে বাড়ি করতে চায় ।

অরুণের সাদা অ্যামবাসাডার গাড়ি রোদে ঝিকোচ্ছে বড় রাস্তায়, অরুণ পিছন ফিরে প্রীতমকে কী যেন বলছে । পিছনের সীটে প্রীতম বসে আছে নিজীব হয়ে । সে কিছুই শুনছে বলে মনে হল না । চোখ বোজা, ঠোঁটে ক্লান্ত একটু হাসি ।

অরুণ বলল, পছন্দ হয়েছে ?

না, বড্ড ঘিঞ্জি ।

তোমার জন্মেও পছন্দ হবে না ।

বিলু ভুকুটি করে বলে, পছন্দের মতো হলেই পছন্দ হবে ।

দালাল লোকটা সামনের সীটে অরুণের পাশে উঠে বসে । বিলু পিছনের সীটে প্রীতমের পাশে বসে বলে, তোমাকে খামকা কষ্ট দিলাম ।

প্রীতম চোখ মেলে চেয়ে বলে, খুব নয়, তবে এখন শুয়ে থাকতে ইচ্ছে করছে ।

শোবে ? শোও না ! বলে বিলু নিজের কোল দেখিয়ে দিয়ে ঠিক হয়ে বসে ।

প্রীতম শোয় না । অরুণের সামনে কেমন দেখাবে ! সে বলল, না, পারব ।

একটা বা দুটো বালিশ আনলে পারতে । অরুণ গাড়িতে স্টার্ট দিয়ে বলে ।

ভুল হয়ে গেছে । বিলু জবাব দেয় ।

প্রীতম লজ্জার সঙ্গে বলে, না না, সেটা খারাপ দেখাত । আমাব অত বেশী কষ্ট হচ্ছে না ।

হলেই কি আপনি বলবেন ! অরুণ মুখ ফিরিয়ে একটু হাসে । তারপর মাথা নেড়ে বলে, আপনি তাজ্জব লোক ।

কেন ? মৃদু উদাস গলায় প্রশ্ন করে প্রীতম । ঠিক প্রশ্নও নয় । সে যে একটু তাজ্জব লোক তা সে জানে ।

আপনি ভাবেন, নিজের কষ্টের কথা স্বীকার করার মানেই হল, ডিফিট ।

এ কথার নিশ্চয়ই জবাব হয় । কিন্তু প্রীতম জবাব দেওয়ার মতো দমে কুলিয়ে উঠতে পারে না । বহুক্ষণ সে বসে আছে । হেলান দিয়ে যথেষ্ট নরম গদিতে ডুবে থাকা সত্ত্বেও তার শরীর এখন খাড়া থাকতে চাইছে না । শরীরের জীবাণুরা ক্ষেপে উঠছে । ঝিমঝি ডাকছে সারা পা জুড়ে ।

একটু মাথা হেলিয়ে দিতেই বিলুর কাঁধে আশ্রয় পায় সেটা । বিলু বলে, তোমার লজ্জার কি ? ভাল করে মাথা রাখো ।

প্রীতম আবার ঘাড় সোজা করে বসে ।

উঠলে কেন ?

রাস্তাঘাট দেখি । বহুকাল এসব দিকে আসিনি ।

বিলু মৃদু স্বরে বলে, দেখতে হবে না । মাথাটা আমার কাঁধে রেখে চোখ বুজে থাকো । কোনো কাজ হল না আজ, শুধু শুধু তোমাকে টেনে আনলাম ।

প্রীতম উদাসভাবে বসে থাকে । বলে, পছন্দ হল না কেন ?

পাড়াগুলো কেমন যেন !

কেমন ?

ভাল নয় ।

সব জায়গাতেই মানুষ থাকছে । ভূমিও থাকতে পারবে ।

এটা বুঝি কোনো কথা হল ? মানুষ তো উত্তর মেরুতেও থাকে, মরুভূমিতেও থাকে ।

নাকতলা তো মেরুও নয়, মরুও নয় । অরুণ সামনে থেকে বলে ।

তুমি থাড়া পারসন । তোমার কথা বলা সাজে না । বিলু ধমক দেয় ।

প্রীতম উদাসভাবে চেয়ে থাকে বাইরের দিকে । এই পৃথিবীতে তার কোনো জমির আর প্রয়োজন নেই । ভেবে দেখলে কারোরই প্রয়োজন নেই । তবে সেটা সকলে সব সময়ে টের পায় না । প্রীতম আজকাল পায় । তবে তার কাছে গোটা পৃথিবীটাই একটা সুন্দর সম্পূর্ণ বাস্তুজমি । সবটুকুই তার দরকার । আসমুদ্র পর্বত, অরণ্য, বৃষ্টি, আকাশের নীল রোদ, জ্যোৎস্না মিলিয়ে তার বিশাল বাড়ি । গোটা পৃথিবীকেই তার বড় দরকার ছিল । আরও কিছুদিন ।

বিলু শালটা ভাল করে জড়িয়ে দিচ্ছিল তার গলায় । একটু বিরক্তির মাথা ঝাঁকুনি দিয়ে আপত্তি জানাল সে । বাইরের ঝকঝকে রোদে রাসবিহারীর মোড় পেরিয়ে যাচ্ছে গাড়ি । বাঁ ধারে একটা খোয়া চায়ের দোকানের সামনের ফুটপাথে এই রকম সরল রোদে শীত গ্রীষ্মে দাঁড়িয়ে থাকত বীতশোক । কোনো কাজ ছিল না, সারা জীবন কোনো পয়সা রোজগাব করেনি । ভাল আড়বাঁশ বাজাতে পারত বলে সিনেমা থিয়েটারে কাজ করেছে বহু । কিন্তু পয়সা আদায় করার এলেম ছিল না । চাইতে জানত না । বেশ বয়স হয়ে যাওয়ার পর যখন বুঝেছিল আর কিছু করার নেই তখন থেকে এইখানে চূপ করে সকাল-সন্ধ্যা দাঁড়িয়ে থাকার অভ্যাস করে নিয়েছিল । ভাইদের সংসারে অনাদরের ভাত জুটে যেত । দু'আনা চার আনা হাতখরচও । সেই ছিল তার অটল । ট্রামে বাসে চডত না । বিড়ি খেত । দাঁড়িয়ে থাকত । কখনো এক নাগাড়ে চেয়ে থাকত পশ্চিম ধারে । কখনো পূব ধারে । কিছু দেখত না । কেবল চেয়ে থাকত । অমন নির্বিকার মানুষ, অমন অহং ও আমি-শূনা লোক জীবনে দুটো দেখেনি প্রীতম । বীতশোককে সে বহুবার টাকা বা পয়সা দিয়েছে যেচে । হাত পেতে নিত । বলত, খুব ভাল হল । কয়েকদিন আর বাড়িতে পয়সা চাইতে হবে না । বড্ড বকে ।

বীতশোকের দীন ভাব বহুবার নকল করার চেষ্টা করেছে প্রীতম । কিছুতেই হয় না । অভিনয় হয়ে যায়, কৃত্রিম হয়ে যায় । কতগুলো জিনিস কিছুতেই নকল করা যায় না । ভিতরে ঐ দীনতার কোনো প্রস্রবণ না থাকলে হওয়ার নয় ।

গাড়ি বাড়ির সামনে এসে গেল ছ-ছ করে ।

দোতলার বারান্দায় দাঁড়িয়ে আছে লাবু । একটু ঝুঁকে, চোখে প্রবল উৎকণ্ঠা । পাখির মতো স্বরে ডাকল, মামণি ।

প্রীতমকে ডাকল না । আজকাল প্রীতমকে ডাকে না লাবু ।

অরুণ দরজা খুলে কাঁধ এগিয়ে দিয়ে হাতে তার কোমর জড়িয়ে ধরে ।

প্রীতম নামে । পায়ের ওপর খাড়া হওয়ার চেষ্টা করে এবং বুঝতে পারে বুঝা চেষ্টা ।

অন্য দিক দিয়ে সযত্নে জড়িয়ে ধরে বিলু । পাড়ার লোকজন দেখছে । রোজই দেখে । কী লজ্জা !

দোতলায় নিজের ঘরে বিছানায় পৌঁছে গড়িয়ে পড়ে প্রীতম । বাইরের পৃথিবী থেকে এসে এই খণ্ড ছোট্টো ঘরের মধ্যে তার যুদ্ধক্ষেত্রে পৌঁছে যায় সে ।

বিলু রান্নাঘরে গেল । অরুণ বাইরের ঘরে দালাল লোকটার সঙ্গে বসে কথা বলছে । রান্নায় পাড়ার ছেলেরের খেলার হন্সরা শোনা যাচ্ছে ।

প্রীতম কিম মেরে পড়ে থাকে কিছুক্ষণ।

চা খাবে ? বিলু নিঃশব্দে এসে চূলে আঙুল দিয়ে বিলি কেটে জিজ্ঞেস করে।
খাবো।

খুব হাঁফিয়ে পড়েনি তো ?

না না। বলে উঠে বসতে চেষ্টা করে প্রীতম।

উঠো না। আমি জানি, তোমার কষ্ট হচ্ছে।

তবু উঠে বসে প্রীতম। এইমাত্র মৃত্যু সম্পর্কে তার নতুন একটা কথা মনে হল। সে বলল, তোমার সঙ্গে আমার একটা কথা আছে। ওরা চলে গেলে একবার আমার কাছে এসো।

ওরা এক্ষুনি চলে যাবে চা খেয়েই। তুমি শুয়ে থাকো, আমি আসছি।

কিন্তু প্রীতম শোয় না। বসে থাকে। বাইরের ঘর থেকেই অরুণ বিদায় নিয়ে চলে যায়। সদর বন্ধ করে বিলু ঘরে এসে প্রীতমের বিছানায় বসে।

কি বলছিলে ?

প্রীতমের মুখে একটা নরম উজ্জ্বল আলো জ্বলছে। মৃদু হাসি তার মুখে। সে বলে, মনে আছে বিয়ের পর অভিমান হলেই আমি তোমাকে বলতাম, আমি যখন মরে যাবো তখন দেখো ?

মনে থাকবে না কেন ?

কিন্তু আমার মনে হয় কি জানো ?

কি ?

মানুষ মরে কিছু প্রমাণ করতে পারে না, কিছু প্রতিষ্ঠা কবতে পারে না। ”

সে তো ঠিকই।

অমন আলগা জবাব দিও না। ভেবে দেখ। খুব গভীরভাবে ভাবো।

আমার কি অত সময় আছে ? মেয়েকে চান করাব, তোমাকে চান করাব, রান্নাও অনেক বাকি।

আঃ বিলু ! শোনো। যেও না।

বলো।

অংশুকে তোমার মনে আছে ?

কোন অংশু ?

আমার কলিগ ছিল।

ওঃ। নামটা চেনা। ঠিক মনে পড়ছে না।

অংশু কেন সুইসাইড করেছিল জানো ?

কেন ?

মা আর বউয়ের ওপর রাগ করে। বনিবনা হত না। ভীষণ গণ্ডগোল হত বাড়িতে। তার মায়ের সঙ্গে বউয়ের ছিল সাম্প্রতিক ঝগড়া। অংশু সেই ঝগড়ার মাঝখানে থেকে শুকিয়ে যেতে লাগল দিনকে দিন। তারপর একদিন জ্বালা জুড়োতে ঘুমের ওষুধ খেল।

তাতে কি ?

অংশু মরার পর তার মা আর বউ দু-জনেই প্রচণ্ড ভেঙে পড়েছিল। হুলস্থূল কান্নাকাটি বিলাপ। তারপর এ ওকে দুষত। পরে যতদিন এক সঙ্গে ছিল ততদিন আবার ঝগড়া করত দু-জনেই। অংশু হয়তো ভেবেছিল, সে মরলে দু-জনেরই শিক্ষা হবে। হয়নি। অংশু

হয়তো ভেবেছিল মরলে নিকৃতি পাবে। কিন্তু তা পেয়েছে কিনা তা পৃথিবীর মানুষের কাছে প্রমাণিত নয়। সুতরাং মৃত্যু দিয়ে অংশ কিছুই প্রমাণ বা প্রতিষ্ঠা করতে পারেনি। ঠিক সেই রকম যারা আত্মহত্যা করে তারা কিছুই প্রমাণ করতে পারে না।

সে তো ঠিক।

আমি কয়েকদিন খুব আত্মহত্যা নিয়ে ভাবছি বিলু। আমার জীবনে যে ক'টা আত্মহত্যার ঘটনা ঘটেছে সব ক'টার চুলচেরা বিচার করছি। দেখলাম, মৃত্যু একটা মাইনাস পয়েন্ট। জীবনের কোনো কিছুর সঙ্গেই তার মেলে না।

বুঝেছি। এবার কাজে যাই?

তুমি কখনো মরা নিয়ে কিছু ভাবোনি?

সময় কোথায় যে দু দণ্ড কিছু ভাববো?

প্রীতম খুব সন্দেহের চোখে বিলুর দিকে তাকায়, তারপর বলে, তুমি কি সত্যিই খুব ব্যস্ত? না কি আমাকে অ্যাভয়েড করার জন্য বলছ?

বিলু এ কথার জবাব না দিয়ে একটা গ্যাঢ় নিশ্বাস ফেলল, তারপর একটু ঘন হয়ে বসল প্রীতমের কাছে। মৃদু স্বরে জিজ্ঞেস করল, তোমার আজ কী হয়েছে বলো তো?

কী হয়েছে তা প্রীতম নিজেও বুঝতে পারছে না। ভিতরে একটা বাঁধ ভেঙেছে। খুব আবেগ আসছে, এলোমেলো হয়ে যাচ্ছে মন। গুঁড়ি মেরে এগিয়ে আসছে মৃত্যুভয়। বিলুর কাছে যে এর কোনো নিদান নেই তাও সে জানে। কিন্তু বিভ্রমবশে আজ তার মন ভীষণ কেন যে বিলু বিলু করছে!

প্রীতম কী বলছে তা হিসেব না করেই বলল, তুমি আজ সারা দিন আমার কাছে কাছে থাকো।

থাকব। কাছেই তো থাকি।

প্রীতম মাথা নেড়ে হুতাশভাবে বলে, কিছুই আমার কাছে নয়। ঐ বাথরুমটাকে মনে হয় পঞ্চাশ কিলোমিটার দূরে। খাট থেকে মেঝেটাকে মনে হয়, দোতলা থেকে একতলার ফুটপাথের মতো নীচুতে। এ ঘর থেকে ও ঘর যেন এ পাড়া থেকে ও পাড়া। কেন সব কিছুই এত দূর লাগে বলো তো?

বিলু চুলে হাত বোলাচ্ছে, মাঝে মাঝে একটা অদ্ভুত অবাক চাউনি দিয়ে দেখছে তাকে। আস্তে করে বলল, কিছুই তো দূর নয়।

সবচেয়ে দূরে তুমি আর লাভ। এ কথা বলার সময় প্রীতমের চোখ ঝাপসা হয়ে এল। তার চোখে কি জল আসছে? ছিঃ ছিঃ! চোখে হাত দিয়ে দেখতে তার লজ্জা করল। কিন্তু বুকের মধ্যে যে একটা কান্না গোঙাচ্ছে সে বিষয়ে কোনো সন্দেহ নেই। হঠাৎ হল কি তার? যদি দুর্বলতা আসে, যদি হাল ছেড়ে দেয়, তবে এ লড়াইয়ে তার হার নিশ্চিত।

বিলু একটু রাগ করে বলে, অত ভাবের কথা জানি না বাবা। আমরা তোমার থেকে দূরে হতে যাবো কেন? ঐসব ভাবো বুঝি সারা দিন?

প্রীতম গ্যাঢ় স্বরে বলে, মানুষ কতটা মানুষের কাছে হতে পারে বিলু? একজন অন্যজনের ভিতরে ঢুকে যেতে পারে না?

বিলু হাসল। বলল, এও তো ভাবের কথা। যাই তোমার দুখ নিয়ে আসি গে। দুখ খেয়েই ওষুধ খাবে—

প্রীতম মাথা নেড়ে বলল, যেও না। এ সময়টা খুব ডেনজারাস। এক মুহূর্তও আমাকে ছেড়ে থেকো না এখন। আমাকে ছুঁয়ে বসে থাকো।

বিলু সহজে ভয় পায় না, সহজ আবেগে ভেসেও যায় না। কিন্তু এখন হঠাৎ তার চোখে ঘনিয়ে উঠল ভয়। ঠোঁট সাদাটে দেখাল। শরীরটাও হঠাৎ শিউরে উঠল কি? প্রীতমকে এত চঞ্চল কখনো দেখেনি সে। দু হাতে প্রীতমের রোগা শরীরটা আঁকড়ে ধরে। সে বলল, আছি, আছি। কোনো ভয় নেই তোমার। কেন এরকম করছ? আমি যে ভেবে মরছি।

প্রীতম লক্ষ করে সকালের উজ্জ্বল রোদে ধোয়া এই ঘরে সিলিং থেকে বাদুড়ের মতো ঝুলে আছে কালো কালো অঙ্ককার। ঝুলছে, দোল খাচ্ছে। জানালা দিয়ে বাইরে থেকে অতিকায় ডানায় উড়ে আসছে তাদের আরো দোসর। বুককেসের তলায়, খাটের নীচে, আলনার পিছনে চোরের মতো দাঁড়িয়ে আছে অঙ্ককারের স্তূপ। শরীরের জীবাণুরা ঝিনঝিন শব্দে গাইছে মুক্তিসংগীত।

সে বিলুর হাত আঁকড়ে ধরেছিল। তার বড় বড় নখের আঁচড় লেগে বিলুব হাত ছড়ে গিয়েছিল বলে বিলু অসুস্থ বাথার শব্দ করল, উঃ!

প্রীতম বড় বড় শ্বাস ফেলছিল। উদ্ভ্রান্ত চোখে বিলুর দিকে চেয়ে বলল, যেও না। যাচ্ছি না তো।

থাকো। আর একটু থাকো।

সাবা দিন থাকব, ভেবো না! ওভাবে তাকিয়ে কী দেখছ?

প্রীতমের মন বলল, আব খুব বেশী সময় নেই। দিনের আলোর ওপব একটা অঙ্ককারের ঘোমটা নেমে এসেছে। হালকা ফিকে অঙ্ককাব। কিন্তু ক্রমে তা গাঢ়তর পুঞ্জীভূত হয়ে উঠবে। শরীরের জীবাণুরা তাদের প্রবল সংগীত গেয়ে চলেছে।

হাল ছেড়ে প্রীতম বালিশে মাথা রাখে। চোখ বোজে। বিলুব সঙ্গে জমির প্লট দেখতে যাওয়া তার ঠিক হয়নি। যেই প্লট দেখতে গেল অমনি এল বিষয়-চিন্তা। সে গাড়িতে বসে থেকে অন্তত গোটা তিনেক প্লট দেখেছে। আব বাস্তুজমি কেনার প্রয়োজনীয়তার কথা ভাবতে গিয়ে কেবলই মনে হয়েছে, আমি মরে গেলে বিলু আর লাবুর তো একটা স্থায়ী আস্তানা দরকাব। এই সব ভাবতে ভাবতে জীবাণুদের প্রবল প্রশয় দিয়েছে সে। মন মৃত্যুর পুকুরে ডুব দিয়ে উঠে এসেছে। এখন তার সমস্ত সত্তা এক ঢাল বেয়ে একমুখী টানে নেমে যাচ্ছে মৃত্যুর উপত্যকায়। একে ফেবানো খুব মুশকিল।

বালিশের কোনা আঁকড়ে দাঁত দাঁত চেপে সে বিড়বিড় করে বলতে লাগল, ভাল আছি, আমি ভাল আছি, আমার কোনো অসুখ নেই, আমি রোগমুক্ত, সুস্থির, আমি অজর, অমর। ভাল আছি, আমি ভাল আছি.....

ঐভাবেই ঘুমিয়ে পড়ল প্রীতম।

বিলু তার গায়ে লেপটা সাবধানে টেনে দিয়ে উঠে পড়ল।

মনটা হঠাৎ বড় ভার লাগছে বিলুর। অঘটনের জন্য মনকে সে প্রস্তুত রেখেছে। তবু হঠাৎ সর্বনাশ এসে দরজায় দাঁড়ালে বুক কঁপে উঠবে না কি?

লাবুকে স্নান করিয়ে খাইয়ে দিল বিলু। রান্না দেখিয়ে দিল ঝিকে। তারপর একটু একা হয়ে বারান্দায় এসে উদাসভাবে চেয়ে রইল দূরের আকাশের দিকে।

কলেজে পড়ার সময় এবং তার পরবর্তী কালেও বিলুর প্রিয় বন্ধু ছিল পুরুষরা। মেয়েদের সঙ্গে সে কখনোই মিশতে ভালবাসত না তেমন। পুরুষদের সঙ্গে বেশী মিশে তার স্বভাবও অনেকটা পুরুষের মতো হয়ে গেছে। সে সহজে অসহায় বোধ করে না, ভেঙে পড়ে না। সে অনেকটাই স্বাবলম্বী, আত্মবিশ্বাসী, স্বাধীনচেতা। তবু আজ প্রীতমের হাবভাব দেখে

তার বুকের মধ্যে ধকধক করছে। শুকিয়ে আছে গলা, জিভ। একটু কান্না কান্না ভাব থম ধরে আছে কণ্ঠার কাছে। এখন কোনো আপনজনকে বড় দরকার। কিন্তু কে আছে বিলুর। দাদারা যে যার সংসারে জড়িয়ে থেকে দূরের মানুষ হয়ে গেছে। সেজদা দীপনাথ নানা কাজে ব্যস্ত। ছোড়দা সোমনাথের কাছে আছে বড়ো অথর্ব বাবা। বিলুর এই অসহায় অবস্থায় কেউই এগিয়ে আসবে না, কাজে লাগবে না।

আপনজনের অভাব এমন কোনোদিন টের পায়নি বিলু। এই রোগা মানুষটাকে এতদিন তো ভারী মনে হয়নি তার। প্রীতম কোনোদিনই বিলুব ওপর নিজেকে ছেড়ে দেয়নি। মনে হচ্ছে, আজ থেকে দিল। ফলে বিলুর ভারী বিপদ হল এখন থেকে। কেউ পাশে থাকলে সে অনেকটা জোর পেত। প্রীতমের ভার সে একা বইবে কি করে?

মা! আমি একটু খেলনা ধরব?

বিলু ফিরে তাকিয়ে লাবুকে দেখে। ছোট্ট অসহায়, একান্ত নির্ভরশীল। লাবুকেও তো বইতে হবে তার, যতদিন না লাবু নিজের ভালমন্দ বুঝতে শেখে! বাপ-ন্যাওটা লাবুকে বাপের কাছ থেকে কেড়ে নিতে খুব বেগ পেতে হয়েছে। কিন্তু শেষ পর্যন্ত পেরেছে বিলু। ফলে লাবুর ভারও তাকে একা বইতে হয়।

মেয়ের দিকে চেয়ে একটা বড় শ্বাস ফেলে বিলু। লাবু তাকে ভীষণ ভয় পায়। সব সময়ে চোর হয়ে থাকে। সামান্য নড়াচড়া করতেও মায়ের অনুমতি নেয়। তবু এরকম কড়া শাসন ছাড়া উপায়ই বা কী বিলুর! দুট্ট, দামাল, অবাধ্য মেয়ে হলে বিলুব বড় বিপদ হত।

বিলু গলায় সামান্য মাপমতো আদর মিশিয়ে বলল, খেল। তবে শব্দ কোরো না। বাবার ঘুম যেন না ভাঙে।

লাবু মাথা নেড়ে চলে গেল।

অনিয়ম বিলু পছন্দ করে না। তবুও প্রীতমকে অঘোরে ঘুমোতে দেখে বিলু স্নান-খাওয়া বাকি রেখে বাইরের, ঘরের সোফায় শুয়ে হঠাৎ ঘুমিয়ে পড়ল।

উঠল বেলায়, প্রীতমের ডাকে।

বিলু! বিলু! আমার খিদে পেয়েছে।

ঘুম ভেঙে বিলুর কেমন একরকম লাগতে থাকে। মাথাটা ফাঁকা এবং টলমলে। বুকটা খাঁ খাঁ করছে তেঁটায়। কেবল মনে হচ্ছে, কেউ নেই, আমাদের কেউ নেই।

প্রীতমের মাথা ধুইয়ে খাওয়াতে বসে বিলু হঠাৎ আজ বলে ফেলল, শিলিগুড়ি থেকে কাউকে আনাবে?

প্রীতম অবাক হয়ে বলে, কেন?

আমাদেব এখন একজন সহায় সম্ভল দরকার। আপনজন বলতে তো কেউ নেই।

প্রীতম মুখ ফিরিয়ে নিয়ে বলে, কে আসবে?

তুমি চাইলে নিশ্চয়ই আসবে কেউ না কেউ।

আসার মধ্যে এক আসতে পারে মা। কিন্তু তারই বা এসে লাভ কি?

লাভ হয়তো একটু আছে। আমার না হলেও তোমার।

অসময়ের ঘুম থেকে উঠে প্রীতম দেখেছে, ঘরের বাদুড়খোলা অঙ্ককারগুলো আর নেই। সে ঘরকে বলেছে, আমি বেশ ভাল আছি। আর এখন সত্যিই সে অনেক ভাল আছে।

প্রীতম মাথা নেড়ে বলল, মা! মায়ের ভীষণ মায়া। আমার এ চেহারা মায়ের না দেখাই ভাল। তা হলে আর যে কদিন বাঁচত তাও বাঁচবে না।

বিলুর কোনোদিন সহজে অভিমান-টান হয় না। আজ এ কথায় হল। বলল, শুধু মায়ের দিকটাই দেখলে! আমি কিভাবে বেঁচে আছি তা দেখলে না!

মা আমাকে পেলে বড় করে দিয়েছে। এখন মায়ের পালা শেষ। ছেলেরা বড় হলে মায়েদের খুব বেশী কিছু করার থাকে না।

বিলু দীর্ঘশ্বাস কখনো ছাড়ে না। এখন ছাড়ল। বলল, তুমি আর বড় হলে কোথায়? এখনো মায়ের আঁচলই তোমাকে ঘিরে আছে।

কথাটার মধ্যে একটু খোঁচা ছিল। প্রীতম মাথা নেড়ে বলল, তুমি যদি না পারো তবে আমাকে কোনো নার্সিং হোম বা হাসপাতালে দাও। আমার মাকে বা আর কাউকে এর মধ্যে টেনে এনো না।

বিলুর মুখ থমথম কবে উঠল। ভারতের চামচ তুলেছিল প্রীতমের মুখের কাছে, প্রীতম মুখ ফিরিয়ে নিল বিরক্তিতে। আব খাবে না জানে বিলু। সে নিজে যেমন পুরুষালী স্বভাবের, প্রীতম তেমনি ঠিক মেয়েলী স্বভাবের।

বিলুর ঠোঁটের আগায় অনেক জবাব এসেছিল, কিন্তু সংযত রাখল নিজেকে। ভারতের প্লেট নিয়ে উঠে চলে গেল।

ছাদের দিকে অপলক চেয়ে শুয়ে রইল প্রীতম। চেয়ে থাকলেও তার মন অন্য কাজ করছে। ভিতরে একটা বাঁধ ভেঙে প্লাবন হয়ে গেছে। সেই বাঁধ মেরামত চলছে। এত সহজে সে কি ধরা পড়বে মৃত্যুর ফাঁদে? আগে বেঁচে থাকাটাকে মাঝে মাঝেই খুব অর্থহীন মনে হত। মনে হত, মৃত্যুটা কেমন? এখন আর তা মনে হয় না। এখন মনে হয়, বেঁচে থাকার জন্যই বেঁচে থাকা। এর প্রতিটি মুহূর্তেই দাম কোটি কোটি টাকা। মৃত্যু একটা মাইনাস পয়েন্ট। তা দিয়ে কিছুই প্রমাণ করা যায় না।

॥ বারো ॥

কুমারামাথা জ্যোৎস্নায় নদীর ধারে পাঠশালার বারান্দায় দুটো লোক জবুথুবু হয়ে বসে আছে। আজ একেবারে রক্তজমানো ঠাণ্ডা। থেকে থেকে উত্তরে হাওয়া মারছে, তাতে ভিতরেব প্রাণবায়ুটা পর্যন্ত যেন নিবু নিবু হয়ে আসে। জ্যোৎস্নায় দেখা যায়, নদীর বুকেটা খাঁ খাঁ করছে, শুকনো আর সাদা। একধার দিয়ে শুধু নালার মতো একটা জলধারা কষ্টেস্টে বয়ে যাচ্ছে। নদীর খাত আগে গভীর ছিল। এখন মাটি আর বালি জমে জমে তা প্রায় মাঠঘাটের সমান উঁচু হয়ে এল। বর্ষার প্রথম চোটেই জলের ঢল উপচে মাঠঘাট ভাসায়, পাঠশালার ক্লাস ঘরে গোড়ালিডুব জল দাঁড়িয়ে যায়। তাই এখন গ্রীষ্মের বদলে পাঠশালায় বর্ষার লম্বা ছুটি দেয়।

এই পাঠশালা, এই নদী, চারদিকের মাঠঘাট এসব কিছুর সব গল্পই জানে নিতাইক্ষ্যাপা। খুব যত্নে ছোটো কলকেয় গাঁজা সাজতে সাজতে বলল, এ জায়গার একটা নেশা আছে। থাকো কিছুদিন, টের পাবে। মেরে তাড়ালেও যেতে চাইবে না।

ধূর! এ তো ব্যাকওয়ার্ড জায়গা।

নিতাই ইংরিজি কথাটা বুঝল না। তবে আন্দাজে ধরল, নিম্নের কথাই হবে। একটু চড়া স্বরে বলল, এ জায়গার মাটির তলায় কী আছে জানো? বিশেষ শিবলিঙ্গ। তাকে জড়িয়ে আছে সাতটা জ্যাস্ত সাপ। মাকালতলার মোড়ে যে বটগাছ আছে, ঠিক তার দেড়শ হাত নীচে। একটা গুপ্ত সূড়ঙ্গ আছে, তা দিয়ে যাওয়া যায়। তবে সূড়ঙ্গের হদিশ কেউ জানে

না।

যত সব গুলগল্লো।

নিতাইক্ষ্যাপা এবার ক্ষেপে গিয়ে বলে, আর চাঁদে যে মানুষ গেছে সে গল্পেটা কি ? সেটা গুল নয় ? হিমালয় পাহাড়ে মানুষ ওঠার গল্প গুল নয় ? নিতাই সব জানে। বেশী বকিও না।

সরিং হাসে। বলে, এখানে আর কি কি আছে ?

সে অনেক আছে। শুনলে মহাভারত। থাকো, জানতে পাববে।

বলে নিতাই কলকেটা এগিয়ে দিয়ে বলে, ধরাও। অগ্রে ব্রাহ্মণঃ দদ্যাৎ। প্রসাদ দিও।

আমার পৈতে নেই, ব্রাহ্মণ-টাক্ষণ আবার কি ?

ও বাবা, গোখরো সাপের বিষদাঁত উপড়ে ফেললেই সেটা ঢোঁড়া হয়ে যাবে নাকি ? পৈতে থাক না থাক ব্রাহ্মণ বলে কথা।

কলকেটা নিয়ে সরিং সন্দেহেব গলায় বলে, খুব কড়া নয় তো ! মাথাটাখা ঘুবে গেলে মজা দেখাবো।

আরে না। মিহিন ধোঁয়া, ভারী মিষ্টি, শরীরটা গবম হবে, মাথাটা হালকা লাগবে। একটার বেশী টান দিও না, ধোঁয়াটা বেশীক্ষণ ধরে রেখো না।

রাখলে কি হবে ?

নেশা করেছে টেব পেলো তোমাব দিদি আমাকে ঠেঙিয়ে তাড়াবে।

তা তুমি তো হিমালয়ে চলেই যাচ্ছে। তাড়ালে ভয় কি ?

সে তো যাবোই। খাঁটি জিনিস এখনো সেখানেই পাওয়া যায়। আমাকে এক পোটকা সাধু এসে ভেজাল মাল দিয়ে গেছে। মস্ত্রে তেমন কাজ হচ্ছে না।

সবিং খুব আস্তে ন্যাকড়া জড়ানো কলকেয় টান দিল। মিষ্টি, মাতলা ধোঁয়া। ধক করে গলায় লাগল না, কিছু তেমন টেরই পাওয়া গেল না। ফলে আর একটা জোর টান মেরে ধোঁয়াটা ধরে রাখল বকে।

হাত বাড়িয়ে নিতাই কলকেটা নিয়ে বলে, সাবধান কিন্তু। ধরা পড়লে আমার নাম কোরো না।

আরে না ! বলে ধোঁয়াটা আস্তে আস্তে ছেড়ে দেয় সরিং।

নিতাই কলকেটা জুতমতো ধবে বলে, নিতাইয়ের কপালটা খুব ভাল কিনা ! যেখানে যত খারাপ ব্যাপার হবে সবাই ধরে নেয় এ নিশ্চয়ই নিতাইয়ের কাজ। তোমার ডেপো ভাগনেটা কোথা থেকে খারাপ খারাপ কথা শিখে এসেছে, সে দোষটা পর্যন্ত আমার ঘাড়ে চালান করল মদনা।

বাণ মারতে পারো না ! বাণ মেরে সব ফিনিশ করে দাও।

নিতাই অভিমানভরে বলে, বাণমারা নিয়ে সবাই আমাকে ক্ষ্যাপায়। তুমিও নতুন এসেই পেছুতে লাগলে ?

সরিং বাঁশের ঠেকনোয় মাথা রেখে কুয়াশামাখা আখখানা চাঁদের দিকে চেয়ে বলল, ক্ষ্যাপাব কেন ? বাণ মারা জানলে আমিও বিস্তর লোককে বাণ মারতাম।

নিতাই স্বাসটা সম্পূর্ণ ছেড়ে কলকেয় একটা চুমু খেয়ে মুখ লাগাল, তারপর হাপরের শব্দ করে টেনে নিতে লাগল ধোঁয়া। খিইয়ে উঠল কলকের আগুন। অনেকক্ষণ ঝিম মেরে থেকে বলল, আমিও মারি। কিন্তু মদনা শালা মরে না।

মদনটা কে বলো তো ?

ঠিকাদারবাবুকে চেনো না ? ভুবুণ্ডির কাক । দেখলেই চিনবে । মল্লিবাবুর সঙ্গে খুব মাখামাখি ছিল ।

সরিৎ খুব সাবধানে জিজ্ঞেস করল, মল্লিবাবু লোক কেমন ছিল ?

নিতাই আবার টান মেরেছে । ধোঁয়া বেরিয়ে যাওয়ার ভয়ে অনেকক্ষণ কথা বলল না । তারপর নাক দিয়ে দুটো সাদা সাপ ছেড়ে দিয়ে বলল, যারা বিয়ে করে না তারা লোক খারাপ হয় না । পুরুষদের খারাপ করে তো মেয়েছেলেরা । যাদের এগারো হাতেও কাছা হয় না ।

মেয়েছেলের ওপর তোমার অত রাগ কেন বলো তো ?

মা বোন পর্যন্ত মেয়েছেলেরা ভাল । যেই বউ হল অমনি সর্বনাশ ।

সবিতের নেশা হয়েছে কিনা তা বুঝতে পারছে না ! তবে মাথাটা হালকা লাগছে, টলমল করছে । শরীরে তেমন ঠাণ্ডা টের পাচ্ছে না । বরং একটা যেন হাঁসফাঁস লাগে । তবু সেজদির বাড়ির রহস্যটা জানবার একটা আগ্রহ সে এসে থেকেই বোধ করছে । গত সাত দিনে সে শুধু রহস্যটা টের পেয়েছে । বোঝেনি । এ ব্যাপারে কাউকে প্রশ্নও করা যায় না । কেবল নিতাইক্ষ্যাপার কথা আলাদা ।

সরিৎ খুব সাবধানে জিজ্ঞেস করল, মল্লিবাবু বিয়ে করল না কেন ?

বিয়ে করেনি তাতে কি ? ভালই ছিল । অনেক মেয়েমানুষ ছিল তার । লাইনের ওধারে মঙ্গলহাটের চামেলীর কাছে খুব যাতায়াত ছিল । কলকাতাতেও তো ছিলই শুনি । ফুটিতে থাকত । ফেল কড়ি মাথো তেল । কোনো বাঁধাবাঁধ নেই ।

বিয়ে কবাবে না তো এত সব সম্পত্তি করতে গিয়েছিল কেন ? কার ভোগে লাগবে ?

ও হচ্ছে পুরুষ মানুষের একটা নেশা । রোজগার করবে, সম্পত্তির মালিক হবে, এ না হলে পুরুষ কিসের ? ভোগের কথা যদি বলো তো ভোগ মল্লিবাবু একাই কিছু কম করেনি ।

এত লোক থাকতে সেজো জামাইবাবুকেই বা সম্পত্তি দিয়ে গেল কেন, জানো ?

সে অনেক গুহা কথা আছে । থাকলে টের পাবে । তবে সম্পত্তি তোমার ভগ্নীপোতের নয়, দিদিব ।

তাও জানে সরিৎ । সেই শোকেই কি জামাইবাবু বাড়ি থেকে অনেকটা বাইরের দিকে আলাদা ঘরে পব মানুষের মতো বসবাস করছে ? সেজদির সঙ্গে জামাইবাবুর কথাবার্তা প্রায় নেই বললেই হয় । এ বাড়ির ছেলেমেয়েগুলো একটু নিজীব যেন । গাছপালা, পুকুর, আলো-হাওয়া, প্রচুর খাবার-দাবার সত্ত্বেও বাড়িটায় যেন আনন্দ নেই ।

ক্ষ্যাপানিতাই আর কী বলে শোনার জন্য উৎকণ্ঠ হয়ে থাকে সবির ।

নিতাই বোম ভোলানাথের মতো চোখ বুজে থাকে খানিক । তার পর গদগদ স্বরে বলে, 'জয় কালী ।'

সরিৎকেও গাঁজাটা বেশ ধরেছে । চোখে অনেক ঝিকিমিকি দেখছে সে । শরীরের মধ্যে দে দোল দোল ভাব । চিন্তাশক্তি ঠিক থাকছে না, একটু একটু গুলিয়ে যাচ্ছে বোধভাসি ।

কি খাওয়ালে গো নিতাই ! বাড়ি যেতে পারব তো ! পা টলবে না ?

আরে দূর দূর । খুব পারবে বাড়ি যেতে । অত ভয় খেলে কি নেশা করে সুখ আছে ? চেপে বসে থাকো, চারদিককার কাণ্ডকারখানা দেখ আব হাসতে থাকো । জয় কালী !

নিতাইয়ের দেখাদেখি চোখ বুজে ধ্যানস্থ হতে গিয়ে মুহূর্তের মধ্যে তন্দ্রা এসে যায় সবিতের । হালকা মাথাটা বাঁশের ঠেকনোয় কিছুতেই আটকে থাকতে চায় না । ঠুঁকে পড়ে সামনের দিকে ।

ঝিমুনি কাটিয়ে চোখ চাইতেই বুঝতে-পারে, নিতাই তাকে কী যেন জিজ্ঞেস করছে ।

কী বলছ ?

বলি, দিদি তোমাকে মালদা থেকে এখানে আনাল কেন ?

কী জানি । লিখেছিল এখানে কাজ করতে হবে ।

কী কাজ ?

তা কে জানে । জমিজিরেত সম্পত্তির ব্যাপারটা আমি ঠিক বুঝি না ।

নিতাই একটা স্বাস ফেলে বলে, শ্রীনাথবাবুও বোঝেন না । বোঝেন বটে তোমার দিদি । জাহাজ মেয়েমানুষ । মল্লিবাবু ঠিক লোক চিনত, তাই শ্রীনাথবাবুর নামে সম্পত্তি লিখে দিয়ে যায় নি । গেলে এতদিন পুরোটা ফুকো হয়ে যেত ।

কেন বলো তো ?

সে আর বলে কাজ নেই । শ্রীনাথ কর্তা মল্লিবাবুর দোষগুলো পুরোমাত্রায় পেয়েছেন, গুণগুলো পাননি । এবার বুঝে নাও । আমি এই ছোটো মুখে বড় কথা বলতে চাই না বাবা । তবে ঠাকরোনের সঙ্গে ঠেকে মানায় না ।

সরিং হেসে বলে, তা আমার দিদিও তো মেয়েমানুষ, তারও এগারো হাতে কাছা হয় না ।

আ ছি ছি, তোমার দিদির কথা এখানে হবে কেন ? ওসব কথা এলেবেলে মেয়েছেলে সম্পর্কে খাটে । ঠাকরোন কি তেমনধারা মেয়েমানুষ ?

তবে কেমনধারা ?

নিতাই একটু ফাঁপরে পড়ে গিয়ে বলে, তোমার দিদিকে আসলে কেউ আমরা মেয়েছেলে বলে ভাবিই না । সবাই যমের মতো ভয় খাই ।

সরিং মৃদু মৃদু হাসে । সেজদিকে কুমারী অবস্থাতেও লোকে একটু সমঝে চলত । লম্বা সুগঠিত চেহারার সেজদির দিকে নজর দিত অনেকেই, কিন্তু ভিড়তে ভয় পেত । একবার সেজদির সঙ্গে রাস্তায় যেতে পিছনে একদঙ্গল ছেলের মন্তব্য কানে এসেছিল সরিতের, এ যা ফিগার মাইরি, সাতটা মিলিটারিও ঠাণ্ডা করতে পারবে না ।

কথাটা শ্রীল নয়, শুনে সরিং লজ্জাও পেয়েছিল বটে । কিন্তু কথাটা মিথ্যেও নয় । বলতে কি সেজ জামাইবাবুর আদুরে মোলায়েম চেহারার পাশে সেজদিকে মানায় না । ভাই হিসেবে তার কথাটা ভাবা উচিত নয়, তবু তার মাঝে মাঝে ইদানীং সন্দেহ হচ্ছে, নরম-সরম জামাইবাবু তার পাঞ্জাবী মেয়ের মতো ফিগারওলা সেজদিকে ঠাণ্ডা করতে পারে কি-না । কথাটা এই নেশার ঘোরে মনে হওয়ায় হাসিটা চাপতে পারল না সরিং । ফিক ফিক করে হাসতে লাগল । বিয়ের আসরে সেজদি আর জামাইবাবুকে দেখে মুখ-পাতলা বড় জামাইবাবু বলেই ফেলেছিল, এ যে প্রশান্ত মহাসাগরে একটা কাঁচকলা । কথাটা মনে হওয়ায় সরিং আবার হাসে । হাসতেই থাকে ।

ক্যাপানিতাই চোখ খুলে গভীর গলায় বলল, হাসছ যে !

একটা কথা ভেবে ।

কি কথা ?

সে আছে !

নেশাটা খুব ধরেছে তোমায় । বাড়িতে গিয়ে খানিকটা দুধ খেয়ে নিও । নইলে এ নেশায় শরীর শুকিয়ে যায় ।

আর কি হয় ?

ব্রেন খুব কাজ করে । লোকে গাঁজাখোরকে গাঁজাখোর বলে বটে, কিন্তু মগজকে এমন তরতরে করার মতো জিনিস আর নেই । গাঁজা হচ্ছে কুলোর মতো, ঝেড়ে ঝেড়ে

আজেবাজে চিন্তা মগজ থেকে ফেলে দেয়। কাজের জিনিসগুলো রাখে।

কুলোর উপমায় সরিৎ আবার ফিক করে হাটসে। বুঝতে পারে, হাসিটা কিছুতেই সে সামলাতে পারছে না। খুব ডগমগ লাগে ভিতরটা। সেজদিকে এখানকার এরা সবাই ভয় খায় জেনেও তার হাসি আসতে থাকে। সে বলে, সেজদিকে তোমরা যে মেয়েমানুষ বলে মনে করো না সেই কথাটা আমি আজই সেজদিকে বলে দেবো।

নিতাই আবার ফাঁপরে পড়ে গিয়ে বলে, তাই কি বললাম নাকি ?

তাই তো বললে !

দূর বাপু, তুমি সব কথাই সোজা মানেটা ধরো। এ কথার মধ্যে একটা প্যাঁচ আছে, সেটা তো বুঝবে।

প্যাঁচটা আবার কি ?

নিতাই একটা দীর্ঘশ্বাস ফেলে বলল, তখন মল্লিবাবু বেঁচে। ঠুঁতে নামে একটা বিখ্যাত চোর ছিল এ তল্লাটে। গুণী লোক। তার হাত খুব সাফ ছিল। তো সে একবার এ রকম মাঘের রাত্তিরে তোমাদের দক্ষিণের ঘরে হানা দিয়েছিল। সে ঘরে ঠাকবোন আর তাঁর মেয়েরা শোয়। শ্রীনাথবাবু তখন কলকাতায়। সজলখোকা তখনো হয়নি।

গল্পটা বলতে বলতে নিতাই একবার আঁধারভেদী বেড়ালচক্ষুতে সরিতের মুখখানা দেখে নেয়। শালা শুনছে তো ঠিক ? প্যাঁচটা ধরতে পারছে তো ?

সরিৎ শুনছে। মন দিয়েই শুনছে। এসব কথাই তো সে শুনতে চায়।

সরিৎ বলল, হুঁ।

নিতাই থুঃ করে কৃত্রিম থুথু ফেলে বলে, তা ঘরে ঢুকতে অবশ্য ঠুঁতেকে কষ্ট করতে হয়নি। ঠাকবোন বুঝি বাইরে গিয়েছিলেন দরজাটায় শেকল দিয়ে। ঠুঁতে তাকে তাকে ছিল, সেই ফাঁকে গিয়ে ঢুকে মেয়েদের গলার হার, হাতের বালা হাতাচ্ছে।

তুমি তখন কোথায় ছিলে ?

আমি তখনো সাধু হইনি। গোলাঘরের পাশে মল্লিবাবু একটা কাঁচা ঘর করে দিয়েছিলেন, সেইখানে মড়ার মতো পড়ে ঘুমোতাম।

তো কী হল ?

ঠুঁতে যখন বেরোতে যাচ্ছে সেই সময় ঠাকরোন উঠোন পেরিয়ে ফিরে আসছিলেন।

উঠোন পেরিয়ে কেন ? কলঘর কি তখন উঠোনের অন্যধারে ছিল ?

নিতাই একটা নিশ্চিন্তির শ্বাস ছাড়ল। যাক বাবা, ছেলেটা একেবারে গাড়ল নয়। ঠিক ঠিক শুনছে, জায়গামতো প্যাঁচটা ধরতেও পারছে।

নিতাই একটু আমতা আমতা করে বলল, ঠিক তা নয়। ঠাকরোন হয়তো বাড়িটা চক্কর মারতে বেরিয়েছিলেন। খুব ডাকাবুকো মানুষ তো। ভূত-প্রেত চোর-ডাকাত কাউকে ভয় নেই।

উঠোনের এধারে কে থাকত ?

নিতাই অবাধ হওয়ার ভান করে বলল, কে আবার থাকবে ? তখন তো এত ঘর ওঠেনি। উত্তরধারে মল্লিবাবুর সেই ঘর এখনো আছে, উনিই থাকতেন।

সরিৎ ন্দু হাসে। গোলমালটা সে আগেই আন্দাজ করেছিল, এখন ঠিক ঠিক মিলে যাচ্ছে। গাড়ল নেতাইটা বুঝতে পারছে না যে, গুহকথা ফাঁস হয়ে যাচ্ছে।

সরিৎ বলল, তারপর ?

ঠাকরোনের হাতে পাঁচ ব্যাটারির টর্চ ছিল। চোখ ধাঁধানো আলো হত সেটাতো। ঠুঁতে

যেইমাত্র চৌকাঠ ডিঙিয়েছে অমনি ঠাকরোন টর্চটা মারলেন। গুঁতে এক লাফে উঠানে নেমেই ঠাকরোনের হাতের টর্চটা কেড়ে নিয়ে উঠানে ফেলে দিয়ে দু হাতে মুখ আর হাত চেপে ধরে বলল, 'টু' শব্দ করলে মেরে ফেলব। গুঁতে ভেবেছিল, মেয়েমানুষকে আর ভয় কি? মতলব ছিল, ঠাকরোনকে ঘরে ভরে দিয়ে বাইরে থেকে শেকল টেনে পালাবে। অন্য সব মেয়েমানুষ হলে তা পারতও। ঐ অবস্থায় বেশীর ভাগ মেয়েছেলেরই দাঁত কপাটি লাগার কথা। কিন্তু ঠাকরোনের ধাত অন্য। এক ঝটকায় গুঁতের হাত ছাড়িয়ে এমন এক চড় কষালেন গুঁতে সেইখানে বসে পড়ল। আশ্চর্য যে ঠাকরোন কাউকে ডাকাডাকি করেননি, হাল্লাচিল্লা ফেলেননি। সেইখানে গুঁতেকে ধরে লম্বা টর্চখানা দিয়ে এমন উস্তম-কুস্তম পেটালেন যে, তার ধাত ছাড়ার জোগাড়।

সাজঘাতিক তো। সেজদির এই সাহসে সরিৎ ভারী বিস্মিত হয়।

সেই তো কথা। কাণ্ডটা মল্লিবাবু তাঁর ঘর থেকে আগাগোড়া দেখেছিলেন।

সে কি? দেখেও বেরোননি?

বেরোননি কেন তারও কারণ আছে। পরে বলেছিলেন, আমি তুষার সাহস আর বীরত্বটা দেখছিলাম। স্বীকার করতে হয়, হ্যাঁ, মেয়েমানুষ বটে। এ-রকম একজন ঘরে থাকলে পুরুষমানুষের আর চিন্তা-ভাবনা থাকে না।

সেজদিকে খুব শ্রদ্ধা করতেন বুঝি মল্লিবাবু?

খুব। শুনিয়ে শুনিয়েই বলতেন, শ্রীনাথের বউ যেন গোবরে পদ্মফুল। দেখেছো তো মল্লিবাবুকে?

অনেকবার। দারুণ চেহারা ছিল। মিলিটারির মতো।

তবে বলা ঠাকরোনের পাশে মানাত কাকে? ছোটো মুখে বড় কথা হয়ে যাবে। তবু বলি শ্রীনাথ কতাকে একেবারে গোবরগণেশ লাগে ঠাকরোনের পাশে। মল্লিবাবুর উচেগোটে জম্পেশ চেহারাখানা ছিল। কার্তিকঠাকুরটি নন, রীতিমত খাটিয়ে-পিটিয়ে শরীর।

সে কথা ঠিক।

তবেই বোঝো মল্লিবাবু কেন ঠাকরোনের নামে সম্পর্ক দিয়ে গেলেন। জানতেন, এর কাছ থেকে লোকে ভয় দেখিয়ে নিতে পারবে না।

লোকে কি চেষ্টা করেছে?

করে আবার নি! বিস্তর করেছে। তবে ঠাকরোনের সঙ্গে এঁটে ওঠেনি কেউ। গুঁতেকে যেমন হাজতবাস করিয়ে দেশছাড়া করেছিলেন তেমনি আরো অনেক কীর্তি আছে। থাকো, শুনবে।

দু-চারটে বলো না শুনি।

সে অনেক আছে। লোকে সাথে কি ঠাকরোনকে মেয়েছেলে বলে ভাবে না!

কেউ ভাবে না?

নিতাই আবার মুখটা দেখার চেষ্টা করল। ছেলেটা লাজে খেলাচ্ছে না তো! ভাল মানুষের মতো বলল, ঠাকরোনের সমান সমান পাল্লা টানার মতো মরদ কে আছে বলো! একমাত্র ছিলেন মল্লিবাবু। তাঁর সামনে ঠাকরোন মাথা উঁচু করে কথা বলতেন না।

বটে! বটে! সরিৎ নড়েচড়ে বসে।

মরদ এ তল্লাটে ঐ একজনই ছিল। আব দিনে কালে আর একজনও হয়তো হয়ে উঠবে।

কে? কার কথা বলছ?

সজল খোকাবাবু ।

সরিং একটু ধাঁধায় পড়ে যায় । সজলকে নিয়ে সে কখনো কিছু ভাবেনি । এখন হঠাৎ ভাবনাটা শুরু হল । কিম হয়ে খানিক এলেবেলে চিন্তা ও টলোমলো মাথায় সে সজলের মুখটা ভাববার চেষ্টা করল । তারপরই তার মনে হল, সজলের চেহারাটা বয়সের তুলনায় বেশ লম্বা । হাড়গুলো মজবুত এবং কাঠামোটাও শক্ত, ভারী জেদী ছেলে । মায়ের শাসনে মিনমিনে হয়ে থাকে বটে, কিন্তু ওর ধাত তা নয় । পরশু কি তার আগের দিনই হবে, সজল মুগীর ঘর থেকে একটা মস্ত মোরগ চুরি করে নিয়ে যায় এবং তার বাবার দাড়ি কামানোর জার্মান ক্ষুব দিয়ে সেটাকে জবাই করে । সেই অবস্থাতেই ফেলে রেখেছিল পুকুরের ধারে । হলো বেড়ালটা মুখে করে সেটাকে নিয়ে গোলাঘরের পিছনে ছেঁড়াহেঁড়ি করছিল । সপ্তা দেখতে পেয়ে চৌচামেচি করায় ঘটনাটা ধরা পড়ে । প্রথমে সজলকে কেউ সন্দেহ করেনি । কিন্তু সেজদি সহজে ছেড়ে দেয়নি, সবাইকে প্রশ্ন করে করে অবশেষে ঠিক আসামীকে ধরতে পারে । সজল কবুল করেছে সে মাংস খাওয়ার জন্য মোরগটা চুরি করেনি । তবে ? তাব কোনো জবাব নেই ।

ক্ষ্যাপা নিতাই বলল, ঠিক মল্লিবাবুর মতো ।

কে ?

সজল খোকাবাবু ।

কথাটার মানে কি নিতাই ?

সরিতেব গলার স্বরটা হঠাৎ কঠিন হয়ে ওঠায় নিতাই সাবধান হয়ে বলে, কোনো মানে-টানে নেই বাপু । মুখ ফসকে বেবিয়ে গেছে ।

নেশাটা যত জোর ধরেছে বলে ভেবেছিল সরিং ততটা নয় । হঠাৎ এই সঙ-সাজা ভাড়টার ওপর তার রাগ হল প্রচণ্ড । তাপে তাপে বলছিল সে এক রকম কিন্তু এ তো পষ্টাপষ্ট সেজদির কলঙ্ক রটানো ।

সরিং মালদায় বিস্তব মারপিট করেছে । অনেকগুলো কাজিয়া ছিল না-হক খামোখা । অনেক সময় নির্দোষ লোককেও মেরেছে । আজ একটা মতলববাজ হারামজাদাকে মারলে কেমন হয় ?

ভাবতে ভাবতেই হঠাৎ উঠে একটা লাথি চালায় সরিং, এই শালা ! যত বড় মুখ নয় তত বড় কথা !

নিতাই পৌঁটার মতো গড়িয়ে পড়েছে বারান্দা থেকে । পড়েই চোঁচাল, মেরে ফেললে ! মেরে ফেললে ।

সরিং লাফিয়ে নামে । মাথায় আগুন ধরে গেছে । পর পর কয়েকখানা লাথি ঝাডল কাঁকালে । বলল, শব্দ করলে মেরে চরে পুঁতে ফেলব ।

কে শোনে কার কথা । মাটিতে পড়ে ক্ষ্যাপানিতাই গড়ায় আর জুটাজুটে ধুলো মাখে আর প্রাণপণে চোঁচাতে থাকে, নির্বংশ হবি । অন্ধ হয়ে যাবি । কুষ্ঠ হবে ।

॥ তেরো ॥

বদ্রীর ইনফুয়েনজা হয়েছিল, খবর পেয়েছিল শ্রীনাথ । তারপর থেকে সে আর আসছে না । নদীর ওধারে মাইল দশেক ভিতরে শ্যামগঞ্জ বলে একটা জায়গা আছে । যেখানে এক লপ্টে প্রায় বিঘে দশেক জমি আছে । স্তাতে বর্গা নেই । খবরটা ভালই ছিল । কিন্তু বদ্রী

একদম নাপাত্তা। সে থাকেও বহু দূরে। লাইনের ওধারে অনেকটা যেতে হয় কাঁচা রাস্তায়। জায়গাটা খুব ভাল চেনেও না শ্রীনাথ।

দাদার এই বাড়ি থেকে তার যে বাস উঠে গেছে সেটা সে টের পেয়েছে বহুকাল। ভাবন-ঘরের চাবি তার সঙ্গে থাকে। মজবুত তালা ঝোলে দরজায়। ডুপলিকেট চাবিটা সে, বিছানার তলায় লুকিয়ে রেখেছে। সেটা যেমন কে তেমনই আছে। খোয়া যায়নি। তবু সজল কি করে ঘরে ঢোকে এবং তার জিনিসপত্র ঘাঁটে তা প্রথম প্রথম ততটা খেয়াল করে ভাবেনি সে। কদিন আগে আবার তার ক্ষুরে হাত পড়ায় হঠাৎ খেয়াল হল।

স্বপ্না এসেছিল সকালে, চা দিতে। তাকে জিজ্ঞেস করল, হ্যাঁ রে, আমার ঘরের তালাটা সজল খোলে কি করে জানিস?

স্বপ্না বা স্বপ্নলেখা রোগা মেয়ে। খুব শান্ত, খুব নীরব এবং দুঃখী চেহারা। মুখখানা ভীষণ ধারাল বটে, কিন্তু স্বভাবের সঙ্গে তার মুখশ্রীর কোনো মিল নেই। নিজের এই মেয়েটিকে শ্রীনাথ কখনো ঠিক বুঝতে পারে না।

শ্রীনাথের প্রশ্ন শুনে স্বপ্না ডাব ডাব করে চেয়ে থেকে বলল, বোধ হয় চাবি আছে। চাবি তো আমার কাছে।

তা হলে ঠিক জানি না।

সজলকে দেখতে পেলে পাঠিয়ে দিস তো।

ও আসবে না।

কেন?

সেদিন সেই মোরগ চুরির পর থেকে মা ওকে দক্ষিণের ঘরে সারাদিন শেকল দিয়ে আটকে রাখে।

ও। বলে একটু গম্ভীর হয়ে যায় শ্রীনাথ। ভিতববাড়িতে কি হয় না হয় তার সব খবর তার কানে এসে পৌঁছয় না। শ্রীনাথ চায়ে চুমুক দিয়ে বলল, আচ্ছা যা।

স্বপ্না চলে যাচ্ছিল। শ্রীনাথ ডাকল, শোন।

বলো।

চাবির কথাটা তোর মায়ের কানে তুলিস না।

স্বপ্না একটু হেসে বলল, কে ওসব কথা তুলবে বাবা! মা যে রোগে আছে দু'দিন ধরে! ভাইকে শুধু গলা টিপে মেরে ফেলতে বাকি রেখেছে। ছোটোমামা না আটকালে কি যে হত!

বিরক্ত হয়ে শ্রীনাথ বলল, দোষ যখন স্বীকারই করেছে তখন অত মাবধরের কী দরকার ছিল!

মা জানতে চাইছিল মোরগটাকে ও মারল কেন! সেই কথাটার জবাব দেয়নি যে। শুধু বলেছে, আমি-চুরি করেছি, আমিই কেটেছি। কিন্তু কেন তা বলতে পারছে না।

কেন আবার! রক্তের দোষ! মায়াদযাহীন বলেই তরতাজা মোরগটাকে মেরে মজা দেখেছে। আমি তো দেখেছি ও প্রায়ই ডিম চুরি করে এনে ঢিল ছোঁড়ে তাই দিয়ে।

স্বপ্না চলে গেল। চাবির রহস্যটা বসে বসে ভাবতে লাগল শ্রীনাথ। ভেবে কোনো হদিশ করতে না পেরে বাগানে নেমে গেল।

গাছপালার মধ্যে শ্রীনাথের আনন্দ অগাধ। আচার্য জগদীশ বোস গাছপালার মধ্যে প্রাণ আবিষ্কার করেছিলেন। সারা দুনিয়ার বোকা লোকেরা এক বাঙালীর কাছে শিখেছিল এই মহান সত্য, তবু নোবেল প্রাইজ দেয়নি। শ্রীনাথের হাতে ক্ষমতা থাকলে জগদীশবাবুকে ১০০

চারবার নোবেল প্রাইজ দিত । গাছপালার প্রাণ যে কত বড় আবিষ্কার তা কেন যে তেমন স্বীকার করল না সাহেবরা ! জগদীশ বোস নেটিভ বলেই কি ? হবে । সাহেবরা বড় নাকউঁচু জাত ।

প্রতিদিন শ্রীনাথ নিজেও গাছপালার প্রাণ আবিষ্কার করে । 'অ্থানে এক অদ্ভুত নীরব অনুভূতির সাম্রাজ্য । বাক্য নেই, শ্রবণ নেই, যৌনতা নেই, তবু জন্ম আছে, বৈচে থাকা ও বেড়ে ওঠাব আশ্রয় প্রয়াস আছে । ক্রিসেনথিমাম, কসমস, পপি বা গোলাপ বলে কথা নেই, নগণ্য আগাছাও শ্রীনাথের প্রিয় । ফুলের বাগান থেকে বছবার ওপড়ানো আগাছা সে ঘের-দেয়ালের ধারে ধারে পুঁতে দিয়ে এসেছে । আজও বীজ থেকে গাছের জন্ম দেখে অবাক হয় শ্রীনাথ । বসে বসে ভাবে । চোখে সবুজের ঘোব লেগে যায় তার । মাটির ভিতর পোঁতা শুকনো বীজ থেকে গুপ্ত সৈনিকের মতো সারি সারি ওবা কি করে যে বেরিয়ে আসে ! কী অদ্ভুত ! কী আশ্চর্য । একই ম্যাটি থেকে বীজের বকমফেরে কি করে জন্মায় এত বকমের গাছ ।

শ্রীনাথের হাতের গুণে সামনের বাগানটা হয়েছে দেখবার মতো । অবশ্য কাবও চোখে পড়ে না তেমন । লোক লাগিয়ে শুকনো ডালপালা দিয়ে দেড় মানুষ সমান উঁচু দুর্ভেদ্য একটা বেড়া দিয়ে রেখেছে শ্রীনাথ, যাতে তেমন চোখে না পড়ে । ক্ষাপা নিতাইয়ের কুকুরটা আর কোনো কাজের না হোক, গাছেব পাতা খসলেও চেষ্টায় । শুধু চেষ্টাতে জানে । তবু সেই ভয়েই ফুলচোররা বড় একটা হানা দেয় না । এ হল শ্রীনাথের নিজস্ব বাগান । নাসারি থেকে বিচি এ ফুলের বা ফলের বীজ আব চাড়া নিয়ে আসে সে । সার দেয়, জল দেয়, আর দেয় অগাধ মায়ী মেশানো ভালবাসা । গাছ তেজে বেড়ে ওঠে । বার বার অবাক কবে, আনন্দে ভরে দেয় শ্রীনাথকে । যতক্ষণ সে বাগানে থাকে ততক্ষণ সে অন্য মানুষ । কাম নেই, ক্রোধ নেই, লোভ নেই, অভিমান নেই, এমন কি অহংবোধটুকু পর্যন্ত থাকে না । ওয়ার্ডসওয়ার্থ বা বিভূতিভূষণের মতো সেও তখন অধিক নিজেকে প্রকৃতির মাধ্যমে বিসর্জন দেয় । সম্মোহিত হয়ে থাকে নীরব প্রাণের খেলা দেখে ।

একটা নাইট কুইনের গোড়া উসকে দিচ্ছিল শ্রীনাথ । হঠাৎ নজরে পড়ল বাগানের পিছন দিয়ে আগাছায় ঢাকা পড়ো এক ফালি জমির দিকে । কেউ চলাচল কবে না, দুর্ভেদ্য জঙ্গলে ঢেকে আছে । কিন্তু ঐ পড়ো জমি দিয়ে যেতে পারলে সকলের অলক্ষ্যে দক্ষিণের ঘরের পিছন দিকটায় হাজির হওয়া যায় ।

একটু ভাবল শ্রীনাথ । যাওয়াটা ঠিক হবে কি ?

তারপর ভেবে দেখল, তার সংকোচের কোনো কারণ তো নেই । সে তো এখনো এ বাড়ির কর্তা ।

খুরপি রেখে শ্রীনাথ উঠল । জঙ্গলে কাঁটা গাছ থাকতে পারে বলে ঘরে গিয়ে বাগানের কাজের হাওয়াই চটি ছেড়ে এক জোড়া পুরোনো রবারের বর্ষার জুতো পরে নিল । সাপ বা অন্য কিছুর ভয় তার নেই । জন্মসূত্রেই বোধ হয় সে কোন জায়গায় সাপ আছে বা নেই তা টের পায় । গত গ্রীষ্মেও একদিন ভোর রাতে অন্ধকারে বারান্দার সিঁড়িতে পা বাড়িয়েও সে পা ফেলেনি । মন থেকে কে যেন সাবধান করে দিয়েছে । পা আটকে গেছে । পরে টচ জ্বলে দেখেছে, কেউটে । এখন শীতকাল বলে আরো ভয় নেই ।

পড়ো জমিটা মোটামুটি নির্বিঘ্নেই পেরিয়ে গেল শ্রীনাথ । দক্ষিণের ঘরের পিছনে নিম্পত্র ঝোপঝাড় । একটু খড়মড় শব্দ হয়ে থাকবে ।

ঘরের ভিতর থেকে ভয়ে ভয়ে সজল বলল, কে রে ?

শ্রীনাথ জানালায় পৌঁছে দেখল, পড়ার টেবিলে বসে সজল সোজা জানালার দিকেই চেয়ে আছে। ঠোঁট দুটো একটু ফাঁক হয়ে আছে। চোখে অবাক চাউনি।

বাবা !

শ্রীনাথ মৃদু স্নান একটু হাসল। বলল, ভয় পাওনি তো !

না। তুমি ওখানে কি করছ ?

তোমাব সঙ্গে একটু কথা ছিল।

সজল আরো অবাক। বাবার কথা থাকলে এমন চোরের মতো পিছনের জানালা দিয়ে কেন ? কিন্তু সেটা বলল না সজল। চেয়ে রইল।

শ্রীনাথ বলল, তোমাকে তোমাব মা আটকে রেখেছে বুঝি ?

সজল মৃদু একটু হাসল। চমৎকার দেখাল ওকে। সুপুরুষ ছেলেটি। গালে টোল পড়ল। ঘন ভূর নীচে চোখ দুটো বিকিয়ে উঠল বৃদ্ধিব দীপ্তিতে। চাপা স্বরে বলল, হ্যাঁ। কিন্তু আমার খারাপ লাগছে না।

আটক থাকলে তো খারাপ লাগারই কথা। তোমার তবে লাগছে না কেন ?

খারাপ লাগলে তো আমি মা'ব কাছে হেরে যাবো। মা তো চায় আমার খারাপ লাগুক।

এ কথায় একটু অবাক হয় শ্রীনাথ। সজল যে অনেক গভীর করে ভাবতে পারে তা টের পায়নি কখনো। এ প্রসঙ্গে আব না গিয়ে সে জিজ্ঞেস করে, সারাদিন তুমি কী করো ?

বই পড়ি। আব পাটাতনের ওপব অনেক পুরোনো জিনিস আছে। এত জিনিস যে অবাক হতে হয়।

পাটাতনে ওঠা না তোমার বারণ ? ওঠবার মইটা তেমন ভাল নয়। নড়বড় করে। পড়ে গেলে ?

সজল ভয় খেয়ে বলে, সব সময় নয়। যখন একঘেয়ে লাগে, ঘুমটুম পায় তখন উঠি। সাবধানে।

উঠে কি করো ?

জিনিস দেখি। ওপরে অনেক জিনিস বাবা ! আমি রোজ ওখানে গুপ্তধন খুঁজি।

এত সহজভাবে সজল কখনো শ্রীনাথের সঙ্গে কথা বলে না। এখন কেন বলছে তাও বোঝে শ্রীনাথ। সজল জানে তা'ব বাবা আর মা দুই প্রতিপক্ষ। সব সময়েই সজল তার মায়ের পক্ষে। কিন্তু সেই মোরগ চুরিব ঘটনার পব মায়ের ওপর গভীর ও তীব্র বিরাগ থেকে সজল সাময়িকভাবে তার বাবাব পক্ষ নিয়েছে। এবং এও হয়তো কারণ যে, শ্রীনাথকে এভাবে চুপি চুপি পিছনের জানালায় হাজির হতে দেখে সে বাবার গুরুত্বটা খানিক হারিয়ে ফেলেছে।

শ্রীনাথ বলল, আমি কখনো ঐ পাটাতনে উঠিনি। কী আছে বলো তো !

অনেক ট্রাংক বাস্ক। পুরোনো সব মেটে হাঁড়ির মুখে মালসা দিয়ে ঢেকে ন্যাকড়া জড়িয়ে রাখা। পুরোনো বই আর খবরের কাগজের ডাই।

আর কি ?

একটা চর্চ থাকলে বুঝতে পারতাম। পাটাতনটা দিনের বেলাতেও এত ঘুটঘুটি অন্ধকার যে কিছুই ভাল করে বোঝা যায় না।

আর উঠো না। মা টের পেলে আবার শাস্তি দেবে।

দিলেই কি ? আমাকে যে গুপ্তধন খুঁজতে হবে।

ভুলুটি করে শ্রীনাথ বলে, শাস্তিকে তুমি ভয় করো না ?

সজল বাবার দিকে ফ্যাকাসে হয়ে গিয়ে বসা স্বরে বলে, করি।
করবে। শাস্তিকে ভয় যে না করে তার সর্বনাশ।
সজল চুপ করে চেয়ে থাকে।
বাবা-ছেলেব মধ্যে একটু আগের সহজ সম্পর্কটা হঠাৎ কেটে যায়।
শ্রীনাথ গলা খাঁকারি দিয়ে বলে, ইয়ে, তোমাকে একটা প্রশ্ন করার ছিল। জবাব দিতে
ভয় খেও না। সত্যি কথা বললেও আমি রাগ কবব না।

কী ?

আমার ঘরের তালটা তুমি কিভাবে খোলো ? চাবি দিয়ে, না অন্য কোনো যন্ত্রপাতি
আছে ?

সজল একটু অবাক হয়ে বলে, কেন, চাবি দিয়েই খুলি। অবশ্য খোলাটা অন্যায়
হয়েছে। আব কখনো—

বাধা দিয়ে শ্রীনাথ বলে, অন্যায় তুমি স্বীকারও করেছ। সেটা নিয়ে আমার কোনো প্রশ্ন
নেই। কথা হল, চাবি দিয়েই বা খোলো কি করে ? চাবি তো আমার কাছে থাকে।

সজল একটু আমতা আমতা করে বলে, মায়ের কাছে যে চাবিটা আছে, সেইটে চুরি
করি।

মায়ের কাছে শ্রীনাথ ভীষণ অবাক হয়। ঘরের তালটা সে মাস দুই আগে চাঁদনী বাজার
থেকে বাইশ টাকায় কিনেছে। নামকরা তাল। দুটো চাবিই তার কাছে। তুষার কাছে আর
একটা চাবি যায় কি করে ? এলেবেলে তাল নয় যে, যে-কোনো চাবিতে খুলে যাবে।
শ্রীনাথ কঠিন স্বরে বলে, তোমার মায়ের কাছে তো চাবি থাকার কথা নয়।

সজল বাপের দিকে চেয়ে আবাব ফ্যাকাসে হয়। শুকনো ঠোঁট জিভ দিয়ে ভিজিয়ে নিয়ে
বলে, গুরুপদ চাবিওলা মাকে চাবিটা বানিয়ে দিয়েছে।

শ্রীনাথ অবাক ভাব চেপে রেখে বলে, ও তালার চাবি কি বানানো যায় ? চাবি বানাবে কি
ভাবে ?

সজল মাথা নেড়ে বলে, জানি না তো ! গুরুপদদা একদিন চাবিটা দুপুর বেলায় মাকে
দিয়ে যায়। সেই চাবি দিয়ে মা একদিন তোমার ঘর খুলে বন্দাদিকে দিয়ে ঘর পরিষ্কার
করিয়েছিল।

ও। বলে স্তম্ভিত হয়ে চেয়ে থাকে শ্রীনাথ।

সজলের ভয় কাটেনি বরং বাড়ল। সে তড়াতাড়ি বলল, দোষটা আমারই।

তুমি মোরগটাকে মেরেছিলে ?

হ্যাঁ।

মরার সময় মোরগটা কেমন কবেছিল ?

খুব ডানা ঝাপটাচ্ছিল। ভীষণ ডাকছিল। আমাকে ঠোকরানোর চেষ্টা করছিল। অথচ
যখন চুরি করে ঠ্যাং ধরে নিয়ে যাচ্ছিলাম, তখন কিছু করেনি। ঠিক যখন কাটব তখন ঐ
রকম করতে লাগল। কি করে যেন টের পেল, আমি ওকে কাটব।

মোরগের তো অত বুদ্ধি নেই, তবে টের পেল কি করে ?

সজল কিছুক্ষণ ভেবে বলে, ক্ষুরটা দেখে বোধ হয়।

ওরা তো ক্ষুর চেনে না।

অসহায় ভাব করে সজল বলে, তা হলে কি ?

শ্রীনাথ একটু হেসে বলল, ওরা অস্ত্র চেনে না ঠিকই। তবে বোধ হয় ওরা কখনো—

সখনো মানুষের চোখ মুখ আর হাবভাব দেখে কিছু টের পায়। আর কিছু না হোক, নিষ্ঠুরতাটা বুঝতে পারে, মৃত্যুর গন্ধও পায় নিশ্চয়ই।

সজল একটু অন্যমনস্ক হয়ে বোধ হয় দশাটা কল্পনা করে। তারপর মাথা নেড়ে বলে, আমি অতটা বুঝতে পারিনি।

শ্রীনাথ সাত্বনার গলায় বলে, তোমার এখনো বোঝার বয়সও হয়নি। বয়স হলেও অনেকে ব্যাপারটা বোঝে না।

কাজটা খুব অন্যায় হয়েছিল, না ?

শ্রীনাথ একটা শ্বাস ফেলে বলে, আমরা সবাই যখন মাছ মাংস খাচ্ছি তখন কাজটাকে একা তোমার অন্যায় বলি কি করে ? মোরগ তো সবাই মারছে।

সজল একটু হেসে বলে, তা হলে অন্যায় নয় তো !

তা ঠিক বলতে পারি না। হয়তো অন্যায়ই হবে। কিন্তু তুমি ওটা করতে গেলেই বা কেন ? মাংস খেতে ইচ্ছে হয়ে থাকলে মংলুকে বললেই তো পারতে। ও কেটে দিত।

মাংস খেতে ইচ্ছে হয়নি তো ! মা বোজ টেংরির জুস খাওয়ায়। রোজ খেতে ভাল লাগে, বলো ? খেতে খেতে এখন মাংসের গন্ধে আমার বমি আসে।

শ্রীনাথ বলে, তা হলে কাটলে কেন ?

এমনিই।

শ্রীনাথ হাসে, দূর পাগল ! এমনি এমনি কিছু করে নাকি মানুষ ? কাবণ একটা থাকেই। একটু ভেবে দেখ তো !

আমাব খুব রাগ হয়েছিল।

কার ওপর ?

সকলের ওপর।

আমার ওপরেও ?

সজল লজ্জা পায়। মাথা নেড়ে বলে, না, তোমাব ওপব নয়।

তবে কি মায়ের ওপর ?

হঁ।

কেন ?

সজল এবার আবার একটু ভাবে। ভেবে বলে, ঠিক মায়ের ওপরেও নয়।

তবে কার ওপর ?

এই বাড়িটার ওপব। গাছপালার ওপর। হাঁস মুরগীর ওপর।

তোমার অত রাগ কেন ?

এক একদিন খুব রাগ হয়।

শ্রীনাথ আবাব ক্ষীণ হাসে। বলে, রেগে যদি মোরগ মারতে পারো, তা হলে একদিন মানুষকেও খুন করে বসবে যে !

না, তা নয়। সজল মাথা নীচু করে।

শ্রীনাথ এই বাক্যালাপে আগাগোড়া কৌতুক বোধ করছে। সে হেসেই বলল, স্কুলে যাচ্ছে না ?

না। দুদিন মা স্কুলে যাওয়া বন্ধ রেখেছে।

কবে তোমার ছুটি হবে ?

বোধ হয় আজ। বৃন্দাদি সকালে এসে বলে গেছে পড়া করে রাখতে। আজ স্কুলে যেতে

হবে ।

রাত্রে তুমি এই ঘরে একা থাকো ?

না, ছোটো মামা শোয় ।

ও । শ্রীনাথ মৃদুস্বরে বলে, শোনো । তোমার সঙ্গে আমার আরো কয়েকটা কথা আছে ।
সন্দের পর একবার আমার ঘরে এসো ।

আচ্ছা ।

তারপর শ্রীনাথ একটু ইতস্তত করে বলে, আমার সঙ্গে এই যে কথা হল এটা কাউকে
বোলো না । আমি লুকিয়ে তোমার কাছে এসেছিলাম ।

সজল এক গাল হেসে বলল, জানি ।

শ্রীনাথও হাসল ।

বলতে কি, মল্লিদাদার ওপর শ্রীনাথের কোনো রাগ নেই ।

আগাছায় ভরা পড়ো জমি পেরিয়ে সামনের দিকে ফিরে আসতে আসতে শ্রীনাথ ভাবে,
স্ত্রী বা মেয়েমানুষের ওপর অধিকারবোধটা ভুলে যেতে পারলে পৃথিবীটা কি আরো একটু
সুন্দর হয় ? কুকুর, বেড়াল, পাখি, পতঙ্গের তো বউ থাকে না । ওরকম হলেই কি ভাল ?
তা হলে সজল কাব ছেলে, তার বউ কার সঙ্গে শুয়েছে না শুয়েছে এসব বাজে চিন্তায় আর
কষ্ট পেতে হয় না । ভেবে দেখলে, সজলের ওপরেও তার বিরাগ থাকা উচিত নয় । নিজের
জন্মেব জন্য সে তো দায়ী ছিল না !

গাছপালা, কীটপতঙ্গের কাছ থেকে শ্রীনাথ আজকাল অনেক শিখছে ।

পালং ক্ষেতে সবিং দাঁড়িয়ে । তাকে দেখে বলল, জামাইবাবু, কোথায় ছিলেন ? কখন
থেকে খুঁজছি ।

শ্বশুরবাড়ির কারো ওপর খুব খুশি নয় শ্রীনাথ । অবশ্য ওদের কোনো দোষও নেই ।
ভালমন্দে মিশিয়ে যেমন মানুষ হয়, ওলাও তেমন সাধাবণ । তবু তুষাব ওপর থেকে যেদিন
তার মন সবে গেছে সেদিন ওদের ওপর থেকেও গেছে ।

শ্রীনাথ জোর করে মুখে হাসি এনে বলল, খুঁজছিলে ?

হাঁ । ভাবলাম, কোনো কাজ নেই যখন, জামাইবাবুর বাগানটা দেখে আসি । আমি
খানিকটা বাগানের কাজ জানি ।

খুব ভাল । এর পর থেকে এই বাগান তোমরাই দেখবে ।

কেন, ওকথা বলছেন কেন ? বাগান তো আপনাবই ।

কিছুই আমার নয় । জানো না ? মুখ ফসকে কথাটা বেগোলো ।

সবিং বেধ হয় মুখোমুখি কথাটা শুনে লজ্জা পেল ! বলল, আমার বেশী জানার দরকার
কি ?

শ্রীনাথ অবশ্য সামলে গেল । বলল, আসলে কি জানো ? এসব এখন ভাল লাগে না ।
এখন ভাল লাগে চুপচাপ সময় কাটিয়ে দিতে । কেউ একজন যদি বাগানটা দেখে তো
ভালই ।

সবিং মাথা নেড়ে বলে, আমি দেখব । আপনি কি কবে কি করতে হয় বলে দেবেন ।

বেশ তো ।

সবিং বেশ লম্বা-চওড়া ছেলে । ওদের খাতটাই ওরকম । সা জোগান সব । তবে খুব
একটা বুদ্ধি বা রুচি নেই । একটু ভোঁতা, ব্যক্তিত্বহীন । এক সময়ে এই সবিং খুব প্রিয় ছিল

শ্রীনাথের ।

সরিং বলল, আগে আপনি আমাকে সব সময়ে ব্রাদার বলে ডাকতেন । এবার এসে একবাবও ডাকটা শুনিনি ।

শ্রীনাথ হাসল । বলল, কতকাল দেখা হয়নি । কি ডাকতাম তা মনেই ছিল না । এবার থেকে ডাকব ।

আমাদের ভুলে গিয়েছিলেন তবে ? সরিং সর্কৌতুকে প্রশ্ন করে ।

শ্রীনাথ বিপাকে পড়ে বলে, আরে না । ডাক ভুলতে পারি, মানুষকে কি ভোলা যায় সহজে !

শুধু মানুষ কেন, আমরা তো আত্মীয় । নয় কি ?

সে তো বটেই ।

তবে ?

শ্রীনাথ কথার পিঠে কথা বলতে জানে না । তাই লজ্জা পেয়ে বলল, এসো, ঘরে এসো ।

ঘরে ঢুকেই সরিং বলে, দারুন তো ! ঘর না বার তা বোঝা যায় না এত আলো বাতাস !

শ্রীনাথ তার ইজিচেয়ারে বসে বলল, তোমাদের বাড়ির সকলের খবর-টবব কি ?

সরিং জবাবের জন্য তৈরিই ছিল । বলল, দিন পনেরো হল এসেছি, এই প্রথম এ কথাটা জিজ্ঞেস করলেন ।

শ্রীনাথের বাস্তবিকই কারো কোনো খবর জানার কৌতূহল হয়নি । এইসব নীতি-নিয়ম ভদ্রতাবোধ তার মাথা থেকে উবে যাচ্ছে কেন ?

সরিং ফের বলল, এ কয়দিন ভাল কবে কথাই বলছিলেন না । আমি ভাবলাম, আমাদের ওপর বুঝি রাগ করে আছেন ।

কথাটার জবাব হয় না । শুধু হাসি দিয়ে সেরে দিতে হয় । শ্রীনাথ যতদূর সম্ভব অপরাধী হাসি হেসে বলল, সংসারের নানা রকম ব্যাপার । আমি ঠিক এত বড় একটা এস্টাব্লিশমেন্টের সঙ্গে খাপ খাওয়াতে অভ্যস্ত নই কিনা । তাই বড্ড ভুলও হয় সব কাজে ।

সরিং বিছানায় বসে বলল, কার খবর জানতে চান ?

শ্রীনাথের মনে পড়ল প্রথমই শাশুড়ির কথা । বিয়ের সময় শ্রীনাথ খুব খেতে পারত । শাশুড়িও তাকে তখন প্রাণভরে খাইয়েছেন । থালাব চারদিকে বাটি সাজিয়ে গোটা দুই বৃত্ত রচনা করে ফেলতেন প্রায় । প্রথমই সেই ভদ্রমহিলার কথা মনে পড়ে । শুনেছে, খুব সুখে নেই । শ্বশুর রিটায়ার করার পর ছেলের হাততোলা হয়ে আছেন ।

শ্রীনাথ একটা দীর্ঘশ্বাস ফেলে বলল, জিজ্ঞেস না করাই বোধ হয় ভাল । বরং মনে মনে সকলের মঙ্গল প্রার্থনা করাটাই এখন দরকার ।

সরিং কথাটা বুঝল । একটু গম্ভীর হয়ে বলল, এটা খুব ঠিক কথা । জানতে গেলেই মন খারাপ হবে । কেউই তো ভাল নেই ।

তুমি কেমন সরিং ?

সরিং না, ব্রাদার ।

হ্যাঁ হ্যাঁ, ব্রাদার ।

আমিও ভাল না জামাইবাবু । বড়দার কাছে ছিলাম । ভাল ছিলাম না । সেজদি ডেকে আনল, এলাম । দেখি এখানে কেমন থাকি ।

খারাপ লাগছে না তো এখানে !

ভাল কি লাগার কথা ! বেকারকে কাজ না দিয়ে যত ভালই রাখুন সে ভাল থাকে না ।

শ্রীনাথ চিন্তিত মুখে বলে, সেটা তো সকলেরই প্রবলেম ব্রাদার ।
 আমারও । তাই বলি, কেমন আছি না জানতে চেয়ে বরং আমারও মঙ্গল প্রার্থনা করুন ।
 দূর পাগলা ! তোমার তো বয়স কম, জীবনটাই পড়ে আছে ।
 একটা চাকরি দিন, তবেই জীবন থাকবে । নইলে কবে শুনবেন, ট্রেনের তলায় গলা
 দিয়েছি ।

যাঃ ! বলে হাসে শ্রীনাথ ।

মাইবি জামাইবাবু ! বিশ্বাস করুন ।

॥ চৌদ্দ ॥

চাবিটার কথা কিছুতেই ভুলতে পারছে না শ্রীনাথ । তৃষা তাকে গোপন করে
 ভাবন-ঘরের একটা চাবি করিয়ে রেখেছিল কেন তা বুঝতে অবশ্য তার কষ্ট হয় না । সোজা
 কথা শ্রীনাথের এই একটেরে ঘরখানার ভিতরেও তৃষার দখলদারি রয়ে গেল । অব্যাহত হল
 ঘরখানা । শ্রীনাথের কিছু লুকোনোর রইল না, তার অনুপস্থিতিতে নিরাপত্তাও রইল না
 ঘরখানার ।

মানুষ 'ঘর ঘর' করে গলা শুকোয় । শ্রীনাথেরও শুকোতো এতদিন । আজকাল সে
 ঘরের অসাড়তা বুঝতে পারে । এই সব অবসেসন অভিবৃ্তির কোনো মানে হয় না ।
 একখানা ঘর আব কতখানিই বা আশ্রয় দেয় মানুষকে, যদি না ঘরের লোক আপন হয় ।
 মিস্ত্রী এসে যে ঘর তৈরি করে দিয়ে যায় তার কোনো ব্যক্তিত্ব নেই, বিকার নেই । সেই ঘরে
 যে সব মানুষজন বসবাস করতে আসে তারাই ইউ-কাঠ-টিনের ওপর নানা মায়া ভালবাসার
 পলেক্স:বা দেয়, স্মৃতিব বঙ মাখায়, কত ঠাট্টা ইয়ার্কি খুনসুটি, আদব ভালবাসা দিয়ে পূরণ
 করে তোলে ঘরের শূন্যতাকে । শ্রীনাথ তবে কেন ঘর ঘর কবে মববে ? ঘর তো তৃষার ।

সরিং চলে যাওয়ার পব খানিক বসে এই তত্ত্বকথা চিন্তা করল সে । তারপর উঠে খুব
 ট্রান্স নজরে নিজের দেবরাজ খুলে সব পরীক্ষা করল । বাস্ক তোরঙ্গ উল্টে পাণ্টে দেখল ।
 সবই ঠিক আছে । দেবরাজের বা বাস্কের চাবিও হয়তো করিয়েছে তৃষা । কে জানে ? তার
 ঢেক বই, পাশ বই, ইনসুয়েরেনসের পলিসি, শেয়ার স্যাটিফিকেট, নগদ টাকা এসবই বোধ
 হয় ঝুটিয়ে দেখেছে ।

মালদা থেকে সরিংকে কেন আনিয়েছে তৃষা তাও খানিকটা আন্দাজ করতে পারে
 শ্রীনাথ । একথা তৃষা ভালই জানে যে জমিজিরেতের ওপর নির্ভর করে থাকার বিপদ
 আছে । মল্লিনাথের সব জমি আইনত তার নয়ও । ভৃত্যুড়ে জমি মেলাই আছে । যে
 কোনোদিন শত্রুরা খবর দিয়ে ধরিয়ে দেবে আর সরকার জমি কেড়ে নেবে । কানাঘুষোয়
 শ্রীনাথ শুনেছে, তৃষা বড় পাইকারী দোকান দেবে । চালকল খুলবারও ইচ্ছে আছে । হয়তো
 বা সেই সব কাজের জন্য বিশ্বস্ত লোকের দরকার বলেই আনিয়েছে সরিংকে ।

সরিংের ইতিহাসটা খুব পরিষ্কার জানে না শ্রীনাথ । শেষ বার যখন দেখেছিল তখন
 বোধ হয় সদ্য কলেজে ঢুকেছে । তখনো ব্যক্তিত্ব তৈরি হয়নি । এক বছরে ছেলোটো মানুষ
 হয়েছেন না অমানুষ তা এই অল্প সময়ে বোঝা গেল না । কিন্তু সে যাই হোক, শেষ পর্যন্ত
 সরিং তৃষারই লোক, শ্রীনাথের কেউ নয় ।

শ্রীনাথের লোক পৃথিবীতে খুবই কম । নেই বললেই চলে ।

গভর্নমেন্ট প্রেসে স্টাইক চলছে বলে শ্রীনাথের প্রেসে এখন বিস্তর জব ওয়ার্ক এসে জমা

হয়েছে। ডাঁই ডাঁই হরেক রকমের ফর্ম, বিল, বিজ্ঞপ্তি ছাপার কাজ চলছে। মালিক বলে দিয়েছে, কামাই করা চলবে না। কাজ তুলে দিতে পারলে সবাইকে একটা থোক টাকা দেওয়া হবে। মিনি বোনাস।

বোনাসের ওপর শ্রীনাথের কোনো টান নেই। তবে সে হল জব ওয়ার্কের বিশেষজ্ঞ। বহুকাল প্রেসে কাজ করায় সে হেন কাজ নেই যে জানে না। মল্লিনাথের সম্পত্তি হাতে আসায় কিছুকাল আগে সে নতুন ফেসের কিছু টাইপ তৈরি করার জন্য ভূতের মতো খাটছিল। বাংলা টাইপরাইটার সংস্কারের কাজেও বিস্তর মাথা ঘামাচ্ছিল। কাজ এগিয়েছিল অনেকটাই। লেগে থাকলে কিছু একটা হয়ে যেত হয়তো। কিন্তু, দেদার সম্পত্তি আর নগদ টাকা হাতে আসায় কেমন যেন গা ঢিলে দিয়ে দিল। তবু এখনো বোধ হয় প্রেসের কাজকে সে এক রকম ভালই বাসে। প্রেসটার ওপরেও তার গভীর মায়া। তাই এই কাজের চাপের বাস্তবতা তার খাবাপ লাগে না।

স্নান করে খেয়ে বেরোতে একটু দেরী হল তার। তা হোক। মালিকপক্ষ জানে, দেরী করে গেলেও শ্রীনাথ দায়িত্ব নিয়ে কাজ করে। দরকার হলে সারা রাত খেটে কাজ তুলে দেবে। কাজের চাপে থাকলে শ্রীনাথ অন্য মানুষ। সেই কাজের জন্য সে বোনাস ইনক্রিমেন্ট বা প্রোমোশনও চাইবে না। ও সব কথা তার মনেই আসে না। শুধু মনটার মধ্যে একটা কথাই খচখচ করছে, সজলকে বিকেলে আসতে বলেছিল ঘরে। যদি দেরী হয় তবে সজল এসে ফিরে যাবে। কথার খেলাপ হবে তার। বাচ্চাদের কাছে কথার খেলাপ করা ঠিক নয়। ওতে ওরা শ্রদ্ধা হাবায়, হতাশায় ভোগে।

অফিসে পৌঁছে এক গ্লাস জল খেয়ে, একটা পান মুখে দিয়ে কাজে ডুবে গেল শ্রীনাথ। চাবির কথা মনে রইল না, ঘবের কথা মনে রইল না, তৃষা বা সজলের কথাও বেমানাম গায়ের হয়ে গেল মন থেকে।

কিন্তু মনে পড়ল বিকেলের দিকে। মনে করিয়ে দিল সোমনাথ।

বোসবাবু এসে খবর দিলেন, আপনার ভাই এসেছে।

সন্ধ্যা হয় হয়। শ্রীনাথের ঘাড় টনটন করছিল। কপি ধরে ধরে ঝুটিয়ে ঝুটিয়ে শোধরানো কম কথা নয়। ভুল থাকলে প্রেসের রাঙ্কুসে মেশিন এক লহমায় সেই ভুল কপি কয়েক হাজার ছেপে ফেলবে। ভুল ধরা পড়লে ছাপা কাগজ সব ফেলে দিতে হবে। এখন কাগজ কালি লেবারার খবচার যে বহর তাতে ক্ষতিব পরিমাণটা বড় কম দাঁড়াবে না। তাই মালিক নিজে দাঁড়িয়ে অনেকক্ষণ কাজ দেখে গেছে। প্রিন্ট-অর্ডার দেওয়ার দায়িত্ব দিয়ে গেছে শ্রীনাথকে। তাতে শ্রীনাথের ঝামেলা বেড়েছে। মাথা তোলার সময় পায়নি।

ভাই কথাটা কানে শুনেই বুঝেছিল সোমনাথ। দীপনাথ কিছুতেই নয়। কারণ দীপ ভাই হলেও একটু দূরের ভাই।

প্রেসটা বিরাট বড় দরের হলেও রিসেপশন বা ওয়েটিং কম বলে কিছু নেই। বাইরের দিকে সুপারিনটেনডেন্টের ফাঁকা অফিসে বসে আছে সোমনাথ। মুখটায় চোর-চোর ভাব, চোখের দৃষ্টিতে শেয়ালের মতো একটা এড়ানো এড়ানো ভাব।

প্রকৃতির নিয়মে বাপের মেজো ছেলেরাই নাকি সব চেয়ে পাজি হয়। তাদের ক্ষেত্রে স্টো হয়নি। শ্রীনাথ নিজেই মেজো। সে কতটা পাজি তা হিসেব করে দেখিনি এখনো। কিন্তু পাজি বলতে সত্যিকারের যা বোঝায় তা হল সোমনাথ। মল্লিনাথের সম্পত্তির ভাগ চাইছে বলেই নয়, সোমনাথ বুড়ো বাবাকে নিজের কাছে রেখে অন্য দু ভাইয়ের কাছ থেকে সেই বাবদ টাকা নেয়। ভয়ংকর কৃপণও বটে। সরকারের একটা বিল সেকশনে কাজ

করে। ঠিকাদারদের কাছ থেকে প্রচুর টাকা ঘুষ নেয়।

শ্রীনাথ বলল, কি রে ?

তোমার সঙ্গে দেখা করতে এলাম।

সোমনাথের কপালে এখনো সেই মারের দাগ রয়েছে। মরতে মরতে বেঁচে গিয়েছিল।

শ্রীনাথ দারোয়ানকে দু ভাঁড় চা আনতে পাঠিয়ে বসে বলল, সব ভাল তো ?

সোমনাথের চেহারাটা মন্দ নয়। মোটাসোটা, গোলগাল, গোপাল-গোপাল চেহারা। মা যতদিন বেঁচে ছিল ততদিন ছোটো ছেলেকে চূড়ান্ত আদর দিয়ে গেছে। সেই সুবাদেই এই চেহারা।

সোমনাথ বলল, বাবার অবস্থা তো জানই ! যে কোনোদিন হয়ে যাবে।

জানা কথা। বাবার খবরের জন্য ব্যস্ত নয়ও শ্রীনাথ। এই সব নিষ্ঠুরতা বয়সের সঙ্গে সঙ্গে আসে। বাবা যে কবে ফালতু হয়ে গেল তা টেরও পায়নি। কিন্তু হয়েছে।

শ্রীনাথ একটু দীর্ঘশ্বাস ছেড়ে বলল, সে তো জানি।

সোমনাথ মার খাওয়ার পর দু তিন বার ওকে দেখতে এসেছিল শ্রীনাথ। তখন বাবার সঙ্গেও দেখা হয়। কিন্তু দেখা হওয়া আর না হওয়া সমান। বাবা এখনো লোক চিনতে পারছেন বটে কিন্তু কারো জন্যই কোনো অনুভূতি নেই। সোমনাথ যে হাসপাতালে তা শুনেও নির্বিকার। বিকেলের জল খাবার নিয়ে শমিতার কাছে বায়না করছিল বলে শমিতা কটকট করে উঠল। বলল, আপনার ছেলে হাসপাতালে সিরিয়াস অবস্থায় পড়ে আছে, আর আপনি চিড়ে সেক্স চিড়ে সেক্স করে পাগল হচ্ছেন ! এ রকমই ধারা নাকি আপনাদের ?

কথাটা তা নয়। বাবা এখন সুখ-দুঃখ ভাল-মন্দ এই সব অনুভূতির বাইরে চলে গেছে। বোধ-বুদ্ধি ছোটো হয়ে হয়ে এখন কেবল নিজের জৈবিক চাহিদাটুকু নিয়ে সীমাবদ্ধ হয়ে আছে। এও হয়তো এক ধরনের পাগলামি। তবে যাই হোক, বাবাকে নিয়ে তাদের আর খুব বেশী ভাবনা-চিন্তা নেই। তৃষা কিছুকাল আগেই শ্রীনাথকে একবার বলেছিল, স্বশ্রমশাইকে এখানে এনে রাখলেই তো হয়। এখানে অনেক ফাঁকা ঘর, খোলামেলা জায়গা, দেখাশুনা করার লোকও আছে, তবে কেন উনি সোমনাথদের খুপরি বাসায় পড়ে থাকবেন ?

যখনকার কথা তখনো সোমনাথ মার খায়নি। ফি-রবিবারে সস্তীক ঝগড়া করতে আসত। প্রস্তাব শুনে কিন্তু সোমনাথ বা শমিতা কেউ রাজি হল না। বলল, না, উনি আমাদের কাছেই থাকতে চান। অন্য কোথাও যাওয়ার নাম করলেই রেগে ওঠেন।

কথাটা মিথ্যেও নয়। বড়ো বয়সে অনেক সময়েই অভ্যস্ত জায়গা ছেড়ে লোকে অন্য কোথাও যেতে চায় না। যুক্তি হিসেবে ছেলেমানুষের মতো বলে, এ বাড়িতে পায়খানাটা আছে হয়, এখানে জলের সুবিধে। সোমনাথ রোজ মাছ আনে ইত্যাদি। তবু বাবাকে জোর করে আনাও যেত এবং তাতে ফল খারাপ হত না। কিন্তু সোমনাথ রাজি হল না অন্য কারণে। বাবার খরচা বাবদ তৃষা মাসে মাসে ওকে তিনশো টাকা করে পাঠাত এবং শ্রীনাথ যত দূর জানে, এখনো পাঠায়। কর্তব্যের ব্যাপারে তৃষার কোনো ত্রুটি নেই। আর কিছু সোমনাথ আদায় করে বিলু আর দীপনাথের কাছ থেকে। দীপ মাসে মাসে দেয় না, কিন্তু কখনো-সখনো থোক পাঁচ-সাতশো টাকাও দিয়ে ফেলে। সুতরাং বাবাকে নিজের কাছে রাখলে সোমনাথের লাভ ছাড়া ক্ষতি নেই।

সোমনাথ একটু চুপ করে থেকে বাবা সম্পর্কে ট্র্যাজেডিটা শ্রীনাথের মাথায় বসতে সময় দিল। তারপর বলল, আমি ছেলে হিসেবে কোনো ত্রুটি রাখি না, সব কর্তব্যই করি।

ই। শ্রীনাথ ওর মতলব বুঝতে না পেরে সাবধান হয়ে সংক্ষেপে উত্তর দিল।

সোমনাথ দুঃখী দুঃখী মুখ করে গম্ভীর গলায় বলল, শমিতার শরীরটা ভাল যাচ্ছে না ।
কী হয়েছে ?

সোমনাথ অপরাধীর মতো মুখ নীচু করে বলে, ছেলেপুলে হবে ।

ও ।

তাই বলছিলাম এ অবস্থায় বাবার যত্ন-আত্তি ঠিক মতো হবে না । বাবার অবশ্য অত
বোধটোখ নেই, কিন্তু আমার তো বিবেক আছে । ডাক্তার শমিতাকে কাজকর্ম করতে একদম
বারণ করেছে, বেশী নড়াচড়া কবলে মিসক্যারেজ হয়ে যেতে পারে ।

কোনো ডিফেক্ট আছে নাকি ?

আছে ।

তা হলে এখন কী করতে চাস ?

যদি কিছু মনে না করো তো বলি, এখন বাবাকে কিছুদিন তোমাদের কাছে নিয়ে রাখো ।

শ্রীনাথ টক কবে প্রস্তাবটায় রাজি হতে পারে না । 'তুবা এক সময় স্বশ্রুকে তার কাছে
রাখতে চেয়েছিল বটে, কিন্তু এতদিনে যদি মত পাণ্টে থাকে ? বাড়ি তো শ্রীনাথের নয় যে
নিজে সিদ্ধান্ত নেবে ।

শ্রীনাথ বলল, তোব বউদিকে একটু বলে দেখ ।

সোমনাথ একটু উদ্ভার সঙ্গে বলল, বউদিকে বলব কেন ? বউদি কে ? তুমি কত্যা, তুমিই
ডিসিশন নেবে ।

শ্রীনাথ অবাক হয়ে বলে, আমি কিসের কত্যা ? কোনো ব্যাপাবেই আজকাল আমি থাকি
না ।

সোমনাথ ওপরওয়ালার মতো চড়া গলায় বলল, থাকো না কেন ? থাকো না বলেই তো
মেয়েমানুষের বাড়ি বাড়ে ।

বিরক্ত হয়ে শ্রীনাথ বলে, ওসব কথা থাক । আমি না হয় তোর বউদিকে আজ জিজ্ঞেস
করব'খন কাল ঐসে জেনে যাস ।

কী জেনে যাবো ? জানাজানির মধ্যে আমি নেই । বাবা তো তোমারও । তোমরা এক
সময়ে বাবাকে রাখতেও চেয়েছিলে । তা হলে এখন আবার পিছোচ্ছে কেন ?

শ্রীনাথ একটা গভীর শ্বাস ছেড়ে চুপ করে রইল । এটা যে পিছোনো নয় তা সোমনাথও
কি জানে না ? ও এখন একটা চাল খেলছে, সেটা যে কি তা অবশ্য শ্রীনাথ বুঝতে পারছে
না ।

সোমনাথ বলল, তা ছাড়া অত মতামতেরই বা দরকার কি বুঝি না, বাবা ! বড়দা তো
বাবারই ছেলে । তার বাড়িতে বাবা তো নিজের রাইট নিয়েই থাকতে পারে ।

ছেলের সম্পত্তি ওপর বাবার অধিকার আছে, এমন কথা কোন আইনের বইতে আছে
তা একবার জিজ্ঞেস করতে ইচ্ছে করল শ্রীনাথের । কিন্তু তাতে কথা বাড়বে বলে বলল
না ।

শ্রীনাথ মৃদুস্বরে বলল, আমি তো অমত করছি না । তবে আমার মতামতের দামও
নেই ।

একশ বার দাম আছে । সোমনাথ গলার জোরে কথাটাকে যত দূর সম্ভব গৌণে দিতে
চেষ্টা করল শ্রীনাথের মাথায় । তারপর মোলায়েম আদুরে গলায় বলল, তুমি মেজদা,
দিনকে দিন কেমন হয়ে যাচ্ছে বলো তো ! তোমার টাকাপয়সা বা বিষয়-সম্পত্তির লোভ
নেই সেটা আমরা সবাই জানি, কিন্তু তা বলে সংসারের সব কর্তৃত্ব বউদির হাতে ছেড়ে

দেবে ?

শ্রীনাথ যে নিলোভ সেটা যে সোমনাথ জানে তা শুনে খুশিই হয় শ্রীনাথ । বলে, আমি যেমন আছি তেমনিই থাকতে দে । গণ্ডগোলে জড়াস না ।

সন্মিসি তো নও । সংসারে থাকলে গা বাঁচিয়ে চলবে কি করে ? তা ছাড়া চোখের সামনে এত বড় সব অনায়ায ঘটে যাচ্ছে দেখেও যদি চুপ করে থাকো তবে তোমার ভালমানুষির কোনো দাম থাকে না ।

ভালমানুষির দামই বা চাইছে কে ! কথটা বলতে পারত শ্রীনাথ, বলল না । শুধু আনমনে একবার ইঁ দিল ।

সোমনাথ বলল, বউদি যে তোমাকে বাড়ির চাকর-বাকর মনে করে সেটা আমাদেরও খারাপ লাগে । তুমি যদি একটু রোখাচোখা হতে তবে এমনটা হতে পারত না ।

শ্রীনাথের একটু বাগ হচ্ছিল । কিন্তু সোমনাথকে রাগ দেখিয়ে লাভ নেই । কোনোকালেই ও কারো পরোয়া করে না । শ্রীনাথ তাই চুপ করে থাকে ।

সোমনাথ নিজেই বলে, তুমি চুপ করে থাকলেও আমি ছেড়ে দেবো বলে ভেবো না । তোমাদের ওখানকার লোকেরা আমার সঙ্গে যোগাযোগ রাখে । তারা কেউ বউদির পক্ষে নয় । তারা নিজেরাই বলছে বড়দার সম্পত্তিতে বউদির কোনো রাইট নেই । দরকার হলে তারা ওখানকার মাতব্বরদের সালিশী মানবে । বউদির রাজত্ব অত নিষ্ফল্টক হবে ভেবো না ।

এটা যে অপমান তা শ্রীনাথ বুঝতে পারছে । তুমি তার বনিবনা থাক বা না থাক এই কথাগুলো তুমাকে জড়িয়ে তাকেও বলা ; তবু জবাব দেওয়ার মতো জোর পায় না শ্রীনাথ । সে নিজেও বোঝে, দাদার সম্পত্তি নিয়ে একটা অনায়ায দখলদারি চলছে ।

শ্রীনাথ বলল, এসব আমাকে বলছিস কেন ? আমি তাদের কি করেছি ? যা করবি করিস, আমার কিছু বলার নেই ।

সোমনাথ একটু নরম হয়ে বলে, তোমাকে কষ্ট দিতে চাইও না । দুঃখ হয় বলে বলি । ওখানকার কে কে তোর কাছে এসেছিল ?

অনেকেই আসে । বহু গুপ্ত খবর দিয়ে যায় । বউদি নাকি তার গুপ্ত ক্লাসের সেই ভাইটিকে মালদা থেকে আনিয়েছে !

শ্রীনাথ অবাক হয়ে বলে, সরিৎ ! সরিৎ গুপ্তা নাকি ?

সোমনাথ একটু হেসে বলে, তুমি তো মানুষ চেনো না । নিতাই খ্যাপাকে মেরে তোমার শালা পাট পাট করে দিয়েছিল । বউদি ঘটনাটা চেপে দিয়েছে । এতকাল ভাড়াটে গুপ্তা ছিল, এখন নিজের ভাইকে দিয়েই গুপ্তামি চালাবে ।

নিতাইকে সরিৎ মেরেছে, একথা কেউ তো আমাকে বলেনি !

তুমি কোন খবরটাই বা রাখো ! বউদি যে বন্দুকের লাইসেন্স চেয়ে আপলিকেশন করেছে তা জানো ?

না তো ।

বড়দার একটা জার্মান বন্দুক ছিল তা মনে আছে ?

আছে । আমি নিজেও কয়েকবার শিকার করতে গিয়ে চালিয়েছি । তারপর সেটা থানায় জমা করে দিই ।

বউদি সেইটেই ফেরত চেয়েছে । তবে লাইসেন্স হবে সরিতের নামে ।

শ্রীনাথের কাছে এগুলো খুব একটা দৃষ্টিস্তর ব্যাপার নয় । সে বলল, ও তা হবে ।

ছেলেপুলের ঘর বলে মারাম্বক অস্ত্রটা শ্রীনাথ ঘরে রাখতে চায়নি। নইলে সে দরখাস্ত করলে বন্দুকটার দখল পেয়ে যেত। কিন্তু দখল করার ইচ্ছেই তার ছিল না। তাই থানায় জমা করে দিয়েছিল। তুষা বন্দুকটা ফেরত চেয়েছে, ভাল কথা, কিন্তু সেটা একবার তাকে জানালেও পারত।

সোমনাথ বলল, সরিং হল বউদির রঙ্গরাজ।

শ্রীনাথ বুঝল না। বলল, কে রঙ্গরাজ?

দেবী চৌধুরানীর বড় সাকরেদ, মনে নেই? আর বউদি নিজে হতে চাইছে দেবী চৌধুরানী।

শ্রীনাথের গম্ভীর থাকা উচিত ছিল। কিন্তু উপমাটা এমন অদ্ভুত যে, অনিচ্ছে সন্তেও ক্ষীণ একটু হেসে ফেলল।

সোমনাথ আঁষটে মুখে বলে, হেসো না মেজদা। ব্যাপারটা খুবই সিরিয়াস।

শ্রীনাথ এবার গম্ভীর হয়ে বলল, তা আমি কি করব বল।

কিছুই যদি না কবো তবে অন্তত দেখে যাও। চতুর্দিকে লক্ষ রেখে চলো।

চাবির কথাটা আবাব মনে পড়ে গেল শ্রীনাথের। একটু অনামনস্ক হয়ে গেল সে। বলল, লক্ষ রেখেই বা লাভ কি? আমার কোনো ইন্টারেস্ট নেই।

সোমনাথ অধৈর্যের গলায় বলল, বাবার ব্যাপারটা কি হবে?

বললাম তো।

শোনে, মেজদা! সোমনাথ খুব জোরালো গলায় বলে, বউদির মত থাক বা না থাক আমি সামনের রবিবার বাবাকে নিয়ে গিয়ে তোমাদের ওখানে পৌঁছে দিয়ে আসছি। তাবপর আর আমার দায়িত্ব থাকবে না।

দারোয়ান চা দিয়ে গেল। শ্রীনাথ চায়ে চুম্বক দিয়ে বলল, তাতে হয়তো আপত্তি উঠবে না। কিন্তু আমি বাবার কথাটাই ভাবছি।

কি ভাবছ?

বাবার খুব কষ্ট হবে হয়তো।

বাবার কষ্টের কথা যদি সত্যিই ভাবো তবে কষ্ট দিও না।

মুখের মতো জবাব পেয়ে শ্রীনাথ চুপ করে গেল। চা খেয়ে উঠল সোমনাথ। বলল, তা হলে ঐ কথাটাই ফাইনাল।

শ্রীনাথ উর্ধ্বমুখে ভাইয়ের মুখখানা দেখল। বাবাকে ও কেন রতনপুরে চালান করছে তার সত্যি কারণটা বুঝতে চেষ্টা করল। সম্ভবত সোমনাথ বাবাকে ওখানে পাঠিয়ে ক্ষীণ একটা অধিকার প্রতিষ্ঠার চেষ্টা করছে। নইলে মাসে তিনশ টাকার ফালতু আয় জলাঞ্জলি দিত না।

সোমনাথ চলে যাওয়ার পর আরো কিছুক্ষণ কাজ করল শ্রীনাথ। যখন উঠল তখন সন্ধ্যা সাতটা।

খাবাপ পাড়ায় যেতে হলে প্রথম প্রথম একটু বুকুর জোর চাই। একা যেতে সাহসও হয় না। কিন্তু আশ্চর্য আশেপাশে বন্ধুবেশী আড়কাঠিরা ইচ্ছেটাকে ঠিক টের পেয়ে যায় এবং তারাই পৌঁছে দেয় মেয়েমানুষের ঘরে। শ্রীনাথেরও তাই হয়েছিল। যখন ফেব্রারিট কেবিশন আড্ডা মাবত তখন কানাই বোস নামে একজন ঠিকাদারের সঙ্গে বন্ধুত্ব হয়। সে খাবাপ পাড়ায় যেত এবং সেইসব গল্পও করত খুলে মেলে। শ্রীনাথকে খাবাপ পাড়ায় নিয়ে

গিয়েছিল সে-ই। তারপর থেকে অবশ্য আর বাধা হয়নি। যেতে যেতেই শ্রীনাথের অভিজ্ঞতা হয়েছে, কলকাতা শহরে নাম লেখানো এবং না-লেখানো খারাপ মেয়ে অটেল। আজকাল তার চোখ পাকা হয়েছে। রাস্তায় ঘাটে যে কোনো মেয়েকে একনজর দেখেই বুঝতে পারে, খারাপ না ভাল। তা ছাড়া যাতায়াতে বহু দালালের সঙ্গে চেনা হয়েছে। তারাও খোঁজ দেয়। বাবুল দস্তিদার নামে একজন বন্ধুগোছের দালাল কদিন আগে বলেছিল, শ্রীনাথবাবু, আপনি লো ক্লাসের মেয়েদের কাছে যান কেন? ওরা তো পাশ্চাত্য ভাত। কোনো মজা নেই। যাদের বেশ আছে তারা নানারকম এনজয়মেন্ট করবে। শরীরের ব্যাপারটারও তো অনেক রকম স্টাইল আছে।

বাবুল তাকে হাওড়া ময়দানের কাছে নমিতার খোঁজ দেয়। দেখে খারাপ মেয়ে মনে করা বেশ কঠিন। একদম আধুনিক। ফটোফট ইংরিজি বলে, দারুণ সাজে, গীটার বাজায়, বি এ পাশ। রবি ঠাকুর থেকে বিষু দে পর্যন্ত কোটেশন দেয়।

খরচ অনেক বেশী বটে, কিন্তু নমিতা কেবলমাত্র শরীরী তো নয়। সে শ্রীনাথের সঙ্গে বেডায়, রেস্টুরেন্টে খায়, সিনেমা থিয়েটারও দেখে। সারাক্ষণ বেশ সাজিয়ে গুছিয়ে কথা বলে। বেশিভাগ কথাই প্রেম-ভালবাসা ঘেঁষা। এমন সব কথা যা শ্রীনাথের বয়ঃসন্ধির যৌবনকে ফিরিয়ে আনে। নমিতার চোখের চাউনি, চোঁটেব হাসি সব কিছুই অত্যন্ত উষ্ণ, নিবিড় এবং অনেকটাই যেন আস্তরিক। বিভ্রমই বটে, তবে বিভ্রমই তো মানুষ চায়।

শ্রীনাথ তাই সম্প্রতি নমিতার খাতায় নাম লিখিয়েছে। জমানো টাকা ২-২ করে বেরিয়ে যাচ্ছে। তা যাক। জীবনে টাকা দিয়ে তো কিছু পাওয়া চাই। শ্রীনাথ মনে করে নমিতার কাছে সে কিছু পাচ্ছে। কৃত্রিম হলেও পাচ্ছে।

নমিতার খদ্দেরের সংখ্যা বেশী নয়। দিন ও সময় বাঁধা থাকে। অ্যাপয়েন্টমেন্ট ছাড়া যাওয়া যায় না। এইটেই একমাত্র যা অসুবিধে।

আজ শ্রীনাথের দিন নয়। তবু মনটা ভাল ছিল না বলে হাওড়ায় এসে গাড়ি ধরতে গিয়েও ধরল না। বেঁচিয়ে বাসে উঠে ময়দানের কাছে নমিতার দোতলার ফ্ল্যাটে এসে উঠল।

আশ্চর্য। নমিতা একা ফাঁকা ঘরে সেজেগুজে বসে আছে। তাকে দেখে উজ্জ্বল হয়ে বলল, আজ একটা ছোটোলোকের আসার কথা ছিল। দেখ তো, সারা বিকেলটা বসে বসে নষ্ট করলাম। তুমি এলে, কী ভাগ্য!

খুশি হয়েছো?

সকলের বেলায় হই না। তুমি তো সকলের মতো নও!

নই?

নমিতা হেসে ফেলে বলল, বললে ভাববে তেল দিচ্ছি। তা কিন্তু নয়।

সোফায় বসে শ্রীনাথ হাসিমুখে বলল, আমি কিরকম তা আজ তোমার মুখে শুনব। বলো তো।

যাঃ। লজ্জায় যেন লাল হল নমিতা। মুখ দু হাতে ঢেকে বলল, এভাবে বলা যায় নাকি? বোঝো না কেন?

নমিতার দোভাজ করা বিনুনির সঙ্গে অনেকগুলো আলগা ফিতে বাঁধা। তাতে ভারী ছুরি দেখাচ্ছে ওকে। কানে মস্ত রূপোর কানপাশা। হাতে রূপোর চুড়ি। একটু অবাঙালী সাজে আজ ওর আকর্ষণ তিনগুণ বেড়েছে।

মায়া ও মতিভ্রমের দিকে অভ্যাসবশে হাত বাড়াল শ্রীনাথ।

কিন্তু তারপর শরীরে সেই খিঁচখিঁচ ভাব । যেন অপবিত্রতা, অশৌচ । বাড়িতে ফিরে কোরোসিন স্টোভ জ্বলে গরম জল বসিয়ে অপেক্ষা করতে লাগল । স্নান করবে । এমন সময় দরজার বাইরে সজল এসে দাঁড়ায় ।

বাবা !

এসো । শ্রীনাথ নরম স্বরে ডাকে । মনে মনে ভাবে সজলের সঙ্গে এই দেখা হওয়ার আগে স্নানটা সেয়ে নেওয়া উচিত ছিল । স্নান না কবে যেন এই অবস্থায় জ্বেলের সঙ্গে কথা বলতে নেই । কোথায় যেন আটকায় ।

সজল একটু যেন সংকোচের সঙ্গে ঘরে আসে । মুখে একটু লজ্জার হাসি ।

সজল দেখতে ভাবী মিষ্টি । মুখখানা যেন নরুণ দিয়ে চোঁচে তৈরি । শরীরের হাড়গুলো চওড়া । লম্বাটে গড়ন । বড় হলে ও খুব লম্বা চওড়া আব শক্তিশালী পুরুষ হয়ে দাঁড়াবে ।

সজল ঘবে ঢুকে কীতলভবে ঘুবে ঘুরে এটা ওটা দেখতে থাকে । হঠাৎ বলে, জল গরম কবছ কেন বাবা ? চা খাবে ? ছোড়দিকে বলো না, কবে দেবে ।

না, চা খাবো না ।

তবে ?

চান করব ।

এত রাতে ! সজল অবাক হয়ে বাবার দিকে তাকায় ।

কী বড় বড় অস্ত্রভেদী চোখ । কিছুতেই শ্রীনাথ ওর চোখে চোখ বাখতে পারল না । মাথা নীচু করে বলল, পায়ের নোংরা লেগেছিল ।

বুকেটা ঢিঁব ঢিঁব কবে ওঠে শ্রীনাথের । হে ভগবান ! আব যাই হোক ছেলের কাছে যেন কোনদিন মুখ কালো না হয় ।

সজল বলে, তোমার শীত করবে না ?

শীত কববে বলেই তো গরম জল কবছি ।

বাড়িতে বলে পাঠালেই তো মা গরম জল করে দিত ।

লোককে কষ্ট দিয়ে কি লাভ ! এটুকু নিজেই পারা যায় ।

তোমার ক্ষুরটা ধরেছিলাম বলে রাগ করেছো, বাবা ?

একটু করেছিলাম । এখন আব রাগ নেই । টেবিলের ডান ধারের দেরাজে আছে । বের করে নাও । ওটা তোমাকে দিলাম ।

দিলে ? উজ্জ্বল হয়ে সজল জিজ্ঞেস করে ।

ঐ । কিন্তু ধুব সাবধান । অসম্ভব ধার । হাতটাত কেটে ফেলো না ।

না, আমি দাড়িই কাটব ।

দাড়ি ! অবাক হয়ে শ্রীনাথ তাকায় ।

হি হি । নিতাইদা যখন ঘুমোবে তখন চুপি চুপি গিয়ে ওর দাড়ি কামিয়ে দিয়ে আসব ।

সর্বনাশ । শ্রীনাথ প্রায় দাঁড়িয়ে পড়ে, খবদার ওসব করতে যেও না । কখন গলায় বসিয়ে দেবে অসাবধানে । তা হলে কিন্তু ফাঁসি ।

আচ্ছা । তাহলে রেখে দেবো । বড় হলে নিজের দাড়ি কামাব ।

ক্ষুরটা ওকে দেওয়া ভুল হল কি ? হয়তো । কিন্তু তখন দেওয়া জিনিস ফেরত নেওয়া ঠিক হবে না ।

শ্রীনাথ বলে, তুমি মাকে জিজ্ঞেস করে এখানে এসেছো তো !

হ্যাঁ । ঘাড় নাড়ে সজল । বলে, মা বারান্দা পর্যন্ত এগিয়ে দিয়ে গেল ।

তোমার মা ! বলে আবার সচকিত হয়ে খাড়া হয় শ্রীনাথ ।

ঠিক সেই মুহূর্তে দরজার আড়াল থেকে কালো শাড়ি পরা তৃষা দরজার আলোয় দেখা দেয় ।

অস্বাভাবিক কিছুই নয় । তার স্ত্রী এই ঘরে আসতেই পারে । তবু ভীষণ যেন চমকে যায় শ্রীনাথ । যেন তার লুকানো কোনো ষড়যন্ত্র ধরা পড়ে গেছে । প্রকাশ পেয়েছে তার ভীষণ কোনো গোপনীয়তা ।

শ্রীনাথ বলল, তুমি !

তৃষা গম্ভীর মুখে বলে, অবাক হওয়ার কি হল ? আমি তো ভূত নই । মানুষ ।

॥ পনেরো ॥

শ্রীনাথ নিজেকে সামলে নিয়ে বলল, এসো । কিছু বলবে ?

তৃষা খুব তীক্ষ্ণ চোখে সজলের দিকে চেয়ে ছিল । চৌকাঠের ওপাশ থেকেই বলল, ক্ষুরটা কি তুমি সজলকে দিয়ে দিলে ?

ই ।

কেন দিলে ?

ওর ওটার ওপর খুব লোভ । প্রায়ই চুরি করে আমাব ঘরে ঢুকে ক্ষুরটা নিয়ে দুট্টমি কবে বেডায় ।

তাই দেবে ? বাচ্চা ছেলের হাতে ধারালো জিনিস থাকলে কত কি বিপদ হতে পারে ।

শ্রীনাথের যে কথাটা মনে হয়নি তা নয় । কোথায় যেন একটু অপরাধবোধ জেগে ওঠে তার । বলে, ওকে বলেছি রেখে দিতে ।

তৃষা কঠিন গলায় বলল, সজল কি খুব বাধ্য ছেলে ? ওকে তুমি চেনো না ?

শ্রীনাথ বিবন্ধ হয়ে বলে, অত ভেবে দেখিনি । না দিলেও তো নিজে থেকেই নেবে ।

তাই ঐ সর্বনেশে জিনিস হাতে তুলে দিতে হবে ? এটো দিয়েই মুগী কেটেছিল !

সজল টেবিলের ধারটায় কাঠ হয়ে দাঁড়িয়ে আছে । মা বাবা দুজনকেই সে সাঙ্ঘাতিক ভয় পায় । ক্ষুরটা নিয়ে কি কববে বুঝতে না পেরে মুঠোয় ধরে রেখেছে । চোখ দবজার দিকে ।

শ্রীনাথ কঠিন স্বরে বলে, তাব আগে আমার জানা দবকাব মুগী কাটাব জন্য ক্ষুরটা ও পেয়েছিল কি কবে ! আমাব ঘরে ঢুকল কি কবে ?

তৃষা শ্রীনাথের দিকে স্থির তীব্র চোখে চেয়ে বলে, সেটা ওকেই জিজ্ঞেস কোরো । আমাব সেটা জানার কথা নয় ।

শ্রীনাথ এ নিয়ে কথা বাড়াতে চায় না । চাবির কথা উঠলে সজলের নাম ফাঁস হয়ে যাবে । তাই সে তৃষার চোখের দিকে না তাকিয়ে বলল, আমার দেওয়ার ভাগ দিয়েছি । তোমার ভয় কবলে ওর কাছ থেকে নিয়ে না-ও ।

তৃষার গলায় বেশীর ভাগ সময়ে উদ্ভা থাকে না, কাঠিন্য থাকে । ঠাণ্ডা নিকটাপ একরকম রক্ত জল করা গলায় বলল, ও খুব স্ভাবিক নয় । ক্ষুব, ছুবি বা ও বকম কিছু পেলে ও যা খুশি করতে পারে । নিজের গলাতেও বসিয়ে দেওয়া অসম্ভব নয় । এটা তোমার না জানার কথা নয় । নিজেও দেখছ ।

শ্রীনাথ অবাক হয়ে বলে, আমি জানব কি করে ? আমাকে কেউ এ রকম কিছু বলেনি

তো !

নিজের ছেলে সম্পর্কে আর একটু খোঁজ-খবর রাখাটা বোধ হয় ছেলের ভালর জন্যই দরকার ।

বলে তৃষা সজলের দিকে তাকাল । খুবই শান্ত গলায় বলল, ক্ষুরটা তোমার বাবাকে ফেরত দাও ।

সজল টেবিলের ওপর ক্ষুরটা রেখে দেয় । আস্তে করে বলে, বাবা বলছিল আমি যেন বড় হয়ে ওটা দিয়ে দাড়ি কামাই ।

তৃষা তেমনি শান্ত স্বরে বলে, দাড়ি যখন হবে তখন ক্ষুরেরও অভাব হবে না । এর মধ্যে শ্রীনাথের কিছু বলা সাজে না । সে তাই অপমানিত বোধ করেও চুপ করে থাকে ।

তৃষা চৌকাঠ ডিঙালো না । দরজাব কোণে বাঁকা হয়ে ঠেস দিয়ে দাঁড়িয়ে বলল, কিছু বলতে আসিনি । সজলকে বিকেলে আসতে বলেছিলে, ও অনেকবার তোমার খোঁজ করে ফিরে গেছে । রাতে আবার এল । অন্ধকার উঠোন পেরোতে ভয় পায় বলে সঙ্গে এসেছি । দেৱী দেখে সজল ভাবছিল ।

শ্রীনাথ বলল, অফিসে কাজ ছিল । বিকেলে ফিরতে পারিনি ।

সে তো থাকতেই পারে । তৃষা স্টোভে বসানো জলটার দিকে চেয়ে বলল, তোমার জল ফুটে গেছে ।

ডেকচির ঢাকনা ঠেলে ফুটন্ত জল পড়ে স্টোভের আগুন লাফাচ্ছে । শ্রীনাথ উঠবার আগেই অবশ্য তৃষা গিয়ে আঁচল দিয়ে ডেকচিটা নামিয়ে স্টোভটা এক ঝুঁয়ে নিভিয়ে দিয়ে বলল, আজকাল রোজ রাতে স্নান করছ ! কী ব্যাপার ?

শ্রীনাথ বাধা-বাধা গলায় বলে, কলকাতায় যা ধুলো ময়লা.....তার ওপর প্রেসের কালিবুলি...শরীরটা কুমন খিত খিত করে ।

আগে তো এই অভ্যাস ছিল না !

এখন হচ্ছে ।

তৃষা আর এ নিয়ে ঘাঁটল না । বলল, প্রীতমবাবুর অসুখের খবর পেয়েছিলাম । তাকে একবার দেখতে গিয়েছিলে ?

শ্রীনাথ একটু লজ্জা পায় । বলে, না । সময় হয়নি ।

কী হয়েছে তাও তো জানা দরকার ছিল । তুমি যাবে বলে আমি বিলুর চিঠির জবাব পর্যন্ত দিইনি । এটা ভীষণ অভদ্রতা হল । ওরা কী মনে করছে !

শ্রীনাথ শ্বাস ফেলে বলল, জেনে আর হবেটা কী ? ও সব না জানাই ভাল ।

তৃষার গলা একটু তীক্ষ্ণ হল, কেন ?

আমরা ওঁদের জন্য আর কী করতে পারি ?

করতে না পারলেই বা, বিপদের দিনে গিয়ে একটু সামনে দাঁড়ালেও মানুষ জোর পায় । তোমারই বোন-ভগ্নীপতি, তাই বলেছিলাম ।

শ্রীনাথ উদাস গলায় বলল, কেউ কারো নয় । আমার আর ও সব সেন্টিমেন্ট নেই ।

না থাকলে তো মুক্ত পুরুষ । তবে তুমি যাবে না জানলে আমি বিলুর চিঠির জবাব দিতাম । চাই কি একবার নিজেই যাওয়ার চেষ্টা করতাম ।

শ্রীনাথ আজকাল সংসারের কোনো দায়দায়িত্বের কথা শুনলেই বেগে যায় । যখন চাকরির টাকায় সংসার টানত তখন অভ্যাস ছিল । এখন দায়দায়িত্ব না নিয়ে নিয়ে তার

ভেতরটা অলস হয়ে গেছে। কোথাও যেতে ইচ্ছে করে না। কারো সঙ্গে দেখা করার কথা ভাবতে তার গায়ে জ্বর আসে।

শ্রীনাথ বলল, তুমি গেলেই তো ভাল হয়।

তাই যেতে হবে দেখছি।

সজল'মা-বাবার কথা শুনছিল না। খুব সাবধানে হাত বাড়িয়ে ক্ষুরটা ছুঁয়ে দেখছিল। কী দারুণ ধার!

শ্রীনাথ কথটা কিভাবে তুলবে বুঝতে পারছিল না। একটু দোনোমোনো করে বলল, আজ বুলু অফিসে এসেছিল।

তুষা অবাক হল না। শান্ত স্বরে বলল, তাই নাকি।

শমিতার বৃষ্টি বাচ্চা হবে।

ও। ছোটবাবু কি সেই খবর দিতেই এসেছিল? না কি অন্য মতলব আছে?

মতলবের কথা বলতে পারব না। তবে বলছিল সামনের রবিবার বাবাকে এখানে দিয়ে যাবে। বাবার ওখানে খুব অসুবিধে হচ্ছে।

তুষা মৃদু একটু হেসে বলে, তা তুমি কি বললে?

আমি মতামত দিইনি।

ওমা! কেন?

আমি তো মতামত দেওয়ার মালিক নই। তোমার সঙ্গে কথা বলে জানাবো বলেছি।

এতে আমার সঙ্গে পরামর্শ করার কি আছে? ছোটবাবু যদি স্বশুর মশাইকে না রাখতে চায় রাখবে না। আমাদের এখানে অনেক ঘর আছে। উনি স্বচ্ছন্দে এসে থাকতে পারেন। এর আগেও তো আমি বলেছি, স্বশুর মশাইকে দিয়ে যেতে। ছোটবাবু রাজী হয়নি।

শ্রীনাথ একথা শুনে খুশী হল না, অখুশীও হল না। তবে একটু অবাক হল। তুষা এখনো সম্পর্ক অস্বীকার করছে না, এখনো উদারভাবে দায়দায়িত্ব নিতে চাইছে। অথচ এক সময়ে স্বশুর-শাশুড়ির দায়দায়িত্ব নিয়ে গবীর অবস্থায় অনেক মন কষাকষি হয়েছে তাদের। তুষা কেন এত উদার হয়ে যাচ্ছে সেটা বোঝা মুশকিল।

শ্রীনাথ বলল, ঠিক আছে। বুলুকে তাই বলে দেবো।

বোলো। না বললেও ছোটবাবু দিয়ে যাবে ঠিকই। বাবা এখানে থাকলে ওরও যাতায়াতের একটা উপলক্ষ হয়।

তুষার বুদ্ধি দেখে একটু তাক লাগে শ্রীনাথের। তুষার বুদ্ধি বরাবরই প্রখর ছিল। এখন মানুষ চরিয়ে সেটা আরো সাজঘাতিক ধাবালো হয়েছে।

শ্রীনাথ মাথা নীচু করে বসে নিজের হাতের দিকে চেয়ে রইল। কিছু বলার নেই।

তুষা বলে, তোমার জল ঠাণ্ডা হয়ে যাচ্ছে। স্নান করলে করে নাও।

ই। বলে শ্রীনাথ ওঠে।

সজলকে আর কিছু বলবে?

না। ক্ষুরটা দেওয়ার জন্যই ডেকেছিলাম।

ক্ষুরটা ও নেবে না। ওটা সাবধানে রেখে দাও যাতে কেউ নাগাল না পায়। আর কখনো আমাকে জিজ্ঞেস না করে ওকে কিছু দিও না।

শ্রীনাথ একটু বিষ-হাসি হেসে বলেই ফেলল, ক্ষুরের চেয়ে বন্দুক অনেক বিপজ্জনক। তুমি বন্দুকটাও সাবধানে রেখো।

বন্দুকের কথা যে তুষা শ্রীনাথকে বলেনি সেইটে মনে করেই শ্রীনাথ চিমাটিটুকু কাটল।

তুষা অবশ্য চোখের পাতাও ফেলল না । মুখের ভাবেরও কোনো বদল হল না তার ।

শান্ত স্বরে তুষা বলল, তুমি কোনো ব্যাপারেই মাথা ঘামাও না বলে বন্দুকের কথাটা তোমাকে বলিনি । আজকাল অনেক সময়ে নগদ টাকা বা সোনাদানা ঘরেই রাখতে হয় । চারদিকে যে ভীষণ ডাকাতি হচ্ছে সেই কথাটা ভেবেই বন্দুকটা ফেরত চেয়েছি । বন্দুক থাকবে আমার স্টিলের আলমারিতে । কোনো ভয় নেই ।

আমাকে বলেনি বলে কিছু মনে করিনি । তবে কথাটা বলুর মুখ থেকে শুনে জানতে হল বলে খারাপ লাগে । বাইরের লোকেও যা জানে তা ঘরের লোক হয়েও আমি জানি না ।

তুষা সজলের দিকে চেয়ে বলল, তুমি গিয়ে শুয়ে পড়ো । রাত হয়েছে ।

মা-বাবার কথা চালাচালি হাঁ কবে শুনছিল সজল । তুষা বলার পর বাধ্য ছেলের মতো ঘর থেকে বেরিয়ে গেল । বারান্দায় মেঝের ওপর তুষা তার মস্ত ফ্যাশ লাইট উপুড় করে রেখে এসেছিল । বাতি জ্বালিয়ে সজলকে পথটা দেখিয়ে দিয়ে আবার ফিরে আসে তুষা । আগের ভঙ্গিমাতেই দরজায় ঠেস দিয়ে একটু বাঁকা হয়ে দাঁড়িয়ে বলে, ছেলের সামনে ও সব কথা না তুলেই ভাল ।

আমি তুলতে চাই না । কথা আপনি ওঠে ।

বন্দুকের কথা তোমাকে ছোটোবাব বলেছে ?

হ্যাঁ ।

অনেক খবর রাখে তা হলে ?

নিজের স্বার্থেই বাখে । বোধ হয় এখানকার লোকজনকে নিয়ে একটা ঘোঁটিও পাকাচ্ছে ।

সেটা জানি । এখানকার অনেক লোকও মুখিয়ে আছে আমাকে জন্দ করার জন্য ।

শ্রীনাথ অধৈর্যের গলায় বলে, সেটা নতুন কথা নয় । কিন্তু আমার জানতে হচ্ছে করে, এখনো লোকে আমাদের শত্রু ভাববে কেন ?

সবাই ভাবে না !

কিছু লোকেই বা ভাববে কেন ? শ্রীনাথ সামান্য উঁচুতে তোলে গলা । ববাবর সে অসম্ভব শান্তিপ্ৰিয় ফুর্তিবাজ মানুষ । কোনো বুট-ঝামেলা পছন্দ করে না । কোনো বিরুদ্ধতা দেখলেই সে গুটিয়ে যায় ।

তুষা বলল, তাতে তোমার দুশ্চিন্তার কিছু নেই । তারা আমাকেই শত্রু ভাবে । তোমাকে নয় ।

শ্রীনাথ শ্লেষের হাসি হেসে বলল, যাক এতদিনে তবু স্বীকার করলে যে, তুমি আর আমি দুটো সম্পর্কহীন আলাদা লোক ।

তুষা শু কঁচকে বলে, কথাটার মানে কি তাই দাঁড়াল ?

তাই দাঁড়ায় ।

• আমি তো ও রকম ভেবে বলিনি ।

শ্রীনাথ ইজিচেয়ারে বসে পড়ে আবার । মাথার পাতলা চুলে উত্তেজিত আঙুল চালাতে চালাতে বলে, কি ভেবে বলেছো তা তুমি জানো আমিও জানি ।

তুষা শান্ত গলায় এতটুকুও উত্তেজিত না হয়ে বলে, তুমি বিষয় সম্পত্তির মধ্যে থাকো না । সে হয়তো তোমার অভিমান । সম্পত্তি যেহেতু আমার নামে । তুমি দেখ না বলেই আমাকে দেখতে হয় । লোকেও লক্ষ করছে বিষয়সম্পত্তি আমিই দেখি, আমিই সংসার চালাই । লোকে সেটা সহ্য করতে পারে না । একজন মেয়েমানুষকে ক্ষমতায় দেখতে পুরুষরা পছন্দ করে না । তার ওপর এখানকার বেশীর ভাগ পুরুষই অপদার্থ, কুচুটে,

পরশ্রীকাতর। তাতে তেমন কোনো কাজ না থাকায় ঐ সব করে বেড়ায়। তবে তোমার সম্পর্কে তাদের কোনো রাগ নেই।

শ্রীনাথ অধৈর্যের গলাতেই বলে, সেটাই বা তুমি কি করে জানলে ?

তুষা একটু ফিচেল হাসি হেসে বলে, লোকে বলে আমি নাকি তোমার মতো ভাল লোককে পায়ের তলায় দাবিয়ে রেখেছি। তুমি নাকি খুবই ন্যায়বান, যুক্তিবাদী, সংলোক। এমন কি তুমি আমাকে ছেড়ে নাকি অন্য জায়গাতে চলে যাওয়ারও চেষ্টা করছ। এ রকম খারাপ একজন মহিলার সঙ্গে বাস করতে তোমার নাকি ভীষণ ঘেন্না হয়। এ সব শুনেই বুঝি, লোকের রাগ তোমার ওপর নয়।

তুষা ইদানীং একসঙ্গে এত কথা বলেনি শ্রীনাথের সঙ্গে। তুষা আজকাল তর্ক করে না, আলোচনা করে না, কথার পিঠে পিঠে খানিকক্ষণ জবাব দিয়ে এক সময়ে চুপ কবে যায়। আজ তুষার এত কথা এবং কথার মধ্যে চাপা একটা হতাশার ভাব লক্ষ্য করে অবাক মানে শ্রীনাথ।

সে বলল, এখানকার লোক কি বলে তা আমার কানে বেশী আসে না। তবে এটা বুঝি যে, এতদিনেও আমরা এ জায়গার লোক হয়ে উঠতে পারিনি।

তুষা একটা শ্বাস ফেলে বলে, এক জায়গায় বিষয়সম্পত্তি নিয়ে বসলেই সেই জায়গা আপন হয় না। পুঙ্খানুক্রমে থাকলে আত্মীয়তা জ্ঞাতিগুপ্তি বাড়লে তবে হয়।

তবু চেষ্টা করা উচিত ছিল।

কথাটা কি আমাকে উদ্দেশ্য করে বলছ ?

তবে আর কাকে ?

আমাকে দায়ী করছ কেন ? এ জায়গাব আপন হতে তুমিও তো চেষ্টা করছ না। কেবল একটা পালাই-পালাই ভাব।

শ্রীনাথ সাবধান হয়। বদ্বীকে দিয়ে সে যে জমি কেনাব চেষ্টা করছে অন্য জায়গায় সেটাও কি তুষা জানে। জানার কথা নয়। বদ্বীও বেশ কিছুদিন হল আসে না।

একটু চিন্তিত দেখাল শ্রীনাথকে। আস্তে করে বলল, এ জায়গাকে আমার আপন করে কি লাভ ? তুমি থাকবে, সুতরাং দায়িত্ব তোমারই।

কেন, তুমি থাকবে না ?

আছিই তো। যতদিন থাকা যায় থাকবও।

তুষা বড় বড় চোখে তার দিকে চেয়ে থাকে কিছুক্ষণ। তারপর বলে, বিষয়সম্পত্তি আমার হলেও সংসারটা কিন্তু আমার নয়। ছেলেমেয়েও আমি বাপের বাড়ি থেকে আনি। সুতরাং এখন থাকা না থাকার কথা তোলা খুব বীরপুরুষের কাজ হবে না।

আমি বীরপুরুষ নই বলেই কথাটা উঠল।

তুমি স্নান করে এসো। আমি যাই। বলে তুষা নিচু হয়ে বারান্দা থেকে তার ফ্যাশ লাইট কুড়িয়ে নিল। তারপর অন্ধকারে তাকে আর দেখা গেল না।

শ্রীনাথ ডেকচির জল নিয়ে কলপাড়ে গিয়ে খুব ঘষে ঘষে স্নান করল আজ।

কলপাড় থেকেই দেখা যাচ্ছিল, পুকুরের ধারে আজও শুকনো কাঠকুটো দিয়ে মস্ত আগুন জ্বলেছে নিতাই।

স্নান করে ফিরে এসে বারান্দায় উঠে শ্রীনাথ হাঁক পাড়ল, নিতাই নাকি রে !

হ্যাঁ।

শুনে যা।

ভেজা গায়ে উত্তরে হাওয়ায় খোলা বারান্দায় শীতে কাঁপছিল শ্রীনাথ । নিতাই কাছে আসতেই বলল, শুনলাম এর মধ্যে কবে যেন সরিৎবাবু তোকে মেরেছে ।

নিতাই হাসে, দূর । দূর । মারবে কি ? গাঁজার নেশায় তখন বাবুর গায়ে জোর ছিল নাকি ?

শ্রীনাথ অবাক হয়ে বলে, সরিৎ গাঁজা খেয়েছিল ?

রোজ নয় । সেদিন খেয়েছিল ।

মারল কেন ?

আজ্ঞে নেশা-ভাঙের মুখে কোন কথা থেকে কোন কথা বেরিয়ে যায় । তার কোনটা শুনে বাবুর রাগ হল কে বলবে ?

মেরেছিল যে, সেটা আমাকে বলিসনি কেন ?

নিতাই খুব হেসে-টেসে বলল, পরদিনই আবাব খাতির হয়ে গিয়েছিল কিনা ।

সরিৎ ছেলেটা কেমন ? গুণ্ডামি-টুণ্ডামি করে না তো !

আজ্ঞে না । লোক খুব ভাল ।

বদ্রী তপাদারেব বাড়িটা চিনিস ?

খুব চিনি । লাইনের ওধারে উত্তরদিকে আমবাগান পেরিয়ে মাইলটাক ।

কাল ওকে গিয়ে খবর দিবি তো । বলবি জরুরী দবকার । আসে যেন একবার কাল পরশু ।

দেবোখন । এই সেদিনও মা ঠাকরোন ডাকিয়ে এনেছিলেন । আমিই গিয়ে খবর দিয়েছিলাম কিনা ।

শ্রীনাথ অবাক হয়ে বলে, সজলের মা বদ্রীকে ডাকিয়েছিল ?

আজ্ঞে ।

কেন ?

তা জানি না ।

আশ্চর্য তো ! আচ্ছা, তুই যা ।

খুবই অনামনস্ক হয়ে গেল শ্রীনাথ । এত অনামনস্ক যে ঘরে ঢুকেও সে ঘরটাকে লক্ষ্যই করল না । ডেকচি, বালতি, মগ, গামছা সব যত্নেব মতো যেখানকার জিনিস সেখানে রাখল । ধোয়া লুঙ্গি পরল, উলিকটের গেঞ্জী গায়ে দিয়ে চাদর জড়াল । চুল আঁচড়াল ।

তারপর ইজিচেয়ারে বসতে গিয়েই সাপ দেখাব মতো চমকে উঠল ভীষণ । বুকের ভিতর ধড়াস ধড়াস করে হৃৎপিণ্ড আছাড়িপিছাড়ি খাচ্ছে ।

তার বিছানায় খুব অলসভঙ্গীতে টর্চ হাতে তৃষা বসে আছে ।

বোধ হয় চমকানোতে মুখ ফ্যাকাসে হয়ে গিয়েছিল শ্রীনাথের । বোধ হয় চমকটা বাইরে থেকেও বুঝতে পেরেছিল তৃষা । উঠে এসে বুকে হাত রেখে বলল, আমারই অনায়া । একটা জানান দেওয়া উচিত ছিল । ভয় পেয়েছো ?

শ্রীনাথ কথা বলতে পারল না বুকের অসহ্য ধড়ধড়ানিতে । শুধু মাথা নেড়ে জানাল, না ।

আমাকে তোমার ভয় কিসের ?

অনেকক্ষণ দম নিয়ে স্বাভাবিক হল শ্রীনাথ । বুকটা তার বোধ হয় ভাল নয় । ক্ষীণ একটু যন্ত্রণা হচ্ছে যেন । এক মেডিক্যাল রিপ্রেজেন্টেটিভ বন্ধু তাকে সাবধান করে দিয়েছিল, দেখো ভায়া, যদি বাঁ দিকের বুকে নিপলের দু ইঞ্চি নিচে কখনো ব্যথা-টাখা হয় তবে ঠিক ১২০

হাট ট্রাবলের লক্ষণ বলে জেনো।

বাথাটা হচ্ছে। শ্রীনাথ চোখ বুজে অনুভব করে।

তৃষা ইজিচেয়ারের ধারে দাঁড়িয়ে তার মাথায় হাত বুলিয়ে দিচ্ছিল। বলল, তোমার তো কখনো এমন শরীর খারাপ হয় না।

শ্রীনাথ চোখ মেলে বলল, ওটা কিছু নয়। বলো, কি বলবে?

এখন তোমার ভাল লাগছে তো!

হ্যাঁ। ভাল।

তৃষা আবার বিছানায় গিয়ে বসল। তোমার খাবারটা আমি এ ঘরেই পাঠিয়ে দিতে বলেছি। এই শীতে আবার অত দূরে যাবে?

শ্রীনাথ মৃদু স্বরে বলে, ভালই কবেছো।

আবার ভেবে বসবে না তো যে, ত্রৈমাসিকে এইভাবে আলাদা আব পর করে দিচ্ছি! লোকে কত ভুল ভাবতে ভালবাসে।

আজ এত আদুরেপনা কেন তা বুঝল না শ্রীনাথ। কিন্তু একটু হাসল। বলল, না, তা কেন?

তৃষা বসে রইল। গেল না। ভারী অস্বস্তি হতে লাগল শ্রীনাথের। আজ কেন সব অন্য বকম হচ্ছে?

একটু বাদেই খাবার নিয়ে এল বৃন্দা। সামান্যই খেল শ্রীনাথ। বৃন্দা দাঁড়িয়ে থেকে এঁটো পরিষ্কার করে নিয়ে গেল। তবু তৃষা বসে আছে।

শ্রীনাথ ইজিচেয়ারে বসে বলল, কিছু বলবে?

তৃষা মৃদু হেসে বলে, বলার জন্যই বসে আছি।

বলো।

তোমার শরীর এখন কেমন লাগছে?

খুব ভাল। কিছু হয়নি।

তৃষা উঠে দরজাটা বন্ধ করে দিয়ে এল। আবার বিছানায় বসে অদ্ভুত এক হাসি হেসে বলল, আমি তোমার বউ না?

তাই তো জানি! অবাক, ভীষণ অবাক হয়ে বলে শ্রীনাথ।

তৃষা বলে, বউ হলেও আমি ভাল বউ নই। ত্রৈমাসিকে একটা জিনিস থেকে বহুকাল বঞ্চিত করে রেখেছি। তাই না?

শ্রীনাথ খুব গভীর হয়ে গেল। বৃকের মধ্যে আবার সেই ধড়াস ধড়াস। সাবা গায়ে শীতকাঁটা।

বলো, ঠিক নয়? তৃষা আদুরে গলায় বলে।

শ্রীনাথ তৃষার মুখের দিকে তাকায়। না, তৃষার কোনো পরিবর্তন ঘটেনি। যেমন দৈনন্দিন মানুষটি ছিল, তেমনই আছে। শুধু চোখ দুটো একটু দিপ-দিপ করে জ্বলছে। মুখে অদ্ভুত এক মোহিনী হাসি।

তৃষা বসা স্বরে ফিস ফিস করে বলল, আজ নাও। দিতে এসেছি। অভিমান কোরো না, মুখ ফিরিয়ে থেকো না। লক্ষ্মীটি!

শ্রীনাথের গলা শুকিয়ে আসছিল। তার শরীরের কামনা মরে যায়নি বটে, বরং সে রোজই তীব্র কাম বোধ করে। তবু এখনো এক রাত্রে দুজন মেয়েমানুষের পাল্লা টানবার ক্ষমতা তার নেই। হাওড়া ময়দানের নমিতা তাকে আজ নিঃশেষ করেছে।

মদু স্বরে শ্রীনাথ বলে, আজ নয় ।

আজই ! বলে উঠে আসে তৃষা । পাশে দাঁড়ায় । কানের কাছে মুখ এনে বলে । আজই ।
আজ আমি ভীষণ পাগল হয়েছি ।

শ্রীনাথ সিটিয়ে যায় । কাঠ হয়ে বসে থাকে । তারপর বলে, তোমার এত ইচ্ছে ছিল না
তো কখনো !

তুমি তার কি জানবে !

আমি জানব না তো জানবেটা কে ?

আজ জেনে দেখ ।

আজ নয়, তৃষা ।

আজই । আজই চাই । এসো ।

তৃষা শ্রীনাথের কোমর ধরে দাঁড় করিয়ে দেয় । তৃষার গায়ে অনেক জোর । এত জোর
যে শ্রীনাথ ওকে ঠেকাতে পারল না ।

বুকের বাঁ দিকে নিপলের ঠিক দু ইঞ্চি নিচে ক্ষীণ ব্যথাটা আবার টের পেল শ্রীনাথ ।

তৃষা কানে কানে বলে, আমার যদি ইচ্ছেই না থাকবে তাহলে তোমাব এতগুলো
ছেলেপুলে হল কি করে ?

শ্রীনাথ হঠাৎ বলে ফেলল, ইচ্ছে হয়তো আছে, তবে তা আমাকে নিয়ে নয় । আমার
প্রতি তুমি বরাবর ক্যালাস ছিলে ।

অবাক গলায় তৃষা বলে, তোমাকে নিয়ে নয় ? তবে কাকে নিয়ে ?

অনেক কথাই বলতে পারত শ্রীনাথ । কিন্তু ভদ্রতাবোধ এসে গলা টিপে ধরল । বাধা
হয়ে দাঁড়াল লজ্জা । মৃত দাদা মল্লিনাথের প্রতি একরকম মায়া হল এ সময়ে । এত অকপটে
তৃষার সঙ্গে সম্পর্ক ভাঙচুর করতে বুঝি বা হল ভয় । তাই বলতে পারল না ।

তৃষা বাতি নিভিয়ে দিয়ে চলে এল বিছানায় । এক ঝটকায় নিজেকে খুলে ফেলল ।
শ্রীনাথকেও শরীরে কোনো আবরণ রাখতে দিল না । নগ্ন শরীরে লেপটা টেনে নিল । বলল,
লেপটা ভীষণ ঠাণ্ডা । কাল বের করে রেখে যেও, রোদে দেবো । চাবিটা রেখে যেও,
তাহলেই হবে ।

শ্রীনাথ জবাব দেওয়ার আগেই তৃষা তাব মুখ বন্ধ করে দিল জোরালো এক চুমুতে । বড়
ঘিনঘিন করছিল শ্রীনাথের । মুখে লাল, ঠোঁট, শ্বাস কিছুই তার শরীরে সাড়া তুলছে না ।
নেতিয়ে অবশ হয়ে আছে শরীর ।

এসো । বলে হাত বাড়ায় তৃষা ।

না তৃষা, আজ আমার ইচ্ছে নেই ।

কানের কাছে হঠাৎ তীক্ষ্ণ শোনায তৃষার গলা, ইচ্ছে নেই কেন ? বহুদিন তো এসব
হয়নি । ইচ্ছে না হওয়ার কথা নয় ।

তৃষার হাত দারোগার মতো খানাতল্লাস করতে থাকে তার শরীরে ।

শ্রীনাথ লড়াই করে, না তৃষা, আজ আমার মন ভাল নেই ।

তবু তৃষার সমস্ত শরীর হামলে পড়ে তার ওপরে । তার হাত তৎপর হয় । এমন কি টর্চ
ছেলেও কি যেন দেখার চেষ্টা করে সে ।

হঠাৎ শ্রীনাথ বুঝতে পারে, তৃষার এক ফোঁটাও কাম নেই । এতটুকুও ভালবাসা জাগেনি
আজ ওর এই রাতে । তৃষার চোখ আর হাত একটা কিছু বুঝতে চাইছে । দেখতে চাইছে ।

শ্রীনাথ ভয়ে প্রাণপণ প্রতিরোধের চেষ্টা করে । নিজেকে ঢাকতে চায় । তৃষাকে সরিয়ে
১২২

দেওয়ার চেষ্টাও করে সে ।

কিন্তু জোরালো হাতে পায়ে বিছানার সঙ্গে তুষা তাকে বেঁধে রাখে । পুরুষকে জাগিয়ে তোলার যতরকম মুদ্রা আছে তা প্রয়োগ করে যায় সে । টর্চ জ্বলে পরীক্ষা করে তাকে ।

তারপর গভীর এক শ্বাস ফেলে তাকে ছেড়ে দেয় ।

শ্রীনাথ উপড় হয়ে বালিশে মুখ গুঁজে থাকে ঘেম্মায় । তুষা জানল, সে আজ অন্য মেয়েমানুষের কাছে গিয়েছিল ।

॥ যোল ॥

রবিবার দিনটা দীপনাথের নিরঙ্কুশ ছুটি থাকে । বেলা পর্যন্ত ঘুমোনা, আড্ডা, বিকেলের দিকে প্রীতম বা সোমনাথের বাড়িতে যাওয়া কিংবা আর্ট একজবিশন, ভাল নাটক, বিচিত্র কোনো অনুষ্ঠান দেখে বেড়ানোর প্রোগ্রাম থাকে তার ।

কিন্তু এই রবিবার ছুটি পেল না সে । বোস সাহেব বিরাট দল নিয়ে শিকারে যাচ্ছেন । মিঠাপকুরের বাগানবাড়ি ছেড়ে দিয়েছে একজন বড় মহাজন । সেখানে কেটারারের এলাহি খাওয়াদাওয়ার ব্যবস্থা হয়েছে ।

দীপনাথের এইসব আমোদ-ফর্তিতে কোনো সম্মানজনক ভূমিকা নেই । তাই সে আনন্দ পায় না, বরং যথেষ্ট উৎকণ্ঠিত থাকে । তবু এবার তার কোথায় একটু উত্তেজনাময় আনন্দের অনুভূতি হচ্ছিল । তার কারণ, অন্যান্য মহিলাকুলের সঙ্গে মণিদীপাও যাচ্ছেন ।

নিজের মনের এই সাম্প্রতিক পাপবোধ দীপনাথকে যথেষ্ট খোঁচা দেয় । কিন্তু সে যেন তপ্ত ইক্ষু চর্বণ, জ্বলে গাল না যায় তাজন ।

মিঠাপকুরের মস্ত ঝিলে যে বালিহাঁস থাকবেই এমন কোনো কথা নেই । তবে ঝোপ-জঙ্গল বাঁশঝাড়ে বিস্তর নিরীহ পাখি-টাখি এসে বসবে । তাদের দু-চারটে মারা পড়লেও পড়তে পারে । কারণ সঙ্গে যাচ্ছে তিন তিনটে বন্দুক ।

আগমবাসাডারে ড্রাইভারের কনুইয়ের গুতো আর অ্যালবার্ট টমসনের চীফ অ্যাকাউন্ট্যান্ট মিস্টার গুহর ভারী উরুর পার্শ্বচাপ সহ্য করতে করতে সেই তিনটে খাপে ভরা ভারী বন্দুক খাড়া করে ধরে থাকতে হচ্ছে তাকে আগাগোড়া । লাগেজ বুটে জায়গা হয়নি, সেখানে বিস্তর জিনিস । আর দীপনাথ থাকতে অন্য কোথাও জায়গা হওয়ার দরকারই বা কি ?

তবে দৃশ্যটা মণিদীপা দেখছে না । মেয়েরা দুটো গাড়ি বোঝাই হয়ে আগে আগে যাচ্ছে । পিছনে আর দুটো গাড়িতে পুরুষমানুষের দল । মণিদীপা দেখলে একটু অস্বস্তি বোধ করত দীপ । ভদ্রমহিলা মনে করেন, দীপনাথ বোস সাহেবের চামচা । কথাটা হয়তো তেমন মিথোও নয় ।

সকালের নরম রোদে শহব ছাড়িয়ে ফাঁকা রাস্তা আর দু ধারে প্রাকৃতিক সবুজের মধ্যে পড়ে দীপনাথের ভাল লাগার কথা । বন্দুকগুলোর জন্য তেমন লাগছে না । মুখের সামনে তিনটে খাপে ঢাকা নল উঁচু হয়ে তার চোখ আড়াল করে আছে । এই বন্দুকে পাখি মারা পড়বে ভাবতেই তার বৃকে কষ্ট হয় । খুনখারাপি—তা সে পাখিই হোক আর বাঘই হোক—দীপনাথ সহ্য করতে পারে না । বড়দা মল্লিনাথ তাকে বন্দুক চালাতে শিখিয়েছিল । মল্লিনাথের হাত ছিল সাফ । মাথা ঠাণ্ডা, আর বৃকে ছিল যথেষ্ট নিষ্ঠুরতা । একজকিউটিভ ইনজিনিয়ার হিসেবে কিছুদিন উত্তর বাংলায় ছিল মল্লিনাথ । তখন বনে-জঙ্গলে তার সঙ্গে

ঘুরে দীপনাথ তালিম নিয়েছিল। কিন্তু আজও সে বন্দুক জিনিসটাকে পছন্দ করে উঠতে পারেনি।

শুধু সাহেব পিছনে একটু ঘুরে ব্যাক সীটে বসা বোস সাহেব এবং আর তিন কোম্পানির তিন বড় মেজো কতর সঙ্গে অফিস নিয়ে কথা বলছিলেন। ফলে উরুর চাপে দীপনাথ আরো চ্যাপটা হয়ে গেল। শীতকালেও তার অল্প ঘাম হচ্ছে। দমফোটা লাগছে।

হাওড়া ছেড়ে উনিশ কুড়ি মাইল দূরে মিঠাপুকুর। ইতিমধ্যেই গাছ-গাছালি ঘন হয়ে উঠেছে। বসতির ঘনত্ব কমে এসেছে। চাষের মাঠ দেখা যাচ্ছে। বন্দুকের নল সরিয়ে দেখতে থাকে দীপনাথ। সামনের একটা গাড়িও খুব তৃষিত চোখে দেখে নেয় সে। সবুজ একটা ফিয়েট গাড়ি। ওতে মণিদীপা রয়েছে। মণিদীপা আজও শাড়ি পরেনি। জিন্স আর টি শার্ট। তার ওপর একটা কাশ্মীরী কোট। বড্ড বেশী চমকি দেখাচ্ছিল।

গাড়িটা ডাইনে বাঁক নিল। আর দেখা গেল না।

বিশুদ্ধ মার্কিন ইংরিজীতে এ-গাড়ির সাহেবরা অফিস বিজনেস আর বিভিন্ন একজিকিউটিভের দোষ-ত্রুটি নিয়ে অনর্গল কথা বলে যাচ্ছে। দীপনাথ বিন্দুমাত্র কৌতুহল বোধ করে না। চোখ বুজে, সে মনের চোখটি খোলে। অমনি নীল আকাশের গায়ে স্বর্গের সমান উঁচু মহান পর্বতের দৃশ্য ভেসে ওঠে।

সব তুচ্ছতা ছেড়ে একদিন কি সে পাহাড়ে যাবে না?

গাড়ি ডাইনে বাঁক নিয়ে একটা গাছপালায় নিবিড় ঞ্ডিপথে ঢোকে। কাঁচা রাস্তা। গাড়ি হৌঁচট খাচ্ছে। খুব আস্তে চলছে। প্রচণ্ড ধুলো উড়ছে চাকার ঘষড়ানিতে। চারদিকের গাছপালার ডাল আর পাতা ছটাছট আছড়ে পড়ছে গাড়ির গায়ে। বাঁশের একটা ডগা শুধু সাহেবের গালে চুমু খেয়ে গেল। উনি একটু সরে এলেন। উরুর চাপে দীপনাথ আরো সক্র হল এবং ড্রাইভারের কনুই তার পেটে ঘোত করে বসে গেল।

প্রায় আধ ঘণ্টা এই যন্ত্রণা সহ্য করে বাগানবাড়িতে পৌঁছোলো দীপনাথ।

ধূলিধূসর দুটো গাড়ি থেকে মহিলারা নেমেছেন। বাগানময় অজস্র সুন্দর নিবিড় গাছপালা, কুঞ্জবন, পুকুর, বাড়িটাও বিশাল। চারদিকে উঁচু দেয়ালের প্রতিরোধ। চারদিক ম ম করছে কফির গন্ধে। বাগানে পুকুরের ধারে মস্ত গার্ডেন আমব্রেলার নিচে টেবিল সাজানো। এখুনি হালকা জলখাবার দেওয়া হবে। ড্রিংকস চাইলে ড্রিংকসও। কেটারারের বেয়ারারা ট্রে নিয়ে তৈরী হচ্ছে।

বন্দুকগুলো খাসে শুইয়ে রেখে দীপনাথ হাত পা টান টান করল। পুলওভার গায়ে রাখা যাচ্ছে না এই রোদে। সেটা খুলে পিঠে ঝুলিয়ে হাতা দুটো গলায় ফাঁস দিয়ে রাখল। একটা ফাঁকা টেবিলে বসে কফিতে চুমুক দিয়ে হাঁফ ছাড়ল সে।

কিছুক্ষণ সে হাঁফ ছাড়তে পারবেও। শিকারের প্রোগ্রামে সে সাহেবদের সঙ্গে যাবে না, এ কথা বোসকে সে আগেই জানিয়ে দিয়েছে।

বোস শুনে একটু হেসে বলেছেন, রক্ত দেখলে ভয় পান নাকি?

ওসব আমার ঠিক সহ্য হয় না।

ঠিক আছে। মিসেসরাও কেউই নাকি যাবেন না। আপনি না হয় ওঁদের সঙ্গে সময়টা কাটাবেন।

কথাটায় খোঁচা আছে। কিন্তু সারা দিন কত খোঁচাই তাকে হজম করতে হয়।

শিকারের পর লানচ। এবং লানচের পর কলকাতা থেকে আসা এক ম্যাজিসিয়ান ম্যাজিক দেখাবেন। এক গায়িকা গান শোনাবেন। তারপর মিস্টার এবং মিসেসরাও হয় ১২৪

গাইবেন, না হলে মজার গল্প বলবেন, কবিতা আবৃত্তি করতে পারেন, যার যা খুশি।

সুতরাং দীপনাথের খুব একটা কাজ নেই। অনেকটা সময় সে একা কাটাতে পারবে।

কফির কাপের কানার ওপর দিয়ে তার চোখ খুব আলতোভাবে লক্ষ্য করছিল, কিন্তু মণিদীপাকে কোথাও দেখা যাচ্ছিল না। রাই মাখিয়ে গোটা দুই ভেজিটেবল স্যানডউইচ খেয়ে ফেলল সে। তারপর আবার বসে বসেই খুঁজতে লাগল চোখ দিয়ে। অবস্থা চোখ বশ মানছে না। বড় জ্বালা।

অনেকটা দূরে একটা লিচু গাছের আড়ালে ক্যামবিসের চেয়ারে ঘোড়ায় চড়ার ভঙ্গিতে মণিদীপা বসে আছে, এটা আবিষ্কার করতে বেশ কিছুটা সময় লাগল। মণিদীপার সঙ্গে জনা দুই মহিলা ও জনা তিনেক পুরুষ রয়েছে। হাত পা নেড়ে প্রচণ্ড কথা বলছে তারা।

দীপনাথ উঠল এবং একটু লক্ষ্যহীন পায়ে এদিক ওদিক হাঁটতে হাঁটতে লিচুতলার কাছাকাছি পৌঁছে গেল। মণিদীপার চোখে পুড়ার জন্য সে ইচ্ছে করেই ওর মুখোমুখি উট্টো দিক থেকে খানিকটা হেঁটে কাছাকাছি চলে গেল প্রায়।

কিন্তু মণিদীপা একদমই পাণ্ডা দিল না তাকে। ডাকল না, তাকালও না।

দীপনাথের কাছে এটুকুই যথেষ্ট অপমান। মণিদীপা সম্পর্কে যত বেশী সচেতন হয়ে উঠেছে সে, তত বেশী অভিমান আর অপমানবোধ বেড়ে যাচ্ছে তার।

দীপনাথও স্পষ্ট করে তাকাল না। উদাস মুখে হাঁটা অব্যাহত রেখে সে ঘুরতে ঘুরতে বাড়ির পশ্চিম দিকে একটা পরিচ্ছন্ন ঘাসজমিতে চলে এল। খুঁজে-পেতে একটা পছন্দসই গাছের ছায়ায় চিত হয়ে শুয়ে পড়ল সে, হাতে মাথা রেখে। চোখ জ্বালা করছে রোদের তেজে। তাই চোখ বুজল। তারপর পাহাড়ের স্বপ্ন দেখতে দেখতে ঘুমিয়ে পড়ল হঠাৎ।

কিন্তু ঘুমোলেও দীপনাথের ইন্দ্রিয় এবং স্নায়ু সব সময়ে সজাগ থাকে। সামান্য শব্দ বা সামান্য চলাফেরাও সে টের পায়। ঘুমের চট্কার মধ্যেই সে একটা ভারী সুন্দর গন্ধ পেল। ঘুম ভাঙলে চোখ চাইল না সে, কে এসেছে তা সে জানে।

বড় অভিমান হল তার। পাশ ফিরে শুল।

মণিদীপা আস্তে করে ডাকল, দীপনাথবাবু!

প্রথমে উত্তর দিল না দীপনাথ।

আরো দুবার ডাক শুনে হঠাৎ উঠে বসল।

মণিদীপা হাসছিল। বলল, কুস্তকর্ণ।

দীপনাথ হাইটা চেপে দিয়ে বলল, কিছু কাজ নেই, তাই ঘুমিয়ে পড়েছিলাম। কিছু বলছেন?

তোমন কিছু নয়। আমার ভাল লাগছে না।

কেন?

এরা কেউ তো আমাদের ক্লাসের লোক নয়। আপনি যেরকম মধ্যবিত্ত পরিবারের, আমিও তাই। আই হেট সেম। বলতে বলতে মণিদীপা একটু জ্বলে ওঠে।

দীপনাথ গম্ভীর হয়ে বলে, তা বললে হবে কেন? একজন একজিকিউটিভের বউকে এই সমাজে মিশতেই হবে। অন্য উপায় তো নেই।

খুব জেদের গলায় মণিদীপা বলে, আমার যা ভাল লাগে না তা মানিয়ে নিতে আমি রাজী নই।

তা হলে কি করবেন?

আমি এখানে-সারা দিন থাকতে পারব না।

একটু আগে তো লিচুতলায় হাই সোসাইটির লোকদের সঙ্গে দিব্যি আড্ডা দিচ্ছিলেন ।
ওঃ । আই ওয়াজ প্রিচিং কমিউনিজম ।

কি সর্বনাশ !

মণিদীপা মৃদু হেসে বলে, খুবই সর্বনাশ । মিস্টার বোস শুনলে মূর্ছা যাবেন । উনি কমিউনিজমকে সাংঘাতিক ভয় পান । আমাদের বাড়িতে লাল মলাটের কোনো বই ঢুকতে পারে না । তা বলে ভাববেন না হাই সোসাইটিতে কমিউনিস্ট নেই । বরং অনেক আছে । আমি যাদের সঙ্গে কথা বলছিলাম তাদের একজনই তো কটুর মার্কসিস্ট ।

হতেই পারে ।

হচ্ছেও । কমিউনিজম ক্রমেই ছড়িয়ে পড়ছে সব ক্লাসের মধ্যে ।

খুব ভাল । দীপনাথ আবার হাই তোলে । মণিদীপার এই একটা ব্যাপারই তার যা একটু না-পছন্দ । সে জিজ্ঞেস করল, বসরা সব কোথায় ?

মণিদীপা ঘাসে বসে বলল, শিকার শিকার খেলা কবতে গেল সব । প্রত্যেকটাই মাতাল । কারো হাতে টিপ নেই ।

না থাকলেই ভাল । পাখি মারা আমার একদম ভাল লাগে না ।

মণিদীপা হাসে । বলে, আপনাকে দেখেই মনে হয়, আপনি ভীষণ সফট-হার্টেড ।

মণিদীপার হাসিটা এতই ঝকঝক এবং হাসলে বয়সটা এতই কম দেখায় যে, দীপনাথের চোখ আঠাজালে পড়া পাখির মতো মণিদীপার মুখে আটকে থেকে ছটফট করছিল ।

মণিদীপা হঠাৎ গা ঝাড়া দিয়ে উঠে বলে, দি হামবাগস্ আর আওশে । চলুন আমরা একটু ঘুরে আসি ।

কোথায় যাবেন ?

যে-কোনো জায়গায় । জাস্ট টু কিপ ডিসট্যানস ফ্রম দি হবুচন্দ্র কিংস অ্যাণ্ড গবুচন্দ্র মিনিস্টারস । কোন্সো চাষার বাড়িতে গেলে কেমন হয় ?

দীপ শঙ্কিত হয়ে বলে, ও বাবা !

ভয় পাচ্ছেন কেন ? চলুন । রিয়্যাল হিউম্যান বিয়িং-এর কাছে গেলে অনেক ভাল লাগবে ।

চাষা বলতেই যে রিয়্যাল হিউম্যান বিয়িং নয় এ কথাটা বোঝানোর বৃথা চেষ্টা করল না দীপ । তবে উঠল ।

মণিদীপা হাঁটতে হাঁটতে বলে, ধারে-কাছে দেখার মতো কোনো জায়গা নেই ?

দীপ মাথা নেড়ে বলে, জানি না, তবে কয়েক মাইলের মধ্যে রতনপুর নামে একটা জায়গা আছে । সেখানে আমার মেজদা থাকে ।

মণিদীপা ভূ তুলে বলে, উনি কি বড়লোক ?

না । তবে একটা খামার মতো আছে ওদের । গেরস্থ ।

আমি যদি যেতে চাই আপনার কোনো অসুবিধে নেই তো ?

থাকলে তো কথাটা বলতামই না । চেপে যেতাম ।

মণিদীপা ঘড়ি দেখে বলে, এখন মোটে সাড়ে নটা বাজে । গিয়ে লানচেব আগে ফেরা যাবে তো ?

তা যাবে ।

তবে গাড়ি যোগাড় করি ? বলে প্রায় দৌড়ে চলে যায় মণিদীপা ।

বেশ খুশী ও উজ্জ্বল দেখাচ্ছিল মণিদীপাকে । দীপনাথ স্পষ্ট টের পায়, একা সে নয় ।

মণিদীপাও তার প্রতি টানে টানে একটু একটু এগিয়ে আসছে। বেশ আগ্রহী। হয়তো সেটা প্রেম নয়। কারণ মণিদীপার সত্যিকারের ভালবাসার লোক একজন বয়স্ক স্কুলমাস্টার, যার নাম স্নিগ্ধদেব এবং যে সাংঘাতিক বিপ্লবী। কিন্তু মণিদীপার মন উপচে যে বাড়তি লাভগাটুকু বাবে পড়ছে তার কিছু ভাগ অবশ্যই দীপেরও। আপাতত এই রবিবারটার যাবতীয় কষ্ট, কাজ ও অপমানকে ভুলিয়ে দেওয়ার পক্ষে সেটুকুই ঢের।

মণিদীপা ফিয়েট গাড়িটা যোগাড় করেছে। দীপ সামনের সীটে ড্রাইভারের পাশে বসতে যাচ্ছিল, মণিদীপা বলল, ও কি? পাশাপাশি না বসলে কথা বলব কার সঙ্গে?

দীপ লজ্জা পেয়ে মণিদীপার পাশে উঠে বসে।

মণিদীপা বলে, আপনি ড্রাইভিং জানেন?

না, একটু শিখেছিলাম, ভুলে গেছি।

জানলে ড্রাইভটাও কষ্ট দিতাম না।

আপনি তো জানেন।

মণিদীপা মাথা নেড়ে বলে, জানলে কি হবে? এসব অচেনা জায়গায় কি পারব? ঠিক সাহস পাচ্ছি না।

পারবেন। দৃঢ় স্বরে বলে দীপনাথ।

পারব? মণিদীপা উজ্জ্বল চোখে তাকায়।

নিশ্চয়ই। বোচাকে খামকা কেন কষ্ট দেবেন? ছেড়ে দিন। দীপনাথ এ কথা বলার সময়েও টের পাচ্ছিল, তার বুক কাঁপছে। নির্জন গাঁ-গঞ্জের বাস্তব এই অ্যাডভেঞ্চারে ড্রাইভার না থাকলে মণিদীপা অনেক খোলামেলা হবে না কি? মুখ-ফাঁকা দু-একটা কথা ঠিক বেরিয়ে আসবে।

কিন্তু শেষ পর্যন্ত আর একটু ভেবে মণিদীপা বলে, না, থাক। আমি যে আপনার সঙ্গে পালিয়ে যাচ্ছি না ড্রাইভারটা তার সাক্ষী থাকবে।

ভীষণ লাল হয়ে গেল দীপ। বলল, কী যে বলেন!

রতনপুর কোন দিকে এবং কত দূর তার স্পট ধারণা ছিল না দীপের। খুব দূর যে নয় তার একটা ধারণা হয়েছিল মাত্র।

কিন্তু লোকজনকে জিজ্ঞাসাবাদ করে মাত্র পনেরো মিনিটে পৌঁছে গিয়ে সে নিজেও অবাক। মণিদীপা মেজদার বাড়িতে কে কে আছে এবং তারা কেমন লোক তা জানতে চেয়েছিল। সেই সব প্রশ্নের জবাবও ভাল করে দেওয়া হল না।

ফটকের কাছে গাড়ি থেকে মণিদীপাকে সঙ্গে নিয়ে নামবার সময় দীপনাথ একটু লজ্জা বোধ করছিল। এই পোশাকে একজন সধবাকে দেখে মেজো বউদি আবার কি ভাববে!

টুকতেই ডান ধারে শ্রীনাথের বাগান।

মণিদীপা দাঁড়ায় এবং বাগান থেকে মাটিমাখা হাতপায়ে উঠে আসে শ্রীনাথ।

কাকে চাইছেন?

দীপনাথ হাতের ইশারা করে চুপ থাকতে ইঙ্গিত করে মেজদাকে। তার পর এগিয়ে গিয়ে বলে, মেজদা, ইনি মিসেস বোস। আমার বসের স্ত্রী।

শ্রীনাথ একটু অবাক। বলে, ও, তুই! আসুন! আসুন!

শ্রীনাথ আর তাদের মধ্যে বেড়ার বাধা; শ্রীনাথ বেড়া বরাবর এগিয়ে যেতে যেতে বলে, ঐ সামনের ঘর। আসুন।

বোবাই যাচ্ছিল, মেজদা একটু ঘাবড়ে গেছে। তটস্থ হয়ে পড়েছে। হবেই। কী

একখানা মেয়ে ! সঙ্গে নিয়ে বেরোলে বাজারে প্রেস্টিজ বেড়ে যায় ।

মণিদীপা মুখ ফিরিয়ে দীপনাথকে বলে, ঘরে নয় । আমি বাগানটা দেখব । দারুণ সুন্দর বাগান ।

শ্রীনাথ কথাটা শুনে মুখ ফিরিয়ে বলে, বাগান দেখবেন ? খুব খুশী হলাম । তা হলে ঐ সামনের ফটক ঠেলে চলে আসুন ।

বাস্তবিকই দেখার মতো বাগান করেছে শ্রীনাথ । সাজানো গোছানো নয় । বরং জংলা, এলোপাথাড়ি সব গাছপালা গজিয়ে উঠেছে । কিন্তু তার বিচিত্র রকমফের মানুষকে হতভম্ব করে দেয় । প্রাইজ জেতার মতো বড় বড় আকারের মরসুমী ফুল থেকে পঞ্জিকার বিজ্ঞাপনের ভাষায় রাস্কুসে ফুলকপি পর্যন্ত সবই ফলেছে । সবচেয়ে বড় কথা, বাগানের ভেতরে গিয়ে দাঁড়ালে নিবিড় গাছপালার আবডালে বাইরের পৃথিবী একদম আড়াল পড়ে যায় ।

আপনি বাগান করতে খুব ভালবাসেন, না ? মণিদীপা শ্রীনাথকে জিজ্ঞেস করে ।

শ্রীনাথ একটা চার-রঙা তারাফুল তুলে মণিদীপার হাতে দিয়ে বলে, আচার্য জগদীশ বোস গাছের প্রাণ আবিষ্কার করেছিলেন, জানেন তো ! আমি নতুন করে সেই প্রাণটার সন্ধান করছি ।

রোদচশমার ওপর দিয়ে মণিদীপার ভূতে একটু কুণ্ডন দেখা দেয় । সে বলে, অনেক বাঙালী একথাটা বলে বেড়ায় । কিন্তু আচার্য জগদীশ গাছের প্রাণ আবিষ্কার করেছিলেন, একথাটা মোটেই ঠিক নয় ।

শ্রীনাথ একটু যেন ভয় খেয়ে তাকায় । বলে, তা হলে ?

মণিদীপা এবার সুন্দর কবে হাসে । বলে, গাছের প্রাণের কথা লোকে তো বহু দিন ধরে জানে । জগদীশ বোস বোধ হয় গাছের সেনসিটিভিটি প্রমাণ করেছিলেন । ডিটেলস জানি না । তবে ওরকমই কিছু ।

শ্রীনাথ একটু নিভে গিয়ে বলে, তাই হবে ।

মণিদীপা খুব সমবেদনার সঙ্গে বলে, কিন্তু তাতে কিছু আসে যায় না । গাছের প্রাণ আপনিই আবিষ্কার করেছেন । এত বড় আর লাইভলি ফুল আমি আগে দেখিনি । প্রত্যেকটা গাছই এত হেলদি !

আপনি গাছ ভালবাসেন ?

কে না বাসে ?

শ্রীনাথের মুখ উদ্ভাসিত হয়ে যায় । সে বলে, আজকালকার ছেলেমেয়েরা বিচি দেখে গাছ চিনতে পারে না । লেখাপড়া শিখে তা হলে কি লাভ ?

ঠিকই তো !

বলতে বলতেই গাছপালা এবং বাগানের ওপর মণিদীপার কৌতূহল শেষ হয়ে যায় এবং দীপনাথ সেটা নির্ভুলভাবে বুঝতে পারে ।

দীপ বলে, চলুন, আমার বউদির সঙ্গে আলাপ করিয়ে দিই ।

মণিদীপার চোখ চারদিকটা গিলে খাচ্ছে । বলল, বাঃ, বেশ তো জায়গা । এরকম একটা জায়গায় থাকতে পারলে কলকাতার ফ্ল্যাট ছেড়ে দিতে আমি এশ্বিনী রাজী ।

ভাবন-ঘর থেকে ভিতরবাড়ি যাওয়ার পথেই খবর রটে গিয়েছিল । ছেলে-মেয়েরা ভিড় করে দাঁড়িয়ে আছে উঠানের ধারে । তৃষা এগিয়ে এসে মণিদীপার হাত ধরে বলল, আসুন । আপনার জন্যই বোধ হয় আমার একজন হারানো দেওরেরও খোঁজ পাওয়া গেল ।

বাকি সময়টুকু দীপনাথ আর মণিদীপার নাগালও পেল না। মেয়েমহলে গিয়ে ঘুরঘুর করা তার স্বভাব নয়। মণিদীপাকে এগিয়ে দিয়ে সে ফিরে এল ভাবন-ঘরে।

শ্রীনাথ হাত-মুখ ধুয়ে এসে বলল, কোথায় এসেছিলি ?

মিঠাপুকুর। তোমার আস্তানাটা যে এত কাছে কে জানত ?

শ্রীনাথকে গম্ভীর দেখাচ্ছিল। বলল, আমি ভাবলাম বুঝি সোমনাথ তোকে খবর দিয়ে আনিয়েছে।

না তো ! সোমনাথ আনাবে কেন ?

আজ বাবাকে নিয়ে ওরও এখানে আসার কথা।

দীপনাথ ভারী লজ্জিত হয়। বাবা যে সোমনাথের কাছে সেটা সে মাঝে মাঝে ভুলেই যায়। বাবাকে দেখেওনি বহুদিন।

সে বলল, বাবা আসছে কখন ?

কে জানে ?

দীপনাথ ঘড়ি দেখে বলে, বেলা বারোটা পর্যন্ত থাকতে পারি। তারপর লানচে যেতে হবে। এর মধ্যে যদি বাবা এসে যায় তবে দেখাটা হতে পারে।

এখানে দুপুরে খাবি না ?

উপায় নেই। একা হলে কথা ছিল। বসের বউ সঙ্গে রয়েছে।

মেয়েটা একটু ক্ষাপা নাকি ?

কেন ?

কেমন যেন অন্যরকম।

দীপনাথ হাসে, বলে, ক্ষাপা নয়। আজকালকার মেয়েরা এরকমই। সজলকে ডাকো তো। বহুকাল ওকে দেখি না।

শ্রীনাথ বারান্দায় বেরিয়ে ক্ষাপা নিতাইকে ডেকে সজলকে পাঠিয়ে দিতে বলে।

॥ সতেরো ॥

সজল এসে প্রণাম করে হাসিমুখে দাঁড়াতেই মনটা স্নিগ্ধ হয়ে গেল দীপনাথের। সজলের মুখানা ভারী মিষ্টি হয়েছে। দুখানা বুদ্ধিদীপ্ত বড় বড় চোখ, জড়তাহীন ভাবভঙ্গী। ফুহারাখানাও বেশ লম্বা এবং কাঠামোটাও মজবুত।

আমাকে চিনতে পারিস, সজল !

হঁ-উ। বড় কাকা।

এখানে আসব বলে ঠিক ছিল না। তাই তোর জন্য কিছু আনতে পারিনি। বলে মানিবাগটা হিপ পকেট থেকে বের করে কুড়িটা টাকা সজলের হাতে দেয় দীপনাথ। বলে, জামাটামা কিছু একটা কিনে নিস।

শ্রীনাথ ধমক দিয়ে বলে, কেন, কোন পালপার্বণ পড়েছে এখন ! কিছু দিতে হবে না।

সজলও হাত গুটিয়ে নিয়ে বলে, না না, আমার এখন জামাব দরকার নেই, কাকু। তুমি টাকা রাখো।

দীপনাথ শ্রীনাথকে ধমক দিয়ে বলে, তুমি থামো তো। সজল কি আমার কুটুম নাকি ? বলে সজলের দিকে বড় বড় চোখে চেয়ে বলে, কাকার সঙ্গে ভদ্রতা হচ্ছে ? এক চড় খাবি। নে !

সজল টাকটা নেয়। খুব লজ্জার সঙ্গে হাসে।

দীপনাথ মানিবাগ পকেটে পুরতে পুরতে বলে, আজেবাজে ব্যাপারে খরচ করিস না। জামা কিনে নিস। লেখাপড়ায় কেমন হয়েছিস? ক্লাসে ফার্স্ট হোস নাকি?

শ্রীনাথ বলে ওঠে, আরে না না। কোনো রকমে পাসটাস করে যায় আর কি। লেখাপড়ায় মনই নেই। অতি বীদর।

দীপনাথের নিকট-আত্মীয় বলতে এরাই। বড়দা মল্লিনাথ বিয়েই করেনি। তবে দীপনাথ একবার এক গোপনসূত্রে খবর পেয়েছিল বৈধ সন্তান না থাকলেও নাকি এই রতনপুরেই মল্লিনাথের একজন বাঁধা মেয়েমানুষ ছিল এবং তার গর্ভে মল্লিনাথের এক অবৈধ সন্তানের জন্ম হয়। মল্লিনাথকে বাদ দিলে আর থাকে সে নিজে আর সোমনাথ। সোমনাথের এখনো ছেলেপুলে হয়নি। এখনো পর্যন্ত শ্রীনাথই যা বংশরক্ষা করছে।

বংশরক্ষা কথাটা এ যুগে প্রায় তামাদি হয়ে গেছে। তবু দীপনাথ এই কথাটার মধ্যে এক গভীর মায়া ও তীব্র আকাঙ্ক্ষা বোধ করে।

সে উঠে পড়ে বলল, চল, তাদের বাড়িটা ঘুরে দেখি।

সজল খুব বাজী। বলল, চল।

কাকাকে সজলের খুব পছন্দ হয়ে গেছে। সে শুনেছে এই কাকা নাকি খুব উদাস ধরনের। সংসারে মন নেই। আত্মীয়দের সঙ্গে তেমন সম্পর্কও নেই। ছোটো কাকার মতো এই কাকা কোনোদিন জোঠুর সম্পত্তি দাবি করতে আসেনি।

সজল মুখ তুলে সকালের রোদে দীপনাথের মুখখানা ভাল করে দেখল। উদাস একরকম চোখ। একটু যেন ছটফটে ভঙ্গী। মুখখানা লম্বা ধরনের এবং খুবই সুশ্রী। সব মিলিয়ে কাকাটিকে তার ভীষণ পছন্দ হয়ে যায়।

ক্ষাপা নিতাইয়ের ঝোপড়াটা দেখিয়ে দীপনাথ বলে, ওটা কি রে?

নিতাই ক্ষাপার ঘর।

কোন নিতাই? সেই যে তান্ত্রিক?

সজল অবাক হয়ে বলে, তুমি চেনো?

চিনব না কেন? বহুকাল আগে বড়দাব ফাইফরমাশ খাটত। তখন দেখেছি। তখন অবশ্য তান্ত্রিক হয়নি। এখন কী করে?

ওং, সে অনেক কিছু করে। বাণ মারে।

সর্বনাশ! কাকে বাণ মারে?

হি হি করে হাসে সজল, বলে, সবাইকেই মারে। যার ওপর যখন ক্ষেপে যায়। একদিন সরিৎ মামাকেও বাণ মেরেছিল।

সরিৎ! কোন সরিৎ? বউদির এক ভাই ছিল সরিৎ, সেই নাকি?

ই, সরিৎমামা এখন আমাদের এখানে থাকে।

ওকে বাণ মারল কেন?

সরিৎমামা ওকে মেরেছিল যে! মার নামে কি যেন সব বলেছিল, তাই মেরেছিল।

বউদির নামে? হুঁ কুঁচকে বিরক্তির ভাব প্রকাশ করে দীপনাথ বলে, তবে বউদি ওকে এখানে রেখেছে কেন? তাড়িয়ে দিলেই তো হয়।

সজল মাথা নেড়ে বলে, মা ওকে তাড়াবে না।

কেন?

নিতাইদাকে মা খুব ভয় পায়।

পুকুরধারে বিষ্ময়ে প্রায় থেমে যায় দীপনাথ । বলল, বউদি ওকে ভয় পায়, বলিস কি রে ? ওকে ভয় পাবে কেন ?

বাণ মারে যে !

কথাটা দীপনাথ হেসেই উড়িয়ে দেয় । ভূষা বউদি স্কাপা নিতাইয়ের বাণকে ভয় খাওয়ার মেয়ে নয় ।

পুকুরের গভীর ছায়াচ্ছন্ন জলের দিকে চেয়ে ছিল দীপনাথ । চারদিকে গাছপালার নিবিড়তা । এত সুন্দর ছায়া আর গভীর জল যেন বহুকাল দেখিনি দীপনাথ । কী নির্জনতা এখানে । বলল, এ পুকুরে বউদা অনেক মাছ ছেড়েছিল ।

এখনো অনেক মাছ । সজল আগ্রহের সঙ্গে জবাব দেয় ।

মাছগুলো তোরা কি করিস ?

মাঝে মাঝে ধরা হয় । ধরবে কাকা ? আমার ছইল আছে ।

না রে, আজ সময় নেই ।

তবে কবে আসবে বলো, সেদিন দুজনে মিলে ধরব ।

আসব'খন একদিন ।

তুমি রবিবারে রবিবারে আসতে পারো না ?

ভারী স্নেহের হাতে সজলের মাথার এক টোকা চুল একটু নেড়ে দেয় দীপনাথ । বলে, তোর বুঝি খুব মাছ ধরার শখ ?

খুব । তবে মাছ খাই না ।

তা হলে ধরিস কেন ?

ভাল লাগে । ভূমি কখনো মুগীর গলা কেটেছো কাকু ?

দীপনাথ ভূ কঁচকোয় আবার । বলে, না তো ! কেন রে ?

মুগী কাটতে খুব ভাল লাগে, না ?

দীপনাথ একটু দৃষ্টিস্তার দৃষ্টিতে ভাইপোর দিকে তাকায় । মুগী কাটার মধ্যে ভাল লাগার কী আছে বুঝতে না পেরে মাথা নেড়ে বলে, আমার ভাল লাগে না । অবোলা জীবকে কাটতে ভাল লাগবে কেন ? তুই কাটিস নাকি ?

লুকিয়ে কেটেছিলাম । মা টের পেয়ে তিন দিন ঘরে বন্ধ করে রেখেছিল ।

কাটতেই বা গেলি কেন ?

নিতাই কাটে, সবির মা মা কাটে, লক্ষ্মণ কাটে, তবে আমি কাটলে কী দোষ ?

ইতস্তত করে দীপনাথ বলে, দোষ নেই । তবে তোর বয়সে সবাই তো রক্ত দেখলে ভয় পায় ।

আমিও পেতাম । এখন পাই না । জানো কাকু, বাবার কাছে একটা দারুণ জার্মান স্কুর আছে । সেইটে দিয়ে কাটতে যা ভাল না !

সর্বনাশ ! স্কুরে হাত দিস নাকি ? ভীষণ ধার যে, কখন হাতফাত কেটেকুটে ফেলবি ।

কাটবে কেন ? বাবা তো নিজেই স্কুরটা আমাকে দিতে চেয়েছিল । মা দিতে দিল না । তাই নিয়ে দুজনের কী ঝগড়া ! জানো, মা আব বাবার মধ্যে খুব ঝগড়া । কেউ কারো সঙ্গে কথা বলে না ।

দীপনাথ একটু মুশকিলে পড়ে যায় । কারো হাঁড়ির খবরে তার তেমন আগ্রহ নেই । তার ওপর এই বাচ্চা ভাইপোটোর মুখ থেকে পাকা পাকা কথা শুনতে তার ভাল লাগে না । কিন্তু এ বাড়ির আবহাওয়া যে খুব পরিশ্রুত নয় তা সে জানে । যদি এদের জন্য কিছু করা যেত !

দীপ বলল, ঝগড়া নয়। মা-বাবার মধ্যে ওরকম একটু-আধটু হয়েই থাকে।
সজল মাথা নেড়ে বলে, আমার বন্ধুদের মা-বাবার মধ্যে ওরকম হয় না তো।
কী নিয়ে তোর মা-বাবার এত ঝগড়া?

মুখে মুখে ঝগড়া হয় না। কিন্তু দুজনের সম্পর্ক ভাল না। সবাই জানে। বাবা তো এ
বাড়ি ছেড়ে চলে যাবে।

তোকে কে বলল?

আমরা জানি। বদ্রীকাকু আছে না, ঐ যে লাইনের ওধারে থাকে, সে-ই বলেছে।
বদ্রীটা আবার কে? যা হোক, হবে কেউ। ভাবে দীপ।

সজল বলে, মা একদিন বদ্রীকাকুকে ডাকিয়ে এনে খুব ধমকাল। বদ্রীকাকু নাকি বাবার
জন্য চারদিকে জমি খুঁজছিল। জমি পেলেই বাবা চলে যাবে।

ও।

মা অবশ্য বদ্রীকাকুকে এমন ভয় দেখিয়েছে যে আর এদিকে আসে না। ছোটোকাকুর
মতোই অবস্থা।

কেন, ছোটোকাকুর আবার কী হয়েছিল?

বাঃ, ছোটোকাকুকে দুটো লোক মিলে মারল না? এখনো কেস চলছে তাই নিয়ে।

সে জানি। তার সঙ্গে তোর মায়ের সম্পর্ক কি?

সেই লোক দুটোকে যে আমি চিনি!

তারা কারা? কী নাম?

বললে মা আমাকে মেরে ফেলবে।

বিরক্তি চেপে দীপ বলে, তাহলে বলিস না।

সজল একটু দ্বিধায় পড়ে। আসলে এই বড়কাকুকে তার ভীষণ ভাল লেগে গেছে।
একে সে সব কথা বলতে চায়। সে তাই চুপি চুপি বলল, এর পবের বার যখন ভূমি আসবে
তখন চিনিয়ে দেবো। ঐ ইটখোলাব দিকে থাকে।

দীপ একটা দীর্ঘশ্বাস ফেলে বলে, চিনেই বা কি করব? তুই বরং ওসব কাউকে বলিস
না। সেই লোক দুটো কি তোর মায়ের লোক?

না তো কি? মদনজ্যোতীর লোক। মদনজ্যোতীকে বলে মা ওদেব কাজে লাগিয়েছিল।

পুকুর পাড় ছেড়ে সবজিবাগানের ধার ঘেষে একটা কুলগাছের ছায়ায় এসে পড়েছিল
দুজন। সবজিবাগানে মুনীষ খাটছে। ভারী সুন্দর ফুলকপি বাঁধাকপি হয়ে আছে। এক ফালি
জমি ঘন সবুজ ধনেপাতায় ছাওয়া। কাঁঠালের ডালে মস্ত মৌচাকে গুন গুন শব্দ।

কিন্তু এই সুন্দর দৃশ্যের ওপর যেন এক বিষণ্ণতার পর্দা ঠেলে দিয়েছে কে। দীপ
আধখানা চোখে দেখছে। মন অন্যত্র।

সে জিঙ্গেস করল, তুই খেলাধুলো করিস না?

খুব করি।

কি খেলিস?

ক্রিকেট, ব্যাডমিন্টন, সিজনের সময় ফুটবল।

আবার যখন আসব তখন তোর জন্য কি নিয়ে আসব বল তো?

একটা এয়ারগান আনবে? যা দিয়ে পাখি মারা যায়?

পাখি মারবি কেন? টারগেট প্র্যাকটিস করবি!

সরিংমামা বলেছে আর কিছুদিন পরেই আমাকে আসল বন্দুক চালাতে শিখিয়ে দেবে।

আসল বন্দুক পাবি কোথায় ?
 জ্যেষ্ঠের বন্দুক থানায় জমা আছে না ? মা সেইটে আনাচ্ছে ।
 বন্দুক দিয়ে তোর মা কি করবে ?
 আমাদের নাকি অনেক শত্রু !
 দীপনাথ হেসে ফেলে । বলে, তাই নাকি ?
 সজল হাসে না, গম্ভীর মুখ কবে বলে, এ জায়গায় কেউ আমাদের দু চোখে দেখতে পারে না । বিশেষ করে মাকে ।
 কেন ?
 সবাই বলে, মা নাকি ভাল নয় ।
 দীপ গম্ভীর হয়ে বলে, ছিঃ সজল, ওসব কখনো মনে ভাববে না । বলবেও না কাউকে ।
 তোমাব মাকে আমি বহুকাল চিনি । ঊনি খুব ভাল ।
 আমি তো খাবাপ বলিনি । লোকে বলে ।
 লোকে যা খুশি বলুক, কান দিও না ।
 তুমি এখানে এসে থাকবে, কাকু ? থাকো না, খুব মজা হবে তা হলে । এখানে একটাও ভাল লোক নেই ।
 আমি যে ভাল তা তোকে কে বলল ?
 আমি জানি । মাও বলে ।
 মা কি বলে ?
 বলে ভাইয়েদের মধ্যে সবচেয়ে ভাল হল বড় ঠাকুরপো । সাথে পাঁচে থাকে না, নিজের মনে আছে ।
 বলে বুঝি ?
 তুমি থাকলে এখানকার লোকেরা আমাদের পিছনে লাগবে না ।
 এখন লাগে বুঝি ?
 ভীষণ । ইঙ্কলেও আলোচনা হয় । সবাই বলে আমবা নাকি জ্যেষ্ঠকে ঠকিয়ে সব সম্পত্তি নিয়ে নিয়েছি । এমনও বলে, মা নাকি জ্যেষ্ঠকে বিষ খাইয়ে মেরেছে ।
 যাঃ । বলতে বলতে তারা একটা ডাঙা জমিতে উঠল ।
 সামনেই মেহেদীর বেড়া । তারপর উঠোন । অন্তঃপুর ।
 আগড় ঠেলে উঠোনে পা দেওয়ার আগে সজল মুখ ফিরিয়ে বলল, আজ দাদুর আসার কথা, জানো ?
 জানি ।
 দাদু এলে খুব মজা হবে । আমি দাদুকে যা ক্ষ্যাপাই না !
 ক্ষ্যাপাবি কেন ? দাদু বুঝি বন্ধু ?
 তা নয় । ভাল লাগে । দাদু যে একটুতেই রেগে যায় ।
 রাগলেই বুঝি রাগাতে হবে ?
 কথা কইতে কইতে তারা উঠোনে ঢোকে ।
 মঞ্জু ছুটে এসে দীপনাথের হাত ধরে বলে, উঃ কাকু, ভদ্রমহিলা যা স্মার্ট না !
 দীপ একটু হাসে । বলে, তা তো বুঝতেই পারছি । ভদ্রমহিলাকে পেয়ে কাকাকে একদম ভুলে গেছি । একবার কাছের গেলি না ।
 বড় বড় চোখে চেয়ে মঞ্জু বলে, আহা, তুমি তো আসবেই । উনি তো আর আসবেন না ।

এত সুন্দর কথা বলেন না, কী বলব !

খুব ভাব হয়ে গেছে তোদের ?

ভীষণ । আর একটু থাকবে, কাকু ?

উপায় নেই রে । লানচে ফিবে যেতে হবে ।

আর কতক্ষণ ?

দীপ ষড়ি দেখে বলে, বড় জোর ঘন্টাখানেক ।

উনি কিন্তু যেতে চাইছেন না ।

সে কি ?

হ্যাঁ গো । বার বার বলছেন, তোমাদের বাড়িটা আমার খুব ভাল লেগে গেছে । ইচ্ছে হচ্ছে সারা দিনটা এখানেই কাটিয়ে যাই । থাকবে কাকু সারাদিন ?

তাই হয় নাকি ? চারদিকে খোঁজ পড়ে যাবে । শোন, গাড়ির ড্রাইভারটা বসে আছে, ওকে একটু চা-টা পাঠিয়ে দিস তো ।

ওঃ, সে কখন দিয়ে এসেছে মংলু ! চা, পরোটা, ডিমভাজা । তোমাদের জন্য মা তাভাতাডি কিমাকারি তৈরি করছে ।

ওবে বাবা, এখন ওসব খেলে লানচ খাবো কোন পেটে ?

পারবে । এসো না আমাদের ঘরে । মণিদি কিরকম গল্প করছে দেখে যাও ।

দীপনাথ হাত ছাড়িয়ে নিয়ে বলে, দূর পাগলী । মেয়েমহলে পুরুষদের যেতে নেই । তুই বরং ঠুকে গিয়ে বল, হাতেব ঘড়িটার দিকে যেন একটু নজর রাখে ।

দাদুর সঙ্গে দেখা করে যাবে না ? আজ ছোটকাকু দাদুকে নিয়ে আসবে যে !

আজ যদি দেখা না হয় তবে অন্য দিন আসব ।

সজল গেল না । মঞ্জু দৌড়ে চলে গেল মণিদিপার গল্প শুনতে । দীপ আনমনে চিন্তা করে, মণিদিপা ওদেরও কমিউনিজম বোঝাচ্ছে না তো !

রান্নাঘরের দরজায় গিয়ে দীপনাথ ডাকল, বউদি !

তুষা দারুণ সুন্দর গল্প ছড়িয়ে কিমা রান্না করছিল । দুটো বিশাল চোখে ফিরে তাকিয়ে মৃদু হেসে বলল, অন্যের বউ নিয়ে টানটানি না করে নিজে একটা বউ জুটিয়ে নিলেই তো হয় ।

ভীষণ বিব্রত বোধ করে লাল হয়ে গেল দীপনাথ । বলল, যাঃ, কী যে বলো ?

অন্যের বউটি অবশ্য সাম্প্রতিক স্মার্ট । সুন্দরীও ।

তাতেই বা আমার কি ?

তুষা রান্নার ভার বন্দার হাতে ছেড়ে বেরিয়ে আসে । বলে, এসো, আমার ঘরে বসবে ।

দীপনাথ তুষার পিছু পিছু এসে যে ঘরটায় ঢোকে সেটাতেই এক সময় বড়দা মল্লিনাথ থাকত । চমৎকার পাকা ঘর । আবলুস কাঠের দেয়াল-আলমারি, বন্দুকের স্ট্যাণ্ড থেকে এইচ এম ভি-র বাস্ক্র গ্রামোফোনটি পর্যন্ত এখনো সযত্নে সাজানো । বিশাল একখানা চিত্র-বিচিত্র খাট । এক পাশে টেবিল । হল্যাণ্ডের ফিলিপস রেডিও ।

দীপনাথ বহুকাল বাদে এই ঘরে এল । তুষা বলল, অবশ্য রঙটা আমার মতোই ।

কার রঙ ? দীপ অবাক হয়ে জিজ্ঞেস করে ।

মণিদিপার । তোমার বন্ধুর বউ নাকি ?

বন্ধু নয় । বস্ । ওপরওয়ালা ।

বস্ মানে জানি মশাই, বাংলা করে বলতে হবে না ।

দীপ হাসে। বলে, আমি আনি। উনিই আসতে চাইলেন।
আজকালকার মেয়েদের কোনো জড়তা নেই। লজ্জা-টজ্জাও কম। আমরা হলে পাঁচটা কথা উঠে পড়ত।

কথা ওঠার ব্যাপার নয় বউদি। দিনের বেলায় সামান্য আউটিং। দোষের কিছু দেখলে নাকি ?

তুষা মাথা নেড়ে বলে, দোষের কি দেখব আবার, তবে একটা জিনিস দেখে একটু মজা পেয়েছি।

কি সেটা ?

মেয়েটা দু-পাঁচ মিনিট পর পরই তোমার খোঁজ করছে। উনি কোথায় গেলেন ? দূরে যাননি তো ? উনি যদি চা খান তা হলে আমিও খাবো।

দীপনাথ আবার লাল হয়। বুকের মধ্যে এমন একটা সিরসিরানি ওঠে যে গাঁয়ে কাঁটা দিতে থাকে।

॥ আঠারো ॥

তুষা দীপনাথকে বসিয়ে রেখে খাওয়া-দাওয়ার ব্যবস্থাই করতে গেল বোধ হয়।
মল্লিনাথের এই ঘরখানায় বসে হারানো বহু স্মৃতিই মনে পড়ার কথা। আশ্চর্য, দীপনাথ একবারও মল্লিনাথের কথা ভাবল না। তার শরীর বার বাব কাঁটা দিল এক শিহরনে।
মণিদীপা তাব খোঁজ করছে !

সত্য বটে দীপনাথের ভিতবে এক সময়ে ইস্পাত ছিল। তাদের সব ভাইবোনের মধ্যেই কিছুটা করে আছে। একমাত্র ব্যতিক্রম হতে পারে মেজদা শ্রীনাথ। কিন্তু দীপনাথের সেই ইস্পাতই বা কোথায় গেল ?

ভিতর থেকে দীর্ঘশ্বাস ফেলে অন্য এক দীপনাথ বলল, জং ধরে গেছে হে !

দীপনাথ বলল, অত সস্তা নয়। আমি সহজে হার মানি না।

হার মেনেছো কে বলল ? বরং তথ্য বিশ্লেষণ করে একটু ঘুরিয়ে বলা যায়, তুমি জয় করেছো। হার মেনেছে অন্য পক্ষ।

ইয়ার্কি নয়। আমি কারো প্রেমে পড়িনি।

তাও বলা হচ্ছে না। ঘুরিয়ে বলতে গেলে অন্য পক্ষই পড়েছে। তাতে তো তোমার দোষ ধরা যায় না।

অন্য পক্ষের দায়-দায়িত্ব তো আমি নিতে পারি না। কে কবে কার প্রেমে পড়বে আর দোষটা আমার ঘাড়ে চাপাবে—

ধীরে বন্ধু, ধীরে। একটু ঠাণ্ডা মাথায় ভাবো। মণিদীপার বয়স কত বলো তো ?

কে জানে ? কুড়ি থেকে পঁচিশের মধ্যে হবে বোধ হয়।

তাই এ বয়সে আজকালকার মেয়েদের খুকীই বলা যায়।

যত খুকী ভাবছো তত নয়।

তবু বলাছি ততটা পাকেনি এখনো। মনটা কাঁচা আছে। জাম্বুবান স্বামীটার জন্য একটা আনহাপী লাইফ লীড করতে হচ্ছে বলে রাগে আক্রোশে প্রতিহিংসায় মাথাটাও ঠিক নেই কি না।

মিস্টার, বোসকে দোষ দিয়ে লাভ নেই। এই মহিলাও যে সাজঘাতিক বিপ্লবী।

স্বামী সিমপ্যাথিটিক হলে বিপ্লবটা এমন চাগিয়ে উঠত না মাথার মধ্যে । যাকগে যা বলছিলাম, মিসেস বোসের কাঁচা মাথাটা খাওয়া এমন কিছু কঠিন কাজ ছিল না । তুমি ছাড়া অন্য কেউ হলেও খেতে পারত ।

এই কথায় দীপের একটু অভিমান হল । বলল, তা হতে পারে । তবে মাথাটা আমার খাওয়ার ইচ্ছে নেই ।

একেবারেই নেই কি ?

মোটাই নেই ।

তা হলে বাপু তুমি মুক্ত পুরুষ । অত লজ্জা-সরম পাচ্ছে কেন ?

আমি মুক্ত পুরুষই ।

তবু বলছি, ভিতরকার মরচে-পড়া ইম্পাতে একটু শান দাও । শক্ত হও । নইলে আমও যাবে, ছালাও যাবে । চাকরিও নট, মণিদীপাও নট ।

যায় যাক । পরোয়া করি না ।

চাকরির পরোয়া করো না করো, মণিদীপাব পরোয়া একটু-আধটু করছ, উর্নিও করছেন । বউদির চোখে ধবাও পড়ে গেছে । এখন বেশ সাবধানে পা ফেলো ।

আমার কোনো দুর্বলতা নেই । এই মুহূর্তে সব দুর্বলতা ঝেড়ে ফেলে দিলাম ।

বলে দীপনাথ খুব বুক চিতিয়ে উঠে দাঁড়াল । আর সেই মুহূর্তেই মল্লিনাথের বার্মা সেগুনের বিশাল আলমারির গায়ে লাগানো খাঁটি বেলজিয়াম আয়নায় তার আপাদমস্তক প্রতিবিম্ব সামনে দাঁড়াল ।

ব্যায়াম-টায়াম করে এবং দৌড়ঝাঁপের মধ্যে থেকে থেকে তার চেহারাটা হয়েছে গুণ্ডা শ্রেণীর । খুবই শক্তপোক্ত । লম্বাটে আখান্না । মুখশ্রীতে কিছু রুক্ষতা সত্ত্বেও বংশগত লাবণ্য কিছু রয়ে গেছে । চেহারাটা মনোযোগ দিয়ে দেখছিল সে । বেশ খানিকক্ষণ ঝুটিয়ে দেখে মন থেকে এক বিচারপতি রায় দিল, এই চেহারার পুরুষ মানুষের প্রেমে পড়তে কোনো মেয়েবই বাধা নেই ।

ভালই গো ভালই । অত দেখতে হয় না নিজেকে ! বলে তৃষা পিছন দিকে একটা টুলের ওপর খাবারের রেকাবি রাখল ।

খুবই চমকে গিয়েছিল দীপনাথ । হেসে ফেলে বলল, চেহারা নয় । আয়নাটা দেখছিলাম । খাঁটি বেলজিয়াম গ্লাস ।

তৃষা একটু গম্ভীর হয়ে বলল, হ্যাঁ, আজকাল আর এসব জিনিস পাওয়া যায় না ।

দীপনাথ আবার একটু অস্বস্তিতে পড়ে : জিনিসটা বড়দার । বউদি আবার ভাবল না তো, ঘুরিয়ে ফিরিয়ে এসব জিনিসের ওপর দাবিদাওয়া রাখছি ?

সে তাড়াতাড়ি বলল, অত সব কী এনেছো ? লানচ্ আছে যে !

তৃষা বড় বড় চোখে চেয়ে বলে, এসে থেকেই তো বাপু কেবল শুনছি লানচ্ আর লানচ্ । ওসব সাহেবী কেতাব লানচ্ কি রকম হয় তা একটু-আধটু জানি বাপু । ওখান তুমি কম খেলে না বেশী খেলে, ফেললে না রাখলে তা কেউ খেয়ালও করবে না । এসব আমাকে শিখিও না ।

কথাটা ঠিক । দীপনাথ যদি বুফে লানচে একটা পদ নিয়ে কিছুক্ষণ নাড়াচাড়া করে তা হলেও কেউ লক্ষ করবে না । তা ছাড়া লানচের আগেই সকলে নিরাপদ রকমের মাতাল হয়ে যাবে বলেই মনে হচ্ছে । তাই সে প্লেটের সামনে বসে বলল, তা বটে । খেয়াল ছিল না ।

তুষা মুখ টিপে হেসে বলে, ভেবো না, উনিও পেট ভরে খেয়েছেন। লানচু নিয়ে মণিদীপার একটুও মাথাব্যথা নেই। এমন কি যেতে চাইছেন না।

সর্বনাশ! না গেলে পরব্রী হরণের দায়ে পড়ে যাবো, বউদি।

পড়ে যাবে কেন ভাই? পড়ে অলরেডি গেছ।

তার মানে?

ভাল চাও তো এদের কনসার্নে চাকরি আর কোরো না।

দীপনাথ আবার লাল হয়ে একটা লুচি ছিঁড়ে দুই টুকরো করে বলে, তুমি না একদম বাজে!

তুষা একটু গভীর হয়ে বলে, তুমিই বা কেন এরকম কিঙ্কত? দেশে কুমারী মেয়ের তো অভাব নেই, তবে এই কচি বউটার মাথা খেয়ে বসে আছে কেন?

দীপনাথ এবার স্পষ্টতই একটু বিরক্ত হয়। তেতো গলায় বলে, এ যুগটা তোমাদের যুগের মতো নয় বউদি। এখনকার মেয়েরা অত সহজে প্রেমে পড়ে না। মণিদীপার তুমি কি বেহেড অবস্থা দেখলে?

তুষা হেসে ফেলে বলে, ঠাট্টা বোঝো না, তুমি কেমন হয়ে গেছ বলো তো!

ঠাট্টা! হতেও তো পারে। দীপনাথ আবার লাল হয়, বলে, বসের বউ নিয়ে ইয়ার্কি নয়। কানে গেলে সর্বনাশ।

তুষা নীবরে একটু হাসে। বলে, প্রেমে পড়েছে এমন কথা কিন্তু একবারও বলিনি। বরং বলছিলাম, বসের বউকে ভাল জুপিয়ে নিয়েছো। টক করে প্রোমোশন পেয়ে যাবে।

জুপিয়েছি তাই বা বলছ কি করে?

ওসব বোঝা যায়।

তবে তুমিই বোঝগে যাও।

রাগ কবলে নাকি গো! বলে তুষা আবার গা জ্বালানো হাসি হাসে। বস্তুত একমাত্র এই দেওরটির কাছেই সে ববাবর একটু তরল। স্বশুরবাড়ি বা বাপের বাড়ির আব কারো সঙ্গে তাব কোনো ঠাট্টা বা ইয়ার্কির সম্পর্ক নেই। দীপনাথকে ববাবরই তার ভাল লাগে। এই এক সংসার-উদাসী মানুষ। বড় ভাল মানুষ। কখনো কাউকে আঘাত দিয়ে কথা বলে না, কারো কাছে কোনো প্রত্যাশাও নেই তার। বিয়ের পর হয়তো বদলে যাবে। বেশীর ভাগ ভাল পুরুষই বিয়ের পর সেয়ানা হয়। দীপনাথ যতদিন বিয়ে না করছে ততদিন তুষার তাকে বোধ হয় এরকমই ভাল লাগবে।

দীপনাথ বলল, না, বাগ করব কেন? অনুবাদের কথাই তো বলছ। তবে তুমি ববাবরই ফাজিল।

তুষা স্নিগ্ধ চোখে চেয়ে বলে, আমি যে ফাজিল সে শুধু দুনিয়ায় একমাত্র তুমিই বললে! আর কেউ কিন্তু বলে না।

আর সবাই কী বলে তোমাকে? খেতে খেতে চোখ তুলে দীপনাথ ভ্রু নাচিয়ে জিজ্ঞেস করে।

সে অনেক কথা। সোমবাবু তো নাকি বলে, আমি দেবী চৌধুরানী হওয়ার চেষ্টা করছি। এখনকার লোকেও বলে, আমি মেয়ে গুণ্ডা, নারী ডাকাত।

বলে নাকি?

শুনি তো।

ঠিকই বলে। দীপনাথ গভীর মুখে বলল।

তুষা মৃদু হাসল। বলল, কেন, তোমারও কি তাই মনে হয় ?

ডাকাত না হলে ভিলেজ পলিটিকসের সঙ্গে লড়াই করে টিকে থাকতে পারতে না, বউদি। ডাকাত তো তুমি বটেই।

তোমার মেজদাও আমাকে খুব ভাল চোখে দেখেন না। গুঁর ধারণা আমি ইচ্ছে করে এখানকার লোকদের সঙ্গে পায়ে পা বাধিয়ে ঝগড়া করছি।

করছো নাকি ? সর্বনাশ ! লোক্যাল লোকদের খুব সমীহ করে চলবে। এরা গ্রাম্য হোক, অশিক্ষিত হোক, ক্ষেপলে কিন্তু নাজেহাল করে ছাড়বে।

কঠিন হয়ে গেল তুষাব মুখ। ঠাট্টা ইয়ার্কিও ভাবটা একদম রইল না আর। বলল, সহজে আপস করি না। করবোও না।

দীপনাথ চোখ তুলে বউদির মুখটা একবার দেখে নিয়ে বলল, মামলা-মোকদ্দমা চলছে নাকি ?

চলছে।

আচমকই দীপনাথের মুখ দিয়ে কথাটা বেরিয়ে গেল, সোমনাথকে কারা মেরেছিল জানো ?

তুষা এক ঝলক তাকিয়ে বলল, না। জানলে চুপ করে থাকতাম নাকি ?

তা বলিনি। এইটুকু ছোটো একটা জায়গায় ক্রিমিন্যাল ধরতে পুলিশের এত দেবী হচ্ছে কেন সেইটেই বুঝতে পারছি না।

সে পুলিশ জানে।

সে তো ঠিকই। দীপনাথ আবার মাথা নীচু করে। তারপর একটু ধীর গলায় বলে, সজলকে কি এখানেই বরাবর রাখবে ?

তুষা অবাক হয়ে বলে, কেন বলো তো ! এখানে রাখব নাই বা কেন ?

দীপনাথ বিজ্ঞের মতো বলে, এই পরিবেশটা হয়তো তেমন ভাল নয়, বউদি।

তা তো নয়ই।

তাহলে সজলকে কোনো ভাল স্কুলে দিয়ে দাও। হোস্টেল বা বোর্ডিং-এ রাখো।

তুষা বোকা নয়। সে স্থির দৃষ্টিতে দীপনাথের দিকে চেয়ে ছিল। বলল, সজলের সঙ্গে তোমার কথা হল বুঝি ?

ই।

কি বুঝলে ?

বুঝলাম সজল এখানে খুব হ্যাপী নয়। ওকে বাইরে পাঠানোই ভাল।

হ্যাপী নয় কেন ? কিছু বলল ?

অনেক কিছু বলল। সেগুলো কিছু খারাপ কথাও নয়। তবে বুঝতে পারলাম ওর একটা আবেগমূলক সাইকোলজি গ্রো করছে।

তুষা একটা দীর্ঘশ্বাস ছেড়ে বলে, সেটা আমিও মাঝে মাঝে টের পাই, আগে আমাকে যমের মতো ভয় পেত। আজকাল কেমন যেন ভয়ডর কমে যাচ্ছে।

বাইরে পাঠিয়ে দাও। ঠিক হয়ে যাবে।

দেখবো।

যদি বলো তো আমিও ভাল বোর্ডিং স্কুল দেখতে পারি।

তুষা খুবই অনামনস্ক ছিল। জবাব দিল না।

রওনা হওয়ার আগে পর্যন্ত সোমনাথ বাবাকে নিয়ে এল না। একটা বেজে গেল। রওনা

না হলেও নয় ।

বিদায়ের সময় বড় ফটকের কাছে বাড়ির সবাই জড়ো হল । সমস্বরে বলল, আবার আসবেন ।

খুব অকপটে মণিদীপা ঘাড় হেলিয়ে বলল, আসবই । ঠিক আসব । আমার এরকম একটা স্পট দেখার খুব ইচ্ছে ছিল ।

গাড়ি চলতে শুরু করার বেশ খানিকক্ষণ পর দীপনাথ সাবধানে বলল, একটু দেরী করে ফেললাম আমরা ! মিস্টার বোস ভাবছেন ।

একটু ভাবুক না ! রোজ তো ভাবে না, আজ ভাবুক ।

আপনার যা মানায়, আমাকে তো তা মানায় না । দোষটা বোধ হয় আমার ঘাড়ে এসে পড়বে ।

কেন ? আপনার দোষ কিসের ? আমিই তো আসতে চেয়েছিলাম ।

দীপনাথ একটু শ্বাস ফেলল । সব কথা মণিদীপা বুঝবে না । বোঝানো যাবেও না ।

মণিদীপা আবার তার স্বভাবসিদ্ধ স্নেহের হাসি হেসে বলে, ইউ আর এ স্নেভ । বন্ডেড লেবারার । বোসের মতো একজন কাকতাল্যাক্রান্তেও ভয় পান ।

আমিই যে সেই কাক ।

মণিদীপা সামান্য ঠোঁট ঝিকিয়ে বলে, কথটা মিথ্যে নয় । একটা কথা মনে রাখবেন, দীপনাথবাবু, আমি সম্পূর্ণ স্বাধীন । কারো কাছে দাসত্ব লিখে দিইনি, দেবোও না । আমি কোথায় যাবো না যাবো সেটা আমিই ঠিক করতে ভালবাসি এবং তার জন্য কোনো জবাবদিহি করতে ভালবাসি না ।

মণিদীপা যে মোটেই তার প্রতি দুর্বল হয়ে পড়েনি সেটা হঠাৎ চোখের দৃষ্টির খর বিদ্যুৎ এবং স্বরের কঠিন শীতলতায় হাড়ে হাড়ে টের পেল দীপনাথ । তার ভিতরে যে প্রত্যাশা, লোভ ও তরল একরকমের আবেগ তৈরি হয়েছিল তা চোখের পলকে কেটে গেল । সে সচেতন হয়ে নড়েচড়ে বসল । তার পাশে যে মেয়েটা বসে আছে সে মোটেই মেয়েছেলেই নয় । একজন দৃষ্ট কমরেড, একজন নির্বিকার বিপ্লবী । যদি কারো প্রেমে কখনো পড়ে থাকে মণিদীপা তবে সে দীপনাথ নয় । সেই ভাগ্যবান বা দুর্ভাগা একজন স্কুলমাস্টার, স্নিগ্ধদেব ।

দীপনাথ কথার তোড়ে একটু কোণঠাসা হয়ে গিয়েছিল । কি বলবে ভেবে না পেয়ে বেশ কিছুক্ষণ বাদে বলতে পারল, আমার দাদা-বউদি একটু সেকেলে । আপনার বোধহয়—

মণিদীপা কথটার জবাব দিল না । বাইরের দিকে চেয়ে শিথিল শরীরে বসে ছিল । মুখ গম্ভীর ।

দীপনাথ আর কিছু বলার সাহস পেল না ।

বাগানবাড়িতে তাদের অনুপ্রবেশ বিন্দুমাত্র আলোড়ন তুলল না । কেউ জিজ্ঞেস করল না কিছু । শিকারের পাণ্ডি এখনো ফিরেই আসেনি ।

দীপনাথ এতক্ষণ মনে মনে এই একটা ভয়ই পাচ্ছিল । বোস সাহেব ফিরে এসে যদি শোনেন—

দীপনাথ নিশ্চিন্ত হল । মণিদীপা গাড়ি থেকে নেমে তাকে কোনো কথা না বলে সেই যে গটগট করে হেঁটে কোথায় চলে গেল তাকে আর দেখতে পেল না সে । খুঁজতেও সাহস হল না । মুহূর্মুহ মেয়েটার মেজাজ পাণ্টে যায় ।

দীপনাথ চারদিকে চেয়ে দেখল, দুপুরের রোদে উঁচু সমাজের গৃহিণীরা গাছতলার টেবিল চেয়ারে শ্রুত ভঙ্গিতে বসে আছেন। দুটো তাসের আড্ডা বসেছে। কয়েকজন পুরুষ আনাড়ির মতো ক্রিকেট খেলার চেষ্টা করছেন। বেয়ারারা বিয়ারের ট্রে নিয়ে ঘুরছে।

দীপনাথ একটা নিরিবিলি গাছতলা বেছে নিয়ে মাথার ওপর হাত রেখে শুয়ে পড়ল। বউদি অঢেল খাইয়েছে। লানচে সে আজ আর কিছু খাবে না। আন্তে আন্তে ঘুমিয়ে পড়ছিল সে।

স্বপ্নের মধ্যে মণিদীপা এসে সামনে দাঁড়াল। পিছনে চাবুক হাতে বোস সাহেব। বোস সাহেবের ব্যাকগ্রাউন্ডে মণিদীপাকে আরো কঠিন ও সাজঘাতিক দেখাচ্ছে।

মণিদীপা বলল, দীপনাথবাবু!

দীপনাথ সঙ্গে সঙ্গে বলল, জানি।

কি জানেন?

আপনি আমাকে অপমান করবেন এইবার। অপমানটা আমি সবার আগে টের পাই।

কি করে বুঝলেন?

কারণ আমি সবসময়েই অপমানই প্রত্যাশা করি বলে। জীবনে আমি এতবার এত মানুষের অপমান সহ্য করেছি যে, আমাকে আর অপমান করার দরকারই নেই কারো। প্রীজ, আপনিও করবেন না।

যারা কাপুরুষ তারাই অপমানিত হয়। কই করুক তো স্কুলমাস্টার স্নিগ্ধদেবকে কেউ অপমান! এমন রুখে উঠবে যে যত বড় লোকই হোক না কেন, ওর চোখেব সামনে দাঁড়াতেই পারবে না।

জানি।

স্নিগ্ধর আপনি কতটুকু জানেন?

স্নিগ্ধদেবকে জানি না। কিন্তু চরিত্রবান মানুষদের জানি। তাদের কেউ অপমান করতে সাহস পায় না। ব্যক্তিহুওলা লোকদের চেনা শক্ত নয়। আপনার চোখের দৃষ্টি দেখেই আমি স্নিগ্ধদেবকে অনুমান করতে পারি। আমি তার চেয়ে বোধহয় অনেক বেশী স্বাস্থ্যবান, কিন্তু তার জোর অন্য জায়গায়। আমি জানি।

মণিদীপা হাসল না। গম্ভীর মুখে বলল, স্নিগ্ধদেবের জোরটা কোথায় জানেন?

না, বলুন শুনি?

স্নিগ্ধদেব কখনো আমাকে কামনা করেনি। আর করেনি বলেই সে আমাকে কিনে রেখেছে। আর আপনি?

আমি করেছি। চোখ নামিয়ে দীপ বলল।

আর কি জানেন?

কি?

স্নিগ্ধদেব কখনো তার বসকে খুশি করে জীবনে উন্নতি করতে চায়নি। স্নিগ্ধদেব কখনো টাকা-পয়সায় বড়লোক হতে চায় না। স্নিগ্ধদেব একা বড় হতে চায় না। তাই স্নিগ্ধ অত বড়।

মানছি। আমি বড় নই।

কেন বড় নন?

সারা জীবন আমার কেটেছে বড় ভয়ে ভয়ে। আতঙ্কে। নৈরাশ্যে। অনিশ্চয়তায়।

স্নিগ্ধও কি তার চেয়ে বেশী ভয়, আতঙ্ক, নৈরাশ্য বা অনিশ্চয়তার কারণ নেই!

আছে। মানুষ যত বড় হয় তার সমস্যার বহরও তত বাড়ে।

তাহলে ? স্নিগ্ধদেব পারলে আপনি পারবেন না কেন ?

আমি যে বড় নই।

ওটাও কাপুরুষের মত কথা।

আমার যে স্নিগ্ধদেবের ট্রেনিংটা নেই। আমার জীবনের তেমন কোনো লক্ষ্যও নেই।

হতাশ হয়ে মণিদিপা বলে, কোনো লক্ষ্যই নেই ?

দীপ একটু ভেবে বলে, একটা লক্ষ্য আছে হয়তো। কিন্তু বললে আপনি হাসবেন। আমার জীবনের একটাই লক্ষ্য। একদিন স্বর্গের সমান উঁচু মহান এক পাহাড়ে উঠব। উঠব, কিন্তু চূড়ায় পৌঁছাবো না কোনোদিন। পাহাড়ের ওপর উঠলে তাকে ছোটো করে দেওয়া হয়। আমি পাহাড়ের চেয়ে উঁচু নই। আমি চাই উঠতে উঠতে একদিন সেই পাহাড়ের কোলেই ঢলে পড়ব।

বোমান্টিক ইডিয়ট। সেন্টিমেন্টাল ফুল।

শুনুন মিসেস বোস, আমার কথাটা একটু শুনুন। যখন আমি ক্লাস নাইনে পড়ি তখন একটা হাবমাদ ছেলের সঙ্গে আমার লড়াই বাধে। খুবই সাংজ্যাতিক ছেলে। তার নাম ছিল সুকু। সে অসম্ভব ভাল সাইকেল চালাত, ছিল খুবই ভাল স্পোর্টসম্যান। তাব গায়ে ছিল আমার দ্বিগুণ জোব। কি নিয়ে তাব সঙ্গে আমার প্রথম লেগেছিল মনে নেই। বোধহয় বেঞ্চে জায়গা দখল করা নিয়ে। প্রথমে ছোটোখাটো তর্কাতর্কি। একদিন মনে আছে, সে সামনের বেঞ্চে বসে পিছনের ডেস্কে আমার বইয়ের ওপর ইচ্ছে করে কনুই তুলে দিয়ে ভর রেখেছিল। আমি তার কনুই ঠেলে সরিয়ে দেওয়ার চেষ্টা করেছিলাম। সে নির্বিচারভাবে পিছনে ফিবে আমার বইগুলো টান মেরে নীচে ফেলে দিল। ক্লাসে তখন মাস্টারমশাইও ছিলেন। কিন্তু আমি তার বেপবোয়া নির্ভীক হাবভাব দেখে নালিশ করারও সাহস পেলাম না। কিন্তু ঝগড়াটাব শেষ সেখানেও হল না। আমার মধ্যে অপমানবোধ বড় তাঁর কাজ করছিল। পরদিন আমি সকলের আগে ইস্কুলে পৌঁছে সুকুর সামনের বেঞ্চে বসলাম এবং মাস্টারমশাই ক্লাসে আসার পর ইচ্ছে করেই সুকুর বইয়ের ওপর কনুই তুলে দিলাম; কি হল জানেন ? সুকু তার বইগুলো এক হ্যাঁচকা টানে সবিয়ে নিল। আমি পিছনে হেলে ধড়াস কবে ডেস্কে ধাক্কা খেলাম। ডেস্কের তলা দিয়ে সুকু একটা লাথিও মেরেছিল কোমরে। সেদিনও কিছু বলিনি ভয়ে। কিন্তু ক্লাসে সবাই সুকুর আর আমার ঝগড়ার কথা জেনে গেল। সবাই তাকাত, হাসত, মজা পেত। বলা বাহুল্য, নামকরা স্পোর্টসম্যান বলে সবাই ছিল সুকুরই পক্ষে। এরপর থেকে ক্লাসে প্রায়ই সুকু আর তাব কয়েকজন চেলাচামুণ্ডা, আমাকে হাবা বলে ডাকতে শুরু করেছিল। অঙ্ক কষছি, ট্রান্সলেশন করছি, ফাঁকে ফাঁকে শ্বাসবায়ুর শব্দের সঙ্গে কানে আসত, এই হাবা ! এমন কিছু খারাপ কথা নয়, এখন বুঝি। কিন্তু তখন পিঠি জ্বলে যেত শুনে। উল্টে কিছু বলতে হয় বলে আমিও গালাগাল দেওয়া শুরু করি। প্রথম বলতাম শালা, গাধা, গরু, এইসব। পরে একদিন বেশী বাগ হওয়ায় মুখ দিয়ে বেরিয়ে গেল শুয়োরের বাচ্চা। হেডসারের ক্লাস ছিল। উনি চলে যেতেই রাগে টকটকে রাঙা মুখে উঠে এল সুকু। কোনো কথা না বলে আমার জামা ধরে এক ঝটকাই দাঁড় করিয়ে কী জোব এক চড় মারল যে তা বলে বোঝানো যাবে না। মাথা ঘুরে গেল চড় খেয়ে। আর চড় খেয়ে যখন আমার বুদ্ধিনাশ হয়ে গেছে তখনই সুকুর সাঙাৎরা এসে আমার পরনের হাফ প্যান্ট খুলে নিয়ে বাইরে ফেলে দিয়ে এল। সম্পূর্ণ গাড়লের মতো হতবুদ্ধি হয়ে আমি বসে ছিলাম। গায়ে শুধু শাট, পরনে আর কিছু নেই। ক্লাসসুদ্ধ ছেলে

হাততালি দিয়ে চৈচাচ্ছে। পৃথিবীতে এর চেয়ে বেশী যেন আর অপমান নেই। দুহাতে লজ্জা ঢেকে আমি হতভম্বের মতো তখন জানালা দিয়ে বাইরে চাইলাম। সেই প্রথম যেন আবিষ্কার করলাম উত্তরের হিমালয়কে। দেখলাম পৃথিবীর সব তুচ্ছতাকে অতিক্রম করে কত উঁচু হয়ে দাঁড়িয়ে আছে ঐ মহান পর্বত। জানালা দিয়ে সে যেন হাত বাড়িয়ে দিল আমার দিকে। বিড়বিড় করে বড় অভিমানে আমি বললাম, এরা তো কেউ আমার নয়। এরা বড় যন্ত্রণা দেয় আমাকে। আমি একদিন তোমার কাছে চলে যাবো। সেই থেকে, মিসেস বোস, সেই থেকে ঐ পাহাড় আমাকে বাঁচিয়ে রেখেছে। কেউ অপমান করলেই আমি পাহাড়ের কথা ভাবি। কেবলই মনে হয়, আমি একদিন সব ক্ষুদ্রতা ত্যাগ করে পাহাড়ে চলে যাবো। যখন যাবো তখন আর কোনো অপমানই আমার গায়ে লেগে থাকবে না।

ঘুমের মধ্যেও দীপের ষষ্ঠ ইন্দ্রিয় ঠিকই কাজ করছিল। হঠাৎ ঘুম ভেঙে কলের পুতুলের মতো সোজা হয়ে বসল সে। সূর্যের শেষ একটু আলো গাছের গাচ ছায়া ভেদ করে ঘোলা জলের মতো ছড়িয়ে আছে এখনো। লানচু কখন শেষ হয়ে গেছে!

যে জায়গায় দীপ শুয়ে ছিল সেটা বাগানের শেষ প্রান্তে, একটা পুকুর পেরিয়ে। এখান থেকে কিছুই দেখা যায় না।

প্রচণ্ড শীত করছিল তার। মাটির ওপর শুয়ে থাকায় জামা-কাপড়ে একটা ভেজা-ভেজা ভাব। শুকনো মরা ঘাস লেগে আছে গায়ে।

উঠে সে দ্রুত পায়ে বাড়ির সামনের চাতালে চলে আসে।

দেখে কোনো লোক নেই। একটা গাড়িও নেই। সবাই চলে গেছে।

দীপনাথ একটু হতবুদ্ধি হয়ে যায়। পাটি সন্ধে পর্যন্ত চলার কথা ছিল। তবে কি সাহেবরা মদ খেয়ে বেশী মাত্রায় বেচাল হয়ে পড়েছিল?

তাই হবে। *

রাত্তায় এসে সে দেখতে পায়, একটা ভ্যানগাড়িতে কেটারারের লোকেরা মালপত্র তুলছে।

সে এগিয়ে গিয়ে জিজ্ঞেস করল, পাটি ভেঙে গেল ভাই?

একটা ছেলে খুব সুন্দর করে হেসে বলে, হ্যাঁ। সাহেবরা মাতাল হয়ে গিয়েছিলেন।

দীপনাথ মনে মনে হিসেব করছিল। তাকে ফিরতে হবে। কেউ তাকে ফেলে গেছে বলেই তো সে আর পড়ে থাকতে পারে না।

সে বলল, আমি বোস সাহেবের সেক্রেটারি। একটা জরুরী কাজে আটকে পড়েছিলাম। তোমাদের গাড়িতে আমাকে একটু পৌঁছে দাও।

কেটারারের লোকেরা রাজি হচ্ছিল না। সন্দেহ করছে।

পাঁচটা টাকা কবুল করে এবং প্রায় হাতে পায়ে ধরে অবশেষে জায়গা পেয়ে গেল দীপ। ড্রাইভারের পাশেই। খুব ঠাসাঠাসি চাপাচাপির মধ্যে বসে সে বন্দুকগুলোর কথা ভাবছিল। বন্দুকগুলো ঠিকঠাকমতো ওরা নিয়ে গেছে তো? ফেরার সময়ে বন্দুকগুলো ধরে বসে ছিলই বা কে?

তুমি বেলুন ফোলাবে ? না, না, কক্ষনো নয় ! কক্ষনো নয় ! বলে বিলু তেড়ে এল ।
বেলুন-ধরা রোগা হাতখানা বিলুর নাগালের বাইরে সরিয়ে নিয়ে প্রীতম একটু
ছেলেমানুষের হাসি হেসে বলল, পারব । দেখ, ঠিক পারবো ।

পারলেই কি ? রোগা শরীরে যদি শেষে না সয় ?

কিছু হবে না । লাবুর জন্মদিনে আমার তো কিছু করার সাধ্য নেই । এটুকু করতে দাও ।

অনেকগুলো চোপসানো বেলুন দু হাতের আঁজলায় নিয়ে লাবু একটু থতমত খেয়ে
দাঁড়িয়ে আছে বিছানার পাশে । বিকেল হয়ে এসেছে, তবু কেউ বেলুনগুলো ফোলাচ্ছে না
দেখে তার একটু দুশ্চিন্তা হয়েছিল বলে সে শেষ পর্যন্ত বাবাকে এসে ধরেছিল, বেলুনগুলো
একটু ফুলিয়ে দেবে, বাবা ? সবাইকে বলেছি, কেউ শুনছে না । কিন্তু বাবার যে বেলুন
ফোলানোও বারণ তা সে বুঝতে পারেনি ।

বিলু মেয়ের দিকে ফিরে কঠিন চোখে তাকিয়ে বলল, বেলুন ফোলানোর জন্য আর
লোক ছিল না ? কে তোকে বাবার কাছে আসতে বলেছে ?

লাবু ভয়ে কাঁটা হয়ে বলে, বিন্দুদিকে বলেছিলাম । দিল না তো ! তুমিও দিচ্ছে না ।

তাই বাবার কাছে আসতে হবে ?

প্রীতম গম্ভীর স্বরে বলে, ওকে বকছ কেন ? ও কি বোঝে ?

বিলুও বোঝে না । ওর যখন রাগ হয় তখন ও কিছুই বুঝতে চায় না । না যুক্তি, না ভাল
কথা । এক নাগাড়ে তখন কেবল নিজের ঝাল ঝেড়ে যায় । লঘু অপরাধে লাবু প্রায়ই
অত্যন্ত গুরু দণ্ড ভোগ করে । প্রীতমের সে বড় জ্বালা । তার চেয়ে লাবুর জন্ম না হলেও
বুঝি ভাল ছিল !

বিলু প্রীতমের দিকে চকিতে ফিরে দাঁড়িয়ে বলল, খুব বোঝে । তুমি ওর হয়ে একদম
কথা বলবে না । সারাদিন আমি ভোগ করছি, শাসন করার অধিকারও আমার হাতেই ছেড়ে
দাও ।

প্রীতম মৃদু স্বরে বলে, আজকের দিনটা যাক । আজ ওর জন্মদিন ।

বিলু মেয়েকে নড়া ধরে সরিয়ে নিতে নিতে বলল, ছেড়ে দিয়ে দিয়েই তো এরকম
বেয়াড়া হয়ে উঠেছে ।

প্রীতম বালিশে শরীরের ভর ছেড়ে দিল । চোখ বুজল । শরীরে তেমন কোনো ক্লান্তি
নেই, কিন্তু এই ছোট্ট ব্যাপারটায় মনটা চুমকে গেল ।

বাঁ হাতে ধরা বেলুনটাকে বার বার আঙুলে নিষ্পেষিত করল সে । স্থিতিস্থাপক রবার
তার শক্তিশীন আঙুলের ফাঁকে লুকোচুরি খেলল কিছুক্ষণ ।

লাবুর আজ তিন বছর পূর্ণ হল । এখন ডিসেম্বরের শেষ । জানুয়ারির প্রথম সপ্তাহ
থেকেই লাবু একটা কিণ্ডারগার্টেনে পড়তে যাবে । বিন্দু ওকে পৌছে দেবে, আবার নিয়ে
আসবে ছুটির পর । তারপর একদিন একা একাই ইস্কুলে যাবে লাবু । ফ্রক ছেড়ে শাড়ি
ধরবে । তখন প্রীতম কোথায় ?

আমি তখন কোথায় ? এ কথা ভাবতে গিয়েই বোধ হয় প্রীতমের বুক থেকে একটা
দীর্ঘশ্বাস বেরিয়ে গেল । সঙ্গে সঙ্গেই মৃত্যুর ওত পেতে থাকা জীবাণুরা কোলাহল করে ওঠে
শরীর জুড়ে । তারা এই সব দুর্বল মুহূর্তগুলির জন্যই তো অপেক্ষা করে থাকে !

প্রীতম বিপদের গন্ধ পেয়ে টপ করে চোখ খোলে । বালিশ থেকে মাথা তুলে চারদিকে

চায়। বলে, ভাল আছি। ভাল আছি। খুব ভাল আছি। কিছু হয়নি আমার।

বলতে বলতে হাতের বেলুনটা মুখে নিয়ে এক ফুঁয়ে টনটন করে ফুলিয়ে তোলে সে। তারপর ডাকে, লাবু! লাবু!

লাবু প্রথমে সাড়া দেয় না। আরো কয়েকবার ডাকে প্রীতম।

লাবু খুব মৃদু, ভীতু পায়ে পদটি সরিয়ে জড়োসড়ো হয়ে ঘরে ঢুকে চৌকাঠের কাছেই দাঁড়িয়ে চেয়ে থাকে।

বিছানায় ডিমসুতো রেখে গিয়েছিল লাবু। বেলুনের মুখটা বেঁধে ফেলতে পারল প্রীতম। এক গাল হেসে বেলুনটা লাবুকে দেখিয়ে জিজ্ঞেস করল, হয়নি?

লাবুও ছোটো ছোটো ইঁদুরের মতো দাঁত দেখিয়ে হাসল।

প্রীতম বলল, সব বেলুন নিয়ে এসো, ফুলিয়ে দিই।

মা জানলে?

জানুক। তুমি আনো তো! অধৈর্যের গলায় বলে প্রীতম। এক্ষুনি কোনো কাজ নিয়ে তার ব্যস্ত হয়ে পড়াটা দবকার। শরীরের ক্ষিপ্ত জীবাণুরা আফ্রিকার নরখাদকের মতো মৃত্যু-নাচ নাচছে।

লাবু চোখের পলকে পাশের ঘর থেকে আঁজলা করা বেলুন নিয়ে এসে প্রীতমের বিছানায় ছড়িয়ে দিয়ে বলে, মা বাইরে গেছে। খুব তাড়াতাড়ি করো, বাবা।

মেয়ের সঙ্গে একটু বোঝাপড়ার চোখাচোখি হয় প্রীতমের। দুজনেই একটু হাসে।

একটা বুটিদার হলুদ বেলুন ফুলিয়ে দিয়ে প্রীতম বলে, তোমার মা কোথায় গেছে?

মিষ্টির দোকানে। অর্ডার দেওয়া ছিল, নিয়ে আসতে গেছে। তুমি দেবী কোরো না।

প্রীতম দেবী করে না। যথেষ্ট দম পাচ্ছে সে। বুকভরা অফুরন্ত বাতাস। মুহূর্ত ফুঁয়ে সে বেলুনগুলি ফুলিয়ে তুলছে। আপনমনে হাসছেও সে। এ যেন এক অদ্ভুত জীবন-মনগের খেলা।

মা আসছে কি না বারান্দায় গিয়ে দেখি, বাবা?

দেখ। আসতে দেখলেই একটা টু দিও।

আচ্ছা। বলে লাবু ছুটে ঝুলবারান্দায় চলে যায়।

আজ তিন বছর পূর্ণ হয়ে গেল লাবুর। কেমন যেন বিশ্বাস হয় না। তিন তিনটে বছর যেন মাত্র কয়েক মাস বলে মনে হয়।

ডিসেম্বরের শেষ দিকে এক বিকেলে জগুবাজারে বিলুকে নিয়ে দু-চারটে জিনিস কিনতে বেরিয়েছিল প্রীতম। বিলুর তখন দশমাস চলছে। যে কোনোদিনই বাচ্চা হতে পারে। নার্সিং হোম ঠিক করা ছিল। ঘন ঘন চেক আপ চলছিল।

জগুবাজারে এক মনোহারী দোকানে কেনাকাটা করার সময় বিলু হঠাৎ তার কানে কানে বলল, বাড়ি চলো। আমার শরীর ভাল লাগছে না।

কিরকম লাগছে?

ভাল নয়। চিনচিনে বাথা।

প্রীতম এক সেকেন্ডও দেবী করেনি। ট্যাকসি না পেয়ে টানা রিকশায় বিলুকে তুলে সোজা চলে গেল ডাক্তার বোসের চেম্বারে। বোস তৈরিই ছিলেন। হেসে বললেন, দেবী আছে। তবু এখনই ভর্তি করে দেওয়া ভাল। নইলে বেশী রাত হয়ে গেলে বিপদ হতে পারে।

বাড়ি ফিরে এসেই তারা নার্সিং হোমে যাওয়ার জন্য গোছগাছ করতে বসল। কিন্তু

নিরোট অনভিজ্ঞতার দরুন কি লাগবে না লাগবে তা না জেনে সুটকেস বোঝাই করছিল শাড়ি আর ব্লাউজ আর কসমেটিকসে। বিলু একটু পরেই হাঁফিয়ে গিয়ে শুয়ে পড়ল। প্রীতম তখন বেডিং বাঁধছে। পাশের ফ্ল্যাটের মাদ্রাজী পরিবারের এক বুড়ি এসে তখন সহজ বাংলায় বিলুকে বললেন, তুমি এখন কেবল হাঁটাচলা করতে থাকো, একটুও বসবে না। তারপর প্রীতমকে ধমকে বললেন, নার্সিং হোমে বিছানা আছে। তোমাকে বেডিং নিতে কে বলেছে? সুটকেসে পাউডার-ক্রীম-ফাউন্ডেশন দেখে বুড়ি হেসেই খুন। বললেন, নার্সিং হোমে যা লাগে তা হল প্রচুর পরিমাণে পরিষ্কার ন্যাকড়া। যত পারো ছেঁড়া কাপড় নাও। আর পরবার জন্য দামী শাড়ি কক্ষনো নেবে না, নার্সিং হোমের জমাদারনী, আয়া, ঝি-রা সব নিয়ে নেবে।

সঙ্গে সাতটা নাগাদ বিলু নার্সিং হোমে ভর্তি হয়ে গেল। তখনো ব্যাথা-টাথা ওঠেনি ভাল করে। একজন সিস্টার প্রীতমকে বললেন, আপনি বাড়ি চলে যান। এখনো অনেক দেরী আছে। মানুষের আত্মীয়স্বজন কাছে না থাকা যে কত মারাত্মক তা সেদিন হাড়ে হাড়ে টের পেয়েছিল প্রীতম। কেউ কাছে নেই, একটা সাম্বনার কথা বলার মতো লোক নেই, আগ বাড়িয়ে সাহায্য করার মতোও কেউ নেই; আছে শুধু পকেটভর্তি টাকা। কিন্তু টাকা দিয়ে কি সব কেনা যায়?

ডাক্তার বোস চিকিৎসক খারাপ নন। স্ত্রীরোগ বিশেষজ্ঞ হিসেবে নামও আছে। কিন্তু লোকটা অসম্ভব টাকা চেনে। অফিসের এক কলিগই প্রীতমকে ডাক্তার বোসের কথা প্রথম বলেছিল। কিন্তু সেই সঙ্গে সে এও বলেছিল, দেখবেন, এ কিন্তু কথায় কথায় সিজারিয়ান করে। সিজারিয়ানে টাকা বেশী তো। আপনি সহজে সিজারিয়ানে রাজি হবেন না।

কিন্তু রাজি হতে হয়ওনি প্রীতমকে। নার্সিং হোমে মাদ্রাজীদের ফ্ল্যাটের ফোন নম্বর দেওয়া ছিল। সারা রাত জেগে দুশ্চিন্তা ভোগ করে যখন সকালের দিকে একটু ঘুমিয়েছে প্রীতম তখনই তাকে জাগিয়ে সেই বুড়ি খবর দিয়ে গেলেন, অপারেশন কবে বিলুর বাচ্চা বের করতে হবে। অবস্থা ভাল নয়। বিছানা ছেড়ে কোনো রকমে পোশাক পরে প্রায় মুক্তকণ্ঠ হয়ে ছুটেছিল প্রীতম।

নার্সিং হোমে গিয়ে গাড়লের মতো দাঁড়িয়ে থাকা ছাড়া কিছুই করার ছিল না প্রীতমের। বিলুকে ও টি-তে নিয়ে গেছে। তার অবস্থা কিরকম তা কেউই বলতে পারছে না।

কতগুলো সময় আসে যখন মানুষের কিছুই করার থাকে না। তখন তাকে অসহায়ভাবে দর্শকের আসনে বসে থাকতে হয়। তার সামনে তখন যা করার তা করে যায় ভাগ্য বা নিয়তি। প্রীতম নার্সিং হোমের লাইনজে বসে রইল স্থির হয়ে। শরীর স্থির, কিন্তু মনের মধ্যে এক ঘূর্ণিঝড়। বিশাল, ব্যাপ্ত প্রচণ্ড এক সর্বনাশের ভয়। তার ওপর সে একা, একদম একা। বোজানো চোখের পাতা ভিজিয়ে জল নেমে এল ফোঁটায় ফোঁটায়। বিলুর মৃত্যু সে সহ্য করতে পারবে না। বিড় বিড় করে সে বলল, ওকে বাঁচিয়ে দাও, বাঁচিয়ে দাও। কাকে বলল কে জানে! এমন সময় ডাক্তার বোস এসে কাঁধে হাত রাখলেন।

বিলু তখন হতচেতন। হাতে চুঁচ, কবডি বাঁধা। আয়া ন্যাকড়ায় জড়ানো রক্তের দলা বাচ্চাটাকে এনে দেখাল। হতবুদ্ধি প্রীতম তখন কী দেখল, কীই বা বুঝল তা আজ আর মনে করতে পারে না। শুধু মনে আছে বিলুর হাতে বেঁধানো সেই স্যালাইনের চুঁচ, ফ্যাকাশে মুখ, মৃত্যুনিীল চোখের দুটো পাতা। আর বক্তাভ একটা মাংসের পুটিলির মতো সদ্যোজাত লাবু। কোনো ভালবাসা, টান, স্নেহ কিছুই বোধ করেনি সেদিন।

কিন্তু তারপর যত দিন গেছে, যত লাবুর চোখ মুখ স্পষ্ট হয়েছে, যত পাকা হয়ে উঠেছে

সে ক্রমে ক্রমে তত তার দিকে ভেসে গেছে প্রীতম । কিন্তু সে কি তিন বছর ? এই তো মোটে সেদিনের কথা !

নিজের কৃতিত্বে খুবই তৃপ্ত হল প্রীতম । মোট পনেরোটা বেলুন ফুলিয়েছে সে । তার মধ্যে অন্তত চারটে বিশাল লম্বা, আর চারটে বিশাল গোল । বিছানা উপচে ফোলানো বেলুনগুলো লাফিয়ে লাফিয়ে নেমে ঘরময় ছড়িয়ে পড়ছিল । গোটা দুই দুম দাম ফেটেও গেল ।

ছুটে এসে লাবু অবাক ।

ওমা, কত কটা ফুলিয়েছো, বাবা !

প্রীতম গর্বের হাসি হেসে বলে, আরো ফোলাবো । তুমি বেলুনগুলো কুড়িয়ে আনো, তোড়া বেঁধে দিই । সিলিং থেকে ঝুলিয়ে দিলে সুন্দর দেখাবে ।

কে ঝোলাবে ? তুমি ?

কে ঝোলাবে সেইটেই প্রশ্ন । প্রীতম একটু গম্ভীর হয়ে যায় । তাদের যে কেউ নেই । সে, বিলু আর লাবু । বাস, এইটুকুতেই তারা শেষ ।

প্রীতম বলল, কেউ না ঝোলালে আমিই ঝুলিয়ে দেবো ।

পারবে ?

পারব । চেষ্টা করলে পারা যায় ।

মা বকবে না ?

বকলে বকবে ।

লাবু বেলুন কুড়িয়ে নেয় । খুব যত্নের সঙ্গে আতকায় বেলুনের তোড়া বাঁধতে বসে যায় প্রীতম । হাত পায়ের প্রবল আড়ষ্টতা, শরীরের দুর্বলতা, কোনোটাকেই গ্রাহ্য করে না । দাঁতে দাঁত চেপে সে মনে মনে বলে, ভাল আছি । ভাল আছি । কিছুই হয়নি আমার ।

এবং পারেও প্রীতম । গোড়ায় গোড়ায় বেঁধে বেলুনের একটা সুন্দর তোড়া তৈরি করে ফেলে সে ।

ভীষণ অবাক হয়ে যায় লাবু । স্তম্ভিত হয়ে বাবার হাতের এই শিল্পকর্ম দেখে সে । দেখতে দেখতে মুগ্ধ হয়ে সে বাবার খুব কাছে চলে আসে । এমনকি বাবার উরুর ওপর কনুইয়ের ভর রেখে মাথাটা পাজরে ঠেকিয়ে বসে লাবু । তারপর বলে, আরো বেলুন আনব, বাবা ?

আগে চলো এটা ঝুলিয়ে দিই ।

বিন্দুদিকে ডাকি ?

ডাকো । ওকে বাইরের ঘরে ফ্যানের নীচে একটা চেয়ার দিতে বলো ।

ফ্যানের সঙ্গে বাঁধবে ?

হ্যাঁ ।

দৌড়ে গিয়ে লাবু বিন্দুকে ধরে আনে ।

বিন্দু এমনতে বেশী কথা বলে না । সারাদিনই সে চূপচাপ । কিন্তু এখন থাকতে না পেরে বলল, আপনি টাঙাবেন ? একা বাথরুমে যেতে পারেন না আপনি, টাঙাতে গেলে পড়ে যাবেন যে ।

পারব । তুমি চেয়ারটা একটু ধরে থেকো ।

আমিও ধরব, বাবা । লাবু বলল ।

সবটাই প্রীতমের কাছে লড়াই। সাজঘাতিক এক লড়াই। কোটি কোটি জীবগুর বিরুদ্ধে মরণপণ যুদ্ধ।

শোওয়ার ঘর থেকে বসার ঘরের দূরত্ব তার কাছে এখন কয়েক মাইল। বিন্দু বাইরের ঘরে ফ্যানের নীচে একটা কাঠের মজবুত চেয়ার দাঁড় করিয়েছে। প্রীতম বিছানা থেকে নেমে তার শুকিয়ে আসা দুই থরো থরো পায়ে ভর দিয়ে দাঁড়াল। দাঁড়িয়েই মনে হয়, পারব না।

বিন্দু পর্দা সরিয়ে দেখছিল। সেও বলল, পারবেন না।

প্রীতমের পা দুটো এই কথা শুনেই যেন লোহার সিকের মতো শক্ত হয়ে গেল। বাতাসে হাত বাড়িয়ে অভ্যাসবশে একটা অবলম্বন খুঁজল প্রীতম। পেল না।

একটু টলে গেল সে। তারপর আবার সোজা হল। লাবু আর বিন্দুকে অনামনস্ক রাখা ব জন্য সে খুব স্বাভাবিক গলায় জিজ্ঞেস করল, আজ কাদের নেমন্ত্রণ করেছে, লাবু ?

পাশের ফ্ল্যাটের উষারা সবাই। আর সেজোমামা, অরুণমামা, ছোটমামা, আরো অনেক আছে বাবা।

প্রীতম চার-পাঁচ পা এগিয়ে গেল। দরজার চৌকাঠ হাতের নাগালে পেয়ে ধরে ফেলল। বলল, কি কি খাওয়াবে ?

মিষ্টি, মাংস, লুচি।

আচ্ছা। বলে চৌকাঠ পেরিয়ে প্রীতম নিরালায় হয়ে আবার কয়েক কদম এগোয়।

পারবে, বাবা ?

পারবো। ভেবো না।

বিন্দু চেয়ারটা শক্ত করে ধরে। নীচু সিলিঙের আধুনিক ফ্ল্যাট বলে পাখাটাও খুব উঁচুতে নয়। প্রীতম একটু দম নিয়ে ওপরের দিকে চেয়ে স্ট্র্যাটেজিটা ঠিক করে নিল। তারপর হামাগুড়ি দিয়ে চেয়ারে উঠে পড়ল ধীরে ধীরে।

মাথাটা একটু ঘুরছে।

সে বলল, মাংসটা কি বাড়িতেই রান্না হবে ?

লাবু বলে, না তো। অরুণমামা বাইরে থেকে মাংস আনবে।

ও। খুব ভাল। আর লুচি ?

লুচিও বাইরে থেকে আনা হবে। এ কথাটা বিন্দু বলল।

ঘরে কিছু হচ্ছে না ?

বলতে বলতে প্রীতম চেয়ারের পিঠে ভর দিয়ে ধীরে ধীরে দাঁড়ায়। হাত বাড়িয়ে ফ্যানের বাটিটা ধরেও ফেলে সে।

পারবেন তো ? বিন্দু প্রবল উৎকণ্ঠায় জিজ্ঞেস করে।

খুব পারব। কাজটা মোটেই শক্ত নয়।

বাবা ঠিক পারবে, দেখো। না, বাবা ?

হ্যাঁ মা। এবার তোড়িটা আমার হাতে দাও।

লাবু তোড়িটা বিন্দুর হাতে দেয়। বিন্দু সেটা তুলে ধরে প্রীতমের নাগালে। বুদ্ধি করে প্রীতম তোড়ার গোড়ায় আলগা সূতো রেখেছে। যাতে বাঁধতে অসুবিধে না হয়।

পা দুটো আবার থরথরিয়ে ওঠে যে ! হাঁটু ভেঙে ভেঙে আসছে না ? মাথাটা বেভুল চক্কর মারছে।

তুমি কবে থেকে স্কুল যাবে, লাবু ?

জানুয়ারি ফাস্ট উইক ।

স্কুলটা কেমন ?

খুব ভাল, বাবা । ইংলিশ মিডিয়াম ।

ও ।

বলতে বলতে ফ্যানের একটা ব্লেডের সঙ্গে তোড়ার সুতো জড়িয়ে দিতে পারে প্রীতম ।

ইস্কুলে যেতে তোমার ইচ্ছে করে ?

হ্যাঁ-অ্যাঁ !

ভয় করে না ? আমার তো ছেলেবেলায় ইস্কুলে যেতে খুব ভয় করত ।

আমার করে না । ইস্কুলে কত খেলা, গল্প হইচই ।

তোমাদের ইস্কুল খুব ভাল । আমার ইস্কুলটা তো ভাল ছিল না ।

কেন, বাবা ?

আমরা পড়া না পারলে ইস্কুলে খুব মারত ।

আমার ইস্কুলে মারধর নেই ।

সেইজন্যই তো ভাল ।

বলতে বলতে দ্বিতীয় সুতোটা জড়িয়ে দেয় প্রীতম । অব্যাহত পা দুটোর থরথরানি সমানে চলছে । মাথাটা অদ্ভুতভাবে ঘুরছে তার । চোখে ধাঁধা লেগে যাচ্ছে বারবার ।

তোমাকে স্কুলে খুব মারত, বাবা ?

হ্যাঁ মারত । তবে আমার চেয়েও বেশী মার খেত তোমার সেজোমামা । ভীষণ দুট্ট ছিল ।

ছি ছি । সেজোমামা কাদত না ?

বেলুনের তোড়া খুবই সুন্দরভাবে সিলিং ফ্যানটাকে ঢেকে ফেলেছে । প্রীতম পারল । ধোঁয়াটে চোখে নিজের এই অসম্ভব দুর্দান্ত কীর্তিটি দেখে একটা বিরাট শ্বাস ছাড়ল সে । আর সঙ্গে সঙ্গে সমস্ত শরীরটা হঠাৎ কাচের পুতুলের মতো ভেঙে পড়ল তার ।

কি হল তা বুঝতেও পারল না প্রীতম । টের পেল চেয়ারটা টাল খেয়ে তাকে নিয়ে পড়ে যাচ্ছে । ঘরের চারটে দেয়াল চোখের ওপর পর পর ঘুরে গেল । তারপর দেখল ঘরের মেঝেটা একশ মাইল বেগে ছুটে আসছে তার দিকে ।

আতঙ্কে চিৎকার করছে বিন্দু আর লাবু । নিরলস দুই হাতে বাতাস আঁকড়ে ধরার চেষ্টা করতে করতে পড়ে গেল প্রীতম । হাড়িসার শরীর কঠিন শানের ওপর পড়ে ঝনৎকার তুলল ।

নীলাভ এক অন্ধকারের মধ্যে অনেকক্ষণ ডুবে রইল সে । চেতনা সম্পূর্ণ বিলুপ্ত নয় । সে টের পাচ্ছিল, বহু দূরে কারা যেন কথা বলছে । কেউ কি কাদল ? কিন্তু সে সব তাকে স্পর্শ করছে না । এক অপরিচিত নীলাভ অন্ধকারের মধ্যে অগাধ সাঁতার দেয় প্রীতম । ভারী ঠাণ্ডা, বড় মেলায়েম, ভীষণ সুন্দর এই অন্ধকার । কোনো শব্দ নেই । শুধু বিস্তার আছে । সীমাহীন অগাধ অফুরান আকাশের মতো ।

আস্তে আস্তে অন্ধকার থেকে আলোয় চোখ মেলল সে । এত আলো যে চোখে ধাঁধা লেগে যায় । চারদিকটা প্রবলভাবে অর্থহীন । একটা ঘর, আসবাব, কয়েকটা মুখ । কোন মানে নেই এর । এরা কারা, এসব কি, এ জায়গাটা কোথায় ?

কিছুক্ষণ এরকম ধন্দের মধ্যে কাটাবার পর পরিপূর্ণ চেতনায় ফিরে এল প্রীতম ।

লাবু বিছানার কাছেই ফোঁস ফোঁস করে কাদছে । বিন্দু চোখে জলের ঝাপটা দিচ্ছে ।

বিলু হাত বুলিয়ে দিচ্ছে বুকে । কিন্তু প্রীতম টের পায়, তার শবীরে জীবাণুদের কোলাহল
থেমে গেছে । কাছেপিঠে ওত পেতে থাকা মৃত্যুভয়ের, বাঘটার গায়ের গন্ধও পাচ্ছে না
সে । ভাল হতেই তার সমস্ত মনপ্রাণ ছুটে গেল লাবুর দিকে ।

বিলুর দিকে চেয়ে প্রীতম বলল, লাবুকে মারোনি তো ? ওর কিন্তু কোনো দোষ নেই ।

বিলু প্রীতমের চোখ থেকে অশ্রুত্বিতে চোখ সরিয়ে নিয়ে বলে, একটা থাঙ্গড় দিয়েছি ।
একটু বাইরে যেতে না যেতেই এসব কী কাণ্ড বাঁধালে তোমরা বলো তো ? পাগল হয়ে
গেছো নাকি সবাই ?

প্রীতম মৃদু স্বরে বলে, লাবুর দোষ নেই । ওকে কেন মারলে ?

তবে দোষটা কার ? বেলুন বেলুন করে এতক্ষণ ও-ই সকলের মাথা গরম করে
তুলেছিল ।

ও আমাকে বেলুন ঝোলাতে বলেনি । আমি নিজে থেকেই যা কিছু করেছি ।

কিন্তু কেন করতে গেলে ? এসব বাহাদুরী কাকে দেখাচ্ছিলে ?

লাবুর জন্মদিনে আমারও তো কিছু করতে ইচ্ছে হয় ।

আমিই তো বেলুন সাজাতে পাবতাম ।

আমিও তো পেরেছি ।

পেরেছো ঠিকই । কিন্তু পড়ে গিয়ে হাড়গোড় ভেঙেছে কিনা কিংবা আর কিছু হয়েছে
কিনা তা বুঝতে এখন ডাক্তার ডাকতে হবে ।

প্রীতম মাথা নেড়ে বলে, দরকার নেই ।

তুমি চুপ করে থাকো । দরকার আছে কিনা আমি বুঝব ।

না, প্লীজ ডেকো না । আজকে আনন্দের দিনে ডাক্তার এলে সব মাটি হয়ে যাবে ।

এখন তো আর কিছু করার নেই । ডাক্তারকে ফোন করে দিয়েছি । এক্ষুনি চলে
আসবে ।

আবার ফোন করো । আসতে বারণ করে দাও । আমার কিছুই হয়নি ।

হয়নি কি করে বুঝব ?

হঠাৎ প্রবল চেষ্টায় উঠে বসে প্রীতম , এই দেখ, উঠেছি । এই দেখ হাত, এই দেখ পা ।
বুকে হাত দাও । দেখ, হাট ঠিক ঠিক চলছে ।, দাও না হাত ।

বিলু তবু সন্দ্বিহান চোখে চায় । কিন্তু প্রীতমের মুখচোখে কোনো অস্বাভাবিকতা নেই ।
তবু সে বলে, তা হলে অজ্ঞান হয়ে গিয়েছিলে কেন ?

ওটা পড়ার ইমপ্যাকটে । সকলেরই হয় । এখন যাও ডাক্তারকে আসতে বাবণ করে
দিয়ে এসো ।

বলতে বলতে প্রীতম বিলুকে বিছানা থেকে প্রায় ঠেলে নামিয়ে দেওয়ার চেষ্টা করে ।

বিলু বলে, আচ্ছা, আচ্ছা, যাচ্ছি ।

বিলু ঘর থেকে বেরিয়ে গেলে প্রীতম মেয়ের দিকে চেয়ে একটু বুঝদারের হাসি হাসে ।
লাবুর কান্না থেমেছে । কিন্তু চোখ ভরা জল নিয়ে সে ফোঁপাচ্ছিল । বাবার দিকে চেয়ে সেই
ফোঁপানি আর চোখের জল নিয়েই গাল ভরে হাসল ।

প্রীতম জরুরী গলায় বলে, রঙীন কাগজ নেই ? না থাকলে বিন্দু দোকান থেকে নিয়ে
আসুক । দরজায় কাগজের শিকলি না টাঙালে কি ভাল লাগে ?

লাবু হি-হি করে হাসতে থাকে আনন্দে । হাততালি দেয় ।

অগত্যা দোকান থেকে রঙীন কাগজ নিয়ে আসে বিন্দু । কাঁচি আর আঠার শিশি নিয়ে

বিছানায় শিকলি বানাতে বসে যায় প্রীতম। লাবু মাছির মতো লেগে আছে গায়ের সঙ্গে। বিলু দেখল, কিন্তু কিছু বলল না। শুধু খুব থমথমে দেখাচ্ছিল তাকে।

বিলু বুঝবে না, এ শুধু লাবুর নয়, প্রীতমেরও জন্মদিন। বিলু কেন, পৃথিবীর কেউই কোনোদিন বাইরে থেকে টের পাবে না, প্রীতমের ভিতরে এক ধুন্দুমার কুরুক্ষেত্রে চলছে কৌরব আর পাণ্ডবের লড়াই। আজ সেই লড়াইতে অনেকখানি হারানো জমি দখল করে নিয়েছে প্রীতম। লাবুর সঙ্গে তাই আজ তারও জন্মদিন।

প্রীতমের শিকলি তৈরির অভ্যাস ছিল ছেলেবেলায়। সরস্বতী পূজোর প্যাণ্ডেল সে বড় কম সাজায়নি। আবার সেই উত্তাপ ফিরে এল আজ। অল্প সময়ের মধ্যেই সে মস্ত মস্ত শিকলি বানিয়ে ফেলে। ঘরদোর সাজাতে সাজাতে এসে বিলুও মাঝে মাঝে অবাক হয়ে দেখছে। কিছু বলছে না, কিন্তু চোখের দৃষ্টিতে অবাক হওয়ার ভাবটা স্পষ্টই ফুটে উঠেছে। একবার মুখ ফুটে বলেই ফেলল, আমি তো ভেবেছিলাম তোমার অসুখ বলে এবার লাবুর জন্মদিনটা নমো নমো করে সারব।

প্রীতম একটু বিবর্ণ হয়ে বলে, আমার অসুখ! না, আমার তো অসুখ নেই। আমি ভাল আছি। শোনো বিলু, লাবুর জন্মদিনে কেবল দোকানের খাবার দিয়ে অতিথিদের বিদেয় করাটা কি ভাল?

তবে কি করব? আমার তো খাবার তৈরি করার সময় নেই।

বেশী নয়, অন্তত একটা কোনো আইটেমে এই ঘরের কব্বীর হাতের ছোঁয়া থাকা ভাল।

বিলু একটা ক্লিষ্ট শ্বাস ফেলে বলে, এখন তো সময়ও নেই। তবু ছকুম করো, করব।

প্রীতম হেসে ফেলে। বলে, দুঃখের সঙ্গে নয়, আনন্দের সঙ্গে যদি করতে পারো তা হলে বলি।

বিলু ক্ষীণ একটু হাসল, ঠিক আছে। আনন্দের সঙ্গেই করব না হয়।

বলছিলাম কি, লুচির সঙ্গে একটু বেগুন ভেজে দাও। অতিথির সংখ্যা তো খুব বেশী নয়। পারবে না?

পারব।

ভারী তৃপ্ত হল প্রীতম। গভীর শ্বাস ছাড়ল একটা। মনে মনে বলল, আজ আমারও জন্মদিন! আমারও জন্মদিন! ভাবতে ভাবতে ক্লাস্ত শরীরে বিমুনি এল। বালিশে মাথা রেখে ঘুমিয়ে পড়ল প্রীতম।

যখন আবার চোখ মেলল তখন বাইরের ঘরের দরজায় রঙীন শিকলি ঝুলছে, ঘরের এ-কোণ ও-কোণ জোড়া রঙীন কাগজের ফেস্টুন, বেলুনের তোড়া থেকে বহরঙা আনন্দ ঝরে পড়ছে। বাইরের ঘর গম গম করছে অতিথিদের কলরোলে।

এসো সেজদা। বলে বিছানায় উঠে বসল প্রীতম। দীপ ঘরে ঢুকে একটা চেয়ার টেনে বিছানার কাছে বসল।

কেমন আছিস, প্রীতম?

ফাইটিং। জোর লড়াই দিচ্ছি সেজদা।

তাকে একটু ব্রাইট দেখাচ্ছেও।

ভিতরেও খুব ব্রাইটনেস ফিল করছি।

খুব ভাল। খুব ভাল। তোর কোনোদিন খারাপ কিছু ঘটতেই পারে না। 'তই বড় ভাল যে।

প্রীতম লজ্জায় লাল হয়ে বলে, বহুকাল আসোনি, সেজদা । ব্যস্ত ছিলে ?
ব্যস্ত ? তা বলা যায় । আসলে একটা ছইমজিক্যাল লোকের খিদমৎ করতে হয় তো ।
মাঝখানে দুম করে আমেদাবাদ, বোম্বে আর হায়দ্রাবাদ ঘুরে আসতে হল বসের সঙ্গে ।
বেশ চাকরি তোমার, সেজদা । খুব টুর পাও ।
দীপনাথ বিষণ্ণ হেসে মাথা নেড়ে বলল, টুর পাওয়াটা তখনই ভাল লাগে যখন দুশ্চিন্তা
থাকে না ।

তোমার আবার দুশ্চিন্তা কি ? বিয়ে করোনি, দায়দায়িত্ব নেই । ঝাড়া হাত-পা ।
অনেক উল্লেখ করতে হয় রে, প্রীতম । তুই বুঝবি না ।
ম্রেট হাতে বিলু খুব ব্যস্তভাবে রান্নাঘরের দিকে যেতে যেতে থমকে দাঁড়িয়ে বলল, ঘুম
ভাঙল কখন ?

এইমাত্র । প্রীতম হাসিমুখে বলে, বেগুনভাজা কি করেছে, বিলু ?
করিনি আবার ! কতরি ছকুম, না করে উপায় আছে ? তোমাকে এবার কিছু খেতে দিই ।
অনেকক্ষণ খাওনি ।

দাও । খুব আগ্রহের সঙ্গে বলে প্রীতম, সব আইটেম দিও ।
বিলু চোখ কপালে তোলে, সব আইটেম মানে ? তোমার জন্য স্টু করা আছে, পাঁউরুটি
টোস্ট করে দিচ্ছি ।

প্রীতম প্রবলভাবে মাথা নেড়ে বলে, না, না । আমি লাবুর জন্মদিনের নেমস্তম্ভ খাবো ।
বিলু হাসে, তাই কি হয় ? ওসব দোকানের জিনিস । তুমি রুগী মানুষ, সেইবে কেন ?
ফের বিবণ হয়ে যায় প্রীতম, কে বলল আমি রুগী ? তাহলে বেলুন টাঙাল কে ? শিকলি
বানাল কে ?

ওঃ ! তাই তো ! আমার ভীষণ ভুল হয়ে গিয়েছিল । যেভাবে লাবুকে মাঝে মাঝে
ভোলায় ঠিক সেইভাবে প্রীতমকে ভুলিয়ে বিলু বলল, আচ্ছা, তাহলে অন্য করে দেবো ।
বলে বিলু চলে যায় ।

বিলুর যাওয়ার দিকে চেয়ে থেকে দীপ মাথা নেড়ে বলে, বিলুকেও আজ একটু ব্রাইট
দেখাচ্ছে ।

শুধু তোমাকেই দেখাচ্ছে না, সেজদা ।

গোটা দুনিয়াটারই ব্রাইটনেস কমে যাচ্ছে রে প্রীতম, আমি কোন ছাড়া !

আমার কাছে পৃথিবীর ব্রাইটনেস একটুও কমছে না, বরং বাড়ছে । দিনে দিনে বাড়ছে ।
যেচে থাকাটাই যে কী ভীষণ আনন্দের তা লোকে বোঝে না কেন বলো তো !

দীপনাথ একটু চুপ করে বসে মিটিমিটি হাসে । তারপর আচমকা বলে, আজকাল যেন
বিলুর সঙ্গে তোর একটু বেশী ভাবসাব হয়েছে রে, প্রীতম !

যাঃ, কি যে বলো ! আমাদের ভাব আবার কবে ছিল না ?

সে ছিল ঠাণ্ডা ভাব । এখন যেন সম্পর্কটা ফ্রিজ থেকে বের করে উনুনে চড়ানো
হয়েছে । বেশ হাতে-গরম !

খুব হাসে প্রীতম । রান্নাঘরের দিকে মুখ ঘুরিয়ে উঁচু গলায় বলে, বিলু ! বিলু ! শুনে যাও
সেজদা কি বলছে !

হাসিমুখে, স্নিগ্ধ মনে কিছুক্ষণ দীপনাথের দিকে চেয়ে থাকে প্রীতম। বাইরের ঘরে কোনো বাচ্চা বুঝি কচি গলায় ইংরিজি গান গাইছে। বেশ সাহেবী উচ্চারণ। সঙ্গে বোঙ্গো আর মাউথ অর্গান। মন দিয়ে শোনে প্রীতম। তারপর বলে, ও ঘরে কী হচ্ছে তা আমার খুব দেখতে ইচ্ছে করছে।

দীপনাথ জিজ্ঞেস করল, যাবি ?

প্রীতম মাথা নেড়ে বলে, না। থাকগে।

দীপনাথ বলে, নতুন কিছু হচ্ছে না। সেই কেক কাটা, মোমবাতি নেভানো, সাহেবরা যা সব করত আর কি।

বলে একটু হাসে দীপ।

প্রীতমও হাসে। বলে, সাহেবরা দেশ ছেড়ে গেলেও সাহেবদের ভূত তো আর আমাদের ছেড়ে যায়নি সেজদা। আমার জন্মদিনে মা পূজো দিত, পায়ের রাঁধত। আজও তাই করে শুনেছি, আমি কাছে না থাকলেও করে।

থাকগে। তুই এ নিয়ে বিলুকে কিছু বলতে যাস না। তাদের সম্পর্কটা একটু ভাল যাচ্ছে দেখছি। সেটা যেন বজায় থাকে।

ও নিয়ে ভেবো না। আমি কখনো ঝগড়া করি না। তাছাড়া, বিলু যা করে আনন্দ পায় তাই করুক।

বলে প্রীতম ছাদের দিকে চেয়ে একরকম উদাস অভিমান মুখ করে শুয়ে থাকে। অনেকক্ষণ বাদে বলে, তোমার কথা বলো সেজদা, শুনি।

আমার আর কী কথা! নাথিং নিউ।

আমি তোমার কথা মাঝে মাঝেই ভাবি। মনে হয়, তোমার সত্যিই আরও ওপরে ওঠার কথা ছিল। এতদিনে একটা বেশ হোমরাচোমড়া হতে পারতে তুমি। একজন সুন্দরী মহিলাকে বিয়ে করতে পারতে। কিছুই করলে না। কেমন যেন উদাস হয়ে যাচ্ছে।

দীপ হাসছিল মৃদু মৃদু। বলল, দুনিয়াটা যে সস্তা নয় তা কি নিজে এতদিনেও বুঝিসনি প্রীতম ?

দুনিয়া সস্তা নয় জানি। কিন্তু তোমার যে ভীষণ রোখ ছিল। ইস্কুলে তুমি কত ভাল ছাত্র ছিলে।

বিলু খুব দ্রুত পায়ে এসে প্রীতমের বিছানায় একটা প্লাস্টিক ফেলে তার ওপর চীনেমাটির বড় প্লেট রেখে বলল, লাগলে বোলো, বিন্দু দেবে।

বলেই বাইরের ঘরের দিকে চলে গেল বিলু। ঐ ঘর থেকে হট্টগোল আর গানবাজনার শব্দ আসছিল কিছুক্ষণ ধরে। বিলু সাবধানে মাঝখানের দরজাটা ভেজিয়ে দিল।

প্রীতম প্লেটের দিকে তাকাল, কিন্তু নড়ল না।

খা। দীপনাথ সম্মেহে বলে।

ইচ্ছে করছে না।

এই তো বলছিলি খিদে পেয়েছে।

এইমাত্র খিদেটা চলে গেল।

দীপনাথ মৃদু হেসে বলে, আসলে বোধ হয় কিছু একটা ভেবে তোর মনটা খারাপ হয়েছে।

প্রীতম ক্লিষ্ট একটু হাসে। বলে, তোমার মতো এত ভাল করে আমাকে কেউ চেনে না মেজদা। তুমি খুব সহজেই আমাকে বুঝতে পারো। কি করে পারো বলো তো !
দূর পাগলা ! দীপনাথ উদাস মুখ করে বলে, আসলে তোকে ছেলেবেলা থেকে দেখছি তো !

তাই হবে। বলে প্রীতম আবার ছাদের দিকে চেয়ে থাকে। বলে, তোমার কথা ভেবেই আমার মনটা খারাপ লাগছে সেজদা। তোমাকে এত আনসাকসেসফুল দেখব বলে কোনোদিন ভাবিনি।

তবে তুই কী ভেবেছিলি ? এয়ার কন্ডিশনড চেম্বার ? চার হাজার টাকা মাইনে ? ফ্লুয়েন্ট ইংরিজি বলিয়ে বাঙালী-মেম বউ নিয়ে পাটিতে যাওয়া ?

প্রীতম উদাস গলায় বলে, হলেই বা দোষ কি ছিল ?

দোষ কিছু নয়। তবে সেরকম হলে এই যেমন তোর কাছটিতে এসে বসে আছি এরকম বসতে পারতাম না। বাইরের ঘর থেকেই হয়তো বিদায় নিতাম। নয়তো লাবুর জন্মদিনে আসতামই না। হয়তো লাবুর জন্মদিনের চেয়েও ইমপোর্ট্যান্ট কোনো পাটি থাকত।

তাও মেনে নিতে রাজি আছি সেজদা। আমার কাছে এসে তোমাকে বসতে হবে না, লাবুর জন্মদিনের কথাও না হয় ভুলে গেলে, তবু সাকসেসফুল হও।

এসব কথায় ঠিক হাসি আসে না দীপনাথের। একটু বিষণ্ণ স্বরে সে বলে, তুই আমাকে খামোকা হীরো বানাচ্ছিস। এর চেয়ে বড় কিছু হওয়ার যোগ্যতাই আমার ছিল না। আমি এই বেশ আছি। আমার উচ্চাকাঙ্ক্ষা নেই, তাই কমপিটিশনও নেই কারো সঙ্গে, আর তাই অযথা উদ্বেগ নেই, অশান্তি নেই। এই একরকম কেটে যাচ্ছে তো।

প্রীতম দীপনাথের মুখের দিকে চেয়ে বুঝল, প্রসঙ্গটা আর বাড়ানো ঠিক হবে না। দীপনাথ সত্যিকারের অস্বস্তি বোধ করছে। সে আবার ছাদের দিকে চেয়ে রইল। তারপর যেন দীপনাথকে নয়, খুব দূরের কাউকে উদ্দেশ্য করে বলল, তোমার মনে আছে সেজদা, একবার আমার দশ-বারো বছর বয়সের সময় তুমি আমাকে হাকিমপাড়ার রাস্তায় খুব মেরেছিলে !

দীপনাথ প্রথম জবাব দিল না। স্থির হয়ে বসে রইল। তারপর মৃদু স্বরে বলল, হুঁ, তখন তো ছেলেমানুষ ছিলাম।

আমি জানি সেজদা, সে কথা ভাবলে তুমি আজও দুঃখ পাবে। কিন্তু মজা কি জানো ? কি ?

মজা হল, তুমি আমাকে মেরে মস্ত এক উপকার করেছিলে। বোধ হয় মার্বেলের জেস্তাল নিয়ে তোমার সঙ্গে আমার ঝগড়া লাগে। তারপর তুমি আমাকে হঠাৎ দুম দাম প্রচণ্ড মারতে শুরু করে দিলে। আশ্চর্য এই যে, তার আগে বা পরে জীবনে আমি কারো হাতে মার খাইনি। ইস্কুলে নিরীহ ভাল ছেলে, বাড়িতে চূড়ান্ত আদুরে, বড় হয়ে ল-অ্যাবাইডিং সিটিজেন, তাই আমাকে কেউ কখনো মারধর করার স্কোপ পায়নি। একমাত্র তুমি মেরেছিলে। জীবনে ঐ একবারই আমি মার খাই।

দীপনাথ দীর্ঘশ্বাস ডেড়ে বলে, সে কথা ভাবলে আজও আমার খারাপ লাগে। তুই-ই বা কেন ওসব ভাবিস ? কোন ছেলেবেলার কথা !

প্রীতম হাত তুলে দীপনাথকে থামিয়ে দিয়ে বলে, ভাবলে আমার দুঃখ হয় না। বরং খুব আনন্দ পাই। ব্যাপারটা তুমি ঠিক বুঝবে না। সেই বয়সে তুমি পাড়ায় পাড়ায় মারপিট করে বেড়াতে, ওসব ছিল তোমার জলভাত। আমার কাছে তো তা ছিল না। কেউ আমাকে ঘৃষি

চড় লাথি মারবে, ড্রেনের মধ্যে ফেলে দেবে এমন ঘটনা কল্পনাও করতে পারতাম না কোনোদিন। আমার গায়ে ফুলের টোকাটাও লাগেনি তখনো। তুমি যখন মারলে তখন ভয় বা ব্যথার চেয়েও বেশী হয়েছিল বিস্ময়। একজন আমাকে মারছে! ভীষণ মারছে! বীভৎস রকমের মারছে! আমি মার খাচ্ছি! আমার নাক আর দাঁতের গোড়া দিয়ে রক্ত পড়ছে! আমি নোংরা ড্রেনের মধ্যে পড়ে আছি! এইসব ভেবে আমি ভীষণ ভীষণ অবাক হয়ে গেছি তখন। আর চোখের সামনে চেনা পৃথিবীটাই তখন হঠাৎ বদলে যাচ্ছে। ঠিক যেন পুনর্জন্মের মতো একটা ব্যাপার। মার খেয়ে প্যান্টে পেছাপ করে ফেলেছিলাম। সবাই তাই দেখে হেসেছিল। অপমানে তখন মাথা পাগল-পাগল। পারলে তোমাকে তখন খুন করি। কিন্তু কি হল জানো? অদ্ভুত একটা পরিবর্তন এসে গেল আমার মধ্যে। তুমি জানো না, বড়সড় বয়সেও মাঝে মধ্যে আমি রাতে ঘুমের মধ্যে বিছানায় পেছাপ করে ফেলতাম। তোমার হাতে মার খাওয়ার পরই সেই বদ অভ্যাসটা একদম চলে গেল। সেই সঙ্গে আমার যে সাঙ্ঘাতিক ভূতের ভয় ছিল সেটা অর্ধেকের বেশী কমে এল। খেতে শুতে, জামা-জুতো পরতে আমি সবসময়ে মা বা দিদিদের ওপর নির্ভর করতাম। সেই থেকে সেই নির্ভরশীলতা আর একদম রইল না। মনে মনে ভাবতাম, যে রাস্তার ছেলের হাতে মার খায় তার বাড়ির আদর খাওয়া মানায় না। তার ভূতের ভয় হলেও চলে না। এইভাবে নিজের ওপর আধিপত্য এল। তোমার ওপর শোধ নেবো বলে আমি একটা ব্যায়ামাগায়ে ভর্তি হয়ে বহুদিন ব্যায়াম-টায়াম করে মাসল্‌ও ফুলিয়েছিলাম। কিন্তু ততদিনে তোমার সঙ্গে আমার গভীর ভাব হয়ে গিয়েছিল। কিন্তু সেই মার খাওয়াটা কোনোদিন ভুলিনি। আজ যে আমি একটা অসুখের সঙ্গে লড়াই করতে পারছি তা কি করে পারছি জানো? তোমার সেই মারের জন্য। তোমার হাতের মার আজও আমাকে চাবকে চালায়। বাইরের ঘরে যে বেলুনের থোপা ঝুলছে, দরজায় যে রঙিন কাগজের শিকলি তা আজ আমি নিজে তৈরি করলাম। সেই যে তুমি আমাকে দুনিয়ার সব বিপদ সম্পর্কে হুঁশিয়ার করে লড়াই করার দম দিয়ে ছেড়ে দিয়েছিলে, সেই দমে আমি আজও বহাল আছি সেজদা। নইলে কবে রোগের কথা ভেবে ভেবে শুকিয়ে মরে থাকতাম।

দীপনাথ ম্লান হেসে বলল, কোনোদিন তো বলিসনি এসব!

আজ মনে হল তাই বললাম।

দীপনাথ একটা দীর্ঘশ্বাস ছেড়ে বলল, বুঝলাম। কিন্তু এখনো তোর বেলুন-টেলুন ফোলাতে যাওয়া উচিত নয়। বিলু আমাকে বলছিল, তুই নাকি কিছু মানতে চাস না। চেয়ার থেকে পড়ে গিয়েছিলি নাকি আজ!

খুব অকপটে বাচ্চা ছেলের মতো হাসে প্রীতম। বলে, ও কিছু নয়। ব্যালানসটা রাখতে পারিনি।

একটু সাবধান হওয়া ভাল। বেশী বাড়াবাড়ি না-ই করলি।

প্রীতম করুণ মুখ করে বলে, কিন্তু আমি যে ভাল আছি সেজদা। খুব ভাল আছি।

তাই থাকিস।

কিন্তু তুমি কেন ভাল নেই?

আমি! অবাক হয়ে দীপনাথ বলে, আমি কি খারাপ আছি? বেশ আছি তো! ভালই আছি।

তোমার মুখ দেখে তা মনে হয় না।

দীপনাথ বেখেয়ালে নিজের গালে হাত বোলালো, তারপর খুব বোকার মতো একটু

হাসল। বলল, কেন, আজ তো দাড়িটাড়ি কামিয়ে এসেছি। মুখ দেখে খারাপ লাগার কথা তো নয়।

ইয়াকি মেরো না সেজদা। মনে রেখো, রোগে ভুগলে মানুষের অনুভূতি ভীষণ বেড়ে যায়। তুমি স্নো পাউডার মেখে এসে হোঃ হোঃ হিঃ হিঃ করতে থাকলেও আমি ঠিক বুঝতে পারতাম যে, তুমি আসলে ভাল নেই।

তখন থেকে কেন যে তুই কেবল টিকটিক করছিস! এমন পিছনে লাগলে আর ঘন ঘন আসব না দেখিস, বছদিন বাদে বাদে আসব।

প্রীতম একটু অদ্ভুত চোখে চেয়ে রইল, তারপর একেবারে আপাদমস্তক দীপনাথকে চমকে দিয়ে প্রশ্ন করল, তুমি কারো প্রেমে-টেমে পড়োনি তো।

এত চমকে গিয়েছিল দীপনাথ যে, বুকটা ধুকপুক করে উঠল ভীষণভাবে। আর ঠিক সেই সময়ে বাইরের ঘরের ভেজানো দরজাটা কে যেন খুলে ধরল। উন্মত্ত বোঙ্গো, ব্যানজো আর মাউথ অর্গানের সঙ্গে মার্কিনী গানের দুর্দান্ত শব্দ এসে তছনছ করতে লাগল ঘর। দীপনাথ কোনোকালেই ভাল অভিনেতা নয়। তার ধারণা, সে যা ভাবছে তা আশেপাশের সবাই টের পেয়ে যাচ্ছে। আজ পর্যন্ত কোনো গোপন কথাই ঠিকমতো গোপন করতে পারেনি দীপনাথ।

বাইরের ঘরের দরজা ভেজিয়ে বিলু রান্নাঘরের দিকে চলে যাওয়ার পর দীপনাথ মদু স্বরে বলল, দূর দূর!

প্রীতম কথাটা বিশ্বাস করল না। কিন্তু তেমনি অদ্ভুত গোয়েন্দার মতো দৃষ্টিতে চেয়ে খুঁটিয়ে দেখছিল দীপনাথকে। বাস্তবিক তার অনুভূতি আজকাল প্রখর থেকে প্রখরতর হয়েছে। এমন কি সে আজকাল বাতাসে অশরীরীদেরও বুঝি টের পায়। দীপনাথের চোখে মুখে সে আজ একটা হালকা ছায়া দেখতে পাচ্ছে। চোখের দৃষ্টি বড্ড চঞ্চল, চোখে চোখ রাখতে চাইছে না। প্রীতম আজকাল উকিলের মতো সওয়াল করতে পারে। তাই সে সহজ সরল পথে গেল না। বলল, তোমার কি আজকাল বকুলের কথা খুব মনে পড়ে?

বকুলের কথা! একটু যেন অবাক হয় দীপনাথ। বকুলের কথা একসময়ে ভুলে যাওয়া শক্ত ছিল বটে। কিন্তু এখন তা একদম মনে পড়ে না। সে মাথা নেড়ে বলল, কী যে বলিস পাগলের মতো। কোন ছেলেবেলার কথা সব! কবে ভুলে গেছি!

একটুও মনে নেই?

তা মনে থাকবে না কেন? মনে করতে চাইলে মনে পড়ে। এমনিতে পড়ে না। বকুল কিন্তু দেখতে ভারী সুন্দর ছিল। একদম রবি ঠাকুরের কোনো উপন্যাসের নায়িকার মতো।

দীপনাথ ম্লান হাসল। বলল, তা হবে। তোব মতো চোখ তো সকলের নেই। আমার অত সুন্দর লাগত না।

তবে ওর সঙ্গে ঝুলেছিলে কেন?

তা সে বয়সে কি আর বাছাবাছি থাকে!

তোমার আর সব ভাল, কিন্তু বরাবরই তুমি একটু চরিত্রহীন ছিলে কিন্তু সেজদা। বহুক্ষণ বাদে হঠাৎ খুব হোঃ হোঃ করে হাসে দীপনাথ। বলে, চরিত্রহীন! বলিস কি? একটু ছিলে। হাসলে কি হবে, আমি তো জানি।

কি জানিস?

সাইকেল নিয়ে বাবুপাড়ায় একসময়ে শীলাদের বাড়ির কাছে টহল মারতে। তারপর

নজর দিলে রেল কোয়ার্টারের লাগ্যর ওপর। তোমাকে সবচেয়ে জন্ম করেছিল কলেজপাড়ার বকুল।

শ্মিত হাসছিল দীপনাথ। একটা শ্বাস ফেলল।

প্রীতম বলল, অবশ্য জন্ম করতে গিয়ে বকুল নিজেই জন্ম হয়ে গেল শেষ অবধি।

পাশের ঘরে উৎসব চলছে। এই ঘরে দুজন মানুষ নিশ্চক্ক হয়ে আন্তে আন্তে ফিরে যাচ্ছিল উজানে।

বকুলকে কে যেন শিখিয়েছিল, ছেলেদের সঙ্গে মিশতে নেই। তার বিষণ্ণ, গম্ভীর, সুন্দর মুখে সবসময়ে একটা অদৃশ্য নোটিশ ঝুলত : আমার দিকে কেউ তাকাবে না, একদম তাকাবে না, খবরদার তাকাবে না।

বকুল নিজেও বোধ হয় কোনো ছেলের দিকে তাকায়নি কোনোদিন।

বকুল এমনিতে বাড়ি থেকে বেরোতো না কখনো। তবু ইস্কুলের পথে বা এবাড়ি ওবাড়ি কখনো যেতে হলে ছেলেরা তো টিটকির দিতে ছাড়ত না। কিন্তু বকুল উদাস অহংকারে রাণীর মতো হেঁটে চলে যেত। যখন কলেজে ভর্তি হল তখন কো-এডুকেশনেও তাকে কাবু করতে পারেনি। দীপনাথ তখন কলেজের শেষ ক্লাসে। সে বকুলের হাবভাব দেখে বলত, হাতি চলে বাজারে, কুস্তা ভুখে হাজারে।

দীপনাথ বকুলের প্রেমে পড়েছিল কিনা তাতে সন্দেহ আছে। তখন সে ছিল শিলিগুড়ির চালু মস্তান টাইপের ছেলে। দল পাকাত, ইউনিয়ন করত, মেয়েছেলে নিয়ে দেয়ালা করার সময় পেত না।

তবু বকুলকে নজরে পড়েছিল দীপনাথের। ভারী সুন্দরী, ভীষণ শাস্ত, অদ্ভুত অহংকারী। কাউকে পাত্তা দিত না। কারো দিকে তাকাত না। এমন কি পাছে তার দিকে কেউ তাকায় সেই ভয়েই বোধ হয় ভাল করে সাজগোজও করত না সে। অত্যন্ত সাদামাটা শাড়ি পরে আসত, মুখে কোনো রূপটান মাখত না, আঁচল জড়িয়ে শরীরটাকে খুব ভাল করে মমীর মতো ঢেকে রাখত। নজর থাকত সবসময়েই মাটির দিকে। সাহস করে দুচারজন ফাজিল ছেলে তার সঙ্গে নানা ছুতোয় কথা বলার চেষ্টা করেছে, বকুল জবাব দেয়নি।

এই বকুলের সঙ্গে দীপনাথের সেবার লেগে গেল হঠাৎ। ক্লাসের ব্ল্যাকবোর্ডে কোনো মেয়ের সঙ্গে প্লাস চিহ্ন দিয়ে কোনো ছেলের নাম লেখাটা কোনো অস্বাভাবিক ব্যাপার নয়। সর্বত্রই হয়ে থাকে। বকুলের নামও বছবার ব্ল্যাকবোর্ডে কেউ কোনো ছেলের সঙ্গে জুড়ে দিয়ে লিখেছে। একদিন সংস্কৃত ক্লাসে প্রফেসর এসে দেখলেন গোটা গোটা অঙ্করে ব্ল্যাকবোর্ডে লেখা : বকুল, তোমাকে আমি ভালবাসি—দীপনাথ চট্টোপাধ্যায়। লেখাটা ডাস্টার দিয়ে মুছবার আগে রসিক অধ্যাপক একটা ছোটো রসিকতা করেছিলেন। লেখাটার জন্য বকুল হয়তো কিছু মনে করত না, কিন্তু রসিকতাটার জন্যই বোধ হয় হঠাৎ ফুসে উঠেছিল মনে মনে।

পরদিন ঘটনাটা আর একটু গড়ায়। বকুল দীপনাথের লেখা একটা কুৎসিত প্রেমপত্র পায়। সেই চিঠিতে আদরসের ছড়াছড়ি। বকুল এমনিতেও বোধ হয় কিছু প্রেমপত্র পেত। সেগুলোকে পাত্তা দিত না। এই চিঠিটাকে একটু বেশী পাত্তা দিল।

সেদিন সোজা প্রিন্সিপালের ঘরে গিয়ে চিঠিটা তাঁর হাতে দিয়ে ভীষণভাবে কেঁদে ফেলল বকুল, দেখুন স্যার, কিসব লিখেছে !

প্রিন্সিপ্যাল অপ্রস্তুতের একশেষ। চিঠিটায় চোখ বুলিয়ে সরিয়ে রাখলেন। তারপর ডেকে পাঠালেন দীপনাথকে।

ইউনিয়নের পাণ্ডা হিসেবে দীপনাথকে ভাল করেই চিনতেন তিনি এবং অপছন্দও করতেন।

দীপনাথ এলে জিজ্ঞেস করলেন, এই চিঠি তোমার লেখা ?

দীপনাথ চিঠিটা পড়ল। তার মুখ বিবর্ণ হয়ে গেল পলকে। এ চিঠি সে লেখেনি। তার রুচিবোধ কখনো অত নীচে নামতে পারে না। তবু হাতের লেখাটা তার চেনা-চেনা ঠেকেছিল বলে চিঠিটা পকেটে রেখে সে অকপটে বলল, না। কিন্তু কে লিখেছে তা খুঁজে বের করতে পারব। বলে সে বকুলের দিকে ইঙ্গিত করে প্রিন্সিপ্যালকে বলল, আপনি নিশ্চিন্ত থাকতে পারেন, এই মহিলার প্রতি আমার কোনো দুর্বলতা নেই।

এই কথাটা দীপনাথ তেমন কিছু ভেবে বলেনি, শুধু আশ্চর্যের প্রয়োজনে ছাড়া। প্রকৃতপক্ষেও বকুলের প্রতি তার কোনো দুর্বলতা তো ছিলও না। মেয়েটিকে সে আর পাঁচজনের মতোই সুন্দরী বলে লক্ষ্য করেছিল মাত্র। তার বেশী কিছু নয়।

কিন্তু শাস্ত, শামুক স্বভাবের লাজুক ও অহংকারী বকুল কথাটার মধ্যে কেন সাজঘাতিক অপমান খুঁজে পেল সেই জানে। হঠাৎ সে দিশাহারার মতো দাঁড়িয়ে তীক্ষ্ণ স্বরে বলল, মিথ্যে কথা। আপনি মিথ্যে কথা বলছেন।

দীপনাথ অবাক হয়ে বলল, কোনটা মিথ্যে কথা ?

এ চিঠি আপনার লেখা। কাল ব্ল্যাকবোর্ডেও আপনি যা-তা লিখে রেখেছিলেন। আপনি অনেকদিন আমার পিছু নিয়েছেন। আপনি মিথ্যেবাদী, স্কাউন্ডেল।

বলতে বলতে রাগে বুদ্ধিবিক্রমে, আক্রোশে বকুল হঠাৎ নিজের পায়ের চটি খুলে ছুঁড়ে মারল দীপনাথের দিকে।

দীপনাথেরও কপাল খারাপ। চিঠিটা এদিক ওদিক না গিয়ে সোজা এসে লাগল তার কপালে।

প্রিন্সিপ্যালের চোখের সামনে এই ঘটনা।

দীপনাথ তেমন কিছু বলেনি। পকেট থেকে চিঠিটা বের করে প্রিন্সিপ্যালকে ফেরত দিয়ে বলেছিল আমি একাজ করিনি। আপনি এনকোয়ারি কবে দেখতে পারেন। যদি আমার কথা সত্যি হয় তবে এ মেয়েটির পানিশমেন্টের ব্যবস্থা করবেন কি ? আমি বিচার চাই।

ব্যাপারটা নিয়ে সারা কলেজ এবং শহরেও বেশ একটা হৈ-চৈ পড়ে গিয়েছিল। ফয়সালা হতেও অবশ্য দেবী হয়নি। চিঠির হাতের লেখা দীপনাথের ছিল না, সুব্রত নামে একটি মিটমিটে ডান ছেলে ঐ কাজটি করে দীপনাথকে ফাঁসায়। ব্ল্যাকবোর্ডের লেখাটা কার তা অবশ্য ধরা পড়েনি।

প্রিন্সিপ্যাল একদিন ইউনিয়নের পাণ্ডা সমেত দীপনাথকে নিজের ঘরে ডেকে পাঠিয়ে বললেন, ব্যাপারটা মিটিয়ে নাও। আফটার অল একটা মেয়ের ভবিষ্যৎ বলে একটা কথা আছে। তাকে তোমরা পাবলিকলি অপমান করলে তোমাদের পৌরুষ বলে কিছু থাকে না।

কিন্তু ইউনিয়নের নেতারা বলল, না জেনে যখন অন্যায় কাজ করেছে তখন পানিশমেন্টও তাকে নিতেই হবে। একজন নির্দোষ ছেলেকে আপনার সামনেই ও চটি ছুঁড়ে মেরেছে। একাজ কোনো ছেলে করলে তো আপনি ছেড়ে দিতেন না !

এই নিয়ে বিস্তারিত কথাবার্তা, তর্কাতর্কি হল।

অবশেষে প্রিন্সিপ্যাল বললেন, বকুলের কি শাস্তি হবে তা লেট হারসেলফ ডিসাইড। মেয়েটির স্বভাব চমৎকার। আমার মনে হয় ওকে সেলফ ইমপোজড পানিশমেন্ট নেওয়ার

স্বাধীনতা তোমাদের দেওয়া উচিত ।

এতে দীপনাথ ও তার বন্ধুরা আপত্তি করেনি ।

বিকেলের দিকে জানা গেল বকুল নিজের শাস্তি নিজেই ঠিক করে নিয়েছে । সে ছ'মাস খালি পায়ে কলেজে আসবে ।

এ পর্যন্ত ঘটনাটা ছিল অপমান, আক্রোশ, বিবাদে ভরা ।

কিন্তু বকুল যখন পরদিন থেকে খালি পায়ে কলেজে আসতে লাগল তখন ব্যাপারটা হয়ে দাঁড়াল ভাবী করুণ ।

বকুলের মাথা আরো হেঁট, চোখেমুখে অহংকারের বদলে নিকর কান্না । মেয়েটাকে প্রায় ভিখিরি করে ছেড়ে দিয়েছিল দীপনাথ । আর তখনই তাকে গভীরভাবে ভালবেসে ফেলেছিল ।

কিন্তু মফঃস্বল শহরে তখনকার দিনে মেলামেশা বা ভাব করা অত সহজ ছিল না ।

মাসখানেক বাদে ভরা বর্ষা একটি দিনে যখন কলেজে ভীড় খুব কম, তখন বারান্দায় হঠাৎ বকুলের সঙ্গে মুখোমুখি দেখা হয়ে গেল দীপনাথের ।

দীপনাথ বলল, বকুল, একটা কথা বলব ?

মাথা নত করে বকুল মৃদু স্বরে বলল, বলুন ।

আমি ব্যাপারটা মনে রাখিনি । আপনি কাল থেকে আর খালি পায়ে কলেজে আসবেন না । তার দরকার নেই ।

বকুল বিনীত এবং দৃঢ়স্বরে বলেছিল, আপনার কথায় তো হবে না ।

বেন হবে না ! ভিকটিম তো আমিই । আমিই সব অভিযোগ তুলে নিচ্ছি !

তা নিলেও হয় না । পানিশমেন্টটা তো আমি নিজেই নিয়েছি । ডিসিশনটা আমার । সেখানে অন্যের কথায় কিছু যায় আসে না ।

দীপনাথ উদ্বেগের সঙ্গে বলল, খালি পায়ে হেঁটে অভ্যাস নেই, শেষে যদি পেরেক টেরেক ফুটে ভাল-মন্দ কিছু হয় তো লোকে আমাকেই দায়ী করবে যে !

করবে না । এতে আপনার কোনো হাত ছিল না ।

শাস্তি স্বভাবের আড়ালে বকুলের যে একটি জেদী, একগুঁয়ে, নিজস্ব মন আছে তা হাড়ে হাড়ে টের পেল দীপনাথ । এও বুঝল, এ মেয়েটির সঙ্গে জমানো ততটা সহজ হবে না । বরফ এখনো গেলেনি ।

বরফ অবশ্য কোনোদিনই তেমন করে গলল না । তবে বকুলের সঙ্গে একটু মাখামাখি করার রাস্তা দীপনাথ অনেক চেষ্টায় করে নিয়েছিল । প্রায়ই দেখা হত তাদের । কথাবার্তা হত ।

শেষ পর্যন্ত বুঝি দীপনাথের ওপর একটু টান এসেছিল বকুলের । একদিন বলল, আপনি কি চাকরি-বাকরি করবেন না ? বি-এ পাশ করে ভ্যাবাগঙ্গারামের মতো আড্ডা মেরে বেড়াচ্ছেন যে বড় !

চাকরি করলে কি হবে ?

হবে একটা কিছু । আপনি একটা চাকরি জোগাড় করুন তো আগে ।

মনে মনে তখন বকুলকে প্রশ্ন করেছিল দীপনাথ, আমাকে বিয়ে করবে বকুল ?

মনে মনে বকুলের জবাব এল, হ্যাঁ ।

পিসেমশাইয়ের এক চেনা লোকের সূত্র ধরে কৌটোর কারখানায় চাকরি পেয়ে গেল দীপনাথ । কলকাতায় চলে এল ।

তারপর যা হয় । চাকরি বাঁচাতে আর কাজ শিখতে হিমসিম খেতে খেতে একদিন বকুল তার মন থেকে বেরিয়ে গেল । বকুলের কি হয়েছিল কে বলবে ! সে দীপনাথকে কোনোদিন মনের কথা তেমন করে জানায়নি তো ! তবে একজন মিলিটারি অফিসারকে বিয়ে করে সে ইউ পি-বাসিনী হয় বলে খবর পেয়েছিল দীপনাথ । খুব একটা দুঃখ পায়নি তার জন্য ।

এখন প্রীতমদের এই ঘরে অনেকখানি উজিয়ে দৃশ্যটা দেখে আবার বর্তমানে ফিরে আসে দীপনাথ । একটা বড় করে শ্বাস ছাড়ে ।

প্রীতম বলে, তাহলে বকুল নয় ।

দীপনাথ মৃদু স্নান হেসে বলে, না বকুল নয় ।

তবে কে সেজদা ?

কেউ নয় ।

আজ নয়, তবে কোনোদিন ইচ্ছে হলে বোলো ।

বলার কিছু নেই রে । আজ চলি ।

বলে উঠল দীপনাথ ।

আবার এসো । তুমি এলে ভাল লাগে ।

আসব । তুই ভাল থাকিস ।

আমি ভাল আছি । খুব ভাল আছি ।

দীপনাথ চলে গেলে প্রীতম খানিকক্ষণ চোখ বুঁজে থাকে । সে কিছু ভোলে না, সে অনেক কিছু দেখতে পায়, অনেক বেশী অনুভব করে । বিড়বিড় করে সে বলল, তোমাব কিছু হয়েছে সেজদা । তুমি ভাল নেই । তুমি কি এমন কারো প্রেমে পড়েছো যে তোমাকে ভালবাসে না ?

জানুয়ারির প্রথম সপ্তাহ থেকেই স্কুলে যেতে শুরু করল লাবু । ফেব্রুয়ারিতে বিলু যোগ দিল চাকরিতে । আড়াইশো টাকা মাইনে আর খাওয়া-দাওয়া কবুল করে একজন বেবী সিটার রাখা হয়েছে লাবুর জন্য ।

এইসব ঘটনাগুলো বাইরে থেকে দেখতে কিছুই নয় । কিন্তু প্রীতমকে এইসব ছোটোখাটো পরিবর্তন বড় গভীরভাবে স্পর্শ করে । বিলু বাড়িতে না থাকলে তার কাছে ভীষণ একঘেয়ে আর ফাঁকা লাগে বাড়িটা । নিজেকে বড় অসহায় মনে হয় । লাবু যতক্ষণ ইস্কুলে থাকে ততক্ষণ সে ভিতরে ভিতরে অস্থির হয়ে থাকে । সবচেয়ে খারাপ লাগে বেবীসিটার মেয়েটিকে । বয়স বেশী নয়, লেখাপড়া জানে, চেহারারও খানিকটা চটক আছে । কিন্তু মেয়েটা খুব অবাক চোখে প্রীতমকে বারবার তাকিয়ে দেখে । কী দেখে মেয়েটি ? প্রীতমের অস্বাভাবিক রোগা, শুকিয়ে যাওয়া হাত পা ? প্রীতমের নিরন্তর শুয়ে থাকা ? ও কি ভাবে, এ লোকটা আর বেশীদিন বাঁচবে না ?

যদি সবসময়ে একজন লোক প্রীতমকে লক্ষ করে তাহলে প্রীতম কিভাবে তার লড়াই করবে ? বারবার যে সে আত্মসচেতন হয়ে ওঠে ! চমকে যায় মাঝে মাঝে ! অস্বস্তি বোধ করে ?

সে একদিন বলেই ফেলল, বিলু, ওকে তাড়াও ।

কাকে ?

অচলাকে ।

কেন ? ও কি করেছে ?

কিছু করেনি । কিন্তু বাইরের অচেনা একজন সবসময়ে ঘরে থাকলে আমার ভারী অস্বস্তি হয় ।

ও মা ! তাহলে লাবুকে দেখবে কে ?

কেন, বিন্দু !

বিন্দুর যে ট্রেনিং নেই ! অচলা ট্রেন্ড নার্স । ভাল বেবীসিটার । অরুণের চেনা বলে কম নিচ্ছে । নইলে ট্রেন্ড বেবীসিটারের মাইনে কম করেও তিনশো ।

প্রীতম জানে, বলে লাভ নেই । সে যত ঘ্যানঘ্যান করবে তত বিলু তাকে খুব ভদ্রভাবে বোঝাবে, রাজি করানোর চেষ্টা করবে । কিছুতেই তবু ছাড়বে না অচলাকে । বিলু ঐরকম । খুব ঠাণ্ডা আর কঠিন ওর প্রতিরোধ ।

প্রীতম তাই হাল ছেড়ে দেয় । কিন্তু তবু তো তাকে বাঁচতেই হবে ! সব বিরুদ্ধতার বিরুদ্ধেই তো তার লড়াই । তাই সে অচলার বিস্ময়কে সহ্য করার নতুন শিক্ষণ নিতে চেষ্টা করে ।

শোনো অচলা ।

বলুন ।

পাখাটা একটু আস্তে করে খুলে দাও । গরম লাগছে ।

দিচ্ছি ।

তোমার বাড়িতে কে কে আছে ?

স্বামী, একটা ছেলে ।

তোমার ছেলেকে কে দেখাশোনা করে ?

সে এখন বড় হয়েছে । দশে পড়ল । কাউকে দেখতে হয় না ।

তোমার যে দশ বছরের ছেলে আছে তা তো মনে হয় না । কত বয়স তোমার ?

কত আর হবে ! আমার খুব অল্প বয়সে বিয়ে হয়েছিল ।

স্বামী কি করে ?

বিজনেস ।

এবার একটু শীত-শীত করছে । পাখাটা আর একটু কমিয়ে দাও বরং ।

পাখা তো এক-এ আছে, আর তো কমবে না । তাহলে বন্ধ কবে দিই ?

দাও । এখন কি গরম পড়েছে ?

তা একটু পড়েছে ।

তাই বলো, আমারও আজকাল গরমই লাগে ।

শীত তো চলে গেল ।

বিন্দুকে একটু চা করতে বলবে ?

বিন্দু বাড়ি নেই, এবেলা ছুটি নিয়েছে ।

ও । তাহলে থাক ।

ও মা ! থাকবে কেন ? আমি করে দিচ্ছি ।

এইভাবে লড়াইটা লড়তে থাকে প্রীতম । বেশ ভালই লড়ে । একদিন অচলার চোখ থেকে কৌতূহল খসে যায় । সে প্রীতমের দিকে আর আড়ে আড়ে তাকায় না ।

আপনি কখন গায়ে দিয়ে শুয়ে আছেন কেন ? এখন তো আর শীতকাল নেই ? শীতকাল নেই ? তবে এটা কি কাল ?

ফাল্গুনের শেষ । এখন আর শীত কোথায় ?

তাই বলো । আমারও কেমন হাঁসফাঁস লাগে আজকাল । চোখে ভাল দেখি না, বাইরে কি রোদের খুব তেজ ?

খুব তেজ । কিন্তু চোখে ভাল দেখেন না কেন ? ছোটো ছেলে তো ছানিটা কাটিয়ে দিতে পারত ।

চেয়েছিল কাটাতে । আমিই ভাবলাম, সে ছা-পোষা মানুষ । চোখ কাটাতে খরচ তো কম নয় । আর এ বয়সে চোখ নিয়ে আমি ক'রবটাই বা কি ?

চোখ কাটানোর নাম করে টাকা নিয়েছিল সেই গেলবার । শুনি দীপু ঠাকুরপোও টাকা দিয়েছিল । তা হলে কাটাল না কেন ?

সে টাকা কি আর রেখেছে ? গরীবের সংসার, কবে বোধ হয় ভেঙে খেয়ে ফেলেছে ।

খুব গরীব নয় । মাইনে তো খরাপ পায় না যত দূর জানি । থাকে অবিশ্যি গরীবের মতো । কিন্তু তা বলে নিজের বাবার চোখের ছানিটা পর্যন্ত কাটাতে নেই ? অমন ছেলের কাছে ছিলেন কি করে এতদিন ?

না, এমনিতে অযত্ন করত না । ডাক-খোঁজও করত খুব । বউমাটিও ভাল ।

ভাল হলেই ভাল । কিন্তু চোখ যখন কাটায়নি, তখন টাকাটা আমাদের ফেরত দিয়ে দিক ।

সে কি আর দিতে পারবে ? পাবে কোথায় ? ওদের সংসারে সারাদিন হা-টাকা যো-টাকা ।

আপনার নিজেরও তো কিছু টাকাপয়সা ছিল শুনেছি । সেটাও খুব কম হবে না । সেটাও কি গিয়েছে নাকি ?

আমার টাকা !

তা নয় তো কি ? কিছু টাকা তো আপনার ছিল ।' অস্তত পনেরো বিশ হাজার তো হবেই ।

কে জানে ! কোথাও আছে বোধ হয় । ডাকঘরে বা ব্যাংকে ।

আছে ঠিক জানেন ?

মনে নেই । আজকাল ভুলে যাই বড্ড ।

শাশুড়ীর মায়ের কিছু গয়নাও ছোট কতরির কাছে ছিল ।

বুলুর কাছে ? না, না, বুলুর কাছে থাকবে কেন ? গয়না ছিল আমার কাছে ।

ছিল মানে ? এখন কি নেই ?

কথাটা তা নয় । আসলে গয়নাগুলো আমি বউমাকে দিয়েছিলাম তার লকারে রাখতে ।

তবেই হয়েছে । বউমা তার লকার বোধ হয় আর জীবনেও খুলবে না ।

মটরমালা একটা হার কিন্তু দিইনি ।

সেটা তবে কোথায় ?

সেটা বউমা স্যাকরাকে দেখাতে চেয়ে নিয়েছিল । বেশী দিনের কথা নয় । বলল, ওরকম একটা হার গড়াবে । স্যাকরা প্যাটার্নটা দেখতে চেয়েছে ।

ফেরত দিয়েছিল ?

দিয়েছে বোধ হয়। আমার বাস্কাটা খুলে দেখ তো ! বাঁ দিকে একটা বহু পুরনো সিগারেটের কৌটো আছে। ওপরে কয়েকটা পইতে, তার তলায়।

দেখতে হবে না। ধরেই নিচ্ছি ওটাও নেই।

না, না, দেখই না ভাল করে। আমি লুকিয়েই রেখেছিলাম।

লুকিয়ে রাখতে গেলেন কেন ? চোর-ডাকাত না ছেলের ভয়ে ?

ভয়ে ঠিক নয়। তোমার শাশুড়ী যখন মারা যান তখন গলায় ঐটে ছিল। আমি খুলতে চাইনি। ভাবলাম যার জিনিস তার সঙ্গে যাক। সুরবালাকে মনে আছে তোমার ?

ও মা। নিজের পিসশাশুড়ীকে মনে থাকবে না কেন !

তা সেই সুরবালাই ওটা গলা থেকে খুলে আমার হাতে দিল। বলল, এটা কাউকে দিও না। এখনো রাঙা বউঠানের গায়ের তাপ এতে লেগে আছে। সেই থেকে হারটা ছিল। তোমার শাশুড়ীর কথা খুব মনে পড়তো বলে হারটা দেখতাম ঘুরিয়ে ফিরিয়ে। কি যেন বলছিলাম !

বলছিলেন, হারটা লুকিয়ে রেখেছিলেন।

ঠিক তাই। পাছে কেউ চুরি করে সেই ভয়ে। ভেবেছিলাম একেবারে শেষ সময়ে যে সেবা করবে তাকে দিয়ে যাবো। সময় করে একবার খুঁজে দেখো তো !

আমি দেখব কেন ? আপনার জিনিস আপনিই খুঁজুন। আমার ওতে লোভ নেই। তবে এও জানি, খুঁজলেও পাবেন না।

তবে কি ফেরত দিতে ছোটো বউমা ভুলে গেল ?

ভুলে যাবে কেন ? অত ভুলো মন তো ওর নয়।

তা হলে ?

তা হলে আর কি ? মনে মনে ওটা ছোটো বউমাকেই দান করে দিন।

দান করাই যায়। ছোটো বউমা আমার সেবা কিছু কম করেনি।

সেটা করেছে নিজের গরজেই। আপনি যতদিন বেঁচে থাকবেন ততদিনই মাসে মাসে টাকা পাওয়ার ব্যবস্থা ছিল যে ! আমরা পাঠাতাম। দীপু ঠাকুরপো পাঠাত।

দীপু ! বহুকাল দীপনাথকে দেখি না। সে কি তোমাদের এখানে মাঝে মাঝেই আসে ?

না, বহুকাল বাদে ঐ সেদিন এসেছিল, যেদিন আপনাকে সোমনাথ পৌঁছে দিয়ে গেল এখানে। তাড়া ছিল বলে চলে গেল একটু আগে। সঙ্গে ওর বসের বউ ছিল।

কি করছে এখন ?

চাকরিই করছে।

ভাল আছে তো ! বহুদিন দেখিনি।

দেখবেন। আসতে লিখে দেবো।

তোমাদের এই বাড়িটা খুব ভাল। বেশ খোলামেলা, হাওয়া-বাতাস আছে। আগেরবার দেখে গেছি, তখন এত দালান-কোঠা ওঠেনি।

এ সব ঘর পরে হয়েছে।

মল্লিনাথের কি অনেক সম্পত্তি, বউমা ?

খুব কম নয়।

আমার ছেলেদের মধ্যে মল্লিনাথই ছিল সব চেয়ে সাকসেসফুল। অথচ দেখ, তারই ভোগ করার কেউ নেই।

কেউ নেই কেন ? এই তো আমরা ভোগ করছি ।

সে ঠিক কথা । তবে তার নিজের তো কেউ নেই । পাঁচ ভূতে লুটে খাচ্ছে ।

আমরা কি ভূত, বাবা ?

তোমাদের কথা নয় । কী মুশকিল ! আমার কি বুড়ো বয়সে সব কথা ঠিকঠাক আসে ?

বললেন বলেই জিজ্ঞেস করলাম । সোমনাথ কি বলে ? আমরাই সেই পঞ্চভূত ?

বলুকে তোমরা দেখতে পারো না কেন বলো তো ? সে কিন্তু তার মায়ের খুব আদরের সন্তান ছিল ।

বেশী আদর দিয়েছেন বলেই তো এরকম ।

ছেলেপুলেরা তো বাপ-মায়ের আদরেরই হয় । তুমি কি আদর দাও না ?

দেবো না কেন ? তবে অন্যায় আদর দিই না ।

দীননাথ চট্টোপাধ্যায় তাঁর নিবিড় চুলে ভরা মাথাটা নাড়ালেন । বললেন, সবাই সে কথা বলে ।

কি বলে ?

বলে মেজো বউ খুব কড়া ধাতের । তা ভাল, আমরা সে আমলে সত্যিকারের ছেলেপুলে মানুষ করতে জানতাম না । ছেলেরা নিজেরাই যে যার মানুষ হত । এখনকার দিনের মা-বাবারা অনেক বেশী ছেলেপুলের যত্ন করে । তবে শাসনটা তেমন করে না । তুমি অবশ্য করো ।

আপনারাও যদি ছেলেপুলেকে শাসন করতেন তবে এরকম হত না ।

দীননাথ শঙ্কিত চোখ তুলে বলেন, কিরকম বলো তো ? আমার ছেলেপুলেরা কি খুব খারাপ ?

ভালও কিছু নয় ।

কেউ নয় ?

ভাণ্ডার ঠাকুরকে ধরছি না ।

দীননাথ খুশী হয়ে আবার মাথা নেড়ে বললেন, মল্লিনাথ ছিল ব্রিলিয়ান্ট । ওরকম ছেলে হয় না ।

দীপুও বড় ভাল । আপনার ছেলেপুলেদের মধ্যে এই দুজন অন্যরকম ।

শ্রীনাথ কি খুব সৃষ্টিছাড়া ? তাকে এখানে এসে অবধি ভাল করে দেখলামই না ।

কখন দেখবেন ? সেই সকালে বেরোন, রাত করে ফেরেন । কখনো ফেরেনই না ।

ফেরে না ? তবে রাতে কোথায় থাকে ?

তা কে বলবে ?

দীননাথ একটু ভাবেন । বলেন, ওর কি চরিত্র খারাপ ?

খৌজ নিয়ে দেখিনি ।

খারাপ হতে দিও না । এখনো আটকাও । স্বামী ছাড়া মেয়েদের কিছু নেই ।

আমি ও সব মানি না ।

আজকালকার মেয়েরা অবশ্য মানেন না । পুরুষগুলোও তো যাচ্ছেতাই । একটা কথা বলব, বউমা ?

বলুন ।

আমি মরে গেলে বলুকে একটু দেখো । যত খারাপ ভাবো ও তত খারাপ নয় ।

দেখব কি, দেখার আছেই বা কি ? সোমনাথ তো আর কর্চি খোকা নয় । বয়স হয়েছে,

বিয়ে করেছে, নিজের এবং অন্যের ভালমন্দ ভালই বুঝতে শিখেছে।

ও ওর মায়ের খুব আদরের ছিল।

তাতে আমার কি ? আমি তো মায়ের আদর দিতে পারব না।

তা বলিনি। বলছি, ওর বড় অভাব। ওকে একটু দেখো।

আপনি কি বলতে চাইছেন বুঝেছি। বোধ হয় সোমনাথই আপনাকে এ সব বলতে শিখিয়ে দিয়েছে।

দীননাথ একটু লজ্জা পেয়ে বলেন, যত যাই হোক, ওর দাদারই তো সম্পত্তি।

সেটা দাদা বেঁচে থাকতে বুঝে নিল না কেন ?

তুমি কি ওকে খুব অপছন্দ করো ?

করলেই বা। ওর তাতে কি যায় আসে ?

ও তোমারই দেওর।

তা হলেই বা কি ? আমাকে তো বউদি বলে ভাবে না। ভাবলে এখানকার লোকদের আমার ওপর ক্ষেপিয়ে তোলার চেষ্টা করত না।

ও কি তাই করছে ?

হ্যাঁ।

দীননাথ তাঁর এই বয়সেও প্রচুর কালো চুলে ভরতি মাথাটা চুলকোন দু হাতে। তারপর বলেন, ওকে কি তুমি লোক দিয়ে মার খাইয়েছিলে ?

ও তাই বলে নাকি ?

ঠিক তা বলে না। তবে আন্দাজ করে। মরতে মরতে বেঁচে গেছে।

তুষা একটা দীর্ঘশ্বাস ছাড়ে।

দীননাথ তুষার দিকে গভীরভাবে চেয়ে দেখছিলেন। ভাল দেখতে পান না বলে ভু কৌচকানো। বলুলেন, তবে এই কঞ্চলটা আর গায়ে দেবো না বলছো ?

না। শীত করলে পাতলা সুতির চাদর গায়ে দেবেন।

চাদর তো নেই।

আপনার যে কিছুই নেই তা আমি জানি। ও সব নিয়ে ভাববেন না। চাদর বিছানায় ঠিক থাকবে।

আচ্ছা। খুব ভাল। তোমার বেশ চারদিকে চোখ।

চোখ ছিল বলে বেঁচে আছি। নইলে চিল-শকুনে খেয়ে যেত। কঞ্চল দিন, রোদে দিয়ে তুলে রাখব।

থাক না, বিছানাতে আছে থাক। এ কঞ্চল বিলেতে তৈরী। মল্লিনাথ দিয়েছিল। একটা স্মৃতির মতো।

ভয় নেই বাবা। আমি শমিতা নই যে, নিয়ে ফেরত দেবো না।

ঐ দেখ, কী কথা থেকে কী কথা !

কঞ্চলটা দিন। শীত এলে ফেরত পাবেন।

আর শীত কি আসবে আমার জীবনে ? এটাই শেষ শীত বোধ হয়।

তুষা কঞ্চলটা নিয়ে চলে যায়। বিছানাটা একটু ফাঁকা ফাঁকা ঠেকে দীননাথের। কঞ্চলটার জন্য বড় উদ্বেগ। নিয়ে গেল, আবার দেবে তো ! ঠেকে ঠেকে শিখেছেন, একবার নিলে লোকে আজকাল আর কিছু ফিরিয়ে দেয় না।

দীননাথ আর শুয়ে রইলেন না। বসে বসে নিজের ছেলেপুলেদের কথা ভাবতে

লাগলেন। দীপনাথ মানুষ হয়েছিল বেদবালার কাছে। বেদবালার প্রথম সন্তান বাঁচেনি। তাই দীপুকে নিয়ে গেল। পরে আরো ছেলেপুলে হয়েছিল বটে, কিন্তু দীপুকে খুব বুক দিয়ে মানুষ করেছিল। বলত, দীপ হল আমার মেজো ছেলে।...বিলুর বড় বিপদ চলছে। জামাইয়ের নাকি বাড়াবাড়ি অসুখ!...শ্রীনাথ রাতে ফেরে না মাঝে মাঝে, এ ভাল কথা নয়।...ওদিকে ছোটো বউমা কি করছে কে জানে। সোমনাথ বলেছিল, রবিবারে রবিবারে আসবে। তা কত রবিবার চলে গেল। এল না তো! বউমার কি কিছু হল-টল?

খবর দেওয়া সঙ্গেও বদ্রী এল না দেখে এক ছুটির দিনে বিকেলে নিজেই তার খোঁজে বেরিয়েছে শ্রীনাথ।

তাড়া নেই। বাজারের কাছটায় মাদারির খেল হচ্ছে, তাই দাঁড়িয়ে দেখল খানিক। আবার রওনা হওয়ার মুখে পিছন থেকে রঘু স্যাকরা ডাকল, কে, শ্রীনাথদা নাকি? আরে রঘুবাবু, খবর কি?

কোন দিকে চললেন?

যাই একটু ঘুরে-টুরে আসি।

খবরটা শুনেছেন নাকি?

কি খবর?

আপনার শালাবাবুর নামে যে শচীন সরকারের ভিটেটা কেনা হয়ে গেল।

সরিতের নামে? কে কিনল?

কোনো খবরই রাখছেন না আজকাল।

শ্রীনাথ বিরক্ত হয়ে বলে, ওসব খবরে আমার ইন্টারেস্ট নেই, রঘুবাবু।

রঘু শ্রীনাথের বিরক্তিতা গায়ে মাখল না। খুব জরুরী গলায় বলল, পুকুর আর বাঁশবন সমেত বিষে সাতেক জায়গা। টাকাও নেহাত কম লাগেনি। বিষেতে তিন হাজার, তার ওপর পাকা একতলা বাড়িটার জন্য আরো হাজার আষ্টেক। আপনার শালা কি ব্ল্যাক-ট্যাক করে নাকি?

কে জানে কি করে?

সবাই এ নিয়ে খুব গরম। শচীন সরকারের বউয়ের সঙ্গে বিনোদ কুণ্ডুর ব্যবস্থা হয়েছিল। বিষেতে দুই হাজার আর বাড়ির বাবদ পাঁচ। আপনার শালা চড়া দাম হৈকে কিনে নিল।

তার আমি কি করব?

বিনোদ সহজে ছাড়বে না। টাকাটা কোথেকে এল তার খোঁজ নিচ্ছে। বাগে পেলে জেলে ভরে দেবে। বিনোদের এক ভায়রাভাই সার্কেল অফিসার।

দিক। আমি ওসবের মধ্যে নেই।

তা আমরা জানি।

আপনারা মানে?

এ অঞ্চলের সবাই। আমরা বলি, শ্রীনাথ চাটুজে কখনো কারো পাকা ধানে মই দিতে আসে না।

বলে থেমে গিয়ে রঘু গেলাসের ইঙ্গিত করে বলল, চলবে নাকি? এই কাছেই খালধারে আমার একটা ঠেক আছে।

না। কাজে যাচ্ছি।

আপনার বাবা এলেন শুনেছি! ক'দিন থাকবেন?

তা জানি না। আছেন তো এখন।
বাপমায়ের মতো জিনিস হয় না। গৃহদেবতা। যত্ন-আপ্তি করবেন। ঠুঁদের আশীর্বাদেই
সব।

তা বটে।

সোমনাথবাবু বাবাকে মাথায় করে রেখেছিলেন। ঐ হল ছেলের কাজ।
ঠিকই তো।

যাই তা হলে। ডান দিকে এই কাছেই রাম লাখন সিং-এর ঘর। চেনেন তো ?
না। আসিনি কখনো।

ভাল জায়গা। সব ব্যবস্থা আছে।

কি ব্যবস্থা ?

যা চান। সবই চলে ওখানে। দরকার হলে বলবেন।

রঘু খালধারের ধুলোভরতি রাস্তায় নেমে গেলে অনেকক্ষণ ভাবনাভরতি মাথা নিয়ে
আনমনে হাঁটে শ্রীনাথ। বাজার পেরিয়ে রেল লাইনের ধারে উঠে হাঁটা পথ ধরে। হাঁটতে
হাঁটতে একটু হাসে শ্রীনাথ। এরা তৃষাকে চেনে না।

তার মায়া হয়। ভাবে রঘু স্যাকরাকে ডেকে বলে দিয়ে আসে, শুনুন মশাই, তৃষা
আপনাদের একদিন এখান থেকে উচ্ছেদ করে ছাড়বে। কোন দিক থেকে ওর মার আসবে
তা টেরও পাবেন না।

বদ্রী ঘরে ছিল। ডাকতেই বেরিয়ে এসে খাতির করে ঘরে নিয়ে গিয়ে বসাল।
ঘরটা পাকা হলেও ছোটো আর গরম। পশ্চিম দিকে খোলা বলে রোদে তেতে আছে।
বদ্রী একটা হাতপাখা নাড়তে নাড়তে বলল, ক'দিন খুব ঝামেলায় ছিলাম বলে যেতে
পারিনি। যাবো-যাবো করছিলাম।

তুই তো গিয়েছিলি শুনলাম।

কোথায় ? বদ্রী আকাশ থেকে পড়ে।

তৃষা তাকে ডেকে পাঠিয়েছিল না ?

বদ্রী হেসে বলে, ওঃ, সে বহুদিন হল।

কেন ডেকেছিল ?

রায়পাড়ার একটা জমি বেচতে চাইছেন।

তৃষা জমি বেচতে চাইছে ? শ্রীনাথ খুব অবাক হয়।

তাই তো বললেন।

মিথ্যে বলিস না, বদ্রী। তৃষাকে আমি জানি সে কোনো কালে এক ইঞ্চি জমিও বেচবে
না। পারলে সে গোটা অঞ্চল, গোটা দেশ, মায় গোটা দুনিয়া কিনে নেবে।

বদ্রী ফাঁপরে পড়ে বলে, আজ্ঞে, আমি যা জানি তাই বললাম।

তুই চেপে যাচ্ছিস। তৃষা তাকে অন্য কাজে ডেকেছিল।

আজ্ঞে না।

আর তারপর থেকেই তুই আমার সঙ্গে দেখা-সাক্ষাৎ বন্ধ করেছিস।

বললাম তো, ঝামেলায় ছিলাম খুব। আমার সম্বন্ধীর অসুখ গেল। ছোট্টাছুটি,
ডাক্তারবন্দি, হাসপাতাল অবধি হয়ে গেল।

তৃষা তাকে কী বলেছে ?

আপনার ব্যাপারে কিছু নয়। জমি নিয়েই কথা ছিল।

আমার জন্য যে জমির খোঁজ এনেছিলি তার কি হল ?

যেরকম চাইছেন সেরকম পাচ্ছি না ।

বলেছিলি দুরের দিকে পাওয়া যাবে ।

শেষতক হয়নি । সব জায়গায় ছডোছড়ি করে বর্গা রেজিস্ট্রি হয়ে যাচ্ছে ।

ভাল দাম পেলে বর্গা ছাড়া জমিও লোকে বেচবে । আমি তো টাকায় পিছোচ্ছি না ।

দেখব । কয়েকদিনের মধ্যেই খবর পেয়ে যাবেন ।

না বদ্রী, খবর পাবো না । খবর তুই দিবিও না ।

আমার তাতে কি লাভ বলুন । খবর দিয়েই তো দু পয়সা ঘরে তুলি ।

তুষা কি তোকে ঘুষ দিয়েছে ?

কি যে বলেন ! বদ্রী জিব কাটে ।

লুকোস না । তুষা কি চায় না যে, আমি কোথাও জমি কিনি, চাষবাস করি ?

কোন স্ত্রীই বা চায় বলুন । কিন্তু কথাটা তা নয় ।

তবে কি ?

কথাটা হল, আপনি অন্য জায়গায় যেতে চাইছেন কেন ? এদিকে তো আপনার জমিজায়গার অভাব নেই ।

জমি কি আমার ?

বদ্রী চোখ লুকিয়ে বলে, আপনার ছাড়া আব কার ? বউঠান তো আর আপনার পর-মানুষ নন ।

এসব কথা তোকে শেখাল কে ? তুষা ?

না, না । কি যে বলেন ।

বদ্রী, আমি জানি তুষা তোকে হয় ভয় দেখিয়েছে, নয় তো ঘুষ দিয়েছে ।

বদ্রীর মুখটা আস্তে আস্তে বদলে যাচ্ছিল । কেমন অসহায়, ফ্যাকাশে, ভয়ে ভরা ।

হাতপাখা রেখে বদ্রী নীচু স্বরে বলে, দোষ ধরবেন না তো ? তা হলে বলি ।

বল, বদ্রী । আমি কাউকে কিছু বলব না । কিন্তু ব্যাপারটা আমার জেনে রাখা দরকার ।

বউদিকে আমরা ভয় খাই । উনি চোখ রাঙালে সে কাজ করতে ভরসা হয় না ।

তা হলে তুষা তোকে চোখই রাঙিয়েছে ?

ঠিক চোখ রাঙানো নয় । বরং ডেকে পাঠিয়ে অনেক মিষ্টি মিষ্টি কথাই বললেন । শেষে জিজ্ঞেস করলেন, আমি আপনাকে জমির খোঁজ দিতে পেরেছি কিনা ।

তুই কি গাড়লের মতো সব বলে দিলি ?

না বললেও উনি ঠিকই খোঁজ রাখেন । চতুর্দিকে ওনার চর ঘুরে বেড়াচ্ছে । প্রমথবাবুর জমি কিনতে চেয়েছিলাম সে কথা প্রমথবাবুই বলে এসেছেন বউদিকে ।

* তোকে কী বলল তুষা ?

আমার কাছ থেকে সব কথা বের করে নিয়ে বললেন, উনি এখন অন্য জায়গায় জমি-টমি কিনলে এখানকার সব দেখাশোনার অসুবিধে হবে ।

বাজে কথা । আমি এখানকার কিছুই দেখাশোনা করি না ।

সে আমি জানি । বউদি যা বললেন তাই বললাম আপনাকে ।

তারপর কি হল ?

উনি বললেন, আর জমি-টমি তোমাকে দেখতে হবে না । নিজের কাজ নিয়ে থাকো । জমির যদি তেমন কোনো খবর পাও তা হলে আমাকে জানিও । কাছেপিঠে হলে আমরা

কিনব ।

শ্রীনাথ একটু দীর্ঘশ্বাস ছাড়ল । তারপর বদ্রীর দিকে চেয়ে বলল, তুই আমার নিজের লোক ছিলি রে, বদ্রী । তুষা তোকেও হাত করল ।

বদ্রী কাঁচুমাচু হয়ে বলে, আমার দোষ নেই দাদা, ছা-পোষা মানুষ ।

শচীন সরকারের ভিটে কেনা হচ্ছে, সে খবর রাখিস ?

রাখি । আপনার শালার নামে ।

কেন ?

ল্যান্ড সিলিং আছে না ? জমি কিনে গেলেই তো আর চলবে না । আপনার নামেও বিস্তর জমি কেনা হয়েছে, আপনি কি জানেন ?

না তো ! খুব অবাক হয়ে শ্রীনাথ বলে ।

হয়েছে ।

কিনলেই হল ? আমার সইসাবুদ লাগবে না ?

আপনার ওকালতনামায় অন্য লোক কিনছে ।

ওকালতনামা আমি কাউকে দিইনি তো ?

তার আমি কি বলব বলুন । যা জানি তাই বলছি ।

জানিস যদি তবে খোলসা করে বল । আমার ওকালতনামা অন্যে পায় কি করে ? পেয়েছে । আমি ভাল করে জানি ।

তবে কি বলছিস আমার সইও জাল হচ্ছে আজকাল ?

আমি তাই বললাম নাকি ? হয়তো কোনো সময়ে দিয়েছেন, এখন মনে নেই ।

বাজে কথা বলিস না । আমার এখনো ভীমরতি ধরেনি ।

বদ্রী জবাব দিল না । আস্তে আস্তে হাতপাখা নাড়তে লাগল । খুব আস্তে করে বলল, শুধু আপনি নয় । বন্দু, মংলু, এমন কি স্ক্যাপা নিতাইয়ের নামেও বিস্তর জমি কেনা হয়েছে ।

সেই যে সেজোকাকা এসে গেছে তারপর থেকে সজলের প্রায়ই খুব সেজোকাকার কথা মনে পড়ে । সজলের হাত ধরেছিল সেজোকাকা । হাতটা দারুণ শক্ত । ধরলেই বোঝা যায় সেজোকাকার গায়ে খুব জোর । অত চওড়া কবজি আর কারো দেখেনি সে ।

ইস্কুলে সে একদিন বন্ধুদের বলল, আমার সেজোকাকা একবার খালি হাতে বাঘ মেরেছিল ।

খালি হাতে ? যাঃ ।

সেজোকাকার গায়ের জোর তো জানিস না । ঝুঁষি মেরে পাথর ফাটিয়ে দেবে ।

তোর সেজোকাকা কুংফু জানে ? কারাটে ?

ফুঃ । সেজোকাকা যখন শিলিগুড়িতে ছিল তখন একবার সিনেমা হলে মারপিট লাগে ।

একা পঞ্চাশজনকে মেরে ঠাণ্ডা করে দিয়েছিল ।

গুল ঝাড়িস না ।

আচ্ছা, আবার এলে তোদের দেখাবো সেজোকাকাকে ।

কিরকম দেখতে ?

ইয়া লম্বা, অ্যায়াসা গুল্লু গুল্লু মাসল্ ।

বুকের ছাতি কত ?

ছেচল্লিশ ।

আমার দাদারই তো বাহান্ন ।

তোর দাদাকে আমি দেখেছি রে, কমল । মোটেই বাহান্ন হবে না ।

তবে কত ?

বিয়াল্লিশ হবে বড় জোর ।

দাদা কার কাছে ব্যায়াম শেখে জানিস ? বিট্টু ঘোষের আখড়ায় ।

জানি । সেজোকাকাক আমাকে কুংফু শিখিয়ে দেবে বলেছে । কারাটেও ।

আমার দাদাও কারাটে জানে ।

আমার সেজোকাকার মতো নয় ।

তোর সেজোকাকাক যে বাঘটা মেরেছিল সেটা কত বড় ?

দশ ফুট । খবরের কাগজে বেরিয়েছিল । দেখিসনি ?

আমাদের বাড়িতে খবরের কাগজ রাখাই হয় না ।

বেরিয়েছিল । আসল রয়েল বেঙ্গল ।

তোর বাবার গায়ে কিন্তু একদম জোর নেই ।

সজল ফুসে উঠে বলে, কি করে বুঝলি ?

একদিন দেখি স্টেশনের দিক থেকে আসছে তোর বাবা । চায়ের দোকানে কতকগুলো লোক বসে থাকে না সব সময় । সেই লোকদের একজন চৈচিয়ে তোর বাবাকে আওয়াজ দিল, ঐ যে শ্রীচরণনাথ যাচ্ছে, দেখ দেখ ।

বাবা কি করল ?

তোর বাবা মাইরি সব শুনতে পেল । ঘাড় ঘুরিয়ে তাকালও । তখন সেই লোকটা না—হিঃ হিঃ—

সেই লোকটা কি ?

সে যা অসভ্য কাণ্ড না ।

বল না ।

সেই লোকটা দু হাতের আঙুল দিয়ে তোর বাবাকে খুব অসভ্য একটা জিনিস দেখিয়ে বলল, যাও যাও, এইটে করো গে ।

লোকটা কে ?

নাম জানি না । খুব মস্তানের মতো দেখতে ।

বাবা কিছু বলল না ?

কিছু না । মাথা নীচু করে চলে এল ভেড়ুয়ার মতো ।

সজলের গা রি রি করে রাগে । সে বলে, ঠিক আছে, মামাকে বলে দেবো ।

তোর মামা কি করবে ?

মামাকে তো চেনো না । কী করবে দেখো ।

যাঃ, যাঃ, তোর মামাকে জানি । ঐ তো মহাদেবের দোকানে বসে থাকে বিকেলের দিকে । লোকে বলে বেকার ।

মালদায় মস্তান ছিল, জানো না তো ।

বাড়িতে ফিরে সজলের নানা সময়ে বারবার কথাটা মনে পড়ে । স্টেশনের কাছে একটা লোক তার বাবাকে আওয়াজ দিয়েছিল ।

বাবা যে কেন এরকম তা বোঝে না সজল । সে অবশ্য বাবাকে ভয় পায় । ভীষণ ভয় পায় । কিন্তু সেই সঙ্গে এও জানে, বাবাকে সে ছাড়া আর কেউ ভয় পায় না । পান্তাও দেয়

না কেউ ।

বাবার জায়গায় সেজোকাকু হলে নিশ্চয়ই অন্যরকম হত । যেই মস্তানটা আওয়াজ দিত অমনি সেজোকাকু গিয়ে দুই চটকানে লোকটাকে মাটিতে ফেলে মুখ দিয়ে রক্ত বার করে ছেড়ে দিত । বাবা কেন সেজোকাকুর মতো নয় !

দাদু এসে সজলের কথা বলার আর একটা লোক হয়েছে । নইলে মা, দিদিদের বা বাবাকে সে নাগালে পায় না কখনো । দাদুকে পায় ।

দাদু !

বলো, ভাই ।

তুমি সেজোকাকুর ঠিকানাটা জানো ?

না । তবে তোমার বাবা বোধ হয় জানে । ঠিকানা দিয়ে কি করবে ?

চিঠি লিখব । কাকু আমাকে একটা এয়ারগান দেবে বলেছিল ।

এয়ারগান দিয়ে কি করবে ?

লোককে ভয় দেখাবো । আচ্ছা দাদু, সেজোকাকু কি কুংফু জানে ?

কি ফু বলছিস ? বলে দীননাথ কানের পিছনে হাত দিয়ে ঝুঁকে পড়েন ।

হি হি করে হেসে ফেলে সজল । দাদু এসব জানে না ।

॥ বাইশ ॥

রতনপুরে পাঁচখানা নতুন সাইকেল রিকশা চালু হল । পাঁচখানাই তুষার । মাইল তিনেক দূরে তুষা খুলেছে হাসকিং মিল । এই পাঁচখানা রিকশা আর মিল অবশ্য তুষা নিজের নামে করেনি, করেছে সরিতের নামে ।

একটা হালকা পলকা সস্তা মোপেড কিনে দিয়েছে সরিৎকে । সে এখন হাসকিং মিল আর রিকশা নিয়ে দিনরাত গলদঘর্ম । প্রথমটাতেই বুঝতে যা একটু সময় লাগে । তারপর আন্তে আন্তে সব কাজেরই একটা বাঁধা ছক দাঁড়িয়ে যায় । তখন আর কষ্ট হয় না । বহুকাল বাদে খাটুনিতে নেমে প্রথমটায় হাঁফ ধরে যাচ্ছিল সরিতের । এখন ক্রমে সয়ে যাচ্ছে ।

মোপেড জিনিসটা সরিতেব তেমন পছন্দ নয় । মোপেড মানেও সে জানে না । তবে আন্দাজ করে, মোটর কাম পেডাল, অর্থাৎ যখন মোটরে চলবে তখন একরকম, মোটর খারাপ হলে পেডাল মেরে সাইকেলের মতোও চালানো যাবে । সুতরাং গাড়িটা না রাম না গঙ্গা । সাইকেলও নয়, মোটর সাইকেলও নয় । তবে কলকজা বিশেষ জটিল নয় বলে সহজেই সারানো যায় । বেশী খরচাও নেই । এক লিটার তেলে পঞ্চাশ পঞ্চাশ কিলোমিটার চলে যেতে পারে । তবু এই কলের গাড়িতেও দুইদিক সামলাতে সরিতের দমসম হয়ে যায় ।

আজকাল রোদের তেজ বেড়েছে । গরম পড়ে গেছে বেশ । ভোর হতে না হতেই হাসকিং মিলে গিয়ে হাজির হতে হয় । মিল চালু করে দিয়েই কাজ শেষ হয় না । খাতায় এনট্রি রাখতে হয় । মাঝে মাঝে ধান কিনতেও বেরোতে হয় তাকে । দুপুরে বাড়িতে খেতে আসার নিয়ম নেই । এক গেরস্তর ঘরে মাসকাবারী বন্দোবস্তে দুপুরের ভাতের ব্যবস্থা করে দিয়েছে তুষা । কাজেই সারাদিন সরিৎ এখানে বন্দী । বিকেলে বাড়ি ফিরে স্নান সেরে একটু জিরোতে না জিরোতেই বেরোতে হয় দোকানঘরে ।

তুষা তিন মেয়ের নামে ঝকঝকে এক স্টেশনারি আর মুদির দোকান দিয়েছে বাজারের

কাছে। দোকানের নাম ত্রয়ী। রতনপুরে যা পাওয়া যেত না সেইসব জিনিস মনে করে রেখেছিল তৃষা। ত্রয়ীতে এখন সেইসব জিনিস পাওয়া যায়। নুডল, লিপস্টিক, স্টেনলেস স্টিলের বাসন, ভাল শ্যাম্পু কিংবা সাবান, দামী সিগারেট পর্যন্ত। প্রথম প্রথম খুব একটা বিক্রি ছিল না। কিন্তু লোকের আজকাল নতুন নতুন জিনিস কেনার আগ্রহ দেখা দিয়েছে। দোকানও তাই রমরম করে চলছে। ত্রয়ীতে কোনো দু নম্বর খারাপ কোয়ালিটির মাল নেই। সবই বাজারের এক নম্বর জিনিস। লোকে তৃষাকে দেখতে পারুক চাই না পারুক তার দোকান থেকে চোখ বুজে জিনিস কেনে।

দোকানে দুজন কর্মচারী রেখেছে তৃষা। সন্ধ্যাবেলায় সরিৎ গিয়ে বসে স্টক আর বিক্রির টাকা মেলায়। মূদীর দোকানের স্টক মেলানো রোজ অসম্ভব। তবু যথাসাধ্য হিসেব নিতে হয়। রাত দশটা পর্যন্ত এই করতে চলে যায়। তারপর বাড়িতে ফিরতে না ফিরতেই শেষ ট্রেনের ট্রিপ মেরে রিকশা ফেরত দিচ্ছে আসে রিকশাওয়ালারা। তাদের কাছে রোজের পয়সা গুনে নিতে হয়। সব কিছুতেই লাভের অর্ধেক বখরা সরিৎ পায়। শুধু ত্রয়ীর আয় থেকে তার ভাগ নেই। দোকানের টাকা জমা হচ্ছে মেয়েদের বিয়ের জন্য। তবু প্রথম মাসের হিসেবেই সরিৎ পেল প্রায় চারশো টাকা। পেয়ে তার মাথা ঘুরে গেল।

এত টাকা একসঙ্গে নিজের করে কোনোকালে পায়নি সরিৎ। কি করবে তা ভেবে পাচ্ছিল না। টাকাটা অবশ্য এক রাত্রির বেশী রইল না তার কাছে। পরদিনই তৃষা ডেকে একশো টাকা মায়ের নামে আর পঞ্চাশ টাকা মালদায় বড়দার নামে পাঠাতে বলে দিল। আব বলল, বাকি টাকা থেকে খাইখরচ বাবদ আমাকে একশ টাকা দিবি। যা থাকবে তা থেকে পঞ্চাশ টাকার বেশী হাতখরচ রাখবি না। বাকিটা ডাকঘরে অ্যাকাউন্ট খুলে জমা দিয়ে আয়। পাশবই আমার কাছে দিয়ে যাবি।

সরিৎ কিছুটা ম্লান হয়ে গেল বটে, কিন্তু মেজদীর ওপরে যে কথা চলে না তাও সে জানে।

পরের মাসেই তার আয় আরও পঁচিশ টাকার মতো বেড়ে গেল। সরিৎ বুঝতে পারছিল, এই হারে চললে তার টাকা খায় কে। তবে মুশকিল হল, তার একটু গান-বাজনা আসত, সিনেমা দেখার নেশা ছিল। সেগুলো এবার যায় বুঝি। সকাল থেকে রাত পর্যন্ত মেজদি একেবারে নিশ্চিহ্ন করে দিয়েছে তার।

এর মধ্যেই আবার তাকে অন্যরকম কাজেও লাগায় তৃষা। একদিন ডেকে বলল, স্টেশনের কাছে চায়ের দোকানে কয়েকটা বাজে লোক নাকি বসে থাকে, একটু নজর রাখিস তো। তোর জামাইবাবুকে টিটকিরি দেয়, সজল ইস্কুলে গুনে এসেছে।

সরিৎ একটু চনমনে হয় কথাটা শুনে। মারাপট, হাস্যামা তার পছন্দসই জিনিস।

তৃষা বোধহয় তার মনের ভাব বুঝেই বলল, তা বলে খুনোখুনি করতে হবে না। সঙ্গে গঙ্গা থাকবে, যা করার সেই করবে। তুই তোর জামাইবাবুকে আগলে রাখিস।

জামাইবাবু যে ভেড়ুয়া তা সরিৎ জানে। তবে আবার অন্যরকম তেজও আছে। পাঁচখানা রিকশার মধ্যে একখানা রোজ রাতে স্টেশন থেকে শ্রীনাথকে নিয়ে আসবে, এরকম একটা কথা হয়েছিল। কিন্তু শ্রীনাথ রাজি হয়নি। বলেছে, না, আমি এমনিই আসতে পারব।

সরিৎ ব্যাপারটা খুব ভাল বুঝল না। গঙ্গাকে সে চেনেও না। তবে মেজদীর কাছে বেশী কিছু জানতে চেয়ে লাভ নেই। দরকারও নেই।

পরদিন সন্ধ্যাবেলা হাসকিং মিল থেকে ফিরে আসার পর গঙ্গার দেখা পেল সরিৎ। বড়

ঘরের দাওয়ায় এক কোণে অঙ্ককারে গা ঢাকা দিয়ে বসে আছে। সামনে একটা কাঠের চেয়ারে তৃষা।

তৃষা ডেকে বলল, এই গঙ্গাকে দেখে রাখ। কাল তোর সঙ্গে যাবে।

সরিং দেখল, আবছা অঙ্ককারে গাঁয়ার গম্ভীর ধরনের একটা লোক। চোখে চোখ রেখে তাকাত্তে জানে না। চেহারাটা খুব মজবুত। পরনে ধুতি আর হাফহাতা শার্ট। সরিতের সঙ্গে কথাই বলল না। শুধু যাওয়ার আগে ভাঙা চাষাড়ে গলায় বলল, আমি স্টেশনের ধারেই থাকব। আপনি রাতের দিকে আসবেন।

গঙ্গা কে, কী তার পেশা তা কিছুই জানা গেল না। এমন কি মুখটাও ভাল করে দেখতে পায়নি সরিং। মেজদিও কোনো পরিচয় দেওয়ার দরকার মনে করল না। তবে সরিং বুঝল, এ হল মেজদির পোষা গুণ্ডা। শহরে গুণ্ডাদের মতো চতুর না হলেও বোধহয় কাজের লোক। গাঁয়া গুণ্ডারা বোধহয় অন্যরকম হয়।

স্টেশন থেকে একটা পাকা রাস্তা আঁকাবাঁকা হয়ে ঢুকে এসেছে জনবসতির মধ্যে। সামনেই একটা টোরাস্তা। তার মোড়ের কয়েকটা কাঁচা ঘরে চা মিষ্টির দোকান। বাইরে পেতে রাখা বেঞ্চে সর্বদাই কিছু লোককে সন্দের পর বসে থাকতে দেখা যায়। হ্যাজাক জ্বলে, চায়ের গন্ধ ছড়িয়ে পড়ে।

পরদিন রাত আটটা নাগাদ সবিংকে তাদের রিকশাওয়ালা ফাণ্ডলাল স্টেশনের চত্বরে এনে নামিয়ে দিল। লোকজন কেউ নেই এত রাতে। জামাইবাবু কোন গাড়িতে আসবে তাও কিছু ঠিক নেই। সরিং মালদা থেকেই একটা চেন সঙ্গে করে এনেছে। খুব কাজের জিনিস। প্যাকটের পকেট থেকে সেটা বের করে একবার দেখে নিল। ধারেকাছে গঙ্গা নেই, তবে নিশ্চয়ই কোথাও গা ঢাকা দিয়ে আছে। কী করতে হবে মেজদি তা বলে দেয়নি। রতনপুরে তার দুচারজন বন্ধু হয়েছে। তাদের কাউকে সঙ্গে আনলেও হত। কতজনের সঙ্গে পাল্লা দিতে হবে তা তো জানে না।

আজকাল সরিতের পকেটে সিগারেটের প্যাকেট এবং দেশলাই থাকে। এতকাল থাকত না। বরাবর দুটো বা চারটে সিগারেট কিনে খালি প্যাকেটে ভরে রাখত। সিগারেট থাকলেও বেশীর ভাগ সময়েই দেশলাই থাকত না। পথচলতি লোককে থামিয়ে তাদের জ্বলন্ত সিগারেট থেকে ধরিয়ে নিত। এমন সব উজ্জ্বলিত আজকাল করতে হচ্ছে না। স্টেশনের কাঠের বেঞ্চে বসে নিজের ভরা প্যাকেট থেকে সিগারেট চোঁটে তুলে নিজেরই দেশলাই দিয়ে সেটা ধরিয়ে খুব একটা আত্মতৃপ্তি বোধ করল সরিং। মাস গেলে এখন তার রোজগার সোয়া চারশ। মেজদির জন্য এখন জান দিয়ে দিতে পারে সে।

একটা ডাউন গাড়ি চলে যাওয়ার প্রায় সঙ্গে সঙ্গেই আপ গাড়িরও আলো দেখা যাচ্ছিল। গাড়ি থেকে অনেকজনাই নামল, কিন্তু শ্রীনাথকে দেখা গেল না।

হাই তুলে বসে বসে নিজের অবস্থায় এই পরিবর্তনের কথা সুখের সঙ্গে ভাবছিল সরিং। আর কিছুদিন পব হচ্ছে করলে সে বিয়েও করতে পারে। মালদায় দু-চারটে মেয়ের সঙ্গে তার ভাব হয়েছিল বটে। কিন্তু আজ, বেশ কিছু দূরে বসে এবং অনেকটা সময়ের পার্থক্যে সে আবেগহীন ভাবে বিচার করে দেখল সেই মেয়েদের কাউকেই তার খুব একটা প্রয়োজন বলে মনে হচ্ছে না। বরং রতনপুর হাইস্কুলের একজন ছাত্রীকে তার চোখে ধরে গেছে। আলাপ-টালাপ অবশ্য হয়নি এখনো। কিন্তু সেটা কোনো ব্যাপার নয়।

আবার একটা আপগাড়ি এল। চলেও গেল। দুটো সিগারেট শেষ হয়ে গেল সরিতের।

ফাণ্ডলাল এসে বলল, গাড়ি কি গ্যারাজ করে দেবো বাবু ? আমার মেয়েটার জ্বর ।
সরিং একটু কড়া চোখে চেয়ে বলল, আরও দুটো গাড়ি দেখব । তারপর যা হয় করা
যাবে । এখন যা ।

পরের গাড়িটাতেই শ্রীনাথ এল ।

জামাইবাবু যে কলকাতায় ফুটি লোটে একথা সবাই জানে । জামাইবাবুর চোখে মুখে
ফুটি করার একরকমের ছাপও পড়ে গেছে । প্রায় রোজই সামান্য নেশা করে আসে ।
আজও এসেছে । ঠিক মাতাল নয়, তবে খুব আয়েসে পা ফেলছে, শরীরে গা ছাড়া ভাব,
চোখ লালচে এবং উজ্জ্বল ।

গেটের কাছে শ্রীনাথের কনুইটা ছুঁয়ে সরিং ডাকল, জামাইবাবু !

শ্রীনাথ অবাক হয়ে বলে, আরে তুমি ?

ভচাক করে মদের গন্ধটা সরিতের শাক দিয়ে পেটে ঢুকে যায় । সেও এক সময়ে
খেয়েছে এসব । তবু এখন গা গুলিয়ে উঠল ।

শ্রীনাথের অহংকারী স্বভাবের কথা সবাই জানে । সরিং তাকে পাহারা দিয়ে নিয়ে যেতে
এসেছে জানলে মারাত্মক চটে যাবে । সরিং তাই সাবধানে বলল, এদিকে একটু কাজ ছিল ।

শ্রীনাথ বোকাটে একরকম মাতলা হাসি হেসে বলল, হ্যাঁ, তোমরা সব কাজের মানুষ ।

ফাণ্ডলালের রিকশাটা দাঁড় করানো আছে । যেতে চান তো—

ও তোমাদের রিকশা তোমরা চড়বে । আমি দিবা হেঁটে যেতে পারব ।

তাহলে আপনি এগোন, আমি পিছু পিছু আসছি ।

সরিং শ্রীনাথের সঙ্গে যেতে চায় না । শ্রীনাথের সঙ্গে তাকে দেখলে মোড়ের মান্তানরা
টিটকিরি নাও দিতে পারে । শ্রীনাথকে তারা ভেড়ুয়া বলে জানে, কিন্তু সরিংকে তো জানে
না ।

শ্রীনাথ মাথা নেড়ে বলে, এসো । তবে আমার সঙ্গে থাকার এমনিতে দরকার নেই ।

আপনার দরকার নেই সে জানি । পথটা একসঙ্গে হেঁটে যাবো আর কি ।

এসো । বলে শ্রীনাথ এগোয় ।

সরিং রেল কোয়ার্টারের পিছনে মেঠো পথটা আগেই ঠিক করে রেখেছিল । পাকা রাস্তা
এড়িয়ে ওটা ধবে দোকানঘরগুলোর পিছন দিকে গিয়ে ওঠা যায় ।

মেঠো পথে নেমেই পকেট থেকে চেনটা বের করে সরিং একবার নিপুণ হাতে বাতাসে
সেটা ঘোরাল । বাঁ করে ভোমরার ডাক ডেকে বাতাস কেটে এসে বশীভূত সাপের মতো
সেটা আবার কুণ্ডলী পাকাল তার হাতে ।

শ্রীনাথের অনেক আগেই সে দোকানঘরের পিছনে পৌঁছে যায় । এখানে গাছপালায়
অভাব নেই । শাস্তভাবে সে একটা বড়সড় গাছের আবডালে দাঁড়িয়ে দোকানঘরগুলোর
দিকে লক্ষ রাখে । প্রথম দোকানটাই বড় এবং সেখানেই ছোকরা আড্ডাবাজদের সংখ্যা
বেশী । অন্তত ছজনকে সে দেখতে পায় বাইরের বেনচে বসে হাঃ হাঃ হিঃ হিঃ করছে ।
বয়স কুড়ি থেকে ত্রিশের মধ্যে । কাউকেই তেমন পোক্ত মান্তান মনে হল না । একজন খুব
চুঁচিয়ে গান গাইছে, চাঁদনী চাঁদসেই হোতা হ্যায়, সিতারো সে নহি । কোনো হিন্দি ছবির
গান । ছেলেটা গায়ও ভাল । একটু উৎকর্ষ হয়ে শুনছিল সরিং । এ ছবিটা তার দেখা নয়
নিশ্চয়ই । কাছেপিঠে কোথাও চলছে কি ? কিংবা কলকাতায় ? একদিন সময় করে
গিয়ে দেখে আসবে ।

শ্রীনাথ মস্তুর পায়ে মোড়ে এসে পড়ল । চলার ভঙ্গীতে আত্মবিশ্বাস নেই, তাড়া নেই,

এমন কি কোনদিকে যাবে তারও যেন ঠিক নেই। মোড়ে এসে চারদিকে চেয়ে তবে বাঁ দিকে ফিরল।

মুঠো থেকে চেনটার একটা কোণা ছেড়ে দিল সরিৎ।

ঠিক এমন সময়ে পিছন থেকে তার কবজিটা আলতো হাতে ধরে ফেলল কে যেন। সরিৎ বাঘের মতো পিছু ফিরতেই গঙ্গা বলল, এখানে আপনি জড়াবেন না। বাবুকে নিয়ে বাড়ি চলে যান। হাস্যামা হলে মা ঠাকরোন যেন এতে না বেঁধে যান।

তবে আমি এলাম কেন?

দরকার হলে আমি হাঁক মারব।

দুজনে গাছের ছায়ায় দাঁড়িয়ে কটমটে চোখে তাকিয়ে দেখে, শ্রীনাথ বড় দোকানঘরটা বসুখে আলোর চৌহদ্দিতে গিয়ে পড়ল। সঙ্গে সঙ্গে একটা ছোকরা লাফিয়ে উঠে বলল, আরে শ্রীচরণ চাটুজে যাচ্ছে ঐ দ্যাখ।

আর একজন, আজ খুব টেনেছে রে।

কাছটা টেনে খুলে দিয়ে আয় না।

আমার কাকা কি বলে জানিস? শ্রীনাথ বৌদি আর ভূষা দাদা।

হোঃ হোঃ! হিঃ হিঃ!

শ্রীনাথ একবার খুব উদাস চোখে দোকানটার দিকে তাকাল। চোখে রাগ নেই, ঘৃণা নেই, কেবল বুঝি বৈরাগ্য বা অবহেলা আছে।

সরিতের চোখ বাঘের মতো জ্বলে ওঠে।

গঙ্গা নীচু স্বরে বলে, আপনি কতবাবুর পিছু পিছু যান। একটু আস্তে হাঁটবেন।

সরিতের এই প্রস্তাব পছন্দ নয়। তার রক্তে রীতিমতো জ্বালা ধরেছে, হাত-পা নিসপিস করছে। সে বলল, অত কায়দা কানুনের দবকার কি?

দরকার আছে। ঠাণ্ডা গলায় গঙ্গা বলে।

সরিৎ কথা বাড়ায় না। মেজদির ব্যাপার মেজদিই ভাল বুঝবে। ভিতরের জ্বালা চেপে রেখে রাগে গনগন করতে করতে পাকানো চেনটা হাতের মুঠোয় চেপে বেখে সে বড় রাস্তা ধরে জামাইবাবুর পিছু নেয়। দোকানঘরটার সামনে একবার থমকে দাঁড়িয়ে আঙুনে চোখে তাকায় ছোকরাদের দিকে।

ছোকরারা চোখ ফিরিয়ে নেয়। তাদের স্বাভাবিক জৈব বুদ্ধিই তাদের বলে দেয়, এবার গোলমাল করাটা ঠিক হবে না।

ছোকরারা একটা টু শব্দ করলেও সরিৎ লাফিয়ে পড়ত। তা হল না। সরিৎ কয়েক কদম এগিয়ে অঙ্ককারে দাঁড়িয়ে একবার ফিরে চাইল। গঙ্গাকে এখনো দেখা যাচ্ছে না। লোকটা, করছে কি?

জামাইবাবু খানিকটা এগিয়ে গেছে। যাক। লোকটা আস্তে আস্তে হাঁটছে। সরিৎ পা চালিয়ে ধরতে পারবে। সে রাস্তা থেকে সরে ধারে দাঁড়িয়ে একটা সিগারেট ধরাল।

একটু বাদে হঠাৎ ওপাশের আঁধার থেকে গঙ্গা বেরিয়ে এসে দোকানটার সামনে দাঁড়াল, তার হাতে একটা খাটো লোহার রড। ভবগতিক আকাট খুনীর মতো। ছোকরাগুলো বোধ হয় গঙ্গাকে চেনে। গঙ্গা দু-চারটে কথা বলে দোকানটার দিকে দু কদম এগোতে না এগোতেই তড়াক তড়াক করে লাফিয়ে উঠে ছোকরাগুলো এধার ওধার দৌড়ে পালাতে থাকে। সরিৎ হাসে। একপাল ভেড়ুয়া। এগুলোকে ধাওয়া করতে খামোখা এত কায়দা কসরৎ। গঙ্গা একটা ছোকরাকে ধরে পেটাচ্ছে, দূর থেকে দেখতে পেল সরিৎ। দুই ছোকরা
১৭৪

এদিকে পালিয়ে আসছিল। সরিৎ চেনটা খুলে দু'কদম এগিয়ে রাস্তার মাঝবরাবর গিয়ে দাঁড়ায়। ছোকরা দুটো পালাতে পালাতে পিছু ফিরে দোকানঘরের কাণ্ডটা দেখছে। সরিৎকে লক্ষ্য করেনি।

সরিতের চেন একবার ঘুরে এল। 'বাপ রে' বলে চোঁচিয়ে পয়লা ছোকরা বসে পড়তে না পড়তেই দু'নম্বরকে লাং মেরে ফেলে দিয়ে সরিৎ তার ঝুঁতনীতে বুটশুদ্ধ একটা লাথি জমিয়ে দিল। এতসব কবতে গা একটু ঘামলও না তার। পয়লা ছোকবার গলায় চেনটা ফাঁসের মতো পরিয়ে টেনে দাঁড় করাল সবিৎ। কদর্য একটা খিস্তি দিয়ে বলল, আর কখনো গলা দিয়ে আওয়াজ বোরোবে?

এ ধরনের কঠিন মাঝ ছোকরা বোধহয় জীবনেও খায় নি। কেমন ভাবলা হয়ে গেছে। কানের ওপরে অনেকটা জায়গা চেন-এ কেটে গিয়ে কঁধের জামা পর্যন্ত রক্তে ভিজে যাচ্ছে। ঐ অবস্থাতে ছেলেটা মাথা নেড়ে বসা গলায় বলল, না।

ঠিক এই সময়ে পিছন থেকে জামাইবাবুর স্পষ্ট তীক্ষ্ণ গলা শুনতে পায় সে, কী হচ্ছে এখানে? সরিৎ, ওদের মারছে কেন?

সরিৎ চেনটায় একটু টাইট মেরে জামাইবাবুর দিকে ফিরে চেয়ে হাসল। বলল, আপনাকে রোজ আওয়াজ দেয় এই সুমুন্দির পুতেবা। মুখগুলো বন্ধ করে দিয়ে যাচ্ছি।

শ্রীনাথ একটু বুঝি থমকে যায়। তারপর হঠাৎ প্রচণ্ড রাগে ফেটে পড়ে চোঁচিয়ে ওঠে, কে বলেছে তোমাকে এ কাজ কবতে? আওয়াজ দেয়, বেশ করে। একশবার আওয়াজ দেবে। ছেড়ে দাও। ছেড়ে দাও শীগগীর।

সরিৎ যতটা অবাক হয়, ততটাই রেগে যায়। তেজী গলায় বলে, কী বলছেন আপনি?

শ্রীনাথ তেড়ে এসে বলে, ঠিকই বলছি। ওরা আওয়াজ দেয় ঠিকই করে। যা সত্যি তাই বলে। তাতে তোমাদের অত গায়ের জ্বালা কেন?

চেন-এর ফাঁস থেকে ছেলেটাকে ছেড়ে দিয়ে সবিৎ ধমক দিয়ে বলে, আপনার মাথা খারাপ হয়ে গেছে! যান তো, বাড়ি যান। যা করার আমরা করছি।

কেন বাড়ি যাবো? ইয়ার্কি পেয়েছো? গুণ্ডামি করবে আর কেউ কিছু বলতে পারবে না! আমি এক্ষুনি পুলিশে যাচ্ছি। তোমাদের সবাইকে মজা দেখিয়ে ছাড়ব।

জামাইবাবুর এই বাবহারে একেবারে হাঁ হয়ে গেল সরিৎ। লোকটা বলে কি? নিজের শালাকে ধরিয়ে দিতে পুলিশে যাবে? খুব বেশী টেনেছে নাকি আজ?

তাকে আরো অবাক কবে দিয়ে শ্রীনাথ দৌড় পায়ে দোকানঘরগুলোর দিকে এগোতে এগোতে চোঁচাতে লাগল, এতগুলো লোক থাকতে চোখের সামনে গুণ্ডামি করে চলে যাবে? আপনারা বসে দেখছেন কি সব? এক্ষুনি পুলিশে খবর দিন। বৈধে নিয়ে যাক দুটোকে...

দু-চারজন ডেইলি প্যাসেনজার, চায়ের দোকানের খদ্দের, মালিক আর বয় বেয়ারা মিলে মোড়ে নেহাত কম লোক নেই। চোঁচানিতে তারা বেরিয়ে এসেছে।

মার-খাওয়া দুটো ছেলেই রাস্তার ওপর গাড়লের মতো বসে আছে। সরিতের হাতে রক্তমাখা চেন। জামাইবাবু লোক জড়ো করছে।

এই সংকট সময়ে ছায়ার মতো গঙ্গা এসে পাশে দাঁড়াল। হিংস্র গলায় বলল, আপনাকে হুজ্জত করতে মানা করেছিলাম, শুনলেন না।

সরিৎ অন্যমনস্ক গলায় বলে, লোকটা পাগল হয়ে গেছে।

পাগল নয়। শয়তান। আপনি দেবী করবেন না। ফাগুলালের রিকশা সামনে এগিয়ে

দাঁড় করানো আছে, সোজা বাড়ি চলে যান। পুলিশ এলে বিপদে পড়ে যাবেন।

জামাইবাবুকে কি করবে ?

সে আমি দেখছি। আপনি যান তো। কাজ একেবারে গুবলেট করে দিয়েছেন আপনি।

সরিং ব্যাপারটা বুঝল না। তবে গঙ্গার পরামর্শটা মেনে নিল। একটু এগিয়ে গিয়ে রিকশাটা দেখে চড়ে বসল। ফাগুলাল উর্ধ্বশ্বাসে নিয়ে এল বাড়িতে।

তুষা রান্নাঘরে বসে ঠাকুরের কাজকর্ম দেখছিল।

সরিং গিয়ে জরুরী গলায় ডাক দিল, মেজদি, একটু বাইবে এসো।

তুষা তাড়াছড়ো কবল না। কিছু একটা বুঝে নিয়েই যেন একটু বিরক্ত গলায় বলল, ঘরে যা, যাচ্ছি।

সরিং কোথায় কি গুণ্ডগোল করে ফেলেছে তা সে নিজেও বুঝতে পারছিল না। ঘরে এসে নিঃশব্দে জামা কাপড় বদল করল।

তুষা শান্ত ভঙ্গীতে এসে দরজায় দাঁড়িয়ে জিজ্ঞেস করল, কী হয়েছে ? সরিং একটু উত্তেজিত গলায় ঘটনাটা সংক্ষেপে জানিয়ে স্কাভের সঙ্গে বলল, জামাইবাবু সব কাঁচিয়ে দিয়েছে।

তুষা কঠিন চোখে ভাইয়ের দিকে চেয়ে ছিল। ঠাণ্ডা এবং বিরক্ত গলায় বলল, তুই গঙ্গার কথা শুনলি না কেন ?

ছেলে দুটো আমার ওপর এসে পড়ল যে। একটু রঙ চড়াল সরিং।

তুষা অনুত্তেজিত গলায় বলে, আমি খোঁজ নিয়েছি, ছেলেগুলো পর্জি হলেও ষণ্ডাণ্ডা নয়। তোকে মারতে আসেনি।

আমি ভাবলাম বুঝি...সরিং আমতা আমতা করে।

এর পর থেকে যেটা বলব সেটা ভাল করে শুনবি, বুঝবি। যা করলি তাতে সবাই জেনে যাবে এ ঘটনায় আমাদের হাত আছে। গঙ্গা অনেক সাবধানে কাজ করত।

সরিং বলল, লোকে জানতে পারত না। শুধু জামাইবাবু ঐ পাগলামিটা না করলে—

তোর জামাইবাবু যে ওরকম কিছু করবে তা জানি বলেই তোকে বলেছিলাম ঠুকে আগলে রাখতে। তুই ঠুকে নিয়ে চলে এলে ওরকম করতে পারত না।

এখন তা হলে কি করব ?

কিছু করতে হবে না। চুপচাপ থাক।

পুলিস এলে ?

তুষা বোধ হয় একটু হাসল। কিন্তু আবছা অন্ধকারে ভাল দেখতে পেল না সরিং। তবে শাস্ত আত্মবিশ্বাসের কণ্ঠস্বর শুনতে পেল, পুলিশ আসবে না।

মেজদি চলে গেলে সরিং উত্তেজিত মাথায় বসে জামাইবাবুর সাইকোলজিটা বুঝবার চেষ্টা করছিল। ওরকম কাণ্ড করার কোনো যুক্তিসঙ্গত কারণই সে খুঁজে পাচ্ছে না।

একটু বাদে উঠে সে একবার বাইরের দিকে বেরোলো। জামাইবাবুর ঘর এখনো অন্ধকার তালাবন্ধ। বুকটা গুরুগুরু করে উঠল তার। লোকটা যদি সত্যিই পুলিশে যায়। বহু লোক সাক্ষী আছে।

স্ক্যাপা নিতাই আজ ঘরেই আছে। ডাকতেই বেরিয়ে এসে এক গাল হেসে বলল, আজকাল খুব কাজের লোক হয়েছে সরিংবাবু।

তা হয়েছে। চল খালধারে গিয়ে একটু গাঁজা টেনে আসি। বহুকাল টানি না।

গাঁজা পাবো কোথায় ? পয়সা-টয়সা ছাড়ো কিছু।

ছাড়ছি। বদমায়েসী করিস না। আজ একটু গাঁজা না টানলেই নয়।

চোখ ছোটো করে নিতাই জিজ্ঞেস করে, কেন, কি হয়েছে ?

সে অনেক কথা।

নিতাই টপ করে ঘরে ঢুকে গাঁজার বুলি নিয়ে বেরিয়ে এসে ঘরের ঝাঁপ টেনে দিয়ে বলল, চলো।

শ্রীনাথের চেষ্টামেচিতে মোড়ের মাথায় বিস্তর লোক জমে গেছে এতক্ষণে। পরের ট্রেনের ডেলি প্যাসেনজাররাও জুটেছে। আচমকা দু-দুটো গুণ্ডার হাতে দোকানঘরের আড্ডাবাজ ছেলেরা ঘায়েল হওয়ায় কিছু লোক হয়তো খুশীই, কিন্তু শ্রীনাথ তাদের খুশী থাকতে দিতে চায় না।

সে সমবেত জনসাধারণকে বলছিল, আপনারা কি ভেড়া হয়ে গেছেন নাকি ? যে ছেলোটো চেন চালিয়েছিল তাকে আমি চিনি। পুলিশের কাছে আমি তার নামধাম বলব। আপনারা সাক্ষী দেবেন।

ভীড়ের মধ্যে গঙ্গাকে কোথাও দেখা যাচ্ছিল না। কিন্তু তার জায়গা নিয়েছে আর একজন রোগা পাতলা ছোটোখাটো লোক। তাকে এ অঞ্চলের সবাই চেনে। এত ধূর্ত এবং ফেরেববাজ লোক দুটো নেই। তার নাম গণি। যখন যে রাজনৈতিক দল টাকা দেয় তখনই সে সেই দলের হয়ে গ্রামেগঞ্জে কাজ করে বেড়ায়। মামলা মোকদ্দমায় তার মাথা খুব সাফ। জমি-ঘটিত আইন-কানুন তার নখদর্পণে।

পিছন থেকে গলা তুলে গণি জিজ্ঞেস করে, ছেলোটোর নাম যদি জানেন তবে সবার কাছে বলছেন না কেন ? সাক্ষী দেবার কথাই বা উঠছে কিসে ? লোকে যদি তাকে না চিনে থাকে তবে কি বানিয়ে বলবে নাকি ?

গণিকে শ্রীনাথও ভালই চেনে। এও জানে গণি অন্তত তৃষার বিপক্ষের লোক নয়। তবু সে তেজী গলায় বলল, যে ছোকরা দুজন মার খেয়েছে তারা দেখেছে।

তারা কোথায় ? কে মার খেয়েছে ?

ঐ যে রাস্তায়, বলে শ্রীনাথ আঙুল তুলে দেখায় পিছনবাগে। কিন্তু রাস্তায় ছেলে দুটোকে দেখা গেল না।

গণি বলল, কেন বুটমুট ঝামেলা করছেন ? মাল খেয়ে আছেন বুঝতে পারছি। বাড়ি গিয়ে আরাম করুন গে।

শ্রীনাথ রাগে লাল হয়ে চাঁচিয়ে বলল, এইমাত্র এত বড় ঘটনাটা ঘটে গেল সকলের চোখের সামনে সেটা কি ইয়ার্কি নাকি ?

সবাই গুনগুন করছিল। একমাত্র গণিই গলা তুলে বলল, ঘটনা আবার কি ? একটা গাঁইয়া লোক হঠাৎ কি কারণে ক্ষেপে গিয়ে একটা ছেলেকে দুটো কিল ঘুষি চালিয়ে পালিয়ে গেল। তাই নিয়ে এত হইচইয়ের কিছু নেই।

গাঁইয়া লোক ! শ্রীনাথ অবাক হয়ে বলে, কিসের গাঁইয়া লোক ! ও তো গঙ্গা।

গণি খুব হাসল। বলল, গঙ্গা না কে তা কে দেখেছে ? আপনি মাল-খাওয়া চোখে কি দেখতে কি দেখেছেন।

শ্রীনাথ বলল, আলবৎ গঙ্গা। সবাই দেখেছে।

দেখেছে তো বলুক না। বলছে না কেন ?

শ্রীনাথ চাঁচিয়ে বলল, আপনারা বলুন তো, লোকটা গঙ্গা নয় ?

শ্রীনাথ ভুল করেছিল। একথা ঠিক গঙ্গাকে প্রায় এক ডাকে লোকে চেনে। তাকে মারতে লোকে দেখেছেও। কিন্তু সে কথা কেউ কখনো স্বীকার করবে না।

করলও না। দু-চারজন বরং বলল, শ্রীনাথবাবু, বাড়ি চলে যান। যা হওয়ার হয়ে গেছে।

শ্রীনাথ অসহায়ভাবে বলল, একটা ছেলের মাথা ফেটে রক্ত পড়ছিল, আমার নিজের চোখে দেখা।

চারদিকের গুঞ্জনটা বেশ চোঁচামেচিতে দাঁড়িয়ে গেল। শ্রীনাথের কথা কেউ শুনছে না। সবচেয়ে আশ্চর্যের কথা, যাদের ওপর হামলা হয়েছিল সেই আড্ডাবাজ ছেলেগুলোর একটারও টিকি দেখা গেল না।

ভীড় ঠেলে একটা খালি রিকশা এগিয়ে এল। চালাচ্ছে তুষার আর এক বশংবদ বীরু। তুষারই রিকশা। ঝকঝকে নতুন। সামনে এসে শ্রীনাথকে বলল, বাবু, উঠে পড়ুন, মা আপনার জন্য ভাবছেন।

গণি এক ফাঁকে কাছে এসে দাঁড়িয়েছে। কাঁধে হাত রেখে একটু চাপ দিয়ে বলল, উঠে পড়ুন। মালটা কিন্তু আজ একটু বেশী টেনে ফেলেছেন।

শ্রীনাথ কঠিন স্বরে বলল, আমি কিন্তু অত সহজে ছেড়ে দেবো না গণিমিয়া। বলে রাখলাম।

কী করবেন? পুলিশে যাবেন? যান না, কে ঠেকাচ্ছে?

যাবো। তাই যাবো।

পুলিস হাসবে। আপনার তো সাক্ষীই নেই।

দরকার হলে টাকা দিয়ে সাক্ষী জোটাবো। তা বলে এত বড় অন্যায় সহ্য করব না।

তার চেয়ে বাড়ি গিয়ে মাথাটা ঠাণ্ডা ককন। তারপর যা বিবেচনা হয় করবেন! বলে একরকম ঠেলেই তাকে রিকশায় তুলে দেয় গণি। রোগা হলেও গণির কবজিতে জোর বড় কম নয়। আঙুলগুলো লোহার মতো শক্ত। ছাড়াতে গিয়েও পারল না শ্রীনাথ। কবজিতে ব্যথা পেয়ে 'উঃ' করে ককিয়ে উঠল। রিকশায় উঠতে না উঠতেই বীরু হাওয়ার বেগে রিকশা ছেড়ে দিল। একটু বাদে ছায়ার মতো রিকশার পাশাপাশি একটা সাইকেল চলে এল। তাতে গণি।

পাশাপাশি চলতে চলতে গণি বলল, ঐ ছোঁড়াগুলো যে রোজ আপনাকে টিটকিরি দেয় সেটা কি আপনার ভাল লাগে শ্রীনাথবাবু?

শ্রীনাথ উগ্রস্বরে বলল, বেশ করে টিটকিরি দেয়। কেন দেবে না?

আপনাকে বা আপনার বউকে অপমান করলে আপনার লাগে না?

না। ওরা সত্যি কথাই বলে।

আপনি কি মরদ নন? আমাকে বললে তো আমি অনেক আগেই চামড়া তুলে নিতাম।

ওরা ঠিক কাজই করে।

সে আপনার যা খুশি ভাবুন। কিন্তু থানা-পুলিস করলে একটু ভেবেচিন্তে করবেন।

আমি কাউকে পরোয়া করি না।

লোকে তো হাসবে। আজও তো লোক হাসালেন।

এটা তোমাদের ষড়যন্ত্র গণি। তোমরা তুষার টাকা খাও।

হি হি। কি যে বলেন! গণি বোধ হয় জিভ কাটল। তারপর হালকা গলায় বলল, ঠাকরোনের সঙ্গে আপনার বনিবনা নেই তো সেটা হল ঘরের ব্যাপার। পাঁচজনকে সেটা

জানাতে যাওয়া কি ভাল ? ঘরের কথা পরকে জানালে যে ঘরটা বাজার হয়ে যায় ।

॥ তেইশ ॥

আমি যদি এই কোম্পানি ছেড়ে দিই তাহলে আপনি কী করবেন ?

দীপনাথ একটু ভেবে বলল, কি করে বলি ? আপনি কি সত্যিই ছাড়ছেন ?

ছাড়তে পারি । একটা ইংলিশ ফার্ম ভাল অফার দিয়েছে । পুরোপুরি ইংলিশ নয়, ইনডিয়ান কোলোবোরের আছে ।

ভাল অফার কি ?

খুবই ভাল অফার । ডিরেক্টব করবে বলে প্রমিস করেছে । কিন্তু সেটা কোনো কথা নয় । আমার প্রশ্ন হল, আপনি কি ক্লববেন ?

দীপনাথ মিস্টার বোসের দিকে চেয়ে ছিল । বোস ঠ্যাং ছাড়িয়ে বেতের আরামদায়ক চেয়ারে বসে আছে । সামনে বেতের টেবিলে দুটো বিয়ারের বোতল আর গেলাস । বোতলের গায়ে এখনো ফ্রিজের কুয়াশা । দীপনাথ নিজের গেলাস নামিয়ে রেখে বলল, আমার তো এ কোম্পানিতে কোনো পাকা চাকরি নেই । আপনি চলে গেলে এরাই বা রাখবে কেন ?

একজ্যাকটলি । আমিও তাই জানতে চাইছিলাম, আপনি আমার সঙ্গেই থাকতে চান কিনা । বোসেব গলার স্বর খুব সহানুভূতি এবং সমবেদনায় মাখনের মতো নরম হয়ে কানে বাজল ।

দীপনাথ বলল, খবরটা খুব আনএক্সপেকটেড । আমি একটু ভেবে দেখি ।

বোস অসহিষ্ণুভাবে বলে, আপনি কেন ইনস্ট্যান্ট ডিসিশন নিতে পারেন না বলুন তো । সব সময়ই সব কাজে আপনার জড়তা দেখতে পাই । জীবনে বড় কিছু করতে গেলে ডিসিশনটা মাস্ট বি প্রোন্টো ।

তাড়াহাড়ের কিছু আছে কি ?

আছে । বোস প্রেট থেকে কাই মাখানো সসেজ কাঁটায় তুলে মুখে দেয় । বিয়ারে দীর্ঘ চুমুকেব পর বলে, ইংলিশ ফার্মের ম্যানেজিং ডিরেক্টর গ্র্যান্ডে বসে চারদিকে জাল ফেলছেন । পরশু ফিরে যাচ্ছেন বাংগালোরে । যাওয়ার আগেই পাকা কথা হয়ে যাবে ।

শুয়োরের মাংসের প্রতি আজন্ম একটু ঝুঁতঝুঁতানি থাকা সত্ত্বেও স্রেফ বোসকে সঙ্গ দিতে দ্বিতীয়বার সসেজ খেয়ে খুব সংকোচের সঙ্গে বলল, এই কোম্পানিতে আমার কোনো স্ট্যাটাস ছিল না । নতুন কোম্পানিতে কোনো স্ট্যাটাস পাবো কি ?

স্ট্যাটাস ! বলে বোস হাঁ করে একটু চেয়ে থাকে । বারান্দায় কোনো আলো নেই । ঘর থেকে আর রাস্তা থেকে যেটুকু আলো আসছে তাতে অঙ্গকার কাটেনি । তাই বোসের চাউনিটা ভাল করে বুঝতে পারল না দীপ । বোস একটা ঠুং বলে সোজা হয়ে বসল । তারপর বলল, কোম্পানি যে এখনই নতুন লোক নেবে এমন কোনো অ্যাসুরেন্স নেই । আমিও কথা দিতে পারছি না । তবে ওগানোও আপনি এর চেয়ে খারাপ থাকবেন না ।

আপনি কি আমার জন্য চেষ্টা করবেন ?

করব । তবে প্রথম দিকে নয় । পরে । এ কোম্পানি সদ্য স্টার্ট করেছে । দে নীড এ লট অফ একস্পিরিয়েন্সড পিপল । কাজেই আপনারও চান্স আছে । কিন্তু প্রথম লটে নয় । আপনি তো ততটা একস্পিরিয়েন্সড নন ।

দ্বিতীয়বার ঘেমা-পিন্ডি সত্ত্বেও সসেজটি খারাপ লাগেনি দীপের। কিন্তু বোস যেহেতু আর সসেজ খেল না সেইজন্য তারও আর একটা খেতে সংকোচ হচ্ছিল। পেটে যথেষ্ট খিদে। সে বিয়ারে নিরাসক্ত একটা চুমুক দিয়ে বলে, বাংগালোরেই যেতে হবে ?

অফ কোর্স।

দীপ আনমনা হয়ে গেল কয়েক পলকের জন্য। বাংগালোরে। তার মানে হিমালয়ের সেই সব মহান পাহাড় থেকে আরো বহু দূরে। বাংগালোরে গেলে যখন-তখন প্রীতমটার কাছে গিয়ে হাজির হওয়া যাবে না। বাংগালোর দীপনাথের অচেনা নয়। বার তিনেক গেছে বোসের সঙ্গেই। বড় ভাল পরিচ্ছন্ন শহর। তবু তো দূর।

কি ভাবছেন ?

ভাবছি, অনেকটা দূর।

বোস হঠাৎ হেসে ফেলে। খিলখিল মেয়েলী হাসি। বলে, দূর ? কোথা থেকে দূর ? কলকাতা থেকে।

আমি যদি উন্টো করে বলি বাংগালোর থেকেই কলকাতা দূর !

তার মানে ?

বোস কথাটার সোজা জবাব না দিয়ে বলে, দূরের কনসেপশনটা বাঙালীদের খুব অদ্ভুত। আমার তো কোনো জায়গাকেই পরের জায়গা মনে হয় না, তাই দূরের জায়গা বলেও ভাবি না।

দীপনাথ একটু গৌজ হয়ে থেকে অনিচ্ছার সঙ্গে বলে, সে অবশ্য ঠিক।

আপনাকে কলকাতার ভূতে পেল নাকি ? কিন্তু শুনছি আপনি নর্থ-বেঙ্গলের ছেলে।

দীপ একটু বিষম গলায় বলল, কলকাতায় আমার এক ভগ্নীপতি থাকে। সে ভীষণ অসুস্থ। আমি ছাড়া ওদের মর্যাল গার্জিয়ান কেউ নেই।

বোস বেতল থেকে বিয়ার ঢালছিল গেলাসে। কথাটা শুনল কিনা বোঝা গেল না, তবে পাঙাও দিল নাকি তেমন। বলল, ওটা কোনো কথা নয়। ইয়োর ডিসিশন মাস্ট বি ভেরী প্রম্পট।

বোস যখন বিয়ার ঢালছিল তখন প্রায় চুরি করার মতো করে আর একটা সসেজ তুলে নিল দীপ। ভিতরটা হতাশায় ভরা। বোস চলে গেলে তার খুঁটি সরে যাবে। হতাশায় ফাঁকা ফৌঁপরা অভ্যন্তরে সসেজটাকে পাঠিয়ে দীপনাথ কিছুক্ষণ বিয়ারের ঝিল্লিধ্বনি শুনল নিজের মাথায়। আজ মণিদীপা বাড়িতে নেই। কোথায় গেছে, আসবে। সেই পিকনিকের পর থেকেই মণিদীপার সঙ্গে কথা প্রায় বলেইনি সে। বড় অভিমান হয়েছিল। আর সবাই তাকে ফেলে চলে এলেও ক্ষতি ছিল না, কিন্তু মণিদীপা এল কি করে! সে তো মাতালও হয়নি সেদিন ? সেই দিন দুপুরেই না মেজদার বাড়িতে গিয়ে খুব আঠা দেখিয়ে এসেছিল ?

কি ভাবলেন ?

কিছু না।

ভাবনাটা স্টাট করুন। কাল বা পরশুই একটা ফাইন্যাল কথা আমাকে জানিয়ে দেবেন।

আচমকা দীপ ইংরেজিতে জিজ্ঞেস করে, ডু ইউ লাভ মি মিস্টার বোস ?

বোস প্রশ্নটার জন্য প্রস্তুত ছিল না। তবে সময় নিয়ে এক রাউন্ড সসেজ বিয়ারের সঙ্গে ভিতরে পাঠিয়ে বলল, আজ এ ফ্রেন্ড ইউ আর টপ গ্রেড। অ্যান্ড আই রিয়েলি নীড এ ফ্রেন্ড।

এ কথার জবাব হয় না। কথাটা হয়তো আবেগ থেকেই বলা, যদিও বোসের আবেগ

সহজে প্রকাশ পায় না।

একটু বাদে আর কিছু বিয়ার খাওয়ার পর বোস খুব গা ছেঁড়ে বসে ধীরে ধীরে বলে, আমার যে সত্যিকারের কেউ নেই তা বোধ হয় আপনি এতদিনে টের পেয়েছেন।

দীপনাথ একটু মুশকিলে পড়ে গিয়ে আমতা আমতা করে বলে, বৃহৎ মানুষরা সব সময়ই একা।

কথাটা দীপনাথ কোথায় যেন শুনেছিল। আজ আলটপকা কাজে লেগে গেল। বোস খুশিই হল বোধ হয়। আহাম্মকটা হয়তো সত্যিই নিজেকে বৃহৎ মানুষ ভাবে। বিয়ার সহযোগে তাই হয়তো কিছুক্ষণ মনে মনে কথাটাকে উপভোগ করল। তারপর বলল, মিসেস বোস অবশ্য বাংগালোরে যেতে রাজি নন।

কেন?

কে জানে? সী হ্যাজ হার ওন শুয়ে। উনি ভয়ঙ্কর স্টার্বোর্ন।

তাহলে?

তাহলে কিছুই না। আমি যাচ্ছিই।

মিসেস বোসের কী হবে?

সী মে সিক এ ডিভোর্স।

কথাটা এমন অনায়াসে বলে ফেলল বোস যে, খুব অবাক লাগল দীপনাথের। ডিভোর্সের ব্যাপারটা এখনো কোনো বাঙালীব কাছে এতটা জলভাত হয়ে যায়নি। সে তাই বলল, না না, তাই কি হয়?

বোস কথাটায় কান না দিয়ে বলল, ওঁর একজন অ্যাডভাইজার আছে। স্নিফদেব চ্যাটার্জি। এ লেফটিন্যান্ট ছিলগান। উনি তাঁর পরামর্শ ছাড়া কিছু করবেন না। দ্যাট বাগার কন্ট্রোলস হার।

জুয়াড়ির মতো আবেগহীন মুখভাব বজায় রাখার চেষ্টা করতে করতে দীপনাথ বলল, তাই নাকি?

বোস মাছি তاذানোর মতো করে হাত নেড়ে বলল, ও প্রসঙ্গ থাক। মিসেস বোসকে নিয়ে বেশী ভাববার কিছু নেই। আই অ্যাম র‍্যাডার ইন নীড অফ এ ফ্রেন্ড। অ্যান্ড আই হ্যাভ নান। আপনি কি আমার বন্ধু হতে পারেন?

বহুকাল চাকরবাকরের মতো থেকে এখন একটা মরীয়াভাব এসে গেছে দীপনাথের। সে আর ততটা মুখচোরা থাকতে চাইল না। হঠাৎ বলে বসল, বৃহত্তর সঙ্গে কি ক্ষুদ্রের বন্ধুত্ব হয় বোস সাহেব?

বলেই বুঝল এ প্রায় শরৎচন্দ্রীয় ডায়ালগ হয়ে গেল। আসলে সে মোটে আধ গেলাস বিয়ার খেয়েছে। কিন্তু অভ্যাস না থাকায় সেইটুকুই পেটে গিয়ে জিভটাকে একেবারে লাগামছাড়া করে দিয়েছে বোধ হয়।

বোস সাহেবের অবস্থাও খুব ভাল কিছু নয়। বেতের সোফার পিছনে আরো তিনটি খালি বোতল জমা পড়েছে, টেবিলের ওপর বাকি দুটোর মধ্যে একটার মুখ এখনো খোলাই হয়নি। বাড়ির বেয়ারা এইমাত্র একপ্লেট গরম পকোড়া রেখে গেল টেবিলে। বোস সাহেব একটা পকোড়া তুলে কামড় দিয়ে বলল, হয়। মে বি আই অ্যাম সামটাইমস ভেরী রুড। আপনিও হয়তো অফিস ওয়ার্কে তেমন এফিসিয়েন্ট নন। কিন্তু তার মানে এ নয় যে আমি আপনার ক্যারেকটারের প্লাস পয়েন্টগুলো লক্ষ করিনি। আই র‍্যাডার লাইক ইউ। অন দি আদার হ্যান্ড আমারও কিছু প্লাস পয়েন্ট আছে মিস্টার চ্যাটার্জি। সেগুলো কি আপনি লক্ষ

করেছেন ?

দীপনাথ আর একটু হলেই বোসের সামনেই লজ্জায় জিভ কেটে ফেলত বা বলে উঠত, আই অ্যাপোলোজাইস । কিন্তু বিয়ারের ধোয়ার ভিতর দিয়েও মগজের যুক্তি বুদ্ধি পথ হারিয়ে ফেলেনি । একথা সত্যি যে, সে বোসের প্লাস পয়েন্টগুলো লক্ষ করেনি । কিন্তু সেকথা স্বীকার করে কোন আহম্মক ?

সে বলল, আপনার প্লাস পয়েন্ট তো অনেক ।

বোস বোকা লোক নয় । বোকা হলে এত অল্প বয়সে এত ওপরে উঠতে পারত না । কথটা শুনে একটু হাসল । আবার পকোড়া আর বিয়ার খেয়ে বলল, আই হ্যাভ মাই ভাইসেস অলসো । কিন্তু একটা জিনিস কি জানেন ? আপনি যদি কেবল আমার দোষগুলো লক্ষ করেন তাহলে কোনোদিনই আমাকে ভালবাসতে পারবেন না । মিসেস বোসের প্রবলেমটা এখানেই । বলেই হঠাৎ বোস পিছনে হেলে ছাদের দিকে চেয়ে বড় একটা শ্বাস ফেলে বলল, দূর ছাই । এসব কথা আপনাকে বলছিই বা কেন ?

আপনাদের ভিতরকার প্রবলেমটা কি তা আমি আজও জানি না । তবে মিসেস বোস ইজ এ উওয়ান অফ পারসোনালিটি ।

বলছেন ! ঠিক আছে, মানছি । কিন্তু শী ইজ ক্রিয়েটিং এ ডেঞ্জারাস মানিটারি প্রবলেম ফর মি ।

কি রকম ?

কোম্পানি একজিকিউটিভদের অবস্থা যতটা ভাল বলে লোকে মনে করে আসলে তে ততটা ভাল নয় । আপনিও জানেন, আই হ্যাভ বিগ একসপেন্ডিচারস । মিসেস বোস হ্যাভ ইভন গ্রেটার একসপেন্ডিচারস । উনি খুব বড়লোকের মেয়ে নন, তবু খরচের হ্যাবিটটা এত সাজাতিক—ইউ নো ।

আপনার কি ঠিকার প্রবলেম চলছে বোস সাহেব ?

ভেরি অ্যাকিউটলি । কোম্পানিতে আমার দেদার লোনও হয়ে গেছে । হাজার ত্রিশেকের কাছাকাছি ।

বলেন কি ?

বোস আর একটা শ্বাস ছেড়ে বলল, সেটাও একটা মস্ত প্রবলেম । নতুন কোম্পানিতে যাওয়ার আগে এই কোম্পানির টাকা শোধ করতে হবে । নইলে দেয়ার মে বি আগলি কনসিকোয়েনসেস ।

বুঝতে পারছি ।

বোস হাসল, বুঝতে তো পারছেন, কিন্তু এই টাকাটা আমি কোথায় পাবো তা বলতে পারেন কি ?

দীপনাথের মনে পড়ল, মণিদীপা তাকে কয়েকবারই বলেছে 'আমি ওকে শেষ করে ছাড়ব' । বোস সাহেবকে সেসব কথা কোনোদিনই বলা যাবে না । বলতে গেলে এই প্রথম তার বোস সাহেবের ওপর খানিকটা মায়া হচ্ছিল । এতকাল এই লোকটার তাবোদারি সে করেছে বটে, কিন্তু কোনোদিনই বিন্দুমাত্র সহানুভূতি বোধ করেনি । বরং মণিদীপা বোসকে শেষ করেছে ভেবে সে মনে মনে এক রকমের আনন্দও পেত । আজ কষ্ট হল । বোস কোনোদিন এত খোলামেলা কথাবার্তা বলেনি তার সঙ্গে ।

দীপনাথ মাথা নেড়ে বিষণ্ণ মুখে বলল, না । ত্রিশ হাজার আমার কাছে অনেক টাকা ।

আমার কাছেও । বলে বোস আবার একটা শ্বাস ছাড়ে । আস্তে করে স্বগতোক্তির মতো

বলে, ক্লাবে আনপেইড বিল কত জমে গেছে কে জানে। হায়ার পারচেজ-এর দোকানেও অনেক পেমেন্ট রয়ে গেছে। বাংগালোরে যাওয়ার আগে সবই মেটাতে হবে। যাকগে, যা বলছিলাম। আপনি কি আমার সঙ্গে যাবেন মিস্টার চ্যাটার্জি, আই নীড ইউ।

একটু ভেবে দেখি।

খুব বেশী ভাববেন না। তাহলে আর যাওয়া হবে না।

দ্বিধাব সঙ্গে দীপনাথ বলে, বাংগালোরে বোধ হয় খবচ বেশী।

একটু বেশী হতে পারে। তবে সেখানে আমি তো বিশাল বাংলো পাবো। মিসেস বোস যদি না যান তাহলে ইউ মে শেয়ার দি হাউস। আপনার মাসে কত হলে চলে যায়?

দীপনাথ মিথ্যে করে বাড়িয়ে বলতে পারত। কিন্তু মিথ্যে কথাটা চট করে তার মুখে আসে না। তাই বলল, ছ-সাত শো।

বোস মৃদু স্বরে বলল, আপনাকে আমার হিংসে হয়। এত কমে চালান কি করে?

দীপনাথ করুণ করে হাসল। কি কবে সে চালায় তা তো বোসকে তারই জিজ্ঞেস করার কথা।

অন্ধকার বাবান্দায় দুজনের কথাবার্তা হঠাৎ থেমে গেল। নীচে গেটের সামনে একটা গাড়ি এসে থেমেছে। বোস সাহেবের নিজস্ব ছোটো গাড়িটা। দাবোয়ান গেট খুলে দিল। গাড়িটা বাঁক নিয়ে ঢুকে এল ভিতরে। মিসেস বোস।

দীপনাথের বৃকের ভিতর হৃৎপিণ্ডের স্পন্দন কিছু বাড়ল। একটু দমের কষ্ট হতে থাকল। বেশ কিছুদিন হল সে মণিদীপার সঙ্গে অভিমানে কথা বলেনি। আর বোধহয় সেই কারণেই বৃকের মধ্যে অনেক বেশী আবেগ জমে উঠেছে।

দুজনেই কিছুক্ষণ অপেক্ষা কবল।

প্রথম স্তব্ধতা ভেঙে বোস সাহেব বলল, প্রস্তাবটা নিয়ে একটু তাড়াতাড়ি ভাববেন। বেশী সময় নেই।

বোস সাহেবকে এত দুর্বল কোনোদিন দেখেনি দীপনাথ। আজ বীয়ারের ধাঁধার সঙ্গে এই হৃদয়দৌর্বল্য মিশে কেমন ভোষল ভোষল লাগছিল নিজেকে। সে কিছুক্ষণ কান খাড়া করে বসে রইল। মণিদীপা যে ঘরে এলেন তা বোঝা গেল ক্ষীণ কণ্ঠস্বরে। ডাইনিং হলেই বোধহয় বেয়ারার সঙ্গে কিছু কথা বললেন।

দীপনাথ উঠে বলল, আমি তা হলে আসি।

বোস আনমনে সামনের দিকে শূন্য চোখে চেয়ে বসে ছিল। ঠাংদুটো ছড়ানো। কিছু দেখছে না। শুনছে না।

দীপনাথ আর একবার বিদায় জানাতে বোস মুখটা ফিরিয়ে যেন অন্য কোনো মানুষকে বলল, শুড নাইট।

দীপনাথ প্যাসেজে ঢুকে একটু অপেক্ষা করে। ডান ধারে দুটি শোয়ার ঘর, বাঁ দিকে একটা মস্ত লিভিং রুম, সামনে ডাইনিং কাম ড্রয়িং। এতটা অতিক্রম করে তবে সিঁড়ি। কিন্তু এই পথটুকুতে মণিদীপার সঙ্গে দেখা হবে কি? যদি বেড়রুমে ঢুকে গিয়ে থাকে?

দীপনাথের ভিতরটা আজ বড় কাঙাল। খুব প্রত্যাশা নিয়ে সে একটু গলাখাঁকারি দিল। তারপর ধীর পদক্ষেপে এগোতে লাগল। চোখের নজর ডাইনে বাঁয়ে খবব নিচ্ছে। প্রায় বয়ঃসন্ধির অবস্থা। বুক কাঁপছে, গলা শুকোচ্ছে, কান গরম হচ্ছে। অথচ পিকনিক থেকে ফেরার সময়ে এই ভদ্রমহিলা তার খোঁজও নেয়নি।

ডাইনিং হল পর্যন্ত কোনো ঘটনাই ঘটল না। একটু হতাশ হল দীপনাথ। আজকের

দিনটা বোধহয় তার ভাল গেল না ।

ড্রয়িং রুমে মণিদীপাকে বসে থাকতে দেখবে বলে মোটেই আশা করেনি দীপ । বাইরে থেকে ফিরে কোনো মহিলাই নিজের ড্রইং রুমে বসে ম্যাগাজিন দেখে না ।

কিন্তু মণিদীপা ঠিক তাই করছে । যেন এ বাসা তার নয়, সে বেড়াতে এসেছে মাত্র । বাইরের ঘরে বসে অপেক্ষা করছে ।

মণিদীপাকে এক পোশাকে দুদিন কখনো দেখেনি দীপ । আজও তার পরনে দীপনাথের না-দেখা একখানা নীল শাড়ি । যাদের রং চাপা তাদের নীল রং পরতে নেই, এমন একটা কথা কারো মুখে কখনো শুনে থাকবে দীপ । তাতে নাকি কালোকে আরো কালো দেখায় । কিন্তু মণিদীপা সেই নীল রংকে হজম করে আরো সুন্দর হয়ে বসে আছে । মস্ত চওড়া সোফায় গা ছেড়ে বসার ভঙ্গিটির মধ্যে একটু অহংকার মেশানো তুচ্ছ-তাচ্ছিল্যের ভাব আছে । তবে হ্যাঁ, ভঙ্গি, মুখের ভাব সব কিছু মধ্য একটা অপেক্ষার ভাব আছে ঠিকই ।

কিন্তু কার জন্য অপেক্ষা ? বৃকের মধ্যে একটা আশার পাখি হঠাৎ গুডগুড করে ওঠে যে !

আত্মবিস্মৃত হয়ে দাঁড়িয়ে পড়েছিল দীপনাথ । বোকার মতোই । প্রথম কয়েক সেকেন্ড মণিদীপা লক্ষ্যই করল না । তারপর হঠাৎ বড় বড় চোখ তুলে নীরবে তাকাল । চোখে সেই পুরোনো অহংকার ।

চোখে চোখ । কয়েকটি দ্বিধাগ্রস্ত মুহূর্ত ।

আচমকই মণিদীপা জিজ্ঞেস করে, কী চলছিল ? বাঁয়ার ?

ঐ একটু

হাতের ম্যাগাজিনটা আবার দেখতে দেখতে মণিদীপা বলল, আগে তো এসব খেতেন না !

এখন মাঝে মাঝে খাই । বারণ করবার তো কেউ নেই ।

মণিদীপার চোখ আবার উঠল । এবার চোখ দুটো বেশ কঠিন ।

বারণ করারও লোক চাই নাকি ?

লোক কেউ থাকলে ভাল লাগত ।

আজকাল বেশ সাহসের সঙ্গে কথা বলতে পারেন তো !

মরিয়ার সাহসের অভাব হয় না ।

মণিদীপা চমৎকার একটু হাসল, স্নেহভারি চেয়ে এরকম সাহস অনেক ভাল ।

তা হলে আমার উন্নতি হচ্ছে বলছেন ।

বোধহয় । আর একটু না দেখলে বোঝা যাবে না ।

তা হলে দেখুন । বলে একটু বুক চিতিয়ে দাঁড়ায় দীপ । হেসে বলে, অনেককাল দেখেন না ।

তাই নাকি ? খুব স্নেহের সঙ্গে বলে মণিদীপা ।

কিন্তু দীপনাথ আর সেই পুরোনো সংকোচটা বোধ করে না । বোস বাংগালোরে চলে যাচ্ছে এবং তাকে মিনতি করছে সঙ্গে যাওয়ার জন্য । তাতে বোস সাহেবের ওপর ওয়ালাসুলভ চরিত্রটা ভেঙে গেছে । মণিদীপা ছিল বসের বউ, কিন্তু সেও এখন সম্ভাব্য ডিভোর্সের গাড্ডায় । তবে দীপনাথের আর কাকে সংকোচ ?

দীপনাথ তাই খুব স্বাভাবিক গলায় বলল, আমি একটা গাছের তলায় শুয়ে ঘুমিয়ে পড়েছিলাম সেদিন । আমার বিশ্বস্ত বন্ধুরা আমাকে না নিয়েই চলে এসেছিল । অথচ

সেইসব বন্ধুদের পায়ে কাঁটা ফুটলেও আমাকেই দায়ী হতে হত।

মণিদীপা হঠাৎ নিভে গিয়ে দাঁতে ঠোঁট কামড়ায়।

ম্যাগাজিনটা ফেলে রেখে নিজের খাটো চুল খোঁপায় বাঁধার একটা অক্ষম চেষ্টা করতে করতে বলে, আমার দোষ ছিল কিনা ঠিক জানেন?

আপনার কথা বলছি না।

তবে কার কথা?

আমার ছদ্ম বন্ধুদের কথা। আর দোষের কথাই বা উঠছে কেন? আমি সামান্য মানুষ, নজরে পড়ার মতোই তো নয়।

আমি ঝুঁজেছিলাম। কিন্তু সেদিন ঠুঁকে নিয়ে এত বেসামাল হয়ে যাই যে কিছু করার উপায় ছিল না। দে ওয়্যার মেকিং এ সিন। আমি মিসেস সিন্‌হাকে বলেছিলাম আপনাকে যেন ঝুঁদের গাড়িতে তুলে নিয়ে আসেন। পরে মিসেস সিন্‌হা আমাকে বললেন তাড়াতাড়িতে আপনাকে নাকি ঝুঁজে পায়নি।

তা হবে। উদাসভাবে বলে দীপ। তারপর দরজার দিকে এগোয়।

শুনুন।

বলুন। তেমন উদাস স্বর দীপনাথের।

নিশ্চয়ই আপনি ও ব্যাপারটার জন্য আমার ওপর চটে যাননি!

আপনার ওপর চটার প্রশ্নই ওঠে না।

ছদ্ম বন্ধু বলতে আপনি আমাকেই মীন কবছেন।

না। আপনাকে কেন মীন কবব?

না হলে আপনার কোন বন্ধুই বা ওখানে ছিল?

বোধহয় সবাই আমার পরম বন্ধুই ছিল ওখানে।

একটু ঝাঁঝালো স্ববে এবার মণিদীপা বলে, এত নাগ করতেও পানেন আপনি। আচ্ছা বাবা, ক্ষমা চাইছি। কান ধরছি।

হাসিমুখে দীপ ফিরে দাঁড়ায়। তার বাগ বেশীক্ষণ থাকে না। একটু মিষ্টি কথাতেই উবে যায়।

সে বলল, অতটার দরকার নেই।

এবার আর রাগ নেই তো?

মোটাই নেই।

আবাব আমি ভাল বন্ধু তো?

নিশ্চয়ই।

বসুন না একটু।

দীপ বসল। কোনো সংকোচ হল না। বোস সাহেব দেখে ফেললেও বোধহয় ক্ষতি নেই, এই মহিলাকে তো সে ডিভোসই করবে।

বলুন।

মণিদীপার মুখচোখ কাছ থেকে দেখে একটু শীর্ণ মনে হল। কাঁধের হাড় দুটোও একটু বেশী জেগে রয়েছে। বলল, বোস সাহেবের সঙ্গে কি কথা হল?

বাংগালোরে যাওয়া নিয়ে।

আমি কিন্তু যাচ্ছি না, শুনেছেন?

বলছিলেন।

আর কিছু বলেনি ?

আর কি ?

এ প্রশ্নের জবাব না দিয়ে মণিদীপা খুব সুন্দর করে একটু হাসল। ন্যাকামি নেই, অঙ্গভঙ্গি নেই, তেমন কোনো কটাক্ষ নেই, তবু নিছক নিজের চরিত্রের একটা সহজ সরল জোরে মণিদীপা কি করে তাকে সম্মোহিত রেখেছে তা দীপনাথ ঠিক বুঝতে পারে না।

মণিদীপা হাসিটা মুছে ফেলে মৃদু স্বরে বলল, যখন ভাঙল মিলনমেলা ভাঙল...।

দীপনাথ একটু গভীর ও দুঃখিত মুখ করে বলে, কিছুই ভাঙবে না। আপনিও বাংগালোরে চলুন।

কেন, আপনার হুকুম ?

না, তা নয়। শুনেছি আপনাকে হুকুম করার আলাদা লোক আছে।

আছেই তো। যার চরিত্র আছে সেই হুকুম করতে পারে।

ঠিক কথা। কিন্তু তিনি এক্ষেত্রে কী হুকুম দিয়েছেন ?

ভুক্তি করে মণিদীপা বলে, আগে বলুন আমাকে হুকুম দেওয়ার লোকটা কে ? হয়তো স্নিগ্ধদেববাবু।

স্নিগ্ধদেব সম্পর্কে আপনার এত স্বচ্ছ ধারণা হল কি করে ?

আমার ধারণা নেই। বোস সাহেব বলছিলেন।

বোস সাহেব ! বলে হঠাৎ যেন কিছুক্ষণ স্তম্ভিত হয়ে বোস থাকে মণিদীপা। তাবপব চাপা হিংস্র স্বরে বলে, স্নিগ্ধদেবের নাম ওঁর জানাব কথা নয়। আপনি বলেছেন ওঁকে ? একটু অবাক হয়ে দীপনাথ বলে, আমি বলব কেন ? আমি তো তেমন কিছু জানিও না।

তবে ও জানল কি করে ?

দীপ মাথা নেড়ে বলে, তা আমি জানি না।

ও আপনাকে কুঁচী বলছিল ?

দীপ একটু বিপদে পড়ে যায়। ভরসা এই, এই মেয়েটিকে বোস ডিভোর্স করবে এবং সম্ভবত দীপের বস হিসেবেও বোস আর থাকছে না। দীপনাথ তাই সাহস কবে একটু হাসি মুখে এনে বলে, বলছিলেন আপনি নাকি স্নিগ্ধবাবুর কথায় চলেন।

মণিদীপার চোখেমুখে ক্রুদ্ধ অহংকার ফুটে ওঠে। ঠোঁট উল্টে বলে, আমাকে কেউ কখনো হুকুম করে না। আমি কখনো কারো কথায় চলি না।

তবু আমি ওয়েল ওইসার হিসেবে বলছি, আপনি বাংগালোরে যান। ভাল হবে। মিলনমেলা ভাঙবে না।

ভাঙলে বয়ে গেল। আপনি যাচ্ছেন বুঝি ?

ঠিক করিনি। তবে যেতেও পারি।

তাই বুঝি আমাকে অত সাধাসাধি ?

কথটা বুঝতে একটু সময় লাগল দীপেব। কয়েক সেকেন্ড। তারপরই তার ফর্সা বঙে আগুন ধরে গেল যেন। অপলক স্থির চোখে চেয়ে বলল, তার মানে ?

মিস্টার বোস আপনাকে বলেননি যে আপনি আমার প্রেমে পড়েছেন আর আমি আপনাকে নাচাচ্ছি ?

দীপনাথ হতভম্ব হয়ে চেয়ে থাকে।

মণিদীপা হাসছিল। খুবই বিষাক্ত শ্লেষ ভরা হাসি। আস্তে করে বলল, আমাকে বলেছে।

কী বলেছে ?

ঐ যা বললাম ।

আমি ! আপনাকে ?

হ্যাঁ, আপনি আমাকে এবং আমি আপনাকে । বলা উচিত ছিল । স্নিগ্ধদেবের কথা যখন উঠল তখন এটা উঠলেও দোষ ছিল না ।

ছি ছি, আমি তো ভাবতেও পারি না । বলেই দীপ অনুভব করল তার ভিতরকার চৌটিকাটা ইয়ারবাজ আর একটা দীপনাথ খুব হোঃ হোঃ করে হেসে বলল, পারোও বটে হে তুমি । ভাবতে ভাবতে ছাল তুলে ফেললে, আর মুখে বলছ ভাবতে পারো না ।

আপনি ভাবতে না পারলে কি হবে ? বোস সাহেব তো ভাবছেন ।

খুব ভুল ভেবেছেন উনি ।

ভুল ভাবায় উনি একজন বিশেষজ্ঞ । কিন্তু এ ব্যাপারটা হয়তো ততটা ভুল ভাবেননি ।

এই বলে মণিদীপা হঠাৎ মুখে বঙিন ম্যাগাজিনটা চাপা দিয়ে আড়ালে হাসতে থাকে ।

দীপ অবাক হয়ে বলে, কোন ব্যাপারটা ?

এই আপনার আর আমার ব্যাপারটা ।

তার মানে ?

আপনি হয়তো সত্যিই আমার প্রেমে পড়েছেন ।

কী যে বলেন ! দীপনাথ বোধহয় বামধনুব মতো বগ্বগু হায়ে গেল লজ্জায়, ঘেন্নায়, আত্মধিকারে ।

খুব অসম্ভব ব্যাপার কি ?

খুবই অসম্ভব ।

তা হলে আমার পক্ষে বেশ দুঃখের কথা । সারা জীবনে বহু লোক আমার প্রেমে পড়েছে । প্রায় সব পৰিচিত যুবক এবং প্রৌঢ় । আপনারই বা না পড়ার কি ?

কি যে বলেন !

দোষের তো কিছু নয় ।

মিসেস বোসের মুখ ম্যাগাজিনে ঢাকা । তবু চোখ দেখে বোঝা যাচ্ছে মেয়েটি হাসছে ।

দীপ দরজাব নবের দিকে হাত বাড়িয়ে বলল, আমি কারো প্রেমে পড়িনি ।

সত্যিই ? বলে চোখ বড় করে মণিদীপা ।

বিশ্বাস করা না করা আপনার ইচ্ছে ।

তা হলে আর বাংগালোরে গিয়ে আমার কী হবে ? আপনি যদি আমার প্রেমে পড়তেন তা হলে বাংগালোরে গিয়েও সুখ ছিল ।

ইয়ার্কি কবছেন ?

মণিদীপা খুব দীর্ঘে দীর্ঘে ম্যাগাজিনটা মুখ থেকে নামায় । মুখে এতটুকু হাসি নেই, মজা নেই । বড় বড় দুখানা চোখ নেমে যায় কারপেটের দিকে ।

জবাবের জন্য অপেক্ষা করে না দীপ । দরজা খুলে বেরিয়ে যায় ।

যদি কেউ ড্রয়িং রুমে থাকত তা হলে দেখত, জ্ঞানবরায়সে মণিদীপা এই প্রথম সচেতনভাবে কাদছে ।

পরদিন অফিসে এসেই দীপনাথ শুনল, আমেদাবাদ থেকে স্বয়ং বড় মালিক এসেছেন। বোস সাহেবের সঙ্গে রুদ্ৰদুয়ার আলোচনা চলছে। অফিসে জোর কানার্ঘুষো, বড় মালিক বোস সাহেবকে ছাড়তে রাজি নন। তার জন্য বোস সাহেবকে আরো অনেক বেশী মাইনে দিতেও তিনি প্রস্তুত।

অফিস বলতে চল্লিশ বাই কুড়ি একটা হলঘর। গাদাগাদি স্টিলের টেবিল-চেয়ার, ফাইল-ক্যাবিনেট লোহার আলমারি। শুধু বোস সাহেবের জন্য আলাদা একটা কাঠের ঘেরা দেওয়া চেম্বার।

দীপনাথ সম্পর্কে অফিসের সকলেরই প্রথম প্রথম একটু সন্দেহের ভাব ছিল। সম্ভবত তাকে বোস সাহেবের স্পাই বলে মনে করত। এখন আর সে ভাবটা নেই। বরং দীপনাথ যে এখনো পাকা চাকরি পায়নি তার জন্য কারো কারো কিছু সহানুভূতি আছে।

আগে এ অফিসে বাঙালী প্রায় ছিলই না। ইদানীং বোস সাহেব কিছু বাঙালী ছেলেকে চাকরি দিয়েছেন। কম বেতনের কেরানী বা টাইপিস্ট নেওয়ার ক্ষমতা বোস সাহেবের হয় তো আছে।

দীপনাথ গিয়ে টাইপিস্ট রঞ্জন রায়ের মুখোমুখি চেয়ারে বসল। বঞ্জন একদম হালে ঢুকেছে। মাস দুই হবে বোধ হয়। চেহারাটা খুব রোগা, মুখে শুকনো খড়ি-ওঠা ভাব, চোখ গর্তে, গাল ভাঙা। তবে লম্বা চুল আব জাঁদরেল জুলপি আছে। কিন্তু বঞ্জনের পোশাক-আশাক খুবই সাদামাটা। সাধারণ একটা লাল-সাদা চেককাটা হাওয়াই সার্ট আর পরনে বোধ হয় এসপ্লানেডের ফুটপাথ থেকে কেনা স্ট্রিচলনের সস্তা বেলবটম, পায়ে চটি। ছেলেটা সর্বদাই খুব গম্ভীর থাকে। কিন্তু কথা শুরু করলে আবাব অনেক কথা কয়।

দীপনাথ জিজ্ঞেস করল, বোস সাহেবের ঘরে কনফারেন্স কক্ষ চলছে?

বঞ্জনের এখন কোনো তেমন কাজ নেই বোধ হয়। ডান হাতের মুঠোটা মুদ্রাদোষবশত সব সময়ে মুখের সামনে মাউথপিসের মতো ধরে রাখে। ঐ ভঙ্গিতেই বলল, তা ঘন্টা খানেক হয়ে গেল।

মালিকের চেহারা কেমন দেখলে? খুব বুড়ো?

না, তেমন বুড়ো নয়। বছর যাটবে হবে। একেবারে আমার মতো দেখতে। রোগা চিমসে চেহারা। তবে ভাষণ লম্বা। 'হু ফুটেব ওপর। সঙ্গে আরো সাস্পোপাস্প আছে।

ক'জন হবে?

জনা চারেক। সবাই নাকি মালিক। বড় মেজো সেজো।

তা হলে খুব লড়ালড়ি হচ্ছে, কি বলো?

রঞ্জন হাসল। বলল, তাই তো মনে হচ্ছে।

কোনদিকে ফয়সালা হবে মনে হয়?

কি করে বলি? বোস সাহেব চলে গেলে আমাদের চাকরিরও বাবোটা বাজবে। ক'দিন হল এসব ভেবে আরো শুকিয়ে যাচ্ছি। মালিক যখন নিজে এসেছেন তখন...

মালিক কি খুব বড় অফার দিয়েছে?

সবই শুজব। তবে অতদূর থেকে তো কেবল মিঠা বাত বলতে আসেনি। মালিকড়ির কথাই হচ্ছে বোধ হয়।

দীপনাথ একটা স্বস্তির শ্বাস ছাড়ে। বোস থাকলে তার সব দিক দিয়েই সুবিধে। বলল, ১৮৮

কনফারেন্স আর কতক্ষণ চলবে ?

বলতে পারি না । শুনেছি আজই হেস্তনেষ্ট যা হয় হয়ে যাবে । ফেলাদা অবশ্য কালই আমাকে বলেছে অন্য জায়গায় চাকরির চেষ্টা করতে ।

সবিস্ময়ে দীপনাথ বলে, ফেলাদা কে ?

রঞ্জন একটু হেসে বলে, ফেলাদা বোস সাহেবের ডাকনাম ।

তুমি ঠুকে চেনো নাকি ?

চিনি না আবার ! আমার পিসতুতো দাদা ।

বলো কি ? এতদিন জানতাম না তো ?

অফিসে আত্মীয়তার ব্যাপাবটা গোপন রাখাই ভাল ।

সে অবশ্য ঠিক । তোমার আপন পিসীর ছেলে ?

হ্যাঁ । তবে তেমন ঘনিষ্ঠতা তো নেই । ফেলাদাও এখন টপ বস । ফান্ডাই আলাদা ।

দীপনাথ বুঝল, সম্পর্কে ভাই হলেও বঞ্জন বোধ হয় বোস সাহেবের ওপর তেমন সন্তুষ্ট নয় । সাবধানে জিজ্ঞেস করল, তোমার বাবা বেঁচে আছেন ?

বঞ্জন একটু অবহেলার মুখভঙ্গি করে বলল, আছে না-থাকার মতোই । মাথার গোলমাল ।

বোস সাহেব মামাকে দেখতে-দেখতে যান না !

নাঃ । ও সব ফেলাদা পছন্দ করে না । আত্মীয়তা তো সব বোগাস ব্যাপাব ওদের কাছে ।

তবু তো তোমাকে চাকরি দিয়েছেন ।

দিয়েছেন । রঞ্জনের গলার স্বরে কোনো কৃতজ্ঞতা ফুটল না, আমাকে না দিলেও আর কাউকে তো দিতেই হত ।

বোস সাহেবের নিজের মা-বাবা নেই ?

কেন থাকবে না ? টালিগঞ্জে ওদের বিরাট জয়েন্ট ফ্যামিলি ।

সেই ফ্যামিলির সঙ্গে বোস সাহেবের যোগাযোগ নেই ?

একটু-আধটু কি নেই ! তবে না থাকার মতোই । ফেলাদার মা-বাবা অর্থাৎ আমার পিসী আর পিসেমশাই খুব ভাল মানুষ । বলতে কি তাদের জন্যই আমার এই চাকরি । কিন্তু ফেলাদা দারুণ সেলফিস ।

মা-বাবাকে দেখেন না বুঝি ?

এমনিতে দেখার দরকার নেই । ফেলাদার আর দুই ভাইও ভাল চাকরি করে, পিসেমশাই পেনশন পান । ওদের ভালই চলে যায় । কিন্তু টাকাটাই তো বড় কথা নয় । সোজা কথা ফেলাদার কোনো দরদ নেই । বউটাও হয়েছে তেমন । আপনি তো ওদের ভালই চেনেন ! বলে একটু ইঙ্গিতপূর্ণ হাসি হাসল রঞ্জন ।

আমি কর্মচারী । যেটুকু চিনি তা কর্মচারী হিসেবে । মানুষ কেমন তা তো বিচার করিনি ।

কিন্তু আপনি তো ওদের সঙ্গে টুরেও যান শুনেছি ।

তা অবশ্য যাই । কিন্তু দূরত্ব থাকে ।

বউটাকে আপনার কেমন মনে হয় ?

কেন, এমনিতে তো ভালই ।

রঞ্জন একটু ককণার হাসি হাসল । চাপা গলায় বলল, কিছুই জানেন না । একটা আস্ত ভ্যাম্প । ফেলাদার বারোটা না বাজিয়ে ও মেয়ে ছাড়বে না ।

মগিদিপা সম্পর্কে এ সব কথা শুনতে খুব একটা ভাল লাগছিল না দীপনাথের । সে

উদাসভাবে বলল, তাই নাকি ?

জীনস্ পরা মেয়ে পথেঘাটেই দেখতে ভাল, কিন্তু আমাদের মতো মিডল ক্লাস ফ্যামিলিতে ও সব মেয়ে চলে না। আমাব ও রকম বউ হলে থাঞ্চড় মেরে বাড়ি থেকে বের করে দিতাম।

দীপনাথ একটু চিন্তা করে বলে, তোমার কথাটা ফেলে দেওয়ার মতো নয়। তবে সব কিছুর জন্য তো কেবল মেয়েদেরই দোষ দেওয়া যায় না।

মেয়েদেব দোষ দিচ্ছে কে ? ফেলাদা যে তাব বউকে কন্ট্রোল করতে পারে না তার জন্য ফেলাদাই দায়ী। অথচ ওদেব লাভ-ম্যাবেজও নয়।

জানি। শুনেছি মিসেস বোস গরীব ঘরের মেয়ে।

গরীব মানে একদম ডুখখা পাটি। বাপ পলিটিকস করত। চাকরি-বাকরি করেনি কোনোদিন। পাটি থেকে কিছু কিছু পেয়ে টেনেমেনে সংসার চালাত। ওদেব বাড়ির সবাই পলিটিকসের পোকা।

মিসেস বোসের বাবা কি কোনো নেতা-টেতা ?

না না। শ্রেফ কাড়ার।

ও। বলে দীপনাথ চুপ করে থাকে।

রঞ্জন তার মুঠোব মাউথপীস সরিয়ে নিয়ে ঢুল ঠিক কবছিল। ঠোঁট সামান্য ফাঁক। দীপনাথ চকিতে দেখতে পেল, রঞ্জনের সামনের সামান্য উঁচু দুটো দাঁতের বং কালচে। বোধ হয় পোকা লেগেছে। একটা দাঁত বোধ হয় আধখানা ভাঙ'ও।

রঞ্জনকে কেন মাউথপীস সামনে বাখতে হয় তা বুঝতে পারল দীপনাথ। মানুষের যে কত কমপ্লেক্স থাকে !

রঞ্জন আবার মাউথপীস সামনে ধরে বলল, শুনেছি ফেলাদায় আর বউদিতে নাকি খুব খাড়াখাড়ি। ডিভোর্সও হয়ে যেতে পারে।

তাই নাকি ? বলে বিস্ময়েব ভান করে দীপনাথ।

শুনেছি। যদি ডিভোর্স হয় তো ফেলাদা জোর বেঁচে যাবে।

তোমার সঙ্গে মিসেস বোসের ভাল আলাপ আছে ?

না। তবে দেখেছি ! আমাদের পান্তাই দিতে চায় না। তাকালে যেন মনে হয় পোকামাকড় দেখছে।

একটু ডাঁটিয়াল, না ?

সেন্ট পারসেন্ট। অথচ ডাঁটের কি আছে বলুন। গায়েব রং তো টেলিফোনের মতো। বাপেরও কিছু মালকড়ি নেই। তবু এমন রং নেবে যে আপনার গায়ে বিচ্ছুটি লেগে যাবে। লোয়ার ক্লাস থেকে আপার ক্লাসে উঠে এখন চোখে ভেলভেট দেখছে।

দীপনাথ আড়চোখে দেখল, উদ্দিপরা একজন বেযারা ট্রে-ভর্তি কোল্ড ড্রিংকস নিয়ে বোস সাহেবের চেয়ারে ঢুকছে। সাদা স্টুণ্ডলো বোতলের মুখ থেকে উঁচু হয়ে আছে। দৃশ্যটা সুন্দর দেখায়।

দীপনাথ চেয়ারবেব দরজাব দিকে চোখ রেখে জিজ্ঞেস করল, তুমি এখানে কত পাচ্ছে ?

রঞ্জন বলল, মোটে আড়াইশো। ফেলাদা ইচ্ছে করলেই তিনশো সাড়ে তিনশো কবতে পারত। কিন্তু কববে না। হি ইজ সেলফিস।

আত্মীয়রা কেউই বোধ হয় মিস্টার বোসের ওপর খুব খুশি নয়, না ?

কেউ না। ফেলাদার মা-বাবা পর্যন্ত ওকে পছন্দ করে না।

দীপনাথ চুপ করে বসে রইল। বোস সাহেব যে কেন এত একা তা বুঝতে আর কষ্ট হয় না তার। গতকাল সন্ধ্যায় বোস সাহেব যে কেন তার বন্ধুত্ব চেয়েছিল তা স্পষ্ট হয়ে গেল এখন।

রঞ্জন বলল, আমি শুনেছি আপনি নাকি খুব এফিসিয়েন্ট লোক। অথচ ফেলাদা আপনাকে লেজে খেলাচ্ছে, চাকরি দিচ্ছে না। অফিসে এ নিয়ে কথা হয়।

দীপনাথ কথাটা কানে নিল না। বরং অন্য দিকে চেয়ে হঠাৎ একটা অদ্ভুত প্রশ্ন করল, ভব ডাকনাম ফেলা কেন বলে তো?

ফেলা। ও। ফেলাদাও আগে বোধ হয় পিসার আরো ছেলেমেয়ে হয়ে বাঁচেনি। তাই এই ছেলের নাম ফেলা। খুব আদরের ছিল।

দীপনাথ মাথা নেড়ে বলে, বেশী আদরের ছেলেবা একটু বখা হয়।

রঞ্জন হাসল। বলল, আদরের ছেলেরা বখা হলে আপত্তি নেই। বখা ছেলেরাও অনেক সময়ে মা-বাপকে হাটা করে না। কিন্তু ফেলাদা তো বখা ছেলে নয়। বরং ভাল রেজাল্ট করে পাশ করেছে বরাবর, ভাল চাকরি কবছে। একে তো বখা বলে না। এ তো সেলফিসনেস। আদরের ছেলেবা সেলফিস হবে কেন?

দীপনাথ ভ্রু কঁচকে ভেবেও এই রহস্যের সমাধান খুঁজে পেল না। কিন্তু বোস সাহেবের একাকিত্বের ব্যাপারটা বুঝতে পাবল। লোকটা খুবই আনন্দপুলার সন্দেহ নেই। সে মাথা নেড়ে হঠাৎ একটু হেসে ঘোষণা করল, মিসেস বোস কিন্তু সেলফিস নন।

রঞ্জন স্থির চোখে দীপনাথকে একটু মাপজোখ করে নিয়ে বলে, বউদি ফেলাদার চেয়েও বেশী সেলফিস। আপনি ওকে চেনেন না।

চেষ্টাবের দরজা হঠাৎ খুলে গেল। জনা চাবেক লোক বোরিয়ে এল কথা বলতে বলতে। তিন জনের পরনে বকবকে স্যুট। শুধু খুব লম্বা এবং রোগা মানুষটির পরনে শ্রুতি এবং গলাবন্ধ সূত্রের কোটি, মাথায় সাদা পাগড়ি। সকলের পিছনে বোস সাহেব। তাদের মুখ দেখে বোকা খাচ্ছিল না, ডিসিশন কোন দিকে গেছে। তবে তাদের কারো মুখেই গাভীর্ষ বা হাসিখুশি ভাব নেই।

বোস সাহেব ওদের সঙ্গেই অফিস থেকে বেরিয়ে গেল। যাওয়ায় আগে চারদিকে চেয়ে দেখে নিল একবার। দীপনাথ নিজের উপস্থিতি জানান দিতে উঠে দাঁড়িয়েছিল। বোস সাহেব একবার তাকালও তার দিকে, কিন্তু কোনো ইশারা করল না।

দীপনাথ আবার বসে পড়ল। এই দাঁড়ানোর অবস্থায় তাকে দেখলে মণিদীপা অবশ্যই চাপা হিংস্র গলায় বলত, স্লেভ! স্লেভ! বন্ডেড লেবারার।

ওরা বেরিয়ে যেতেই অফিসে একটা চাপা গুঞ্জন শুরু হয়ে গেল, নানা রকম অনুমান, আন্দাজ।

হাতে একটা কাজ আছে। সেরে ফেলি। বলে রঞ্জন তার টাইপ মেশিনে খটাখট শব্দ তুলতে লাগল।

দীপনাথ উঠে সামনের দিকে জানালায় এসে উঁকি দিয়ে দেখল, মস্ত একটা গাড়িতে বোকাই হয়ে বোস সাহেব সমেত মালিকরা কোথাও যাচ্ছে। অর্থাৎ এখন তাব কোনো কাজ থাকছে না।

দীপনাথ বোকা নয়। সে জানে এই কোম্পানির যা কার্পিটাল ইনভেস্টমেন্ট আছে তাতে অনায়াসে এটাকে উঁচু গ্রেডে তোলা যায়। কিন্তু ব্যবসায়িক কারণে মালিকরা তা চাইছে না। বোস চাইছে। শুধু বাজিগত বেতন বা ভাতা বাড়ালেই বোস খুশি হওয়াব

লোক নয়। সে যে এ কোম্পানিকে হায়ার গ্রেডে তুলেছে তার স্বীকৃতি না দিলে সে খুশি হবেও না। টাকার সঙ্গে প্রেস্টিজও তার দরকার। মালিকরা সেই মৌলিক ব্যবসাগত নীতিতে নরম হল কিনা সেটাই বড় কথা।

সূত্রাং দীপনাথের অনিশ্চয়তা কাটে না।

বোস সাহেবের বেয়ারাকে জিজ্ঞেস করতেনই সে বলল, সাহেব লানচের পর অফিসে আসবে।

লানচের এখনো দেবী আছে দেখে দীপনাথ সন্তুর্ণণে গিয়ে বোস সাহেবের চেয়ারে ঢুকে দরজাটা টেনে দিল। এই চেয়ারে ঢুকতে তার কোনো বাধা নেই। প্রায়ই ঢোকে।

চেয়ারে এয়ার-কন্ডিশনার চলছে। বিশাল ঝকঝকে সেক্রেটারিয়েট টেবিল, ঘোরানো চেয়ার। মেঝেয় সত্যিকারের উলের কাপেট। মালিকরা বোস সাহেবকে যথেষ্ট আদরে রেখেছে। এত আদরে থাকলে দীপনাথ বর্তে যেত, আর কিছু চাইত না। মালিকদের কথায় উঠত, বসত। কিন্তু নাগ্নে সুখমস্তি। বোস আরো চায়। কেন চায় কে জানে! এ পৃথিবীতে কিছু মানুষের আছে রাক্ষসে চাওয়া। আলাদীনের দৈত্য কিংবা জীন পরীরাই বোধ হয় সেই চাহিদা কেবলই মিটিয়ে যাচ্ছে। দীপনাথ খবর রাখে, এক আধা-সাহেবী কোম্পানীর এক ডিরেকটর বিশ হাজার টাকা মাইনে এবং আর সব খরচপত্র পায়। এত পাওয়া পছন্দ কবে না দীপ। এত পেলে কি জীবনটা বিশ্বাদ হয়ে যায় না!

ডাইরেকট লাইনে সে বোস সাহেবের বাড়ির নম্বর ডায়াল করল।

মণিদীপা বোধ হয় আর কারো অপেক্ষায় টেলিফোন কোলে করেই বসে ছিল। প্রথম রিং-এর শব্দটা হতে না হতেই রিসিভার তুলে বলল, হেলো।

আমি দীপ।

হঁ। কি খবর?

একটা খবর বোধ হয় দিতে পারি।

কি সেটা?

খবরটা ভাল হলে খাওয়াবেন তো!

আপনার প্রিমিটিভিনেসটা কবে যাবে বলুন তো?

বাথাহত দীপনাথ বলে, কেন? প্রিমিটিভিনেসটা কি দেখলেন?

ঐ যে খাওয়ার কথা। খাওয়াটা এমন বড় প্রবলেম কি?

দীপনাথ বিষন্ন হেসে বলে, আপনার মতো একজন মার্ক্সবাদীর মুখে কথাটা কি মানাল? দেশের লক্ষ মানুষের মূল প্রবলেমটাই তো এই প্রিমিটিভ প্রবলেম। যা নিয়ে আপনি ভাবছেন, স্নিগ্ধদের ভাবছেন।

স্নিগ্ধর কথা ওঠে কেন? কথা হচ্ছে আপনার আর আমার মধ্যে। লীভ স্নিগ্ধ।

আমি ওর নাম উচ্চারণ করলেও বুঝি ওকে অপমান করা হয়?

মণিদীপা অধৈর্যের গলায় বলে, ইউ আর স্টিল প্রিমিটিভ। ইউ আর জেলাস।

দীপনাথ একটু চোখ বুজে দম ধরে রইল। তারপর বলল, আমার জেলাসির কোনো কারণ নেই।

নিশ্চয়ই জেলাস। আপনি জেলাস, মিস্টার বোস জেলাস। আপনারা স্নিগ্ধকে হিংসে করেন, কারণ আপনারা জন্মেও ওর মতো হতে পারবেন না।

সবাই কি নেতা হতে পারে? কাউকে কাউকে তো জনগণও হতে হবে।

স্নিগ্ধ নেতা নয়। আমরা ব্যক্তিপূজায় বিশ্বাস করি না, নেতৃত্বেও নয়।

তা হলে কি কালেকটিভ লীডারশীপ ?

ও বাবা । তাও জানেন দেখছি ।

একটু একটু শিখছি ।

এবার খবরটা কি দয়া করে বলবেন ?

তাই তো বলতে চাইছিলাম । কিন্তু আপনি বলতে দিচ্ছেন কই ?

সরি । এবার বলুন ।

বোস সাহেব বাংলাদেশের চাকরি নাও নিতে পারেন । আজ মালিকদের সঙ্গে কনফারেন্স হল ।

শুনে মণিদীপা একটু চুপ করে থাকে । তারপর নিম্পৃহ গলায় বলে, তাতে আমার কি ? কিছুই কি নয় ?

বোস সাহেবের বাংলাদেশে যাওয়া-না-যাওয়া নিয়ে তো কোনো প্রবলেম হয়নি । আমাদের প্রবলেম অন্য । সে আপনি বুঝবেন না ।

দীপনাথ বিষণ্ণ হয়ে বলে, ও । আমি অবশ্য আপনাদের প্রাইভেট ব্যাপারে কিছু জানতে চাইছিলাম না । জাস্ট খবরটা দিলাম, যদি তাতে আপনার মত বদলায় ।

না, খবরটার তেমন কোনো দাম নেই আমার কাছে । বোস কি ফাইন্যান্সি ডিসিশন চেক করেছেন ?

তা এখনো জানি না । তবে ভাবসাব দেখে মনে হয়, মালিকরা এ রকম একজন এফিসিয়েন্ট লোককে ছাড়বে না ।

এফিসিয়েন্ট ! বলে একটু গ্লেশের হাসিই যেন হাসল মণিদীপা । তারপর বলল, আপনি কষ্ট করে খবরটা দিলেন বলে ধন্যবাদ । যদিও খবরটার কোনো ইমপর্ট্যান্সই আমার কাছে নেই ।

শুনুন, মিসেস বোস ।

শুনিছি । কিন্তু মিসেস বোস নয়, মণিদীপা । আমার নিজস্ব পরিচয়টাই আমার একমাত্র পরিচয়, কথাটা কতবার বলেছি ?

মনে রাখতে পারি না । আমরা একটু সেকলে ।

হ্যাঁ, আপনারা কিছু অভ্যাসের দাস ।

তাই হবে ।

কি বলছিলেন ?

কাল রাতে আমি আপনাকে যা বলেছি তার জন্য খুব লজ্জিত ।

লজ্জার কি আছে ? ফ্র্যাংকেনস আমি পছন্দই করি । আমিও তো আপনাকে কিছু কথা বলেছি ।

ও সব তো সত্যি নয় ।

কোনটা সত্যি নয় ?

ঐ যা সব বললেন ।

বোস সাহেব আপনাকে আর আমাকে সন্দেহ করে কি না ।

দীপনাথের কান লাল হল এত দূরে থেকেও । বলল, ও সব উনি যদি ভেবে থাকেন তো ভুল ভেবেছেন ।

ভুল ভাবতে পারেন । তবে সত্যি হলেও লজ্জার কিছু নেই ।

কী, যে বলেন !

আপনি মেয়েদের বোকা ভাবেন, না ?
 না তো। কেন ?
 সব পুরুষই তাই ভাবে।
 আমি ভাবি না।
 আর মেয়েরাও আবার পুরুষদের বোকা ভাবে।
 এ সব কথা হচ্ছে কেন ?
 ভাবছিলাম, আপনি আমাকেও বোকা ভাবেন কি না।
 মোটেই না।
 না ভাবলেই ভাল। কারণ, আমি বোকা নই।
 আপনি তো খুবই বুদ্ধিমতী।
 খুব না হলেও মোটামুটি।
 কিন্তু কী বলতে চাইছেন ?
 বলছি যে, আমি পুরুষদের ভাবসাব এবং মতলব টের পাই।
 ঠিক বুঝলাম না।
 আমি জানি আপনি আমার প্রেমে পড়েছেন।
 না না। ছিঃ ছিঃ কি যে বলছেন সব...
 আর তাতে আমি মোটেই বাগ করিনি। বরং খুশি হয়েছি।
 কিন্তু ব্যাপারটাই যে সত্যি নয়। দীপনাথ মিথোঢ়াকে সত্যি বলে চালাবার চেষ্টা করে।
 ও পাশ থেকে মণিদিপা খুব আত্মপ্রত্যয়ের সঙ্গে বলে, আমি মানুষে মানুষে ভালবাসায়
 বিশ্বাসী। বরং ভাল না বাসাটাই সম্ভবজনক।
 কিন্তু সে তো অন্য ভালবাসা।
 আমার কাছে সব ভালবাসারই অর্থ এক। ভালবাসা মানেই তো আর বিয়ে বা সেকস
 নয়।
 তা হলে মিস্টার বোস কি দোষ করলেন ? উনি কেন আপনার ভালবাসা পাচ্ছেন না ?
 খুব বুদ্ধিমানের মতো পট করে কথাটা পেড়ে ফেলল দীপনাথ।
 মানুষ হিসেবে ঠাঁর প্রতিও আমার ভালবাসা এবং সহানুভূতি আছে। তবে আমরা
 শ্রেণীশত্রুর প্রতি কিছুটা নির্দয়।
 মিস্টার বোস আপনার শ্রেণীশত্রু হতে যাবেন কেন ? আপনাদের শ্রেণী তো এক।
 মোটেই নয়। দেয়ার ইজ এ গ্রেট ডিফারেন্স।
 কিসের ডিফারেন্স ?
 আমি তো আপনাকে আগেও বলেছি আমি হচ্ছে শ্রমিকশ্রেণীর মানুষ।
 বলেছেন, কিন্তু আমি কথাটা আজও বুঝতে পারিনি।
 কারণ আপনার সেই মানসিকতা বা ট্রেনিং নেই।
 তা অবশ্য ঠিক।
 অথচ শুনেছি আপনি এক সময়ে ছাত্র আন্দোলন করতেন। এবং সেটা করতেন
 শিলিগুড়িতেই, যেখানে অনেক বিপ্লবীর জন্ম।
 দীপনাথ সত্যিকারের অবাক হয়ে বলে, এ কথা আপনাকে কে বলল ?
 বলেছে শিলিগুড়িরই একটা ছেলে। জেসপের ইঞ্জিনিয়ার। একটা পাটিতে কিছুদিন
 আগে আলাপ হল। সে শিলিগুড়ির ছেলে শুনে আপনার রেফারেন্স দিয়েছিলাম।

আমাকে চিনল ?

খুব চিনল। নইলে জানলাম কি করে ?

তখনকার ছাত্র আন্দোলন তো এখনকার মতো ছিল না।

তা হতে পারে। তবু আপনি যে কোনোদিন কোনো আন্দোলন করেছেন তাতেই প্রমাণ হয় যে, আপনার ব্যাকবোন ছিল।

এখন কি নেই ?

না। মিস্টার বোসের তাঁবেদারি করে করে আপনার ব্যাকবোন ভেঙে গেছে। সোজা কথা, মিস্টার বোসরা অন্যের মেরুদণ্ড ভেঙে দেওয়ার জন্যই অত মাইনে পান।

তাই নাকি ?

ঠিক তাই। আর সেই জন্যই মিস্টার বোস আমার শ্রেণীশত্রু। আপনারও।

দীপনাথ ঠিক কবেছিল, কথাটা বলবে না। কিন্তু এখন একটু গুমগুমে বাগ আব উত্তেজনার মাথায় কথাটা এসে গেল। সে বলেই ফেলল, কিন্তু আপনাকেও যে কেউ কেউ চরম শ্রেণীশত্রু মনে করে।

করতে পারে। তারা কারা ?

আপনারই আত্মীয়স্বজন কেউ কেউ।

আমার আত্মীয়দের আপনি চেনেন ?

আপনার এক দেওরের সঙ্গে আলাপ হল। দূর সম্পর্কের দেওর। সে আপনাকে পছন্দ করে না।

সে কি খুব গরীব ?

বেশ গরীব। কেন ?

যদি গরীব হয় তবে তাকে আমার ভালবাসা জানিয়ে দেবেন। যে-কোনো গরীবেরই অধিকার আছে আমাকে ঘৃণা করার। কারণ দুর্ভাগ্যবশত আমি একজন গুপ্তগোলাকার স্ত্রী। কিন্তু যে-কোনো গরীবই আমার পরম শ্রদ্ধার পাত্র।

একথাও কি তাকে জানাবো ?

নিশ্চয়ই। কিন্তু জানানোর সাহস আপনার হবে না।

কেন ?

কারণ চুকলি যারা করে তাদের সংসাহস থাকে না।

তার মানে ?

আপনি কার কথা বলছেন তা আমি জানি। রঞ্জন। সে যদি কোনো কথা আপনাকে বলেই থাকে তবে সেটা আমার কাছে ফাঁস করা আপনার উচিত হয়নি, দীপবাবু। একে সাদা বাংলায় চুকলি করা বলে।

দীপনাথের মাথা ঝাঁ ঝাঁ করছিল অপমানে। এই মেয়েটার কাছে সে কেন বারবার এরকম হেরে যায় ? এত নির্মমই বা কেন মণিদীপা ?

মণিদীপার শান্ত স্বর ওপাশ থেকে শোনা গেল, শুভ্র দীপবাবু, আমি আপনার ভাল চাই বলেই আপনাকে ছোটো হতে দেখলে খারাপ লাগে। মনে রাখবেন আপনিও একজন গরীব, আর গরীবের জন্য সামনে বিশাল লড়াই পড়ে আছে। কূটকচালির মধ্যে জড়িয়ে পড়লে লড়াইটা করবে কে ?

দীপনাথ অশ্রুট-স্বরে বলল, মাপ করবেন। ঠিক চুকলির জন্য কথাটা বলা নয়।

তাও জানি। আপনি আমাকে একটু চিমটি কাটতে চেয়েছিলেন। কিন্তু অত সহজে জন্ম

হওয়ার মানুষ: তো আমি নই। আমার ট্রেনিং আছে।

টেলিফোনটা কান থেকে নামিয়ে সভয়ে দীপনাথ সেটার দিকে চেয়ে রইল কিছুক্ষণ। ওপাশে মণিদিপা এখনো কিছু বলছে। কিন্তু সেটা শুনল না দীপনাথ।

আস্তে টেলিফোনটা নামিয়ে রেখে বেরিয়ে এল।

অল্পের জন্য বেঁচে গেল দীপনাথ। বেরোতেই মুখোমুখি বোস সাহেব।

খুবই গম্ভীর মুখ বোস সাহেবের। দীপনাথের দিকে চেয়ে বলল, চেষ্টা করে আসুন। কথা আছে।

॥ পঁচিশ ॥

দীপ একটু খতমত খেয়েছিল ঠিকই। আবার বোসের সঙ্গে চলার দীর্ঘকালের অভ্যাসবশে সামলেও গেল।

চেষ্টা করে ঢুকে বোস সাহেবের মুখোমুখি বসল শান্তভাবে। মনে কিছু প্রত্যাশা। চাকরি বা পারমানেন্ট স্ট্যাটাস নিয়ে। দীপনাথ অবশ্য নিজে থেকে কিছু জিজ্ঞাসা করবে না। বোস নিজেই যদি বলে।

বোস সাহেবকে খুবই ক্লান্ত দেখাচ্ছিল। ইদানীং দীপ লক্ষ্য করছে, এই অল্প বয়সেই বোসের গায়ের চামড়া অনেকটাই যেন ঝুলে ঝুলে পড়েছে। শরীরের কোনো বাঁধন নেই। মুখশ্রীতে কিছু শ্রীহীনতা। ফ্যামিলি অ্যাফেয়ার্সের জন্য হতে পারে। কিংবা কোনো অসুখ হওয়াও বিচিত্র নয়।

বোস নিজের চুলে অতি দ্রুত উদ্বেজিত আঙুল চালান কয়েকবার। একটু হাঁফাচ্ছেও। আজকাল অসম্ভব গরম পড়ে গেছে কলকাতায়। জুন চলে গেল। জুলাইয়ের আজ চার তারিখ। বৃষ্টি নেই। কলকাতায় আজকাল বৃষ্টি হয় কম। গরম ক্রমেই বাড়ছে। বৃষ্টিহীন শহরের বাতাস বিষিয়ে যাচ্ছে ধীরে ধীরে। এই গরমে বোসের মতো আরামপ্রিয় নথরকান্তিদের হাঁফ ধরা স্বাভাবিক। তবু কেমন সন্দেহ হয় দীপনাথের। লোকটার শরীর হয়তো ভাল নেই।

বোস কিছু বলার আগেই তাই দীপনাথ হঠাৎ বলে ফেলল, ইদানীং কোনো মেডিক্যাল চেক আপ করিয়েছেন মিস্টার বোস?

বোস সাহেব বেশ কষ্টকর একটা বড় শ্বাস ছেড়ে বলল, না তো! কেন?

আপনার বয়স বেশী নয় জানি। তবু একটা মেডিক্যাল চেক আপ করিয়ে রাখা ভাল।

বোস একটু অবাক হয়ে চেয়ে থেকে বলে, কেন বলুন তো! আমি তো বেশ ভালই আছি।

আমি বলছি না যে, আপনি অসুস্থ। তবে চেক আপের হ্যাঁবিট রাখা ভাল। বিশেষ করে যারা রেসপনসিবল পোস্টে কাজ করে তাদের জন্য এটা দরকার। অন্তত হার্ট, প্রেশার আর সুগার।

হেল উইথ দোজ থিংস। শুনুন, কোম্পানি আপগ্রেডেড হচ্ছে।

দীপনাথ অপমান হজম করে অভ্যস্ত। প্রথম কথাটা তাই গায়ে মাখল না। দ্বিতীয় কথাটা শুনে একটু নড়েচড়ে বসল। বলল, মালিকরা রাজি হয়ে গেল তা হলে?

ভারবালি। ফাইন্যাল ডিসিশন আমেদাবাদে গিয়ে জানাবে। তবে কথার নড়চড় বড় একটা ওদের হয় না।

তা হলে আপনি কি এই কোম্পানিতেই থাকছেন ?

সম্ভবত । ওবা আমাকে আমেদাবাদে হেড অফিসে যাওয়াবও অফাব দিয়েছে । সেকেন্ড অফাব দিল্লি নতুন ব্রাঞ্চেব চার্জ । আমি কোনোটোতেই বাজি হইনি । ইস্টার্ন জোনে আমাব পাওয়াব অনেক বেশী ।

সে কথাও ঠিক ।

আগামী কয়েক মাসে এখানে অনেক বদবদল হবে । আমি যদি শেষ পর্যন্ত থাকি তবে আপনি একটা ভাল পজিশন পাবেন ।

সাবধানে দীপনাথ মুখ তুলে জিজ্ঞেস কবল, কিবকম পজিশন ?

চাবজন অ্যাসিস্ট্যান্ট ম্যানেজাব নেওয়া হবে । আপনি ঐ চাবটে পোস্টেব একটা পেতে পাবেন । আবাব বলছি যদি আমি থাকি । আমাব ডিসিশন এখনো ফাইন্যাল নয় ।

আব যদি বাংলালোব যান তা হলে ?

তাহলেও ওপেন অফাব আছে । কাল বাতেও বলছিলাম । আপনিও যেতে পাবেন ।

কিন্তু আপনাবই যে কোনো নিশ্চয়তা নেই মিস্টাব বোস ।

বোস মাথা নাডল না আমাব কোনো নিশ্চয়তা এখনো নেই । তবে হয়তো দিন সাতেকের মধ্যে সব ঠিক হয়ে যাবে । আপনি তো অনেকদিন অপেক্ষা কবলেন । আব তো মোটে সাত আটটা দিন । মালিকবা ফিবে গিয়েই বোডেব মিটিং ডাকবে । তবে সে মিটিং নাম কো বাস্তু । ডিসিশন যা হওয়াব তা এখানে আজই বলতে গেলে হয়ে গেল ।

তবু আপনি বাংলালোবে যাওয়াব ব্যাপাবটা ঝুলিয়ে রাখলেন কেন ?

দেযাব ইজ অ্যানাদাব প্রবলেম । কাল বাতে সেটা নিয়েও আপনাব সঙ্গে ডিসকাশন হয়েছিল ।

মিসেস বোস ?

একজ্যাকটলি ।

প্রবলেমটা কি ?

দীপা নিজেই প্রবলেম । শী ইজ পলিটিক্যালি অবসেসড । মেয়েদেব পলিটিকস কবা আমাব পছন্দ নয় । দু নম্বব, শী ইজ গাইডেড বাই অ্যানাদাব ম্যান ।

আপনি তো কাল ডিভোর্সেব কথা বলছিলেন ।

ডিভোর্স একটা সোস্যাল স্ক্যান্ডাল । জবাবদিহি কবতে কবতে জিব বেবিযে যাবে পাঁচজনেব কাছে । আমি চাইছিলাম স্নিগ্ধব ক্লাচ থেকে ওকে বেব কবে বাংলালোবে নিয়ে যেতে ।

দীপ একটু ভাবল । বলল, উনি বোধ হয় রাজি নন ।

না ।

তা হলে কি হবে ?

ও যদি শেষ পর্যন্ত বাজি হয় তবে আমি নিশ্চয়ই এ চাকবি ছেড়ে বাংলালোরেব অফারটাই নেবো । ইট অল ডিপেন্ডস অন হাব ।

বুঝলাম । বলে দীপ বিবস মুখে উঠে দাঁডায় । শেষ পর্যন্ত মিসেস বোসের অনিশ্চিত ইচ্ছা অনিচ্ছার ওপরেই তাব ভাগ্য নির্ভবশীল । ব্যাপারটা খুবই অপমানজনক নয় কি ?

বোস একটু ঠাণ্ডা হয়েছে । হাঁফ-ধরা ভাবটাও আব নেই । বলল, আমি কাল আপনাকে আব একটা কথাও বলেছিলাম । সেটা কিন্তু ইমোশনেব কথা নয় ।

কি কথা ?

আই রিয়েলি নীড ইউ । মীজ ট্রাই টু বি মাই ফ্রেন্ড ।

দীপনাথের ভদ্রতায় বাধে । নইলে বলত, আপনার স্ত্রীর সঙ্গে প্রেম আছে সন্দেহ করেও বন্ধুত্ব চান ? না বলে দীপনাথ একটু কাষ্ঠহাসি হাসল । মাথা নাড়ল শুধু । তার অর্থ, ঠিক আছে ।

বোস খুব তীক্ষ্ণ চোখে চেয়ে ছিল । হঠাৎ চোখ নামিয়ে টেবিলের একটা কাগজ খামকা দেখতে দেখতে বলল, আমি জানি কাজটা আপনার পক্ষে বেশ শক্ত । ইন রিয়েলিটি, আপনার ওপর কিছু ইনজাস্টিস হয়েছেও । কিন্তু সেগুলো মেরামত করা অসম্ভব নয় ।

মিসেস বোসের মতামতটা কবে জানা যাবে ?

জানি না । তবে আজ আমি আর একবার ট্রাই করব ।

একবার স্নিগ্ধদেবকে অ্যাপ্রোচ করুন না !

বোস এবার চোখ তুলে বেশ কিছুক্ষণ চেয়ে থাকে । তারপর ধীর স্বরে বলে, লোকটাকে আমি চিনি । প্রথম দিকে ওপেনলি কয়েকবার আমাদের বাসায় এসেছেও । কথাবার্তায় ভীষণ ভদ্র, হাসিটাও খুব সুইট । কিন্তু অসম্ভব স্টার্বোর্ণ । ও যদি কোনো কিছু স্থির করে থাকে তবে তা মরলেও বদলাবে না । তা ছাড়া আপনি কি মনে করেন নিজের স্ত্রীকে কোনো ব্যাপারে রাজি করাতে অন্য কারো সাহায্য নেওয়াটা ওয়াইজ ডিসিশন ?

সেটা অবশ্য ভেবে দেখিনি ।

ম্মান হেসে বোস বলে, আমাকে ভাবতে হয় ।

দীপনাথ বিনীতভাবে বলল, যদি অনুমতি দেন তবে আমি একবার এই রিমোট কন্ট্রোলটির কাছে অ্যাপ্রোচ করতে পারি ।

রিমোট কন্ট্রোল ! বলে বোস অবাক হয়ে তাকায় ।

ঐ যে স্নিগ্ধদেব । যিনি আড়াল থেকে মিসেস বোসকে চালাচ্ছেন ।

রিমোট কন্ট্রোল ! বলে হঠাৎ হেসে ওঠে বোস । খুব জোরে নয় । তবু সেটা হাসিই । মাথা নেড়ে বলে, রিমোট কন্ট্রোল ! একজ্যাকটলি । কিন্তু আপনারও তার কাছে যাওয়ার দরকার নেই । স্বামী-স্ত্রীর ব্যাপারে ঠিক ওভাবে ফয়সালা হয় না । তবু আপনার অফারের জন্য ধন্যবাদ । আপনি আজ চলে যেতে পারেন । আমার আজ আর আপনাকে দরকার হবে না । কল ইউ এ ডে ।

দীপনাথ বেরিয়ে এল ।

বাইরে হা-হা করছে রোদ । ফুটকড়াই ভাজা গরম । টেরিলিনের নিশ্ছিদ্র শার্টের তলায় গা ভিজে গেল ঘামে ।

আনমনে রাস্তা পার হল দীপনাথ । হাতে অনেকটা সময় আছে । এই খর গ্রীষ্মের দুপুরে তার কোথাও যাওয়ার নেই । বোস যদি বাংগালোরে না যায় তবে সে এই কোম্পানির অ্যাসিস্ট্যান্ট ম্যানেজার হবে কোনোদিন । কিন্তু অতটা ভাবতে একটু কষ্ট হয় তার । বোস সাহেব যতই বলুক, লোকটা ধুরন্ধর । কোনো না কোনো দিক থেকে লোকটার ওপর প্রেশার রাখতে হবে । কিন্তু বোসকে প্রভাবিত করার কোনো পথ পায় না দীপ ।

স্নিগ্ধদেব । একবার স্নিগ্ধদেবের কাছে খুব যেতে ইচ্ছে করে দীপনাথের । সে হয়তো এক ছদ্মবেশী টুটকি । সে-ই হয়তো ভারতের ভাবী প্রধানমন্ত্রী । স্নিগ্ধদেবই হয়তো সেই মানুষ যার জন্য পৃথিবী অপেক্ষা করছে । আবার হয়তো বা সে একটা ফ্রড ! একটা সাইকিক কেস । স্বেফ থোঁকাবাজ ।

যাই হোক, একবার স্নিগ্ধদেবের কাছে যেতে খুব ইচ্ছে করে ।

বিলু যে ব্যাংকে কাজ করে সেটা খুব দূরে নয়। প্রীতমটা কেমন আছে জানতে গুটি গুটি
সেদিকেই রওনা দিল দীপ। বেলা দুটো বাজবার মুখে মুখে পৌঁছেও গেল।

বিলু কাউন্টারে বসে। চোখাচোখি হতেই চোখ তুলে বলল, সেজদা!

প্রীতম কেমন?

ঐ রকমই।

লাবু?

আর কি, দিন দিন দুষ্ট হচ্ছে।

তুই কখন বাড়ি ফিরিস?

দেরী হয়। সন্দের মুখে মুখে। কেন বলো তো?

না এমনিই জিজ্ঞেস করলাম। অনেকটা সময় প্রীতম একা থাকে।

কি করব বল! সবই তো বোঝো।

বুঝি আবার বুঝিও না। চাকরিটা না নিলেই পারতিস।

পারতাম না। জোরে বোলো না, সবাই শুনবে। কোথেকে এলে হঠাৎ?

আমার অফিস তো দূরে নয়।

তাই তো। মনেই ছিল না।

অরুণ আসে-টাসে?

বিলু যেন চোখটা ফিরিয়ে নিল একটু। বলল, আসে। ওর বাবা এই ব্যাংকের ডিরেক্টর।

বিলু কি সত্যিই অরুণের সঙ্গে প্রেম করে? দীপনাথ সাহস করে বলল, কিসে ফিরিস
বিকলে?

লেডিজ ট্রামে। কখনো মিনিবাসে।

অরুণ লিফট দেয় না?

বিলু কি একটু ভয় পেল? কেমন যেন দেখাল মুখখানা। ধরা পড়া ভাল। নীচু স্বরে
বলল, কালেভদ্রে। যখন আসে তখন পৌঁছে দেয়।

বিলু অরুণের সঙ্গে প্রেম করলেই বা তার কি? ভেবে পায় না দীপনাথ। সে নিজেও কি
মণিদীপার প্রেমে পড়েনি? ওটাও পরস্ত্রী, এটাও পরস্ত্রী। তবু মানুষ এমনই অন্ধ, এমনই
নিকৃষ্ট যে, নিজের বেলা আর পরের বেলা দু রকম চোখ নিয়ে দেখে। দীপনাথও অবিকল
তাই। নিজেকে একদিন দীপনাথ হয়তো এ জন্যই ঘৃণা কবতে শুরু করবে। নিজেকে ঘৃণা
করার অনেকগুলো কারণ ঘটতে শুরু করেছে।

দীপনাথ উদাস মনে জিজ্ঞেস করল, আজ কখন ফিরবি?

দেরী আছে। পাঁচটার আগে তো নয়।

দীপনাথ ঘড়ি দেখে বলল, একটু আগে বেরোতে যদি পারিস তবে আমিও সঙ্গে যেতে
পারতাম।

তুমি যাও না বাসায়। ও তো একা আছে, তোমাকে পেলে ভীষণ খুশি হবে। আমি ছুটি
হলেই তাড়াতাড়ি চলে যাবো।

দীপনাথ ভাবতে লগল। ব্যাংকের লোহার শাটার নেমে এল সদর দরজায়। লেনদেন
বন্ধ। কোথায় যাবে বা কোথাও যাবে কিনা তা আজ ঠিক করতে পারছিল না দীপনাথ। সে
কি সত্যিই মণিদীপার কাছে রক্তনের কথা নিয়ে চুকলি করছিল? ভাবলে এখনো কান লাল
হয়ে ওঠে যে!

না রে যাই। আজ অন্য কাজ আছে। বলে দীপনাথ কাউন্টার ছেড়ে চলে আসতে

আসতেও একবার কী ভেবে বিলুর দিকে ফিরে দেখল। বিলুকে একটু অন্যরকম লাগছে না ? কেন লাগছে ? কয়েকদিন ধরেই যেন একটু অন্যরকম ! না ? বিলুর চুল আর রুক্ষ নয়। একবেণীতে বাঁধা। জুঁ কি প্লাক করে বিলু আজকাল ? হতে পারে। তবে ঠোঁটে ন্যাচারাল কাঁলারের লিপস্টিক যে দিয়েছে তা স্পষ্টই বোঝা যায়। মুখের উজ্জ্বল রং প্রমাণ করে মুখেও আজকাল কোনো দামী মেক-আপ ব্যবহার করে সে। চোখে কি একটু আবছা কাজলও দিয়েছে ?

দীপনাথের ফিরে তাকানো দেখে বিলুও চেয়ে ছিল। দীপনাথ তাই চোখ ঘুরিয়ে নিয়ে চলে আসে। মনটা খারাপ লাগে। খুব খারাপ লাগে। হয়তো চাকরি করতে গেলে মেয়েদের একটু সাজতেই হয়। এর পিছনে হয়তো অন্য কারণ নেই। তবু কেন মনটা খারাপ হল আজ দীপনাথের ?

বিলুর ভাবনাটা শেষ করেনি দীপনাথ। ভাবতে ভাবতেই প্রচণ্ড রোদের রাস্তায় ছায়া দেখে দেখে হাঁটছিল। বিলু আজকাল আগেকার মতো গোমড়ামুখী নয়। বেশ কথাটখা বলে। হাসে-টাসেও। বয়সটাও যেন যথেষ্ট কমে গেছে।

এসব থেকে অবশ্য কোনো পাকা সিদ্ধান্তে আসতে পারে না দীপনাথ। কিন্তু বৃকের মধ্যে একটা মনখারাপের বাতাস বহিতে থাকে।

এই জনকোলাহল, মানুষে মানুষে বিচিত্র সব সম্পর্ক, সংসারে জীবন ও মৃত্যুর মাঝখানে হরেক জটিলতা, অপমান, দুঃখ ও অভাববোধ, এসব ছাড়িয়ে ঐ বহু দূরে এক মহান ষ্ঠেতবর্ণের পর্বত দাঁড়িয়ে আছে তার জন্য। শুধু তারই জন্য। দীপনাথ বরফকাটা কুড়ুল নেবে না, নাল লাগানো জুতো পরবে না, সঙ্গে নেবে না অকসিজেন সিলিণ্ডার, দড়ি বা তাঁবু। সে একদিন এমনি সাদামাটা ভাবে রওনা দেবে সেই উত্তুঙ্গ প্রেমিক ও প্রভুর কাছে। নিজের তুচ্ছতাকে বিসর্জন দেবে সেই মহিমময়ের অতুলনীয় মহত্বের মধ্যে। একদিন কি পাহাড় ডাকবে না তাকে ?

আজ হঠাৎ সেজদা ব্যাংকে এসেছিল। বিলু একটু দৃষ্টিস্তর সঙ্গে বলে।

অরুণ গাড়ি চালাচ্ছিল। মুখ না ফিরিয়েই বলল, সো হোয়াট ?

সেজদা কখনো আসে না তো।

তাই বলেই কি আসতে নেই ? তোমার সব অদ্ভুত অদ্ভুত প্রবলেম। সেজদা ব্যাংকে এসেছিল কেন তা নিয়েও মাথা ঘামাতে হবে নাকি ?

অরুণ ঠিক এসব ব্যাপার বুঝবে না। ওদের পরিবার সম্পূর্ণ অন্য ধরনের। ওরা অন্য রকম মানুষ। অটেল টাকা, অপার স্বাধীনতা। পরিবার থেকে কোনো বাধা নিষেধ নেই। বাপে ছেলেতে একসঙ্গে বসে মদ খায়, একই ক্লাবে ফুঁটি করতে যায়, মেয়েমানুষ নিয়ে খোলাখুলি আলোচনা করে।

বিলু তাই দাঁতে ঠোঁট কামড়ে একটু ভেবে বলল, জিজ্ঞেস করছিল যে তুমি আমাকে লিফট দাও কিনা !

দিই তো !

দাও সে তো ঠিকই। এখনো তো দিচ্ছে। বললাম যে, সেজদা কথাটা জানতে চাইছিল।

অরুণ গাড়িটা একটু আন্তে করে বলল, প্রবলেমটা কি একটু বলবে খোলাখুলি ? সেজদা জানতে চাইল তো তাতে কি হল ?

ভাবছি সেজদা আমাদের নিয়ে কিছু ভাবছে কিনা ।

কি ভাববে ?

সন্দেহ করতে তো পারে কিছু !

লাভ আফেয়ার ?

যদি ধরো তাই ।

অরুণ হাসল, কথাটা তো মিথ্যেও নয় । আই লাভ ইউ ।

ইয়ার্কি কোরো না । সেজদা একটু সেকলে । হয়তো ফ্রেণ্ডশীপ বোঝে না । উল্টোপাল্টা কিছু ভেবে বসে আছে ।

সেটা কি কোনো অ্যাংজাইটির ব্যাপার আমাদের ? তুমি যেমন আছে তেমনি থাকবে । লোকে যা খুশি ভাবতে পারে । আমরা তো বাচ্চা ছেলেমেয়ে নই । ভাল-মন্দ বুঝি ।

বোঝো ? বিলু একটু হাসে ।

আলবাত বুঝি ।

তা হলে বলো তো, এই যে আমাকে লিফট দিচ্ছে এটা ভাল না মন্দ ?

রাবিশ, বিলু । এসব নিয়েও তুমি ভাবো নাকি আজকাল ? তুমি একদম পাণ্টে গেছ ; কি রকম ?

আগে তোমার এত সঙ্কোচ ছিল না । কত ফ্রী ছিলে !

আজকাল ফ্রী নই ?

একদম নও । সেজদার সঙ্গে সঙ্গে তুমিও একই লাইন অফ থটস্ ধরে ফেলেছো ।

সংসারে, বিশেষ করে আমাদের মতো মধ্যবিত্ত সংসারে বেশী ফ্রীডম ভাল নয়, অরুণ ।

কে তোমাকে এসব শেখাচ্ছে বলো তো !

কে শেখাবে ! নিজেই বুঝতে শিখছি ।

বিলু, পৃথিবী তো পিছিয়ে যাচ্ছে না । চারদিকে চেয়ে দেখ কত মুক্ত হয়ে যাচ্ছে সমাজ, কত অবাধ হচ্ছে । নিজের মনের মধ্যে মাথা কুটে মরার সংস্কার থাকলে স্বাধীনতার অর্থই থাকে না । তোমাকে স্বাধীন কববে কে ?

বোকো না তো ! বকবকানি একদম ভাল বাসি না ।

অরুণ খুব হাসল । বলল, কেমন দিলাম আস্ত একখানা ভাষণ ছেড়ে !

কলেজের ডিবেটিং-এ বলতে সে একবকম ছিল । এখন তো দামডাটি হয়েছে ।

আচ্ছা, নাউ আই শ্যাল হোল্ড মাই টাং অ্যাণ্ড লেট ইউ লাভ ।

বিলু খানিকক্ষণ থম ধরে রইল । তারপর হঠাৎ বলল, তুমি একটা ব্যাপার লক্ষ করেছেো, অরুণ ?

কী বলো তো !

আমার ভুল হতে পারে । আগে বলো, প্রীতমকে আজকাল তুমি কেমন দেখছো ? কেমন মানে ?

মানে প্রীতমকে আগের মতোই রুগ্ন লাগে কি তোমার ?

অরুণের মুখে হাসি নেই । গম্ভীর মনোযোগে খানিকক্ষণ ভাবল, তারপর বলল, হয়তো খুব ঝুটিয়ে লক্ষ করিনি । ইচ্ছা দেয়ার এনি ইমপ্রুভমেন্ট ?

বললাম তো, আমার চোখের বা মনের ভুল হতে পারে । তাই তোমাকে জিজ্ঞেস করছি ।

আমি লক্ষ করিনি । তুমি কিছু দেখেছো ?

মনে হয়। খুব সামান্য একটু যেন, ভুলই হবে হয়তো, তবু—
বিলু আর বলল না। বোধহয় ভাল কথা বলতে নেই বলেই।
অরুণ গম্ভীর মুখেই বলল, ঠিক আছে, আজ লক্ষ করে দেখবো।
দেখার কিছু নেই। তেমন কিছু হলে তোমার নজরে এমনিতেই পড়ত।
তার কোনো মানে নেই। প্রীতমের সঙ্গে দেখা হয় বটে। কিন্তু খুব ইনটেনসিভভাবে তো
ওকে লক্ষ করি না। মনটা হয়তো নানা রকম চিন্তায় ব্যস্ত থাকে। মানুষ তো কত সময়ে
একটা জিনিস দেখেও দেখে না।

বিলু হুঁ কুচকে সামনের কাচের ওপাশে গতিশীল রাস্তাঘাট দেখছিল। বলল, কদিন
আগে লাবুর জন্মদিনে কী কাণ্ড করেছিল সে তো জানো।

ই। অরুণ মাথা নাড়ল। তারপর বলল, দেয়ার মে বি সাম ইমপ্রুভমেন্ট।

ডাক্তার কি তোমাকে কিছু বলেছে?

ডাক্তাররা তো সব সময়ে প্রফেশন্যাল কথাবাতাই বলে।

ইদানীং কিছু বলেনি?

না। তেমন কিছু নয়।

ডাক্তারকে একবার জিজ্ঞেস করবে?

আজই তো যাচ্ছি প্রীতমকে নিয়ে। জিজ্ঞেস করব।

আজই আকুপাংচারের ডেট নাকি?

অরুণ বিস্ময়ে হুঁ তুলে বললে, না তো আজ আচার্যি কবিরাজের ডেট। ভুলে গেছ?

আমি আজকাল ভুলে যাই। এত চিন্তা মাথায়, অথচ অনেক কিছু মনে রাখতে পারি না।

ন্যাচারাল। তোমার অবস্থায় যে কারো হত।

বিলু একটু স্মিত মুখে বলল, তুমি তো মনে রেখেছো! আমার ভরসা যে তুমিই।

এ কথায় অরুণের ফর্সা রং রাঙা হল, বাজে কথা বোলো না।

কৃতজ্ঞতা জানাচ্ছি বলে ভেবেছো নাকি?

কখনো ওসব জানিও না। তাতে রিলেশনটা হালকা হয়ে যায়।

কী মুশকিল! কৃতজ্ঞতা জানাইনি তো! তবু বকছো কেন?

অরুণ চুপচাপ কিছুক্ষণ গাড়ি চালাল।

বিলু বলল, মুডটা হঠাৎ খারাপ করে ফেললে নিজের দোষেই।

অরুণ হঠাৎ হেসে ফেলল এবং চমৎকার দেখাল তাকে। বলল, লীভ ইউ। প্রীতমবাবুর
যদি কোনো ইমপ্রুভমেন্ট হয়ে থাকে তবে সেটাই আপাতত বড় কথা।

ময়দানের ভিতর দিয়ে খুব আস্তে গাড়ি চালাচ্ছে অরুণ। অন্যমনস্ক। গম্ভীর।

বিলু নিজের মনে মনে আর একবার সম্মোহিত হয়। এই একটি লোককে সে চেনে যে
নিজের প্রশংসা একটুখানি শুনলে লজ্জায় রাঙা হয় এবং কখনো কখনো রেগে যায়।
অরুণের অনেক গুণের মধ্যে এই একটা গুণ সবচেয়ে বেশী আকর্ষণ করে বিলুকে। অথচ
অরুণ কত ব্যাপারে কতই না প্রশংসা পাওয়ার যোগ্য। কিন্তু সেসব বলার কথা বিলুর
মনেও থাকে না। অরুণ অরুণের মতোই, সেটা আবার তাকে বলার কি? আজ হঠাৎ মুখ
ফসকে বলে ফেলেছিল।

বিলু খানিকক্ষণ ভেবেচিন্তে বলল, প্রীতমকে বাইরে থেকে যেমন মনে হয় ও মোটেই সে
রকম নয়। ওর মনের জোর সম্পর্কে আমার এতদিন কোনো ধারণাই ছিল না।

আজকাল খুব স্বামীর প্রশংসা করে বেড়াচ্ছে যে!

খেটুকু বলার সেটুকু বলব না কেন !

অরুণ আবার সিরিয়াস হয়ে বলে, কথাটা মিথ্যে নয় । হি ইজ এ ফাইটার । এ টাফ ফাইটার ।

হয়তো সেই জোরটার জন্যই লডতে পারছে । তোমার কি মনে হয় না মনের জোর থাকলে অসুখ সেরে যেতে পারে ।

আই বিলিভ ইন সায়ান্স । মনের জোর জিনিসটা ফ্যালনা নয় ! কিন্তু তার ক্ষমতার সীমা আছে ।

প্রীতম পারবে না বলছ ?

পারতে পারে । নট ইমপসিবল ।

কিন্তু তুমি চাইছো না যে আমি ওর মনের জোরের ওপর নির্ভর করে কোনো আশার কথা ভাবি ।

অরুণ প্রথমে জবাব না দিয়ে মলিন মুখ করে হাসল একটু । তারপর বলল, কথাটা অবশ্য তাই দাঁড়ায় !

কেন চাইছো না, অরুণ ?

প্রীতম যদি ভাল হয়ে ওঠে তো লক্ষ বার ওয়েলকাম । কিন্তু তুমি যে কোনো ইভেনচুয়ালিটির জন্য তৈরী থাকলেই ভাল । তাতে কোনো শকই তোমাকে ভেঙে ফেলতে পারবে না ।

ডাক্তাররা যে রুগীদের মনের জোর রাখতে বলে, সেটা তা হলে কি ?

সেটাও দরকার । কিন্তু মনের জোরটাই সব নয় । একবার আমার ইন্ধুলের অ্যানুয়াল পরীক্ষার আগে টাইফয়েড হয়েছিল । দিন চারেক টেম্পারেচার ঠায় একশ চারে দাঁড়িয়ে । তখনো টাইফয়েডের মডার্ন ট্রিটমেন্ট বেরোয়নি । চারদিনের দিন রক্ত পরীক্ষা করে টাইফয়েড ধরা গেল । আমি যেই বুঝলাম যে এ অসুখ সহজে সারবে না আর অ্যানুয়াল পরীক্ষাও দেওয়া হবে না, তখন গা ঝাড়া দিয়ে উঠে বসে মনের খুব জোর করতে লাগলাম । বছর নষ্ট হওয়ার আতঙ্কে জোরটা বেশ ভালই দিয়েছিলাম । সন্কেবেলা টেম্পারেচার সাতানব্বইতে নেমে গেল । ডাক্তাররা পর্যন্ত হাঁ । কিন্তু মাত্র কয়েক ঘণ্টার জন্য । তারপরই তেড়ে জ্বর উঠল । আবার একশ-চার । ত্রিশ দিনের দিন ভাত খাই ।

খুবই স্তব্ধ হয়ে বসে থাকে বিলু । ঠোঁটদুটো লিপস্টিক স্বেঙে ভারী শুকনো দেখায় ।

অরুণ কয়েকবার ফিরে ফিরে দেখল বিলুকে । তারপর বলল, হতাশ হলে বোধহয় !

বিলু কিছু বলল না । কিন্তু একটা বড় শ্বাস ফেলল ।

অরুণ গাঢ় আন্তরিক গলায় বলে, তোমাকে মিথ্যে কোনো স্তোক দেওয়াটা উচিত হত না বিলু । তার চেয়ে বাস্তববাদী হওয়া ভাল ।

আমি স্তোক চাইনি তো । বিলু একটু অবাক হয়ে বলে ।

তবু বলছি প্রীতমের মনের জোরের ওপর নির্ভর করে খুব একটা বেশী আশা করে বোসো না ।

বিলু আবার একটা বড় শ্বাস ফেলে বলল, দিন-রাত তো কেবল নেগেটিভ চিন্তাই করে যাই অরুণ ! আমাকে সেটা আর শিখিও না তুমি ।

নেগেটিভ চিন্তা করতেও বলিনি । যে কোনো অবস্থার জন্য মনটাকে নিরপেক্ষ রাখা ।

হঠাৎ বিলু ঝাঁঝালো গলায় বলে, কেন বাজে বকছো অরুণ, মনকে নিরপেক্ষ রাখা কথাটাই ভগ্নামি । কেউ কোনোদিন তা পারে না ।

চেষ্টা করলেই ডিটাচড হওয়া যায় । তুমি চেষ্টা করছ না । দিনে দিনে তুমি আরো বেশী জেবড়ে জড়িয়ে পড়ছো ।

বেশ করছি ।

অরুণ হাসল, কদিন পর দেখব তুমি হয়তো তারকেশ্বরে মানত করতেও যাচ্ছে ।
বিরক্ত হচ্ছিলো বিলু । নীরস গলায় বলল, যদি বুঝি তাতে কাজ হবে তা হলে তাও করবো । একজন মানুষের জন্যই করবো তো !

একটা শ্বাস ফেলে হতাশ গলায় অরুণ বলে, করো । মেয়েরা কোনোদিনই সংস্কারমুক্ত হতে পারে না, এ তো জানা কথা ।

আবার ভাষণ !

ভাষণ কেন হবে ! তোমাকে তো অন্যরকম জানতাম বিলু । তুমি ছিলে ঠাণ্ডা, লজ্জিকাল, আনইমোশন্যাল । প্রীতমের এই অসুখ যখন হল তখনো তোমাকে ইমোশন্যাল হতে দেখিনি । হঠাৎ আজকাল তোমার ভিতরে একটু আবেগ-টাবেগ দেখছি ।

বিলু চুপ করে থাকে । এ কথার জবাব হয় না । অরুণ দীর্ঘকালের বন্ধু । বিলুর স্বভাব, বিলুর চবিত্র সবই অরুণের নখদর্পণে । সে যদি আজ কোনো কথা বলে তবে সেটা বাজে কথা হবে না । কথাটা মিথ্যেও নয় । বিলুর ভিতরে কোনোদিনই কোনো আবেগ ছিল না । কোনো কিছুতেই সে উত্তেজিত হয়নি কখনো । এমন কি জ্ঞানত কোনোদিন বিলু কোনো কারণেই কাঁদেনি । অথচ কান্না নাকি মেয়েদের বড় সহজেই আসে । প্রীতম সম্পর্কে বিলু কোনোদিন তেমন কোনো টানও বোধ করেনি আবার বিরূপতাও নয় ।

কিন্তু এই সেদিন যখন লাবুর জন্মদিনে রোগা লোকটা বিছানায় বসে প্রাণপণে বেলুন ফোলানোর চেষ্টা করছিল তখন হঠাৎ সেই সামান্য দৃশ্যটা দেখে হঠাৎ বিলুর ভিতরে খান খান শব্দে কি যেন ভেঙে গেল । হঠাৎ এল আবেগ, হঠাৎ এল ভয় । প্রীতম মরে মাঝে, এই সত্যটাকে সে শাস্ত্র বিম্বাদে গ্রহণ করে নিয়েছিল । কিন্তু রোগা কাঠির মতো হাতে বেলুনটা ধরে কাঁপতে কাঁপতে যখন নিজের মহার্ঘ শ্বাসবায়ু তার মধ্যে ভরে দেওয়ার চেষ্টা করছিল প্রীতম তখনই যেন বিলু টেব পেল একটা মানুষের কাছে তার নিজের বঁচে থাকাটা কত জরুরী ।

আজকাল আমার মধ্যে একটু-আধটু আবেগ আসছে ঠিকই । বিলু অনেকক্ষণ বাদে বলল, কিন্তু তার মানে তো এ নয় যে, সেটা ইললজিক্যাল ।

অরুণ নিষ্পহ গলায় বলে, আমি ইমোশন জিনিসটা বুঝি না । আমার নিজের তো কোনো সেন্টিমেন্ট নেই, বুঝব কি করে ? আমার মা যেদিন মারা গেল সেদিন এক ফোঁটাও কাঁদিনি । কোন দুঃখ বা অভাব বোধ করিনি । আমি বিকেলে একটা পাটিতেও গিয়েছিলাম । আমি হচ্ছি আলবিয়ার কামুর নায়কদের মতো । ভেরি মাচ কোল্ড ব্লাডেড ।

বিলু চিঁমটি কেটে বলে, তোমার পরিবারকে জানি । বেশী বোকো না । মায়ের জন্য কাঁদবেই বা কেন, তুমি মাকে তো ভাল করে চেনোইনি । মানুষ হয়েছে গভর্নেসের কাছে । একটু বড় হতেই চলে গেলে বিদেশে । ওরকম পরিবারে কোনো ইমোশন্যাল সম্পর্কই গড়ে ওঠে না ।

তা অবশ্য ঠিক ।

কিন্তু তোমার ভিতরে যে ইমোশন টসটস করছে তা একদিন টের পাবে, দেখো । নিজেকে যত আধুনিক ভাবছো, ততটা নও ।

বাড়ির গলিতে গাড়ি ঢোকাবার আগেই বিলু নেমে গেল । অরুণ গাড়ি ব্যাক করিয়ে

ঢোকাবে। অন্য দিন এই অবস্থায় বিলু গলির মুখে দাঁড়িয়ে অপেক্ষা করে ওর জন্য। আজ করল না। একুনি প্রীতমকে একবার দেখবার জন্য সে কিছুটা অস্থির বোধ করছিল।

দ্রুত সিঁড়ি ভেঙে উঠে ঘরে ঢুকে দেখল, প্রীতম শান্তভাবে শুয়ে ঘুমোচ্ছে।

বিলু হাতের ব্যাগটা ড্রেসিং টেবিলে রেখে লঘু নিঃশব্দ পায়ে বিছানার কাছে আসে। তারপর খুব ঝুটিয়ে ঝুটিয়ে দেখে প্রীতমের হাত পা মুখ। একটু কি রং বদল হয়েছে চামড়ায়? সামান্য স্বাস্থ্যের ঝিকমিকি কি দেখা যাচ্ছে না?

ঠিক বুঝতে পারল না।

॥ ছাব্বিশ ॥

এই এখন নিজের মনের ভিতরে একটা গর্তের মধ্যে পড়ে গেছে দীপনাথ। কিছুতেই উঠতে পারছে না। অনেক হাঁচোড়-পাঁচোড় করে যাচ্ছে। কিন্তু মনটা একবার ছেঁছে গেলে খুব সহজে তাকে আবাব দু পায়ে দাঁড় করানো যায় না। এই পৃথিবীতে সে কি সবচেয়ে বোকাদের দলে? যদি বা সে বোকাই, তবে কেন মণিদীপার মতো অমন চনমনে চালাক তুখোড় এক মহিলার সঙ্গে তার একটা হোক-না-হোক সম্পর্ক হল?

এক সময়ে বকুলের প্রেমে পড়েছিল দীপনাথ। কলকাতার জল বছর খানেক পেটে যেতে না যেতেই কৌটোর কারখানায় সব রস নিংড়ে নিল। তখন নারীদেহ মনে পড়লেও নারীপ্রেম কথাটা ভসকা লাগত। এই কিছুদিন আগেও তার নারীপ্রেম নিয়ে ভাবনা-চিন্তা আসত না। এখনো কি আসে? বলা যায় না ঠিক। তবে মণিদীপা যখন এসেছে, তখন ওগুলো আসতেই বা বাধা কি? ব্যাপারটা কতদূর গড়াবে তাও জানা নেই। কিন্তু ইতিমধ্যেই মনে একটা তেতো স্বাদ আসছে। একটা কিছু বদলাবে। একটা কিছুর বদল দরকার। কখনো প্রেমিকা, কখনো চাকবি।

মনটা আজ আরও বিগড়ে গেছে বিলুকে দেখে। বিলুব সঙ্গে অরুণের একটা খুব আধুনিক বন্ধুত্বের সম্পর্ক আছে। দীপনাথ সম্পর্কটার ওপরসা চেহারাটা মানে না। তলে তলে কী হচ্ছে সেটাই তার জিজ্ঞাসা। প্রীতম কিছু টের পায় হয়তো। কিন্তু কেটে ফেললেও বলবে না।

গোঁয়ার দীপনাথ তাই বিলুর অফিস থেকে বেরিয়ে খানিক দূর গিয়েও আবার ফিরে এল। অফিসে ঢুকল না। তবে উল্টোদিকের ফুটপাথে একটা দোকানের শেডের তলায় দাঁড়িয়ে রইল। দাঁড়াতে হল বহুক্ষণ। খামোকা এতক্ষণ দাঁড়ানোরও মানে হয় না বলে সে খানিক চীনেবাদাম, কাটা পঁপে আর আখের রস খেল, এক বিষহরি ওষুধওলার বক্তৃতা শুনল। দোকানে দোকানে শোকেস দেখে বেড়াল। চারটের কিছু বাদে একখানা টয়োটা লাল রঙের মোটরে চড়ে এল অরুণ। দোষের কিছু নয়, আসতেই পারে।

তারপর বিলু আর অরুণ মিলে ভোকাট্টা হয়ে গেল।

বিলু তার আপন বোন হলেও ওর স্বভাবচরিত্র রুচি সম্পর্কে তেমন কিছু জানে না দীপনাথ। তারা একসঙ্গে মানুষ হয়নি। ফলে বিলুকে তার ধাঁধার মতো লাগে।

গরমে রোদে প্রচণ্ড ঘাম হচ্ছিল দীপনাথের। ক্লান্তি লাগছিল। ট্রাম ধরে সে বোর্ডিং-এ ফিরে আসে। ঘরে কেউ নেই। দুটো তালায় ইন্টারলক করা। দরজা খুলে ঘরে ঢুকল। জানালা দরজা বন্ধ ছিল বলে ঘরটা সহনীয় রকমের ঠাণ্ডা। দীপনাথ পাজামা পরে খালি গায়ে ফ্যানের নীচে শুতে না শুতেই ঘুমিয়ে পড়ে। বহুকাল পরে এই অসময়ের ঘুম।

সন্ধ্যাবেলা ঘুম ভাঙতে দেখল, ফুড ইনসপেক্টর ভদ্রলোক তাঁর বিছানায় বসে খুব চোর চোর চোখে তাকে দেখছে। রুমমেটদের সঙ্গে আলাপ-পরিচয় প্রায় নেই বললেই হয় দীপনাথের। তিনজন অচেনা লোক একটা ঘরে রাত কাটায় মাত্র। সারা দিন যে যার ধন্দায় ব্যস্ত থাকে। দীপনাথের মনে পড়ল, ফুড ইনসপেক্টরের নাম সুখেনবাবু। একটু খাপছাড়া গোছের লোক। চল্লিশ-টল্লিশ বয়স হবে, এখনো বিয়ে করেননি। মোটাসোটা লম্বা ফর্সা আলিসান চেহারা। কিন্তু খুবই নম্র ও লাজুক। গুন গুন করে মাঝে মাঝেই রবীন্দ্রসংগীত ও অতুলপ্রসাদী বা রজনীকান্তের গান করেন। গলা যে সুরে বাঁধা তা গুন গুন থেকেই বোঝা যায়। বিছানার ওপর লম্বালম্বি একটা নাইলনের দড়িতে ঝোলানো সুখেনবাবুর রাজ্যের জামা-কাপড় পাহাড় হয়ে থাকে। জামা-কাপড় ময়লা হলে সেগুলো কাচাকাচির হাল্কা মায় না গিয়ে উনি নতুন জামা প্যাণ্ট কিনে আনেন। পুরোনোগুলো ঐভাবে জমে যাচ্ছে। এরকমভাবে কত জামা হবে তা একবার জানতে ইচ্ছে হয় দীপনাথের। সুখেনবাবু রাতের দিকে সামান্য মদ খেয়ে আসেন, সেটা গন্ধেই টের পায় দীপনাথ। এছাড়া ভদ্রলোকের আর কোনো দোষের কথা তার জানা নেই।

আজ ঘুম ভেঙে দীপনাথ সুখেনবাবুর সুরেলা গুন গুন শুনতে পেল। ও চাঁদ চোখের জলে....

দীপনাথ টপ করে উঠে বসে বলল, বেশ গলা আপনার। শিখতেন নাকি ?

সুখেনবাবু ভারী লজ্জা পেয়ে মুখ লুকিয়ে একটু হাসেন। চোখে ভারী চশমা, যেটা ঝানের সময়েও খোলেন না। খালি গায়ে রং ফেটে পড়ছে, কিন্তু বক পিঠ, কাঁধ, এমন কি কানে পর্যন্ত প্রচুর লোম। মুখে প্রায় সর্বদাই পান। হেসে বললেন, এখনো শিখি।

একটু জোরে করুন। শুনি।

ভদ্রলোক আপত্তি করলেন না। আর একটু গুন গুন করে সুর এবং কথা ঝালিয়ে নিয়ে অনুচ্চস্বরে হুঠাং গাইতে শুরু করলেন, ও চাঁদ চোখের জলে লাগল জোয়ার...

বড় প্রিয় গান দীপনাথের। চোখে জল এসে যাচ্ছিল। লোকটা গায় ভাল।

গোটা চার-পাঁচ গানের পর পাড়ার দোকানে চা আর টোস্টের কথা চাকরটাকে দিয়ে বলে পাঠাল দীপনাথ। জুং করে বসে বলল, বাড়িতে কে কে আছে ?

বাবা আছেন। মা, মানে সংমা আছেন।

বাড়ি কোথায় ?

এই তো জয়নগর। যেখানকার মোয়া বিখ্যাত।

জানি। যাইনি কখনো।

কাছেই।

আপনি নিজে বাড়ি যান না ?

কখনো-সখনো। খুব কম।

ভাই-টাইরা কি করে ?

নিজের ভাই নেই। তবে সৎ ভাই-বোন আছে। তারা এণ্ডিগেণ্ডি অনেক। ছোটো ছোটো সব। এখনো কিছু কাজটাঙ্গ করার মতো বয়স হয়নি।

তাহলে তো আপনার লায়ামিলিটিজও আছে।

তা আছে। মাসে মাসে টাকা পাঠাতে হয়।

বাবা কি করেন ?

কিছুই নয়। আগে কিছু জমিজমা ছিল। তা সে সব প্রায় সবই বেচে দিতে হয়েছে।

এখন মেরেকেটে দু-চার বিঘে আছে হয়তো ।

আপনার টাকাতাই চলে ?

চলে কিনা কে খোঁজ নিচ্ছে ? তবে চলে যায় নিশ্চয়ই কোনোরকমে । দেশের অবস্থা খুব খারাপ । লোকের যে কি করে চলছে সেটা একটা রহস্য ।

দীপনাথ একটু অনামনস্ক হয়ে বলে, তা ঠিক ।

সুখেন গভীর হয়ে বলেন, মাসে তিরিশ-চল্লিশ টাকা আয় করে এমন লোকও যে কি করে বেঁচে আছে সেটা ভেবে পাই না । কিন্তু আছে ।

আপনি বিয়ে করেননি ?

সময়ই পেলাম না । আঠেরো বছর বয়স থেকে রোজগারের খান্দায় বেরিয়ে পড়তে হল । বাবার দ্বিতীয় পক্ষের সংসার নইলে কে টানত বলুন ?

সুখেনবাবু এমনিতে লাজুক হলেও বোধ হয় নিজের কিছু কথা কাউকে বলতে চান । আজকাল লোকে প্রাণ খোলসা করে প্রাণের কথা বলার মতো লোক পায় না । কাউকে হঠাৎ পেয়ে গেলে পাকা ফোড়া ফেটে গেলে যেমন গলগল করে পুঁজ রক্ত বেরিয়ে আসে । দীপনাথ ঠিক করল লোকটার সঙ্গে ভাব কববে । বলল, আপনাব বোধ হয় বাবার সঙ্গে বনিবনা নেই !

সুখেন একটু লজ্জা পেয়ে বলেন, আমার কয়েকটা অ্যামবিশন ছিল । বাবা যদি বুড়ো বয়সে বিয়েটা না করত তা হলে আমাব পক্ষে লেখাপড়া বা গানবাজনার শখ মেটানো অসম্ভব হত না ।

আপনার তো এমন কিছু বয়স হয়নি । এখনো পারেন ।

মনটাই বুড়ো হয়ে গেছে ।

সৎ-মার সঙ্গে বনিবনা কেমন ?

সুখেন একটু চুপ করে থেকে বলেন, বনিবনার প্রশ্ন নেই । বাবা যখন বিয়ে করেন তখন আমি বড় হয়ে গেছি । কাজেই সৎ-মার পক্ষে অত্যাচার করা সম্ভব ছিল না । বরং সৎ-মাই উষ্টে আমাকে ভষ পায় । তার বয়স বোধ হয় আমার মতোই । লোক খারাপ নয় । কিন্তু এই মহিলাকে মায়ের জায়গাটা দিতে পারিনি আর কি ।

ভাই-বোন ক'জন ?

তিন বোন, দুই ভাই ।

তারা আপনাকে মানে ?

মানে । না মেনে উপায় কি ? বয়সের তফাতটা তো বিরাট । কিন্তু কেবল আমাকেই মানে, আর কাউকে নয় । আমি বাড়িতে না থাকায় সেগুলি তেমন ভালভাবে মানুষ হচ্ছে না । অভাবও খুব ।

আপনি তো আরো দিতে পারেন ইচ্ছে করলে ।

দিয়ে লাভ নেই । বাবার দারুণ খরচের হাত । তার ওপর অভাবে থেকে থেকে এমন হয়েছে, টাকা পেলেই কাছা খুলে খরচাপাতি শুরু করে দেন । মাছ মাংস গোলাও লাগিয়ে দেন । দু দিনে হাত ফাঁকা ।

মার নামে পাঠালে পারেন ।

তাতে বাবার প্রেস্টিজে লাগে ।

দীপনাথ হাসছিল । দেখাদেখি সুখেনও হাসলেন । আসনশিড়ি হয়ে নিজের টোঁকিতে জুত করে বসে ছিলেন, এবার একটা বাগ্লিশ কোলে টেনে নিয়ে আরো আরামে বসলেন ।

বালিশ বিছানা সবই অবশ্য তেলচিটে নোংরা। বললেন, আপনি খুব বড় চাকরি করেন শুনেছি।

দীপনাথ ম্লান হেসে বলল, বড় চাকরি কিছু নয়। কোনো রকম একটা।

কেন, বড় সায়েবের নাকি ডান হাত? ম্যানেজার বলছিল, দীপনাথবাবু মাসে আড়াই হাজার টাকা বেতন পান। ইচ্ছে করলে যাকে খুশি চাকরি দিতে পারেন।

দীপনাথ সত্যি কথাটা বলতে একটু ইতস্তত করে। অনেক সময়ে মানুষকে তার ভুল ভাবনা নিয়ে থাকতে দেওয়াটা স্ট্র্যাটেজির দিক দিয়েও দরকার। তবে আবার একেবারে নির্জলা মিথোটাও স্বীকার করতে বাধে। সে বলল, ম্যানেজার বাড়িয়ে বলেছে।

তবু আমার মতো উজ্জ্বল তো নয়।

উজ্জ্বল কেন? আপনারও তো ভাল চাকরি।

কোন দিক দিয়ে? গালভরা নামের সরকারী চাকরি, এইমাত্র। যা পাই তাতে দশ দিনও চলে না।

তা হলে চালান কি করে?

এদিক সেদিক করতে হয়। ডান হাত বাঁ হাত।

দীপনাথের একটা ব্যাপাব আছে। সে কখনো ঘুষ-টুষের কথা ভাবতেই পারে না। সে বোসের কাছে উজ্জ্বল করে বটে, তবু কখনো হিসেবের বাইরের টাকা ছোঁয়নি। সে যে সচেতনভাবে সং তা নয়, ডান হাত বাঁ হাতের কথা তার মনেই আসে না আসলে। তার চারপাশের বেশীর ভাগ লোকই যে এই অপকর্মটি করে তা জেনেও তার নিজের কখনো ইচ্ছে হয়নি।

দীপনাথ একটু হেসে বলল, সবাই আজকাল কবছে। সুখেনও বিনা জবাবে একটু হাসলেন। প্রসঙ্গ পাণ্টে বললেন, আপনাকে তো এ সময়ে বড় একটা দেখতে পাই না। শুনি নাকি অফিসে আপনার অনেক রাত পর্যন্ত কাজ থাকে!

প্রায়ই থাকে। কাজ না হোক, পাটি-ফাটি থাকেই।

আজ কি সে সব নেই?

না, আজ একটু ছুটি পেয়েছি।

সঙ্গেবেলাটা কি করবেন?

কিছু করার নেই। ভাবছি বইটাই পড়ব।

দূর। বই পড়ে কি হয়? আমি লাস্ট বইটাই পড়েছি সেই কলেজে ইউনিভার্সিটিতে। এখন শুধু খবরের কাগজখানা সকালে একবার দেখি।

দীপনাথ বইয়ের পোকা। আজকাল অবশ্য বোস সাহেবের হ্যাপা সামলে বোর্ডিংয়ে রাত করে ফিরে পড়তে ইচ্ছে করে না। রাতে বাতি জ্বলে রাখলে রুমমেটদেরও অসুবিধে। কথাটা শুনে একটু বিরক্ত হল দীপনাথ। তবে কিছু বলল না।

সুখেন বললেন, আজ আমার সঙ্গে চলুন। একটু খাওয়াদাওয়া করে আসি। আমি খাওয়াবো।

দীপনাথ একটু ইতস্তত করে। সুখেনকে সে প্রায় চেনেই না। এত অল্প পরিচয়ে এ লোকটার পয়সায় খাওয়া কি উচিত?

তার দ্বিধা দেখে সুখেন একটু কৰুণ মুখ করে বললেন, আপনার সঙ্গে বন্ধুত্ব হয়ে গেল তো, তাই বলছিলাম। কলকাতায় ফ্র্যাংকলি স্পিকিং আমার কোনো বন্ধু নেই। বলতে কি আপনিই আমার প্রথম বন্ধু।

এত চট করে বন্ধুত্ব পাঁতাতে দীপনাথের আপত্তি আছে। তবে সুখেন লোকটা বোধ হয় বাস্তবিকই একা এবং বন্ধুহীন। নইলে দু-চারটে কথাবার্তার পরই কেউ অত হ্যাংলার মতো বন্ধুত্ব পাঁতাতে চায় না। তাই দীপনাথ বলল, ঠিক আছে। তবে আমি কিন্তু মদটদ বেশী খাই না।

বেশী নয়। একটুখানি। জাস্ট ফুঁটি করা আর কি!

চলুন।

তা হলে আর দেরী নয়। উঠে পড়ুন।

দীপনাথ ওঠে।

এ কথা ঠিক যে কলকাতা শহরটা দীপনাথের নখদর্পণে নয়। এখনো এর অনেক কানাগলি, গোলকধাঁধা তার চেনা নেই। সুখেন একটা টানা রিকশা ডেকে ঘরের দরজায় দাঁড় করিয়ে বলল, ট্যাকসি পাওয়ার বহুৎ ঝামেলা। যেখানে যাবো সেখানে ট্যাকসি ঢোকেও না।

সুখেনের সঙ্গে টানা রিকশায় খুবই চাপাচাপি বোধ করছিল দীপনাথ। সুখেন বেশ স্বাস্থ্যবান। দীপনাথও নেহাত কম যায় না। ফলে চাপে মাজা ভেঙে যাওয়ার জোগাড়। সুখেন তার মধ্যে বসেই মহানন্দে গুন গুন করে ‘দুঃখ আমার প্রাণের সখা.....’ গাইতে লাগলেন।

রিকশা হ্যারিসন বোড ধরে গিয়ে চিত্তরঞ্জন আভেনিউতে পড়ল। খানিক এগিয়ে ডান হাতে যে গলিতে ঢুকল সেটায় কন্ট্রিনকালে আসেন দীপনাথ। তারপর আরো গলি। আরো সরু ও অন্ধকার গলির পর গলি। সুখেন হাপসে-পড়া রিকশাওয়ালাকে এমন ভাবে পথ চেনাচ্ছিলেন যে, মনে হয় উনি চোখ বুজে সব দেখতে পান। পশ্চিমা রিকশাওয়ালারি ন্যাড়া মাথায় পর্যন্ত ঘাম জমে গেছে। কষ্ট হচ্ছিল দীপনাথের। বলল, চলুন না বাকি পথটা হেঁটে যাই?

দরকার কি! প্রায় এসে গেছি।

রিকশাওয়ালারি জন্য মায়া হচ্ছে।

মায়া করবেন না। ওরা খুব হার্ডি। আমাদের মতো নয়।

এই নিষ্ঠুরতা ভাল লাগল না দীপনাথের। চুপ করে রইল।

রিকশাকে অবশেষে থামালেন সুখেন। সামনে একটা এঁদো বাড়ি। সেটা কত উঁচু তা এই সরু গলিতে সজ্জের আবছা আলোয় ঠাহর করা মুশকিল।

সুখেন নেমে ভাড়া দিতে গিয়ে রিকশাওয়ালার সঙ্গে একটু বচসা বাধালেন। তারপর দীপনাথকে বললেন, আসুন।

এখানে কি কোনো রেস্টুরেন্ট আছে? দীপনাথ অবাক হয়ে জিজ্ঞাসা করল। বলতে কি বাড়িটার চেহারা দেখে সে একটু হতাশও হয়েছে। একেবারে অবাঙালী পাড়া। নর্দমা আর রোদহীন বাতাসের ভ্যাপসা গন্ধ আসছে। কম আলোর ভুতুড়ে গলি।

আমি ফুড ইনস্পেকটর। সব ঘাঁটি চিনি। নিশ্চিন্তে আসুন।

সরু সিঁড়ি বেয়ে বাড়ির দোতলায় সুখেনের পিছু পিছু উঠে এল দীপনাথ। সুখেন একটা ফ্ল্যাটের দরজার পর্দা সরিয়ে গটগট করে ঢুকলেন।

কোনো রেস্টুরেন্ট বলে মনেই হয় না। সামনের ঘরটা ঠিক যেন কারো বাড়ির খাওয়ার ঘর। একটা মাত্র ডাইনিং টেবিল ঘিরে গোটাছয়েক চেয়ার। স্টিক লাইট জ্বলছে। চারিদিকে ফানুসের মতো আকৃতির আরো কয়েকটা ঘর-সাজানোর বাতি জ্বলছে সিলিং

থেকে । দেয়ালে মুখোশ, তীর-খনুক, বিদ্যুৎএবং মরা প্রজাপতি সাজানো । বাড়িটা চুপচাপ । শুধু ভিতরের কোনো ঘর থেকে ক্ষীণ রেডিওয় বিবিধ ভারতীয় শব্দ আসছে । কেউ তাদের রিসিভ করল না । সুখেন গিয়ে ডাইনিং টেবিলের চেয়ার টেনে বললেন, বসুন, ঐ কোণে বেসিন আছে, হাত ধুয়ে আসতে পারেন ।

এটা তো কারো বাড়ি বলে মনে হচ্ছে ।

বাড়িই তো । কিন্তু কাম রেস্টুরেন্ট । পাবলিকের জন্য নয় । বাঁধা খদ্দের । যারা চেনে তারাই আসে ।

লোক কই ?

আসবে । খেতে হলে এ সব জায়গাই ভাল । এরা ঠিক প্রফেশনাল নয়, তাই যত্ন করে খাওয়ায় ।

পুরোনো বাড়ি বলেই বোধ হয় ঘরটায় তেমন গরম নেই । একটা আদিকালের ডি সি পাখা ঘুরছে ওপরে । একটু ধূপকাঠির গন্ধও রয়েছে ।

দীপনাথ জিজ্ঞেস করল, এরা কি চীনে ?

দো-আঁশলা । খাঁটি চীনেম্যান এখানে পাবেন কোথায় ?

কথা বলতে বলতেই এক বয়স্ক চীনে মহিলা এসে নিঃশব্দে দাঁড়ায় । মোটাসোটা, হাসিখুশি, স্তনহীন, স্বর্ণদস্তী । পরনে কামিজ আর ঢোলা পাজামা । পায়ে রবারসোলের খড়ম । সুখেন অল্প কথায় অডার দিলেন ।

মহিলা চলে গেলে দীপনাথকে জিজ্ঞেস করলেন, শুয়োরের মাংস খান তো ?

দীপনাথ খায় । একটু ঘেমা হলেও খায় । হেসে মাথা নাড়ল ।

সুখেন বলেন, এরা ঐটে ভাল করে ।

খাবার এল একটু বাদেই । প্রন-চাউমিন আর পর্ক চপ । পরিমাণে প্রচুর এবং অত্যন্ত সুন্দর গন্ধ ও স্বাদ । সঙ্গে দু বোতল বীয়ার । কাঁচা পৈয়াজ এবং স্যালাড । দীপনাথ খেয়ে বুঝল, বহুকাল সে এত ভাল খাবার খায়নি ।

সুখেন ভূ তুলে জিজ্ঞেস করেন, ভাল নয় ?

দারুণ ।

ভাল খেতে চাইলে আমাদের বলবেন । এ রকম আরো বহু খাওয়ার জায়গা আছে কলকাতায় ।

আমার জানা ছিল না ।

অনেকেই জানে না ।

দীপনাথ হাসল ।

সুখেন খেতে খেতেই বলেন, আমার বিয়ের কথা জিজ্ঞেস করছিলেন না ? তখন আপনাকে সত্যি কথাটা বলিনি ।

কি কথা ?

আমার একজন মহিলা আছেন ।

দীপনাথ ভূ তুলে বলে, মহিলা ?

বিবাহিতা । ছেলেমেয়েও আছে ।

সে কি ?

সুখেন একটু হাসলেন । ঠোঁট চাউমিনের তেলে মাখা । চকচক করছে । চোখে বীয়ারের উজ্জ্বলতা । এতক্ষণে লোকটাকে হঠাৎ বদমাশের মতো দেখাল । শান্ত লাজুক নীরেট

মুখচোখে একটা পাপবোধের আবিলতাও ফুটে উঠল। বললেন, বিয়েতে একটু আটকাচ্ছে। সামাজিকতাই বাধা।

দীপনাথ অল্প ভড়কে গিয়ে বলে, বিবাহিতা মহিলা মানে তো স্বামী আছে।

সে ব্যাটা এক নম্বরের পাজি। বদমাশ দি গ্রেট। এখন জেল খাটছে। বউটাকে দেখার কেউ নেই। ছেলেমেয়েগুলো একেবারে অনাথ।

ছেলেমেয়ে কজন?

তিনটে।

ভদ্রমহিলার বয়স?

বয়স আছে।

এ ব্যাপারটা সুখেন ভাস্ততে চান না বুঝে দীপনাথ আর প্রশ্ন করে না। শুধু বলে, ও।

আপনার সঙ্গে এ ব্যাপারে একটু পরামর্শ করতে চাই।

দীপনাথ সতর্ক হয়ে বলে, ওটা আপনার পাসেনাল ব্যাপার। থাক না।

আরে গোপনীয়তা কিছু নেই। আপনি তো আমার বন্ধু, আপনাকে বলতে বাধা কি? বিয়ে কি ঠিক হয়ে গেছে?

ঠিক কিছুই নয়। আমি তেমন ইনটারেসটেডও নই। তবে একটু ফেঁসে গেছি। ঐ মহিলার কাছে আমি ইনডেটেড। অসময়ে আমার অনেক উপকার করেছে। এখন ওর একটা পারমানেন্ট আশ্রয় দরকার।

তাহলে আর আমি কি বলব বলুন।

চলুন না একবার মহিলাটির কাছে নিয়ে যাই আপনাকে এখন।

এখন! বলে দীপনাথ ভড়কায়। একদিনে এত ঘনিষ্ঠতায় হাফ ধরে যাচ্ছে তার। বলল, আজ থাক।

বেশী দূর নয়। রিকশায় মিনিট দশেক।

আবাব বিকশা! আঁতকে ওঠে দীপনাথ।

সুখেন হেসে বলেন, আপনার টানা রিকশা ভাল লাগে না, না? আমার কিন্তু বেশ লাগে। মনে হয়, কলকাতার ভিড়ের ওপর দিয়ে যেন নৌকোয় ভেসে ভেসে চলেছি।

সে তো বুঝলাম। কিন্তু আমি গিয়ে করবটা কি?

কিছুই নয়। একটু বসবেন, চা-টা খাবেন। বাথি খুশি হবে।

ভারী অস্বস্তি বোধ করে দীপনাথ। রলি ঠাকুর জীবনে জীবন যোগ করার কথা বলেছেন বটে, কিন্তু বেমক্কা এই অদ্ভুত পরিস্থিতিতে জড়িয়ে পড়তে তার একদম ইচ্ছে করছিল না। ভয় ভয় করছিল। সে বলল, কোথায় বাড়ি?

গড়পাড়। আমাদের বোর্ডিং থেকে বেশী দূরও নয়।

খাওয়া হতেই টক করে উঠে পড়লেন সুখেন। চীনে মহিলার সঙ্গে পাশের রান্নাঘরের দরজায় দাঁড়িয়ে গুনগুন করে কী একটা কথা বলে এলেন।

চলুন।

দীপনাথ জড়তা কাটিয়ে উঠল। লোকটা খাইয়েছে, বন্ধু হতে চেয়েছে, একটু রিটার্ন সার্ভিস দেওয়া উচিত। তবে সে মনে মনে স্থির করে ফেলল এর পর থেকে সুখেনকে আর বেশী পাস্তা দেবে না।

রিকশায় উঠে আবাব দীর্ঘ রাস্তা পেরিয়ে নিজেদের বোর্ডিং-এর সামনে দিয়েই গড়পাড়ের দিকে চলল তারা। সুখেন গুনগুন করে একটা নজরুলগীতি গাইছিলেন। শেষ

পর্যন্ত সুখে দু' বোতল বীয়ার টেনেছেন, দীপনাথ কষ্টেস্ট্রে এক বোতল। বেশ ঝিম ঝিম করছে শরীর।

গড়পাড় দীপনাথের অচেনা নয়। তবু আজ কেন যেন গা ছমছম করছিল।

সুখে একটা নতুন দোতলা ফ্ল্যাটবাড়ির সামনে রিকশা থামালেন। আবার রিকশাওয়ালার সঙ্গে একটু বচসা। এবং আবার দোতলায় ওঠা। তবে এ বাড়িটা ঝকঝকে নতুন। চওড়া সিঁড়ি। উজ্জ্বল আলো। দোতলার বাঁ দিকে ফ্ল্যাটের দরজায় বোতাম টিপতে ভিতরে পিয়ানোর মতো আওয়াজ হল। দরজা খুলল একটি উনিশ-কুড়ি বছরের মারকাট যুবা। তার চোখমুখে ছমছমে স্মার্টনেস। শরীরখানা বেতের মতো মেদহীন এবং শক্তসমর্থ, কিন্তু মোটাসোটা নয়। গায়ে একটা স্যাণ্ডো গেক্সী, পরনে গাঢ় খয়েরী রঙের বেলবটস্, মাথায় লম্বা চুল, গালে কোমল দাড়ি-গোঁফ, চোখে চশমা। খুব ভদ্র ও নরম গলায় বলল, আসুন, আসুন। মা এইমাত্র ফিরল।

সুখে বললেন, তুমি বেরোচ্ছে নাকি ?

হ্যাঁ।

এই ইনি হচ্ছেন দীপনাথ চ্যাটার্জি। আমান বন্ধু। বলে দীপনাথের দিকে ফিরে বললেন, বীথির বড় ছেলে স্বস্তি। সেন্ট জেভিয়ার্সে পড়ে।

দীপনাথ খুবই হতভম্ব হয়ে গেছে। বীথির ছেলে এত বড় ? তবে বীথির বয়স কত ?

ঘরদোর বেশ বড়লোকদের মতো সাজানো গোছানো। ভাল সোফাসেট, বুককেস, রেডিওগ্রাম সবই আছে। মেঝেয় একটা উলের ছোটো কাপেট পর্যন্ত। দীপনাথ আরো হাঁ হয়ে গেল। এরা তবে মোটেই গরীব নয়।

সুখে তাকে বাইরের ঘরে বসিয়ে রেখে চট করে ভিতরের ঘরে চলে গেলেন। অনেকক্ষণ কেউ এল না। শুধু একটু বাদে স্বস্তি একটা হাওয়াই শার্টের বোতাম লাগাতে লাগাতে বেরিয়ে ঝাওয়ার সময় বলে গেল, বসুন, চা আসছে।

একটু বাদেই সুখেনের পিছু পিছু চায়ের ট্রে হাতে এলেন বীথি। এবং দীপনাথের যা কখনো হয় না, সে প্রথম দর্শনেই এই তিন ছেলেপুলের বয়স্কা মায়ের প্রেমে পড়ে গেল।

বীথির যে বয়স হয়েছে তা তাঁর অদ্ভুত সৌন্দর্য ভেদ করেও বোঝা যায়। চল্লিশের কাছাকাছি বয়স হবে, লাগে সাতাশ-আঠাশ। বেশ লম্বা, দারুণ ফর্সা, সব চেয়ে চোখে পড়ে দুখানা মায়াবী একটু পুরু ঠোঁট। টসটস কবছে আল্লাদে। এত সুন্দর ঠোঁট খুব কমই দেখেছে দীপনাথ। তা ছাড়া মুখখানায় সৌন্দর্য যতটা তার চেয়ে ঢের বেশী কমনীয় নরম এক রকম সহৃদয় ভাব। শরীরটা একটু মেদভারে আক্রান্ত। তবু মানিয়ে গেছে। জংলা ছাপা শাড়ি পরে আছেন, খাটো ব্লাউজ, দু হাতে সোনার দুটি বালা। সামনের দিকে চুল এমনভাবে ছাঁটা যে কপালের দু পাশে দুটো চুলের বুমকো দোল খায়। কপালে টিপ, ভ্রু প্লাক করা।

দীপনাথ কোনো মেয়ের দিকেই একদৃষ্টে তাকিয়ে থাকতে পারে না। লজ্জা কবে। আজ বীথির সুন্দর চেহারা এবং হয়তো বীয়ারের প্রভাবে সে প্রায় চোখের পাতা ফেলতে পারছিল না। সুখেনের মাথা কি সাথে খারাপ হয়েছে ?

বীথি বেশী আদব-কায়দার ধার না ধেরে প্রথমেই বলে ফেললেন, দেখুন তো ভাই, আপনাকে নিয়ে আসবে যদি ফোনেও একবার জানিয়ে দিত, তা হলে একটু যত্ন-অস্তির ব্যবস্থা করতাম। এই তো আধঘণ্টা আগে রান্নার লোকটাকে ছুটি দিয়ে দিলাম।

আমবা খেয়ে এসেছি। দীপনাথ বলল, এবং তার নিজের কানেই নিজের গলা অন্য রকম শোনাল।

সুখেনের মুখে একটা আত্মাদের হাসি লেগে আছে তো আছেই । এক মুহূর্তের জন্যও বন্ধ হচ্ছে না । উনি বললেন, সে কথা কি বলতে বাকি বেখেছি ! কিন্তু বীথি না খাইয়ে ছাড়বে না ।

বীথি চা এগিয়ে দিয়ে উল্টোদিকে বসে বললেন, ফ্রিজে মাংসের ঘুঘনি আছে । একটু বসুন, গরম করে দেবো ।

পেটে জায়গা নেই । পারব না । দীপনাথ কাতর স্বরে বলে ।

জায়গা হয়ে যাবে । বসুন না, খিদে পেয়ে যাবে'খন । হোটোলে মেসে থাকেন, ওরা কী খাওয়ায় তা তো জানি ।

হাতের আঙুলগুলো লক্ষ করছিল দীপনাথ । বীথির মতো এত সুন্দর লম্বাটে ললিত আঙুল সে জীবনে দেখেনি ।

চায়ে নিঃশব্দে ছোটো একটা চুমুক দূদিয়ে বীথি বললেন, আজ অফিস থেকে ফিরতেও দেবী হয়ে গেল । রান্নার গ্যাসও ফুবিয়েছে দুদিন হল । স্টোভ ছেলেই সব করতে হবে ।

কষ্ট করবেন কেন ? কোনো দরকার নেই ।

সৌন্দর্যের সঙ্গে একটা আত্মসচেতনতাও মিশে আছে কিনা, ভাবছিল দীপনাথ । কয়েকটা কথাতেই বীথি জানিয়ে দিলেন যে, তাঁর বাসায় টেলিফোন, ফ্রিজ এবং গ্যাস উন্নত আছে । আজকাল মধ্যবিত্তদের ঘবে এ সব থাকে এবং তারা এই নিয়ে খুব আত্মপ্রসাদও বোধ করে । বীথির আত্মসচেতনতার কথা ভেবে একটু খারাপ লাগল দীপনাথের ।

বীথি ভারী সুন্দর হাসেন । দাঁত ঝকঝকে এবং হাসলে মাএ অর্ধেক দেখা যায়, বাকি অর্ধেক ঠোটে ঢাকা থাকে । সব মিলিয়ে বীথি অতীত কামউত্তেজক । তাঁরকিয়ে থেকে দীপনাথ নিজের অসহনীয় উত্তেজনা টের পায় । ভিতরে গর্জন করছে এক ঘুম-ভাঙা বাঘ । আশ্চর্য । কোনোদিন মণিদীপাকে দেখে ঠিক এরকমটা হয়নি । অথচ বীথির বয়স মণিদীপার চেয়ে অনেক বেশী ।

বাড়িতে আর কারো সাডাশব্দ নেই । বীথি বললেন, এ সময়ে কেউ বাড়িতে থাকে না । ছোটো ছেলে টিউটোরিয়ালে যায় । মেয়ে এখন লখনউতে—ওদের স্কুলের এক্সক্যুরশনে গেছে ।

আপনি হয়তো বিশ্রাম করতেন, অসময়ে আমরা এলাম । ভদ্রতা করে দীপনাথ বলে ।

ওমা ! বিশ্রামই তো করছি । কারো কারো সঙ্গে বসে কথা বলাটাও বিশ্রাম ।

কথাগুলোর তেমন মানে নেই, শুধু শুনতে ভাল । দীপনাথকে এখানে সুখেন আনলেন কেন তা সে বুঝতে পারছিল না এখন পর্যন্ত । তবে অপেক্ষা করছিল ।

ঘণ্টাখানেক গেলে বীথি বললেন, যা গরম পড়েছে, একটু ঠাণ্ডা বীয়ার খান । ফ্রীজে আছে । ঘুগনীটাও গরম করে আনি ।

না, না, করল দীপনাথ । বীথি শুনলেন না । ফলে আবার বীয়ার এবং মাংসের ঘুগনী পেটে চালান হল ।

মাঝ পথে হঠাৎ সুখেন উঠে বললেন, কাছেই একজন লোকের সঙ্গে দেখা করে আসছি । একটু বসুন দীপনাথবাবু, মিনিট চল্লিশ ।

আমিও বরং উঠি ।

না না । বসুন না, গল্প করি । বীথি বললেন ।

খুবই ভয় ভয় করল দীপনাথের । সেই সঙ্গে জেগে উঠল ঘুমন্ত লোভ, কাম, সব কিছু । সদর দরজা বন্ধ করে এসে বীথি বললেন, চলুন আমার বাসাটা আপনাকে ঘুরে দেখাই ।

কী হবে বা হতে পারে তা যেন জানত দীপনাথ । একটা চমৎকার মধুর ফাঁদের মতো ব্যবস্থা । সে যে ফাঁদে পা দিচ্ছে তাও জলের মতো পরিষ্কার । সুখনটা রাসকেল । কিন্তু এই অভিজ্ঞতাটারও যেন দরকার ছিল দীপনাথের ।

বীথি তাকে শোওয়ার ঘরে নিয়ে এলেন । চমৎকার ঘর । মস্ত খাটে নরম বিছানা । মৃদু সবুজ আলো জ্বলছে ।

আলোটা কি থাকবে ? বীথি ব্যবসায়িক গলায় জিপ্সেস করেন ।

থাক ।

বীথি সাবধানে জানালার পর্দাগুলো টেনে দিলেন ।

ঘরের মাঝখানে বোকাব মতো দাঁড়িয়ে দীপনাথ ভাবল, এত সহজ ! এত সহজ ! অথচ এত সুন্দরী !

॥ সাতাশ ॥

বেজী জাতটা কিছুতেই পোষ মানে না । যতই পোষো, যতই আদরে রাখো, সুযোগ পেলেই শালারা জঙ্গলে জঙ্গলে পালিয়ে যাবে । যাবে তো যাবেই, আর আসবে না ।

নিতাই তা জানে । তবু বহুকাল ধরে একটা বেজীব বড় শখ । মল্লিবাবুর একজোড়া বেজী ছিল । তখনকার এই বতনপুর ছিল কেউটে গোখরোর আড্ডা । উরু পর্যন্ত একটা চামড়ার স্নেক বুট পবে বেজী নিয়ে মল্লিবাবু এই ভিটের জঙ্গলেই রক্ত সাপ মেরে বেড়িয়েছেন । সেই কর্মফলেই অকালে মরণ । সাপ মারতে নেই, এই সরল সাদা কথাটা শহুরে বাবুরা কিছুতেই শুনবে না । নিতাই ধবে নিয়েছিল, একদিন সাপেই কাটবে বাবুকে । সেটা অবশ্য হয়নি । মল্লিবাবু সাপ মেরে মেরে এ জায়গাকে সাপের শ্মশান বানিয়ে ছেড়েছিলেন । তিন্দি মারতেন, তাঁর বেজী দুটোও মারত । মদন ঠিকাদাব বলত, সাপের চেয়ে মানুষ অনেক বেশী বিপজ্জনক । মেয়েমানুষ আরো । সাপ না মেরে বরং বন্দুক দেগে এখানকার কয়েকটা বদমাশ শয়তানকে মারো হে মল্লিবাবু । বন্দুক দেগে দাও, জায়গাটা ঠাণ্ডা হবে । মল্লিবাবু জবাবে বলতেন, আমি সব কিছু মারতেই ভালবাসি ।

তখন গনিয়ার জঙ্গল নামে একটা জঙ্গল ছিল, এখন রিফিউজিরা সেখানে থানা গেড়েছে । সেই জঙ্গলে তাকে পাখি মারতেন মল্লিবাবু । কম কবেও চার পাঁচটা ফ্ল্যাপা কুকুর মেরেছেন । বধে খুব আনন্দ ছিল । মানুষও মেরেছেন কিনা সে কথা বলা বারণ । নিতাইয়ের মুখ দিয়ে কখনো তা বেরোবে না । তা সেই গনিয়ার জঙ্গলেই একদিন বেজী দুটো পালিয়ে গেল । মল্লিবাবুর সে কী রাগ বাবা । পোষা জীব মায়া কাটিয়ে পালিয়ে গেলে রাগ হওয়ারই কথা ।

আর পোষা মানুষ, ভালবাসার মানুষ পালিয়ে গেলে ? যে লক্ষ্মীছাড়ি গুসকরায় গিয়ে রসবড়া ভাজছে তাকে কিছু কম পুষত নিতাই ? বেজীর নেমকহারামী তবু গায়ে সয়, মেয়েমানুষেরটা সয় না ।

খালধারে রামলাখনের ঘরে একটা বেজীর বাচ্চা রেখে গেছে কোন এক খন্দেব । কাণ্ডটা ভারী মজার । বাটা নাকি বেজীর বাচ্চাটা নিয়েই ফুটি করতে এসেছিল । পকেট গড়ের মাঠ । খাসীর নাড়ীভূড়ি দিয়ে প্যাজ লঙ্কার ঝাল-কটকটে করে রান্না ঘুঘনী আর দিশী মাল মিলিয়ে পনেরো বিশ টাকার খেয়ে উঠে বলল, পয়সা নেই । তখন রামলাখন বেজীটা রেখে দিল । বেজীর প্রতি কোনো মায়া-দয়া নেই তার । লোকটাও আর ছাড়াতে আসেনি ।

সন্ধান পেয়ে বেজীটা বাগাতে রামলাখনকে গিয়ে অনেক তোতাই-পাতাই করেছে
নিতাই। রামলাখন'রাজি নয়। কেবল বলে, তোর পয়সা কোথায় ? বেজী কি মাগনা ?
দেবো। যত চাস দেবো।

বাকির কারবার হবে না। হঠ।

জানিস আমার দশ বিঘে জমি আছে ?

সবাই জানে। যা না জমির এক গোছা ধানে হাত দিয়ে দেখ গেছো মাগী তোর কি হাল
করে !

চাটুজে গিলিকে গেছো মাগী বললি ! দাঁড়া বলে দেব।

বলগে। লাইনের এপারে কিছু করতে এলে—বলে জঘন্য একটা খিস্তি দেয় রামলাখন।

শুনে কান ঢেকে ফেলে নিতাই। বলে, ছিঃ ছিঃ, মুখটা গঙ্গাজলে ধুয়ে ফেলিস রে।
ওসব পাপ কথা বলতে নেই।

তবে জমির কথা তুলিস কেন ? জমি কি তোর বাপের ?

আমার নামে তো।

তাতে কি ? নাম ধুয়ে জল খা গে যা।

বেজীর জন্য চাস কত বলবি তো !

পঞ্চাশ। এক পয়সা কম হবে না।

তাই দেবো।

নগদ ছাড়, দিয়ে দিচ্ছি।

নগদ পারো কোথায় ? কাউকে বাণ মাঝতে হয় তো বল, মেরে দেবো।

দেহাতীরা বাণটানকে একটু ভয়-টয় পায়। রামলাখনের বাপটা পুরোদস্তুর দেহাতী
ছিল। কাঁচা চামড়ার মজবুত নাগরা পড়ত। মাথায় ফগ্গে জড়াত, মোটা মারকিনের কুর্তা
পরত, আটহাতি ধুতি ব্যবহার করত। কিন্তু পাশও রামলাখনটা এদেশের জল-হাওয়ায়
শেয়ালের মতো চালাক হয়ে উঠেছে। বলল, তোর বাণের মুখে পেছাপ করি। বাণ মারবি
তো গেছো মাগীকে মার গে। মুখে রক্ত উঠে যদি মরে তো বেজীটা দিয়ে দেবো।

রামলাখনের রাগের কারণ আছে। স্টেশনের গায়ে একটা গাছের গোড়া বাঁধিয়ে দিবি
একটা জুয়ার আড্ডা করেছিল সে। সন্দের দিকে কারবাইড জ্বালিয়ে আসর বসত। জমি
কারো বাপের নয়, সরকারের। কারো বলার হক ছিল না। পুলিশ-টুলিস বড় একটা আসেও
না এদিকে। কেউ এসে পড়লে দু-চার টাকা দিলেই হয়ে যায়। কিন্তু হঠাৎ একদিন পালে
বাঘ পড়ল হড়াম করে। স্বয়ং সারকেল অফিসার আর থানার ও সি এসে হাজির।

রামলাখনকে মাস তিনেক জেলের ভাত খেতে হয়েছিল। পুলিশের একটা পোস্টও বসে
গিয়েছিল স্টেশনের ধারে। সবাই বলে, কাণ্ডটা ঘটিয়েছিল তুষা। পুলিশ তার হাতের
লোক। তার পিছনে পলিটিকস্‌ওয়ালারাও আছে।

নিতাই বলে, তা কিসে দিবি বলবি তো ! বেজী জিনিসটা আমার বড় পছন্দ।

রামলাখন উদাস গলায় বলে, আমার ভুটা খেতটা যদি সাত দিন কুপিয়ে চৌরস করিস
তো দিয়ে দেবো।

বলে কি ব্যাটা ! দিনে আট টাকার মজুর রাখলেও সাতদিনে ছাপ্পান্ন টাকা যে ! ব্যাটার
মাথাটাই খারাপ। নিতাইকে কাজ করতে বলছে। কাজ করা কাকে বলে তা নিতাই নিজেই
ভুলে গেছে। ফাইফরমাশ করা ছাড়া তার আর ভারী কাজ আসেই না। কাজের নামে গায়ে
জ্বর আসে। আর করাই বা কার জন্য ? যার জন্য কাজ সেই তো কবে লম্বা দিয়েছে।

নিতাই বলল, তোর দিন ঘনিয়েছে রে ব্যাটা । সাধুসন্মিসিকে কাজের কথা বলিস ।

তুই সাধু ?

আলবৎ সাধু ।

তবে চোর কে ? বদমাশ কে ?

তোর কবে কি চুরি করেছি রে নির্বংশের ব্যাটা ?

আই বাপ তুলে কথা বলবি না বলে দিচ্ছি ।

ঐ দেখ । বাপ তুললাম কখন ? তুইই তো আমাকে চোর আব বদমাশ বললি ।

বললাম তো কি ? মারবি নাকি ?

মেজাজ দেখাচ্ছিস কেন রে হারামজাদা ? বেজীটা নিয়ে কথা হচ্ছে তো তাই নিয়ে কথা ক' ।

হারামজাদা বললি যে ! মানে জানিস ?

মদ বেচে দু পয়সা করেছিস বলে খুব তেল হয়েছে রে তোর । এই বলে রাখলাম, নিতাইকে ক্ষেপিয়ে কেউ সাতদিনও পার করতে পারেনি । মরবি ।

ফের বজরুকি করছিস ? এটা লাইনের ওপার নয়, মনে রাখিস ।

হেঃ হেঃ করে হেসে নিতাই বলে, এই তো সেদিন জন্মালি বে লাখন । মাঘের পেটে যখন ছিলি তখন এই নিতাই এসব জায়গায় লাঠি ঘোরাতে । দেহাত থেকে এসেছিস দেহাতীব মতো চূপচাপ থাক ।

এই পর্যন্ত হয়ে ছিল । তিন দিনের দিন নিতাই মাঝরাতে গিয়ে রামলাখনের মাটিব ঘাবে সিঁধ দিল ।

পরদিন সকালের রোদে বেজীটা ক্ষ্যাপা নিতাইয়ের ঘরের সামনে তুরতুর কবে চলে-ফিরে বেড়াতে থাকে আর প্রাণ ভরে দেখতে থাকে নিতাই । ইস্পাতেব একটা বন্ধু হল । বেজীটাকে এমন ট্রেনিং দেবে সে যে, ব্যাটা বাঘের গলার নলীও কেটে দিয়ে আসতে পারবে ।

নিতাই জানে বেজী ঝুঁজতে এ বাড়িতে আসাব মুরোদ রামলাখনের নেই । মুখে যতই গেছো মাগী বলুক, সজল খোকর মাকে যমের মতো ডরায় । তাই নিতাই খানিকটা নিশ্চিন্ত ।

বেজীর ঘোরাফেরা দেখতে দেখতে নিতাই অনেক তত্ত্বকথা ভাবছিল । মল্লিবাবুর ছিল দুটো বেজী, তার একটা । বড়লোকদের সব জিনিসই কিছু বেশী থাকে । কিন্তু ভগবান তা বলে বড়লোকদের তিনটে করে হাত পা দেয়নি । তবে বড়লোক শালারা অত তড়পায় কেন ?

কথাটা ভেবে খুশিই হল সে । এখন কথাটা কাউকে বলা দরকার । ঘরে একটা পাখির খাঁচা খালি পড়ে আছে । তার বউ ময়না পুষত । বউ পালানোর পর কিছুদিন মন খারাপ থাকায় ময়নাটাকে আর দানাপানি দেওয়া হয়নি । পাখিটা মরেই যেত । যখন ঝুঁকছে তখন তুষা এসে নিয়ে গেল । খাঁচাটা পরে ফেরত দেয় । ময়নার জন্য নতুন মস্ত খাঁচা বানিয়ে নিয়েছে ।

বেজীটাকে ধরে খাঁচাবন্দী করে তত্ত্ব কথাটা কাউকে বলতে বেরোলো নিতাই ।

গ্রীষ্মকালে মাথার জটাটা খুব পাকিয়ে উঠেছে । উকুনের চিড়বিড়েনির চোটে মাথা খাবলে ঘা করে ফেলল । সেই ঘা এখন দগদগিয়ে উঠে পুঁজ রক্ত পড়ছে । চিমসে গন্ধ এমন ছাড়ে যে, নিতাই নিজেও টের পায় । বোষ্টমরা বেশ আছে । মাথা কামিয়ে ফেলে ।

তান্ত্রিকদেরই যত বিপদ ।

হরিশ ডাক্তার আগে জল দিলেও লোকের রোগ সারত । এখন আর পসার নেই, এই গঞ্জ জায়গায় এখন আরো দুজন ডাক্তার হয়েছে । তবু হরিশ ডাক্তার এখনো বাজারের গায়ে ডিসপেনসারিতে হাতের থাবায় নাক ঢেকে চুপ করে বসে থাকে । কম্পাউণ্ডার পর্যন্ত নেই ।

নিতাই গিয়ে সুমুখের চেয়ারটা টেনে বসে বলল, মাথার ঘায়েব একটা ওষুধ দাও দিকিনি ।

হরিশ বেশী কথা বলে না । চেয়ে থেকে শুধু বলল, পয়সা কে দেবে ?

চিকিৎসকের আগেই পয়সা ! ডাক্তাররা কি চামারই হল দিনে দিনে !

যা না, ঐ যে সব ভাগাড়ের ডাক্তাররা এসেছে তাদের কাছে যা । কী বলে শুনে আয় ।

ওসব শুনে কী হবে ? তুমি হলে এ ষাঁয়ের পুরোনো ডাক্তার । আমিও পুরোনো লোক ।

তোমার আমার কি কেবল পয়সার সম্পর্ক ?

তবে কিসের সম্পর্ক ? তুই আমার কোন ভাতিজা লাগিস ?

মাথাব ঘায়ে আমাব বলে পাগল-পাগল অবস্থা ! পিছুতে লাগছ কেন বলো তো । একটা মলম-টলম দাও না । ডাক্তাররা তো বিনিমাগনা কত ওষুধ পায় ।

সে তোব মতো গর্ভশ্রাবের জন্য নয় ।

খুব যে বড় বড় কথা বলছ, তোমার অবস্থাও জানি ।

কি জানিস ?

তোমার রুগী জোটে না ।

ই ! দুদিন সবুর কব, তারপর দেখিস জোটে কি-না ।

দুদিনে কি হবে ?

ভাগাড়ের ডাক্তাররা যখন রতনপুবে শকুন ফেলবে তখন গ্রাহি গ্রাহি বলে এসে জুটবে সব । রুগী জোটে না । রুগী জোটে না তো তুই-ই বা কেন এসে জুটলি ? বেবো !

আচ্ছা না হয় মানছি । পুরোনো চাল ভাতে ব্যাড়ে, সবাই জানে । তোমার দাম-এরা বুঝবে কি ? আমরা পুরোনোরা বুঝি ।

হরিশ ডাক্তার একটা শ্বাস ফেলে বলে, সুবিধে হবে না রে, অন্য জায়গায় দেখ ।

চটলে নাকি ?

চটাই তো স্বাভাবিক । সকালবেলায় তোব মুখটাই দেখতে হল !

শাস্ত্রে কি আছে জানো ?

কি আছে ?

শাস্ত্রে আছে, বড়লোকদের তিনটে করে হাতও নেই, তিনটে করে পাও নেই । আছে ?

তবে বড়লোকদের কটা করে হাত পা ?

দুটো করে । গরীবদের মতোই ।

এটা তো ভেবে দেখিনি ।

ভাবো । ভাবলেই টের পাবে ।

ভাবব'খন । এখন তুই বাপু গতর তোল ।

তুলছি, তুলছি । আমার হাতে মেলা সময় বলে ভাবো নাকি ? কাজ আমারও আছে । বলছিলাম, বড়লোকদের যদি ভগবান গরীবদের মতোই সব দিয়েছেন, তবে শ্রমীদের অত

তেল কেন ?

এটাও ভাববার কথা । জামা-কাপড় ক'দিন কাচিস না বল দেখি ! গন্ধে ভূত পালায় ।

ভূত কখনো গন্ধে পালায় না গো ডাক্তার ।

তবে কিসে পালায় ?

মস্ত্রে ।

ওঃ, তুই তো আবার তান্ত্রিক !

আলবৎ তান্ত্রিক । একটা মলম দাও, মাস পয়লা দাম দিয়ে দেবো ।

তোব কি মাস পয়লায় বেতন হয় নাকি ?

আমাব যজমান আছে, তাদের বেতন হয় ।

তোরও যজমান ?

আমাকে ভাবো কি বলো তো তোমরা, তন্তুটা তো ইয়ার্কি নয় ।

সে জানি । কিন্তু তোব ওষুধের পয়সা না থাকলেও গাঁজাব পয়সা জোটে কোথেকে বল দিকি ।

লোকে দেয় ।

চুরিটরি এখনো কবিস নাকি ?

চোর কি আমাব গায়ে লেখা আছে ?

চোরের গায়ে চোর লেখা থাকে নাকি ?

মলম তা হলে দেবে না ?

পয়সা দিলে দেবো ।

ফুঃ ! বিনা পয়সায় কত মলম চাও ? ঐ বেণু ডাক্তারবেব কাছে গেলে এখনই বাপেব সুপুত্র হয়ে মলম দেবে ।

তাই যা না ।

যাচ্ছি । তুমি পুরোনো লোক বলেই এসেছিলাম ।

যা যা ভাগ ।

গন গন করতে কবতে নিতাইক্ষাপা বেবিযে এল । ওষুধ কবাটা একটু শিখতে হবে । জড়িবুটি কিছু না জানলে আজকাল সাধুসন্নিসির তেমন কদর হয় না ।

বেণু ডাক্তার গঞ্জে নতুন লোক । তাব ডাক্তারখানায় কিছু রুগী জোটে । আজও জুটেছে ।

দরজায় দাঁড়িয়ে নিতাই হুঙ্কার দিল, জয় কালী ! জয় কালী তারা মহাবিদ্যা ষোড়শী ভুবনেশ্বরী ।

বেণু একটা ছেলের পিলে টিপে দেখছিল । বিরক্ত মুখ তুলে বলল, কি চাই ?

চাটুজ্জে বাড়ি থেকে আসছি ।

কোন্ চাটুজ্জে ?

চাটুজ্জে আবার এখানে কটা ? শ্রীনাথ চাটুজ্জে, তৃষা চাটুজ্জের নাম শোনোনি ?

ও । বলে বেণু ডাক্তার আবার পিলে দেখতে লাগল । তারপর ওষুধের নাম লিখল, কমপাউন্ডারকে ডেকে কাগজখানা দিল ।

ততক্ষণে নিতাই কাঠের বেঞ্চটায় জায়গা করে নিয়ে বসে ঠ্যাং নাচাচ্ছে । বসে বসে সে বেণু ডাক্তারকে দেখছিল আর ভাবছিল । কোথেকে এসে বেশ জুড়ে বসে গেছে । কথায় আছে বন থেকে বেরুলো টিয়ে, সোনার টোপের মাথায় দিয়ে । এও হল সেই কাণ্ড ।

আপনমনে খুব একচোট হাসল নিতাই। বেণু ডাক্তার ভু কঁচকে চেয়ে তার হাসি দেখল, কিছু বলল না। নিতাই হেসেটেসে নিয়ে বলল, হরিশ ডাক্তার কি বলে জানো? বলে, তোমরা নাকি সব ভাগাড়ের ডাক্তার।

বেণু আবার ভু কৌচকায়। বলে, এটা গালগল্পের জায়গা নয়।

তোমরা বাপু ছট কবে বড় চটে যাও। আজকাল কারও সঙ্গে বসে দুটো কথা বলতে পারি না। সবাই ব্যস্ত, সবাই বদরাগী।

হাতের রুগীকে ছেড়ে দিয়ে বেণু নিতাইয়ের দিকে চেয়ে বলল, কি চাই?

মাথার ঘাঘের জন্য একটু মলম দাও তো।

মাথাটা দেখি।

গরু-মোষ যেমন গুঁতোলোর সময় করে তেমনি মাথাটা এগিয়ে দিল নিতাই।

বেণু ডাক্তার টাকার কথাটা আগে তুলল না। তার মানে লোকটা খারাপ নয়। জপানো যাবে।

অনেকক্ষণ দেখল বেণু। তাবপব বলল, ওষুধ দিচ্ছি। দিন সাতেক লাগিয়ে দেখ। যদি তাতে না কমে তবে একবার মেডিক্যাল কলেজে গিয়ে দেখিও।

নিতাই এক গাল হেসে বলে, তোমার ওষুধেই কমবে। লোকে বলে তুমি ধষগুরী।

কই, হরিশবাবু তো বলেন না! বলে বেণু একটু হাসে।

হরিশ আবার ডাক্তার! কলিকালে কতই হল, পুলিপিঠেব ন্যাজ বেরুলো।

বেণু ডাক্তারের সত্যিই গালগল্পের সময় নেই। তবু বলল, পুলিপিঠেব আবার লেজ হয় নাকি?

ও সে এক মাতালের গল্প। মদ খেয়ে আলায়-বালায় পড়ে ছিল, ত্রো এক ইদুব এসে তাব মুখ শুকছে। খপ কবে ইদুরটাকে চেপে ধরে ভাবল, বাঃ এ যে দিবা পুলিপিঠে। কিঙ পুলিপিঠেব একটা ন্যাজও বয়েছে। তাই ভাবছে এসব কলিকালের কাণ্ডমাণ্ড আর কি।

গল্পটা বেণু ডাক্তার জানত না। একটু হাসল। হাসি দেখে ভরসা পেল নিতাই। মানুষের মুখে হাসি সে বড় একটা দেখতে পায় না। ভারী দুর্লভ জিনিস। বলল, এরকম কত গল্পো আছে আমার খোলায়। শুনতে চাও ত্রো বোজ এসে শুনিযে যাবো।

কমপাউনডার একটা অয়েল পেপারে মোড়া খানিকটা মলম এনে দিয়ে বলল, এক টাকারো আনা। দিনে তিনবার লাগাবে। সকাল, দুপুর, বাঁত্র।

কমপাউনডার ছোকরা চেনা মানুষ। আর চেনা মানুষকেই নিতাইয়ের যত ভয়। তাই শুনি-না শুনি-না ভাব করে বলল, বুঝলে ডাক্তার, আমি ক্লাস এইট পর্যন্ত পড়েছি। ম্যাট্রিক পরীক্ষার সময় এমন টাইফয়েড হল, পরীক্ষাটাই বরবাদ।

ও বাবা! বেণু ডাক্তার চোখ বড় করে বলে, এইট থেকেই এক লাফে ম্যাট্রিক!

কোথাও একটা কিছু গোলমাল হচ্ছে বুঝতে পেরে নিতাই মোলায়েম গলায় বলে, সে আমলে হত। আজকেব কথা তো নয়।

তুমি কোন আমলেব লোক, বয়স কত?

তা তিন কুড়ি চার কুড়ি হবে। নিতাই বোকা সাজল একটু।

ডাক্তার হাসে। বলে, তাহলে তো মেলাই বয়স তোমার।

আমি যখন ছোটো ছিলাম তখন এ জায়গায় বাঘ ডাকত।

কমপাউনডার ছোকরা তাড়া দিয়ে বলে, পয়সাটা?

নিতাই বিরক্ত হয়ে বলে, চুপ দে ত্রো সতু। কাজের কথা হচ্ছে তার মধ্যে ঘ্যান ঘ্যান

লাগালি। পয়সা হবে'খন। চাটুজ্জ বাড়ির পয়সা মার যায় দেখেছিস ? আমার দশ বিঘে জমি আছে।

কথার তোড়ে সতু ভড়কে পিছিয়ে গেল।

বেণু ডাক্তার লোক খারাপ নয়। তাছাড়া পসার জমাতে হলে লোককে প্রথম প্রথম একটু খাতির করতেই হয়। তাই হাসিমুখেই বলল, ঠিক আছে, পরে দিয়ে যেও। তুয়া বউদির কাছে বিলও পাঠিয়ে দিতে পারি।

আতকে উঠে নিতাই বলে, না না, বউদিদিমণিকে আবার এর মধ্যে কেন। মোটে তো সাতসিকে পয়সা। গনিয়ার জঙ্গলের পূবধারে ভাঙা মন্দির ঝুড়লে সাত ঘড়া সোনার মোহর, জানো ? বহুকাল আগে এক সাধু আমাকে সন্ধান দিয়ে গেছে। ভারী আলিস্যি তো আমার তাই আজও তুলিনি। আমারটা খাবেই বা কে বলো। সন্মিসি ফকির মানুষ। তুলব-তুলব করেও তাই তুলিনি। এবার একদিন যেতেই হবে দেখছি।

মলমটা নিয়ে বেরোতেই দেখতে পেল, সামনে বউদিদিমণির দোকান ত্রযীর পাশের টিউবওয়েলটায় মাছির মতো ভিড লেগেছে। আগে বাজারে পাতকো ছিল, পুকুর ছিল, একটা টিউবওয়েলও ছিল। পুকুর মজে ওবাট হয়েছে, পাতকো ভাঙা, টিউবওয়েলটার দশাও বুড়োর দাঁতের মতো নড়বড়ে। বউদিদিমণি এই টিউবওয়েল বসাল এই সেদিন, এখনো গায়ের সবুজ রংটা চট্টনি পর্যন্ত। প্রথম প্রথম লোকে এ টিপকলের জল নিত না। মাতব্বররা নাকি নিষেধ করেছিল। আজ ভিড দেখে খুশি হল নিতাই। একটা হুংকাব ছেড়ে বলল, জয় কালী। এই ব্যাটা বা, লাইন লাগা। লাইন লাগা।

বলে নিজেই এগিয়ে গিয়ে লোকজনকে ঠেলা ধাক্কা দিতে থাকে নিতাই, বাপেব কল পেয়েছিস শালারা ? ভেঙে ফেলবি যে। এই খোকা, ভব দিবি না, টিপকল বেকে যাবে।

লোকে হিঁহি করে হাসে, নিতাইয়ের কথার অবাধ্যাও হয় না। যত যাই হোক, বউদিদিমণিরই তো কল। আর নিতাই হল বউদির ডান হাত। লোকে তাই লাইন লাগাতে থাকে। নিতাই একটু তফাত হয়ে কোমরে হাত দিয়ে দাঁড়িয়ে মাতব্বর করতে থাকে, এই পদা, অমন ঝকাং ঝকাং হ্যাণ্ডল মারছিস যে ! বাপের জন্মে এসব সাহেবী জিনিস দেখেছিস ? খাস বিলেত থেকে জাহাজে করে আনা। বলি ও রতনের মা, লাইন ভেঙে এগোলে যে বড় ! কাদু তুই হরিপদর পেছনে। এই শালা কেতন, তোর কি চান করার মতলব নাকি ? কোমবে গামছা, মাথায় সপসপে তেল, হাতে বালতি মগ ? আঁ ? চান করলে ঠ্যাং ভেঙে দেবো। ইং, লাটসাহেব বউদিব বিলিতি কলে চান মারাতে এসেছে ! ভাগ, ভাগ ! হু হু বাবা, এ কল এমন মস্তুর দিয়ে বেঁধেছি কেউ বদ মতলব নিয়ে এলে কল সাপ হয়ে ছুবলে দেবে। এ হল পাতাল গঙ্গার জল, যত পারিস খা, রোগ ভোগ দূর হয়ে যাবে, গায়ে হাতির বল হবে। ডায়াবেটিস জানিস, ডায়াবেটিস ? এই জল খেলে ডায়াবেটিসও সারে।

দুপুরের দিকে বাজারটা ফাঁকা ফাঁকা। তারই ভিতর থেকে হঠাৎ একটা কালোপানা লোক ধাঁ করে বেরিয়ে এল। নিতাই মাতব্বরিতে ব্যস্ত ছিল বলে দেখতে পায়নি। লোকটা এসে রক্তাশ্রবানা গলার কাছটায় চেপে ধরতেই নিতাই চেতন হয়ে দেখল, রামলাখন।

এই শালা, কাল আমার ঘরে সিধ দিয়েছিল কে ?

তোর বাবা। বলে চোখ বুজে রইল নিতাই। নিশ্চিন্তে। কারণ, সেই মুহূর্তে সে বাজারের ও প্রান্ত থেকে একটা ভটভটিয়া আসার শব্দ পেল। সময় মতোই আসছে।

শালা, এইখানে আজই তোর লাস নামিয়ে দিয়ে যাবো।

নিতাই চোখ বন্ধ করে গম্ভীর গলাতেই বলল, শিপড়ের পাখা ওঠে কখন জানিস ? মরার সময় । ঘোর কলি, ঘোর কলি । নইলে মাতাল বদমাশরা সাধুসন্নিসির গায়ে হাত তোলে ? একটা খিস্তি দিয়ে রামলাখন বলে, পুলিশে সকালবেলায় খবর করেছে । কিন্তু তোকে পুলিশে দেবো না । নিজের হাতে বানাবো ।

ভটভটিয়াটা ত্রয়ীর সামনে দাঁড়িয়ে গেছে । কলের লাইন ভেঙে লোকে মারপিট দেখতে জুটে গেছে চারধারে ।

নিতাই চোখ খুলে চারদিকটা দেখে নিয়ে খুশি হল । লোকজন না জুটলে খেল কিসের ? ঠাণ্ডা গলায় বলল, তিন দিনের মধ্যে গলায় রক্ত উঠে মরবি । যা, বাণ মেয়ে দিলাম । ঠিক আছে । বাণের মোকাবিলা করে নেবো । এখন বল, বেজীটা কোথায় ? তার আমি কি জানি ?

তুই জানিস না তো কে জানে ? তোরা বাপ জানে । বল । বলে রামলাখন একটা ঠুসো দিল পেটে ।

ককিয়ে উঠে নিতাই বলে, বাপ জানে তো আমার বাপের কাছেই যা না । আমার বাপ কোথায় আছে জানিস ? ভূত হয়ে মাদারপাড়ার বাঁশবনে দোল খায় । তোকেও সেখানে পাঠাবো । আর তো মোটে তিন দিন ।

চড়াক করে একটা চড পডল গালে । মাথাটা ঘুরে গেল একটু । গাঁজার নেশা থাকলে একটু দুধ দরকাব হয় । নইলে শরীরে কিছু থাকে না । বৃদ্ধিয়ার মায়ের কাছ থেকে এক পো করে নিলে কেমন হয় ? বদলে মস্তুর দেবে ওদের । রাজি হবে না ?

নিতাই বিড়বিড় করে বলে, তুই মরবি । তোর বংশ ঝেড়েপুঁছে সাফ হবে । ছেবাদ্দ হবে না, পিণ্ডি পডবে না ।

মলমটা ঠেলা ধাক্কায় হাতের মধ্যেই ভচকে গেছে । হাতময় আঠা । এই অবস্থাতেও সাবধানে হাতটা তুলে মাথার ঘায়ে মলম ঘষতে ঘষতে সে হঠাৎ চোঁচায়, বোম কালী, গোলে বকাবলী । জয় মা ! শেষ করে দে, ফিনিস করে দে, রক্ত দিয়ে চান কর মা ! মা গো !

সরিৎবাবু বড় দেৱী করছে । আবাব চোখ বুজে ফেলে নিতাই । চোখের নজর লুকোনোটা ভাল অভ্যাস । তারাপীঠের এক সাধু তাকে কায়দাটা শিখিয়েছিল । বলেছিল, পাপ-তাপ কবলে লোককে চোখের দিকে তাকাতে দিও না । চোখে সব ভেসে ওঠে । ধরা পড়ে যাবে । চোখ বুজে থেকো, মেজাজটা ঠাণ্ডা রেখো । বিপদ কেটে যাবে । সেই উপদেশটা আজ কাজে লাগিয়ে দিল ।

ভিডেব ওপাশে রাস্তাব ধারে সবিৎ তাব মোপেড থামিয়েছে, দোকানের কর্মচারীদের সঙ্গে কথাবার্তা বলছে । গোলমাল দেখে ঘাড় ঘুরিয়ে মুখ কৌচকাল ।

কি হচ্ছে বে ওখানে ?

দোকানের ছোকরা কর্মচারী শব্দ বলে, ক্ষাপা নিতাইকে রামলাখন ধরেছে । বেজী না কি চুরি করেছে বুঝি ।

রামলাখনটা কে ?

সে ঐ লাইনের ওধারে ঝোপডায় থাকে । মহা বদমাশ ।

সবিৎ একবার ভালল ঝামেলায় জড়াবে না । সেজদি আবাব কি না কি বলে ।

কিন্তু রামলাখন নামে লোকটা খুব গলা তুলছে । দু-চার ঘা ঝাড়লও । সরিৎের রক্তটা একটু চনমনে হয়ে ওঠে । নিতাই চোর ছাঁচড যাই হোক, সে চাটুঙ্কেলবাড়ির আশ্রিত । তাব ওপর বাজারী মার পড়লে দিদিরওঁ অপমান ।

সরিং মোপেড থেকে নেমে রাস্তাটা চকিত পায়ে পার হল।

বাবা আজকাল তাকে ঘরের চাবি দিয়ে যায়। আগের মতো বাবা আর রাগী নেই। না, কথাটা ভুল হল। বাবা এখন বরং আগের চেয়ে আরো অনেক বেশী রাগী হয়ে গেছে। কিন্তু সজলের ওপর বাবা আজকাল একদম রাগে না।

বাবার ঘরে ঢুকে সজল আজকাল ইচ্ছে মতো জিনিসপত্র হাটিকায়। বাবা কিছু বলে না। মাঝে মাঝে বলে, আমি যখন থাকব না তখন তুমি এ ঘরটায় থেকো।

তুমি কোথায় যাবে ?

কোথাও চলে যাবো।

কেন ?

এখানে ভাল লাগে না।

আমারও লাগে না। আমাকে রামকৃষ্ণ মিশনের হোস্টেলে পাঠাবে ?

সে তোমার মা জানে।

মাকে তুমি বলো না !

কেন হোস্টেলে যেতে চাও ?

হোস্টেলে অনেক বন্ধু পাবো।

কেন, এখানেও তো তোমার অনেক বন্ধু। পাঠশালার মাঠে বিকেলে ঐ যাদের সঙ্গে ফুটবল খেল !

হ্যাঁ, ওরা আবার বন্ধু নাকি ? মা তো আমাকে বাইরের কারো সঙ্গে মিশতে দেয় না, যদি আমি খারাপ হয়ে যাই। তাই সব ভালো ভালো ছেলেদের সঙ্গে মা বন্দোবস্ত করেছে, তারা যদি বাড়িতে এসে আমার সঙ্গে খেলে তাহলে রোজ ভালো টিফিন খাওয়াবে।

শ্রীনাথ অবাক হয়ে বলে, সে কি !

সজল হি হি করে হাসে। বলে, একটা ছেলেও ভাল করে শট করতে জানে না। একটা ছেলের সঙ্গেও আমার তেমন ভাব নেই। শুধু খাওয়ার লোভে পেটুকগুলো রোজ খেলতে আসে।

রাগে ক্ষোভে শ্রীনাথের মুখটা কেমনধারা হয়ে গেল। প্রায় কাঁপা গলায় বলল, শাসন তাহলে এত দূর গেছে !

তুমি ভেবো না বাবা, আমি ইসকুলে অন্য সব বন্ধু পাই।

কিন্তু এরকম ভাড়া করা বাছাই ছেলেদের সঙ্গে মিশলে যে মনের দিক থেকে তুমি পঙ্গু হয়ে যাবে।

কথাটার মানে বুঝল না সজল, কিন্তু আন্দাজে বুঝল। বলল, সেই জন্যই তো হোস্টেলে যেতে চাই। যেতে দেবে, বাবা ?

শ্রীনাথ একটু ভেবে মাথা নেড়ে বলে, আমি তোমাকে যেতে দেওয়ার মালিক নই।

তা হলে আমি তোমার সঙ্গে যাবো।

শ্রীনাথ হেসে তার মাথায় হাত বুলিয়ে দেয়। গাঢ় স্বরে বলে, সেও তোমার মা জানে। তোমার মায়ের হাত থেকে কেউ পালাতে পারে না। তুমিও পারবে না।

আর তুমি ?

আমি পারবো। একভাবে না পারি অন্যভাবে পারব।

অন্যভাবে কি রকম বাবা ?

সে তুমি বুঝবে না। তবে আমি যখন থাকব না তখন এই খোলামেলা ঘরখানায় তুমি এসে থেকে। আমার বাগানটা দেখো। বাগান করা খুব ভাল। প্রকৃতির মতো এমন শিক্ষক আর নেই।

বাবার কথাগুলো একটু অদ্ভুত লাগে বটে, কিন্তু বাবা বরাবরই একটু এ রকমই তো। সজল তাই বাবাকে নিয়ে বেশী ভাবে না। তবে ঘরখানা তার খুব ভাল লাগে। সুযোগ পেলেই এসে হানা দেয়। হাঁটকায়।

সেদিন সকালের পড়া থেকে ছুটি পেয়েই চলে এল বাবার ঘরে। গ্রীষ্মের ছুটি চলছে। অগাধ অফুরন্ত দুপুর সামনে। বাবার ঘর থেকে ক্ষুরটা গোপনে নিয়ে বেরিয়ে এল সজল। বিশাল বাগানের এদিক-সেদিক ঘুরতে ঘুরতে চলে এল নিতাইয়ের ঘরে।

সামনে বিম মেরে ঘুমোচ্ছে ইস্পাত। ঝোপড়ার দরজাটা বন্ধ। ঠেলতেই ঝাঁপের দরজা খুলে যায়।

নিতাইদা আছো ?

নেই। তবে একটা অদ্ভুত জিনিস রয়েছে। পাখির খাঁচায় ছোট্ট একটা বেজী।

সজল খাঁচার গায়ে হাতের চাপড় দিতেই বেজীটা এদিক-সেদিক ছোট্টাছুটি করতে থাকে। বেজী সাপ মারে শুনেছে সজল। কখনো দেখেনি। সে খাঁচাটা দোলাতে থাকে। এখন একটা সাপ এনে খাঁচাটার মধ্যে ছেড়ে দিলে দারুণ হত।

ভাবতে ভাবতেই ফটকের দিকে একটা গোলমাল শুনতে পেল সজল। ছোট্টোমামা কাকে যেন মারতে মারতে আর গালাগাল দিতে দিতে টেনে আনছে। বলছে, চল শালা, তোর বেজী যদি খুঁজে না পাস তবে পুতে ফেলব।

দরজায় দাঁড়িয়ে সজল দেখল। লোকটা রামলাখন। মামা খুব মারছে রামলাখনকে। চেন দিয়ে গলাটা পেঁচিয়ে ধরে রেখেছে এক হাতে। মামার গায়ে দারুণ জোর। দেখে একটু খুশির হাসি হাসে সে। গায়ের রক্ত ছলাত ছলাত করে।

বেজীর ব্যাপারটা বুঝতে তার এক পলকও লাগেনি। চকিতে ঘরে ঢুকে খাঁচাটা নিয়ে সে বেরিয়ে আসে। তারপর অজস্র ঝোপঝাড়ের মধ্যে ঢুকে যায়।

॥ আঠাশ ॥

আড়াল থেকে দেখতে পাচ্ছিল সজল ; রামলাখনকে ছোট্টোমামা ঘাড়ে ধরে এনে ধাক্কা দিয়ে নিতাই ক্ষ্যাপার ঝোপড়ায় ঢুকিয়ে দিয়ে বলল, বার কর তোর বেজী। বার কর !

রামলাখনের অবস্থা খুবই সঙ্গীন। মুখটা ভাষাচ্যাকা খেয়ে আছে। কাঁদো কাঁদো ভাব। আবার রাগও থমথম করছে। কিন্তু শক্ত পাল্লায় পড়ায় কিছু করতে পারছে না।

ছোট্টোমামার সঙ্গে যদি কোনোদিন সেজকাকার ফাইট হয় তবে কে জিতবে তা এখন ভেবে ঠিক করতে পারছে না সজল। তার মন চায় সেজকাকাই জিতুক। কিন্তু তা কি হবে ? ছোট্টোমামার গায়ের জোর ভীষণ, সাহসও সাজঘাতিক। এই তো মাত্র কয়েক মাস হল এ জায়গায় এনেছে, এর মধ্যেই তাকে সবাই ভয় খায়। তবু যদি কোনোদিন ফাইট লাগে, আর সজলকে যদি রেফারি করা হয় তবে সজল সেজকাকাকেই জিতিয়ে দেবে।

রামলাখন ঝোপড়া থেকে ম্লান মুখে বেরিয়ে এল। সজল জানে, ঘরে বেজীটা পেয়ে গেলেও রামলাখনের লাভ হত না। ছোট্টোমামা অত কাঁচা ছেলে নয়। সঙ্গে সঙ্গে বলত, ওটা তো আমাদের বেজী। পরশুদিনই গণি মিয়ার কাছ থেকে কিনেছি। তোর বেজী কই ?

এসব সজলের জন্য। বেশ কিছুদিন আগে শীতলাবাবুদের ময়না পাখিটা খাঁচা খোলা পেয়ে উড়ে পালায়। কিন্তু খাঁচায় থেকে থেকে ডানার জোর ছিল না বলে খানিক উড়ে এসে তাদের বড় ঘরের বারান্দায় চূপ করে বসে ছিল। বৃন্দা সেটাকে ধামা চাপা দিয়ে ধরে। পরে খবর পেয়ে শীতলাবাবুর মেয়ে টুটু যখন খোঁজ করতে এল তখন পাখিটা নতুন বড় একটা খাঁচায় নিতাইক্ষ্যাপার পাখিটার পাশে দোল খাচ্ছে।

টুটু বলল, ও মা! এই তো আমাদের ময়না।

বৃন্দা অবাক হয়ে বলে, তাই নাকি? তা সে তোমরা গণি মিয়ার সঙ্গে বোঝা গে যাও। নগদ পঁচিশ টাকায় কালই তো বড়দিমণি কিনলেন।

ডাহা মিথ্যে। পরে শীতলাবাবুরা বাড়িসুদ্ধ মেয়ে মন্দায় এলে সে কি কাঁউ কাঁউ করে ঝগড়া। জবাবে মা কিছুই বলল না। বৃন্দাকে এগিয়ে দিল। বৃন্দা একাই গলার জোরে সবাইকে হঠিয়ে দিয়েছিল।

গণি মিয়া মাঝে মাঝে পাখি বেচতে আসে। মার সঙ্গে তার একটা বন্দোবস্ত আছে। মা যা বলাবে সে তাই বলবে। কাজেই বৃন্দার ভয় ছিল না। তবু শীতলাবাবুদের পাখিটাকে ধরে রাখার একটা অন্য কারণও ছিল। কোন কালে যেন জেঠুর সঙ্গে জমি নিয়ে তাদের মামলা হয়। সেই রাগে জেঠুর তিনটে গরুর একটাকে শীতলাবাবু তার চাকরকে দিয়ে বিষ খাইয়ে মারে। গাড়ীন গাইটা সঙ্কের মুখে বাড়ির উঠোনে দাপিয়ে মরল। গরুর ডাক্তার এসে বলল, এ তো ক্রিয়ার পয়জনিং কেস। মা তবু ময়নাটকে মারেনি। কেউ কেউ অবশ্য বলে যে, শীতলাবাবুদের ময়নাটা আসলে নিজে উড়ে আসেনি, নিতাই পাগলই সেটাকে চুরি করে আনে।

সত্যি মিথ্যে কে জানে!

তবে রামলাখন ব্যাটা এখন হাতজোড় করে ছোটোমামার কাছে বোধ হয় ক্ষমাই চাইছে। পুকুরপারের ঝোপঝাড়েরে গা ঢাকা দিয়ে বসে সজল সব দেখতে পাচ্ছিল। তার হাতের খাঁচায় বেজী।

হেলেদুলে নিতাই ক্ষ্যাপা এসে দাঁড়িয়ে হাত তুলে বলল, জয় কালী কলকাত্তাওয়ালী। নখদর্পণ জানিস ব্যাটা?

রামলাখন কী একটা তেজী জবাব দিল তার কথার।

নিতাই নেচে উঠে বলল, শান্তর মস্তুর জানলে তো মর্ম বুঝবি? পাঁচটা টাকা নিয়ে অমাবস্যায় আসিস, গুণে বলে দেবো তোর বেজী কোথায় আছে। বলে খুব হাসতে থাকে বাহাদুরীর হাসি।

ছোটোমামা অবশ্য আর বাড়াবাড়ি করল না। বাগানের কাজ করার জন্য যে সব ফুরনের লোক হামেশা কাজ করে তাদের একজনকে ডেকে বলল, এটাকে লাইন পার করে দিয়ে আয় গে। এসে আমাকে খবর দিস।

রামলাখন বিদেয় হতেই সাবখানে চারপাশটা দেখে নিয়ে সজল এক দৌড়ে বেজীর খাঁচা নিয়ে ভাবন-ঘরে পৌঁছে গেল। তালো খুলে ভিতরে ঢুকে সে দরজায় খিল তুলে দেয়।

ভাবন-ঘরের পিছন দিকে একটা দরদালানের মতো ঢাকা বারান্দা আছে। খুব বড় নয়, বরং খুবই ছোটো। চারদিকে ঘষা কাচ বসানো জানালা। এ ঘরে কেউ কখনো আসে না। একটা অদ্ভুত ঢালু টেবিল আছে। এটাতে নাকি ড্রইং বোর্ড রেখে জেঠু নানা আঁকজোখ করত। ইনজিনিয়ারদের ওরকম করতে হয়। এ ঘরে পুরু ধুলোর আন্তরণ পড়েছে, মাকড়সা জাল বুনেছে, ঘুলঘুলিতে চড়াই পাখি বাসা করেছে।

টেবিলের তলায় খাঁচাটা রেখে সজল ভাবতে লাগল, বেজীরা কি খায় ?

ভেবে পেল না । তবে বাড়ি থেকে একটু বাদে গিয়ে কয়েকটা ছোলা, এক বাটি জল, কিছু চাল এনে খাঁচার মধ্যে ছড়িয়ে রেখে গেল । যেটা মন চায় খাবে । বিকেলে চীনেবাদাম কিনে এনে দেবে । মংলুকে বললে কাঁচা মাংসরও ব্যবস্থা হবে । বাবা এলে জেনে নেবে বেজীরা কি খায় ।

ভাবন-ঘরে ফের তলা দিয়ে বেরোচ্ছে, শুনতে পেল ঝোপড়ার দিক থেকে নিতাইক্ষ্যাপা চৈচাচ্ছে, জয় কালী, কালীস্বরী, মহাবিদ্যা, প্রলয়ংকরী । মা । মা গো ।

তাকে দেখেই নিতাই হাতছানি দিয়ে ডাকল ।

মুখখানা নিপাট ভালমানুষের মতো করে এগোয় সজল ।

কোথায় ছিলে সজলখোকা ? কত কাণ্ড হয়ে গেল, দেখলে না ।

কী কাণ্ড ?

হি হি করে খুব হাসে নিতাই । তারপর গলা নামিয়ে চোখ ছোটো করে খুব ষড়যন্ত্রের গলায় বলে, বাজারে পেয়ে ব্যাটা খুব ধরেছিল আমাকে । মা প্রলয়ংকরী এসে বাঁচায় ।

কে ধরেছিল ?

রামলাখন । ব্যাটা সাতদিনের মধ্যে মুখে রক্ত উঠে মববে । বাণ মেরে দিয়েছি, কাজও শুরু হয়ে গেছে । কিন্তু মায়ের কী লীলা বলো তো । আমাকে বাঁচাতে মা বেজীটা হাপিস করে দিল বটে, কিন্তু সারা বাড়ি তন্ন তন্ন করে খুঁজেও শালাটাকে আর দেখতে পাচ্ছি না ।

বেজী ? কত বড় বেজী ?

নিতাই চোখ কুঁচকে সজলের দিকে অনেকক্ষণ দেখে নিয়ে বলে, তোমার কাণ্ড নয় তো ?

মাইরি না । চোখের দিব্যি ।

আহা, বেজীটা তো তোমার জনাই আনা । ব্যাটা দেহাতী কি মর্ম বুঝবে অবোলা জীবের ।

পেলে আমাকে দিও । আমার খুব বেজী পোষার শখ ।

মুখটা একটু ম্লান হয় নিতাইক্ষ্যাপার । আনমনে দূরের দিকে চেয়ে বলে, মা কত মায়াই না জানে । বেজীটা যে হাওয়া হয়ে গেল আর রূপ ধরল না । মেহনতটাই বৃথা ।

তুমি বেজীটা চুরি করেছিলে নিতাইদা ?

চুরি আবার কি ? অবোলা জীবটাকে উদ্ধার করেছিলাম । তা মায়ের জীব মা নিজেই নিয়েছে । ভারী আশ্চর্য কাণ্ড । জলজ্যান্ত ঘরে রেখে গেলাম ।

দুপুর পেরিয়ে গেল নিতাইদা, খাবে না ?

আনমনে একটু হুঁ দিয়ে নিতাই মাটিতে একটা কাঠি দিয়ে আঁকিবুকি কাটতে থাকে ।

সজল সরে আসে । বেজীটা কিছুদিন এখন লুকোনো থাক ।

উঠোনের পূর্বধারে মস্ত নিমগাছের ঝিরঝিরে ছায়ায় ইজিচেয়ার পেতে বসে দীননাথ হোমিওপ্যাথ হরিপদ রায়ের সঙ্গে কথা বলতে বলতে একসময় বলেই ফেললেন, তোমার ওষুধ সত্যিই কথা কয় হে ।

পড়ন্ত বিকেলের আলোয় হরিপদের মুখ একটু উজ্জ্বল হল । মুখখানা এমনিতে শুকনো আর ভাঙা, রসকম নেই, সর্বদাই চিন্তায় ভারাক্রান্ত । বলল, আগে তো বিশ্বাস করতেন না ।

তোমার ওষুধের গুণও আছে, এ বাড়ির ভাল খাওয়াদাওয়া, সেবা যত্ন আছে । বউমার ব্যবস্থা সব খুব ভাল ।

সে তো আছেই। কিন্তু খেলেই তো হবে না, হজম করবে কে ?

সেও ঠিক। ছোটো ছেলের কাছে যখন ছিলাম তখন মনে হত, বয়স বুঝি আশি নব্বুই কি শতেক পার হয়েছে। একটু ভীমরতিও যেন ধরেছিল। হাঁটতে চলতে পারতাম না নিজের জোরে।

আর এখন ?

দেখছই তো, ওই ঘর থেকে একা এতদূর চলে এসেছি।

আস্তে আস্তে আরও পারবেন। আমি আপনাকে একদম ছোকরা বানিয়ে দেবো।

দীননাথ হাসলেন। বেঁচে থাকতে একটা আলাদা স্বাদ পাচ্ছেন। বললেন, ওষুধ তো ভালই দাও, তবে আমার দাদুভাইয়ের কুমি সারে না কেন ?

সজলের কুমি জন্মেও সারবে না। শুধু ওষুধ দিলে কি হবে ? পথ্য কন্ট্রোল করবে কে ? সারাদিন কুপথ্য করছে।

দীননাথ গম্ভীর মুখে খানিক ভেবে বললেন, আমার চার ছেলের মধ্যে বড় জন নেই, সেজো বিয়ে করবে কিনা জানি না। ছোটোর ছেলেপুলে হবে শুনছি, কিন্তু মেয়ে হলেই বা ঠেকায় কে ? এখন পর্যন্ত বংশে বাতি দিতে ঐ একমাত্র নাতি। তুমি খুব মন দিয়ে ওর চিকিৎসা করো তো।

ওষুধ তো দিই। প্রায়ই খায় না, ভুলে যায়।

এখন থেকে আমি খেয়াল রাখব। আজকাল আর ততটা ভুলে যাই না। বলে দীননাথ লাজুক মুখে হাসেন।

সজলের জন্য ভাববেন না। আমার চিকিৎসাতেই বড় হল। তবে মাঝে মাঝে অ্যালোপ্যাথিরও বিষ ঢুকেছে কি না।

হরিপদ চলে যেতে দীননাথ গ্রীষ্মের বিকেলে এই নরম ছায়ায় বসে বসে সোমনাথের কথা ভাবতে লাগলেন। মেজো বউমা যত্ন করে বটে, এ বাড়ির পরিবেশও ভাল। তবু কেন যেন ছোটো বউমার জন্য, ছোটো ছেলের জন্য আর কলকাতার অঙ্ককার সেই একতলা বাসাবাড়ির জন্য বড় মন কেমন করে। এখানে এসে অবধি শ্রীনাথের সঙ্গে ভাল করে দেখাই হয়নি। খুব পর মানুষের মতো থাকে। ব্যাপারটা নিয়ে ভাবছেন। কিন্তু চিন্তাশক্তি এখন আর তেমন জোরালো নয় বলে ভেবেও কিছু ঠিক করতে পারছেন না।

আজকাল ঘরে, বারান্দায়, উঠোনে টুকুস টুকুস করে হাঁটতে পারেন। আগে পারতেন না। মেজো বউমা অবশ্য বলে, হাঁটতে ঠিকই পারতেন, কেবল মনে জোর ছিল না। ভাবতেন, হাঁটতে গেলেই পড়ে যাবো বুঝি। মেজো বউমার বুদ্ধি খুব সাফ। ঠিকই বুঝেছিল। একা বসে মাথায় দুশ্চিন্তা আসছিল বলে দীননাথ উঠে পড়লেন। বাচ্চা ছেলের যেমন নতুন হাঁটতে শিখে হাঁটার নেশায় পায়, তাঁরও হয়েছে তেমনি।

বিকেলের দিকে বাড়িটা হাঁ-হাঁ করছে ফাঁকা। উঠোনটা জনমনিষ্যিহীন পড়ে আছে। ঘুরে ঘুরে হিসেবী চোখে দেখেন দীননাথ। ছোটো শয়তান বুলুটা মিছে কথা বলে না। মল্লি বেশ বড় সম্পত্তিই করেছিল। অনেকখানি জায়গা নিয়ে বাড়ি। কোনো কিছুই অভাব নেই। উপচে পড়ছে। দেখে বকের মধ্যে একটু ধাক্কা লাগে। তাঁর আর ছেলেরা কেউই তেমন কৃতী নয়। সকলেরই টানাটানি। ওরা যদি সবাই মিলে এই জায়গাটায় থাকতে পারত। ভেবে দীর্ঘশ্বাস পড়ে। হবে না। ওদের কারো সঙ্গে কারো মিল নেই।

উঠোনের পশ্চিমধারে এসে একটা ছাগলের 'ম্যা' শুনে দাঁড়ালেন দীননাথ। বাগানে ছাগল ঢোকেনি তো ! পশ্চিমধারে একটা বাঁশের আগড়। সেটা ঠেলে উঁকি মারতেই

দেখেন, একটা পুরুষ্ট ছাগল ঠ্যাং ছড়িয়ে দাঁড়িয়ে আছে, আর মংলু পেতলের মালসায় চড়াং চড়াং করে তার দুধ দুইছে।

ছাগলের দুধ কে খায় রে ?

শুনে মংলু হাসে, আপনিই তো খান, আর কে খাবে ?

ও বাবা, আমাকে বউমা রোজ ছাগলের দুধ দেয় বুঝি ?

হ্যাঁ তো। ডাক্তার আপনাকে ছাগলের দুধ খেতে বলে গেছে না ! মা ঠাকরোন তাই ছাগলটা কিনে আনালেন।

দীননাথ হাঁ করে থাকেন। তাঁকে দুধ খাওয়ানোর জন্য বউমা ছাগল কিনেছে ? এ যে ভাবা যায় না। বলতে কি, এই বুড়ো বয়সে বেঁচে আছেন বলেই মাঝে মাঝে তাঁর লজ্জা করে। যত্ন-আন্তি খাতিরের কথা মনেও আসে না। এ যে আজকাল নিজের মেয়েও করে না।

ছাগল দোয়ানো দেখতে দেখতে চোখে প্রায় জল এসে গেল। দাঁড়িয়ে অনেকক্ষণ দৃশ্যটা দেখলেন। মালসা ভরে উঠল দুধে, দীননাথের মনটাও ভরে গেল। দুনিয়াতে একটু আদর ছাড়া আর তাঁর কিছু চাওয়ার নেই।

ফিরে এসে বউমার ঘরের দাওয়ার সিঁড়িতে উঠে ডাকলেন, বউমা ! ও মেজো বউমা !

ঘরে কেউ নেই। শ্রীনাথের তিন মেয়ের নাম ওদের ঠাকুমাই রেখে গেছেন, রমলা, বিমলা আর কমলা। সে নাম অবশ্য আজ আর টিকে নেই। শুধু দীননাথই আজও ওদের এই নামে ডাকেন। রমলা এখানে থাকে না। তার এক মাসি তাকে দত্তক নিয়েছে। বিমলা আর কমলাকে বড় একটা দেখতে পান না দীননাথ। এখন দেখলেন, মেজো বিমলা লাল একটা শাড়ি পরে খুব পাকা মেয়ের মতো সেজে এলোচুল খোঁপায় বাঁধতে বাঁধতে উঠোন পেরিয়ে কোথায় যাচ্ছে।

দীননাথ ডাকলেন, বিমলি।

কি দাদু ?

কোথায় যাস ?

কোথায় যাবো..? বাড়ির মধ্যেই।

তোর মা কোথায় ?

মা বেরিয়েছে। কিছু লাগবে ?

না, কি আর লাগবে।

তবে ? কথা বলার লোক পাচ্ছে না বুঝি ?

দীননাথ হেসে বলেন, তো তুই-ই আয় না, দুটো প্রাণের কথা বলি বসে বসে। পাঠশালার মাঠে আমার বন্ধুরা বসে আছে যে।

তবে যা।

তুমি গিয়ে বাবার সঙ্গে কথা বলো না ! বাবা ফিরেছে।

ফিরেছে ? যাক। বলে উঠলেন দীননাথ। লাঠিতে ভর দিয়ে বেশ ভালই হাঁটতে পারছেন। কাউকে না ধরে, কারো সাহায্য না নিয়ে পৌঁছে গেলেন ভাবন-ঘরে।

শ্রীনাথ একটু দূরের ছেলে। দীননাথ এমনিতেই ছেলেরদের সমীহ করেন, শ্রীনাথকে আরো একটু। ছোটো ছেলে ছাড়া আর কাউকে তুই-তোকাকরি করেন না। বাইরে দাঁড়িয়ে একটু গলা খাঁকারি দিয়ে সাবধানে ডাকলেন, শ্রীনাথ, আছো নাকি ?

ভিতর থেকে গম্ভীর গলা এল, কে ?

আমি দীননাথ ।

শ্রীনাথ দরজায় এসে দাঁড়াল । খালি গা, পরনে একটা সবুজ লুঙ্গি । টকটক করছে ফর্সা রং । চুলগুলো এলোমেলো । চোখের নীচে একটু বসা ভাব, একটু কালচেও । ঠোঁট দুটো কেমন যেন ঢিলে হয়ে ফাঁক হয়ে আছে । শরীরের বাঁধুনি নেই । একসময়ে খুবই সুপুরুষ ছিল শ্রীনাথ । এখনো আছে । বোধহয় এখন একটু বয়সের ছাপই পড়েছে চেহারায় ।

শ্রীনাথ একটু অবাক এবং বিরক্ত হয়েছে । বলল, আপনি একা একা এতদূর এলেন কেন ?

দীননাথ অপ্রতিভ হয়ে হাসলেন । বললেন, আজকাল একটু হাঁটতে-টাটতে পারি । বউমার কাছে এসে বেশ ভাল আছি । কত সেবা-যত্ন ।

বলে বড় বড় চোখ করে ছেলের দিকে চাইলেন দীননাথ । কিন্তু শ্রীনাথ খুশি হয়েছে বলে মনে হল না । বরং বিরক্তিতা স্পষ্ট প্রকাশ পেল । বলল, তবু একা একা এতদূরে এসে ভাল করেননি ।

দীননাথ স্নান হয়ে বললেন, ভাবলাম অনেকদিন তোমার সঙ্গে দেখা হয় না । তুমি তো রাত করে ফেরো, আমি তখন ঘুমিয়ে পড়ি ।

বিরক্ত শ্রীনাথ বলল, দেখা করার কি আছে ?

তোমার শরীরটা কি ভাল নেই ? আজ তাড়াতাড়ি ফিরলে যে ।

না, শরীর ভালই আছে ।

দীননাথ ঘরে ঢুকতে সাহস পেলেন না । অনেকটা হেঁটে এসে একটু কাহিলও হয়ে পড়েছেন । লাঠিটা পাশে রেখে বড় একটা শ্বাস ছেড়ে ছেলের মন রাখার জন্য বললেন, অফিসে নাকি তোমার খুব নামডাক । খাটুনিও তাই বোধ হয় বেশী । নামডাক হলেই খাটুনি বাড়ে ।

শ্রীনাথ ঠোঁট ফাঁক করে অসহায় বিরক্তির নিয়ে বাবার দিকে চেয়ে থাকে কিছুক্ষণ । তারপর বলে, চলুন আপনাকে রেখে আসি ।

তোমাকে যেতে হবে না । আমি একাই পারব । একটু দমটা নিয়ে নিই ।

অনিচ্ছের গলায় তখন শ্রীনাথ বলে, শানে বসছেন কেন ? দাঁড়ান চেয়ার এনে দিই ।

হাত তুলে দীননাথ বলেন, তার দরকার নেই । এই ভাল । বলছিলাম কি বউমার ব্যবস্থা তো খুবই সুন্দর, চারদিকে লক্ষ্মী শ্রী । একটু আগে বসে বসে ভাবছিলাম, এই জায়গায় তোমরা তিন ভাই যদি একসঙ্গে থাকতে পারতে !

শ্রীনাথ কথাটার জবাব দিল না । তবে অনেকটা দূরত্ব রেখে সেও বারান্দার শানে বসল উবু হয়ে ।

দীননাথ আপন মনেই বললেন, এখানে হাঁস, মুগী, গরু, ছাগল, সজ্জী কত কি ! অপরিপূর্ণ । বুলুটার কথা ভাবি । বড় কষ্টে আছে । সবাই মিলেমিশে থাকলে কারো তেমন কষ্ট থাকবে না ।

শ্রীনাথ গম্ভীর হয়ে জিজ্ঞেস করে, বুলুর কষ্ট কিসের ?

সংসারে বড় অভাব । আমি তো ওদের সংসারে কম দিন থেকে আসিনি ।

অভাব হওয়ার তো কথা নয় । বুলু যা মাইনে পায় ওদের দুজনের ভালভাবে চলবার কথা ।

তবে চলে না কেন ?

কঞ্জুষদের ওরকমই হয় । ওটা অভাব নয়, স্বভাব ।

বলু যে একটু কপণ তা দীননাথ জানেন। তবু কথাটা স্বীকার না করে মাথা নেড়ে বললেন, মিতব্যয়ী আর কি। তবে প্রয়োজন বুঝে খরচ করতে পিছোয় না।

শ্রীনাথ অন্যমনস্ক হয়ে দুবের দিকে চেয়ে ছিল। বলল, কষ্ট তো আমারও কিছু কম যায়নি একসময়ে। তখন বলু কদিন খোঁজ করেছে?

দীননাথ আবার অপ্রতিভ হয়ে বললেন, ও খোঁজ করে কি কববে? ওর নিজেরই চলে না।

এ কথায় শ্রীনাথের মুখ বিকৃত হয়ে যায়। তীব্র বিরক্তির গলায় বলে, বলুকে আপনি খুবই স্নেহ করেন, সেটা ভাল কথা। কিন্তু আপনার যে আরো দুটি ছেলে আছে সে কথাটা ভুলে যান কেন? এত একচোখোমি মোটেই ভাল নয়।

দীননাথ এ কথায় একেবারে বেহাল হয়ে গেলেন। খানিকক্ষণ চুপ করে বসে নিজের ঠোঁটে জিভ বুলিয়ে নিলেন। তারপর বললেন, কথাটা ঠিক তা নয়। বলুর কাছেই ছিলাম তো, তোমরা কেউ খোঁজ নিতে না।

বাজে কথা। শ্রীনাথ ধমক দিয়ে বলে, আমরা সবসময়েই আপনাব খোঁজ নিতাম, টাকাও পাঠানো হত।

সে সবই শুনেছি।

তবে বলছেন কেন? বলে কিছুক্ষণ আক্রোশভরে দীননাথের দিকে চেয়ে রইল শ্রীনাথ। তাবপব হঠাৎ তার চোখ উদাস হয়ে গেল। মুখটা লাল হয়ে উঠেছিল, আন্তে আন্তে বিবর্ণ হয়ে গেল। খুবই উদাস গলায় বলল, বলু বা দীপু যদি এখানে এসে থাকতে চায় অনায়াসেই থাকতে পারে। আমি বলার কে? এ সম্পত্তি কার তা কি আপন জানেন না?

কেন, মল্লিনাথের।

শ্রীনাথ মৃদু স্নান হাসি হাসল। বলল, আপনার ভীমরতি ধরেছে। এ সম্পত্তি আপনার বউমার।

দীননাথ তাতে হটে গেলেন না। দৃঢ় প্রত্যয়ের সঙ্গে বললেন, বউমার মানেই তো তোমার। স্ত্রী ধনে স্বামীব পুরো অধিকার। তাছাড়া স্ত্রীলোকের আবার আলাদা সম্পত্তি হয় নাকি? আমি যদি একটা বাড়ি করতাম তবে তোমার মায়েব নামেই করতাম। সবাই আজকাল তাই করে।

শ্রীনাথ মাথা নেড়ে বলে, অন্য কি করে তা দিয়ে আমার কি? আপনার বউমার সম্পত্তিকে আমি নিজের সম্পত্তি বলে মনে করি না।

দীননাথ একটু অবাক হয়ে বলেন, বউমা তো চমৎকার মেয়ে। আমার জন্য ছাগল পর্যন্ত কিনেছে। তোমার সঙ্গে তার বনিবনা হয় না কেন?

শ্রীনাথ বাবার দিকে অবাক হয়ে তাকাল। বলল, ছাগল কিনেছে?

শুধু তাই? দুবেলা ডাক্তার আসছে। চমৎকার সব খাওয়াদাওয়া। আমার তো দশ বছর বয়স কমে গেছে।

শ্রীনাথ চুপ করে রইল।

দীননাথ বললেন, তুমি বরং বউমাকে একটু বলে দেখ। তুমি বললে বউমা দীপু আর বলুকে এখানে আনতে অস্বাজি হবে না।

আপনার বউমা আমার কথায় চলেন না। আপনিই বলুন, তবে এটা জেনে রাখবেন, এ সম্পত্তিতে আমার অধিকার নেই। আমি অধিকার ফলাতেও চাই না।

বড় ভাইয়ের সম্পত্তিতে সকলের অধিকার আছে। মেয়েমানুষ যত ভালই হোক তাকে

মাথায় উঠতে দিতে নেই ।

বিরক্ত হয়ে শ্রীনাথ বলে, যা বোঝেন না তা নিয়ে কথা বলেন কেন ? বউমা আপনার সেবা-যত্ন করছে, সে খুব ভাল কথা । আরামে থাকুন । খামোখা সংসারের পলিটিকসে মাথা দিতে যাবেন না । তাহলে আর বেশী দিন আরামে থাকতে হবে না । আপনার ভালর জন্যই বলছি । এখন আপনি যান, আমার কাজ আছে ।

দীননাথ স্নানমুখে উঠে পড়েন । তিন ছেলে এক জায়গায় থাকবে, তার এই স্বপ্নটা হয়তো কোনোদিন সত্য হবে না । ছেলেদের মধ্যে মিল নেই । তবু বউমাকে একবার বলে দেখবেন । বউমা বিবেচক ।

গাছপালার ফাঁক-ফোঁকর দিয়ে ধীরে ধীরে দীননাথ চলে যাচ্ছেন, এই দৃশ্যটা খানিকক্ষণ দাঁড়িয়ে বসে দেখল শ্রীনাথ । তারপর ঘরে এসে হেলানো চেয়ারটায় বসল । জীবনে কোথাও কোনো শান্তি নেই । মদ মেয়েমানুষ রেস খেলা কিছুতেই সে কোনো আনন্দ পায় না আজকাল । মনটা বিষাক্ত, বিরক্ত, ক্ষিপ্ত । মাথার মধ্যে পাগল-পাগল ভাব ।

বহুক্ষণ চোখ বুজে ভিতরকার যন্ত্রণাটা অনুভব করে শ্রীনাথ । ভিতরে যেন একটা অর্থহীন পাগল কারখানা চলছে । বিপুল রোলার, পিনিয়ন শ্যাফট চলছে ঘুরছে শব্দ করছে, কিন্তু কিছুই তৈরি হচ্ছে না । একা হলেই নিজের ভিতরে এই পাগলা কারখানার কাণ্ড টের পায় সে । বহুকাল হল সে কোনো সং চিন্তা করে না, সৌন্দর্য উপভোগ করে না ।

খুব তলিয়ে ভাবলে অবশ্য একটা কথা স্বীকার করতে হয় । এই যন্ত্রণাটাকে সে উপভোগ করে । এই বিষ থেকেই একটা নেশার আমেজ উঠে এসে তার মন আর মগজকে আচ্ছন্ন করে রাখে । একরকমের মৌতাত । তখন সে বাইরের পৃথিবীর কিছুই লক্ষ করে না, আপনমনে বিড় বিড় করে নানা কথা বলতে থাকে । কান পেতে শুনলে শোনে, বিড় বিড় করে সে যা বলে স্নেগুলো কুৎসিত অশ্লীল সব গালাগাল এবং আক্রোশের কথা । আর তাব সমস্ত আক্রোশ ক্রমে ক্রমে জড়ো হয়েছে এক জায়গায় । সেই জায়গাটার নাম তৃষা । তাই চোখ বুজলেই সে তৃষাকেই দেখতে পায় ।

বাবা ! আচমকা ডাকে খুব চমকে উঠল সে ।

কে রে ?

আমি । আমি স্বপ্না । বলে স্বপ্নলেখা ঘরে আসে ।

কত লম্বা হয়েছে স্বপ্না । বহুকাল বাদে দেখল নাকি নিজের ছোটো মেয়েটাকে । মুখের আদলটাও একটু বদলে গেছে । নিজের মুখের সুস্পষ্ট ছাপ মেয়ের মুখে দেখতে পায় শ্রীনাথ । এ মেয়ে দিনেকালে চিত্রার মতোই সুন্দর হবে ।

মেয়েকে দেখে মনটা সামান্য নরম হল । গলার তেতো ভাব যতদূর সম্ভব কমিয়ে রেখে আস্তে করে জিজ্ঞেস করল, কি চাস ?

স্বপ্না একটু তন্ত । খুব ব্যস্ত জরুরী গলায় বলে, ভাইয়ের মাথা ফেটে গেছে । তোমার ওষুধের বাস্কটো নিয়ে একবার আসবে ?

মাথা ফেটে গেছে ? কিভাবে ? বলে হিম হয়ে থাকে শ্রীনাথ । রক্ত সে একদম সইতে পারে না ।

বেজী নিয়ে খেলা দেখাচ্ছিল পাঠশালার মাঠে । বেজীটা পালিয়ে যাচ্ছিল, ভাই তাড়া করতে গিয়ে হৌচট খেয়ে পড়ে ইঁটে মাথা লেগে কেটে গেছে ।

জোর মা কোথায় ?

মা বাড়ি নেই। ছোটো মামাকে সঙ্গে নিয়ে কলকাতায় গেছে সেই দুপুরবেলায়। ফিরতে রাত হবে। পিসেমশাইকে দেখতে যাবে বলে গেছে।

তৃষাকে ঘৃণা করলেও শ্রীনাথ জানে এ সব অবস্থায় তৃষাই সবচেয়ে উপযুক্ত লোক। তার রক্ত সাপের মতো ঠাণ্ডা, কোনো বিপদে কখনো ঘাবড়ায় না।

আঁকুপাকু করে শ্রীনাথ উঠল, বলল, খুব রক্ত পড়ছে নাকি ?

খুব। ভেসে যাচ্ছে।

জ্ঞান ফিরেছে ?

জ্ঞান ফিরবে কি ? অজ্ঞান তো হয়নি ? বরং হাসছে হি হি করে।

হাসছে ?

ভাইকে তো চেনো না। গেছো বৌদর একটা।

হাসছে শুনে খানিকটা ধাতস্ত হল শ্রীনাথ। একটা ফাস্ট এইড বক্স বহুকাল ধরে এই ঘরে রাখা আছে। দাদা মল্লিনাথই কিনে রেখেছিল। ডেসকের লকার থেকে সেটা বের করে খুলে দেখল, ব্যাভেজ, কার্চি থেকে ওষুধপত্র সব সাজিয়ে রাখা। দেখলেই কেমন লাগে। কেবল রক্ত, ক্ষত, যন্ত্রণার কাতর শব্দ মনে পড়ে। এইজন্যই না সে প্রীতমকে এতকাল দেখতে যায়নি।

বাক্সটা নিয়ে উঠল শ্রীনাথ, চল দেখি।

মায়াবশে স্বপ্না বলে, তোমাকে যেতে হবে না। বাক্সটা দাও।

পাববি ?

ওমা, আমি তো ফাস্ট এইড জানি। মার ঘর তালাবন্ধ নইলে ওঘরেও ফাস্ট এইড বক্স ছিল। বলে স্বপ্না বাক্স নিয়ে চলে গেল।

শ্রীনাথ বসে পড়ে। কিন্তু নিজের ভিতর এক অস্থিরতা বোধ করতে থাকে। একবার যাওয়া দরকার। তবে একটু পরে। আগে ওরা রক্ত-টক্ত মুছে ব্যাভেজটা বেঁধে ফেলুক।

ভিতরের কারখানাটা আবার ভীমবেগে চলতে শুরু করে। শ্রীনাথ বিড় বিড় করতে থাকে, মাগী ! হারামজাদি। শুয়োরের বাচ্চা।

সন্ধে হয়ে আসতে শ্রীনাথ উঠে পড়ল। জামা-কাপড় পরে ভিতরবাড়িতে এসে সজলকে দেখল। ব্যাভেজ বাঁধা মাথা নিয়ে শুয়ে শুয়েই মেকানো নিয়ে খেলছে। দেখেই বলল, বাবা দেখ, ঠিক হাওড়ার ব্রিজ হয়নি ?

শ্রীনাথ আড়চোখে লোহার ছোটো ছোটো পাতে নাটবল্টু দিয়ে এঁটে তৈরি করা ব্রিজটা দেখে বলল, অনেকটা।

এই সেটটা দিয়ে ক্যান্টিলিভার ব্রিজ হয় না। তুমি আমাকে একটা বড় মেকানো কিনে দেবে ?

দেওয়া যাবে।

আজই।

আজ কি করে হবে ? ওসব তো কলকাতা ছাড়া পাওয়া যায় না।

তুমি কলকাতায় যাচ্ছে তো।

না। এখানেই একটু ঘুরে আসতে যাচ্ছি।

আমি যাবো ?

আজ নয়। সদ্য একটা ব্যথা পেয়েছো।

ব্যথা লাগেনি।

তোমার এ টি এস নেওয়া আছে ?

হ্যাঁ ।

তবু আজ আর না বেরোলেই ভাল ।

তাহলে কি আনবে ?

কি চাও ?

কিছুমিছু এনো । বলে সজল হি হি করে হাসে ।

হাসছো কেন ?

কিছুমিছুর গল্পটা জানো না বাবা ?

না ।

নিতাইদা জানে । সওদাগর বাণিজ্যে যাচ্ছিল, সবাই সবকিছু আনতে বলল, শুধু ছোটো বউ বলল, কিছুমিছু এনো ।

সজল গল্প শুরু করছে দেখে শ্রীনাথ তাড়াতাড়ি বলে, গল্প পরে শুনব বাবা । তুমি এখন ঘুমোও ।

সন্ধেবেলা কি ঘুম আসে ? এখুনি মাস্টারমশাই আসবে যে ।

আজ পড়বে ?

পড়ব । আমার কিছু হয়নি ।

চিন্তাশ্রিত মুখে শ্রীনাথ ছেলের দিকে কিছুক্ষণ চেয়ে থাকে । তারপর বলে, তাহলে পোড়ো ।

উঠে পড়ি বাবা ?

উঠবে ? বলে আবার ভাবে শ্রীনাথ ।

তুমি দিদিদের ডেকে বলে দাও যে, আমাকে ওঠার পারমিশন দিয়েছে । নইলে ওরা আমাকে জোর করে শুইয়ে রাখবে ।

শ্রীনাথ ষড়যন্ত্রটা বুঝতে পারল । তবু ঘাড় নেড়ে বলল, ঠিক আছে ।

তাহলে উঠি ?

শরীর ভাল লাগলে ওঠো ।

সজল উঠেই পড়েছিল । এখন এক লাফে বিছানা থেকে নেমে পড়ল । ‘হো হো হো’ বলে দুহাত ওপরে তুলে টেঁচাতে টেঁচাতে ঘর থেকে বের হয়ে গেল এক ছুটে ।

শ্রীনাথ বেরিয়ে এসে দেখে স্বপ্না কোথা থেকে এসে সজলকে পাকড়াও করে ধমকাচ্ছে, শীগগীর গিয়ে শুয়ে থাক । নইলে মা এলে বলে দেবো ।

শ্রীনাথ গম্ভীর গলায় বলল, ওর তেমন কিছু হয়নি । ছেড়ে দে । বসে বইটাই পড়ুক, মন ভাল থাকবে ।

শ্রীনাথ বাড়ি থেকে বেরিয়ে পড়ল । হাতে টর্চ । রামলাখনের ঘরে ফুর্তির আসরটা কি রকম তা একবার দেখে আসবে আজ । খুবই নোংরা অস্বাস্থ্যকর নিশ্চয়ই । তবে শ্রীনাথের আজকাল বাছাবাছির মন নেই । তাছাড়া এখানকার বদমাশ শয়তানগুলোর সঙ্গে একটু মেলামেশা করা বড় দরকার ।

শ্রীনাথ বাড়ির ফটক পেরিয়ে রাস্তায় পা দিয়ে চারপাশ লক্ষ করল। দুচারজন যাতায়াত করছে, কিন্তু চেনা মুখ নজরে পড়ল না। ধীরেসুস্থে স্টেশনের দিকে হাঁটতে থাকে সে। সামনেই একটা তেমাথার মোড়। আর মোড় মানেই কিছু পানবিড়ি বা মুদির দোকান। কিছু লোক সমাগম। এখানে দুচারটে চেনা মুখ নজরে পড়ল বটে, কিন্তু এদের সঙ্গে কথাবার্তার সম্পর্ক বড় একটা নেই শ্রীনাথের। রাস্তায় ঘাটে প্রায়ই দেখে এই যা। তবে হরিশ কম্পাউন্ডার ধীরে ধীরে সাবধানে সাইকেল চালিয়ে মোড় পেরিয়ে বাজারের দিকে যাচ্ছিল। হরিশের সঙ্গেও ঘনিষ্ঠতা নেই, তবে কথাবার্তা হয়। শ্রীনাথ হাঁক মারল, হরিশবাবু যে !

হরিশ সাইকেলের ব্রেক চেপে ধরেও ঘুষটাতে ঘুষটাতে খানিক দূর চলে গিয়ে নামল। এ অঞ্চলে শ্রীনাথবাবু মানী লোক। তিনি ডাকলে থামতেই হয়, পথ-চলতি জবাব দিয়ে চলে যাওয়া যায় না।

হরিশ একগাল হেসে বলে, ভাল আছেন তো শ্রীনাথদা ?

থারাপ কি ? আপনাকে বহুকাল দেখি না।

দেখবেন কি করে, আপনারা কাজের লোক, ব্যস্ত থাকেন।

আমার আর কাজ কি ? বসে বসে খাচ্ছি। বলে শ্রীনাথ একটু শ্লেষের হাসি হাসে।

হরিশের সাইকেলের হ্যান্ডলে একটা ন্যাকড়ার ব্যাগ ঝুলছে। বোধ হয় বাজার করে ফিরবে সেই রাত্রিবেলা। কম্পাউন্ডার হলেও বোধ হয় হরিশের সংসার বেশ সুখেরই। মুখে-চোখে সংসারী মানুষের স্বাভাবিক দৃষ্টিভঙ্গির ছাপ আছে, চেহারাটাও গরীবদের মতো নীরস। বোধ হয় দিন দুয়েক দাড়ি কামায়নি। অল্পে বুড়িয়ে যাওয়ার ভাব। নিতান্তই সস্তা হ্যান্ডলুমের ময়লা গেরুয়া পাঞ্জাবি আর মোটা ধুতির পোশাক। পায়ে হাওয়াইজোড়ার সোল কাগজের মতো পাতলা। তবু লোকটাকে অসুখী মনে হয় না শ্রীনাথের। একহাতে সাইকেলটা ধরে রেখে অন্য হাতে মাথা চুলকোতে চুলকোতে কৃতার্থ হয়ে যাওয়ার হাসি হেসে বলে, বসে বসে খেলেও কি আর বড়লোকদের কাজের অভাব হয় ?

আমি বড়লোক কিসের ? সবাই জানে, সম্পত্তি সজলের মায়ের।

ঐ হল। আপনার যে কেমন সব কথা !

কথাটা শুনতে খাবাপ বলেই কি আর মিথ্যে ? আমি বড়লোক-টড়লোক নই বাপু।

হরিশ বোধ হয় এসব কথায় থাকতে চায় না। অন্য কথায় যাওয়ার জন্যই বলল, আজ যে বড় বেলাবেলি দেখছি। এত সকালে তো ফেরেন না।

আজ ফিরেছি। ভাবলাম, রোজ তো কলকাতায় ফুটি করিই, আজ এখানকার রসের হাটটা একটু দেখে আসি।

হরিশ একটু ঘাবড়ে গেল এ কথায়। বলল, তা বেশ তো। ভাল কথা।

শ্রীনাথ কূটচোখে হরিশকে নজর করছিল। একে দিয়ে কাজটা হলেও হতে পারে। তাই সে গলাটা একটু নামিয়ে বলল, রামলাখনের ঝোপড়ায় কেমন ব্যবস্থা জানেন ?

হরিশ খতমত খেয়ে বলে, রামলাখন ? মানে লাইনের ওপাশে ?

হ্যাঁ। শুনেছি নাকি খুব জমে সেখানে।

হরিশ বিষম মুখে বলল, জানি না।

বেশ গলা তুলে মোড়ের প্রায় সবাইকে শুনিয়ে বলল, আজ রামলাখনের ঘরেই ফুটি

করতে যাচ্ছি।

হরিশ একথার জবাব না দিয়ে এবং কথাটা যেন শোনেনি এমন ভাবখানা করে তাড়াতাড়ি বলল, যাই তাহলে, দেবী হয়ে যাচ্ছে।

বলেই সাইকেলটা একটু ঠেলে গুপ্ত করে লাফিয়ে উঠে বসল।

শ্রীনাথ একটু চেয়ে রইল চলন্ত সাইকেলটার দিকে। আশা করা যায়, আজ বা কালকের মধ্যেই সারা বাজারে কথাটা ছড়িয়ে পড়বে। ভেবে আপনমনে এক বিষাক্ত আনন্দের হ্বাসি হাসল শ্রীনাথ। ছড়াক, অনেকদূর পর্যন্ত ছড়াক।

মোড় ছাড়াতেই যতীনবাবুর সঙ্গে দেখা। বছরখানেক আগে হাইস্কুলের অ্যাসিস্ট্যান্ট হেড মাস্টার হিসেবে রিটায়ার করেছেন। এখন দুবেলা টিউশনি করেন আর অবসর সময় কাটে বছর তিনেকের নাটনীটিকে নিয়ে। আজও নাটনী নিয়ে বেড়াতে বেরিয়েছেন। যতীনবাবুরও ভারী গাছপালার শখ। তবে পয়সার অভাবে বিরল জাতের দামী গাছ লাগাতে পারেন না। আজ দেখা হতেই বললেন, দেওঘর থেকে গোলাপ আনিয়েছেন শুনলাম। আমাদের একটা কলম দেবেন?

আর ক'দিন যাক। গাছ এখনো মাটির সঙ্গে কথা কইছে।

সে তো জানি। গাছ বড় হোক, আমার কথাটা যেন মনে থাকে।

থাকবে। আপনি নতুন কি লাগালেন?

এ সিঁজনে আর কি হবে। মল্লিকা লাগিয়েছিলাম, খুব ফুল হচ্ছে। আপনার কথামতো কেমিক্যাল সার একদম বাদ দিয়ে দিয়েছি।

ভাল করেছেন। বেশীদিন কেমিক্যাল সার দিলে মাটি জমে পাথর হয়ে যাবে। দুনিয়াটার যে কী সর্বনাশই করছে মানুষ কেমিক্যাল সার দিয়ে। বুঝবে একদিন। দরদী লোক পেয়ে কথাটা আবেগ দিয়ে বলল শ্রীনাথ।

যতীনবাবুর বাচ্চা নাটনীটা খুঁত খুঁত করছে। দাদুর এই দাঁড়িয়ে দাঁড়িয়ে কথা বলাটা তার বিশেষ পছন্দ নয়। যতীনবাবু নাটনীকে কোলে তুলে নিয়ে বললেন, ক'দিন ধরেই যাবো-যাবো ভাবছিলাম। কিন্তু আপনাকে তো বাড়ি গিয়ে পাওয়া যায় না। আজ ভাগ্যে দেখা হয়ে গেল।

সকালের দিকটায় থাকি।

আজ ছুটি নাকি?

না। তাড়াতাড়ি ফিরে এসেছি। বলে একটু ইতস্তত করল শ্রীনাথ। যারা গাছ ভালবাসে তাদের দুঃখ দিতে তার প্রাণ চায় না। কিন্তু মনে এত বিষজ্বালা যে, সব সৎ ও অসতের বোধ একাকার হয়ে গেছে। তাই শ্রীনাথ দ্বিধা বেড়ে বেশ স্পষ্ট করে বলল, যাচ্ছি একটু রামলাখনের ঘরে ফুটি করতে।

যতীনবাবু কথাটা ঠিক বুঝতে পারেননি। বললেন, রামলাখন? সেটা আবার কি?

ঐ লাইনের ওপাশে তার ঘোপড়ায় দেশী মদ বিক্রি হয়। আরও সব ব্যাপার আছে।

যতীনবাবু হাঁ হয়ে গেলেন। এমনভাবে তাকালেন যেন শ্রীনাথের মাথা খারাপ হয়েছে কিনা তা বুঝতে পারছেন না। দৃশ্যটা করুণ এবং শ্রীনাথের একটু কষ্টও হল। কিন্তু এরকমভাবে কথাটা না ছড়ালেও তার উপায় নেই। এ তার লড়াই।

যতীনবাবু ভীষণ গম্ভীর হয়ে গেলেন। নাটনীকে আর একটু বৃকে চেপে ধরে ভূটা কুঁচকে বললেন, যান। বড়লোকদের সবই মানায়।

আমি বড়লোক নই, তবে ফুটিবাজ বটে। বড়লোক হচ্ছে সজলের মা। আমি কে?

যতীনবাবু গলা খাঁকারি দিয়ে বিরক্তি প্রকাশ করলেন। তারপর বললেন, ওসব ভদ্রলোকের জায়গা নয়।

বেশ রেলার সঙ্গেই শ্রীনাথ বলল, ভদ্রতার মুখে পেছাপ।

এই কথাটাই যতীনবাবুকে ধাক্কা দিয়ে সচল করে দিল। নাতনী নিয়ে বেশ পা চালিয়ে চলে গেলেন।

মোড়ে দাঁড়িয়ে একা একা হাসল শ্রীনাথ। কাজ হচ্ছে। কাজ হচ্ছে।

চোটে হেঁটে শ্রীনাথ স্টেশনের বিপরীত গঞ্জে পৌঁছে গেল সন্দের ঘোর-ঘোর আঁধারে। রামলাখনের ঝোপড়াটা সে কয়েকদিন হল চিনে রেখেছে দূর থেকে। কাজেই খুঁজতে হল না।

তবে রামলাখনের আড্ডাটা নিতান্তই ছোটোলোকদের জন্য। উঠোনে গোটা চারেক ছাগল বাঁধা অবস্থায় মিহিন স্বরে ডাকছে মাঝে মাঝে। দড়ির জালে ঘেরা বারান্দার একধারে মুগীর পাল ডানা ঝাপটাচ্ছে। ছাগলের বোটিকা গন্ধের সঙ্গে মুগীর চামসে গন্ধ মিশে বাতাস দূষিত।

উঠানের দু পাশে দুটো খোড়ো ঘর। মাটির ভিত। সর্বত্রই নোংরা ময়লা আর দীনদরিদ্র হাড়হাভাতে ভাব। কোনোকালেই এরকম কুৎসিত জায়গায় পা দেয়নি শ্রীনাথ। এখানে ফুটির প্রলম্ব ওঠে না। বরং বমি আসছে।

তবু এ তো তার লড়াই।

রামলাখনকে চাক্ষুষ চেনে কিনা তা সে নিজেও জানে না। দেখলে হয়তো মুখটা চেনা বলেই জানতে পারবে। তবে সে না চিনলেও এ তল্লাটে তাকে সবাই চেনে। তাই বাবান্দায় উঠে গম্ভীর গলায় হাঁক মারল, রামলাখন!

ঘরের ভিতর থেকে সৌদা টকচা বিচ্ছিরি গন্ধ আসছে। সম্ভবত পচাই বা তাড়ি, বা দুটোই। এসব কখনো খায়নি শ্রীনাথ। খেতে পারবে বলেও মনে হয় না। গঞ্জে গা গুলোচ্ছে।

খুব নীচু আধমানুষ সমান একটা দরজা সামনে। কুঁজো হয়ে সাযোয়ান একটা লোক উঁকি মেরে খুব ভুকুটি করে তার দিকে চাইল।

শ্রীনাথ উঁচু গলায় বলে, তুমি রামলাখন?

রামলাখন সন্দের ঘোর ঘোর অন্ধকারে বোধ হয় ভাল দেখতে পায় না। ফের ঘরে ঢুকে একটা হ্যারিকেন হাতে উঁকি দিয়ে দেখে নিল। তারপর পরিষ্কার বাংলায় বলল, কি চাই বাবু?

শ্রীনাথ হেসে বলল, দূর ব্যাটা। তোর এখানে লোকে আবার কি চাইবে? ফুটি করতে চাই।

লোকটা হাঁ করে আছে। হ্যারিকেনের আলোতেও তার চোখে আতঙ্ক দেখতে পায় শ্রীনাথ। বোধ হয় তার মতো বিশিষ্ট লোক এখানে আসায় ভড়কে গেছে।

শ্রীনাথ গলা মোলায়েম করে বলে, ভাল মালটাল রাখিস? না কি শুধু পচাই আর তাড়ি?

লোকটা জবাব দিচ্ছিল না। ঘরের ভিতরে বোধ হয় দু-চারজন গুন গুন করে কথা বলছিল, সেসব কথাবার্তা থেমে গেছে। লোকটার মুখের ভাব আর চারদিককার আবহাওয়ায় কেমন অস্বস্তি হচ্ছিল শ্রীনাথের। সে রামলাখনকে নিশ্চিত করার জন্য বলল, আরে ভয় নেই, পুলিশের লোক নই। আমাকে চিনিস না? আমি চাটুজে বাড়ির বাবু।

এবার লোকটা চেরা গলায় এক কথায় বলল, চিনি।

তবে হাঁ করে আছিস কেন ?

লোকটা একটু যেন বিরক্ত গলায় বলল, যা হবার তা তো হয়ে গেছে। আবার কি অন্যায়টা হল ?

কথাটার কোনো মানেই বুঝল না শ্রীনাথ। বলল, দূর ব্যাটা, নিজেই এক পেট গিলে বসে আছিস নাকি ? কী হয়েছে ? কিসের কথা বলছিস ?

লোকটা কথা কানে না তুলে বলল, সাচ বাত বলে দিই বাবু, নিতাই শালা বহুৎ হারামি। অনেকদিন আমার বেজীটা চুরি করার মতলবে ছিল। লাইনের এধারে শালাকে পেলে ছাড়ব না।

শ্রীনাথ বুঝল, নিতাই একটা কিছু করেছে। তা সে নিতাই সবসময়েই করে। চুরি তার হাতের পাঁচ। মাঝে মাঝে বিরক্ত হয়ে শ্রীনাথ ভাবে, নিতাইকে তাড়িয়ে দেবে। আবার মনে হয়, সেই দাদার আমল থেকে আছে, পাগলছাগল লোক। আছে থাক। কত সময়ে কাজেও লেগে যায়।

শ্রীনাথ জিপ্তেস করল, কেন, নিতাই কি করেছে ?

আপনি জানেন না বাবু ?

বললে তো জানব ! আমি কি নিতাইয়ের খবর নিয়ে বেড়াই নাকি ?

আপনার শালা সরিৎবাবু আমাকে বাজার থেকে মাঝে মাঝে মারতে সকলের সামনে দিয়ে আপনাদের বাড়িতে নিয়ে গেল। বলল, বের কর তোর বেজী, নইলে জান নিয়ে নিব। বলুন, কাজটা জুলুম নয় ? নিতাই বেজী চুরি করেছে সবাই জানে। আর চোরাই মাল ঘরে রাখার মতো বুরবক তো নিতাই নয়। ঝুটমুট আমার হয়রানি।

সরিৎ তোমাকে মেরেছে ? কবে বলো তো ?

আজ দুপুরবেলা।

শ্রীনাথ কি বলবে ভেবে পেল না। তবে রাগে তার গা জ্বলতে লাগল। সরিৎ যে ভদ্রলোকের মতো মানুষ হয়নি সেটা শ্রীনাথ জানে। কিন্তু এটা বড্ড বেশী বুক চিতিয়ে চলা। এটাকে বাড়তে দিলে অনেকদূর গড়াবে। একা তৃষাতেই রক্ষা নেই, তার ওপর আবার সরিৎ।

শ্রীনাথ একটা ধমক দিয়ে বলল, তা তোকে মারল আর তুইও মার খেলি ! এত বড় গতরটা কি ভেড়ার গতর নাকি ? উন্টে দু ঘা দিলি না কেন ?

আই বাবা, বাবুলোকদের গায়ে হাত তুললে পুলিশ জান কয়লা করে দেবে। আমরা তৃষা বউদির সঙ্গেও কাজিয়া করতে চাই না। কিন্তু নিতাই শালা কে বলুন ! ওকে খাতির করব কেন ?

কথা বারান্দায় দাঁড়িয়েই হচ্ছে। ভারী মশার উৎপাত। দাঁড়ানো অবস্থাতেই শ্রীনাথের ধূতি পরা পায়ের পিছনে গোটা পাঁচ-সাত কামড়াল। সে নীচু হয়ে পা চুলকোতে চুলকোতে বলল, ঠিক আছে, ব্যবস্থা হবে। এখন ঢুকতে দে বাবা। মালটাল বের কর কী আছে।

লোকটা অপ্রস্তুত হয়ে বলে, এই ঘরে সব বস্তির লোক বসে। ঐদিকের ঘরে চলুন, আলাদা ব্যবস্থা করে দিচ্ছি।

দূর ব্যাটা ! শ্রীনাথ হাসে, আলাদা মাল খাওয়ায় সুখ কী রে ! সকলের সঙ্গে বসে খেলে তবে না মৌজ। দরজা ছাড় তো বাবা বিভীষণ।

রামলাখন দরজা ছেড়ে ভিতরে ঢুকে যায়। পিছু পিছু শ্রীনাথ।

ঘরটা বেশ বড় মাপের। মেটে ভিটির ওপর দেয়াল ঘেঁষে কয়েকটা কাঠের বেনচ, আর মাঝখানে চাটাই পাতা। খন্দের বেশী এখনো জোটেনি। দু-চারজন রিকশাওয়ালা বা কুলিকাবারি গোছের লোক বসে আছে এদিক ওদিক। জানালা বেশী না থাকায় ঘরের মধ্যে যেমন গুমোট তেমনি গা-গোলানো গন্ধ। অতি জঘন্য পরিবেশ। একটা কালো মোটাসোটা গোছো মেয়েছেলে সার্ব করছে। তার হাতে মোটা রূপোর রুলি, পায়ে মল। মুখখানার কোনো শ্রী নেই। বরং ব্রণ বা ঘামাচি থাকায় মুখের চামড়া অমসৃণ। তবে মেয়েটার একটা প্লাস পয়েন্ট যে, তার বয়স ত্রিশের নীচেই।

এই মেয়েটাই যদি এখানকার মক্ষীরানী হয়ে থাকে তবে শ্রীনাথ এখানে মেয়েছেলের ব্যাপারটা পেরে উঠবে না।

রামলাখন তাকে একটা কাঠের চেয়ারে বসতে দিয়েছিল। শ্রীনাথ সোজা চাটাইয়ে বসল। রামলাখন বোধ হয় গরম জলে ধুয়ে ভাল একটা গেলাশে তার স্টকের সবচেয়ে সেরা দিশী মদই এনে দিল। তবু খুবই ঘিন ঘিন করছিল শ্রীনাথের। কিন্তু সে জানে মুখে দেওয়ার আগটুকু পর্যন্তই যত ঘেন্না। তাবপর আর ঘেন্নাপিণ্ডি থাকে না, সব অমৃত হয়ে যায়।

মাল খেতে খেতে শ্রীনাথ রামলাখনের সঙ্গে জমিয়ে নিল।

বহু বহুকাল বাদে তৃষা এই ঘরের কাছের কলকাতায় এল।

দুপুরবেলা হাওড়া স্টেশনে নেমেই বুঝেছিল সে অনেকটাই গৈয়ো হয়ে গেছে। শহর দেখলে বুকে চমক লাগে। ভয় ভয় করে। দিশেহারা বোধ হয়।

সরিং বলল, ট্যাকসি নেবো তো!

ট্যাকসি! ট্যাকসি কেন?

তবে কিসে যাব? যা ভীড়।

আমাব পয়সা সস্তা হয়নি। বাসে বা ট্রামে যাবো।

এ কথাও ওপর কথা নেই। তবে সরিং আশা করেছিল, বড়লোক দিদির সঙ্গে একটু আরামে ট্যাকসিতে ঘুরবে। সেটা হল না।

তৃষার তেমন কেনাকাটার বাই নেই। তবে বড়বাজার থেকে কিছু জামাকাপড় না কিনলেই নয়। ত্রয়ীর জন্য পাইকারদের কাছেও যেতে হল। বড়বাজারের পাইকাররা মফঃস্বলের ক্ষুদ্র দোকানদারদের পান্তাই দিতে চায় না। তৃষা এসেছে তাদের কারো কারো সঙ্গে পাকাপাকি ব্যবস্থা করতে। না হোক তৃষার হাতব্যাগে হাজার দশেক টাকা আছে আজ। বাসে যাওয়া কতটা নিরাপদ তা বুঝতে পারছিল না সরিং। শত সতর্ক থাকলেও কলকাতার হস্তশিল্পীদের কাজ খুবই সূক্ষ্ম। মেজদিও তো এখন আর কলকাতার হালচালে রপ্ত নয়। তাই সরিং প্রায় চোখের পাতা ফেলছিল না।

বড়বাজারে কাজ সারতে সারতেই বিকেল হয়ে গেল। অফিস টাইম।

সরিং বলল, ভবানীপুরে কি আজই যাবে?

যেতেই হবে। কেন?

বলছিলাম, অফিস ভাঙল তো, বাসে ওঠা যাবে না।

আমি যাবোই।

সঙ্গে মালপত্র আছে যে!

পাইকারদের সঙ্গে বন্দোবস্তে যাওয়া গেছে বলে তৃষা একটু খুশি। মেয়েছেলে খন্দের

দেখেই হোক বা অন্য কারণেই হোক পাইকাররা তুষার সঙ্গে অন্তত দুর্বাবহারটা করেনি । পাইকার বাছতে ঘোরাঘুরিও কিছু কম হয়নি । তাই সবদিক বিবেচনা করে তুষা বলল, ট্যাকসি ধরতে পারবি ?

দেখি ।

দেখ তাহলে ।

সরিং অবশ্য সহজেই ট্যাকসি পায় । তার কারণ সে সহজাতভাবেই উদ্যোগী লোক । ট্যাকসি ধরতে গিয়ে যদি অন্য কারও সঙ্গে বথেরা লাগে বা ট্যাকসিওয়ালা বেগড়বাই করে তবে সরিং টপ করে হাত চালাচালিতে নেমে যেতে পারে । তাছাড়া নিপাট ভালোমানুষের মতো ট্যাকসিওয়ালা যেদিকে যেতে চায় সেদিককার নাম করেই উঠে বসে তারপর নিজস্ব পথে ঘাড় ধরে নিয়ে যেতে পারে ।

সুতরাং আধঘণ্টার চেষ্টাতেই সরিং ট্যাকসি পেয়ে গেল । ভবানীপুরে যখন পৌঁছোলো তখনো বেলা আছে বেশ ।

একটু বাধা-বাধা লাগছিল তুষার । বহুকাল প্রীতমবাবু বা বিলুর সঙ্গে দেখা হয়নি । এ বাড়িতে আসেওনি তিন চার বছর । বিলুর মেয়ে হয়েছে খবর পেয়েছিল, সেই মেয়েটাকে দেখেনি পর্যন্ত ।

দোতলায় উঠে কলিং বেল টিপতেই অল্পবয়সী একটি মেয়ে দরজা খুলে দিল । ঘরে ঢুকে স্বভাবসিদ্ধ তীক্ষ্ণ নজরে চারদিকটা দেখে নেয় তুষা । প্রথমেই নজরে পড়ে, ঘরে অনেক দামী জিনিস, কিন্তু কোনো যত্ন নেই । বিলু কোনোকালেই সংসারী ছিল না । একটু উড়-উড় উদাসীন মেয়ে । কুমারী অবস্থায় অনেক জল ঘোলা করেছে । তুষা কানাঘুষো শোনে, এখনো নাকি একজন পুরুষবন্ধুর সঙ্গে গোপন সম্পর্ক রাখে ।

তা সে রাখুক গে, কিন্তু সংসারটা গুছিয়ে তুলবে তো ! বাইরের ঘরে সিলিং-এ ঘন কালো ঝুল জমে আছে, চেয়ারে ধুলো, সোফার ঢাকনা নোংরা, টেবিলের ওপর ম্যাগাজিন অগোছালোভাবে ডাঁই করা, মেঝের জুট কার্পেটের ফঁেসো বেরিয়ে আছে, দরজার পর্দায় হাজার রকমের হাতমোছার দাগ ।

তুষা প্রথমে মেয়েটিকেই জিজ্ঞেস করল, তুমি কে ?

এ বাড়িতে বাচ্চা রাখি ।

শুধু বাচ্চা রাখো ?

হ্যাঁ ।

তুষার চেহারায ব্যক্তিত্ব এবং কণ্ঠস্বরের বিরক্তিতে মেয়েটা একটু মিইয়ে গেছে । ঠিক বুঝতে পারছে না, ইনি কে বা কতখানি কর্তৃত্বের অধিকারী ।

তুষা নীরস গলায় বলল, ঘরদোরের দিকে একটু নজর দিতে পারো না ? বিলু বাড়ি আছে ?

না । অফিসে ।

প্রীতমবাবু ?

ভিতরের ঘরে শুয়ে ঘুমোচ্ছেন ।

তাহলে আমরা এঘরেই একটু বসি । তুমি ততক্ষণে একটু চা করে আনো । আর প্রীতমবাবুর ঘুম ভাঙলে বোলো, রতনপুরের বউদি এসেছে ।

আচ্ছা ।

বাচ্চাটা কোথায় ?

বাচ্চাও ঘুমোচ্ছে।

তোমার নাম কি ?

অচলা।

কতদিন কাজ করছ ?

এই তো মাস তিনেক।

চা করতে পারবে তো ?

এবার অচলা হেসে বলে, কেন পারব না ?

না ভাবছিলাম তোমার চা করার কথা হয়তো নয়।

তাতে কি ? একটু বসুন, করে আনছি।

বাড়িতে আর কাজের লোক নেই ?

আছে। বলে অচলা সরিৎকে অপাঙ্গে দেখে নিল। ঘরে ঢুকে অবধি ছেলেটা খুব মন দিয়ে তাকে দেখছে। ক্ষুধার্ত চোখ। যেন পেলেই ছিঁড়ে খায়। নজরটা অবশ্য অচলার খারাপ লাগে না। পুরুষের চোখে নিজের একটা যাচাই হয়। রতনপুরের বউদিকেও তার একনজরেই ভাল লেগে গেছে। আজকালকার ফালতু বউ নয়, ওজন আছে। ঘরের পাখা চালিয়ে দিয়ে অচলা স্মিতমুখে ভিতরে চলে গেল।

প্রচণ্ড ভ্যাপসা গরমে তুষার ব্লাউজ ভিজ়ে গেছে। কিন্তু শরীরের কষ্টকে সে কোনোকালে কষ্ট বলে মানে না। মনের কষ্টও তার নেই, কারণ মন জিনিসটাকে সে মেরে ফেলতে শিখে গেছে।

তুষা পাখার তলায় সোফায় বসল। সরিৎ একটু সন্ত্রমসূচক দূরত্ব রেখে বসল চেয়ারে। সরিৎ জেনে গেছে সে মেজদির যতটা ভাই তার চেয়ে অনেক বেশী কর্মচারী।

একটু বাদেই ট্রেতে চা সাজিয়ে নিয়ে এল অচলা। প্লেটে বিস্কুট আর চানাচুর। বলল, দাদাবাবু জেগেছেন।

আমার কথা বলেছো ?

বলেছি। উনি আসছেন।

আসছেন ! বলে ভূ তোলে তুষা, আসছেন মানে ? শুনেছি, উনি নাকি বিছানা থেকে উঠতে পারেন না !

এখন তো ওঠেন দেখি।

তবু কি দরকার ? চলো, আমরাই ভিতরে যাই। বলে তুষা উঠে পড়ে।

অচলা মৃদু হেসে বলে, চা খেয়ে নিন। আমি ততক্ষণে ভিতরের ঘরটা গুছিয়ে নিচ্ছি। নইলে তো আপনি আবার রাগ করবেন।

একথায় মেয়েটিকে ভাল লেগে গেল তুষার। সে মুখ টিপে একটু হেসে বলল, হ্যাঁ। অগোছালো দেখলে আমার খুব রাগ হয়। ঘরদোরের সিজিল মিছিল থেকে সে ঘরের লোকেরা কেমন তা বোঝা যায়।

তা তো ঠিকই। তবে আমার কাজ শুধু বাচ্চা রাখা। ঘরের কাজের জন্য অন্য লোক আছে।

তা তো থাকবেই। তবে কাজের লোক রাখলেই তো হয় না। লোককে দিয়ে কাজ করিয়ে নিতেও জানা চাই। সেটা সবাই পারে না। তোমার দোষ দিচ্ছি না। তবে বাপু তোমাকেও বলি, এবাড়িতে যখন কাজে ঢুকেছো তখন তুমিও এ বাড়িরই লোক। আপন মনে করে একটু চারদিকে নজর রেখো। শুধু মাইনের কেনা লোক হয়ে থাকলে কোনোদিন

কোথাও ভালবাসা পাবে না ।

এসব কথা অন্যে বললে অচলা হয়তো চটে যেত । সে বহু বাড়িতে বাচ্চা রাখার কাজ করেছে, বহু গিল্মিকে চরিয়ে খেয়েছে । কিন্তু এই বউদির কথাগুলোর মধ্যে এমন একটা জোর আর ভালবাসা আছে যে অচলার রাগ তো হয়ই না, বরং ভক্তি এসে পড়ে । সে শুনেছে রতনপুরের বউদির অনেক সম্পত্তি, অনেক টাকা । কিন্তু দেখে তা মনে হয় না । সাদা খোলের সাধারণ শাড়ি পরা, মুখে রুপটান নেই । কালো হলেও চেহারাখানা কী ! এত সুন্দর যেন অচলা জীবনে দেখেনি । কথা বলার ঢঙটাও এত ভাল যে, বকলেও শুনতে ইচ্ছে করে ।

চা খেতে খেতে তুষা অচলার মুগ্ধ ভাব লক্ষ্য করছিল । সারা জীবনে তুষা এইসব মানুষের ভালবাসা অটল পেয়েছে । এখনো যে সব কাজের লোক তার বাড়িতে আছে তারা এক কথায় তার জন্য প্রাণ দিতে পারে । বৃন্দাকে ডবল মাইনে দিয়ে নিতে চেয়েছিল বাজারের পুরোনো মহাজন পোদ্দাররা । বৃন্দা তো যায়ইনি, তার ওপর ক্যাট ক্যাট করে দু'কথা শুনিয়ে দিয়ে এসেছে । কিন্তু এসব লোকের ভালবাসা পেলেও তার জীবনে কোথাও একটা ভালবাসার অভাবও কি নেই ? তুষা জানে, তার তিন মেয়ে আর ছেলে তাকে ততটা ভালবাসে না যতটা স্বাভাবিক নিয়মে ছেলেমেয়েদের মাকে ভালবাসা উচিত । এই অভাববোধটা এতকাল তাকে কষ্ট দেয়নি । আজকাল মাঝে মাঝে কথাটা মনে হয় । নিজের পরিবারের কারো ভালোবাসাই বোধহয় তুষা কোনোদিন পাবে না । তাকে একমাত্র সত্যিকারের ভালবেসেছিল একজন । সেই তার একমাত্র প্রেমিক, একমাত্র উপাস্য, যার কথা ভাবলে আজও মন স্নিগ্ধ হয়ে যায় । সে মল্লিনাথ ।

বাইরের চেহারা তুষার কোনো ভাবপ্রবণতা নেই, আবেগ নেই, আদিখ্যেতা নেই । তার জীবনে ভালবাসার চর্চাও তেমন কিছু নেই । কিন্তু ভিতরে ঐ একটা জায়গায় সে আজও দুর্বল । রতনপুরের বাড়িতে প্রকাশ্যে জায়গায় মল্লিনাথের কোনো ছবি নেই । বেশী ফটোগ্রাফ মল্লিনাথের ছিলও না । অনেক কুড়িয়ে বাড়িয়ে গোটা দশেক ছবি জোগাড় করতে পেরেছে তুষা । আলাদা একটা অ্যালবামে সেটে সেগুলো নিজস্ব স্টীলের আলমারিতে লুকিয়ে রেখেছে । এখনো মাঝে মাঝে গোপনে বের করে দেখে । যত দিন যাচ্ছে তত ধীরে ধীরে মল্লিনাথের ওপর শ্রদ্ধা বাড়ছে তার ! মৃত ভাসুর মল্লিনাথকে ভালবাসা পাণ কি না কে জানে । তবে এই পাপটুকু তুষা করে যাবে ।

ভিতরের দরজার পর্দা হঠাৎ সরে যেতেই তুষা চায়ের কাপ রেখে উঠে গিয়ে প্রীতমের হাত ধরল, অনেকক্ষণ বাইরের মানুষের মতো বৈঠকখানায় বসে আছি । আর নয়, এবার অন্দরমহলটায় ঢুকতে দিন ।

প্রীতম স্নিগ্ধ হাসিতে মুখ আলো করে বলল, আপনার কথা এত ভাবি কি বলব ! আজকাল সকলের কথা ভাবি ।

যাক, আর বানিয়ে বানিয়ে খোশামোদ করতে হবে না নন্দাইমশাই । চলুন কথা বলি ।

প্রীতমকে তার বিছানায় বসিয়ে পাশে বসে তুষা । বলে, করবে রতনপুর যাবেন বলুন তো । দিন ঠিক করুন, আমি নেওয়াবার ব্যবস্থা করব ।

নিয়ে কি হবে ! আমার যে চিকিৎসা চলছে । গিয়েও তো থাকতে পারব না, বিলু আবার টেনে হিঁচড়ে নিয়ে আসবে ।

আনবেই তো । অসুখ হয় কেন ?

সে কি আমার দোষ ?

সে সব জানি না। অসুখ শীগগীর সারিয়ে ফেলুন।

সারাবার মালিকও কি আমি ?

সব আপনি। মানুষ ইচ্ছে করলে সব পারে।

বউদির যে কেমন সব কথা ! বলে উজ্জ্বল মুখে একটু হাসে প্রীতম। এই একজন লোক
যে, একথা বলল।

মেয়ে কোথায় ?

পাশের ঘরে।

দাঁড়ান দেখে আসি। বলে তৃষা উঠে গেল। ফিরে এসে বলল, অচলা ওকে ঘুম
পাড়িয়েছে বুঝি। কপাল আমার, মটকা মেরে পড়ে চোখ পিট পিট করছে। আমাকে
দেখেই চোখের পাতা টাইট করে বন্ধ করল।

প্রীতম হাসল। বলল, আপনি এলে কী যে ভাল লাগে। দাদাকে সঙ্গে আনলেন না !

বেশ বলেছেন ভাই। দাদাকে সঙ্গে আনব কি, বরং আপনার দাদার সঙ্গেই তো আমার
আসার কথা।

এ হল।

আমি তাঁর নাগালই পাই না। কলকাতায় চাকরি করতে আসেন কোন সকালে, ফেরেন
রাত্রে।

একদিন আমাকে দেখতেও এলেন না।

মানুষটা একটু এ রকম।

আপনি এতদিন বাদে দোষ কাটাতে এলেন।

তৃষা হেসে বলে, রতনপুরে চলুন, দেখবেন আমাকে সকাল থেকে সংসার কেমন নাকে
দড়ি দিয়ে ঘোরাচ্ছে। তখন উল্টে বোধ হয় আমার জন্য মায়া হবে।

প্রীতম খুশি হচ্ছিল। তৃষা বউদি একবারও তার শুকিয়ে যাওয়া শরীর নিয়ে একটুও
মন্তব্য করেননি। সে হঠাৎ জিজ্ঞেস করল, আপনি ইচ্ছাশক্তিতে বিশ্বাস করেন বউদি ?

ওমা ! কেন করব না ? আমি নিজেই তো ভাই ইচ্ছের শক্তিতে চলি। আমার তো আর
কোনো ক্ষমতা নেই।

বিমর্ষ মুখে প্রীতম বলে, কিন্তু বিলু করে না। বিলুকে অরুণ বুঝিয়েছে, অসুখ-বিসুখের
ক্ষেত্রে ইচ্ছাশক্তির কোনো দাম নেই।

অরুণ কে তা জিজ্ঞেস করল না তৃষা। অরুণের কথা সে জানে। শুধু বলল, শহুরে
লোকরা যাই ভাবুক, আমরা গৈয়ো লোক ওসব মানি। বিলু অফিস থেকে কখন ফিরবে
বলুন তো !

আজ রাত হবে বলে গেছে। অফিসের এক কলিগের বিয়ে।

তা হলে আমি তো আজ আর বেশীক্ষণ বসতে পারব না। স্বশুরমশাই আমাকে কিছুক্ষণ
না দেখলেই অস্থির হয়ে পড়েন।

আর একটু বসুন বউদি। আপনার সঙ্গে কথা বললেই ভাল লাগে।

বসল তৃষা। কয়েকবার চা খেল। খাবারও খেতে হল। লাবুর জন্য একটা সোনার হার
এনেছিল। লাবু ওঠার পর সেটা তার গলায় পরিয়ে আদর করল একটু। সন্দের বেশ কিছু
পরে যখন উঠল, তখন প্রীতমকে খুবই উজ্জ্বল এবং আত্মবিশ্বাসী দেখাচ্ছে। তৃষা বলল,
তাড়াতাড়ি রোগটাকে মেরে তাড়িয়ে দিন।

আবার কবে আসছেন ?

আসব । শীগগীরই আসব । গিমিটিকে তৈরি থাকতে বলবেন । এবার এসে এক বেলা থেকে খেয়েদেয়ে যাবো ।

বিশ্বাস হয় না । তবে শুনতে ভাল লাগল । বলে প্রীতম স্নিগ্ধ হাসে ।

দেখবেন । বলে তুষা উঠে পড়ে ।

রতনপুরে গাড়ি থেকে তুষা আর সরিৎ যখন নামল তখন রাত সাড়ে ন'টা বেজে গেছে । রিকশা তৈরি ছিল । উঠে পড়ল দু'জনে ।

তোমাথা পেরিয়ে রিকশা যখন সাঁই সাঁই করে ছুটছে তখন বটতলায় একটা ভীড় দেখে তুষা বলল, ওরে, রিকশা থামা ! থামা !

বটতলার বাঁধানো চত্বর ঘিরে অস্তুত জনা কুড়ি লোক ঝুঁঝকো অন্ধকারে দাঁড়িয়ে । একটা লোক চত্বরের ওপর অন্ধকারে দাঁড়িয়ে চৌচিয়ে চৌচিয়ে বক্তৃতা দিচ্ছে, ঐ মাগীকে যতক্ষণ না দেশছাড়া করতে পারছ ভাইসব, ওর ভাইটাকে যতক্ষণ না চিতায় তুলছ ততক্ষণ তোমরা সব শুয়োরের বাচ্চা...

সরিৎ মৃদুস্বরে বলল, জামাইবাবু ।

জানি । তুই নেমে যা ।

কিছু করতে হবে ?

না, শুধু কি বলছে শুনে আসবি । আমি চললাম ।

রিকশা চলে গেল । সরিৎ চিতাবাঘের পায়ে গিয়ে বটতলার ভিড়ে মিশে গেল ।

॥ ত্রিশ ॥

আজ বোসসাহেবের মুখে খুব ছেলেমানুষী হাসি দেখল দীপ । একটা খোলা টাইপ করা চিঠি টেবিলের ওপর ফেলে দিয়ে বোস বলে, ম্যানেজমেন্ট আমার প্রোপোজাল মেনে নিয়েছে ।

দীপ চিঠিটা ভদ্রতাবশে তুলল, তাকিয়ে দেখল, কিন্তু পড়ল না । তার দরকারও নেই । চিঠিটা আবার টেবিলে রেখে দিয়ে বলল, তা হলে বাংলালোরে ?

ইটস্ ড্রপড্ ন্যাচারেলি ।

ভাল । খুব উদাস গলায় বলে দীপনাথ ।

খুশি হলেন না ?

দীপ একটু অবাক হয়ে বলে, আমার খুশি অখুশির ব্যাপার তো নয় বেসসাহেব ।

কিন্তু আপনি বোধ হয় চেয়েছিলেন আমি বাংলালোরে না যাই ।

দীপ মাথা নেড়ে বলে, ঠিক তা নয় । তবে আমি নিজে যেতে চাইনি ।

বোস একটু যেন ল্লান হয়ে বলে, তাই হবে । আমিই হয়তো ভুল ভেবেছিলাম ।

দীপ স্থির চোখে চেয়ে বলে, আর একজনও বোধ হয় চাননি । মিসেস বোস ।

ওর কথা বাদ দিন । ওদিকটা নিয়ে আমি ভাবছি না । মিসেস বোসও আপনার মতোই ।

আমি যাই ক্ষতি নেই, তবে উনি যাবেন না ।

দীপনাথ এ সব কথায় খুশি হচ্ছে না । বোস সাহেব বলেছিল, কোমপানি আপগ্রেডেড হলে তাকে অ্যাসিস্ট্যান্ট ম্যানেজার করা হবে । সে বিষয়ে বোস এখনো কিছু বলেনি । দীপ চক্ষুলাজ্জায় নিজেও মুখ ফুটে জিজ্ঞেস করতে পারছে না । সে শুধু বলল, আপনি বাংলালোরে না গেলে মিসেস বোসের সঙ্গে আপনার ব্রিচটা আবার মিলে যাবে ।

থ্যাংকস্ ফর ইওর ইনফর্মেশন, মিসেস বোসের সঙ্গে আমার কোনো ব্রিচ নেই।
যাক, দাম্পত্য কলহ তাহলে মিটেছে। দীপ নিশ্চিন্ত হয়ে একটু শ্বাস ছাড়ে।
কলহও মেটেনি। যারা কখনো কোনোদিন জোড়া লেগেছিল তাদের মধ্যেই ব্রিচ হয়।
আমরা কোনদিনই ততটা ঘনিষ্ঠ নই।

দীপনাথ এর কী জবাব দেবে? তবু ভেবেটেবে বলে, মনের মিলটা তো স্বর্গ থেকে হয়ে
আসে না। ওটাও আমার মনে হয় প্র্যাকটিসের ব্যাপার।

বোসসাহেব মিসেস বোসের প্রসঙ্গ আজকাল একদম পছন্দ করে না। তবু এ কথায় খুব
কৌতূহলের মুখ করে বলে, সেটা কি রকম?

এক সময়ে ভালবাসা হত প্লাবনের মতো, ঝড়ের মতো। চোখাচোখি হতে না হতেই
প্রেম। কিন্তু সে যুগ তো আর নেই। এখন কেউ চোখ বুজে ভালবাসে না। তবে
ভালবাসার চেষ্টা করতে করতে একদিন হয়তো বেসে ফেলে।

কথাটার মধ্যে একটা হয়তো থেকে যাচ্ছে দীপনাথবাবু!

তা থাকছে। আজকাল খবরের কাগজে এত বউ খুনের কথা পড়ি যে ভালবাসার মধ্যে
একটা হয়তো আপনা থেকেই এসে যায়।

বউ খুনের ঘটনা পড়েন। কিন্তু বর খুনের কথাও যে আছে। সেটা খবরের কাগজে
বেরোয় না। আর সত্যিকারের ফিজিক্যাল খুনও ঘটে না। কিন্তু এক ধরনের মানসিক
স্লো-পয়জনিং ঘটে। তাতে পুরুষদের ভিতরটা আস্তে আস্তে মরে যায়।

বলে বোস একটু হাসে। খুবই স্নান, মড়ার মুখের হাসির মতো হাসি।
এয়ার-কন্ডিশনারের মৃদু শব্দটা না থাকলে এখন ঘরখানা খুবই নিস্তব্ধ লাগত দীপনাথের।
কারণ তার নিজের ভিতরটাও এ সময়ে বড় নিস্তব্ধ। মুখে কোনো কথা আসছে না।

অনেকক্ষণ বাদে বোস সাহেব বলল, আপনি তা জানেন? জানেন না। আপনি তো
আবার বিয়ে করেননি, এ সব অভিজ্ঞতাও নেই।

দীপনাথ মৃদুস্বরে বলে, আপনাদের ব্যক্তিগত ব্যাপারে অবশ্য আমার নাক গলানো উচিত
নয়।

বোস মাথা নেড়ে বলে, ইউ আর এ ফ্যামিলি ফ্রেন্ড, দেয়ারফোর ইউ আর উইদিন
আওয়ার ফ্যামিলি। নাক গলালে দোষ দেখে না। কিন্তু মুশকিল হল, আমাদের
প্রবলেমটার মধ্যে কোনো মিস্ত্রিও নেই। একদম খোলাখুলি গরমিল। কোনো প্যাচওয়ার্কও
নেই। বয়-বেয়ারা-বাবুটি থেকে শুরু করে বাইরের লোকও সবাই জানে।

আমি কিন্তু এতকাল টের পাইনি।

তাহলে আপনি আমাদের দিকে মনোযোগ দেননি কখনো।

তা হবে।

আমাদের সমস্যাটা খুবই আন-ইমোশনাল। হার্ড ফ্যাক্ট। এব কোনো সমাধানও হয় না।

তাহলে কি হবে?

ডিভোর্স হতে পারে আবার নাও হতে পারে। আমরা হয়তো চিরকাল এমনি থেকে
যাবো। কিছুই বলা যায় না।

ডিভোর্স করলে মিসেস বোস কি করবেন? ওর পক্ষে তো আবার বিয়ে করা সম্ভব নয়।
অসম্ভবও কিছু নয়। তবে আমার বিশ্বাস ডিভোর্স করলে উনি পুরোপুরি ওর রোমান্টিক
পলিটিকস্ নিয়ে মাতবেন।

তারপর?

তারপর কি হবে তা নিয়ে একদিন চলুন লটারি করব।

বোসসাহেব কথাটা বলেই হেসে ফেলে। সঙ্গে দীপও।

বোসসাহেব মাথা নেড়ে বলে, বাইরে থেকে কিছুতেই ঠিক বোঝা যায় না মিস্টার চ্যাটার্জি। আপনি ওয়েলউইশার, কাজেই আপনি তো ভাঙন ঠেকানোর চেষ্টা করবেনই। আই নো ইউ টু বি এ ভেরী নাইস ম্যান। দুনিয়াতে ভাল লোকের খুব অভাব। আপনি সেই দুর্লভদের একজন।

দীপ একটু লাল হয়। মনে মনে ভারী ছোটো হয়ে যায় নিজের কাছে। ভিতরটা ছটফট করে তার। কিছুদিন আগেও সে নিষ্কলঙ্ক ভাল লোকই ছিল। মনে পাপ থাকলেও কাজে কখনো বেচাল কিছু করেনি সে। হঠাৎ সেদিন—

মানুষ কমপ্লিমেন্ট দেওয়ার সময় একটু বাড়াবাড়ি করে ফেলে ঠিকই, কিন্তু আগার এ কথাটা মোটেই বাড়াবাড়ি নয় দীপনাথবাবু। বলে বোস একটু স্মিত চোখে দীপনাথকে দেখে। তারপর বলে, আমি খুব ব্রড মাইন্ডেড। মিসেস বোস যদি আমাকে অ্যাকসেন্ট করতে পারেন তাহলে আমি সব মেনে নেবো। কাজেই আমাকে কিছু বোঝাতে হবে না। আপনি বরং মিসেস বোসকে একটু ট্রাই করুন। ঐ খুঁটিটাকেই নড়ানো শক্ত। তবে আপনি পারলেও পারতে পারেন। আমরা স্বামী-স্ত্রী দু'জনেই আপনাকে পছন্দ করি। মিসেস বোসও সেদিন বলছিলেন—

অসময়ে রসভঙ্গ হল। বোসের চেম্বারের দরজা খুলে বেয়ারা ঢুকে স্লিপ দিল। ভিজিটার।

মিসেস বোস তার সম্পর্কে কি বলেছে তা শোনা হল না দীপনাথের। উঠল। চলে যেতে যেতেই দীপনাথ একটু থমকে সংকোচ ঝেড়ে চোখবুজে জিজ্ঞেস করল, তাহলো আমিও এই অফিসেই থাকছি তো?

বোস বিস্মিত মুখ তুলে বলে, অফ কোর্স। কোথায় আর যাবেন?

না, জিজ্ঞেস করলাম আর কি।

এ ফানি কোম্পেন। এই অফিস তো এখন আপগ্রেডেড। আমার ক্ষমতাও বেড়েছে। আপনি অন্য কোথাও চেষ্টা করবেন না। আমি আপনার কেসটা উইথ টপ প্রায়োরিটি দেখছি।

দীপনাথ মাথা নেড়ে বেরিয়ে এল। পাশ কাটিয়ে কোট-প্যান্ট পরা একজন ভিজিটার ঢুকে গেল চেম্বারে।

দীপনাথের আজকাল কীজ নেই। বোস ইচ্ছে করেই কাজ দিচ্ছে না। বসিয়ে বসিয়ে ভাউচারে প্রায় আটশো টাকা পাইয়ে দিয়েছে গত মাসে। হয়তো এটা তাকে খুশি রাখার চেষ্টা। তবে একজন বস-মার্কা লোকের সঙ্গে ব্যক্তিগত সম্পর্কে জড়িয়ে যেতে একটু বাধো-বাধো লাগে দীপের।

সে গিয়ে আবার বঙ্কনের মুখোমুখি বসে। বঙ্কনেরও কাজ নেই। খুটখাট করে ডিমাভালে কি যেন একটু টাইপ করছিল। দীপ বসতেই অভ্যাসবশে হাত মুঠো করে মুখের সামনে মাউথপিসের মতো ধরে বলল, কোম্পানি তাহলে জাতে উঠল?

উঠল বলেই তো মনে হচ্ছে।

আমাদের গ্রেড কি হবে শুনেছেন কিছু?

না। মোটে তো চিঠি এল। আরো ফর্মালিটি আছে।

কিছু একটা হলে বাঁচা যায়।

বিয়ে করবে নাকি ?

না, না, ও সব নয়। বিয়ে একটা ফালতু জিনিস। উটকো ঝামেলা।
তবে ?

তবে আবার কি ? মাইনে বাড়লে সংসারের কিছু সুবিধে হবে।

সে তো বটেই।

রঞ্জন শুকনো মুখ করে বলল, চাকরি পাওয়ার পরই মা একটা ইনসিওর করিয়েছে দশ হাজার টাকার। সঙ্গে ব্যাঙ্কে একটা রেকারিং ডিপোজিটও। মা তো জানে না, প্রিমিয়াম বা মাহুলি ডিপোজিট দেওয়া কত কষ্টের। ভাবছিলাম, দুটোই ছেড়ে দেবো।

মাইনে তো বাড়বেই। ছেড়ো না। একটু ধৈর্য ধরো।

রঞ্জন মূঠোর আড়ালে হাসল, ওই একটা জিনিস আর শেখাতে হবে না দাদা। ধৈর্য জিনিসটা শিখেই মায়ের পেট থেকে পুড়েছি। নইলে এতদিন বেঁচে আছি কি করে ?

আচমকাই দীপ জিজ্ঞেস করে, তুমি কখনো পলিটিকস করোনি রঞ্জন ?

আমি ? না তো ? তবে ছাত্র ছিলাম যখন, তখন একটু-আধটু করতাম। সেটা কিছু না। কেন বলুন তো ?

এমনি আজকালকার ছেলেরা তো করে।

রঞ্জন আবার একটু হাসল। বলল, করে বটে, তবে ক্যারিয়ারের জন্য। আমার বয়সী ছেলেদের বেশীর ভাগেরই কোনো সত্যিকারের পলিটিকস নেই। নকশালদের শুধু ছিল। আর তো সব—

কথাটা রঞ্জন শেষ করে না। বোধ হয় দীপনাথের রাজনীতির বোধ সম্পর্কে কিছু জানে না বলেই সতর্ক হয়ে গেল।

দীপনাথ বলে, পলিটিকস করলে সিরিয়াসলিই করা ভাল। নইলে একদম ওটাকে এড়িয়ে চলতে হয়।

হঠাৎ পলিটিকসের কথা তুললেন যে !

আজকাল যারা পলিটিকস করে তাদের মধ্যে খুব মহৎ মানুষ কাউকে দেখতে পাই না কেন বলা তো। ভারতবর্ষে এতগুলো নেতা আছে অথচ তাদের কারো ওপর ভক্তি হয় না। এটা ভেবে খুব অবাক লাগছিল বলে ত্রোমাকে জিজ্ঞেস করছিলাম।

ভক্তি হবে কি করে ? আমি তো আপনাকে বললামই যে পলিটিকস আজকাল ক্যারিয়ার ছাড়া কিছুই নয়। আই এ এস বা ডব্লু বি সি এস-এর মতো, কিংবা তার চেয়েও খারাপ।

একটু অন্যমনস্কভাবে দীপনাথ বলে, কিন্তু ছদ্মবেশে কেউ নেই তো ? হয়তো তেমন কোনো নেতা আছেন যিনি এখনো আমাদের কাছে তেমন পরিচিত নন, হঠাৎ দুম করে একদিন বেরিয়ে গোটা দেশের খোল-নলচে পাণ্টে দেবেন।

দাদা কি নেতাজীর কথা বলছেন নাকি ?

আরে না। ভাবছি, তেমন কেউ সত্যিই আছে কিনা।

নেই। ও রকম কেউ থাকলে এদিন চূপ করে বসে থাকত না।

হয়তো আছে ; তুমিও জানো না, আমিও জানি না।

থাকলে আছে। ও নিয়ে আমি মাথা ঘামাই না। আপনার কি হয়েছে বলুন তো ?

দীপনাথ হতাশ গলায় বলে, কি আবার হবে ! কিছু নয়।

আপনার চাকরির কি হল ? বস কথা দেয়নি ?

দিয়েছে। বলেছে হবে।

ওঁকে বিশ্বাস করবেন না । আমার দাদা হলেও বলে দিচ্ছি, ও মাল অত সহজ নয় । যা করতে চান কাগজে-কলমে লিখিয়ে নেবেন ।

সেই রকমই কিছু করতে হবে দেখছি । আনমনে দীপনাথ বলে ।

হ্যাঁ, ডেফিনিটলি করাবেন । আপনি একটু ভোলেভালে টাইপের আছেন । কিন্তু মনে রাখবেন আপনার বস এমন একখানা চীজ, যে চোখের পলক ফেলতে না ফেলতে রং পাস্টে ফেলবে ।

দীপনাথ নিজের সম্পর্কে রঞ্জনর মন্তব্যটা শুনে সামান্য করুণার হাসি হাসে । ভোলেভালে কাকে বলে তা অবশ্য সে জানে না । তবে যদি হাঁদা বোঝায়, তবে বলতে হবে, দীপনাথ হাঁদা নয়, আবার খুব চালাকও নয় । তার মগজের চেয়ে হৃদয় বেশী ক্রিয়ানীল, এটাই যা ঝামেলার । যথেষ্ট লোভ বা আকাঙ্ক্ষা তার নেই । আর থাকলেও সে খুব বেশী স্বার্থপর হতে কখনো পারে না । নির্লজ্জ হতেও নয় ।

রঞ্জন বলল, সেদিন হঠাৎ এক কাণ্ড হয়ে গেছে । হঠাৎ দেখি সন্কেবেলা মণিদীপা বউদি একখানা ঝরঝরে গাড়ি চালিয়ে আমাদের বাসায় হাজির ।

দীপনাথ মণিদীপা নামটির আকস্মিক উচ্চারণে হঠাৎ কেমন স্থবির হয়ে গিয়েছিল । সামলে নিয়ে বলল, তাই নাকি ?

আমরা তো সব হাঁ । জীবনে কখনো আসেনি, একমাত্র বিয়ের পর একদিন জবরদস্তি নিমন্ত্রণ খেতে আসা ছাড়া । আমাদের ঠিকানাও ওর জানার কথা নয় ।

কি বলল ?

সে অনেক কথা । বাবার জন্য ফল-মিষ্টি সব এনেছিল । তারপর আমাকে ডেকে খুব সেধে সেধে কথা বলল । কত মাইনে পাই, কর্তাদন চাকরি, পার্মানেন্ট কিনা, অফিসে ইউনিয়ন আছে কিনা । ফালতু বাত সব । শেষমেশ হঠাৎ আপনার কথা তুলল ।

দীপনাথের গলার কাছে অস্বস্তি হতে থাকে । সে অস্পষ্ট স্বরে বলে, আমার আবার কি কথা ?

প্রথমেই জিজ্ঞেস করল, আমি আপনাকে চিনি কিনা । চিনি বলায় জানতে চাইল, আপনি কত মাইনে পান, চাকরি পার্মানেন্ট হয়েছে কিনা । এত সব ফালতু কথা । তবে শেষে জিজ্ঞেস করেছিল, আপনি লোকটা কেমন ।

বলো কি ? তুমি কী বললে ?

যা সত্যি তাই বললাম । বললাম, দীপনাথ চাটুজ্জের কোনোকালে উন্নতি হবে না । লোকটার অ্যামবিশন নেই । উনিও দেখলাম কথাটা মেনে নিলেন ।

দীপনাথ হাসল । মানুষ নার্ভাস হলে যেমন হাসে । তারপর বলল, আমি যে অপদার্থ এটা দেখছি-সবাই জেনে গেছে । তোমার বউদি আর কি বলল ?

অনেক পলিটিক্যাল পয়েন্ট তুলল । মনে হল আমাকে ওর দলে ভেড়াতে চাইছে । যাহক ভ্যাজর ভ্যাজর অনেকক্ষণ শুনতে হল । বস কাম দাদার বউ, চটাতে তো পারি না । মনে মনে হাসছিলাম । বড়লোকদের পক্ষে গরীবদের জন্য দুঃখ বোধ করা কত সোজা । আমি নিজে গরীব হয়েও কিন্তু গরীবদের পছন্দ করি না ।

দীপনাথ খামোখা লজ্জা পেল । বলল, তোমার বউদি আমার সম্বন্ধে আর কিছু বলেনি তো !

না, আর কি বলবে ? আপনার কথা বলতে বলতে বিপ্লব-টিপ্লবের কথায় চলে গেল ।

দীপনাথ মনে মনে একটু নিশ্চিন্ত হয়। মণিদীপা তাকে মুখের ওপর চুকলিখোর বলেছিল সেদিন টেলিফোনে। রঞ্জনকেও বলে দিতে পারত যে, তার সব কথা দীপনাথ মণিদীপাকে বলেছে। যা হোক এইটুকু করুণা মণিদীপা তাকে করেছে।

দীপনাথ উঠে পড়ল। বলল, বাইরে থেকে ঘুরে আসি।

বাইরে আজ সাজঘাতিক রোদ। যা গরম পড়েছে।

কোনো কাজ নেই, ঘুরেই আসি। বস যদি খোঁজ করে তবে বোলো লানচের আগেই এসে যাবো।

দীপনাথ বেরিয়ে এল এবং প্রচণ্ড রোদ আর গরম গলা টিপে ধরল তার।

কিন্তু শরীরের অস্বস্তি বা অসুবিধের কথা ভাবছিল না দীপনাথ। সে ভাবে তার পতনের কথা। এত সহজে তার পদস্থলন ঘটবে এটা সে কোনোদিন ভাবেনি। তার ভিতরে একটু ইম্পাত ছিল। অত প্রিয় সিগারেট সে ছেড়ে দিয়েছিল কেবল ইচ্ছাশক্তির জোরে। শরীরের জোর আসল নয়, আসল হল মনের জোর। সেদিন রাত্রে বীথির শোওয়ার ঘরে সেই জোরটা কোথায় গেল তা আজও আর ঝুঁজে পায়নি দীপনাথ।

ব্যাপারটার মধ্যে কোনো পূর্বপরিকল্পনা ছিল না। সুখেনকেও খামোকা দোষ দিয়ে লাভ নেই। সুখেন তো আর বীথির দালাল নয়। সেই রাতের ঘটনার পর সুখেন আর ফিরে আসেনি বীথির বাসায়। একা রিকশা করে বোর্ডিং-এর ঘরে ফিরল দীপনাথ। সুখেন সে রাত্রে বোর্ডিং-এও ফিরল না। ফিরল পরদিন রাত্রে। প্রথম চোখে চোখে তাকাচ্ছিল না। দীপনাথও লজ্জায় ঘেম্নায় কেম্নো হয়ে যাচ্ছিল।

ভাগ্য ভাল কলেজের পড়ুয়া ছেলেটা সেদিনই তার মেদিনীপুরের বাড়িতে গেছে। একা ঘরে সুখেনকে পেয়ে অনেক রাত্রে দীপনাথ বলল, ব্যাপারটা একটু ব্যাখ্যা করবেন ?

সুখেন করুণ মুখ করে বলল, ব্যাখ্যার কিছু নেই। আপনার জন্য আমার খুব কষ্ট হত। তাই—

আমার জন্য কষ্ট হবে কেন ? আমি কি দুঃখে আছি ?

ঠিক তা বলা যায় না। তবে আপনি সেদিন আমার বন্ধু হলেন তো ! আমার আর কোনো বন্ধু নেই। আপনাকে বন্ধু পেয়ে সেদিন কী যে আনন্দ ইচ্ছিল।

আমি তো তেমন কেওকেটা কেউ নই। বন্ধু হলেও অতি সাধারণ বন্ধু। রাস্তাঘাটেও এ রকম আকছার বন্ধু মেলে।

যাঃ, কী যে বলেন। আপনি কত সুপুরুষ, স্মার্ট, কত সং মানুষ। এ রকম লোক কই ?

এই প্রশংসায় মোটেই খুশি হয়নি দীপনাথ। রূঢ় গলায় বলেছে, আমি যদি অত ভালই তাহলে আমাকে এ রকম গাড্ডায় নিয়ে ফেললেন কেন ?

বললাম যে আপনার জন্য কষ্ট হয়।

মানেটা একটু বুঝিয়ে বলুন।

সুখেন যে খুব ভাল বোঝাতে পারে তা নয়। একটু এলোমেলো ভাবে বলল, দেখলেই বোঝা যায় এই বয়স পর্যন্ত আপনার মেয়েমানুষের অভিজ্ঞতা হয়নি।

তাতে কি ?

ওটা না হলে মানুষের মনের আড় ভাঙে না।

শুধু সেই জন্য ?

না, আমি ভাবছিলাম, আপনি তো আমার বন্ধু হলেন, বন্ধুর একটু সেবা দিই।

বীথি কী ভাড়াটে মেয়ে ?

ঠিক তা নয়। কথাটা ঠিক বুঝবেন না। ও একটু ঐ রকম, কিছু মানে-টানে না।
টাকাপয়সা নেয় ?

কেন, আপনার কাছ থেকে নিয়েছে নাকি ? বলে জিভ কেটে সুখেন বলল, ছিঃ ছিঃ।
না, আমার কাছ থেকে নেয়নি।

নেওয়ার কথা নয়।

আপনি বোধ হয় ওর সঙ্গে ষড়যন্ত্র করে রেখেছিলেন।

সুখেন লাজুক হেসে বলে, তাই।

কিন্তু ওর সঙ্গেই আপনার বিয়ের কথা আছে না ?

আছে।

এ রকম মেয়েকে জেনেশুনে বিয়ে করবেন ?

সেইজন্যই তো আপনার পরামর্শ চেয়েছিলাম।

আমি পরামর্শ দেওয়ার মালিক নই।

আলবৎ মালিক। আমি আপনাকে বুজম ফ্রেন্ড হিসেবে মানি। যা বলবেন তাই হবে।

এ ব্যাপারে আমার কিছু বলা সাজে না। আমি কিছু বুঝতেই পারছি না। প্রস নয়, চাকরি করে, দেখতে সুন্দর, বড়সড় ছেলে আছে, স্বামী জেল খাটছে, সব মিলিয়ে মহিলা খুবই অদ্ভুত। আমি হলে বিয়ে করার সাহস পেতাম না।

হ্যাঁ, একটু অন্য রকম।

খুবই অন্য রকম। ওর সঙ্গে আপনি জুটলেন কি করে ?

জুটে যায়। উদাস গলায় বলে সুখেন।

বীথি এত সহজে অচেনা লোককে শরীর দেয় কি করে ? ওর যেম্মা করে না ? ভয় করে না ?

আপনাকে যেম্মা ? অবাক হয়ে সুখেন বলে, আপনার মতো এ রকম ভদ্রলোক ও আর পেয়েছে নাকি ? আজ সন্ধ্যাবেলাই তো আপনার কত প্রশংসা করছিল।

রাগে তেতে উঠলেও প্রশংসার কথায় একটু থমকে গেল দীপনাথ। বলল, কি রকম ?

আপনার সম্পর্কে আমি যা ভেবেছি ওরও ধারণা তাই। আজ অনেকক্ষণ আপনার কথা হল।

আমি তো কিছুই নই। একটা লম্পট চরিত্রহীন।

ছিঃ ছিঃ, ওকথা বলবেন না। পুরুষমানুষের কোনো কলঙ্ক নেই।

ওটা আপনার ধারণা, আমার নয়।

তাহলে বরং আমার কান মলে দিন। বলে বাস্তবিকই মাথাটা এগিয়ে দিল সুখেন।

সুখেনের সঙ্গে পারা যায় না। কাজেই হাল ছেড়ে দিল দীপনাথ। বীথির সঙ্গে সেই সম্পর্কের কথা ভেবে আজও সে কোনো সুখ পায় না। বরং নিজের ভিতরটা কোনো মহামূল্যবান হারানোর দুঃখে হাহাকারে ভরে ওঠে।

আর কোনোদিন সে বীথির কাছে যাবে না।

রোদের রাস্তায় আনমনে হাঁটতে হাঁটতে সে ঘটনাটা নিয়ে গভীরভাবে ভাবছিল। এই রহস্যময় নোংরা শহর তার ভাল লাগছে না। একদম ভাল লাগছে না।

তুই ছইলচেয়ারে কেন রে ?

আমাকে সবাই যে রুগী বানিয়ে রাখতে চায়, কি করব বলো তো সেজদা !

তুই তো একটু-আধটু হাঁটতে পারছিলি ।

এখনো কি পারি না ? পারি । দেখবে ?

থাক গে । বসে আছিস বসেই থাক ।

সারাদিন বসে থাকি । তুমি কতকাল পরে এলে ।

সময় পাই না রে । মনটাও ভাল নেই ।

তোমার মনের আবার কি হল ? চাকরি যায়নি তো !

না, চাকরিটা আছে ।

পার্মানেন্ট হয়েছে ?

এবার হয়তো হয়ে যাবে ।

শ্রীতম খুব সুন্দর একরকম হেসে বলে, অবশ্য সেটা জেনেই বা আমার কি হবে ?
জাগতিক ব্যাপার-সাপার নিয়ে অজ্ঞকাল ভাবি না ।

না ভাবাই ভাল । জগৎটা তো ভাল কিছু নয় । তোর মাথায় কোনোকালেই বিষয়বুদ্ধি
ছিল না । তুই ছিলি আনমনা, ফিলজফার টাইপের ।

শ্রীতম একমুখ হাসি নিয়ে বলল, তাব মানে তো হাঁদা ।

একটু লজ্জা পায় দীপনাথ । ছেলেবেলায় অন্যমনস্ক শ্রীতমকে সে নিজেই হাঁদা বলে
ডাকত । তাই থেকে পাড়ায় তার নামই হয়ে গিয়েছিল হাঁদা । বলল, হাঁদা থাকাই ভাল ।

শ্রীতম মাথা নেড়ে বলে, এ সমাজে হাঁদার জায়গা নেই সেজদা । চার চৌকো না হলে
টেকা যায় না ।

দীপ স্মিতমুখে বলে, তা যদি বলিস তবে আমিও তোর চেয়ে কম হাঁদা নই । তুই তবু
একটা ভাল চাকরি করছিলি । আমার মতো ওপরওয়ালার ফাইফরমাশ খাটতে হয়নি
তোকে ।

শ্রীতম একটু থমকে গিয়ে বলে, ওপরওয়ালো কি তোমাকে ফাইফরমাশ করে ?

বেফাঁস কথাটা বলে ফেলেছে দীপনাথ । শ্রীতম তাকে এতটাই ভালবাসে যে, তার আর
বোস সাহেবের আসল সম্পর্কটা জানলে দুঃখ পাবে । তাই সে তাড়াতাড়ি বলল, চাকরি
করতে গেলে ওরকম একটু আধটু করতে হয় রে ।

শ্রীতম মাথা নেড়ে বলে, ঠিক বুঝলাম না । বুঝিয়ে বলো ।

বোঝানোর কিছু নেই । ফাইফরমাশ মানে তো আর সেরকম কিছু নয় ।

আগেও তুমি এরকম কিছু কথা বলেছো । তখন গুরুত্ব দিইনি । কিন্তু আজ তোমার মুখ
দেখে অন্যরকম লাগছে ।

অন্যরকম লাগবার কি ? আমি ঠিক আছি । চাকরি পাকা হলে সবই স্বাভাবিক হয়ে
যাবে ।

শ্রীতম অনেকক্ষণ গুম হয়ে রইল । আস্তে ছইলচেয়ারটা ঘুরিয়ে মেঝের ওপর খানিকটা
গড়িয়ে গিয়ে ফিরে এল । বলল, শুধু চাকরিই নয়, আরো কিছু ব্যাপার ঘটেছে সেজদা ।
তোমার চোখ অন্যরকম ।

মনে মনে শ্রীতমের নজর থেকে রেহাই চাইছিল দীপনাথ । আগে ওর নজর এত তীক্ষ্ণ

ছিল না। রোগে ভুগলে কি মানুষের অনুভূতি বাড়ে ? বাড়ে হয়তো। দীপনাথ জানে, টি বি রোগীদের মধ্যে অনেকেই পৃথিবীর শ্রেষ্ঠ কবি বা শিল্পী হয়েছে। হয়তো শরীরের ক্ষয় অন্যদিকে স্নায়ুকে স্পর্শকাতর করে তোলে। সে একটু অস্বস্তিতে ভরা গলায় বলল, কিছুই পালটায়নি। তুই ভুল দেখছিস।

তুমি নিজে কিছু টের পাও না ?

না তো ! কি টের পাবো ?

আশ্চর্য ! যদি সত্যিই টের না পেয়ে থাকো তবে এখন থেকে খুব সাবধান হয়ে সেজদা।

কিসের জন্য সাবধান করছিস ?

প্রীতম মৃদুস্বরে বলল, যে মানুষ নিজের বশে থাকে না সে নানা অবস্থার চাপে পড়ে নানারকম মানুষের একটা সমষ্টি হয়ে দাঁড়ায়।

দূর ! কথাটার মানেই বুঝলাম না।

তোমাকে কি আমি বোঝাতে পারি ? তুমি চিরকালই আমার চেয়ে সবকিছু বেশী বোঝো।

চিরকালই তোর মাথায় অদ্ভুত সব কথা আসে। একবার যেন কোন মহাপুরুষের একটা কথা তুলে শুনিয়েছিলি, শয়তান আর কেউ নয়, শয়তান হল মানুষের প্রতিদ্বন্দ্বী ইচ্ছা। কথাটার মানে অনেক ভেবে ভেবে শেষকালে বের করেছি। অদ্ভুত কথা।

প্রীতম ভ্রূ কঁচকে বলে, অন্য সব কথা ছেড়ে এ কথাটাই বা মনে রাখলে কেন তুমি ? প্রতিদ্বন্দ্বী ইচ্ছা কাকে বলে তা বুঝতে পেরেছি বলে।

তোমার প্রতিদ্বন্দ্বী ইচ্ছা কিছু হয় ?

সকলেরই হয়।

প্রীতম মাথা নেড়ে সম্মতি জানায়। তারপর আবার ভ্রূ কঁচকে কি যেন ভাবে। খানিক বাদে বলে, আমার মাথা পর্যন্ত এখনো রোগটা পৌঁছোয়নি। যতদিন না পৌঁছোয় ততদিন আমি সব বুঝতে পারব সেজদা। কিন্তু আমার আজকাল কিছু বুঝতে ইচ্ছে করে না। মনে হয় রোগটা তাড়াতাড়ি মাথায় পৌঁছে গেলে বুঝি ভাল হয়।

দীপনাথ একটু অবাক হয়ে বলে, সে কি ? তুই যে নেগেটিভ চিন্তা করতে ভালবাসতি না ! তুই যে আমাকে রোগের কথাটাও উচ্চারণ করতে বারণ করেছিলি ?

এখন আর বারণ করছি না।

হাল ছেড়ে দিচ্ছিস ?

তোমরা সংসারটাকে বেঁচে থাকার যোগ্য করে রাখোনি। এখানে কি কারো বাঁচতে ইচ্ছে করে ?

ক'দিন আগেও তো এই পৃথিবীটাই ছিল। হঠাৎ রাতারাতি তো পাল্টে যায়নি।

বড় পৃথিবী না পাল্টাক, মানুষের নিজস্ব জগতের নিজস্ব সংসারের পৃথিবী তো পাল্টে যেতে পারে।

তোর পৃথিবীর আবার কি অদলবদল হল ?

প্রীতম ভ্রূ কঁচকে রোগা হাতে নিজের নীচের ঠোঁটটা টেনে ধরে চুপ করে থাকে। জবাব দেয় না।

খুব গাঢ় স্বরে এবং বৃকে ভয় নিয়ে দীপনাথ জিজ্ঞেস করে, কিছু হয়েছে রে ?

প্রীতম হঠাৎ খুব স্পোর্টসম্যানের মতো হেসে ওঠে। সোজা হয়ে বসার চেষ্টা করতে

করতে বলে, হলেই বা কি ? আমার তো কিছুই যায় আসে না ।

দীপনাথের মনে পড়ে বিলুর সাজগোজ, অরুণ ওকে মাঝে মাঝে গাড়িতে লিফট দেয় ।
অক্ষম প্রীতম পড়ে থাকে ঘরে । বিলু টাটকা যুবতী ।

দীপনাথ একটা দীর্ঘশ্বাস ফেলে বলে, কি জানি কি হল !

দুনিয়া পাণ্টে যাচ্ছে সেজদা ।

হঁ । কিন্তু পাণ্টানোর কারণটা তো বলবি !

সব কি বলা যায় ? তোমার সব কথাই কি তুমি আমাকে বলতে পারো ? পারো না ।

আমার বলার মতো কিছু নেই ।

কে জানে ! হয়তো আছে । হয়তো নেই ।

প্রীতম, তুই কেন খামোখা আমাকে নিয়ে ভাবিস ?

খামোখা নয় সেজদা । আমি একা একা সারাদিন সকলের কথা যদি না ভাবি তবে আমার সময় কাটবে কি করে ?

শুধু সময় কাটানোর জন্য হলে বই পড়িস না কেন ?

আমি তো নাটক নভেল ভালবাসি না । ঘবে তেমন বই নেইও কিছু । বিলু কখনো বইটাই পড়ে না । আমারও ভাল লাগে না । তার চেয়ে বরং জ্যাঙ্গ মানুষদের নিয়ে ভাবলে অনেক বেশী ভাল লাগে ।

ভাল আর লাগছে কই ? আমরা তো কেউ তোর মনের মতো ভাল নই ।

প্রীতম হাসে না । গম্ভীর মুখেই বলে, কথাটা মিথ্যে নয় সেজদা, তোমরা কেউ আমার মনের মতো ভাল নও । কিংবা হয়তো আজকাল আমার ভালর সঙ্গে তোমাদের ভাল মিলছে না ।

তা নয় রে । ঘরে বসে থেকে তুই তো বাইরের সঙ্গে সম্পর্ক বেশী রাখিস না । তাই হয়তো ঠিকঠাক সব জিনিস বুঝিস না ।

প্রীতম একটু হাসে । বলে, তুমি এখনো আমাকে সেই শিলিগুড়ির বাচ্চা প্রীতম বলে ডাকো বোধহয় ।

কেন, তাই বললাম বুঝি ?

শোনো সেজদা, আমি বাইরের দুনিয়ার সঙ্গে সম্পর্ক মিটিয়েছি । শীগগীরই আমার ঘরসংসারের সঙ্গে যে সম্পর্কটুকু আছে তাও মিটে যাবে । তখন তোমাদের ভাল নিয়ে তোমরাই একটা বিচার করে দেখো ।

বহুবচনে বলছিস কেন রে ? আমার সঙ্গে কাকে জড়াচ্ছিস ?

এই কথায় হঠাৎ প্রীতমের ঠোঁট দুটো কি কেঁপে উঠল ? টপ করে মাথা নোয়াল কেন ?
চোখে জল এল নাকি ? একটু দূরে চেয়ারে বসে ছিল দীপনাথ । কাছে উঠে এসে প্রীতমের কাঁধে আলতো হাত রেখে বলল, আমাকে বিশ্বাস হয় না তোর ?

হয় । খুব স্কীণ গলায় বলে প্রীতম, একমাত্র তোমাকেই হয় ।

তাহলে সব বল । শুনি । কি হয়েছে ?

প্রীতম আবার মুখ তোলে । একটা শ্বাস ছেড়ে বলে, বাদ দাও । ওসব কিছু নয় ।
দুনিয়ায় সম্পর্কটার কোনো মানে নেই । এ দুনিয়ায় কে কাব ভাই, কে কার বউ, তা দিয়ে কি হয় বলা তো ? মারা গেলে কোন অসীম অন্ধকারে হারিয়ে যাবো সবাই, কে কার থাকবে ?

এ কথাটার মানেও বুঝলাম না । সহজ করে বুঝিয়ে দে ।

কিছু বোঝানোর নেই ।

বিলু কি তোর দিকে নজর দিচ্ছে না ?

প্রীতম এ কথাটার জবাব চট করে দিল না । একটু অস্থির হল যেন । দুটো হাত বার বার কোল থেকে হাতলে, হাতল থেকে চাকায় স্থানান্তরিত করল । চোখের পলক ফেলল ঘন ঘন । তারপর বলল, বিলু বিলুর মতোই ।

বুঝিয়ে বল ।

প্রীতম খুব আশ্বে করে বলল, মাঝখানে কদিন বিলু খুব আপনজন হয়ে উঠেছিল । ঠাণ্ডা বিলুর ভিতর খানিকটা উত্তাপ টের পেতাম । তুমিও হয়তো লক্ষ করেছো ; আমি ইচ্ছাশক্তির কথা বলতাম । ও সেটা বিশ্বাসও করত ।

চমৎকার । তারপর কি হল ?

ও আমাকে অন্য চোখে দেখতে লাগল হঠাৎ । খুব বেশী নজর রাখত, খুব বেশী ভাবত আমাকে নিয়ে । তারপরই চাকরিতে ঢুকে গেল । গোটা একটা ছবিই যেন ভেঙে পড়ে গেল আচমকা ।

চাকরিতে ঢুকলে মেয়েদের একটু বদল হয় । সারাদিন খাটে, ঘরে এসে আবার সংসারের ঝামেলা পোয়ায় ।

আমার সেই কনসিডারেশন নেই ভাবছো ?

থাকলে ভালই তো ।

মেয়েদের চাকরি করা আমি পছন্দ করি না ঠিকই । কিন্তু যখন বিলু চাকরিতে ঢুকল তখন থেকেই আমি মনকে প্রস্তুত করেছি । মন নিয়েই তো আমার সারাদিন কাটে । সারাদিন তো শরীরের লড়াইতে হেরে যাচ্ছি, তাই মনকে খুব শাসনে রাখি । যে কোনো অবস্থার জন্য আমার মন তৈরি থাকে ।

তাহলে অসুবিধেটা কোথায় ?

বাইরে থেকে দেখলে বোঝা যাবে না, সেজদা । ছোটখাট অনেক ব্যাপার ঘটে যায় ।

কি রকম ? একটু খুলে বল ।

বিলু চাকরি করতে যাওয়ার পর প্রথম প্রথম সবই ঠিক ছিল । কোনো কিছুই পালাটায়নি । শুধু ও না থাকলে বাড়িটা ফাঁকা লাগে মাত্র । সারাদিন বিলুর জন্য অপেক্ষা করতাম । বিলুও ফিরত আমার জন্য আকুলি ব্যাকুলি হয়ে । তারপর ক্রমে ক্রমে বিলুর বোধহয় ক্লান্তি এল । অনেকদিন ধরে এক রুগ্নী-স্বামীর ঘর করছে । ক্লান্তি আসা স্বাভাবিক । সঙ্গে অফিসের খাটুনিও যোগ হয়েছে । কিন্তু সে ক্লান্তি একরকম । অন্যদিকে আর একটা ক্লান্তিও আছে । সেটা হল আশা বা ভরসার ক্লান্তি । ও আমাকে একদিন বলল, ইচ্ছাশক্তির জোরে মানুষ সব কিছুকে জয় করতে পারে না । আধুনিক বিজ্ঞানে ইচ্ছাশক্তির কোনো দাম নেই । তুমি ঠিকমতো ওষুধ খাও, চিকিৎসা করা হচ্ছে, ঠিক সেরে যাবে ।

কেন বলল ওকথা ?

ওর ধারণা সারাদিন ইচ্ছাশক্তির ব্যায়াম করলে আমার মন ক্লান্ত হয়ে পড়বে । মাথাও বিগড়ে যাবে ।

দীপনাথ একটু হেসে বলে, তাতেই বা কি ? ও যদি বলেই থাকে তো বলুক না । তুই কান দিস কেন ?

প্রীতম মাথা নেড়ে বলে, কান দিই কারণ কথাটা ওর নিজেই নয় । আর কেউ ওর মুখে কথাটা বসিয়েছে । বিলু আধুনিক বিজ্ঞানের খবর রাখে না, ইচ্ছাশক্তির কার্যকারণও ওর জানা নেই ।

হয়তো হঠাৎ ভেবে ফেলেছে, জেনে ফেলেছে !

তা নয় । আমার অনুভূতি তোমাদের চেয়ে এখন অনেক বেশী প্রখর । আমি তো বাইরে যাই না । তাই চারদিকের সঙ্গে ঘষা খেয়ে খেয়ে আমার অনুভূতি ভৌঁতা হয়ে যায়নি । আমি নিজেকে নিয়ে থাকি, মনে শান দিই, যুক্তি দিয়ে সব কিছুকে বিশ্লেষণ করার অবসর পাই ।

বুঝলাম । বল ।

আমি যে মরতে চাই না এটা বিলুর চেয়ে আর বেশী কে জানে বলো ! আমার নিজস্ব পদ্ধতিতে আমার লড়াই চালাচ্ছি । আমার আশা ছিল, বিলু অন্তত সে লড়াইতে আমাকে সাপোর্ট দেবে । কিন্তু সেই প্রথম দিককার বিলুকে যেমন ঠাণ্ডা আর পর মনে হত, আজকাল বিলু যেন তাই হয়ে গেছে । কোনোদিন আমার ভাবনা-চিন্তার সঙ্গে বিলু তো একমত ছিল না । মাঝখানে একটু হয়েছিল । আবার এখন সেই আগেকার বিলু ।

তোর কী ধারণা ?

প্রীতম মাথা নেড়ে বলে, অন্য কেউ বিলুর ভাবনা-চিন্তাকে প্রভাবিত করে এটা আমার পছন্দ নয় সেজদা ।

অন্য কেউটা কে ? অরুণ ?

তার আমি কি জানি ! আমি তো ওদের দুজনের মধ্যে কী কথা হয় তা জানি না ।

দীপনাথের বুকের ভিতরটা ফাঁকা লাগছিল । এরকম কিছু হবে তা তো সে জানতই । মুখে অবশ্য বলল, বিলুর কথা নিয়ে তুই মাথা ঘামাস না ।

একবারে উদাসীনও থাকতে পারি না । বললাম যে মৃত্যুর সঙ্গে আমার লড়াই একবারেই আমার নিজস্ব । ওষুধ বল, ডাক্তার বল, কেউ তো আমাকে বাঁচিয়ে রাখতে পারবে না । হয়তো আমার ইচ্ছাশক্তিরও তেমন ক্ষমতা নেই । কিন্তু তা বলে লড়াইটায় এত সহজে হেরে যাবো ? কেউ আমার লড়াইটাকে বুঝবে না ?

বিলু ভুল করেছে । আমি ওকে বুঝিয়ে বলব ।

প্রীতম মাথা নাড়ে, তার চেয়ে তুমি আমার বাড়িতে একটা চিঠি লিখে দাও । শতম এসে আমাকে নিয়ে যাক ।

শিলিগুড়িতে যাবি ? হঠাৎ উৎসাহে একটু চৈঁচিয়ে ওঠে দীপনাথ ।

প্রীতম ম্লান মুখে ক্রিস্ট একটু হাসি ফুটিয়ে দীপনাথের দিকে চেয়ে বলে, তুমি ভুলে গেছ সেজদা ?

কি ভুলেছি ?

তোমাকে বলিনি কখনো আমাকে আমার মায়ের কথা, ভাইদের কথা, শিলিগুড়ির কথা বোলো না ! ওসব মনে পড়লে আমি হাল ছেড়ে দিই, আমার লড়াই কবার জোর থাকে না । বলিনি ?

দীপনাথ একটু অবাক হয়ে বলে, কিন্তু এখন যে তুই নিজেই বললি !

কেন বললাম তা তো ভেবে দেখলে না সেজদা !

কেন ?

প্রীতম ঠোঁটকে রবারের মতো টেনে হাসিটা বজায় রাখল । বলল, তার মানে তো দাঁড়ায়, আমি হাল ছেড়ে দিয়েছি, লড়াইয়ে হেরে গেছি । এখন আমার মন মৃত্যুর জন্য প্রস্তুত ।

দীপনাথের কপালে ভাঁজ পড়ে । বহুকাল বাদে সে আজ খুব সীরিয়াস হয় । গম্ভীর গলায় বলে, শোন প্রীতম, বিলুর সামান্য কথায় তোর এত কিছু হয়নি । তুই আমাব কাছে

কিছু লুকোচ্ছিস। বল তো কি হয়েছে !

না, না...বলতে বলতে কোনোদিন যা হয় না তা আজ হল। আচমকা প্রীতমের গলা ভেঙে বসে গেল। চোখ দুটো পলকে রাঙা হয়ে উঠল। সে দু'হাতে মুখ ঢাকলো।

প্রীতম ! প্রীতম ! এই পাগলা ! ওরকম করছিস কেন ?

প্রীতম সাড়া দিল না। মুখ ঢেকে কয়েকটা হেঁচকি তুলল। তারপর গৌজ হয়ে স্থির হয়ে রইল অনেকক্ষণ। যখন মুখ তুলল তখন সে মুখ পাথরের মতো হয়ে গেছে।

দীপনাথ ওকে একটু ঝাঁকুনি দিয়ে বলল, বলবি না তো বলিস না। আমি কিছু শুনতেও চাই না। কিন্তু দোহাই আমার মুখ চেয়ে অন্তত ভেঙে পড়িস না। আর কেউ চাক বা না চাক আমি চাই তুই বেঁচে থাক। আমি তোর ইচ্ছাশক্তির জয় দেখতে চাই। আমি নিজে ইচ্ছের লড়াইতে মার খেয়ে গেছি। আই হ্যাভ নো মর্যালিটি। কিন্তু আমার চোখের সামনে তুই তো আছিস !

প্রীতমের মুখের পাথর নরম হল। একটু হাসলও সে। বলল, সেজদা, তুমি কোনোদিন সাবালক হবে না। ওসব কি বলছো ? আমি তোমার আইডিয়াল ?

দীপনাথ একটু ধাতস্থ হয়। একটু লজ্জাও পায়। তারপর স্ফোভের সঙ্গে বলে, একটু ইমোশন এসে গিয়েছিল। তুই এরকম ভাবে কথা বলিস কেন ?

ঠিক আছে, বলব না। কিন্তু আমি তো বলতে চাইওনি। তুমিই তখন থেকে বলতে বলছ।

দীপনাথ গম্ভীর হয়ে বলে, কিছু কথা আছে না শোনাই ভাল। ওগুলো চাপা থাকলে শাস্তিতে থাকব।

আমিও তাই বলি।

দীপনাথ ঘড়ি দেখে বলে, সাতটা বাজতে চলল, বিলু এখনো এল না ? লাবুই বা কোথায় ?

লাবু পাশের ফ্ল্যাটে ওর সমবয়সী একটি মেয়ের সঙ্গে মাদ্রাজী টিচারের কাছে প্রাইভেটে পড়ে।

অচলা ? বিন্দু ?

বিন্দু রান্নাঘরে আছে। অচলার ছেলের অসুখ বলে কদিন আসছে না।

তুই তাহলে একা ?

ঠিক একা নই। আমার সঙ্গে হাজারো ভূতের ভাবসাধ। তারা আছে।

দীপনাথ হেসে বলে, তোর সঙ্গী ভূত ছাড়া আর কে হবে ? অত পাগলামি সইবে কে ?

তুমি কি এখনই যাবে ?

দীপনাথের একটু কাজ আছে। ঘড়ি দেখে বলল, রাত হল।

যাবে তো যাও।

একটু বসি। বিলুর সঙ্গেও দেখাটা হয়ে যাবে।

প্রীতম মাথা নেড়ে বলে, না, যাও সেজদা। আমি এখন একটু একাই ভাল থাকব। আমার মনে মনে কিছু হিসেব কষতে হবে।

কর তাহলে। কিন্তু হিসেবের অঙ্কে মাইনাস বসাস না। সব প্লাস।

ঠিক আছে। চেষ্টা করব। অন্তত একজন তো আমাকে বেঁচে থাকতে দেখতে চায়।

অনেকেই চায়। তুই জানিস না।

দীপনাথ বেরিয়ে আসে। আজকাল মন ভাল থাকে কমই। তবু আজ বিকেলে যেন

আরো ভরাডুবি হল। খুব আনমনে সে নিউ আলিপুরে যাওয়ার একটা ভীড় ঠাসা বাসে উঠে পড়ল। বহুদিন বোস সাহেবের বাড়িতে যাননি।

বাসে আচমকাই বেলফুলের ঝাঁঝালো গন্ধ এল নাকে। এই এক গন্ধই মনের বিষাদকে উড়িয়ে নিয়ে যায়। আজ বোধহয় বিয়ের তারিখ।

॥ বত্রিশ ॥

টালিগঞ্জ ফাঁড়িতে নামবার মুখে দুটো জিনিস টের পেল দীপনাথ। এক হল, বাইরে হঠাৎ তেঁড়েফুঁড়ে প্রচণ্ড বৃষ্টি নেমেছে, সঙ্গে ঝোড়ো বাতাস। দু নম্বর হল, তার প্যাণ্টের হিপ পকেট থেকে মানিবাগটা খোয়া গেছে। দুটোই দুঃসংবাদ। দুটোর ওপরেই দীপনাথের কোনো হাত নেই। এই প্রচণ্ড ভীড়ের বাসে মানিবাগটা উদ্ধারের চেষ্টা পণ্ডশ্রম। বাইরের এই ঝড়বৃষ্টিতেই তাকে নামতেও হবে।

একেবারে কর্পদকহীন দীপনাথ বেকুবের মতো ভীড়ের বাস থেকে বৃষ্টির মধ্যে খসে পড়ল। দৌড় দৌড়। মোড়ের সিনেমা হলের লবি পর্যন্ত পৌঁছোতেই জামাপ্যান্ট ভিজে চূপসে গেল। ছাদের নীচে নিরাপদ আশ্রয়ে দাঁড়িয়ে সে রুমাল দিয়ে মাথা, ঘাড় মুখ মুছছিল যতখানি সম্ভব। মানিবাগটার জন্য রাগে গা চিড়বিড় করছে। খুব বেশী ছিল না, মেরেকেটে গোটা ত্রিশেক টাকা হবে। কিন্তু এখন মেসে ফেরার পয়সাটাও তার নেই। বোসের কাছ থেকে ধার করতে হবে।

কলকাতা শহরকে সে কতখানি ঘেঁষা করে তা এই হঠকারী বৃষ্টির সন্ধ্যায় ভেজা গায়ে দাঁড়িয়ে হাড়ে হাড়ে বুঝতে পারছিল। নিজের ওপর রাগে ভিতরে ভিতরে ফুঁসে উঠছিল। হিপ পকেটে মানিবাগ রাখাটাই এক নম্বরের বোকামি। তার ওপর সে ভীড়ের বাসেও গাড়লের মতো অনামনস্ক ছিল। সেটা দু নম্বর বোকামি।

বৃষ্টির তোড় কমে আসছিল, দীপনাথের রাগও ঠাণ্ডা হচ্ছিল ক্রমে। মনটা তেতো, বিরক্ত। কলকাতায় তার কম দিন হল না, তবু এখনো সে এ শহরে বাস করার যোগ্যতা পুরোপুরি অর্জন করতে পারেনি।

ঘণ্টাখানেক বাদে যখন বৃষ্টি থামল তখন বাসে এত ভীড় যে কাছে যাওয়াই মুশকিল। তার ওপর খালের ওপর ব্রিজের মুখে এক নিশ্চল জ্যাম জমে গেছে। বাসে উঠবার পয়সা দীপনাথের নেই, উঠলেও সহজে পৌঁছানো যাবে না। সুতরাং দীপনাথ হাঁটা ধরল।

বোস সাহেবের বাড়ি পৌঁছোবার পর তার দুঃখের ভরা পূর্ণ হল। রাঁধুনী লোকটা দরজা খুলে জানাল, মিস্টার বা মিসেস কেউই বাড়ি নেই। কখন ফিরবে বলা যাচ্ছে না।

এই অঞ্চলে দীপনাথের চেনাজানা কেউ নেই। একমাত্র উপায় হল বোস সাহেব বা মণিদীপার জন্য অপেক্ষা করা কিংবা রাঁধুনীর কাছেই কিছু ধার চাওয়া। লোকটা দীপনাথকে চেনে।

দীপনাথ বলল, তা হলে আমাকে অপেক্ষা করতে হবে। জরুরী কাজ আছে।

রাঁধুনী বলল, বসুন, চা করে দিচ্ছি।

ভেজা জামাকাপড়ে দামী সোফাসেটে বসতে একটু দ্বিধা বোধ করে দীপনাথ। ভেবেচিন্তে সে একটা রেকসিনে মোড়া চেয়ারে বসল। তারপর ম্যাগাজিন তুলে ছবি দেখতে লাগল।

নিজের মুখের ভাব কোনোদিনই গোপন করতে পারে না দীপনাথ। তার মন খারাপ

থাকলে মুখের ভাবে অবশ্যই বিমর্ষতা ফুটে উঠবে। আরো ঘণ্টাখানেক বাদে যখন মণিদিপা ফিরল তখন দরজায় দাঁড়িয়েই তাকে দেখে উদ্বেগের গলায় জিজ্ঞেস করল, কী হয়েছে ?

দীপনাথ খুব বেপরোয়া মতো একটু হাসবার চেষ্টা করে বলল, কোথায় কি হয়েছে ! কিছু হয়নি তো।

মণিদিপা গম্ভীর হয়ে বলে, না হলেই ভাল।

দীপনাথ এক ঝলক চেয়েই চোখ নামিয়ে নেয়। বহুকাল বাদে মণিদিপার সঙ্গে দেখা।

এত সুন্দর দেখাচ্ছে। বোস সাহেব একে ডিভোর্স করবে কোন প্রাণে !

মণিদিপা ভিতরে গেল না। দীপনাথের মুখোমুখি বাইরের ঘরেই বসল। আজ তার সাজগোজ তেমন চোখে পড়ার মতো নয়। হলুদ লাল কালো ডুরের একটা তাঁতের শাড়ি পরনে। চুল এলোখোঁপায় বাঁধা। বসে আর একটা ম্যাগাজিনের পাতা ওন্টাতে লাগল।

দুজনের মধ্যে একটা অস্বস্তি আর সংকোচের বলয়। কেউ সেটা ভাঙতে চায় না। দীপনাথ সমস্ত অপমান মনে রেখেছে, কিছুই ভোলেনি। এই মেয়েটাকে চোখের সামনে দেখলে বা টেলিফোনে এর গলার স্বর শুনলেও তার স্নায়ু দুর্বল হয়ে যায়। প্রতিশোধের কথা মনে থাকে না।

রান্নার লোকটা দীপনাথকে সযত্নে ট্রেতে করে চা আর ঘরে তৈরী কেক দিয়ে মণিদিপার দিকে সসন্ত্রমে চেয়ে বলল, টি মেন্সাব ?

মণিদিপা চোখ না তুলেই মাথা নাড়ল। খাবে না।

দীপনাথ সসঙ্কোচে চায়ের কাপটার দিকে চেয়ে ছিল। কিছু বলার নেই, একটা জড়তা বোধ করছে।

মণিদিপা ম্যাগাজিনটা মুখে ধরে রেখেই বলল, বোস সাহেবের সঙ্গে কোনো দরকার ছিল বুঝি ?

ছিল একটু।

দরকারগুলো অফিসে মিটিয়ে নিলেই তো হয়। অফিস আওয়ারসের পরও কেন একজন লোককে এত দূর দৌড়ে আসতে হবে বুঝি না।

দীপনাথ বুঝতে পারল না, এটা মণিদিপার বিরক্তি না অনুকম্পা। হয়তো কোনোটাই নয়। সে বলল, অফিসের বাইরেও কাজ থাকে।

মণিদিপা হুঁ কুচাক বলে, আপনি চা খান, জুড়িয়ে যাচ্ছে।

খাচ্ছি। বলে দীপনাথ কাপে চুমুক দেয়।

কোমপানি জাতে ওঠার পর বোধ হয় আপনার কাজ আরো বেড়েছে।

বোস সাহেবের হয়তো বেড়েছে। দীপনাথ বলল।

আপনার বাড়নি ?

না। আমি তো জাতে উঠিনি। এই প্রথম বুদ্ধিমানের মতো একটা মন্তব্য করতে পেরে খুশি হল দীপনাথ।

কোনোদিন উঠবেনও না।

উঠব। যেদিন সর্বহারাদের একনায়কত্ব হবে।

ম্যাগাজিনটা টেবিলের ওপর ফটাস করে আছড়ে ফেলে সোজা হয়ে মণিদিপা ফুঁসে ওঠে, এ সব কি ইয়াক্কির কথা ?

দীপনাথ চমকে উঠলেও ঘাবড়ে যায়নি। এ মেয়েটাকে খোঁচা দেওয়া যে বিপজ্জনক তা সে জানে। কিন্তু খোঁচা যখন দিয়েই ফেলেছে তখন পিছু-হটাও বোকামি। তাই সে মৃদুস্বরে

বলল, সর্বহারার সব রকম কোয়ালিফিকেশন আমার আছে। অন্তত আজ এই মুহূর্তে আমি সর্বহারা।

মণিদীপা দুই বিশাল চোখে তাকে ভস্ম করে দিতে দিতে বলে, তার মানে ?
একটু আগে বাসে আমার পকেটমার হয়েছে। মেসে ফেরার বাসভাড়া পর্যন্ত নেই।
দীপনাথ ভেবেছিল মণিদীপা হাসবে। কিন্তু হাসল না। চোখের দৃষ্টিতে ভৎসনা মিশিয়ে
একটু তাকিয়ে থেকে বলল, কত গেছে ?

বড়লোকের চোখে বেশী নয়। তবে গরীবের অনেক। প্রায় ত্রিশ টাকা।

কবে যে আপনাকেও চুরি করে নেয়। টাকাটা কোথায় ছিল ?

হিপ পকেটে।

পুলিসে জানিয়েছেন ?

দীপনাথ একটু অবাক হয়ে বলে, পকেটমার হলে কেউ পুলিসে যায় নাকি ? এ রকম
তো শুনিনি। গিয়েও লাভ হয় না।

তবু পুলিসকে জানানোটা নিয়ম।

খামোকা সময় নষ্ট। আমি ব্যাপারটা মেনে নিয়েছি। হয়তো এক গরীবের পকেট কেটে
আর এক গরীবের কিছু উপকার হচ্ছে।

পকেটমাররা গরীব হবে কেন ? ওদের বিরাট অর্গানাইজেশন থাকে। আপনি খুব
সহজই সব কিছু মেনে নেন। ওটা একদম ভাল নয়। প্রতিবাদ বা প্রতিরোধ যত সামান্যই
হোক তার একটা মূল্য আছে, এটা মানেন তো ?

আমাদের দেশে নেই।

কে বলল নেই ?

আমিই বলছি।

আপনি কখনো প্রতিবাদ বা প্রতিরোধ করেছেন জীবনে ? না কবলে বুঝবেন কি করে ?
প্রতিরোধ বা প্রতিবাদের ক্ষমতা থাকলে এই ঝড়-বাদলের সন্ধেবেলা এত দূরে বসের বাড়ি
বয়ে আসতেন না।

দীপনাথ একটু অধৈর্যের গলায় বলে, বাস সাহেবের কাছে তো আমি আসিনি। গরজটা
আমারই।

কিসের গরজ ?

আপনি সতাই বিয়েটা ভেঙে দিচ্ছেন ?

মণিদীপা একথা বোধহয় একটু হকচকিয়ে যায়। তারপর ভীষণ তেতো আর বিরক্ত
গলায় বলে, এটা কি অন্যের ভীষণ পার্সোনাল ব্যাপারে হাত দেওয়া নয় ?

দীপনাথ এ কথাটার জবাব তৈরী রেখেছিল। সে বলল, বিয়ে করা বা বিয়ে ভাঙা
কোনোটাই খুব পার্সোনাল বিষয় হতে পারে না, মিসেস বাস। যদি হত তাহলে বিয়েতে
সোস্যাল গ্যাডারিং, পুরুত, ম্যারেজ রেজিস্ট্রার বা সাক্ষী দরকার হত না।

আমি ওসব জানি না। প্রসঙ্গটা আমার কাছে ভাল লাগে না।

আমারও লাগে না। তবে আমি আপনাদের ভাল চাই বলেই জিজ্ঞেস করছি, বিয়েটা
বাঁচানো কোনোভাবে সম্ভব কিনা ?

বোধহয় না।

কেন, মিসেস বাস ?

বিয়েটা আমরা কেউই ভাঙছি না বোধহয়। আপনিই ভেঙে যাচ্ছে।

দীপনাথ আচমকা জিঙ্ক্রেস করল, সেদিন আপনি টেলিফোনে আমাকে বলেছিলেন, স্নিগ্ধদেবের কথা মিস্টার বোস জানেন না। কিন্তু কথাটা সত্যি নয়, মিসেস বোস। স্নিগ্ধদেব আপনাদের এ বাড়িতে একসময়ে আসতেন। বোস সাহেবের সঙ্গে তার পরিচয়ও ছিল।

মণিদীপা হঠাৎ একটু অস্বস্তি বোধ করে। বিরক্তির ভাব দেখিয়ে ঠোঁট উন্টে বলে, হতে পারে। আমার অত মনে নেই। তবে এর মধ্যে আবার স্নিগ্ধকে কেন?

দীপনাথ সামান্য ম্লান একটু হেসে বলল, আজকাল বারবারই কেন যেন স্নিগ্ধদেবের কথা আমার মনে হয়। ভাবি, স্নিগ্ধই হয়তো আমাদের আগামী দিনের নেতা, মুক্তিদাতা, দেশের হৃদয়।

মণিদীপা এ কথায় রাগ করবে না হাসবে তা ঠিক করতে সময় নিল। তারপর হেসেই ফেলল। বলল, হতেও পারে। ঠাট্টার ব্যাপার নয়।

আমি ঠাট্টা করিনি। যিনি আড়াল থেকে এত চোখা চালাক হাজির-জবাব একটি মহিলাকে চালাতে পারেন তাঁর ক্ষমতা অনেক।

দাঁতে দাঁত পিষে মণিদীপা বলে, আপনাকে এ খবর কে দিয়েছে যে, স্নিগ্ধ আমাকে চালায়?

আমাকে স্নিগ্ধদেবের ঠিকানাটা দেবেন?

কেন? বড় চোখে চেয়ে সন্দিগ্ধ গলায় মণিদীপা জানতে চায়।

আমি তাঁর সঙ্গে দেখা করব।

কেন দেখা করবেন?

আমি জানতে চাই কেন আপনাদের বিয়ে ভেঙে যাচ্ছে।

স্নিগ্ধ তা কি করে বলবে? আপনার কি সন্দেহ যে, আমি স্নিগ্ধর সঙ্গে লুকিয়ে প্রেম করি?

না। প্রেম করার হলে আপনি প্রকাশ্যেই করতেন।

এটা কি কমপ্লিমেন্ট?

ধরে নিতে পারেন।

বেশ ধরলাম। তা হলে আপনি বা আপনার স্পাইনলেস বস ভাবেন না যে, আমি স্নিগ্ধর সঙ্গে প্রেম করি?

না, ভাবি না।

তা হলে ডিভোর্সের ব্যাপারেই বা স্নিগ্ধর কি করার থাকতে পারে?

উনি আপনার প্রেমিক না হলেও আপনার নেতা।

তা হতেই পারে।

তিনি প্রভাব বিস্তার করলে আপনি হয়তো বোস সাহেবকে ছেড়ে যাওয়ার সিদ্ধান্তটা পাষ্টাবেন।

নেতারা আজকাল এসবও করেন নাকি?

আমরা তাঁকে অনুরোধ জানাব।

আমরা মানে? আপনার সঙ্গে আরো কেউ আছে নাকি?

দীপনাথ একটু বাধা পেল, ভাবল। ভেবে বলল, না, আমি একাই যাবো।

তাই বলুন। আমরা শুনে আমি চমকে গিয়েছিলাম।

আপনি কি ভেবেছিলেন?

ভাবছিলাম, আপনার সঙ্গে বোধহয় বোস সাহেবও আছেন।

না, বোস সাহেবের আত্মসম্মান বোধ একটু বেশী।

মণিদিপা তীব্র শ্লেষের হাসি হেসে বলে, বোস সাহেবের ঘটে আপনার চেয়ে বুদ্ধিও কিছু বেশী আছে। উনি বোকা নন বলেই স্নিগ্ধর কাছে যাওয়ার কথা ভাবেন না।

আমি কি স্নিগ্ধদেবের কাছে গেলে খুবই বোকামি করব ?

খুবই বোকামি করবেন।

আমি কি খুবই বোকা ?

এখন পর্যন্ত তেমন বুদ্ধির কোনো পরিচয় দেননি।

দীপনাথ প্রাণপণে ভাবার চেষ্টা করছিল। তার বুদ্ধিবৃত্তি এখন ঠিকমতো কাজ করছে না। মাথাটা এলোমেলো, বিজ্ঞাস্ত। একটু ঘাবড়েও যেন যাচ্ছে সে। ভেবেচিন্তে বলল, হয়তো আমি বোকাই। তবু আমি আপনাদের ভাল চাই।

কি ভেবে বুঝলেন যে, বোস সাহেবের সঙ্গে বিয়েটা না ভাঙলেই ভাল হবে ?

দীপনাথ গুছিয়ে বলতে পারবে না জানে। তবু কিছু কথা তার বুকে ঠেলাঠেলি করছে। সে মৃদুস্বরে বলল, বিয়ে ভাঙলে বিশ্বাসের ভিত নড়ে যায়।

তার মানে ?

ডিভোর্সের চলন বেশী হলে ভবিষ্যতে স্বামী বা স্ত্রী কেউ কারো ওপর নির্ভর করতে পারবে না। অবিশ্বাস এসে পড়বে। কেউ সুখী হবে না।

ডিভোর্স না করেও তো অনেকেই সুখী নয়। মণিদিপার মুখে মৃদু শ্লেষের হাসি।

তা বটে। কিন্তু আপনি যদি বোস সাহেবকে সহিতে না পারেন তবে ভবিষ্যতে যে অন্য কাউকে সহিতে পারবেন তার তো গ্যারান্টি নেই। হয়তো সামান্য সওয়া বওয়ার অভাবে একটার পর একটা বিয়ে ভেঙে যাবে। মানুষের ঘরদোর খাঁ খাঁ করবে। অফিস থেকে ফেরার সময় একজন মানুষ ঠিক ঠিক বুঝতে পারবে না, ঘরে তার বউ আছে কি নেই।

হাউ ট্রাজিক ! বলে মণিদিপা একটু শব্দ করে হেসে ফেলে।

দীপনাথ গৌয়ারের মতো তবু বলল, কাজটা ভাল হচ্ছে না মিসেস বোস।

মণিদিপার ঝলমলে মুখের ভ্রুটা হঠাৎ কঁচকে যাওয়ায় ভীষণ থমথমে হয়ে গেল। তেমনি গভীর গলায় বলল, বোস পদবীটা কি আমার গায়ে লেগে আছে ? আপনি আজ পর্যন্ত আমার নাম ধরে ডাকার সাহস পাননি। ভারী আশ্চর্য !

দীপনাথ অধৈর্যের গলায় বলে, ওসব ইররেলেভেন্ট ব্যাপার। আপনার নাম ধরে ডাকতে আমার এখনো একটু সংকোচ আছে। আমি চট করে ফ্রী হতে পারি না।

তাই দেখছি। মণিদিপার ভ্রু আবার সটান হল এবং মুখে মৃদু হাসি ফুটে উঠল। বেশ আবার ঝলমলে দেখাল তাকে। মৃদু স্বরে বলল, আপনি সত্যিই খুব ভাল লোক। কিন্তু আমার বিশেষ কিছু অন্টারনেটিভ নেই। আপনি যখন অনেকখানিই জেনে ফেলেছেন তখন আপনাকে আর একটু জানাতে বাধা নেই। শুনুন, ডিভোর্সের পর আমি আর কাউকে বিয়ে করতে যাব না, স্নিগ্ধর সঙ্গে অবৈধ প্রেম কবব না। এমন কি আপনার সঙ্গেও নয়।

‘যাঃ, কী যে বলেন !

মণিদিপা মন্তব্যটা যেন শুনতে পায়নি এমন উদাসীনভাবে বলল, আপনাকে আগেও বলেছি, আমার ধ্যানধারণার সঙ্গে মিস্টার বোসের কোনো মিল নেই। আমরা জাস্ট চুক্তিবদ্ধ স্বামী-স্ত্রী। আমাদের সম্পর্কটা এখন একদম স্টেলমেট হয়ে গেছে।

আপনি কি খুব অহংকারী ?

মণিদিপা একটু চেয়ে থেকে গভীর মুখেই মাথাটা ওপরে নীচে নেড়ে বলল, ভীষণ।

আমি সহজে কারো কাছে মাথা নীচু করতে পারি না ।

হতাশার গলায় দীপনাথ বলে, মিস্টার বোসও তাই । সমস্যা হল দুজন অহংকারীকে কি করে বশে আনা যায় । একজন একটু মাথা না নোয়ালে তো হয় না ।

মণিদীপা গাড় এক দৃষ্টিতে দীপনাথকে দেখছিল । এ মেয়েটা বেশ অকপটে চোখে চোখে তাকাতে পারে । সম্ভবত ওর মনে পাপ নেই । মণিদীপা না হেসেই বলল, আপনি তো বিয়ে করেননি, স্বামী-স্ত্রীর এই প্রবলেমটার কথা জানলেন কি করে ?

জানি ।

মণিদীপা অন্যমনে দেয়ালে একটা ক্যালেন্ডারের দিকে চেয়ে বলল, বোধহয় স্বামী-স্ত্রীর মধ্যে সবচেয়ে বড় প্রবলেম হল অহংকারের লড়াই ।

আপনি কি তা মানেন ?

মণিদীপা অবাক হয়ে বলল, মানি বলেই তো বলছি ।

তা হলে তো প্রবলেমটা থাকে না । সলুভ হয়ে গেল ।

হল না । একটা মানুষ কি সহজে নিজেকে বদলাতে পারে ?

কিন্তু বদলালে যদি ভাল হয় ?

ভাল হয় কিনা তা দেখার জন্য তা হলে মানুষকে দীর্ঘকাল অপেক্ষা করতে হবে । হয়তো বারে বারে বদলাতে হবে । মানুষ তো পুতুল নয় ।

তা হলে কি হবে ?

কিছু হবে না । এসব প্রবলেম অত সহজে মেটে না । তার চেয়ে ডিভোর্স ভাল ।

দীপনাথ একটা দীর্ঘশ্বাস ফেলল ।

মণিদীপা উঠে দাঁড়িয়ে বলল, দাঁড়ান, আপনার বাসভাড়াটা এনে দিই ।

দীপনাথ স্নান মুখে বলল, চলে যেতে বলছেন তো ?

মণিদীপা যেমন-টপ করে দাঁড়িয়েছিল তেমন টপ করে বসে পড়ল । অত্যন্ত ব্যথিত চোখে চেয়ে বলল, মানেটা বুঝি তাই দাঁড়াল ?

তা জানি না । তবে হঠাৎ বাসভাড়া দেওয়ার কথা শুনে মনে হল আপনি আমার মধ্যস্থতার ব্যাপারটা তেমন পছন্দ করছেন না ।

সে তো ঠিকই । আমার ব্যক্তিগত ব্যাপারে অন্য কারো মতামত আমি পছন্দ করি না । কিন্তু তা বলে আপনাকে আমার অপছন্দ নয় ।

দীপনাথের ফর্সা মুখ লাল হয় একটু ।

মণিদীপা তাকে শিউরে দিয়ে বলল, বহুকাল আপনি আসেননি । হয়তো আমার ওপর রাগ করেছিলেন । কিন্তু আপনাকে আমার খুব দেখতে ইচ্ছে করেছিল কদিন । খুব ইচ্ছে করেছিল । -বিশ্বাস করুন । আপনার ভালমানুষীর একটা দারুণ অ্যাট্রাকশন আছে ।

দীপনাথের একটু শ্বাসকষ্ট হচ্ছিল । তবু সে নিজেব আবেগের ওপর উঠতে পারল প্রাণপণ চেষ্টায় । বলল, মিস্টার বোসের কি কোনো অ্যাট্রাকশনই নেই ?

- হঠাৎ বোস সাহেবের কথা উঠল কেন ? বলে মণিদীপা হেসে ওঠে । তারপর বলে, আপনার বোধহয় এখনো ধারণা, আমি আপনার প্রেমে পড়েছি ।

না, না, তাই বললাম নাকি ? দীপনাথ আঁকুপাকু করে ওঠে ।

মণিদীপা স্নিগ্ধ স্বরে বলে, বোস সাহেবের কিছু অ্যাট্রাকশন নিশ্চয়ই আছে দীপনাথবাবু । তবে সেগুলোর কোনো অ্যাপিল আমার কাছে নেই ।

একটা মানুষের তো সবরকম সঙ্গুণ থাকতে পারে না । তার যেটুকু আছে সেটুকুকে

মূল্য দিলেও হয় ।

আপনি আজকাল পুরোপুরি বোস সাহেবের দালাল হয়ে গেছেন । কিন্তু বোস সাহেব আপনাকে এ কাজের ভার দিয়েছে বলে মনে হয় না । কারণ, ওর কাছে আমারও কোনো অ্যাট্রাকশন নেই ।

দীপনাথ মাথা নেড়ে বলে, না, আমি বোস সাহেবের দূত হয়ে আসিনি । তবে আপনাদের দুজনকে আমার বেশ লাগত । ছাড়াছাড়ি হয়ে গেলে খারাপ লাগবে ।

আপনার ভাল লাগার মতো কিছু যে করতে পারছি না তার জন্য দুঃখিত ।

দীপনাথ মাথা নীচু করে বলল, আমার ভাল লাগার প্রশ্নটা তো বড় নয় । আমার নিজের এক পিসীর কথা খুব মনে পড়ছে । আমি সেই পিসীর কাছে শিলিগুড়িতে মানুষ । পিসীর দাঁত উঁচু ছিল, সাজগোজ করতে জানতই না, লেখাপড়ারও তেমন বালাই ছিল না । যাকে বলে ভয়েড অফ অল উওম্যানলি অ্যাট্রাকশন, কিন্তু পিসেমশাই তো তার সঙ্গেই একটা জীবন কাটালেন ।

মণিদীপা গম্ভীর হয়ে বলে, ওসব বলে লাভ নেই । আমার মা বাবাও একসঙ্গে এতকাল কাটিয়েছেন । তাঁদের মধ্যে রিলেশনও খুব ভাল । সেই আমলের বিয়েটা ছিল পারিবারিক । এখন ম্যান উওম্যান রিলেশন । পৃথিবী তো থেমে নেই, দীপনাথবাবু ।

থেমে নেই, কিন্তু তার গতিটা খুব মহৎ লক্ষ্যে হয়তো যাচ্ছে না ।

সেটা আপনার ধারণা । আমি মনে করি কিছু কিছু জিনিসকে ভেঙে ফেলে ভিতরকার সত্যটিকে খুঁজে দেখা উচিত । রিভ্যালুয়েশনটাই বেঁচে থাকার বড় লক্ষণ ।

দীপনাথ হঠাৎ হাত বাড়িয়ে বলল, আমাকে বাসভাড়াটা দিন । অনেক রাত হল ।

মণিদীপা ঠোট দাঁতে চেপে একটু চেয়ে থেকে বলে, নাউ হু ইজ বিয়িং রুড ? কথায় মাঝখানে বাসভাড়া চাওয়ার মানে কি আমাকে অপমান করা নয় ?

দীপনাথ উঠে দাঁড়ায় এবং তেতো গলায় বলে, আপনাকে অপমান করার ইচ্ছে ছিল না । আমি তো অপমান করতে আসি না, অপমানিত হতেই আসি ।

এটা থিয়েটারী সংলাপ হয়ে গেল । তবু মণিদীপা ঠাট্টা করল না । গম্ভীর মুখে নিজের করতলের দিকে চেয়ে রইল কিছুক্ষণ । তারপর আচমকা উঠে গিয়ে মিনিট পাঁচেক বাদে ফিরে এসে নিঃশব্দে তিনটে দশ টাকার নোট সেন্টার টেবিলের ওপর ছাইদানীতে চাপা দিয়ে রাখল ।

দীপনাথ তাকিয়ে বলল, অত টাকা দিয়ে কি হবে ?

মণিদীপা জবাব দিল না ।

দীপনাথ টাকাটা ঝুল না, গোঁয়ারগোবিন্দর মতো দাঁড়িয়ে থেকে বলল, আমার পকেটমারের পুরো টাকাটাই তো আপনার দেওয়ার কথা নয় । পঞ্চাশটা পয়সা পেলেই আমার হয়ে যাবে । আর সেটাও ধার হিসেবে । কালই ফেরত দেবো ।

মণিদীপা যেন চটকা ভেঙে বলল, ওঃ, তাই তো । মনে ছিল না যে অহংকারী আমি একাই নই ।

আমি অহংকারী নই । অহংকার করার কিছুই যে আমার নেই তা তো আপনি ভালই জানেন ।

আপনার সবকিছু আমি জানি এ ধারণা কি করে হল ? আমি কারো কিছু জানতে চাইও না । বলে মণিদীপা আবার গিয়ে একটা আধুলি এনে উন্টাস করে টেবিলে ফেলে দিল । আধুলিটা অচল কিনা দেখে নিয়ে দীপনাথ পকেটে ফেলে ।

চলি তাহলে ।

মণিদীপা জবাব দিল না । মেঝের দিকে চেয়ে চুপ করে দাঁড়িয়ে রইল বাইরের ঘরে । দীপনাথ আবার বলে, আসছি । বোস সাহেব এলে বলবেন, আমি এসেছিলাম । মণিদীপা হঠাৎ ফুঁসে উঠে বলল, পারব না । বলেই ঝাপটা দিয়ে ভিতরে চলে গেল ।

॥ তেত্রিশ ॥

ট্রেনের কথা একদম খেয়াল থাকে না দীপনাথের । অথচ কৌটো কোম্পানির মালিক নীলাশ্বর ভদ্র তাকে শিখিয়েছিল, কলকাতায় এখানে সেখানে যাতায়াতের সময় যদি কাছাকাছি রেল স্টেশন থাকে তবে তাতেই যাতায়াত করবেন । কলকাতার বাসে-ট্রামে ওঠা মানে কিছুক্ষণ নরকবাস । তার চেয়ে ট্রেন চের ভাল ।

কিন্তু দীপনাথের একমাত্র দূরে যাওয়ার কথা ভাবলেই ট্রেনের কথা মনে পড়ে । অথচ কলকাতায় লোকাল ট্রেন যে কত উপকারী তা খেয়াল থাকে না ।

আজ অবশ্য খেয়াল হল । মণিদীপার দেওয়া আধুলি পকেটে নিয়ে বেরিয়ে সে আজ প্রথম কালিঘাট স্টেশনের কথা ভাবল । মিনিট দশেক হাঁটলেই ট্রেনের নাগাল ।

বাড়ির বাইরে এসে সে একবার দোতলার অঙ্ককার বারান্দার দিকে মুখ ফিরিয়ে তাকাল । ততটা অঙ্ককার নয় যাতে মণিদীপাকে দেখা যাবে না । চুপচাপ রেলিঙে ঝুঁকে দাঁড়িয়ে আছে । রাস্তার আলো অতদূরে মৃদু হয়ে পৌঁছেছে, সঙ্গে একটা বড় গাছের চিকড়ি-মিকড়ি ছায়াও ।

দীপনাথ স্টেশন পর্যন্ত দৃশ্যটাকে বয়ে আনল ।

ফাঁকা স্টেশন প্ল্যাটফর্মে কুড়িয়ে বাড়িয়ে জনা পাঁচেক যাত্রী হবে । স্টেশনঘরে জিজ্ঞেস করে জানল ট্রেনের এখনো দেরী আছে ।

সিগারেট ছেড়ে দেওয়ার পর আজকাল কোনো কিছুর জন্য অপেক্ষা করতে গেলে সময়টা বড় দেরীতে কাটে, অপেক্ষা দীর্ঘ মনে হয় । তবু সিগারেট ছেড়েছিল বলে দীপনাথ আজকাল নিজের পকেটে হাত দিয়ে পয়সার অস্তিত্ব টের পায় । দিনে কম করেও আড়াই থেকে তিন টাকা ছিল গার সিগারেট আর দেশলাইয়ের খরচ । একদিন খুব শাস্তভাবে সে এই খামোকা খরচটার কথা ভাবল । পরদিনই সিগারেটের বদলে মেনথল দেওয়া লজেনস কিনল এক ডজন । লজেনস মুখে ফেলে মুখের সরস ভাবটা বজায় রাখল, সিগারেট আর ঝুল না । কোনো কিছু ছাড়তে হলে এক ঝাঁকিতেই ছাড়তে হয়, ধীরে ধীরে ছাড়া যায় না ।

ঠিক সেই সিগারেটের মতোই সহজে যে সব ছাড়া যাবে তা তো নয় । স্টেশনের একটা বেনচের কোণায় বসে দীপনাথ কেবলই যখন অঙ্ককার বারান্দায় দাঁড়ানো মণিদীপার কথা ভাবছিল তখন তার মনে হল, এটা ছাড়া যায় না । এটা ছাড়লে বাঁচার কোনো অর্থ থাকে না । জীবনের প্রতিটি মিনিটই তবে অসহনীয় এক একটি ঘটায় দাঁড়াবে ।

আবার ভাবল, একটু আগেই না সে বিশ্বাসের কথা বলছিল !

মুশকিল হল দীপনাথের প্রিয় কোনো চিন্তা নেই, একমাত্র আজকাল মণিদীপাকে ভাবা ছাড়া । সে কি করে একা তার অবসরকে ভরে তুলবে ।

বৃষ্টির জল এখানে সেখানে জমে আছে । প্ল্যাটফর্মের মোরম ভেজা । ভ্যাপসা একটা গরম থম-ধরা ভাব । স্টেশনের আলোর সংখ্যা এতই কম যে চারদিক ভাল করে দেখা যায়

না। এই স্টেশন থেকে কোনোদিন গাড়ি ধরেনি দীপনাথ, কোনোদিন ট্রেন থেকে নামেও নি এই স্টেশনে। আজই প্রথম। আধুলি ভাঙিয়ে শিয়ালদার টিকিট কাটবার পর খুব অল্প কিছু খুচরোই অবশিষ্ট আছে পকেটে। পকেট থেকে পয়সাগুলো বের করে হাতের মুঠোয় ধরে থাকে দীপনাথ। আধুলিটায় মণিদীপার স্পর্শ ছিল। এই পয়সাগুলোয় বুকিং ক্লার্কের হাতের ছোঁয়া আছে মাত্র তবু এও তো মণিদীপারই স্পর্শের ভাঙানো খুচরো।

আজই, এই মুহূর্তে মণিদীপাকে বিসর্জন দেওয়ার জন্য দীপনাথ আচমকা পয়সাগুলো ছুড়ে দিল লাইনের দিকে। ঠুং ঠাং শব্দ হল অদূরে। দু-একজন অন্ধকারে মুখ তুলল শব্দের দিকে। লাইনের ওপর গাড়ির আলো এসে পড়ল তখন।

গাড়িতে কোনো ভীড় নেই, বরং অস্বস্তিকর রকমের ফাঁকা। দীপনাথ উঠল এবং ফাঁকা বেনচে খুব হাত না ছড়িয়ে বসল।

দীপনাথ !

উ !

এবার একটা বিয়ে করো।

আমি অপদার্থ, অপদার্থদের বিয়ে করতে নেই।

বিয়ে কর দীপনাথ, তাহলে অন্তত সন্ধ্যাবেলা ফিরে যেতে ভাল লাগবে। মেসবাড়িতে ফেরা তো ঠিক ফেরা নয়।

কথাটা ঠিক। প্রতিদিনই মনে হয়, কোথাও ঠিক ফিরে যাচ্ছি না। কিন্তু শুধু ওটুকুর জন্য অতটা রিসক নেওয়া কি ভাল ?

তবে কী ভাল দীপনাথ ? পরকীয়া ?

পরকীয়া ? ছিঃ ছিঃ, তা কেন ?

তবে বিয়ে করো দীপনাথ। জীবনে একজনের কাছে অন্তত পুরোপুরি উন্মোচন করতে পারবে নিজেকে। এখন এটা তোমার দরকার।

ভাবছি। বরং আর একটু ভাবি।

তুমি ভাবতে বড় ভালবাসো। অত ভেবে ভেবে ঘুমু পাখি হয়ে যেও না। সঙ্গে কিছু কর।

বিয়ে করলে খাওয়ানো কি ?

বোস তো চাকরি দিচ্ছে।

যদি দেয়। বোসকে তো ঠিক বোঝা যায় না।

বলো কি ! বোস যে তোমার বন্ধু !

তবু বোস সাহেবের মতো লোককে বিশ্বাস নেই হে, হয়তো এ জীবনে বিয়েটা ঘটেই উঠবে না।

কি রকম মেয়ে হলে হবে তোমার দীপনাথ ?

খুব সুন্দর কিছু নয়। মিষ্টি চেহারাটা হবে। খুব ভালবাসতে জানবে আর....আর কি ! আর কিছু নয় ?

আর খুব বিশ্বস্ত হবে। খুব বিশ্বস্ত।

বাঃ।

তবে একটু ভয় করে। ভয় করে।

কেন বলো তো !

আমার মেজদা শ্রীনাথ আর মেজবৌদির মধ্যে তো দেখছি। বিলু আর শ্রীতমের মধ্যেও

দেখছি। বোস সাহেব আর মণিদীপার ব্যাপারও জানি। তাই ভয় করে।

যদি মণিদীপাকে বোস সাহেব ডিভোর্স করে তাহলে কখনো তাকে বিয়ে করতে পারবে না দীপনাথ ?

পারব। নিশ্চয়ই পারব।

ভেবে বলো। ভাল করে ভেবে দেখ।

পারব। বলছি তো। তবে সেটা ঘটবে না।

যদি ঘটে ?

ঘটবে না। মণিদীপা কি আমাকে ভালবাসে ?

ভালবাসার কথা থাক দীপনাথ। আমি বলি বিশ্বস্ততার কথা। একটু আগেই বলছিলে না যে, মানুষের ঘর-সংসার খাঁ খাঁ হয়ে যাবে !

বলছিলাম।

বিশ্বস্ততার কথা বলছিলে ?

হঁ। তাও।

মণিদীপাকে বিশ্বাস করতে পারবে ?

পারব না কেন ?

কি করে পারবে ? সে যে বিশ্বাসের ঘরে আগুন দিয়েই আসবে, যদি আসে।

আসবে না। ও রকম কিছু ঘটবে না।

যদি ঘটে ?

বলেছি তো, যদি আসে তবে বিনা প্রশ্নে তাকে নেবো।

তবে একটু আগে তাকে যে বড় বিসর্জন দিলে !

আমার মনে হয় ওরা বিয়ে ভাঙবে না। যদি না ভাঙে তবে মণিদীপার ভালর জন্যই ওকে মন থেকে বিসর্জন দেওয়া আমার উচিত।

তাহলে প্রতিমা ভাসান হয়ে গেল বলছ ! আর ওকে নিয়ে ভাববে না ?

না। যেভাবে সিগারেটের নেশা ছেড়েছিলাম ঠিক সেইভাবে ছাড়ব।

জানি সিগারেট ছেড়ে মেনথল দেওয়া লজেনস খেতে। এখন কে তোমার লজনচুস হবে দীপনাথ ? বীথি ?

না, না ! ওকথা বোলো না। ঐ আমার একটা মাত্র পাপ, মাত্র একবারের পদস্বলন !

তাই তো বলি দীপনাথ, বিয়ে করো। তাহলে আর দুনিয়াটা এত গোলমালে লাগবে না।

শিয়ালদা সাউথ স্টেশনে ঘরমুখো যাত্রীদের হাউড় ভীড়, গাড়ি থামতে না থামতেই ঝাঁপিয়ে পড়ল কামরায়। ঠেলা গুঁতো খেয়ে, ঘষটে, চেপটে অতি কষ্টে নামে দীপনাথ। প্র্যাটফর্মের থিকথিকে ভীড় কেটে ফটকের দিকে এগোয়।

সুখেন ঘরেই ছিল। পাজামা পাঞ্জাবি পরে যেন বেরোবার মুখে বসে আছে। দীপনাথকে দেখেই বলল, আমি আপনার জন্যই ওয়েট করছিলাম। বাইরের জামা-কাপড় আর ছাড়বেন না। চলুন বেরোই।

কলেজের পড়ুয়া ক্রমমেটটি আজ ঘরেই আছে। খুব কম কথা বলে, একটু অভদ্র রকমের চুপচাপ থাকে। সে আজ খুব নিবিষ্ট মনে বইখাতা খুলে পড়াশুনো করছে।

দীপনাথ আড়চোখে তাকে দেখে নিয়ে বলল, কোথায় ?

বাইরে চলুন বলছি।

দীপনাথ বিরক্ত হয়। সুখেনের বন্ধুত্ব আজকাল তার স্বাস্রোধ করে দিচ্ছে। কিন্তু পাছে

পড়ুয়া ছেলেটির সামনেই কাণ্ডজ্ঞানহীন সুখেন বেফাঁস কোনো কথা বলে ফেলে সেই জন্য সে ঘরের বাইরে এল।

রাস্তায় এসে সুখেন বলে, আজ বীথি আপনাকে নেমস্তন্ন করেছে।

একটু চমকে উঠে দীপনাথ বলে, কেন ?

সেদিন আপনাকে ঠিকমতো কিছু খাওয়াতে-টাওয়াতে পারিনি বলে দুঃখ করছিল। আজ আমার অফিসে ফোন করে বলল, তোমার বন্ধুকে নিয়ে অবশ্যই আসবে। যত রাত হোক আমি অপেক্ষা করব।

দীপনাথ খুবই রেগে যাওয়ার চেষ্টা করে। তার মনে হয়, এই প্রস্তাবে তার বোমার মত ফেটে পড়া উচিত। কঠিন প্রতিরোধ তৈরি করা উচিত। সুখেনকে প্রচণ্ড অপমান করা উচিত।

কিন্তু কোনোটাই পারে না দীপনাথ। ভিতরে একটা বোমার পলতেয় আগুন সে দিয়েছিল ঠিকই কিন্তু মিয়ানো বোমাটা ফাটল না। তবু যতদূর সম্ভব গলায় ঝাঁঝ এনে সে বলল, না, আমি যেতে পারব না। আমি অসম্ভব টায়ার্ড।

আজ যে বড় জমাটি বাদলার ওয়েদার ছিল দীপবাবু !

বাদলার ওয়েদার তো কি হয়েছে ?

ভারী অপ্রতিভ মুখে বোকাটে হাসি হেসে সুখেন বলে, আপনি ভারী তেজী মানুষ। মর্যালিস্ট, কিন্তু বীথি আজ কোনো দুষ্কৃমী করবে না, কথা দিয়েছে। আপনি যে রেগে আছেন তা ওকে আমি বলেছি। আপনি জানান না, বীথি ভারী ভাল মেয়ে। জীবনে অনেক ঘা খেয়ে—

উদাসভাবে দীপনাথ বলে, খারাপ মেয়েদের সব গল্পই এরকম। বীথি ভাল মেয়ে হলেই বা আমার কি ?

ব্যথিত মুখে সুখেন বলে, আপনি ভুল বুঝেছেন।

ওসব কথা থাক। আমি ইন্টারেস্টেড নই।

ও যে অপেক্ষা করবে।

অপেক্ষা করতে তো কেউ বলেনি। তবু যদি করে তো করবে।

বাদলা ওয়েদারটা ছিল। জমত।

আমার মেজাজ ভাল নেই সুখেন।

সেইজন্যই তো আরো দরকার। বীথি মেজাজ ভাল করার ওষুধ জানে।

ভিতরে ভিতরে দীপনাথের প্রতিরোধ ভেঙে যাচ্ছিল। দুর্গের ফটক ভেঙে ঢুকে আসছে অস্বাভাবিক। বাদলা দিন, অবসাদ, একঘেয়ে মেসের বিছানায় ঘুমিয়ে পড়া—এসবের মধ্যে তো কিছু রহস্য নেই। তাছাড়া একবার যখন পদস্থলন ঘটেছে তখন দ্বারে আর বেশী কি হতে পারে ? খুব শীগগীরই সে বিয়ে করে ফেলবে, তখন ভাল করে দুর্গের চারদিকে পরিখা কাটবে, মজবুত ফটক লাগাবে। শুধু আজকের দিনটা.....একটা দিন.....

দীপনাথ বলল, এটা আপনাদের খুব অন্যায্য।

দীপনাথের কঠোর দুর্বলতা ধরে ফেলে সুখেন উজ্জ্বল মুখ করে বলল, আপনার বন্ধু ছাড়া আমি সত্যিই অন্য কিছুকে তেমন মূল্য দিই না। লোকে শুনলে ভাববে আমি আপনার খারাপ বন্ধু, কু-পথে নিয়ে যাচ্ছি। মাইরি, তা নয়। আমি শুধু চাই, আপনার জীবনে আর একটু আনন্দ আসুক।

দীপনাথ একটু ধমক দিয়ে বলে, কিন্তু এই-ই শেষ বার। বীথিকে কথাটা বলে দেবেন।

নিশ্চয়ই, নিশ্চয়ই ! শুধু আজকের দিনটা ।

আবার টানা রিকশা ভাড়া করে সুখেন । বলে, টানা রিকশার মতো এমন বাবুয়ানির জিনিস হয় না । ভারী আয়েসের গাড়ি । নিজেকে রাজা-রাজা লাগে ।

দীপনাথ টানা রিকশা দু চোখে দেখতে পারে না, তবু আনমনে বলল, হঁ ।

কী ভাবছেন ?

কিছু না ।

আজকাল আপনাকে আরো বেশী অন্যমনস্ক লাগে । অফিসে ঝামেলা চলছে নাকি ? না । এমনি নানা কথা ভাবি ।

আমি একটু অন্যরকম । আমার মাথায় তেমন ভাবনা-চিন্তা আসে না । মন-টন খারাপ হলে আমি ফুর্তি করতে বেরিয়ে পড়ি ।

ফুর্তি করাটাই তো জীবনের একমাত্র লক্ষ্য নয় মানুষের ।

করুণ মুখ করে সুখেন বলে, আমি খুব ভোঁতা ধরনের । বুঝলেন । পলিটিকস ভাল লাগে না, খেলাধুলো বুঝি না, দেশ কাল নিয়ে খামোখা মাথা ঘামাতে ইচ্ছে করে না । দুনিয়াটাকে নিয়ে আমার কোনো চিন্তা নেই । এমন কি নিজের পরিবার নিয়েও ভাবি না । ইন্দো-চায়না ওয়ারের সময় এক ভদ্রলোক আমাকে যুদ্ধের কথা জিজ্ঞেস করায় আমি ভারী ফাঁপরে পড়েছিলাম । আবছা আবছা কানে এসেছিল বটে চীনের সঙ্গে ইন্ডিয়ায় কী একটা গুণ্ডগোল হচ্ছে, কিন্তু তার ডিটেলস কিছু জানতাম না । লোকটা আমাকে দেশদ্রোহী-ট্রোহী বলে খুব গালাগাল করেছিল । মাইরি, দেশদ্রোহী কিনা আমি তাও ঠিক বলতে পারব না । আমার গুণ্ডিটা বড়ই ছোটো ।

দীপনাথ হাসছিল ।

সুখেন হাসি দেখে উদ্বেগের গলায় বলল, আমি লোকটা কি খুব খারাপ ? আমাকে আপনার কেমন লাগে বন্ধু ?

আপনি দারুণ লোক ।

ঠাট্টা করছেন !

করলেই বা, অন্যের কথায় আপনার কি আসে যায় ?

অন্যের কথায় আসে যায় না ঠিকই, কিন্তু আপনার কথায় আসে যায় । আমার জীবনে বলতে গেলে আপনিই সঠিক বন্ধু হলেন । আর কারো সঙ্গে আমার কখনো এত ভাল লাগেনি । আপনার জন্য আমার অনেক কিছু করতে ইচ্ছে করে ।

আর কিছু করতে হবে না, মাঝে মাঝে রবীন্দ্রসঙ্গীত, অতুলপ্রসাদী বা রজনীকান্তের গান শোনাবেন তাহলেই হবে ।

ঠিক আছে । যখনই ইচ্ছে হবে একবার মুখ ফুটে বলবেন, শুনিয়ে দেবো ।

রিকশা গড়পারে ঢুকতেই বুকটায় খামচা-খামচি শুরু হল দীপনাথের । বীথির মুখোমুখি হওয়াটাই ভারী লজ্জার হবে । জীবনে যে মহিলার সঙ্গে তার অতখানি ঘনিষ্ঠতা হল সেদিন তাকে সে ভাল করে চেনেও না ।

দোতলার ঘরের দরজায় আজ দারুণ একটা ছাপ-ছক্করওয়ালা পর্দা টাঙ্গানো । পান্না দুটো খোলা । ভিতর থেকে ধূপকাঠির চন্দনগন্ধ আসছে । ঘরের ভিতরে রজনীগন্ধা ছিল আজ । নীলরঙ্গা জীন-এর ফুলপ্যাণ্ট আর খালি গায়ে তোয়ালে জড়ানো স্বস্তি সোফায় বসে কী একটা চিঠি পড়ছিল । তারা ঘরে ঢুকতেই মুখ তুলে হাসল । কী সুন্দর হাসি । কোমল দাড়িতে মুখটা ভারী নরম যীশুখ্রীস্টের মতো দেখায় । মাথা ভর্তি লম্বা চুল । অকপট

চাউনি। চেহারাটা রোগাটে হলেও মাংসপেশীগুলো কঠিন। শরীরে লকলক করে জোরালাে একটা ভাব।

কী খবর দীপনাথবাবু? অনেকদিন বাদে এলেন?

দীপনাথ খুব অস্বস্তির সঙ্গে হাসল। স্বস্তি কি জানে না যে, দীপনাথ বীথির প্রেমিক? নিজের মায়ের কথা না জানাটা তার পক্ষে অস্বাভাবিক। স্বস্তির মুখে চোখে খরশান বুদ্ধির দীপ্তি। এ ছেলে সব জানে। তবে কি করে সহ্য করে?

দীপনাথবাবুকে বসিয়ে রেখে সুখেন ভিতরে গেল। স্বস্তি উঠে গেল না। বসে চিঠিটা পড়ে আবার ভাঁজ করে খামে ঢুকিয়ে পকেটে পুরল। তারপর বলল, একটু বসুন। মা বাথরুমে। এসে যাবে এক্ষুনি।

স্বস্তিকে আপনি বলবে না তুমি তা ঠিক করতে পারছিল না দীপনাথ। স্বস্তির বয়স খুবই কম, কিন্তু ওর নরম হাসির পিছনে একটা ঝাঁঝালো ব্যক্তিত্ব আছে বলে সন্দেহ হয়।

কেন জানে না, এর আগের দিন অস্পষ্টভাবে স্বস্তিকে দেখে যেন আর কারো কথা মনে হয়েছিল। আজও হল। কে? একটু ভাবল দীপনাথ। তারপরেই অবাক হয়ে দেখল, স্বস্তিকে দেখে তার কেন যেন অপরিচিত অদেখা স্নিগ্ধদেবের কথা মনে পড়ে। স্নিগ্ধদেব কি এরকম? হয়তো কালো, রোগা, লম্বা এবং আরো পরিণত এবং ধীর স্থির। তবু স্বস্তির ভিতর যেন ঐরকম এক বিপ্লবীর গন্ধ আছে।

দীপনাথ বলল, আপনি কি পলিটিকস্ করেন?

স্বস্তি আবার সুন্দর হাসিটি হাসল। কিন্তু প্রশ্নটা এড়িয়ে গেল না। নরম গলায় বলল, স্টুডেন্টস মুভমেন্ট করি কিছু কিছু। আপনি ইন্টারেস্টেড?

একসময়ে নর্থ বেঙ্গলে আমিও করতাম। তারপর যা হয়।

ও। স্বস্তি আর কিছু বলল না।

দীপনাথ অস্বস্তি বোধ করতেই থাকে। স্বস্তি বোধ হয় রাজনীতির ব্যাপারে খুব সচেতন। এলেবেলে লোকের সঙ্গে ও নিয়ে কথা বলতে চায় না। দীপনাথ তাই নিরুত্তাপ প্রশ্ন করল, বাইরে থেকে এলেন?

ওয়াই এম সি এ-তে টেবিলটেনিস খেলতে গিয়েছিলাম। খেয়েই আবার বেরিয়ে যাবো।

কোথায়?

আমি একটা নাইট স্কুল করেছি। বেলেঘাটায়।

খুব ভাল। দীপনাথ আলগা গলায় বলে। কিছুতেই এই ছেলেটিকে তার বীথির মতো নষ্ট মহিলার গর্ভজাত বলে মনে হয় না। সে জিজ্ঞেস করে, আর কি করেন?

স্বস্তি মাথা নেড়ে বলে, সংগঠন ছাড়া খুব বেশী কিছু করা একার পক্ষে সম্ভব নয়। তাই একটা অর্গানাইজেশন করে তুলছি।

কী করতে চান?

অনেক কিছু। টু মেক পিপল কনশাস। সোস্যালি অ্যান্ড পলিটিক্যালি।

জনসাধারণকে নিয়ে ভাবা বা দেশের জন্য কিছু করার কথা দীপনাথ বহুকাল হল ভুলে গেছে। এই গ্রীষ্মের রাতে এখন সে এক কামার্ত শুকনো পুরুষ, প্রায় বিগত-যৌবনা এক সুন্দরীর বৈঠকখানায় বসে অপেক্ষা করছে। তার দেশ নেই, দেশবাসী নেই, দায় দায়িত্ব নেই। নিজের জন্য কি একটু লজ্জা হচ্ছিল দীপনাথের?

লজ্জা থেকে মুক্তি দিতেই বুঝি স্বস্তি উঠে পড়ে বলল, আমি একটু আগেই খেয়ে নিচ্ছি।

স্কুলে ওরা অপেক্ষা করবে। কিছু মনে করবেন না।

না, না। আপনি কাজে যান।

স্বস্তি চলে গেল। পাশের খাবার ঘরে চেয়ার টানার শব্দ হল।

চূপচাপ বসে দীপনাথ নিজের ভিতরকার অস্বস্তি ভোগ করতে থাকে। এই যে এরা, এই স্বস্তি এবং তার মা, এরা কারা, সমাজের কোন শ্রেণীর মানুষ, ভাল না মন্দ তা কিছুই বুঝতে পারে না সে। ভারী রহস্যময় এরা। হয়তো অকপট, হয়তো সংস্কারমুক্ত, তবু মন থেকে এদের স্বীকার করে নিতে পারছে না দীপনাথ।

নিজের মায়ের ঘণ্য জীবনে কি অভ্যস্ত হয়ে গেছে স্বস্তি? তার প্রতিবাদ নেই? বিপ্লব নেই?

খুব অল্প সময়ে খাওয়া শেষ করে খালি গায়ের ওপর একটা ভাঁজহীন হাওয়াই শার্ট চড়াতে চড়াতে বেরিয়ে যাওয়ার সময় স্বস্তি যখন তার দিকে চেয়ে হেসে গেল তখনো দীপনাথ তার মুখ দেখে কিছুই বুঝতে পারল না। কিন্তু হঠাৎ স্বপ্নোচ্ছিতের মতো উঠে সে তাড়াতাড়ি সিঁড়ি দিয়ে নেমে রাস্তায় স্বস্তিকে ধরল, শুনুন, আমি আপনার নাইট স্কুলটা একটু দেখব।

স্বস্তি অবাক হলেও কোনো আবেগ প্রকাশ করল না। শাস্ত গলায় বলল, মা আজ আপনাদের নেমস্তন্ন করেছে শুনেছি। ততক্ষণ ওয়েট করা তো সম্ভব নয়।

আমার নেমস্তন্নের চেয়ে নাইট স্কুলটা দেখাই বেশী দরকার।

পরে দেখবেন। কিছু তেমন দেখার মতো ব্যাপার নয়। মা অপেক্ষা করছে। আপনি যান, আমিও চলি।

দীপনাথ নিজেকে সামলাতে না পেরে হঠাৎ বলল, আপনার মা নন, আপনাকেই আমার বেশী দরকার। আমি আপনার কাছে কিছু শিখতে চাই।

স্বস্তি হয়তো সন্দেহ করল, দীপনাথ মদ-টদ খেয়েছে। তাই সামান্য হেসে বলল, শেখার কথা বলছেন কেন? ওসব ইমোশনের কথা।

হতে পারে। কিন্তু এখন আমি আপনার সঙ্গে যেতে চাই।

স্বস্তি একটু স্থির চোখে তার দিকে চেয়ে খুবই আবেগহীন ভঙ্গি গলায় বলল, মায়ের বন্ধুদের সঙ্গে আমার সম্পর্ক ভালই, কিন্তু আমি তাদের কারো সঙ্গে ঘনিষ্ঠ হই না, অন প্রিন্সিপল। মাফ করবেন।

স্বস্তি চলে যাওয়ার পরও তার গভীর, গভীর, বেতারঘোষকের মতো সুন্দর কণ্ঠস্বরটি অনেকক্ষণ কানে লেগে রইল দীপনাথের।

রাস্তায় দাঁড়িয়ে সে একবার ভাবল, এখন থেকেই মেসে ফিরে যাবে।

কিন্তু ভিতরে ভিতরে দুর্গের ফটক ভেঙে যে ঘোড়সওয়ার ঢুকেছে সে লগুভণ্ড করে দিচ্ছে নীতিবোধ, আব্রু এবং প্রতিবোধ।

আস্তে আস্তে সিঁড়ি ভেঙ্গে ওপরে উঠছিল দীপনাথ। মাঝপথ পর্যন্ত উঠেই থামল। বাইরের ঘরে নয়, কিন্তু ভিতরের ঘরে কোথাও তীব্র স্বরে বীথি কিছু বলছে। বলছে বোধ হয় সুখেনকেই। সুখেনের গলাও শোনা গেল। দুজনের বোধ হয় বগড়া হচ্ছে।

বগড়ার শব্দটা দীপনাথকে সাহায্য করল অনেক। তার নিজের ভিতরের উত্তেজনা হঠাৎ স্তিমিত হয়ে এল। অনিচ্ছা জাগল।

কাউকে কিছু না বলে সিঁড়ি ভেঙে নেমে এল দীপনাথ। ধীরে সুস্থে হেঁটে গলি পেরিয়ে বড় রাস্তায় এসে পড়ল।

দৈহিক দিক থেকে পঙ্গু দক্ষ একজন চারটারড অ্যাকাউন্ট্যান্ট বাড়িতে বসে যে কোনও রকম ট্যাকস রিটার্ন, হিসাব তৈরি এবং অ্যাকাউন্টস সংক্রান্ত সব রকম পরামর্শ দিতে প্রস্তুত। প্রথম শ্রেণীর ফার্মে চাকরির অভিজ্ঞতা আছে।

এই বিজ্ঞাপনটা একটি চেক সহ কিছুদিন আগে পাঠিয়েছিল প্রীতম। রোববারের কাগজে বিজ্ঞাপনটা বেরোলো। পারসোনাল কলামে বিজ্ঞাপনটার দিকে অনেকক্ষণ চেয়ে থাকে সে। কাজটা ঠিক হল কিনা বুঝতে পারছে না। অরুণ বা বিলু টের পাবে না। বিজ্ঞাপনে ঠিকানা নেই, বক্স নম্বরে আছে। তবে যদি খুঁটিয়ে দেখে এবং দুইয়ে দুইয়ে চার করে তবে প্রীতমের ধরা পড়ার সম্ভাবনা যে একেবারে নেই তা নয়। অরুণের ক্ষুরধার বুদ্ধিকেই তার ভয়। অবশ্য যদি সত্যিই প্রীতম কোনও কেস হাতে নেয় তবে ওদের কাছে শেষ পর্যন্ত কিছুই গোপন থাকবে না।

কাগজটা রাখতে গিয়েও আবার দুইয়ের পাতায় বিজ্ঞাপনটা দেখে নেয় প্রীতম। ওটা চোখে পড়ার পর থেকেই তার রক্তস্রোত কিছু দ্রুত হয়েছে, শ্বাসের উষ্ণতা বেড়েছে। বহুকাল পরে উত্তেজক কিছু ঘটল। কিন্তু প্রশ্ন হচ্ছে, যদি ক্রায়েন্ট সত্যিই আসে তবে সে পারবে কিনা। এই পারা না পারার প্রশ্নটিই তার কাছে সবচেয়ে বড়।

ছুটির দিনে বিলু সারাদিনই ঘরে থাকে। চাকরি করে বলে আজকাল সপ্তাহের অনেক কাজ জমে থাকে ছুটির দিনটির জন্য। কাচাকুচি, তোলা ঝাড়া, একটু-আধটু রান্না। রবীন্দ্রসদনে বাচ্চাদের একটা ফাংশনে যাওয়ার জন্য অনেকদিনের বায়না ছিল লাবুর। আজ মায়ে-মেয়েতে সন্ধ্যাবেলা রবীন্দ্রসদনে গেল। দুপুরে ফিরবে। বিলুর খুব ইচ্ছে ছিল না। কিন্তু লাবুর মুখ চেয়ে যেতে হল। একা ভাল লাগছিল না প্রীতমের। একা কাজ ছাড়া কখনোই ভাল লাগে না। আজ তাই বালিশে হেলান দিয়ে সে পারা না-পারার কথা ভাবতে থাকে।

সুস্থ শরীরের একজন মানুষ কতটা পারে তার কোনো হিসেব হয় না। মানুষের পারার কোনো শেষই নেই। কেবলমাত্র ইচ্ছের জোরেই না মানুষ দক্ষিণ মেরুতে গেছে, সিঁড়িহীন দেয়ালের মতো খাড়া আকাশের মতো উঁচু পাহাড়ে উঠেছে, খড়ের নৌকায় পাড়ি দিয়েছে সমুদ্র। ক-মাস আগেই তো খবরের কাগজে পড়েছে, আমেরিকার এক ছোকরা ব্যাথাহারা ট্যাবলেট খেয়ে তারপর নিজের শরীরে ছুরি চালিয়ে এক মস্ত অপারেশন প্রায় সাজ করে এনেছিল। মানুষ কি আসলে মানুষ? অনেক মানুষ আছে যারা আসলে দৈত্য, দানব, রাক্ষস বা দেবতা।

ইচ্ছাশক্তির ওপর বিলু বা অরুণের আস্থা নেই। ওদের কখনো ঠিক এ রকম প্রয়োজন না পড়লে, এ রকম বেঁচে থাকা ও মরে যাওয়ার সমস্যা দেখা না দিলে, নিরন্তর রোগজীবাণুর সংক্রমণ টের না পেলে ইচ্ছাশক্তির ওপর ওদের আস্থা আসবেও না।

কেবল ইচ্ছের জোরে প্রীতম পারবে তো? তার শরীর শুকিয়েছে বটে, কিন্তু রোগ এখনো তার মগজকে স্পর্শ করেনি। হয়তো দীর্ঘ দিন করবেও না এখনো। অডিটের সব আইনকানুন তার মনে আছে।

অচলা! হঠাৎই ডাকল প্রীতম।

রান্নাঘরে বিন্দুর সঙ্গে বসে কিছু খাচ্ছিল বোধ হয়। ডরাট মুখে সাড়া দিল, যাই। মেয়েটাকে খুব ভাল লাগে প্রীতমের। আগে সহ্য করতে পারত না। মনে হত, বাইরের

একজন মানুষ এসে অন্দরমহলে অনধিকার প্রবেশ করেছে। অন্যায় কৌতূহলে চেয়ে চেয়ে দেখছে তার শুকনো শরীর। অস্বস্তি হত। আজকাল হয় না। অচলাকে তাড়িয়ে দেওয়ার কথা আর ভাবেও না প্রীতম।

কিছু বলছেন ?

চাকাওলা চেয়ারটা কই ? দেখছি না তো ?

ও-ঘরে বোধ হয় লাভ নিয়ে গাড়ি-গাড়ি খেলছিল কাল। এনে দিচ্ছি।

অচলা হুইল-চেয়ারটা সামনের ঘর থেকে টেনে আনলে প্রীতম বিরসমুখে বলল, থাক। শোওয়ার ঘরের ব্যাক-এ অ্যাকাউন্টেন্টসির কয়েকটা বই আছে, সঙ্গে খাতা। এনে দাও তো। একটা ডটপেন বা কলম দিও, আর পেনসিল।

অচলা এনে দিল। বলল, একটু চা করে দিই ?

দাও। বই খুলে প্রীতম একটার পর একটা এনট্রি দেখে যায়। হবেক রকমের প্রবলেম জল করে দিতে থাকে। এখনো মগজ শতকরা একশ ভাগ ক্রিয়াশীল।

অচলা ! আবার ডাকে প্রীতম।

চা নিয়ে যাচ্ছি। অচলা জবাব দেয় এবং প্রায় সঙ্গে সঙ্গেই আসে।

বলুন।

শোনো। আজ থেকে এক সপ্তাহ কেটে গেলে তুমি একটু সজাগ থাকবে। আমার কাছে কেউ কেউ আসতে পারে। তারা বিভিন্ন কোম্পানির লোক। তোমার বউদি যেন ব্যাপারটা টের না পায়।

কোম্পানির লোক কেন আসবে ?

তারা কাজ নিয়ে আসবে। কাজ করতে আসবে।

আপনি রোগা শরীরে কাজ করবেন ?

রোগা শরীর বলেই কাজ বন্ধ করে দেওয়াটা কি উচিত হবে ? শোনোনি, অনেক সময় কাজ করলে রোগের প্রকোপ কমে যায় ?

আপনাদের তো অভাব নেই, তবে কেন কাজ করবেন ?

টাকার জন্যে নয়। বেঁচে থাকার জন্যে।

অসুখ হলে শুয়ে থাকতে হয়। ডাক্তাররা বলেন, আবসোলিউট রেস্ট।

এতকাল তো আঁচি ডাক্তারদের অবাধ্য হইনি। কিন্তু ডাক্তারদের ওষুধে আমার কাজও হয়নি। তাঁদের কথা শুনে আর কি হবে ?

কাজ হয়নি কে বলল ? আপনাকে আমি প্রথম এসে যে রকম দেখেছিলাম এখন তার চেয়ে ভাল দেখি।

প্রীতম হাসল। বলল, সত্যিই ভাল দেখ ? নাকি রুগীকে ও রকম বলতে হয় বলে বলছ ?

ভাল দেখছি। চা খান, ঠাণ্ডা হয়ে যাবে।

প্রীতম তার দু হাতে প্লেটসুজু চায়ের কাপ তোলে। কম করেও দু-তিন কেজি ভারী মনে হয় কাপটাকে। একটু একটু কাঁপে, চা ছলকায়। তবু পারে প্রীতম আজকাল। চা খেতে ডাক্তার তেমন কিছু বারণ করেনি, কিন্তু খুব সম্প্রতি বিলু তার চা বন্ধ করেছে। বিলু না থাকলে লুকিয়ে অচলা করে দেয়। চা আজকাল বড় প্রিয় হয়েছে প্রীতমের।

চায়ে চুমুক দিয়ে প্রীতম বলে, আমি ভাল আছি। লোকে বিশ্বাস করুক বা না করুক, আমি কিন্তু ভাল আছি।

ভাল হয়েও যাবেন । কিন্তু তা বলে এখনই কাজটাজ করতে যাবেন না । কমপ্লিট রেস্ট নিন ।

কমপ্লিট রেস্ট বলে কিছু নেই, জানো না ? মন যদি অস্থির থাকে, তবে কি করে বিশ্রাম হবে ? কারো যদি রাতের বেলা বিছানায় শুয়েও ঘুম না আসে তবে কেবল শুয়ে থাকাটাই তো ঘুমের অলটারনেটিভ হতে পারে না । বরং শুয়ে থাকলে আরো অশান্তি । তার চেয়ে বইটাই পড়ে সময় কাটিয়ে দেওয়া ভাল ।

বউদি যে আপনাকে ভাবনা-চিন্তা করতে বারণ করেছেন । কাজ করতে গেলেই তো মাথায় চাপ পড়বে !

কাজ না করলেও পড়ে । সারাদিন কত চিন্তা করি ।

অচলা সামান্য হেসে বলে, আপনি নাকি ভীষণ মনের জোর খাটিয়ে অসুখ সারানোর চেষ্টা করেন ?

সেটা কি দোষের ?

জানি না । তবে বউদি বলেছিলেন ওতে-ও মাথার ওপর চাপ পড়ে ।

উদাস গলায় প্রীতম বলে, তোমার বউদি আমার সবটুকু তো জানে না । সে কি করে বুঝবে আমি কিসে ভাল থাকি ?

প্রীতমের এই হঠাৎ উদাসীনতা লক্ষ করে অচলা তাড়াতাড়ি বলল, আচ্ছা, আচ্ছা, ঠিক আছে । কাজ করলে যদি ভাল থাকেন তবে না হয় আমি বউদিকে কিছু বলব না । কিন্তু পরে যেন দোষ না হয় ।

সারা দিনটা এই অচলাই আজকাল তাকে সঙ্গ দেয় । স্নেহ-মমতার একটা দুর্লভ ভাণ্ডার আছে ওর । সহজেই চোখ ছলছলিয়ে ওঠে, অল্প কারণেই উদ্বিগ্ন হয় । লাবু এখন একটু বড় হয়েছে । ঠিক বেবী-সিটারের দরকার আর ওর নেই । অচলা তাই প্রীতমকে দেখাশোনা করে নিজের গরজেই । কেউ ওকে বলেনি । একজাতের মেয়ে আছে, যারা প্রেমিকা বা স্ত্রী হিসেবে তেমন কাজের নয় । কিন্তু ভারী ভাল মা হতে পারে । অচলা ঠিক সেই জাতের ।

ছেলেবেলায় মা ছাড়া প্রীতম আর কোনও মেয়েকে চিনতই না । বড় হয়ে চিনল বিলুকে । সারা জীবনে নিজের মা, বোন, বউ আর মেয়ে—এই ছিল প্রীতমের ঘনিষ্ঠ মহিলা-জগৎ । এর বাইরে যারা তাদের কাছে প্রীতমের ভারী লজ্জা, সংকোচ, বুক দুক-দুক ভয় । এখন সেই ছোট্ট চৌহদ্দিতে কবে অনায়াসে ঢুকে গেছে অচলাও ।

প্রীতম বলল, তোমার দোষ হবে না । ভয় নেই ।

অচলা মৃদু হেসে বলে, আচ্ছা দেখব দোষ হয় কিনা । আজকাল তো রোজ আপনার জন্য আমি বউদির বকুনি খাই ।

কেন ? আমার জন্য তুমি বকুনি খাবে কেন ? বিলুর তো ভারী অন্যায় ।

ঠিকই করেন । সেদিন আপনি বাথরুমের ঠাণ্ডা জলে চান করলেন, পরশুর আগের দিন বিন্দুকে দিয়ে রাস্তার আলুর চপ আনিয়ে খেলেন, গত সপ্তাহে পাপোশে পা আটকে পড়ে গিয়েছিলেন । আপনার ঐ সব দুষ্টমির জন্য বকুনি তো আমারই খাওয়ার কথা ।

প্রীতম প্রশ্ন করল না, কিন্তু চোখে প্রশ্ন নিয়ে চেয়ে রইল ।

অচলা এবার স্নিগ্ধ চোখে চেয়ে বলল, বউদি কি বলেছেন জানান ? বলেছেন, এ বাড়িতে বাচ্চা কিন্তু একটি নয়, দুটি । এ বাড়ির কর্তার চার্জও তোমার । এমন কি দুটো বাচ্চার দেখাশোনার জন্য আমার মাইনেও বউদি পঞ্চাশ টাকা বাড়িয়ে দিয়েছেন ।

তাই বলো ! প্রীতম মাথা নাড়ল ।

এবার বুঝেছেন, কেন আপনার কিছু হলে আমার জ্বালা !

বুঝেছি। কত বেশী পাও বললে ?

পঞ্চাশ টাকা।

মাত্র ? আমি তোমাকে কিছু ঘষ দিতে রাজি অচলা।

অচলা হেসে ফেলে বলে, আমার আর বেশী চাই না। বলুন, কি করতে হবে ? কিছু নয়। শুধু সব কথা তোমার বউদিকে বোলো না।

বলব না। কিন্তু সব কি লুকোতে পারবেন ? বিন্দু আছে, লাবু আছে। ওরা ঠিক বলে দেবে। আর আমিও তো আপনাকে যা-খুশি তাই করতে দিতে পারি না।

আমি কি খুব যা-খুশি তাই করি ?

ঐ যে বইপত্র নিয়ে বসেছেন। এখন কি মাথা খাটানো ভাল ? আমি ভয়ে কিছু বলি না, পাছে আপনি রেগে যান। আজ বলছি, রুগীদের বইপত্র নিয়ে পড়ে থাকা উচিত নয়।

প্রীতম খানিকক্ষণ শূন্য চেয়ে থেকে বলল, তোমার বউদি তা হলে আমার ভার তোমার হাতেই ছেড়ে দিল ?

তা কেন ? বউদিও দেখাশোনা করবেন, আমিও করব। আমি নার্সিং জানি তো, তাই রুগীর দেখাশোনা অনেকের চেয়ে ভাল পারি।

প্রীতম একটু গম্ভীর হয়ে বলল, খুব ভাল। কিন্তু বিলু ব্যাপারটা আমাকে জানাল না কেন ?

ওমা ! আপনি রাগ করলেন নাকি ?

প্রীতমের আজকাল বুকভরা অভিমান হয়েছে। বেশীদিন রোগে ভুগলে বুঝি এ রকমই হয়। পাছে অভিমানের ব্যাপারটা অচলা ধরে ফেলে সেই ভয়ে একটু ক্লিষ্ট হাসি হাসল সে। বলল, না। রাগের কিছু নেই।

সত্যিই নেই ? বউদি আপনাকে কত ভালবাসেন। আমি অনেক পরিবারে কাজ করেছি। আপনাদের মতো ভাল সম্পর্ক খুব বেশী পরিবারে দেখিনি।

প্রীতম একটা ছোটো স্বাস ফেলে। বলে, আমি কারো কাছে ভার হতে চাইনি কখনো।

ঐ দেখুন ! আপনি ঠিক রাগ করছেন।

প্রীতম নিজেকে সামলে নেয়। ঠাট্টার গলায় বলে, দাঁড়াও, দাঁড়াও। আমি একটু ভেবে দেখি, আমার জন্য তোমাদের কী কী করতে হয়। তারপর চেষ্টা করে দেখব, সেগুলো আমি নিজেই পারি কিনা।

অচলা উদ্বেগের গলায় বলে, নিশ্চয়ই পারেন। কিন্তু পুরুষমানুষ বলে কথা, মেয়েমানুষ থাকতে তারা কেন সব কাজ করতে যাবে ? আমি বাড়ি ফিরলে এখনো আমার কর্তা এক গেলাস জল নিজে গড়িয়ে খান না। কেন খাবেন ?

প্রীতম হেসে ফেলে। বলে, সবাই কি তোমার কর্তার মতো ? পৃথিবীতে আমার মতো হতভাগাও কিছু আছে।

আপনি কেন এ রকম বলুন তো ! কী কথা থেকে কোন কথায় চলে গেলেন।

প্রীতম মাথা নেড়ে বলে, বিলুর জন্য নয়, তোমার কথা ভেবেই আমার মনটা খারাপ লেগেছিল, অচলা। আমি ভেবেছিলাম, আমার ওপর বুঝি তোমার মন একটু নরম হয়েছে, তাই যেতে সেধে আমার সেবা করো আজকাল। কিন্তু তা তো নয়, তুমি তো আসলে চাকরি করছ। তাই না ?

এ কথায় অচলা থেমে গেল। কী বলবে ? তার মানসিকতা একটা বিশেষ স্তর পর্যন্ত

সিদ্ধান্ত নিতে পারে। তার ওপরে যাওয়া তো সম্ভব নয়। পৃথিবীর খানাবন্দ, অন্ধকার সে কিছু কম চেনে না। মানুষের ভিতরকার ইতর জন্তুর মুখোমুখিও সে কয়েকবার হয়েছে। মাত্র বছরখানেক আগে এক অসুস্থ, দারুণ সুন্দরী মহিলার নার্সিং করছিল সে। স্বামী মস্ত চাকরি করে। দ্বিতীয় রাত্রিতেই সেই সুপুরুষ সবল লোকটি তাকে টেনে নিয়ে গিয়েছিল শোওয়ার ঘরে। এ সব নিয়ে হইচই করা বোকামি জেনেই সে কিছু করেনি। আগের অভিজ্ঞতাও কিছু আছে। দিন-রাতের নার্সিং বা বেবিসিটিং করতে গেলে চোখের সামনে তরতাজা যুবতী মেয়েকে পেয়ে লঘু-প্রেমের ইচ্ছে কত পুরুষের জেগে ওঠে। কিন্তু প্রীতমকে সে চোখে দেখার কিছু নেই। এই এক পুরুষ যে অন্য রকম। সম্পূর্ণ অন্য রকম। এ মানুষ প্রেমে পড়ে না, কিন্তু মা চায়। এর দৃষ্টিতে কখনো পাপের ছোঁয়া দেখেনি অচলা। এ যেন তার ছেলেরই এক ভাই। টাকা পায় বটে, কিন্তু টাকার জন্য তো এ মানুষটার জন্য তার এত দরদ নয়। কিন্তু সেকথা বোঝানোর মতো ভাষা জানা নেই অচলার।

ভাষার অভাবে অচলার তাই চোখে জল এল। মুখটা ফিরিয়ে ধরা-গলায় বলল, গরমজল হয়ে গেছে। এখন স্পঞ্জ করে দেবো। তৈরি থাকুন।

আমি তোমার কাছে স্পঞ্জ করব না। বিলু আসুক।

নার্স ডাক্তারদের কাছে লজ্জা করতে নেই।

না, না। বলে প্রায় আর্তনাদ করে ওঠে প্রীতম। সে পারবে না। ভারী লজ্জা।

আচ্ছা, তা হলে বউদিই আসুক।

অচলা রান্নাঘরের দিকে চলে গেলে অনেকক্ষণ চুপচাপ বসে থাকে প্রীতম। মেয়েটা কি দুঃখ পেল? পৃথিবীর কাউকেই তার এতটুকু দুঃখ দিতে ইচ্ছে হয় না।

কাল বাতে খুব বৃষ্টি গেছে। আজ এত বেলাতেও মেঘলার আঁধার ছেয়ে আছে চারদিকে। এ রকম দিনে কিছু ভাল লাগে না। মনটা বড় সাঁৎ সাঁৎ করে। বিলু কেন আসছে না এখনো?

স্পঞ্জ করার ব্যাপারে সিদ্ধান্ত নিয়ে ফেলল প্রীতম। কিছু যায় আসে না, অচলাই স্পঞ্জ করুক। অচলাকে ডাকতে যাচ্ছিল প্রীতম, হঠাৎ ভীষণ চমকে উঠল।

তার শোওয়ার ঘরের দরজায় পাঠানের মতো বিশাল চেহারার দাড়িওয়ালা একটা লোক দাঁড়িয়ে, তার কাঁধে মস্ত এয়ারব্যাগ। চোখে 'হালকা রঙ্গিন কাচের রোদ-চশমা।

অবাক হয়ে চেয়ে ছিল প্রীতম। অশ্রুট গলায় জিঞ্জেস করল, কে?

ব্যাগটা মেঝেয় নামিয়ে রেখে শতম এগিয়ে এসে বিছানার ধারে বসে।

চিঠি পাওনি? আসব বলে চিঠি পোস্ট করেছি পরশু।

প্রীতম ওঠে। বুক কাঁপছে, অস্তিত্ব কাঁপছে।

কোন গাড়িতে এলি?

দার্কলিং মেল, আর কোন গাড়ি?

এত দেরী যে!

চোরাই চাল নিয়ে হুজ্জতি হল ডানকুনিতে। সেখানে ঠায় আড়াই ঘণ্টা লেট। বউদি, লাবু সব কোথায়?

বেরিয়েছে একটু। আসবে এক্ষুনি। বোস।

বিন্দু আছে?

আছে।

দাঁড়াও, ওকে একটু চা করতে বলে আসি।

উঠতে হবে না। এখান থেকেই শুনতে পাবে। অচলা ! অচলা !

অচলা কুণ্ঠিত পায়ে আসে। মুখে হাসি নেই।

একগাল হাসিতে মুখ উজ্জ্বলিত করে প্রীতম বলে, এই আমার মেজো ভাই। এইমাত্র শিলিগুড়ি থেকে এল। একটু চা করতে পারবে ?

মাথা নেড়ে অচলা আবার ধীরে চলে গেল। সেদিকে একটু চেয়ে থাকে প্রীতম। মেয়েটাকে সুযোগ মতো একটু মন-ভোলানো কথা বলতে হবে। বেচারী দুঃখ পেয়েছে।

শতম তার গায়ের টি-শার্টটা খুলে ফেলল। গলায় কালো সূতলিতে বাঁধা ধুকধুকি। হাতে পাঞ্জাবী বাল। গালে ঘেঁষ দাড়ি, মস্ত গৌঁফ। একদম চেনা যায় না। তার ওপর সম্প্রতি চেহারাটাও ভাল হয়েছে। এই বড়সড় স্বাস্থ্যবান যুবকটি তার ভাই এ কথা ভাবতেই ভাল লাগে।

পরশু চিঠি ড্রপ করেছিস বললি ?

শতম বলে, হ্যাঁ। পাওনি তো ?

পাওয়ার কথা নয়। দু দিন তো মিনিমাম লাগে। বারো তেরো বছর আগে মা সকালে চিঠি পোস্ট করলে আমি বিকেলে এখানে পেয়ে গেছি কতবার।

আসাটা হঠাৎ ঠিক হল। তাই আগে খবর দেওয়া যায়নি।

তাতে কি ? খবর না দিলেও তো কোনো অসুবিধে নেই।

না, তবু ভাবলাম তোমরা যদি কোথাও চেনজে-টেনজে যাও।

কোথায় আর যাচ্ছি !

যা গরম তোমাদের কলকাতায় !

সকাল থেকে কিছু খেয়েছিস ?

খেয়েছি।

বাড়ির সবাই ভাল ? মা ?

ঐ এক রকম। মা তোমার জন্য কী সব যেন পাঠিয়েছে। বলে শতম উঠতে যাচ্ছিল।

প্রীতম বলল, থাক না। বোস। পরে বের করিস।

তুমি কেমন আছো ?

ঐ এক রকম। তুই অনেকদিন বাদে এলি।

ঠেকায় না পড়লে কে কলকাতায় আসতে চায় বলো। এ তো নরক। দিন দিন আরো খারাপ হচ্ছে শহরটা। বউদি কোথায় গেছে বললে ?

একটা ফ্যাংশনে।

ঐ মেয়েটা কে ?

ও অচলা। লাবুর দেখাশোনা করে।

বউদি চাকরি করছে, না ?

হঁ। না করে উপায় ছিল না।

আমি মেয়েদের চাকরি করা সাপোর্ট করি। তবে বাড়িতে সবাই হয়তো পছন্দ করে না।

স্নান করবি না ? প্রসঙ্গটা পাশ কাটিয়ে জিগ্জস করে প্রীতম।

বাথরুমে জল আছে তো ? তোমাদের কলকাতায় খুব জলের ক্রাইসিস বলে শুনি।

প্রীতম বলে, জল আছে।

অচলা ধীর পায়ে ট্রেতে চা নিয়ে এল। সঙ্গে কিছু নোনতা বিস্কুট। এক গেলাস জলও। বুদ্ধি আছে। কারণ শতম প্রথমেই জলের গেলাস নিয়ে এক চুমুকে শুবে নিল।

অচলা বলল, আর এক গেলাস দেবো ?

না। কলকাতার জল ভীষণ নোনতা। খাওয়াই যায় না। খুব তেঁটা ছিল বলে এক গেলাস খেলাম।

অচলা মৃদু হাসল।

বিষ্কুট লাগবে না। চায়ের সঙ্গে আমি কিছু খাই না। বলে কাপটা ট্রে থেকে তুলে নেয় শতম।

আপনি ডিম খাবেন তো ? আজ ডিম হয়েছে।

ডিম ? না, আমি ও সব খাই না। মাছ মাংস ছেড়ে দিয়েছি। শুধু ডাল হলেই চলবে।

ওমা ! সে কি ?

শতম একটু অপ্রস্তুত হয়ে বলে, ডিম ছাড়া কিছু হয়নি ?

তা হয়েছে। কিন্তু মাছ মাংস স্থান না কেন ?

ওঃ, সে একটা ব্যাপার আছে। বলে লাজুক হাসি হাসে শতম।

অচলা বলে, তাহলে ছানার ডালনা করে দিতে বলি। ছানা আছে।

শতম জবাব দিল না। খাওয়া নিয়ে তার বেশি ভাবনা আসে না।

শ্রীতম মাছ মাংস নিয়ে কিছু জিজ্ঞেস করতে ভরসা পেল না। শতম হয়তো জবাব দিতে চাইছে না। ভাই বড় হয়েছে, এখন তাকে আর জেরা করা যায় না তো। যদি নিজে থেকে কারণটা কখনো বলে তো বলবে।

শ্রীতম বলে, তুই আজকাল খুব মোটরসাইকেল দাবড়াস শুনি।

এখানে সেখানে যেতে হয়।

সাবধানে চালাস তো !

হ্যাঁ হ্যাঁ, ও নিয়ে ভেবো না।

মা বারণ করেনি মোটরসাইকেল কিনতে ?

ও বাবা ! সে অনেক ঝামেলা গেছে। এখন তেমন কিছু বলে না।

আমার নিজের একটা মোটরসাইকেল বা স্কুটারের খুব শখ ছিল।

না কিনে ভাল করেছেো। কলকাতার রাস্তায় ওসব চালানো ভয়ংকর রিস্কি।

তা অবশ্য ঠিক।

শোনো দাদা, বউদি আসার আগেই তোমাকে একটা ইম্পট্যান্ট কথা বলে নিই। আমি এবার কেন এসেছি জানো ?

কেন ?

তোমাকে নিয়ে যেতে।

আমাকে নিয়ে যাবি ? শ্রীতম কেমন দিশেহারা বোধ করে। কী বলছে শতম তা যেন ঠিক বুঝতে পারে না। আবার বলে, নিয়ে যাবি ?

বউদি চাকরি করে, সূতরাং তুমি রুগী মানুষ সারাদিন একা পড়ে থাকো। শোনার পর থেকেই মা খুব অস্থির। নার্স বা আয়ার হাতে তো ঠিক যত্ন হয় না। মা বলে পাঠিয়েছে, শিলিগুড়ির বাড়িতে তোমার সবরকম ট্রিটমেন্টের ব্যবস্থা হবে। আমরা সবাই আছি। এখানে এরকম অসহায় অবস্থায় থাকবে কেন ?

শ্রীতম কথা ঝুঞ্জে পাচ্ছিল না। অনেকক্ষণ চুপ করে থেকে বলল, সেটা কি ভাল হবে ? বলি কি ভাববে ?

বউদি তো তেমন কিছু ভাবছে না। নইলে এরকম অবস্থায় তোমাকে রেখে চাকরি

করছে কেন ? তোমার টাকার দরকার হলে একটা পোস্টকার্ড ছেড়ে দিলেই আমরা টাকা পাঠাতে পারতাম । বউদির চাকরি করার দরকার ছিল না ।

প্রীতম মাথা নেড়ে বলে, তা জানি । টাকাটা কোনো কথা নয়, আমি গেলে বিলু আর লাবুর গারজিয়ান কে থাকবে ?

সেটা তুমি বউদির সঙ্গে কথা বলে ঠিক করো । মত হলেই আমি প্লেনের টিকিট কাটবো ।

তুই স্নানে যা । বিলু আসুক । আমি একটু ভেবে দেখি ।

প্রীতম চোখ বুজে থাকে । সংসারে একটা বিরোধ এতকাল চাপা পড়ে ছিল । এখন কি সেটা বেরিয়ে আসবে প্রকাশ্যে ? একটা লড়াই শুরু হল নাকি তাকে নিয়ে ? শতমের মুখচোখে ওরকম একটা কাঠ-কাঠ শক্ত ভাব কেন ? ভিতরে যেন গনগনে রাগের আগুন !

শতম বাথরুমে গেল । দরজার শব্দ শুনল প্রীতম । সংসারে ঝগড়াঝাঁটিকে বড় ভয় পায় প্রীতম । অশান্তির ভয়ে সে চিরকাল চুপ করে থেকেছে । বহু অন্যায়ের প্রতিবাদ করেনি, অনেক ন্যায্য কথা বলতে চেয়েও বলেনি ।

ভিতরে ভিতরে বড় অস্বস্তি হচ্ছিল প্রীতমের । তাকে নিয়েই এখন এই টানা-হ্যাঁচড়ার সূত্রপাত ঘটবে ।

ঠিক এই সময়ে কপালে একটা ঠাণ্ডা নরম করতল কে যেন রাখল । ছোটো হাতখানা ।

প্রীতম চোখ খুলে দেখে, পৃথিবীতে তার সবচেয়ে প্রিয় মুখখানা ঝুঁকে আছে মুখের ওপর ।

ঘুমোচ্ছিলে বাবা ?

না । ফাংশন কেমন হল ?

খুব ভাল । আমি কিন্তু রাস্তার মোড় থেকে গুলিটা হেঁটে একা একা বাড়িতে এলাম ।

কেন, তোমার মা ?

মা তো অরুণ মামার সঙ্গে কথা বলছে । সেই মোড়ে ।

অরুণ মামা গিয়েছিল নাকি তোমাদের সঙ্গে ?

হ্যাঁ তো । আমরা যে অরুণমামার গাড়িতেই গেলাম মোড় থেকে ।

ও । ভাল, খুব ভাল । বলে লাবুর হাতখানা মুঠোয় চেপে চোখ বোজে প্রীতম । তারপর গাঢ়স্বরে বলে, তোমার কাকা এসেছে । শতাকাকা । শোনো মা, আমি যদি শিলিগুড়ি চলে যাই তাহলে কি তোমার খুব কষ্ট হবে ?

আমিও যাবো ।

তোমার যে ইস্কুল ! তোমার মাও এখানে থাকবে ।

ইস ! তুমি গেলে আমার যে কান্না পাবে ।

॥ প্রায়ত্রিশ ॥

পরদিন চেষ্টারে ঢুকতেই বোসসাহেব হাসিমুখে বলে, উড ইউ লাইক এ ট্রিপ টু নর্থ বেঙ্গল ?

দীপনাথ একটু হকচকিয়ে যায় । শিলিগুড়ি ! এর চেয়ে আনন্দের আর কী হতে পারে ।

সে কোনো জবাব দেওয়ার আগেই বোস সাহেব বলে, এবার অবশ্য একদম ইনডিপেনডেন্ট টুর । সঙ্গে আমি থাকছি না ।

তবে ?

তবে আবার কি ? আপনার দায়িত্ব বাড়ছে । আমি আর আগের মতো টুরে যেতে পারছি না । অফিসটাকে ঢেলে সাজাতে হবে অ্যান্ড আই অ্যাম ডগ টার্ড ! টুর এখন থেকে আপনার ।

সব টুর ?

সব না হলেও কিছু ।

নর্থ বেঙ্গল আমার ফেব্রিট—

বোস হাত তুলে কথাটা শেষ হওয়ার আগেই তাকে থামায় । বলে, আমি জানি । নর্থ বেঙ্গলে যেতে পারলে যে আপনি কত খুশি হন তা আপনার চোখমুখ দেখেই বুঝেছি ।
থ্যাংক ইউ ।

ইটস অল ইন দি জব । আমার কোনো কেরামতি নেই । আরো তিনজন অ্যাসিস্ট্যান্ট ম্যানেজার আসছেন । আমি তাঁদের রিক্রুট করিনি, করেছে কোমপানি । তারা গুজরাট, পাঞ্জাব এবং কেরালার লোক । বাঙালী কেবল আপনি ।

আমি ? আমি তো এখনো—

বোস সাহেব আবার হাত তোলে, কথাটা এখনো শেষ হয়নি চ্যাটার্জি । যা বলছিলাম । আপনিই চারজনের মধ্যে একমাত্র বাঙালী এবং মোস্ট প্রোবাবলি একমাত্র ইনএফিসিয়েন্ট লোক ।

দীপনাথ এটা ঠাটা কিনা না বুঝে একটা গাড়লের হাসি হাসল ।

তবে এও জানি অন্যে যখন টুরের নামে দু হাতে টাকা লুটে তখন আপনিই একমাত্র পাই পয়সারও ডিটেলস্ হিসেব দেবেন । তাই বলছি আপনার ইনএফিসিয়েনসির তুলনা হয় না ।

এটা কি কমপ্লিমেন্ট বোস সাহেব ?

না । বলে বোস তার বাঁ ধারে আলাদা করে রাখা একটা সাদা খাম তুলে তার হাতে দিয়ে বলে, এটাও কমপ্লিমেন্ট নয় । জাস্ট দি রিকগনিশন ।

দীপনাথ খামটা খুলল । আমেদাবাদের বোর্ড অফ ডিরেকটর্স তাকে কোমপানির অ্যাসিস্ট্যান্ট ম্যানেজার করেছে । খবরটা বহু বার বোস সাহেবের কাছে শুনেও তেমন বিশ্বাস হয়নি । বাংগালোরের ফ্যাকরা থাকায় বরং কথাটা শুনে মন খারাপ হত । কিন্তু এখন চিঠিটা হাতে পেয়ে তার সমস্ত শরীর মন মাথা ভেসে যাচ্ছে আনন্দে শিহরনে । মোটামুটি বড় একটা কোমপানির সে জোনাল অ্যাসিস্ট্যান্ট ম্যানেজার । মাইনে দেড় হাজার এবং অন্যান্য সুযোগ-সুবিধে ।

এতটা আশা করেনি দীপনাথ । বিভ্রান্তভাবে সে বোস সাহেবের দিকে চেয়ে থাকে ।

বোস সাহেব বলে, বসুন ।

দীপনাথ পুতুলের মতো বসে ।

বোস সাহেব তার কাচের গেলাস থেকে খানিকটা জল খেয়ে একটা শ্বাস ছেড়ে বলে, আমি জানি, গতকাল পর্যন্তও আপনি আমার কথায় বিশ্বাস করতেন না । ভাবতেন আই অ্যাম জাস্ট টেকিং ইউ টু এ ট্র্যাপ ।

দীপনাথ কিছু বলতে যায়, বোস সাহেব আবার হাত তুলে তাকে থামিয়ে দিয়ে বলে, অ্যান্ড আই ডিজার্ভড দ্যাট । আমি আপনার সঙ্গে কথার খেলাও কিছু কম খেলিনি ।

দীপনাথ চূপ করে থাকে । হাতের চিঠিটার দিকে আর একবার তাকায়, ভাঁজ করে

পকেটে রাখার কথা মনে হয় না। কেবল চেয়ে থাকে। তারপর বলে, বাংগালোর কি তাহলে ক্যানসেলড ?

হঁ। তবে বাংগালোর নিয়ে তো আমার কোনো প্রবলেম ছিল না। আমার প্রবলেম যেটা ছিল সেটা রয়েই গেল।

কি ? দীপ ঝুঁকে বসে।

মণি। আমার স্ত্রী।

আমরা কিছুই করতে পারি না মিস্টার বোস ?

বোস মাথা নাড়ে, না। নেস্টট মানথ্ উই আর গোয়িং টু কোর্ট।

কোর্ট, বোস সাহেব ? কোর্ট ?

কোর্ট। মিউচুয়াল করে নিচ্ছি। তারপর কোম্পানির কাজে একটু বাইরে যাবো। শীতের আগেই।

কোথায় ?

মিডল ইস্ট। তারপর আমেরিকা। লম্বা ট্যুর। ভালই হবে। দি উন্ড্‌স উইল বি হিলড্‌।

দীপনাথ এবার চিঠিটা ভাঁজ করে পকেটে রাখে।

বোস হাসে হঠাৎ। বলে, ইজ্‌ দি পেমেন্ট অল রাইট ?

খুব ভাল। আনএক্সপেক্টেড।

বোস সাহেব মাথা নেড়ে বলে, দ্যাটস ফুলিশনেস। আমার কাছে বললেন ভালই, খবরদার আর কাউকে বলবেন না। নাথিং ইজ্‌ টু গুড অ্যাজ্‌ ফার অ্যাজ্‌ ইউ ক্যান স্ট্রেক্‌ দেম।

আপনাকেই বলছি।

আমাকেও নয়। আমি ম্যানেজমেন্টের লোক।

দীপনাথ হাসে।

বোস সাহেব মুখটা একটু গম্ভীর করে বলে, একটা কথা বলে রাখি। আপনার কোয়ালিফিকেশন খুব জেনারেল ধরনের বলে আপনার পে অন্য তিনজনের চেয়ে খানিকটা কম। বাকি তিনজন বেসিক স্যালারি পাবে রাউন্ড অ্যাবাউট টু থাউজান্ড।

পাক, আমার শ্ৰীযোগ করার কিছু নেই।

থাকলেও আপাতত কিছু করা যেত না। আমি বেশী চাপাচাপি করিনি। তা হলে ম্যানেজমেন্ট অন্য রকম সন্দেহ করত।

ঠিক আছে।

বোস মাথা নেড়ে বলে, ঠিক নেই। আমি জানি। তবে আমি তো থাকছিই। বছর খানেকের মধ্যেই সকলের স্ট্যাটাস সমান করব। কথা দিচ্ছি।

দীপনাথের কাছে চাকরির আনন্দ অনেকটাই বিস্মাদ হয়ে গেছে। বোস আর মণিদীপার বিয়ে ভেঙে যাচ্ছে, সেটা তার চাকরি পাওয়ার চেয়েও গুরুতর ঘটনা।

দীপনাথ বলে, আমি মিসেস বোসের কাছে শেষবারের মতো একটু যাবো ?

বোস অবাক হয়ে বলে, নিশ্চয়ই যাবেন। ইউ নীড নো পারমিশান। কিন্তু কেন ?

আর একবার চেষ্টা করব।

বোস হাসে। নিজের মাথার চুলে আঙুল চালাতে চালাতে ম্লান ও সুন্দর হাসিটি ঝুলিয়ে রেখেই বলে, ডুয়িং গুড টু আদারস ? ইউ আর রিয়েলি ইম্পসিবল। আপনাকে তো

বলেইছি, প্রবলেমটা ইমোশনাল নয়। হার্ড ফ্যাক্ট।

জানি। খানিকটা বুঝতেও পারি। কিন্তু আমার মনে হয় প্রবলেমটা তেমন জটিল কিছু নয়। হয়তো আপনাদের সম্পর্কের একটা ছোট্ট কোনো আনঅ্যাডজাস্টমেন্ট আছে। আর সেইটেই এখন ফেপে ফুলে উঠেছে।

বোস আনমনে মধ্য দূরত্বের শূন্যে চেয়ে কি যেন ভাবছিল। দীপনাথের কথাটা শুনে বলল, হতে পারে। সত্যি কথা বলতে কি, আমি কাজকর্ম নিয়ে এত ব্যস্ত থাকি যে, নিজের স্ত্রীকে নিয়ে খুব একটা চিন্তা-ভাবনা করার সময় পাইনি। চিন্তা করার দরকারও হয়নি এতকাল।

এখন কি ব্যাপারটা নিয়ে ভাবছেন মিস্টার বোস ?

বোস সাহেব চমৎকার করে হাসল। ইদানীং বোসের হাসিতে একটা বিষাদ যুক্ত হওয়াতেই বোধ হয় হাসিটা ফোঁস্ট ভাল।

বোস সাহেব বলে, ইন ফ্যাক্ট, আমার কাছে ডোমেস্টিক অ্যান্ড কনজুগাল প্রবলেমগুলো ভীষণ করেন। দীপা এমন সব প্রবলেম তৈরি করে যেগুলো আমি বুঝতেই পারি না। ম্যাজিসিয়ানরা যেমন শূন্যে টুপি থেকে খরগোস বের করে, দীপাও তেমনি আউট অফ নাথিং ক্রাইসিস তৈরি করতে পারে।

কিরকম ক্রাইসিস ?

বলতে গেলে মহাভারত। আমার অত মনেও থাকে না। আই হ্যাভ মোর ইমপর্ট্যান্ট থিংস টু থিংক অ্যাবাইট। বিয়ে করুন, আপনিও জানতে পারবেন।

বিয়ে সবাই করে, কিন্তু সকলের তো আপনাদের মতো প্রবলেম দেখা দেয় না।

সেটাও সত্যি। আমরা বোধ হয় একটু বেশী আপস্টার্ট।

না, না, তা নয়। আপনারা চমৎকার একটি দম্পতি। আমি তো জানি।

বাইরে থেকে বোধ হয় ভালই দেখায় আমাদের। যাকগে, ওসব কথা থাক। ডিভোর্স হলে আমি বা দীপা কেউই বোধ হয় খুব কিছু লুজ করব না।

বিয়ে ভেঙে-যাওয়াটা একটা সোশ্যাল স্ক্যান্ডাল, আপনিই সেদিন বলেছিলেন।

নিশ্চয়ই। স্ক্যান্ডাল এড়ানোর জন্য আমি দীপার সঙ্গে একটা আন্ডারস্ট্যান্ডিং-এ যেতে চেয়েছিলাম। বলেছিলাম, লেট আস লিভ টুগেদার লাইক কো-টেনান্টস।

উনি কি বললেন ?

দীপা গায়ে জ্বালা ধরানো হাসি হেসেছিল। কিন্তু চ্যার্লি, আমার অনেক কাজ আছে। এসব এখন থাক।

দীপনাথ উঠল। বলল, আমি নতুন পোস্টে কবে জয়েন করব ?

আজই।

নর্থ বেঙ্গল কবে যেতে হবে ?

তিন-চার দিনের মধ্যেই।

আসছি বোস সাহেব।

শুনুন, আপনি আজ জয়েন করলেও আজই আপনাকে কোনো কাজ দেওয়া হবে না। আপনি এখন চলে যেতে পারেন। সামনের মাস থেকে কাজের প্রেসার বাড়বে। ততদিন একটু বিশ্রাম করে নিতে পারেন।

আচ্ছা। একটা কথা, আমি কি আমার আত্মীয় এবং বন্ধুদের জানাতে পারি যে, আমি এ চাকরিটা পেয়েছি ?

নিশ্চয়ই। আপনার চাকরি একদম পাকা।

থ্যাংক ইউ। বলে দীপনাথ বেরিয়ে আসে।

একটু অন্যমনস্ক ছিল বলে অফিসের চারদিকে লক্ষ করেনি। বেরোবার মুখে রঞ্জন এসে ধরল, কি দাদা! কতবার যে ইশারা করলাম, দেখতেই পেলেন না।

দীপনাথ থতমত খেয়ে বলে, একটু অন্য কথা ভাবছিলাম।

সে তো বুঝতেই পারছি। খবর কি বলুন তো? আমরা তো শুনছি আপনি কোমপানির অ্যাসিস্ট্যান্ট ম্যানেজার হচ্ছেন।

হ্যাঁ। আজ অ্যাপয়েন্টমেন্ট লেটার পেলাম।

অভিনন্দন না কি যেন জানাতে হয়! তাই জানাচ্ছি।

ঠিক আছে, ঠিক আছে। আজ একটা কাজ আছে রঞ্জন, চলি।

আমার কেসটা একটু দেখবেন। এখন তো আপনি টপ-বসদের একজন।

নিশ্চয়ই। পরে কথা হবে।

বেরিয়ে এসে নীচের ফটকে দাঁড়িয়ে দীপনাথ দেখে, বাইরে প্রচণ্ড বৃষ্টি হচ্ছে। দরজায় ভীড় জমে আছে। বেরোনো যাবে না। কিন্তু অফিসেও ফিরে যেতে ইচ্ছে করল না তার। চূপচাপ ভীড়ের একটু পিছনে দাঁড়িয়ে রইল। মনে অজস্র কথার ঝড়।

আধ ঘণ্টায় কলকাতাকে ডুবিয়ে, গাড়িঘোড়া বন্ধ করে দিয়ে বৃষ্টি থামল।

রাস্তায় বেরিয়ে দীপনাথ ঠিক করতে পারছিল না কোথায় যাবে। মণিদীপা, প্রীতম কিংবা বাবা। ভেবে দেখল অনেকক্ষণ। মণিদীপা হয়তো বাড়িতে নেই এখন। প্রীতম সম্ভবত ঘুমোচ্ছে। তা ছাড়া খবরটা সকলের আগে বাবাকেই দেওয়া উচিত। বহুদিন হল বাবার সঙ্গে দেখা হয় না।

সজলকে একটা এয়ারগান দেওয়ার কথা ছিল। নিউ মার্কেটে গিয়ে একটা এয়ারগান কিনল দীপনাথ। তারপর ভাবল, সকলের জন্যই কিছু নেওয়া উচিত। সুতরাং বউদির জন্য একটা রঙিন শাড়ি, বাবা আর মেজদার জন্য ধুতি, মঞ্জু আর স্বপ্নার জন্য দুটো ম্যাকসি কিনে নিল। পকেটে গত মাসে পাওয়া আটশো টাকার অনেকটাই অবশিষ্ট ছিল।

রতনপুর পৌছোতে বিকেল। কলকাতার কংক্রীট থেকে এই সবুজ গাছপালার মধ্যে হঠাৎ এসে পড়লে মনটা জুড়িয়ে যায়।

পথটা হেঁটেই পার হয় দীপনাথ, সমস্ত শরীর আর মন দিয়ে চারদিককার প্রকৃতি থেকে স্নিগ্ধতা শুষে নিতে নিতে। অল্প দূরে মাঠের ধারে সূর্য নামছে। পাখির ডানার শব্দ। গাছপালায় বাতাস লাগছে এসে।

বাড়িটা ভারী নিঃশ্বাস। ঢুকতেই প্রথমে শ্রীনাথের ভাবন-ঘর। দরজায় তালা ঝুলছে। ভিতরবাড়ি পর্যন্ত অনেকটা পথ। হাঁটতে হাঁটতে দীপনাথ চারদিকে চেয়ে দেখছিল। পুকুরপারের ঝোপড়াতায় ক্ষ্যাপা নিতাই না কে একটা লোক থাকে। সেদিক থেকে একটা কুকুর ঘেউ ঘেউ করে তেড়ে এল মাত্র, কিন্তু কোনো মানুষের সাড়া নেই।

খানিক ঘেউ ঘেউ করে কুকুরটা লেজ নাড়তে নাড়তে সঙ্গ ধরে।

উঠানে পা দিয়ে দীপনাথের একটা কেমন যেন লাগে। বাড়িটা নিস্তব্ধ, নিরানন্দ। লোকের মানসিকতা কি বাড়ির চেহারাতে ফুটে ওঠে? কে জানে! কিন্তু পশ্চিমের রাঙা রোদে ভেসে-যাওয়া মস্ত উঠানে দাঁড়িয়ে দীপনাথের মনে হয়, এ বাড়িতে যেন বিবাদ ঘনিয়ে আছে। বাবা কি তা হলে নেই!

বউদি ! ও বউদি !

বড় ঘর থেকে তুষা বেরিয়ে আসে, ওমা ! বড় ঠাকুরপো ! এসো, এসো ।

শংকিত চোখে তুষার দিকে চেয়ে দীপনাথ বলে, বাবা ! বাবা কোথায় ?

বাবা বেড়াতে গেছেন । সারাদিন বসে থাকেন তো । আজকাল তাই বিকেলের দিকে রিকশায় করে বেড়াতে পাঠিয়ে দিই । বোসো, এঙ্কুনি এসে যাবেন ।

খুব বিশেষ মানুষ ছাড়া তুষা নিজের ঘরে কাউকে বসায় না । দীপনাথকে বসাল । বলল, এতদিন পর মনে পড়ল ?

মনে রোজই পড়ে । সময় হয় না ।

কলকাতার লোকদেরই যত সময়ের অভাব । না ?

কথাটা মিথ্যে নয় । আচ্ছা বউদি, বাড়িটা আজ এরকম লাগছে কেন বলো তো ? কিরকম ?

ঠিক বোঝাতে পারব না । খুব আনহ্যাপি যেন ।

যাঃ । আনহ্যাপির কি আছে !

বাচ্চাগুলো কোথায় ?

এ সময় ওরা বাড়িতে থাকে নাকি ? খেলতে-টেলতে গেছে । ওসব কি এনেছো অত ?

দেখ তো এই শাড়িটা কেমন ? বলে তুষাব শাড়িটা পলিথিনের প্যাকেট থেকে বের করে দীপনাথ ।

বাঃ, বেশ শাড়ি । কার জন্য কিনলে ?

তুমি পরবে ।

আমি ! আমি কি আজকাল রঙিন শাড়ি পরি নাকি ! পাগল কোথাকার ।

কেন, রঙিন শাড়ি পরলে কি হয় ?

যাঃ, ছেলেমেয়েরা বড় হচ্ছে না ! তা ছাড়া তোমাকে এসব পাকামি কবতে কে বলেছে ? আমার জন্য শাড়ি আনার কি দরকার পড়ল হঠাৎ বলো তো । বিয়ে-টিয়ে ঠিক হয়েছে নাকি ?

না, তবে বিয়ের পথ পরিষ্কার হয়েছে । আমি একটা দেড় হাজারি চাকরি পেয়েছি ।

ওমা ! তাই নাকি ! তা হলে পাত্রী দেখি ?

দীপনাথ স্মিতমুখে চেয়ে বলল, তোমার হাতে অনেক পাত্রী আছে জানি । ধীরে সুস্থে দেখো । আগে রঙিন শাড়ির প্রবলেমটা মিটুক । তুমি রঙিন শাড়ি পরবে না কেন ?

বয়স হচ্ছে না ! লাজুক ভাব করে তুষা বলে । মল্লিনাথ ছাড়া বোধ হয় দীপনাথই একমাত্র পুরুষ যাকে খুব কাছের লোক বলে ভাবতে পারে তুষা । এই দেওরটির মুখোমুখি হলে তার সব কঠোরতা কোমল হয়ে আসে, বৃকের জ্বালাগুলো মিইয়ে যায় ।

তোমার কত বয়স ?

কে জানে বাবা ! শুধু জানি, ছেলেমেয়ে বড় হচ্ছে, আমিও বুড়ী হচ্ছি ।

তোমার দ্বিগুণ বয়সের মহিলারা কত ঝলমলে শাড়ি পরে ঘুরে বেড়াচ্ছে চারপাশে, দেখ না ?

কলকাতায় ওসব কেউ মাইন্ড করে না । কিন্তু এ তো কলকাতা নয় ! গাঁ গ্রামকে তো জানো না । এখানে নিষেধ রটে ।

সেটা তোমার ইমাজিনেশন । গাঁ গ্রামও আর আগের মতো শরৎচন্দ্রের যুগে পড়ে নেই । বুড়োমিটা একটু কমাও । যাও গিয়ে শাড়িটা পরে এসো ।

আচ্ছা আচ্ছা হবে 'খন। আগে জিরিয়ে নাও, চা করতে বলে আসি।

ভুকুটি করে দীপনাথ বলে, আগে শাড়ি পরবে, তারপর আমি এ বাড়িতে জলগ্রহণ করব। যাও।

তৃষা হাসে না। মলিন এক মুখ করে খানিকক্ষণ দেওরের দিকে চেয়ে থাকে। তারপর মৃদুস্বরে বলে, আচ্ছা, পরছি।

তৃষার মুখের দিকে চেয়ে হঠাৎ কষ্ট হল দীপনাথের। বউদিকে সে কোনোদিন ঠিক এরকম বিবাদ-প্রতিমা দেখেনি। তৃষা কোথাও কখনো হার মানে না, ভেঙে পড়ে না।

সে বলল, তোমার কি হয়েছে বলো তো!

কিছু না গো। বলে তৃষা জোর করা হাসি হেসে চলে যেতে যেতে দরজা থেকে মুখ ফিরিয়ে বলল, রঙিন শাড়ি পরে আসছি, তখন দেখো কেমন ঝলমলে আর হাসিখুশি দেখায়।

বলেই চলে গেল।

মল্লিনাথের ঘরটায় একা বসে চারদিক দেখে দীপ। খাটের পাশেই বন্দুক রাখার ব্যাকে মল্লিনাথের পুরোনো বন্দুকটা ফিরে এসেছে। কৌতূহলী দীপনাথ উঠে গিয়ে বন্দুকটা তুলে নেয়। ছাঁচা ইম্পাতের সিকিম জিনিস। প্রচণ্ড ভারী। ঘোড়ার কাছে লোহার ওপর নানা কারুকার্য করা। কুঁদোর গায়ে একটা খোদাই করা পেতলের পাতে ইংরিজিতে লেখা এম এন চ্যাটার্জি। বন্দুকটা ভেঙে ব্যারেলের ফুটোয় চোখ রাখে দীপনাথ। সদ্য পরিষ্কার করা বর্তুল আয়নার মতো ইম্পাতে ঝকঝকিয়ে উঠল আলো আর প্রতিবিম্ব।

আপনার চা।

একটু চমকে ওঠে দীপনাথ। বউদির ঝি বন্দা।

রেখে যাও। বলে বন্দুকটা আবার সোজা করে কাঁধে তুলে দেয়ালের দিকে তাক করে দীপনাথ। বড়দস্য হাত ছিল পরিষ্কার। শুধু বন্দুকের টিপ কেন, কোন দিকটাতেই বা খামতি ছিল বড়দার! বিশাল চেহারার অতি সুন্দর পুরুষ, দক্ষ ইনজিনিয়ার, সাহসী, ডানপিটে। যেখানেই গেছে সেখানেই সহজাত কর্তৃত্ব বজায় রেখেছে। কারো কাছে মাথা নোয়ায়নি। শুধু একটু চরিত্রের দোষ ছিল। মদ আর মেয়েমানুষ। কিন্তু শেষ পর্যন্ত বিয়েটা কেন করল না তা সঠিক বোঝা যায় না। যখন উত্তরবাংলায় ছিল তখন মাঝে মাঝেই পিসির বাড়িতে হানা দিয়েছে। হঠাৎ ফুটি করতে খুব ভালবাসত। দীপনাথ তখন রামকৃষ্ণ ব্যায়ামাগারে ব্যায়াম করে। স্বাস্থ্যখানা বরাবর পেটানো ছিল। মল্লিনাথ তার কাঁধে থাবড়া মেরে বলত, তুই হবি আমার মতো। স্বাস্থ্য না হলে কি পুরুষকে মানায়?

যোর যোর হয়ে এসেছে ঘরখানা। বন্দুকটা কোলে নিয়ে প্রায় জুড়োনো চায়ে চুমুক দিতে দিতে জলজ্যাস্ত চোখের সামনে যেন দেখতে পেল মল্লিনাথকে। দীপনাথ গভীর একটা শ্বাস ফেলে বলল, অত স্বাস্থ্য ছিল তোমার, তাও বাঁচলে কই? তুমি বেঁচে থাকলে আমাদের একটা আশ্রয় থাকত। বাড়িঘরের আশ্রয় নয়, মনের আশ্রয়।

টুক করে ঘরের আলো জ্বলে উঠল। খুব জোরালো নয়, নিস্তেজ হলুদ আলো। সেই আলোয় তৃষা সামনে দাঁড়িয়ে লাজুক মুখে হেসে বলল, নাও, হল তো!

দীপনাথ দেখে, হলুদে খয়েরিতে ছাপা সুন্দর শাড়িতে বউদির বয়স কম করেও দশ বছর কমে গেছে। কিন্তু হাসিটি সন্তোষ মুখ এত মলিন যে শাড়িটাকে ছদ্মবেশ বলে মনে হয়।

তৃষা চোখ নামিয়ে শাড়িটা একবার দেখে বলল, বুড়ো বয়সের এত সাজগোজ কে দেখবে বলো তো!

মেয়েরা নিজেদের জন্যই সাজে ।

তোমাকে বলেছে !

ঠিক আছে, তুমি না হয় আমার জন্যই সেজো । তোমাকে বুড়ী দেখতে আমার ভাল লাগে না ।

এ কথায় তুষা যেন কিছুক্ষণ নিজেকে খুঁজে পেল না । শক্ত মেয়ে হরিণীর মতো চকিত চোখে চারদিক দেখতে লাগল । তারপর হঠাৎ চোখ পড়ায় শ্রু কঁচকে বলল, কী সর্বনাশ ! তুমি যে বন্দুক নিয়ে বসে আছ । কিন্তু ভাই, আমি তো রোহিণী নই ।

দীপনাথ হেসে বলে, আমারই বা কোন গোবিন্দলাল হওয়ার দায় ঠেকেছে !

দীপনাথ বন্দুকটা আবার র্যাকে তুলে রেখে বলল, শিলিগুড়িতে থাকতে এই বন্দুকটা কয়েকবার চালিয়েছি । হঠাৎ হাতের কাছে পেয়ে একটু দেখছিলাম । এটা যত্ন করে রেখো ।

যত্নেই আছে । এতদিন থানায় জমা ছিল । নিয়ে এসেছি ।

ভাল করেছে । বাবা ফিরেছে ?

না । উনি বোধ হয় শিমুলতলার বুড়াদের আড্ডায় বসেছেন ।

বাবাকে চাকরির খবরটা দিতেই আসা ।

আজই চলে যাবে নাকি ?

যাবো না ?

খুব যদি জরুরী কাজ না থাকে তবে থেকে যাও না রাতটা !

কেন বলো তো ?

কেন আবার ! তুমি এলে আমরা কত খুশি হই জানো না ? ছেলেটা তো বড় কাকা বড় কাকা করে অস্থির । আমাকেও জ্বালিয়ে খায় । সবাইকে বলে তুমি নাকি দারুণ ভাল বকসিং জানো, আরো কি কি সব যেন । বলে, বড় কাকা একাই পঞ্চাশজন গুণাকে মেরে পাট করে দিতে পারে ।

বহুকাল বাদে এমন হোঃ হোঃ করে হাসল দীপনাথ । বলল, ব্যাটা বোধ হয় খুব আড্ডাভেঞ্চারের বইটাই পড়ে ।

ভীষণ । আর দিনরাত্তির কেবল মারপিটের গল্প ।

ওর জন্য এয়ারগান এনেছি ।

কত কি এনেছো পাগল ! কত টাকা নষ্ট হল ।

আমার মাইনে দেড় হাজার, মনে রেখো ।

দেড় হাজার ! বলে একটা শ্বাস ছাড়ে তুষা । বলে, সংসারী হলে বুঝতে এই বাজারে দেড় হাজার কিছুই নয় । এখন থেকে কিছু কিছু করে জমাও ।

তুমি সত্যিই বুড়ী হয়েছো ।

সেই মেয়েটার কি খবর বলো তো ! যাকে একদিন সঙ্গে করে এনেছিলে !

মেয়ে নয়, বউ । বসের বউ ।

ঐ হল । সে কেমন আছে ?

ভাল না ।

কেন ?

স্বামী-স্ত্রীর ডিভোর্স হয়ে যাচ্ছে ।

তুষা একটু চূপ করে থাকে । তারপর হঠাৎ বলে, সত্যি বলো তো ঠাকুরপো, ডিভোর্সের কারণ তুমি নও তো !

দীপনাথ চমকে তাকায়, কী যা তা বলছ ?

আর একদিন ঠাট্টা করেছিলাম, তুমি রেগে গিয়েছিলে । আজ কিন্তু ঠাট্টা করছি না । আমার সতিই ধারণা, ও মেয়েটা তোমাকে অসম্ভব ভালবাসে ।

দূর ! আমাকে দেখলেই যা তা বলে । কথায় কথায় অপমান করে । তুমি একটি বুদ্ধ । তৃষা হাসল, তা হলে বলি, এবার ঠিক জানলাম মেয়েটা তোমার প্রেমে পড়েছে । নইলে অপমান করত না ।

॥ ছত্রিশ ॥

ওপরে আজকের তারিখ । নীচে সাদা পাতায় গোটা গোটা অক্ষরে শ্রীনাথ তার ডায়েরী লিখছিল । আগেও লিখত মাঝে মাঝে । তবে সে-সব ছিল গাছপালার কথা, নানা অভিজ্ঞতা এবং ভাবনা-চিন্তার কথা । আজকাল সে লিখেছে নিজের জীবনের সব নোংরামির কথা । জ্বালা-যন্ত্রণার কথা । কিছুই গোপন করছে না, বরং এত খোলাখুলি লিখেছে যে লেখার পর সেটা পড়তে গেলে তার নিজেরই মাথা গরম হয়ে যায় । তবু তার মধ্যে আছে বিষাক্ত, জ্বালাধরা, তীব্র এক সুখও ।

সবচেয়ে উত্তেজনা হয় যখন তৃষার কথা লেখে, মল্লিনাথের কথা লেখে । ওদের অবৈধ প্রেম এবং সজলের জন্মকথা সবটাই সে লিখেছে কিছু তথ্য ও কিছু অনুমানের ওপর দাঁড়িয়ে । কিন্তু গল্পটা জমেও গেছে বেশ ।

শ্রীনাথ জানে, তার ঘরে কোথাও কিছু গোপন করার উপায় নেই । তৃষা ডুপলিকেট চাবি করিয়ে রেখেছে । তার অনুপস্থিতিতে এই ঘরে প্রায়ই নিখুঁত তল্লাসী চালানো হয় । তৃষা কী খোঁজে সেই জানে । তবে শ্রীনাথ তার ডায়েরীটা খুব সহজ জায়গায়, হাতের কাছে, টেবিলের ওপরেই রেখে যায় । তৃষা পড়ুক । শুধু তৃষাকে পড়ানোর জন্যই না তার এই নিরন্তর ডায়েরী লিখে যাওয়া ! এর জন্যই সে বেশ মোটা একটা খাতা তার প্রেস থেকে বাঁধিয়ে এনেছে ।

আজ সে মদ খায়নি । মেয়েমানুষের ঘরে যায়নি । আজ দুপুরে প্রচণ্ড বৃষ্টির পর মনটা কেমন অন্য গান গাইল । প্রেসের বুড়ো মালিক মারা গেল সেদিন । গতকাল তার শ্রাদ্ধের নিমন্ত্রণ খেতে গিয়েই জীবনের নশ্বরতার দিকটা হঠাৎ আবার চোখে পড়ল তার । রাস্তা দিয়ে মড়া নিতে দেখলে বা শ্মশানঘাটে গেলে যেমনটা হয় আর কি ! ফুটি করলে মনের ভারী ভাবটা হয়তো কেটে যেত । কিন্তু কাটাতে চায়নি শ্রীনাথ । বহুকাল অনিত্য জীবনের কথা তো ভাবেনি । নতুন একটা ভাবনা । সেটা ভেবে দেখলে ক্ষতি কি ?

আজ-সন্ধ্যার মুখে ফিরে এসে পরিপাটি করে স্নান সেরে ডায়েরী নিয়ে বসেছে । আজ কোনো জ্বালা-যন্ত্রণার কথাও লিখেছে না সে । আজ সে খুব শান্ত বিষণ্ণতায় লিখেছে একটা যন্ত্র ও একজন মানুষের যৌথ সংগ্রামের কথা ।

একদিন সেই উনিশশো পনেরো সালে খলসেপুর গ্রাম থেকে একটি ছেলে জীবিকার সন্ধানে কলকাতায় এসে ডুবজলে পড়ে গেল । এই তরঙ্গসঙ্কুল উথাল-পাথাল দরিয়ায় সাঁতারের কায়দা জানে না । কখনো এ বক-এ শুয়ে থাকে, কখনো ঐ গাড়িবারান্দার তলায় । তখন করপোরেশনের জলের কল শুকনো থাকত না, লোকের সদাশয়তা ছিল কিছু, দানধ্যান ছিল, ইংরেজ ছিল, রাজা ছিল, জমিদার ছিল । সে এক অন্য জগৎ । কখনো কলের জল, কখনো লোকের দয়া সম্বল করে ছেলোটো টিকে রইল । দু-একজন তার অবস্থা

দেখে দেশে ফিরে যাওয়ার পরামর্শ দিল। ছেলোটো গেল না...কালক্রমে সেই ছেলে কিভাবে এক মস্ত প্রেসের মালিক হল সেই কাহিনী খুব মনপ্রাণ দিয়ে লিখছিল শ্রীনাথ। বড়ো মালিক শচীন্দ্রনাথকে সে সত্যিই প্রশংসা করত। এই একজন লোক যিনি জীবনে কাউকে বড় একটা আপনি থেকে তুমি বলেননি।

শচীনবাবু মারা গেলেন, বহুকাল বাদে খুব দুঃখ পাওয়ার মতো একটা ঘটনা ঘটল শ্রীনাথের জীবনে। আজকাল তার মন এতই ভৌতা হয়ে গেছে যে, সহজে সে দুঃখ পায় না। মনে হয় কোনও নিকট আত্মীয়-বিয়োগ ঘটলেও তার চোখে জল আসবে না কিছুতেই।

কিন্তু এল। শচীনবাবুর বয়স হয়েছিল আশির কাছাকাছি। এই বয়সেও বেশ ভালই ছিলেন। শরীরে মেদ ছিল না, কোনও ঘ্যানঘ্যানে অসুখ ছিল না, খাওয়ার লোভ ছিল না। প্রচুর দানধ্যান করে গেছেন। শ্রীনাথ একমাত্র এই লোকটার জন্যই একটানা এতকাল এক জায়গায় নিরুপদ্রবে কাজ করে গেছে। একেবাবে হালে কিছু শ্রমিক অসন্তোষ, ধর্মঘট, বিক্ষোভ এবং লক আউটের সম্ভাবনা ইত্যাদি দেখা দিলেও কোনো দিনই খুব বিরক্তিকর কিছু ঘটেনি। সবই মিটে গেছে। সেই প্রতিষ্ঠানের মেরুদণ্ডটি ভেঙে গেল। তবে প্রেসের ভবিষ্যৎ ভেবে নয়, নিছক একজন মানুষের জন্যই সেই দিন খুব কঁদেছিল শ্রীনাথ। খুব কঁদেছিল।

তার নিজের জীবনে আব কোনো সদর্থক লড়াই নেই, গবীব থেকে বড়লোক হওয়া নেই, সাফল্য লাভ নেই। এখন একটানা এক জীবন, ঘাত-প্রতিঘাতহীন বয়ে যাবে মৃত্যুর দেউড়ি অবধি। তাই বুঝি ঐ কান্না। যে জীবন তার নয়, যে জীবন তার কখনো হবে না তাকে সিংহাসনে বসিয়ে মানুষ মাঝে মাঝে এরকম ধূলায় পড়ে কাঁদে।

দরজাব শেকল নড়ে উঠতেই সামান্য চমকে গিয়েছিল শ্রীনাথ।

মেজদা ! বাইরে থেকে কে ডাকল।

কে ?

আমি দীপু। দরজা খোলো।

শ্রীনাথ উঠে দরজা খুলে দীপনাথকে দেখে একটু অবাক হয়। কারণ, দীপনাথের পরনে একটা লুঙ্গি করে পরা ধূতি, গায়ে একটা স্যান্ডো গেঞ্জি। এই বেশে কোথেকে এল ?

দীপু ! কখন এসেছিস ?

অনেকক্ষণ। সেই বেলা থাকতে।

টের পাইনি তো ?

পাবে কি করে ? তুমি তো বারবাড়িতে থাকো।

দরজা ছেড়ে ঘরে গিয়ে দীপনাথকে ঘরে আসার পথ দেয় শ্রীনাথ। টেবিলের পাশের চেয়ারটায় গিয়ে ফের বসে বলে, এই ঘরটাই বাড়ির মধ্যে আমার সবচেয়ে বেশী ভাল লাগে।

ঘবখানা তো ভালই। বলে দীপনাথ বিছানায় বসতে যাচ্ছিল।

শ্রীনাথ বলল, ঐ আরাম কেদারায় বোস। মুখোমুখি হবে। আজ কি এখানেই থাকবি নাকি ?

বউদি যেতে দিল না। একটু কাজ ছিল কলকাতায়।

কাজ তো রোজই আছে। তোর চাকরির কি একটা গোলমাল চলছে না ?

মিটে গেছে। আমি কোম্পানির অ্যাসিস্ট্যান্ট ম্যানেজার হয়েছি।

বাঃ খুব ভাল ।

বলে শ্রীনাথ একটা বিড়ি ধরাল । আজকাল বিড়ি খেতে দারুণ লাগে । বড়বাজার থেকে স্পেশাল বিড়ি কিনে আনে পাইকারি দরে । দীপনাথের সাফল্য তাকে বিন্দুমাত্রও স্পর্শ করে না । দুনিয়ার কোনো কিছুই করে না বড় একটা । কত মাইনে হল জিজ্ঞেস করবে করবে করও করতে পারে না । কি হবে জেনে ?

খানিক বিড়ির ধোঁয়া বুকে আটকে রেখে ছেড়ে দিয়ে বলল, ভাল । খুব ভাল ।

দীপনাথ চারদিকে তাকিয়ে ঘরখানা দেখে । স্থাপত্যের দিক দিয়ে ঘরটাকে গোলই বলতে হয় । সব দিকটা না হলেও পিছনের দিকটা পুরোপুরি অর্ধ বৃত্তাকার । চারদিকেই মস্ত মস্ত জানালা । এই ঘরের নাম মল্লিনাথ দিয়েছিল ভাবন-ঘর ।

হঠাৎ দীপনাথ প্রশ্ন করে, বড়দা এই ঘরে বসে কী ভাবত বলো তো !

কে জানে !

বড়দাকে কখনো কিছু খুব ভাবতে তো দেখিনি । হইচই করত, ফুটি করত, ভাবত কখন ?

ভাবত, ভাবত । না ভাবলে, ব্রেন না খাটালে এত সম্পত্তি করল কি করে অত অল্প বয়সে ?

দীপনাথ মাথা নেড়ে বলে, ভাবলেও অলস চিন্তা করত না । এই ঘরটা আসলে ছিল কাজের ঘর । ড্রইং করত, প্ল্যান আঁকত ।

তা হবে । আমি তো কিছু করি না, বসে বসে ভাবি । ঘরটার নাম আমিই সার্থক করছি ।

কি ভাবো তুমি ? সকৌতুকে প্রশ্ন করে দীপনাথ । তার সন্দেহ মেজদারও ভাবনা-চিন্তা করার মস্তিষ্ক নেই ।

আমার সবই অলস চিন্তা । অলস মাথা শয়তানের বাসা ।

শ্রীতমকে দেখতে গিয়েছিলে ?

শ্রীনাথ মাথা নেড়ে বলে, না । তোর বউদি গিয়েছিল ।

সে খবর শুনেছি । তোমারও একবার যাওয়া উচিত ।

এবার যাবো একদিন । তুই কি প্রায়ই যাস নাকি ?

যাই । শ্রীতমকে তো ছেলেবেলা থেকে চিনতাম ।

সে তো ঠিকই ! শ্রীতম ছেলেটাও ভাল । ওর যে কেন এমন হল :

সে কথা আমিও ভাবি । শ্রীতমের তো কোনো পাপটাপ নেই । তবে কেন ওরই এই রোগ !

বাঁচবে না, না ?

ডাক্তাররা স্পষ্ট করে সে কথাটাও তো বলছে না । তবে শ্রীতম খুব বেঁচে থাকতে চায় ।

এ কথায় যেন একটু অবাক হয় শ্রীনাথ । বেঁচে থাকাটা এমন কি ভাল ব্যাপার যে, লোকে বেঁচে থাকতে চাইবে ! তবে মাথা নেড়ে গতানুগতিক কথাটাই বলল, তা তো চাইবেই ! কে না চায় !

সেই আকাজক্ষাই শ্রীতমকে বাঁচিয়ে রেখেছে । হয়তো শেষ অবধি ঐ জোরেই বেঁচেও যাবে ।

তাই যেন হয় । এই বয়সে বিলুটা না ভেসে যায় ।

তোমার এক-আধদিন গিয়ে ওদের সঙ্গে দেখা করা উচিত । কেন সময় পাও না বলো তো ! প্রেসের চাকরিটুকু ছাড়া আর তো তোমার দায়দায়িত্ব নেই । সংসার-টংসার সব তো

বউদি দেখছে।

শ্রীনাথ আর একটা বিড়ি ধরিয়ে বলে, সময়ের অভাবটা বড় কথা নয়। আমার কেমন যেন অসুখ-বিসুখের কাছে যেতে ইচ্ছে হয় না।

তা বলে কর্তব্য করবে না? আমরা ছাড়া শ্রীতম আর বিলুর কে আছে বলো? কেন, শ্রীতমের তো মা বাপ ভাই বোন, সবাই আছে শুনেছি।

আছে, তবে তারা এখানে থাকে না। সেটা কোনো কথা নয়। এখানে যখন অসহায়ভাবে আছে তখন আমাদের সকলেরই উচিত খোঁজ খবর নেওয়া।

শ্রীনাথ একটু বিপদে পড়ে যায়। সঠিক কিছু জবাব দিতে পারে না। অন্য দিকে চেয়ে অন্য প্রসঙ্গে যাওয়ার জন্য বলে, সেই যে তোর সঙ্গে একটা মেয়ে এসেছিল তার খবর কি? মেয়ে নয়, বসের বউ।

ওঃ, আমি ভেবেছিলাম বুঝি—

কথাটা হাওয়ায় ছেড়ে দেয় শ্রীনাথ। দীপনাথ একটু লজ্জা পায়। শ্রীনাথ কী ভেবেছিল তা খুব দুর্বোধ্য নয়।

দীপনাথ বলল, অন্যরকম ভাববার তো কিছু নেই। আমি তো পরিচয় করিয়ে দেওয়ার সময়েই বলেছিলাম যে, উনি আমার বসের বউ।

তা হবে। মনে ছিল না। মেয়েটা অনেক খবর রাখে।

একালের ছেলেমেয়েরা তোমাদের আমলের চেয়ে একটু বেশী ইনফর্মেশন রাখে।

তা বুঝি। সজলই তো এমন সব কথা বলে যে আমি অবাক হয়ে যাই।

দীপনাথ মৃদু হেসে বলে, ইনফর্মেশনের ব্যাপারে তোমার আগ্রহ খুবই কম কিন্তু মেজদা। আজকাল তোমাকে সব ব্যাপারেই খুব কোলড বলে মনে হয়। কেন বলো তো!

আমার কথা বাদ দে।

বউদির সঙ্গে কি বনিবনা হচ্ছে না?

কোনোদিনই হত না।

আজকাল বেশির ভাগ সংসারেই স্বামী-স্ত্রীর বনিবনা হচ্ছে না দেখছি।

তাই হবে।

কিন্তু তোমরা তো আজকালকার ছেলেমেয়ে নও। যথেষ্ট বয়স হয়েছে। এতদিনে আন্ডারস্ট্যান্ডিংটা তৈরি হয়ে যাওয়া উচিত ছিল।

শ্রীনাথ একটা শ্বাস ছেড়ে বলে, অনেক ব্যাপার আছে। সবটা তোকে বলা যায় না।

দীপনাথ গম্ভীর হয়ে বলে, আমি শুনতে চাইনি। ওসব শুনে কী হবে? সবসময়েই দুপক্ষেরই সমান বলার কথা থাকে। কিন্তু কথা এক জিনিস, আর কাজ অন্য।

শ্রীনাথ খুব ঘন ঘন বিড়িতে টান দেয় খানিকক্ষণ। তারপর বলে, আমার দিক থেকে আর কিছু করার নেই।

এটা ভাল নয়, মেজদা। এ বয়সেও যদি তোমরা স্বামী-স্ত্রী অচেনা লোকের মতো থাকো তবে ছেলেমেয়েরা কী ভাববে? ওরা বড় হচ্ছে, বুঝতে শিখছে। মা-বাবার মধ্যে সম্পর্ক ভাল না থাকলে ছেলেমেয়েরা মানুষ হয় না।

তার আমি কি করব? আমার কিছু করার নেই।

বউদির ব্যাপারে তুমি বরফের মতো ঠাণ্ডা থাকলে কি করে কি হবে! বরং একদিন তোমরা মুখোমুখি বসে ঠাণ্ডা মাথায় কথাবার্তা বলো না কেন! বউদি তো অবিবেচক নয়। বরং আমাদের অনেকের চেয়ে বউদির বুদ্ধি বেশী, বড়দার সম্পত্তি উনি খুব ভাল দেখাশোনা

করছেন।

হাঁ, ঠুর অনেক গুণ। বিষগলায় বলে শ্রীনাথ।

ঐ তো রাগের কথা হল। মানুষের গুণের পাশাপাশি দোষও তো কিছু থাকবেই। তোমারও কি দোষ নেই?

আমারই তো সব দোষ বলে শুনি। শ্রীনাথ খুবই নিরুত্তাপ গলায় বলে।

এটাও রাগের কথা। শোনো মেজদা, এভাবে বারবাড়ির ঘরে তোমার বনবাস মোটেই ভাল দেখায় না। তার চেয়ে তোমরা একটা আপসরফা করে নাও।

আমাকে আর কিছু করতে বলিস না। আমি পারব না।

কেন পারবে না?

আমার ও ব্যাপারে কোনো আগ্রহ নেই।

দীপনাথ একটু চুপ করে ভাবে। ঠিক এই অবস্থায় শ্রীনাথকে আর চাপাচাপি করা উচিত হবে কিনা বুঝতে পারে না। তার মনে হয়, শ্রীনাথ এখন এমন একটা হতাশা ও মানসিক অবসাদে ভুগছে যে তাকে বেশী চাপ দিলে সে ক্ষেপে উঠবে।

দীপনাথ মৃদু স্বরে বলে, ঠিক আছে। তুমি না চাইলে কোনো কথা নেই।

শ্রীনাথ আর একটা বিড়ি ধরাচ্ছে। ধরিয়ে বলল, তুই যেভাবে বলছিস ওভাবে এর সমাধান হয় না। অনেকদিনের অনেক ব্যাপার জমে জমে পাহাড় হয়েছে। এ শুধু কি কথা কয়ে ঠিক করা যায়?

তুমি অত বিড়ি খাচ্ছে কেন? আগে তো খেতে না।

খাই। এমনিই।

অত বিড়ি খেও না।

কি আর হবে।

রেসের মত তোমাকে সেদিন দেখে খারাপ লেগেছিল। প্রায়ই যাও নাকি?

যাই। তবে নিয়মিত কিছু নয়। আমার নেশা নেই। তুই যাস কেন?

সাধ করে যাই না। বোস সাহেবের সঙ্গে যেতে হয়েছিল। নইলে রেসটেন আমি বুঝিই না।

শ্রীনাথ একটা শ্বাস ফেলে, আমার কাছে সব সমান। ভাল বা মন্দ বলে কিছু নেই।

তুমি আজকাল খুব অন্যরকম হয়ে গেছ।

সেটা আমিও টের পাই। কিন্তু কিছু করার নেই।

করার থাকলেও তো তুমি করবে না।

একথায় শ্রীনাথ একটু হাসল।

আমি সজলকে নিয়ে একটা কথা ভাবছি, মেজদা।

কি?

আমার চাকরি তো পাকা হল। ভাবছি কলকাতায় একটা ফ্ল্যাট নেবো। সজলকে কলকাতার কোনো ভাল ইংলিশ স্কুলে ভর্তি করে দেবো। আমার কাছেই থাকবে।

সজল কি যেতে চায়?

খুব চায়। আজই তো আমাকে চুপিচুপি বহুবার বলেছে, আমাকে তোমার সঙ্গে নিয়ে চলো, বড়কাকা। আমি তোমার কাছে থাকব।

সজল গুরুত্বপূর্ণ একটা কথা আমার কাছেও বলে। ও বোধহয় এ বাড়িতে থাকতে চায় না।

না, চায় না। তোমরা ওর মনের দিকে মোটেই তাকাও না। হি ইজ বিয়িং নেগলেকটেড। আগের বার যখন এসেছিলাম তখন ও আমাকে কিছু অদ্ভুত কথা বলেছিল। তখনই বুঝেছিলাম ও ভেতরে ভেতরে রিভোলট করছে।

হতে পারে। আমি অত সব লক্ষ করিনি।

করো না কেন? আমাদের বংশের এখনো পর্যন্ত ঐ একটিই সলতে। সজলের দায়িত্ব তোমরা যদি ঠিকমতো নিতে না পারো তবে আমিই নেবো। ও আমাকে খুব ভালও বাসে।

নে না। কে বারণ করেছে? ছেলেমেয়েরা আমার কাছে মানুষ হয় না, হয় ওদের মায়ের কাছে। কাজেই ওদের ভালমন্দ তোর বউদির হাতে।

তবু তোমারও দায়িত্ব আছে। তুমি বাবা।

শ্রীনাথের বিড়ি নিভে গেছে। সেটার পোড়া মুখটা টিপে ছাই ফেলেতে ফেলেতে খুব অবাক হয়ে প্রতিধ্বনি করল, আমি বাবা!

দীপনাথ অত্যন্ত তীক্ষ্ণ চোখে চেয়ে ছিল শ্রীনাথের দিকে। এই লোকটার জন্য তার দুঃখ হয়, এর ওপর রাগও হয়। কোথায় যেন একটা স্বাভাবিকতার সুর কেটে গেছে শ্রীনাথের জীবনে। বড়দা মল্লিনাথের সঙ্গে মেজ বউদি তুষার যে অবৈধ সম্পর্কের কথা কানাঘুষায় দীপনাথের কানে গেছে তা যদি সত্যিও হয় তবু তার জন্য এতদিন বাদে শ্রীনাথের খুব বেশী প্রতিক্রিয়া থাকার কথা নয়। যদি কিছু ঘটেও থাকে তার জন্য শ্রীনাথেরও কি দায়িত্ব নেই! বড়দার খামার বাড়িতে বউদিকে একা ফেলে রাখত কেন দিনের পর দিন? ঘি আর আগুন কাছাকাছি রাখতে নেই, সে কথা কে না জানে! তখন তো অনেকে এমন কথাও বলেছে যে, দাদার সম্পত্তি হাত করার জন্যই শ্রীনাথ বউকে কাজে লাগিয়েছে। এসব নোংরামি এতকাল গুরুত্ব দিয়ে ভাবেন দীপনাথ। এখন অবস্থা দেখে ভাবতে হচ্ছে।

সে বলল, সজলের ওপর আমাদের সকলেরই দায়িত্ব আছে।

বলছি তো, তোর বউদির সঙ্গে বুঝে দেখ। আমি এ সংসারের কেউ নই।

বউদির অমত নেই। তবু তোমাকে জিজ্ঞেস করতে বলল।

তবে তো হয়েই গেছে। নিয়ে যাস সজলকে, আমার অমত নেই। তুই কি শিগগিরই বিয়েটিয়ে করবি?

হঠাৎ ওকথা কেন?

বিয়ে না করলে সজল থাকবে কার কাছে? তোর তো অফিস আছে, টুর আছে।

লোক রাখব!

দূর পাগলা! শ্রীনাথ হাসে, বাচ্চারা কি মাইনে-করা লোকের কাছে ভাল মানুষ হয়?

যাকগে, সেটা পরে ভেবে দেখা যাবে। এবছরই তো কিছু হচ্ছে না। নতুন সেসনে ওকে কলকাতার ভাল স্কুলে ভর্তি করব। তার দেবী আছে।

বাবার সঙ্গে দেখা কবেছিস?

করেছি। বাবা বলছিল, তুমি নাকি এক বাড়িতে থেকেও তাঁর খোঁজখবর নাও না।

নিই না ঠিক নয়। মাঝে মাঝে নিই। তবে এক বাড়িতেই তো থাকা, ব্যস্ততার কিছু নেই।

আর একটা কথা, মেজদা।

তুই আজ অনেক কথা বলছিস।

প্রয়োজন হয়েছে বলেই বলছি।

বল। শুনছি।

ঘরের কথা বাইরের লোককে জানানো কি ভাল ?

শ্রীনাথ ঠাণ্ডা বিড়িটার দিকে চেয়ে থাকে । জবাব দেয় না ।

দীপনাথ অত্যন্ত ঠাণ্ডা দৃঢ় স্বরে বলে, এ কাজটা কিন্তু মোটেই ঠিক নয় । মনে রেখো, এই পরিবারের সঙ্গে আমাদের সকলেরই সম্মান জড়িয়ে আছে । বউদির নামে তুমি যদি বাইরে কিছু রটাও সেটা আমাদেরও ছোটো করে দেয়, তোমাকেও করে । তুমি সেটা বুঝতে চাও না কেন ?

ওসব কথা থাক । শ্রীনাথ অস্বস্তি বোধ করে বলে ।

আজ থাক । কিন্তু পরে যদি শুনি তবে আবার কথাটা তুলব, আর তুমি যদি মনে করো যে, মানসিক দিক দিয়ে তুমি নিজের ওপর কন্ট্রোল হারিয়ে ফেলেছ তা হলে তা জানিও, ডাক্তার দেখানোর ব্যবস্থা করব ।

সুস্পষ্টই এটা ওয়ার্নিং । দীপনাথকে শ্রীনাথ খুব ভাল করে চেনে না । তবে এটা জানে যে, দীপনাথের নৈতিক বোধ খুব প্রবল, সবাই তাকে দাদা মল্লিনাথের মতই শক্ত সমর্থ লোক বলে জানে । তবে মল্লিনাথের নীতিবোধে ঘাটতি ছিল, দীপনাথের তা নেই ।

শ্রীনাথ বুঝতে পারল না দীপুকে তার ভয় পাওয়া উচিত কিনা । বোধহয় উচিত । কেননা গত পাঁচ মিনিট সে দীপনাথের চোখে চোখ রাখা দূরের কথা, তার দিকে চাইতেই পারল না ।

দীপনাথ উঠল, আমি একটু নিতাই স্ক্যাপার খোঁজ করতে যাচ্ছি । যাওয়ার সময় দেখা হবে তোমার সঙ্গে ।

আয় ।

দীপু চলে যেতে নিশ্চিত্তির শ্বাস ছাড়ল শ্রীনাথ । ভারী ভয়ের গুড়গুড়ানি উঠেছিল বুকের মধ্যে । ঠিক এই রকম ভয় পেত সে দাদা মল্লিনাথকে ।

ডায়েরী বন্ধ করে রাখল শ্রীনাথ । আর লিখতে ইচ্ছে করছে না । উঠে বহুকাল বাদে সে বিনা প্রয়োজনে ভিতর বাড়ির রাস্তায় পা দিয়ে হাঁটতে থাকে ।

তৃষা নিজের ঘরের বারান্দায় একটা প্লাস পাওয়ারের চশমা চোখে দিয়ে মাদুরে বসে জাবদা খাতায় কী লিখছিল নীচু হয়ে । ফুরফুরে হাওয়া দিচ্ছে । চাঁদনী নেই, কিন্তু থোকা থোকা জোনাকি জ্বলছে চারদিকে । ঝিঝি ডাকছে ।

তার সাড়া পেয়ে মুখ তোলে তৃষা ।

আর ঠিক সেই মুহূর্তেই শ্রীনাথ টের পায়, তৃষা আর যুবতী নেই । তৃষা প্রৌঢ়ত্ব পা দিয়েছে । বসার ভঙ্গি, চশমা, মুখ তুলে চাওয়া—এসব কিছুর মধ্যে সুস্পষ্টই বয়সের প্রগাঢ়তা এসে গেছে ।

তুমি ! -

একটু এলাম ।

বোসো ।

শ্রীনাথ মাদুরে বসল । দূরত্ব রেখে ।

তৃষা নিজে থেকেই বলে, দীপুর সঙ্গে দেখা হয়েছে ?

হঁ ।

ও বড় ভাল ছেলে ।

হ্যাঁ ।

আর কথা ঝুঁজে পাচ্ছিল না শ্রীনাথ ।

॥ সাইত্রিশ ॥

অঙ্ককার উঠোন ভর্তি জোনাকি পোকার নীলচে আলো নেচে বেড়াচ্ছে। আলোর তালে ডাকছে ঝিঝি পোকা। দুটো একটা গার্হস্থ্যের শব্দ ছাড়া চারদিক বড়ই নিব্বুম।

বারান্দায় মুখোমুখি বসা পুরুষ ও রমণীটিকে হঠাৎ কারও চোখে পড়লে ভাববে, স্বামী-স্ত্রী ঘনিষ্ঠ বিশ্বস্ততায় পরস্পরের উদ্ভাপ নিচ্ছে। কত ভুল দৃশ্যই না রচিত হয় এইভাবে।

শ্রীনাথ তৃষার দিকে কয়েকবার তাকিয়ে চোখ ফিরিয়ে অঙ্ককার দেখছে। তৃষা নীচু হয়ে তার খাতার পাতা ওপটাচ্ছে। অনেকক্ষণ আর কেউ কোনও কথা বলল না। পরস্পরের গুপ্ত কৃত দুর্বলতা আর পাপের কথা তারা জানে। তাই আহত হওয়ার ভয়ে মুখোমুখি তারা পরস্পরকে আজকাল কদাচিৎ আক্রমণ করে।

শ্রীনাথ সামান্য তিক্ত গলায় বলে, দীপু আমার ছোটো। অনেক ছোটো। ওকে আমাদের ঘরসংসারের খবর জানানোটা কি ভাল?

তৃষা খুবই ঠাণ্ডা গলায় জবাব দিল, খবরটা জানাল কে? তোমার কি সন্দেহ আমি? দীপু আজ অনেক কথা কইল। সবটা কানে ভাল ঠেকল না। কেউ নিশ্চয়ই জানিয়েছে।

কি কথা?

তোমার আমার কথা। গরমিলের কথা।

সে তো এ-বাড়ির কাকটাও জানে।

দীপু তো এ-বাড়ির লোক নয়। সে জানল কেমন করে?

কেউ বলেছে হয়তো। উদাস গলায় তৃষা বলে, বললেই বা দোষ কি? কে কার পরোয়া করে?

আফটার অল দীপু আমার ছোটো ভাই। সে কিছু বললে আমার অপমান হওয়ার কথা।

হওয়ার কথা, কিন্তু হয়েছে কি?

নিশ্চয়ই হয়েছে। নইলে এলাম কেন?

এখনও যে অপমানের বোধ একটু হলেও আছে সেটা ভাল।

আমি ঝগড়া করতে আসিনি।

ঝগড়া কেউ করছে না।

শ্রীনাথ উম্মা চেপে আবার ঠাণ্ডা গলায় বলল, তোমার খেলা তুমি খেলবে, আমার খেলা আমি খেলব। এর মধ্যে কোন সালিশী ডেকে আনা উচিত নয়।

সালিশী কেউ ডাকেনি। তবে খেলার কথা কি বলছ তাও আমি বুঝতে পারলাম না। কিসের খেলা?

তৃষা খেলা বোঝেনি দেখে যেন খুবই অবাক হল শ্রীনাথ। তৃষার দিকে তাকাতাই আবার তার নির্ভুল নজরে পড়ল, তৃষার বয়স। এই সেদিনও ভারী কচি ঢলঢলে চেহারা ছিল তৃষার। এখন হঠাৎ যেন বয়সের ভার নেমেছে চেহারায়। মুখে ভাঁজ পড়েনি, শরীরে খাঁজ পড়েনি, চামড়া ঢিলে হয়নি, তবু কোথাও না কোথাও পুরোনো হওয়ার আভাস ধবা পড়ছে চেহারায়।

শ্রীনাথ মুখ ফিরিয়ে নিয়ে তার ছোটো বিড়ি ধরাল। বলল, খেলাটা তুমি ঠিকই বোঝো, স্বীকার কর বা না কর।

তবু তুমিও একটু বুঝিয়ে বলো না, শুন।

দরকার নেই। বলেছি তো ঝগড়া করতে আসিনি।

ঝগড়া কি আমিই করছি? শুধু জানতে চাইছি মাত্র।

জানানোর মতো রহস্য কিছু যদি থাকত। যাকগে, বলছিলাম দীপুটা এ সব না জেনে সুখেই আছে। এসব না জানলে সুখেই থাকবে।

কে কাকে কী জানায় তা আমি কি করে বলব? রেসের মাঠে তো আমি তোমাকে দেখিনি, দীপু দেখেছে। মদের দোকানে বসেছে, সে খবর দিয়ে গেল পাঁচু রিকশাওয়ালা। মিনার হলে একটি মেয়ের সঙ্গে সিনেমা দেখছিলে তা চোখে পড়েছে সিদ্ধেশ্বরবাবুর। আমি খবর দিই না, খবর পাই।

খুব শান্তভাবেই কথাটা শুনল শ্রীনাথ। তার পর বলল, খবর আমিও কিছু রাখি, কিন্তু সেগুলো বলতে গেলে চাঁচামেচি হবে, খবর আরও ছড়াবে। ও সব কথা থাক।

কথাগুলো কি বটতলার মিটিং-এর জন্য জমিয়ে রাখছ? লোক জড়ো করে না বললে সুখ নেই?

শ্রীনাথ মাথা নেড়ে বলে, বলার এখনো অনেক বাকি। ঠিকই বলেছো, লোক জড়ো করে না বললে সুখ নেই।

তবে দীপু জানল বলে আর দুঃখ করার কি? তুমিই তো ঢোল সহরং করতে বেরিয়ে পড়েছো।

শ্রীনাথ অঙ্ককারের দিকে চেয়ে বিড়িটায় শেষ টান দিয়ে বলল, দীপুর কথা আলাদা। আমি পাবলিককে যাই বলে থাকি দীপুকে বলিনি। তুমি যদি বলতে থাকো তবে আমাকেও লাজ-লজ্জার বালাই ঝেড়ে ফেলে বলতে হবে।

বলো না। বাকি থাকে কেন?

সব বলব?

সব বলতে কি? আর কিছু বাকি আছে নাকি?

আছে। পাবলিককেও আমি সব বলিনি। বলতে বলছ?

তুষা মুখ তুলে খুব সহজভাবে তাকাল। চোখে বেড়ালের মতো জুলজুলে চাউনি নেই। কিছু ক্লাস্তি কি? অন্তত গলায় একটা পরিশ্রান্ত স্বর ফুটল, তুমি কি করতে না করতে তুমিই জানো। ছেলেপুলেরা ঘনদোর নোংরা করেই, মেয়েরা তা ঝেঁটিয়ে পরিষ্কার করে দেয়। আমারও সারা জীবন তাই করতে হবে। দুঃখ কিসের?

সব আবর্জনা কি যাবে তাতে?

চেষ্টা তো করতেই হবে।

নোংরা কি তুমিই কিছু কম করেছো এই সংসারকে?

এবার ঝগড়ার কথা কে বলছে শুন!

শ্রীনাথ সামলে নিল। বাস্তবিক তুষার সঙ্গে আর ঝগড়া কবার কোনো মানেই হয় না। সামলে নিয়ে সে বলল, তোমার কাছে একটা জিনিস চাইব। দেবে?

চাইবে? তুষা অবাক হয়ে বলে, কি চাও বলো।

খুব দূরে কোথাও এক ফালি জমি কিনে চাষাবাস করব ভেবেছিলাম। তুমি তাতে বাগড়া দিয়েছো। জমির কোনো খবরই পাচ্ছি না। যদি বাধা না দাও তবে আমি একটু জমি কিনে চাষাবাস নিয়ে থাকতে পারি।

আমি বাগড়া দিইনি।

দিয়েছে। শোনাও সব করে লাভ নেই। আমি ঠিক করেছি, জমি যদি কিনতে নাই পারি তবে অন্তত কলকাতায় একটা মেসে গিয়ে উঠব। সেটা কি আটকাতে পারবে ? আটকাবো কেন ?

কেন তা আমি কি জানি। হয়তো তোমার কোনো এক্সপেরিমেন্টের জন্য আমার মতো একটা গিনিপিগ দরকার।

ও সব তোমার নিজের মনের কথা। আমি বাধা দেবো না। দিইওনি। তোমাকে নিয়ে আমার কোনো এক্সপেরিমেন্টও করার ইচ্ছে নেই।

আমি দূরে গেলে তোমারই সুবিধে। পাবলিককে ঘরের কথা বলার কেউ থাকবে না। পাবলিককে নিয়ে তো আমি ভাবছি না। তারা তোমাকেও চেনে, আমাকেও চেনে। আমি ভাবছি তোমার বাবার কথা, তোমার ছেলেমেয়ে এবং সংসারের কথা। তুমি গেলে এদের কে দেখবে ?

একটু অবাক হয়ে শ্রীনাথ বলে, এদের এতকাল কি আমি দেখাশুনো করতাম নাকি ? না, এতকাল আমিই করেছি। কিন্তু আমারও তো ক্লাস্তি আছে, বয়স আছে। আমি বরং বলি, এতকাল তো আমিই দেখলাম, এবার তুমি দেখ, আমি যাই।

কোথায় যাবে ?

এ প্রশ্ন তো তোমাকে আমি করিনি। তবে তুমিই বা করছো কেন ? কোথাও যাবো। শ্রীনাথ মাথা নেড়ে বলে, এ সম্পত্তি আমার নয়, তোমার। এখানে এ সব আগলে আমি থাকতে যাবো কেন ?

তৃষা একটা বড় শ্বাস ফেলে বলে, সম্পত্তির সুখ কি রকম তা হাড়ে হাড়ে টেব পাচ্ছি। তুমি যদি চাও তো তোমার নামে লিখে দিতে পারি।

আমার নামে লিখে দেবে কেন ? আমি নেবোই বা কোন লজ্জায় ?

উদাস মুখে তৃষা বলে, সে সব জানি না। সম্পত্তি না নিলে বলার কিছু নেই, কিন্তু সংসারের দায়িত্ব আমি একা নিতে পাবব না।

এ সব তোমার সাজানো কথা। তুমিও জানো, আমিও জানি দায়িত্ব আমার কোনোকালে ছিল না, আজও নেই। তুমি আমাকে দায়িত্ব দাওনি, আমিও নিইনি।

এতকালের কথা দিয়ে কি হবে ? আমি বলছি এখনকার কথা। এতকাল অন্যরকম ছিল বলে চিরকালই তাই থাকবে নাকি ?

শ্রীনাথ বিমর্ষ মুখে উঠে দাঁড়িয়ে বলল, আমি জানি তৃষা, তুমি আমাকে আটকে রাখতে চাও। যদিও আমাকে তোমার আর প্রয়োজন নেই।

এরকমভাবে যারা ভাবে তাদের কিছু বলার নেই। কিন্তু আমি ওভাবে ভাবি না।

তোমার মনের খবর রাখি না। কিন্তু এটা বুঝতে কষ্ট হয় না যে, আমি এ-বাড়িতে ভারচুয়ালি কয়েদ রয়েছি।

কেউ তোমাকে কয়েদ রাখেনি।

না, দরজায় তালা দিয়ে কয়েদ তো তুমি করোনি। তুমি শুধু আমার বেরিয়ে যাওয়ার পথগুলো আটকে দিয়েছো।

তৃষা হাঁটু তুলে তার ওপর ধুতনি রেখে কি যেন ভাবল একটু। তারপর বলল, তুমি কলকাতার মেসে থাকবে ?

থাকব।

তাতে বাধা কোথায় ?

বাধা যে নেই তাও নয় । মেসে আমি বহুকাল থাকতে পারব না । তুমি জেনে গেছ যে, গাছপালা ছাড়া আমি আজকাল থাকতে পারি না । হাতে পায়ে মাটি না লাগালে আমার স্বস্তি নেই । কলকাতায় গেলে আমি ছুটফট করে মরব । সেই জন্যই যদি আমি কলকাতার মেসে যেতে চাই তবে তুমি বাধা দেবে না, আমি জানি ।

আমি তোমাকে নিয়ে অত খুটিয়ে ভাবিনি । মিছিমিছি তুমি আমাকে এক মন্ত শত্রু মনে করে বসে আছো । যদি আমি শত্রু হতাম তবে অনেক কিছু করতে পারতাম ।

তাও জানি । তোমার অপার করুণা ।

ঠাট্টা কোরো না । এখন আর ও সব ভাল শোনায় না ।

শ্রীনাথ বাঁকা হাসি হেসে বলে, শত্রুতার বদলে বরং আমার কিছু উপকারই করতে চেয়েছো । স্টেশনের স্টলে সিরিৎকে লেলিয়ে দিয়ে কয়েকটা ছেলেকে মার খাইয়েছো । আমাকে নিয়ে ওরা মস্তুরা করত সেটা তোমার সহ্য হয়নি ।

বড় বড় চোখে চেয়ে তৃষা বলে, তোমার মান-অপমানবোধ নেই জানি । তা বলে তোমার পরিচয়টা তো মুছে যায়নি । তোমার অপমানে এই পরিবারেরও অপমান, সেটা ভুলতে পারিনি । মনে রেখো, এই পরিবারটা কিন্তু আমার বাপের বাড়ির পরিবার নয়, তোমারই পরিবার । আমি সঙ্গে করে আনিনি ।

শ্রীনাথ বিষ হাসি হেসে বলে, সেটা কি আর জানি না । কিন্তু আমি জানলে কি হবে ? পাবলিক জানে, এই পরিবার শ্রীনাথ চাটুজ্জের নয়, তৃষা চাটুজ্জের । তুমিই সর্বসর্বা । আমাকে কেন আর নাম-কো-বাস্তে জড়ানো ।

তোমার কি কোনো অপমানই আর গায়ে লাগে না ?

না । আমার আবাব মান-অপমান কি ? সংসারকে যদি একটা বড় গাছ বলে ভাবো তবে আমি হচ্ছি সেই গাছের একটা পোকায খাওয়া বুড়ো পাতা । খসে পড়লে কেউ টেরও পাবে না ।

সেটা তোমার মনের দোষ । আমি তোমাকে সংসারের বাড়তি লোক বলে ভাবি না । তুমি নিজে থেকেই নিজেকে বাড়তি লোক করে তুলেছো । এখানে আসার পর থেকে কখনো তুমি সংসারের সঙ্গে জড়াতে চাইলে না, আলগা আলগা গা বাঁচিয়ে থাকলে । আমার পাশে এমন একজন পুরুষমানুষ ছিল না যে সব দেখাশোনা করবে । বাধ্য হয়েই আমাকে পুরুষের কাজ করতে হয়েছে ।

কাজটা তুমি যে-কোনো পুরুষের চেয়েও ভাল ভাবে করেছে । সবাই বলে তুমি নাকি এ তল্লাটের সব জমিই প্রায় নামে বেনামে কিনে নিয়েছো । এমন কি আমার নামেও জমি কেনা হয়েছে, অথচ আমি জানি না ।

তুমি যদি সম্পত্তি দেখাশোনা করতে তাহলে বুঝতে পারতে, কত কী করে তবে সব বজায় রাখতে হয় । কতকাল সাজিনি, বেড়াইনি, সিনেমা দেখিনি । সব ছেড়ে শুধু এই ছাইমাটি আগলে যক্ষিবুড়ীর মতো বসে আছি । তবু তো তোমাকে খুশী করতে পারিনি ।

আমার সুখের অন্ত নেই । যার বউ এত গুলের তার সুখের অভাব কি ?

আবার ঠাট্টা করছ ? করো । তোমার দিন পড়েছে ।

তাই নাকি ? তুমি তাই মনে করো ?

করব না কেন ? তোমার তো ফুর্তির কোনো ভাঁটা পড়েনি । দেখছি, মুখ বুজে আছি ।

শ্রীনাথ একটা গভীর শ্বাস ফেলে বলল, তোমাকে আর কেউ না জানলেও আমি জানি তৃষা । আমার কাছে ও সব বলে ভাল সেজো না । তোমাকে মানায় না । তুমিও আমাকে

শেষ করার চেষ্টা করছ, আমিও তোমাকে শেষ করার চেষ্টা করছি। কিন্তু আমি দুর্বল, তোমার মতো ধূর্তও নই। বুঝতে পারছি আমি হেরে যাবো। তোমার সঙ্গে কেউ কখনো পেরে ওঠেনি। তবু লড়াই তো লড়াইই হবে।

তুমি বোধ হয় আজকাল খুব বেশী নেশা-টেশা করছ।

করছি। সেটাও লড়াইয়েরই কৌশল।

এত কথা হচ্ছে খুবই স্বাভাবিক কণ্ঠস্বরে। কেউ গলা তুলছে না, চোঁচাচ্ছে না। প্রায় মৃদু প্রেমের কথা বাতাসে ভাসিয়ে দিচ্ছে বৃদবৃদের মতো। দেখলে কেউ কল্পনাও করতে পারবে না যে, দুজনে আসলে নিজেদের অস্ত্র ও ঢাল নিয়ে আক্রমণ ও আত্মরক্ষার এক প্রবল চেষ্টা চালাচ্ছে।

তৃষা মৃদুস্বরে বলে, তোমার লড়াই তুমি করোগে বাতাসের সঙ্গে। তোমার সঙ্গে আমার কোনো লড়াই নেই।

নেই? তবে আমার পিছনে কেন তোমার গোয়েন্দারা ঘোরে? কেন গোপনে আমার ঘরের ডুপলিকেট চাবি তৈরি হয়? কেন বন্দীকে ডেকে ভয় দেখানো হয় জমির খবর না দেওয়ার জন্য?

তৃষা একটু খতমত খেয়ে গেল। পর মুহূর্তে নিজেকে সামলে নিয়ে বলল, সব প্রশ্নেরই সঠিক জবাব আছে। একদিন মাথা ঠাণ্ডা করে শুনো। সেদিন বুঝতে পারবে, আমি তোমার কোনো ক্ষতি করতে চাইনি। রামলাখনের ঘরে ফুটি করতে যাও বা আর যেখানেই যা করে বেড়াও, আমি বাধা দেবো না। দিতে আমার আত্মসম্মানে লাগে। কিন্তু আমার ক্ষতি করতে গিয়ে নিজের নাম ডোবাচ্ছে কেন?

শুধু আমার নাম নয়, সেই সঙ্গে তোমার নামও। কিন্তু মুশকিল কি জানো?

আমি ও সব জানতে চাই না।

তবু জেনে রাখো। এককালে, অর্থাৎ ত্রিশ-চল্লিশ বা পঞ্চাশ বছর আগে মদ খেলে বা মেয়েমানুষের কাছে গেলে নিন্দেহ হত। লোকে সন্দেহের চোখে দেখত, এড়িয়ে চলত। আজকাল দান উটে গেছে। এখন বারো আনা ভদ্রলোকই মদ খায়, মেয়েমানুষও আজকাল আর তেমন দোষ ধরে না কেউ। এই গাঁ-গঞ্জে কিছু লোক এখনো শুনলে একটু চমকে ওঠে বটে, কিন্তু তা নিয়ে বেশী একটা হই-চই করতে যায় না। যদি করত তবে এতদিনে তোমার বা আমার নামে টি টি পড়ে যেত। তুমিও সেটা জানো বলেই কোনো বাধা দাওনি আমাকে। তোমার বুদ্ধি অনেক বেশী।

তৃষা জবাব দিল না। হাঁটতে ধুতনি রেখে চেয়ে রইল। মুখে কোনো আফসোস নেই, উদ্বেগ নেই। কেবল এক ঠাণ্ডা হিসেব নিকেশ রয়েছে।

শ্রীনাথ দাঁড়াল না। সিঁড়ি ভেঙ্গে উঠোনে নেমে এল। একবার ফিরে তৃষার দিকে চাইল। একটু বয়সের ছাপ পড়ল নাকি? বয়স হল বুঝি এতদিনে।

বৃষ্টির পর ভারী ভ্যাপসা গরম পড়েছে। তবু এ জায়গাটা ফাঁকা বলে তেমন খারাপ লাগে না। দীপনাথ খানিকক্ষণ বাবার সঙ্গে কথা বলল বসে বসে। তারপর বেরোলো সরিত্তের সঙ্গে বাজার দেখতে। একটু একটু করে বুঝতে পারছিল বড়দা মল্লিনাথ যা সম্পত্তি রেখে গিয়েছিল বউদি তার ওপরেই নির্ভর করে নেই। নানা দিকে সম্পত্তি বেড়েছে, আয় বেড়েছে। সবটাই হয়তো আইন মেনে নয়। কিন্তু তবু বেড়েছে তো।

ত্রয়ীর কাউন্টারে রমরমা ভীড়। দোকানের স্টক দেখে তাজ্জব মানে দীপনাথ। কম

করেও হাজার পঞ্চাশেক টাকার জিনিস রয়েছে। দিনে অঙ্কত দু-তিন হাজার টাকার বিক্রি।
ফেরার সময় সে একটা স্বাস ফেলে বলল, না হে, বউদি জানে। কিভাবে ব্যবসা করতে
হয় তা ঐ বউদির মতো অনেক পুরুষেরও জানা নেই।

একথায় সরিৎ খুব খুশী হয়। মেজদিকে তারও বড় ভক্তি। সে বলল, দিদি রুখে না
দাঁড়ালে মল্লিদার সম্পত্তি ভুতে খেত।

তুমি কি হাসকিং মিল দেখছো?

না, সবই দেখতে হয়। তবে মেইনলি হাসকিং মিলটা।

বউদির জমি কত বলো তো।

তা কম নয়। সব তো নামে নেই।

জানি। পুলিশ বা সরকার থেকে ঝামেলা হয় না?

বন্দোবস্ত আছে।

এখানকার লোকেরা কেমন?

ভাল নয় খুব একটা। আগে নানা রকম গোলমাল করেছে। তবে এখন মেজদিকে সবাই
সমঝে চলে।

ভয় পায়?

পায়। সমীহ করে আর কি।

দীপনাথ য়ুদু হেসে বলল, মেজদাকে আমি ভালই জানি। মেজদা এত সব করতে পারত
না।

সরিৎ সতর্ক গলায় বলে, জামাইবাবু একটু অন্য রকম হয়ে গেছেন।

কি রকম বলো তো।

অন্য রকম। খুব স্বাভাবিক নয়।

সেটাও বুঝতে পারছি। কিন্তু কেন?

কে বলবে?

দীপনাথ য়ুদুস্বরে বলে, মেজদা কিন্তু মানুষ খারাপ ছিল না কোনোদিন।

সে আমি জানি। বিয়ে হওয়ার পর প্রথম প্রথম দেখেছি তো। দারুণ লোক। কিন্তু
এখন কেমন ম্যাস্তামারা হয়ে গেছেন।

তোমরা মেজদার ওপর নজর রাখো। মানুষটার কোথাও একটা গভীর ক্ষত আছে।
আমি ঠিক বুঝতে পারছি না সেটা কেন। কিন্তু আছে।

উনি তো কাউকে বলবেন না। কি করে আমরাই বা জানব বলুন।

তোমাদের কথা নয়। দীপনাথ গভীর হয়ে বলে, এ-কাজ করতে পারে একমাত্র বউদি।

দিদির সঙ্গে উনি কথাই বলেন না।

একটু বিরক্ত হয়ে দীপনাথ বলে, তাও জানি। কিন্তু বুঝি না। যাকগে, বউদির সঙ্গেই
কথা বলে দেখব।

আমরা চাই জামাইবাবু আবার স্বাভাবিক হয়ে উঠুন। উনি কিন্তু তা হচ্ছেন না। এ
জায়গার লোকদের কাছে উনি মেজদির নামে যা তা বলে বেড়াচ্ছেন।

তাই নাকি? বলে বিষ্ময়ে দাঁড়িয়ে পড়ে দীপনাথ। কি রকম?

এই তো সেদিন কলকাতা থেকে আমি আর মেজদি ফিরছি। দেখি বাটতলায় লোক
জড়ো করে যা-তা বলছেন। মেজদি আমাকে বলল, যা গিয়ে চুপি চুপি শুনে আয় কি
বলছে।

তুমি শুনলে ?

শোনা যায় না, শোনা উচিতও নয় । মেজদির হুকুমে শুনতে হল, কিন্তু সে মুখে আনতে পারব না ।

দীপনাথ খুবই বিষন্ন বোধ করে । আস্তে আস্তে হাঁটতে হাঁটতে সে অনেকক্ষণ ধরে ভাবে । শ্রীনাথ এরকম নয় । তাদের বংশে ইতরামো বড় একটা কারো মধ্যে নেই । তবে মেজদার এটা হল কি ?

দীপনাথ অনেকক্ষণ বাদে বলল, তোমার জামাইবাবুকে তোমরা কি চোখে দেখ সরিং ?

আমরা জামাইবাবুকে নিয়ে আর ভাবি না । ভেবে লাভ নেই ।

কিন্তু একটা মানুষ কেন এরকম পাগলের মতো কাজ করছে তা ভেবে দেখবে না ?

আমাকে জামাইবাবু পছন্দ করেন না । আমার নামেও লোককে যা-তা বলেন । আমি তাই বেশী কাছে ঘেঁষি না ।

দীপনাথ আর কিছু বলল না । বাড়ি পৌঁছে চুপচাপই হাত-মুখ ধুল । তারপর খেতে বসে অন্যমনস্কভাবে টুকটাক কিছু কথাবার্তা বলল । খাওয়ার ঘরে শ্রীনাথ নেই । পাশাপাশি সরিং, সে আর সজল ।

নিজের শোবার ঘর তাকে ছেড়ে দিয়ে তুষা শোবে ছেলেমেয়েদের সঙ্গে । বালিশ বিছানা ঠিক করতে যখন এল তখনই দীপনাথ বলল, বউদি, মেজদা কেমন আছে বলো তো ।

দেখছি তো ভাই ।

তবু তোমার মুখে শূনি ।

তোমার মেজদা ভাল নেই ।

কেন ভাল নেই ? শরীর খারাপ ?

শরীরের খবর তো জানি না ।

কেন জানো না ?

তুষা বড় বড় চোখে স্থির দৃষ্টিতে চেয়ে বলল, উনি জানতে দিচ্ছেন কই ?

যদি হট করে মেজদা আজ নিজের ঘরে গলায় দড়ি দেয় তাহলে ?

কী যা তা বলছ ?

একটা শ্বাস ফেলে দীপনাথ বলে, মেজদার মনের ব্যালান্স নষ্ট হয়ে গেছে বউদি । তোমার সাবধান হওয়া উচিত ।

॥ আর্টিক্রিশ ॥

কিছুক্ষণ দুজনেই চুপচাপ বসে থাকে । বাইরে রাতের নিস্তর্রতায় নানা গ্রামীণ শব্দ । দূরে মেঘ ডাকল । ব্যুষ্টি হবে ।

তুষা দীপনাথের দিকেই একদৃষ্টি চেয়ে ছিল । ইঠাৎ স্তব্ধতা ভেঙে সে-ই প্রথম বলল, কেউ যদি মরতে চায় তাহলে কি করে ঠেকাবো বল ?

দীপনাথ বিরক্ত ছিল । গলার স্বরে একটু রুঢ়তা চলে এল । সে বলল, ওটা কথা নয় বউদি, ওটা কথার চালাকি । তোমার কাছ থেকে এ ধরনের কথা আনএক্সপেকটেড । যে বুক দিয়ে আগলে অসীম মমতায় বড়দার সম্পত্তি আগলাচ্ছে, কারবার বাড়াচ্ছে, এত দায়-দায়িত্ব পালছে, সে কেন দায়িত্বজ্ঞানহীনের মতো কথা বলবে ?

কথার রুঢ়তা তুষার দুই গালে চড় কষায় । ভীষণ অপমান বোধ করে সে । পৃথিবীতে

দ্বিতীয় কেউ এ ধরনের কথা বললে সে সহ্য করত না। কিন্তু এ যে দীপনাথ। এই একজন মানুষ যার সামনে তার হৃদয় দ্রব হয়, গাঢ় হয়। দীপনাথের প্রতি তার এক অন্ধ স্নেহ।

তৃষা বড় শ্বাস ফেলে বলল, তুমি বোধ হয় ভাবছো, বিষয় সম্পত্তি নিয়ে মেতে আছি বলেই তোমার দাদাকে দেখার সময় পাই না!

ঠিক তা বলছি না।

তাই বলছ গো। বলে তৃষা স্নান হাসল। আজকাল তার মনে কোনো আবেগ ওঠে না, বিরহ জাগে না, প্রেম নেই। আছে কঠিন সব সমস্যার সমাধান, হিসেব-নিকেশ, দেনা-পাওনা। কিন্তু আজ হঠাৎ একটু দুলছে মনটা। সে দীপনাথের দিকে একদৃষ্টে চেয়ে বলে, কথটা মিথ্যেও তো নয়। বহুকাল তোমার মেজদার শরীরের খবর আমি জানি না। ওর অবশ্য এমনিতে অসুখ-বিসুখ কিছু নেই। কিছু হলে বলবেও না।

মেজদার বয়স চল্লিশের কোঠায় পড়ল না!

হবে বোধ হয়।

এইবেলা চেকআপগুলো করিয়ে নাও না কেন?

তোমাকে একটা কথা বলব?

বলো।

এসেছোই যখন দয়া করে এখন ওগুলোর ভার তুমিই নাও না!

আমি তো কাল সকালেই কেটে পড়ব।

আর একটা দিন থাকো। ডাক্তার আনানোর ব্যবস্থা আমিই করাবো। তুমি শুধু তোমার দাদাকে রাজী করাবে।

দীপনাথ একটু চিন্তা করে বলে, অফিসের বুড়ী একবার ছুঁয়ে আসতেই হবে। তারপর যদি হয়—

তাই হবে। এক্ষণ থেকে অনেকে কলকাতায় অফিস করে। তুমিও পারবে।

এখানে কি ভাল ডাক্তার আছে?

আছে, তবু আমি এখানকার ডাক্তার ডাকব না। সরিৎ কাল সকালে গিয়ে কলকাতা থেকে বড় ডাক্তার নিয়ে আসবে।

তাতে অনেক খরচ। তার চেয়ে মেজদাকে নিয়ে গেলেই তো হয়। মেজদা তো আর শয্যাশায়ী রুগী নয়।

ও কী যেতে চাইবে ডাক্তারের কাছে?

দীপনাথ হেসে ফেলল, বলল, আজ তোমার বুদ্ধি একদম খেলছে না, খুব ছেলেমানুষের মতো কথা বলছ।

কেন? কি বললাম?

মেজদা যদি কলকাতায় ডাক্তারের কাছে যেতে না চায়, তা হলে বাড়িতেও যে ডাক্তার দেখাবে তার গ্যারান্টি কি?

তবু বাড়িতে তো তুমি থাকবে!

আমিই না হয় কলকাতায় নিয়ে যাবো। তা হলে তো হবে?

তৃষা লজ্জায় চোখ নামিয়ে বলল, হবে, কিন্তু তাহলে তো তুমি আর একটা দিন এখানে থাকবে না!

শুধু আমাকে এখানে একদিন আটকে রাখার জন্য এত টাকা খরচ করবে! তুমি পাগল হলে নাকি বউদি।

রাগ করলে না তো !

না । তবে আমি গরীব ঘরের ছেলে, বাজে খরচা একদম পছন্দ করি না । বলছি তো থাকব ।

তুষা ভারী লজ্জা পেয়েছে । নিজের মনের কোনো দুর্বলতা ধরা পড়লে সে ভীষণ লজ্জা পায় । স্বভাবে এক দুর্মদ অহংকার আর তেজ আছে তার । কোথাও সে মাথা নোয়ায় না । এই একটা লোকের সামনে তার সব প্রতিরোধ ভেঙে পড়ে ।

ধরা পড়ে তুষা দুই চোখে মিটমিট করে চেয়ে দীপনাথের মুখে কৌতূকের হাসিটা দেখে নিয়ে বলল, শোনো দীপু, সংসারে বোধ হয় আমার আপন মানুষ একজনও নেই যাকে নিজের কথা বলি । আমার মতো এমন একা দুটি নেই । এমন কি আমার পেটের ছেলেমেয়েরাও আমার কাছ থেকে দূরে দূরে থাকে ।

তুমি এরকম ভয়ংকরী তো আগে ছিলে না ।

আজকাল হয়েছে । ভিতরে ভিতরে শুকিয়ে পাকিয়ে কোনোদিন যে মেয়েমানুষ ছিলাম তা ভুলতে বসেছি । অথচ পুরুষমানুষও তো নই । আজকাল তাই মাঝে মাঝে প্রশ্ন জাগে, আপনজন কেউ না থাকলে বেঁচে থাকাটা কি বড় আলুনি নয় ?

তোমার মুখে একদম মানাচ্ছে না কথাটা বউদি । তুমি কি জানো, আড়ালে, তোমাকে কেউ কেউ দেবী চৌধুরানী বলে ডাকে ?

জানব না আবার ! বলে একটু হাসে তুষা । শোনো দীপু, তোমার দাদা নয়, হয়তো একদিন শুনবে, আমিই সিলিং থেকে দড়িতে ঝুলে পড়েছি ।

ইয়ার্কি মেরো না ।

ইয়ার্কি বুঝি ? বিশ্বাস হচ্ছে না ?

তুমি মরবে কেন ?

কেউ ভালবাসে না বলে । তুষা দুষ্টুমির হাসি হাসল ।

দীপনাথ একটু গম্ভীর হয়ে বলে, মেজদার কথা কেন বললাম জানো ? মেজদার চেহারাটার ওপর যেন একটা ছায়া পড়েছে । কিসের ছায়া কে জানে ! তবে দেখলে খুব ভাল ঠেকে না । আজকাল কি মেজদা খুব ড্রিংক করে ?

তা করে বোধ হয় । কিন্তু তার জন্য নয় । ড্রিংক অনেকেই করে ।

তা হলে আর কি করে বলো তো ?

কিছু করে না । কিংবা কি করে তা জানায় না । কিন্তু ভিতরে ভিতরে ভীষণ একটা রাগ আর অভিমানে ফেটে পড়ছে সবসময় ।

তবু তুমি কিছু উপায় বের করতে পারছ না ?

তাই তো তোমাকে ধরেছি । তুমি একটা কিছু উপায় করো, হয়তো তোমার কথা শুনবে ।

ডাক্তার দেখিয়ে চিকিৎসার ব্যবস্থা করতে পারি, কিন্তু তোমাদের ভিতরকার জটিলতাকে সরল করব কি করে ? কাজটা তো সহজ নয় ।

আমাদের জটিলতা যেমন আছে থাক । এ জন্মে ওর সঙ্গে আমার বোধ হয় আর মিলমিশ হবে না । কিন্তু ও লোকটা তো বাঁচুক । নিজের মনে মাথা ঝুঁড়ে মরছে, এটা তো ভাল নয় ।

দাদার সম্পত্তি নিয়ে কোনো গুণ্ডগোল নয় তো ?

না, তা কেন ? তোমার মেজদা সম্পত্তির পরোয়াই করে না । এর সমস্যা অন্য । হয়তো

সবটার জন্যই আমি দায়ী নই।

তোমাকে দায়ী করছে কে ?

একটা শ্বাস ফেলে তৃষা বলে, তুমিই করছ গো। আর একমাত্র তোমাকেই আমি ভয় পাই।

দীপনাথের এ কথায় হাসা উচিত ছিল, কিন্তু হাসি এল না। সে বলল, ভয় পাও বউদি ? আমাকে ভয় পাও ? আমাকে ভয় পাওয়ার কি আছে ?

কি আছে তা কি করে বলব ? ঠিক এরকম আর একজনকে ভয় পেতাম। সে কে জানো ? ভাসুরঠাকুর।

দীপনাথের ভু কৃষ্ণিত হল। একটু সময় নিয়ে সে বলল, বড়দাকে তুমি খুব শ্রদ্ধা করতে ? না বউদি ?

গাঢ়স্বরে তৃষা বলল, করতাম। ওরকম মানুষকে কে না করে বলো ?

তোমাকেও বড়দা খুব ভালবাসত নিশ্চয়ই। নইলে সব তোমাকেই লিখে দিয়ে যেত না।

তৃষা দৃষ্টি নত রেখে বলল, বোধ হয়। কিন্তু সে কথা থাক।

দীপনাথ অস্বস্তির সঙ্গে মৃদুস্বরে বলল, অনেকে অনেক কুকথা বলে। আমি সেগুলো বিশ্বাস করি না। তোমরা যখন বড়দাদার বাড়িতে এসেছো, তখন আমি ছিলাম সেই শিলিগুড়িতে। কী হয়েছিল তা সঠিক জানি না। কি হয়েছিল বউদি ?

প্রয়োজনে মিথো কথা বলতে তৃষার আটকায় না। কিন্তু আজ রাতে এই প্রিয় দেওরটির সামনে যখন দ্রবীভূত মন নিয়ে সে বসে আছে তখন মিথো কথা বলতে জিভে আটকাল তার। মল্লিনাথকে নিয়ে আজ অবশ্য তার লজ্জারও বোধ হয় কিছু নেই। দশজনের সামনে ইচ্ছে করলে সে চেষ্টাও বলতে পারে।

তৃষা মৃদুস্বরে বলল, সংসারটা তো জঙ্গল। বাইরে মানুষ পোশাক পরে থাকে বটে, কিন্তু ভিতরে ভিতরে বেশীর ভাগই তো জানোয়ার। কেউ কারও ভাল দেখতে চায় না, তাই কলঙ্ক রটায়। রটানোর রসদও ছিল। আমি তখন যুবতী, ভাসুরঠাকুরেরও এমন কিছু বয়স হয়নি... আর কি কিছু বলতে হবে ? তৃষা মিথো কথা বলল না, সত্যও নয়। ঠেকা দিল মাত্র।

কুণ্ঠিত দীপনাথ বলল, থাক থাক। তোমাকে ব্যাখ্যা করতে হবে না। আমি ওসব জানি। তুমি কিছু মনে কোরো না বউদি।

আমার মনই নেই, তাই মনে করা-টরা আসে না। আগে আগে রাগ হত, দুঃখ হত। আজকাল কিছু হয় না।

আমাকে ভয় পাও কেন তা কিন্তু বলোনি।

সব কি-বলতে হয় ?

আহা, এ তো গোপন কিছু নয়।

যদি বলি তবে তুমি আমার ভয় ভেঙে দেওয়ার চেষ্টা করবে। কিন্তু আমি চাই, ভয়টা থাক। পৃথিবীতে অন্তত আমার একজনও ভয়ের লোক থাক।

দীপনাথ একটু যেন বিরক্ত হল। বলল, বলছ বটে, কিন্তু ভয়ের কোনো লক্ষণ তো কখনো দেখিনি।

তৃষা বড় বড় চোখে চেয়ে থাকে কিছুক্ষণ। তারপর বলে, দেখনি ?

কোথায় আর দেখলাম।

দেখার চোখ থাকলে তো দেখবে।

তা হলে তোমার চোখ দিয়েই না হয় দেখাও ।

এই যে সন্ধ্যাবেলা তোমার হুকুমে রঙিন শাড়ি পরে এলাম এ কাজ আর কেউ আমাকে দিয়ে করাতে পারত ?

দীপনাথ নিঃশব্দে কিন্তু মুখ ভরে সরল হাসি হাসল । বলল, তা হলে শাড়িটা কাউকে আবার দিয়ে-টিয়ে দিও না । মাঝে মাঝে পোরো । ভয়েই পোরো না হয় ।

তুমা গাঢ় স্বরে বলে, তুমি যখন আমাকে খুকী সাজাতে চাও তখন না হয় সাজবই । পরবে তো ?

পরব বাবা, বলছি তো ।

বৃষ্টি নামল বাইরে । গাছের পাতায় জলের ফোঁটা পড়ার সেই অদ্ভুত রোমাঞ্চকর শব্দ বহুকাল বাদে শুনল দীপনাথ । গাছগাছালির ভিতর দিয়ে বাতাস বইছে । ব্যাঙ ডাকছিল অনেকক্ষণ ধরে । এখন বৃষ্টির সঙ্গে সেই ডাক মিশে যেন মুহূর্তের মধ্যে ফিরিয়ে আনল শিলিগুড়ির শৈশবকে ।

বউদি, কি অদ্ভুত !

কী অদ্ভুত ?

তোমাদের এই জায়গাটা !

তোমার পছন্দ ?

খুব পছন্দ । বড়দা একটা সুন্দর জায়গা বেছে বের করেছিল তো ।

মুখ টিপে হেসে তুমা বলে, খুব সুন্দর নয় গো । থাকলে টের পাবে । থাকবে এখানে ? বললাম তো থাকব । কালকের দিনটা ।

না রে বোকা, সে কথা বলিনি । বলছি এখানেই থাকো না কেন ? কোনো অসুবিধে হবে না । মেসে বোর্ডিং-এ থাকো, আমার ভাল লাগে না ।

দূর । তাই হয় নাকি ?

কেন হয় না দীপু ? যে মানুষটা এ বাড়িতে থাকলে আমি সবচেয়ে খুশি হই সেই কেন আসতে চায় না বলো তো ।

দীপনাথের মুখে কথা আসছিল না । তবে মেজো বউদি যে তাকে খুব ভালবাসে এটা সে বহুদিন ধরে জানে । তবু সে একটু নিষ্ঠুর হল । আশ্তে করে বলল, কি জানো বউদি, সেটা ভাল দেখাবে না । বড়দা একটা বিশেষ উদ্দেশ্য নিয়েই তোমাকে এই সব বাড়িঘর সম্পত্তি দিয়ে গেছে । যদি আমি বা বুলু এসে থানা গাড়ি তা হলে লোকে বলবে, সম্পত্তির লোভে এসে জুটেছি ।

তুমিও ও-কথা বললে দীপু ?

একটু ভেবে দেখ বউদি, খারাপ কথা কিছু বলিনি । আজ বাবাও আমাকে ওরকম একটা কিছু বলছিল, আমি কান দিইনি ।

বাবা তাঁর কথা বলেছেন, আমি আমার কথা বলছি । আমার নিকটজন কেউ নেই দীপু, সমান সমান কেউ নেই, বন্ধু নেই ।

নেই ? বলো কি ? তবে মঞ্জু স্বপ্না সজল সরিৎ এরা কারা ?

ওরা ওবাই । তুমি তো ওদের মতো নও । ওরা আমাকে ভয় পায়, ওরা কেউ আমার সমান সমান নয়, বন্ধু নয় । সম্পর্কটা কেমন জানো ? যেন ওরা সবাই আমার অধীন, আর আমি ওদের ওপরওয়াল ।

আমি কি তোমার সমান সমান ?

না দীপু, তুমি তার চেয়ে কিছু বেশি। পৃথিবীতে কারো যদি আমার ওপরওয়ালা হওয়ার ক্ষমতা থেকে থাকে তবে সে একমাত্র তুমি।

যাঃ, কী যে সব বলছ আজ বউদি! তোমার মাথাটা আজ বড্ড গোলমাল করছে দেখছি। একটু বায়ু দমনের ওষুধ খাওগে যাও।

ইয়ার্কি নয় দীপু। তুমি আমার সমস্যাটা ধরতেই পারছ না।

ধরার মতো লীড দিচ্ছে কই? এমন সব কথা বলছ যা নাটক নভেলে থাকে।

বোকা কোথাকার! তুমি মেয়েমানুষদের একদম চেনো না।

খুব চিনি।

ছাই চেনো। একমাত্র বসের ঐ কালো বউটিকে চিনলেই কি আর সবাইকে চেনা যায়?

বউদি! ফের ইয়ার্কি?

কালো বললাম বলে রাগ নাকি?

আঃ, তোমার সঙ্গে পারা যায় না।

ভয় নেই গো, আমি মণিদিপার চ্যাপটার খুলে বসব না। ওর নাম শুনলেই তোমার যা মুখের অবস্থা হয়!

দীপনাথ নিজের করতলের দিকে চেয়ে থাকে। বুক টিপ টিপ করছে। মনের মধ্যে কেবল আনন্দে-বিষাদে মেশা আলোছায়ার চক্রর।

তুমি আমাকে সন্দেহ করো বউদি?

তুষা শ্মিতমুখে বলে, করি। কিন্তু ভয় পাই বলে অতটা বলতে ভরসা হয়নি। আজ বললাম। তবে আবার বলছি, তোমার মনের কথা জানি না এখনো। কিন্তু আমার মেয়েমানুষের চোখ ভুল দেখেনি, তোমার বসের কচি বউটার মাথা কিন্তু তুমিই চিবিয়ে খেয়েছো। ও তোমাকে অন্ধের মতো ভালবাসে।

বাসলেই বা কি লাভ? উদাস অবহেলায় বলে দীপনাথ।

তাই দেখছি। তোমাকে যারা ভালবাসে তাদের কোনো লাভ নেই। তুমি সকলের প্রতি সমান নিষ্ঠুর।

উঃ, আজ তুমি মাথা ধরিয়ে দিলে বউদি। যা ডায়ালগ দিচ্ছে।

তুষা মৃদু হেসে বলে, তুমি তো জানো না, আমি আর পাঁচ জনের সঙ্গে কত কম কথা বলি। লোকে যদি শোনে যে, আমি কথা বলে বলে তোমার মাথা ধরিয়ে দিয়েছি, তা হলে বিশ্বাস করবে না। সবাই বলে, আমি নাকি ভীষণ গম্ভীর।

কি একটা বলছিলে যেন!

বলছিলাম, মেয়েমানুষকে তুমি ছাই জানো।

না জানলেই বা কি এমন ক্ষতি!

তোমার ক্ষতি নয়। ক্ষতি আমার।

তোমারই বা কেমন ক্ষতি!

বললে তো বলবে নাটকের ডায়ালগ দিচ্ছি।

আচ্ছা, বলব না।

মাথা ধরবে না?

না। ঘাট মানছি, বলো।

তুমি কি মানো যে, আমার বাইরেটা যতই রক্ষ হোক, আমি আসলে একজন মেয়েমানুষ?

তাই তো জানতাম। অত ঘটা করে মানবার কি আছে। তুমি মেয়েমানুষ না হলে পুরুষের সঙ্গে বিয়ে হল কি করে ?

তুয়া হেসে বলে, লোকে অবশ্য তোমার দাদাকেই মেয়েমানুষ বলে, আমাকে পুরুষ। কথা ঘোরাচ্ছে। পয়েন্ট থেকে সরে যাচ্ছে।

খুব ঘুম পায়নি তো ?

না। তবে রাত অনেক হল, এক কাপ চা হলে—

করছি। এ ঘরে চায়ের ব্যবস্থা সব সময়েই থাকে।

তুয়া উঠে কেরোসিনের স্টোভে চা বসিয়ে এসে বলল, তুমি ঠিক বুঝবে না। তবু বলি, আমার মাঝে মাঝে মাথাটা কেমন হয়ে যায় আজকাল। বুদ্ধি বিবেচনা গুলিয়ে যায়। তখন মনে হয়, আমাকে চালানোর মতো কেউ থাকলে বড় ভাল হত।

তোমার চালক তো মেজদা। *

আইনে তাই বলে, কিন্তু কাজে নয়। ওর কথা থাক। আমার কথা বলি। আমি কারো প্রভুত্ব মেনে নিতে পছন্দ করি না। আমি অন্যের ওপর ছড়ি ঘোরাতে ভালবাসি। আমি ক্ষমতা ব্যবহার করতে ভালবাসি। এগুলো সবাই জানে, আমিও অস্বীকার করি না। আমি অহংকারী, একটু রাগী, হয়তো একটু নিষ্ঠুরও। কিন্তু আমার ভিতরে যে মেয়েমানুষের মনটা আছে সে এখন কারো প্রভুত্ব মেনে নিতে চায়। চালানোর লোক চায়। একজন বিশেষ কারো হুকুম মেনে চলতে চায়। তুমি কি জানো দীপু, মেয়েরা যে যত বড়ই হোক প্রত্যেকের ভিতরে এই মজ্জাগত আকাঙ্ক্ষা থাকে ? জানো না তো ? তা হলে আমার কাছ থেকে শোনো। স্বামী বা প্রেমিক, ছেলের বা ভাই, কোনো একজন না একজন পুরুষের কর্তৃত্ব সব মেয়েই জীবনের কোনো না কোনো সময়ে স্বেচ্ছায় মেনে নেয়। নইলে তার মন ছটফট করে, ভিতরটা অদ্ভুত অস্বস্তিতে ভরে থাকে।

দীপনাথ খুব অবাক হয়ে চেয়েছিল তুষার দিকে। মুখে একটু অদ্ভুত হাসি ফুটে উঠল। বলল, মাইরি মেজো বউদি, তুমি তো দারুণ কথা বলতে পারো। কী সুন্দর সাজিয়ে বললে ! আমি তো ভেবেছিলাম গাঁয়ে থেকে তুমি গাঁইয়া-মাজারি হয়ে গেছ !

তুয়া আবার লজ্জা পেল। উঠে গিয়ে চায়ের জল নামিয়ে পাতা ছেড়ে এসে ফের বসল। বলল, কথা কি মুখে এমনি আসে ! আসে জ্বালায়।

দীপনাথ মাথা নেড়ে বলে, তোমার কথা মানছি। মেয়েরা না হয় প্রভুই চায়, কিন্তু আমি মনে করি তাদের প্রভু হবে তাদের স্বামীরাই। মেজদাকে তুমি একটু কষ্ট করে প্রভুত্বটা দিয়ে দাও।

আবার তোমাকে হাঁদা গঙ্গারাম বলতে ইচ্ছে করে।

বলো না, শুনতে খারাপ লাগছে না।

ফাজিল হয়েছে। শোনো দীপু, মেয়েদের সকলেরই একজন প্রভু থাকেন, সবসময়ে সে তো স্বামীই হয় না। স্বামীদের সকলের কি সেই সিমপ্যাথি বা পারসোনালিটি থাকে ! ওসব ছেলেমানুষী কথা বলছ কেন ? তোমার মেজদার এমন কিছু নেই যে, আমার ওপর প্রভুত্ব করতে পারেন।

দীপনাথ একটা দীর্ঘশ্বাস ছেড়ে বলল, এটা যদি বিয়ের আগে ডিসাইড করতে বউদি, তা হলে কত ভাল হত ! যার প্রভু হওয়ার যোগ্যতা নেই তাকে বিয়ে করতে গেলে কেন ?

তখন কি জানতাম !

জানা উচিত ছিল। হুঁচুকে দীপনাথ বলে।

সবাই কি জানে ! জিজ্ঞেস করো তো মণিদীপাকে, সেও জানে কিনা । জিজ্ঞেস করো তো, তার প্রভু কে !

তুষা চা করে নিয়ে আসে । এক কাপ দীপনাথকে দেয়, এক কাপ নিজে নিয়ে বসে । বলে, আমার যখন বিয়ে হয় তখন আমি কতটুকু । জীবনের এত বিষ তো তখনো পান করিনি ।

বৰিঠাকুর ছাড়ছ যে ! বলে দীপনাথ একটু হাসে । কিন্তু হাসিটা ফুটল না । বলল, আমাকে দিয়ে কি তোমার সেই সুপারম্যানের কাজ হবে বউদি ?

জানি না । শুধু বলি, ভাসুরঠাকুরের পর একমাত্র তোমাকেই আমার বন্ধুর মতো মনে হয় । নিজের ভাই বা বাপের বাড়ির কাউকেই আমি এত স্নেহ বা শ্রদ্ধা করি না । সামান্যসামনি বলছি, খারাপ লাগছে । দীপু, তোমাকে আমার খুব দরকার । পরামর্শ কবার, দুঃখের কথা বলার, সঙ্গ করার মতো তো কেউ নেই আমার ।

দীপনাথ চা খেতে খেতে বাইরে বৃষ্টির গভীর শব্দ শুনতে থাকে । ভূ কৌচকানো । ভাবছে । অনেকক্ষণ বাদে হঠাৎ ফিক করে হেসে বলল, কেউ যদি আড়ি পেতে আমাদের কথা শোনে বউদি, তা হলে ভাববে আমরা দেওরে বউদিতে অবৈধ প্রেম করছি ।

তুষা ম্লান হাসল, আর প্রেমে কাজ নেই গো । অনেক হয়েছে । আর লোকের ভাবনা নিয়ে ভাবতে পারি না । থাকবে এখানে দীপু ? যদি থাকো, আমি সব সম্পত্তি তোমার নামে লিখে দেবো ।

চায়ের কাপটা শেষ করে মেঝেতে নামিয়ে রেখে দীপনাথ বলে, তুমি আমাকে কী ভাবে বলো তো ! ওসব বলো না, শুনতে ভাল লাগে না ।

তোমার লোভ নেই কেন দীপু ?

কে বলল নেই ? তবে আমি সহজ পন্থায় বিশ্বাসী নই ।

তোমাকে কিন্তু স্লাভ দেখাইনি । বিশ্বাস করো এত কষ্টে আমি যা করেছি সব এখন ছাই বলে মনে হয় । অথচ কষ্ট তো করেছি । এগুলো তো যাকে তাকে বিলিয়ে দিতে পারি না ।

দীপনাথ হাই তুলে আড়মোড়া ভেঙে বলে, তোমার অফারটা খুব ভাল । সে জন্য ধন্যবাদ । কিন্তু আমারও এসব ভাল লাগে না বউদি । আমার এই পরিবেশ, এই হাড্ডাহাড্ডি লড়াই, এত নোংরা আর প্যাঁচবে জগৎটাকেই পছন্দ হয় না । আমি কি ভাবি জানো ? একদিন এক মস্ত বরফে ঢাকা পাহাড় আমাকে ডাকবে । সেদিন আমি সব ছেড়েছুড়ে রওনা হয়ে যাবো, আর কোনোদিন ফিরব না ।

ও কি অলঙ্কুণে কথা ! যাঃ ।

সত্যি । বিশ্বাস করো । একটা পাহাড় আমাকে ডাকে । ভীষণ ডাকে । সেই মস্ত উঁচু, আকাশছোঁয়া মহাপর্বতের কথা ভাবলে আমি সব ভুলে যাই ।

তুষা আস্তে হেসে ওঠে, পাগলা কোথাকার ! যদি পাহাড়েই যাবে তবে মণিদীপার হবে কি ? সে যে কেঁদে মরে যাবে ।

বউদি, ফের ? বলে কটমট করে তাঁকানোর একটা অক্ষম চেষ্টা করে দীপনাথ ।

ঘাট হয়েছে । আর হবে না ।

অনেকবার ও কথা বলেছো, কিন্তু তোমার সত্যিকারের রিপেন্টেন্স এসেছে বলে মনে হয় না । ফের বললে কিন্তু—

আচ্ছা, এবার দেখো ।

টেবিলের ওপর অ্যালার্ম ক্লকটায় সময় দেখে তুষা চমকে উঠে বলল, ওমা ! রাত একটা

বাজে । সত্যিই তো, লোকে সন্দেহ করলে বলার কিছু নেই । এবার আমি যাই দীপু, তুমি দরজা দিয়ে শোও ।

বৃষ্টিতে যাবে ? ছাতা ?

আছে গো, আছে । বলে তুমি আলমারির পিছন থেকে ছাতা বের করে তড়িৎ পায়ে দরজা খুলে চলে গেল ।

দরজার ছিটকিনি আর বাটাম দিয়ে দীপনাথ এসে বিছানায় বসে । এ জায়গায় একদম মশার উৎপাত নেই । কেন নেই তা কিছুক্ষণ ভাবল দীপনাথ । থাকারই তো কথা ! বোধ হয় বউদি ওষুধ ছুঁড়িয়ে চারদিককার মশা নিকেশ করেছে ! বউদি ওরকমই, যা করবে তাতে খুঁত রাখবে না ।

অনেকক্ষণ ভারী আনমনে বসে রইল দীপ । অনেক কথা ভাবল । সে একটা জিনিস টের পায় আজকাল । সেটা হল, মানুষকে স্বাভাবিকভাবে আকর্ষণ করার এক দুর্লভ ক্ষমতা আছে তার ।

বউদি বিছানার চাদর, মাথার তোয়ালে পাণ্টে দিয়ে গেছে । তবু এই বিছানায় প্রগাঢ় মেয়েমানুষী কিছু সুগন্ধ রয়ে গেছে এখনো । এত ভাল বিছানায় দীর্ঘকাল শোয়নি দীপনাথ । সহজে তাই ঘুম আসে না ।

পাশবালিশ আঁকড়ে ধরে সে জিজ্ঞেস করে, মণিদীপার প্রভু কে ? বিলুর প্রভু কে ? বীথির প্রভু কে ? দূর দূর, বউদিটা যে কী সব বলে গেল !

গভীর এক বৃষ্টি ঝেঁপে এল চারদিকে । বৃষ্টি আর বৃষ্টি । উঠোনে অনেক জল দাঁড়িয়ে গেছে । এমন সুন্দর জলে জল পড়ার নিবিড় শব্দ বহুকাল শোনেনি যেন দীপনাথ । সে ঘুমিয়ে পড়ে ।

অমনি দেখে একটা মস্ত আস্ত কাচের ওপাশে মণিদীপা । কাচে গাল ঠেকিয়ে কোণাচে চোখে দেখছে তাকে ।

কিছু বলছেন ?

মণিদীপা কিছু বলে । ঠোঁট নড়ে কিন্তু শব্দ আসে না ।

মণিদীপা, আপনি কেন আমাকে ভালবাসেন ? ঠিক নয়, মণিদীপা, ঠিক নয় । আপনি বোস সাহেবকে ভালবাসুন । ভালবেসে দেখুন, ঠকবেন না ।

মণিদীপার চোখে অসহ্য অভিমান । ঠোঁট কাঁপে । কিন্তু শব্দ আসে না ।

দীপনাথ কাচের গায়ে আঙুল ছোঁয়ায় । মণিদীপা, আমাদের এরকম করাটা উচিত নয় । আমি আপনার ভাল চাই ।

মণিদীপা কী বলছে ? শুনতে পায় না দীপ । কিন্তু দেখে, মণিদীপার পিছনে এক মস্ত অঙ্ককার । একটা ফাঁকা মাঠ ।

ভিতরে আসছেন না কেন মণিদীপা ?

এবার কাচের ভিতর দিয়ে স্কীপ টেলিফোনের গলার মতো ফিনফিনে শব্দ আসে, দরজা কোথায় ?

দরজা ! দরজা নেই ? দীপনাথ জিজ্ঞেস করে ।

না । দরজা রাখেননি কেন দীপনাথবাবু ?

পিছনের মাঠে অনেক মশাল জ্বলে উঠল হঠাৎ । এক দঙ্গল কালো কালো লোক । হাতে লাঠি সড়কি বহ্নম । ডাকাত ।

দরজা রাখিনি ! বড় ভুল হয়ে গেছে । দাঁড়ান, কাচ ভেঙে ফেলছি ।

মণিদীপা হেসে ওঠে, ভাঙবেন ? এ যে বুলেট-প্রুফ কাচ ।

দীপনাথ দড়ম করে ঘূষি মারে কাছে । একটুও চিড় ধরে না । মাঠ ভেঙে লোকগুলো নিঃশব্দে, বিশেষ এক উদ্দেশ্য নিয়ে এগিয়ে আসছে ।

দীপনাথ কাচের গায়ে দমাদম লাথি মারে । কিছুই হয় না । মাঠ ছেড়ে লোকগুলো মণিদীপার কাছ বরাবর এসে ঘিরে ধরে ।

গৌ গৌ আওয়াজ করে পাশ ফেরে দীপনাথ । অস্ফুট স্বরে ঘুমের মধ্যেই বলে, আমি আসছি ।

॥ উনচল্লিশ ॥

শ্রীনাথ অবাক হয়ে বলে, ডাক্তার ? দেখাবো কেন রে ? আমার কি হয়েছে ?

কিছু হয়েছে বলে নয় । চেক-আপ-এর জন্য । এখন একটু সাবধান হওয়া ভাল ।

সারা রাত বৃষ্টির পর সকালে রোদ উঠেছে । কিন্তু বাগানে জল দাঁড়িয়ে গেছে, কাদা থিকথিক করছে, মেলা গাছ শুয়ে পড়েছে বৃষ্টির দাপটে । শ্রীনাথ সমস্তে শুয়ে পড়া গাছগুলোকে ঠেকনো দিয়ে দাঁড় করাচ্ছিল । দীপনাথের প্রস্তাব শুনে বারান্দার সিঁড়িতে বসেছে খানিক । অবাক হয়ে বলল, চেক-আপ ? সে সব তো বড়লোকেরা করে শুনেছি । আমবা নাভিস্বাস না উঠলে ডাক্তারের কাছে যাই নাকি ? গুচ্ছের বাজে খরচ ।

টাকার কথা বাদ দাও তো । টাকা আমি দেবো ।

তুই কি পাগল হলি ? আমার কিছু হয়নি । বেশ আছি ।

বেশ থাকলে বলতাম না । তোমাকে বেশ দেখাচ্ছে না । চোখের কোল ফুলেছে, শরীরের বাঁধন আলগা, তার ওপর ড্রিংক-ট্রিংক করো, ডাক্তার দেখিয়ে রাখা ভাল ।

তোর মাথায় ঋ বুদ্ধি ঢোকাল কে বল দেখি ।

কেউ ঢোকায়নি । কাল থেকে আমারই মনে হচ্ছিল ।

দূর দূর । ও সব কোনো দরকার নেই । আমার শরীরের ভাল-মন্দ আমি টের পাই না ভেবেছিঁস ?

চেহারা নরম হলেও শ্রীনাথ গোঁয়ার কম নয় । রাজি হল না ।

হতাশ দীপনাথ ঘিরে এসে তুষাকে বলল, বউদি, হল না ।

আমি তো জানতাম ।

আমি আজ চলে যাবো বউদি । তুমি মেজদাকে দেখো ।

যাবে ? কাল রাতে কি কথা হয়েছিল ?

সে তো দাদার চেক-আপের জন্য । সেটা যখন হচ্ছে না তখন— ।

তুষা একটা দীর্ঘশ্বাস ফেলল । এ সব দীর্ঘশ্বাস-টাস তার বড় একটা আসে না । আজ এল । বলল, ঠিক আছে ।

তুষার অভিমানের আঁচ টের পেল দীপনাথ । কিন্তু বেশী গা করল না । বাঁধা পড়তে তার ভাল লাগে না । একা, আলগা, দূরের লোক হয়ে থাকার মধ্যে তার অনেক কম ।

নিজেদের ঘরের লম্বা বারান্দায় পিচবোর্ডের টারগেট বানিয়ে এয়ারগান ছোঁড়ার অভ্যাস করছিল সজল । মাদুর পেতে পাশ বালিশ ফেলে তার ওপর কনুই রেখে শুয়ে খুব কায়দা দেখাচ্ছে । দীপনাথ হেসে বলে, কটা লাগালি ?

সতেরোটোর মধ্যে দুটো মাত্র ।

দে আমাকে ।

এয়ারগান নিয়ে দীপনাথ ছোট্টো লোহার গুলি ভরে ফটাফট খানিকক্ষণ টারগেট প্র্যাকটিস করল । আসলে নিজেকে এইভাবে সরিয়ে নেওয়া, প্রত্যাহার করা । বউদির চোখে চোখে তাকাতে হচ্ছে না ।

দেবীতে অফিসে গেলেও ক্ষতি ছিল না । তবু দীপনাথ পালানোর জন্য সময়ের আগেই নেয়ে খেয়ে বেরিয়ে পড়ল । বাড়ির চৌহদ্দি ঠেঙিয়ে রাস্তায় পা দিয়েই শ্বাস ফেলে ভাবল, বাঁচা গেল ।

বৃষ্টির পর এই শরৎকালের ভোরবেলাটা খুব ভাল কাটছিল না প্রীতমের । পরশু শতম এসেছে । তারপর থেকে প্রতি মুহূর্তেই তার ভয় হয়েছে, এই বুঝি তাকে শিখন্তী রেখে বউদি আর দেওরে লেগে যায় । লাগেনি এখনো, কিন্তু আবহাওয়ায় বারুদের গন্ধ ছিল ।

কাল ঘটল অন্য রকম । একদম অন্য রকম ।

বিলু ফিরল কাল বেশ রাতে । কম করেও নটা । পাশের ফ্ল্যাটের মাদ্রাজীদের টেলিফোনে অবশ্য একটা খবর দিয়েছিল, ফিরতে দেবী হবে । কারণ বলেনি ।

কারণটা প্রীতম ঝাঁ করে টের পেল, বিলুকে দেখেই ।

কি দেখেছিল প্রীতম ? শুয়ে শুয়ে সারাক্ষণ সে চিন্তা করছে, খুঁজছে, প্রশ্ন করছে নিজেকে, কি দেখেছিলাম ? কি দেখেছিলাম ?

বিলু ভিতরের ঘরে ঢুকেই খুব সচকিত চোখে একবার দেখেছিল প্রীতমকে । দৃষ্টি অন্য রকম । চোরেব মতো । ভয়ে ভরা । তারপর গেল বাথরুমে ।

ফিরে এসে খাটের বিছানায় প্রীতমের পায়ের কাছে বসে বলল, অফিসে যা কাজ না ।

অফিসের কাজের জন্য দেবী হল ? খুব নিবিড় তীক্ষ্ণ শারলক হোমসের চোখে তাকিয়ে বিলুকে দেখতে দেখতে প্রশ্ন করে প্রীতম ।

না । অফিসের পর একটা ডিনার ছিল ।

কারা দিল ?

নতুন ডিরেকটরের রিসেপশন ।

চোখ কপালে তুলে প্রীতম জিজ্ঞেস কবে, নতুন ডিরেকটরের রিসেপশনে তোমার নিমন্ত্রণ ?

সে তো আমার গুণে নয় । এই ব্যাংকের ডিরেকটর যে অকুণের বাবা ।

তাতে কি ? তবু ঐ রিসেপশনে তোমাকে ডাকার কথা নয় ।

বিলু একটু কাঠ হয়ে বলল, ডাকল তো । কি কবব বল ।

কোথায় হল ?

পার্ক হোটেলে । শতম কোথায় ?

বেরিয়েছে । ফিরবে ।

শতমের কথাটা তুলে বোধ হয় পাশ কাটাতে চাইল বিলু । প্রীতম তাকে পাশ দিলও । আর কিছু জিজ্ঞেস করল না । করার দরকার নেই । বিলুর মুখশ্রী, চোখের দৃষ্টি, দেহের শাস্ত ভাবই বলে দিচ্ছে অন্য কিছু । ডিনার ছিল ঠিকই, কিন্তু তারপর আরো গভীর কিছু ছিল । অন্তরঙ্গ কিছু ছিল ।

বিদ্যুতের ছোবল খেয়ে প্রীতম আঁকড়ে ধরল বালিশ । সে তো জানত । পুরুষ আর রমণী যতই পরিধেয় পরুক, ঘনিষ্ঠতা একদিন তাদের দেহমিলনে প্ররোচিত করবেই ।

টের হয়তো পেত না প্রীতম। পেল কেবল এই দীর্ঘ রোগে ভুগে অনুভূতির প্রখরতা বেড়ে গেছে বলে।

নাকি অন্যায় সন্দেহ? আবার ভাবতে বসল প্রীতম। ভেবে ভেবে বৃষ্টির রাত পার করল।

শতম কাল অনেক রাতে ফিরেছে। তখন ঘুমের ভান করে শুয়ে ছিল প্রীতম। কথা হয়নি। কথা বলতে ইচ্ছে ছিল না তার কারো সঙ্গেই।

বৃষ্টির পর এই শরৎ ঋতুর মতো উজ্জ্বল ভোরবেলা বিছানায় বসে আছে প্রীতম। শরীরের গাটে হালছাড়া ভাব। শরীরে খিল ধরেছে। মাথা ভার। চোখে জ্বালা। ভাবছে, কি দেখেছিলাম?

আজকাল বিলুর বদলে অচলা আসে তার প্রাতঃকৃত্যে সাহায্য করতে। দুর্বল আঙ্গুলে নিজেই দাঁত মেজে নেয় প্রীতম। অচলা কুলকুচের জন্য একটা অ্যালুমিনিয়ামের গামলা ধরে রাখে বিছানায়। আজ দাঁত মাজতে গিয়ে বার বার অবশ হয়ে পড়ে যাচ্ছিল হাত।

অচলা বলল, কি হল? আমি মেজে দেবো?

না, না। আমি পারব।

কি বকম ক্লান্ত দেখাচ্ছে আপনাকে।

রাতে ভাল ঘুম হয়নি।

তাহলে আমাকে ডাকেননি কেন?

তুমি কি করতে?

একটা ট্র্যাংকুইলাইজার খাইয়ে দিতাম।

প্রীতম হাসল, ট্র্যাংকুইলাইজার? ওতে কিছু হত না। কাল রাতে আমার কিছুতেই ঘুম আসত না। বিলু কোথায়?

বউদি ওঠেননি।

ক'টা বাজে বলো তো।

বেশী নয়। সাতটা।

প্রীতম দেখল সকাল সাতটার তুলনায় অনেক বেশী আলো এসেছে ঘরের মধ্যে। এত আলো ভাল লাগছিল না প্রীতমের। সে বলল, জানালাগুলো ভেজিয়ে দাও তো। চোখে বড় আলো লাগছে।

অচলা জানালা ভেজিয়ে দিয়ে কাছে এল। বলল, কি হয়েছে বলুন তো? ডাক্তারকে খবর দেবো?

না।

তাহলে বউদিকে ডাকি।

না, ও ঘুমোক। তুমি যাও অচলা। আমি শুয়ে থাকি।

কিছু খেয়ে নিন।

অচলা আপত্তি শুনল না। তর্ক করতে ইচ্ছে করল না বলে এক গলাস দুধ খুব অনিচ্ছার সঙ্গে খেয়ে প্রীতম পড়ে রইল বিছানায়। কিছুতেই আজ নিজের প্রতিরোধ রাখতে পারছে না সে। হেবে যাচ্ছে। জয়েব গঞ্জে শরীরময় নেচে উঠছে বীজাণুরা। কোলাহল করছে।

ঘুম এল না। অসহ্য কষ্ট। উঠে বসল প্রীতম। ঘর বড় বেশী অন্ধকার। না?

অচলা, জানালাগুলো খুলে দিয়ে যাও।

তাই দিয়ে গেল অচলা। বলল, বউদি উঠে বাথরুমে গেলেন। আসছেন এক্ষুনি।
প্রীতম কিছু বলল না। শূন্যগর্ভ চোখে চেয়ে রইল সামনের দিকে। কোনো মানুষই
কোনো মানুষের সম্পত্তি নয়, ক্রীতদাস ক্রীতদাসী নয়, কারো দেহেব অধিকার, প্রেমে পড়ার
অধিকার কেনই বা থাকবে না মানুষের? এ সব ভাবল। অনেক ভাবল।

কি হয়েছে? অচলা বলছিল—

বলতে বলতে বিলু এসে কাছ খেঁষে বসে। মুখ থেকে ঝাঁঝালো পেস্টের গন্ধ আসছে।
কিছু নয়। রাতে ঘুম হল না।

কেন?

কি করে বলব? এল না।

আমাকে ডাকোনি কেন?

তুমি কাল খুব টায়ার্ড ছিলে। বলে এক ঝলক বিলুকে দেখে নেয় প্রীতম।

তাতে কি? তোমার অসুবিধে হলে বলবে না তা বলে?

কিছু অসুবিধে হয়নি। একটু ছটফট করেছি মাত্র।

ডাক্তারবাবুকে টেলিফোন করে দিচ্ছি এখনই।

না। তার দরকার নেই। আজ ভাল আছি।

বিলু আর তেমন উদ্বেগ দেখাল না। অনেকক্ষণ অবশ্য বসে বইল কাছে। ইঠাৎ বলল,
শতম কেন এসেছে বলো তো!

এমনি।

আমাকে অচলা বলছিল, ও নাকি তোমাকে শিলিগুড়িতে নিয়ে যেতে চায়।

প্রীতম মনে মনে অচলার ওপর বিরক্ত হল। মুখে বলল, তাই তো বলছে।

নিয়ে যাবে কেন? এখানে কি কোনো অসুবিধে হচ্ছে তোমার?

প্রীতম গম্ভীর মুখে বলল, আমার বোঝা তো অনেক টেনেছো বিলু। এবাবটা কিছুদিনের
জন্মা ছেড়ে দিলে দোষ কি?

বিলু একথায স্তব্ধ হয়ে যায়। তারপর অনেকটা সময় পার কবে বলে, তুমি কি আমার
বোঝা?

বোঝা। ভীষণ বোঝা বিলু। নিজেকে আমার তাই মনে হয়।

তোমার মনে এমন সব জিনিস হয় যা লজিক্যাল নয়।

প্রীতম বিলুর দিকে চেয়ে ছিল। কাল রাতের অপরাধবোধ টানা ঘুমেব পর কেটে
গেছে। এখন পরিচ্ছন্নই দেখাচ্ছে বিলুকে। তবু এ বিলু কীটদষ্ট। এতদিন ওর প্রতিরোধ
ছিল। কাল ভেঙে গেছে। প্রীতম সব টের পাচ্ছে। পৃথিবীতে কে কার?

তোমার অফিসের সময় হয়ে এল বিলু।

বিলু নড়ল না, স্থির হয়ে বসে রইল কিছুক্ষণ। তাবপর আস্তে আস্তে বলল, আমি
জানতাম শেষ পর্যন্ত তুমি এই ডিসিসনই নেবে। কোনোদিন তুমি আমাকে আপনজন
ভাবোনি।

এ কথার জবাব দিলে বোধ হয় ঝগড়া হবে। কিন্তু প্রীতম কোনোদিন ঝগড়া করেনি।
তার সারা জীবনেই ঝগড়া বলে কিছু নেই। যদিও বা দু-চারবার সে কারো সঙ্গে ঝগড়া
করেছে, প্রতিবারই গো-হারা হয়েছে। উদ্বেজিত হলে তার মুখে কথা ফোটে না, মাথা
গুলিয়ে যায়, শরীর ম্যালেরিয়ায়োগীর মতো ঝাঁপতে থাকে। সে ভাবী করুণ অবস্থা।

প্রীতম তাই চুপ করে থাকে।

বিলু বলে, ওরা তোমাকে কেন নিয়ে যেতে চায় তা বলেছে ?

নিয়ে যেতে চায় এমনিই। আমি তো ঐ পরিবারেরই ছেলে।

তা কি জানি না। কিন্তু ভাবছি আমার কোনো ত্রুটি হল কি না।

না, তুমি যথেষ্ট করেছো।

একটা কথা বলবে ? তুমি বাড়িতে চিঠি লিখে কিছু জানাওনি তো ?

কী জানাবো ?

তোমার কোনো অসুবিধের কথা ?

না বিলু। আমার তো কোনো অসুবিধে নেই। আমি কখনো কারো কাছে তোমাব নামে নালিশ করিনি। ওটা আমার আসে না।

আমিও তাই জানতাম এতদিন।

আজ কি বিশ্বাস করছ না আমায় বিলু ?

বিশ্বাস করছি। আমি শুধু ভাবছি আমার দোষটা কোথায়।

এটা দোষগুণের ব্যাপার নয়। আমাব মা, ভাই, বাড়ির লোক সবাই চায় আমাকে তাদের কাছে কিছু দিন নিয়ে রাখতে। তোমার দোষের কথা ওঠেই না।

কথা বলতে বলতে প্রীতম গভীর ভাবে বিলুকে দেখছিল, অনুভব করছিল। কাল এই বিলু ছিল তাব। আজ যেন তার নয় আর। এই সত্য প্রীতমের ভিতরে মৃত্যুর ঘণ্টা বাজিয়ে দিচ্ছে। বেঁচে থাকা নিরর্থক। তার লড়াই শেষ হয়েছে। এবার শিলিগুড়ি চলে যাবে। জানালা দিয়ে দেখবে সারাদিন, উত্তরের পাহাড়। শৈশব ফিরে আসবে। নিবিড় হয়ে উঠবে মায়ের আঁচলের সেই অদ্ভুত গন্ধ। বড় নেই-আঁকড়া ছেলে ছিল সে। আবার তাই হয়ে যাবে। মাঝে মাঝে লাবুর জন্য কষ্ট হবে খুব। বিলুর কথা বড় মনে পড়বে। কিন্তু বেশীদিন নয়, রোগ-জীবাণুরা ঘোড়সওয়ারের মতো উঠে আসবে মাথায়। সব ভুলিয়ে দেবে। সব ভুলে যাবে প্রীতম।

বিলু আবার নীচু গলায় বলে, তোমার শিলিগুড়িতে যাওয়ার অর্থ আমার সঙ্গে, আমাদের সঙ্গে ছাড়াছাড়ি।

প্রীতম মাথা নেড়ে বলে, তাই বিলু। অস্বীকার করে লাভ নেই। তুমি তো শিলিগুড়িতে যাবে না।

ও কথা থাক। কেন যাব না, কেন যেতে চাই না তা তো তুমি জানো।

জানি। তবে ছাড়াছাড়ির জন্য দুঃখ নেই বিলু। এখানে থাকলেও খুব শীগগীরই একদিন ছাড়াছাড়ি তো হতই।

বিলু খুব অবাক হয়ে প্রীতমের দিকে তাকিয়ে বলে, তার মানে ? ও সব কী বলছ তুমি ?

কেন, তুমি জানো না যে, আমার, আয়ু বেশীদিন নয় ? এটা কি নতুন কথা বিলু ?

বিলুর চোখমুখ তবু বিষ্ময়ে টান টান হয়ে থাকে। অস্ফুট গলায় সে বলে, তুমি তো কোনোদিন এ সব বলোনি প্রীতম। আজ কেন বলছ ?

ভারী অপ্রস্তুত বোধ করে প্রীতম। মুখে কথা আসে না।

বিলু তার দু-হাত দিয়ে প্রীতমের একথানা হাত ধরে বলে, কেন বললে ? তুমি তো কখনো মরার কথা বলো না। আজ কেন বললে ?

প্রীতম হাতটা আস্তে টানে। কিন্তু দুর্বল হাতখানা বিলুর হাত থেকে খসে এল না। সে বলল, একটু আস্তে বিলু। শতম শুনবে, অচলা শুনবে।

শুনুক। তোমাকে বলতে হবে প্রীতম।

কি বলব ! আমি কিছু ভেবেচিন্তে বলিনি । মনে হল, তাই বললাম ।

তোমার মনের সেই জোর কোথায় গেল ?

একটু শ্লেষের হাসি অজ্ঞাতেই ফুটে ওঠে প্রীতমের মুখে । বলে, মনের জোরে তুমি তো বিশ্বাস করো না ।

আমি না করলেও তুমি তো করতে ?

আমার মনের জোর আর নেই । হাল ছেড়ে দিয়েছি । এবার ভেসে যাবো ।

বিলু তার হাতটা আর একটু নিবিড়ভাবে চেপে ধরে, কি হয়েছে তোমার বলবে ?

আমার কিছু হয়নি । তুমি কেমন আছো বিলু ?

এ কথায় বিলু যেন চমকে ওঠে, আমি কেমন আছি ? তার মানে ?

প্রীতম ঠেস দিয়ে কথা বলতে প্রায় জানেই না । বলতে লজ্জাও করে তার । তবু আজ বলল, এখন তো তোমার একটা আলাদা বাইরের জীবন হয়েছে বিলু । সে জীবনটার কথা তো আমি জানি না । তাই জিজ্ঞেস করছি, কেমন আছো ?

বিলুর মুখ থমথম করছে । একটু কঠিন গলায় সে বলে, আলাদা জীবন ? চাকরি করলেই কি একটা আলাদা জীবন হয় মানুষের ! আজ তুমি অদ্ভুত সব কথা বলছ প্রীতম ।

চাকরি কেন করতে গেলে বিলু ? সে কি টাকার জন্য ?

না তো কি ?

এমন নয় তো যে, সারাদিন একজন রুগীর সঙ্গ করে করে হাঁফিয়ে উঠেছিলে বলে, সব সময়ে মৃত্যুর সঙ্গে ঘর করতে হচ্ছে বলে, একটু মুজিব জনা, ডানা মেলবাব জনাই চাকরি করতে গেছ ?

বিলুর সেই পুরোনো কাঠিন্য ফিরে এল মুখশ্রীতে । বহুকাল ঐ বরফ-শীতল ভাবটা দেখিনি প্রীতম । মাঝখানে কিছুদিন একটু প্রগলভা হয়েছিল বিলু । শীতল মুখশ্রীর সঙ্গে ঠাণ্ডা গলাব মিশেল দিয়ে বিলু বলে, তোমার যদি তাই মনে হয়েছিল তবে আগে বলোনি কেন ?

আমি তো তোমার কোনো কাজে বাধা দিই না । সব মানুষেরই ইচ্ছে মতো চলাব স্বাধীনতা আছে । তবু কেন বলছি জানো ? মনে হয় বলে ।

কেন মনে হবে ?

এ প্রশ্নের জবাব হয় না । মনে হয়, তাই বললাম । চাকরি করে কিছু অন্যায়ও করোনি । আমি যদি না বাঁচি তবে এ চাকরিটা তোমার দরকার হবে ।

বিলু মাথা নীচু করে বসে থাকে । সময় বয়ে যাচ্ছে । প্রীতমের বড় ইচ্ছে হল, নতমুখী এই শীতল মেয়েটিকে একটা চরম আঘাত দিতে । কোনো দিন শত অপরাধেও যা করেনি প্রীতম । কিন্তু এখন সে শেষবারের মতো চলে যাচ্ছে । হয়তো আর কখনো দেখা হবে না । ওকে একটু আঘাত দিয়ে যাওয়া ভাল । তাতে হয়তো ও মনে রাখবে ।

প্রীতম গলা বাড়ল । অনেক ইতস্তত ভাব, দ্বিধা কাটিয়ে আস্তে আস্তে বলল, আর একটা কথা ।

বলো শুনছি ।

তোমার বয়স বেশী নয় । যদি আমার ভালমন্দ কিছু হয় বিলু, তাহলে তুমি একা থেকো না ।

বিলু মুখটা নীচুই রাখল । মৃদু কঠিন স্বরে বলল, কী বলতে চাইছো ?

বলছি, তুমি আবার বিয়ে করো ।

বিয়ে ? বলে ভারী অবাক হয়ে তাকায় বিলু, কী বলছ ?

বিয়ের কথায় অবাক হয়ো না । তুমি তো এ সব সংস্কার মানো না, আমিও মানছি না । ভেবে দেখেছি, তোমার একা থাকার চেয়ে আবার বিয়ে করাই ভাল ।

বলতে মুখে আটকায় না তোমার ?

না । কারণ বিয়ে অনেক স্পষ্ট, অনেক পরিষ্কার ও সহজ ব্যাপার । তাতে গোপনীয়তা নেই, লুকোছাপা নেই, ভয়-ভীতি নেই । বিয়েই ভাল বিলু ।

এতটা স্পষ্ট কথা, এত সুস্পষ্ট আক্রমণ বোধ হয় বিলু প্রত্যাশা করেনি । তার শীতল কঠিন মুখশ্রী কাঁপতে থাকে । তারপর হঠাৎ ঠোঁট ফুলে ফুলে ওঠে । চোখ জলে ভরে আসে । স্থলিত গলায় সে বলে, কী বলছ তুমি ?

প্রীতম আনমনে দূরের জানালার দিকে চেয়ে আকাশের উজ্জ্বল নীল চৌখুপীটা দেখছিল । উদাস গলায় বলল, সেই ভাল বিলু । না হয় অরুণকেই কোরো । ও তোমাকে খুব ভালবাসে ।

বিলু একটু শিউরে উঠল কি ?

একটা হাত তুলে সে প্রীতমের মুখ চাপা দিয়ে বলল, বোলো না, ওকথা আর বোলো না । কী বলছ তা তুমি জান না ।

প্রীতমের সমস্ত শরীর এলিয়ে পড়েছে এই পরিশ্রমে । এই কথাটুকু, এই আঘাত করার প্রস্তুতি এবং আঘাত তাকে এক পালটা প্রতিক্রিয়ায় বড় ক্লান্ত করে দিয়ে গেছে । ধীরে ধীরে বালিশে এলিয়ে পড়ে প্রীতম । বড্ড ঘুম আসছে । মনটা হালকা । পৃথিবীতে কেউ কারো নয় । সারা জীবন ধরে মানুষ কেবলই ভুল দাবিদাওয়া করে যায় ।

শুনছ ! এই, শুনছ ! প্রীতম !

প্রীতম সাড়া দিল না । অগাধ ঘুম তাকে নিশ্চিহ্ন করে দিয়েছে ।

বিলু তড়িৎ পায়ে উঠে পাশের ফ্ল্যাটে দৌড়ে গেল টেলিফোন করতে ।

আধ ঘণ্টা পর ডাক্তার এল । দেখল । ওষুধ লিখল । কিন্তু বিলুর কোনো প্রশ্নেবই স্পষ্ট জবাব দিল না । বলল, খুব স্ট্রেন গেছে । দেখা যাক কী হয় ।

সিরিয়াস নয় তো !

মনে তো হচ্ছে না । দেখা যাক ।

একটু দেরীতে ঘুম থেকে উঠে শতম গিয়েছিল প্রাতঃভ্রমণে । ফিরে এসে দাদার অবস্থা দেখে কেমনধারা হয়ে গেল । মুখ ফ্যাকাশে, চোখে আতঙ্ক । বারবার জিজ্ঞেস করে, বউদি, দাদা বাঁচবে তো ? কিছু হয়নি তো ?

না । তুমি ভেবো না শতম ।

তুমি অফিসে যাবে বউদি ?

না, আজ অফিসে যাওয়ার কথাই ওঠে না ।

প্রেসক্রিপশনটা দাও । আমি ওষুধ এনে দিচ্ছি ।

অচলাই পারবে ।

না, না । অধৈর্যের গলায় প্রায় হুংকার ছাড়ে শতম, আমি আনব । দাও ।

প্রেসক্রিপশনের সঙ্গে বিলু যখন টাকাও দিতে গেল তখন আবার হুংকার ছাড়ে শতম, টাকা ? দাদার ওষুধের জন্য টাকা নেবো ? রাখো তো ! খুব রোজগার করতে শিখেছো ।

কথাটায় কামড় ছিল, কিন্তু শতমের মুখের দিকে চেয়ে কিছু বলতে সাহস পেল না বিলু । ও চলে গেলে বিলু চুপি চুপি বাথরুমে ঢুকে দোর দিল । আয়নায় নিজের মুখখানা দেখল

অনেকক্ষণ ধরে । কাল রাতের ব্যাপারটা কি টের পেল প্রীতম ? ছিঃ ছিঃ ।

॥ চল্লিশ ॥

প্রীতম কখনো দূরে কোথাও যায়নি । তার একমাত্র দূরে যাওয়া ঘটেছিল যখন শিলিগুড়ি থেকে কলকাতায় এল সি-এ পড়তে । বিদ্যাসাগর স্ট্রীটের এক মেসবাড়ির দোতলার ঘরে বসে সে তখন ভাবত, ইস ! শিলিগুড়ি কত দূর ।

কলকাতায় থাকতে থাকতে আর কলকাতাকে দূরের জায়গা মনে হত না তার । শিলিগুড়ির কথা ভেবে শুয়ে শুয়ে চোখে জল আসত না তার । বিয়ের পর বিলুর সঙ্গে হানিমুন করতে গিয়েছিল পুরী । সেই তার আর একবার দূরে যাওয়া । দিন সাতেকের মধ্যেই কলকাতায় ফেরার জন্য হন্যে হয়ে উঠেছিল সে । অফিসের কাজে বর্ধমান, টাটানগর, সিঙ্কী বা দু-তিনবার দিল্লিতেও যেতে হয়েছিল তাকে । কোনোদিন সে বাইরে গিয়ে ভাল বোধ করেনি । কোথাও দু-তিন দিনের বেশী থাকতে পারেনি । দূর প্রীতমকে টানে না কখনো ।

তার প্রিয় শিলিগুড়ি, তার প্রিয় কলকাতা ।

কিন্তু দীর্ঘ চব্বিশ ঘণ্টা পর চোখ চেয়ে প্রীতম টের পেল, জীবনে সে এত দূরে আর কখনো আসেনি । শব্দহীন, ঝিঝি-ডাকা আবছা অন্ধকার চেনার মধ্যে চেয়ে সে অনুভব করল, দূরত্বটা বড় বেশী । মাঝখানে এক বিশাল নদী বয়ে যাচ্ছে কি ? অস্পষ্ট সেরকম একটা শব্দ পায় সে । কোনো নাম কিছুতেই মনে পড়ছে না । কোনো মুখ মনে নেই । স্মৃতির কপাট বন্ধ । জীবাণুরা অনেকটা উঠে এল বৃষ্টি ! মগজে ? হবেও বা । তার শরীরের মধ্যে আর কোনো লড়াই নেই । সে হাল ছেড়ে দিয়েছে ।

দাদা ! দাদা, শুনতে পাচ্ছে ?

হু ।

কেমন আছে ? কেমন লাগছে ?

ভাল । খুব ভাল । অতি কষ্টে আড়ষ্ট জিভ নেড়ে বলে প্রীতম । কিন্তু কে প্রশ্ন করল তা বুঝতে পারল না । সে যে জবাবটা দিল তার অর্থও তার ভাল জানা নেই । শুধু অভ্যস্ত একটা শব্দ বেরিয়ে গেল মাত্র ।

কিছু খাবে ?

না ।

গরম দুধ খাও । ভাল লাগবে ।

গরম দুধ ! না, খাবো না ।

এই যে, লাবুকে দেখ । লাবু সেই সকাল থেকে তোমার পাশে বসে আছে । দেখ ।

লাবু ? কই ?

এই তো ! আয় লাবু, বাবার চোখের সামনে আয় ।

লাবুর মুখ শুকনো করুণ । হামাগুড়ি দিয়ে সে বাবার মুখের ওপর ঝুঁকে বসল ।

কিন্তু চিনতে পারল না প্রীতম । লোকটা কে ?

মেয়েটা কে ? কিন্তু অভ্যস্ত জিভ বলল, লাবু ? বাঃ বেশ ।

তুমি মরে যাওনি তো বাবা ? লাবু ফিস ফিস করে জিজ্ঞেস করে ।

মরে যাইনি তো । প্রতিধ্বনি করে বলে প্রীতম ।

মাকে ডাকবো বাবা ?

মা কে ?

মা ! আমার মা ?

তোমার মা ! বাঃ খুব ভাল । বলল প্রীতম ।

মা সারা রাত জেগে ছিল তো । এইমাত্র একটু ঘুমোচ্ছে ।

আচ্ছা ।

ডাকবো বাবা ?

শতম লাবুর পিঠে হাত রেখে বলে, যাও, ডেকে আনো ।

লাবু গিয়ে ওঘরে মাকে ডাকতে থাকে ।

শতম বিছানায় বসে প্রীতমের কপালে হাত বুলিয়ে দেয় । সারা শরীরে কোথাও মাংস নেই । কপালটা করোটির মতো শক্ত । দাঁতে দাঁত পিষে শতম বলে, এরা তোমাকে প্রায় শেষ করে এনেছে দাদা । আর নয়, শিলিগুড়ি চলো । তোমাকে ঠিক সারিয়ে তুলব ।

প্রীতম শিলিগুড়ি কথাটা যেন বুঝতে পারে । ঠক করে কিছু মনে পড়ে না, তবে একটা মস্ত সাদা পাহাড়, ঘন জঙ্গলের দৃশ্য চোখে ভেসে ওঠে তার ।

শিলিগুড়ি ?

শিলিগুড়ি । যাবে না দাদা ?

যাবো ।

তাহলে আমি আজই রিজার্ভেশন করতে যাবো ।

প্রীতম যদিও কিছুই মনে করতে পারে না, তবু তার ভিতর থেকে এক প্রমপটারই যেন বলে ওঠে—ওদের কে দেখবে ?

তুমি কি ওদের দেখ ? ওদের ওরাই দেখবে ।

একথাটা স্পষ্টই শুনতে পেল বিলু । সে নিঃশব্দে বিছানার ওপাশে এসে দাঁড়িয়েছে । মুখ এক রাতেই শুকিয়ে গেছে । চোখ কান্নায় ফোলা এবং অনিদ্রায় লাল । চুল এলোমেলো । কাল সারা রাত সে প্রীতমকে ছেড়ে প্রায় নড়েইনি । অপেক্ষা করেছে, কখন প্রীতমের জ্ঞান ফিরে আসে । আমাকে শুধু খারাপ ভেবেই চলে যেও না প্রীতম । আমি যে তোমাকে কত ভালবেসেছিলাম তা জেনে যাবে না ?

শতমের কথাটা কানে আসতেই একটু শিউরে ওঠে বিলু । প্রীতমকে নিয়ে যাবে ? নিয়ে যাবে ?

প্রীতমের করোটির মতো শক্ত কপালে বিলুও হাত রাখে, কেমন আছো ? প্রীতম ?

প্রীতম খুব ভাল করে মহিলাটিকে দেখে নিচ্ছিল । এ যেন কে ? খুব চেনা । ঠিক মনে পড়ছে না ।

প্রীতম বলল, ভাল । খুব ভাল আছি ।

আর কেউ না বুঝলেও বিলু ঠিকই টের পায়, একটা দিনের মধ্যেই প্রীতমের মধ্যে একটা বড় রকমের ওলট-পালট হয়ে গেছে । তার এমনও সন্দেহ হয়, প্রীতম তাকে চিনতে পারেনি ।

একটু ঝুঁকে বসে বিলু । খুব আশ্বে করে বলে, আমি বিলু । চিনতে পারছ ?

শতম পাশ থেকে বলে, চিনতে পারবে না কেন বউদি ? কী বলছ ?

বিলু করুণ মুখটা তুলে মাথা নেড়ে বলে, ও চিনতে পারছে না । আমি জানি ।

এরকম কি মাঝে মাঝে হয় ?

না । এই প্রথম ।

শতমের মুখে উদ্বেগ ফুটে ওঠে, একটু আগেই তো শিলিগুড়ি যাওয়ার কথায় রাজী হয়ে গেল ।

বিলু বলল, ওর চোখের দৃষ্টিটা দেখ । তাহলেই বুঝতে পারবে । বলে বিলু আবার প্রীতমের মুখের ওপর ঝুঁকে পড়ে জিজ্ঞেস করে, আমি কে বলো তো ? আমি কে ?

তুমি ! বলে প্রীতম হু কৌঁচকায় । অনেক দূর থেকে শব্দগুলো আসছে । ঝিঝি-ডাকা আবছায় ভাসছে কিছু মুখ ।

লাবুকে চিনতে পারছ না ? এই যে লাবু ।

লাবু ! হ্যাঁ লাবু । প্রীতম হু কুঁচকে রেখেই বলে ।

শতম চাপা গলায় বলে, ডাক্তারকে খবর দেবে না বউদি ?

বিলু মাথা নেড়ে বলে, খবর দেওয়াই আছে । বেলা দশটা এগারোটা নাগাদ আসবেন কালই বলে গেছেন । আমি ভাবছি, এটা হয়তো ঘুমের ওষুধের এফেক্ট । এটা কেটে গেলে হয়তো ঠিক হয়ে যাবে ।

দাদাকে এবার কিছু খেতে দাও ।

খাওয়াবো । অচলাকে দুধ গরম করতে বলে এসেছি ।

শতম একটু চূপ করে থেকে বলে, এটা কোনো খারাপ সাইন নয়তো বউদি ? কি জানি । তবে ঘাবড়ে যেও না ।

আমার কিরকম লাগছে ।

জবাবে বিলু একটু হাসল মাত্র ।

অচলা দুধের ফিডার নিয়ে গম্ভীর মুখে ঘরে আসে । কাল সারা রাত সেও প্রায় জেগেই কাটিয়েছে । তবে তার অভ্যাস আছে বলে মুখে রাত জাগার কোনো ছাপ নেই । সে কাছে এসে বলল, সরুন, আমি খাইয়ে দিচ্ছি ।

বিলু উঠে সরে বসল । মন দিয়ে দেখতে লাগল, অচলা কি সুন্দর পটু হাতে অল্প অল্প করে দুধ খাইয়ে দিচ্ছে প্রীতমকে । গলায় পরিষ্কার একটা তোয়ালে দিয়ে নিয়েছে ।

বিলু আশ্বস্ত করে জিজ্ঞেস করল, অচলা, আমার মনে হচ্ছে ও লোকজন চিনতে পারছে না । তুমি একটু দেখ তো !

অচলা মুখ না তুলেই বলল, ডাক্তার আসুন উনিই বুঝবেন ।

তুমি কিছু বুঝতে পারছ না ?

আমি পেশেন্টের অবস্থা খুব ভাল দেখছি না ।

কি হল বলো তো ?

কি করে বলব ! কালও তো নরমাল ছিলেন । আজ কেমন অন্যরকম দেখছি ।

দুধ খাইয়ে অচলা গরম জলে ভেজানো তোয়ালে এনে প্রীতমের মুখ মুছিয়ে চুলগুলো পাট করে দিল । একটু ট্যালকম পাউডার ছড়িয়ে দিল গায়ে । একটা ওষুধ খাওয়াল, তারপর বলল, পেশেন্ট এবার ঘুমোবে । আপনারা ওঘরে যান ।

প্রীতম বাস্তবিকই ঘুমিয়ে পড়ে ।

ডাক্তারের জন্য শতম ঘর-বার করতে করতে বারবার ঘড়ি দেখতে থাকে । আঁচলে শরীর জড়িয়ে বাইরের ঘরের সোফায় কোণ-ঘেঁষে বসে থাকে বিলু । একদম স্থবিরের মতো । বাড়ির আবহাওয়ায় বিষণ্ণতা টের পেয়ে লাবু দ্বিতীয় শোওয়ার ঘরে গিয়ে খাটের নীচে ঢুকে পুতুল খেলতে বসে ।

এতদিন বলার সুযোগ হয়নি, কিন্তু আজ রাগ বিরক্তি শোক সব মিশে শতম নিজেকে সামলানোর চেষ্টা না করেই হঠাৎ বলে ফেলল, এখানে দাদার যত্ন হচ্ছে না বউদি। এবার আমি দাদাকে শিলিগুড়ি নিয়ে যাবো।

এ কথার কোনো জবাব মাথায় এল না বিলুর। অনেকক্ষণ ধরে তার মনের মধ্যে ঐ কথটাই প্যারেড করে বেড়াচ্ছে, প্রীতমকে নিয়ে যাবে! প্রীতমকে নিয়ে যাবে!

বিলু শতমের দিকে চেয়ে থেকে মনের সেই কথটাই মুখ দিয়ে বলল, নিয়ে যাবে!

শতম সামান্য চড়া গলায় বলে, তুমি অফিসে চলে যাও। সারাদিন দাদা তো একা থাকে। আয়া-টায়ারা কি ঠিকমতো সেবাযত্ন করতে পারে?

বিলু আবার বলে, নিয়ে যাবে!

তুমি বাধা দিও না বউদি। দাদার ভালর জন্যই বলছি।

বিলুর ভিতরে যে ঠাণ্ডা কঠিন এক মানুষ ছিল সে গলে জল হয়ে গেছে। এখন বিলুর মাথা ঠিক নেই। সে খুবই শুষ্ক সরু অসহায় এক গলায় বলল, প্রীতম যদি আর ফিরতে না পারে!

শতম গম্ভীর হয়ে বলল, কি হবে তা তো জানি না। তবে শিলিগুড়ি তো মোটে এক রাতের পথ। প্লেনে পঁয়তাল্লিশ মিনিট। যখন তখন ইচ্ছে হলে চলে যেতে পারবে। ভাবছ কেন?

এত অসহায় বিলু কখনো বোধ করেনি। সে নিজের চারদিকে একবার হরিণের মতো ত্রস্ত চাউনিতো দেখে নিল। কিন্তু আসলে কিছুই দেখল না। কোথাও কিছু নেই দেখবার মতো। নিজের করতলের দিকে চেয়ে স্থির হয়ে কিছুক্ষণ বাসে রইল। তারপর মৃদুস্বরে বলল, তুমি কি ওকে নিয়ে যেতেই এসেছিলে শতম?

বলতে পারো তাই। দাদা অমৃত করলে নিতাম না। কিন্তু দাদা এবার অমৃত করেনি।

আমারও তো একটা মতামত আছে।

ক্রুদ্ধ শতম বিলুর দিকে ষণ্ডামার্কের মতো তাকিয়ে বলল, তোমার মতটা তাহলে কি? দাদা এইখানে এইভাবে শেষ হোক?

বিলুর আজ মনের জোর নেই। যদি গতকাল অরুণের সঙ্গে তার ঘনিষ্ঠতাটা না হত, যদি ওভাবে ভেসে না যেত সে, তবে আজ রুখে উঠতে পারত বিলু। অরুণ কোনো সংস্কার মানে না, বড় বেশী সাহসী। কোনোদিন বিলুর ওপর এই লোভ প্রবল ছিল না অরুণের। কাল সেই লোভ দেখা দিল। বলল, অবশেষে আমার বিয়ের ব্যাপারটা ঠিক হয়ে গেল বিলু। হয়তো জানুয়ারিতে। তার আগে পর্যন্ত এই সময়টুকু আমাদের। অরুণ বিয়ে করছে—এই খবরে একই সঙ্গে বিষাদ ও ক্রোধ চেপে ধরেছিল বিলুকে। আর সব মিলিয়ে হয়ে গেল ঐ অদ্ভুত কাণ্ডটা। কেউ জানে না, তবু তারপর থেকেই বিলুর ভিতরে একটা মিয়োনো ভাব, পাগবোধ, চকিত শিহরন খেলে যাচ্ছে। অকারণেই মাঝে মাঝে চমকে উঠছে সে, ভয় ভয় করছে তার, লজ্জা পাচ্ছে।

বিলু মাথা নেড়ে বলল, যেখানে গেলে ওর ভাল হবে সেখানেই নিয়ে যাও। আমি ওর ভালই তো চাই।

তাহলে তোমার মত আছে বলছ?

না থাকার কিছু তো নয়। তবে আমাকে তোমরা কেউ একবারও তো জিজ্ঞেস করেনি। আমি কি কেউ নই? কথটা বলতে বলতে বিলুর চোখ ভিজে এল। এ ঘটনা তার জীবনে এতই বিরল যে, কখনো নিজের চোখে জল এলে সে নিজেই অবাক হয়। এখন অবশ্য হল

না। তবে মুখ ফিরিয়ে শতমের চোখ থেকে মুখ আড়াল করল।

শতম বলল, এটা প্রোটোকলের সময় নয় বউদি। অনুমতি বা তা নিয়ে মন কষাকষি এ সব খুব ছেলেমানুষী ব্যাপার। দাদার এখন লাইফ অ্যান্ড ডেথ-এর প্রশ্ন।

বিলুর মনটা তার স্বাভাবিক কাঠিন্য ও শীতলতা কিছুটা ফিরে পেল এ কথায়। সে ঠাণ্ডা গলায় বলল, নিয়ে যাও, কিন্তু সঙ্গে আমি যেতে পারব না।

সেটা জানি। কিন্তু গেলে তোমার কোনো ক্ষতি হত না। শিলিগুড়ির বাড়িটাও তোমারই বাড়ি।

তু ঝুঁচকে বিলু বলে, ওসব কথা থাক শতম।

শতম কথাটা কানে না তুলে বলে, তোমাদের সেখানে একটু কষ্ট হতে পারে, কিন্তু চলেও যাবে। তোমাদের সব খরচ আমরা চালিয়ে নিতে পারব।

আমাদের খরচ সম্পর্কে তোমার কোনো ধারণাই নেই, তাই বলছ। কিন্তু ও কথা নিয়েও এখন কিছু বলতে চাই না। প্রীতম ইচ্ছে করলে তার যা টাকাপয়সা আছে তা তুলে নিয়ে যেতে পারে।

শতম একটু হকচকিয়ে গেল। বলল, দাদার টাকা নিয়ে আমরা কী করব? টাকার কথা ওঠেই না। আমরা শুধু দাদাকেই নিয়ে যেতে চাই।

ওর ওপর তোমাদের অধিকার অনেক বেশী।

শতম মাথা নেড়ে বলে, ওটা তোমার রাগের কথা।

আমার মতো অবস্থায় যদি কাউকে বছরেব পর বছর কাটাতে হত তবেই সে বুঝতে পারত আমার রাগ কেন হয়। এককাল প্রীতমকে আগলে রেখেছি, হঠাৎ এখন তোমরা ভালমানুষ সেজে ওকে নিয়ে যেতে চাইলে রাগ কি হতে পারে না?

শতম যেন এরকম কথার জন্য প্রস্তুত ছিল। বলল, স্বামীকে আগলে রাখাই স্ত্রীর কাজ। বউদি, সে কাজটাও তুমি ভাল করে করছ? একে কি আগলে রাখা বলে?

অত কথায় কাজ নেই শতম। নিতে এসেছো নিয়েই যাও। তোমাদের কাছেই হয়তো ও ভাল থাকবে।

আমাদের সঙ্গে তুমি কোনো সম্পর্ক রাখো না বলে হয়তো জানোই না, আমরা কেমন লোক। যদি জানতে তাহলে দাদাকে নিয়ে যেতে চাইছি বলে রাগ করতে না। কিন্তু তুমি নিশ্চিত থাকতে পারো, দাদাকে আমরা প্রাণপণে আগলে রাখব। মাইনে করা লোকের হাতে ছেড়ে দিয়ে চাকরি করতে যাবো না।

বিলু নিঃশব্দে উঠে ভিতরের ঘরে চলে এল। রাতে ঘুম হয়নি, শরীর জুড়ে ব্যথা আর ক্লান্তি। সঙ্গে উদ্বেগ, অশান্তি, লজ্জা, পাপবোধ, সে এসে প্রীতমের বিছানায় বসল। কী করবে ভেবে পাচ্ছিল না বিলু। প্রীতমের প্রতি তেমন উত্থালপাখাল ভালবাসা কোনোদিনই ছিল না তার। কিন্তু এখন মনে হয়, প্রীতম চলে গেলে তার পায়ের তলা থেকে একটা পাটাতন সরে যাবে বুঝি!

কিন্তু এই বোধ তো সত্য নয়। প্রীতমের ওপর কোনো দিক দিয়েই সে নির্ভরশীল নয়। কাজেই যুক্তি দিয়ে নিজের ভাবাবেগকে দমিয়ে দিতে পারল সে। অরুণের কাছে সে শিখেছে, দুনিয়ার কালো দিকগুলি, হতাশার কথাগুলি, দুঃখের বোধগুলিকে পাত্তা দিতে নেই। অরুণ উপদেশ দিয়ে এ সব তো শেখায়নি, তাকে দেখেই শিখেছে বিলু। অরুণ ঠিক ঐ রকম। কোনো দিন কোনো ঘটনাই তাকে বিমর্ষ কবে না।

বিলু শতমের জ্বালা-ধরানো কথাগুলোকে নিয়ে ভাবল না আর। ভাববে কেন! ওর

দাদাকে ও নিয়ে যাক । বিলুর পৃথিবী যেমন ছিল তেমনই থাকবে । হয়তো আর একটু স্বাধীনতার স্বাদ পাবে সে । একটু মন কেমন করবে প্রীতমের জন্য । তা করুক । পৃথিবীতে বেঁচে থাকতে গিয়ে কত লোক কত শোক তাপ সহ্য করে ।

আস্তে আস্তে প্রীতমের পাশে ছোটো পরিসরে গুটিসুটি হয়ে শুয়ে কখন অঘোরে ঘুমিয়ে পড়ল বিলু ।

ছোটো, গোল রোদেভরা সবুজ পৃথিবীটা হেলিকপ্টারের তলায় স্পষ্ট দেখতে পাচ্ছিল প্রীতম । পৃথিবীটা যে এত ছোটো তা সে জানত না । কোনো শহর গাঁ চোখে পড়ে না । শুধু কিছু সবুজ ছোটো ছোটো পাহাড়, একটা ঘন বনাকীর্ণ উপত্যকা, ফুলের বন্যা বয়ে যাচ্ছে সেখানে । একটা ছলছলে পাহাড়ী নদী গেছে একেবৈকে । আর একটা ন্যারোগেজের রেল লাইন । অনেক প্রজাপতি উড়ছে, পাখি উড়ছে । দেখতে দেখতেই পৃথিবীটা একটা পাক খেল । ও পিঠেও জনবসতি নেই, একটা ছোটো নীল সমুদ্র, একটা বরফ ঢাকা পাহাড়, আর একটা মাঠের ভিতরে সরু মেঠো পথ দেখতে পায় সে । এত সুন্দর জায়গাটা যে, প্রীতম হেলিকপ্টারে কাচের মতো স্বচ্ছ তলাটায় উপড় হয়ে পড়ে একদৃষ্টে লোভীর মতো চেয়ে থাকে । কিন্তু হেলিকপ্টারটা বার বার চেষ্টা করেও ছোট্ট সুন্দর পৃথিবীটাকে স্পর্শ করতে পারছে না । কোথাও এক অদৃশ্য বলয় বাধা দিচ্ছে । দূরত্বটাকে অতিক্রম করা যাচ্ছে না । চোখে গগলস্ আর হাতে দস্তানা-পরা পাইলট খুব চেষ্টা করছে অবশ্য । কিন্তু হচ্ছে না ।

মাঝে মাঝে হেলিকপ্টার ঝাম করে নেমে যাচ্ছে, ঝুইঝুই দূরত্বে এসে যাচ্ছে । কিন্তু সুন্দর ছোট্ট গোল রূপকথার রাজ্যের মতো পৃথিবীটা অমনি একটা পাক খেয়ে সরে যাচ্ছে দূরে । অনেকটা দূরে । তখন ভয়ে হতাশায় ককিয়ে উঠছে প্রীতম । হাত তুলে বলছে, পাইলট ! পাইলট ! নামাও ।

বিরক্ত পাইলট বলে, কি করব ? চেষ্টা তো করছি ।

আরো চেষ্টা চাই । আরো চেষ্টা ।

আমার হেলিকপ্টারে যতটা ক্ষমতা ততটা চেষ্টা করছি । পৃথিবীটা যদি অমন বদমাইশি করে তবে কি করব বলুন !

প্রীতম ভয়ে ঘেমে ওঠে । বলে, বিলু রয়েছে ওখানে, লাবু রয়েছে, আমাকে যে নামতেই হবে ।

বিলু কি আপনার একার ? আমারও কি নয় ?

প্রীতম কেতরে ঘাড় ঘুরিয়ে পাইলটের দিকে তাকাল । হেলমেটের নীচে ফর্সা ঘাড়, মসৃণ করে ছাঁটা কালো চুল, সুদৃঢ় ঠোঁটের একটু আভাস । ঠিকই তো । বিলু তো তার একার নয়, অরুণেরও ।

প্রীতম বলল, আমার বড় কষ্ট হচ্ছে অরুণবাবু ।

কেন বলুন তো ! কষ্ট কিসের ?

বেশী দূরে আমি কখনো যাইনি । আমার এক্সুনি বিলুর কাছে ফিরে যাওয়া দরকার । আপনি হেলিকপ্টারটা নামিয়ে দিন ।

অরুণ খুব বিষণ্ণ গলায় বলে, বিলু ? এই পৃথিবীতে তো বিলু থাকে না । এখানে কেউ থাকে না । শুধু আপনি থাকবেন বলে এটা তৈরি করা হয়েছে ।

একটু অবাক হয়ে প্রীতম বলে, সে কী ? আমি একা এখানে থাকবো কেমন করে ?

তা তো জানি না। আমার ওপর স্বকুম আছে, আপনাকে এখানে নামিয়ে দিয়ে ফিরে যেতে হবে। তবে এ জায়গাটা খুব সুন্দর। আপনার বোধ হয় ভালই লাগবে।

কিন্তু বিলুর কি হবে? লাবুর?

ওরা অন্য পৃথিবীতে ভালই থাকবে। ওদের মতো করে ভাল থাকবে।

সে পৃথিবীটা কত দূর?

কয়েকটা লাইট ইয়ার।

লাইট ইয়ার! এত দূর!

হ্যাঁ। দূরত্বটা কিছু বেশী।

হেলিকপ্টারটা হঠাৎ কাত হয়ে সাঁ সাঁ করে নামতে থাকে। ঘরঘর করে চপারের শব্দ হয়। নীচে সবজি সাদা নীল ঘূর্ণির মতো ছোট্ট পৃথিবীটা পাক খায়।

নামছি! বলে অরুণ চৌচিয়ে ওঠে।

না, না! আমি ফিরে যাবো অরুণ!

ফেরার উপায় নেই প্রীতমবাবু!

ফিরতেই হবে। বিলু, লাবু, একা। বড় অসহায়।

একা কেন? আমি তো রয়েছি।

তা বটে। বলে আবার হতাশায় ভেঙে পড়ে প্রীতম।

খুব কাছাকাছি এসেও তাদের হেলিকপ্টারের নাগাল এড়িয়ে পৃথিবীটা সরে যায় এপাশে, ওপাশে।

দুট্টমিটা দেখছেন? অরুণ বিরক্ত হয়ে বলে।

প্রীতম জবাব দেয় না। কাচের ওপর উপুড় হয়ে থাকে। চোখে জল আসে। তবু মনে কোনো ভার নেই। একা এই পৃথিবীতে তাকে কতকাল বেঁচে থাকতে হবে? অনন্তকাল! অসীম সময় কি করে একা কাটাবে প্রীতম?

অরুণ ডাকছে, প্রীতম! প্রীতমবাবু!

উঃ।

কেমন লাগছে?

ভাল নয়। একদম ভাল নয়। এখানে কি করে থাকব?

কপালে একটা ঠাণ্ডা হাত স্পর্শ করে। প্রীতম চোখ মেলে চায়।

অস্বচ্ছতা অনেকটাই কেটে গেছে প্রীতমের। দীর্ঘ ঘুমের পর শরীরের নিস্তকতা আছে, কিন্তু ক্লান্তি নেই।

নিজের ঘরখানাকে চিনতে পারে প্রীতম। চিনতে পারে সামনে দাঁড়ানো অরুণকেও। ফটফটে সাদা একটা টি-শার্ট তার গায়ে। সুন্দর মুখে কিছু উদ্বেগ, একটা খুব সুন্দর গন্ধ ভাসছে বাতাসে।

অরুণ তার কপাল থেকে হাতটা সরিয়ে নিয়ে জিজ্ঞেস করে, কেমন আছেন?

আধো জাগরণে যে জবাব দিয়েছিল প্রীতম এখন জাগ্রত অবস্থায় ঠিক তার উল্টো বলল, ভাল আছি। খুব ভাল আছি।

আমাকে চিনতে পারছেন তো?

আপনি! আপনি! তো অরুণ!

বাঃ! চমৎকার!

প্রীতম হাসবার চেষ্টা করল। এখনো কানে মৃদু হেলিকপ্টারের শব্দ লেগে আছে। বলল,

কিন্তু অত দূরে আমি যেতে পারব না ।

কোথায় যাওয়ার কথা বলছেন ?

ঐ যেখানে আপনি নামিয়ে দিয়ে আসতে চেয়েছিলেন আমাকে ।

আমি ! বলে অবাক হতে গিয়েও অরুণ মৃদু হেসে ফেলে, আপনি বোধ হয় হ্যালুসিনেশন দেখছিলেন ।

অনেক দূর ! কিন্তু সে জায়গাটাও সুন্দর ।

অনেক দূরে আপনাকে যেতে হবে না প্রীতমবাবু । ইউ আর উইথ আস ।

বিলু আর লাবুর কি হবে ?

অরুণ চেয়ার টেনে বিছানার পাশে বসে । কপালে হাত রাখে । তারপর মৃদু স্বরে বলে, বিলু আপনার জন্য কাল্মাকাটি করছে প্রীতমবাবু । এখন আপনার একটু স্টেডি হওয়া উচিত ।

প্রীতমের ঘোর ঘোর ভাবটা অল্প কেটে যাচ্ছে । সে বড় একটা শ্বাস ফেলে কিছুক্ষণ চোখ বুজে থাকে । শরীরে জীবাণুদের কোলাহল । সে একটু একটু করে পা নাড়ল, হাত নাড়ল । না, এখনো সাড় আছে । চোখ চেয়ে সে ভাল করে চারদিকটাকে দেখে নিল ।

অরুণের দিকে চেয়ে বলল, আমি শিলিগুড়ি চলে যাচ্ছি ।

শুনেছি । কিন্তু কাজটা কি ভাল হচ্ছে ?

কেন ? কাজটা কি খারাপ ?

বিলু একা হয়ে যাবে ।

কেন, আপনি তো আছেন ।

ডোন্ট বি এ ফুল । আমি কে ? বিলুর জন্য আমি কি করতে পারি ?

আমিই বা বিলুর কে ? আমরা কেউ কারো নই ।

আপনাদের কি ঝগড়া হয়েছে প্রীতম ?

না, ঝগড়া কেন হবে ?

স্বামী-স্ত্রীর ঝগড়া দেখলে আজকাল আমি খুব ভয় পাই । আমিও শীগগীর বিয়ে করতে যাচ্ছি কিনা ।

প্রীতম বড় বড় চোখে চেয়ে থাকে অরুণের দিকে ।

অরুণ মৃদু হেসে বলে, ইটস টু ।

॥ একচল্লিশ ॥

কলকাতায় এবার খুব বৃষ্টি হচ্ছে । ভীষণ বৃষ্টি । দুপুর বা বিকেলের দিকে প্রায়দিনই ঝামাঝম বৃষ্টি এসে পথঘাট ডোবাচ্ছে । ট্র্যাফিক জ্যাম । বৃষ্টির জ্বালাতেই কদিন প্রীতমের কাছে যাওয়া হয়নি দীপনাথের । অবশ্য অফিসেরও কাজ বেড়েছে । প্রায় দিনই কাজ শেষ করতে সন্ধ্যা সাতটা-আটটা বেজে যায় । নতুন অ্যাসিস্ট্যান্ট ম্যানেজারদের মধ্যে একজন মাত্র কাজে যোগ দিয়েছে । বাকিরা আরো দিন পনেরো পরে আসছে । সুতরাং দীপনাথকে একাই তিনগুণ খাটতে হচ্ছে ।

সপ্তাহখানেকের মাথায় দুপুরে বিলুর টেলিফোন এল ।

সেজনা ! আমি ভেবেছিলাম তুমি বুঝি ট্যারে বাইরে গেছ । বহুদিন খবর নিচ্ছো না ।

না রে । নতুন পোস্টে কাজের প্রেশার ভীষণ । রোজ বিকেলের দিকে বৃষ্টিও নামছে

এখন। প্রীতম কেমন ?

খোঁজও তো নাওনি। আমার অফিস তোমার অফিস থেকে তো মোটে দু'কদম।

বিলু ঠিক এভাবে অভিমানের গলায় কখনো কথা বলে না। বরাবরই ও একটু কাঠ কাঠ। তাই সামান্য অবাক হচ্ছে দীপনাথ। সে বলল, রোজই যাবো-যাবো করছি বলে আর খোঁজ নেওয়া হয়নি। তেরা সবাই ভাল আছিস তো ? প্রীতম কেমন আছে আগে বল ? মাঝখানে একটু ক্রাইসিস গেছে। একদিন অজ্ঞান হয়ে গিয়েছিল।

বলিস কি ?

সিরিয়াস কিছু নয়, তুমি তো খবর রাখো না, এর মধ্যে অনেক ঘটনা ঘটে গেছে। কি ঘটনা ? উদ্বেগের গলায় দীপনাথ বলে।

এসো বলব। আজ আসবে ?

ঘড়ি দেখে দীপনাথ বলে, মোটে পাঁচটা বাজে। যেতে দেবী হবে।

হোক, তবু এসো। আজ আমাদের ওখানেই রাতে থেকো। অনেক কথা আছে।

থাকব ? বলে একটু দ্বিধা করে দীপনাথ। দ্বিধার কিছু নেই, বোনের বাড়িতে লোকে থাকতেই পারে। তবু ঐ হল দীপনাথের স্বভাব।

তুমি বোধহয় জানো না, শতম এসেছে।

তাই বুঝি ! কবে এল ?

দিন আট-দশ। প্রীতমকে শিলিগুড়ি নিয়ে যাচ্ছে।

শিলিগুড়ি ! খুব অবাক হয়ে দীপনাথ বলে, সে কি রে ! প্রীতম যে শিলিগুড়ি যাবে না বলেছিল আমাকে।

মত পাল্টেছে।

যাচ্ছে তাহলে ?

গলাটা হঠাৎ একটু ভেঙে গেল বিলুর। বলল, যাচ্ছে। তুমি আজ এসো কিন্তু। ভীষণ দরকার।

তুই প্রীতমকে যেতে দিতে রাজি হয়েছিস ?

আমার মতামতে কিছু যায় আসে না।

কবে যাচ্ছে ?

পরশু। রিজার্ভেশন হয়ে গেছে। বাঁধাছাঁদা চলছে।

তুই সঙ্গে যাবি না ?

আমাকে তো যেতে বলেনি। বললে হয়তো কিছুদিনের জন্য যেতাম।

টেলিফোনে আর কিছু বলল না দীপনাথ। যদিও একটা রাগের হলকা তার মগজটাকে ঢেটে নিচ্ছিল। কিন্তু রাত্রে প্রীতমের বাড়ি গিয়ে বাইরের ঘরে বিলুকে ধরল দীপনাথ।

বিলু, প্রীতমের চেয়ে কি চাকরিটা বেশী ইম্পোর্ট্যান্ট ? তুই ওর সঙ্গে যাচ্ছিস না কেন ? বললাম তো, ওরা আমাকে যেতে বলেনি।

এটা কি প্রোটোকলের সময় যে, না বললে যাবি না ?

ওরা যদি আমাকে না চায়, তবে কেন যাবো ?

তবু যাবি। হয়তো তুই যেতে চাস না ভেবে ওরা বলছে না। ওদেরও প্রেস্টিজ আছে।

বিলু মুখ নীচু করে শক্ত হয়ে রইল। ভীষণ গোঁ।

ছুটি পাবি না ? দীপনাথ কোমল গলায় জিজ্ঞেস করে।

হয়তো পাবো, তবে বেশী দিন নয়।

তবে চাকরিটা ছেড়ে দে না কেন ?

আজকাল একবার চাকরি ছাড়লে আর কি সহজে পাওয়া যায় ?

চাকরিটাকে অত ইম্পোর্ট্যান্স দিচ্ছিস কেন ?

বিলু ধীরে ধীরে মুখ তুলল। বেশ কঠিন মুখ। ধীর শাস্ত গলায় বলল, চাকরিটা এখন আমাদের কাছে খুব জরুরী।

প্রীতমের চেয়েও ?

একটা শ্বাস ফেলে বিলু বলল, প্রীতম তো বঁচবে না, সেজদা। তারপর আমার আর লাভের কি হবে ? কে দেখবে আমাদের ? অনেক ভেবেচিন্তে তাই চাকরিটাকে ধরে রাখাই বুদ্ধিমানের কাজ বলে ঠিক করেছি।

কথাটা নির্ভেজাল ভাবাবেগহীন সত্য। তবে বড্ড বেশী নির্লজ্জ অকপট। দীপনাথ এ ধরনের নগ্ন সত্যকে পছন্দ করে না। বিরক্ত হল, অস্থির বোধ করল, কিন্তু সঠিক কোনো জবাবও এল না মুখে।

শতম বেরিয়েছে, প্রীতম অঘোবে ঘুমোচ্ছে। তাই দীপনাথ বাইরের ঘরেই বসে রইল অনেকক্ষণ। বিলু গিয়ে নিজে চা করে আনল, একটা ধোয়া পাজামা এনে রাখল পাশে। দীপনাথ আনমনে খানিকক্ষণ আকাশ-পাতাল ভাবল।

হঠাৎ বলল, তুই তা হলে এই ফ্ল্যাটে একাই থাকবি ?

আমি আছি, লাভ আছে, অচলা আর বিন্দুও থাকছে। ঠিক একা তো নয়।

তবু একে একাই বলে। পুরুষ অভিভাবক তো থাকছে না।

খুব ভাল হত যদি তুমি এসে থাকতে। তিনটে ঘর আছে, তোমার কোনো অসুবিধা হত না।

দীপনাথ মাথা নেড়ে বলল, সেটা সম্ভব নয়। এ বাড়িতে প্রীতম নেই, এটা আমার সহ্য করা মুশকিল।

তুমি বড্ড সেন্টিমেন্টাল সেজদা। প্রীতমকে আমি কারো চেয়ে কম ভালবাসি না, কিন্তু রিয়ালিটিকে তো মেনে নিতেই হবে। প্রীতম চলে গেলে এ বাসায় আমিও তো থাকব।

দীপনাথ জবাব দিল না। বিলুও আর দ্বিতীয়বার তাকে এ বাসায় থাকার কথা বলল না।

দীপনাথ জিজ্ঞেস করে, প্রীতম কেন অজ্ঞান হয়ে গিয়েছিল বললি না।

ব্রু কুচকে বিলু বলে, কি করে বলব ? তবে সেদিন অফিস থেকে ফিরে এসে ওকে খুব ইমোশনাল দেখেছিলাম। এমন সব কথা বলছিল যার কোনো মানে হয় না।

কিরকম কথা ?

বলছিল, ও শীগগীরই মরে যাবে। তারপর আমি যেন বিয়ে করি। এইসব কথা।

এরকম কথা তো সহজে বলে না প্রীতম। সেদিন কেন বলল ?

তা তো জানি না। বলে বিলু চোখ সরিয়ে নিল।

ও কখনো মরার কথা ভাবে না। অসম্ভব বৈচে থাকার ইচ্ছে গুর। তবে কেন ওরকম কথা বলবে ? তোকে আবার বিয়ে করতে বলবে এমন ছেলেমানুষও তো প্রীতম নয় !

বলল তো।

প্রীতমের ওপর একটু রাগ হয় দীপনাথের। বলে, তা পাত্রটাও প্রীতমই ঠিক করে দিয়ে যেত না হয় !

বিলু খুবই অস্বস্তি বোধ করছে। আঁচলটা গায়ে টান টান করে জড়িয়ে শাড়ির খুঁটা

আঙুলে জড়াচ্ছে। মুখ তুলছে না, কিন্তু ওর ছটফটানি স্পষ্ট বোঝা যায়। দীপনাথ খর চোখে বোনকে দেখছিল। একটা আবছা সন্দেহ খেলে যায় মনে।

বিলু কিছু বলল না। খানিক অপেক্ষা করে দীপনাথ বলল, প্রীতমকে আজ একটু বকব। এসব কথা কেন বলবে ও ?

মৃদু দৃঢ় স্বরে বিলু বলে, না। কিছু বলার দরকার নেই। হয়তো ভুল বুঝবে। ভাববে, আমি তোমার কাছে নালিশ করেছি।

নালিশ তো করাই উচিত।

ওর এখন ন্যায়-অন্যায় বোধ নেই। অন্যরকম হয়ে গেছে। কিছু বললে হয়তো ক্ষেপে উঠবে।

প্রীতম ক্ষেপে উঠবে ! কথাটা বিশ্বাসই করা যায় না। প্রীতমের কোনোদিন রাগ দেখাই যায়নি। সেই ছেলেবেলায় শিলিগুড়ির হাকিমপাড়ার রাস্তায় দীপনাথের হাতে মার খেয়ে ছেলেমানুষের মতো অসহায় আক্রোশে চৈচিয়েছিল প্রীতম। বড় হয়ে সে হয়ে উঠেছে শাস্ত্র, নির্বিরোধী এবং প্রায় ব্যক্তিত্বহীন এক মানুষ। স্ত্রৈণ ? না, ঠিক স্ত্রৈণও বলা যায় না প্রীতমকে। কোনোদিন ঝগড়া করেনি বিলুর সঙ্গে, মতে মত দিয়ে চলেছে, তবু আলাদা একটা সত্তাও বেঁচে ছিল তার মধ্যে। বিলু প্রীতমকে হয়তো কোনোদিনই ঠিকমতো বোঝেনি।

অচলা এসে খবর দিল, প্রীতম জেগেছে।

নিঃশব্দে দীপনাথ গিয়ে প্রীতমের পাশটিতে বসে। ওব রোগা দুর্বল হাতখানা নিজের হাতে তুলে নেয়।

প্রীতমের মুখে আজ হাসি ফুটল অনেক দেরীতে। মৃদু স্বরে বলল, ক' বছর পরে এলে ? বছর ! দূর পাগলা। অফিসে দিন সাতেক খুব ভুতুড়ে খাটুনি চলছে।

জানি। তুমি কাজের লোক।

অপদার্থ বলেই তো খাটতে হয় বেশী। তোর মতো কোয়ালিফিকেশন থাকলে খাটতে হত না।

কোয়ালিফিকেশন কোন কাজে লাগল, সেজ্জদা ?

লাগবে। সেরে ওঠ, দেখবি।

তুমি কি ছেলেমানুষ হয়ে গেলে, সেজ্জদা ! সেরে ওঠ বললেই কি সেরে উঠবে ? তোর কি হয়েছে বল তো ? আগে তো সবসময়ে বলতিস ভাল আছি।

আজকাল আমি ভাল নেই।

কেন ভাল থাকিস না ? কেন মেজাজ খারাপ করিস ?

বেঁচে থেকে কি হবে ? কিসের ওপর দাঁড়িয়ে বাঁচে মানুষ ? কোন আশায় রোজগার করে ? কোন পিপাসায় সারাদিন ভুতের মতো থেটে বিকেলে বাড়ি ফিরে আসে ? কি সব যা তা বলছিস ?

পায়ের নীচে মাটি সরে গেলে মানুষ আর বেঁচে থাকবে কেন ?

অনেক রোগা, দুর্বল, নিজীব দেখাচ্ছে প্রীতমকে। কণ্ঠস্বর তত স্পষ্টও নয়। তবু তার ভিতর থেকে একটা ঝাঁঝ আসছে।

দীপনাথ মৃদু স্বরে বলল, চুপ কর। দুনিয়ার সব কিছু নিয়ে মাথা ঘামাতে নেই।

তার মানে ?

তুই যা বলতে চাইছিস তা আমি জানি।

সামান্য অবাক হয়ে প্রীতম বলে, জানো ? কি জানো বলো তো ?

দীপনাথ মাথা নেড়ে বলে, এ ঠিক জানা নয়। আন্দাজ। তবে আন্দাজটা হয়তো মিথ্যে নয়। বলব ? শুনে তোর কী লাভ, প্রীতম। বরং জেনে রাখ, তুই যেমন জানিস, আমিও তেমন জানি।

দীপনাথের হাতটা কাকের পায়ের সরু দাঁড়ার মতো আঙুলে চেপে ধরার চেষ্টা করে প্রীতম এই প্রথম মন খুলে হাসল। গভীর একটা শ্বাস ফেলে বলল, জানো ! তুমি জানো ! কি করে জানলে ? নিজের চোখে কিছু দেখেছো ?

দূর বোকা ! আমি কি গোয়েন্দাগিরি করে বেড়াই ? তুই যেভাবে জেনেছিস আমিও ঠিক সেইভাবে...আন্দাজ, অনুমান।

প্রীতম গভীর দৃষ্টিতে দীপনাথের দিকে চেয়ে বলে, তোমার খুব সূক্ষ্ম অনুভব আছে, সেজদা।

মোটাই নয়। কিন্তু আমি বলি, তুই ওসব নিয়ে কেন ভাবিস ? মানুষ একটা বিশ্বাসের জায়গা চায়, নির্ভরতা চায়, আশ্রয় চায়—এসব তো পুরোনো কথা। কিন্তু তোর তো তা নয়। বিলু তোর বউ বটে, কিন্তু তুই বেঁচে আছিস নিজের জোরে। বউ যদি বিশ্বাস না রাখে, তাতেও তোর কিছু এসে যায় না, প্রীতম। বেঁচে থাকাটাই যে তোর আসল পায়ের তলার মাটি। তুই কেন ছিচকীদুনের মতো অনোব ওপর নির্ভর করবি ?

তুমি কেন এতদিন এলে না সেজদা ? এসব কথা কেন আগে এসে বললে না আমায় ? সমস্যাটা নিয়ে আমি রোজ শুয়ে শুয়ে ভাবছি আর জড়াছি।

প্রীতমের চুলে আঙুল দিয়ে বিলি কেটে দীপনাথ বলে, বিলু বা অরুণ তো তোর কোনো প্রবলেম নয়, প্রীতম। তবু যে ওটা নিয়ে ভেবেছিস তাব কারণ, পুরুষের স্বাভাবিক অধিকারবোধ। বিয়ের পর একজন মেয়েকে পুরোপুরি পাবো, সে আমার সম্পূর্ণ বিশ্বস্ত হবে, তার ওপর পৰিপূর্ণ নির্ভর করা যাবে, এসব হল পুরুষদের মজ্জাগত আকাঙ্ক্ষা। কিন্তু ভেবে দেখলে দেখবি, বড় কবে পাত পোতে লাভ নেই, যে দেয় সে তাব আন্দাজ মতোই দেয়। বিলু বা সংসারের আর কারো কাছ থেকে কিছু চাসনি, প্রীতম। শুধু বেঁচে থাকাটাকেই বড় করে দেখ।

প্রীতম মাথা নেড়ে বলে, আমি আব মাথা ঘামাচ্ছি না সেজদা। ঘটনা যাই হোক, আমার তো সত্যিই তাতে কিছু যায় আসে না।

এতক্ষণে বুঝেছিস বোকাবাম।

কিন্তু বেঁচে থাকারও তো আব আমার কোনো দরকার নেই।

কেন ? ওকথা কেন বলছিস ? এতক্ষণ তা হলে কি বুঝলি ?

আমি যা বুঝছি তা তুমি কোনোদিন বুঝবে না। তোমাকে কি করে ভালবাসার তত্ত্ব বোঝাবো বলো তো।

বোঝালে বুঝব। বল শুনি।

আমি যে বিলুকে ভালবাসি সেটা বোঝো ?

দীপনাথ গম্ভীর হল। সে ভেবেছিল বিলুকে গুরুত্বহীন করে দিয়ে প্রীতমকে শাস্ত করা যাবে। সেটা হয়নি। এর মধ্যে একটা ভালবাসার চোরকাটাও বিধে আছে তা হলে। সে বলল, ভালবাসবি না কেন ?

অতঃপর আলাপভাবে কথাটা ভেবো না। আমি জানি তুমি আজও সত্যি করে কাউকে ভালবাসেনি। বেসেছো ?

কে জানে বাবা !

বাসোনি । সংসারে তোমার কোনো ইনভলভমেন্ট নেই বলেই অত সহজে সব ঘটনাকে উড়িয়ে দিতে পারলে । আমি তোমার মতো অত বেপরোয়া হবো কি করে ? ভালবাসলে তা হওয়া যায় না ।

তা হলে কি করবি ?

বিলু কোথায় ? তাকে ডাকো, আমি আজ তোমার সামনে বিলুকে কয়েকটা কথা জিজ্ঞেস করব ।

দীপনাথ চমকে ওঠে, বলিস কি ? তুই কি পাগল ? ওসব কথা এভাবে বলতে নেই ।

প্রীতম শাস্ত্রাভাবে অকপট চোখে চেয়ে বলল, কথটা বিলুকে এতদিন জিজ্ঞেস করতে সাহস পাইনি । কি জানি যদি অপমান বোধ করে দোতলা থেকে ঝাঁপ দেয় । আজ তুমি আছো, তোমাকে মাঝখানে রেখে কথগুলো বলব ।

দীপনাথ শক্ত করে প্রীতমের হাত চেপে ধরে কঠিন গলায় বলে, না প্রীতম, এ কাজ করিস না ।

সেজদা, আমি শিলিগুড়ি চলে যাচ্ছি । শেষ বারের মতো । আর কখনো বিলুর সঙ্গে দেখা হবে না । কথা ক'টা জেনে গেলে নিশ্চিন্তে যাওয়া হবে । নইলে বড্ড হটফট করব যে ।

না, প্রীতম ।

কেন নয় ?

আমি বিলুর দাদা । খুব লজ্জার ব্যাপার হবে ।

আমি খারাপ কিছু বলব না, সেজদা । শুধু জিজ্ঞেস করব, ও অরুণকে সত্যি ভালবাসে কি না । যদি বাসে তা হলে কি করে বাসে । কিভাবে সেটা সম্ভব হল ? আর যদি সম্ভব হয়েই থাকে তবে আমি কোন বিশ্বাসে এতকাল বেঁচে ছিলাম । কাব জনা বোজগার করেছে, কাকে ভেবে দিনের শেষে বাড়ি ফিরে এসেছি ।

পৃথিবীটা কিরকম তা কি জানিস না, প্রীতম ?

না জানি না । আমি বিলুকে আজও ভালবাসি । তাই আমি ওকে জিজ্ঞেস করব, বাকি জীবন ও অরুণকে ঠকাবে কিনা । যদি ঠকায় তবে ঘরে ঘরে সেই ঠকানোর হাওয়া গিয়ে লাগবে কিনা । আমি স্পষ্ট কথা জানতে চাই ।

তুই আজ বড্ড ছেলেমানুষী করছিস, প্রীতম । তোর বোঝা উচিত, দুনিয়ার সব সত্য জানতে নেই । এগুলো না জানলেও তোর চলবে ।

তুমি ভাবছো আমি মরে যাবো বলেই এসব কথা না জানা ভাল । তাই না সেজদা ?

না প্রীতম, তা নয় ।

আমি জানি ।

তুই ভুল জানিস ।

বিলুকে ডাকো ।

না । তুই একটু শাস্ত হ ।

নিজের বোনকে আড়াল করতে চাইছো না তো ?

ছিঃ প্রীতম । তুই কি জানিস না, বিলুর চেয়েও আমার কাছে তুই-ই বেশী ইম্পোর্ট্যান্ট ?

প্রীতম ক্রান্তিতে চোখ বুজল । তারপর সামান্য দমফোট গলায় বলল, বিলুকে ডাকার দরকার নেই । ও সবই শুনেছে । ভিতরের ঘরের পর্দার আড়ালে এতক্ষণ ছিল ।

দীপনাথ একটু তটস্থ হয়, তাই তো। বিলুর না শোনার কথা নয়। ফ্ল্যাটিবাড়ির ঘরের মধ্যে ঘর। কান পাওলেই শোনা যায়। সে নীচু হয়ে ফিস ফিস করে বলল, কেন শোনালি, প্রীতম ?

প্রীতম চোখ বুজে রেখেই হাসল। বলল, শোনাতে চেয়েছিলাম। একটু শুনুক। তাতে ওর ভাল হবে।

দীপনাথ স্তব্ধ হয়ে বসে রইল। ইদানীং তাকে বড় বেশী স্বামী-স্ত্রীর সমস্যায় জড়িয়ে পড়তে হচ্ছে। অভিজ্ঞতা বড় কম হল না। তবু প্রীতমের এই নিষ্ঠুরতার কোনো তুলনা হয় না। তার মেজদা প্রকাশ্যে বউয়ের নামে কুৎসা রটিয়েও এতটা তীক্ষ্ণ লড়াই তৈরি করেনি।

ভিতরের ঘরের পর্দা সরিয়ে হঠাৎ বিলু চৌকাঠে দেখা দেয়। মৃদু স্বরে বলে, সেজদা, শোনো।

দীপনাথ জড়তা কাটিয়ে ওঠে।

পাশের ঘরে নিয়ে গিয়ে বিলু মৃদু স্বরে বলে, ও কী বলছিল, সেজদা ?

কেন, তুই শুনিসনি ?

একটু-আধটু কানে এসেছে।

না শুনলেই ভাল করতিস।

আমি শুনতে চাই। তুমি বলো।

কি বলব ? বলার কিছু নেই।

ও কি শিলিগুড়ি যাবেই ?

তাই তো মনে হচ্ছে। যাওয়াই ভাল।

একটু আগের কাঠিন্য হঠাৎ ঝরে গেছে বিলুর। কেমন সাদা পাঁশুটে মুখে চেয়ে থাকে দীপনাথের দিকে। হলুদ আলোয় চোঁট দুটো বিবর্ণ দেখায়। অনেক বোগাও হয়ে গেছে বিলু। গলার স্বব আবার হঠাৎ ভেঙে গেল ওর। বলল, যাক না, যাক। কে আটকাচ্ছে ?

এ সব কথা বলে সাধারণ মেয়েরা হঠাৎ কেঁদে ফেলে বা ভেঙে পড়ে। বিলু তা করল না। খাটের বাজুতে ঠেস দিয়ে দাঁড়িয়ে রইল, যেমন ছিল। খাটে সবুজ নাইলনের মশারির মধ্যে লাবু নিশ্চিন্তে ডান কাতে ঘুমোচ্ছে। খুব আন্তে ঘুরছে সিলিং-এর পাখা।

কিছুক্ষণ কেউ কোনো কথা বলল না। তারপর বিলুই হঠাৎ বলল, ও আমাকে সন্দেহ করে।

সন্দেহ কেন করবে ? সন্দেহ নয়।

তোমাকে কিছু বলেনি ?

বলেছে। তবে সেটা সন্দেহ নয়, বিলু। আমিও জানি সেটা সত্য।

বিলু মেঝেতে পা ঘষল। মুখ তুলল না। মৃদু স্বরে বলল, তুমিও আমাকে বিশ্বাস করো না সেজদা ?

দীপনাথ দীর্ঘশ্বাস ছেড়ে বলে, অরুণকে ছেড়ে দে না কেন বিলু ! কেন অশান্তি বাড়াজিস ?

একটু তেজের গলায় বিলু বলে, ছাড়ার কিছু তো নেই। অরুণের মতো শুভাকাঙ্ক্ষী আমার কে আছে ?

এ সময়ে দীপনাথের আর একটা দীর্ঘশ্বাস ঝরে গেল। বিলুর দেওয়া পাজামাটা সে এখনো পরেনি। মৃদু স্বরে বলল, আজ যাই রে বিলু। পরে একদিন এসে থাকব।

বিলু অবাক হল না। পরিস্থিতি পাল্টে গেছে। বলল, খেয়ে যাও।

না, খিদে নেই।

মেসে ফিরতে রাত হয়ে গেল। ঢাকা খাবার ছুঁয়েও দেখল না দীপনাথ। বিছানায় শুয়ে জেগে রইল। ঘুম এল ভোরের দিকে, যখন দীর্ঘ বিরতির পর আবার বৃষ্টি নামল বাইরে।

পরদিন আধভেজা হয়ে অফিসে পৌঁছে পেডেস্টাল ফ্যানের সামনে দাঁড়িয়ে প্যান্ট শাট শুকিয়ে নেওয়ার চেষ্টা করছিল সে। এ সময়ে একস্টেনশন লাইনে তার টেবিলের টেলিফোন বেজে ওঠে। হঠাৎ কেন যেন আওয়াজটা শুনেই মনে হল, মণিদিপা। বহুকাল তার ডাক আসেনি।

রিসিভার কানে তুলতেই নির্ভুল গলাটি বলল, আমি ভীষণ আটকে পড়েছি এক জায়গায়। একটু হেলপ করবেন?

দীপনাথ কাচের শার্শি দিয়ে বাইরে বৃষ্টির প্রচণ্ড তাণ্ডব দেখতে পাচ্ছিল। ভর-দুপুরেও প্রায় ঘুটঘুটি অন্ধকার চারদিকে। রাস্তায় কোনো চলমানতা নেই। গাড়ি না, মানুষ না, গরুটা পর্যন্ত না। স্নেহমুদ্রায় বলল, এই ওয়েদারে ঈশ্বর আপনার সহায় হোন। কোথায় আটকে পড়েছেন?

বাগবাজারের এক মিষ্টির দোকান থেকে ফোন করছি। রাস্তায় হাঁটুজল।

দীপনাথ বলল, এখানে কোমর সমান। কিছু করার নেই। অপেক্ষা করুন। বোস সাহেবকে লাইনটা দেবো?

বিরক্ত মণিদিপা বলে, তা হলে আর আপনাকে ফোন করছি কেন?

সত্যিই তো, কেন?

প্রমোশন পাওয়ার পর খুব চোপা হয়েছে তো আপনাব!

প্রমোশন পেলেও আমি এখনো বোস সাহেবের আভারে। আপনার মতোই।

আমি কারো আভারে নই। আই অ্যাম নট এ প্লেভ লাইক ইউ।

সে কথা থাক। আপনার জন্য কি কবা যায় বলুন তো!

সেটাই তো আপনাকে ভাবতে বলছি।

বোস সাহেবকে বলি, তিনিও না হয় একটু ভাবুন।

আপনাদের কাউকেই ভাবতে হবে না। আমিই ভাবব।

রাগ করলেন? আপনার ভয়ের কিছু নেই। এখন বেলা বারোটা মাত্র বাজে। বৃষ্টি থামবে, গাড়িঘোড়াও চলবে। একটু অপেক্ষা করতে হবে এই যা। বাগবাজারে কোথায় গিয়েছিলেন?

যেখানে আমার খুঁশ। শুনুন, অফিসের একটা গাড়ি পাঠাতে পারেন না?

গাড়ি? আমার চোখের সামনে অস্তুত দশ-বারোখানা গাড়ি রাস্তায় জলবন্দী হয়ে পড়ে আছে। গাড়ির কথা ভুলে যান। গরীবের বন্ধুরা বিপদে পড়লেই কেন গাড়ির কথা ভাববে?

আবার কটকটে কথা! আমার আধুলিটা তা হলে ফেরত চাইব কিন্তু।

ঐ যাঃ। আধুলিটা ফেরত দিইনি আপনাকে?

কই আর দিলেন!

তা হলে শীগগীরই একদিন যাচ্ছি ফেরত দিতে।

মণিদিপার পরের কথাটা অস্পষ্ট এল। লাইন ডেড। সম্ভবত আন্ডার-গ্রাউন্ড কেবলে জল ঢুকেছে। তবু মনে হল মণিদিপা জিজ্ঞেস করছিল, উইথ লাভ?

কতকাল পরে রেলগাড়ি দেখছে প্রীতম !

অ্যামবুলেন্স থেকে স্ট্রচারে নামিয়ে ট্রেনের একটা ফার্স্ট ক্লাশ কুপেতে চটপট তাকে তুলে দিয়ে গেছে বাহকেরা। কিন্তু ঐ সময়টুকুতেই সে অবাক হয়ে ঠিক লাবুর মতো ছেলেমানুষী কৌতূহলে রেলগাড়িটাকে দেখেছে।

নীচের বার্থে নরম বিছানায় শুয়ে সে রেলগাড়ির অদ্ভুত নেশার গন্ধটা পাচ্ছিল। কাঠের পালিশ, গদি আর মৃদু ফিনাইল মিলে বোধহয় এই গন্ধটা তৈরি হয়। বড় ভাল লাগে।

কাঁদবে বলে লাবুকে স্টেশনে আনা হয়নি। তবু কি কাঁদেনি? অসহায় তোষাপানা মুখ করে সারাদিন বেড়ালের মতো ঘুরঘুর করেছে প্রীতমের বিছানার আশেপাশে। রওনা হওয়ার সময় সামলাতে পারেনি, হাউমাউ করে কেঁদে উঠেছিল। প্রীতম মড়ার মতো মুখ করে শব্দ হয়ে রইল। মনে মনে জপ করল, ওরা কেউ না, ওরা আমার কেউ না। তবু সে তো জানে, আমত্যা লাবুর মুখখানা চোখে ভাসবে তার।

স্ট্রচারে অ্যামবুলেন্সে ভেসে ভেসে চলে আসার সময় সে নিজেকে সান্ত্বনা দিয়েছিল, এ শোক বেশীদিন তো নয়। শোনানি তোমার শরীরের ভিতরে কোলাহল আর জয়ধ্বনি করছে জীবগুরা। বেশীদিন নয় হে, বেশীদিন নয়।

এতদিনে গতকালই প্রথম সে তার বিজ্ঞাপনের একটা জবাব পেয়েছিল। ছোটো একটা কোম্পানি তাকে দিয়ে অডিট করতে চেয়েছে। সামান্য ফী দেবে। একটু দ্বিধাগ্রস্ত হয়েছিল প্রীতম, হয়তো কাজটাজ হাতে নিলে বেঁচে যাবে। তারপর ভাবল, খেলাটা শেষ হওয়াই ভালো। খামোখা টানাহাঁচড়া করে ক্ষতবিক্ষত হওয়া। আর লড়াই নেই। এবার নিশ্চিত।

সারাক্ষণ বিলু পাশাপাশি রয়েছে। ট্রেনের কামরা অবধি। পায়ের কাছে বসে প্রীতমের রোগা হাঁটুর ওপব হাত রেখে পলকহীন চেয়ে আছে। বিকেল থেকে কেবলই ঐ মূক চেয়ে থাকা। কথা নেই। প্রীতম অবশ্য চাইছে না। চেয়ে কি হবে? মায়া বাড়বে।

তবু এই শেষ সময়টুকু এভাবে কাটিয়ে দেওয়া অভদ্রতা বলে প্রীতম বিলুকে জিজ্ঞাস করল, মেজদা আসবে না?

বিলু সংবিৎ পেয়ে বলল, তুমি যে কেন সেজদাকে মেজদা ডাকো!

আমি তো মেজদাই ঢাকব। পিসিমার ছেলেরা ডাকত। ও আমাদের ছেলেবেলা থেকে ডেকে অভ্যাস। তবে আজকাল সেজদাও ডাকি, কিছু ঠিক নেই।

বিলু বলল, আসবার তো কথা। হয়তো অফিসে কাজ পড়েছে।

মেজদা আসবেই। তুমি একটু দরজার কাছে গিয়ে দাঁড়াও। হয়তো কামরাটা চিনতে পারছে না।

বিলু নিঃশব্দে উঠে গেল। একটু বাদেই ফিরে এসে বলল, শতম তো রয়েছে বাইরে।

ট্রেন ছাড়তে কত দেরী?

এখনো কুড়ি মিনিটের মতো।

শতমটা যে কেন একগাদা টাকা খরচ করে ফার্স্ট ক্লাশের টিকিট কাটতে গেল। সেকেন্ড ক্লাশেই দিবি যেতে পারতাম।

এই ভাল হয়েছে। সেকেন্ড ক্লাশে ভীড়, গোলমাল, ধাক্কাধাক্কি।

সেটাই তো ভাল। কতকাল মানুষজন দেখি না, গোলমাল কানে আসে না। জ্যান্ত তাজা, একগাদা মানুষ দেখতে কত ভাল লাগত।

অসুবিধে হত ।

তুমি বুঝবে না মানুষের ভীড় আমার এখন কত প্রিয় ।

ঘরবন্দী থাকলে ওরকম মনে হয় । কিন্তু ভীড় তো আর সত্যিই ভাল কিছু নয় ।

আচমকাই অরুণের দীর্ঘ গৌরবর্ণ চেহারাটা দরজা জুড়ে দেখা দিল । পরনে ধূসর রঙের সাফারি শাট আর প্যান্ট । হাতে গাড়িব চাবি ।

একটুও চমকাল না প্রীতম । মনে কোনো প্রতিক্রিয়া নেই । শান্ত গলায় বলল, আসুন ।

চললেন তাহলে ? অরুণ ভিতরে এসে দাঁড়ায় ।

চললাম । বিলু আর লাভু রইল ।

বিলু উঠে দাঁড়িয়ে অরুণকে বলল, এখানে বোসো ।

অরুণ বসল না, হাত নেড়ে বিলুকে বসে থাকাব ইঙ্গিত করে বলল, বিলুও তো ছুটির অ্যাপলিকেশন করেছে শুনলাম । কঁরোনি বিলু ?

হ্যাঁ ।

শিলিগুড়ি কবে যাচ্ছে ?

সামনের মাসে ।

প্রীতম এই সংলাপ নীরবে শুনল । কথা বলল না । বিলু সামনের মাসে শিলিগুড়ি যাবে, একথা তাকে আগে বলেনি । এখন জেনেও প্রীতমের ভাল বা খারাপ কিছু লাগল না । মাথার মধ্যে কোনো কথাই তরঙ্গ তুলছে না । কেমন একটা জমাট নীরোট ভাব ।

অরুণ ওপরের বাস্কে হাতের ভর রেখে ঝুকে বলল, আমার বিয়েটা পর্যন্ত আপনি থাকবেন আশা করেছিলাম ।

প্রীতম সামান্য হাসল । বলল, বিয়েটা হোক । দূর থেকে শুভ কামনা করব ।

অরুণ মুখ গভীর করে বলে, আপনার ওয়েল উইশিং-এর দাম আছে । আপনি সত্যিকারের ভাল লোক ।

প্রীতম আবার হাসে । মাথাটা এত প্রতিক্রিয়াহীন কেন ? এত জমাট কেন ?

বিলু আবার হাঁটুতে হাত রেখেছে । আস্তে করে বলল, আমি আর দিন কুড়ি-পঁচিশ বাদেই যাচ্ছি । ততদিন ওষুধ-টষুধ ঠিকমতো খেও ।

ভেবো না । বাড়িতেই দেখার লোক আছে ।

তবু বলছি ।

গাড়ি ছাড়ার মিনিট সাতেক বাকি থাকতে দীপনাথ এল । মুখে ঘাম, উদ্বেগ । বড় বড় শ্বাস ছাড়াচ্ছে ।

এলে মেজদা ? ভাবছিলাম, বোধহয় পৌঁছতে পারবে না ।

দেরী হয়ে গেল । বৌবাজারে যা জ্যাম । ট্যাকসি ছেড়ে প্রায় দৌড়ে এসেছি ।

তোমার নর্থ বেঙ্গলের ট্যুর আর নেই ?

আছে । খুব শীগগীরই যাচ্ছি । অফিসে কিছু বকেয়া কাজ জমে গেছে বলে ডেটটা পিছিয়েছে ।

তাড়াতাড়ি চলে এসো । আমি বেশীদিন—

চুপ কর প্রীতম ।

প্রীতম আবার হাসে । মাথা একটু তোলার চেষ্টা করে বলে, পাঁচ মিনিটের বেশী বোধহয় সময় নেই । বিলু, তুমি নামো ।

বিলু মৃদুস্বরে বলে, অনেক দেরী আছে ।

প্রীতম দীপনাথের দিকে চেয়ে বলে, মাথাটা কেমন লাগছে মেজদা। বোধবুদ্ধি কমে যাচ্ছে। ক'টা বাজে বলো তো। সময় আছে ?

দীপনাথ ঘড়ি দেখে বলে, মিনিট তিনেক।

শতম গাড়িতে উঠল না ?

উঠবে। অত অস্থির হচ্ছিস কেন ?

অস্থির নয়। গাড়িটা চললে আমার খুব ভাল লাগবে। কতকাল চলন্ত রেলগাড়িতে...কতকাল...

প্রীতম !

উঁ।

ওরকম করছিস কেন ? শরীর কেমন লাগছে ?

ভাল। খুব হালকা। চোখ বুজে গভীর শ্বাস টেনে প্রীতম বলে, গাড়ি ছাড়লেই ভাল লাগবে।

দীপনাথ ওর কপালে হাত রাখে। করোটির মতো কপাল। চামড়ায় খসখসে ভাব। ঠিক এতটা দুর্বল কিছুদিন আগেও ছিল না প্রীতম। ডাক্তাররা পাকেপ্রকারে জবাব দিয়েছে অনেককাল আগেই, তবু অসম্ভব মনের জোরে লড়ে গেছে প্রীতম।

দীপনাথ ক্রুদ্ধ বিরক্ত চোখ তুলে অরুণের দিকে তাকায়। সুন্দর শয়তান। বলবে দীপনাথ ? বলবে যে, আপনিই প্রীতমের এ অবস্থার জন্য দায়ী ?

বলা যায় না। মানুষের সমাজে আজও ভদ্রতা, শিষ্টতার মতো কিছু ভাঁড়ামি এসে সত্যের মুখ চাপা দিয়ে ধরে।

অরুণ একদৃষ্টিতে দীপনাথকে দেখছিল। হঠাৎ বলল, আমেরিকায় এক জায়গায় মোটর নিউরো ডিজেনারেশন নিয়ে রিসার্চ চলছে। আমি চিঠি লিখেছিলাম। জবাব এসেছে, ওরা এখন এই রোগটা নিয়ে অ্যানিম্যাল রিসার্চ করছে। কোলোনে আর এক জায়গায় যোগাযোগ করেছি।

কি লিখেছে ?

এখনো জবাব আসেনি। যদি আসে তবে জানাবো। এইটুকু স্বাভাবিক গলায় বলে হঠাৎ মুখটা কাছে এনে বলল, এস এন ডি ইজ ইনকিউরেবল ইউ নো।

দীপনাথ মাথা নাড়ে।

শতম দরজায় আসে। ছোটো কুপটায় ভীড় হয়ে গেছে। শতম বলল, গাড়ি ছেড়ে দিচ্ছে। বউদি, নামো।

কথাটা শুনেও কয়েক সেকেন্ড বসে থাকে বিলু। তারপর উঠে প্রীতমের মাথায় হাত বুলিয়ে দেয়। কোমল স্বরে বলে, আসছি। ভাল থেকো।

প্রীতম চোখ চাইল। বলল, গাড়ি চলছে বিলু ?

না, এখনই ছাড়বে। আমি যাচ্ছি।

আচ্ছা। বলে আবার চোখ বোজে প্রীতম। গাড়ি যখন সতিাই ছাড়ল তখনো তার চোখ বোজা। গাড়ি নড়ে উঠলে হঠাৎ বলল, আমি বাড়ি যাচ্ছি।

একটু বাদে কলকাতার চৌহদ্দি পেরিয়ে দার্জিলিং মেল মাঠঘাটের অঙ্ককার ভেঙে যখন দৌড়োচ্ছে উর্ধ্বশ্বাসে তখনো প্রীতম কিছু টের পেল না। শতম শিয়রে বসে দাদার কপালে হাত রাখল। রোগা, পাণ্ডুর মুখখানার দিকে চেয়ে রইল গভীর দৃষ্টিতে। অনেকক্ষণ তার

মুখে রাগ, অভিমান, দুঃখ খেলা করে গেল। তারপর শান্ত হল শতম।

দাদা !

ঊ।

ওদের কথা বিশ্বাস কোরো না।

কাদের কথা ?

ডাক্তারদের কথা, বউদি বা অরুণদার কথা। ওরা কি দুনিয়ার সব কিছু জানে ?
দুনিয়ায় সব কথা কেই বা জানে।

শোনো দাদা, আমি বলছি, এ অসুখ ভাল হয়ে যাবে। তোমাকে এত সহজে মরতে
দেবো নাকি ? ওরা তোমাকে মেরে ফেলছিল বলে আমি তোমাকে নিয়ে যাচ্ছি।

ভাল করবি ? শুনিসনি, মোটর নিউরো ডিজেনারেশনের কোনো চিকিৎসা নেই ?
রাখো তো। নাম চিকিৎসায় সব ভাল হয়।

প্রীতম মুখে কিছু বলল না। শুধু একটু প্রশ্রয়ের হাসি হাসল।

শতমের চোখেমুখে একটা গভীর বিশ্বাসের প্রত্যয় ফুটে উঠল, নামই সব। নাম থেকেই
প্রাণ। নামে সব হয়। দেখবে দাদা ?

ক্লান্ত চোখে একটু উৎসুক দৃষ্টিতে চেয়ে প্রীতম বলে, এসব তো এতদিন বলিসনি।

বলব কি ? ওরা তোমার এত চিকিৎসা করছে অথচ নিজেরাই বিশ্বাস করছে না যে, তুমি
বাঁচবে। মূলে একটু বিশ্বাস না থাকলে কি হয় ! ওদের কারো স্বভাবেই বিশ্বাস জিনিসটা
নেই। বীজমন্ত্র জপে অসুখ সারে, একথা শুনলে হাসত। আজ তোমাকে ঐ পরিবেশ থেকে
তুলে আনতে পেরেছি বলে বলছি। তুমি শুধু একটু বিশ্বাস করো যে, তুমি বাঁচবে।

কিন্তু সব যে বড় দূরে সরে যাচ্ছে।

কিছুই দূরে সরছে না। তুমি চুপ করে চোখ বুজে থাকো। আমি তোমার শিয়রে বসে
একটু জপ করি।

আচ্ছা। প্রীতম চোখ বোজে।

শতম কামরার বাতি নিভিয়ে দেয়। প্রীতমের শিয়রে শিরদাঁড়া টানটান খাড়া রেখে
বসে। ব্রু-যুগল এবং নাসামূলের সঙ্গমে ত্রিকুটি। আজ্ঞাচক্র। তেসরা তিল। দার্জিলিং
মেল-এর ঝোড়ো গতি, দুলুনি এবং প্রবল শব্দের জন্য মনটাকে সংহত করতে একটু দেয়ী
হয়। কিন্তু প্রবল ইচ্ছাশক্তির বলে পারেও তা। আজ্ঞাচক্রে স্মিত হাস্যময় অপার্থিব সুন্দর
মুখশ্রী ফুটে ওঠে। শুরু হয় বীজনামের স্পন্দন। একটু একটু কাঁপতে থাকে শতম। নামের
ধ্বনির সঙ্গে তাল রেখে তার হৃৎপিণ্ডের শব্দ পাটে যায়। শব্দ ধ্বনিত হতে থাকে। ব্রাতা
ডাকে, অনাহত শব্দ ডাকে...শোন ঐ অনাহত শব্দ—সব শব্দ শব্দ শব্দ। তিনি বলেছিলেন,
দ্যাখ, আমাদের যেতে হলে সেই গঙ্গার ধারে যেতে হবে। শব্দগঙ্গা, আকাশগঙ্গা, দ্যাখ,
আমার নাম করতে করতে আসলেই ঐ ত্রিবেণীঘাটে পৌঁছবে, তারপর ঐ ত্রিবেণীতে
পৌঁছলে ঐ শব্দগঙ্গা পেলেই গা ঢেলে দিয়ে বসে যা। রূপেব রাজ্য আস্তে আস্তে পার হয়ে
পড়। তারপর রূপও যাবে নামও যাবে। আমি কে জানিস ? ঐ শব্দটা। ওটা কি জানিস ?
ঐ প্রণব।

স্টেশনেব বাইরে এসে অরুণ বলল, দীপনাথদা, আপনাকে গাড়িতে পৌঁছে দিই ?

দীপনাথ ভীষণ আনমনা ছিল। কথাটা শুনতেই পেল না। অরুণ দ্বিতীয়বার বলায় সে
মাথা নাড়ল, না দরকার নেই। আমি তো কাছেই থাকি।

বিলু কিছু বলছিল না এতক্ষণ । এবার হঠাৎ বলল, আজ তোমাকে মেসে ফিরতেই হবে সেজদা ?

কেন বল তো !

আজ প্রীতম চলে গেল । আমার খুব একা লাগবে ।

তোর সঙ্গে যেতে বলছিস ?

গেলে খুব ভাল হয় । যাবে ?

অনামনস্ক দীপনাথ প্যাণ্টের পকেটে হাত ভরে কি যেন ভাবে অনেকক্ষণ । বলে, প্রীতমকে যেতে দিলি কেন ?

গেলে আমি কি করব ? জোর করল যে ।

তোর জোর ছিল না ?

তাতে ভাল হত ?

দীপনাথ আবার একটু ভেবে বলে, না বোধহয় । এই ভাল হয়েছে ।

ও ওর মা-বাবা ভাই-বোনকে বড় বেশী ভালবাসে । তাই আমি ভাবলাম, ও যদি নাই বাঁচে তাহলে অন্তত শেষ ক'টা দিন প্রিয়জনদের কাছে থাকুক । কোনো ভুল করেছি ? না তো । দীপনাথ অবাক হয়ে বলে, ভুল করবি কেন ?

অরুণ তার গাড়িটা দূরে পার্ক করে রেখেছে । তিনজন হাঁটতে হাঁটতে সেদিকে যায় । যাবে সেজদা ?

চল ।

অরুণ সামনে, গাড়ি চালাচ্ছে । পিছনের সীটে বিলু আর দীপনাথ ।

বিলু মৃদুস্বরে বলে, প্রীতম বড় কষ্ট পাচ্ছে সেজদা ।

দেখলাম তো ।

শুধু শরীরের কষ্টই তো নয় । দিনরাত ঘরবন্দী থাকতে কেমন লাগে বলো ।

দীপনাথ একটু দীর্ঘশ্বাস ছাড়ে ।

বিলু মাথা নীচু করে বসে রইল কিছুক্ষণ । তারপর বলল, সবাই হয়তো আমার দোষ ধরবে ।

অনমনা দীপনাথ বলল, কে দোষ ধরবে ?

ওরা, ঐ প্রীতমের বাড়ির সবাই ।

কেন ? তুই কি করেছিস ?

আমি আবার কি করব ? ওরা হয়তো বলবে, আমি প্রীতমের যথেষ্ট সেবা করিনি । শতমও সেইরকমই সব কথা বলে গেল । ওদের বিশ্বাস আমি চাকরির নাম করে প্রীতমকে আভয়েড করেছি ।

প্রীতমের বাড়ির লোককে আমি চিনি । ওরা খারাপ নয় ।

এ কথাটাকে সমর্থন করল না বিলু । তবে জবাবও দিল না । গৌজ হয়ে বসে রইল । অনেকক্ষণ বাদে বলল, তুমি প্রীতমকে বড্ড ভালবাসো, না সেজদা ?

ঊ । স্বপ্নোখিত দীপনাথ বিলুর আবছা মুখের দিকে চায় । তারপর বড় একটা শ্বাস ছেড়ে বলে, প্রীতমটা যে ভীষণ ভাল । শিলিগুড়িতে আমরা একসঙ্গে মানুষ হয়েছি । ওকে কি ভাল না বেসে পারা যায় ।

প্রীতমও তোমাকে ভীষণ ভালবাসে ।

জানি ।

ও চলে যাওয়ায় তুমি আমার চেয়েও বেশী শক্‌ড ।

দীপনাথ মাথা নেড়ে বলে, ঠিক তা নয় ।

তুমি যে ভীষণ আনমনা হয়ে আছো ।

দীপনাথ একটু গলা ঝাঁকড়ি দিয়ে আস্তে আস্তে বলল, প্রীতম বাড়ি গেল । তাতে শক্‌ড হওয়াব কিছু নেই । আমি শুধু আমাদের ছেলেবেলার কথা ভাবছিলাম ।

বলে চুপ করে রইল দীপনাথ । কলকাতায় প্রীতম ছিল । অশক্ত, শয্যাশায়ী, পঙ্গু হলেও ছিল । কিন্তু এখন, আজ থেকে আর নেই । কলকাতা এখন তো অনেক বিবর্ণ লাগবে দীপনাথের কাছে ।

অরুণ বিলুদের বাসার মোড়ে নামিয়ে দিয়ে গেল ।

নিঃশব্দে ফ্ল্যাটে উঠে এল দীপনাথ আর বিলু । লাবু ঘুমিয়ে পড়েছে । খোলা জানালা দিয়ে হুহু করে হাওয়া এসে ফাঁকা ঘরে ছটোপুটি খাচ্ছে । প্রীতমের বিছানার বেডকভারের কোণ বাতাসে উন্টে আছে । ওষুধের ফাঁকা শিশিগুলো দাঁড় করানো বিছানার পাশের টেবিলে ।

বিলু বাথরুমে গেছে । দীপনাথ দাঁড়িয়ে প্রীতমহীন ঘরখানা খুব মন দিয়ে দেখে । ঘরের কোণে প্রীতমের ছইল চেয়ার বোকার মতো দাঁড়িয়ে আছে । প্রীতম চলে গেছে, এটা কি বুঝতে পারছে প্রীতমের বিছানা, টেবিল বা ছইল চেয়ার !

রাতে খেতে বসে কিছুই প্রায় খেতে পারল না দীপনাথ । বমি আসছে । মুখ ধুয়ে এসে বলল, প্রীতমের বিছানায় একটা ফর্সা চাদর পেতে দে । আমি আজ এই বিছানায় শোবো ।

বিলু আপত্তি করল না ।

খাওয়া-দাওয়ার পাট চুকিয়ে বিলু এসে প্রীতমের বিছানায় দীপনাথের পাশে বসল ।

পান খাবে সেজদা ?

না ।

একুনি শুয়ে পড়বে নাকি ?

দীপনাথ অসহায় ভাবে হেসে বলে, শুয়ে লাভ নেই । আজ রাতে ঘুম আসা শক্ত ।

তবে আমাকে প্রীতমের গল্প বলো । তোমাদের ছেলেবেলার গল্প ।

শুনতে চাস ?

চাই । আজ প্রীতমের কথা শুনতেই তো তোমাকে ডেকে আনা । কথাটা হয়তো সত্যি নয় বিলুর । প্রীতমের কথা শুনতে তার হয়তো ততটা ইচ্ছে হচ্ছে না, কিন্তু সে জানে, সেজদা প্রীতমের কথা বলতে পারলে খুশি হবে ।

প্রীতম । প্রীতমের কথা বলতে গেলেই বিশাল পাহাড়, বনশ্রেণী চোখে ভেসে ওঠে । ছেলেবেলার শিলিগুড়ির জনবিরল রাস্তাঘাট, উদ্যোগ মাঠ, অব্যাহত প্রসার মনে পড়ে যায় । প্রীতম তো কোনো বিচ্ছিন্ন মানুষ নয় । সে যেন এই ছেলেবেলার এক অবিচ্ছিন্ন শর্ত ।

অনেক অনেক কথা জমা হয়েছিল বুকে । বলতে বলতে ফাঁকা হয়ে গেল বুক । হাঁটু মুড়ে ভিখিরির মতো করুণ ভঙ্গিতে বসে যতদূর সম্ভব মন দিয়ে শোনে বিলু ।

॥ তেতাল্লিশ ॥

পরদিন ভাইবোনে অফিসে বেরোলো একসঙ্গে । ভীড়ের বাসে রড ধরে দাঁড়িয়ে গুতোগুতির মধ্যেও দীপনাথ লেডীজ সীটে বসা বিলুকে লক্ষ করে । আজ সকালে বিলুর

মুখে একটু বিষণ্ণতা এসেছে, একটু অনামনস্কতা। দুইয়ে মিলে ওর কাঠ কাঠ মুখটাকে কোমল লাভণ্যে মেখেছে বুঝি। চোখদুটো ভার ভার। রাতে হয়তো কেঁদেছে।

খুব ভাল, খুব ভাল। মনে মনে বলে দীপনাথ।

বিলুকে ব্যাংকে পৌঁছে দিয়ে সে অফিসে যায়। মনটা আজ খুব গভীর এবং স্থির। দুঃখ নেই, আনন্দও নেই। তবু কী একটা গভীরতর ভাব থানা গেড়ে আছে।

অনেকক্ষণ সে কাজে মন দিতে পারল না। টেবিলে বসে রইল চুপচাপ। বোস সাহেব একটা ছোট কাজে দিল্লি গেছেন। কার্যত এখন অফিস চালাতে হচ্ছে দীপনাথকে। অফিসকে অবশ্য চালানোর কিছু নেই। আপনি চলে। কিন্তু বিস্তর কাজ জমে আছে।

মনটাকে জড়ো করতে সময় লাগল একটু। দুপুর পর্যন্ত একটানা কাজ করে গেল সে। লানচে ফোন এল।

দীপনাথবাবু ! মণিদীপার গলা।

বলছি। কি খবর ? সেদিন শেষ পর্যন্ত কিভাবে বাড়ি ফিরলেন ?

থাক। জানতে যে চাইলেন সেটাই ভাগ্যি।

দীপনাথ হাসল। বলল, সেদিন কিছু করার ছিল না।

জানি। কিন্তু তা বলে একটু সিমপ্যাথিও দেখাতে নেই ?

কেন, দেখাইনি ?

আমি অবশ্য সিমপ্যাথির কাঙাল নই।

সেটা আর বলতে হবে না। হাড়ে হাড়ে জানি।

শুনুন, আমি একটু মুশকিলে পড়েছি।

কি মুশকিল ?

হাতে টাকা নেই। মিস্টার বোসের ব্যাংক অ্যাকাউন্ট যে এত ফাঁকা তা জানতাম না।

কত টাকা ?

পাঁচ শ' হলেই চলবে। অ্যারেনজ করা যাবে অফিস থেকে ?

দীপনাথ বলল, আপনি কিছু ভাববেন না। ব্যবস্থা হয়ে যাবে। আপনার কবে দরকার ?

আজই ; এঙ্কুনি।

এঙ্কুনি কি করে হবে। আমি বরং বিকেলে—

না, অত দেরী করা অসম্ভব। আমি এসপ্ল্যান্ড থেকে ফোন করছি। ঘণ্টাখানেকের মধ্যেই আমি আপনাদের অফিসে যাচ্ছি।

ঠিক আছে। আসুন।

কেমন আছেন ? ভাল ?

আপনি. কেমন ?

চমৎকার। ফ্রি লাইক এ বাটারফ্লাই।

ফ্রিডম ফ্রম হোয়াট ?

এভরিথিং। হাজব্যান্ড হাউজহোল্ড অ্যান্ড হেডেক।

অনেকটা আমার মতোই, তাই না ?

তার মানে..?

আমি যেমন ফ্রি ফ্রম ওয়াইফ ওয়েলথ্ অ্যান্ড ওরিজ।

এটাও কি রঙ নাশ্বার ?

কেন বলুন তো !

আমি দীপনাথ চ্যাটার্জির সঙ্গে কথা বলছি, না অন্য কারো সঙ্গে ?

নম্বর ঠিকই আছে ।

আপনি এত স্মার্ট হলেন কবে থেকে ? খুব বোল ফুটছে দেখছি । দিবা তো সরল সোজা গৈয়ে লোকটি ছিলেন । বোল ফোটাচ্ছে কে ?

কেউ হবে । দীপনাথ হাসছিল না । ভূ কোঁচকানো । চিন্তিত মুখ । একটু সময়ের ফাঁক দিয়ে বলল, বোস সাহেবের সঙ্গে আপনার একটা জয়েন্ট অ্যাকাউন্ট ছিল না ?

হ্যাঁ । একমাত্র সেটাই আমার অ্যাকসেসিবল অ্যাকাউন্ট ।

আপনার নিজের অ্যাকাউন্টও তো আছে !

আছে । কিন্তু তাতে বছকাল টাকা নেই ।

বোস সাহেবের বেতন, যত দূর জানি, জয়েন্ট অ্যাকাউন্টেই জমা হয় ।

মণিদীপা একটু চুপ করে থাকে । তাঁরপর একটু ঝাঁঝালো গলায় বলে, জেরা করার মানে কি ?

জেরা নয় মিসেস বোস । কেবল সেফ-সাইডে থাকা । বোস সাহেব ফিরে এলে হয়তো কৈফিয়তটা আমাকেই দিতে হবে ।

আমার কথা বলবেন । কৈফিয়ত যেন আমার কাছেই চায় ।

রাগ করলেন ? আসলে টাকা-পয়সার ব্যাপারটাই এত বিচ্ছিরি যে, এই একটা ব্যাপারে কিছুতেই আব্রু রাখা চলে না ।

আপনি আজকাল খুব প্র্যাকটিক্যাল হয়েছেন । এত প্র্যাকটিক্যাল যে আমার আবার মনে হচ্ছে এটা রঙ নাশ্বার ।

একদিক দিয়ে বিচার করলে এটা তো রঙ নাশ্বারই, মিসেস বোস ।

তার মানে ?

সেদিন বৃষ্টিতে বাগবাজারে আটকে পড়ে আপনার ফোন করা উচিত ছিল মিস্টার বোসকে । আপনি তা না করে একটা রঙ নাশ্বারে ডায়াল করেছিলেন । মনে আছে ?

মণিদীপা একটু সময় নেয় । এত সময় নেয় যে, দীপনাথের একবার সন্দেহ হয় লাইনটা কেটে গেছে । মণিদীপা অবশ্য লাইন ছাড়েনি । খানিক বাদে একটু গম্ভীর গলায় বলে, আপনি মাইন্ড করবেন জানলে আপনাকে ফোন করতাম না ।

মাইন্ড করিনি । বরং আনন্দে শিহরিত হয়েছিলাম । ভঁরু সেটা কিন্তু রঙ নাশ্বার ।

আমি রঙ নাশ্বার বলে ভাবি না । ভাবলে এত সহজে আপনার কাছে আজ টাকার কথা বলতে পারতাম না ।

একটা কপট শ্বাস ছেড়ে দীপনাথ বলল, আমার মেজোবউদি ঠিকই বলে ।

কি বলে ?

সে আপনাকে বলা যাবে না ।

মেজোবউদি মানে রতনপুরের সেই বউদি ?

হ্যাঁ । এই সেদিনও মেজোবউদি বলছিল—

থামলেন কেন ?

থামাই ভাল । সে বলা যায় না ।

তবু শুনি ।

কি শুনবেন ? শোনার মতো নয় । টাকাটা রেডি রাখছি, এলেই পেয়ে যাবেন ।

শুনুন । টাকাটা যখন পাওয়া যাচ্ছেই তখন মেক ইট এ থাউজ্যান্ড ।

আপনার সঙ্গে ফোনে বেশীক্ষণ কথা বলা দেখছি বিপজ্জনক।

কেন ?

আর পাঁচ মিনিট পরে তো আরো পাঁচশ টাকা বাড়িয়ে দেবেন।

খুব অসুবিধে হবে নাকি ? গলাটা একটু করুণ শোনায মণিদীপার। বলে, বোস কবে ফিরবে কিছুই বলে যায়নি। অথচ আমাকে তো এসটার্লিশমেন্টটা চালাতে হবে !

এসটার্লিশমেন্ট যে মণিদীপা চালায় না তা দীপনাথ ভালই জানে। তবু বুঝদারের মতো ভালমানুষী গলায় বলল, অলরাইট। ইট উইল বি এ থাউজ্যান্ড।

ছাড়ছি তা হলে ?

ঠিক আছে।

ফোন রেখে দীপনাথ ওঠে। বুড়ো অ্যাকাউন্ট্যান্ট অবনীবাবুর টেবিলে গিয়ে বোস সাহেবের পে-অর্ডারগুলো উপেট-পাণ্টে দেখে। পৃথিবীতে উচ্চতম হারে ট্যাকস কেটে নেওয়া হয় একমাত্র ভারতবর্ষেই। তা ছাড়া অফিস থেকে বোস সাহেবের প্রচুর টাকা অ্যাডভান্স নেওয়া আছে। সেই সব বকেয়া কর এবং অ্যাডভান্স কেটে নেওয়ার পরও বোস সাহেবের অ্যাকাউন্টে বড় কম জমা হয় না। তবু নিশ্চিত হওয়ার জন্য সে টেবিলে ফিরে এসে বোস সাহেবের ব্যক্তিগত আয়করের রিটার্ন যে জমা দেয় সেই মিত্রকে ফোন করল। হুঁ আর একটু ঝুঁচকে গেল তার।

খুব কম করেও জয়েন্ট অ্যাকাউন্টে হাজার দশেক টাকা থাকার কথা। মাস এখনো শেষ হয়নি। দীপনাথ ক্ষান্ত হল না। ফোন করল ব্যাংকে। দীপনাথের খুবই পরিচিত ব্যাংক। বোস সাহেবের হরেক চেক বহুবার জমা দিতে এসেছে। কাজেই সে অনায়াসে জেনে নিতে পারল, বোস সাহেব দিল্লি যাওয়ার পব মণিদীপা কম কবেও তিন হাজার টাকা তুলেছে। মাত্র দু-তিন দিনে। এবং আজই আবার টাকা চাইছে ?

দীপনাথ সমস্যাটা সরিয়ে রেখে অফিসের কাজ টেনে বসল। বোস সাহেবের অনুপস্থিতিতে কার্যত সেই কর্তা।

কাজ করতে করতে হুঁশ ছিল না দীপনাথের। হঠাৎ হাতঘাড় দেখে অবাক হল। বেলা পৌনে পাঁচটা। মণিদীপা এখনো আসেনি। অ্যাকাউন্ট্যান্টকে বলে টাকার ব্যবস্থা করে রেখেছে দীপনাথ। সাড়ে পাঁচটায় অফিস ছুটি।

ক্যাশিয়ারকে ডেকে ভাউচারে সই করে টাকাটা নিজের টেবিলের টানায় রেখে চাবি দিল দীপনাথ। আগে তার এত ক্ষমতা ছিল না, এত স্বাধীনতাও নয়। আজকাল সে নিজের নামে অনেক টাকা অফিস থেকে নিতে পারে। মাইনের সঙ্গে হিসেব করে কেটে নেবে।

মণিদীপার কথা কয়েক মিনিট ভাবল দীপনাথ। তারপর আবার কাজ টেনে বসল।

অফিস ছুটি হয়ে যাওয়ারও প্রায় পনেরো মিনিট বাদে বেয়ারা এসে বলল, মেমসাহেব এসেছেন।

কোথায় ?

করিডোরে।

ভিতরে নিয়ে এসো।

পৌনে ছটা ছাড়িয়ে ছটার দিকে এগিয়ে যাচ্ছে ঘড়ির কাঁটা। দীপনাথ টেবিলের কাণ্ডজে জঞ্জাল সরিয়ে দরজার দিকে চেয়ে অপেক্ষা করছিল। বুক কাঁপছে, গলা শুকোচ্ছে।

খুব ছাপছকরওলা রাজস্থানী ঘাঘরা আর কামিজে রঙের একটা ঘণী তুলে মণিদীপা শূন্য অফিসঘরটায় ঢোকে। চারদিকে মরা টেবিল, প্রাণহীন ক্যাবিনেট, বিসৃঙ্খল কাগজের স্তুপের

ভিতর বসন্তের হাওয়া এল। সঙ্গে সুগন্ধ।

আমার জনাই বসে আছেন? নাকি কাজ ছিল?

কাজ ছিল।

যাক তা হলে বসিয়ে রাখিনি। রাখলে তো দোষ ধবতেন।

ধরতাম। কিন্তু তার চেয়েও খারাপ হত, আমি চলে গেলে আপনি টাকাটা আজ আর পেতেন না।

পেতাম।

কি করে?

আপনি পৌছে দিতেন।

তাই নাকি? কি করে বুঝলেন?

আই নো ইউ। ইউ আর ফেথফুল লাইক এ—

ডগ? বল হাসে দীপনাথ।

ভ্রুকুটি করে মণিদীপা বলে, তাই বলেছি?

বললেও দোষ হত না। কুকুরের কিছু গুণ পেলে মানুষও বর্তে যেত।

এখনো বসতে বলেননি।

বসুন।

মণিদীপা বসে। চোখেমুখে সামান্য টেনশন। চনমন কবছে। রোজ যেমন দেখায় তেমনি ভাল দেখাচ্ছে তাকে। মুখে খুব একটা রঙ মাথেনি। স্নিগ্ধ কোমল মুখশ্রী। একটু গভীর, একটু করুণ।

চা খাবেন? সামনেই একটা ভাল দোকান আছে। বেয়ারা এনে দেবে।

আমার চায়ের নেশা নেই।

তা হলে কি দিয়ে আপ্যায়ন করি আপনাকে?

আপ্যায়ন-টন এখন থাক। আপনি এখন এই অফিসেব একজন বস, তাই না?

ছোটো-মাপের।

বস হতে কেমন লাগে?

মন্দ না।

মণিদীপা সুযোগ পেয়েও কোনো চিমটি কাটল না। এমন কি সেই বিষ হাসিটাও হাসল না। বলতে পারত, একজন বিপ্লবীর মৃত্যু ঘটেছে। জন্ম নিয়েছে একজন শোষণকারী বা ঐ গোছের কিছু।

আপনাকে একটু ডিসটার্বড দেখাচ্ছে।

মণিদীপা চোখ না তুলে বলল, না তো। আপনার বউদি কি বলেছে, এবার বলুন।

বউদি! বলে একটু অবাক হয় দীপনাথ, বউদি কি বলবে?

ঐ যে তখন ফোনে বললেন, বউদি ঠিকই বলে!

বলেছি? ও হ্যাঁ। কিন্তু সে তো বলা যাবে না।

কেন বলা যাবে না?

কথাটা উপ সিক্রেট।

আমি শুনতে চাই।

কেন শুনতে চান?

নাই যদি বলবেন তবে বউদির বেফারেন্স দিলেন কেন?

সাধারণ মেয়েদের গোপন কথা শোনার অনভিপ্রেত কৌতূহল থাকে । কিন্তু আপনি তো সাধারণ নন ।

মণিদীপা একটা কাচের পেপারওয়াটে গ্লাসটপ টেবিলের ওপর কাত করে গড়িয়ে দেয় । ধরে । আবার গড়িয়ে দিয়ে একটু খেলা করে । গোমরা মুখে বলে, কারো আড়ালে তাকে নিয়ে আলোচনা করাটাও তো উচিত নয় ।

যারা আলোচনার যোগ্য তাদের নিয়েই আলোচনা হয় । সাধারণ মানুষকে নিয়ে কে আলোচনা করে বলুন ।

উঃ । বলুন না বউদি কি বলেছেন !

দীপনাথ টেবিলেব ডায়ার খুলে টাকাটা একটা লম্বা খামে ভরে এগিয়ে দেয় । বলে, নিন ।

নেবো না । আগে বলুন ।

দীপনাথ মৃদু হেসে বলে, বউদি বলেছে, তোমার বসের বউয়ের মাথায় একটু ছিট আছে, ঠাকুবপো ।

মোটাই না । আপনার বউদি আপনাকে ঠাকুরপো বলে ডাকেন না, নাম ধরে ডাকেন ।

এতও মনে রেখেছেন ।

মেয়েরা রাখে ।

আপনি কি মেয়ে ?

তবে কি ?

না, না, ঠিক তা বলিনি । দীপনাথ হেসে ফেলে বলে, আমি বলছিলাম, আপনি তো সাধারণ মেয়ে নন । ও সব খুঁটিনাটি লক্ষ করে অতি সাধারণ মেয়েরা, যাদের আই কিউ ভীষণ লো ।

বারবার আমাকে অসাধারণ বলছেন কেন ? আমি কিছু অসাধারণ নই ।

আপনি মনে-প্রাণে প্রৌলোভিত হয়ে তা জানি । কিন্তু ঈশ্বর তো সবাইকে সমান গুণ দিয়ে পৃথিবীতে পাঠাননি । ও রকম অ্যান্টিকমিউনিস্ট দুনিয়ায় দুটো হয় না । আর বোধ হয় তাই কমিউনিস্টরাও অ্যান্টিগড ।

কমিউনিস্টরা অ্যান্টিগড নয় । অ্যান্টিগড হচ্ছে ডেভিল । আমরা ঈশ্বরে বিশ্বাসই করি না, তাই তার অ্যান্টিও হতে পারি না । ঈশ্বরের বিরুদ্ধতা করতে গেলেও তার অস্তিত্ব মানতে হয় ।

ঠিক আছে, ঠিক আছে । বুঝেছি । দীপনাথ হাত তুলে বলে, কিন্তু এটা তো মানবেন দুনিয়ার সবাই সমান নয় । সাধারণ আছে, অসাধারণ আছে ।

মানি । কমিউনিস্টরা তো গাধা নয় ।

আমি সেইটিই বোঝাতে চেষ্টা করছিলাম আপনাকে ।

ঠিক করে বলুন তো, বউদি কি বলেছেন !

আমার বউদি অতি সাধারণ । তিনি তাঁর মতো করে বলেছেন, ও সব আপনার শুনে কাজ নেই ।

মণিদীপা মাথা নেড়ে বলে, আপনার বউদি খুব কমন মহিলা নন । সী নোজ হোয়াট ইজ হোয়াট ।

দীপনাথ বিজ্ঞের মতো হেসে বলে, তা হলে বলছেন বউদি যা বলেছে তা সত্যি ?

না জেনে বলি কি করে ?

অ্যাসাম্পশন থেকে । বউদি নোজ হোয়াট ইজ হোয়াট ।

মণিদীপা ঠোঁট কামড়ে একটু ভেবে বলে, মে বি। আগে তো শুনি।
টাকাটা নিন।

আগে বলুন।

বড্ড জ্বালাচ্ছেন তো ! বউদি কিছু বলেনি। আমি আপনাকে টিজ করছিলাম।

মণিদীপা গাড়ী তীক্ষ্ণ চোখে দীপনাথের দিকে সরাসরি চেয়ে থাকে একটুক্ষণ। তারপর ভ্যানিটি ব্যাগ খুলে এক প্যাকেট দামী বিদেশী সিগারেট আর একটা লাইটার বের করে। সিগারেট ধরিয়ে রাজস্থানী পোশাকের কোমরে একটা ডোরে বাঁধা দুটো চাকতি আয়নার একটা তুলে নিজের মুখটা মন দিয়ে দেখে।

দীপনাথ সামান্য অবাক হয়। মণিদীপাকে সে সিগারেট খেতে আগে দেখেনি। কি বলবে তা ভেবে না পেয়ে একটু চুপ করে থাকে সে। তারপর বলে, এটা কবে থেকে ধরলেন ?

অবাস্তুর প্রশ্ন।

মেয়েদের সিগারেট খেতে দেখলে আমার বিঅ্যাকশন হয়।

আমি মদও খাই।

ভাল করেন না।

বেশ করি।

বউদি ঠিক বলে।

মণিদীপা জ্বালাতন হয়ে চোখ ছোটো করে তাকিয়ে থাকে একটুক্ষণ। তারপর বলে, ইয়ার্কি হচ্ছে ? আজ আমার কিন্তু ইয়ার্কির মূড নেই।

বসের বউ ইয়ার্কির পাত্রী নয়। ইয়ার্কি করাছি না।

আমি কারো বউটুই নই। বউদি কি বলেন ?

বউদি বলেন—বলে দীপনাথ একটু থামে। তারপর আচমকা বলে, বলব। ঠিকই বলব। তার আগে সিগারেটটা ফেলে দিন।

মণিদীপা প্রায় আস্ত সিগারেটটা মেঝেয় ফেলে স্যান্ডালে পিষে দিল। যেন সিগারেটটা ফেলে দেওয়ার একটা ছুতো সে নিজেও খুঁজছিল।

এবারে বলুন।

বলছি, বলছি। আব একটা কথা।

কি ?

প্রমিস করতে হবে, মদও খাবেন না।

মণিদীপা তীক্ষ্ণ চোখে চেয়ে ঝাঁঝালো গলায় বলে, আমাকে কি পেয়েছেন বলুন তো !
অ্যানাদার স্নেড লাইক ইউ ?

ভালোবাসা জিনিসটাই তো স্নেডারি। সেদিক দিয়ে দেখতে গেলে, আপনি আমার না হলেও নিশ্চয়ই আর কারো স্নেড।

অনেক জানেন তো। বলুন তবে কার ?

ধরুন স্নিগ্ধদেব !

স্নিগ্ধদেবের কথায় হঠাৎ মণিদীপা নাক কোঁচকায়। তারপর কয়েকটা ঘন শ্বাস ছেড়ে বলে, স্নিগ্ধর কথা আমি ভুলে যেতে চাই। ও নামটা আর আমার সামনে ম্লীজ উচ্চারণ করবেন না।

বিস্মিত দীপনাথ বলে, সে কি ? স্নিগ্ধদেব কি করলেন হঠাৎ ?

হি ইজ নাউ এ ফলেন গাই।

তার মানে ?

বিশ্বাস করবেন ? স্নিগ্ধদেব আমেরিকায় যাচ্ছে !

দীপনাথ ব্যাপারটা ধরতে পারল না, বলল, তাতে কি ?

তাতে কিছু নয় বুঝি ? আমেরিকান গভর্নমেন্টের টাকায় তাদের স্কলারশিপ নিয়ে ও চল যাচ্ছে। মুখে বলছে, ওখানে গিয়ে মারকিন ট্রেড ইউনিয়ন মুভমেন্ট নিয়ে রিসার্চ করবে। কিন্তু আমি জানি, তা নয়।

আপনি কি জানেন ?

আমি জানি, হি হাজ আবানডনড্ দি রিভোলিউশন। ও যাচ্ছে সুখে থাকবে বলে।

কি করে বুঝলেন ?

স্নিগ্ধদেবকে আমি যত গভীরভাবে বুঝি আর কেউ তা বোঝে না। হি হাজ এ চার্মিং পারসোনালিটি। সবাইকে হিপনোটাইজ করে রাখতে পারে। এ বর্ন লিডার। আমেরিকান এজেন্টরা ওকে সেই কারণেই পিকআপ করেছে।

সি আই এ ?

মে বি। কিন্তু ও এখন সম্পূর্ণ ওদের ট্র্যাপে।

বুদ্ধিমান লোকেরা সহজে ট্র্যাপে পড়ে না মিসেস বোস।

আমি ইডিয়ট নই। জানি, স্নিগ্ধকে কেউ ট্র্যাপে ফেলেনি। বরং ও নিজেই একটা সোনার খাঁচা খুঁজছিল। পেয়ে গেছে।

তা হলে আমাদের কি হবে, মিসেস বোস ?

তার মানে ?

দীপনাথ হতাশার গলায় বলল, আপনার কাছে শুনে শুনে আমিও যে মনে মনে স্নিগ্ধদেবকে আমার লিডার বানিয়েছিলাম। ভেবেছিলাম এই দুর্ভাগ্য দেশে একদিন লেনিন, মাও বা হো চি মিনের মতোই স্নিগ্ধদেব উঠে দাঁড়াবেন।

আবার ইয়ার্কি ?

বলে মণিদীপা দীপনাথের দিকে চেয়ে নিজের ভুল বুঝতে পারল হয়তো। দীপনাথ ইয়ার্কি করছে না। তার মুখে সত্যিকারের এক গভীর হতাশার কালিমা মাখানো। মণিদীপা ঝুকে বসে ব্যগ্রভাবে জিজ্ঞেস করে, আপনার কি হল বলুন তো হঠাৎ ? আর ইউ সিরিয়াস।

দীপনাথ খানিকক্ষণ শূন্য চোখে মণিদীপার দিকে চেয়ে থাকে। তারপর ধীরে ধীরে মাথা নেড়ে বলে, অতটা না হলেও স্নিগ্ধদেব যে একজন মহৎ মানুষ ছিলেন তা আপনার ডিভোশন দেখেই মনে হয়েছিল। ওর যদি পতন হয়ে থাকে তবে সেটা আমাদের সকলের কাছেই দুঃখের ব্যাপার। বিশেষত আপনার কিছুই রইল না।

আমার কেন কিছুই থাকবে না ! স্নিগ্ধ আমার কে ?

হয়তো লিডার। হয়তো লিডারের চেয়েও বেশী কিছু। অন্তত ঐ একটা জায়গায় আপনার ডিভোশনের কোনো খীকতি ছিল না।

ঠোট উটে মণিদীপা বলল, আমরা ব্যক্তিপূজায় বিশ্বাসী নই। এক স্নিগ্ধ মারকিনদের দালাল হয়ে গেল তো কি ! আরো হাজার স্নিগ্ধদের আসবে।

মাথা নেড়ে দীপনাথ বলে, অত সোজা নয়। আপনিও সেটা জানেন।

বলেছি তো আমি ব্যক্তিপূজায় বিশ্বাসী নই। ব্যক্তিগত মেধা বা ব্যক্তিত্বেরও কোনো মূল্য নেই যদি তা বিপ্লবের কাজে না লাগে। স্নিগ্ধদেব এখন আমার কাছে নন-এনটিটি।

উনি কবে রওনা হচ্ছেন ?

আসছে সপ্তাহে ।

ওঁর সঙ্গে একবার দেখা হতে পারে ?

কি জানি ! শুনেছি দিল্লি গেছে । সেখান থেকে ফিরে এসেই বউ-বাচ্চা নিয়ে পোটলা-পুটলি বেঁধে রওনা হবে ।

স্নিগ্ধদেব কি ইদানীং আপনার কাছে টাকা চাইতেন ?

একটু অবাক হয়ে মণিদীপা বলে, চাইত । কিন্তু আপনি জানলেন কি করে ?

এমনি কৌতুহল ।

মণিদীপা গভীর হয়ে টেবিলের কাছে আঙুল দিয়ে নকশা আঁকার চেষ্টা করতে করতে বলে, চাইত অবশ্য ধার হিসেবে । ওব কিছু গবম জামাকাপড দবকাব বিদেশে যাওয়াব জন্য ।

পাণি ফান্ডেও আপনার কিছু কনট্রিবিউশন আছে বোধ হয় ?

হ্যাঁ এ সব কথা কেন ?

এমনি, মিসেস বোস ।

আপনার কৌতুহল ঠিক মেয়েদের মতোই ।

তা হবে । ইচ্ছে না হলে জবাব দেবেন না ।

এ সব প্রসঙ্গ ভাল লাগে না । আই হেট টু টক অ্যাবাউট মানি । টাকা শুধু আমার কিছু পাবপাস সারভ কববে, তা বলে আমার ইনটেলেক্টকে দখল করবে না ।

তা ঠিক ।

এবার বলুন বউদি কি বলেছেন ?

বউদি বলেছে, আপনি একজন চমৎকার মানুষ ।

মিথ্যে কথা ।

বউদি বলেছে, আপনি লোক তত ভাল নন ।

এটাও বাজে কথা ।

দীপনাথ মুখ বিকৃত করে বলে, তা হলে একদিন বউদিকে গিয়ে জিজ্ঞেস করলেই তো হয় !

কবে নিয়ে যাবেন বলুন । আমি এক্ষুনিই যেতে রাজি । বলাতে বলাতে উঠে দাঁড়িয়েছিল মণিদীপা ।

দীপনাথ অবাক হয়ে বলে, এক্ষুনি যাবেন ? পাগল নাকি ।

মণিদীপা আবার বসে পড়ে । হতাশার গলায় বলে, কলকাতায় এখন একা আমার অসহ্য লাগছে । ইট বার্নস্ । বিশেষত আফটার স্নিগ্ধ'জ বিট্রিয়াল ।

আমেরিকায় গেলেই কি বিপ্লবী মরে যায় ? বরং তার বেস অনেক ব্রড হয় ।

কিন্তু স্নিগ্ধ সেভাবে যাচ্ছে না । হি হাজ সোলড্ হিমসেলফ্, আই নো । স্নিগ্ধর অ্যাকাডেমিক ক্যারিয়ার ছিল অসম্ভব ব্রিলিয়ান্ট । ইচ্ছে করলে ও এমনিতেও সুখে জীবন কাটাতে পারত ।

দীপনাথ একটা সত্যিকারের দুঃখের দীর্ঘশ্বাস ছাড়ল । তারও কি মনে মনে আশা ছিল না, স্নিগ্ধদেবই একদিন সাধারণের অরণ্য থেকে মহীরূহের মতো মাথা তুলুন ! সে বলল, আমরা আর একজন স্নিগ্ধদেবকে বানিয়ে নেবো মিসেস বোস । ভাববেন না ।

মণিদীপা মাথা নত রেখেই বলল, সেটা আমি জানি ।

তা হলে জ্বলছেন কেন ?

মানুষ বিট্ট করলে রাগ হবে না ? বলে হঠাৎ একটু হেসে মণিদীপা বলে. আপনি এ রকম অদ্ভুত লোক কেন বলুন তো !

কেন, কি করলাম ?

আমার মুখে শুনে আপনি স্নিগ্ধকে আপনার লিডার বানিয়েছিলেন ? সত্যি ?

ভীষণ সত্যি ।

যাঃ । প্লিজ আপনি আব কখনো ৬ বকম করবেন না ।

কেন ?

আপনাকে মানায় না । একটু মাথা উচু করে থাকতে শিখুন তো ! যাকে তাকে নেতা বানাবেন কেন ?

স্নিগ্ধদেব কি যে-সে ?

একদম যে-সে । আপনি আপনার মতো থাকবেন ।

কেন, স্নিগ্ধকে নেতা বলে মানলে কি আমি ছোটো হয়ে যাবো মিসেস বোস ?

হ্যাঁ, যাবেন ।

আমি তো এমনিতেই ছোটো । স্নেহ ।

মোটাই না ।

আপনিই তো বলতেন ।

গাট্টা করতাম । আই নো ইউ টু বি এ ভেরি গুড ম্যান । বোস সাহেবকে আপনি ছাড়েননি কেবল মায়া করে ।

এটা কি কমপ্লিমেন্ট ?

তাই মনে করুন । বউদির কাছে কবে নিয়ে যাবেন ?

বোস সাহেব আসুন, তারপর ।

কেন ?

ভারচুয়ালি আমিই এখন অফিস চালাচ্ছি । তা ছাড়া বোস সাহেবের অনুমতি না নিয়ে তার বউকে অন্য জায়গায় নিয়ে গেলে লোকে কি বলবে ?

আর একদিনও তো নিয়ে গিয়েছিলেন । অনুমতি নিয়েছিলেন কি ?

তখন ছিল অন্য রকম । দীপনাথ হাসিমুখে বলে ।

॥ চ্যাপ্লিন ॥

বেয়ারাকে কিছু বলতে হয়নি । বোস সাহেবের বউকে সে চেনে । নিঃশব্দে এসে এক পট কফি আর দুটো কাপ সমেত ট্রে টেবিলে রেখে কফি ঢেলে দিল । দুটো করে চিনির কিউব, গরম দুধ ।

কফিটা আনমনে চামচে নাড়তে নাড়তে মণিদীপা বলে, বাইরে বৃষ্টি নামল ।

হবে । বৃষ্টির সিজনি তো এটা ।

তা জানি । আপনি আমার সব কথাতেই জবাব দেন কেন বলুন তো !

দিতে নেই বুঝি ? বসের ওয়াইফ বলে ?

মণিদীপা ক্রুদ্ধ চোখে তাকায় । তারপর সামান্য চড়া গলায় বলে, আপনি আমাকে কখনো সিরিয়াসলি নেন না ! না ?

আপনার ব্যাপারে আমি এবং আমরা সবাই খুব সিরিয়াস।

আমরাটা আবার কে ?

আমি বা বোস সাহেব, অর্থাৎ জনগণ আর কি।

আজ আমার ইয়ার্কি ভাল লাগছে না। আই হ্যাভ লস্ট এ ফ্রেন্ড, ইউ নো !

শুধু ফ্রেন্ড নয় মিসেস বোস। স্নিগ্ধদেব ছিলেন আপনার আইডিয়া, আপনার ড্রিম, আপনার নেতা। কিন্তু লস্টা আপনার একার নয়। আমারও, অর্থাৎ জনগণেরও। আমি তো ভাবতাম, উনিশশো নব্বই সালে স্নিগ্ধদেবই হবেন ভারতের প্রধানমন্ত্রী।

একটু আগেই আপনি স্নিগ্ধদেব সম্পর্কে খুব সিরিয়াস ছিলেন। আবার এক্ষুনি লাইট হয়ে গেলেন ! আপনার পারসোনালিটি এত ফ্লাকচুয়েট করে কেন বলুন তো।

করে ?

নিশ্চয়ই করে।

দীপনাথ মুখখানা আঁশটে করে বলে, আমার পপুলারিটির পারদ নেমে যাচ্ছে দেখছি।

মণিদীপা আর একবার সিগারেটের প্যাকেটের ঢাকনা খুলেও থামল। হুঁ কুঁচকে বলল, আপনি হয়তো জানেন না, যাদের পারসোনালিটি থাকে না তারাও পপুলার হতে পারে। পারসোনালিটি নেই বলেই তারা অন্যের যে কোনো কথায় অনায়াসে সাই দিয়ে যায়, অন্যের হয়ে খামোকা খাটে, চাটুকরিভা করে, খোশামোদ করে। ওভাবেও পপুলারিটি গেন করা সম্ভব। আপনি যেমন ভাবে করেছেন।

বহুকাল পর আবার কান-মাথা গরম হল দীপনাথের। মণিদীপার মার কোন দিক থেকে আসবে তা সে জানত না। খুব গভীরে আহত হয় দীপনাথ। আহত হয়, তার কারণ মণিদীপা খুব মিথ্যে বলেনি। কখনো কখনো তো সত্যিকারেরই চাটুকার, খোশামুদে। নিজের মতামত, ইচ্ছে-অনিচ্ছে প্রকাশে ভীক ;

ক্লিষ্ট মুখ তুলে দীপনাথ বলে, জনগণের কি কোনো পাবসোনালিটি থাকে ?

মণিদীপা জয়ের গন্ধ পেয়ে একটু ঝুঁকে তীব্র স্বরে বলে, আপনি যে জনগণেরই একজন সেরা সংভাবে একবারও বিশ্বাস করেন কি ? জনগণের কেউই তা করে না। তারা ভাবে, আমি ছাড়া আর সবাই জনগণ, সাধারণ অ্যাভারেজ। যেদিন আপনি নিজেকে সত্যিই সাধারণ মানুষদের একজন ভাবতে পাবেন সেদিন লোকে আপনাকে অসাধারণ বলে স্বীকার করবে।

দীপনাথ মনে মনে তারিফ করল। এটাও নিখুঁত মার। সে পুনর্বার আহত।

তবে প্রত্যাঘাতের জন্য ব্যস্ত হল না দীপনাথ। নরম চোখে তাকিয়ে থেকে বলল, আপনি কি আমার বিবেক, কাউন্টার ইগো ? যাত্রাদলের বিবেকের মতো এসে মাঝে মাঝে জীবনের সত্যগুলিকে চিনিয়ে দিয়ে যান !

মণিদীপার প্লেটে কাপ রাখার শব্দটা একটু জোরালো শোনাল। উঠে দাঁড়িয়ে বলল, টাকাটা দিন !

দীপনাথ কথা বাড়াতে সাহস করল না। টাকাটা টেবিলের ওপর নিঃশব্দে রাখল।

হুঁ কুঁচকে মণিদীপা বলে, কোনো ভাউচারে সই করতে হবে না ?

দীপনাথ মাথা নাড়ল। না।

অফিসের টাকা দিতে ভাউচার লাগে না ?

লাগে। কিন্তু অত কথায় কাজ কি ?

মণিদীপা ঠোট ওণ্টাল, কাঁধ ঝাঁকাল। তারপর চটপটে পায়ে বেরিয়ে গেল, একটিও

কথা না বলে ।

সারা অফিসটাই ফাঁকা, নিস্তব্ধ হয়ে গেল ।

দীপনাথ কিছুক্ষণ সামনে চেয়ে রইল । এ কথা সত্য, তার ব্যক্তিত্বের তেমন জোর নেই, না আছে স্বাধীন মত প্রকাশের সাহস । প্রায় সকলেই তাকে পছন্দ করে বটে, কিন্তু কেউই তাকে খুব ইম্পর্ট্যান্ট মনে করে না । শুধু এই সেদিন, মেজবউদি বলেছিল, দীপনাথকে তার প্রয়োজন । ঠিক ও রকমভাবে দীপনাথকে আর একজনও গুরুত্ব দিয়েছিল । সে হল বোস সাহেব । বাংগালোরে নিয়ে যাওয়ার জন্য ঝুলোঝুলি ।

কিন্তু এ সব কথা ভেবে কি হবে ? সে যা সে ঠিক তাই । কেউ তো তাকে শেখায়নি কি করে ব্যক্তিত্ব তৈরি করতে হয় । কেউ তো তাকে হাতে ধরে শেখায়নি জীবনযাপনের পদ্ধতি । আজ তার মনে হয়, যে ভাবে ছেলেবেলায় তাঁকে এক দুই বা অ আ ক খ শেখানো হয়েছিল, ঠিক তেমনি করে আজ এই জীবনযাপনের পাঠ কেউ শিখিয়ে দিলে বড় ভাল হত ।

আস্তে আস্তে রাত বাড়ছে । বাইরে ঝুম হয়ে এল বৃষ্টি । দীপনাথ আবার কাগজপত্র টেনে বসে বকেয়া কাজ সেরে রাখতে লাগল । মাঝে মাঝে অন্যমনস্কতা এল, ক্লান্তি লাগল, হাই উঠল । তবু ঠায় রাত পৌনে আটটা পর্যন্ত টেবিলে রইল সে ।

তারপর বেয়ারাকে ডেকে অফিস বন্ধ করতে বলে ধীরে ধীরে নেমে এল নীচে । বৃষ্টির জোর কমে এসেছে । রাস্তাঘাট ফাঁকা । ইদানীং অফিসপাড়াটা রাতের দিকে খুব নিরাপদ নয় । নির্জন রাস্তায় একা মানুষকে পেলে একদল ছেলেছোকরা প্রায়ই চুরি ছিনতাই করে । তাই ঘড়িটা খুলে প্যাণ্টের পকেটে ঢুকিয়ে রাখল দীপনাথ ।

চারদিকে দেখে রাস্তায় নেমে কয়েক পা হাঁটতেই পি করে একটা হর্নের শব্দ । দীপনাথ বেখেয়ালে ফিরে তাকাল । তাকিয়েই একটু চমকে উঠল ।

কালো ছোটো গাড়িটার ড্রাইভিং সীটে মণিদীপা বসে আছে না ! একটা সিগারেটের আগুন একটু ধিঁয়ে উঠেই মিঁয়ে গেল ।

দীপনাথ এগিয়ে জানালায় ঝুঁকে বলে, কাজটা ভাল করেননি । এ পাড়াটা এত রাতে খুব বিপজ্জনক । সঙ্গে অতগুলো টাকা রয়েছে ।

আই ক্যান লুক আফটার মিসেলফ্ ।

ওটা বৃথা অহংকারেব কথা মিসেস বোস । এই দেশে কোনো সক্ষম পুরুষও নিজের সিকিউরিটির গ্যারান্টি দিতে পারে না, মেয়েরা তো কোন ছার ।

আপনি গাড়িতে উঠুন । পৌঁছে দিচ্ছি ।

ও বাবা । আমি থাকি শেয়ালদার কাছে । সেখানে রোজ খুব সাজঘাতিক রকমের জ্যাম হয় । অবলা* মেয়েমানুষ আপনি, গিয়ে মুশকিলে পড়বেন ।

নাইনটিনথ্ সেঞ্চুরির ভাষায় কথা বলবেন না তো ! আপনার সঙ্গে আমার একটা জরুরী দরকার আছে । উঠুন ।

অপেক্ষাই যদি করলেন তা হলে তো ওপরেই বসে থাকতে পারতেন ।

পারতাম । কিন্তু অত কথায় কাজ কি ?

দীপনাথ টোক গিলে সামনের সীটে মণিদীপার পাশে উঠে বসল ।

গাড়ি ছেড়ে মণিদীপা দাঁতে দাঁত পিষে বলে, আমি অবলা ? না আপনি অবলা ?

আমিই বোধ হয় । যাক সে কথা । কী বলছিলেন ?

মণিদীপা মোটেই দীপনাথের আস্তানার দিকে গাড়ি ঘোরাল না। সোজা এসপ্লানেডের দিকে যেতে যেতে বলল, আই ওয়াস্ট টু নো অ্যাবাউট দি মানি।

দীপনাথ ভিতরে ভিতরে অস্বস্তিতে পড়ে যায়। মৃদুস্বরে বলে, কিছু গোলমাল নেই মিসেস বোস। পরিষ্কার হোয়াইট মানি।

সে কথা নয়। টাকাটা কার?

তার মানে?

টাকাটা নিয়ে চলে আসতে আসতে আমি ভাবছিলাম মিষ্টার বোসের অ্যাবসেনসে তার অফিসেব অ্যাকাউন্ট থেকে আর কেউ টাকা তুলতে পারে কিনা। ভেবে মনে হল, তা সম্ভব নয়। আমি অবশ্য আইনকানুন জানি না, তবু মনে হল। তাই ভাবলুম, এ টাকাটা কার? আপনার নয় তো।

আরে না। বোস সাহেবেরই টাকা। অফিসের আইন যেমন আছে তেমনি ফাঁকও আছে।

এক্ষেত্রে আমার অন্য রকম সন্দেহ হচ্ছে। ইউ আর জাস্ট হ্যাভিং পিটি অন মি।

মোটেই নয় মিসেস বোস।

আবার মিসেস বোস?

জিবে এসে যায়, কি করব?

ইউ আব এ প্লেভ। মৃদু প্রশ্নের হাসি হেসে মণিদীপা বলে।

তাই তো। একটু আগেই জানতে পাবলাম যে আমি ব্যক্তিগতহীনও।

আর আমিও জানতে পারলাম যে, আমি আপনার কাউন্টার ইগো।

তাতে রাগ কবেছেন?

না তো! বরং শুনে আমাব পরম আনন্দ হয়েছে।

আর বলব না।

মণিদীপা একবার ঘুরে তাকাল। চোখ হাসছে, মুখ হাসছে। সত্যিকারের আনন্দ দেখলেই বোঝা যায়। বলল, টাকাটা আপনার। আই অ্যাম সিওর।

সন্দেহ থাকলে কাল আমাদের অ্যাকাউন্ট্যান্টকে ফোনে জিজ্ঞেস করে দেখবেন।

তাতে লাভ নেই। আমি ফোন করার আগে আপনি অ্যাকাউন্ট্যান্টকে শিখিয়ে পড়িয়ে রাখবেন।

আপনি সন্দেহ বাতীকগ্ৰস্ত।

সন্দেহের পিছনে কারণ আছে।

বোস সাহেবেরই টাকা। আমি তো জানি, আপনি স্বামীর অর্জিত টাকা ছাড়া অন্য টাকা জৌবেন না। ইউ আর এ লয়াল ওয়াইফ।

এটা আবার কোন দেশী ইয়ার্কি?

ইয়ার্কি নয়।

ওলড কোর্ট হাউস স্ট্রিট ধরে মণিদীপা গাড়িখানা আস্তে চালিয়ে ময়দানে এসে পড়ে। তারপর ছুঁ করে চালাতে থাকে। কিছুক্ষণ কথা বলে না মণিদীপা। দীপনাথও চুপ করে থাকে। যদিও সে জানে মণিদীপা তাকে কোথাও পৌঁছে দিচ্ছে না। শুধু নিয়ে যাচ্ছে। কোথায়, তা হয়তো মণিদীপাও জানে না।

খুব মৃদুস্বরে, প্রায় নিজে থেকে শুনিয়ে দীপনাথ বলে, আর কত দূরে নিয়ে যাবে মোরে...

মৃদু হলেও মণিদীপা বোধ হয় শোনে। মুখ না ঘুরিয়েই বলে, আমি কিন্তু সুন্দরী নই।

আপনি দারুণ সুন্দরী। কে বলে সুন্দরী নন ?

হলেও আই ডেন্ট কেয়ার। সুন্দর ব্যাপারটাই স্কিন ডীপ !

তা হবে। আমি শুধু সত্যি কথাটা জানিয়ে দিলাম।

মণিদীপা আবার বহুক্ষণ জবাব দিল না। ময়দানের অঙ্ককার চিহ্নে ভেজা রাস্তায় চোখে ধাঁধা লাগিয়ে ছুটে আসছে গাড়ি। বৃষ্টির চিকন কাচে আলোর রেণু ছড়িয়ে পড়ছে। হেডলাইট ঘিরে অপ্রাকৃত আলোর বলয়। এক রকম মন্দ লাগে না দীপনাথের। বিদেশী এক সেন্ট ছোটো গাড়ির মধ্যে ভারী ঘন হয়ে এক মায়ার সৃষ্টি করেছে। এত সুন্দর সব গন্ধ মাঝে মণিদীপা !

এক-একবার গাড়ির অঙ্ককার অভ্যস্তরে চলমান গাড়ির আলো এসে পড়ে আর উদ্ভাসিত হয়ে ওঠে মণিদীপার মুখ। এখন মণিদীপার মুখে একটু আগেকার সেই ঝলমলে হাসির কোনো রেশ নেই।

মণিদীপা একবারও আর ফিরে তাকায় না তার দিকে। শুধু একবার বলে, আপনার মাথার চুলে বৃষ্টির জল লেগে আছে। গ্লাভস কমপার্টমেন্টে একটা পরিষ্কার ঝাড়ন আছে। মুছে নিন।

দরকার নেই। আপনা থেকেই শুকিয়ে যাবে।

আর কোনো কথা হল না অনেকক্ষণ।

দীপনাথ ভেবেছিল, মণিদীপা নিউ আলিপুরের ফ্ল্যাটেই নিয়ে যাচ্ছে তাকে। কিন্তু তা নয়। খিদিরপুরের ঘিঞ্জি ও নোংরা পাড়ায় একটা দু নম্বরী চেহারার রেস্টুরেন্টের সামনে গাড়ি দাঁড় করিয়ে মণিদীপা নামল। বলল, আসুন।

এখানে কোথায় ? বলতে বলতে দীপনাথ সন্দিহান ভাবভঙ্গী করে নামে।

গাড়ি লক করে মণিদীপা খুবই অভ্যস্ত পায়ে রেস্টুরেন্টে ঢোকে। পিছনে দীপনাথ।

ম্যাডম্যাডে হলুদ রঙের এম্বো-খোঁড়ো দেয়ালের লম্বা সরু একখানা ঘর। ঢোকান মুখেই মস্ত উনুনে শিক-কাবাব সৈকা হচ্ছে। কাঁচা পেঁয়াজ এবং মশলাদার রান্নার খুব চড়া গন্ধ। তন্দুরে রুটি হচ্ছে। ভীড় বেশী নেই। যারা এনামেলের প্লেট থেকে রগরগে মাংসের কাই মেখে মাংসের টুকরোয় জড়িয়ে হালুম হালুম খাচ্ছে তারা নিঃসন্দেহেই খালাসী শ্রেণীর লোক। এদের জাত-টাত নেই। সব একাকার, একরকম। দরিদ্র, লোভী, ক্ষুধার্ত, হিংস্র এবং ক্রুদ্ধ। সেই সঙ্গে ওপরতলার লোক সম্পর্কে সন্দিহান, দ্বিধাগ্রস্ত এবং ভীত। চোর চোখে একটা আধবুড়ো পাঠানী চেহাবার কালো লোক দুজনকে খুব দেখছিল।

মণিদীপা অবশ্য খুবই সহজভাবে গিয়ে একটা টেবিলের দখল নেয়। কাঠের ময়লা আবরণহীন টেবিল। ভেজা স্যাঁস্যাঁতে ভাব। মণিদীপা একটা রুমালে মুখ থেকে সামান্য বৃষ্টির ফোঁটা মুছে বলে, আমি মাঝে মাঝেই এখানে ডিনার সেরে যাই।

কেন ?

এমনি। ভাল লাগে।

পাবলিক রিলেশন ?

আই লাইক দিজ মেন। আই লাইক দিস এনভিরনমেন্ট।

দীপনাথ একটা দীর্ঘশ্বাস ছাড়ল।

রেস্টুরেন্টটা খালাসী মার্কা হলেও খাবার খুব খারাপ নয়। রুটি আর চাপ মুখে দিয়ে সেটা টের পায় দীপনাথ। একটু সন্তুষ্ট হয়ে বলে, মাংসটা কিসের ?

গরু নয়। খাসী।

গরু কিনা তা জিজ্ঞেস করিনি।

মণিদীপা মৃদু শ্লেষের হাসি হেসে বলে, আমার প্রেজুডিস নেই, কিন্তু আপনার তো থাকতে পারে।

দীপনাথের তেমন খিদে ছিল না। স্নাতকভাবে গ্রাসটা মুখে নাড়াচাড়া করতে করতে বলে, আমার আছে। এ-দেশের গরুর মাংস খুব হাইজিনিক না হওয়ারই কথা।

এ-দেশের কিছুই হাইজিনিক নয়। কিন্তু তাতে কি? গরীবরা তো বেচে আছে। আপনি দেশের সব গরীবকে নিয়ে ভাবেন, শুধু একজন গরীব ছাড়া।

সে কে? আপনি?

মাথা নেড়ে দীপনাথ বলে, না। বোস সাহেব।

বোস সাহেব গরীব নাকি?

দীপনাথ আবার মাথা নেড়ে বলে, অ্যাপারেন্টলি নয়। কিন্তু আজ ঔর ব্যাংকে ফোন করে যা জনলাম তাতে মনে হয় বোস সাহেব মানিটারিলি খুব ভাল অবস্থায় নেই।

উদাসভাবে মণিদীপা বলে, তার আমি কি করব?

কিছুই নয়। শুধু একজন গরীবের কথা আপনাকে স্মরণ করিয়ে দিলাম।

মণিদীপাও তার খাবার নাড়াচাড়া করছিল মাত্র। ঐভাবেই আরো কিছুক্ষণ বোস থেকে হঠাৎ রুমালে হাত মুছে উঠে পড়ল।

চলুন।

আবার কোথায়?

আঃ, অত প্রশ্ন কবেন কেন?

মণিদীপার ভিতরকাব ছটফটানি খুব স্পষ্ট টেব পাচ্ছিল দীপনাথ। কিসের কামড় তা বুঝতে পারছিল না অবশ্য।

মণিদীপা আবার গাড়ি ছাড়ল। এবার নাক বরাবর সোজা এসে থামল নিজের ফ্ল্যাটবাড়ির সামনে। দীপনাথ নিশ্চিন্তির শ্বাস ছাড়ল।

মণিদীপা ঘরে ঢুকে ব্যাগটা সোফায় ছুড়ে ফেলে ডাইনিং হলে গিয়ে ঢুকল। দীপনাথ বসে রইল বাইরের ঘরের সোফায়। শুনতে পেল মণিদীপা দিল্লিতে ট্রাংক কল বুক কবছে পাশের ঘরে।

তারপর খানিকক্ষণ নিস্তরতা। তাব মধ্যেই রাধুনী কফি দিয়ে গেছে, দীপনাথ একটা পুবোনো ন্যাশনাল জিওগ্রাফিকের সিকি ভাগ ছবি মুগ্ধ চোখে দেখে ফেলেছে।

এ সময়ে ঘরোয়া ছাপা শাড়ি পরে মণিদীপা এসে সামনে বসল। বলল, আপনাকে একটু বসতে হবে। আমি দিল্লিতে বোস সাহেবকে কনটাক্ট করছি। অস্তুত ততক্ষণ।

হঠাৎ গরীবকে মনে পড়ল যে!

আই ওয়াস্ট টু টিচ হিম এ লেসন।

ও বাবা। টেলিফোনেও ঝগড়া করবেন নাকি?

আমরা ঝগড়া-টগড়া করি না। নো শাউটিং বাট উই হ্যাভ আওয়ার ওয়ে অফ কমিউনিকেশন।

দীপনাথ মৃদু হাসে। মণিদীপা ভারী ছেলেমানুষ।

দিল্লির লাইন পেতে খুব একটা দেরী হয় না। টেলিফোন বেজে উঠতেই ছুটে যায় মণিদীপা। দীপনাথও নিঃশব্দে উঠে গিয়ে মণিদীপার পাশে দাঁড়াল।

মণিদীপা বোস সাহেবকে ফোনে ধরতে পেরেছে। একতরফা মণিদীপারই কথা শুনতে

পাচ্ছিল দীপনাথ : শোনো, আমি মগি বলছি। আই অ্যাম সরি, ব্যাংকে টাকাগুলো সব তুলতে হয়েছে। আমার হাতে আর একদম টাকা নেই। ...না, হারায়নি। তুমি এলে সব বলব। ...আঃ, শোনো না ! দেয়ার ইজ এ সিরিয়াস ম্যাটার। আমি তোমার অফিস থেকে টাকা অ্যাডভান্স চেয়েছিলাম। ...কি বললে ? ...হ্যাঁ, মিস্টার চ্যাটার্জির কাছেই। ...অ্যাঁ ? টাকাটা চাইতেই উনি দিয়ে দিলেন। কিন্তু বুঝতে পারছি না হাউ ইজ ইট পসিবল। ...বলো। ...বলছি তো সিরিয়াস ট্রাবলে না পড়লে অফিসে জানাতাম না। তুমি এলে সব বলব। ফোনে কি বলা যায় ! ...ইজ ইট অলরাইট দেন ? ...ওঁকে আমি বাসায় ধরে এনেছি। কিছু বলবে ? ...আচ্ছা, ছাড়ছি।

দীপনাথ নিঃশব্দে সরে এসে সোফায় বসে।

মগিদীপা যখন পর্দা সরিয়ে বাইরের ঘরে এল তখন তার মূর্খ কৌটুকানো। মুখ গম্ভীর।

দীপনাথ মৃদুস্বরে বলে, কথা বললেন ?

ইউ আর এ লায়ার।

কেন ?

ও টাকা বোস সাহেবের নয়।

তাতে কি ? টাকার গায়ে তো নাম লেখা থাকে না।

কিন্তু আপনিই না একটু আগে বলছিলেন, আমি অন্যের টাকা ছুঁতে যেম্মা পাই !

দীপনাথ আন্তরিক দুঃখের গলায় বলে, আপনাকে শাস্ত করার জন্য বলেছি। ওটা নিয়ে ভাববেন না। স্টিল নাউ আই ও ইউ ফিফটি পয়সা।

বলতে বলতে দীপনাথ তার মানিবাগ বের করে একটা আধূলি সেন্টার টেবিলে রাখল। বলল, কুইট্‌স্‌।

নো কুইট্‌স্‌। আপনি আমাদের কাছে হাজার টাকা পান।

বলতে বলতে মগিদীপা তার এলো চুলগুলো একটা গার্ডারে আটকে সামনে বসল।

দীপনাথ মৃদুস্বরে বলল, এ সব প্রসঙ্গ থাক।

মগিদীপা মৃদু হেসে বলে, উড ইউ বিলিভ ? আমি কিন্তু সত্যিই অন্যের টাকা ছুঁতে যেম্মা পাই। আমি বোস সাহেব ছাড়া ম্যারেড লাইফে অন্য কারো টাকা নেওয়ার কথা ভাবতেই পারিনি। আপনার টাকাটা তাই ফেব্রু দিতাম। কিন্তু বোস সাহেব অ্যাপ্রুভ কবেছে বলে নিচ্ছি।

দীপনাথের বুকের মধ্যে একটা অদ্ভুত আনন্দ ঠেলাঠেলি করতে থাকে। এতদিনে ! অবশেষে ! “হররে” বলে তার চোঁচিয়ে উঠতে ইচ্ছে করে। সেই সঙ্গে একটা বিরহের জ্বালাও খামচে ধরে বুক। হরষে বিষাদ কথাটা বছবার পেয়েছে। আজই প্রথম হরষে বিষাদ কাকে বলে তা বুঝল।

পরিপূর্ণ চোখে মগিদীপার দিকে চেয়ে দীপনাথ বলে, আজ তা হলে চলি মগিদীপা।

মগিদীপা একটু অবাক হয়ে বলে, তা হলে বোল ফুটল ?

ফুটল। আজ জেনে গেলাম আপনি সুখী হবেন। আপনি মানে আপনারা।

মগিদীপা উঠে পিছনে আসতে আসতে বলে, একজিটটা একটু ড্রামাটিক হয়ে যাচ্ছে না কি ?

হোক, হোক। জীবনে একটু নাটক থাকা ভাল।

ইয়াকি হচ্ছে ? বসুন, এখানে ডিনার খেয়ে যাবেন।

ডিনার খাওয়ালেন যে, দোকানে ! মনে নেই ?

সেকি খাওয়া বলে ?

তা হোক । আজ আর একটা ভোজে দিল খুশ হয়ে আছে । অন্য ভোজের দরকার নেই ।

॥ পঁয়তাল্লিশ ॥

পুরোনো গোয়ালঘরটা ফাঁকা পড়ে থাকে । তুষা ইদানীং কয়েকটা খুব ভাল জাতের গরু কিনেছে । পাকা লম্বা ব্যারাক বাড়ির মতো নতুন গোয়ালঘর তুলেছে । সূক্ষ্ম জালের পাল্লা বসিয়ে জানলা দরজা দিয়ে মশা ঢোকার পথ বন্ধ করা হয়েছে । গরু দেখাশোনা করার জন্য আরো দুটো লোক এসেছে ।

সজল কাউকে কিছু না বলে এক ছুটির দিনে সকালে পুরোনো গোয়ালঘরটায় গিয়ে ঢুকল । সঙ্গে বেজী, হাতে লাঠি ।

মাটির ভিটিতে এর মধ্যেই হরেকরকম গর্ত তৈরি হয়েছে, জঞ্জাল জমেছে । বাইরে থেকে লতানে গাছ এসে উঁকি ঝুকি মারছে জানলা-দরজা দিয়ে । বিদ্রী একটা ভাপসা গন্ধ আর পোকামাকড়ের ঘিনঘিনে আওয়াজ । সজল সিলিং-এর কাঠের বীমগুলো দেখছিল । বেশ মজবুত ।

বেজীটা তড়াক করে একটা লাফ দেওয়ায় সজল চকিতে চোখ নামায় । একটা গর্তের মুখে সরু একটা মুখ উঁকি দিয়েই ডুব দিল । সাপ । সজল জানে, এ ঘরে সাপ থাকবেই । বেজীটা এখনো বাচ্চা, বোধ হয় সাপের সঙ্গে লড়াতে শেখেনি । সজল তাই উদাত্ত বেজীটাকে হাতে তুলে নিয়ে ঘরের বাইরে ছেড়ে দরজা বন্ধ করে দিল ভিতর থেকে । তার লাঠির ডগায় একটা লোহার ফলা পরানো আছে । নিঃশব্দে সে গর্তটার কাছে গিয়ে উঁকি দিল ভিতরে । অন্ধকারে তেমন কিছু দেখা যায় না, সে ভুসভুসে মাটির মধ্যে ফলাটা চালিয়ে গর্তের মুখটা বড় করতে থাকে ।

গর্তটা তেমন গভীর ছিল না । মুখটা বড় হতেই সে ভিতরে চিকরিমিকরি দেখতে পেল । গোখরো । মাথা তুলছে না ভয়ে । ওরাও তো মরণ টের পায় ।

সজল দাঁড়িয়ে একটু ঝুঁকে খুব সাবধানে গর্তের মধ্যে ফলাটা চালিয়ে দিল বার কয়েক । ভিতরে তর্জন গর্জন চলল কিছুক্ষণ । তারপর নিথরতা । সাপটাকে গর্ত থেকে তুলল না সজল । ওপর থেকে মাটি চাপা দিয়ে বন্ধ করে দিল ।

নিজেই একটা বাঁটা এনে ঘরটা যতদূর সম্ভব সাফ করল । একটা মস্ত বস্তায় বালি ভরে তৈরি রেখেছিল সে । ক্ষাপা নিতাই আর সে ধরাধরি করে এনে সেটাকে সিলিং-এ দড়ি দিয়ে ঝুলিয়ে দিল ।

কাজ শেষ হলে নিতাই কপালের ঘাম মুছে বলে, কাণ্ড বাপু তোমার । গায়ের জোর করে হবোটা কি শুনি ? জোর হল মস্তরের । এই দেখ না, আমার যে রোগা জিরজিরে শরীর, তবু সাতখানা গায়ের লোক আমায় দেখলে পথ ছেড়ে দেয় । মস্তরে জোর বাড়ায়, সব বশ হয়ে যাবে ।

সজল ঝুলন্ত বস্তাটায় ঘুরে ঘুরে ঘূষি মারছিল । কর্কশ বস্তা আর বালিতে আঙুলের চামড়ার নুনছাল উঠে গেল । জ্বালা করছে । সে ধমক দিল, কেটে পড়ো তো নিতাইদা ! আর, খবরদার মাকে বলতে যেও না ।

সজলখোকা, এই তো সেদিনও এটুকু ছিলে ! বলে একটু অবাক হয়ে নিতাই সজলকে

আজ ভাল করে দেখে । তারপর দীর্ঘশ্বাস ছেড়ে বলে, হবে না ! কার ছেলে দেখতে হবে তো !

কথাটার মানে সজল জানে । একসময়ে সে নিজেকে জেঠামণির ছেলে বলে ভাবতে ভালবাসত । আজকাল বাসে না । তার বাবা শ্রীনাথ যেমনই হোক, সে আজকাল বাবার পক্ষে । তাই বস্তা ছেড়ে কোমরে হাত দিয়ে সে রক্তচোখে তাকাল নিতাইয়ের দিকে ।

নিতাই চোখ দেখেই ধরে ফেলে, মার আসছে । সজলখোকা ছোটো বয়সে তাকে বড় কম মারেনি । কিন্তু সে ছিল ছোটো হাতের মিঠে মার । কিন্তু ইদানীং সে বাচ্চাটা বেশ বুন্দো আর শক্তপোক্ত হয়ে উঠেছে । এখন এর হাতের মার খেলে হাড় গিয়ে লাগবে ।

নিতাই চট করে সুর পাটে বলল, শ্রীনাথবাবুর কথাই বলছিলাম খোকাবাবু । তোমার বাবা । ভারী তেজী লোক । তুমি তারই ছেলে তো ।

বেরোও তো এখন ।

এই যাচ্ছি, বলে নিতাই চোখের পলকে সরে পড়ে । দুনিয়াটা কেমনধারা হয়ে যাচ্ছে । কাউকে বিশ্বাস নেই । সেদিনকার খোকাটা কেমন মাতব্বরের মতো চোখ রাঙায় । ছোটো কলকে দিয়ে যে সরিৎবাবুকে একসময়ে বশে রেখেছিল সেও এখন মোড়লমশাই । শুধু নিতাই বদলালো না, যে নিতাই সেই নিতাই-ই রয়ে গেল ।

অবশ্য নিতাই আর বেশীদিন পুরোনো নিতাই থাকবে না । ক’দিন আগে হিজলির শিষ্যবাড়ি থেকে একটা শোল মাছের বাচ্চা আর কিছু ডালের বড়ি গামছায় বেঁধে ফিরছিল নিতাই । হিজলির জেলেরা বোকাসোকা লোক । দু’ঘর তার কাছে মস্ত নিয়েছে হালে । এই এখন শিষ্যবাড়ি থেকে কিছু আদায় উত্তল করতে পেরে মনে ভারী ফুর্টি ছিল । গুনগুন করছিল আপনমনে । পশ্চিমের জলার ধারের নির্জন রাস্তায় সাঁঝটি হল যেই অমনি নিতাই তারস্বরে কালী নাম করতে লাগল । কিন্তু তবু মেছো পেত্নীটা এলো-চুল ফাঁপিয়ে জলা থেকে উঠে এসে পথ আটকে দাঁড়াল ।

নিতাইয়ের হয়ে গিয়েছিল সেদিনই । শাত ছাড়ে আর কি ! হঠাৎ মনে পড়ল, এ জলার ধারেই বাঁশবনের আড়ালে কুঠে সামস্ত থাকত না ! ব্যাটা মরেছে । চারটি ছেলেপুলে নিয়ে তার বউ এখন বিধবা । তা সেই বিধবাই নয় তো !

আন্দাজটা লেগেছিল ঠিকই । চোখ খুলে দেখল, সামস্তর সেই বিধবাই বটে । কালো হাকুচ, রোগা, বড় দাঁত, চোখ কোটরে । একেবারে মরি মরি ছিরি ।

তবু সেই ঝুঁককো সাঁঝে জলা থেকে আঁশটে গন্ধের একটা কু-বাতাস এসে বাঁশবনে মড়মড় শব্দ যখন তুলল, আর যখন রাঙা-ভাঙা একটা চাঁদও উঁকি দিল দিগন্তে, তখন আর বুক বশ মানল না । ভারী একটা কষ্ট ঘুলিয়ে উঠল বুকের মধ্যে । সামস্তর বেধবা বউটা ! আহা !

কি খবর গো !

সামস্তর বিধবা স্ত্রী নিতাইকে বিলক্ষণ চেনে । রতনপুরের নামকরা চাটুজে বাড়ির পোষা তান্ত্রিক । তাই সে জড়োসড়ো হয়ে বলল, কোনোগতিকে আছি বাবা ।

তার আঁচলে বাঁধা কিছু গঁড়িগুগলিই হবে । সামস্ত একসময়ে চমৎকার ঘরামীর কাজ করত । কুষ্ঠ হয়ে বসে যায় । সেই থেকে অবস্থা পড়তির দিকে । সংসারটার কি অবস্থা তা আন্দাজ করতে অসুবিধে নেই । এদের মস্তর দেওয়া বৃথা । কিছুই আদায় উত্তল হবে না । তবু নিতাইয়ের সেদিন ভারী কষ্টই হচ্ছিল । গরীবের জন্য গরীব না ভাবলে চলে ?

সে বলেই ফেলল, চলো তোমার ঘরটা দেখে যাই । সামস্ত আমার বন্ধুলোক ছিল ।

ঘর ! বলে বউটা হাঁ করে রইল, ঘর বলতে কি আর কিছু আছে বাবা । কোনোরকমে থাকা । যাবে তো এসো ।

বাঁশবনের পিছনে সামস্তুর ভিটেয় পা দিয়ে নিতাইয়ের চোখে জল এল । এমন গরীবও আছে ! ঘর বলতে শুধু কয়েকটা মাটির দেয়াল খাড়া রয়েছে । চালে টিন বা খড় নেই, সে জায়গায় পুরোনো চট, বাসী ক্যালেন্ডারের কাগজ, ক্যান্ডেলের এইসব দিয়ে জোড়াপাটি লাগানো । বিছানা নেই, বাসন নেই, কাপড়চোপড় নেই । কি ভাবে ক্ষেঁ আছে ! সামস্তুর বউয়ের ট্যানাটা বোধ হয় গায়ে গায়ে ভিজে গায়ে গায়েই শুকোয় রোজ । তাই চামসে আঁশটে পেট-গোলানো গন্ধ ছাড়ছে গা থেকে । বড় মেয়েটা যুবতীই হবে । বুকে ন্যাকড়ার ঢাকনা, কোমর থেকে আর একটা আব্রু ঝুলছে । শরীরটা ঢাঙা, কঙ্কালসার । বাকি কুঁচো কাচাগুলো উদোম নাংটো ।

সামস্তুর বেধবা কান্নাকাটি করল না । বলল, এখনো ভিক্ষে শুরু করিনি বাবা । চাটুজ্জ মাকে বলে ঘরের একটা কাজ দাও তো বাঁচি ।

শোল মাছটা বেধবার হাতে দিয়ে নিতাই বলল, এটা সেদ্ধ করে আজ চালিয়ে দাও । আমি গিয়ে বউদিমণিকে বলবখন । হয়ে যাবে হিল্লো । বড় মেয়ে কতয় পড়ল ?

বিয়ের যুগিয়া । নেবে ?

ভেবে দেখি ।

ভাবাবাবির অবশ্য কিছু নেই । এই বয়সে হাড়হাভাতে ছাড়া আর কে মেয়ে দেবে ? তবু দর বাডাতে একটু সময় নিয়ে রাখল । প্রথম দিন তো ! বিয়ের কথা পাড়লেই হয়তো মেয়েব গায়ে এক কুড়ি কি দু' কুড়ি দামের লেবেল বসে যাবে । দিনকাল ভাল না ।

তুষা বউদিকে পবদিন সব বলল নিতাই । বউদি শুনেটোনে বলল, চোর নয় তো ?

না, সামস্ত লোক ভাল ছিল । কুষ্ঠরোগী ছিল বলে পরিবারটা কোথাও ঘরের কাজ পায় না ।

তুষা বউদি খুব চোখা নজরে নিতাইকে দেখে নিয়ে বলল, বড় মেয়েটেয়ে আছে ?

নিতাই লজ্জায় মুখ নামিয়ে বলল, আছে একটা ।

বউদিমণি আর কিছু জিজ্ঞেস করেনি বটে, কিন্তু ওইটুকুতেই বুঝিয়ে দিয়েছে যে, তার চোখকে ফাঁকি দেওয়া নিতাইয়ের বাপেরও সাধ্য নয় ।

সামস্তুর বউ অবশ্য খানকালে কাজ পেল । আগুরি শতখানেক টাকাও বউদি দিয়ে দিল ঘর মেরামতির জন্য । সামস্তুর ঘরামী বন্ধুরা মজুরী না নিয়ে ছেয়ে দিল ঘর । এখন খেয়ে-পরে আছে । সামস্তুর বড় মেয়ের শাড়ি জুটেছে, শরীরটাও ফিরছে আন্তে আন্তে । বিকেলের দিকটায় প্রায়ই গিয়ে ওদের উঠোনে থানা গাড়ে নিতাই ।

মুশকিল হল, বিয়ে করে বউ তুলবে কোথায় ! সে ভালমতোই জানে, এ বাড়িতে বউ নিয়ে নিতাইকে বাস করতে দেবে না বউদি । তার ওপর খোরাকির কথাও ফেলনা নয় । একা পেট চলে যায়, কিন্তু বউ হলে তার অনেক বায়নাঙ্কা । তাই খুব হিসেব নিকেশ করছে নিতাই । বিয়ের জন্য প্রশ্নটাও আঁকুপাঁকু করে । পুতুলরানী গিয়ে অবধি জীবনটা শুকিয়ে পাটকাঠি হয়ে গেছে ।

নিতাই যাওয়ার পর অনেকক্ষণ বালির বস্তায় ঘুমি চালাল সজল । মুঠির চামড়া লাল, কবজি ছিড়ে পড়ছে বাথায়, সারা গায়ে জবজবে ঘাম ।

দিন চারেকের মধ্যে গোয়ালঘরে দুটো বাঁচ্চা সমেত আরো দুটো গোখরো মারল সজল । দেখে শুনে নিতাই বলল, বাস্তুসাপ । মারলে তো, এখন দেখ কী না কী হয় । দোষের কাজ

হয়ে গেল, একটা পূজো লাগালে হয়।

সজল বলল, ধ্যাত !

কিন্তু ব্যাপারটা ভাল লাগল না নিতাইয়ের। বাস্তুসাপ বলে কথা। সে গিয়ে বউদিমণিকে গোপনে জানাল, পুরোনো গোয়ালঘরে তিনটে বাস্তুসাপ মেরে দিয়েছে সজলখোকা। কাজটা ভাল হয়নি। একটা পূজোটুজো লাগালে ভাল হয়।

তুষা চোখ বড় করে বলে, সজল মেরেছে ?

আজ্ঞে। বারণ শোনে না।

একটু ভাবল তুষা। সজল সাপ মেরেছে ! ঘটনাটার মধ্যে একটু সাবালকত্বের আভাস আছে না ?

সজলকে নিয়ে বরাবরই একটা ভাবনা ছিল তুষার। সেটা আর একটু বাড়ল। তা বলে ছেলেকে কিছু বললও না সে। গোপনে গিয়ে একদিন গোয়ালঘরে ঝুলন্ত বালির বস্তাটা দেখে এল। ফাঁসীর মড়ার মতো ঝুলে আছে। অনেকক্ষণ ব্যাপারটা গুনগুন করল তার মনের মধ্যে।

সকালে বিকেলে দুইজন প্রাইভেট টিউটর সজলকে পড়ান। তবু আজকাল সজল প্রায়ই রাতের দিকে শ্রীনাথের কাছে পড়া বুঝতে আসে।

ব্যাপারটা যে শ্রীনাথের খুব ভাল লাগে তা নয়। কিন্তু সে খুব একটা বারণও করে না। শুধু যেদিন নেশাটা বেশী হয় সেদিন ফিরিয়ে দেয় ছেলেকে। কিংবা ফেরাতেও হয় না, দরজার বাইরে থেকেই বাবার অবস্থাটা দেখে সজল নিজেই ফিরে যায়।

যেদিন শ্রীনাথ ভাল থাকে, তেমন নেশা করে না, সেদিনই বই খাতা নিয়ে এসে সজল বসে যায়।

শ্রীনাথ যে খুব ভাল পড়াতে পারে তা নয়। চর্চা না থাকায় কত কি ভুলে গেছে। ভগ্নাংশ বা দশমিকের অঙ্কই পারে না। ভূগোলে কোন্ দেশের কী রাজধানী তা মনেই পড়ে না। ইতিহাস যেন আবছা এক নদীর মতো লাগে, হুমায়ুন আকবরের বাবা ? না আকবর হুমায়ূনের ?

অবশ্য এসবেও কিছু যায় আসে না। কিছুক্ষণ পড়া-পড়া খেলা সেরে নিয়ে সজল গল্প বলার জন্য শ্রীনাথকে নানারকম উসকানি দিতে থাকে। তাতে কাজও হয়।

সারাদিন কারো সঙ্গেই তো কথা বলার নেই শ্রীনাথের। শ্রোতা পেয়ে সে মনের আগল খুলে দেয়। বানানো গল্প নয়, ভূত প্রেত দত্তা দানোর গল্প নয়, শ্রীনাথ স্মৃতির ভাণ্ডার উজাড় করে দিতে থাকে সজলের কাছে। সজল হাঁ করে শোনে।

রাত বাড়ে। চারদিক নিঃস্বপ্ন হয়ে যায়। এক এক দিন ভিতর বাড়ি থেকে বৃন্দা বা অন্য কেউ এসে ডেকে নিয়ে যায় সজলকে। কোনোদিন সজলকে নিজেই ফেরত পাঠায় শ্রীনাথ।

একদিন শ্রীনাথ জিজ্ঞেস করল, রোজ আমাব কাছে আসিস কেন রে ?

সজল লাজুক মুখে বলে, তুমি খুব ভাল পড়াও যে !

শ্রীনাথ ছেলের দুট্টমি ধরতে পেরে বলে, আমি আর কী পড়াবো ? তুই তো আসিস গল্প শুনতে।

বড় মায়া হয় শ্রীনাথের। ছেলেটা তো জানেও না যে, সে ওর বাবা নয়। কিন্তু তাতে তো ওর কোনো দোষ নেই। শ্রীনাথ ওর কাছে কোনোদিন ভুলটা ভাঙবে না। সজলকে তার ভালই লাগে। হয়তো ছেলের মতোই ভালও বাসছে আজকাল।

শ্রীনাথ বা সজল টের পায় না, কিন্তু মাঝে মাঝে ভাবন-ঘরের জানালা বা দরজার পাশটিতে ছায়ামূর্তির মতো এসে কিছুক্ষণ উৎকর্ষ হয়ে দাঁড়িয়ে থাকে তৃষা। সজল যে তাকে তেমন পছন্দ করে না তা তৃষা বরাবর জানে। তার জন্য কোনো মাথাব্যথাও নেই তার। কিন্তু ইদানিং শ্রীনাথের ওপর সজলের টান দেখে তার মনে নানা সন্দেহ উঁকি দেয়। শ্রীনাথকে বিশ্বাস নেই। ছেলেকে হাত করে তৃষাকে বিপাকে ফেলার চেষ্টা করছে হয়তো।

করছেই। এতদিন বাইরের লোকের কাছে কুৎসা গেয়ে বেড়িয়েছে। তাতে কাজ হয়নি দেখে এখন নতুন করে কোনো ফন্দি আঁটছে নিশ্চয়ই।

দিন সাতেক বাদে একদিন নিশুত রাতে কুকুরের চিংকারে ঘুম ভাঙল তৃষার। উঠোনে খুব চোঁচাচ্ছে কুকুরটা। তৃষার ভয়ডর বলে কিছু নেই। মেঝেয় বৃন্দা পড়ে ঘুমোচ্ছে। তাকে ঠেলে তুলে দিয়ে তৃষা টর্চ হাতে দরজা খুলল।

পাল্লা দুটো ভাল করে খোলবার আগেই অঙ্ককার উঠোনে একটা নীলচে লাল আগুনের বলকানি, আর সেই সঙ্গে বুক কাঁপানো দুডুম শব্দ। বাতাসের ধাক্কা আগুনের হলকা আর সেই সঙ্গে বালির মতো গুঁড়ো গুঁড়ো কি যেন এসে সপাটে ধাক্কা মারল তৃষাকে। আচমকা এসব ঘটে যাওয়ায় হতবুদ্ধি হয়ে গিয়েছিল তৃষা। কিন্তু সেই অবস্থাতেই দু জোড়া পায়ের দৌড়োনের শব্দ তার কান এড়াল না।

দরজা খুলে তৃষা টর্চ জ্বেলে দেখে বারান্দার সিঁড়ির কাছে শানের ওপর অনেকখানি জায়গা জুড়ে সাদাটে দাগ। সিমেন্টে চিড় ধরেছে। একটা বোমার খোল পড়ে আছে উঠোনে। বারুদের গন্ধে বাতাস ভারী।

শব্দে মারমার করে বাড়ির লোকজন উঠে এল। সরিৎ, ছেলেমেয়ে, চাকর-বাকর। বোমার শব্দে ইম্পাত কেঁউ কেঁউ করে পালিয়ে গিয়েছিল। লোকজন দেখে সেও এল আবার ঘেউ ঘেউ করতে করতে।

সরিৎ নিঃশব্দে ঘরে ঢুকে বন্দুকটা নিয়ে এল। বলল, কোন্দিকে গেল বলো তো মেজদি!

তৃষা টর্চ জ্বেলে সদর ফটকের দিকটায় আলো ফেলে বলল, তাড়া করে লাভ নেই। তাদের দেখেছো?

না। তবে দুজন ছিল। পায়ের শব্দ পেয়েছি।

কারা হতে পারে?

কি করে বলব? মংলার হাতে চিঠি দিয়ে একবার থানায় পাঠা।

থোকনকে সজাগ থাকতে বলে হঠিয়ে দিল তৃষা। তারপর টর্চ হাতে নিঃশব্দে চলল ভাবন-ঘরের দিকে।

গ্রীষ্মকাল বলে কয়েকটা জানালা খুলে রেখে শোয় শ্রীনাথ। আজও শুয়েছে। আগে অঙ্ককার ঘরে শ্রীনাথের ঘুমন্ত শরীরটা তীক্ষ্ণ চোখে দেখে। ঘুমোচ্ছে! বোমার আওয়াজটা এত দূরে এসে পৌঁছেযনি নাকি?

সন্দেহ। তৃষা টর্চ জ্বেলে নাইলনের মশারির ভিতরে শ্রীনাথের ঘুমন্ত মুখটাকে বুঝবার চেষ্টা করে। ঘুমোচ্ছে তো? নাকি মটকা মেরে পড়ে আছে। টর্চের আলোটা খানিকক্ষণ মুখের ওপর নাড়াচাড়া করেও দেখল, শ্রীনাথ জাগে কি-না। জাগল না।

তৃষা ডাকল, শুনছো! ওঠো তো! বাড়িতে কারা এইমাত্র বোমা মেরে গেল। অনেকক্ষণ ডাকাডাকির পর শ্রীনাথ উঠল।

কি হয়েছে ?

দরজা খোলো, বলছি।

বিরক্ত শ্রীনাথ উঠে দরজা খোলে, এত রাতে ! ডাকাত পড়েছে নাকি ?

এখনো পড়েনি। তবে যে কোনোদিন পড়বে।

কি হয়েছে তা হলে ?

দুটো লোক এসে আমার শোওয়ার ঘরে বোমা মেরে গেল একটু আগে। শব্দ পাওনি ?

বোমা ! বলে হাঁ করে চেয়ে থাকে শ্রীনাথ। বোমা মারে বটে লোকে, কিন্তু তুষার শোওয়ার ঘরে বোমা মারার কি আছে তা সে ঘুমন্ত মাথায় সঠিক বুঝতে পারে না।

কারা জানো ? তুষা জিজ্ঞেস করে।

আমি কি করে জানব ? বোমা কারো গায়ে লেগেছে ?

না। মনে হচ্ছে আমাকেই মারতে এসেছিল। কিন্তু তাড়াহুড়োয় ঠিক মতো ছুঁতে পারে নি। বারান্দায় পড়ে ফেটে গেছে।

সর্বনাশ ! বলে সত্যিকারের সাদা হয়ে যায় শ্রীনাথ। তার মাথাটা ঘুম ছাড়িয়ে সম্পূর্ণ জেগে ওঠে। কাল রাতে একটু বেশী টেনে ফেলেছিল সে। জেগে শরীরের একটা প্রবল কষ্ট টের পায়। বলে, তোমাকে মারতে এসেছিল !

খুব তীক্ষ্ণ চোখে শ্রীনাথকে লক্ষ করে তুষা। হয়তো অভিনয়। সে ঠিক নিশ্চিত হতে পারে না। বলে, আমাকে ছাড়া আর কাকে ? আমার তো শত্রুর অভাব নেই। কিন্তু এতটা আগে কখনো হয়নি। তুমি কিছু জানো না ?

আমি জানব ! আমি কি জানব ?

তুমি তো রামলাখনের আড্ডায় যাও, বটতলায় মিটিং করো, ওসব জায়গায় যারা যায় তারাই হয়তো এই কাণ্ডটার পিছনে আছে।

তুষা কী বলতে চাইছে তা সঠিক ধরতে পারল না শ্রীনাথ। তাই রেগেও গেল না। তোম্বা ঘাবড়ে যাওয়া মুখে মাথা নেড়ে বলল, না, আমি কিছু শুনিনি। কেউ তোমাকে মারতে চায় বলে জানি না।

এখন তো জানলে !

জানলাম। কিন্তু কি করা উচিত বুঝতে পারছি না।

তুষা সামান্য হেসে বলল, তোমাকে কিছুই করতে হবে না। কোনোদিন কিছু কি করেছে আমাদের জন্য ? আজও তোমাকে ছাড়াই চলবে।

শ্রীনাথ এ কথাটাও গায়ে মাখল না। চুপ করে বসে রইল কিছুক্ষণ, তারপর একটা বিড়ি ধরাল। চোখেমুখে ভীষণ উদ্বেগ আর ভয় ফুটে রয়েছে তার।

তুষা উঠে বাইরে গিয়ে চারদিকে টর্চটা ঘুরিয়ে দেখল। নিতাই একটা মশাল জ্বলে জঙ্গলে-জঙ্গলে ঝুঁজছে। আরো কয়েকটা টর্চ জ্বলে উঠছে এখানে সেখানে।

তুষা উঁচু গলায় ডাকল, সরিৎ !

কি বলছ ? ফটকের ধার থেকে জবাব এল।

ছেলেমেয়েগুলোকে শুয়ে পড়তে বল। বন্দাকে বলিস ওদের ঘরে শুতে। নইলে ভয় পাবে।

যাচ্ছি।

বন্দুকটা রেখে আয়। বলে তুষা আবার ভাবন-ঘরে ঢুকে শ্রীনাথের মুখোমুখি হয়।

শ্রীনাথ আর একটা বিড়ি ধরিয়ে বলে, পুলিশে যাওয়া উচিত।

লোক গেছে। ছেলে দুটো কাল পরশুই ধরা পড়বে।
পড়লেই ভাল। কিন্তু আজকাল পুলিশ অত রেসপনসিবল নয়।
তৃষা খুব খর দুষ্টিতে শ্রীনাথের মুখের দিকে চেয়ে বলল, পুলিশ পারুক বা না পারুক
ছেলে দুটো ধরা পড়বেই। মরা বা জ্যান্ত।

॥ ছেচল্লিশ ॥

মরা বা জ্যান্ত! বলে শ্রীনাথ খুব অবাক চোখে তৃষার দিকে চায়। একটু জোতলা জিভে
জিজ্ঞেস করে, ধরতে পারলে তুমি ওদের মেরে ফেলবে নাকি?

না। তৃষা ঠাণ্ডা গলায় বলে, জ্যান্ত ধরতে পারলে মারব কেন? যদি জ্যান্ত ধরা না যায়
তা হলে দরকার হলে মেরে ফেলব!

তুমি! বলে বিস্ময়িত চোখে অনেকক্ষণ পলক ফেলে না শ্রীনাথ। তারপর যেন চুপসে
হতাশ হয়ে হাল ছেড়ে দিয়ে বলে, তুমি সব পারো।

ভুলে যেও না ওরা আমাকেই মেরে ফেলতে চেয়েছিল।

শ্রীনাথ আর একটা বিড়ি ধরায়। খুব ঘন ঘন বিড়ি খাচ্ছে এখন সে। তৃষার কথাটা শুনে
একটু ভেবে বলল, কথাটা শুনতে কিছু অদ্ভুত। তবু বলি, তোমাকে মেরে ফেলতে
চেয়েছিল বলেই যে ওরা বধের যোগ্য তা কিন্তু নয়।

আমিও তা বলিনি। যদি ধরা পড়ে তা হলে যা করার পুলিশ বা আইন আদালত করবে।
যদি তারা উপযুক্ত শাস্তি না দেয় বা খালাস দেয় তখন আইন আবার আমরা হাতে নেবো।
কিন্তু সে অন্য কথা। আমাকে মারতে চেয়েছিল বলেই যে আমি তাদের মারব তা আমি
এখনো বলছি না।

শ্রীনাথের গলার স্বর থেকে আত্মবিশ্বাস বিদায় নিয়েছে। কেমন মিনমিনে শোনাচ্ছে
তাকে। তেমনি এক ভেজা ভীতু গলায় সে বলে, তুমি আগে আর কাউকে খুন করিয়েছো
তৃষা?

তৃষা আজ রাতে নানা কারণেই কিছু বিভ্রান্ত। তবু এখন শ্রীনাথের মুখের দিকে চেয়ে
তার একটু করুণা হল। সে মাথা নেড়ে বলল, না। কিন্তু আমার সম্পর্কে তোমার জ্ঞান এত
কম কেন?

শ্রীনাথ একটা ঢৌক গিলে বলল, জ্ঞান? না, আমার আর জ্ঞানের দরকার নেই। আমি
আর কিছু জানতে চাই না।

বলতে বলতে শ্রীনাথের দাঁতে একটু খটখটি হল। সে যে অত্যন্ত ঘাবড়ে গেছে তা
বুঝতে তৃষার কোনো কষ্ট হচ্ছে না। এ লোক যে তৃষাকে খুন করানোর জন্য লোক লাগাতে
পারে না তা বুদ্ধি দিয়ে বুঝতে পারছে তৃষা। কিন্তু সন্দেহের একটা আলপিন তবু ফুটে থাকে
তার মনের মধ্যে। সে শান্ত কিন্তু কঠিন এক গলায় বলে, লোককে ঘরের কথা বলে
বেড়ানো তোমার স্বভাব। কিন্তু তা বলে লোককে বলতে যেও না; যে, আমি বোমাওলাদের
মেরে ফেলার তালে আছি। যদি বলো তা হলে তোমার ভাল হবে না।

শ্রীনাথ ভয় পেয়েছে ঠিকই, কিন্তু তা বলে তৃষার এই প্রচল্লম চোখরাঙানোটোও তার সহ্য
হয় না। সে আবার বিড়ির আগুন থেকে নতুন বিড়ি ধরিয়ে নেয়। বলে, আমি বললেই যে
লোকে বিশ্বাস করবে এমন নয়। মাতাল বদমাশদের কথা লোকে রেখে-ঢেকে অর্ধেক ধরে,
অর্ধেক ফেলে দেয়। আজকাল তাই বলাবলি ছেড়ে দিয়েছি। কিন্তু লোকে যদি আমার কথা

বিশ্বাস করত তবে বলতাম।

কথা বলতে বলতে শ্রীনাথের একটু শ্বাসকষ্ট হচ্ছিল। সে উঠে গিয়ে কাঠের আলমারি থেকে একটা ব্র্যাণ্ডির বোতল বের করে ছিপিতে ঢেলে কয়েকবার খেয়ে নিল। একটা বিদ্যুটে টেকুর তুলে মুখটা বিকৃত করে আবার ইজিচেয়ারে বসে পড়ল। মুখটা বোকাটে, ঘাবড়ানো এবং সম্ভ্রান্ত।

তুষা বলল, লোকে তোমাকে বিশ্বাস না করলেও কেচ্ছাকে বিশ্বাস করে। তাদের কাছে কে বলেছে সেটা বড় কথা নয়, কী বলছে সেটাই বড় কথা। তাই বলছি বোলো না। তোমাকে সাবধান করে দিয়ে যাচ্ছি।

অসহায় মুখে শ্রীনাথ বলে, খুন-টুন আমি সহিতে পারি না।

তুমি পুরুষমানুষ হয়ে যখন পারো না, আমি মেয়েমানুষ হয়ে কি পারি? তুষা যেন বাচ্চা ছেলেকে ভোলাচ্ছে এমনভাবে কথাটা বলল। একটু দীর্ঘশ্বাস ফেলে বলল, কিন্তু অনেক ঠেকে শিখেছি, আমি বিপদে পড়লে বাঁচানোর মতো কেউ নেই। আমার দুঃখ হলে পাশে এসে কেউ দাঁড়াবে না। তাই বিপদ-আপদ বা দুঃখ-টুংখকে আমি কাছে আসতে দিই না। তার আগেই নিকেশ করি। মাঝরাতে দুটো ছেলে এসে বাড়িতে ঢুকে বোমা মেরে আমাকে উড়িয়ে দিয়ে যাবে, এতকাল তো এত কষ্টের জীবন শুধু সেজন্য বয়ে বেড়াইনি। কাজেই যারা মারতে এসেছিল তাদের একটু সমঝে দেওয়া ভাল। যদি আর কারো মনে ও রকম ইচ্ছে থেকে থাকে তবে তারাও ইশিয়ার হবে।

হয়তো তোমাকে মারতে চায়নি। হয়তো অন্য কাউকে—

কি করে বুঝলে?

সেদিন স্টেশনের কাছে দুটো ছেলেকে সরিৎ চেন দিয়ে মেরেছিল। তারাও হতে পারে। হয়তো সরিৎের ওপর শোধ নিতে এসেছিল।

সরিৎ আমার ভাই। তাকে মারতে এলেই বা আমি ছাড়ব কেন? সে আমার আশ্রয়ে আছে, তার দায়দায়িত্ব আমার, সেটা ভুললেও তো চলবে না।

শ্রীনাথের আর কিছু বলার থাকে না। সে চুপ করে রইল।

তুষা জিজ্ঞেস করে, সরিৎ যাদের মেরেছিল তাদের তুমি চেনো?

না। মুখচেনা।

সোমনাথ বহুকাল এদিকে আসছে না। তবু আমাকে সব খবরই নিতে হবে।

সোমনাথ! সোমনাথ এর মধ্যে নেই তুষা। আমি বলছি। খানিকটা আতঙ্কের সঙ্গে বলে ওঠে শ্রীনাথ।

নেই কি করে জানলে? সোমনাথ নিজে না থাকলেও তার অনেক সিমপ্যাথাইজার আছে এখানে।

ওকে এখানে কেউ চেনেই না। তা ছাড়া বুলু এখন তার বউকে নিয়ে ব্যস্ত।

তুমি কোনো খবরই রাখো না। ওদের বাচ্চাটা পেটেই নষ্ট হয়ে গেছে সেই কবে! সোমনাথ বাবাকে একটা চিঠিতে লিখেছে, আমিই নাকি কোন তান্ত্রিককে ধরে বাণ মেরে ঐ কাণ্ড করিয়েছি।

বুলু লিখেছে?

হ্যাঁ। বাবার তোষকের নীচে চিঠিটা ছিল। তোষক রোদে দিতে গিয়ে চিঠিটা বৃন্দার হাতে পড়ে। সে আমাকে দেয়।

বুলুটা পাগল।

তাই হবে । বলে তৃষা ওঠে । চারদিকে চেয়ে বলে, তুমি ঘুমোও । রাত আর বেশী নেই ।
আর ঘুম ! বলে শ্রীনাথ আবার উঠে গিয়ে ছিপিতে ঢেলে ব্যাণ্ডি খায় ।

তৃষা অঙ্ককার বারান্দায় বেরিয়ে আসে । মস্ত বাগানের আনাচে-কানাচে এখনো টর্চ জ্বলছে ।

তৃষা বারান্দা থেকেই চেষ্টা করে বলল, তোদের আর ঝুঁজতে হবে না । ঘরে যা সবাই ।
আনমনে রাস্তাটুকু পার হয়ে উঠানে পা দিয়ে তৃষা দেখে, তার ঘরের সিঁড়িতে সরিৎ বসে আছে । হাতে একটা বেতের মোটা লাঠি । তার পাশে স্ফাপা নিতাই । নিতাইয়ের পায়ের কাছে ইম্পাত । তৃষাকে দেখে ইম্পাত উঠে এসে কুঁই কুঁই করে গায়ে পা তুলে আদর কাড়ার চেষ্টা করল । কিন্তু কুকুরের আদরে বড় ঘেন্না তৃষার । বলল, যাঃ যাঃ ।

সঙ্গে সঙ্গে ইম্পাত ভয় খেয়ে নিতাইয়ের কাছে ফিরে যায় ।

তৃষা বলে, তোরা শুতে গেলি নাঁ ?

সরিৎ হাই তুলে বলল, সাড়ে তিনটে বাজে, আর শুয়ে কী হবে ?

তৃষা আর কিছু বলল না । বারান্দায় উঠে দরজার শিকল খুলল ।

সরিৎ বলল, দরজাটা দিয়ে দাও । আমরা পাহারা দিচ্ছি ।

তৃষা খুব অনামনস্ক । কথাটা শুনেও শুনল না । মশারি সরিয়ে বিছানার ধারে বসে রইল সে । স্ট্যাণ্ডে বন্দুকটা রেখে গেছে সরিৎ । তৃষার চোখ সেইদিকে । ভিতরে ভিতরে ফুঁসে উঠছে রাগ আর আক্রোশ । কিন্তু বাইরে খুব নিখর সে । মনে এখন আর কোনো ভয় বা বিভ্রান্তি নেই । তবে তীব্র জ্বালা আছে ।

অনেকক্ষণ বসে থেকে তারপর উঠে স্টোভ জ্বলে সে চায়ের জল চড়ায় । উঠানে, বাগানে লোকজন জেগে পাহারা দিচ্ছে । কিন্তু এই ভোরবেলা আর কোনো শত্রু এসে ঢুকবে না, এটা জানে তৃষা । শত্রুরা জানে, এর পর তৃষা আরো সতর্ক হবে, নিষ্ঠুর হবে । তাই আর সহজে এ-বাড়ির ছায়া মাড়াবে না তারা । কিন্তু মাড়ালেই তৃষার সুবিধে হত । হাতের মুঠোয় পেত তাদের ।

পুলিসের সঙ্গে যোগাযোগ অনেক দিনের । তারা এনকোয়ারিতে এসে কি কি জিজ্ঞেস করবে তা সে জানে । তার কোনো শত্রু আছে কিনা । কাকে তার সন্দেহ হয় । লোকগুলো কেমন দেখতে । ইত্যাদি ।

তৃষা দরজা খুলেই বিস্ফোরণ দেখেছিল । আর কিছু মনে নেই । কিন্তু তৃষা জানে, দরজা খোলা এবং বোমা ফাটবার মধ্যে যে কয়েক সেকেন্ড সময় তার মধ্যেই তার চোখ অনেক কিছু দেখেছে । কিন্তু বোমার ধাক্কায় মাথাটা এতই গুলিয়ে আছে যে কিছুই মনে পড়ছে না । তবে মনটাকে শান্ত ও নিরুদ্বেগ করে যদি একাগ্রভাবে চিন্তা করে সে, তবে নিশ্চয়ই মনে পড়বে ।

কিন্তু মনটাকে শান্ত করা কি সোজা ! সংসারের এত জ্বালাপোড়া, এত ক্ষোভ রাগ হতাশা জমে আছে ভিতরে । মশারির মধ্যে বসে চোখ বুজে যতবার ভাববার চেষ্টা করল ততবারই অন্য সব বাজে চিন্তা হিজিবিজি কথা এসে লগুভগু করে দিল মাথা । ঐ কয়েক সেকেন্ডের জরুরী স্মৃতি কিছুতেই মনে এল না ।

উঠোনটা অঙ্ককার ছিল । কুকুরটা দৌড়ে দৌড়ে ডাকছিল খুব । দরজা খুলে কী দেখেছিল সে ? শুধু অঙ্ককার ? আর কিছু নয় ? কোনো অস্বাভাবিকতা নয় ? কোনো গন্ধ বা শব্দ নয় ? কোনো নড়াচড়া নয় ? যে দু জোড়া পায়ের শব্দ শুনেছিল তার আওয়াজ কেমন ? চটির আওয়াজ না জুতোর ? ভারী পা, না হালকা ?

চারদিকে ফটফটে ভোরের আলো দেখা গেলে ঘর থেকে বেরিয়ে এল তৃষা। বহু কাজ।

বাকি রাতটুকু ভাল ঘুম হয়নি শ্রীনাথেরও। তৃষা চলে যাওয়ার পর একা ঘরে এক রক্ত-জল-করা ভয় তাকে পেয়ে বসল। এ কার ঘর সে করছে এতকাল? তৃষা অনেক কিছু করতে পারে, সে জানে। কিন্তু তাঁ বলে খুন? মাথাটা গরম হয়ে উঠছিল, বুদ্ধি ঘুলিয়ে যাচ্ছে। বুকের মধ্যে উঠছে এক ধুকধুকনি। খুনখারাপী মারধর কোনোদিনই সহ্য করতে পারে না শ্রীনাথ। উঠে গিয়ে সে ব্র্যাণ্ডির বোতলটা বের করে আনল। জল মিশিয়ে অনেকক্ষণ খেল বসে বসে। তারপর শরীরে ঝিমঝিমনি উঠলে গিয়ে শুয়ে পড়ল : দুঃস্বপ্ন দেখল অনেক। উঃ আঃ শব্দ করল ঘুমের মধ্যেই।

একটু বেলায় ঘুম থেকে উঠল শ্রীনাথ। শরীর কাহিল, মন অবসন্ন। এত বিদ্যুটে হ্যাংওভার বহুকাল হয়নি তার। প্রায় হামাগুড়ি দিয়ে সে গিয়ে মুখ-হাত ধুল। তারপর ইজিচেয়ারে পড়ে রইল মড়ার মতো। বাড়িতে বোমা পড়লেও যথা সময়ে চা এল ঠিকই। চেয়ে আরো এক পট দুধ ছাড়া চা আনিয়ে খেল শ্রীনাথ। সঙ্গে অল্প ব্র্যাণ্ডি। কিন্তু মাথাটা অল্প অল্প ঘুরছে, শ্বাসের কষ্ট হচ্ছে বেশ।

সকালেই পুলিশের জীপ এসে ফটকের কাছে থেমে আছে। শ্রীনাথকে জিজ্ঞাসাবাদ করতে অবশ্য কেউই এল না। এলে খুবই অস্বস্তিতে পড়বে সে। সে নিজেও জানে সত্যিকারের কাপুরুষ বলতে যা বোঝায় সে হচ্ছে তাই। তবে এখন আর সেজন্য কোনো লজ্জা নেই শ্রীনাথের। জীবনটাকে তো আর পাণ্টানো যাবে না।

চোখ বুজেও সে দুঃস্বপ্নই দেখছিল এখন। চারদিকে শরতের উজ্জ্বল এক সকাল। চোখ বুজেই টের পেল দরজার আলোয় কে যেন এসে দাঁড়িয়ে ছায়া ফেলল।

চোখ চেয়ে অতি কষ্টে মুখে হাসি আনার চেষ্টা করে শ্রীনাথ বলল, আয়। পুলিশ কি চলে গেছে?

সজল ষড়যন্ত্রকারীর মতো বেড়াল-পায়ে ঘরে আসে। মুখ টিপে হেসে বলে, না। ডবল ডিমের ওমলেট খাচ্ছে বসে বসে। তবে খেয়েই চলে যাবে।

এনকোয়ারি হয়ে গেল?

হ্যাঁ। সবাইকে ধরে ধরে অনেক কথা জিজ্ঞেস করল।

তোকেও করেছে?

হ্যাঁ। বলে মাথা হেলায় সজল, আমি বলেছি বোমবাজদের আমি চিনি।

সে কী? বলে শ্রীনাথ চোখ বড় করে তাকানোর চেষ্টা করে। কিন্তু সকালের এই সাদা আলোটা সহিতে পারে না একদম। চোখ কঁচকে বলে, তুই আবার নাম-টাম বলিস নি তো? বলেছি।

কার নাম বলেছিস?

রামলাখন আর কাটুমদা।

কাটুমদা কে?

শীতলাতলার ভটচাষ মশাইয়ের ছেলে, চেনো না?

সে বোমা মেরেছে?

মারতে পারে। মেজদিকে ইস্কুলের রাস্তায় রোজ ফলো করে। মেজদি একদিন চাট খুলে তাড়া করেছিল।

খুবই অবসাদ বোধ করে শ্রীনাথ । বলে, না জেনে পুলিশকে কোনো নাম বলা ঠিক নয় । বললি কেন ?

এমনিই । পুলিশ ধরে নিয়ে গিয়ে পেটালে ভাল হবে ।

ধরবে নাকি ওদের ? তোর কথায় ?

না । একটু হতাশার গলায় সজল বলে, মা যে সব নষ্ট করে দিল । মা পুলিশকে বলল, ওর কথা ধরবেন না । তোমার কথা মা কী বলেছে জানো ?

কি বলেছে ?

বলেছে, আমার হাজব্যাণ্ড প্রকৃতিস্থ নন । ওকে জেরা করার দরকার নেই । তাই পুলিশ তোমার কাছে আসেনি ।

একটা নিশ্চিন্তির শ্বাস ফেলল শ্রীনাথ । মনে মনে তৃষাকে ধন্যবাদ দিল ।

সজল জিজ্ঞেস করল, বোমার শব্দটা তুমি শোনানি বাবা ?

না ।

জায়গাটা দেখেছো ? যেখানে বোমাটা মেরেছিল ?

না দেখিনি ।

গিয়ে একবার দেখে এসো । দারুণ । বারান্দার শানে অনেকখানি চিড় ধরে গেছে । মার গায়ে লাগলে একদম উড়িয়ে দিত ।

বিরক্ত শ্রীনাথ বলে, তুই হাসছিস কেন ? এটা কি মজার ব্যাপার ?

সজল যেন ধরা পড়ে গিয়ে একটু কাঁচুমাচু হল । বলল, লাগেনি তো ।

লাগেনি, কিন্তু ব্যাপারটা তা বলে হাসির নয় ।

আমার স্কুলের একটা ছেলে পেটো বানাতে পারে । কিছু টাকা দিলে শিখিয়ে দেবে ।

খবরদার ! বলে শ্রীনাথ ধমক দেয় ।

সজল ফের একটু মিচকি হাসি হেসে বলে, তুমি কেবল শুধু শুধু আমার ওপর রাগ করছ । ছোটোমামা নিজেই পেটো বানায় তা জানো ?

স্তুভিত্তি শ্রীনাথ বলে, তোকে কে বলল ?

কে বলবে ? সবাই জানে ।

তোর মা জানে ?

মা-ই তো মশলা কেনার টাকা দেয় ।

শ্রীনাথ হাঁ করে থাকে । মাথাটা একটু বেশী পাক খায় বলে তাকাতে কষ্ট হয় খুব । বড় করে শ্বাস ফেলছে বারবার । বলল, সরিং ও সব বানায় কেন ?

কে জানে ? ঠোঁট উল্টে সজল বলে ।

আবার এক তীব্র আতঙ্কে বিহ্বল হতবুদ্ধি হয়ে যায় শ্রীনাথ । এ সে কাদের মধ্যে রয়েছে ? এ কারা তার আত্মীয়স্বজন ? উঠতে গিয়ে টাল খেয়ে বসে পড়ল শ্রীনাথ । আবার চেষ্টা করল । এ-বাড়ির চৌহদ্দি ছেড়ে এস্কুনি তার বেরিয়ে পড়া দরকার । কিন্তু উঠতে গিয়ে এবার আর বসে পড়ল না । চোখ অন্ধকার আর মাথা শূন্য হয়ে দড়াম করে পড়ে গেল মেঝেয় ।

সজল চমকে উঠেছিল । কিছুক্ষণ অবাক হয়ে চেয়ে রইল মেঝেয় পড়ে থাকা তার বাবার দিকে । উপুড় হয়ে মুখের কাছে মুখ নিয়ে ডাকল, বাবা ! বাবা !

শ্রীনাথ রক্তবর্ণ দুটো চোখ খুলে বলে, একটু হাওয়া । আমাকে খোলা হাওয়ায় নিয়ে চলো ।

কি হয়েছে তোমার ?

আমি মরে যাচ্ছি ! শীগগীর ।

সজল ভিতরবাড়িতে দৌড়ে গেল ।

একটু বাদেই বাড়ির লোকজন আর ডাক্তার-বদিতে ভরে গেল ঘর ।

শ্রীনাথের বহুকাল কোনো অসুখ-বিসুখ করেনি । বিছানায় এক ঘোরের মধ্যে শুয়ে থেকেও সে সবই টের পায় । বিছানায় তৃষা, মঞ্জু আর স্বপ্না খুব কাছাকাছি বসে আছে । ডাক্তার তার প্রেসার নিচ্ছে । মাথার কাছে একটা টেবিল ফ্যান থেকে স্নিগ্ধ হাওয়া এসে লাগছে । পাতালে তলিয়ে যেতে যেতে মাঝে মাঝে ভেসে উঠছে শ্রীনাথ । তারপর একটা ছুঁচের মুখ ঢুকে গেল হাতে । গভীর ঘুমে তলিয়ে গেল সে ।

ডাক্তার বলে গেল, ভয়ের কিছু নেই । একজহশন, ড্রিংক, ল্যাক অফ একসারসাইজ । মাইন্ড স্ট্রোকও বলা যায় । প্রেসারটা ভীষণ লো । এখন থেকে সাবধান হওয়া দরকার ।

তৃষা ডাক্তারকে বিদায় দিয়ে ভাবন-ঘরের ইজিচেয়ারে এসে বসে ।

শ্রীনাথের তেমন কিছু হয়নি জেনে ছেলেমেয়েরা নেয়ে খেয়ে স্কুলে গেল । বাড়ির লোক সংসারের নানা কাজে লেগে পড়ল । সরিৎ গেল ওষুধ আনতে ।

একা তৃষা শ্রীনাথের ঘুমন্ত মুখের দিকে জ্বালাভরা চোখে তাকিয়ে রইল । মনে মনে বলল, অকৃতজ্ঞ ! তোমার না হয়ে যদি আমার এ রকম হত, তবে তুমি আমার জন্য করতে এতটা ? পুরুষমানুষের মতো নিমকহারাম দুটো নেই দুনিয়ায় । তুমি বেশ্যাপাড়ায় গিয়ে মদ খেয়ে যত না নিন্দে কুড়িয়েছো, আমার একটা কলঙ্কের নিন্দে তার চেয়ে ঢের বেশী । বেশ আছে তোমরা কাপুরুষ মেরুদণ্ডহীন ! মেয়েমানুষকে মারতে চোরের মতো মাঝরাতে এসে বোমা ছোঁড়ো, তোমরা কেমন জন্তু ?

পুরুষমানুষের ওপর আগ্রাসী রাগ খুব বেশীক্ষণ রইল না তৃষার । বোমার খবর রটে গেছে । বহু লোক দ্রুত আসছে । পাড়ার মাতব্বর, প্রাক্তন এক এম এল এ, সমাজকর্মী, কৌতূহলী গিম্বান্নিরা । বৃন্দাকে শ্রীনাথের ঘরে রেখে তৃষাকে উঠে যেতে হল ।

ফাঁক পেতে পেতে সেই দুপুর । ঘুমন্ত শ্রীনাথকে আধোজাগা করে গরম দুধ খাইয়ে এল তৃষা । নিজে নেয়ে খেয়ে একটা প্যাডের কাগজে লম্বা চিঠি লিখতে বসল দীপনাথকে ।

দীপু, তোমাকে আমার গার্ডিয়ান করতে চেয়েছিলাম । তুমি সেই ভয়ে সেই যে পালিয়ে গেলে আর এলে না । না হয় গার্ডিয়ান নাই হলে, তা বলে কি খোঁজ নিতে নেই ! আমাব যে কী বিপদ যাচ্ছে জানো না তো ।....

অনেক অনেক কথা লিখল তৃষা । সচেতনভাবে যা সে কখনোই লিখতে পারত না । লজ্জা পেত ।

চিঠিটা খামে ঐটে মংলাকে ডাকছিল ডাকে দেওয়ার জন্য । বারান্দা থেকেই হঠাৎ চোখে পড়ল, ফটক থেকে আলোছায়ায়ময় আঁকাবাঁকা পথটি ধরে একজোড়া স্বামী-স্ত্রী আসছে । বোধ হয় পড়শীই কেউ হবে । তৃষা ঘরে গিয়ে চশমাটা চোখে দিয়ে বেরিয়ে এল ।

বলল, ওমা !

উঠানে দীপনাথ আর মণিদীপা পাশাপাশি দাঁড়িয়ে মৃদু মৃদু হাসছে ।

দীপনাথ বলল, এলাম ।

তৃষা নেমে গিয়ে মণিদীপার হাত ধরে বলল, তুমি বাপু আজ একদম সাজেনি !

মণিদীপা বড় বড় চোখে চেয়ে তৃষাকে দেখছিল । খুবই বুদ্ধিমতী । বলল, আমি না হয় সাজিনি । কিন্তু আপনার কী হয়েছে বলুন তো ! ইউ লুক সো ফ্রেস্টফলেন !

কিছু নয়। ঘরে এসো।

আপনাদের এ জায়গাটা আমার ভীষণ ভাল লাগে। অবশ্য তার জন্য আপনিই রেসপনসিবল। আপনাকে ভাল লাগে বলেই জায়গাটাকেও ভাল লাগে। কিন্তু আপনিই তো আজ পাথস।

॥ সাতচল্লিশ ॥

নিজের ঘরে দুজনকে বসাল তুষা। দীপনাথ চেয়ারে, মণিদীপা তুষার পাশে বিছানায়।

মণিদীপা আগের দিন যে পোশাক করে এসেছিল তা তুষার তেমন পছন্দ হয়নি। আজ মণিদীপার পরনে শাড়ি। চুলে নতুন করে ছাঁট দেয়নি বলে বব চুলও অনেক লম্বা হয়ে কাঁধ ছাড়িয়েছে। শুধু কপালের দুপাশে কয়েকগাছি চুল ছাঁটা। সেগুলো সবসময়ে দুদিকে ঝাপটার মতো দোলে। সিঁথিতে সিঁদুর না থাকায় দীপনাথের সঙ্গে ওকে যে-কেউ প্রেমিক-প্রেমিকা বলে গুলিয়ে ফেলবে। বয়সটাও কম। তার ওপর চেহারা যুঁকির ছাপ প্রবল।

তুষা খুব অল্প সময়ের মধ্যেই যা দেখার দেখে নেয়। বলল, আগের দিন কিন্তু বলে গিয়েছিলেন খুব তাড়াতাড়ি আবার আসবেন। আসতে কিন্তু বছর ঘুরে গেল।

পথটা ঠিক চিনি না তো! ট্রেনে আগেরবার আসিনি। নইলে ঠিক চলে আসতাম।

একা কেন? দীপুই তো আনতে পারত।

ওঁর কত কাজ! ছদ্ম গাষ্টীর্যে মণিদীপা বলে, কতদিন ধরে সাধাসিধি করে আজ তবু সময় হল। আপনার এই খামারবাড়িটা এত ফ্যান্টাসটিক যে, আমার বারবার এ জায়গাটার কথা মনে পড়ে।

তুষা এই প্রশংসায় একটু আনমনা হয়ে গেল। বলল, জায়গাটা তো এমনিতে সুন্দর হয়নি। কত ভালবাসা এর সঙ্গে জড়িয়ে আছে আমার। লোকে কেবল বাইরে থেকে দেখে, এ বাড়ির মালিকদের কত টাকা।

মণিদীপা তুষার এই ভাবান্তর লক্ষ করল না। সে জ্বালতো প্রলম্ব করল, আচ্ছা আপনি কি জোতদার?

জোতদার! কই কখনো কথাটা ভেবে দেখিনি তো! না বোধ হয়, আমি জোতদার-টোতদার নই।

তবে জোতদার কাদের বলে?

মণিদীপাকে তুষার হাতে ছেড়ে দিয়ে দীপনাথ বাইরে এসে দাঁড়ায়। খাঁ খাঁ করছে দুপুর। গ্রীষ্ম ও বর্ষার রেশ এখনো কেটে যায়নি। তবু এই বারান্দায় দাঁড়ালে আকাশের ঐক্য মেঘ, উঠোনের ধারে কিছু কাশফুল আর রোদের রং দেখলে শরৎকাল টের পাওয়া যায়। খানিকক্ষণ প্রকৃতির দিকে চেয়ে দীপনাথ মাথা নীচু করে বারান্দার পাশে জুতোর রবার সোল ঘষতে থাকে। বউদিকে আজ একটু অন্যরকম লাগছে না? একটু যেন বিব্রত! একটু অন্যরকম।

দীপনাথ সিঁড়ি ভেঙে নেমে উঠোন পেরোলো। বাবার ঘরের দরজা আবজানো। নিঃশব্দে ঢুকে দেখল, তিনি কাত হয়ে শুয়ে ঘুমোচ্ছেন।

তাকে না জাগিয়ে বেরিয়ে এল দীপ। 'এ-ঘর সে-ঘর ঘুরে কাউকে না পেয়ে সে এল ভাবন-ঘরে। দরজা আবজানো দেখে ঠেলে ঢুকেই থমকে গেল সে। মেজদা! কী হয়েছে

মেজদার ?

চোখের পাতা মেলে অনেকক্ষণ ঘোর-ঘোর আচ্ছন্ন ভাবটায় ডুবে থাকে শ্রীনাথ ।
তারপর চেতনায় ফেরে ।

মেজদা !

দীপু !

তোমার কী হয়েছে ?

আমাকে এখান থেকে নিয়ে যাবি, দীপু ?

কোথায় যাবে ?

পালিয়ে যাবো । এরা কী ভীষণ ডেনজারাস্ তা জানিস না । এরা মানুষ মারে, বোমা
বানায় ।

এরা কারা ?

তুযা, সরিৎ ।

কী যা তা বলছ ?

কেউ বিশ্বাস করবে না, জানি । তবু বলছি, দে আর মারডারারস্ । সজলকে জিজ্ঞেস
করিস, বোমা বানায় কি না ।

বোমা বানানো অত সোজা নয় । আর বোমা দিয়ে কী হবে ?

কাল রাতে সরিৎ এ বাড়িতে বোমা ফাটিয়েছে ।

সরিৎ ?

তোর বউদি অবশ্য বলেছে, দুটো ছেলে রাতের বেলা তাকে খুন করতে এসেছিল ।
পুলিসকেও তাই বলেছে । পরে সজলের কাছ থেকে জেনেছি, আসলে বোমা বানায় সরিৎ
নিজেই । তুযা তার জন্য টাকা দেয় ।

একটু বিরক্তির গলায় দীপনাথ বলে, আচ্ছা, সে সব কথা পরে হবে । তোমার কী হয়েছে
আগে বলো তো !

ওসব শুনে আজ সকালে আমি কেমন নার্ভাস হয়ে কোলাপস্ করলাম ।

শোনো মেজদা, এখনো তোমার স্বাস্থ্যে অ্যালকোহলের গন্ধ আসছে । নার্ভাস তুমি
এমনিতে হওনি, মদ খেয়ে কোলাপস্ করেছেো ।

না, না । বিশ্বাস কর । সে শুধু খেয়ালি ভাঙতে একটু খেতে হয় বলে খাওয়া । আসল
কারণ অন্য ।

অনেক আগেই তোমাকে ডাক্তার দেখাতে বলেছিলাম । আমার সন্দেহ ভিতরে ভিতরে
তোমার ডায়াবেটিস পাকিয়ে উঠছে ।

দূর ! মদ খেলে কোনো অসুখ হয় না ।

একথাটা মাতাল বন্ধুদের কাছে শিখেছো । কথাটা কিন্তু সত্যি নয় ।

মরলে মরব । রামে মারলেও মারবে, রাবণে মারলেও মারবে ।

রাবণটা কে ?

আমাকে এখান থেকে নিয়ে যা দীপু । আই বেগ টু দী ।

শেষ কথাটা ছেলেবেলায় পড়া ইংলিশ সিলেকশনের কোনো পাঠ্যাংশ থেকে মুখস্থ বলল
শ্রীনাথ । দীপনাথ অবশ্য হাসল না । গভীর মুখে বলল, নিজের কী অবস্থা করেছেো যদি
নিজের চোখে একবার দেখতে !

এরা আমাকে স্লো পয়জন করেনি তো, দীপু ?

তোমাকে কে শ্রো পয়জন করেছে তা কি জানো না ? দীপনাথ সামান্য ঝাঁঝ মিশিয়ে বলে। বলেই হেসে ফেলে। শ্রীনাথের দুর্বল ন্যাতানো একটা হাত মুঠোয় নিয়ে বলে, অন্যের ঘাড়ে কেন দোষ চাপাচ্ছে ? আমি তো তোমাকে চিনি।

তোরা সবসময়ে কেন আমারই দোষ দেখিস ? আর কোনো দিকে তাকাস না কেন ? একটা কালো মেয়েমানুষ এতগুলো লোককে কি করে হিপনোটাইজ করে রাখে বল তো ?

তোমাকে তো পারেনি !

আমাকে পারা খুব সোজা নয়। আই হ্যাভ ড্রাংক লাইফ টু দি লীজ।

এটাও কোটেশন। কিন্তু দীপনাথ এবারও হাসল না। বলল, তোমাকে পারেনি। বলুকেও পারেনি।

বলুকে গুণ্ডা দিয়ে মার খাইয়েছিল, কে জানিস ?

আমি হলেও তাই করতাম।

নিজের মায়ের পেটেব ভাইকে গুণ্ডা দিয়ে মার খাওয়াতিস ?

না। নিজের হাতেই মারতাম। বউদি মেয়েমানুষ নিজের হাতে মারতে পারেনি বলে অন্যকে দিয়ে মার দিয়েছে।

হতাশ শ্রীনাথ চোখ বুজে বলে, তোরা অন্ধ। তোবা কোনোদিন টুথটাকে ধরতে পারবি না। ও তোদের যাদু করে রেখেছে।

বউদি যদি যাদু চালিয়ে থাকে তবে তুমিও কিছু পাল্টা যাদু চালাও না। কে বারণ করছে ?

ও হচ্ছে লেডী ম্যাকবেথ। অ্যামবিশাস, ক্রুয়েল।

সব বুঝলাম। তবু বউদি তার কর্তব্য করে যাচ্ছে। এ বাড়ির দরজা এখনো আমাদের মুখের ওপর বন্ধ করে দেয়নি। বাবাকে আমবা কোনো ভাই-ই দেখিনি। বউদি দেখছে। তোমার লজ্জা করা উচিত, মেজদা।

শ্রীনাথ চুপ করে থাকে।

দীপনাথ খানিকটা সময় ছাড় দিয়ে বলে, কাল রাতে বোমা কিভাবে ফাটল তা জানো ?

না। তুষা মাঝরাতে এসে ঘুম থেকে তুলে আমার কাছেই জানতে চেয়েছিল বোমাটা কে বা কারা মেরেছে।

তার মানে বউদি তোমাকে সন্দেহ করে !

কে জানে ! হয়তো করে।

তুমি জানো কিছু ?

কী জানবো ? সকালে সজলের কাছে শুনে বুঝলাম, সরিং বোমা বানায়। হয়তো রাতে গোপনে বানাচ্ছিল, অ্যাকসিডেন্টালি ফেটে গেছে।

তাই যদি হয় তবে বউদি পুলিশে খবর দেবে কেন ? খবর দিলে তো নিজেদেরই ধরা পড়ার সম্ভাবনা। পুলিশ বাড়িটা তন্ন তন্ন করে দেখবেই।

শ্রীনাথ যুক্তিটা বোঝে। তবু মিনমিন করে বলে, কাল রাতে কী হয়েছিল তা জানি না। তবে সরিং যে বোমা বানায়.....

দীপনাথ একটু বিরক্ত হয়ে বলে, সজলের সব কথা বিশ্বাস কোরো না। ও বলে বেড়ায় আমি নাকি কুং ফু জানি, পঞ্চাশটা লোককে একা ঘায়েল করতে পারি। আসলে সজল একটু রোমাণ্টিক, অনেক কিছু কল্পনা করতে ভালবাসে।

সরিং এক নম্বরের গুণ্ডা, তুই জানিস না। স্টেশনের কাছে দুটো ছেলেকে চেন দিয়ে

এমন মেরেছিল !

তুমি সব কিছুকে গুলিয়ে ফেলছ। সরিৎ গুণ্ডা হলেই বা তোমার কি ? আর বউদিকেই বা ওর সঙ্গে এক করছ কেন ?

তোদের কিছুই বোঝানো যাবে না। তোরা বুঝতে চাস না।

তোমারই বা বেশী বোঝার দরকার কি ? দিবা খাচ্ছে, দাচ্ছে, চাকরি করছ, বউদিকে বেশী না ঘাঁটলেই হল।

তোরা তো তা বলবিই।

বোমাটা কোথায় পড়ল জানো ?

না। আমি ভিতরবাড়িতে যাইনি। শুনছি, তুষার শোওয়ার ঘরের বারান্দায়।

কী সর্বনাশ !

বোমা পড়া নিশ্চয়ই বিপজ্জনক। কিন্তু তার চেয়েও ভয়ের কথা, তুষা বলেছে বোমা যারা ফেলেছে তাদের জ্যান্ত ধরতে না পারলে মরা অবস্থায় ধরবে। তুষা যা বলে তা করে।

জানি, মেজদা।

ও কেমনধারা মেয়েমানুষ ?

দীপনাথের একবার বলতে ইচ্ছে হয়েছিল তুমি যেমনধারা পুরুষ। কিন্তু তা বলল না দীপনাথ। সে লক্ষ করল, অসুস্থ শ্রীনাথের চোখে-মুখে আতঙ্কের গভীর একটা ছাপ পড়েছে। তাই একটু কষ্ট হল দীপনাথের। সে বলল, তুমি মনে মনে বউদির একটা ভয়ংকর চেহারা বানিয়ে নিয়েছো বলে কষ্ট পাচ্ছে। আসলে হয়তো মানুষটা অত ভয়ংকর নয়।

তুই কিছু জানিস না।

তা হবে। কাল রাতে বউদিকে কেউ বোমা মেরেছিল এ খবর বউদি নিজে কিন্তু আমাকে বলেনি। লোকে খামোখা বউদিকে কেনই বা বোমা মারবে তাও আমি বুঝি না।

খামোখা নয়। একে এখানকার কেউই পছন্দ করে না।

পছন্দ যদি না করে, তবে সেটা বউদির দোষ নয়।

তোরা মাথাটা তুষা একেবারে চিবিয়ে খেয়েছে। তোরা তুষার ভাল দেখ, আমার তাতে কি ? শুধু আমার জন্য একটু আলাদা ব্যবস্থা করে দে। আমি ওর কাছ থেকে দূরে চলে যেতে চাই।

বিরক্ত দীপনাথ বলল, এখন একটু ঘুমোও, মেজদা।

শোন যাস না। রাতে আমার কাছে কে থাকবে ?

তার মানে ?

রাতে কারো আমার কাছে থাকা দরকার। আমি তুষা আর সরিৎকে বিশ্বাস করি না।

তোমার মাথাটা গেছে, মেজদা। কী আবোল-তাবোল বকছ ?

মোটাই আবোল-তাবোল নয়। যখন আমার ভালমন্দ একটা কিছু ঘটে যাবে তখন বুঝবি। বলতে বলতে শ্রীনাথ কয়েকবার উঠে বসার চেষ্টা করল। কিন্তু ক্লাস্তিতে পারল না। বালিশে আবার মাথা রেখে বলল, আমার কোনো অসুখ ছিল না। আজ সকালের চা-টা একটু তেতো তেতো লেগেছিল। চা খাওয়ার পর থেকেই—

দীপনাথ হাসল। বলল, তোমাকে মেরে বউদি বা সরিতের কী লাভ ?

শত্রুর শেষ রাখতে নেই।

তুমি কি বউদির শত্রু ?

ও তো তাই মনে করে।

কি করে বুঝলে ?

আমি বুঝব না তো কে বুঝবে ? কাল রাতে যখন তুমি আমার কাছে এসেছিল তখন মাথাটা গোলমেলে ছিল বলে ওর কথার অর্থ ধরতে পারিনি। এখন ভেবে দেখলাম, আসলে বোমা মারাব ব্যাপারে ও আমাকেই সন্দেহ করছিল।

দীপনাথ একটা মস্ত শ্বাস ছাড়ল। তারপর ঘড়ি দেখে বলল, তুমি আরো কয়েক ঘণ্টা ঘুমোও তো। ঘুমোলে উত্তেজনা, ভয় সবই কমে যাবে।

কিন্তু আজ রাতে আমার কাছে কে থাকবে ?

স্বপ্না নিতাইকে ডেকে এনে মেঝেতে শুইয়ে রেখে, যদি একা নিতান্তই ভয় পাও।

নিতাই ? নিতাই তো তুমি লোক ! এ বাড়িতে আমার লোক কেউ নেই, সবাই তুমি। আমার কাছে তুমি নিয়ে যা। তোর মেসে, জায়গা হবে না ?

দীপনাথ মেজদার মুখের ওপর কোনো কঠিন কথা বলতে পারল না। লোকটা ভয়ে সন্দেহে এত কাতর যে বেশী কিছু বললে আবার ভেঙে পড়বে।

দীপনাথ তাই মন-ভোলানো গলায় বলল, এ অবস্থায় তো যেতে পারবে না। শরীরটা সুস্থ হোক, আমি এসে নিয়ে যাবো।

ঠিক বলছিস ?

ঠিকই বলছি।

কিন্তু যদি স্নো পয়জন করে থাকে তবে সুস্থ হবো কি করে ? আবহাওয়া বিছানা ছেড়ে উঠতেই পারব না।

পারবে। একটু রেস্ট নাও, তা হলেই পারবে।

এ কাঠের আলমারিতে একটা ব্র্যাণ্ডির বোতল আছে, এনে দে তো।

এই শরীরে ব্র্যাণ্ডি খাবে ?

না খেলে যে ঘুম আসবে না। ডাক্তার একটা বোধহয় ঘুমের ওষুধ দিয়েছিল সকালে। তার এফেক্টটা কেটে গেছে। দুশ্চিন্তায় মাথাটাও গরম।

দীপনাথ উঠল। ইচ্ছে ছিল ব্র্যাণ্ডির বোতলটা বের করে ইচ্ছে করেই হাত থেকে ফেলে দিয়ে ভাঙবে। কিন্তু কাঠের আলমারিটা খুলে বোতলটা খুঁজে পেল না সে। বলল, কই ? নেই তো !

ভাল করে খুঁজে দেখ। ওপরের তাকে, ডানদিকে জামাকাপড়ের ভাঁজে ঢোকানো আছে।

দীপনাথ খুঁজল। পেল না। বলল, না নেই।

তা হলে সরিয়ে নিয়েছে। ওরা সব খোঁজ রাখে।

কেউ সরিয়ে নিলে তোমার ভালই করেছে। এ শরীরে খেলে তুমি বাঁচবে না।

এমনিতেও মরব। কথাটা তা নয়। ওরা আমার কিছুই গোপন বা ব্যক্তিগত থাকতে দেবে না। কেন যে আমার পিছনে লেগেছে ! তুমি মেসে আমার জন্য আজই একটা সীট বুক করবি গিয়ে।

করব। কিন্তু তোমার বাগান ?

বাগান ! শ্রীনাথ হতাশায় চোখ বুজে বলে, সেই গিরিশবাবুর মতো, বন্ধতে হয়— আমার সাজানো বাগান শুকিয়ে গেল।

আবার কোন্ট্রোল শুনে দীপনাথ হাসল। বলল, বাগান শুকোবে কেন ? তুমিই শুকিয়ে যাচ্ছে, মেজদার। এখন ঘুমোও।

বন্দা কোথাও গিয়েছিল। এখন ঘরে এসে ঢুকেই বলল, এ কী ! বাবু জাগলেন কখন ?
দীপনাথ একটু বিরক্তির সঙ্গে বলে, তুমি রুগীর দেখাশুনো করছ নাকি ?

আজ্ঞে হ্যাঁ।

কোথায় গিয়েছিলে ? এরকম একা ঘরে ফেলে যাওয়া উচিত হয়নি।

বড় গরুটা খোঁটা উপড়েছে শুনে ধরতে গিয়েছিলাম। বড় তেজী গাই। অন্য কাউকে
মানে না।

আর যেও না।

আচ্ছা। বাবু, একটু দুধটুধ কিছু আনি ?

শ্রীনাথ আতঙ্কের সঙ্গে বলে, না, না। আমি কিছু খাবো না। তুই কাজে যা, আমি ভাল
আছি।

মাঠানকে একটা খবর দিই গে ?

কোনো দরকার নেই। আমি এখন ঘুমোবো।

বলে শ্রীনাথ পাশ ফিরে কোলবালিশ আঁকড়ে চোখ বোজে। আত্মরক্ষার এর চেয়ে ভাল
পদ্ধতি সে আর খুঁজে পায় না।

দীপনাথ মাথা নেড়ে ইঙ্গিতে বন্দাকে ঘরের বাইরে যেতে বলে। বন্দা চলে গেলে
শ্রীনাথের কানের কাছে মুখ নিয়ে আস্তে আস্তে বলে, কোনো ভয় নেই। ঘুমোও।

ঘুম আসবে না। দেখ তো টেবিলে ঘুমের কোনো ওষুধ আছে কি না।

দীপনাথ টেবিলে একটা ট্র্যাংকুইলাইজারের ছোটো শিশি পেয়ে গেল। একটা বড়ি
শ্রীনাথকে গিলিয়ে দিয়ে খানিকক্ষণ অপেক্ষা করল সে। শ্রীনাথ খুবই অবসন্ন ছিল।
সকালের ঘুমের ওষুধের ক্রিয়াও রয়েছে ভিতরে। ফলে দশ মিনিটের মধ্যে শান্তভাবে
ঘুমিয়ে পড়ে।

দীপ বেরিয়ে এসে দরজাটা টেনে দেয়। তার ভূ কোঁচকানো, মনটা ভার। মানুষের
এরকম ভয়ংকর মানসিক যন্ত্রণার চেহারা সে খুব কমই দেখেছে, যতটা শ্রীনাথের মধ্যে দেখা
গেল। শ্রীনাথের আর যেটুকু অবশিষ্ট আছে সেটুকু কুরে কুরে খেয়ে নেবে ঐ অবিশ্বাস আর
সন্দেহ।

ভেতরবাড়িতে যাওয়ার রাস্তার ধারে একটা গাছতলায় ঠেস মেরে বসে রইল দীপনাথ।
সাড়ে চারটের সময় ফটক খুলে বইয়ের ব্যাগ কাঁধে সজল ঢুকল।

সজল ! দীপনাথ কোমল স্বরে ডাকে।

বড়কাকা ! সজলের ক্লান্ত মুখ উজ্জ্বল হয়ে ওঠে, কখন এলে ?

বেশীক্ষণ নয়।

সজল এসে তার হাত ধরে বলে, ভিতরে চলো ! মা রোজ তোমার কথা বলে।

তোমার মার সঙ্গে দেখা হয়েছে।

বাবার খুব অবস্থা খারাপ, জানো ? আজ সকালে বাবার স্ট্রোক হয়েছে। ডাক্তার বলেছে,
অবস্থা এখন-তখন।

তোমার বাবার সঙ্গে এইমাত্র কথা বলে এলাম।

সজল অবশ্য এ কথায় অপ্রতিভ হয় না। হাসে। বলে, বাবা ভীষণ ভীতু।

তোমার সঙ্গে একটা কথা আছে সজল। তোমার জন্যই আমি অপেক্ষা করছিলাম।

কি কথা ?

তুমি কি তোমার বাবাকে বলেছো যে, সরিৎ বোমা বানায় ?

বোমা 'কই, না তো !

বোলানি ? দীপনাথ একটু অবাক হয় ।

সজল ঠিক বুঝতে পারছিল না, সত্য কথাটা বলা উচিত হবে কি-না । কিন্তু বড়কাকা তার ভীষণ প্রিয় । এই কাকার কাছে তার সব সত্যি কথা বলে দিতে ইচ্ছে করে । সে চোখ নামিয়ে বলে, আমি আসলে বাবাকে একটু ভয় খাওয়ানোর জন্য বানিয়ে বলেছিলাম ।

কাজটা ভাল করেনি । তোমার বাবা খুবই ভয় পেয়েছেন । তা ছাড়া কথাটা পাঁচ কান হলে তোমার মা আর ছোটো মামাও বিপদে পড়বেন । তুমি কি তা চাও ?

আমি আর কাউকে বলিনি ।

বোলো না । এখন যাও হাত-মুখ ধুয়ে বাবার কাছে গিয়ে একটু বোসো । বাবাকে বোলো, তুমি বোমা বানানোর কথাটা বানিয়ে বলেছো ।

বাবা যদি রাগ করে ?

করবে না । বরং খুব খুশি হবে । আমিও ও-ঘরেই থাকবোখন, ভয় নেই ।

আচ্ছা । বলে মাথা নেড়ে চলে গেল সজল ।

দীপ উঠে বাগানের মধ্যে হেঁটে বেড়াতে লাগল খানিক এলোমেলো উদ্দেশ্যহীনভাবে । অভিশাপ বলে কিছু মানে না সে । কিন্তু আজ মনে হচ্ছে, বড়দা মল্লিনাথের এই গোটা বাড়ি এবং সম্পত্তির ওপর একটা অভিশাপ ছায়া বিস্তার করে আছে শকুনের মতো । এখানে আসার আগে অবধি শ্রীনাথ বা তৃষা সুখেই ছিল তো ! যেই এ বাড়ির মৌরসী পাড়া পেল তখন থেকে জটিল থেকে জটিলতর হয়ে উঠল ওদের জীবন । দুর্ব্বহ হল বেঁচে থাকা । এখন তার সন্দেহ হচ্ছে, শ্রীনাথ হয়তো খুব বেশীদিন বাঁচবেও না । বড়দা মল্লিনাথ গেছে, এখন শ্রীনাথও যদি যায় তবে সেটা বড় দুঃখের হবে ।

॥ আটচল্লিশ ॥

এ বাড়িটা অভিশপ্ত কিনা তা অনেক ভেবেও স্থির করতে পাবল না দীপনাথ । প্রকৃতপক্ষে অভিশাপ-টাপ গোছের কিছুকেই সে বিশ্বাস করে না । তার ঈশ্বরবিশ্বাস বলেও তেমন কিছু নেই । সে ভূত-প্রেতও মানে না বহুকাল । তবু বড়দা মল্লিনাথের এই শখের বাড়ির বাগানে বসে সে আজ এক দীর্ঘশ্বাস ও অভিশাপকে টেব পায় ।

যখন গরীব ছিল তখনই ভাল ছিল মেজদা । যেই বড়দার সম্পত্তি পেল অমনি সত্যিকারের গরীব হয়ে গেল । আজ শ্রীনাথ ও তৃষার সমস্যা বোধ হয় চিকিৎসার অতীত । দুটো মানুষের মধ্যে ফেনিয়ে উঠেছে ব্যক্তিগত ও বিচিত্র শত্রুতার জটিলতা । তার মধ্যে তৃতীয় কোনো মানুষ ঢুকতেই পারবে না ।

আজ মেজদার জন্য খুবই চিন্তিত হয়ে পড়ে দীপনাথ । মাথা নীচু করে ঘাস ছিঁড়ছিল সে । এমন সময় সজল খুব কাছ থেকে ডাকল, বড়কাকা !

দীপ মুখ তুলে হাসে, বোলো ।

সজলের মুখশ্রীতে তার মায়ের আদল । কিন্তু লম্বাটে গড়ন আর চোখমুখে নিভীক এক দৃঢ়তার ভাব থাকায় তাকে ঠিক শ্রীনাথের ছেলে বলে মনে হয় না বটে । এটুকু মল্লিনাথের । বউদি কথাটা সেদিন স্বীকার করেনি । স্বীকার করার দরকারও নেই । সজল বড় হলে কথাটা আপনি স্বীকৃতি পেয়ে যাবে ।

আগে দীপ, পিছনে সজল ভাবন-ঘরের বারান্দায় উঠে এল । দরজা ভেজানো । ঠেলে

ঢুকবার মুখে বন্দা পথ আটকাল, কোথায় ঢুকছো এসে বাবুরা ? রুগীর ঘর যে ! অমন ছটছাট ঢুকলে হবে কেন ?

দীপ মৃদুস্বরে বলে, রুগীর ভালর জন্যই আসা ।

পিছন থেকে সজল হুমকি দিয়ে ওঠে, তোমার সব তাতেই অত সদরি কেন বলো তো বন্দাদি ! মারব একদিন এমন ঝাপড় ।

সজলের একখানা হাত নিঃশব্দে চেপে ধরে দীপনাথ এবং সজল চুপ করে যায় ।

বন্দা বলে, বাবু এখন ঘুমোচ্ছে । একটু আগে অবুধ দিয়েছি, কিন্তু খেল না ।

কেন খেল না ? দীপনাথ জিজ্ঞেস করে ।

ঠোট উন্টে বন্দা বলে, ভগবান জানে । ঘুমের ঘোরে ভুল বকছিল নাকি, বলল তো অবুধে বিষ আছে ।

সত্যিই ঘুমিয়েছে তো ?

মটকা মেরে পড়ে থাকলে ঠিক বুঝতাম । তা নয় । নাক ডাকছে । পা টিপে টিপে এসে দেখে যাও না ।

দীপনাথ আর সজল নিঃসাড়ে ঘরে ঢোকে । শ্রীনাথ বাঁ-কাতে শুয়ে বাস্তবিকই ঘুমোচ্ছে । শিশুর মতো অসহায় গভীর ঘুম ।

দুজনে আবার নিঃসাড়ে বেরিয়ে আসে ।

সজল বলে, বড়কাকা, তা হলে কি হবে ?

তোমার বাবা যখন ঘুম থেকে উঠবেন তখন এসে সত্যি কথাটা এক ফাঁকে জানিয়ে যেও ঠকে ।

আচ্ছা ।

বাবাকে ভালবাসো তো সজল ?

সজল হাসে, ঋণা নীচু করে বলে, বাসি । তবে বাবা একটু কেমন যেন । আর সকলের মতো নয় ।

তা হোক । সবাই তো সমান হয় না । বাবাকে একটু ভালবেসো । দুনিয়ায় খুব কম লোকই তোমার বাবাকে ভালবাসে । তুমি কিন্তু বেসো ।

আচ্ছা ।

আর একটা কথা ।

কী ?

তোমার বাবা কাল রাতের ঐ বোমার পর থেকে খুব ভয়ে ভয়ে আছে । ঠাঁর সন্দেহ কেউ ঠেকেও খুন করবে । তুমি এখন থেকে বাবার কাছে থেকো । পারবে ?

মাকে রাজী করাও, পারব ।

তোমার মাকে আমি বলে যাবো ।

কিন্তু মা রাজী হবে না ।

কেন ?

বাবা যে মদ খায় । মাতাল হলে যা তা বিক্রী গালাগাল দেয় ।

সে অন্য সময়ে । এখন তোমার বাবা অসুস্থ । মদ খাওয়া বা গালাগাল দেওয়ার প্রবণ ওঠে না ।

বলছি তো, মা বললে থাকব ।

সজলকে ভিতরবাড়ি পর্যন্ত আর টেনে নিল না দীপ । মাঝপথে ছেড়ে দিয়ে বলল, এবার

খেলতে যাও ।

সজল এক ছুটে ফটক পেরিয়ে পালাল ।

দীপনাথকে খুঁজতে হল না । ভিতরবাড়িতে ঢুকবার মুখেই বউদির সঙ্গে দেখা । ট্রেতে তোয়ালের ঢাকনা দেওয়া খাবার চাকরের হাতে সাজিয়ে নিয়ে তৃষা ভাবন-ঘরে যাচ্ছে ।

দীপ বলল, দাদা ঘুমোচ্ছে । অঘোর ঘুম ।

তৃষা একটু শুকনো মুখ কবে বলল, দুপুরেও প্রায় কিছু খায়নি ।

এখন জাগিয়ে খাবার দিতে যেও না । জাগলে বরং দিও । দীপনাথ সতর্কভাবে বলে । সে জানে বিষপ্রয়োগের ভয়ে শ্রীনাথ খাবার দেখলে ভয় পাবে, চেষ্টামেচিও করতে পারে । দীপনাথ মণিদীপার উপস্থিতিতে ঘটনাটা ঘটতে দিতে চায় না ।

তৃষা চাকরকে বলে তবু, ট্রেটা বৃন্দাকে পৌঁছে দিয়ে আয় । বলিস বাবু জাগলে দুধটা যেন গরম করে দেয় ।

শোনো বউদি । দীপনাথ খুব সিরিয়াস মুখে বলে ।

কী বলো ।

আজ থেকে দাদাব কাছে রাত্রিবেলা সজলকে রেখো ।

সজলকে ! কেন বলো তো ?

দাদা তো ভীতু মানুষ জানোই ।

তা খুব জানি । কিন্তু তাব জন্য সজল কেন । সবিং আছে, মংলা আছে, নিতাই আছে ।

দাদার কাছে সজলের থাকাই ভাল ।

সজল ! না না । তা হয় না ।

কেন হয় না ?

সজল ছেলেমানুষ, সে কী কববে ?

কিছু করতে হবে না, শুধু থাকবে ।

কগী পাহারা দেওয়া কি ছেলেমানুষের কাজ ? বরং আমি নিজেই থাকবখন । আমার তো ভয়ভীতি বলতে কিছু নেই ।

তবু সজলকে রাখবে না ?

তুমি আচ্ছা এক ছেলেমানুষ । বলছি না যে, কগীকে দেখাশোনা করতে হলে সজলকে দিয়ে হবে না ।

তা অবশ্য ঠিক । তবু সজল যদি ঘরে থাকে তবে দোষ কি ? দাদা যখন ভাল হয়ে উঠবে তখন প্রতি রাত্তাই যদি সজল ওঁর কাছে থাকে তবে বোধ হয় ভালই হবে । মেজদাকে একটু বুঝতে দেওয়া দরকার যে ওর আপনজন কেউ আছে ।

এ কথায় স্পষ্টতই তৃষার চোখেমুখে একটা দুর্ভাবনা ফুটে ওঠে । সে বলে, পাগল হয়েছে ? রোজ রাতে গিয়ে ও-ঘরে থাকলে একদিন সজলের গলা টিপে ধরবে না !

অবাক দীপনাথ বলে, কে ধরবে ? মেজদা ?

তৃষা একটু লজ্জা পায় । বলে, সজল আমার একটামাত্র ছেঁলে, জানোই তো । ওকে কোনো রিস্কের মধ্যে ফেলতে চাই না ।

রিস্ক কিসের ?

আছে । সব তুমি বুঝবে না ।

একটু বিরক্তির গলায় দীপনাথ বলে, রিস্কই যদি থাকবে তবে সজল সঙ্কের পর মেজদার কাছে পড়া বুঝতে যায় কি করে ?

যায়, কিন্তু কখনো একা যায় না। সজল নিজেও জানে না, ওর পিছনে লোক থাকে। ঘরের আশেপাশেও আমি পাহারা রাখি। চোখের আড়াল হতে দিই না।

এ কথাটির মধ্যে যেন মেজদাকে জড়িয়ে তাদের পুরো বংশের ওপরেই একটা কলঙ্ক আরোপ করা হল। অপমানে হঠাৎ দীপনাথ তেতে ওঠে, লাল হয়। কিন্তু মুখে জবাবও আসে না। শ্রীনাথ তাদের পুরো পরিবারকে এত দূর অধঃপাতে টেনে নামিয়েছে।

তুষা মুখ তুলে ভিখিবিব মতো গলায় বলে, দোষ নিও না। ওকে বিশ্বাস করার উপায় আমার নেই। আমি অনেক ঠেকে, অনেক ঠেকে অনেক শিখেছি।

দীপনাথ একটা দীর্ঘশ্বাস ছাড়ল। বলল, ঠিক আছে।

তোমার মেজদা কি তোমাকে কোনো ভয়ের কথা বলেছে?

বলেছে।

কি বলেছে?

দীপনাথ আনমনে বলে, ওই ভয়টায়ের কথা।

তুষা আর প্রসঙ্গটা বাড়ায় না। বলে, এসো। উনি বসে আছেন।

থাকুন না। উনি তো তোমাদের কাছেই এসেছেন।

তুষা বলল, তা বটে। তবু তোমার একেবারে বেপান্তা থাকা ভাল নয়। কিছু ভাববে। ওনা অত ভাবে না।

তুমি তবে কি কবরে এখন?

একা একা একটু ঘুরে বেড়াই।

আজ এখানে এসে তোমার ভাল লাগছে না।

না বউদি। মনটা ভাল নেই।

তোমার বউদির কপালটাই খারাপ।

কাল বাতে কারা এসে নাকি তোমাকে বোমা মেরেছিল! কই, বলোনি তো!

তুষা মুখ টিপে হেসে বলল, মরলে তো বাঁচতাম।

গৈয়ো মেয়েদের মতো কথা বোলো না। কী হয়েছিল?

কি করে বলব? কুকুবটা চোঁচাছিল শুনে উঠে দরজা খুলতেই ভীষণ কাণ্ড।

তোমার কোথাও লাগেটোগিনি তো?

না। আমার কই-মাছের প্রাণ। লাগলেও মরতাম না।

তুমি কাউকে সন্দেহ করো?

তুষা চিন্তিত মুখ করে বলে, কাকে সন্দেহ করব? আমার শত্রুর অভাব তো নেই, কিন্তু এতটা কেউ করবে বলে ভাবিনি কখনো।

মেজদাব কোনো হাত আছে বলে সন্দেহ হয়?

তুষা বড় বড় চোখে দীপনাথের মুখের দিকে অকপটে চেয়ে বলে, হঠাৎ একথা কেন?

মেজদাই বলছিল, তুমি নাকি ওকে সন্দেহ করছ।

তুষা মাথা নেড়ে ধীরে কেটে কেটে বলে, না। সে প্রথম একটু সন্দেহ হয়েছিল। কিন্তু পরে ভেবে দেখলাম, মেজদাবও অতটা করবে না। তার সেই সাহস নেই। তবে ওর শুভাকাঙ্ক্ষী তো অনেক। তারা কেউ এ কাণ্ড করেছে কিনা কে বলবে?

মেজদা লোক ভাল নয় বউদি, সবাই জানে। তবু বলি, আমাদের চার ভাইয়ের মধ্যে মেজদা আব সোমনাথের কোনো কিলার ইনস্টিংক্ট নেই। ওরা রক্ত দেখলে ভয় পায়।

বাকি দুজন? বলে তুষা চিকচিকে চোখে তাকায়। মুখ টিপে হাসে।

বড়দার ছিল। ইন ফ্যাকট বড়দা এক-আধটা খুনখারাপি করেছে বলে শুনলেও আমি অবাক হবো না।

আর তুমি ?

আমার কথা আমি নিজে বলি কি করে ? তবে আমাকে যদি কেউ কোণঠাসা করে ফেলে, যদি মরিয়া করে তোলে তা হলে কাউকে খুন করা আমার পক্ষে হয়তো তেমন অসম্ভব নয়।

মাগো ! বোলো না, শুনলে ভয় করে।

দীপনাথ খুব কষ্ট করে মুখে হাসি টেনে বলল, ঢঙ কোরো না বউদি, আমি তোমাকে জানি। ভয়ডর তোমার কুষ্ঠিতে লেখা নেই। বোমা মারার ব্যাপারে তোমার মেজদাকে সত্যিই সন্দেহ হয় না তো !

বললাম তো, না।

তা হলে সজলকে মেজদার কাছে রেখে স্বস্তি পাওনা কেন ?

তৃষা একটু থমকে গিয়ে বলে, তুমি আজকাল বড্ড জেরা করো দীপু। সব কথা তোমাকেও বলা যায় না। তবু জেনে রাখো, আক্রোশ মানুষকে অনেক দূরে টেনে নামাতে পারে।

দীপনাথ চিন্তিত মুখে বলে, তাই দেখছি।

আমার মতো বয়স হোক, আরো অনেক কিছু দেখবে।

দীপনাথ ভুকুটি কবে বলে, তোমার বয়স কত ?

তোমার চেয়ে পাঁচ-ছ বছরের বড়।

ইয়ার্কি কোরো না। বিয়ের সময় তুমি নিতান্ত ছুকরী ছিলে। খুব বেশী হলে তুমি আমার সমান বয়সী বা এক-আধ বছরের ছোটোই হবে।

খুব টেক্সা মারার শখ, না ?

তোমারই বা অত বুড়ো সাজাব বাই কেন ? এই সেদিনও রঙিন শাড়ি পরা নিয়ে ঝামেলা করছিলে।

বয়স হয়েছে গো। তুমি যতই আমাকে খুকি দেখতে চাও না কেন, বয়স বসে নেই। এখন ঘরে চलो তো।

তোমাব ঘর খুব সুন্দর বউদি, কিন্তু আমার বাইরেটাই বেশী ভাল লাগছে।

তুমি কি মণিদীপাকে লজ্জা পাও দীপু ?

যাঃ, কী যে বলো। লজ্জার ব্যাপার নয়, তবে অনারেবল ডিসট্যাপ্স বজায় রাখি মাত্র।

আমার রিপ্রেজেন্টেটিভ হয়ে একটু গিয়ে ওঁব কাছে বোসো। আমি গিয়ে তোমাদের খাবাবদাবারের ব্যবস্থা দেখি।

খাওয়ার দরকার নেই। যত দূর জানি মিসেস বোস ডায়েটিং করছেন, আর আমার আজকাল খিদে পায় না।

তবু। বহুদূর থেকে এসেছো। এসো, গুজজনদের কথা শুনতে হয়।

কিন্তু ঘরে মণিদীপা ছিল না। আশেপাশে কোথাও তাকে ঝুঞ্জে পাওয়া গেল না।

নিজের মস্ত ভ্যানিটি ব্যাগে লুকিয়ে দুটো জিনিস এনেছিল মণিদীপা। একটা ছোটো ক্যামেরা আর একটা টেপ-রেকর্ডার।

তৃষা গৃহকর্মে গেলে সে ফাঁকা ঘরে একটুকুণ বসে ছিল। তারপর পায়ে পায়ে বেরিয়ে

এল বাইরে ।

আগেরবার এসে একটা ছোটোখাটো আঙ্গুঞ্জ বিস্তর মৌমাছির চাক দেখে গিয়েছিল । গাছের জড়াজড়ির মধ্যে নীচে ঘন ছায়া । সেই জায়গায় সারাক্ষণ সেতারের ঝালার মতো মৌমাছির গুঞ্জন । তা ছাড়া চারদিক থেকে আচমকা আচমকা অদ্ভুত পাখির ডাক চলে আসে । গাছের পাতার ভিতর দিয়ে দমকা বাতাস বয়ে যাওয়ার রহস্যময় শব্দ ওঠে ।

জায়গাটা খুঁজে বের করতে কষ্ট হল না তার । বাড়ির পিছন দিকে একটু চোখের আড়াল জায়গা । কেউ তেমন নজর দেয়নি বলে এদিকটায় ঝোপঝাড় গজিয়ে উঠেছে । এখনো মাঝে মাঝে শরতের খেয়ালখুশির বৃষ্টি আসে বলে মাটি স্যাঁতস্যাঁতে ভেজা ।

কুঞ্জবনের মধ্যে বড় বড় ঘাস, ঘন ছায়া । জমজমাট শব্দের আসর বসেছে । নাক-মুখ ঝুয়ে উড়ে যাচ্ছে মৌমাছি । মণিদীপার গায়ে একটু কাঁটা দেয় । টেপ-রেকর্ডারটা বের করে ঘাসের ওপর বাথে সে । বোতাম টিপে যন্ত্রটা চালু করে সে সরে আসে বাইরে ।

পঁয়ত্রিশ মিলিমিটারের ক্যামেরায় এলোপাথাড়ি ছবি তুলতে থাকে । চারদিকে শুধু গাছপালা । এই জঙ্গলের ছবি তুলে তেমন লাভ নেই ভেবে মণিদীপা একটা জুঁসই পাখি খুঁজতে খুঁজতে বাড়ির বিশাল সীমানার মধ্যে অনেকটা চলে গিয়েছিল । আচমকা কে ডাকল, সেলাম মেমসাহেব !

মণিদীপা তাকিয়ে দেখে একটা অত্যন্ত হতদরিদ্র কুটিরের দরজায় সাধুগোছেব একটা লোক দাঁড়িয়ে মাথা চুলকোচ্ছে ।

গরীব দেখলেই মণিদীপার আবেগ জেগে ওঠে । সে বলে, তুমি কি এই বাড়ির কাজের লোক ?

ঠিক কাজের লোক নই মেমসাহেব, আমি হিঁচি যোগী নিত্যানন্দ । অনেকে নিতাই অবধূতও বলে । মারণ উচ্চাটন বশীকরণ যাঁ দরকাব বলবেন, কাজ হয়ে যাবে ।

মণিদীপা সাধু-সন্তদের পাতা দেয় না । শুধু এ-লোকটা গরীব বলেই তার যা কিছু কৌতূহল । সে দু পা এগিয়ে গিয়ে বলে, এই ঘরে তুমি থাকো ?

আজ্ঞে । নিতাই এক পা পিছিয়ে যায় ।

দেখি তো তোমার ঘরটা ।

এই চোস্ত মেয়েটা তার ঘরে ঢুকবে ভেবে নিতাই একটু বিপদে পড়ল । এ-বাড়িতে যারা আসে তাদের তো এ-ঘর ঢোকার কথা নয় । বউদি শুনলে আবাব না তার বাপাস্ত করে ছাড়ে । তাই সে বলল, আজ্ঞে, ভিতরে ভয়ের জিনিস আছে । কবোটি, কঙ্কাল আবো কত কি ! মেয়েদের ঢোকা বাবণ ।

তুমি ঐ সব বুজঝুঁকি করে বেড়াও ?

এ সব কথা নিতাই অনেক শুনেছে । মাথা চুলকে বলল, বুজঝুঁকি হবে কেন মেমসাহেব, খাঁটি জিনিস লোকে সহজে চিনতে চায় না । একটা কথা বলব, রাগ করবেন না ? না, বাগের কি ? বোলা ।

আমার একটা ফোটো খিচে দেবেন ?

মণিদীপা হাসে, দেবো না কেন ? এসো, আর একটু আলোর দিকে সরে এসো ।

দাঁড়ান তা হলে, জিনিসপত্র সব নিয়ে আসি ।

বলে নিতাই মুহূর্তে ঘরের মধ্যে ঢুকে গেল । কয়েক মিনিট বাদে যখন বেরিয়ে এল তখন তাকে আব চেনা যায় না । সর্দাঙ্গে ধূনির ছাই মাখা, গলায় হাড়েব আর রুদ্রাক্ষের দু-গাছি মালা, এক হাতে নবকরোটি পানপাত্র, অন্য হাতে সিঁদুর মাখা ত্রিশূল ।

মণিদীপা হেসে ফেলে বলে, তোমাকে একদম ক্লাউনের মতো দেখাচ্ছে ।
 খুব জুং করে তুলবেন । সবটা যেন ওঠে ।
 বলে খুব গভীরভাবে বুক চিতিয়ে দাঁড়ায় নিতাই ।
 মণিদীপা তার গোটা তিনেক ছবি তুলে নিয়ে বলে, তুমি তো সাধু মানুষ, ফটো দিয়ে কী
 করবে ?

যজমানদের দেবো । তাবা পূজো করবে ।

বলো কি ?

নিতাই খুব লজ্জার সঙ্গে হেসে বলে, আঙে তারা খুব মানে আমাকে ।

ধর্মটম সব নিষ্কর্মাদের ব্যাপার । তুমি আর কোনো কাজটাজ করো না ?

এই করেই বলে সময় পাই না ।* আর কাজ করব কখন ?

মণিদীপা বলল, চলো তোমার ঘরটা দেখাবে আমাকে ।

এবার নিতাই খাতিল করে বলল, আসুন আঙে । সাধু-সন্ন্যাসীর ঘর আপনার হৃদয়ে
 অসুবিধে হবে ।

না, না, আমার কোনো অসুবিধে নেই ।

সারা বাড়ি আর বাগান তোলপাড় করে ঝুজতে ঝুজতে অবশেষে যখন দীপনাথ
 নিতাইয়ের ঘরে উঁকি দিল তখন চোখ কপালে উঠল তার । নিতাইয়ের পঞ্চমুখী
 ওপর মণিদীপা বাবু হয়ে আঁট করে বসে আছে । নিতাই তার সামনে মাটিতে ছব
 কেটে বাগ
 মাঝার কাঁদা দেখাচ্ছে ।

॥ উনপঞ্চাশ ॥

ঝোপড়ার দবজায় দীপনাথ উঁকি দিতেই মণিদীপা মুখ তুলে চাইল । একটি হেসে ইঙ্গিতে
 নিতাইকে দেখিয়ে বলল, হি ইজ এ কমপ্লিট ফ্রন্ড ।

সো অ্যাম আই অ্যাণ্ড সো ইউ অল আব । এখন চলুন তো, বউদি আপনাকে ভীষণ
 ঝুজছেন । দীপনাথ কথা বলতেই ঝোপড়ার ভেতরকার চিমসে কটু বদখত একটা গন্ধ পেয়ে
 নাক কঁচকে বলে, এই বিকট গন্ধের মধ্যে বসে আছেন কি করে ?

মণিদীপা উঠে আসছিল । বাইরে এসে মিষ্টি হেসে বলল, আমি এক সময়ে কলকাতায়
 বস্তুতে বস্তুতে সোশ্যাল ওয়ার্ক করেছি । নোংরা বদগন্ধ, আব্রু হান্ডার, পতাকা যদি সহ্য
 করতে পারেন তবে দেখবেন লোকগুলো খারাপ নয় । দে আর অল লাইক ইউ অ্যাণ্ড মি ।

অভিজ্ঞতাবলে দীপনাথ জানে, কথাটা সত্যি নয় । তবু সে তর্কে না গিয়ে বলল, আপনি
 অনেক কিছু পারেন দেখছি । আমি ক্ষাপা নিতাইয়ের ঝোপড়ায় এর আগেও বার কয়েক
 হানা দিয়েছি । ভিতরে ঢুকতেই গা ঘিনঘিন করেছে ।

মণিদীপা দীপনাথের পাশাপাশি হাঁটতে হাঁটতে বলে, বেচারার একটা বউ ছিল, আপনি
 জানেন ?

কে না জানে ? বউ পালানোতেই তো নিতাই পাগল হল ।

হাসছেন ? লোকটা যে বউকে অতটা ভালবাসত তার জন্য কষ্ট হয় না আপনার ?

হয় । আই অ্যাম অলওয়েজ উইথ দ্য হাজব্যান্ডস্ ।

জানি । ব্যাখ্যা করতে হবে না ।

এতক্ষণ পালিয়ে পালিয়ে আর কি কি করলেন ?

ঐ যাঃ ! বলে থমকে দাঁড়ায় মণিদীপা । আমার টেপ রেকর্ডারটা পড়ে আছে জঙ্গলের মধ্যে ।

কী সর্বনাশ ! টেপ রেকর্ডারও সঙ্গে এনেছেন নাকি ?

আনব না তো কি ? কলকাতায় বসে মৌমাছির শব্দ শুনব বলে....দাঁড়ান দেখে আসি— বলে মণিদীপা কুঞ্জবনের দিকে প্রায় দৌড়তে থাকে । পিছনে দীপনাথ ।

খাস জঙ্গলের ওপর ক্যাসেট শেষ হওয়া টেপ রেকর্ডারটা পড়েই ছিল । স্পিকারের ওপর পাখি নোংরা ফেলে গেছে । মণিদীপা রি-উইনড করে একটু শুনল শব্দটা । মুখ গোমড়া করে বলল, একদম ভাল সাউণ্ড আসেনি ।

দীপনাথ হেসে বলে, টেপ রেকর্ডারটা যে চুরি হয়ে যায়নি সেটাই ভাগ্য বলে জানবেন ।

আপনার সঙ্গে আমার তফাত কোথায় জানেন ?

কোথায় ?

আপনি সবসময়ে জিনিসটার কথা ভাবেন, তার পারপাসটার কথা ভাবেন না । আমার কাছে অনেক বেশী জরুরি হল মৌমাছির শব্দ, পাখির ডাক । আপনার কাছে তার চেয়ে ঢের বেশী দামী জিনিস এই যন্ত্রটা । আপনি এত অ্যান্টি-রোমাণ্টিক কেন বলুন তো !

তার মানে আমি আপনার চেয়ে অনেক বেশী বাস্তববাদী ।

আমি যে বাস্তববাদীদেরই সবসময়ে পছন্দ করি তা কিন্তু নয় ।

তা জানি । সেই জন্যই বোধহয় আপনি আমাকে কোনদিনই পছন্দ করেননি ।

মণিদীপা মৃদু একটু হাসল । তারপর বলল, আপনি বাস্তববাদী একথা কিন্তু আমি স্বীকার করিনি । আপনি রোমাণ্টিকও নন তা বলে ।

তাহলে আমি কি ?

আপনি ভীষণ হাঁদারাম ।

দীপনাথ হাসল বঁটে, কিন্তু এই খুকি চেহারার এঁচোড়ে পাকা মেয়েটাকে একটা গাঁট্রা মারবার জন্য তার হাত একটু নিসপিসও করছিল । ঘাসজঙ্গলে মিষ্টি ছায়ায় দুজন মুখোমুখি হাঁটু গেড়ে বসে । মুখ নীচু করে মণিদীপা ক্যাসেটটা যন্ত্র থেকে খুলে আনল । নিজের ভ্যানিটি ব্যাগ থেকে আর একটা নতুন দামী ক্যাসেট বের করে ভরল টেপ রেকর্ডারে ।

আবার টেপ করবেন নাকি ?

আগেরটা যে ভাল হ'ল না । এই ক্যাসেটটা দিয়ে দেখি । যন্ত্রটা গাছের ডালে বসালে বোধহয় ভাল হয়, তাই না ? ঐ নীচু মৌচাকটার কাছাকাছি টেপ রেকর্ডারটাকে একটু সেট করে দেবেন ?

আমাকে গাছে উঠতে বলছেন ?

গাছে ওঠেননি কোনদিন ?

বিস্তর । তবে সে ছেলেবেলায় । এই বুড়োবয়সে পড়ে গিয়ে মাজা ভাঙলে আপনি দায়ী ।

আপনি হাঁদারাম হলেও পড়ে যাওয়ার লোক নন । ক্যারিয়ারের গাছটিতে তো দিবা তরতরিয়ে উঠে যাচ্ছেন । আর এ তো সামান্য গাছ ।

মুখ শুকনো করে দীপনাথ বলে, দুনিয়ার যত খারাপ কি কেবল আমি ?

আপনি ভীষণ খারাপ । এখন জুতো খুলুন তো । নীচু গাছ, উঠতে কোনো অসুবিধে হবে না ।

উঠছি বাবা । ক্যারিয়ারিস্ট হওয়াও যে কী কষ্টের তা যদি বুঝতেন ! জুতো খুলতে

খুলতে দীপনাথ বলে, বসকে তেল দিতে হয়, বসের বউকে তেল দিতে হয়। আর তেল দেওয়ার ছিটিও দেখুক লোকে। বসের ছিটিয়াল বউ মৌমাছির গান টেপ করবে বলে এই বারবেলায় মধ্যবয়সে গাছেও উঠতে হচ্ছে।

কারিয়ারিস্ট দু'রকমের আছে। হাঁদারাম আর বুদ্ধিমান। বুদ্ধিমানদের খাটতে হয় না, কিন্তু হাঁদারামদের খাটা ছাড়া তো উপায় নেই।

দীপনাথ জুতো খুলে গাছে উঠল। খুবই সহজ গাছ। নীচুতেই অজস্র ডালপালা। দুটো ডাল ডিঙিয়ে একটু উপরে উঠতেই মণিদীপা বলল, বাঃ, বেশ পারেন তো। কিন্তু আরো ওপরে উঠে গেলে আমি টেপ রেকর্ডারটা দেবো কি করে? নাগাল পাবো না যে! এইবেলা এটা ধরুন। বলে দু'হাতে টেপ রেকর্ডারটা উঁচু করে তুলে ধরল মণিদীপা।

ঝুকে যখন টেপ রেকর্ডারটা নিতে হাতু বাডাল দীপনাথ তখনই সন্দেহবাতিকগ্রস্ত একটা মৌমাছি ধেয়ে এল কোথেকে। বাঁ চোখের কোলে তার বিষাক্ত হল কট করে বিধল, টেব পায় দীপনাথ। কিন্তু এ সময়ে নড়লে বা অসাবধান হলে দামী যন্ত্রটা পড়ে যেতে পারে। তাই সে একটুও শব্দ করল না। নীরবে টেপ রেকর্ডার তুলে নিল।

মৌচাকটা খুব ওপরে নয়। আর দুটো ডাল উঠতেই সে প্রায় হাতের নাগালে পেয়ে গেল মৌমাছিতে বিড়বিড় করা চাকটাকে। বাঁ চোখের কোল মুহূর্তে ফুলে উঠেছে। তীব্র জ্বালা। কিন্তু দীপনাথ শব্দ করল না। একটা মৌমাছির কামড় বই তো নয়। মৌচাকেব কাছাকাছি যেতে হলে মুখ মাথা ঢেকে নিতে হয়, সে জানে। কিন্তু ঢাকনা দেওয়ার মতো কিছু নেই হাতের কাছে।

একটা ঘন পাতার চাপ ভেদ করে মাথা তুলতে না তুলতেই তার চুলের মাথা জেট প্লেনের মতো দুটো মৌমাছি এসে ঢুকল। আব একটা ছল দিল কলাবেব নীচে, ঘাড়ে। প্রতিটি ছলই ইলেকট্রিক শকের মতো। দীপনাথ স্থির হয়ে রইল। নড়লে আবার কামড়াবে। খুব ধীরে ধীরে চোখ ঘুরিয়ে ঘুরিয়ে সে টেপ রেকর্ডারটা ঝোলানোর অবলম্বন খুঁজে দেখল। পেয়েও গেল হাতের কাছে। একটা ভারবহনক্ষম ডাল বেরিয়ে আছে কাণ্ড থেকে। সে হাতলটা গলিয়ে দিল গাছের ডালে। তারপর সাবধানে রেকর্ডিং চালু করে দিল। টেপ ঘুরছে কিনা তাও দেখে নিল ভাল করে। এখানে মৌমাছির শব্দ খুব ঝাঁঝানো। আশা করা যায় রেকর্ডিং ভালই হবে।

সাবধানে আবার নেমে আসে দীপনাথ। ভাগ্যে তার প্যান্টের পকেটে একটা রোদচশমা ছিল। কালো চশমা পরতে তার ভাল লাগে না। সবকিছু মেঘলা দেখায় তাতে। তবু রোদের কথা ভেবে সঙ্গে এনেছিল। এতক্ষণ পরেনি। গাছ থেকে নেমেই সে মণিদীপার দিকে পিছন ফিরে চশমাটা পরে নিল।

মণিদীপা গম্ভীর মুখে দাঁড়িয়ে আছে। একটা ধন্যবাদ না, কোনো কথাও না।

দীপনাথ হাতটা ঝেড়ে নিয়ে হাসি মুখে বলল, চলুন। বউদি বসে আছে।

মণিদীপার ভ্রু কৌচকানো, নতমুখ। শুধু বলল, হুঁ।

দীপনাথের বাঁ চোখ ক্রমে আরো ফুলে উঠেছে, চশমার ফ্রেমের তলা দিয়েও সেটা দেখতে পাওয়ার কথা। কিন্তু মণিদীপা তাকাচ্ছে না তার দিকে। মৃদু পায়ে হাঁটছে আগে আগে, ভিতর বাড়ির দিকে। দীপনাথের ঘাড়ে মাথায় আরো গোটা তিনেক জায়গা ফুলে উঠেছে। পাগল-পাগল জ্বালা। তবু সে পিছন থেকে হাসিমুখে বলল, ম্যাডাম এই কুঞ্জবনটা খুঁজে বের করলেন কি ভাবে?

মণিদীপা জবাব দিল না।

দীপনাথ অবাক হল না। মণিদীপা একটু মুড়ি। কখন ভাল থাকে বা কখন খারাপ থাকে তার তো কোনো ঠিক নেই। তাই সে আর কথা বলে উত্তাক্ত করল না। জ্বালাভরা চুলকোনি সামাল দিতে একবার চশমাটা তুলে হলের জায়গাটা কচলায় সে। নরম জায়গাটা তো তেঁড়েফুঁড়ে আরো ফুলে উঠতে থাকে। চশমাটা আর রাখাই যাচ্ছে না। তবু সেই জ্বালাধরা জায়গার ওপর চশমাটা জোর করে বসিয়ে রাখল সে। মৌমাছির হল, তার চেয়ে বেশী কিছু তো নয়। মানুষ এর চেয়ে ঢের বেশী যন্ত্রণা সহ্য করতে পারে। প্রীতম করেনি ? মূমূষু পদ্ম ঐ প্রীতম তাকে জীবনে অনেক বেশী প্রেরণা দেয়। চাঙ্গা করে তোলে।

ঘরে পৌঁছতে পৌঁছতেই শরীরের জ্বালা-যন্ত্রণা প্রায় ভুলেই গেল দীপনাথ।

বউদি, এই যে ধরে এনেছি। উনি মৌমাছির টেপ রেকর্ডিং করছিলেন, স্ক্যাপা নিতাইয়ের ইন্টারভিউ নিচ্ছিলেন।

তৃষা তার ঘরের টেবিলে খাবার সাজাচ্ছিল। লুচি, ডিম্বেব ডালনা, মিষ্টি আরো কী কী যেন। ফিরে না তাকিয়েই বলল, খুব ভাল। এ জায়গা যাদের কাছে ভাল লাগে আমি তাদের খুব পছন্দ করি।

মণিদীপা তৃষার কাছ বরাবর এগিয়ে গিয়ে মৃদুস্বরে জিজ্ঞেস করল, মৌমাছি কামডালে কি লাগাতে হয় জানেন ?

তৃষা চট করে মুখ তুলে বলে, তোমাকে কামডেছে নাকি ?

না। মণিদীপা ইঙ্গিতে দীপনাথকে দেখিয়ে দিয়ে বলে, ওকে। দেখুন চোখ কেমন ফুলে আছে।

তৃষা দীপনাথের দিকে চেয়ে দেখল। তার মুখে কোনো উদ্বেগ ফুটল না। শুধু বলল, মধু। বলে নিজেই গিয়ে একটা বেঁটে জালের মিটসেফ খুলে, ঢাকনা দেওয়া পাথরের বাটি বের করে আনল। তাতে টলটল করছে টাটকা মধু।

হলের জায়গাগুলোতে আঙুল দিয়ে মধু ঘষে দিতে দিতে প্রায় কানে কানে তৃষা জিজ্ঞেস করে, কী কবে কামডাল ?

গোপনে জিজ্ঞেস করাব মতো ব্যাপার নয়। তবু দীপনাথও মৃদুস্বরে বলল, গাছে উঠতে হল যে।

কেন ?

টেপ রেকর্ডারি খোলতে।

তৃষাকে বেশী বলতে হয় না। প্রখর বুদ্ধিবলে সে সব বুঝে নেয়। বলল, বসেপ বউ, তার ওপর আবার প্রেমেও পড়েছে, এটুকু জ্বালা-যন্ত্রণা কিছু নয়।

তোমাকে একদিন এমন গাঁট্টা দেবো না।

মণিদীপা বিছানার ধারে বসে একটা ম্যাগাজিনের পাতা ওলটাচ্ছে। কিছু দেখছে না, শুধু চোখটা সরিয়ে রাখছে মাত্র।

দীপনাথ বলল, টেপ রেকর্ডারিটা আবার নামাতে হবে কিছুক্ষণ বাদে। কিন্তু সেটা আর আমার কস্মো নয়।

তৃষা বলল, কস্মোটা য়াওয়ার দরকার কি ছিল ? বাড়িভর্তি কাজের লোক রয়েছে, যে কেউ ওটুকু করে আসতে পারত। তোমাকে ভাবতে হবে না, আমি লোক পাঠিয়ে নামিয়ে আনবোখন।

মধু লাগানোর কিছুক্ষণের মধ্যেই জ্বালাযন্ত্রণা অনেক কমে গেল। শুধু ফোলাটা রইল। কিছুক্ষণ থাকবে। সে জিজ্ঞেস করে, মেজদা খেয়েছে বউদি ?

না, অঘোরে ঘুমোচ্ছে।

ঘুমোতে দাও। যত ঘুমোবে তত টেনশন কেটে যাবে।

তুষা হাসল, বোমা মারল আমাদের আর টেনশন হল তোমাব মেজদার। এসব পুরুষকে নিয়ে চলা যে কী মুশকিল!

কে পুরুষ? পুরুষ তো তুমি!

তুষা মৃদু হেসে চাপা গলায় বলে, এখানকার লোকেরাও সেই কথা বলে। আহা, আমার কী গৌরবের ব্যাপার!

তুমিই আমাদের গৌরব।

যাঃ। তাড়াতাড়ি খেয়ে নাও তো। মেয়েবা মণিদিপার সঙ্গে গল্প করবে বলে বসে আছে। কেউ খেলতে পর্যন্ত যায়নি।

খাওয়ার সময়েও দীপনাথ লক্ষ্য করল মণিদিপা তাব দিকে তাকাচ্ছে না, কথা বলছে না। দীপনাথ ঘাটাল না। নিঃশব্দে খেয়ে নিল দুজনে। বোস সাহেব দিল্লি থেকে আমেদাবাদ গেছেন। কবে ফিববেন ঠিক নেই। মণিদিপা রোজ অফিসে ফোন কবে দীপনাথকে জ্বালাচ্ছিল, কবে বতনপুর যাচ্ছেন বলুন! আমরা যে কলকাতায় পাগল-পাগল লাগছে। দীপনাথ ঠিক করেছিল, এবার বোস সাহেবের অনুমতি ছাড়া মণিদিপাকে কোথাও নিয়ে যাবে না। বোস সাহেব অবশ্য প্রায়ই অফিসে ট্রাংক কল করে তার সঙ্গে কথাবার্তা বলেছে। কিন্তু কোনোভাবেই দীপনাথ কথাটা তুলতে পারেনি সংকোচের বশে। কিন্তু মণিদিপাও এড়ায় পরশুদিন সে কাজেব কথা হয়ে যাওয়ার পর বোস সাহেবকে খুব বিনীতভাবে বলল, মিসেস বোস একটু রতনপুরে যেতে চাইছেন।

কোথায়?

বতনপুর। কাছেই। সেখানে আমার মেজদার বাড়ি।

ওঃ, অফ কোর্স। যাক না, কে আটকাচ্ছে?

আপনার একটা পারমিশান—

বোস সাহেব খুব হাসল। বলল, আজ পর্যন্ত ক'টা ব্যাপারে দীপা আমার পারমিশান নিয়েছে তা তো আমি জানি।

উনি না নিলেও আমাদের তো নিতেই হয়। আপনার পারমিশান ছাড়া আমি ঠকে কোথাও নিয়ে যেতে পারি না।

বোস সাহেব বলে, ইটস অলরাইট, টেক হার এনিহোয়ার শী লাইকস্।

ধাঁব স্বরে তখন দীপনাথ বলল, ওভাবে বললে আমি সেটাকে পারমিশান বলে ধরতে পারি না মিস্টার বোস।

বোস সাহেব মেজাজ খারাপ করতে পারত। কিন্তু কোম্পানির বিজনেস খুব ভাল হওয়ায় বোসের মেজাজ শরীফ ছিল। খুব উদার গলায় বলল, এমনিতেও দীপা একাই বহু জায়গায় যাচ্ছে। এ তো আপনার মতো একজন চমৎকার গাইডের সঙ্গে যাবে। যাক না।

আমরা সকালে বা দুপুরে গিয়ে সঙ্কেবেলাই ফিরে আসব।

ওঃ, আমি ভেবেছিলাম বুঝি উইক এণ্ড কাটাতে। তাহলে তো পারমিশানের দরকারই ছিল না চ্যাটার্জি। আপনি এত বেশী সংস্কার মেনে চলেন কেন বলুন তো! আচ্ছা ভদ্রলোক মশাই আপনি! শুনলে দীপাও হাসবে।

আসার সময় হাওড়া স্টেশনে মণিদিপা বলেছিল, আমার যদি ভাল লাগে তাহলে আমি রতনপুরে দুদিন থেকে যেতে পারি কিন্তু।

স্বচ্ছন্দে । কিন্তু আপনার ফ্ল্যাট পাহারা দেবে কে ?

পাহারা দেওয়ার কিছু নেই । বেয়ারা বাবুচি আছে । আমি মানুষকে বিশ্বাস করতে ভালবাসি । আপনার দুশ্চিন্তা থাকলে আপনি গিয়ে পাহারা দিতে পারেন ।

এখানে মগিদীপার কেমন লাগছে কিংবা সে থাকবে কিনা তা জিজ্ঞেস করতে ইচ্ছে হলেও মুখের ভাব দেখে সাহস পেল না দীপনাথ । খেয়ে উঠে সে দীননাথের সঙ্গে দেখা করতে গেল । মঞ্জু আর স্বপ্না এসে ধরে নিয়ে গেল মগিদীপাকে ।

দেখা হতেই দীননাথ বলেন, তোমরা কেউ বলুব খবর নাও না । সে কেমন আছে, বউমার কী হল কেউ আমাকে বলে না ।

সোমনাথের খবর দীপনাথ নেয়নি বহুদিন ঠিকই । তবে সোমনাথও তার সঙ্গে দেখা করে না । সে একটু লজ্জা পেয়ে বলে, খুব কাজ পড়েছে ।

ভাইয়ের খবর নেওয়াটাও কাজ ।

আপনি একটা চিঠি দিলেও তো পারেন ।

চিঠি স্বপ্নাকে দিয়ে বার দুই লেখলাম । আজকাল ডাকের পিওনরা ঠিকমতো চিঠি দেয় না । বোধহয় পায়নি, তাই জবাবও দেয়নি ।

আচ্ছা, আমি এবার গিয়ে খোঁজ নেবো ।

নিও । বোলো, এখানে আমার ভাল লাগছে না ।

কেন বাবা ? এ জায়গা তো খুব ভাল ।

ভাল আর কি ? শ্রীনাথ খবরও নেয় না । তার কী সব খারাপ অভ্যাস হয়েছে শুনি । আমাদের বংশে এসব তো ছিল না । তার ওপর কাল রাতে নাকি ডাকাত পড়েছিল—এ ভারী গণ্ডগোলের জায়গা ।

শীত পড়লে কলকাতায় যাবেন । এখন কিছুদিন থাকুন ।

তুমি বিয়ে করলে আমার একটা আস্তানা হত । তিন ছেলের কাছে ঘুরেফিরে থাকতে পারতাম । বিলুও খোঁজ করে না । প্রীতম আছে কেমন ?

ভাল । বিলু তো চাকরি করে ।

শুনেছি । প্রীতম ভাল হয়ে গিয়ে থাকলে একবার যেন আসে । তার মুখটা তো ভুলতে বসেছি ।

আসবে । এখানে আপনার আর কোনো অসুবিধে আছে ?

এ আমার জুতের জায়গা নয় । কেমন সবই অচেনা অপরিচিত ঠেকছে । নিজের জায়গা বলে মনে হয় না ।

দীননাথের সঙ্গে আর বেশীক্ষণ কথা বলল না দীপনাথ । মানিবাগ থেকে একশ টাকার নোট বের করে হাতে দিয়ে বলল, ইচ্ছেমতো খরচ করবেন ।

দীননাথ সংকুচিত হয়ে বললেন, আমার আর খরচ কি ? বরং বউমার হাতে দিও ।

না, আপনি রাখুন । কাউকে কিছু দিতে ইচ্ছে হলে দেবেন ।

দীননাথ খানিকক্ষণ চুপ করে থেকে বলেন, এই বিবেচনাটুকু অন্য ছেলেদের যদি থাকত !

দীপনাথ তাড়াতাড়ি উঠে পড়ল । ভাবন-ঘরে গিয়ে বৃন্দার কাছে খবর নিয়ে জানল, কিছুক্ষণ আগে ডাক্তার এসে শ্রীনাথকে দেখে গেছে । আবার বোধহয় ঘুমের ইনজেকশন দিয়েছে । অঘোরে ঘুমোচ্ছে শ্রীনাথ ।

দীপনাথ শ্রীনাথের সুন্দর বাগানটার ভিতরে গিয়ে অনেকক্ষণ বসে রইল । শরৎকাল

আসতে না আসতেই শ্রীনাথের বাগানে শিউলি এসে গেছে। অনাদরে মাটিতে ঝরে পড়া অজস্র শিউলি বাসি হচ্ছে। একটা স্থলপন্ন গাছে ঝেঁপে পন্ন ফুটেছে। মৌমাছিরা গুঞ্জন তুলে উড়ছে। বউদি কি জানে শ্রীনাথের নিজের হাতে তৈরি করা ফুল থেকেই মৌমাছি কুঞ্জবনে গিয়ে চাক বাঁধে, আর সেই মধুই টলটল করছে তার পাথরের বাটিতে? কথটা বউদিকে বললে কেমন হবে? ভেবে আপনমনেই মাথা নাড়ল দীপনাথ, লাভ নেই। কোনো কোনো স্বামী-স্ত্রী বোধহয় তাদের সম্পর্কের বিষকেই বেশী উপভোগ করে। মধুর কথা তারা কানে নেবে না।

বেলা ঢলে পড়ল গাছগাছালির আড়ালে। চিকড়িমিকড়ি রোদ খেলছে বাগান জুড়ে। দীপনাথ উঠে ভিতর বাড়িতে আসে।

বউদি, এবার যেতে হয়।

এক্ষুনি কি? আর একটু থাকো। তোমার সঙ্গে কথাই তো হল না।

সঙ্গে বসের বউ, ফিরতে রাত হওয়া ঠিক নয়।

দীপু, তুমি কবে বুঝবে যে, আমি কত একা?

দীপনাথ একটু হেসে বলে, একদিন আমি আমার বসকে বলেছিলাম, বড় মানুষরা একটু একা একটু নিঃসঙ্গ হয়। তোমাকেও বলি বউদি, মহীয়সীরা চিরকাল একা। তাদের সঙ্গী হওয়াব মতো যোগ্যতা ক'জনের থাকে বলো?

আমি মহীয়সী? অবাক করলে দীপু!

কেন, লোকে বলে না?

তোমার মতো চাটুকার তো সবাই নয়। মহীয়সী হলে আমাকে লোকে মারতে চাইবে কেন বলো! কেনই বা আমাব আপনজন বাজারে হাটে আমার কলঙ্ক রটিয়ে বেড়াবে?

লোকের কথা দিয়ে কী হবে বউদি! আমি যা মনে করি তা তো পাল্টে ফেলব না।

তুষা একটু হাসল। মুখের বিষণ্ণতা তাতে কাটল না। খুব গম্ভীর গলায় বলল, কোনোদিন যেন আর না শুনি তোমার মুখে যে, আমি খারাপ, আমি ভাল নই।

শুনবে না বউদি।

তোমার কাছে যেন আমি চিরকাল ভাল থাকি।

থাকবে। যে ছেলে দুটো কাল বোমা মেরেছিল তারা ধরা পড়েছে?

না। তবে নাম জানা গেছে। দুজনেই ভাড়াটে গুণ্ডা। কাছাকাছি মাধবগঞ্জে থাকে।

কারা তাদের পাঠিয়েছিল? তোমার কাউকে সন্দেহ হয়?

কী করে বলব? তবে হয়তো একদিন এইভাবে আমার মরণ হবে দীপু। তখন খুব কম লোকই কাঁদবে আমার জন্য। আর কেউ না কাঁদুক, তুমি একটু কেঁদো। কান্না এমনিতে না এলে নিজেকে চিমটি কেটো।

॥ পঞ্চাশ ॥

কথা শুনে একটু গম্ভীর হতে গিয়েও অবশেষে একটু মুচকি হেসে ফেলে দীপনাথ। বলে, ও সব ছিচকাঁদুনে মেয়েলী সেন্টিমেন্টের কথা তোমার মুখে একদম মানায় না বউদি।

তুষা চোখ বড় বড় করে বলে, তাই বুঝি? কাল রাতেই তো মায় বোমা মেরে গেল। তবু বলছ মেয়েলী সেন্টিমেন্ট? কাল রাতে কপালজোরে বেঁচে গেছি বলেই যে সব ক'টা ফাঁড়া কাটাতে পারব অত পুণ্য তো করিনি।

প্রবল আত্মবিশ্বাসের সঙ্গে দীপনাথ বলে, তুমি মরবে না। তুমি মরলে আমাদের চলবে কি করে ?

চলবে কি করে তার আমি কি জানি ! আমি অমর নই।

বিরক্ত হয়ে দীপনাথ বলে, বার বার মরার কথা বলে আবহাওয়া ভারী করতে চাইছে কেন বলো তো ! এ রকম তো ছিলে না ! বুড়ো হচ্ছে নাকি !

তোমার কাছে বুড়ো হবো সাধ্য কি ! এই না সেদিন রঙিন শাড়ি এনে পড়িয়ে ছাড়লে !

তবে ? বুড়ো হওনি, শীগগীর মরছোও না। এখন যাও তো ভদ্রমহিলাকে ডেকে দাও। পরস্মী ফেরত দিয়ে আসি।

কিন্তু পরস্মীটি যে নড়তে চাইছে না !

কেন বলো তো ?

আমাব মেয়ে দুটোকে পলিটিকস শিখিয়ে মাথা খাচ্ছে।

তা হলে এক্ষুনি মাল ট্রানসফার করো, নইলে সর্বনাশ। পলিটিকস অতি বিঘাঙ্ক জিনিস।

নিজে থেকে না উঠলে তুলি কি করে ?

ওর ওঠার তেমন ইচ্ছেও বোধ হয় নেই। হাওড়া স্টেশনে আমাকে বলছিল দু-একদিন এখানে থেকেও যেতে পারে।

তা থাকুক না। ক্ষতি তো নেই। স্বপ্না আর মঞ্জুর ঘবেই ভাষগা হবে।

একটু ইতস্তত করে দীপনাথ বলে, কাজটা ঠিক হবে না বউদি। ওর হাজব্যান্ডেল কাছে থাকার পারমিশান নেওয়া হয়নি।

হাজব্যান্ডকে কি ও মানে ?

ও না মানুক, আমি তো ওর হাজব্যান্ড হিসেবে বোস সাহেবকে মানি !

হাজব্যান্ড তো এখানে নেইও শুনেছি।

তাতে কি। ফ্লাটিটা তো আছে।

সেখানে কি ও নিবাপদ দাঁপু ?

তার মানে ?

মানে আবার কি ? তোমাব মবালিটিব সেনস্ দেখে হাসি পায়। একা ফ্লাটে একটা ছুকরি মেয়ে কতগুলো বয়-বাবুচিব হেফাজতে থাকে, সেটাই বা কোন ভাল ব্যাপার ? ওব হাজব্যান্ডের উচিত ছিল কোনো বয়স্কা আত্মীয়কে ফ্লাটে রেখে যাওয়া বা ওকে বাপের বাড়িতে পাঠিয়ে দেওয়া।

দীপনাথ ব্যাপারটা একটু ভেবে দেখে নেয়। তারপর চিন্তিত মুখে বলে, আমি তোমার মতো করে ভাবিনি। তুমি হয়তো ঠিকই বলছ। তবু আমার দায়িত্ব তো ওকে রক্ষা করা নয়। আমার দায়িত্ব শুধু জায়গা মতো পৌঁছে দেওয়া।

তুষা একটু হেসে বলে, অত আলগা কথা বোলো না দীপু। ও তোমার ওপব আরো একটু নির্ভর করে।

দীপনাথ এ সব ঠাট্টায় অভ্যস্ত হয়ে গেছে বলে লজ্জা পেল না। বলল, ইয়ার্কি কোরো না। কারো ওপব নির্ভর করার মতো মেয়ে নয়।

তুষা একটু গম্ভীর হয়ে বলে, কেন মেয়েটাকে ঝোলাচ্ছে বলো তো তুমি ! পরস্মীকে ভাগিয়ে নেওয়ার লোক তো নও। তবে ওকে পাগল করছো কেন ?

পাগল করছি ! হাসালে বউদি। আমাকে পান্তাই দেয় না।

বরং খুব বেশী পাত্তা দেয়। তোমাকে মৌমাছি কামড়েছে বলে মুখের ভাবখানা কি রকম হয়েছিল দেখনি ?

আচমকাই এবার লাল হল দীপনাথ। একটা শ্বাস ফেলে বলল, ওর চেয়ে তুমিই বেশী পাগল করলে আমায়। এখন যাও তো, যা বলছি করো তো। ডেকে দাও।

যাচ্ছি বাবা। বলে তুষা যায়। দীপনাথ অধৈর্যের সঙ্গে পায়চারি করতে থাকে বাগানের রাস্তায়। মেয়েদের বিদায় নিতে অনেক সময় লাগে। শেষ কথার রেশ ছিঁড়তে পারে না সহজে। দীপনাথ বার কয়েক ঘড়ি দেখল। জুতো ঘষল রাস্তার মোরমে। আজকের মৌমাছির হল বহু কাল মনে থাকবে। কী জ্বালা ! কী সুখ ! চোখের কোল এখনো বেলুনের মতো ফুলে আছে। ঘাড়ে মাথায় এখনো তিনটে টিবি। অল্প বাথা। কাল ফোলা মিলিয়ে যাবে, বাথা থাকবে না। শুধু স্মৃতি থাকবে।

যখন শেষ অবধি উঠানের সীমানা ডিঙিয়ে মণিদীপা বেরিয়ে এল তখন সন্ধ্যা হয় হয়। চারদিকে লঘু ছায়া পড়ে গেছে। হাওয়া দিচ্ছে খুব। দূরে মেঘ ডাকল।

মঞ্জু বলল, আর একটু দেখে যাওয়া ভাল মণিকাকিমা, বৃষ্টি আসবে বোধ হয়। স্বপ্না মণিদীপার একটা হাত ধরেই ছিল, বলল, থেকে যাও না কাকিমা !

ওরা খুব জমিয়ে নিয়েছে, বুঝল দীপনাথ। অনায়াসে 'তুমি' করে বলছে। মেয়েরা এ সব পারে।

মণিদীপা একবার জিজ্ঞাসু চোখে দীপনাথের দিকে তাকায়। দীপনাথ অস্বস্তি ব সঙ্গে চোখ সরিয়ে নিয়ে মণিদীপার পিছনে দাঁড়ানো তুষার দিকে তাকায়। তুষা তার দিকে একদৃষ্টে চেয়ে আছে। দীপনাথ চোখ নামিয়ে নেয়।

খুব সংকোচের সঙ্গে দীপনাথ মৃদুস্বরে জিজ্ঞেস করে, আপনি কি থাকতে চান ? ওবা ছাড়তে চাইছে না। আপনি কি বলেন ?

স্বপ্না হাঁ করে কথা গিলছে। দীপনাথ কি বলবে ? সে একবার কাঁধ ঝাঁকিয়ে বলল, ইচ্ছে হলে থাকুন।

আপনি ?

আমি ? আমাকে যেতেই হবে।

কেন, খুব কাজ ?

খুব কাজ। আপনি থাকতে পারেন। কাল সকালে বা যখন আপনাব ইচ্ছে বউদি' লোক দিয়ে পাঠিয়ে দেবে।

লোকের দরকার নেই। একাই পারব।

তা হলে থাকছেন ?

ভাবছি।

ভাববার সময় নেই। আপনি থাকুন, আমি চলি।

থাকবে ! থাকবে ! বলে স্বপ্না আর মঞ্জু প্রায় আঁকড়ে ধরে মণিদীপাকে।

দৃশ্যটা দেখতে ভালই লাগে দীপনাথের ! তবু মনে একটা কাঁটা ফুটে আছে। বোস সাহেবের অনুমতি নেওয়া হয়নি। সে তুষার দিকে সপ্রশ্ন চোখে চেয়ে বলে, যাই বউদি ?

এসো। মণিদীপা আমাদের কাছে যত্নেই থাকবে।

আসি তা হলে। বলে মণিদীপার দিকে একপলক চেয়ে দীপনাথ তার অভ্যস্ত বড় বড় পদক্ষেপে বেরিয়ে এল বাগানের ফটক খুলে।

স্টেশন অনেকটা পথ। দূরে মেঘ ডাকছে। শরতের দমকা বৃষ্টি এসে কখন ভিজিয়ে

দেয় কে জানে । ছাতা নিয়ে কদাচিৎ পথে বেরোয় সে । ছাতা জিনিসটাই তার পছন্দ নয় ।

চৌমাথা পেরিয়ে ডানদিকের রাস্তা ধরে এগিয়ে অনেকটা এসে হঠাৎ এক জায়গায় থমকে দাঁড়িয়ে গেল দীপনাথ । খুব নির্জন । একটা মস্ত অশ্বখের ঘন ছায়া জায়গাটাকে অন্ধকার করে রেখেছে । চারদিকে অজস্র ঝোপঝাড়, বাড়িঘর নেই । এই জায়গাতেই সোমনাথকে মেরেছিল না গুণ্ডারা ! কেউ চিনিয় দেয়নি দীপনাথকে, তবু তার মনে হল, এই সেই জায়গা । সোমনাথকে কারা মেরেছিল তা আজও সঠিক জানে না দীপনাথ । এর ওর তার কাছে নানা কথা শুনেছে । সোমনাথ বড় বেশী আদবে মানুষ । কখনো শাসন করা হত না বলেই কি একটু অন্যরকম হল সে ? কে বলবে ? আবার বউদির গুণ্ডারাই যদি তাকে মেরে থাকে তবে তারা শমিতার ওপর অত্যাচার করবে কেন ? বউদি নিশ্চয়ই ওরকম জঘন্য কাজ করার হুকুম ওদের দেয়নি ! ঘটনাটা তাই আজও কিছুতেই বুঝতে পারে না দীপনাথ ।

খানিকক্ষণ ঝুঁঝুকো ছায়ায় সে চুপ করে দাঁড়িয়ে থাকে । ভাবে । বিশ্লেষণ করে । কোনো সিদ্ধান্তে আসতে পারে না ।

বৃষ্টি এল বলে । এখনো অনেকটা পথ । দীপনাথ খুব দ্রুত হাঁটতে থাকে । কখনো দৌড় পায়ে । স্টেশনের একেবারে কাছাকাছি তেমাথায় বৃষ্টিটা তার নাগাল পেয়ে গেল । দোকানে ঢোকা যেত, কিন্তু না ঢুকে ঝিরঝিরে বৃষ্টিতে ভিজতে ভিজতে বাকি পথটা দৌড়ে পার হল সে ।

স্টেশনের চত্বরে উঠে ছাদের নীচে দাঁড়িয়ে রুমালে মাথা ঘাড মুছল । কলকাতার একখানা টিকিট কাটল । তারপর দাঁড়িয়ে বৃষ্টি দেখতে লাগল । স্টেশনে যাত্রী বলতে প্রায় কেউ নেই । সে একা । খবর নিয়ে জেনেছে কলকাতার ট্রেন আরো মিনিট দশেকের আগে নয় ।

মগিদীপা রয়ে গেল । ঘটনাটায় স্বস্তি পাচ্ছে না দীপনাথ । আনমনে একবার চোখের কোলে ফোলা জায়গাটায় আঙুল বাখল । ফোলাটা অনেক কমে গেছে । ব্যথা নেই, জ্বালা নেই । তবু কী যেন একটু আছে । আঙুল ছোঁয়াতেই রোমাঞ্চ হল গায়ে ।

বৃষ্টির মধ্যেই একটা রিকশা ঝড়ের বেগে ছুটে আসছে স্টেশনের দিকে । মোড়ের মাথায় ঘণ্টি মারছিল ঘন ঘন । ফিরে দৃশ্যটা দেখছিল দীপনাথ ।

কে আসে ?

বুকের মধ্যে হঠাৎ দামামা বেজে ওঠে । এত বেসামাল বহুকাল লাগেনি দীপনাথের । অথচ সেই নিত্যদিনের মগিদীপাই তো ! মহন্তর কিছু তো নয়, চমকপ্রদও তো কিছু নয় । বিরহ তো মাত্র আধ ঘণ্টার ।

রিকশাওয়ালাই একটা ছাতা ধরে স্টেশনে তুলে দিয়ে গেল মগিদীপাকে । দীপনাথের দিকে চেয়ে বলল, আপনাকে না পেলে দিদিমণিকে আবার ফিরিয়ে নিয়ে যাওয়ার কথা ছিল । দীপনাথ জবাব দিল না । নিঃশব্দে গিয়ে আর একখানা কলকাতার টিকিট কেটে আনল । মগিদীপাও সামান্য ভিজেছে । হাত বাড়িয়ে বলল, আপনার রুমালটা দিন তো । মাথাটা বড্ড ভিজে গেছে ।

দীপনাথ রুমাল দিল না । তার শুচিতায় বাধে । পরস্তু কেন অন্য পুরুষের রুমাল ব্যবহার করবে ? আর বুকের ভিতরকার সেই দামামা ? হ্যাঁ তাও সত্যি । আর এই দুইকে কখনো মেলাতে পারে না বলেই তো দীপনাথ আজ বড় একা বোধ করে ।

কই, রুমালটা দিলেন না ! মগিদীপা হাত বাড়িয়ে আছে ।

শাড়ির আঁচলে মুছে নিন। আমার রুমাল নোংরা।

মণিদীপা কোনো কথা বলল না। আঁচলটা ঘুরিয়ে মাথাটা যথাসাধ্য মোছার চেষ্টা করল।

আপনি জানতেন যে, আমি চলে আসব ?

না তো ! কি করে জানব ? দীপনাথ অবাক হয়ে বলে।

না জানলে এতক্ষণ চলে যাননি কেন ?

যেতাম, গাড়ি পেলে। এখনো গাড়ি আসেনি।

চল্লিশ মিনিটেও ট্রেন পেলেন না !

না। আপনার কেন মনে হল আমি আপনার জন্যই যাইনি ?

মণিদীপা কাঁধটা ঝাঁকিয়ে বলে, এমনিই। আপনি চলে আসার পরই জায়গাটা এত বোরিং মনে হল যে থাকতে ইচ্ছে করল না।

দীপনাথের সুস্পষ্টই স্বাসকষ্ট হতে থাকে। বুকের মধ্যে তোলপাড়। এত অকপট কোনোদিন ছিল না মণিদীপা। আজ এসব হচ্ছেটা কী ?

দীপনাথ কথা বলল না। মণিদীপা খুব দীন ভঙ্গীতে গিয়ে একটা ফাঁকা বেঞ্চে বসল। মাথা নীচু, চোখ নত।

ঘনঘোর বৃষ্টির শব্দের ভিতর দিয়ে নিঃশব্দে অতিকায় ট্রেন চলে এল।

দীপনাথ বলল, ট্রেন।

মণিদীপা উঠল। বৃষ্টির ভিতর দিয়ে দুজনে দৌড়ে এসে প্রথম যে কামরাটা পেল, উঠে পড়ল।

প্রায় ফাঁকা কামরা। আলো জ্বলছে। বাইরে ঘন অন্ধকারে অব্যাহার বৃষ্টি। কামরার মেঝেয় চীনেবাদামের খোসা, কাগজের চোঙা, বিড়ি সিগারেটের টুকরো, দেশলাইয়ের ফাঁকা খোল। সব মিলিয়ে জনাপাঁচেক লোক এখানে সেখানে শুয়ে বসে আছে। বেশীর ভাগই চাষীবাসী শ্রেণীর। মাঝপথেই কোথাও নেমে যাবে।

মুখোমুখি বসেও কেউ কারো দিকে তাকাতে পারছিল না। আজ পরস্পরের কাছে তারা বড় বেশী ধরা পড়ে গেছে। লুকোনোর কিছু আর রইল না বোধ হয়। নাকি এখনো কিছু পর্দার আড়ালে আছে ?

বউদি কি বলল ? অনেকক্ষণ বাদে দীপনাথ আন্তে গলায় প্রশ্ন করে।

কী বলবে ?

হঠাৎ চলে এলেন দেখে কিছুই বলল না ?

না তো ? কিছু বলার কথা নাকি ?

কথাই তো। এভাবে চলে আসা ঠিক হয়নি। পাঁচজনে পাঁচ কথা ভেবে নেবে।

মণিদীপা অবাক হয়ে বলে, কী ভাববে ?

আপনাকে নিয়ে আর পারি না।

বলুন না কী ভাববে !

দীপনাথ ম্লান একটু হাসে। হাল ছেড়ে দিয়ে আপনমনে মাথা নাড়ে একটু। তারপর বলে, মানুষের মনে কতরকম যে পাঁচ আছে।

বাট উই আর ফ্রেন্ডস। বলে মণিদীপা উঠে এসে পাশে বসে।

অফ কোর্স। কিন্তু সেটা কি সবাই বুঝবে ?

মণিদীপা অতিশয় ফিচেল হাসি হাসছিল। বলল, সবার আগে দেখা দরকার আপনি বা

আমি পরস্পরকে বন্ধু মনে করি কিনা ।

আমি আপনার অত্যন্ত শুভাকাঙ্ক্ষী বন্ধু, বিশ্বাস করুন ।

অবিশ্বাস একবারও করিনি । মণিদীপার সুগন্ধ একটা শ্বাস এই কথাব সঙ্গে দীপনাথের ঘাড় ঝুঁয়ে গেল ।

মণিদীপা এত কাছে ঘেঁষে বসে আছে যে, দীপনাথের অস্বস্তি হতে থাকে । সেই অস্বস্তির মধ্যে এক ধরনের তীব্র সুখ । তার শরীর শিউরে ওঠে ।

দীপনাথ কিছু ভেবে না পেয়ে বলল, আমাকে অবিশ্বাস করার কিছু নেই ।

আপনার কথাই ওঠে না । আপনি কখনো নিয়ম ভাঙতে ভালবাসেন না । সেই সাহস আপনার নেইও । কাওয়ার্ডদেব থাকেও না । তাই অধিকাংশ কাওয়ার্ডই হয় নীতিবাগিশ ।

তাই নাকি ? আপনি খুব নিয়ম ভাঙতে ভালবাসেন, তাই না ?

ভীষণ । আব যারা নিয়ম ভাঙে তাদেরই আমার বেশী পছন্দ । নীতিবাগীশরা আমার দু চোখের বিষ ।

বুঝলাম মিসেস বোস ।

কিছুই বোঝেননি । নীতিবাগীশ আর আদর্শবাদীর মধ্যে অনেক তফাত । কিসের তফাত জানেন ? নীতিবাগীশরা জীবনে কিছু করতে পারে না, আদর্শবাদীরা পারে । মণিদীপার গলার স্ববে রাগের উত্তাপ বাড়ছে ।

বুঝলাম । এক্ষেত্রে আপনিই বোধ হয় সেই আদর্শবাদী ?

নিশ্চয়ই । আব আদর্শবাদীদেরও কিছু শুচিতার বোধ থাকে । কিন্তু আপনি বা বোস সাহেব কোনোদিন আমাকে সিরিয়াসলি নেননি । আপনারা শুধু জানেন আমি আপস্টাট, একসট্রাভ্যাগানট নটি । তার বেশী কিছু নয় । মণিদীপা ঘন ঘন শ্বাস ছাড়ছে । নাকের পাটা ফুলে ফুলে উঠছে ।

আমি ভাবি নু । গোমড়া মুখে দীপনাথ বলে ।

টু অফ ইউ আর ইন এ লীগ এগেইনস্ট মি ।

না মিসেস বোস ।

এ কথায় কী হল কে জানে, মণিদীপার মুখচোখ রাগে ফেটে পড়ল । ঘনশ্বাসের ঝোড়ো আওয়াজের সঙ্গে চাপা আক্রোশ ভরা গলায় ‘আমি জানি, আমি জানি’ বলতে বলতে আচমকা অপ্রত্যাশিত, দু হাত বাড়িয়ে সে খামচে ধরে দীপনাথের জামা । টেনে প্রায় ছিঁড়ে দিতে দিতে বলে, কেন আপনারা ভালবাসেন না আমাকে ? কেন বাসেন না ? কেন ?

শিলিগুড়ি গিয়ে অবধি দীপনাথকে চিঠি দেয়নি প্রীতম । তবে সে যে পৌঁছেছে সে খবর বিলুর কাছে শুনেছে দীপনাথ । আজ মেসে ফিরে প্রীতমের চিঠি পেল সে । বেশ দীর্ঘ চিঠি । হাতের লেখাটা অবশ্য প্রীতমের নয় । অন্য কাউকে দিয়ে লিখিয়েছে, আমি ভাল আছি । কিন্তু এ জায়গাটা কী বিচ্ছিন্ন হয়ে গেছে বলো তো ! মদের দোকান, স্মাগলিং, মারপিট, হই-চই, আগে জানলে কিছুতেই আসতাম না । তুমি কখনো বলানি তো আমাকে !...বলো তো, গোটা দেশে একটাও কি শান্ত, নিরিবি, সুন্দর জায়গা নেই ? সব পড়ে গেছে ? সব নষ্ট হয়ে গেছে ? বেঁচে থেকে তবে আর কী হবে ? কলকাতায় এতকাল বিছানায় শুয়ে শুয়ে কত ভেবেছি, আমার স্বপ্নের শিলিগুড়ি বুঝি গাছপালা পাহাড় নদী আর নির্জনতা সাজিয়ে নিয়ে বসে আছে আমার জন্য । কোথায় কি ? নোংরা হাটুরে চেহারার এই বিকট শহর অসগাপাশতলা কলকাতার নকল । আমাকে একটা জায়গার সন্ধান দাও

মেজদা ।...

একটা শ্বাস ফেলে খামে আবার চিঠিটা ভাঁজ কবে ভরে বাখে দীপনাথ ।

সুখেন বহু দিন পর বাড়ি গেছে । পড়ুয়া ছেলেটাও দিন-দুই হল দেশে । ঘরে আজ দীপনাথ একা । রাতে সে কিছুই খেল না । বাতি নিভিয়ে অনেকক্ষণ বিছানায় শুয়ে রইল । সে আর খুব বেশীদিন এই মেসে থাকবে না । আর একটু ভালভাবে থাকার জন্য সে এবার একটা ফ্ল্যাট ভাড়া নেবে । রান্নার লোক বাখবে ।

ভাবতে ভাবতে টানটান হয়ে উঠে বসে সে । নিজেকেই প্রশ্ন করে, না হয় বাসা নিলাম, লোক রাখলাম, কিন্তু তারপর ? তারপর কি জীবন আমূল পাটে যাবে ? নতুন কিছু ঘটবে ?

বুকেব একটা জায়গায় অসাবধানে মগিদীপার বাঁ হাতের কড়ে আঙুলের তীক্ষ্ণ নখে সামান্য আঁচড় লেগেছিল । ঘামে ভিজ্ঞে এখন সেই জায়গাটা সামান্য জ্বালা করছে । মৌমাছির হলের জায়গাগুলো এখনো সামান্য ফুলে আছে । কী কববে দীপনাথ ? কী করবে ?

নিশিতে পাওয়ার মতো বিছানা ছেড়ে উঠে পড়ে সে । দরজা খুলে রাস্তায় নেমে আসে । নিশিত রাতে ফুরফুরে হাওয়া ছেড়েছে । কুকুররা ঝগড়া করছে মোড়ে । গলির মুখে দাঁড়িয়ে দেখে এত রাতে ঠেলাগাড়িতে কাদেব মাল যাচ্ছে কোথায় । আকাশভরা তারা ফুটে আছে । মাঝরাতে এইভাবে জেগে উঠে দীপনাথের কাছে আজ হঠাৎ আবার বহু দূরের এক মহাপর্বতের সংকেতবার্তা এসে পৌঁছোয় । মানুষের জীবন নানা পঙ্কিলতায় ভরা, যুক্তিহীন, পরিণতিহীন, আনন্দহীন—ঐ জীবন ছেড়ে চলে এসো দীপু । আমি বহুকাল তোমার জন্য অপেক্ষা করছি ।

যাবে দীপনাথ । বড় উচাটন হয়ে ওঠে মন । কোথায় কোন দুর্গম প্রান্তর, পাথুরে জমি, চড়াই-উতরাই ভেসে যেতে হবে তার তো কোনো ঠিক নেই । কোন দিক থেকে সংকেত ভেসে আসছে, তা সে জানেও না ভাল মতো । শুধু তার পালে সেই পাহাড়-ছোঁয়া বাতাস এসে লাগে । বলে, উজানে যাও, উজানে যাও ।

॥ একাদশ ॥

প্রীতম জিজ্ঞেস করে, তুমি কোথেকে শিখলি এ সব ?

শতম লজ্জা পায়, শিখেছি, শিখেছি । দেখ না তোমাকে ভাল করে তুলবই ।

তোমার মনের জোর আছে । আমার নেই ।

জোর-টোর নয়, আসলে তোমার ইচ্ছে নেই । তুমি কি বিশ্বাস করো না, যার মনে যত পাঁচ-বোঁচ, যত কুটিলতা জটিলতা তার তত ব্যারাম ? খামোখা কারো ব্যারাম হয় না । রোগের প্রথম অঙ্কুর গজায় মনে । তারপর তা শরীরে ফুটে বেরোয় ।

মান হেসে প্রীতম বলে, আমার মনে বোধ হয় অনেক পাঁচ-বোঁচ, অনেক জটিলতা কুটিলতা ।

মাথা নেড়ে শতম বলে, তা নয় । তবে তোমার একটা রোগ রোগ বাতিক ছিল দাদা । শরীর নিয়ে তুমি বড় বেশী ভেবেছো ।

তা ভেবেছি ।

তোমরা কখনো ভাবতে ইচ্ছা করোনি যে, এই শরীর মানুষকে দেওয়া হয়েছে কাজ করার

জন্য ! বসিয়ে রাখার জন্য নয় ! যত শরীর শরীর করবে তত আজ চুলকুনি, কাল পাঁচড়া, পরশু আর একটা না একটা কিছু এসে ধববেই ।

শরীরকে ভুলে যেতে বলছিস ?

একদম । গতর পুষে রাখার জন্য তো নয় । মনের ওপর শরীরের সব ভালমন্দ । মনটাকে তাজা রাখো, শরীর উজ্জ্বল হবে । আর বসে বসে মরণের চিন্তা করো, শরীরে তার ছায়া পড়ে যাবে । শরীরকে কখনো বিশ্রাম দিও না । খাটাও, কেবল খাটিয়ে যাও ।

প্রীতম হেসে বলে, বিশ্রাম নেবো না ?

নেবে । কেন নেবে না ? তবে শরীরের বিশ্রাম কেমন জানো ?

কেমন ?

তুমি তো অ্যাকাউন্ট্যান্ট ! রোজ হিসেব-নিকেশ করতে করতে যখন ক্লান্তি আসে তখন যদি হঠাৎ একটু টেবিল টেনিস খেল বা কবিতা লেখো, কি একটু বাগান করলে, সেইটেই বিশ্রাম । রোজকার অভ্যস্ত কাজ ছেড়ে অন্য কাজ করলে শরীর বিশ্রাম পায় ।

ঘুমোবো না ?

ঘুমোবে । দিনে রাতে চার ঘণ্টা ।

বলিস কি ? ডাক্তাররা যে আট ঘণ্টার কথা বলে ।

বলে তো কি ? শরীরের জন্য চার ঘণ্টা ঘুমই যথেষ্ট । দেখ না কুলি-লাইনের পশ্চিমারা সারা দিন মাল বয়, অসুরের মতো খাটে, আবাব কত বাত অবধি জেগে 'রামা হো' গান গায় । আবাব ভোররাতে কাজে বেরিয়ে পড়ে । ক'ঘণ্টা ঘুমোয় বলো তো ! তাবা বেঁচে নেই ? তোমার আমার চেয়ে ঢের ভালভাবে বেঁচে আছে । ঐ যে চার ঘণ্টা ঘুমোয় সে ঘুম গভীর, নিপাট, গায়ের ওপব দিয়ে মোষ হেঁটে গেলেও টের পাবে না তা জানো ?

জানছি ।

ভুল বললাম ?

প্রীতম মাথা নেড়ে বলে, না । তবে এত সব ভাল করে কখনো লক্ষ করিনি ।

এখন থেকে করো । শরীর নিয়ে ভেবো না ।

রোজ সকালেই এ রকম কিছু উজ্জীবক কথাবার্তা বলে শতম তার মোটরসাইকেল নিয়ে বেরিয়ে যায় । দুধের গ্লাস হাতে আসে মা । শরীর নিয়ে কখনো কিছু বলে না । কথাবার্তা অনেকটা কমে গেছে । দুধের মধ্যে অনেকটা সর তুলে নিয়ে আসে । পাশে বসে চামচ দিয়ে ঘুটে ঘুটে সরটাকে দুধের মধ্যে মেশাতে থাকে : এতে নাকি বেশী পোষ্টাই ।

কিন্তু এ সবই অনভ্যস্ত অস্বাভাবিক লাগে প্রীতমের কাছে । বিলুর সঙ্গে থেকে থেকে ঐ এক রকম অভ্যাস তৈরী হয়ে গেছে । বিলু কোনোদিন তার দিকে বিশেষ নজর দেয়নি, মনোযোগী হয়নি । তবে মনকে সরিয়ে রেখে হৃদয়হীন কর্তব্য করে গেছে । আর তাইতেই অভ্যস্ত হয়ে গেছে প্রীতম । এখন তার প্রতি কেউ বেশী মনোযোগ দিলে, তাকে কেউ বেশী ভালবাসলে, ভারী অস্বস্তি বোধ করে সে । মাঝে মাঝে বাড়ির লোকের অতি আদরের অত্যাচারে সে বিরক্ত হয় । রেগেও যায় । মা বরাবরই তাকে খুব ভাল বোঝে । তার মুখ দেখেই মনের ভাব ঠেঁচে নিতে পারে । তাই প্রীতমের জন্য আহা উহ সব চেয়ে কম করেছে মা ।

সর ঘুটে দুধটা খাইয়ে নীরবে মা একটা তেল-পড়ার বোতল নিয়ে এসে হাতে পায়ে মালিশ করে দেয় । প্রথম প্রথম বিচ্ছিরি লাগত, মাখতে চাইত না প্রীতম । আজকাল হাল ছেড়ে দিয়েছে । তার অসুখের প্রথম দিকে অফিসের এক কলিগ গৌরাজ বোস হাবড়ার এক

ফকিরের কাছ থেকে বার দুই মস্তপূত তেল এনে দিয়েছিলেন মালিশের জন্য। সে তেল আবার আগাগোড়া হাতে করে বয়ে আনতে হত, কোথাও রাখার নিয়ম ছিল না। গৌরাস্বাবু ভীড়ের ট্রেনে ঘেমে চুপসে কষ্ট করে সে তেল আনতেন। বিলুকে পই পই করে বুঝিয়ে দিতেন, কি করে মালিশ করতে হবে। বিলু সে তেল রেখে দিত। কখনো মালিশ করেনি। একদিন প্রীতম বলেছিল, গৌরাস্বাবু কষ্ট করে তেলটা আনলেন, ফেলে রাখবে ?

ও সব বুজুকি দিয়ে কী হবে ? তেলপড়ায় অসুখ সারলে এত লোক ডাক্তারের কাছে যেত না।

খুবই যুক্তিপূর্ণ জবাব। অবশ্য প্রীতম নিজের তেলপড়ার গুণে খুব বিশ্বাসী নয়। কিন্তু তার মন বলত, আমি যদি তোমার প্রিয়জনই হয়ে থাকি তবে আমার এই কঠিন অসুখের সময় তুমি লজিক মেনে চলতে পারো কি করে ? মানুষ যাকে ভালবাসে তার একটু কিছ্ হলেই সে পাগল হনো হয়ে যায়। তখন যুক্তি থাকে না, বিশ্বাস-অবিশ্বাসের প্রশ্ন থাকে না, সে তখন ডাক্তার বাদি, তাবিজ তাগা মাদুলি জলপড়া মাথাখোঁড়া ধর্ম দেওয়া সব করে করে বেড়ায়। তাও কাজ না হোক উদ্বেগ আব ভালবাসাব একটা জমজমাট প্রকাশ তো ঘটে। বিলুর ঠাণ্ডা মুখশ্রী আব ক্ষুণ্ণধার বুদ্ধির সামনে কচুকাটা হয়ে গেল প্রীতম। কিন্তু বিলু জানে না, সংসারে সব লড়াই জিততে নেই।

তেলের প্রথম শিশিটা কৌতুহলভরে নাড়াচাড়া কবতে গিয়ে ভেঙে ফেলেছিল লাবু। গৌরাস্বাবু খবর পেয়ে আবার তেল এনেছিলেন। দ্বিতীয় শিশিটা আবার তাকে তোলা বইল। মাস দুই পরে একদিন শিশিটা নড়বে পড়ায় গৌরাস্বাবু প্রীতমকে একান্তে বললেন, আজকালকার ওয়াইফবা কেমন বলুন তো মশাই ? এদের কাছে স্বামী কি কোনো ফাস্টিবই নয় ? আমি বলে গেলাম আপনাকে, যদি বাঁচতে চান তা হলে নিজের মায়ের কাছে চলে যান।

এখন মা পায়ের গোছ থেকে উরু পর্যন্ত টান টান করে ভারী এবং দুর্গন্ধযুক্ত তেলটা মালিশ করে দিচ্ছে। মুখে কথা নেই। মা জানে, প্রীতমের মেজাজ এখানে এসে ভাল থাকছে না। এখানে মন বসতে সময় নেবে। এ জীবনে তো তার বহুকাল অভ্যাস নেই।

নিষ্ঠুর হোক, শীতল হোক তবু বিলুব প্রতি এক চোখভরা তীব্র আকর্ষণ আজও আছে প্রীতমের। শুধু আছে নয়, এখানে আসার পর তা আরো তীব্র হয়েছে। সব দাবি-দাওয়া ছেড়ে দিয়ে এসেছিল, তবু মন থেকে বিসর্জন দেওয়া গেল না। তেমনি বুকে চেউ দেয় লাবুব কথা মনে হলে। সারাদিন ভবানীপুরের সেই ঘরটার ছবি চোখে ভাসে। নাকে শাসে লাবুর গায়ের গন্ধ। বিলুর স্পর্শ টের পায় যেন শরীরে।

প্রীতম ডাকল, মা !

উ !

শতমকে বলো, আবার আমায় কলকাতায় দিয়ে আসুক।

ভাল হ, যাবি।

আমার এখানে খুব ভাল লাগছে। কিন্তু কলকাতায় থাকলে দূরে বসেও আমি কিছু কাজ-টাজ পাই, রোজগার করতে পারি।

মা কথাটার কোনো জবাব দিল না, কিন্তু আপন মনে বলতে লাগল, বউ মেয়ের জন্য মন তো কেমন করবেই। কিন্তু সেখানকার যা অবস্থা শুনি—কে কাকে দেখে।

প্রীতমের এ সব কথাও ভাল লাগে না। চোখ ফিরিয়ে সে জানালার বাইরে কলক ফুলের গাছটার দিকে চেয়ে থাকে। ঘন সবুজ পাতায় ঝোঁপ ফেলেছে জানালাটাকে। তার

এনট্রি করল। আস্তে আস্তে অ্যাকাউন্ট্যান্সির পুরোনো নেশা খুব পেয়ে বসল তাকে। বিলু হলে বাধা দিত। এখানে বাধা দেওয়াব কেউ নেই। দরজা ভেজানো। একটানা অনেকক্ষণ কাজ করে গেল সে। শতমের ব্যবসার কাগজপত্র থেকে সে জানতে পারল, বছরে কম করেও শতম ত্রিশ থেকে চল্লিশ হাজার টাকা রোজগাব করে। জেনে ভারী খুশি হল সে।

বিকেলের দিকে ক্লান্তি এল। চোখ বুজে শুয়ে বিশ্রাম নিতে গিয়ে ইঠাৎ শতমের সেই কথটা মনে পড়ল, অভ্যস্ত কাজ ছেড়ে অন্য কাজ করলে মানুষের বিশ্রাম হয়। ভেবে একটু অবিশ্বাসের হাসি হাসল সে। তবু একসপেরিমেন্ট করতে উঠেও বসল সে।

গান গাইবে? গাইত এক সময়। অল্পস্বল্প। কতকাল গায় না! ভুলে গেছে কথা, সুর।

বালিশে ঠেস দিয়ে চোখ বুজে নীচু স্কেলে সে গুনগুন করল কিছুক্ষণ। অনেক বিস্মৃতি আর অনভ্যাসের পলিমাটি পড়েছে গলায়। তবু কিছুক্ষণ চেষ্টার পর সে মোটামুটি সুরেব ওপর রেখে গাইতে লাগল, দোলাও দোলাও দোলাও আমার হৃদয়...

আশ্চর্য! ক্লান্তিটা ধীরে ধীরে কেটে গেল।

শতম অনেক রাতে এসে হানা দিল ঘরে। বলল, দেখি, কী করলে সারাদিন!

কাগজপত্র উটেপাটে দেখে বলল, বাঃ! এ যে অনেকটা হিসেব করে ফেলেছে। বলে খানিক চুপ করে শতম বলে, তোমাকে খাটাচ্ছি জানলে বউদি আমাকে মেরে ফেলবে। কিন্তু না খাটালে যে হবে না। মানুষ নিজের ক্ষমতা টের পেলে বুঝতে সে কতখানি। খাটতে খাটতে শরীর যখন ভেঙ্গে পড়ে, হাত-পা চলতে চায় না, তখনো ইচ্ছে করলে জোর করে মানুষ ফ্যাটিং লেয়ার পেবিয় যেতে পারে। তখন দেখা যায় ক্লান্তি ঝেড়ে সে আবার দ্বিগুণ কাজ করছে।

তোর অডিট আমিই করে দিতে পাববো।

দিও। তুমি থাকতে আমি অন্যেব কাছে থামোকা যাবো কেন?

আগের রিটার্নের রেকর্ডটা দেখলাম। সব কিছুই রিটার্নে দেখাস কেন? অনেকগুলো এনট্রি না দেখালেও চলত।

আমি কিছুই লুকোই না!

প্রীতম মাথা নাড়ল, বুঝেছে। শতম আর পাঁচজনের মতো তো নয়। সামান্য একটু মহংকাব বুকুর পালে এসে লাগে।

শতম বিছানায় বসে ব'ল, রোজ রাতে খাওয়ার পর আমি মা ছবি মরম রূপম পুঁচকি মিলে আড্ডা দিই। তা জানো?

না তো! টের পাই না।

তোমাকে কেউ ভয়ে আড্ডায় ডাকে না।

প্রীতমের অবশ্য এই পারিবারিক আড্ডা ভাল লাগার কথা নয়। একা ঘরে বসে ৩৭নীপুরের বাসার স্মৃতি আঁকড়ে গুমরে গুমরে উঠতেই সে বোধ হয় আনন্দ পায় বেশী। তবু ভদ্রতাবশে সে বলল, ভয়ের কি? ডাকলেই পারতিস!

ডাকব না। মাঝে মাঝে সবাই মিলে তোমার ঘরেই চলে আসবো।

বেশ তো?

আজ গান গেয়েছিলে। ছবি বলছিল, দাদার গলায় এখনো কী সুর!

ধ্যেত!

বউদির একটা চিঠি এসেছে আজ। দেখেছো?

না তো, কেউ দেয়নি আমাকে।

তোমাকে লেখা নয় । বাবাকে লেখা ।

কি লিখেছে ?

বউদি নভেম্বরের আগে আসতে পারবে না । ডিসেম্বরও হতে পারে ।

ও ।

এ মাসেই আসার কথা ছিল ।

আর কোনো খবর নেই, না ?

না ।

প্রীতম বসে ছিল । আন্তে আন্তে শুয়ে চোখ বুজল ।

॥ বাহ্যম ॥

সকালে দক্ষিণেব খোলা বারান্দায় ইজিচেয়ারে নরম কাঁথা বিছিয়ে বসানো হয় প্রীতমকে । চনচনে শীত পড়ে গেছে এখানে । গলা পর্যন্ত শাল দিয়ে ঢাকা থাকে তার । পায়ে মোজা । সামনেব এই বারান্দাটা চমৎকার । সামনে কাঁচা নর্দমা আর কিছু অসুন্দর কাঠের বাড়ি বাদ দিলে চেয়ে থাকতে খারাপ লাগে না । রোদ এসে কোমর পর্যন্ত তপ্ত করে রাখে । এদিকে পাহাড় দেখা যায় না বটে, কিন্তু অনেকখানি আকাশ দেখা যায় । খুব নীল, খুব গভীর । শুধু একটাই অসুবিধে । বারান্দায় বসলেই রাস্তা দিয়ে যত চেনা মানুষ যায় সবাই দাঁড়িয়ে কুশল প্রশ্ন করে, অসুখের ইতিবৃত্ত জানতে চায় । সেটা ভারী অস্বস্তিকর ।

কয়েক রাত ভাল ঘুম হচ্ছে না প্রীতমের । বিলু শীগগীর আসবে না । লাবুকে অনেকদিন দেখতে পাবে না সে । এসব ভাবনা আছে । আর নতুন এক রহস্যময় প্রশ্ন তাকে বড় জ্বালাতন করে । বিলুকে এখনো সে এত গভীরভাবে ভালবাসে কি কবে ? কেন বাসে ? বিলুকে ছেড়ে এসে কেন শিলিগুড়ি একদম ভাল লাগছে না তার ?

সামনে একটু বাগান ছিল । শতম তার ব্যবসার কাজে একগাদা পাথরকুঁচি এনে ফেলেছিল । এখন বাগানময় সেই পাথরকুঁচি ছড়িয়ে রয়েছে । গাছপালা নেই-ই বলতে গেলে । শুধু ফটকের দুধারে দাউ দাউ করে জ্বলছে লালচে বোগেনভেলিয়া । এই বাগান, বোগেনভেলিয়া, নর্দমা, রাস্তা, বাড়িঘর সবই প্রীতমের সন্তায় জড়িয়ে রয়েছে । তবু হয়, এই সকালের রোদে বারান্দায় বসে কোনো শৈশব স্মৃতিই আসে না তার মনে । বরং জায়গাটাকে অচেনা, অনভ্যস্ত লাগে কেবল ।

বসে থাকতে থাকতে রোদে চোখ জ্বালা করে । চোখ বুজলে নিদ্রাহীন রাত্রির প্রতিশোধ নিতে অসময়ের আচমকা তন্দ্রা এসে চোখ ঠটে ধরে । প্রায় রোজই এইভাবে ঘুমিয়ে পড়ে প্রীতম । ভয়ে কেউ তাকে জাগায় না । অনেক বেলায় শতম যখন ফেরে তখন ডাকে ।

সকাল বিকেল এক ডাক্তার এসে দেখে যায় তাকে । নতুন কোনো ডাক্তার নয় । বাবুপাড়ার সেই পুরোনো বয়স্ক ডাক্তার সেনগুপ্ত । প্রায় ছেলেবেলা থেকেই ঐর চিকিৎসায় বড় হয়েছে তারা । লম্বা চওড়া ডিগ্রি নেই, সাদামাটা এম বি বি এস । কিন্তু ভাল বিচক্ষণ ডাক্তার ।

কলকাতার ডাক্তার যে কেস-হিস্ট্রি লিখে দিয়েছিল সেইটে পড়ার পর প্রথম দিনই ডাক্তার সেনগুপ্ত বলেছিলেন, এ রোগ বাঁধালে কি করে ?

উদ্বিগ্ন শতম জিজ্ঞেস করে, আপনি পারবেন তো ?

কালীভক্ত ডাক্তার সেনগুপ্ত একটা বড় শ্বাস ছেড়ে বললেন, সবই মায়ের ইচ্ছে । দেখি

কি হয় ।

তলে তলে শতম এক হোমিওপ্যাথের কাছ থেকেও শুধু আনে । মালিশের তেল তো আছেই ।

শতম যে একাই চেষ্টা করছে তা নয় । মরম কোথেকে একটা মাদুলি এনে মার হাতে দিয়েছে । মা সেটা বেধে দিয়েছে ডান হাতে । বাবা বিদেশের বিভিন্ন হেলথ রিসার্চ সেন্টারে চিঠি লিখছে । সবাই তটস্থ, সক্রিয় ।

শুধু প্রীতমেরই মাঝে মাঝে মনে হয়, এত চেষ্টা সব বৃথা । সে আর কোনো দিনই ভাল হবে না । শেষ ক'টা দিন যদি কলকাতায় গিয়ে থাকতে পারত !

পুজো এল, চলে গেল । চারদিকে ঢাকের বাদি, লাউড স্পিকার, আলো, ভীড় একেবারেই স্পর্শ করল না প্রীতমকে । এ-বাড়ির কাউকেই করল না তেমনভাবে । এমন কি এবার কারো জন্য জামাকাপডও কেনা হল না পুজোয় । পুজোর দিন ক'টা শুধু একটু ছুটফট করল প্রীতম । বিলুর অফিস ছুটি ছিল, আসতে পারত । বিলুর বদলে অবশ্য তার চিঠি আসে । তাতে কী লেখে তার খোঁজ নেয় না প্রীতম । বাবাকে লেখে, বোনকে লেখে, ওরাই জবাব দিয়ে দেয় । আর কচিং কখনো আসে দাঁপনাথের চিঠি । খুব বাস্তব । উত্তর বাংলায় ট্যুরে আসার কথা ছিল, কিন্তু তা কেবলই স্থগিত হয়ে যাচ্ছে । তার বদলে দাঁপনাথ বাংগালোর, রাঁচি, দিল্লি ঘুরে এল । বড্ড বাস্তব, সময় নেই । প্রীতম যেন ভাল থাকে । চিঠি পড়ে প্রীতম ম্লান হাসে । তারই কোনো বাস্তবতা নেই ।

তবে কাজ আছে । আজকাল শতম তাকে অনেক হিসেবপত্রের কাজ গাঁছিয়েছে । টুকটুক করে সেগুলো করেও ফেলছে প্রীতম । খুব খারাপ লাগছে না । পেনসিল বা কলম ধরতে কিছুদিন আগেও আঙুলে কিছু জড়তা ছিল । ক্রমে সেটা কমে যাচ্ছে বা সয়ে যাচ্ছে । কিন্তু এ তো ঠিক কাজ নয় । কাজ কাজ খেলা । শতম তাকে খেলনা দিয়ে মৃত্যুর কথা ভুলিয়ে রাখার চেষ্টা করছে ।

সব চেয়ে ছোটো ভাই রূপম । বছর সতেরো-আঠারো বয়স হবে । ভাইদের মধ্যে বোধ হয় সেই একটু বখা-গোছের ছেলে । অনেককাল খোঁজ রাখেনি প্রীতম, তাই কে কেমন হয়ে উঠেছে তা সঠিক জানে না । তবে বার কয়েক কথা বলার সময় ওর মুখে সিগারেটের গন্ধ পেয়েছে । প্রায়ই বেশ রাত করে ফেরে । মাঝে মাঝে যে সব ছেলে তাকে এসে ডেকে নিয়ে যায় তাদের চেহারা-ছবি অন্য ধরনের । বখা ইয়ারবাজ ছেলে বলে মনে হয় । তারা কেউ বাড়ির মধ্যে ঢোকে না কখনো । এ সব মিলিয়ে দুইয়ে দুইয়ে চার করল প্রীতম ।

তবে এতেও তো তার কিছু যায় আসে না । সংসারের সঙ্গে যত না জড়িয়ে থাকা যায় সেই চেষ্টায় সে চোখ কান বন্ধ করে থাকে । যা ইচ্ছে হোক ।

বিজয়া-দশমীর রাতে বাড়িতে একটা চাপা গুণ্ডগোল শুনেছিল প্রীতম । কে কাকে বকছে । গলাটা মা'র । কাকে বকছে তা বোঝেনি প্রথমে । সম্ভবত তার ভয়েই এই সব গুজ-গুজ ফুস-ফুস চাপাচাপি ।

ঘটনাটা আরো স্পষ্ট হল কালীপূজার দিন । চৌ-পহর রূপম বাড়িতে নেই । সন্কেবেলা বাসাটা ফাঁকাই ছিল । বাবা গেছেন কালীবাড়িতে মাকে নিয়ে আরতি দেখতে । অন্য ভাইবোনরাও বেরিয়েছে একটু । প্রীতম নিজের ঘরে বসে খাতাপত্র খুলে হিসেব কষছিল । এমন সময় খুব জোরে কড়া নড়ে উঠল । প্রয়োজনের তুলনায় অনেক জোরে ঘটাং ঘটাং করে সে কী আওয়াজ ! রান্নার জন্য যে বয়স্কা বিধবাটিকে রাখা হয়েছে সে গিয়ে দরজা খুলে দিল । তারপর একটা চিৎকার ।

প্রীতম হতচকিত হয়ে কিছুক্ষণ নড়তে পারেনি। বাড়িতে ডাকাত পড়ল নাকি ? আজকাল শিলিগুড়িতে ভীষণ ডাকাতি হয়।

একটু বাদেই রূপম এসে তার ঘরের দরজায় দাঁড়াল, আকণ্ঠ মদ খেয়েছে, চোখে মোদো চাউনি। চৌকাঠে ভব রেখে দাঁড়িয়ে বলল, দাদা, আমার শরীরটা খারাপ, কিছু মনে কোরো না, মা কোথায় বেলো তো !

প্রীতম সবই বুঝল। কিন্তু সেই চৈতন্যে যে বৃকে কাঁপুনি উঠেছিল, সেটা তখনো রয়েছে। আড়ষ্ট শরীরে ভাইয়ের দিকে চেয়ে বলল, চৈতন্যেছিল কে বল তো !

ও তো কমকির মা। আমি ভয় দেখাচ্ছিলাম, এমন মজা করে বাঘের ডাক ডেকে উঠেছিলাম, হঠাৎ প্রায়ই করি ও-রকম, কিছু হয়নি; তুমি আজ কেমন আছো দাদা, আমার মাথাটা বড্ড ধরেছে, এমন একটা জর্দা পান খাওয়ায় কিন্তু আমি জর্দা খাই না তো, আজ খুব লেগে গেল, তুমি বরং শুষে পড়ো, আমি মাকে খুঁজে দেখি।

মা বাড়িতে নেই।

ও, তা আর কি কবা যাবে, তা হলে আমি বরং খুঁজে দেবো কোথায় গেছে, কালিবাড়িটার হবে—ঠিক খুঁজে পেয়ে যাবো। মেজদা বাড়ি ফেরেনি তো দাদা ?

না। এখনো ফেরেনি।

তবে আমি যাই। বলে পিছন ফিরল রূপম।

ভাই মদ খেয়েছে, এ ঘটনাও তেমন স্পর্শ করে না প্রীতমকে। শুধু সে মনে মনে বলে, কলকাতায় আমি এর চেয়ে ঢের ভাল ছিলাম। সেখানে এই সব ঘটত না।

প্রীতমের যে প্রখর অনুভূতি কলকাতায় সক্রিয় ছিল তা এখানে আসার পর ঘুমিয়ে পড়েছে। প্রীতম আজকাল চারদিকটাকে ভাল করে টের পায় না, লক্ষ করে না, পাত্তাও দেয় না।

রূপম চলে গেলে সে আবার হিসেবে মন দিতে চেষ্টা করল।

রূপম সেই রাতে ফিরল না। খাওয়ার সময় প্রীতম খুব উদাস গলায় মাকে জানাল, রূপম সঙ্গেবেলা এসেছিল। তোমাকে খুঁজছিল।

মা একটু কেমন ফ্যাকাসে গলায় বলে, তোর ঘরে ঢুকেছিল নাকি ?

ঠিক ঢোকেনি। দরজা থেকে কথা বলে গেল।

রাঁধুনিও বলছিল, এসেছিল।

তোমার সঙ্গে দেখা হয়নি ?

না তো !

না হয়ে ভালই হয়েছে।

মা কোনো প্রশ্ন করল না। কাঁচুমাচু হয়ে চেয়ে রইল প্রীতমের দিকে। মার মুখের ভাব দেখেই প্রীতম বুঝতে পারে, রূপমের ব্যাপারটা মা খুব ভালই জানে। কিন্তু প্রীতম জেনে গেছে বলে ভয় পাচ্ছে।

প্রীতম অবশ্য কথা বাড়াল না। এ-বাড়ির সঙ্গে অলঙ্ঘ্য তার একটা দূরত্ব রচিত হয়ে গেছে কবে থেকে যেন। এককাল টের পায়নি। এখানে আসার পর থেকে পাচ্ছে। সেই দূরত্বটাকে প্রীতম আর পেরোতে চায় না। লাভ কি ? কারো কোনো পরিণতিকেই তো আর সে ঠেকাতে পারবে না।

শোওয়ার পর প্রীতম অনেক রাত অবধি বাড়িতে একট চাপা উত্তেজিত কথাবার্তার শব্দ শুনতে পেল। একটা দীর্ঘশ্বাস ফেলে অবশেষে চোখ বুজল সে। বাড়ির লোক হয়তো সব

কিছু তাকে বলতে চাইছে না । সে তো ঠিক পুরোপুরি এ-বাড়ির মানুষ নয় । তার খানিকটা গ্রাস করেছে কলকাতা, খানিকটা বিলু আর লাবু । এ-বাড়িতে তার অধিকার সদরের চৌকাঠ অবধি । আর ভিতরে সে নিজেও ঢুকতে চায় না ।

খুব ভোরবেলা, তার ঘুম ভাঙারও আগে, শতম এসে চূপ করে শিয়রে বসে তার মাথা স্পর্শ করে অনেকক্ষণ জপ করে যায় । কোনো দিন তা টের পায় প্রীতম, কোনো দিন পায় না । কিন্তু কে বলবে কেন, ঐ জপটুকু তার আজকাল বড় জরুরী বলে মনে হয় । শরীরের মধ্যে, মনের মধ্যে কিছু একটা হয় । অনেক স্নিগ্ধ বোধ করে সে । সতেজ লাগে । বেলা বাড়লে আস্তে আস্তে অবশ্য সেই ভাবটুকু কেটে যায় ।

আজও জপ করছিল শতম । প্রীতমের মনে কিছু অস্বস্তি ছিল কাল রাত থেকে, তাই ঘুম গভীর হয়নি । ভোর রাতে শতমের জপের মাঝখানে সে চোখ চাইল । মশারির মধ্যে বালিশের পাশে সংকীর্ণ জায়গায় খুব কষ্ট করে মস্ত শরীরটাকে ঝুঁচকে শতম বসে আছে । শিরদাঁড়া সোজা, চোখ বন্ধ, মুখ গভীর । সন্তের মতো এক উদাসীনতা আজকাল ছেয়ে থাকে শতমের মুখে । খুব গভীর ও শক্তিমান বলে মনে হয় । বোধ হয় সেই জনাই আজকাল প্রীতম একটু একটু নির্ভর করে ওর ওপর । নির্ভরতা আসছে । যদি সেই পথ বেয়ে নির্ভরতাও আসে কোনো দিন !

চোখ চেয়ে শতমকে দেখে আবার চোখ বুজে থাকে প্রীতম । সে নাস্তিক না ঈশ্বরবিশ্বাসী তা সে নিজেও জানে না । কোনো দিন ও সব নিয়ে মাথাই ঘামায়নি । ভবানীপুত্রের বাসায় কোনো ঠাকুর-দেবতার ছবি পর্যন্ত নেই । এমন কি বিলু ভগবান মানে কিনা তাও সে স্পষ্ট জানে না । সোজা কথা, এতকাল ভগবান নিয়ে ভাবার অবকাশই হয়নি তার । কঠিন এই অসুখে পড়েও ঈশ্বরের শবণ নেয়নি সে । কিন্তু তা নাস্তিক বলে নয়, নেহাত মনে পড়েনি বলে ।

বিলু কি নাস্তিক ? তার অসুখ হওয়ার পর বিলু একবার দক্ষিণেশ্বরে গিয়েছিল মনে পড়ে । তা ছাড়া আর কিছু মনে নেই । তবু বিলুর নাস্তিক হওয়াই স্বাভাবিক । কারণ অরুণ ঘোর নাস্তিক, আর বিলু বরাবর অরুণেরই অনুগামী ।

বুকের মধ্যে একটু জ্বালা করে ওঠে প্রীতমের । পুরুষের স্বাভাবিক অধিকারবোধ আর ঈর্ষা তাকে এখনো ছাড়েনি । কিন্তু ছাড়া উচিত ছিল । সে তো বিলুকে বলেই এসেছে, বিলু যেন অরুণকে বিয়ে করে । সেটা অবশ্য হয়ে উঠবে না । অরুণ বোধ হয় এতদিনে বিয়ে করে ফেলেছে । তা হলে বিলু কি করবে ? চিরকাল অরুণের উপপত্নী হয়ে থেকে যাবে না তো ! ভেবে গা-টা একটু রি রি করে ওঠে তার ।

আবার চোখ খোলে প্রীতম । ভোরের আলো আর একটু স্পষ্ট হয়েছে । ধানস্তু শতমকে বড় সুন্দর দেখাচ্ছে এই আলোয় । চলছে জপ, শব্দের তরঙ্গ । এই সব জিনিসের সঙ্গে কোনো যোগ নেই তার । তবু মাথা স্থির রেখে শুয়ে থাকে সে । ভাল কিছু, সুন্দর কিছু ভাববার চেষ্টা করে । কিন্তু কিছুই মনে পড়ে না । একমাত্র লাবুর মুখখানা হঠাৎ মনে পড়ে যায় । এই একমাত্র জন যার সঙ্গে তার সম্পর্ক শর্তহীন, জটিলতাহীন । লাবুর মুখখানাই মনে মনে আঁকড়ে থাকে সে ।

জপ শেষ করে নিঃশব্দে চলে গেল শতম । আবার এল চায়ের কাপ হাতে অনেকক্ষণ বাদে । বলল, বেড়াতে যাবে দাদা ?

আমি ? আমি কি করে যাবো ?

খুব পাড়বে । আমরা তো সঙ্গেই থাকবো ।

কোথায় ?

তুমি তো পাহাড় ভালবাস না তেমন । পাহাড়ে এখন শীতও খুব । বীরপাড়ার কাছে আমার বন্ধু প্রত্যাশের এক চা-বাগান আছে । ভাল বাংলা । কদিন গিয়ে থেকে আসবে ? সবাই যাবো ।

প্রীতম মাথা নাড়ে, না রে । নড়াচড়া ভাল লাগে না ।

কিছুদিন একটু অন্য পরিবেশে মনটা অন্য রকম লাগত ।

মন ! না, কোথাও মন ভাল লাগে না ।

শতম একটু গম্ভীর হয়ে বলে, এই শিলিগুড়িতেই তোমার জন্ম । এখানেই বড় হয়েছে । এখানে তোমার কত চেনা মানুষ, বন্ধু-বান্ধব । এই জায়গা তোমার ভাল লাগে না কেন বলে তো ? বন্ধুবান্ধব আর চেনা লোককে তার আশার খবর দিতে বারণ করে দিয়েছে প্রীতম । তাই তেমন কেউ আসে না । কিন্তু শিলিগুড়ি কেন ভাল লাগে না তা প্রীতম বলবে কি হবে ? সে মাথা নেড়ে বলল, ভাল লাগবে না কেন ? তবে সেই শিলিগুড়ি তো আর নেই ।

সে তো ঠিকই । বউদি বা লাবুর জন্য মন কেমন করে বলে এমন মনমরা হয়ে থাকো না তো ?

না, না । ও সব নয় । এখানেও তো তোরা আছিস ।

শতম একটু অহংকাবের সঙ্গে বলে, হ্যাঁ, আমরা আছি । যারা বরাবর তোমার পাশে থাকব । তুমি অত ভাবো কেন ?

না, ভাবি না ।

শোনো, রূপমটা বি. কম পড়তে পড়তে পড়া ছেড়ে দিয়ে বদ বন্ধুদের সঙ্গে মিশছে । মেরে পাট পাট করেছি কয়েক বার । এখনো ভূত ছাড়েনি । আমি বাইরে বাইরে কাজে থাকি, নজব দিতে পারি না । ওকে তুমি একটু দেখ না !

প্রীতম শঙ্কিত হয়ে বলে, আমি ! আমি কী দেখব ?

তুমি ইনভলভড হতে চাইছো না । কেন, আমরা তোমার কেউ নই ?

প্রীতম একটু লজ্জিত হয় । বলে, আমি ঠিক শাসন-টাসন করতে পারি না, তুই তো জানিস ।

শাসন বলতে যদি বকাঝকা আর মারধোর হয় তবে বলি, ওতে রূপুর কিছু হবে না । রাস্তায় ঘাটে ও বিস্তর মারপিট করে । মারে মার খায়ও । ওসবে ওর ঘাঁটা পড়ে গেছে । আর সে রকম শাসনের জন্য তোমাকে দরকার কি ? আমি আর বাবা ওকে কম আসুরিক শাসন তো করিনি । এখন ওকে অন্য রকমভাবে ট্রিট করতে হবে । কিন্তু রকমটা আমরা খুঁজে পাচ্ছি না । তুমি ওর বড়না, একটু দূরের লোক । কলকাতায় থাকো বলে ও তোমাকে খুব ভাল করে জরিপ করতে পারেনি এখনো । একটু সমীহও করে বোধ হয় । দায়িত্ব নিলে হয়তো তুমি পারবে ।

কথাগুলোর যৌক্তিকতা মনে মনে স্বীকার করে প্রীতম । কিন্তু ভিতরে কোনো আগ্রহ জাগে না তার । ছোটো ভাইয়ের জন্য যেটুকু উদ্বেগ থাকা উচিত ছিল তাও তার নেই । উপরন্তু সে একটু ভয় পায়, কঁকড়ে যায় মনে মনে । তবু বলে, ঠিক আছে । ওকে মাঝে মাঝে আমার কাছে পাঠিয়ে দিস ।

মাঝে মাঝে নয় । আমি ভাবছি তোমার ঘরেই ওকে স্থায়ীভাবে থাকতে বলব । ও তোমার দেখাশোনাও করতে পারবে । অবশ্য যদি করে ।

প্রস্তাবটা পছন্দ না হলেও প্রীতম বলল, আচ্ছা ।

রূপমের টিকির নাগাল পেতে অবশ্য আরো দিন তিন-চার পেরিয়ে গেল। তারপর একদিন সন্ধ্যাবেলা একটু কুণ্ঠিত পায়ে সে এসে ঘরে ঢুকল।

দাদা, ডেকেছো ?

প্রীতম চোখ তুলে ভাইটিকে খুব মন দিয়ে দেখে। সব চেয়ে ছোটো। ছেলেবেলায় এ ভাইটাকে খুব বেশী ভালবাসত প্রীতম। তারপর স্বার্থপরের মতো সেই সব ভালবাসা প্রত্যাহার করে নিয়েছে কবে।

রূপমের চেহারা খুব মজবুত নয়। অন্য ভাইদের চেয়ে বরং প্রীতমের সঙ্গেই তার চেহারার মিল বেশী। লম্বাটে গড়ন, রোগা। তবে প্রীতমের মুখে যে লাবণ্য ছিল তা এর নেই। কর্কশ শ্রীহীন মুখ। বোঝা যায়, শরীরের ওপর নেশার অত্যাচার বড় কম নয়। চোখে একটা তীব্রতা আছে, যা সব সময় কু-চিন্তা করলে হয়।

তাড়াতাড়িতে প্রীতম লড়াইয়ের প্রস্তুতি নিচ্ছিল। কি বলা উচিত, কি বললে ভাল হয় তা ঠিক করতে পারল না সে। একটু বিভ্রান্ত বোধ করে এবং একটু বিরক্ত হয়েও সে বলল, একটু বাদে আসিস। মিনিট পনেবো পরে।

আচ্ছা। বলে চলে গেল রূপু।

ততক্ষণ একটু দম ধরে থাকে প্রীতম। খুব বেশী আদর দেখালেও সন্দেহ করবে, খুব বেশী কঠোর হলে ছিটকে যাবে। তার চেয়ে সহজ, অকপট ব্যবহার ভাল। মনে মনে তৈরি হয়ে নিল প্রীতম।

মিনিট পনেরোর মধ্যেই আবার এল রূপু।

প্রীতম খুব সবলভাবে বলল, তুই তো অ্যাকাউন্টেন্টস একটু বুকিস। আমাকে একটু হেলপ করবি তো!

রূপু একটু হাসল। বলল, অ্যাকাউন্টেন্টস তো শিখিনি।

শিখতে সময় লাগে না। পড়াশুনো ছেড়ে দিয়েছিস শুনলাম।

কি হবে পড়ে ? চাকরি পাবো ?

তা অবশ্য ঠিক।

তোমার মতো চার্টার্ড অ্যাকাউন্ট্যান্ট হবো তেমন মাথা আমার নেই।

ত হলে কী করতে চাস ?

আমার আর্টস পড়ান ইচ্ছে ছিল। বাবা, মেজদা বারণ করল। বলল, বি কম কবে কমিটং পড়। আমার মাথায় কমার্স ঢোকে না। অবশ্য আর্টস পড়েও কিছু হত না।

আমার পাশে এসে বোস।

রূপু বিছানায় এসে বসে। পরনে প্যান্ট আর খয়েরী রঙের একটা হাতকাটা সোয়েটার। শিলিগুড়ির এই ভয়ংকর শীতের পক্ষে নিতান্তই তুচ্ছ পোশাক।

এই পোশাকে বেরোচ্ছিলি ? এখানে যা শীত !

আমার শীত লাগে না।

আমার একটা ভাল পুলওভার আছে। সুটকেসটা খোল গিয়ে, ওপরেই আছে। আমি তো পরি না, তুই পর।

থাক না। তোমার লাগবে।

লাগবে না। যা, বের করে গায়ে দে।

রূপু উঠে গিয়ে পুলওভারটা বের করে। ক্রীম রঙের নরম উলে বোনা। নিউ মার্কেট থেকে বছর দুই আগে কেনা। খুব বেশী গায়ে দেওয়ার সময় পায়নি প্রীতম।

গায়ে দিয়ে রূপু বলে, একটু লুজ হচ্ছে ।

তখন আমার স্বাস্থ্য ভাল ছিল । তবু আমারও একটু বড় বড় হত । ভেবেছিলাম, মোটা তো হবেই, বয়স হলে সবাই হয় । তাই একটু বড়ই কিনে রাখি ।

এ কথায় হাসল রূপু । বলল, আমার মোটা হতে দেবী আছে । চাকরি না পেলে— ।

দূর বোকা ! মোটা হওয়া কি ভাল ! রোগা লোকেরাই চটপটে হয় । এটা কিন্তু তোকে মানিয়েছে ।

আরম্ভটা এইভাবে মন্দ হল না । ঘুষ দেওয়ায় এবং নরম সুরে কথা বলায় রূপম বোধ হয় তাকে অপছন্দ করল না তেমন । জানালার ধারে একটা দড়ির খাটিয়ায় বিছানা পেতে শুতেও লাগল রোজ রাতে । প্রায়ই জিজ্ঞেস করে, দাদা তোমার কিছু লাগবে ? কিছু করব তোমার জন্য ? দামী পুলওভারের ঋণ বোধ হয় ভুলতে পারছে না সে । প্রীতম বলে, না, কী আব করবি ? শুধু এই হিসেবপত্রের কীজে আমাকে একটু হেলপ করিস ।

নভেম্বরের শেষ দিকে জমজমাট শীতের এক ভোরবেলা হঠাৎ বাড়িতে খুব হইচই । একটা চেনা গলার স্বর অনেক কুয়াশা আর দ্বন্দ্ব অতিক্রম করে এসে হানা দিল । কাঁপা বৃকে উঠে বসে ছিল প্রীতম ।

দবজা ঠেলে ঘরে এল দীপনাথ । বাঃ, তুই তো দারুণ ইমপ্রুভ করেছিস । বলে ঘাড় ঘুরিয়ে দরজার বাইরে চেয়ে ডাকল, বিলু ! বিলু ! দেখে যা তোর কতটা চেহারা । চিনতে পারবি না ।

॥ তিথ্যায় ॥

বিলু কোনোদিনই খুব সুন্দরী ছিল না, তবে সাদামাটা চেহারার মধ্যেও কারো কারো যেমন এক একটা অদ্ভুত আকর্ষণ থাকে, বিলুরও তাই । হয়তো সেই আকর্ষণটা নেহাতই একটা গজদস্তে বা চোখেব পাতার একটা কালো আঁচিলের মতো তুচ্ছ জিনিসকে নিয়ে তৈরি হয় । বিলুরও সেই রকম একটা কিছু আছে, কিন্তু সেটা যে কী তা আজও স্পষ্ট করে ধরতে পারেনি প্রীতম ।

বিলু যখন ঘরে এল তখন সেই পুরনো আকর্ষণটা আজ বঁড়শির মতো কঠায় আটকে টানছিল তাকে । টানছিল বিলুর দিকেই । কয়েক পলক বিলুর দিকে চেয়েই চোখ সরিয়ে নিল প্রীতম । কলকে ফুলের গাছটার দিকে চেয়ে রইল । বৃকে একটু অস্বস্তি ।

ঘরে ঢুকেই বিলু বলল, মেয়ে লজ্জায় আসতে চাইছে না তোমার কাছে । তুমি ডাকো ।

থাক, লজ্জা ভাঙলে আসবে ।

বিলু বিছানায় এসে বসল । দীপনাথ সামনেই চেয়ারে বসা । প্রীতম চোখ বুজে বলল, ছুটি পেলে তা হলে ?

বিলুকেই বলা, একটু কুষ্ঠার সঙ্গে বিলু বলে, অনেক কষ্টে, অরুণের বাবা নিজে ইনিশিয়েটিভ নিয়ে গ্র্যান্ট করিয়েছেন । চাকরি তো পাকা নয়, বহরও পোরেনি, এখনই ছুটি কি পাওনা হয়, বলো ?

কদিনেব ?

আপাতত দশ দিন ।

অরুণের বিয়েটা ? হয়ে গেছে নাকি ?

এ প্রশ্নটার জবাব দিতে কয়েক সেকেন্ড বেশি সময় নিল বিলু । গলার স্বরও এক পর্দা

নেমে একটু মিয়োনো শোনাল। বলল, ঠিক হয়ে আছে। মাঝখানে অরুণ দু'মাসের জন্য বাইরে গিয়েছিল হঠাৎ, তাই ক'দিন পিছোতে হয়েছে।

প্রীতম নীরবে শুনল, কিছু বলল না। অরুণের বিয়ের ব্যাপারটা তার কাছে আজও গুরুতর। অরুণ মাঝে মাঝে বিদেশে যায়। বিদেশে যাওয়ার নানা সুযোগও আছে তার। কিন্তু তাই বলে বিয়ে পিছোবে এমন কোনো কথা নেই। প্রীতম একটু বড় করে শ্বাস ফেলে বলে, যাও, তোমরা একটু জিরিয়ে-টিরিয়ে নাও। এখানে খুব ঠাণ্ডা। লাবু সম্পর্কে সাবধান।

যাই। সারা রাত ভাল ঘুম হয়নি। বলে বিলু উঠে গেল। বোধ হয় পালালোই।

বিলু চলে গেলে প্রীতম দীপনাথের দিকে তাকায়। দীপনাথ ছোট একটা নোট বইতে উটপেন দিয়ে কী লিখছে খুব মন দিয়ে।

কী করছো ওটা ?

চোখ না তুলেই দীপনাথ বিরক্তির শব্দ করে বলে, আব বলিস না। থাকব মোটে দু'দিন, চোদ্দটা অ্যাপয়েন্টমেন্ট। দার্জিলিং, কালিম্পং, গ্যাংটক, জলপাইগুড়ি দৌড়াবোঁড়ি।

বলতে বলতেই দীপনাথ ওঠে।

ও কি ? চললে কোথায় ?

পিসীর বাড়িতে একবার দেখা করে বেলা দশটা সাড়ে দশটার মধ্যেই একটা জীপ নিয়ে দার্জিলিংটা আজ সেরে আসি।

আমি ভাবছিলাম, তুমি এবার আমাদের বাড়িতে থাকবে।

থাকার উপায় নেই। দার্জিলিং থেকেই আজ সোজা চলে যাবো জলপাইগুড়ি। ওখান থেকেই কাল সকালে চলে যাবো গ্যাংটক। পরশু কালিম্পং হয়ে ফিরব। পর্বদিনের ফ্লাইটে কলকাতা। তোর তো দুঃখের আর কিছু নেই রে, প্রীতম, বিলু তো এসেছে।

আমার দুঃখ কি শুধু বিলুর জন্য ? তুমি যে পর হয়ে গেলে, বড় বেশী ইম্পরট্যান্ট হয়ে গেলে, স্কয়ারস্ হয়ে গেলে !

আমি ? দূর বোকা, কোমপানি চাকরের মতো খাটায়। আমিও খাটি। তোব চিকিৎসা কে করছে রে প্রীতম ?

আমাদের সেই পুরোনো ডাক্তার। তাছাড়া শতম হোমিওপ্যাথিও দিচ্ছে কোথেকে এনে।

বুঁচকে দীপনাথ কী একটু ভেবে বলল, নট ব্যাড, নট অ্যাট অল ব্যাড।

তুমি কি আমাকে ভাল দেখছ, সেজদা ?

অনেক ভাল। এত ভাল তোকে বহুকাল দেখিনি।

নিভে যাওয়ার আগে এটা শেষবারের জ্বলে ওঠা নয় তো ?

তুই সহজে নিভে যাবি বলে মনে হচ্ছে না।

ঠিক বলছ ?

ঠিকই বলছি।

যদি বাঁচি মেজদা, তবে কি করব জানো ? অনেক অনেক দূর পর্যন্ত শুধু হাঁটব। হেঁটে হেঁটে বহুদূর চলে যাবো।

দীপনাথ ঘড়ি দেখল। বাস্তবিকই সময় নেই। উঠি রে।

দীপনাথ অবশ্য প্রীতমের বাড়ি থেকে সহজে ছাড়া পেল না। ঘর থেকে বেরোতেই

শ্রীতমের বোন আর শতম এসে ধরে নিয়ে গেল ভিতর বাড়িতে । এত সকালে দীপনাথ কিছু খেতে পারে না । তবু লুচি, আলু ভাজা, সন্দেশ আর চা অনিচ্ছের সঙ্গে কৌত কৌত করে গিলতে হল খানিক ।

দশটার মধ্যে পিসীর বাড়ির সামনে জীপ হাজির থাকবে । মোটোয়ানিকে খবর দেওয়া আছে । দেয়ী করা চলে না ।

কলকাতা যাওয়ার আগে দেখা করে যেও সেজদা । বিলু রওনা হওয়ার মুখে বলল । যাবো ।

কলকাতায় গিয়ে বাসাটায় একবার হানা দিও । বিন্দু একা রয়েছে । অচলাকে তো সঙ্গে নিয়ে এলাম ।

অন্যমনে একটা হুঁ দিয়ে দীপনাথ গিয়ে রিকসায় উঠে পড়ল ।

বেলা সাড়ে দশটায় যখন উত্তরমুখো পাহাড়ের দিকে জীপ ছাড়ল তখনই সত্যিকারের একা হতে পারল দীপনাথ । সঙ্গে মোটোয়ানিরও আসার কথা ছিল । এভারেস্ট হোটেলে লাঞ্চ দিচ্ছে শিবরামন । কিন্তু মোটোয়ানির কাজ পড়ে যাওয়ায় এল না । ফলে জীপটার ড্রাইভার ছাড়া শুধু দীপনাথ । সৌভাগ্যই বলতে হবে ।

গাড়িটা অবশ্য ঠিক জীপ নয় । জোংগা ডিজেল । তার রাখঢাক আছে । খোলা জীপ হলে তিনধারিয়ায় পৌঁছোতেই পৌঁছোতেই শীতে নাক-কান অবশ হয়ে যেত । এই ঢাকাওলা জোংগাতেও সেটা কম হচ্ছিল না । কিন্তু অবিরল পাহাড়ের মধ্যে যেতে যেতে সব অনুভূতি হারিয়ে যাচ্ছিল দীপনাথের । সে একদিন একা মহাপ্রস্থানে বেরিয়ে পড়বে । একা নির্জন সাদা এক মহা পর্বত অপেক্ষা করে আছে তার জন্য । সেই সাদা মস্ত অপার্থিব পাহাড়ের কথা ভাবলে নিজের তুচ্ছতা ব্যর্থতা কামনা-বাস্তবনা আশা-আকাঙ্ক্ষার কথা বড় আবছা হয়ে আসে । এক নির্জনতা ঘিরে ধরে তাকে ।

বার বার কান বন্ধ হয়ে যাচ্ছে উচ্চতায় ওঠার জন্য । ঢৌক গিলে কানের ছিপি খুলছে সে । ঠাণ্ডায় ক্রমে সিটিয়ে আসছে হাত-পা, চোখে জল আসছে, কান কনকন করছে ব্যথায় । তবু যাত্রাটি খুব উপভোগ করে দীপনাথ । রাস্তাঘাট ফাঁকা, নির্জন । এই শীতে টুরিস্ট নেই বলে রাস্তায় গাড়ি খুব কম । মাঝে মাঝে একটু মেঘলা করে আসে । কুয়াশার মতো মেঘ নেমে আসে রাস্তায় । বাকাহীন নেপালী ড্রাইভারটি সম্পূর্ণ একাক্ষ হয়ে আছে জোংগা গাড়িটির সঙ্গে । অজস্র ঘুণচক্কর পাক খেয়ে খেয়ে ওপরে উঠে যাচ্ছে গাড়ি । আরো নির্জনতা, আরো শীত, মহান পর্বতের আরো কাছাকাছি হওয়া । তিনধারিয়ায় একবার, কাশিয়াঙে আর একবার চা খেয়ে নিল দীপনাথ আর তার নেপালী ড্রাইভার । দীপনাথ স্বচ্ছন্দে নেপালী ভাষা বলতে পারে । কিন্তু ইচ্ছে করেই সে ড্রাইভারটার সঙ্গে ভাব জমাল না । এই পথটুকু সে নীরব থাকতে চায় ।

লাবুর সঙ্গে ভাব জমতে দুপুর হল । ভাব জমার পর অবশ্য লাবুকে আর থামায় কে ! কথা আর শেষ হয় না । ‘জানো বাবা !’ বলে বারবার শ্রীতমের ধুঁতনি ধরে টেনে নিজের দিকে মুখখানা ফিরিয়ে নেয় আর তুচ্ছাতিতুচ্ছ সব গল্প বলে যেতে থাকে ।

তুমি আমাকে ভুলে যাওনি তো, লাবু ?

তোমাকে ? না তো । আমি তো সব সময়ে বাবা বাবা করি, তাই মা বলে—যাঃ তোকে বাবার কাছে শিলিগুড়িতেই রেখে আসবো । আমি বাপ-সোহাগী তো ।

তাই নাকি ? তবে থাকবে আমার কাছে ?

তোমাকে তো সবচেয়ে ভালবাসি বাবা, কিন্তু মাকে ছেড়ে যে থাকতে পারি না ।
মা তো অফিসে যায়, তোমার একা লাগে না ?
না তো ! অচলা মাসী থাকে তো ।

আর কে থাকে ?

আর কেউ না ।

অরুণ মামা মাঝে মাঝে আসে না ?

রোজ আসে । আমরা অরুণ মামার গাড়িতে কত বেড়াই । রবিবারে জু, আইসক্রীম,
লাঞ্চ ।

লাঞ্চ ! কোথায় লাঞ্চ করো ।

পার্ক স্ট্রীটে ।

তোমার অরুণ মামা তো খুব সুন্দর, না লাবু ? আমার চেয়ে অনেক সুন্দর ।

তুমি একটু রোগা । কিন্তু তুমি খুব সুন্দর ।

আর অরুণ মামা ?

অরুণ মামাও সুন্দর । আমাকেও সবাই খুব সুন্দর বলে, বাবা । আমি সুন্দর তো ! না
বাবা !

তুমি ? তুমি ভীষণ সুন্দর । এ বাড়িটা তোমার কেমন লাগছে, লাবু ?

খুব ভাল । অনেক বড় তো বাড়িটা ! কত গাছ !

পাহাড় দেখেছো ?

হ্যাঁ, ছোটকাকু ছাদে নিয়ে গিয়ে দেখাল । আমাদের দার্জিলিং নিয়ে যাবে বড়কাকু,
জানো বাবা ?

দূরে একটা সাদা পাহাড় দেখেছো ?

ওটা তো কাঞ্চনজঙ্ঘা । ছোটকাকু কি বলে জানো ?

কী বলে ?

বলে কাঞ্চনজঙ্ঘাটা নাকি একটা মস্ত বড় আইসক্রীম । সত্যি, বাবা ?

আইসক্রীম ? না, ঠিক তা নয় । দুপুরে তুমি একটু ঘুমোবে না লাবু ?

আজ আমি ঘুমোবো না । বড়কাকু একটু বাদে আমাকে মোটর সাইকেলে চড়িয়ে
বেড়াতে নিয়ে যাবে ।

ও বাবা ! যদি পড়ে-টড়ে যাও ?

যাঃ ! আমি তো সকালবেলায় বড়কাকুর সঙ্গে কতটা ঘুরে এলাম । তিলক ময়দান, নিউ
মার্কেট, সেভক মোড়, পুরোনো স্টেশন । শিলিগুড়ি খুব সুন্দর, না বাবা ?

তোমার ভাল লাগলেই ভাল ।

তোমার ভাল লাগে না ?

কি করে লাগবে ? এখানে যে তুমি থাকো না । একা কি ভাল লাগে ?

আমি একটু বড় হলেই এখানে চলে আসব ।

তখন মাকে ছেড়ে থাকতে পারবে ?

পারব । বিয়ে যখন হবে তখনো তো মা-বাবাকে ছেড়ে থাকতেই হবে । বলো বাবা !

তা তো ঠিকই ।

ছোটকাকুটা না ভীষণ বাজে কথা বলে ।

কী বলে ?

বলে এখানে নাকি কলকাতার চেয়েও উঁচু মনুমেন্ট আছে। আমি বললাম, কোথায় দেখাও। তখন না পাহাড়টা দেখিয়ে বলল, ঐ তো আমাদের মনুমেন্ট, আছে তোদের কলকাতায় ওরকম মনুমেন্ট ?

বটে !

হ্যাঁ, আর বলে কি জলদাপাড়ায় নাকি কলকাতার চেয়েও অনেক বড় জু আছে ! সত্যি বাবা ?

জলদাপাড়া একটা জঙ্গল।

তাহলে তো চিড়িয়াখানা হল না, বলো বাবা।

তা বটে।

শোনো না বাবা, আর বলে, কলকাতাটা পচা জায়গা। এখানে নাকি একটা দুধের পুকুর আছে, সেখানে ডুব দিলে সব অসুখ সেরে যায়। তোমাকে নাকি সেখানে নিয়ে গিয়ে চান করাবে, আর তুমি ভাল হয়ে যাবে। সত্যি, বাবা ?

কে জানে !

চলো না বাবা, দুধের পুকুরটায় চান করে আসবে।

কথা বলতে বলতে একসময়ে লাবু পাশাটিতে শুয়ে কখন বেথেয়ালে ঘুমিয়ে পড়ল। লেপটা ওর গায়ে ভাল করে টেনে দিল প্রীতম।

বাড়িটা নির্জন, চুপচাপ। শতম, মরম বা রূপম নিশ্চয়ই বাড়িতে নেই। বাবা অফিসে। মা বোন সবাই ঘুমোচ্ছে এই শীতের দুপুরে। এ সময়ে বিলু একবার আসবে কি ?

প্রীতম কাগজপত্র টেনে নিয়ে হিসেব মেলাতে বসল। চোখ কান আনমনে প্রতীক্ষা করছিল বিলুর জন্য।

বিলু অবশ্য এল না। দোষ নেই, ট্রেনে ওর ভাল ঘুম হয়নি। দুপুরে ঘুমোচ্ছে একটু।

বিলু এল বিকেল গড়িয়ে। ঘুমিয়ে চোখমুখ ফুলিয়েছে।

এসেই বলল, কী ঠাণ্ডা ! আমার বোধহয় সর্দি লেগে গেল।

প্রীতম কোনো জবাব দিল না। তবে কাগজ-কলম সরিয়ে রেখে বালিশে হেলান দিয়ে বসল।

বিলু চেয়ার টেনে আনল কাছে। মেয়ের দিকে তাকিয়ে বলল, কখন এসে তোমার কাছে ঘুমিয়ে পড়েছে দেখ !

কলকাতায় কি লাবু আমার কথা বলে ?

সারাক্ষণ।

আমাকে মনে রেখেছে তা হলে ?

সে তো রেখেছেই, অন্যদেরও ভুলতে দিচ্ছে না।

ভুলতে কেউ চাইছে কি ?

গম্ভীর হয়ে বিলু বলল, কে জানে বাবা !

প্রীতম একটু হাসল। বলল, অচলা একবারও এঘরে এল না তো !

বিলু তেমনি থমথমে মুখে বলে, এখানে তো তোমার জন্য ওর কিছু করার নেই। তুমি ডাকলে আসবে।

বিলুর অভিমান-টভিমান নেই। তাই হঠাৎ এই গাম্ভীর্যটা কেন তা প্রীতম ভেবে দেখছিল। গত কয়েক মাসে বিলুর স্বভাবের ঋঁটিনাটি দিক অনেকটাই ভুলে গেছে সে। এ ক'দিন চোখের আড়ালের বিলুকে কল্পনায় যেরকম ভাবত, আসল বিলু তার চেয়ে অনেক

বেশী বর্ণহীন, অনুস্তেজক ।

প্রীতম বলল, চেয়ারটা টেনে বোসো ।

বসবার সময় নেই । পাড়াসুদ্ধ মেয়ে-বউ ঝেঁটিয়ে এসেছে দেখা করতে । সামনে না গেলে কী ভাবে ! আমি বরং অচলাকে পাঠিয়ে দিচ্ছি গিয়ে ।

বিলু চলে গেলে প্রীতম ঘুমন্ত লাবুর গায়ে হাত রেখে গভীর চোখে মেয়ের টুলটুলে মুখখানা দেখল । শীতে ঠোট দুখানা শুকিয়ে রয়েছে । গাল ফেটেছে । গা থেকে শিশু-শরীরের মতলা গন্ধ আসছে । পৃথিবীর কোনো সুগন্ধই এর কাছে দাঁড়াতে পারে না । মেয়ের মুখের দিকে চেয়ে প্রীতম আপনমনে ভাবল, তুমি আমার বড় আপন লাবু, বড় আপন ।

কেমন আছেন ?

আচমকা অচলার গলার স্বরে একটু চমকে গিয়েছিল প্রীতম । মুখ তুলে হাসল, ভাল । তুমি ?

আপনি কিন্তু সত্যিই ভাল আছেন । চেহারা ফিরেছে ।

মোটা হয়েছি বলছ ?

না, তা নয় । তবে ফ্রেশ দেখাচ্ছে ।

হয়তো চেঞ্জের ফল ।

অচলা মাথা নেড়ে বলে, শুধু চেঞ্জ নয় ।

বোসো ।

বিছানায় তো বসবে না অচলা, চেয়ারেও নয় । তাই একটু ইতস্তত করে বিছানার পাশে মোঝেতে হাঁটু গেড়ে বসে লাবুর মাথায় হাত বোলাতে বোলাতে বলল, কলকাতায় আমরা রোজ রাতে আপনাকে নিয়ে গল্প করি ।

আমাকে ভুলে যাওনি তো ?

কী যে বলেন ! আপনাকে ভোলা কি অত সহজ ?

বিলু কি আমার কথা খুব বলে ?

আমরা সবাই বলি ।

বাতটা জলপাইগুড়িতেই কাটানোর কথা ছিল । কিন্তু রাত দশটার মধ্যে কাজ শেষ হয়ে গেল, মোটোয়ানির জোংগাটা তখনো মজুদ রয়েছে । দীপনাথ তাই ভাবল, থেকে কী হবে !

জলপাইগুড়ির ঘোষমশাই অবশ্য বললেন, আরে আপনার জন্য গেস্টরুমে বিছানা কবিয়ে রেখেছি, খামোখা এই ঠাণ্ডায় যাবেন কেন ?

কিছু হবে না । শিলিগুড়িতে আমার রিলেটিভরা রয়েছে । তাদের তো সময় দিতে পারছি না । তাই রাতটা গিয়ে থাকি ।

অনিচ্ছের সঙ্গে ঘোষ রাজি হলেন । অবশ্য বললেন, রাস্তা খুব নিরাপদ নয় কিন্তু । নিউ জলপাইগুড়ির তিন বাস্তির মোড়টা ডেনজারাস ।

দেশের সব জায়গাই ডেনজারাস ।

তা অবশ্য বটে ।

কথা না বাড়িয়ে জোংগায় চেপে বসল দীপনাথ । নেপালী ড্রাইভার বোধহয় ঘরে ফেরার তাড়ায় প্রায় উড়িয়ে নিয়ে এল তাকে ।

দার্কিলিং আর জলপাইগুড়ির দুটি অ্যাপয়েন্টমেন্টই খুব গুরুতর ছিল । বোস বলে

দিয়েছে, সম্ভব হলে রাতেই আমাকে ট্রাংক কল করে জানাবেন কী হল।

জলপাইগুড়ি থেকে টেলিফোন করার সময় হয়নি। রাত পৌনে এগারোটায় দীপনাথ শিলিগুড়ি টেলিফোন এক্সচেঞ্জে হানা দেয়। এখানে পুরোনো বজুরা রয়েছে। মোটামুটি সবাই চেনা। কয়েক মিনিটের মধ্যেই বোসের বাড়ির লাইন পেয়ে গেল।

বোস সাহেব? না, উনি এখনো ফেরেননি। আপনি কে বলছেন?

দীপনাথ হাসল। মণিদীপা তার গলা ভালই চেনে। তবে হয়তো বহু দূরের কল হওয়ায় গলাটি অন্যরকম শোনাচ্ছে।

সে একটু চৈচিয়ে বলল, আমি দীপনাথ চ্যাটার্জি।

যাঃ! গলাটি অন্যরকম লাগছে কেন?

লাগলে কী করব? আমি তো নিজের গলাতেই কথা বলছি।

ঠাণ্ডা লাগিয়েছেন নাকি?

না। পাগলদের সর্দি হয় না, জানেন তো!

হয় না? যাঃ বাজে কথা। আমি অনেক পাগল দেখেছি, যাদের সর্দি হয়েছে।

তারা জেনুইন পাগল নয়।

আপনিও জেনুইন পাগল নন। সত্যিই আপনি তো! নাকি অন্য কেউ নাম ভাঁড়িয়ে ইয়ার্কি করছে।

আমিই।

প্রমাণ দিন।

সেই যে আপনার জন্য রতনপুরে মৌমাছির কামড খেয়েছিল।

ওঃ মাই গড!

তার মানে?

আমিও এইমাত্র ঐ ঘটনাটাই ভাবছিলাম।

তা হলে আমি জেনুইন দীপনাথ তো?

ভীষণ জেনুইন।

বোস সাহেব এলে একটা খবর দিতে পারবেন, ঠুকে?

না। আমাদের নন-কমিউনিকেশন চলছে কাল থেকে।

হঠাৎ আবার কী হল?

হচ্ছে তো রোজই।

তা হলে খবরটা দেওয়ার কী হবে?

খুব জরুরী?

জরুরী না হলে রাত এগারোটায় কেউ ট্রাংক কল করে?

তা হলে মেসেজটা বলুন, আমি লিখে বেয়ারাব হাত দিয়ে ওর ঘরে পাঠিয়ে দিচ্ছি।

খবরটা ফেন উনি আজই পান।

পাবেন। মণিদীপা ক্যাজের ভার নিলে করে।

আপনি এত রাত পর্যন্ত জেগে আছেন কেন?

মণিদীপার গা জ্বালানো হাসির শব্দটা এল, বলল, বিরহে। আপনি নর্থ বেঙ্গলে যাওয়ার পর থেকেই এই দশা।

আমি নর্থ বেঙ্গলে এসেছি তা কি আপনি জানতেন?

এমনিতে জানতাম না। তবে হৃদয়ে হৃদয়ে কি টেলিপ্যাথি হয় না?

যা একখানা ফাজিল তৈরী হয়েছেন না ! এবার লিখুন তো ! হাতের কাছে কাগজ-কলম আছে ?

আছে । বাঁদী তৈরি । বলুন ।

ছি ছি । আচ্ছা লিখুন ।

॥ চুয়াম ॥

টেলিফোন রেখে মণিদীপা মেসেজটার দিকে তাকাল । কিছুই তেমন বুঝল না । কতকগুলো ব্যবসায়িক সংকেতবাহী মাত্র । তবু আনমনে তাকিয়ে রইল কিছুক্ষণ । কাগজটা সে ঠিক দেখছে না, অন্য কথা ভাবছে । বেশ কিছুকাল আগে বাগডোগরা এয়ারপোর্টে ব্যাগ থেকে টাকা বের করতে গিয়ে অনেক টাকা ছড়িয়ে পড়েছিল মেঝেয় । দীপনাথ সেগুলো নীচু হয়ে কুড়িয়ে দিচ্ছে । মাথা নীচু লোকটাকে দেখে সেদিন তার মনে হয়েছিল, লোকটার ব্যাকবোন নেই । আজও তাই মনে হয় । লোকটা পাহাড় ভালবাসে । একদিন বলেছিল খুব উঁচু একটা পাহাড়ে একদিন একা গিয়ে উঠবে । আর ফিরবে না । দীপনাথ এখন সেইসব উঁচু পাহাড়ের খুব কাছাকাছি । যদি না ফেরে ?

বেয়ারাকে ডেকে মেসেজটা বোসের শোওয়ার ঘরে পাঠিয়ে দেয় মণিদীপা । বলে দেয়, সাহেব এলে মেসেজটার কথা বোলো ।

নিষ্কর্মা বসে থাকতে বা কিছু নিয়ে ভাবতে মণিদীপা ভালবাসে না । বড্ড একঘেয়ে যাচ্ছে কদিন । তেলের দাম আর এক দফা বাড়ল । ফলে গাড়ি নিয়ে বেরোনো বন্ধ করে দিয়েছে বোস । গাড়ির চাবি নিজের স্টিলের আলমারিতে রেখেছে । জয়েন্ট অ্যাকাউন্টে টাকা রাখছে না । এসব হচ্ছে অর্থনৈতিক নিয়ন্ত্রণ । মণিদীপা মার্কেটিং-এ যায় না বহুদিন । গাড়ি চালিয়ে বেড়ায় না প্রায় মাস দুই । ড্রাইভিং ভুলেই গেল বুঝি । কিন্তু এ নিয়ে বোসের সঙ্গে কথা বলতে রুচি হয় না । শুলেই ঝগড়া লাগবে । আজকাল তাদের ঝগড়া বড় বেশী কুৎসিত পর্যায়ে চলে যায় । রেগে গেলে মণিদীপার ঝোড়ো মগজ থেকে যেসব কথা বেরোয় তা স্বাভাবিক অবস্থায় সে চিন্তা করতে পারে না । কিন্তু আশ্চর্য, ঝগড়ার সময় ঠিক কথগুলো জিভে চলে আসে ।

রোজ ভাবে, এবার চলে যাবো । আজ বা কাল । কিন্তু যাই-যাই করলেও মণিদীপার যাওয়ার জায়গা নেই । বাপের বাড়ির কথা সে ভাবতেই পারে না । নিষাতিত এবং অবসরপ্রাপ্ত রাজনৈতিক কর্মী হিসেবে তার বাবা খুব সামান্য একটা ভাতা পায় পাটি থেকে । বাড়িতে দুখানা ঘর ভর্তি তার ভাইবোন । একবেলা খাবার জুটলে অন্য বেলা জুটতে চায় না । এক দাদা মোটামুটি ভাল চাকরি করে । সংসারের হাঁ-মুখ দেখে সে মানে মানে নিজের বউ ঝাড়া নিয়ে অন্য জায়গায় সরে পড়েছে ।

ছিল স্নিগ্ধদেব । সব জুড়ে ছিল তার । বিশ্বাস ছিল, সব আশ্রয় ছিল হলে স্নিগ্ধদেব এগিয়ে আসবে ঠিক । বুদ্ধিমান ও সাহসী স্নিগ্ধদেবের অনেক গুণ । তবে সবচেয়ে বড় ছিল তার হৃদয় । ভারী নরম সুন্দর মানুষ ।

দীপে দীপ ঘষছিল মণিদীপা, অথচ চোখ ফেটে যাচ্ছে জলের তোড়ে । রাগ, একমাত্র পাগলা রাগটাকে ঝুঁচিয়ে তুললে তবেই এই ভাবাবেগের বৃথা কান্নাকে আটকানো যাবে ।

দীপা !

ডাক শুনে মণিদীপা জানালার কাছ থেকে মুখটা সামান্য ফেরালো । তার চুলের গুছি

মুখটাকে আড়াল করেছে। বুনু তার চোখের জল দেখতে পাবে না। মুখে কিছু বলল না সে।

চ্যাটার্জি আর কিছু বলেনি ?

বুনো থেকে বুনু। এই নামে বিয়ের পর বেশ কিছুদিন স্বামীকে ডেকেছে মণিদীপা। তখন বন্য বরাহের মতোই প্রেম নিবেদন করত বুনু। মণিদীপা বোসের লম্বা থলথলে অপদার্থ চেহারা আর চরিত্রহীন মুখের দিকে চেয়ে বলল, না।

যদি কাল আবার ফোন করে—

কাল আমি বাড়ি থাকব না। ঝোঁঝে উঠে বলে মণিদীপা।

ওঃ, দেন ইটস্ অলরাইট।

বোস চলে গেলে মণিদীপা খাবার ঘরে এল। বোস আজকাল প্রায়ই রাতে বাড়িতে কিছু খায় না। তাই টেবিলে সাজিয়ে শুছিয়ে খাবার দেওয়া নেই। ঢাকনা খুলে মণিদীপা চিংড়ির ঝোল আর ভাত নিজেই নিয়ে একা বসে খেল, ছড়াল। পাতের দিকে তাকিয়ে তার একটু ভয় হল, এই ভাতের অভাবে সে কখনো কষ্ট পাবে না তো!

এর চেয়ে চাকরি করলে কি সুখী হওয়া যেত? বোধ হয় না। মণিদীপা ঐ বাঁধা দশটা পাঁচটার কাজ করতে পারত না কিছুতেই। তবে?

তবে নিয়ে ভাবতে ভাবতে শোওয়ার ঘরে এল সে। নিজস্ব কাঠের আলমারি খুলে শাড়ি ব্লাউজ উলেন টেনে হিঁচড়ে ফেলতে লাগল মেঝেয়। কোথাও কোনো খাঁজে কোণে যদি কিছু টাকা খুঁজে পাওয়া যায়।

পেল কিছু। সব মিলিয়ে পঞ্চাশ টাকাও নয়। এতে কী হবে?

আই মাস্ট সেল সামথিং। আই মাস্ট সেল—বলে দাঁতে দাঁত পিষে বিয়েতে বাপের বাড়ি থেকে দেওয়া ট্রাংকটা খুলল সে। ট্রাংকটা এ-বাড়ির পক্ষে খুবই বেমানান। তার রং গোলাপী এবং ডালায় একটু রঙ্গিন নকশা। তবে মজবুত বলে মণিদীপা এর মধ্যে গয়না রাখে।

গয়না বলতে বাপের বাড়ি থেকে কিছুই প্রায় পায়নি সে। তার ওপর সোনার গয়নায় একটা ঘেন্না ছিল বলে তো বিয়ের পরও তেমন কিছু করায়নি। গয়না একে সেক্কেলে, তার ওপর গয়না রাখার অর্থ সোনা হোর্ডিং। আজ গয়নার কাঠের বাস্‌টটা বের করে সে কিন্তু হতাশ হল। দুটো বাউটি, চারগাছা চুড়ি, একটা পাতলা হালকা নেকলেস। বিয়েতে একছড়া হার দিয়েছিল শাশুড়ি, তাতে কিছু সোনা আছে। তবু সব মিলিয়ে সাত আট ভরির বেশী নয়।

গয়নার ওপর এক বিন্দু মায়া নেই মণিদীপার। তবু আজ বাস্‌টটা খুলে চেয়ে রইল অনেকক্ষণ। চেয়ে দেখল, এই তার শেষ সম্বল।

বোসের সঙ্গে আপোস করতে হবে নাকি? ঘেন্না করে যে! চলে যাবে? কিন্তু কোথায়?

এই কোথায় প্রব্ৰটাজ আজকাল বিশাল হয়ে ডানা মেলে পথ আটকায়।

বুনুর কাছে বোধ হয় আর টাকা চাওয়া যায় না। যায়? মাসের প্রথমে বুনু আজকাল তাকে চারশো টাকা হাতখরচা দেয়। তার বেশী দেওয়ার উপায় নেই, বলে দিয়েছে। চাইলে হয়তো দেবে, কিন্তু অপমান করবে। এখন একটুও অপমান সহিতে পারবে না সে।

দীপনাথ বাগডোগরায় নীচু হয়ে টাকা কুড়োচ্ছে—দৃশ্যটা আবার দেখতে পেল সে। দীপনাথের সেই হাজার টাকার ঋণ আজও শোধ করতে পারেনি বুনু। তা নিয়ে তাদের

স্বামী-স্ত্রীর মধ্যে কথামূল্য কম হয়নি। অধস্তন কর্মচারী এবং প্রায় তার দয়ায় মানুষ একজন লোকের কাছে অধমর্ণ থাকাটা বুনুর কাছে এক বিরম্টি প্রেস্টিজের প্রশ্ন।

মণিদীপা গয়নার বাস্ক বালিশের পাশে নিয়ে এল।

সকালে উঠে খানিকটা ভাবল সে, গয়না বেচেতে লোকে কোথায় যায়? একবার বাপের বাড়িতে গেলে হয়। তার মা গয়না, ঘটি বাটি বেচে অভ্যস্ত, ঠিক গাইড করতে পারবে। কিন্তু সেইসঙ্গে প্রশ্ন উঠবে, মেয়ে কেন গয়না বেচেছে?

থাক, অন্য কিছু ভাবাই ভাল।

এই সংসারে তার তেমন কোনো ইনভলভমেন্ট নেই। সে রাঁধে না, ঘর গোছায় না, আয়-ব্যয়ের হিসেব দেখে না, বোস সাহেবের প্রতিও তার কোনো ব্যক্তিগত দায়দায়িত্ব নেই। যেমন তার প্রতি নেই বোস সাহেবেরও। বোস সকালে চা খায়, দাড়ি কামায়, স্নান করে ব্রেকফাস্ট খেয়ে অফিসে চলে যায়। তার মধ্যে মণিদীপার ভূমিকা কী-ই বা হতে পারে! কোনো কাজের জন্য অনুমতিরও দরকার নেই তার। তবু আজ সকালে সে বুনুর ওপর নজর রাখল। গয়না বিক্রির ব্যাপারটা ওর টের পাওয়া উচিত নয়। টের কোনোদিন যে পাবে না তাও জানে মণিদীপা। গয়নার খোঁজই ও রাখে না। তবু নতুন ধরনের এই কাজটা করতে গিয়ে বুনুর কথাই বারবার ভাবছে সে।

বোস অফিসে বেরিয়ে যাওয়ার পর অনেকক্ষণ অপেক্ষা করল মণিদীপা। বাস-ট্রামে এখনো ভীড়, এখনো ট্যাকসি সুলভ নয়।

বেরোলো এগারোটা নাগাদ।

কোথায় গয়না বিক্রি হয় তা জানে না। ট্যাকসি নিয়ে তাই সে এল অঞ্জুর কাছে।

বহুকাল দেখা নেই। দেখা হতে যে অঞ্জু খুব খুশি হল তাও নয়। অঞ্জু এখন খুবই ব্যস্ত মানুষ। বসন্ত রায় রোডে নিজেদের বাড়ির একতলায় প্রথমে একটা মেয়েদের বিউটি পারলার খুলেছিল। সেটা তেমন চলছিল না। এখন সে দোকান তুলে দিয়ে মেয়েদের দর্জির দোকান দিয়েছে। রমরম করে চলছে।

আজও কাউন্টারে কাঁচি হাতে দাঁড়িয়ে চশমাচোখে খুব মন দিয়ে কী কাটছিল একটা সবুজ সিলকের কাপড় থেকে। ব্লাউজ বা জিনসের মাপ দিতে কিংবা ডেলিভারি নিতে কম করেও এই দুপুরে সাত-আট জন ছুঁড়ি থেকে বুড়ী অপেক্ষা করছে। তিনজন কর্মী মহিলা হিমসিম।

অঞ্জু ফর্সা মোটোসোটা এবং বেশ সুন্দরী। ব্যস্ত অঞ্জু প্রথমটায় প্রায় চিনতেই পারল না। হুঁ কুঁচকে একটু তাকিয়ে থেকে অনেকটা সময়ের ফাঁক দিয়ে বলল, ওঃ তুমি! কী খবর?

একদম ডাম্প গলা, উত্তাপ নেই। চোখ নামিয়ে কাজ করতে করতে বলল, কাটার পালিয়েছে, বুঝলে! যা দেমাক না আজকাল কাটারদের! এত মাইনে দিই তবু হট্টাইট কিছু না বলে-কয়েক ঠিক পালিয়ে যাবে। রাইভ্যাল কনসার্নরা ভাগিয়ে নেয়।

তুমি তো আগে দর্জির কাজ জানতে না অঞ্জু!

ঠিকই তো। কবে শেখার সময় হল বল! ভেবেছিলাম মাইনে করা লোক দিয়েই ব্যবসা চলে যাবে। কিন্তু ভাল কাটারদের রাখা যে কী কামেলা। অর্ডারের স্তূপ জমে আছে, তার টিকির দেখা নেই। বহুবার নাকাল হয়ে শেষে নিজেই শিখেছি প্রাণের দায়ে। এখন কারো পরোয়া করি না।

অঞ্জু ব্যস্ত, বিরক্ত, ক্লান্তও বোধ হয়। কী করবে মণিদীপা ভেবে পাচ্ছিল না। বসারও জায়গা নেই। টুল বেঞ্চ সব ভর্তি। অঞ্জু ব্যবসা করে, সুতরাং বাস্তব-বুদ্ধি-সম্পন্ন, আর তাই

তার কাছে আসা। একটু পরামর্শ দিতে পারত অঞ্জু। কোথায় গেলে গয়না বিক্রি করতে গিয়ে ঠকতে হবে না তা বলে দিতে পারত।

বসবে? নাকি অন দি ওয়ে? অঞ্জু জিজ্ঞেস করে।

একটু দরকার ছিল।

আমার কাছে?

ই। কিন্তু তুমি তো ব্যস্ত।

ভীষণ। এ জন্মে আর বিশ্রাম নেই।

খুব রোজগার হচ্ছে তো?

হচ্ছে। খরচও আছে।

আহাঃ কী-ই বা খরচ! দোকানের তো ভাড়া লাগে না।

ভাড়াটাই যা বাদ। ট্যাক্স আছে, মাইনে আছে, মেনটেনেন্স আছে। কতটা তো কিছু দেখবে না। কেবল বলে দোকান তুলে দাও।

বলে বলুক। তুমি তুলে দিও না। এই বেশ রমরমে একটা দোকানঘরে সারাদিন কাটাতে মজা আছে। বোর করে না।

সেটাও ঠিক। কাজেরও আনন্দ আছে। আই ফিল ইম্পর্ট্যান্ট ডুয়িং সামথিং ফর আদারস্ অ্যান্ড ক্রিয়েটিং অলসো। আমি একটা সামার ড্রেস ডিজাইন বের করছি, জানো? নিউমার্কেটের কানহাইয়ালাল কন্টাক্ট করে গেছে।

অনেক টাকার কন্টাক্ট?

টাকাই তো সব নয়। দেয়ার ইজ অলসো এ প্রেজার। তবে কানহাইয়ালাল টাকাও ভালই দিচ্ছে।

তোমার হাজব্যান্ড কি এখন ম্যাকনিলের ম্যানেজিং ডিরেক্টর?

না, দু নম্বরে আছে। হয়ে যাবে শীগগীরই।

জানো তো, নকশালরা একসময়ে ঠিক করেছিল হাজব্যান্ড আর ওয়াইফের একসঙ্গে রোজগার করা বন্ধ করে দেবে?

দেওয়ার রোমান্টিক ভ্যাগাবন্ডস্। আমার হাজব্যান্ড মাসে দশ হাজার টাকা মাইনে পায় বলেই কি আমার কিছু করার নেই? শোনো কথা! আমিও তো মানুষ।

কথা থামিয়ে চারদিকে চেয়ে দেখছিল মণিদীপা। ভিতরে কাচের আলমারিতে বহু রকমের ড্রেস মেটিরিয়ালস সংগ্রহ করে রেখেছে অঞ্জু। কম করেও ত্রিশ চল্লিশ হাজার টাকার জিনিস। দু-দুটো এয়ারকুলার লাগানো। অবশ্য এখন শীতকাল বলে এগুলো চলছে না। কিন্তু সাইনবোর্ডে লেখা আছে 'এয়ার কন্ডিশনড'। এতে কাজ দেয়, ইজ্জত বাড়ে।

বসবে? অঞ্জু জিজ্ঞেস করে।

এখানে তো বসার জায়গা নেই।

ভিতরে এসো! না! বলে নিজেই গিয়ে কাউন্টারের একপাশে পাটা উঠিয়ে ধরল, এসো।

ভিতরে গোটা চারেক গদিওলা উঁচু টুল। তার একটায় উঠে বসল মণিদীপা।

অঞ্জু বলল, একটু বোসো। হাতের কাজটা মেসিনে পাঠিয়ে দিয়ে নিই।

তুমি কাজ করো না। আমি অপেক্ষা করছি। তাড়া নেই।

তোমার হাজব্যাণ্ডের কী খবর? গোয়িং আপ অ্যান্ড আপ?

হি ইজ অ্যামবিশাস।

পুরুষমানুষ মাত্রই জেলাস। মিসেসরা কিছু একটা করলেই তাদের গায়ে জ্বর আসে।

অথচ নিজেরা ! এক নম্বরের ক্যারিয়ারিস্ট ।

তোমার হাজ্যবান্ড একদম কো-অপারেট করেন না বুঝি ?

না, তা করে । এমন কি ওর অফিসের বিগ বসদের মিসেসরা তো এখান থেকেই সব কিছু বানিয়ে নেয় । ও-ই ইনট্রোডিউস করে দিয়েছে । এমনিতে হি ইজ প্রাউড অফ মি । কিন্তু কেবল ন্যাগ করবে, আমার বাচ্চারা তাদের মাকে পাচ্ছে না, হাইসহোল্ড ঠিক মতো চলছে না এটসেটরা । সব চেয়ে বড় কথা হি ওয়াণ্টস টু ডোমিনেট মি । আমার একটা সেপারেট পারসোনালিটি গড়ে উঠুক এটা ও চায় না ।

আর ইউ আনহ্যাপী ?

অঞ্জু মন দিয়ে একটা সূক্ষ্ম কাটার কাজ সারতে গিয়ে সময় নিল । কিন্তু প্রশ্নটা কানে গেছে ঠিকই । কাপড়টা সরিয়ে রেখে কপাল থেকে চুল সরিয়ে ক্লান্ত মুখে একটু হেসে বলল, আনহ্যাপী কিনা তা ভেবে দেখারও সময় পাই না । তবে ও আমাকে অপছন্দ করে না তো, আই অলসো অ্যাডোর হিম । না মণি, উই আর নট আনহ্যাপী ।

এই দোকান থেকে তোমার নিশ্চয়ই অনেক রোজগার হয় অঞ্জু !

তুপ্তমুখে অঞ্জু বলে, হয় ।

কত বলো তো !

ইনকাম ট্যাকসে বলে দেবে না তো ! ভালই হয় । এ ফিউ থাইজ্যান্ডস্ পাব মাছ্ ।

ফিউ থাইজ্যান্ডস্ ! মণিদীপা অবাক চোখে চেয়ে থাকে ।

আমি লাকি ।

তুমি খুব পরিশ্রমী ও ।

কাজ করতে আমি ভালবাসি ।

আমিও বাসি । কিন্তু কী করব ঠিক বুঝতে পারি না ।

অঞ্জু পাশের টুলে বসে বলে, আমি বলি, ডু সামথিং । আজকালকার পুরুষরা জানো তো, ভীষণ অবিশ্বাসী । আজ তোমার কাছে ফেথফুল আছে, কালই হয়তো থাকবে না । চারিদিকে নাগিনীরা ফেলিতেছে বিষাক্ত নিশ্বাস, বোঝাই তো ! তাই মেয়েদের একটা ফুটিং থাকা ভাল । তাতে অন্তত হাজ্যবান্ডরা বুঝবে যে, বেশী ট্যান্ডাই-ম্যান্ডাই করে লাভ হবে না । ইন ফ্যাক্ট আমার কতটি এক সময়ে আমার ওপর খুব হস্তিভাব করত । আজকাল সমঝে চলে । ভয়ও পায় ।

আমি তোমার মতো লাকি নই অঞ্জু ।

দোকানের কর্মী একটি এসে নীচু গলায় কী পরামর্শ করে গেল । আর একজনের ব্লাউজের মাপ খাতায় লিখে নিতে হল । টুকটাক এসব কাজ সেরে চশমাটা খুলে একটা টুকরো কাপড়ে মুছতে মুছতে অঞ্জু বলে, তোমার একটা পলিটিক্যাল লাইন ছিল না ? ছিল । এখন নেই ।

বেচেছে । হায়ার পলিটিকসে পয়সা আছে, শৌখিন পলিটিকসে কিছু নেই । বরং ঘরের পয়সা বেরিয়ে যায় । তাছাড়া টেনশন, ফ্রাস্ট্রেশন অ্যান্ড আদার হ্যাজার্ডস । তোমার বাবার কথাই ভেবে দেখ । লোয়ার পলিটিকস্ একদম নন-প্রোডাক্টিভ । ডু সামথিং প্রোডাক্টিভ । আর্ন মানি । লাইফ উইল বি ভেরি এনজয়েবল ।

অঞ্জু, আই অ্যাম ইন মানি ট্রাবল !

কেন, তোমার হাজ্যবান্ড— ?

ওর সন্দেহ আমি একষ্ট্রাভ্যাগেন্ট । আজকাল টাকা কন্ট্রোল করছে । মাসে মাসে মাত্র

চারশো টাকা হাতখরচ দিচ্ছে।

চারশো ! বলে প্রায় নাক সিটকোলো অঞ্জু।

তুমিই বলো আমার এখন কি করা উচিত।

আর্ন মানি, আর্ন মানি ! অঞ্জু ছড়া কাটার মতো করে বলে।

মণিদীপার চোখ জ্বালা করে। বুকের ভিতরটাও জ্বলছে রাগে আর আকাজক্ষায়। অঞ্জুর এত রবরবা, এত স্বাধীনতা, এত টাকা তার ভিতরে বিস্তারণ ঘটাতে থাকে, টালমাটাল করে দেয়।

অঞ্জু মৃদুস্বরে বলল, আগে তুমি খুব গরীবদের জন্য ভাবতে। আমি বলি কি, ভাবো তাতে ক্ষতি নেই। এমন কি গরীবদের জন্য কিছু করাও ভাল, আমিই তো রেগুলার কিছু দানধ্যান করি। রামকৃষ্ণ মিশন, একটা অনাথ আশ্রম আর একটা ব্লাইন্ড স্কুলে টাকা দিই। গরীবদের জন্য ফিল করা ভাল, কিন্তু গরীব হওয়া ভাল নয়। পড়াটি আমার দু চোখের বিষ।

মণিদীপা নিঃশব্দে মাথা নেড়ে কথাটা সমর্থন করে। সে জানে, এটা খুব সত্যি। নইলে স্নিগ্ধদেব এত কিছু করে, এত দূর এগিয়ে, হাজার জনাব চোখে বিপ্লবের কাজল পরিয়ে দিয়ে অবশেষে নিজেই কেন সরে পড়ে মার্কিন মুলুকে ? আজ মণিদীপা তাই নেতৃত্বহীন, অস্থির, দ্বিধাগ্রস্ত।

অঞ্জু একটা সিনথেটিক কাপড় টেনে নিয়ে পটু হাতে দাগ দিয়ে দিয়ে কাটবাব তোড়জোড় করছে।

মণিদীপা মৃদুস্বরে বলে, শোনো অঞ্জু, আমার খুব টাকার দরকার। আমি একটা হার বিক্রি করব।

বিক্রি করবে ? যেন এতটা বিশ্বাস করতে পারছে না এমনভাবে তাকায় অঞ্জু।

মণিদীপা একটু লজ্জা পায়, অহংকারেও লাগে। সে তাড়াতাড়ি বলল, অরনামেন্টস তো পরি না। ঘরে রেখে কী লাভ বলো। প্রিমিটিভনেস।

সে তো ঠিকই। তবে সোনা একবার বিক্রি করলে আর কিন্তু কিনতে পারবে না। সোনার যা বাজার।

জানি। তবু করব। তোমার জানাশোনা স্যাকরা' আছে ?

আমি বহুকাল ওসব করাইনি। গয়না যা ছিল সব ব্যাংকের ভলটে। তবে ভবানীপুরে অনেক দোকান আছে পুরোনো গয়না কেনে।

তারা তো ঠকাবে।

চিন্তিত মুখে অঞ্জু বলে, অসম্ভব নয়। কিন্তু আমি যে কাউকে চিনি না।

প্রসঙ্গটা আর টানার মানে হয় না বলে মণিদীপা টানল না। কিছুক্ষণ অন্য কথাবার্তা বলে উঠে পড়ল। কিন্তু বুকে তীব্র দহন। মাথা ফেটে যাচ্ছে রাগে, ঈর্ষায়।

॥ পঞ্চম অঙ্ক ॥

সাড়ে তিন ভরি আছে। পান বাদ যাবে।

পান বাদ দেবেন কেন ? হারটা তো সুন্দর। একটু পালিশ করলে নতুন বলে বিক্রি হয়ে যাবে। মণিদীপা বুদ্ধি খাটিয়ে বলল।

দোকানী গম্ভীর মুখে বলে, আমি শুধু সোনার দাম দিতে পারি।

মণিদীপার কিছু করার ছিল না। বলল, তাই দিন।

টাকা নিয়ে উঠল এবং ট্যাকসি ধরল।

বাসায় ফিরে টাকার গোছাটার দিকে চেয়ে মুখ বাঁকা করে সে। এ টাকা দিয়ে কিছুই শুরু করা যায় না। আরো টাকার দরকার। অনেক টাকা।

টাকাটা অনিবার্যভাবে মার্কেটিং-এ যাওয়ার জন্য তাকে ঠেলছিল। কষ্টে লোভ সামলে নেয় মণিদীপা। অঞ্জুর মতো এনটারপ্রাইজিং একটা কিছু করতে হবে। অনেক টাকার দরকার।

কাগজ-কলম নিয়ে সারাদিন ডাইনিং টেবিলে বসে অনেক হিসেব-নিকেশ করল। দোকান ভাড়া, কর্মচারীর বেতন, ডেকোরেশন, ট্যাকস। তবে অঞ্জুর মতো টেলারিং শপ না রেস্টুরেন্ট না হ্যান্ডিক্রাফটস তা ঠিক করতে পারল না। কিন্তু কিছু একটা করতে হবে।

রাত আটটা নাগাদ যখন টেলিফোন বাজল তখনো মণিদীপার হুঁশ নেই। স্বপ্নাচ্ছন্ন চোখে সে একটা ঝকঝকে দোকানঘর দেখতে পাচ্ছে। ভারী বাস্তু দোকান, ভীষণ জনপ্রিয়। প্রতিদিন হাজার হাজার টাকার বিক্রি।

সেই ঘোরের মধ্যেই গিয়ে টেলিফোন ধরল।

বোস সাহেব আছেন ?

গলাটা শুনে আচ্ছন্ন ভাবটা কেটে গেল মণিদীপার। বৃকে বড় জ্বালা, বড় ক্ষোভ হতাশা।

এখনো ফেরেনি। কোথা থেকে ফোন করা হচ্ছে ?

শিলিগুড়ি। কালকের ফ্লাইটে যাচ্ছি। কিন্তু পৌছোতে বিকেল হয়ে যাবে, কাল আর বোস সাহেবের সঙ্গে দেখা হবে না, বলে দেবেন কইভলি।

বলবো। আপনার সঙ্গে আমারও একটু দরকার ছিল যে ! কবে দেখা হতে পারে বলবেন ?

কাল নয়। পরশু চেষ্টা করব। কেন ?

একটা কাজ হাতে নিয়েছি। এক্সপার্ট ওপিনিয়ন চাই।

আমি কোনো ব্যাপারেই এক্সপার্ট নই।

এক্সপার্ট বলেই তো অ্যাসিস্ট্যান্ট ম্যানেজারের পোস্টে আছেন।

পোস্টটা আমি পেয়েছি তেল দিয়ে ! আপনি তো জানেন।

ব্যাপারটা সিরিয়াস। আমি একটা দোকান দিচ্ছি।

দোকান ? কিসের দোকান ?

পান-বিড়ির।

ওঃ, তাহলে আমি ভাল অ্যাডভাইস দিতে পারব।

তা হলে পরশু ? আফটার অফিস আওয়ার্স ?

হ্যাঁ। বোস সাহেবের গাড়িতেই চলে যাবো আপনাদের ফ্ল্যাটে।

শুনুন। আপনাকে কিন্তু আমার পার্টনার হতে হবে।

কিরকম পার্টনার ?

পার্টনার আবার কিরকম হয় ? ক্যাপিটাল ইনভেস্টমেন্ট ফিফটি ফিফটি।

অর্থাৎ আপনি পান সাজবেন আর আমি বিড়ি বাঁধব ?

শপ ম্যানেজমেন্ট আমার, আউটডোর আপনার।

আর কিছু ?

আর কি ?

ধরুন লাভটা আপনার, লোকসানটা আমার ।

ফের ইয়ার্কি ?

না, ভাবছিলাম রাজনীতি কি একদম ছেড়ে দিলেন ?

ছাড়ব কেন ? এটাও এক ধরনের লড়াই । অপ্রেশনের বিরুদ্ধে ।

আপনি ক্যাপিটাল পেলেন কোথেকে ?

এখনো পাই নি । কি করে পাওয়া যায় তা আপনাকেই জিজ্ঞেস করব । শুনেছি আজকাল ব্যাংক ব্যবসার জন্য লোন দেয় । সত্যি ?

দেয় ।

আমার সামান্য কিছু সোনা আছে । বেচে দিচ্ছি ।

সর্বনাশ ।

সর্বনাশ কেন ?

সোনা বেচলে আর কিনতে পারবেন না কখনো । সোনা বেচতে নেই ।

ওসব প্রিমিটিভনেস আমার নেই । সোনা আমার কোনো কাজে লাগে না ।

ইতিমধ্যেই কি কিছু বেচে দিয়েছেন ?

শুধু হারটা ।

কতটা সোনা ছিল ?

সাড়ে তিন ভরি ।

দীপনাথ চুকচুক করে একটা আফসোসের শব্দ করে বলল, নিশ্চয়ই জানি আপনি ঠেকেছেন । আজকাল সোনার দর জানেন ?

না তো !

কত দিয়েছে আপনাকে ।

তিন হাজারের মতো । সোনার পান বাদ দিল যে ।

ওরা সব সময়ই পান বাদ দেয় । কিন্তু কথা তো তা নয় । ওর ওপরে বারগেন করতে হয় । আপনি নিশ্চয়ই তা করেননি !

আমি লোককে বিশ্বাস করি । বলল মণিদীপা, কিন্তু গলার স্বরে তেজ ফুটল না । বরং করুণ শোনা ।

দীপনাথ হাসল, আমি গিয়ে পৌঁছানোর আগে আর কাউকে সোনা বিক্রি করবেন না । খুব ঠকে যাবেন । তা ছাড়া বোস সাহেবের অ্যাডভাইস নিলেন না কেন ?

ও জানলে রাগ করবে ।

রাগ করাই উচিত ।

সেইজনাই এক্সপার্ট ওপিনিয়ন চেয়েছিলাম । এ সময়ে আপনি নর্থ বেঙ্গলে গিয়ে বসে রইলেন কেন বলুন তো !

আমাকে খেটে খেতে হয়, অন্যের হুকুমে চলতে হয় । আমি কি জানতাম আমি নর্থ বেঙ্গলে এলেই আপনি সোনা বেচবেন !

সোনা আমি সব বিক্রি করব । তবে এবার আপনার ঋতে ।

আমি ও দায়িত্ব নিতে পারব না ।

তা হলে আমার হাত-খরচ চলবে কিসে ?

কেন, বোস সাহেব হাত-খরচও বন্ধ করেছেন নাকি ?

ঠিক তা নয়। যা দেয় তাতে চলে না। টুর থেকে ফিরে এসেই ফিনানসিয়াল ব্যারিকেড তৈরি করেছে।

যতদূর জানি, আপনি চারশো টাকা পান।

বিস্মিত মণিদীপা বলে, আপনি জানেন? কি করে? ও কি আপনাকে বলেছে? দীপনাথ খতমত খেয়ে বলে, ঠিক ওভাবে বলেননি। একবার কী একটা কথা প্রসঙ্গে হঠাৎ ইনফর্মেশনটা বেরিয়ে আসে।

কুট সন্দেহে চোখ ছোটো করে মণিদীপা বলে, ও।

চারশো টাকা কিন্তু কম নয় মিসেস বোস।

কম বলছি না। কিন্তু আমি জানতে চাই আমার স্বাধীনতা নেই কেন? আজকাল বয় বাবুর্চির মাইনে পর্যন্ত বোস সাহেব দেয়, আগে আমার হাত দিয়ে দেওয়ানো হত। জয়েন্ট অ্যাকাউন্টে টাকা নেই। গাড়ি গ্যারাজে তালাবদ্ধ। কিন্তু আপনাকে বলে কি হবে? আপনি পুরুষমানুষ, সবসময়ে পুরুষদেরই পক্ষ নেবেন। আই নো ইউ অল।

আপনিও তো অবলা নারী নন মিসেস বোস। চারশো টাকায় নিম্ন-মধ্যবিত্ত একটা পরিবারের চলে যায়। আর আপনার তো ওটা শুধু হাত-খরচ। খাওয়া থাকা বা পোশাক ওর বাইরে।

হাউ ডু ইউ নো সো মাচ? বোস সাহেব কি এসবও বলেছে?

না। তবে টেলিফোনে আর এসব প্রসঙ্গে না বলাই ভাল।

দেন টক অ্যাকাউন্ট ওয়েদার।

এখানে ভীষণ ঠাণ্ডা। আজ গ্যাংটকে গিয়ে জমে গিয়েছিলাম।

মণিদীপা রাগ করে বলল, রিসিভার রেখে দিচ্ছি কিন্তু।

আরে, রেগে গেলেন যে! ওয়েদারের কথা আপনিই বলেন তো!

রাগ হওয়ার কথা নয় বুঝি? এদেশ বলেই মেয়েদের এত সহজে বেকায়দায় ফেলা যায়। সভ্য দেশ হলে—

দেশটাকে সভ্য করে তুলুন না! কে আটকাচ্ছে?

আপনারাই আটকাবেন, মেয়েরা প্রগ্রেস করলে যাদের ইস্টারেস্ট হ্যামপারড হয়।

আমি তো আপনার পার্টনার। আপনি প্রগ্রেস করলে আমারও প্রগ্রেস।

এখনো পার্টনার হনি।

হচ্ছি তো! পরশু দিন

আপনাকে পার্টনার করব কি-না, তা দু'বার ভাবতে হবে।

কোনো মেয়েকে পার্টনার করতে চান? জমবে না।

তার মানে?

মেয়েতে মেয়েতে কো-অপারেশন হয় না।

পুরুষে মেয়েতেও তো হচ্ছে না।

পরশু বরং আপনি আমার একটা ইস্টারভিউ নিন।

ইস্টারভিউ বহুবার নিয়েছি। কাওয়ার্ড, সেলফ কনটেন্ট।

আমি?

নয়তো কে? অলস ভীতু আনস্‌মার্ট।

তবু আমাকেই পার্টনার করতে চেয়েছিলেন একটু আগে।

এখন চাইছি না। আপনি আমাকে রাগিয়ে দিয়েছেন।

আপনি না রেগে কখন থাকেন বলুন তো। যখনই দেখা হয় তখনই দেখি রেগে আছেন।

আমি মোটেই রাগী নই।

আপনার ব্যবসা যদি জমে যায় তা হলে কি হবে মণিদীপা ?

নামটা মনে পড়েছে তা হলে ?

পড়েছে। কিন্তু প্রশ্নের জবাবটা ?

আমার ব্যবসা জমবেই।

কিন্তু তারপর ?

তারপর আবার কি ? ইট উইল গ্রো বিগার। আমি একটা চেইন অফ শপস্-এর কথা ভাবছি।

সে না হয় হল। কিন্তু আপনার সাংসারিক বা দাম্পত্যজীবনের কী হবে ?

তার সঙ্গে এর কি সম্পর্ক ?

আমি জানতে চাই আপনি সংসার ছাড়ার প্রোলোগ হিসেবে এসব ব্যবসা-ট্যাবসার কথা ভাবছেন কি-না।

আমি তো সংসার ছাড়া হয়েই আছি। গেস্টদের মতো থাকি খাই।

তবু তো একটু হলেও আছেন।

সেটুকু বাদ গেলেও কারোর ক্ষতি হবে না। বরং ফ্রি হলে অনেক বেশী কাজ করতে পারতাম। আমাদের ডিভোর্সটা আপনার জন্যই হল না। কিন্তু তাতে লাভ কি হল বলুন তো !

লাভ-ক্ষতির হিসেব এখনো শেষ হয়নি। সময় হলেই ব্যালান্স শীট পেয়ে যাবেন।

বোস সাহেব উকিলকে একটা ভিজিটও দিয়েছিল শুনেছি। আপনার পরামর্শে নোটিশটা সার্ভ করেনি। কিন্তু এটা বালির বাঁধ।

দেখা যাক।

আমি কারোর করুণার পাত্রী হয়ে থাকা পছন্দ করি না। সব সময়েই মনে হয়, বোস ইচ্ছে করলেই আমাকে ডিভোর্স করতে পারে, দয়া করে করছে না। একজন আউট-সাইডারের মতো এই থাকাটা কি খুব সম্মানজনক ?

ধৈর্য ধরুন।

ধৈর্য ধরছি তার কারণ অন্য। বোসের ফ্ল্যাট থেকে বেরোলে আমার কলকাতায় আর থাকার মতো জায়গা নেই। শুধু সেইজনেই—

জানি মণিদীপা।

আপনি জানেন বলেই বোধ হয় ডিভোর্সটা আটকেছেন। কিন্তু ও ডিভোর্স না করলেও আমি মামলা আনব। তখন ঠেকাতে পারবেন না।

তারপর কি হবে মণিদীপা ?

কিন্তু তার আগে বলুন, আপনি তিন মিনিটের টাইম লিমিট কতক্ষণ আগে পার হয়েছেন ?

অনেকক্ষণ। কিন্তু আমি এক্সচেঞ্জ থেকে কথা বলছি। এ জায়গা আমার চেনা। এমন কি পয়সাও লাগে না।

ও। হ্যাঁ, তারপর কি হবে জিজ্ঞেস করছিলেন। জেনে কি হবে ? আমি ডিভোর্স করলেও তো কেউ মালা হাতে বসে থাকবে না। এদেশের কাওয়ার্ড পুরুষরা ডিভোর্স

মেয়েদের ভয় পায়।

ঠিক তাই মণিদীপা।

কিন্তু আমি তো আর বিয়ে করতে যাচ্ছি না। কাজেই ও প্রশ্ন ওঠে না। আমি চাই কাজ। অনেক, হাজার কাজে ডুবে থাকব।

কাজ চাই? সেজন্য দোকান কেন? আপনার বিপ্লব কি শেষ হয়ে গেছে মণিদীপা?

মণিদীপা হুঁ কৌচকায়, কেন শেষ হবে? যে লোকটা বিপ্লবীর জুতোয় পেরেক ঠুকে দেয় সেও বিপ্লবী। আপনি রিভোলিউশন অফ দি প্রোলেতারিয়েত কাকে বলে তাই জানেন না।

আপনি বোধহয় বিপ্লবীদের জন্যই গুণ্ডি দিয়ে পান সাজবেন, আর আমি বিপ্লবী ব্যাণ্ডের বিড়ি লাল সুতোয় বেঁধে দেবো?

কেন যে আপনি এত অশিক্ষিত?

দীপনাথ গা-জ্বালানো হাসি হাসছিল। দীপনাথের ওপর সে কখনো সত্যিকারের রাগ করেনি। আজ করল। হাসির মাঝখানে রেখে দিল ফোনটা।

বোস সাহেব ফিরল নটা নাগাদ। আজকাল সব সময়েই বাসায় ঢোকে গম্ভীর মুখে, হুঁ কৌচকানো। মণিদীপা তাতে ভয় পায় না বা গুরুত্ব দেয় না। লোকটাকে তার বোঝা হয়ে গেছে। এও জানে তারা দুজনে কেউ নিজেকে বদলাবে না। যদি না বদলায় তবে মিলও হবে না কোনোদিন।

তবে আজ মণিদীপা আধঘণ্টা বাদে হানা দিল বোসের ঘরে। ততক্ষণে বোস গরম কাপড়ের ড্রেসিং গাউন পরে এক কাপ কালো কফি শেষ করেছে। বাইফোনাল চশমা চোখে কিছু কাগজপত্র দেখছিল লেখাপড়ার টেবিলের কাছে বসে।

মণিদীপা সাজিয়ে গুছিয়ে কথা বলার পাত্রী নয়। ঘরে ঢুকেই বলল, বুনু, তোমার সঙ্গে আমার জরুরী কথা আছে।

বোস কাগজ সরিয়ে একটু অবাক চোখে মণিদীপাকে দেখে নিয়ে বিরক্ত গলায় বলে, আই নো। তোমার কথা 'মানেই' টাকা। আমার পক্ষে কিছু করা সম্ভব নয়।

অপমানটা খুব ঝাঁঝালো হয়ে মণিদীপার সর্বাস্ত্রে ঝাঁপিয়ে পড়ল বটে, কিন্তু তবু সে আজ মাথা ঠাণ্ডা রাখতে পারল। আর একটা চান্স ওকে দেবে সে।

মণিদীপা মাথা নেড়ে বলে, টাকার কথা তোলাটা নিশ্চয়ই দোষের নয়।

দোষের হত যদি যথেষ্ট টাকা তুমি না পেতে।

আমি যথেষ্ট পাই না। তার চেয়েও বড় কথা, টাকার ব্যাপারে আমার কোনো স্বাধীনতা নেই।

স্বাধীনতা দেবো এমন শর্ত ছিল না।

তা হলে আমাকে বউ সাজিয়ে রেখেছো কেন?

চলে যাও। দরজা সবসময়েই খোলা।

আমি যেতেই চাই। কিন্তু যাওয়ার জন্যও আমার কিছু থোক টাকার দরকার। আমাকেও বাঁচতে হবে তো।

সেটা কোর্টে ঠিক হবে।

তুমি কি ডিভোর্স স্যুট আনছ?

না। পাবলিসিটি আমি অপছন্দ করি। তবে তুমি মামলা করতে পারো। আমি লড়ব না।

আমি কেন মামলা করতে যাবো? তোমার আমার মিল নেই, ছাড়াছাড়ি দরকার, সেটা

কি কাছারির মুখ দিয়ে বলাতে হবে ? কাছারিতে গিয়ে তো আমরা বিয়ে করিনি ।
তা হলে আপসে সেপারেশন চাও ?

চাই ।

আর সেজন্যই টাকাটা তোমাকে দিতে হবে !

তাও নয় । তুমি মীন বলে অন্য রকম অর্থ করছ । চলে যাওয়ার প্রি-কন্ডিশন হিসাবে আমি টাকাটা চাইনি । আই ওয়াস্ট টু স্টার্ট সামথিং ইমিডিয়েটলি । পরে আমি ব্যাংকের লোন পেয়ে যাবো । তোমার টাকা তখন শোধ করে দেবো ।

তুমি কী স্টার্ট করতে যাচ্ছে আগে সেটা আমার জ্ঞানা দরকার ।

এখনো ঠিক করতে পারিনি । আই ওয়াস্ট টু ওপেন এ শপ ।

শপ ? মুদিখানা নাকি ?

তোমার কালচার বেশী দূর ওঠে নী, তাই যা খুশি ভাবতে পারো ।

ভদ্রঘরের মেয়েরা কি দোকানদারী করে ? কখনো শুনিনি ।

করে এবং খুব ভাল ঘরের মেয়ে-বউও করে । আমার বন্ধু অঞ্জু কত বড় টেলারিং করেছে ! ওব বর তোমার চেয়ে অনেক উঁচু পোস্টে কাজ করে ।

অঞ্জু ? সেটা কে ?

ইউ নো হার ওয়েল । ন্যাকামি কোর্সো না ।

বোস নিজেই নাকটাকে দু আঙ্গুলে চেপে ধরে একটু ভাবল । তারপর মাথা নেড়ে বলল, আই নো । বোধহয় বালিগঞ্জে ওর একটা ফ্যাশনের দোকান আছে, অ্যান্ড শী ইজ এ কাটিথ্রেট ।

তোমার অ্যাসেসমেন্ট তোমার নিজস্ব । তবে আমিও ওরকম কিছু করতে চাই ।

আমি তোমাকে টাকা দিয়ে বিশ্বাস করতে পারি না । অঞ্জু যা পেরেছে তুমি তা না পারতেও পারো ।

তবু তুমি তোমার টাকা ফেরত পাবে । আমি ধার হিসেবে কাগজপত্রে সই করে টাকা নেবো । ইভন আই অ্যাম রেডি টু পে ইন্টারেস্ট ।

বোস হাসল, খুবই শেয়ালমুখে হাসি, যা আসলে হাসি নয় । বলল, তুমি চলে গেলেও তো আমার লাভ হবে না । আইনত আমি বিবাহিতই থেকে যাচ্ছি ।

তুমি কি আবার বিয়ে কবতে চাও বুনু ?

চাইলে দোষ কি ?

আর একটা মেয়ের সর্বনাশ হবে । ঠিক আছে আমি মিউচুয়াল করে নিতে বাজি । কেস তো ইন ক্যামেরাও করা যায় ।

যায় । তবু আমার ইচ্ছে কেসটা তুমি ফাইল করো ।

তবে টাকা দেবে ?

ভেবে দেখব ।

মণিদীপা অত্যন্ত গভীর বুক-খালি-করা দীর্ঘশ্বাস ছেড়ে বলে, চ্যাটার্জি শিলিগুড়ি থেকে ফোন করেছিল ।

কবে আসছে !

কাল । তবে কাল তোমার সঙ্গে দেখা হবে না ।

জানি । তুমি যাও ।

আর একটা কথা বুনু, চ্যাটার্জি আমার টাকার অসুবিধের কথা সবই জানে । তুমি যে

আমাকে রেশনে রেখেছো তা ও জানল কি করে ? তুমি বলেছো ?

আমি ! বলে যেন একটু অবাক হয় বোস । তারপর সত্যিকারের একটু হাসে, ইন ফ্যাক্ট তোমাকে টাকার ব্যাপারে কনট্রোল করার কথা ওই আমাকে প্রথম বলে । হি ইজ এ রিয়্যাল ফ্রেন্ড । ব্যাংকরাপট্‌সি থেকে বাঁচিয়ে দিয়েছে ।

দীপবাবু ?

অবাক হওয়ার কিছু নেই । তুমি যখন আমাকে ফকির বানানোর মহান ব্রত নিয়েছিলে তখন আমার অবস্থা পাগলের মতো । অত টাকা আয় করেও কিছুই থাকে না । দীননাথ ঠিক সেই সময়ে ইনটারফেয়ার করে । আই অ্যাম গ্রেটফুল টু হিম ।

মণিদীপা হাত মুঠো করে রাগে কাঁপতে কাঁপতে অন্ধের মতো, আচ্ছন্ন মাথায় নিজের ঘরে ফিরে এল ।

তার কান্না আসে না সহজে । আজ এল । আসলে কান্না নয় । অসহায় দুর্দম রাগ তার ভিতরটাকে বিদীর্ণ করে দিল বুঝি । বালিশে মুখ চেপে ধরে নিজের শ্বাসরোধ করতে করতে হাত পা ছুঁড়ে কাঁদতে লাগল মণিদীপা ।

॥ ছাপ্তান ॥

তৃষা তার ঘরের উত্তরের জানালা দিয়ে দেখছিল । একটা কাঁপানো ফুলগাছের ইকড়িমিকড়ি চিকের মতো আড়াল করেছে জানালাটাকে । আর এবারকার হাড় কাঁপানো শীতের উত্তরে হাওয়া এসে ডালপালায় হি-হি কাঁপুনি তুলছে মাঝে মাঝে । জানালাটা বন্ধ করতেই এসেছে তৃষা । বাইরে পান্নার দিকে হাত বাড়িয়ে থেমে গেছে । দেখছে ।

দেখছে একটা ভাঙচোরা বুড়িয়ে যাওয়া মানুষের কাঠামো ভাবন-ঘরের বারান্দায় বসে আছে কাঠের চেয়ারে । সকালের অটেল রোদ আর অব্যবহৃত শীত হাওয়ায় রোগা মূর্তিটা নড়ছে কি ? পড়ে যাবে না তো ! লোকটা ঠিক বসেও নেই । যেন কেউ বসিয়ে রেখে গেছে । গলা পর্যন্ত একটা কুটকুটে মোটা লোহি আলোয়ান । মাথা ঢাকা মাফলারে । ভাঙচুরগুলো বুঝতে তবু কষ্ট হয় না । এতদূর থেকে শুধু অল্প খোলা মুখটুকুর দিকে চাইলেই বোঝা যায় । তৃষাকে তো ভাল করে দেখতে হচ্ছে না এখন । তার তো সবটুকুই দেখা । পা তুলে কাঠের চেয়ারে বসে চেয়ে আছে অনড়, অটল । কাঠের চেয়ার ! তৃষা একটু হু কোঁচকায় । কাউকে বললেই তো ইজিচেয়ারটা টেনে বের করে দিত বারান্দায় ।

বউমা ! বউমা ! উঠোন থেকে দীননাথ ডাকছেন ।

তৃষা জানালাটা বন্ধ করে উঠোনের দরজা দিয়ে বেরিয়ে এল ।

দীননাথ রোদে দেওয়া একরাশ লেপ-তোশকের পাশে লাঠি হাতে উবু হয়ে বসে আছেন । তৃষাকে দেখে বললেন, কাউকে পাহারায় রাখোনি, বজ্জাত কাক চড়ুই সব নোংরা করে দেবে যে লেপ-তোশক ।

করবে না । উঠোন দিয়ে তো আমরা অনবরত যাতায়াত করছি ।

তবু সাবধান হওয়া ভাল । সকালবেলাটায় খবরের কাগজটা কোথায় যায় বলো তো ! এই সময়টুকুতেই আমি যা একটু চোখে দেখতে পাই । ওরা সেই বেলা গড়িয়ে গেলে চাইতে চাইতে তবে দেয় । তখন বড় অন্ধর ছাড়া কিছু পড়তে পারি না ।

খবরের কাগজ তো কেউ তেমন পড়ে না বাবা । দেখছি কোথায় আছে । বোধহয় আমার ঘরেই ।

দেখ তো । পেলে পাঠিয়ে দাও । রোদে বসে বসে পড়ি আর তোমার বিছানা পাহারা দিই ।

নিজের ঘরে তৃষা স্টোভে চা বসিয়েছিল । সারাদিনে কয়েকবার সে নিজের হাতে তৈরী চা খায় । রান্নার ঠাকুর হুকুমমতো করে দেয় বটে, কিন্তু তৃষার রুচিমতো হয় না । ঘরে এসে তৃষা জল নামাল । অত্যন্ত দামী সুগন্ধী চা-পাতা ভিজিয়ে চা ছাঁকল । খেল । কিন্তু সারাক্ষণ ভূজোড়া কৌচকানো রইল তার । চায়ের তেমন স্বাদ পেল না ।

খবরের কাগজটা মেঝেয় পড়েছিল । বারন্দার জানালার ধারে । সে নিজে কদাচিৎ খবরের কাগজ পড়ে । চা শেষ করে খবরের কাগজটা শ্বশুরকে পৌঁছে দিয়ে সে উঠোনের বেড়ার আগল ঠেলে বেরিয়ে এল ।

ঝাঁটপাট দেওয়া পরিষ্কার রাস্তার ওপর আবার দুটো একটা করে পাতা খসে পড়ছে । কিছু পোড়া পাতা আর ছাই উড়ে এসেছে • নিতাইয়ের ঝোপড়ার দিক থেকে । রোজ সন্কেবেলা সে আশুন পোহায় ।

বাগানের দিকে মুখ করে বসে আছে শ্রীনাথ । চোখ ডুবে আছে বাগানে । এবার মেদিনীপুরের একটা লোক বাগান করছে । কাজ জানে । সারা বাগান জুড়ে রঙের বান ডাকিয়ে দিয়েছে । এই একটা জিনিস শ্রীনাথ বোঝে । গাছপালা । যে লোকটা বাগান করেছে সে যে গুলী তাতে সন্দেহ নেই । আজকাল শুধু এই লোকটার সঙ্গে শ্রীনাথ যা একটু কথাবার্তা বলে । কথা বলে ভারী আরাম পায় ।

লোকটা পপি ফুলের বেড উসকে দিচ্ছে এখন । জল দিয়ে আসবে । সিঁড়িতে বসে দুদণ্ড জিরোবে । কথা হবে । শ্রীনাথ কাঙালের মতো চেয়ে আছে ।

ভাওয়ালের কবি গোবিন্দ দাস লিখেছিলেন, ও ভাই বঙ্গবাসী, আমি মরলে তোমরা আমার চিতায় দিবে মঠ... । শ্রীনাথ মরলে বঙ্গবাসী অবশ্য মঠ দেবে না । তবু শ্রীনাথের বড় ইচ্ছে, তাকে যেখানে পোড়ানো হবে সেখানে যেন ছোট্ট করে ঘিরে নিয়ে কয়েকটা গাছ লাগানো হয় । মৃত্যুর পর তার মতো পাপী লোকের আত্মার তো গতি হবে না । তার আত্মা থাকবে মাটির খুব কাছাকাছি নিম্নস্তরে । তখন ঐ নিজের ভস্মীভূত দেহের রেণুমাখা গাছপালার মধ্যে সে ঘুরে ঘুরে বেড়াবে । কাউকে ভয় দেখাবে না, কিছু চাইবে না সে ।

ইজিচেয়ারটা কাউকে বের করে দিতে বলোনি কেন ?

কথাটা খুব ভাল শুনতে পেল না শ্রীনাথ । বাগানের মধ্যে ডুবে ছিল । শুধু আঙুলে মুখটা ঘুরিয়ে বলল, উঃ !

কাঠের চেয়ারে এভাবে কতক্ষণ বসে থাকতে পারে রোগা মানুষ ?

এবার চমকাল শ্রীনাথ । তৃষা । তার সর্বাস্তে একটা অস্পষ্ট ভয়ের কাঁপুনি বয়ে যেতে থাকে । খুব অল্প অল্প করে বিষ ছড়িয়ে গেছে তার শরীরে । বিলম্বিত বিষ, কিন্তু অমোঘ । তার খাবারে, তার জলে, দুধে, তার ওষুধে পর্যন্ত । প্রতিবার ভাতের গ্রাস মুখে তুলতে গিয়ে থেমে যায় সে । নিজেকে জিজ্ঞেস করে, খাবো ? এই বিষ ! তার ভিতরে হতাশায় ভেঙে-পড়া মানুষ প্রতিবার জবাব দিয়েছে, খাও, খাও, অনেক ভোগ করেছে জীবনে । মরতে তো হবেই । তাই খেয়েছে শ্রীনাথ । শুধু আয়ু নয়, বিষে আক্রান্ত তার আত্মবিশ্বাস, তার যৌনবোধ, তার মস্তিষ্ক, অনুভূতি । তৃষা বিষ চেনে । প্রয়োগের বিধিও জানে চমৎকার । বিশ্বের প্রভাবেই বৃষ্টি আজকাল তৃষা সকালে এলে সাপুড়ের মস্তের মতো কাজ হয়, ফণা নেমে যায় শ্রীনাথের । ফণা নেমে যায় ? না কথাটা ঠিক হল না । আজকাল সে আর ফণা

তোলে কই ?

শ্রীনাথের চাউনিটা খুব ভাল লাগল না তুষার। চমকানোটোও লক্ষ করল। শ্রীনাথ কোনো দুর্জ্জ্বেয় কারণে তাকে ভয় পায় তুষা জানে। তাই সে আজকাল শ্রীনাথের সামনে আসে না। ভাবে, বোমার সেই শক ওকে খানিকটা অস্বাভাবিক করে ফেলেছে। আপনা থেকেই সেরে যাবে। যায়নি যদিও।

দাঁড়াও, মালীটাকে বলি ইজিচেয়ারটা বারান্দায় দিয়ে যাক। বারান্দার ধারে গিয়ে তুষা ডাকে, শ্রীপতি ! এই শ্রীপতি !

খুব সংকোচের সঙ্গে শ্রীনাথ বলে, কিছু কষ্ট হচ্ছে না। বেশ আছি।

তুষা গভীর মুখটা ফিরিয়ে শ্রীনাথের দিকে চেয়ে বলে, না, ঠিক নেই।

শ্রীনাথ আর কিছু বলল না। শ্রীপতি দৌড়ে এসে ইজিচেয়ার বের করে রোদে পেতে দিল। শ্রীনাথ অস্বস্তির সঙ্গে সেটার ওপর আধশোয়া হল। চিত হয়ে ওপর পানে তাকিয়ে দেখল, তুষাকে কত বিশাল বড় আর শক্তিময়ী দেখাচ্ছে। মাথাটা বারান্দার প্রায় ছাদে গিয়ে ঠেকেছে। দুই চোখে বুদ্ধির ধার আর জ্বরতা ঝলমল করছে সকালের রোদে। গায়ের পশমী চাদরটার রঙ শুকিয়ে যাওয়া রক্তের মতো কালচে লাল, তাতে সবুজ আব হলুদ ফুলের এমব্রয়ডারি। কিন্তু এতেই প্রায় রাজেন্দ্রাণীর মতো দেখাচ্ছে। মনে হচ্ছে ওর পিছনেই রয়েছে শিকলে বাঁধা পোষা সিংহটা।

আজ বদ্রী তোমার সঙ্গে দেখা করতে আসবে।

বদ্রী ! শ্রীনাথ অবাক হয়ে বলে, কেন ?

ও একটা ভাল জমির খোঁজ পেয়েছে। এক লপ্টে পাঁচ বিঘা।

জমির খোঁজ পেয়েছে ? কিন্তু শ্রীনাথ বুঝতে পারে না তাতে তার কি।

তুষা কোমল গলায় বলে, তুমিই তো ওকে জমির কথা বলেছিলে। বলোনি ?

শ্রীনাথের মনে পড়ল। মাথা নাড়ল, হ্যাঁ। বলেছিলাম। সে কতকাল আগে।

কতকাল আবার 'কি'। বছরখানেক হবে।

তবু অনেক দিন। এখন জমি দিয়ে আমি কি করব ?

তোমাকে কিছু করতে হবে না। লোক রেখে চাষ করাতে চাইলে করাবে।

বিষণ্ণ শ্রীনাথ মাথা নেড়ে বলে, তা তো আমি চাইনি। আমি ভেবেছিলাম নিজে চাষ করব, সঙ্গে লোকও খাটাবো। ভেষজের চাষ তো সোজা নয়। ইচ্ছে ছিল জমির পাশে একটা কাঁচা ঘর তুলে থাকব।

তুষা মৃদুস্বরে বলে, যদি তাই চাও তবে এখনো তো হতে পারে।

শ্রীনাথ মাথা নেড়েই যাচ্ছিল। বলল, আর কিছু করার নেই। আমার শরীর বিষে ভরে গেছে। আর বেশী দিন—

তুষা রাগল না। হতাশার একটা শ্বাস ফেলে বলল, আমি শুনেছি, তোমাকে স্নো পয়জন করা হচ্ছে বলে তুমি সন্দেহ কর।

আতঙ্কে প্রায় সাদা হয়ে শ্রীনাথ তুষার দিকে তাকায়। কিন্তু চোখে চোখ রাখতে পারে না বেশীক্ষণ। আবার মাথা নেড়ে বলে, ঠিক তা নয়। সন্দেহ করার কিছু নেই। তবে কোনো কারণে আমার মধ্যে বিষ ঢুকেছে।

কে তোমাকে বিষ দিতে পারে বলো তো ! আমি ?

শ্রীনাথ মনের দিক থেকে এতটাই দুর্বল যে এত স্পষ্ট কথা সহ্য করতে পারল না। বলল, ঐ যে দেশী মদ খেতাম, হয়তো তাই থেকেই...বলে তাকিয়ে বুঝবার চেষ্টা করল।

তুষা কথাটা বিশ্বাস করেছে কিনা।

তুষা মৃদু স্বরেই বলল, তোমার মনের কথা তো জানি না। তবে যদি সন্দেহই থেকে থাকে তবে সেই সন্দেহ নিয়ে তোমাকে এখানে থাকতেও বলি না। বন্দী যে জমিটার খোঁজ আনবে সেটা কেনো। একটা ছোটো বাড়ি তৈরি করে থাকো সেখানেই। কেউ বাধা দেবে না।

এ কথাটাও ভয়ংকর। একবছর আগে এই প্রস্তাব মাথায় তুলে নিত সে। তুষার বন্দিও থেকে মুক্তি—সে এক অদ্ভুত সুখচিন্তা ছিল তখন। আজ সে কথা ভাবতেও ভয় করে। একা পাঁচ বিঘা জমি কোলে করে বসে থাকা। সে যাও বা দুদিন বাঁচত তাও বাঁচবে না তা হলে। এরা বিষ দেয় বটে কিন্তু তবু ঘিরেও থাকে তাকে। একা থাকার কথা সে এখন ভাবতেও পারে না। একা হলেই সমস্ত পৃথিবীর ভার বুকে চেপে বসবে।

শ্রীনাথ মাথা নেড়ে বলে, না না। থাকগে। এখন ওসব ভাবতে পারছি না। বন্দীকে বারণ করে দিও।

শ্রীনাথের শ্রীহীন বসে-যাওয়া শরীরের দিকে চেয়ে সামলে গেল তুষা, না হলে তার বলতে ইচ্ছে হয়েছিল, বিষ তোমাকে কেউ দিচ্ছে না, বিষ তোমার মনের মধ্যে তৈরী হচ্ছে।

মুখে তুষা বলল, যা ভাল বুঝবে করবে। আমি তোমার যাতে ভাল হয় তাই চাই।

তুষার চাদরটায় রোদ পড়েছে। ভয়ংকর সেই শুকনো রক্তের রংটা চোখে বড় লাগে শ্রীনাথের। ভিতরটা চমকে ওঠে বার বার। সে প্রায় অশ্রুট গলায় হঠাৎ জিজ্ঞেস করে, সেই তারা ধরা পড়েছে?

কারা?

ঐ যারা তোমাকে বোমা মেরেছিল!

এ কথায় তুষার চোখ দুটো বলসে ওঠে হঠাৎ। কিন্তু মুখে অন্য কোনো ভাবান্তর দেখা গেল না। স্বাভাবিক গলায় বলল, এখনো ধরা পড়েনি। তারা ফেরার।

কারা জানো?

জানি।

বড় দমে গেল শ্রীনাথ। ধরা পড়েনি অথচ তুষা তাদের জানে। এর একটাই পরিণতি দাঁড়াতে পারে। পুলিশ ধরার আগেই তুষার লোকেরা তাদের ধরবে। আবার চাদরের রংটার দিকে তাকায় শ্রীনাথ। যতদূর সম্ভব স্বাভাবিক অভিনয় করার চেষ্টা করতে করতে শ্রীনাথ যা বলতে চায় না তাই বলে গেল, ছি ছি কী কাণ্ড। বাড়িতে ঢুকে অবলা মেয়েমানুষকে বোমা মারা! বেত মারা উচিত। ধরে চাবকানো দরকার।

বলতে বলতে চোখ বুজে থাকে শ্রীনাথ।

তুষা বলে, ও নিয়ে তোমাকে ভাবতে হবে না। পুলিশ আছে, আইন আছে।

মাথা নেড়ে শ্রীনাথ মনে মনে বলে, তুমিও আছে।

তুষা নিজের কথার খেঁই ধরে রেখে বলে, এখন বরং অন্য একটা জরুরী কথা বলে নিই। চিত্রার জন্য একটি ভাল পাত্র পাওয়া গেছে। এলাহাবাদেরই ছেলে। দিদি আমাদের মত চেয়ে চিঠি দিয়েছে।

কার পাত্র?

চিত্রার—আবার কার?

চিত্রার বিয়ে! চিত্রা! তার বিয়ে দেবে এখনই? বলো কি?

চিত্রার বয়স কত হল খেয়াল আছে?

শ্রীনাথ বেকুবের মতো বলে, কত হবে ? তেরো ! চৌদ্দ ।

তোমার মাথা । আঠারো চলছে ।

শ্রীনাথ তবু ব্যাপারটা বুঝতে পারে না, তাহলেও বিয়ের বয়স নয় ।

আমার বিয়ে হয়েছিল আরো কম বয়সে । ঝোলো ভাল করে পেরোয়নি তখনো । মনে আছে ?

শ্রীনাথ একটা দীর্ঘশ্বাস ছেড়ে আবার চোখ বোজে ।

তৃষা বলে, তবু মানি বিয়ে আরো ক'দিন পরে দেওয়া যায় । কিন্তু মেয়ের বড বাড়ন্ত গড়ন । পাত্রটিও ভীষণ ভাল । সুযোগটা ছাড়া উচিত হবে না ।

তা বটে ।

তোমার মত কি ?

আমার মত ! শ্রীনাথ অবাক হয়ে বলে, আমার মত কি আবার ! চিত্রাকে তো মনেই পড়ে না, সে যে আমার মেয়ে তাই তো ভুলে গেছি ।

তবু তো মেয়ে ।

তা ঠিক । শ্রীনাথ চুপ করে থাকে কিছুক্ষণ । তারপর হঠাৎ বলে, বিয়ের আগে ওকে একবার আনাবে ? দেখব ! ওকে খুব দেখতে ইচ্ছে কবছে ।

তৃষা একটু অবাক হল । কিন্তু সহৃদয় গলায় বলল, দেখবে ? তাহলে যাও না, এলাহাবাদ থেকে কদিন ঘুরে এসো । ওরা খুশি হবে ।

এ কথায় দপ করে নিভে গেল শ্রীনাথ । ক্ষীণ কণ্ঠে বলল, না না । আমি কোথায় যাবো ? আমি পারব না অত দূরে যেতে ।

কেন ?

আমার ইচ্ছে করে না । ভয় করে । অনেক দূর ।

তৃষা দাঁতে ঠোঁট চাপল । শ্রীনাথের ভাঙচুব দূর থেকে সে ভাল করে বোঝেনি । এখন যা দেখল, তা ভয়ংকর । এতটা সে কখনো ভাবেনি ।

শ্রীনাথ চোখ বুজে আপন মনে নিঃশব্দে ডাইনে বাঁয়ে মাথা নাড়ছিল ।

তৃষা সিঁড়ি দিয়ে বারান্দা থেকে নেমে গেল । চলে যেতে যেতে একবার মুখ ফিরিয়ে আস্তে করে বলল, আসছি ।

শ্রীনাথ সেকথা শুনতে পেল না, জবাবও দিল না ।

তুমি কেন জোরে হাঁটছো না ?

আমি অত জোরে পারি না ।

পারো । নিশ্চয়ই পারো । ইচ্ছে করে হাঁটছো না ।

না । মাথা নাড়ে শ্রীনাথ, পারি না । আমার হাঁফ ধরে যায় ।

তুমি কিন্তু বুড়ো হওনি । তোমার অসুখও সেরে গেছে ।

একটা দীর্ঘশ্বাস আপনা থেকেই ঝরে গেল শ্রীনাথের ।

সজল বাবাব মুখের দিকে তাকাল । আজকাল বাবাব মুখের দিকে তাকাতে তাকে বেশী মাথা উঁচু করতে হয় না । তার মাথা শ্রীনাথের কান ছুঁয়েছে । কদিনের মধ্যেই মাথায় মাথায় সমান হয়ে যাবে । তারপর শ্রীনাথকে ছাড়িয়ে উঠবে সে ।

সজল বলল, রোজ যদি আসন করো তবে সব সেরে যাবে ।

যোগাসন ?

যোগাসন । বড়কাকা অনেক আসন জানে ।

তুইও কি আসন করিস ?

করি । আরো কত কি করি । ফ্রি হ্যান্ড, বক্সিং, কুংফু... ।

গুণ্ডা হবি নাকি ?

না, গুণ্ডাদের ধরে ধরে ঠ্যাঙাবো ।

আজকাল গুণ্ডাদেরই সম্মান । সবাই তাদের খাতির করে ।

সজল এ কথায় হাসল ।

মাঠের ধারে রোজ্জই এক গাছতলায় শ্রীনাথকে বসিয়ে রেখে সজল ক্রিকেট খেলে ।
শ্রীনাথ নড়ে না চড়ে না । চুপটি করে বসে আকাশপাতাল ভাবে । খেলা শেষ হলে সজল
বাবাকে নিয়ে বাড়ি ফেরে ।

তুমি আবার কবে থেকে অফিসে যাবে, বাবা ?

রোজ্জই ভাবি, কাল যাবো । আর যাওয়া হয় না । শরীরটা ভাল নেই ।

তোমার চাকরি যদি নট হয়ে যায় ?

তা যাবে না । ওরা আমাকে খুব ভালবাসে ।

প্রকাশু মাঠের মধ্যে নেমে গেল সজল । একটা অস্থখ গাছের তলায় ঘাসের ওপর বসে
থাকল শ্রীনাথ । দুর্বল, নিজীব । তার ব্লাড সুগার ধরা পড়েছে । কিডনি ভাল না । লিভার
ভাল না । কিন্তু সেসব তার এই নিজীবতার কারণ নয়, শ্রীনাথ জানে । তাকে শেষ করে
দিচ্ছে বিষ । আস্তে আস্তে শরীর ভরে যাচ্ছে বিষে । রেহাই নেই, পরিত্রাণ নেই ।

ফেরার পথে সে বলল, শোন, আজকাল আমাকে কেউ কোনো খবর দেয় না । তুই
একটা খবর কিন্তু আমাকে দিস ।

কি খবর বাবা ?

সেই যারা তোর মাকে বোমা মেরেছিল তারা যদি ধরা পড়ে তা হলে আমাকে জানাস ।

সজল অবাক হয়ে বলল, তাদের তো ফাঁসি হয়ে গেছে ।

যাঃ । বলে ধমক দেয় শ্রীনাথ ।

সজল হাসে, ধরা পড়লেই ফাঁসি হবে । আর ধরা তো পড়বেই ।

সবাই কি ধরা পড়ে ?

একজনকে কালিন্দীপুরে দেখেছে সখারামদা ।

তারপর ?

তাকে ফলো করা হচ্ছে কাল থেকে । আজকালের মধ্যেই অ্যারেস্ট হয়ে যাবে ।

তুই জানলি কি করে ?

মায়ের কাছে সব খবর আসে । তুমি মারদাঙ্গাকে ভয় পাও, বাবা ?

শ্রীনাথ মাথা নেড়ে বলে, মারপিটকে ঠিক ভয় পাই না । ভয় পাই তাদের । পৃথিবীতে
আমার কোনো আপনজন নেই, একথা ভেবে মরতে বড় কষ্ট হবে ।

আমরা আপন নই তোমার ?

তাদের সঙ্গে যে আমার মেলে না । আমি খারাপ, তোরাও খারাপ । দু'পক্ষ দু'রকমের
খারাপ । মেলে না যে ! কী করে আপন হবি ?

বাবা, একটা কথা বলবে ?

কি বল তো !

তুমি আমার বাবা নও ?

একদিন বিকেলে দুই বুড়োর দেখা হল গাছতলায়। মহানিমের বড় গাছ। বাগানের দক্ষিণ দিকে একটা পরিষ্কার জায়গায় গাছটা গুঁতেছিল মল্লিনাথ। তখন বন মহোৎসবের খুব ধুম। এখন সেই গাছের তলাটা বাঁধিয়ে দিয়েছে তৃষা। বিকেলের দিকে চমৎকার বসার জায়গা। দক্ষিণ দিকটা ফাঁকা রাখার জন্য ওপাশে অনেকটা জমি কিনে নিয়েছিল মল্লিনাথ। সে জমি তৃষার আমলে আরো বেড়েছে। শীতের সবজির চাষ হয়। এমনিতে উঁই কুমড়ো, না হয় চিচিঙ্গে এমনি কিছু না কিছু সর্বদাই ফলছে। তবে তাতে দৃষ্টির ব্যাঘাত হয় না। গাছতলায় বসলে অনেক দূর পর্যন্ত দেখা যায়। উদাস হয়ে বসে থাকায় অনেকক্ষণ।

শ্রীনাথ বসতে এসে দেখল জায়গাটায় আর একজন বসে। তার বাবা দীননাথ। দীননাথের সঙ্গে শ্রীনাথের বহুকাল দেখা নেই। তাই দীননাথ হাঁ করে ছেলেকে দেখলেন অনেকক্ষণ। এই কি তার মেজো ছেলে শ্রীনাথ? হরি হে! গাল তোবড়ানো, মাথার শেষ ক'গাছি চুল শনের নুড়ি, চোখ ঘোলাটে। এটা কি শ্রীনাথ, সত্যি?

বাবা! ভাল আছেন তো?

ভালই। কিন্তু তোমাকে তো ভাল দেখছি না। কী হয়েছে? সবাই বলে বটে তোমার অসুখ করেছে। কিন্তু কী অসুখ বলে না।

স্ট্রোক মতো হয়েছিল একটু। সেরে গেছে।

সাবধানে থেকো। তোমার স্ট্রোক হওয়ার বয়স তো নয়!

ঠিক স্ট্রোক নয়। জানি না। ডাক্তাররা কিছু স্পষ্ট করে বলে না।

বলবে কি! জানেই না। আজকালকাব ডাক্তাররা সব পেনিসিলিন চিনেছে। যাই হোক দেয় ঠেকে। মরলে মরল, বাঁচলে বাঁচল। দু মাসের বাচ্চা থেকে আশির বুড়ো অবধি সবাইকে এক ওষুধ। ব্রোসো, ভাল করে পা তুলে বোসো। চাদরে হাঁটু ঢেকে নাও, যা মশা এদিকটায়!

শীতকালে একটু মশা হয়।

বুলুর বাড়িতে মশা ছিল না। শীতটা কলকাতায় এত চেপে পড়েও না। এই দুটো মাস ওর কাছে থেকে আসতে পারলে ভাল হত। কতকাল আসে না ছেলেটা।

শ্রীনাথ একটা দীর্ঘশ্বাস ছেড়ে বলে, বাবা, আমাকে একটু শাসন করবেন তো মাঝে মাঝে।

শাসন! বলে দীননাথ হাঁ করে শ্রীনাথের দিকে চেয়ে থাকেন, শাসন করব! বলো কি! কেন, সেই যে ছেলেবেলায় যেমন করতেন!

সে তখন ছোটো ছিলে, করেছি। এখন আবার শাসনের কথা ওঠে কিসে?

শ্রীনাথ মাথা নেড়ে বলে, ঠিক শাসন নয় বটে। মানে কোনটা ন্যায়, কোনটা অন্যায় তা তো বুঝতাম না তখন। আপনি বা মা বলে দিতেন। আমার এখন আবার তেমনই হচ্ছে করে। কোনটা ধর্ম কোনটা অধর্ম সব একজন কেউ এসে চিনিয়ে দিক।

তোমার কথাবার্তা ভারী উটোপাটো লাগছে। এসব তো এখন তুমি নিজেই বুঝে নেবে।

বুঝতে পারছি না বলেই বলছি। আমাকে সৎ পরামর্শ দেওয়ার কেউ নেই। অথচ আয়ুও তো ফুরিয়ে এল।

বলো কি? এর মধ্যে আয়ু ফুরোনোর কি হল?

বাঃ ! আমাকে স্নো পয়জন করা হচ্ছে না ?

পাগল হয়েছে ! বউমাকে ডেকে সব কথা খুলে বলো । উনি বুঝবেন । আমি এসব বুঝতে পারছি না ।

শুনুন ! সজল আমার ছেলে । ছেলে তো !

সজল তোমার ছেলে নয় তো কার ?

শ্রীনাথ ওপর নীচে জোরে জোরে মাথা নেড়ে বলে, আমারই । কিন্তু লোকে নানা কথা বলে মাথা ঘুলিয়ে দেয় ।

লোকে মাথা ঘুলিয়ে দেবে কেন ? কারা তারা ?

আছে চারদিকে । আপনি শুধু বলুন, সজল আমার ছেলে !

তোমার ছেলেই তো !

সজলকে আমিও সেই কথা বলেছি । রোজ বলি । তুই আমার ছেলে ।

ওসব কথা ভেবো না । মরার কথাও নয় । বুড়ো বয়সে আর একটা পুত্রশোক আমার সহ্য হবে না । তুমি আজকাল চাকরিতে যাচ্ছে না ?

আনমনে শ্রীনাথ কপিক্ষেতের ওপরে স্থির থম-থরা বাতাসে ধোঁয়ার একটা ভাসন্ত স্তবের দিকে চেয়ে ছিল । চোখ না ফিরিয়েই বলল, আপনার বউমা বলছে আমাকে দূরে এক জায়গায় পাঠাবে । সেখানে চাষবাস দেখব । একা থাকব ।

তুমিও তাই চাও নাকি ?

আগে চাইতাম । আজকাল দূরে যেতে ভয় করে ।

চাকরিটা ছেড়ে দিয়েছো ?

না । তবে ছাড়তে তো সময় লাগবে না ।

এ বাজারে চাকরি দুস্প্রাপ্য । ভেবেচিন্তে ছেড়ো ।

চাকরিটা কোনো প্রবলেম নয় ।

এবার দীননাথ দীর্ঘশ্বাস ছেড়ে বললেন, প্রবলেম যে কী তাই তো মাথায় ঢোকে না । আমাদের আমলে জীবন ছিল সরল । সব বোঝা যেত । তোমাদের আমলে যত প্যাঁচঘোঁচ ।

শ্রীনাথের চাদরে একটা কাক নোংরা ফেলেছে । সে ওপব দিকে চেয়ে বিশাল গাছটা দেখছিল । দাদা মল্লিনাথ এ গাছটা উপড়ে এনেছিল তায়েব নামে একটা লোকের উঠোন থেকে । তায়েব মল্লিনাথের মুগী চুরি করেছিল, তারই পাল্টি । মল্লিনাথও পাগল কম ছিল না । বারো চোদ্দজন জোয়ান ধরাধরি করে শেকড়ছেঁড়া গাছটা এনে গর্ত ঝুড়ে দাঁড় করিয়ে দিল এখানে । বাঁচার কথা ছিল না, কিন্তু বেঁচে গেছে । এই গাছটা দিয়েই সেবার মল্লিনাথের বন মহোৎসব শুরু । তারপর বিস্তার গাছগাছালি লাগিয়েছিল । কিন্তু এই গাছটাকেই তালবাসত সবচেয়ে বেশী । একটা মস্ত পাথর এনে ফেলেছিল তলায় । সেটার ওপর মাঝে মাঝে ঝুম হয়ে বসে থাকত এসে । বলত, এ হচ্ছে বিবেকানন্দ রক-এর মতো মল্লিনাথ রক । এখানে বসেই আমার একদিন রিয়লাইজেশন হবে ।

মহানিমের শুকনো পাতা একটি দু'টি খসে পড়ছে । ভারী সুন্দর তাদের পড়া । বাতাসে ঘুরপাক খায়, কখনো খাড়া হয়, কখনো আড় হয় । একটু ডাইনে বাঁয়ে হেলাদোলা করে । তারপর প্রজাপতির মতো অহংকার নিয়ে ঘাসের ওপর বা শানে বা শ্রীনাথের রূপারে আলগোছে বসে । বেশ লাগে দেখতে ।

দীননাথ বললেন, অফিসের সময় হল, উঠি ।

ই । বলে শ্রীনাথ ।

দীননাথ উঠলেন, উঠতে উঠতে বললেন, বুলু তোমার ছোটো ভাই। তার এত বড় মিসহ্যাপ হয়ে গেল, তোমরা কেউ গলে না!

মিসহ্যাপ? কিসের মিসহ্যাপ?

বউমার যে মরা বাচ্চা হল।

বৈছেছে। জ্যান্ত হলে কষ্ট পেত। বড় কষ্ট বৈছে থাকায়।

কী যে বলো সব, ঠিক নেই।

দীননাথ চলে যান।

চুপ করে বসে থাকে শ্রীনাথ। তার ডান দিকে বাড়ির ছাদের ওপর থেকে সূর্য পাটে বসে। ছায়া ঘনায়। শীত সাপের মতো শরীর বেয়ে উঠে আসে।

দূরে বেড়ার ওধারে একটা লোক দাঁড়িয়ে আছে অনেকক্ষণ। এবার গলা খাঁকারি দিল। শ্রীনাথ তাকাল না।

একটু বাদে চাপা জঙ্ক এল, শ্রীনাথবাবু! ও শ্রীনাথদা!

কে? ম্লান স্বরে শ্রীনাথ জিজ্ঞেস করে।

শুনুন না! এই বেড়ার ধারে আসুন একটু।

শ্রীনাথ চটিতে পা গলিয়ে ওঠে। ক্ষেতের জমি ডিঙিয়ে এগিয়ে যায়।

চিনতে পারছেন?

রঘু স্যাকরা না!

যাক বাবা বাঁচালেন। লোকে বলে শ্রীনাথ চাটুজ্জেকে ওষুধ করে মাথা বিগড়ে দেওয়া হয়েছে। তাই ভয়ে ভয়ে ছিলাম।

কথাটা কি?

কথা আবার কি? এভাবে ফুর্তিবাজ মানুষ বাঁচে কখনো? চেহারায় তো সাতবুড়োর ছাপ ফেলে দিয়েছেন।

শরীরটা ভাল নেই।

দিব্যি আছে। একটু চাঙ্গা হওয়া দরকার শুধু। দেখবেন তেড়েফুঁড়ে স্বাস্থ্য এসে যাবে। কোষ্ঠ পরিষ্কার হবে। চোখে জ্যোতি বাড়বে।

দূর!

আপনার মুখে দূর শুনলে বল মা তারা দাঁড়াই কোথা! চলুন না একটু চেখে আসবেন। ভাল না লাগলে মাথার দিব্যি দিয়েছে কে!

শ্রীনাথ রঘু স্যাকরার দিকে অর্থহীন চোখে চেয়ে থাকে কিছুক্ষণ। তার ভিতরে মদ খেয়ে ফুর্তি করার কোনো উৎসাহই নেই। তবু মনে হল, এই নেতিয়ে পড়ার হাত থেকে রেহাই মিলতেও পারে।

শ্রীনাথ ধুতির কৌঁচাটা ভাল করে এঁটে হাঁচোর-পাঁচোর করে বাঁশের বেড়াটা ডিঙিয়ে গেল।

ষষ্ঠীভলায় ম্যাচ খেলে এক দঙ্গল ছেলে চৌমাথা দিয়ে ফিরছে। হাতে হাতে ক্রিকেটের সরঞ্জাম। ছজনের হাতে ছটা স্টাম্প, দুজনের কাঁধে ব্যাট, একজন বলটা লুফছে। ছজনের হাতে ছটা প্যাড, তাই দিয়ে মাঝে মাঝে পেটাপেটি করছে নিজেদের মধ্যে আপসে। চৌচিয়ে চৌচিয়ে কথা বলছে সবাই। মাঝ বরাবর সকলের চেয়ে একমাথা উঁচু এবং দুগুণ স্বাস্থ্যবান সঙ্গল। চোখেমুখে আশ্বস্তায় এবং গাভীর। চাউনিতে কোনোরকম ভয়ের ছায়া নেই।

দঙ্গল থেকে তাকে চোখের পলকে আলাদা করে চেনা যায় ।

চৌমাথার বটতলায় গদাই নামে রোগা চেহারার একটা ছেলে বসে ছিল । দঙ্গলটাকে দেখেই সে দৌড়ে গেল ।

সজল ! সজল ! তোর বাবাকে একটু আগে রঘু স্যাকরা নিয়ে গেল ।

মুহূর্তে দঙ্গলটা ঘিরে ধরে গদাইকে, কোথায় নিয়ে গেল ? কেন নিয়ে গেল ?

গদাই উঁচু স্বরেই বলে, আমি ফলো করেছিলাম । স্টেশনের ওপাশে রামলাখনের বস্তিতে গিয়ে ঢুকল । রঘু স্যাকরা সজলের বাবার হাত ধরে টানতে টানতে নিয়ে গিয়ে ঢুকল ।

সজলের মুখে ভুকুটি । মুখ থমথম করছে । বাবার যে মাথাটার ঠিক নেই ইদানীং তা সে একটু-আধটু টের পায় । তবু বাবা অনেক ভাল হয়ে গেছে এখন । মদ খায় না, রাত কবে ফেরে না । বাবার সঙ্গে তার এখন খুব ভাল সম্পর্ক ।

চারদিকে দঙ্গলটায় ফিসফাস চলছে । সকলের চোখ সজলের দিকে । লীডার যা বলবে তাই হবে ।

সজল হাত বাড়িয়ে একটা ছেলের হাত থেকে একটা স্টাম্প নিয়ে নিল । বলল, শালা রঘু স্যাকরা আবার আমার বাবাকে খারাপ করছে । দেখাচ্ছি শালাকে ।

প্রশ্ন উঠল, রামলাখন যদি লাঠি নিয়ে বেরোয় ?

সজল গম্ভীরভাবে বলে, কটা লাঠি আছে ওর ? আমরা এতগুলো আছি কি করতে ? চল !

আর কেউ কথা বলে না । সজলের পিছু পিছু নিঃশব্দে সবাই এগোয় । একটু ভয় পাচ্ছে তারা । একটু দ্বিধা আছে । তবে সজল আছে সামনে ! একটা মজাও তো হবে । রামলাখনের ঝোপড়ায় মদ বিক্রি হয়, মেয়েমানুষের নাচ হয়, তারা শুনেছে । জায়গাটা একবার দেখাও হবে । সজলের পাগলা বাপটা কী করে তাও দেখা যাবে ।

স্টেশন পেরিয়ে খালটার ধারে নেমে একটু এগিয়ে দঙ্গলটা থেমে গেল ।

সজল মুখ ফিরিয়ে বলল, বাইরে থাকিস । আসছি ।

লক্ষীছাড়া চেহারার একটা বাচ্চা মেয়ে এক পাল হাঁস তাড়িয়ে নিয়ে উঠোনে ঢুকছিল । সজল তার পিছু পিছু ভিতরে পা দিল । কোথায় অনেকগুলো মুগী ডাকছে কুক কুক করে । উঠোনের তিনদিকে তিনখানা মাটির ঘর । সব কটার চালেই লাউ ফলে আছে । উঠোনের এক কোণে গোটা দুই কাদামাখা মস্ত শুয়োব প্রাণপণে চিল্লাছে । চারদিকে বন্ধ বাতাসে বিস্ত্রী পচা কটু একটা গন্ধ ।

এক পলক চেয়েই কোন ঘরটায় বাবা আছে তা আন্দাজ করে নিল সজল । কোনো দ্বিধা এল না, বুক কাঁপল না, ভয় করল না, বরং অসহ্য রাগে আক্রোশে জ্বলতে জ্বলতে সে এক লাফে বারান্দায় উঠে নীচু দরজাটা দিয়ে ভিতরে ঢুকল ।

ভিতরের দৃশ্যটা প্রথমে ভুতুড়ে বলে মনে হয় । নিবু নিবু টেমির আলোয় কিছুই দেখা যায় না । আবছা ছায়াছায়া জনা তিনচার লোক বসে আছে চ্যাটাইতে ।

সজল বোমা ফাটানো গলায় গর্জন করল, বাবা !

লোকগুলো চমকে চায় । গেলাস থেকে মদ চলকে পড়ে ।

কে রে বাবা ডাকে ! কে যেন মোদো গলায় বলে ।

একদম কাছেই চ্যাটাইয়ের ওপর বসে থাকা কুঁজো মানুষটা মুখ তুলে চেয়ে থাকে ।

বাবা ! আবার গর্জন করে সজল ।

কুঁজো লোকটা অবাক হয়ে বলে, সজল ! এই তো আমি এখানে ! আর, কি চাস ?

সজল হাতের স্টাম্পটা এত জোরে চেপে ধরে যে গাঁটগুলো ব্যথা করে ওঠে । সে হামাগুড়ি দিয়ে নীচু হয়ে বাবার মুখের দিকে তাকায়, কে তোমাকে এখানে এনেছে ? কেউ না । চল যাই । বলে ওঠার চেষ্টা করে শ্রীনাথ । হাতের গেলাসটা সামনের লোকটার দিকে বাড়িয়ে দিয়ে বলে, এটা তুমিই মেরে দাও রঘু । আমার ছেলে এসে গেছে, আমি উঠি ।

লোকটা খুব ছোটো চোখে সজলকে নজর করছিল । ব্যাপারটা বুঝতে চেষ্টা করছে ।

ঐ লোকটা তোমাকে এনেছে, বাবা ! রঘু স্যাকরা না ?

আমাকে ! আমাকে নিয়তি এনেছে । ও নিমিস্ত মাত্র ।

কিন্তু তত্ত্বকথা শোনার মতো মেজাজ নেই সজলের । হামাগুড়ি দেওয়া অবস্থাতেই সে হাত বাড়িয়ে লোকটার ব্যাপার গলার কাছে মুঠো করে ধরে এক হ্যাঁচকা টানে খাড়া দাঁড় করাল । পর মুহূর্তেই ফটাস করে তার হাতের স্টাম্পটা লোকটার হাঁটু ভেঙে দিল প্রায় ।

বাইরে এসো শালা, এসো বাইরে ! দেখাচ্ছি ।

রামলাখন অদূরেই দাঁড়িয়ে । স্থির চোখে দেখছে । কিন্তু খন্দেরকে বাঁচাতে সে এক পাও এগোলো না, একটি শব্দও করল না । জীবনের দীর্ঘ অভিজ্ঞতা-বলে সে বিপজ্জনক মানুষকে চিনতে পারে আজকাল । শ্রীনাথবাবুর এই ছেলেরা যদিও বাচ্চা কিন্তু এর চেহারা-ই বলে দিচ্ছে যে, এ একদম খুনী । রেগে গেলে দুনিয়া ওলট-পালট করে দিতে পারে ।

রঘু চোঁচাচ্ছে, এ কী ! এ কী ! এসব কী হচ্ছেটা কি ? বাবারে ! ওফ ! হাঁটুটা ভেঙে গেছে । উরে বাবা !

শ্রীনাথ হতবাক, স্তম্ভিত । সজল রঘুকে মারছে ! অ্যা ! সজল রঘুকে মারছে ! এত বড় লোকটাকে অতটুকু ছেলে !

রঘুকে বারান্দায় টেনে আনল সজল । তার গায়ের জোর রাগের ঠেলায় এখন তিনগুণ । রঘু টালমাটাল । বারান্দায় এনে স্টাম্পটা আর একবার চালায় সজল । লাগে গোড়ালির কাছ বরাবর ।

রঘু উবু হয়ে গোড়ালি চেপে ধরে চোঁচিয়ে বলে, কেন মারছিস রে বারোভাতারির পুত ? কোথাকার পেলাদ এলি ?

সজল একটা লাথি কষাতেই কাত হয়ে গেল রঘু । মাজা চেপে ধরে উপুড় হয়ে গোঁ গোঁ করতে লাগল ।

শ্রীনাথের সংবিৎ এল এতক্ষণে । বেরিয়ে এসে দৃশ্যটা ক্ষণেক দেখেই ভারী রাগ হয়ে গেল । এগিয়ে গিয়ে আচমকা ঠাস করে এক চড় বসাল ছেলের গালে, খুব গুণামি শিখেছিস ! অ্যা ! কে এসব করতে বলেছে তোকে ?

সজল বাবার দিকে মুখোমুখি তাকায় । গম্ভীর হয়ে বলে, তুমি এখানে এসেছো কেন ?

কেন, এলে কি ? কী করবি তোরা ? রুখে উঠে শ্রীনাথ বলে ।

সজল একথার জবাব দেয় না । বন্ধুরা ফটকের বাইরে থেকে দেখছে । সে ওদের হাতের ইশারায় এগিয়ে যেতে বলে একটু অপেক্ষা করে । তারপর বাবার একটা হাত শক্ত করে ধরে বলে, বাড়ি চলে ।

রঘু উঠে বসে মাজা ধরে হাঁফাচ্ছে । বলল, দেখলেন তো, দাদা ! দরকারে যেন সত্যি কথাটা বলবেন ।

নিঃশব্দে সজল ঘুরে কয়েক পলক রঘু স্যাকরার দিকে চেয়ে থাকে ।

সজল ছোকরাটাকে এতদিন ভাল করে লক্ষ করেনি রঘু । আজ চোখের দিকে চেয়ে

হিম হয়ে গেল সে। দিনান্তের ফ্যাকাসে আলোয় খেঁটুকু দেখা যাচ্ছে তাই যথেষ্ট। এই কলমের চারাটিকে যদি কেউ শিগগির নিকেশ না করে তবে রতনপুরের কপালে কষ্ট আছে। তৃষা তো এর কাছে ছেলেমানুষ।

কিন্তু সজলকে রঘুর দিকে এগোতে দিল না শ্রীনাথ। ধমক দিয়ে বলল, কান ছিড়ে ফেলব বাঁদরামি করলে। তুমি যে এত মাথায় উঠেছো তা আগে জানলে বেতিয়ে লাল করতাম। চলো বাড়ি।

শ্রীনাথ সজলের মধ্যে ভয়ংকর কিছুই দেখতে পায় না, যা রামলাখন দেখছে, রঘু দেখছে। তার কাছে সজল এখনো প্রায় কোলের ছেলে, অবোধ, দুটু। ছেলেকে বকতে বকতে সে ছেলের হাত ধরেই রাস্তায় ওঠে। সজল সাবধানে বাবাকে রেল লাইন পার করায়। তারপর রিকশা ডাকে।

সারা রাস্তা সজল একটাও কথা বলল না। শ্রীনাথ একতরফা মাঝে মাঝে রুখে উঠে তাকে বকাবকি করে গেল।

শ্রীনাথকে ভাবন-ঘরে পৌঁছে দিয়ে সজল বলল, আমি মাকে খবর দিতে যাচ্ছি। শ্রীনাথ মুখ ভেঙিয়ে বলল, যাচ্ছি! যাও না! মাথা কিনে রেখেছে নাকি সবাই আমার? সন্ধে ঘনিয়ে এসেছে। গন্ধক পোড়ানোর গন্ধে উঠোনের বাতাসটা ভারী। মেজদি শাঁখে ফুঁ দিল পূবের ঘরে। সজল নিঃশব্দে মায়ের ঘরের দরজায় দাঁড়াল।

প্রাস পাওয়ারের চশমা চোখে দিয়ে তৃষা কিছু কাগজপত্র দেখছে।

মা!

গম্ভীর তৃষা মুখ তুলে বলে, বলো।

বাবা আজ আবার রামলাখনের বস্তিতে গিয়েছিল।

তৃষা তেমন চমকাল না। অবাকও হল না। যেন একটু চিন্তিত মুখে চেয়ে বলল, তাকে কে বলল?

আমি গিয়ে ধরে আনলাম।

এবাব তৃষা অবাক হয়ে তাকায়, তুই গিয়ে ধরে আনলি?

হ্যাঁ। গদাইয়ের কাছে খবর পেয়ে বন্ধুদের নিয়ে গিয়েছিলাম।

তৃষা সত্যিকারের রেগে যায়। থমথমে মুখ করে বলে, ওসব নোংবা জায়গায় যেতে কে তাকে বলেছিল?

বাবা যখন যেতে পারে তখন আমার যেতে দোষ কি?

মুখে মুখে কথা বলছিস! খুব সাহস হয়েছে?

সজল চোখ নামিয়ে নেয়। মৃদু স্বরে বলে, আমি তো বাবাকে আনতে গিয়েছিলাম।

ঠিক কাজ করোনি। খবরটা আমাকে দিলে যা ব্যবস্থা করার আমিই করতাম। আর কখনো ওসব জায়গায় যেও না।

বাবার জন্য ব্যবস্থা মা কোনোদিনই করেনি, কিন্তু সে কথা তুলল না সজল। একটু ইতস্তত করে বলল, রঘু স্যাকরা বাবাকে নিয়ে গিয়েছিল।

তৃষা একটু কি চমকে উঠল? কিন্তু স্বাভাবিক গলাতেই বলল, ঠিক আছে, খোঁজ নিয়ে দেখব। তুমি এখন যাও।

আমি কিন্তু রঘু স্যাকরাকে মেরেছি।

তৃষা এবার বাস্তবিকই চোখে পড়ার মতো চমকে ওঠে, কি বললি? তুই মেরেছিস?

দরজার বাইরে আবছা অন্ধকারে সজলের লম্বাটে এবং চওড়া চেহারার ছায়াটার দিকে

তাকিয়ে হঠাৎ যেন ভূষার শরীর কঁপে ওঠে শীতে। ভয়েও কি ?

॥ আটাল ॥

কুঠে সামস্তুর বাড়িটা এখন রোদে হাওয়ায় হাসছে। বাড়ির দাঁত নেই যে হাসবে। তবু কেন যেন ঠিক তাই মনে হয় নিতাইয়ের। চালে খড়, মাটির দেয়ালগুলোয় নতুন পলস্তারা, উঠানের দড়িতে একটা-আধটা শাড়ি কাপড় টাঙানো, বড় সুখের চেহারা বাড়িটার। রান্নাঘর থেকে রোজ খোঁয়াও ওঠে।

সকালের দিকটায় প্রায়দিনই নিতাই এসে বাইরে থেকে হাঁক দেয়, কই গো !

কুঠে সামস্তুর বউ এ সময়ে বাড়ি থাকে না। ধানকলে যায়। তো তার খোঁজে আসেও না নিতাই। যার খোঁজে আসে সে ভাইবোন সামলে, রান্না চাপিয়ে ভারী বাস্ত। তবু একটু হাসিপানা মুখ করে বেরিয়ে এসে বলে, এসো নিতাইদা।

দাদা ডাকটা নিতাই নিজেই শিখিয়েছে। প্রথমটায় কাকা ডাকতে লেগেছিল। সে ডাকটা নিতাই পছন্দ করেনি।

জরিবুটির পোঁটলা পাশে রেখে নিতাই উঠানে শীতের রোদে ঠ্যাং মেলে বসে যায়। জটার ঘা শুকোলেও উকুনের উৎপাত বড় হয়েছে। খাবলে মাথা চুলকোতে চুলকোতে নিতাই সব খোঁজ-খবর নেয়, কী রান্না হচ্ছে ? কেমন আছে সবাই ? তারপর নিতাই নিজের কথা পেড়ে ফেলে, কালও এসেছিল ন-পাড়া থেকে একদল। বলে মস্ত দাও কলা মুলো টাকা চাল ডাল পাহাড়-প্রমাণ এনে ফেলেছে। আমি বলি কি, মস্ত দেওয়া কি মুখের কথা ! নিলেই হলো ? দিলেই হল ? যাও গিয়ে তিন দিন হবিষ্যি করো, মন পবিত্র করো, কালীর থানে পুজো চড়াও, তারপর দেখা যাবে। তা কে শোনে কার কথা ! পা দুখানা ঠেসে ধরল।

বিনি, অর্থাৎ কুঠে সামস্তুর ডাগর মেয়েটি, এ সব কথার অর্থ বোঝে। নিতাই টোপ ফেলেছে। ফিক করে হেসে বলে, জটা বড় বিচ্ছিরি। ও নিতাইদা, জটা ছাড়া তান্ত্রিক হওয়া যায় না ?

নিতাইয়ের মুখ বেজার হয়। জটা ছাড়া তান্ত্রিক হয় কিনা তা সে ভাল জানে না। তবে এটা জানে যে জটা ছাড়া ব্যবসা হয় না। জটা রক্তাশ্বর রুদ্রাক্ষ ত্রিশূল, রক্ত চক্ষু এ সব না হলে মানুষ ভড়কাবে কেন ? আর না ভড়কালে মাথাই বা নোয়াতে যাবে কেন ? তাই সে বলে, তা হয়। তবে কিনা আমার জটার অনেক গুণ। স্বয়ং মা গঙ্গা এই জটার মধ্যে সৈধিয়ে রয়েছেন। কতবার নিংড়ে গঙ্গাজল বের করেছি। তা ছাড়া জটার চুল নিয়ে গিয়ে অনেকে কবচ করে। একগাছা চুল দশ পয়সা।

বলো কি ? বলে হাঁ করে থাকে বিনি। আর জটা ছাঁটাবার কথা মুখেও আনে না।

নিতাই মাতব্বরের মতো মাথা নেড়ে বলে, তান্ত্রিকরা যদি পয়সা চায় তবে টাকার বৃষ্টি করে দিতে পারে। তবে কিনা পয়সাকড়ির কথা আমরা ভাবি না, এই যা।

আমাকে একদিন টাকার বৃষ্টি দেখাবে ?

দেখাবো। তবে পাঁচজনের সামনে নয়। ভারী গুহ্য সাধনার ব্যাপার তো !

মেয়েটার বিস্মিত মুখের দিকে চেয়েই নিতাই টের পায়। জমছে। খেলা জমছে। কিন্তু জমে লাভ কি ? বউদিমণি যদি টের পায় তবে বাড়ি থেকে তাড়াবে। আর বাড়ি থেকে তাড়িয়ে দিলে নিতাইয়ের ঠাই জুটেবে কোথায় ? সত্যি বটে, তার নামেও বউদি দশ বিঘে জমি কিনেছে, কিন্তু সে জমি কোথায় তা নিতাই জানে না, দলিলাটাও চোখে দেখেনি। সে

জমির নাগালও সে কোনোদিন পাবে না । তা হলে তার নিজের বলতে রইল কি ? বউ নিয়ে উঠবে কোথায় ? খাওয়াবেই বা কোন কাঁচকলা ?

তোমার বউ কেন পালিয়েছিল গো, নিতাইদা ? তুমি তো লোক খারাপ নও ! মা বলে, নিতাইবাবার মনটা বড় ভাল ।

সেটা আর সে বুঝল কই বলো ? মডার খুলি দেখে ভয় পেল কিনা ! তত্ত্ব-সাধনার গুহ্য কথা কি মেয়েরা বোঝে ?

বিনি চোখ কপালে তুলে বলে, ওমা ! বউ থাকতে তুমি তান্ত্রিক হয়েছিলে নাকি ? লোকে তো বলে, বউ পালানোর পর হয়েছে !

নিতাই ধরা পড়েও ঘাবড়ায় না । আঙুল দিয়ে দাড়ি আঁচড়াতে আঁচড়াতে বলে, পুরোপুরি ছিলাম না বটে । তবে একটু-আধটু নাডাচাড়া করতাম ।

তোমার সেই বউ খুব সুন্দরী ছিল ? •

ছিল এক রকম । নাকটা চাপা । তা ছাড়া ভালই ।

নাক তো আমারও চাপা ।

তোমার ? যাঃ । তোমার বলে টিকোলো নাক !

এই সব আগডম বাগডম বকতে বকতে বেলা চড়ে । নিতাই জানে, বেশীক্ষণ বসলে বিনি খেতে বলবে । সেটা ঠিক হবে না । গরীব মানুষ, একটা বাড়তি লোককে খাওয়াতে এদের যে কত কষ্ট হয় । তা ছাড়া খায়ই বা কি ? কচু ঘেঁচু আর পাতা সেদ্ধ, একটু লবণ আর লঙ্কা । তাই নিতাই বসে না । উঠে পড়ে ।

বিনি খানিকটা এগিয়ে দিয়ে বলে, আবার এসো । তুমি এলে ভারী ভাল লাগে ।

একদিন দুপুরে সামস্তুর বাড়ি থেকে ফেরার পথে রঘু স্যাকরা ডেকে বলল, চা খাবি নাকি ?

বহুকাল রঘু স্যাকরার সঙ্গে দেখা নেই । একবার খামোখা খুব ঝামেলায় পড়েছিল । সেই থেকে আর ও-পথ মাড়ায় না । তবে কেউ ডাকলে না গিয়েও পারে না নিতাই ।

রঘুর নতুন বাড়ির দাওয়ার বসে বলল, খুব টাকা হয়েছে তোমার দেখছি ।

রঘুর মুখখানার চেহারা ভাল না । হাসি নেই, গোমরাপানা । একটা বাটিতে অ্যাসিডে সোনা জ্বাল দিচ্ছে কাঠ কয়লার আঙুরায় । গন্ধে কার্শি আসে, পেট গুলোয় ।

রঘু বাটিটা নামিয়ে রেখে কাছে এসে বসে বলল, খবর-টবর সব শুনেছিস ?

কি শুনব ? সন্দেহের চোখে চায় নিতাই ।

ও-বাড়ির খবর । চাটুজ্জবাড়ির ।

খবর তো কিছু নেই । শুধু বড়দিদিমণির বিয়ে হবে শুনেছি । তা সে এখানেও নয় । এলাহাবাদে ।

ও খবর নয় । শ্রীনাথ চাটুজ্জ যে আবার মাইফেলে যাচ্ছে, সে খবর শুনিসনি ?

ওঃ । সে তো নতুন কিছু নয় ।

শ্রীনাথের ছেলেটা তো খুব উঠেছে দেখছি ।

সজলখোকা ? সে আবার উঠবে কি ?

উঠবে কি ? বলে মুখ ভেঙায় রঘু । আলিসান চেহারা হয়েছে । ডাকাত-টাকাত হবে বড় হলে । তেমনি হাড়ে হারামজাদা ।

সজলখোকা আবার তোমার কি করল ?

দিতুম সেদিনই ঠ্যাং ভেঙে । নেহাত ছেলেমানুষ, তা ছাড়া বাপটাও সামনে রয়েছে ।

কিছু বলিনি। কিন্তু সাবধান করে দিস। এর পর বীদরামি করলে পুতে ফেলব।

নিতাই হাসে তড়পানি দেখে। মাথা নেড়ে বলে, বাস বাস, অত লাফিও না। সবাই কি আর নিতাইকাপা? ঝেড়ে কাশো তো বাপ, ব্যাপারটা শুনি আগে।

রঘু রক্ত চোখে চেয়ে বলে, ইং, কে আমার সালিশী এলেন! ঠুকে বলতে হবে!

চা ঝাওয়াবে বলছিলে যে!

রঘু উঠে গিয়ে বাটিটা আবার নেড়েচেড়ে দেখে। অ্যাসিডটা সাবধানে আর একটা পাত্রে ঢেলে দিয়ে উঠে আসে। বলে, চা চা করে গলা শুকোচ্ছিস কেন? বলেছি যখন, হবে।

তো কথাটা কি?

কাউকে বলবি না?

কার দিব্যি কাটতে বলো, কাটছি।

মা কালীর।

মা কালীর দিব্যি।

তোর দিব্যির কোনো দাম নেই। তবু বলছি, শ্রীনাথবাবুকে রামলাখনের ঘরে আমি নিজে থেকে নিয়ে যাইনি।

তাই নাকি?

মাইরি।

নিজে থেকে নাওনি, তবে কি বাবু নিজেই গেল?

তাও নয়।

গুহা কথাটা কি?

মাসটাক আগে ভটভটিয়া চেপে শ্রীনাথের শালা সরিৎ এপথ দিয়ে যাচ্ছিল। আমি নারকোল গাছের গোড়ায় নুন দিচ্ছিলুম। দেখে ভটভটিয়া থামিয়ে নেমে এসে অনেক আগড়ম্ব বাগড়ম্ব কথা পাড়ল। ছোকরাকে আমার পছন্দ নয়, তবে মস্তান বলে কথা। খাতির রাখতে হয়। শেষমেঘ বলে ফেলল, জামাইবাবুর অবস্থা তো জানেন। কেমনতরো পাগলা পাগলা ভাব। ডাক্তার বলেছে, আগের সব অভ্যাস হঠাৎ ছেড়ে দেওয়ায় এরকমটা হয়েছে। তা আবার একটু ফুর্তিফুর্তি করলে সেরে যাবে। চিকিৎসাই একরকম।

তাই বটে! চোখ কপালে তোলে নিতাই।

বললে কিন্তু কেটে ফেলব, নিতাই।

কালীর দিব্যি করেছে। নিশ্চিন্তে বলো।

কথা এটুকুই। বলল, জামাইবাবুকে মাঝে মাঝে ডেকে নিয়ে যাবেন। তবে কেউ যেন টের না পায়।

তুমি রাজি হলে?

রাজি না হয়ে উপায়? রামে মারে, রাবণেও মারে যে।

বউদি যদি জানতে পারে?

সে কথাও তুললাম। চোখ টিপে বলল, ডাক্তারের পরামর্শ তো, মেজদি কিছু মনে করবে না। তখনই বুঝলুম, চাটুজ্জগিনীর সায় আছে।

সরিৎ তোমাকে কিছু দিল-টিল?

না, কী দেবে?

কিছুই না?

জুতো খাবি কিন্তু, নিতাই।

নিতাই হেসে বলল, সাধু সেজো না । কদিন আগে একজোড়া বালা ভেঙে রতনচূড় করতে দেয়নি বউদি তোমাকে ?

সে কি ঘুষ ?

তা নয় তো কি ? ও বাড়ির গয়না করে কলকাতার স্যাকরারা । তোমার মতো হাভাতে সোনার বেনেকে কে পৌছে হে ?

যা তাহলে চা পাবি না ।

তাহলে কথাটাও গোপন থাকবে না ।

মা কালীর দিব্যি কাটলি যে !

তুমিও তো চা খাওয়াবে বলে ডেকেছিলে । রেখেছো সে কথা ?

চা হবে রে বাপ, কথাটা ওভাবে খরিসনি ।

মাল ছাড়ো, কথা যেভাবে ধরতে বলবে সেভাবেই ধরব ।

ধরাধরির কিছু নেই । শ্রীনাথবাবু এখন আবার একটু ফুর্তি করার জন্য আঁকুপাঁকু । বেচারার জন্য কষ্টও হয় । কিন্তু এ কালান্তক ছেলেটার জন্য ভয় পাই । সেদিন রামলাখনের ঘরে ঢুকে লঙ্কাকাণ্ড করে এসেছে । ওকে একটু বুঝিয়ে বলবি যে, দোষটা আমার নয় ।

দোষটা কার ঘাড়ে চাপান দেবো তাহলে ?

ডাক্তারের ঘাড়ে । বলবি ডাক্তার বলেছে ।

ও ছেলে অত সহজে ভুলবার নয় ।

তবে ভবি ভুলবে কিসে ?

সে ভার আমার । আমাকে একটা ঘর করার জায়গা দেবে ? তোমার তো মেলা জায়গা, আধকাঠা পেলেও আমার হয় ।

দূর শালা ! ভাগ ।

আচ্ছা, এখন তো চা খাওয়াও । বলে নিতাই জুত করে বসে ।

সজলের বন্ধুদের বলা আছে । তারা চারদিকে নজর রাখে । পাহারা দেয় সজল নিজেও । ইস্কুল থেকে ফিরেই সে আসে ভাবন-ঘরে, ঢুকে বাবাকে দেখে । যখন বিকেলে খেলতে যায় তখন তার হয়ে বাবাকে পাহারা দেয় ক্যাপা নিতাই বা নতুন মালী । সজল সবাইকে বলে রেখেছে, রঘু স্যাকরাকে কাছেপিঠে ঘোরাঘুরি করতে দেখলেই যেন তাকে খবর দেওয়া হয় ।

সজলের পর বাড়ির মাস্টারমশাই চলে গেলে সে নিজেই বাবার কাছে চলে আসে । শ্রীনাথও তাকে দেখলে খুশি হয় ।

আয় । মাস্টারমশাই চলে গেছেন ?

হ্যাঁ ।

বোস, কাছে এসে বোস । যা শীত ।

এক লেপের তলায় গায়ে গায়ে বাপ-ব্যাটায় বসে গুটিসুটি হয়ে । সজল এখন মাথায় মাথায় শ্রীনাথের সমান লম্বা । শ্রীনাথের চেয়ে তার স্বাস্থ্য ভাল এবং গায়ের জোর অনেক বেশী । খুব হঠাৎ করেই সজলটা এমন ধাঁ বেড়ে উঠল । এই বেড়ে ওঠাটাকে খুব উপভোগ করে শ্রীনাথ । সে গাছপালার বেড়ে ওঠা লক্ষ করেছে । এমন সতেজ সহজ বাড়ন খুব সুলক্ষণ । গাছপালাকে কখনো একটু ছাঁটকাট করতে হয় । তাতে বাড় আরো ভাল, কিন্তু মানুষের ছাঁটকাট কীভাবে হবে তা তো সে জানে না ।

সজলের বাড়ন্ত শরীরে নিজের শরীরের তাপ সঞ্চার করে দিতে দিতে শ্রীনাথ বলে, আজকাল আমি কেমনধারা হয়ে গেছি যেন। বোধহয় বেশিদিন বাঁচব না। তুই আমাকে দেখিস।

সজল গম্ভীর গলায় বলে, আর কখনো যাওনি তো, বাবা ?

রামলাখনের ওখানে ? দূর বোকা।

আমি কিন্তু চারদিকে পাহায্য রেখেছি।

পাহারা ! বলে অবাক হয় শ্রীনাথ, সে কি রে ! পাহারা কেন ?

রঘু স্যাকরা যদি তোমাকে নিয়ে যায়।

শ্রীনাথ চূপ করে থাকে। তারপর অনেকক্ষণ বাদে আস্তে আস্তে বলে, রঘুব দোষ কি ? নিমিত্ত মাত্র। আমিও তো ভাল নই। নইলে সে ডাকল আর আমিও কেন চলে গেলাম !

সজল মৃদু কিন্তু দৃঢ় স্বরে বলে, তুমি খুব ভাল বাবা।

দুজনে আর একটু নিবিড় হয়ে বসে। শ্রীনাথ একটু আবেগের ধরা গলায় বলে, ভালই তো ছিলাম একসময়ে। তারপর সব গণ্ডগোল হয়ে গেল। কাঁচা পয়সা, নিশ্চিন্তের জীবন এসব ভাল নয়। তুই একটু দুঃখে থাকিস। টানাটানিতে থাকিস ভাল থাকবি।

সজল হঠাৎ লেপটা গা থেকে সরিয়ে চিতাবাঘের মতো দ্রুত গিয়ে এক ঝটকায় পশ্চিমের জানালাটা খুলে বলল, কে ?

ভয়ার্ত গলায় জবাব এল, আমি।

সজল তেমনি বাঘের মতো গিয়ে দরজার হুকো খুলে বাইরে বেরিয়ে গেল।

সজলখোকা, আমি নিতাই।

কি চাও ?

একটা কথা।

চালাকি কোর না। স্পাইগিরি করছিলে ?

চালাকি নয় গো।

কে তোমাকে লাগিয়েছে কথা শোনার জন্য ?

মাইরি কেউ না।

সজল হঠাৎ বিকট স্বরে চৈঁচিয়ে বলে, আমার বাবার ওপরে যে স্পাইং করবে তার টুটি ছিড়ে ফেলে দেবো।

নিতাই ভদকে গিয়ে বলে, কথাটা শোনোই না। অত চৈঁচালে যে লোক জুটে যাবে।

সজল অবশ্য কথাটা নিতাইকে উদ্দেশ্য করে আর কাউকে শোনাচ্ছিল। কেননা তার ক্রুদ্ধ চোখ ভিতরবাড়ির দিকে। চোখটা ফিরিয়ে অন্ধকারে কালো চাদরে মুড়ি দেওয়া নিতাইয়ের দিকে চেয়ে বলল, মিথ্যে কথা বলবে না তো !

না। তোমাকে মিথ্যে বলে কি মার খেয়ে মরব ?

কি কথা ?

রঘু স্যাকরার দোষ নেই। তোমার মামা তাকে লাগিয়েছিল বাবুকে রামলাখনের আড্ডায় নিয়ে যেতে। আমার নাম কোরো না কিন্তু। বলে গেলাম, এবার পালাই।

সজল খুব অবাক হল না। কিন্তু একা অন্ধকার বারান্দায় দাঁড়িয়ে রাগে বিস্ফেবে পাগল হয়ে দাঁতে দাঁত পিষতে লাগল।

ভিতর থেকে শ্রীনাথ ডাকল, সজল, আয়। কে রে ?

ঘরে ঢুকে দরজাটা বন্ধ করে সজল বলে, নিতাই।

আবার বাপ-ব্যাটায় কাছ ঘেঁষাঘেঁষি করে বসে ।

শ্রীনাথ বলে, তুই কি খুব ডাকবুকো ? দুই ?

সজল হাসে । বলে, না । তবে আমাকে সবাই ভয় খায় ।

তোকে ? তুই তো একটুখানি ছেলে, তোকে ভয় খায় কেন ?

কি জানি !

মারপিট করিস ?

অন্যায় দেখলে । তাছাড়া নয় ।

শ্রীনাথ একটা দীর্ঘশ্বাস ছেড়ে বলে, ওসব করিস না । চারদিকে শত্রু । কে কবে শোধ নিতে খাবারের সঙ্গে বিষ মিশিয়ে তোকেও মেরে ফেলবে ।

আমাকে মা অবধি ভয় পায় । জানো ?

তোকে ? শ্রীনাথ অবাক, কই তোকে দেখে তো ভয়ের কিছু মনে হয় না ।

সজল হাসে, একমাত্র তুমিই আমাকে ভয় পাও না । বরং আমিই তোমাকে ভয় পাই, বাবা ।

দূর পাগল ! আমাকে ভয়ের কি ? কেউ আমাকে ভয় পায় না ।

আমি পাই । আমি যে তোমাকে ভীষণ ভালবাসি ।

॥ উনষাট ॥

ফেয়ারলি প্লেসে ব্ল্যাকারদের সঙ্গে হাতাহাতি করে, লাইন ম্যানেজ করে এবং বুকিং ক্লার্কদের সঙ্গে বিস্তার অর্থহীন কথা বলে সরিৎ এলাহাবাদের তিনটে সেকেন্ড ক্লাস স্লিপারের টিকিট কেটে ফেলল । ঝাড়া ঘণ্টা চারেকের চেষ্টায় ।

বেরিয়ে এসে টিকিটগুলোর দিকে চেয়ে চুকচুক করে একটু আফসোসের শব্দ করল । একেবারে ফালতু গচ্চা । এলাহাবাদ পর্যন্ত অনায়াসে বিনা টিকিটে যাওয়া যেত, খরচ লাগত অর্ধেকের কম । কিন্তু সেজদিকে সেকথা বলাই যায় না ।

শেষ বেলায় বাড়িতে ফিরে বিজয়ীর মতো হেসে সেজদীর হাতে টিকিট দিয়ে বলল, ব্ল্যাকে কাটতে হয়নি । লাইনেই পেয়ে গেলাম ।

তৃষা কোনো জবাব দিল না । প্রথমতঃ গম্ভীর মুখে টিকিটগুলো নিয়ে ঘরের আলমারিতে রেখে এল । বলল, সজলকে একটু ডেকে দিয়ে যাস তো । বোধ হয় পুরোনো গোয়ালঘরটায় আছে ।

সরিৎ গিয়ে দেখে, মস্ত বালির বস্তায় হাতে ন্যাকড়া জড়িয়ে ঘুরে ঘুরে ঝুঁষি চালাচ্ছে সজল । মুখ রক্তবর্ণ, সর্বাস্থে জবজবে ঘাম ।

অবাক সরিৎ বলে, কি করছিস ? বক্‌সিং ?

সজল গম্ভীর মুখে বলে, হ্যাঁ ।

কে শেখায় তোকে ?

কেউ না । নিজে শিখছি ।

সরিৎ নিজের কাজকর্ম এবং ভবিষ্যৎ তৈরি করতে ইদানীং এতই ব্যস্ত ছিল যে, সজলকে ভাল করে লক্ষ্যই করেনি । আজ করল । এবং একটু অবাক হল ।

তুই কত ফুট লম্বা রে ?

পাঁচ নয় ।

সজলের উচ্চতা ওরকমই হবে। বেশী ছাড়া কম নয়। তবে আরও লম্বা হবে। অনেক লম্বা। সরিতের নিজের হাইট মাত্র পাঁচ আট। কিন্তু সে আর বাড়বে না। শুধু লম্বাই নয়, সজলের কাঠামোটা আশ্চর্য রকমের মজবুত। কবজি দু'খানা চওড়া, হাত দু'খানা যেমন লম্বা তেমন দ্রুতগতিসম্পন্ন। কিন্তু তার চেয়েও বড় কথা এবং সব চেয়ে গুরুতর ব্যাপার হল, সজলের দু'খানা চোখ।

বহুকাল বাদে হঠাৎ একটা অজানা ভয়ে বুকটা সামান্য কেঁপে উঠল সরিতের। এ ছেলেকে সামলানো মুশকিল হবে। এর ওপর আধিপত্য করা যাবে না কখনো। এ সব সরিৎ এক নজরেই বোঝে।

সে তবু মুখে হাসি টেনে এনে বলে, খুব তিনঠ্যাঙা লম্বা হয়েছিস তো!

সজল ঘুমি খামিয়ে ঘরের বেড়ায় গৌজা একটা টার্কিশ তোয়ালে দিয়ে ঘাম মোছে।

সরিৎ মস্ত বস্তাটায় হালকা দু-একটি ঘুমি মেরেই বুঝতে পারে, এই ভারী কর্কশ বালিতে ধার হয়ে ওঠা বস্তায় এক নাগাড়ে ঘুমি মারা অত্যন্ত কঠিন কাজ। কবজি ভেঙে যাওয়ার সম্ভাবনা আছে, লিগামেন্ট ছিঁড়তে পারে।

সরিৎ ডান হাতটা বাড়িয়ে বলল, তোর পাঞ্জার কেমন জোর হয়েছে!

সজল একটু হাসল, তারপর হাত বাড়িয়ে সরিতের চেয়ে অন্তত দেড়গুণ বড় থাবায় চেপে ধরল হাতখানা।

সরিৎ বিস্তর মারপিট করে হাড়ি পাকিয়ে ফেলেছে। তাব হাতে ব্যথা লাগে না, তবু হাতখানা ধরে সে বুঝতে পারল, সজলের গায়ে জোর যে তার চেয়ে বেশী তাই নয়, বহু বহুগুণ বেশী। সরিৎ না হয়ে অন্য কেউ হলে সজলের আঙুলের চাপে ককিয়ে উঠত। সরিৎ ককিয়ে উঠল না, কিন্তু আবার এক অজানা ভয়ে খানিকটা বিবর্ণ হয়ে গেল।

সজলের পিঠ চাপড়ে সরিৎ বলে, ভাল তৈরি হয়েছিস। খুব ভাল। তোকে কয়েকটা শক্ত কায়দা শিখিয়ে দেবো। কালিম্পিং-এর একজন ব্রাউন বেল্টের কাছ থেকে শেখা!

সজল খুব উৎসাহ দেখাল না। উদাস মুখে বলল, দিও।

এখন যা। তোকে সেজদি ডাকছে।

গায়ে গেঞ্জী ছিলই। বেড়ার গা থেকে জামাটা টেনে গায়ে চড়াল সজল। বলল, তুমি এগোও। যাচ্ছি।

চিন্তিত মুখে সরিৎ গিয়ে তার মোপেড চালিয়ে বাজাবে গেল। ত্রয়ীতে নতুন মাল এসেছে। দাম ফেলতে হবে।

জামার ওপর হাতকাটা সোয়েটাব চাপিয়ে সজল এসে মায়ের ঘরের সামনে দাঁড়ায়।

তৃষা বেরিয়ে আসে।

শেষ বেলায় শীতের স্নান রোদ পড়েছে সজলের মুখে। মুখের ঘাম সবটা মরেনি এখনো।

লম্বা, সারবান চেহারা। চোখের দৃষ্টি এই বয়সেই যথেষ্ট স্থির এবং গভীর। নির্ভুল একজনের ছাপ পড়েছে সজলের চেহারায়। কিন্তু সেই লোকটিকেও দিনেকালে এ ছেলে ছাড়িয়ে যাবে। তৃষা কিছুতেই আজকাল ছেলের সামনে সহজ বোধ করে না। কেমন অস্বস্তি হয়।

ডেকেছো?

তৃষা গভীর মুখে বলে, সামনের সপ্তাহে আমরা এলাহাবাদ যাচ্ছি।

আমরা মানে!

আমি, তুই আর সরিৎ ।

আমি গিয়ে কি করব ? ইন্সুল কামাই হবে না ?

মামী তোকে দেখতে চেয়েছে । আমরা বেশী দিন থাকব না ।

সামনেই অ্যানুয়াল পরীক্ষা । সজল ঘাড় শক্ত রেখেই জবাব দেয় ।

দু-তিন দিনে কিছু হবে না ।

বড়দির বিয়ের ব্যাপার, সেখানে আমাকে দিয়ে কি হবে ?

কিছু হবে না । কিন্তু আমি তোমাকে একা বাড়িতে রেখে যেতে চাই না ।

সজল অবাধ হয়ে বলে, একা কেন? মেজদি, ছোড়দি আছে, বাবা আছে ।

তাদের থাকা না-থাকা সমান । তুই কবে থেকে মুখে মুখে জবাব দিতে শিখলি ?

তুমি বোকার মতো কথা বলছ বলেই জবাব দিচ্ছি ।

বোকার মতো ! বলে স্তম্ভিত হয়ে তৃষা চেয়ে থাকে ছেলের দিকে । এত সাহস ! এত সাহস এরা কোথেকে পায় ?

কিছুক্ষণ তৃষা কথাই বলতে পারল না ।

সজল অভ্যাসবশে একটু ভয় পেল । মা সম্পর্কে এখনো তার ভয়টা পুরোপুরি যায়নি । শক্ত কাঠামোর গভীর ও আদরহীন তার এই মা তো গায়ের জোরে সবাইকে টিট করে রাখেনি । আর একটু কিছু আছে । সেই রহস্যময় অজানা একটু কিছুকেই পেরোনো যায় না ।

সজল চোখ নামিয়ে বলে, এখন আমি যেতে পারব না । তুমি মেজদি বা ছোড়দিকে নিয়ে যাও ।

তৃষা কিছু বলল না । নিঃশব্দে ঘরে চলে গেল । ঘরের ঠিক মাঝখানে আবহাওয়ায় কিছুক্ষণ কাঠ হয়ে দাঁড়িয়ে থাকে সে । রাগ হয় না, পরাজয়ের গ্লানিও বোধ করে না । শুধু এক শূন্যতা এসে তার ভিতরটাকে ফাঁকা বোধবুদ্ধিহীন করে দেয় কিছুক্ষণের জন্য ।

সজল নিজের ঘরে গিয়ে জামা-প্যান্ট পাশ্টায় । একটু চিন্তিত, উদ্বিগ্ন ।

আগে সে মায়ের কাছে থাকত । তারপর জায়গা হল দুই দিদির ঘরে । সম্প্রতি তার একটা আলাদা ঘর হয়েছে । এ-ঘরে সে একা থাকে । ভূতের ভয় পেত আগে । এখন পায় না । আজকাল খুব কম জিনিসকেই ভয় পায় সজল ।

চূপচাপ কিছুক্ষণ বসে সে এলাহাবাদ যাওয়ার ব্যাপারটা নিয়ে ভাবল । বেড়াতে যাওয়া খারাপ নয়, কিন্তু এখন তার কোথাও যেতে ইচ্ছে করছে না । মনে হয় সে চলে গেলে বাবার বিপদ হবে ।

পায়ে চটি গলিয়ে সজল ঘর থেকে বেরিয়ে লম্বা লম্বা পা ফেলে ভাবন-ঘরে এসে ঢোকে ।

বাবা !

শ্রীনাথ বাগানের ধারের রাস্তায় বেড়াতে বলে গলায় কমফোর্টার জড়িয়ে তৈরি হচ্ছিল । বলল, কি রে ?

মা এলাহাবাদ যাচ্ছে ।

জানি । চিত্রার বিয়ের সম্বন্ধ এসেছে ।

আমাকেও নিয়ে যেতে চাইছে ।

শ্রীনাথ ভালমানুষের মতো বলে, যা না ! ঘুরে আয় ।

আমি বলেছি যাবো না । সামনে পরীক্ষা ।

ও । তাও তো বটে । তবে তোকে নিয়ে যেতে চায় কেন ?
 কি জানি । মার ধারণা, এ-বাড়িতে একা থাকলে আমি বদমাইশী করব ।
 শ্রীনাথ মুখ বিকৃত করে বলে, বাজে কথা ।
 মা খুব রাগ করেছে । তুমি মাকে একটু বুঝিয়ে বলবে ?
 কি বলব বল তো ?
 বোলো, আমি চলে গেলে তোমার অসুবিধে হবে ।
 তাতেও তো তোর মা রেগে যাবে ।
 সে আমি জানি না । তুমি যেমন করেই হোক যাওয়ার ব্যাপারটা কাটিয়ে দাও ।
 শ্রীনাথ চিন্তিত মুখে চেয়ে থেকে বলে, আমার কথার কি কোনো দাম আছে ওর কাছে ?
 তবু বলে দেখব ।
 তুমি বললেই হবে ।

খুবই গম্ভীর মুখে সরিৎকে নিয়ে পরের সপ্তাহে এলাহাবাদ রওনা হয়ে গেল তৃষা । তিন দিনের নাম করে গেল, সাত দিনেও এল না বা চিঠি দিল না ।

তৃষার খবরের জন্য এ-বাড়ির কেউই উদ্বিগ্ন নয় । শুধু বুড়ো দীননাথ মাঝে মাঝে ডাক-খোঁজ করেন, ওরে বউমার পোঁছন সংবাদ এল ? ডাকঘরে একটু খোঁজ নে না তোরা । ওরা তো কত চিঠি হারিয়ে ফেলে, বিলি করে না ।

প্রায় রোজই মঞ্জু আর স্বপ্নার সঙ্গে সজলের ঝগড়া হয় আজকাল । কেউ কাউকে সহ্য করতে পারে না । বাগানে প্রায়ই গরু ঢোকে । বাড়ির গরু দুয়ে দুধ অনেক কম হয়, গ্রাহকরা রাগারাগি করে । হাঁস মুরগিদের ডিমও কম পড়ছে আজকাল । উঠোনে শুকনো পাতা পড়ে থাকে । রাত্রিবেলা তৃষার ঘরের দাওয়ার নীচে বসে ইম্পাত রাতবিরেতে কেঁদে ওঠে প্রায়ই ।

এই তাকে একদিন ম্যুলাবদল সেরে নিশুতিরাতে চুপিচুপি বিনিকে এনে ঝোপড়ায় তুলে ফেলল স্ক্যাপা নিতাই ।

পরদিন তাকে নিয়ে হইচই পড়ে গেল বাজারে । জটা নেই, টেরিকাটা মাথা । দাড়ি কামানো । প্রথমটায় লোকে চিনতেই পারেনি । গম্ভীর মুখে বাজার করছিল । একজন দুজন করে চিনে ফেলতেই ভীড়ে ভীড়াকার ।

নিতাই ভীড় ভালবাসে । তাকে নিয়ে লোকে হইচই করুক তা ও চায় ।

সে ভীড়ের দিকে হাত তুলে বরাভয় দেখিয়ে টিউবওয়েলের মাথায় উঠে দাঁড়াল । গলা ঝেড়ে বলল, ভদ্রমহোদয়গণ, আপনাদের পরিচিত নিত্যানন্দ মহারাজ এখনো নিত্যানন্দ মহারাজই আছেন । তত্ত্বসাধনা অতি গুহ্য সাধনা । এর স্বরূপ কেউ জানে না । গতকাল গুরুদেব স্বপ্নে আদেশ করলেন, ওরে নিতাই, অনেককাল ব্রহ্মচর্য হল । এবার একটু গেরস্থ হ । গৃহস্থ না হলে সংসারটাকে টের পাবি কি করে ? তোর তো পনেরো আনাই হয়ে আছে, এইটে হলেই ষোলো আনা হয়...

শুনে লোকে হাততালি দিল ।

পনেরো দিনের মাথায় এলাহাবাদ থেকে কাশী আর লক্ষৌ ঘুরে তৃষা ফিরে এল । নিতাই ঝোপড়ার দরজা আর দিনমানে খুললই না সেদিন ।

তৃষা ফিরে আসার পরই গরুর দুধ বেড়ে যায়, হাঁস-মুরগিরা উচিত মতো ডিম পাড়ে, উঠোন ঝকঝক করে, মঞ্জু স্বপ্না আর সজলের ঝগড়া মিটে যায় ।

তবে তৃষার মুখ একটা কাঠের মুখের মতো গম্ভীর থাকে । সহজ হয় না, স্বাভাবিক হয়

না।

পরদিন সকালে শ্রীনাথের ঘরে এসে তৃষা বলল, ছেলে আমার পছন্দ হয়েছে। মত দেবো ?

পছন্দ হলে মত দেবে না কেন ?

তোমার মতও তো আছে।

আমার মত বলে কিছু নেই।

কিন্তু তুমি মেয়ের বাবা, চিঠিটাও তো তোমাকেই লিখতে হবে।

আমি আজকাল লিখতে পারি না। হাত কাঁপে। তুমি লিখে দাও বয়ানটা, আমি সই করে দিচ্ছি।

ছেলেটা কেমন তা জানতে চাইলে না ?

তোমার যখন পছন্দ হয়েছে তখন ভালই হবে। সংসারের এসব ব্যাপার তুমি আমার চেয়ে অনেক ভাল বোঝো।

তৃষা চলে আসে।

ঝোপড়ার বেড়ার ফাঁক দিয়ে দুই জোড়া ভীতু চোখ লক্ষ করছিল তৃষাকে। এখনো টের পায়নি। বিনি যে এ-ঘরে আছে তা কারো জানা খবর নয়। ধরা পড়লে কী হবে তাও ভেবে ঠিক করতে পারছে না দুজনে।

তৃষাকে কেউ কিছু বলেওনি। তবু আনমনে ভিতরবাড়ির দিকে ফিরতে ফিরতে তৃষা একবার আলতো দৃষ্টিতে তাকিয়েছিল ঝোপড়ার দিকে। তাকিয়েই ব্রু কৌচকাল। ঝোপড়ার উঠোনটা নিকোনো, ঘাস চাঁচা। একটা নতুন গামছা ঝুলছে দড়িতে।

ঘরে এসে সে মংলুকে ডেকে বলে, স্কাপা নিতাইকে ধরে আন তো। আর দেখে আসবি ওর ঘরে কেউ আছে কিনা। বলেই পরমুহুর্তে আবার কী একটু ভেবে বলল, থাক এখন। বিকেলের দিকে ডেকে আনলেই হবে।

মংলু হাসিমুখে বলে, আজ্ঞে নিতাই জটা হেঁটে ফেলেছে। দাড়িও চৈছেছে।

তৃষা কাঠমুখেই বলল, ও। আজ্ঞা যা। সজলকে বলিস, যেন ইস্কুলে যাওয়ার আগে আমার সঙ্গে দেখা করে যায়।

প্রাস পাওয়ারের চশমা চোখে পাত্রপক্ষকে দেওয়ার চিঠিটা মুসাবিদা করতে বসল তৃষা। খুব বেশীকিছু লেখার নেই। তা হলেও অনেকটা সময় নিয়ে সে নির্ভুল করল চিঠিটাকে। মা!

তৃষা তাকায়। দরজায় সেই মানুষটার ছায়া। সারা জীবনে যে একটি মাত্র মানুষকে ভালবাসতে পেরেছিল তৃষা। কিন্তু তার এই ছায়াকে সে কেন ভালবাসার চেয়েও ভয় পায় বেশী ?

মা আর ছেলে মুখোমুখি তাকিয়ে থাকে। দুজনেই আজ যেন স্পষ্ট বুঝতে পারে, আমরা পরস্পরের শত্রু।

॥ বাট ॥

সাতসকালে কে যেন 'শ্রীনাথবাবু। শ্রীনাথবাবু।' বলে ডাকাডাকি লাগিয়েছে। এ সময়টার শ্রীনাথের ভারী একটা আমেজের ঘুম হয়। আধোঘুম আর আধো-জাগরণের মধ্যে সে ভারী একটা আরেসী ব্যাপার। বিরক্ত হয়ে উঠে দরজা খুলে দেখে, শ্রোসের আর এক

প্রুফরিডার মানিক গুপ্ত । বহুকাল দেখা নেই ।

কিরে ? কী ব্যাপার ? আয় ভিতরে এসে বোস ।

জিভ কেটে মানিক বলে, বসব কি ? স্বয়ং বদুবাবু বাইরে গাড়িতে বসে আছেন । ঘরদোর একটু সামলে নিন । আপনার খবর করতে এসেছেন ।

বলিস কি ? বদুবাবু ! বলে শ্রীনাথ ভারী ব্যস্ত হয়ে লোকজন ডাকাডাকি করতে লাগল ।

হাঁকডাকে বৃন্দা আর নতুন আর একটা কাজের লোক দৌড়ে এসে ঘরদোর সারতে লাগে । শ্রীনাথ কোনোক্রমে মুখ ধুয়ে কাপড় পাশে নেয় । তারপর ফটকের বাইরে দাঁড় করানো পুরোনো প্রকাশ হাডসন গাড়িটার কাছে এগিয়ে যায় ।

আজ্ঞে, আপনি আসবেন ভাবতেই পারিনি ।

বদুবাবুর বয়স শ্রীনাথের মতোই হবে । ফর্সা, গোলগাল বনেদী চেহারা । বাবা কষ্ট কবে কারবার তৈরি করেছিল । এরাও ব্যবসা জানে । প্রেস ছাড়াও অন্যান্য কারবার আছে । প্রচুর পয়সা ।

বদুবাবুর পরনে পাঞ্জাবি আর ধুতি । কাঁধে শাল । মুখটা ব্যক্তিগতময়, গম্ভীর । একটু হেসে বলে, আপনি সেই যে অসুখের খবর দিলেন তারপর আর দেখা নেই । বাবার আমলের লোক, কী হল কী হল ভাবতে ভাবতে চলে এলাম ।

আসুন, আসুন, বড় ভাগ্য ।

বদুবাবুর সঙ্গে মানিক আর ড্রাইভার ছাড়াও বাড়ির চাকর এসেছে । সে একটা মাঝারি বুড়ি নামাল সামনের সীট থেকে । ফলটল আছে, অনুমান করে শ্রীনাথ ।

ভাবন-ঘর অল্প সময়ের মধ্যে ফিটফাট হয়ে গেছে । এমন কি, টেবিলে ফ্লাওয়ার ভাসে টাটকা ফুলও হাজির ।

বদুবাবু চেয়ারে বসে বললেন, কী হয়েছিল বলুন তো !

স্ট্রোক মতো ।

এখন কেমন আছেন ?

এখন ভালই ।

চেহারা কিছু খারাপ দেখাচ্ছে না ।

শ্রীনাথ একটু হেঁ হেঁ করল ।

বদুবাবুর হাতে হীরের আংটি, মুক্তোর আংটি, পান্নার আংটি । গলায় সোনার চেনে গৃহবিগ্রহের লকেট । মদু একটু সুবাস ছড়াচ্ছে গা থেকে । শ্রীনাথ বিগলিত হৃদয়ে অবাক চোখে কেবল দেখল আর দেখল । স্বয়ং বদুবাবু তার বাড়িতে ! বিশ্বাস হওয়ার কথা ?

বদুবাবু বলে, শরীর যখন তেমন কিছু খারাপ নয় তখন কাল থেকে প্রেসে আসতে থাকুন না কেন ! কাজটাজ তেমন কিছু করতে হবে না । সুপারভাইজ করবেন একটু ।

ঘাড় চুলকে শ্রীনাথ বলে, শরীরের জন্য নয় । মনটাই কেমন হয়ে গেছে । দূরে যেতে ভয় ভয় করে ।

বদুবাবু উদাস মুখে বলে, ভয় তো আমারও । বাবা মরে যাওয়ার পর থেকেই কেমন একটা মরণের ভয় এসে ধরেছে । কেবল ভয় পাই, এই বুঝি কে কোথায় মরে গেল, আর বুঝি তার সঙ্গে ইহজন্মে পরজন্মে আর দেখা হল না । মনটা খুব দুর্বল হয়ে আছে সেই থেকে । গত দুদিন কেবল আপনার কথাই মনে হচ্ছে, শ্রীনাথবাবু বেঁচে আছেন তো ! তাই আজ ছুটে এসেছি ।

দেখি একটু ভেবে ।

ভাববার কিছু নেই। আপনার এখনো পঞ্চাশ পেরোয়নি, বুড়োও হননি। এই বয়সে অত ঘাবড়াবার কী আছে? চলে আসুন, বাদবাকি যে ক’দিন বাঁচি সবাই মিলেমিশে থাকি।

শ্রীনাথ একথায় একটা দীর্ঘশ্বাস ফেলল।

তৃষা খবর পেয়ে ভিতর বাড়ি থেকে প্রচুর খাবার আর চা পাঠিয়েছে। বদুবাবু বসে বসে অনেকটা খেল। চায়ে চুমুক দিয়ে বলল, এ জায়গাটা বেশ ভাল।

বদুবাবু উঠল। শ্রীনাথ গাড়িতে তুলে দিয়ে এল তাকে। তারপর ঘরে এসে ভাবতে বসল। এখান থেকে কলকাতা আগে হাতের নাগালে মনে হত। আজকাল মনে হয়, কলকাতা বুঝি সাত সমুদ্রের পার। কি করে অতদূরে রোজ যাবে শ্রীনাথ?

বউদিমণি নোটশ দিয়েছে, এ বাড়িতে আর থাকা চলবে না। নিতাই বাজারের দিকে বস্তিতে সস্তায় একখানা ঘর পেয়ে গেছে। ত্বর নিজের এলেমে নয়। বউ পাঁচ বাড়ি ঠিকে থিয়ের কাজ করবে। তার রোজগারেই এই ঘর নেওয়া।

আজ নিতাই সকালে উঠেই ধোপড়াটা ভাঙছিল। একটু আগে তার তল্লিতল্লা মাথায় করে বউ বস্তিতে রওনা হয়ে গেছে। ফাঁকা নড়বড়ে ঘরখানা ভাঙতে তেমন কষ্ট নেই। তবে চালের ওপর একটা সতেজ লাউডগা। সেটার জন্যই যা কষ্ট। কুসি কুসি লাউ ফলেছে মেলা।

বাঁশের ঝুটিগুলোর গোড়া নড়বড়ে, বেড়ার বাঁধন পচে গেছে কবে। চালে খড় পড়ে গোবর। পোকামাকড় বিস্তর বাসা করেছিল। নিতাইয়ের সঙ্গে সেগুলোরও আশ্রয় গেল।

লাউডগা সমেত চালের খড়গুলো নামিয়ে নিতাই ঘাম মোছে। গাছটা যদি বাঁচে এই আশায় বাঁশ-বাখারি দিয়ে চটপট একটা মাচান খাড়া করতে লেগে যায় সে। মংলু এসে তাড়া দেয়, হল তোর? একটু বাদেই ঝুঁইমালী এসে এ জায়গা চৌরস করবে। হাত চালা।

দাঁড়া তো। মাচানটা বেঁধে দিই আগে।

তোর ঐ লাউগাছ থাকবে ভেবেছিস? মালী এসে একটানে উপড়ে ফেলে দেবে। খামোখা খাটছিস।

কথাটা সত্যিই। নিতাই দম ধরতে একটু জিরোয়। বলে বিড়িটিড়ি কিছু আছে? দে না।

তা দেয় মংলু। লোকটা চলে যাচ্ছে। বিড়ি ধরিয়ে দিয়ে বলে, বিয়ে করলি বলে জায়গাটা গেল তোর। দিবি্য ছিলি।

ভৈরবী ছাড়া সাধনভজন হয় শুনেছিস?

মংলু সঠিক বিশ্বাস করে না নিতাইকে। আবার পুরোপুরি অবিশ্বাস করতেও ভয় পায়। ব্যাটার বাণে কাজ হয় না ঠিকই। আবার যদি এক-আধটা লেগে যায়। তাই সে নিতাইয়ের মুখের ওপর তেমন ঠাট্টাইয়ার্কি করে না। তারও বালবাচ্চা আছে। মংলু বলে, সামস্তর বেটি আবার ভৈরবী হল কবে থেকে?

ভৈরবী কি পেট থেকে পড়ে রে ব্যাটা? বানিয়ে নিতে হয়।

কবে আর বানাবি বাপ? নিজেই জটা কেটে দাড়ি কমিয়ে ভদ্রলোক বনে গেলি।

নিতাই বিড়িতে লম্বা টান মারে। নিম্নলিত চোখে লাউগাছটার দিকে চেয়ে থাকে অনেকক্ষণ। বলে, পটাশপুরে এক মহাস্ত্র এসেছে। কপাল থেকে জ্যোতি বেরোয়। সেই জ্যোতিতে হোমের আগুন জ্বালে। বিদ্যোটা শিখে আসতে হবে।

তোরও তো অনেক বিদ্যে শুনি।

দূর ! এখনো কত শেখার আছে । বলে একটা দীর্ঘশ্বাস ছেড়ে বলে, বউদিমণি তাহলে এখানে ক্ষেত করবে !

তাই তো বলল ঝুইমালীকে ।

ক্ষেত জ্বলে যাবে ।

মংলু অবাক হয়ে বলে, কি করে জানলি ?

এখানে পঞ্চমুণ্ডির আসন ছিল রে ব্যাটা । বহুত ইলেকট্রিসিটি জমে আছে এখানে । গাছ কি বাঁচে ।

তবে লাউগাছটা বাঁচল কি করে ?

সে আমি ছিলাম বলে । আমি না থাকলে ভুতেরা তিনথা নাচন নাচতে লাগবে । দেখিস, বলে দিলাম ।

মংলু একটু হাসে । অনিশ্চয়তার হাসি ।

নিতাই বিড়িটা শেষ করে অন্যদিকে চেয়ে বলে, বাবু জানে ?

তা কে বলবে ?

বাবু জানতে পারলে রাগ করবে । আমাকে বাবু বড় ভাল চোখে দেখে ।

মংলু উদাস মুখে বলে, বাবু রাগ করলেই বা কি ? মা যখন বলেছে তখন সেইটেই হাকিমের আইন ।

বউদিদির বিয়েটা পর্যন্ত থাকতে পারলে বেশ হত । বউদিমণি বলেছিল আমাকে ফাইফরমাস খাটতে এলাহাবাদ নিয়ে যাবে । ভেবেছিলাম, এলাহাবাদ থেকে হিমালয়টা কাছে হয়, একবার ঘুরে আসবো । অঘোরীবাবার চরণ দুখানাও দর্শন হয়ে যাবে ।

অঘোরীবাবা কে রে ?

নাম শুনিসনি ? তিন হাজার বছর এক ঠাঁই বসে সাধনা করে যাচ্ছে । গায়ে পট পট করছে পোকা । জটা মাইলখানেক লম্বা ।

বলিস কি ?

শুধু কি তাই ! সাপের মতো খোলস ছাড়েন একশো বছর পর পর । হিমালয়ে অঘোরীবাবার ঠিকানাটা আমাকে এক সাধু লিখে দিয়ে গিয়েছিল ।

মংলু সাধনা দিয়ে বলে, তা যাবি এলাহাবাদ, তাতে কি ?

মুখখানা বেজার করে নিতাই বলে, আর তো যেতে বলছে না ।

বলবে, বিয়ের দেরী আছে । সেই ফান্সুনে ।

ফান্সুনের আর দেরী কি ?

এলাহাবাদটা কোন্‌দিকে বল তো !

হিমালয়ের গোড়ায় । সেখানকার জলহাওয়া খুব ভাল শুনেছি । মেলা সাধু আসে ।

মংলু ওঠে । বলে, ঘর ভাঙা হয়ে গেলে ডাকিস । বাঁশবাখারিগুলো বাগানের উত্তর দিকে চলার নিচে জমা করে যাস ।

তোকে ভাবতে হবে না । যা ।

লাউডগাটা ঝুইমালী এসে উপড়ে ফেলবে । তবু নিতাই সেটাকে ফেলে যেতে পারছে না । আবার উঠে মাচানটা বাঁধতে লেগে যায় । মালীটা মহা খোঁচড় লোক । কিছু বলতে গেলেই ঝেঁকিয়ে ওঠে । লাউডগাটার কথা তাকে সাহস করে বলবে কি-না ভেবে পায় না নিতাই । বিড়ির একটু তামাক জিভ দিয়ে থুং করে ফেলে নিতাই আপনমনে বলে, দূর ক্যাপা ! দুনিয়াটাই তো ভোর নিজের । এ জায়গা ও জায়গা বাহিন্স কেন ? সব সমান ।

বাজারের বস্তিও যা, চাটুজ্জবাড়ির বাগানও তা ।

ঝোপড়া ভেঙে জিনিসপত্র চালার নিচে সরিয়ে রেখে নিতাই মস্ত বকুল গাছটার তলায় বসে জিরোচ্ছিল । হঠাৎ মনে হল, যাওয়ার কথাটা বাবুকে জানানো দরকার ।

যেই ভাবা সেই গিয়ে ভাবন-ঘরে উঁকি মারে নিতাই ।

ইজিচেয়ারে বসে ইংরিজি একটা খবরের কাগজ কোলে নিয়ে পেনসিল দিয়ে কী যেন কাটাকুটি করছে বাবু । খবরের কাগজের পিছনে একটা সুন্দরমতো মেয়েছেলের ছবি । বাবু !

উঁ ! শ্রীনাথ কাগজ নামিয়ে বলে, নিতাই নাকি ?

আজ্ঞে । একটা কথা বলতে এলাম ।

আমিও তোর কথাই ভাবছি । ভিতরে আয় ।

নিতাই ভিতরে ঢুকে মেঝের ওপর বসে ।

আমার তো ঝাটিপাটি ওঠাতে হল এখন থেকে ।

কথাটা না বুঝে শ্রীনাথ বলে, কি বলছিস ?

আজ্ঞে চলে যেতে হচ্ছে ।

কোথায় ?

বস্তিতে ঘর নিয়েছি ।

সে কি ! আমার যে তোকে ভীষণ দরকার । কাল থেকে প্রেসের চাকরিতে যাবো । তুই রোজ আমার সঙ্গে গিয়ে সারাদিন থাকবি, আবার আমার সঙ্গেই ফিরে আসবি ।

ঠিক এই সময়ে লাউগাছটার কথা মনে পড়ায় বড় হু-হু করে উঠল বুক । নিতাই ভ্যাক করে কঁদে ফেলে ।

কান্দছিস কেন ?

বউদিমণি তাড়িয়ে দিলেন যে !

তাড়ায় কেন ?

বিয়ে করেছে বলে ।

বিয়ে করেছে ? কই, বলিসনি তো !

আজ্ঞে লুকিয়ে-চুরিয়ে করেছে । বউদিমণির ভয়ে ।

শ্রীনাথ বহুকাল বাদে একটু সত্যিকারের হাসি হাসল, বিয়ে করে বেশ করেছে । আর একবারও তো করেছিলি । এবারকার বউটা কেমন ?

খুব ভাল । অমন মেয়ে হয় না ।

ভাল হলোই ভাল । কিন্তু বিয়ে করলি বলেই বউদি তাড়িয়ে দিচ্ছে, এ কেমন কথা ?

আজ্ঞে সবাই বলছে বুড়ো বয়সে কচি মেয়ের সর্বনাশ করেছে ।

বউটা খুব বাচ্চা নাকি ?

বাচ্চা নয়, ডাঁটো মেয়ে ।

তোর বয়স কত ?

কত আর হবে ! ঠিক বুঝতে পারছি না ।

সে যাই হোক, কাল থেকে আমার সঙ্গে রোজ কলকাতায় টানা মারতে হবে, কথাটা মনে রাখিস । বরং আজই গিয়ে স্টেশন থেকে একটা মাল্লি করে আয় । টাকা দিচ্ছি ।

সে যাব । কিন্তু বউদিকে কথাটা একটু বলে রাখবেন বাবু । নইলে যা চটে আছে আমার ওপর !

তাকে বস্তিতে যেতে হবে না । ঝোপড়াতেই থাক । আমি তোর বউদিকে বলে দিচ্ছি ।
 ঝোপড়া ভাঙা হয়ে গেছে । মালী সেখানে চাষ দেবে ।
 শ্রীনাথ অবাক হল । বলল, তুই না দাদার আমলের লোক ।
 আজে । এই বাড়ি ঘর সব আমার চোখের ওপর হয়েছে ।
 শ্রীনাথ একটু চিন্তিত হয় । একটু ভেবে বলে, ঝোপড়া ভেঙেছিস তো কি আছে ।
 ভাবন-ঘরের পিছনদিকে ছাড়া জমি আছে । চালাঘরে বিস্তর টিন আর খুঁটি আছে । একটা
 ঘর বেঁধে নিগে যা ।

কিন্তু বউদি ?

বউদিকে আমি বলছি ।

তুষার কথা কোনোদিন ওঁটায় না । যা বলে তাই হয় । কিন্তু আজ যখন গিয়ে শ্রীনাথ
 তাকে বলল, স্ক্যাপা নিতাইটাকে আমার বড় দরকার । কাল থেকে রোজ আমার সঙ্গে
 কলকাতায় যাবে । তখন তুষা না করল না ।

রঘু স্যাকরা বসেছিল তুষার ঘরে । তাকে বিয়ের গয়নার বরাত দিচ্ছিল তুষা । শ্রীনাথের
 কথা মন দিয়ে শুনে বলল, ঠিক আছে, ওকে নতুন করে ঘর তুলে নিতে বলো গে ।

॥ একঘটি ॥

কোনো মহিলা যদি অর্থনৈতিক স্বাধীনতা চায় তবে তাতে বাধা দেওয়ার কী আছে ?
 বোস সাহেব খুব ক্লান্ত চোখে চেয়ে জিজ্ঞেস করে ।

দীপনাথ মাথা নেড়ে বলে, মিসেস বোসকে আপনিও চেনেন, আমিও খানিকটা চিনি ।
 প্রপার গাইডেনস্ না থাকলে উনি সব টাকা-পয়সা নষ্ট করে ফেলবেন । ব্যবসা বা দোকান
 চালানোর জন্য যে মন দরকার তা ওঁর নেই ।

গাইডেনস্ ও নেবে না ।

আমাকে উনি পার্টনার করতে চেয়েছিলেন ।

কিন্তু এখন ও আপনার নামটাও সহ্য করতে পারছে না ।

কেন বলুন তো !

ও জানে ওর চারশো টাকা অ্যালাউনস্ আপনিই ঠিক করে দিয়েছেন এবং ও যাতে সব
 টাকা ওড়াতে না পারে তার জন্য আপনিই নানারকম প্রিকশন নেওয়ার অ্যাডভাইস আমাকে
 দিয়েছেন ।

কথাগুলো ওঁকে বলে ভাল করেননি ।

বোস ক্লান্ত স্বরে বলে, আই অ্যাম টায়ার্ড অফ হার । আর কত অভিনয় করা যায় বলুন
 তো !

অভিনয় না করতে চাইলে কোর্টে যেতে হয় । সেটাও কি ভাল ?

আমি এখন কোর্টে যেতে রাজি ।

গেলে আপনি সহজেই ডিভোর্স পেয়ে যাবেন । কারণ মিসেস বোস মামলা লড়বেন না ।
 কিন্তু তারপরে ওঁর অবস্থাটা কী দাঁড়াবে ভেবেছেন ? ওঁর বাপের বাড়ির অবস্থাটা ভাল নয়,
 আত্মসম্মানবোধ বেশী বলে উনি নিজের সেখানে যাবেন না । যতদূর খোঁজ রাখি ওঁকে
 আশ্রয় দেওয়ার মতো কেউ নেই । চাকরি যে চট করে পাবেন তারও নিশ্চয়তা নেই ।

সেইজন্যই ওর দোকানের স্কীমটা আমি সাপোর্ট করছি ।

দীপনাথ জ্ঞান হেসে বলে, উনি তিন মাসও দোকান চালাতে পারবেন না।

আচমকাই বোস সাহেব বলে, লেট হার ম্যারি এগেন। আবার বিয়ে করুক। সেই স্কাউন্ডেলটাকেই করুক, কী নাম যেন, স্নিগ্ধদেব না কি।

দীপনাথ থমথমে মুখে বলে, স্নিগ্ধদেব ম্যারেড ম্যান। তাছাড়া একটা বেশ বড়সড় স্কলারশীপ নিয়ে উনি এখন অ্যামেরিকায়।

আমি তো এতসব জানিও না।

আমি জানি। স্নিগ্ধদেব বোধহয় এসব সমস্যায় জড়াতে চাইতো না। বিয়ের কথা বলছেন। এদেশে এখনো ডিভোর্সি মেয়েদের অত সহজে বিয়ে হয় না।

ফাইন্ড এ ওয়ে, চ্যাটার্জি। আই ডোন্ট ওয়াশ্ট টু ডিচ হার। কিন্তু ওকে আটকে রাখা মানে আমার নিজেরও আটকে থাকা। ইউ নো মাই প্রবলেমস্।

দীপনাথ স্থির চোখে বোস সাহেবকে দেখছিল। উত্তর বাংলা থেকে ফিরে আসার কিছু পর থেকেই সে বোস সাহেবকে অত্যন্ত ক্লান্ত ও অধৈর্য দেখছে।

দীপনাথ মৃদুস্বরে বলে, আচ্ছা, আমি ভেবে দেখছি। দু-একদিন সময় দিন।

বোস সাহেব জবাব দিল না।

দীপনাথ বোসের ঘর থেকে বেরিয়ে নিজের টেবিলে ফিরে এল। অন্য তিনজন অ্যাসিস্ট্যান্ট ম্যানেজারের জন্য আলাদা তিনটে প্রাইভেটের খুপরি তৈরি হয়েছে। শুধু দীপনাথই খুপরিতে যেতে রাজি হয়নি। তাই সে এখনো মস্ত হলঘরটার একপাশে খোলামেলা জায়গায় বসে।

টেবিলের কোণটার দিকে ভ্রুকুটি করে কিছুক্ষণ চেয়ে থাকে দীপনাথ। উত্তর বাংলা থেকে ফিরে এসে বার দুই মণিদীপার সঙ্গে টেলিফোনে কথা বলার চেষ্টা করেছে। মণিদীপা কথা বলেইনি। ক্রুদ্ধ অপমানকর গলায় বলেছে, 'আই হেট টু টক উইথ ইউ।' অথচ মণিদীপার সঙ্গে এখন কথা বলার দরকার। বোকা মেয়েটা জানেও না, বা জানলেও বোঝে না যে, তার বিপদ ঘনিয়ে আসছে। দীপনাথ বাইরে থেকে কতদিন বালির বাঁধ দিয়ে রাখবে?

একটা দীর্ঘশ্বাস ফেলে দীপনাথ কাজে মন দেয়। কিন্তু আবার আনমনা হয়ে যায়। নিজের ভেতরকার এক পাপবোধ তাকে বড় অস্থির কবছে, ঝুঁকড়ে দিচ্ছে, কাজে মন দিতে দিচ্ছে না। মণিদীপাকে কি সে-ই নষ্ট করেনি? স্নিগ্ধদেব হয়তো মণিদীপার নেতা ছিল, প্রেমিক ছিল না কিছুতেই। কিন্তু দীপনাথ জানে, মণিদীপাকে যদি সত্যিকারের বিভ্রান্ত কেউ করে থাকে তবে সেই ব্যক্তি সে নিজেই। এখন সে মণিদীপার সঙ্গে সম্পর্ক ছিন্ন করলেও লাভ নেই। তাতে ভাঙা সংসার জোড়া লাগবে না। দীপনাথ নিজেও দুর্বল। বড় দুর্বল। মণিদীপার কথা সে খুব কম সময়েই না ভাবে! এখনো এক তীর অজুত আনন্দ রয়েছে মণিদীপাকে মনে করার মধ্যে।

থাকতে না পেরে দীপনাথ বোস সাহেবের বাড়িতে রিং করল। বাবুটি ফোন ধরে জানাল, মেমসাহেব বাড়ি নেই। লাক্ষণও ফিরবে না বলে গেছে।

একা বেরিয়েছে?

না, একজন দালাল এসেছিল।

দালাল কিসের?

মনে হয় বাড়ির দালাল। মেমসাহেব একটা দোকানঘর খুঁজছে।

দীপনাথ ফোন রেখে দেয়।

বিকেল পর্যন্ত অনেক ফোন এল। অনেক কাজ করল দীপনাথ। কিন্তু মন কান সবই উৎকর্ষ রয়েছে অন্য দিকে।

বেলা চারটে নাগাদ ফোন বাজতেই তুলে মেয়েলী গলায় 'হেলো' শুনে সে প্রায় চুটিয়ে বলল, মণিদীপা ?

মণিদীপা ? মণিদীপা আবার কে বলো তো সেজদা !

ওঃ, তুই বিলু ? কবে ফিরলি ?

আজই।

শ্রীতম কেমন আছে ?

ভালই তো। নিজের আপনজনদের কাছে ভাল থাকারই তো কথা।

ওভাবে বলছিস কেন ? কিছু হয়েছে ?

এসো, সব বলব।

আজ আসার সময় হবে না রে।

না হয় কাল অফিসের পর এসো। আসবে ?

চেষ্টা করব।

মণিদীপাটা কে বলো তো !

ওঃ, বসের বউ। টেলিফোন করার কথা ছিল, তাই হঠাৎ মেয়েলী গলা শুনে ভাবলাম সে-ই।

তোমাকে আর তোমার বসের বউকে নিয়ে কিন্তু অনেক কথা রটেছে। জানো ?

দীপনাথ ভীষণ চমকে গিয়ে বলে, সে কি ?

এমন কি আমি শিলিগুড়িতেও শুনে এসেছি।

কে বলল ?

এলে বলব। ফোনে কি সব বলা উচিত ?

কোথা থেকে কথা বলছিস ?

মাদ্রাজীদের ফ্ল্যাট থেকে। ছাড়ছি। কাল এসো।

বাকি সময়টা দীপনাথ গাড়লের মতো হতবুদ্ধি মুখে বসে রইল চেয়ারে। কিছুই করতে পারল না।

এক সময়ে উঠে অফিস থেকে বেরিয়ে পড়ল রাস্তায়। চারদিকে রথযাত্রার ভীড়। গায়ে গায়ে লোক। বাস ট্রাম ট্যাক্সিতে বাদুড়খোলা মানুষ। দীপনাথ পথে পথে অনেকক্ষণ হাঁটল। হাঁটতে হাঁটতে রেসকোর্স পেরিয়ে এল। ডাইনে, কখনো বাঁয়ে মোড় নিয়ে এ-রাস্তা ও-রাস্তা ধরে অবিরাম হেঁটে সে যখন নিউ আলিপুরে বোস সাহেবের ফ্ল্যাটের সামনে পৌঁছোলো তখন তার ভীষণ ক্লান্ত হয়ে পড়ার কথা। কিন্তু মানসিক বিকলতায় সে দেহের ক্লান্তি টের পাচ্ছিল না।

সন্দের গাঢ় অন্ধকার নেমে গেছে। শীতশেষের ঠাণ্ডার অস্তিম কামড় এবার বেশ তীব্র। দীপনাথ অবশ্য মাইল মাইল হেঁটে ঘেমে গেছে। আকর্ষ জলভেটা পেয়েছে তার। তবে ক্ষুধাবোধ নেই। লোকে তার আর মণিদীপার কথা বলাবলি করে। সত্যিই করে। নইলে বিলু জানল কি করে ? লজ্জা ! লজ্জা !

কলিং বেল টিপতে হল না। দরজা খোলা ছিল। আর খোলা দরজা দিয়ে ঢুকতেই দেখা গেল, বাইরের সাজ পরা মণিদীপা বসার ঘরে কিছু কাগজপত্র আর একটা ডটপেন নিয়ে কিছু করছে। টেবিলে এককাপ কফি।

এবার বেশ কিছুদিন পর মণিদীপার সঙ্গে দেখা হল দীপনাথের। অনেক রোগা হয়ে গেছে মেয়েটা। চোখে-মুখে কিছু রুক্ষতা। সাজগোজে বেশ একটু অমনোযোগ।

দীপনাথকে দেখে নিঃশব্দে তাকিয়ে রইল একটুক্ষণ। তারপর বলল, এত যেমেছেন কেন ?

আপনার সঙ্গে আমার কথা আছে।

কথা ! বলে চোঁট ওঠায় মণিদীপা, কথা তো অনেক হল। কথায় কিছু হয় না।

দীপনাথ একটা কুঁক্সি স্বাস ফেলে বলে, জরুরী কথা আছে। এটা ইয়ার্কি নয়।

মণিদীপা এই ধমকটা আশা করেনি। তার স্বাভাবিক সতেজ অহংকারী ভাবটা সম্প্রতি নানা ঘটনায় বড় বেশী মার খেয়েছে। এসেছে ভয়, জীবনের অনিশ্চয়তা, ডাঙা জমির অভাববোধ।

মণিদীপা দীপনাথের সামনে একটু বিবর্ণ হল, একটু কঁকড়ে গেল। এতই চোখে পড়ার মতো ব্যাপার যে, উদ্ভ্রান্ত দীপনাথেরও চোখ এড়াল না।

মণিদীপা হঠাৎ উঠে সিলিং পাখাটা আন্তে চালিয়ে দিয়ে এসে বলল, বসুন। কফি বলে আসি।

তার আগে কথাটা।

কথাটা তার পরে। আপনি বসুন।

দীপনাথ বসে চোখ বুজল। সিলিং পাখার হাওয়াটা এত মিষ্টি লাগল যে বলার নয়। মণিদীপার গায়ের সুগন্ধ বাতাসটাকে ভারী ঘন করে রেখেছে।

চোখ বুজে বেশ কিছুক্ষণ শূন্য মাথায় বসে থাকার পর মণিদীপা ফিরে এল। বাবুটি নয়, নিজেই ট্রেতে কফি আর গোটা দুই চকোলেট কেব-এর টুকরো নিয়ে এসেছে।

দীপনাথ তাকিয়ে দেখল। তারপর হাত বাড়িয়ে কফির কাপটা তুলে নিয়ে বলল, টেলিফোনে আপনি আমার সঙ্গে কথা বলতে চাননি কেন বলুন তো !

মণিদীপা জবাব দিল না। চুপ করে ফুলদানি থেকে ফুল তুলে তুলে আবার সাজাতো লাগল, দীপনাথের দিকে পিছন ফিরে।

কথা বলবেন না !

মৃদু শাস্ত স্বরে মণিদীপা বলে, কথা চের হয়েছে। আর আমার কথা ভাল লাগে না।

কথা ছাড়া কমিউনিকেট করার আর কী উপায় বলুন !

মণিদীপা মরালীর মতো শরীর বাঁকিয়ে একবার তাকায়। তারপর বলে, লাভ হ্যাজ ইটস ওন ল্যাংগুয়েজ।

দীপনাথ মূক হয়ে থাকে। অনেকক্ষণ বাদে বলে, আপনি কী চান একটু খুলে বলবেন ?

একটা দোকান। খুব সুন্দর জায়গায়, ভদ্র পরিবেশে চালু একটা দোকান। আপাতত আর কিছু নয়।

আপনার মাথায় দোকানটা কে ঢোকাল বলুন তো !

দ্যাট ইজ নান অফ ইওর বিজনেস।

দীপনাথ নীরবে আঘাতটা সহ্য করে শাস্ত স্বরেই বলে, দোকান যদি একান্তই দিতে হয় তবে আমার অ্যাগ্রুভ্যাল ছাড়া তা হওয়ার নয়। আপনি তো তা জানেন।

জানি। তাই আমি বোস সাহেবের কাছ থেকে কিছুই আর প্রত্যাশা করি না। আই অ্যাম অ্যারেনজিং এ ক্যাপিট্যাল ফ্রম এলস্‌হোয়ার।

আপনি ভুল করেছেন মণিদীপা। ব্যবসা আপনার ধাতে নেই।

দ্যাট ইজ অলসো নান অব ইওর হেডেক । বোস সাহেব যে ছুকরিটির সঙ্গে ঘোরাফেরা করছেন এখন থেকে আপনি তাকেই অ্যাডভাইজ দিতে শুরু করুন না !

দীপনাথের সংশয়টা ছিলই । খুব অবাক হল না । বলল, ছুকরিটি আবার কে ? ন্যাকামি করবেন না দীপনাথবাবু । ইউ নো ।

বোস সাহেব কোথায় ?

এ সময়ে বাড়ি থাকেন না । এই বয়সে টিন-এজারকে হাত করতে হলে একটু বেশী লেবার দিতে হয় । হি ইজ ডুয়িং একজ্যাকটলি দ্যাট । আপনি তো সবই জানেন ! উনি হয়তো এটাও আপনার পরামর্শই করছেন ।

দিগবিদিকজ্ঞানশূন্য দীপনাথ হঠাৎ উঠে মগিদীপার কাছে এসে এক ঝটকার তার কাঁধ ফিরিয়ে মুখোমুখি দাঁড় করাল । বলল, আমি কিছু জানি না । এখন আমার প্রশ্নের ঠিক ঠিক জবাব দিন ।

॥ বাষট্টি ॥

মগিদীপা অনেক পুরুষকে পার হয়ে এসেছে জীবনে । সে জানে, পুরুষমানুষের এই হঠাৎ রাগ থেকেই আসে আশ্লেষ । দীপনাথ তাকে এই থরো থরো রাগের চূড়ায় যে হঠাৎ জড়িয়ে ধরে ভেঙে পড়তে পারে অনুরাগে, চুমু খেতে পারে, এমনতরো ঘটনার জন্য সে প্রস্তুত ছিল ।

কিন্তু দীপনাথ পিছিয়ে গেল । ক্লান্ত স্বরে বলল, চারদিকে বদনাম রটে গেছে মিসেস বোস ।

কিসের বদনাম ?

আপনাকে আর আমাকে নিয়ে । আমার ছোটো বোন পর্যন্ত জানে ।

অবাক হয়ে মগিদীপা বলে, এই জন্য আপনি এত ডিসটার্ভড আজ ?

ভীষণ ডিসটার্ভড ।

বদনাম রটলে ক্ষতি তো মেয়েদের । আপনারা পুরুষমানুষ, আপনাদের বদনামটাই ফেম ।

দীপনাথ মাথা নাড়ে, না । আপনি কবে বুঝবেন, নিজের জন্য আমি ততটা চিন্তিত নই, যতটা আপনার জন্য ।

মগিদীপা আবার একটু অবাক হয় । তবে একটা দীর্ঘশ্বাস ছেড়ে বলে, বদনামকে আমি তো ভয় পাই না । আমার নামে এ পর্যন্ত বহু বদনাম রটেছে । আপনি আমার জন্য অনর্থক ভাবছেন ।

অনর্থক । তাই হবে । বলে দীপনাথ সোফায় বসে অনেকক্ষণ মাথা নীচু করে নিজের আঙুলগুলো দেখে । তারপর এক সময়ে বিবর্ণ বিভ্রান্ত মুখখানা তুলে বলে, আমার মাথার ঠিক ছিল না । আপনার সঙ্গে একটু রাফ ব্যবহার করে ফেলেছি ।

মগিদীপা যেখানে দাঁড়িয়ে ছিল সেখান থেকেই একদৃষ্টে দেখছিল দীপনাথকে । চোখের দৃষ্টি কোমল, স্বপ্নাচ্ছন্ন । কথাটা শুনে মৃদু একটু হাসল । বলল, রাফ ব্যবহার ? একটুও নয় । আমি পুরুষদের সত্যিকারের রাফনেস দেখেছি । আপনি রাফ নন । তবে টাফ । ভেরী টাফ আর হেডস্ট্রং ।

কফি ঠাণ্ডা হচ্ছিল । কয়েকটি ব্যগ্র চুমুকে কাপ শেষ করে দীপনাথ উঠল, আজ চলি ।

হঠাৎ কেন উদয় হয়েছিলেন, বললেন না তো !

আপনার সঙ্গে একটা শো-ডাউনের জন্য । অনেক দিন ধরে আপনি আমার সঙ্গে খারাপ ব্যবহার করে যাচ্ছেন ।

শো-ডাউন কি হয়ে গেল ?

জ্ঞান হেসে দীপনাথ বলে, হল আর কই ? আপনার সামনে এলেই আমার সব গুলিয়ে যায় ।

আমার বদনাম নিয়ে আপনি খুব চিন্তিত, কিন্তু একবারও বোস সাহেবের বদনাম নিয়ে ভাবছেন না তো !

দীপনাথ হেসে বলে, এই যে বললেন পুরুষমানুষের বদনাম মানেই ফেম ।

তা ঠিক । তবু আজ এ ওয়েল-উইশার আপনার আর একটু ইন্টারেস্টেড হওয়া উচিত ।

আজকাল শুনি বোস সাহেব আপনাকে জিজ্ঞেস না করে কোনো ডিসিশন নেন না ।

অতটা সত্যি নয় । তবে কোনো কোনো ব্যাপারে উনি আমার অ্যাডভাইস নেন ।

শুনেছি আমার মাসোহারা কত হওয়া উচিত তাও আপনিই ঠিক করে দিয়েছেন ।

দীপনাথ অস্বস্তি বোধ করে বলে, আমাকে বোস সাহেব জিজ্ঞেস করেছিলেন । আমি যা ভাল বুঝেছিলাম তাই বলেছি । আপনি কি তার জন্য রেগে আছেন ?

আমি মাঝে মাঝে খামোখাই রেগে যাই । সে আমার স্বভাব । কিন্তু চারশো টাকা যে অনেক টাকা তাও আমি জানি ।

আপনি বাগ করেছেন ।

আমার রাগে আপনাব কি আসে যায় ! আপনি আমাব কে ? আমি শুধু ভাবছি বোস সাহেব কি করে এ কথাটা মেনে নিল । চারশো টাকার প্রশ্ন নয়, আমার হাত থেকে সব অর্থনৈতিক অধিকার কেড়ে নেওয়ার ডিসিশনটা ও মেনে নিল কি করে ?

দীপনাথ মুখ তুলল না । কিন্তু শাস্ত গলায় বলল, এই ডিসিশন না নিলে বোস সাহেব এতদিনে পথে দাঁড়াতে । অফিসে ওঁর লোন কত ছিল জানেন ?

ঠোঁট উটে মণিদীপা বলে, জানতে চাই না । আমি জানতে চাই, বোস সাহেব যে মেয়েটাকে নিয়ে মাখামাখি করছে সেও আপনার রিক্রুট কিনা ।

দীপনাথ এবার মুখ তোলে । মুখ সামান্য লাল । শ্বাস গাঁঢ় । চাপা গলায় সে বলে, আমাকে আপনি কি ভাবেন বলুন তো !

এ ম্যান উইদাউট ব্যাকবোন অ্যান্ড ভয়েড অব পারসোনালিটি ! আপনার মতো মানুষ বসকে সঙ্কট করতে সব পারে ।

দীপনাথ উঠে দাঁড়াল । কাঁধ ঝাঁকিয়ে বলল, ঠিক আছে । কোনোদিন আমার সম্পর্কে আপনার ধারণা যদি পাল্টায় তবে আবার দেখা হবে ।

মণিদীপা তাকিয়েই ছিল । স্থির গভীর দৃষ্টি । একটু হাসল । বলল, আপনি আমার অনেক ক্ষতি করেছেন । আমার এত ক্ষতি আর কেউ কখনো করেনি । কিন্তু মুশকিল হল, সেটা আপনি টের পাচ্ছেন না ।

দীপনাথ মণিদীপার দিকে চেয়ে বলে, সত্যিই জানি না । চারশো টাকা মাসোহারা বা অর্থনৈতিক অধিকারে হস্তক্ষেপকে যদি ক্ষতি করা বলেন তবে ক্ষতি করেছে । কিন্তু তাতে লাভ ছাড়া ক্ষতি হয়নি । গত কয়েক মাসে বোস সাহেবের কিছু টাকা জমে গেছে । গল্ফ ক্লাবে একটা জমি বায়না করেছেন । এ সব কি ক্ষতি ?

মণিদীপা চেয়েই ছিল । ধীর স্বরে বলে, না, এসব বোস সাহেবের দিক থেকে খুবই ভাল

খবর । নিজের বাড়িতে নতুন ছুকারি বউ নিয়ে থাকবে । কিন্তু তাতে মণিদীপার কি এসে যায় ?

দীপনাথ গভীর শ্বাস ফেলে বলে, বিশ্বাস করুন, আমি বোস সাহেবের প্রশ্নসমূহে কোনো ব্যাপার আছে বলে জানি না ।

মণিদীপা শান্ত স্বরে বলে, বিশ্বাস করছি । আপনি হয়তো এখনো অত নীচে নামেননি । তবে জেনে রাখুন, বোস সাহেব গঙ্গাজলে ধোয়া তুলসীপাতা নন ।

আমি খোঁজ করব । ইফ ইট ইজ টু তা হলে আমি ঠাঁর সঙ্গে কথাও বলব ।

তাতেও মণিদীপার কিছু যায় আসে না । মণিদীপা তেমনি অকপটে চেয়ে থেকে বলে, তাতেও আমার ক্ষতিপূরণ হওয়ার নয় ।

আমি আপনার আর কি ক্ষতি করার ক্ষমতা রাখি ?

কি ক্ষতি তা জানেন না ?

এতক্ষণে মণিদীপার এই অস্বাভাবিক শান্ত স্বর, স্বপ্নাচ্ছন্ন দৃষ্টি আর একভাবে দাঁড়িয়ে থাকার একটা অর্থ ঝুঁজে পেয়ে কেঁপে উঠল দীপনাথ । বলল, না, জানি না ।

লোকে কি মিথ্যে বদনাম করে ?

দীপনাথ চুপ করে চেয়ে থাকে ।

বলুন, লোকে কি মিথ্যে মিথ্যেই কিছু রটায় ? মণিদীপা জিজ্ঞেস করে ।

দীপনাথ মুখ নামিয়ে দ্বিধাগ্রস্ত স্বরে বলে, আমি জ্ঞানত আপনার কোনো ক্ষতি করিনি ।

মণিদীপা যে সুখে নেই তা কি জানেন ?

মাথা নাড়ে দীপ । জানে ।

কেন, তা জানেন না ?

মৃদু স্বরে দীপনাথ জিজ্ঞেস করে, আমি কি তার কারণ ?

হিংস্র অশ্রুট চাপা স্বরে ক্রোধ হতাশা অপমানকে মুক্তি দিয়ে মণিদীপা বলে ওঠে, আপনি ! শুধু আপনি ! আর কেউ নয় । আর কিছু নয় । দয়া করে আমার আর ভাল করতে হবে না আপনাকে । এবার যান ! যান !

এককমভাবে ভেঙে পড়ার মেয়ে মণিদীপা নয় । দীপনাথ একটু অবাক হয়ে তাকাল । মণিদীপা পেছন ফিরে আবার ফুলদানীতে ফুল সাজাচ্ছে । কাঁদছে কিনা তা পিছন থেকে বোঝা গেল না ।

প্রথম ধাক্কাটা কাটিয়ে নিয়েছে দীপনাথ । গাঢ় এক ভালবাসা বহুকাল যাবৎ তার বুক থেকে ঐ কিশোরীপ্রতিমা মেয়েটির দিকে বয়ে যাচ্ছে । এত লোভনীয় বহুকাল যাবৎ তার কাছে আর কেঁউ নয় । এই তো সময় । উঠে গিয়ে শুধু একবার স্পর্শ করে বলতে পারে যে, তোমাকে ভালবাসি মণিদীপা । তা হলেই ও বুকের মধ্যে ভেঙে পড়বে, আর কোনোদিকে চাইবে না, তার হয়ে যাবে চিরকালের মতো । বড় অসুখী মণিদীপা, বহুকাল এই পরের ঘরে বাস করছে ।

লোভ হল, বড় লোভ হল আজ । সমস্ত শরীর পিপাসায় উন্মুখ । পলকা ডিমসুতোর মতো একটু নীতিবোধের বাধা আছে বটে, সেটুকু ছিড়তে কষ্ট নেই ।

ঘর ভাঙবে দীপনাথ ? ভিতরে ভিতরে সেই সিরিওকমিক স্বরটা আবার বহুকাল বাদে শুনতে পেল সে ।

ঘরই কি সব ? ভালবাসা কিছু নয় ?

ভালবাসার মানে হল ভাল-তে বাস করা । বাস করতে ঘর চাই, দীপনাথ । পাকা ঘর ।

নইলে আবার কোন ভালবাসার ঘুম এসে তোমার ভিটেতেও চরবে। ওকে বরং এই ঘরে স্থিত হতে দাও। নিজের সুখ-অসুখ বুঝতে দাও। সওয়া নেই, বওয়া নেই, বিয়ে কি চাট্টিখানি কথা! কত সুখ-দুঃখ সয়ে, কত ঝড়ঝাপটা পেরিয়ে তবে স্বামী আর স্ত্রীর ভালবাসা হয়। ওদের সময় দাও আর একটু।

দিলাম।

দীপনাথ ওঠে।

মিসেস বোস!

মণিদীপা খুব আন্তে মুখ ফিরিয়ে তাকায়। বড় চোখ, অবাক দৃষ্টি।

আমি আজ আসি।

একটু হাসল মণিদীপা, অনেকক্ষণ ধরেই যাই-যাই করছেন। এত তাড়া কিসের?

আমিও সুখে নেই। বড় জ্বালা, এক জুয়ুগায় বেশীক্ষণ বসে থাকতে পারি না।

তাই বুঝি? আজ আমি কেবল ঝগড়া করলাম।

না। তা নয়। আপনার দুঃখ আমি বুঝি।

ধন্যবাদ। কিন্তু বেশী বুঝতে যাবেন না। তাতে বিপদ বাড়বে।

তার মানে?

বোস সাহেবকে ঘাটানোর দরকার নেই। ও আমাকে চায় না। আমি বরং চলেই যাবো।

আপনি শুধু কিছু টাকার ব্যবস্থা করে দিন ওকে বলে। আমার তো একটা ফুটিং চাই।

সেই দোকানের কথা এখনো মাথা থেকে যায়নি?

অন্য কোনো আইডিয়া আসছে না যে!

দোকান করাটা আমার পছন্দ নয় মিসেস বোস।

আচ্ছন্ন দৃষ্টিতে চেয়ে মণিদীপা মৃদু হেসে বলে, তবে কি পছন্দ?

ভেবে দেখি। বলব। কিন্তু যা বলব শুনবেন তো?

মণিদীপা মাথা নাড়ে, শুনব। আমাকে কেউ তো গাইডেন্স দেয়নি এতকাল। আমি ভারী একা হয়ে গেছি। এত একা সহ্য হয় না।

আমি আপনার ভাল চাই। ভীষণভাবে চাই।

মণিদীপা সত্যিকারের লজ্জায় মাথা নত করে বলে, জানি। খুব জানি।

আজ যাই।

আসুন। বলে একটু থেমে মণিদীপা আরো মৃদু স্বরে বলে, এবার ফোন করলে কথা বলব।

দীপনাথ বোস সাহেবকে এতটাই জানে যে, খুব বেশী খোঁজ খবর না করেই সে মেয়েটির পাত্তা লাগিয়ে ফেলতে পারল পর দিন।

বোসসাহেব বোকা নয়। সঙ্কের মুখে দীপনাথ হঠাৎ বিনা এত্তেলায় তার খুপড়িতে ঢুকলে দীপনাথের মুখের দিকে চেয়েই বোস সাহেব বুঝতে পারে, সামখিং রং।

বসুন চ্যাটার্জি।

দীপনাথ বসে এবং বিনা ভূমিকায় বলে, মছয়া আপনার কাজিন?

বোস স্তব্ধ ও স্থির হয়ে বসে থাকে। চোখ টেবিলে। বোস সাহেবের শরীরের যন্ত্রপাতি খুব ভাল নয়, দীপনাথ জানে। তাই ঐ স্তব্ধতায় একটু ভয় পেল সে। কিন্তু তবু নীরবতা ভাঙল না। ব্যক্তিত্বের লড়াইতে প্রথম রাউন্ডটা খুবই গুরুত্বপূর্ণ।

বোস সাহেব ঠিক এক মিনিট দশ সেকেন্ড বাঁদে বাঁ হাতের তর্জনীর ধার দিয়ে থুতনিটা

ঘষে নিয়ে নড়ে বসল। তারপর খসখসে ভাঙা গলায় বলে, দরজাটা লক করে দিয়ে আসুন।

দরকার নেই। অফিস ফাঁকা।

বোস মাথা নাড়ল। মুখটা ফ্যাকাসে, অসহায়, ভীতু কেমন এক ধরনের হয়ে গেছে। হাতে একটা কাগজচাপা নিয়ে নাড়তে নাড়তে তেমনি অদ্ভুত গলায় বলে, দীপা কতটা জানে ?

সামানাই। অন্তত মল্লয়ার কথা জানে না। শুধু জানে সামথিং ইজ কুকিং।

মল্লয়া আমার ডিসট্যান্ট কাজিন।

তা হোক বোস সাহেব। ইট ইজ এ রং চয়েস।

উই হ্যাভ অ্যান আন্ডারস্ট্যান্ডিং ফ্রম অলমোস্ট চাইল্ডহুড। কিন্তু পারিবারিক বাধ্যয়ম বিয়ে হতে পারেনি। ওর বাবা ছিল ভীষণ কনজারভেটিভ।

বাট ইট ইজ নাউ এ ডেড কেস।

বোস মাথা নাড়ে, না, রিলেশন না থাক, উই অলওয়েজ হ্যাভ দ্যাট ফিলিং ফর ইচ আদার।

বোস সাহেব ! দীপনাথের গলাটা ধমকের মতো শোনায়, ব্যাপারটা ইনএভিটেবল নয়, আমি জানি।

আমি তা বলিনি।

তবে ? আপনি অতীতকে খুঁড়ে বের করছেন।

দীপার সঙ্গে আমার রিলেশন তো আপনি জানেন। অথচ আই নীড সামওয়ান। যাকে বিশ্বাস করা যায়, যার ওপর নির্ভর করা যায়।

বোস সাহেব, আপনার এক ভাই এই অফিসে কাজ করে।

বোস অবাক হয়ে বলে, ও কিছু বলেছে ?

না। তবে ও শুনেছে। ওর মুখে ঘেম্মার ভাব দেখলেই তা বোঝা যায়।

বোস সাহেব পিছনে মাথা হেলিয়ে বলে, দীপা অলসো উইল হেট মি। চ্যাটার্জি, আই অ্যাম সরি। কিছু করার নেই !

দীপনাথ বিদায় নেওয়ার একটা নাটকীয় এবং জুতসই ক্ষণের জন্য অপেক্ষা করছিল। একটা সাইকোলজিক্যাল মোমেন্ট। এই কথার পরই তা পেয়ে গেল সে। আচমকা উঠে দরজা ঠেলে বেরিয়ে এল।

॥ তেবটি ॥

নিজের টেবিলে এসে অপেক্ষা করছিল দীপনাথ। একটু বাদেই বোস তার লম্বা মেদবহুল চেহারাটা নিয়ে ধীর পায়ে বেরিয়ে এল। মুখ ভীষণ ভাবালু, গম্ভীর। চোখে অনির্দিষ্ট দৃষ্টি।

বোস একটু ইতস্তত করে দীপনাথের টেবিলের কাছে আসে, চ্যাটার্জি, উঠবেন না ? এই যাবো।

চলুন।

কোথায় ?

চলুন, কোথাও যাওয়া যাক।

দীপনাথ মাথা নেড়ে বলে, আজ আমার ছোটো বোনের বাড়িতে যাওয়ার কথা ।
আজ ক্যানসেল করুন ।

দীপনাথ একটু দম ধরে থেকে বলে, মিস্টার বোস, আমি আপনাকে হেল্প করতে চাই, কিন্তু এখন দেখছি সব ব্যাপারেই আপনাকে হেল্প করা সম্ভব নয় । আই কান্ট হেল্প ইউ টু বি আনহ্যাপী ।

বোস একটু হাসে, ইংরিজীটা আপনি মাঝে মাঝে ভালই বলেন । কিন্তু এখন আপনার সঙ্গে আমার কিছু কথা আছে । বাসায় চলুন ।

খুব জরুরী কথা কি ?

খুব জরুরী ।

দীপনাথ একটা দীর্ঘশ্বাস ফেলে ফোনটা তুলে বিলুদের পাশের ফ্ল্যাটের নম্বর ডায়াল করল । বিলুকে ডাকিয়ে বলে দিল, আজ নয় । কাল যাচ্ছি ।

কত কথা জমে আছে তোমার সঙ্গে ।

আজ একটু কাজ পড়ে গেল রে ।

প্রীতম ঠিকই বলত, ভীষণ কাজেব লোক হয়েছো তুমি আজকাল । আমি যে তোমার জন্যই অফিস থেকে তাড়াতাড়ি ফিরে খাবার তৈরি করাতে বসেছি ।

একটু রাতের দিকে গেলে যেতে পারি । তবে ঠিক নেই ।

দূর । থাকগে আজ । কবে আসবে ?

কাল ।

ঠিক তো ?

ঠিক । কাল অফিস থেকে একবার ফোন করিস ।

বোস সাহেব নীচে গাড়ির কাছে অপেক্ষা করছে । সামনে ড্রাইভার গাড়ি স্টার্ট দিয়ে বসে আছে । দুজনে উঠল । গাড়ি নিউ আলিপুর রওনা হতেই বোস সাহেব বলে, আপনি আমার ওপর স্পাইং করছিলেন ?

ও কথা কেন ?

নইলে এত খবর আপনার জানার কথা নয় ।

খবর নেওয়াটা দোষের, না খবর হওয়াটা ?

বোস সাহেব মুদু হাসে । বুঝদারের মতো খুব সামান্য একটু মাথা নেড়ে বলে, আমি অবশ্য ব্যাপারটা গোপন রেখেছি, কিন্তু সেটা পাপবোধ থেকে নয় । ডিসেনসির জন্য । সময় হলেই মণিকে জানাতাম ।

আমি কিন্তু মিসেস বোসকে খবর দিইনি । উনি আগে থেকেই জানতেন ।

কতটা জানে ?

খুব বেশী নয় । জানে, একটা মেয়ের সঙ্গে মিশছেন ।

মেয়েদের সঙ্গে আমার মেলামেশায় তো বাধা নেই ।

কিন্তু এবার একটা উদ্দেশ্য নিয়ে বিশেষ একজনের সঙ্গে মিশছেন ।

সেটা দীপা জানতে পারে না । জানলে আমাকে বলত । ছেড়ে দিত না ।

ডিভোর্স হবেই ধরে নিয়ে উনি হয়তো ততটা কিছু করতে চাইছেন না ।

তা হলে হেডেকটা কার ? আপনার ?

আমার একটু হেডেক তো আছেই ।

বোস হাসল আবার । এবারকার হাসি দেখে বোঝা গেল, বোস নিজের ওপর নিয়ন্ত্রণ

ফিরে পেয়েছে। বলল, ষ্টেঞ্জ। তবু আমি আপনাকে কয়েকটা প্রশ্ন করব।

হাসি এবং গলার স্বরটা দীপনাথের খুব ভাল লাগল না।

বোস একটু চাপা গলায় বলল, দীপার ওপর আমার আর কোনো ইন্টারেস্ট নেই। তবু আমি ডিভোর্স করতে চাইছিলাম না। আপনাকে বলেছিলাম তো যে, আমি একটা লং-টুরে বাইরে চলে যাচ্ছি।

বলেছেন।

হয়তো তাই যেতাম। তবে শেষ পর্যন্ত আর একটা অ্যাফেয়ার ঘটে যাওয়ায় মনে হল, জীবনটা আর একবার গড়ে তোলা যায়।

বোস বোধ হয় দীপনাথের সমর্থন পাওয়ার জন্যই এ সময়ে একটু চুপ করে রইল। কিন্তু দীপনাথ জবাব দিল না। সে খুব সন্তুর্ণণে চালু দিচ্ছে। কথা বলার চেয়ে চুপ করে থাকাটাই এখন জরুরী। লেট হিম টক অ্যাণ্ড টক।

তাই এখন আমি ডিভোর্স চাই।

আবার চুপ করে থাকে বোস। দীপনাথ আবার নীরব।

বোস সাহেব একটু কাত্তহয়ে প্যাণ্টের পকেট থেকে জিতানি সিগারেটের একটা প্যাকেট বের করে। সিগারেট ধরিয়ে বলে, দীপার অন্য ইন্টারেস্ট থাকলে আমার আপত্তি নেই। অন্য কেউ ওর প্রতি ইন্টারেস্টেড হয়ে থাকলেও বলার কিছু থাকবে না। ইন ফ্যাকট—

বোস সাহেব আবার অর্থপূর্ণভাবে দীপনাথের দিকে তাকায়। কিন্তু দীপনাথ নিজেকে সংযত রাখে। অনেক দিন বাদে এই লোকটার ওপর তার রাগ আর অল্প একটু ঘুণা হচ্ছে।

ইন ফ্যাকট, কেউ কেউ দীপা সম্পর্কে ইন্টারেস্টেড বলেও আমি জানি।

দীপনাথ সামান্য একটু নড়ে বসে। অস্বস্তি বোধ করছে মনে মনে।

বোস সাহেব সিগারেটটা টানছে না। আঙুলে ধরে আছে মাত্র। বাইরের দিকে চেয়ে থেকে খুব আস্তে করে বলে, ইন ফ্যাকট, আপনি নিজেই যদি দীপা সম্পর্কে ইন্টারেস্টেড হয়ে থাকেন তবে আমি আপনাকে দোষ দিই না। দীপা ইজ মডারেটলি গুড লুকিং, ইন্টেলিজেন্ট। তার ওপর লোনলি।

দীপনাথের বুকটা ঝাঁক করে উঠল বটে। কিন্তু তেমন উত্তেজিত হল না। পাথরের মতো মুখ করে বলল, আর আমি ?

বোস অবাক হয়ে বলে, আপনি ? আপনি কি ?

আমি কেমন ?

বোস হাসে, এলিজিবল। কোয়াইট এলিজিবল। হ্যাণ্ডসাম, ওয়েল প্রেসড, ইন্টিগ্রেটেড। কোয়াইট এলিজিবল।

আপনি আপনার স্ত্রীর জন্য কি ঠিক এ রকম পাত্রই খুঁজছেন বোস সাহেব ?

কথাটার ভিতরকার মার বোসকে একটু কাহিল করে ফেলে। সিগারেটটা জানালা দিয়ে ময়দানের ফাঁকা রাস্তায় ছুঁড়ে ফেলে বলে, পাত্র-পাত্রীরা পরস্পরকে খুঁজে পেয়ে থাকলে আমার আপত্তি নেই, আমি এই কথাটাই বলতে চাইছি।

দীপনাথ মাথা নেড়ে বলে, আমি এখনো পাত্রী খুঁজে পাইনি। তবে পাত্রীর গার্জিয়ানের কাছে আমার একটা প্রশ্ন আছে। তাঁর পরিত্যক্ত স্ত্রীকে আমি বিয়ে করলে অফিসে তাঁর পজিশনটা কী দাঁড়াবে !

জিতানির প্যাকেটটা হাতেই ধরা ছিল, বোস সাহেব আর একটা সিগারেট বের করে প্যাকেটের ওপর ঠুকতে ঠুকতে বলে, দেয়ার ইজ এ পয়েন্ট টু পণ্ডার অন। দীপাকে আপনি

বিয়ে করলে আমাদের এক অফিসে থাকা বোধ হয় ভাল দেখাবে না। দেয়ার উইল বি এ লট অফ টক।

সেক্ষেত্রে বোধ হয় আমাকেই সরে যেতে হবে।

বোস মাথা নেড়ে বলে, তার কোনো মানে নেই। বাংগালোরের অফারটা এখনো আমার কাছে ওপেন আছে।

দীপনাথ বিজ্ঞের মতো হেসে বলে, আর এবার বোধ হয় আপনি আমাকে বাংগালোরে সঙ্গী করতে চাইবেন না।

না। বোস শ্বাস ফেলে বলে, ইন ফ্যাকট দীপাকে যদি আপনি নেন তা হলে আপনার এবং আমার এক শহরেও বসবাস করা উচিত হবে না।

আর মিসেস বোস যদি কাউকে বিয়ে না করতে চান, তা হলে কি হবে?

বোস কাঁধ তুলে ঝাঁকুনি দিয়ে বলে, নাথিং।

কিন্তু উনি কাউকে বিয়ে করলেই তো আপনার সুবিধে।

বোস একবার তাকিয়েই দীপনাথের চোখ থেকে চোখ সরিয়ে নিয়ে বলে, তা কেন? দীপনাথ চাপা ক্রুদ্ধ গলায় বলে, তা হলে আপনাকে মাসেমহারার টাকাটা গুণতে হবে না।

বোস এ কথায় চুপ করে থাকে। অনেকক্ষণ বাদে বলে, শুধু তাই নয়।

তা হলে আর কি?

বোস উইগুস্ত্রিন দিয়ে সামনে চেয়ে থেকে বলে, দীপা ছেলেমানুষ, ইমম্যাচিওর, রেস্টলেস, একটুভাগাণ্ড। একা থাকলে ও একদম শেষ হয়ে যাবে। আমি ওকে ট্যাকল করতে পারিনি বটে, কিন্তু আমার চেয়ে ইন্টিগ্রেডেড কোনো পুরুষ হয়তো পারবে।

পাত্রীর গার্জিয়ানের মতো কথা বলছেন না মিস্টার বোস। পাত্রপক্ষকে দোষের কথা শোনাতে নেই। শুধু গুণের কথা জানাতে হয়।

জিতানির ধোঁয়া গলায় লেগে বোস কিছুক্ষণ কাশে। কড়া ফরাসী সিগারেট, ধোঁয়া লাগতেই পারে। কেশে একটু ধরা গলায় বলে, আপনি বলেন খুব চমৎকার।

আপনি মিসেস বোসের জন্য এত চিন্তা করছেন কেন? ওঁর ভবিষ্যৎ ওঁকে ভাবতে দিন।

তা দিয়েছি। আমি কোনো ব্যাপারে ইন্টারফিয়ার করি না। আপনাকে কথাটা বলছি অন্য কারণে।

কি কারণ?

আমি জানি, ইউ আর ইন লাভ উইথ হার, অ্যাণ্ড ভাইস ভার্সা।

একথায় দীপনাথের পায়ের তলার ভিত একটু নড়ে যায়। কিন্তু ল্যাংটার নেই বাটপাড়ের ভয়। তাই সে সামলে নেয়। তারপর একটা দীর্ঘশ্বাস ছেড়ে বলে, আপনি হয়তো সত্যি কথাই বলছেন, ইয়েস, উই আর ইন লাভ।

বোস অবাক হয়ে বলে, ইউ অ্যাডমিট! কনগ্র্যাচুলেশনস।

থ্যাংকস। কিন্তু মুশকিল হল—

বোস সাগ্রহে একটু ঝুঁকে বলে, হ্যাঁ, মুশকিল হল—?

মুশকিল হল, আমি মিসেস বোসকে ভালবাসি বলেই তার ভাল চাই।

বটেই তো। তাতে মুশকিল কি?

মুশকিল হল, কিসে মিসেস বোসের ভাল হবে তা আমি এখনো ভেবে পাইনি।

ভালবাসার একটাই এইম থাকে চ্যাটার্জি, ভালবাসার লোকটাকে কজা করা ।
ঠিক । তবে যদি তাতে তাব ভাল না হয় !
ভাল হবে । তাতেই ওর ভাল হবে ।
আপনাকে এ ব্যাপারে বড় বেশী উৎসাহী মনে হচ্ছে বোস সাহেব ।
বোস একটু বিরক্ত হয়ে বলে, আমাকে সাহেব সাহেব করেন কেন বলুন তো !
আপনি যে ভীষণ সাহেব, বোস সাহেব ।
বোস আবার কাঁধ ঝাঁকায় । তারপর বলে, আমিও ওর ভাল চাই । আমি জানি কিসে ওর ভাল হবে ।

দীপনাথ মাথা নেড়ে বলে, পাত্রীর ভাল দেখলেই তো হবে না । পাত্রের ভাল হবে কিনা সেটাও ভেবে দেখা দরকার ।

আপনারও ভালই হবে । আপনাদের দুজনেই দুজনকে ভালবাসেন, দেয়ার উইল বি নো প্রবলেম ।

ভালবাসি বলেই প্রবলেম । ভালবাসা মানে ভাল-তে বাস করা ।
মানছি । কিন্তু আপনার প্রবলেমটা ধরতে পারছি না ।
কি করে বুঝবেন ? আপনি তো কখনো কাউকে ভালবাসেননি বোস সাহেব ! বুঝতে গেলে ভালবাসতে হয় ।

বোস একটু গুম হয়ে থাকে ।
দীপনাথ দেখে, গাড়ি বাঁক নিয়ে নিউ আলিপুরে ঢুকে যাচ্ছে ।
বোস সাহেব একটা শ্বাস ফেলে বলে, ইউ আর বিয়িং এ বিট ডিসেপটিভ । হয়তো দীপার প্রতি আপনার অ্যাটাচমেন্টটা ফিজিকাল । মে বি ইউ ওয়াণ্ট টু একসপ্লয়েট হার । মে বি ইউ হাভ অলরেডি একসপ্লয়েটেড হার ।

দীপনাথের ঠোট শুকিয়ে গেছে, কান জ্বালা করছে । তবু শুকনো হাসি হেসে সে বলে, যদি তাই করে থাকি তবু আপনার কিছু করার নেই বোস সাহেব । ইউ আর এ ম্যান উইদাইট ব্যাকবোন । আমার যদি স্ত্রী থাকত আর তার যদি পরপুরুষ জুটত, তবে আমি স্ত্রীকে ভালবাসি বা না বাসি সেই পরপুরুষের ঠ্যাং না ভেঙে ছাড়তাম না ।

আপনি আমাকে আপনার ঠ্যাং ভাঙার জন্য ইনভাইট করছেন !
করছি । অ্যাট লিস্ট ইউ শুড ট্রাই ।

বোস হেসে ওঠে ।
গাড়ি এসে থামে ফ্ল্যাটের সামনে । দীপনাথ দেখতে পায় দোতলার বারান্দায় ম্লানমুখী মণিদীপা উদাস চোখে চেয়ে দাঁড়িয়ে আছে । বুকটা কেঁপে ওঠে তার । ধড়াস ধড়াস করতে থাকে ।

॥ চৌষট্টি ॥

এই ফ্ল্যাটে ঢুকতে আজ ভারী লজ্জা আর অস্বস্তি বোধ করে দীপনাথ । বহুকাল সে এরকম সংকটে পড়েনি । আজ তার পায়ের তলায় মৃদু ভূমিকম্প হয়ে চলেছে ।

তারা গাড়ি থেকে নামতেই ওপরের বারান্দা থেকে অদৃশ্য হয়ে গেল মণিদীপা ।
বোস সাহেব বাড়িতে ঢুকবার আগে একটু সময় নিল । সিঁড়ির গোড়ায় দাঁড়িয়ে মৃদু আত্মরিক স্বরে বলল, আপনি আজ একটু রেগে আছেন । আমার প্রোপোজাল হল, লেট
৪৫৪

আস হ্যাভ এ ফ্র্যাংক ডিসকাসন অ্যাণ্ড ট্রাই টু সেটল থিংস ।

দীপনাথের আজ চাকরির ভয় নেই, কৃতজ্ঞতাবোধ নেই, সে মরিয়া । তাই চাপা গরগরে গলায় বলল, সবটাই তো আর একজিকিউটিভ মিটিং নয় বোস সাহেব ।

বোস চিন্তিত মুখে দীপনাথের দিকে চেয়ে বলে, ইউ আর রিয়েলি অ্যারোগ্যান্ট । রিয়াল টাফ গাই । বাট লেস আস কিপ আওয়ার হেড টুডে ।

দীপনাথ তেজের সঙ্গে বলল, দ্যাট ইজ ইওর হেডেক, নট মাইন । আপনি নিজের রিস্কে আমাকে এখানে এনেছেন । আমি কোনো কথা দিতে পারি না ।

বোস সাহেবকে হঠাৎ খুব বিরক্ত আর ক্লান্ত দেখাল । মুখে চোখে গভীর হতাশা । মৃদু স্বরে বলল, ঠিক আছে, আসুন ।

বোস সিঁড়ি বেয়ে আস্তে আস্তে উঠছে । পিছনে দীপনাথ । দীপনাথ দেখতে পেল বোস রেলিং-এ প্রয়োজনের চেয়েও একটু বেশী ভর দিচ্ছে । প্রতিটি সিঁড়িতে উঠতেই যেন বেশ কষ্ট হচ্ছে বোস সাহেবের । মস্ত লম্বা শরীরের আকৃতির সঙ্গে প্রকৃতির অনেক তফাত । দীপনাথ টের পায়, বোস ভাল নেই । খুব তাড়াতাড়িই ওর ডাক্তার দেখানো উচিত ।

দোতলার চাতালে উঠে বোস একবার নিজের বুক হাত রাখে । কয়েক সেকেন্ড দাঁড়িয়ে হাঁ করে দম নেয় ।

সদর দরজা খোলাই ছিল । ড্রয়িং রুমে ঢুকে বোস সাহেব মুখ ফিরিয়ে বলে, আমাব ঘরে গিয়ে বসুন । আমি একটু বাথরুম থেকে আসছি ।

বোস সাহেবের ঘরটা দীপনাথের অচেনা নয় । করিডোরের শেষে বাঁ-হাতী ঘরটা । আগে ডান দিকে মণিদীপার ঘর । বোস সাহেব বাথরুমে ঢুকে দরজা বন্ধ করতেই দীপনাথ মণিদীপার ঘরের বন্ধ দরজার নব ঘুরিয়ে ভিতরে ঢুকল । তারপর আস্তে বন্ধ করে দিল দরজাটা ।

মণিদীপা একদৃষ্টে দরজার দিকে চেয়ে ছিল । তাকে দেখে একটুও চমকাল না । কিন্তু চোখে একটা অদ্ভুত বিহ্বল দিশেহারা দৃষ্টি । যেন কাউকেই বিশ্বাস করতে পারছে না । যেন পৃথিবীর কোনো কিছুই সত্য বলে মনে হচ্ছে না । চুল এলো, মুখ শুকনো, তবু ভারী করুণ আর সুন্দর আর অসহায় এই জেদী মেয়েটিকে দেখে আজ শব্দের মতো আত্ননাদ করে ওঠে দীপনাথের হৃদয় । কী বলবে তা ভুলে গেল সে । মুগ্ধ হয়ে চেয়ে রইল ।

এক একটা পাগলা মুহূর্ত আসে মানুষের জীবনে যখন অগ্র-পশ্চাৎ বিবেচনা থাকে না । দীপনাথের ঠিক সেই অবস্থা । পায়ের নীচে মৃদু ভূমিকম্প উঠল চৌদুনে । বোস সাহেব তার বউয়ের সঙ্গে দীপনাথের মিলন চাইছে । এর চেয়ে সুখের আর কী হতে পারে ?

দীপনাথ নয়, তার ভিতরকার পাগলটা বিনা ভূমিকায় বলল, আমার সঙ্গে যাবে মণিদীপা ?

মণিদীপা তেমনি বিহ্বলভাবে চেয়ে আছে ।

দীপনাথ হাত বাড়িয়ে বলল, এম্মো । চলো যাই ।

এ সমস্তই বলল দীপনাথ । কিন্তু, তীব্র স্বাসের কষ্ট আর অসহনীয় আবেগের তাড়নায় তার কোনো কথাই মণিদীপার কানে পৌঁছল না । প্রায় ফিসফিসানির মতো তার নিজের স্বাসবায়ুর সঙ্গে মিশে গেল মাত্র ।

মণিদীপা বলল, কদিন ধরে ও যে কী পাগলামি শুরু করেছে !

দীপনাথ আবেগের পাহাড়চূড়া থেকে নেমে এল । ভীষণ লজ্জা । ভীষণ গ্লানি । গলা যত দূর সম্ভব নরম করে এবং স্বাভাবিক হওয়ার চেষ্টা করে সে বলে, কে পাগলামি করছে ?

আপনাদের বোস সাহেব ।

কি বলছে ?

যা বলছে তা আপনাকে বলা যায় না ।

দীপনাথ একটা দীর্ঘশ্বাস ছেড়ে বলে, আমাকেও আজ কিছু অদ্ভুত প্রস্তাব দিয়েছেন ।

কিসের প্রস্তাব ?

তাও আপনাকে বলা যায় না ।

মণিদীপা করুণ মুখ করে বলে, তা হলে সেই কথাই । আমাকেও বলেছে, আপনাকেও বলেছে ।

দীপনাথ মাথা নেড়ে বলে, হয়তো সেই উদ্দেশ্যেই আজ উনি আমাকে এখানে নিয়ে এসেছেন ।

মণিদীপার মাজা রঙও বাঙ্গা হল এ কথায় । সে বলল, ছিঃ ছিঃ । ও কোথায় গেল ? বাথরুমে । দীপনাথ একটু চুপ করে থেকে বলে, বাথরুমে উনি একটু সময় নেবেন বলে মনে হচ্ছে ।

কেন ? আমাদের আগুবস্ট্যাণ্ডিং-এর জন্য সময় দিতে ?

দীপনাথ মাথা নেড়ে বলে, না । আমার সন্দেহ, উনি কোনো অসুখে ভুগছেন । ওঁর খুব তাড়াতাড়ি ডাক্তার দেখানো উচিত । এর আগেও একদিন বলেছিলাম, উনি তখন পান্ডা দেননি ।

মণিদীপা মাথা নাড়ে । একটু ভেবে বলে, এরকম একটা সন্দেহ আমারও হচ্ছিল । বিয়ের সময় ও ছিল দারুণ শক্ত সমর্থ মানুষ । এখন কেমন ফ্যাটি, উইক । অসম্ভব স্ট্রেনও যাচ্ছে ।

দীপনাথ বলে, হ্যাঁ । উনি কাজ ভালবাসেন । তা ছাড়া একটা প্রায় অসামাজিক লাভ আফেয়ারে পড়ে যাওয়ায় স্ট্রেনটা বেড়েছে ।

মণিদীপা খুব ম্লান হয়ে মাথা নীচু করে বসে থাকে অনেকক্ষণ । তারপর যখন মুখ তোলে সেই মুখ দেখে পাষণ্ডেরও মায়া হওয়ার কথা । আস্তে করে বলে, এটা আমার ডিফিট, তাই না ?

দীপনাথ অবাক হয়ে বলে, কোনটা ?

এই যে বোস সাহেব তার কাজিনের সঙ্গে প্রেম করছে এর মানে তো এই দাঁড়ায় যে, আই হ্যাভ ফেইলড টু অ্যাট্রাকট হিম ।

দীপনাথ মৃদু হেসে বলে, তাই দাঁড়ায় ।

আমি তা হলে ডিফিটেড ?

খানিকটা । তবে লড়াই তো এখনো চলতে পারে ।

মণিদীপা মাথা নেড়ে বলে, না । লড়াই শেষ । আমি হেরো ।

দীপনাথ মাথা নেড়ে বলে, আপনি ঠিক হারেননি ।

তবে কি জিতেছি ?

তাও নয় । আপনি আসলে যুদ্ধটাই মন দিয়ে করেননি যে ।

আমার কি করার ছিল ?

লোকটাকে আর একটু বাজিয়ে দেখতে পারতেন ।

লাভ নেই । বাজালে ফাঁকা আওয়াজ বেরোবে । ওর কোনো ডেপথ ছিল না কখনো ।

আপনি কি ডেপথওয়ালা লোককেই চেয়েছিলেন ?

মণিদীপা অবাক হয়ে বলে, কে না চায় ?

আপনাকে দেখে কিন্তু তা মনে হয় না।

তা হলে কি মনে হয় ?

মনে হয়, আপনি ভালবাসেন প্লে-বয় টাইপ।

বাঃ ! চমৎকার সব ধারণা আমার সম্পর্কে আপনাদের।

মানুষের ভুল হতেই পারে।

মণিদীপা মাথা নেড়ে বলে, ভুল নয়। একজন মহিলার প্রতি আপনাদের প্রি-কনসিভড কিছু ধারণা ছিল। সেই ধারণাকে আপনারা ভাঙতে চান না। আর সেইটাই সব অশান্তির উৎস।

এই অবস্থাতেও দীপনাথ একটু হেসে বলে, আপনি বরাবর চমৎকার কথা বলেন।

আমার স্বভাবে আরো কিছু চমৎকার দিক ছিল। আপনি বা বোস সাহেব অঙ্ক না হলে ঠিকই লক্ষ্য করতেন।

বিষয় দীপনাথ বলে, আমি তো চান্স পাইনি মণিদীপা। কিন্তু বোস সাহেব পেয়েছেন।

আপনিও অঙ্ক। বোস সাহেবের কাছে আমাকে একটি ভ্যাম্পায়ার হিসেবে দাঁড় করাল কে ?

আমি নই মণিদীপা।

কে আমার অর্থনৈতিক স্বাধীনতা কেড়ে নিতে বোস সাহেবকে পরামর্শ দিয়েছিল ?

আপনি রেগে যাচ্ছেন। কিন্তু এটা রাগের সময় নয়। আমবা তিনজনই একটা বিস্তীর্ণ সিচুয়েশনের মুখোমুখি এসে দাঁড়িয়েছি। এই অবস্থায় মাথা ঠাণ্ডা রাখা দরকার।

মণিদীপা একবার শুধু দু'হাতের পাতায় মুখটা আডাল করল। পরমুহুর্তেই আডাল সরিয়ে সোজা দীপনাথের দিকে চেয়ে বলল, আপনি আমাকে কি করতে বলেন ? বোস সাহেবের মন জয় করতে প্রেম-প্রেম খেলা শুরু করব ?

না। আপনি ঠর সঙ্গ আর সে খেলা খেলতে পারেন না। সেটা আমি জানি।

তবে কি অন্য কারো সঙ্গ পারি ?

সে কথা বলিনি। বিয়ের পর অনেক বছর কেটে গেলে তো আর নতুন করে রহস্যময়ী হওয়া যায় না। প্রেম জমাতে গেলে একটু রহস্য আর একটু দূরত্ব থাকা দরকার যা স্বামী-স্ত্রীর মধ্যে সম্ভব নয়।

স্বামী-স্ত্রীর মধ্যে কি সম্ভব তা কি একজন কনডেমড ব্যাচেলারের কাছ থেকে জানতে হবে ?

ব্যাচেলাররাও কিছু কিছু বোঝে।

বোস সাহেব আপনার পরামর্শে চলে বলে কি মণিদীপাও চলবে ভেবেছেন ?

না। দীপনাথ দীর্ঘশ্বাস ছেড়ে বলে, আমি অত দুরাশা করিনি।

আপনার দুরাশা আর একটু বেশী। আপনি বোধ হয় বোস সাহেবের কাছ থেকে আমাকে ছিনিয়ে নিতে চান।

দীপনাথ গাড়লের মতো চেয়ে থাকে। মুখে কোনো কথা আসে না।

মণিদীপা মৃদু একটু হেসে বলে, ভূমি বোকা ! বোকা ! কেন বুঝতে চাইছো না যে, বোস সাহেব নয়, টাকা নয়, আমি যাকে ভালবাসি তাকেই চাই ?

পিছনেই বন্ধ দরজা। দীপনাথ আস্তে আস্তে ঠেস দিয়ে দাঁড়ায়। বলে, কাকে ?

তোমাকে ! তোমাকে ! তোমাকে !

এলো চুল ঝাঁপিয়ে পড়ল চারধারে । তরঙ্গের মতো উঠে এল মণিদীপা । চোখে পাগলের মতো দৃষ্টি । চোটে সম্মোহন । দীপনাথ ভাবল, এই যৌবনজলতরঙ্গ রোধিবে কে ?

তার পিঠে একটা, দুটো, তিনটে টোকা পড়ল । তারপর গলা খাঁকাবির আওয়াজ । চ্যাটার্জি ! আই আমম ওয়েটিং ।

দীপনাথ তৎক্ষণাৎ ঘুরে দরজা খুলল । দরজার মাথা অবধি করাল বিশাল চেহাৰা নিয়ে বোস দাঁড়িয়ে । কিন্তু এক বৃদ্ধ, হতমান, রুগ্ন দৈত্য । তার না আছে নখ, না দাঁত, না হিংস্রতা ।

আসুন, বোস সাহেব ।

আর ইউ বিজি ?

একটু । উই আর সরটিং আউট এ ফিউ থিংস ।

দেন গো অ্যাডেড । আমি বরং আমার ঘরে...

না । এখানেই আসুন । এটা আপনাব স্ত্রীর ঘর । আমি আউটসাইডার ।

বোস একটু হাসে, কৌধ তুলে ছেড়ে দেয় । তবে ঘরে ঢোকেও ।

মণিদীপা হাত তিনেক দূরে থেমে আছে । নিস্তব্ধ তরঙ্গ । মুখচোখে অপমান ফাটো-ফাটো হয়ে আছে । থম ধরে আছে কান্না ।

বোস মৃদু স্বরে বলে, আমি হয়তো ডিস্টার্ব করছি ।

দীপনাথ তার হাসিমুখ তুলে বোস সাহেবের মুখের দিকে তাকায় । তারপল বলে, পাত্রী আমার পছন্দ নয় বোসসাহেব । পাত্রীরও পাত্র পছন্দ নয় ।

বোস গভীর হয়ে বলে, আই থট আদারওয়াইজ ।

আপনি ভুল ভেবেছিলেন । মণিদীপা খুব গভীর মনের মানুষ পছন্দ করেন । আমার সেই গভীরতা নেই । আব আমি হুইমজিক্যালদের পছন্দ করি না । কিন্তু মণিদীপা হুইমজিক্যাল ।

বোস দাঁড়াতে পারছে না । শরীরের ভিতরকার কোনো অপ্রতিহত দুর্বলতা কুরে কুরে খাচ্ছে তাকে । একটু আড়ষ্ট পদক্ষেপে এগিয়ে গিয়ে বোসসাহেব মণিদীপার বিছানায় বসে । সাঁই সাঁই করে খানিক দম নিয়ে বলে, বেয়ারাকে একটু খাবার জল দিতে বলো তো দীপা । মণিদীপা একবার বোসসাহেবের দিকে তাকায় । পালানোর এমন সুযোগ আর পাবে না । ত্বরিত পায়ে সে ঘর থেকে বেরিয়ে যায় ।

একটু বাদে বেয়ারা ট্রেতে একটা অস্বচ্ছ কাচের গ্লাস নিয়ে ঘরে ঢোকে । আর তখন করিডোরের প্রান্তে টেলিফোনে নির্ভুল ডায়ালের আওয়াজ পায় দীপনাথ ।

মণিদীপা বলল, হ্যালো ! ডক্টর মুখার্জি আছেন ? ইটস আর্জেন্ট ! ভেরী আর্জেন্ট ।

বোস সাহেব জলটা শেষ করে খালি গ্লাস হাতে নিয়ে শূন্য চোখে চেয়ে আছে ।

দীপনাথ নিঃশব্দে দরজা দিয়ে বেরিয়ে আসে । শূন্য, সব শূন্য লাগে তার এ বাড়ির । আন্তে আন্তে সে সিঁড়ি ভেঙে নামে । আর ফিরে তাকায় না ।

॥ পঁয়ষট্টি ॥

শরীরে আবদ্ধ এই জীবন, তবু শরীরেই কি শেষ ? এই যে এক জায়গায় থেকেও চেতনা দিয়ে কত দূর পর্যন্ত স্পর্শ করছে প্রীতম, এ কি সত্য নয় ? এক দরজা জন্ম, আর এক দরজা মৃত্যু, এ ছাড়া আর কোনো ফাঁক-ফোকর নেই যা দিয়ে জানা যাবে এই অস্তিত্বের কারণ ।

একা একা বড় অস্থির হয় মাঝে মাঝে প্রীতম । তার সব যন্ত্রণার উৎস হল কয়েকটি মানুষের প্রতি তার আকর্ষণ ভালবাসা । লাবু, বিলু, মা, বাবা, পরিজন । কাউকেই ছেড়ে দেওয়া যায় না, কাউকেই ছেড়ে দেওয়া যায় না । তবু কেন এই নশ্বরতা ? কেন ছেড়ে দিতে হয় ? কেন ছেড়ে যেতে হবে ?

মাঝরাত্রে এই অস্থিরতাবশে সে একদিন ডুকরে ওঠে, মরম ! মরম !
জানালার পাশের বিছানা থেকে মরম তার ডাকে সাড়া দেয়, দাদা, ডাকছো ?
ওঠ তো ! ওঠ ! আমার ভীষণ অস্থির লাগছে । মাকে ডাক, শতমকে ডাক ! শিগগির !
মরম চকিতে ওঠে । কাছে এসে মশারি তুলে তাকে দু'হাতে ধরে বলে, কি হয়েছে, দাদা ?

বাতিটা জ্বালা । এত অন্ধকার সহ্য হচ্ছে না ।

মরম টিউবলাইটটা জ্বেলে দিয়ে কাছে এসে বসে । তাকে আবার জড়িয়ে ধরে বলে, ডাক্তারবাবুকে ডাকব ?

ডাক্তার ! ডাক্তার কি করবে ? ডাক্তারের কাজ নয় । আমার মন বড় অস্থির ।

আমি তোমাকে একটু হাওয়া করছি । শুয়ে থাকো ।

শুতে পারছি না । শুলেই বুকে চাপ লেগে দম বন্ধ হয়ে আসছে ।

দাঁড়াও । বলে মরম উঠে গিয়ে টেবিল থেকে একটা অম্বলের ট্যাবলেট স্ট্রিপ থেকে ছিড়ে এনে হাতে দিয়ে বলে, এটা খেয়ে নাও । বোধহয় পেটে গ্যাস হচ্ছে তোমার ।

প্রীতম ভাল ছেলের মতো ট্যাবলেটটা চিবোতে থাকে । বলে, তুই বসে থাক । আমার একা লাগছে ।

মরম তাকে প্রায় বুকের সঙ্গে টেনে রেখে বলে, আমি আর ঘুমোবো না ।

হ্যাঁ রে, কলকাতার কোনো চিঠি এসেছে ?

ও, তুমি লাবু আর বউদির কথা ভেবে অস্থির হয়েছো ?

প্রীতম মাথা নাড়ে, না । শুধু ওরা নয়, আজকাল কেমন তাদের সকলের কথাই মনে হয় ভীষণ ।

ভেবো না । আজই বউদির চিঠি এসেছে । সবাই ভাল আছে ।

প্রীতমের চোখ জলে ভরে এল । হঠাৎ বিশীর্ণ হাতে মরমের গাল ছুঁয়ে বলল, তুই কেন খারাপ হয়ে গেলি রে, মরম ?

মরম এ কথায় চূপ করে থাকে । মুখের ওপর এত সরলভাবে এই প্রশ্ন কেউ তাকে করেনি ।

প্রীতম আবার তাড়া দেয়, বল কেন খারাপ হয়ে গেলি !

তুমি একটু বিশ্রাম করো না, দাদা !

না, তুই আগে বল ।

খারাপ হয়ে গেলাম, কি করব বল । তবে তোমাকে ছুঁয়ে বলছি, আবার ভালো হয়ে যাবো । একটু একটু ইচ্ছাও তো !

তোমার কি খুব টাকার দরকার ?

কেন, তুমি দেবে ?

দেবো । কেন দেবো না ?

তুমি যে কী বলো তার ঠিক নেই । তোমার টাকা নিয়ে কি আমার চিরকাল চলবে ?
নিজের পায়ে দাঁড়াতে হবে না ?

তুই শতমের সঙ্গে ব্যবসা করিস না কেন ?

মেজদা আমাকে বিশ্বাস করে না বোধহয় ।

কেন করে না ?

একবার কিছু টাকা নষ্ট করেছিলাম ।

তা হলে তুই আলাদা ব্যবসা কর । আমি টাকা দেব ।

মরম একটা দীর্ঘশ্বাস ছেড়ে বলে, ব্যবসা তো একটা করছিলাম । কিন্তু বাবা বা মেজদার পছন্দ নয় । অবশ্য ভদ্রলোকের ব্যবসাও নয় সেটা ।

কিসের ব্যবসা ?

নেপালের বর্ডার থেকে স্মাগলিং ।

শ্রীতম অস্থিরতা বোধ করে আবার । মাথা নেড়ে বলে, খবরদার না । ধরা পড়লে শেষ হয়ে যাবি ।

মরম হেসে বলে, পুলিশ-টুলিসের ভয় নেই । ভয় স্মাগলিং গ্রুপের কিছু মস্তান ছেলেকে । প্রায়ই গ্রুপে গ্রুপে লেগে যায় । অনবরত মারপিট হয় ।

আর খুন ?

অনেক । রোজ একটা দুটো স্ট্রে খুন হচ্ছে, দেখছ না ?

হাতে পেলে তোকেও মারবে ?

মরম হাসে । মারবে । কতগুলো পাড়ায় আমি যাই না ।

তুই কাউকে মেরেছিস ?

খুন ? না, কাউকে না । তবে হাত-ফাত ভেঙেছি অনেক ।

তোর রিভলভার আছে ?

মরম একটু চুপ করে থেকে বলে, ওয়ান শট একটা জাপানী জিনিস কিনেছিলাম । দিয়ে দিয়েছি । তুমি রাতদুপুরে এসব নিয়ে এত ভেবো না তো !

শ্রীতম সে কথায় কান না দিয়ে বলে, তুই কখনো মার খেয়েছিস ?

অনেক । কয়েকবার খুন হতে হতে বেঁচে গেছি ।

তোর অপমান লাগে না ?

অপমান ! না । সেসব নয় । মারের মধ্যে অপমানের কি আছে ? মার খেয়েছি, উণ্টে মেরেছি ।

আমি কাউকে কখনো মারিনি । জীবনে একবার ছাড়া দুবার মার খাইনি ।

তুমি ছিলে গুড বয় ।

ঐ যে রাস্তার শেষে বড় রাস্তার ড্রেন ! ঐখানে একবার মেজদা খুব মেরেছিল ।

মেজদা মানে দীপুদা নাকি ?

হ্যাঁ, সেই ছোটবেলায় ।

দীপুদা একসময়ে শিলিগুড়ির মস্তান ছিল ।

খুব মস্তান । কিন্তু আমাকে ভালবাসত খুব । আজও বাসে । মেজদার সেই মার আজও আমার শরীরে লেগে আছে । কিন্তু তাতে আমার খুব উপকার হয়েছিল । জড়তা, লজ্জা, সংকোচ সব কেটে গিয়েছিল ।

মরম হাসতেই থাকে, আমরা অন্যরকম । মার খেয়ে কিছুই হয়নি ।

তুই খারাপ হয়ে গেছিস ।

তোমার কি সেজন্য মন খারাপ ?

সে জন্যও । সব কিছুর জন্য । বেঁচে থাকার ওপর ঘেঁসা এসে যায় । তোরা আমাকে বাঁচতে দিবি না ।

ক্লান্ত প্রীতম বালিশে মাথা রাখলে মরম তার মাথায় হাত বুলিয়ে দিয়ে বলে, একটা চাকরি হলে সব ঠিক হয়ে যাবে । দেখো ।

তোকে কে চাকরি দেবে ? ভাল করে লেখাপড়াই করলি না ।

প্রীতম চোখ বুজে গভীর করে শ্বাস নেয় । বুকে দহন, মাথায় অস্থিরতা । পৃথিবী ঘুরে যাচ্ছে, ফোঁটা ফোঁটা সময় পড়ছে টুপ টাপ করে করে । কারো জন্য কিছু করা হল না এই জীবনে ।

মরম !

বলো দাদা ।

নিজের জন্য ছাড়া আমি কখনো কারো জন্য কিছু করিনি । সেজন্য আজ বড় দুঃখ হয় । পৃথিবীটা কি বিশাল ! আমি কেবল ছোটো হয়ে থেকেছি । তুই ছোটো হোস না ।

আচ্ছা, দাদা !

শতমকে ডেকে দে । ও আমার মাথায় জপ করলে আমি বেশ ভাল থাকি ।

মরম ঘড়ি দেখে বলে, সেজদা তো রাত তিনটে থেকে ধ্যানে বসে যায় । এখন সাড়ে তিনটে । ডাকলে আবার ক্ষতি হবে না তো ?

প্রীতম একটু হাসে, তা হলে তুই জপ করে দে ।

আমি ! আমি তো মস্ত্র নিইনি ।

নিসনি কেন ?

কেউ কখনো বলেনি নিতে ।

মনকে যা ত্রাণ করে তাই মস্ত্র । আগে এ সব নিয়ে ভেবে দেখিনি, এখন খুব ভাবি । এখন থেকে তুই আমার মাথায় জপ করে দিবি রোজ ।

মস্ত্র নিয়ে নেবো তা হলে ?

নে । নিলে ক্ষতি কি ? নিয়ে দেখ কি হয় ।

নেবো ।

শতমকে ডাক ।

মরম উঠে যায় ।

একটু বাদেই শতম এসে নিঃশব্দে প্রীতমের শিয়রে বসে ।

প্রীতম তন্দ্রার মধ্যে ওর দাড়িয়াল মুখের দিকে চেয়ে অশ্রুট গলায় বলে, বড় কষ্ট ।

কেমন কষ্ট ?

মনটা বড় খারাপ । সকলের জন্য বড় কষ্ট হচ্ছে ।

জানি । কষ্টই তো ভাল । কষ্ট মানুষকে জাগিয়ে রাখে, চেষ্টাশীল রাখে । বড় বড় মানুষের জীবনী পড়ে দেখো, কী অমানুষিক কষ্ট গেছে তাদের ।

আমি তো বড় মানুষ নই ।

তুমি মস্ত্র মানুষ । সেটা আমরা জানি ।

প্রীতম ক্ষীণ একটু হাসে । মাথা নাড়ে । বলে, না বে । না ।

শতম তার অভ্যস্তরীণ নাম জপের স্রোত খুলে দিয়ে নিঃশব্দে প্রীতমের মাথা ঝুঁয়ে বসে থাকে । শব্দের তড়িৎ প্রবাহিত হতে থাকে এক সত্তা থেকে অন্য সত্তায় । শব্দ দোলে, ঢেউ খায়, তরঙ্গে তরঙ্গে ভাসিয়ে নিয়ে যায় মহাসমুদ্রের দিকে । মহাজীবনের নিহিত সংকেতবার্তা

বেজে যেতে থাকে চারদিকে। ত্রাতা ডাকে, অনাহত শব্দ ডাকে।

প্রীতম গভীর ঘুমে ঢলে পড়ে। শতমেরও বাইরের চেতনা নেই। নাসামূলে ভ্রু-মধোর গভীরতায় তেসরা তিল। যেখানে দ্বিদলে ফুটে ওঠে এক অবিস্মরণীয় সৌন্দর্যের ছবি। সে একত্র করার অশ্বফুট গলায় বলে উঠতে থাকে, ঠাকুর....দয়ালদেশ.... এ তো ইটারনাল থ্রোন !

সকালে যখন বারান্দায় এসে বসে প্রীতম তখন ভোরবেলাটা তার এত অদ্ভুত লাগে ! এ রকম অলৌকিক সুন্দর সকাল সে আর কখনো দেখেনি। এত গভীর, এত রহস্যময়, এত অফুরান !

শেষ শীতের টান এখনো বাতাসে রয়েছে। আর আছে উপচে পড়া রোদ। সামনে একটু ফাঁকা জমি, বাড়ি-ঘর, আকাশ, এই দেখেই তো বড় হল প্রীতম। এই সেই একই শিলিগুড়ি। তবু কোথেকে এল এই অদ্ভুত এক সকাল। বার বার এক অসীম আনন্দের বাঁধা তারে কে আঙুল ছোঁয়ায় ! আর শিউরে শিউরে ওঠে সে। আজ কোনো পিছুটান টের পাচ্ছে না সে, কারো জন্য কিছু কষ্ট নেই। এ কেমন ?

তবে কি বহু কোটি বছর পর মৃত্যুশাসিত এই পৃথিবীকে এসে স্পর্শ করল মৃত্যুহীনতার আলো ? আর কখনো কেউ মরবে না ? না মানুষ ! না গাছপালা। না কীটপতঙ্গ।

ছোট বোন টিউশানিতে যাওয়ার সময় বলে গেল, আসছি দাদা।

ভারী আনন্দে প্রীতম বলল, আয়। তাড়াতাড়ি আসিস।

মা দুধ নিয়ে এল রোজকার মতো। প্রীতম মায়ের কোমর জড়িয়ে ধরল রোগা হাতে, মা !

কি রে ? কাল রাতে নাকি ঘুমোসনি ? মরম বলছিল।

প্রীতম কথার জবাব না দিয়ে আবার গভীর গলায় ডাকে, মা।

মা এই ডাক বোঝে। গভীর হয়ে যায় চোখ, মুখে স্নিগ্ধতা নিবিড় হয়। মাথায় হাত রেখে বলে, চিন্তা করিস না। কাল বিলুর চিঠি এসেছে। ওরা ভাল আছে।

ভাল থাকবে। সবাই ভাল থাকবে।

দুধটা খেয়ে নে।

তুমি বোসো তো কাছে। খাইয়ে দাও।

মা বসে। খাইয়ে দেয়।

মা !

বল।

ঐ মাঠটায় তেজেনবাবুরা একবার দুর্গাপূজা করেছিল, মনে আছে ?

হ্যাঁ। তারপর আর হয়নি। তুই তখন ছোটো।

ঐখানে অষ্টমীর দিন একটা পাঁঠা বলি হয়েছিল।

হবে হয়তো।

হয়েছিল। ছোট একটা পাঁঠা। ছেঁচড়ে যখন হাড়িকাঠের দিকে নিয়ে যাচ্ছিল ওঃ....জীবজন্তুরাও কাদে, জানো ?

তা আর কাদে না ! খুব কাদে।

আমার বার বার মনে হচ্ছে, সেই পাঁঠাটা বোধ হয় আজও ঐখানে ঘাস ছিড়ে খাচ্ছে। ঐ দেখ।

দূর পাগল ! কী যে বলিস !

ভাবতে দোষ কি মা ? তোমার কি ভাবতে ভাল লাগে না, যারা মরে গেছে, আসলে তারা কেউ মরেনি ! অন্য একটা জায়গায় গিয়ে রয়েছে ।

মরা মানে তো তাই-ই শুনি !

হ্যাঁ, তাই । মা, শতমের ঘর থেকে গীতাটা একটু নিয়ে এসো তো । তারপর আমার পাশে বসে শোনো । শুনবে ?

ওমা ! শুনব না ? আমি কত বলি, কেউ একটু শোনায় না । বোস, নিয়ে আসি ।

॥ ছেষট্টি ॥

গীতা পড়তে পড়তে মাঝে মাঝে থামে প্রীতম্, কোনো কোনো শ্লোক ব্যাখ্যা করে, মাকে বুঝিয়ে দেয় । কিন্তু বেশীক্ষণ পারে না । হাঁফ ধরে আসে । অবসন্ন লাগে ।

আজ থাক, আবার কাল পড়িস । বলে মা হাত থেকে ছোট্ট গীতাটা খসিয়ে নিয়ে চলে যায় ।

প্রীতম চুপ করে বসে থাকে । বেলা বাড়ে । প্রীতমের ঘরে যেতে ইচ্ছে করে না । আনন্দের উৎস থেকে যে বান এসেছিল তা আস্তে আস্তে সরে যায় । কিন্তু তীরভূমিতে নতুন পলিমাটির স্তরও রেখে যায় সে । আনন্দের রেশ অনেকক্ষণ তার সঙ্গে থাকে পোষা বেড়ালের মতো ।

সামনে চেয়ে ছিল প্রীতম । দেখার তেমন কিছু নেই । রাস্তার ওধারে মাঠ বাড়িঘর, অনেক কাঁঠাল গাছের ভীড় । কিন্তু এই তুচ্ছ দৃশ্যের মধ্যে এক আনন্দের আলো খেলা করে আজ । সদর স্ট্রীটের বারান্দায় দাঁড়িয়ে রবি ঠাকুরের যেমন একদা হয়েছিল, তেমনই কিছু কি এ ? একটা ডিম ভেঙে ছড়িয়ে পড়েছে এক বিস্ফারিত বিশ্বয় ?

গরম জল করে মা যখন তাকে ধরে ধরে স্নানঘরে নিয়ে গেল তখনো তার মাথা আচ্ছন্ন হয়ে আছে, চোখে ঘোর । একটা জলটোকিতে বসিয়ে মা তার গায়ে যখন কুসুম-গরম জল ঢেলে দিচ্ছে তখন সে স্পষ্টই অনুভব করে তার গা বেয়ে নেমে যাচ্ছে অজস্র নিখরীণী । ধুইয়ে নিয়ে যাচ্ছে তার সমস্ত অসুখ । শরীরে আজ জীবাণুদের নিত্যকার কোলাহল নেই, মৃত্যুভয় নেই । পৃথিবীর দীন দরিদ্রতম ভিক্ষুক বা হতভাগ্যও মরার আগে কিছুক্ষণ সুখভোগ করে প্রকৃতির নিয়মে । তারও কি এই শেষ সুখ ? হ্যাঁ, ভেবেচিন্তে তাই মনে হয় । হোক । এখনই যদি তার মৃত্যু হয় তবে তার কোনো দুঃখ নেই । অজানা পথ ধরে সে এক আনন্দধামে চলে যাবে । মৃত্যু যদি এ রকম হয় তবে কী সুন্দর !

ছেলেবেলার কয়েকজন বন্ধু প্রায়ই দেখা করতে আসে । বহুকাল এই সব বন্ধুর সঙ্গে সম্পর্ক চুকেবুকে গেছে । মানসিকতারও বিশাল ফারাক ঘটেছে । এখন এরা আর বন্ধু নয়, চেনা মানুষ মাত্র । প্রথম প্রথম ওরা দেখা করতে এলে বলার মতো কথা কিছুক্ষণের মধ্যেই ফুরিয়ে যেত । মফস্বলের মানুষের সঙ্গে কলকাতার লোকের তফাত তো থাকবেই । কিন্তু প্রথমদিককার সেই দূরত্ব কমে এসেছে এখন । বন্ধুদের সঙ্গে বলার মতো কথা সে অনেক খুঁজে পায় ।

আজ বিকেলে এল ধীরাজ । ধূপকাঠির একটা ব্যবসা আছে তার । রবীন্দ্রনগরের শেষ প্রান্তে খুব দীনদরিদ্র একটা বাড়ি আছে তার । বউ, দুই মেয়ে আর মা নিয়ে সংসার । সবাই সারাদিন ধূপকাঠি তৈরি করে, ধীরাজ সাইকেলে করে তা বিক্রি করতে বেরোয় । খুবই

কাহিল অবস্থা। দিন চলে না।

এই দীনহীন ধীরাজকে বড় ভাল লাগে প্রীতমের। একটা দেশলাই কেনার আগেও ধীরাজকে দুবার চিন্তা করতে হয়। এই যে কষ্টের বেঁচে থাকা তা আস্তে আস্তে ধীরাজের সব অহংবোধ শুষে নিয়ে ভারী নরম এক মানুষ করে তুলেছে তাকে।

আজ বিকেলে ধীরাজ আসতেই প্রীতম একেবারে বোকা গৈয়ো মানুষের মতো সরলভাবে বলে উঠল, বুঝলি ধীরাজ, আমার আজ খুব আনন্দ হচ্ছে। ভীষণ আনন্দ!

সাইকেলটা বারান্দার নীচে দাঁড় করিয়ে উঠে এল ধীরাজ। সাইকেলের হ্যাণ্ডেলের দুধারে দুটি প্রকাণ্ড থলে ভর্তি ধূপকাঠি। ধীরাজ কাছে এসে বসলেই তার গা থেকে বিচিত্র নানা আতর বা মশলার সুবাস পাওয়া যায়।

আনন্দের কথায় ধীরাজের মুখেও ভারী খুশির হাসি দেখা গেল। মুখোমুখি চেয়ারে বসে বলল, আনন্দ হচ্ছে? তার মানে তুমি সেরে উঠছো। এ খুব ভাল লক্ষণ।

সেরে উঠছি কিনা সেটা কোনো পয়েন্ট নয় রে ধীরাজ! আজই যদি প্রাণটা বেরিয়ে যায় তা হলেও ক্ষতি নেই।

ধীরাজ সম্ভবত এ ধরনের আনন্দের খবর রাখে না। তবে শিক্ষিত ও সফল এই বন্ধুটির যাবতীয় কথাকেই সে মূল্য দেয়। শুধু এই মরার কথাটাকে সহ্যেতে পারে না। বলল, মরবে কেন? তুমি এত ভাল মানুষ, এত কিছু শিখেছো, জেনেছো, তুমি মরলে চলবে কেন? ভগবানের ওরকম অবিচার নেই।

ভাল মানুষরা কি মরে না রে ধীরাজ?

ধীরাজের সরলতা যেমন, তেমনি তার বিশ্বাসের জোর। বলে, মরবে না কেন? মরে। কষ্টও পায়। তবে আমরা বাইরে থেকে একটা লোককে দেখে কতটুকু বুঝি বল? এই জন্মটা তো আর একটা মাত্র জন্ম নয়, অনেক জন্মের একটা যোগফল। কত জন্মে কত কি টেরাবেকা কাজ হয়েছে, এ জন্মে তার এফেক্ট পাচ্ছে মানুষ। আমরা যতটুকু দেখি তার এধারে ওধারে অনেক অজানা জিনিস রয়ে গেছে। জন্মের আগেও জীবন, মৃত্যুর পরেও জীবন। আমরা সংসারী মানুষ, স্বার্থপর ছোটো মানুষ সব, আমাদের কাছে দুটো দরজাই বন্ধ। যারা জ্ঞানী-গুণী মহাপুরুষ ঐ দুই দরজা তাদের কাছে খোলা। তারা অব্যাহত দেখতে পায়, জন্ম-জন্মান্তর পেরিয়ে মানুষ চলেছে।

ভীষণ সরল মন, গৈয়ো চাষাভুষার মতো এই সব কথা বিশ্বাস করতে হচ্ছে হয় প্রীতমের। খানিকটা বিশ্বাস আজকাল করেও সে। তবু বলে। শরীর ছাড়া কি বাঁচা যায়? আমি যে ভাবতেই পারি না। শরীর ছাড়া কি আমি বা তুই জন্মের আগেও ছিলাম, মরার পরেও থাকব?

ধীরাজ তেমনি অকপটে বলে, ছিলাম না? তা হলে আছি কি করে? আর আছি যখন, থাকতেও তো তখন হবেই।

ধূপকাঠির ঝাঁঝালো আতনের গন্ধটা আজ ভারী মিঠে লাগে তার। চুপ করে বহুক্ষণ বসে থাকে প্রীতম। সরল হওয়ার চেষ্টা করে, বিশ্বাসী হওয়ার চেষ্টা করে। কিন্তু এক ধরনের সচ্ছল শহুরে জীবনের বুদ্ধি ও যুক্তিগ্রাহ্য গ্রহণ-বর্জনের রীতিতে অভ্যস্ত বলে পাশাপাশি মনের মধ্যে সন্দেহের কাঁটাও ফুটে থাকে। বিশ্বাস কি এত সোজা?

প্রীতম বলে, আমার ঠিক তোর মতো হতে হচ্ছে করে। একটু টানটানির সংসার থাকবে। ঘরে তৈরি জিনিস সাইকেলে চাপিয়ে নিয়ে দোরে দোরে বেড়াব। আনন্দই আলাদা।

দূর ব্যাটা, আমার জীবনটা কী সুখের ? সকাল থেকে রাত অবধি বাড়ি বাড়ি, দোকানে দোকানে ঘুরে বেড়ানো, ওর মধ্যে কোনো আনন্দ নেই।

আমার যে বড় বেরিয়ে পড়তে ইচ্ছে করে রে ধীরাজ।

আমারও করে। কিন্তু আমার তো হবে না। জন্ম বয়সে কর্ম করেছিলাম একবার মাকে নিয়ে কামাখ্যা ঘুরে। এখন একেবারে কুয়োঁর ব্যাঙ। তোমার মতো লেখাপড়া শিখলাম না, চাকরি করলাম না।

চাকরি কি বেশি সুখের ব্যাপার নাকি ? আমিই বরং রেগেমেগে কতবার চাকরি ছাড়ার কথা ভেবেছি।

তবুও, আমাদের দিন আনি দিন খাই অবস্থার চেয়ে তো ভাল।

প্রীতম একটা দীর্ঘশ্বাস ছাড়ে।

ধীরাজ বিস্ময়ের চোখে চেয়ে থাকে তার দিকে। বলে, তুমি মাঝে মাঝে এমন সব দুঃখের কথা বলো যা শুনলে আমার অবাক লাগে। নিঃসঙ্গতা, নন-কমিউনিকেশন, মৃত্যুভয় এ সব আমাদের কাছে কেতাবী ব্যাপার, বুঝলে ? তোমার হয়তো ছাইরঙা আকাশ দেখলে মন খারাপ হয়ে যায়, আমার কিছুই হয় না। তুমি হলে খুব সূক্ষ্ম অনুভূতির মানুষ। আর আমাদের সবই মোটা দাগের ব্যাপার।

সূক্ষ্ম অনুভূতির নিকুচি করি। তোর মতো দায়ে পড়ে সংসারের ঘানিতে পেঁষাই হয়ে বেরোলে আমি বেশ একখানা ঝরঝরে মানুষ হতাম।

যাঃ, কী যে বলো !

তোর বাড়িতে একদিন নিয়ে যাবি ?

তার আর কথা কি ? কালই চলো। রিকশায় দশ মিনিটও নয়। তবে মাঝখানে সুভাষপল্লীর রাস্তাটা একটু খারাপ, ঝাঁকুনি-টাকুনি লাগতে পারে।

ঝাঁকুনিতে কিছু হবে না। যাবো।

ধীরাজ খুব খুশি হয়ে বলে, বাড়ির এমন অবস্থা যে কাউকে যেতে বলতে লজ্জা করে। তুমি নিজে থেকে যেতে চাওয়ায় এত ভাল লাগল !

প্রীতম প্রসঙ্গ পালটানোর জন্য বলে, আজ ধূপকাঠি কী রকম বিক্রি হল ?

উদাস হয়ে ধীরাজ বলে, বাঁধা গাহেক কিছু আছে, তাদের কাছে পৌঁছে দিয়ে আসি। বিক্রিবাটা ভাল নয়। প্রচণ্ড কমপিটিশন। মালমশলার দামও চড়া।

অন্য কিছু বাবসা করিস না কেন ?

অনেক কিছু করার চেষ্টা কি আর করিনি ? কয়লার দোকান দিলাম, চানাচুর বানালাম, আলুও বেচেছি, কিন্তু কোনোটাতেই মার্কেট পাওয়া গেল না। অল্প পুঁজির কারবার তো, চটপট রিটার্ন না পেলে পেটে গামছা বাঁধতে হয়। লম্বীর টাকা পেট্রায় নমঃ হয়ে যায়। সবই তো বোঝ। তুমি কত বড় অ্যাকাউন্ট্যান্ট।

প্রীতম ম্লান হাসল। ধীরাজের আয়ব্যয়ের হিসেব কষতে বসলে সে নিশ্চয়ই খুব অবাক হয়ে দেখবে ডেবিট-ক্রেডিটে অনেক ভুতুড়ে এনট্রি, অনেক অলৌকিক যোগ-বিয়োগ। সে জানে, ধীরাজের আয় মাসে দু শো টাকাও নয়। দুই মেয়ে, এক ছেলে, বউ, মা নিয়ে সংসার। প্রীতম মাথা নাড়ে, না, কোনো চার্টার্ড অ্যাকাউন্ট্যান্টের পক্ষেই সম্ভব নয় ওর ব্যালান্স শীট তৈরি করা। তার জন্য দরকার ম্যাজিক জানা।

ধীরাজ একটা শ্বাস ফেলে বলে, তবে সত্যনা কি জানো, দুনিয়ায় আমার চেয়েও খারাপ অবস্থায় লাখ লাখ কোটি কোটি মানুষ বেঁচে আছে।

প্রীতম আনমনে মাথা নাড়ল। পৃথিবীতে কে কেমন ভাবে বেঁচে আছে তা নিয়ে বহুকাল সে সত্যিকারের মাথা ঘামায়নি। দুঃখ-দুর্দশায় নাভিস্বাস ওঠা এই দেশে যে সে নিজে সপরিবারে না খেয়ে মরবে না এবং মোটামুটি সুখেই থাকতে পারবে এটা বুঝেই তৃপ্ত ছিল। মাঝে মাঝে ভিথিরিকে ভিক্ষে দেওয়া, সমবেদনা বোধ করা এবং মানুষের জন্য কিছু করা উচিত বলে ভাবা, এ ছাড়া আর কিছু করার ছিল না তার।

ধীরাজ চলে যাওয়ার পর অনেকক্ষণ বুম হয়ে বসে সে পৃথিবীর মানুষজন নিয়ে ভাবল। বৃক্কের মধ্যে ভারী একটা চাপ কষ্ট। মরেই যদি যেতে হয় তবে দুনিয়ার আরো কিছু মানুষের সঙ্গে চেনা-জানা হোক। সারা জীবনে মাত্র গুটিকয় মানুষের সঙ্গে তার পরিচয় হয়েছে, অথচ পৃথিবীতে কত কোটি কোটি মানুষ।

রাত্রিবেলা শতম তার মাথায় জপ করতে এলে প্রীতম গম্ভীর মুখে বলে, তোর নামজপে কাজ হচ্ছে। আমি অন্য রকম ফিল করছি।

শাস্ত্র হাসিমুখে শতম বলে, জপাৎ সিদ্ধির্জপাৎ সিদ্ধির্জপাৎ সিদ্ধি ন সংশয়ঃ।

মানছি।

তবে এই নাম নিজেই নাও না কেন?

এক জায়গায় মাথা মুড়োতেই হবে?

শতম গম্ভীর হয়ে বলে, এই যে তুমি এত অ্যাকাউন্টেন্সি শিখেছো, এই তুমিও তো একদিন এক দুই লিখতে জানতে না, অ আ ক খ জানতে না। কেউ হাত ধরে দাগা বুলিয়ে বুলিয়ে শিখিয়েছিল। তাই না? তখন তো সংশয় ছিল না! এখন জীবনের হিজিবিজি অনেক হিসেবনিকেশ জট পাকিয়েছে, কেউ যদি জট খুলতে শেখায় তবে আপত্তি কি?

প্রীতম চুপ করে চোখ বুজে থাকে। অনেকক্ষণ বাদে আপন মনে বলে, জপাৎ সিদ্ধির্জপাৎ সিদ্ধির্জপাৎ সিদ্ধি ন সংশয়ঃ। শতম, ন সংশয়ঃ।

শুনে শতম একটু হাসল। বলল, ন সংশয়ঃ।

আনন্দের রেশটা রইল পরদিন সকালেও। ঘুম ভেঙে চারিদিকে আবছা ভোরের নরম আলোয় এক স্নিগ্ধ জগৎ দেখতে পায় সে। শরীরে জীবাণুদের কোলাহল নেই, একাকিত্বের বোধ নেই, মৃত্যুর বাঘ কোথাও ডাকেনি।

মরম! মরম! ওঠ, ওঠ।

ডাকছো দাদা? বলে মরম উঠে পড়ে।

চল বাইরে। দেখ, কী সুন্দর ভোর! দরজা খুলে দে শীগগীর।

খুলছি। বলে মরম উঠে দরজা খোলে। প্রীতমের চেয়ারটা টেনে বের করে বারান্দায়।

বোসো দাদা।

প্রীতম বসে বলে, তুইও বোস। দেখ, চারদিকে চেয়ে দেখ।

মরম বারান্দার সিঁড়িতে বসে হাই তোলে। কথা বলে না। কিন্তু বুম হয়ে বসে সেও চেয়ে থাকে আকাশের দিকে।

প্রীতম মুগ্ধ সম্মোহিত চোখে চেয়ে থাকে। ভিতরে এক আনন্দের উৎস মুখ খুলে নির্ঝরনের স্বপ্নভঙ্গ হতে থাকে। কোথা থেকে আসে এত আনন্দ?

ভবানীপুরের বাসা, লাবু, বিলু, অরুণ, ভেতরের সেই বিছানা সব ছায়াছবির মতো চোখের ওপর দিয়ে ভেসে যায়। কিন্তু কিছুই স্পর্শ করে না তাকে।

মরম, একটা রিকশা ডেকে আন। আমি একটু বেড়াতে যাবো।

বেড়াতে যাবে? পারবে?

পারব । যা ।

আমি সঙ্গে যাবো কিন্তু ।

যাবি ।

মা যদি বকে ?

বকবে না । দেবী করিস না, যা ।

মরম যায় এবং অলক্ষণের মধ্যেই রিকশা নিয়ে আসে ।

বারান্দা থেকে প্রীতমকে ধরে ধরে নিয়ে রিকশায় তুলবে বলে হাত বাড়িয়েছিল মরম ।

প্রীতম হাতটা সরিয়ে দিয়ে বলে, পারব । আজ পারব ।

শুধু রিকশায় উঠবার সময় একটু ভর দিতে হল । কিন্তু স্বচ্ছন্দেই উঠে বসতে পারল প্রীতম ।

আমি বরং সাইকেলটা নিয়ে আসি দাদা । রিকশায় দুজন উঠলে তোমার কষ্ট হবে । মরম বলে ।

যা, নিয়ে আয় । অনামনে বলে প্রীতম । জাগতিক কথাবার্তা তার ভাল লাগছে না । তার চেয়ে অনেক জরুরী হল বেরিয়ে পড়া । কী যে একটা কাণ্ড ঘটে যাচ্ছে জগৎ জুড়ে ! তার দেবী হয়ে যাচ্ছে ।

শিলিগুড়ির অতি পরিচিত হাকিমপাড়া ছাড়িয়ে তিলক ময়দান, রোড স্টেশন, সেবকের মোড় হয়ে মহানন্দার পাড় । পিছন থেকে মরম চেষ্টা করে বলে, আরো যাবে বড়দা ?

হ্যাঁ । আরো একটু ।

হিলকাট রোড ধরে জনবিরল পীচ রাস্তা বেয়ে বহু দূর চলে আসে রিকশা । কুসুম-রঙা রোড উঠল-পুবে । প্রীতম শুধু দৃশ্যাবলী দেখছে না । এই পৃথিবীর গভীরতায় আজ পরতে পরতে ডুবে যাচ্ছে সে । মিশে যাচ্ছে এই রোড, হাওয়া, গাছপালা ও শূন্যের মধ্যে ।

যখন প্রীতম ফিরে এল তখন বাইরের বারান্দায় উদ্বেগ নিয়ে দাঁড়িয়ে আছে মা, বাবা আর ছবি । রূপম স্কুটারে বেরিয়েছে খবর করতে । বাইরের রাস্তায় খালি গায়ে দাড়িওয়ালা শতম বৃকে হাত দিয়ে বিশাল চেহারা সটান সোজা দাঁড়িয়ে আছে ।

মরম সাইকেল থেকে নামতে নামতে সভয়ে বলে, আমার দোষ নেই, বড়দা নিজেই গেল । আমি শুধু সঙ্গে—

মা ধমক দিয়ে বলে, তা আমাকে বলে যাবি তো ! রোগা ছেলটাকে নিয়ে বেরিয়েছিস । চিন্তায় আমার মধ্যে আর আমি নেই ।

শতম শুধু প্রীতমের দিকে চেয়ে শাস্ত মুখে একটু হাসল ।

শরীর ভরে এমন দুর্বল ক্লান্তি আগে ছিল না বিলুর । আজকাল সন্ধ্যাবেলা যখন ফেরে তখন দম ফুরিয়ে যায় যেন । অনেকক্ষণ শুয়ে বসে বিশ্রাম না নিয়ে কোনো কাজে হাত দিতে পারে না ।

প্রীতম যাওয়ার পর ফ্ল্যাটটাকে নতুন করে সাজিয়ে নিয়েছে বিলু । প্রীতম যে ঘরে থাকত সেটা এখন লাবুর ঘর । বড় চৌকিতে লাবু আর অচলা শোয় । আলাদা ঘরে বিলু একা । রাত্রিবেলা তার একটানা নির্বিঘ্ন ঘুম দরকার বলেই এই ব্যবস্থা । লাবু বড্ড হাত পা ছড়িয়ে শোয়, ছটফট করে ঘুমের মধ্যে, দাঁত কিড়মিড় তো আছেই, ওকে নিয়ে শুলে বিলুর ঘুমের অসুবিধে হয় ।

বিদেশ থেকে ঘুরে এসে অরুণ তাকে একদিন বলেছে, বিলু । ইউ নীড সেক্স ।

বোকা বোকা কথা বোলো না ।

মুশকিল হল, তুমি নিজেই জানো না যে, ইউ নীড সেক্স ।

না অরুণ, ও সব নয় । আমি এমনিতেই টায়ার্ড । আমার দরকার অনেক ঘুম ।

তোমার ম্যালনিউট্রিশনও হচ্ছে । ডাক্তার দেখাবে ?

দূর ! কথায় কথায় কেউ ডাক্তার দেখায় ? আমার অসুখ কোথায় ?

তোমার অসুখ হয়েছে, জানতি পারতিছ না ।

ইয়ার্কি কোরো না ।

তুমি রোজ কি খাও বলো তো ?

সবাই যা খায় ।

এনাফ অফ প্রোটিন ভিটামিন ?

অত জানি না । মাছ মাংস ডিম মাখন তো কম গিলছি না বাপু । প্রোটিন-ট্রোটিন কতটা

কী যাচ্ছে ভেতরে কে জানে !

হজম হয় ?

আমার কোনোকালে হজমের প্রবলেম নেই ।

তাহলে কেন টায়ার্ড ? ফিলিং লোনলি ?

কি করে বলব কেন টায়ার্ড । আর লোনলি ফিল করার মতো সময় পাই কোথায় ?

ডাক্তার দেখাও । তবে আমার মতে ইউ নীড সেক্স, ব্রুটাল সেক্স ।

তুমি এবার বাইরে গিয়ে অত্যন্ত অসভ্য হয়ে এসেছো ।

সত্যি কথা বলব বিলু ? তোমাদের পেটে খিদে আর মুখে লাজ আমার একদম পছন্দ নয় । সেই জন্য আমার বিদেশ বেশী ভাল লাগে, সেখানে প্রিটেনশন নেই । দে নীড ইট, দে ডু ইট ।

বিলু ধমক দিয়ে বলে, আমার খিদে নেই, নীড নেই । আমি অন্য কোনো কারণে টায়ার্ড । আমার কাছে সবটাই ভীষণ মিনিংলেস হয়ে যাচ্ছে ।

কোনটা ?

সব কিছু । চাকরি, সংসার, ইভন বৈচে থাকা ।

দেন ফল ইন লাভ উইথ মি ।

লাভ কি ? তুমি তো কদিন বাদেই টোপের মাথায় দিয়ে ছাঁদনাতলায় গিয়ে বসবে ।

না-ও হতে পারে সেটা । আমি অনেক ভেবে দেখলাম ইট বেটার বি ইউ ।

এ কথা শুনে অনেকক্ষণ চুপ করে থাকে বিলু । তারপর আচ্ছন্ন এক মুখ তুলে বলে, শুনে একটুও আনন্দ হল না, কেঁপে উঠলাম না, নতুন কিছু মনে হল না তো অরুণ !

‘তুমি ভীষণ ফ্রিজিড হয়ে যাচ্ছে । রাউজ, রাউজ ইওরসেলফ ।

আমি ভীষণ টায়ার্ড । কিন্তু সেটা শরীরের ক্লাস্তি নয় । মনটাই কেমন ব্ল্যাংক ।

চলো, আজ তোমাকে আমার অ্যাপার্টমেন্টে নিয়ে যাবো ।

তোমার বদমাইশীর অ্যাপার্টমেন্টে আমি আর যেতে রাজি নই ।

মোটাই বদমাইশী নয় । বিয়ে করে ঘর বাঁধব বলে এক কার্ডি ঢাকায় কেনা ফ্ল্যাট ।

ইয়ার্কি কোরো না । চলো ।

অপ্রতিরোধ্য অরুণকে ঠেকাবে কি করে বিলু ? তা ছাড়া এই যে ক্লাস্তি, এই যে ফাঁকা মন এর জন্যও একটা বাকানি দরকার । হয়তো অরুণ ঠিকই বলছে । কে জানে !

ইচ্ছে-অনিচ্ছের মাঝামাঝি দোল খায় বিলু । আর সেই দ্বিধার রক্তপথে অরুণ তার পথ

করে নেয়। সেই সাজানো সুন্দর ঈষদীয় তিন ঘরের ফাঁকা পড়ে থাকা ফ্ল্যাটে নিজেকে বিসর্জন দেয় বিলু।

কিন্তু যখন একটু রাতে ভবানীপুরের বাসায় তাকে পৌঁছে দেয় অরুণ, তখন গলিপথটুকু একা হেঁটে আসতে আসতে সে টের পায়, ভূতের মতো তার ঘাড়ের বসে ঠ্যাং দোলাচ্ছে সেই ক্রান্তি, সেই অবসাদ।

বহুদিন প্রীতমকে চিঠি লেখেন সরাসরি। বাড়ির অন্য লোককে লিখেছে। আজ কি ভেবে রাতে বিলু একটা ইনল্যাণ্ডে প্রীতমকে লিখল, ভাবছি কিছুদিন ছুটি নিয়ে তোমার কাছে যাবো। এখানে ভাল লাগছে না। তুমি কেমন আছো?...

॥ সাতষট্টি ॥

চিত্রার বিয়ে কেমন হল, জামাই পছন্দ হল কিনা তা তো বললে না একবারও। এলাহাবাদ থেকে বেনারসের ট্রেন ছেড়ে দেওয়ার পর একথা জিজ্ঞেস করল তৃষা।

শ্রীনাথ জানালা দিয়ে বাইরে চেয়ে ছিল। একটু আনমনা। জীবনে সে কলকাতা ছেড়ে এতদূর আসেনি। অথচ আসার পর নতুন রকমের কিছুও বোধ হচ্ছে না। গোটা দেশটা, গোটা পৃথিবীটাই বোধহয় মোটামুটি একঘেয়ে রকমের। তবু নতুন কিছু বোধ করার খুব চেষ্টা করছিল সে। তৃষার প্রশ্ন শুনে মুখ ঘুরিয়ে বলল, জামাইয়ের মুখে পক্সের দাগ আছে, না?

একটু আছে। খুব বেশী নয়। তেমন চোখে পড়ে না।

কিসের ব্যবসা ওদের?

কতবার তো বললাম, আবগারি।

আবগারি মানে গাঁজা আফিং এসব নাকি?

হ্যাঁ। তবে চার পুরুষের ব্যবসা। অনেক টাকা। কত বনেদী নিজের চোখেই তো দেখলে।

হ্যাঁ, অনেক টাকা। টাকা না হলে তোমার মন সহজে ভেজাতে পারত না।

টাকা জিনিসটা কি খুব ফ্যালনা? ছেলের বিদ্যোও তেঁা কম নেই!

শ্রীনাথ মাথা নাড়ল, ভাল। আমাদের আন্দাজে খুবই ভাল পাত্র।

তোমার মেয়েরও পছন্দ। কনভেন্টে পড়া, স্টাইলিস্ট মেয়ে যখন পছন্দ করেছে তখন বুঝতে হবে পাত্র ফ্যালনা নয়।

ফেলছে কে?

তোমার মুখ দেখে মনে হচ্ছে খুশি হওনি। চিত্রা চলে যাওয়ার সময় একটু কাঁদলেও না।

কান্না না এলে কি করব? বিরক্ত শ্রীনাথ বলে, আমার সহজে কান্নাটান্না পায় না।

চিত্রা দুঃখ পেয়েছে। ওকে তুমি ছোটবেলায় কী ভানটাই বাসতে!

শ্রীনাথ কিছুক্ষণ গুম হয়ে থাকে। তারপর বলে, দুঃখ পাওয়ার কিছু তো নেই। মাসীর কাছে ছিল, ঋগুরবাড়ি গেছে। আমার কাছে তো ছিল না, আমার কাছ থেকে চলেও যায়নি।

ওটা কোনো যুক্তি নয়। দূরে ছিল, তাতে কি? তবু তো তোমার মেয়েই ছিল। এখন গোত্র ছেড়ে অন্য বাড়ির মানুষ হয়ে গেল। মেয়েদের কাছে যে এটা কত বড় ঘটনা!

শ্রীনাথ মাথা নেড়ে বলে, কি জানি ! আমি তেমন দুঃখটুংখ পাচ্ছি না । তবে ওর কথা যেমন মনে হত তেমনি মনে হবে । এলাহাবাদেই ছিল, সেখানেই রইল । দুঃখের যে কী আছে !

ওর বরের সঙ্গে তুমি একটাও কথা বলোনি ।

বলিনি ! শ্রীনাথ অবাক হয়ে বলে, না, মনে হচ্ছে বলেছি !

কি বলেছো ?

ঠিক মনে নেই । তবে বিয়ের পরদিন সকালে ও একটা তোয়ালে খুঁজছিল বাথরুমে যাওয়ার জন্য । আমি একটা তোয়ালে বিছানা থেকে তুলে এনে দিয়েছিলাম । আর সেই সঙ্গে নীচতলার বাথরুমটাও দেখিয়ে দিয়েছিলাম, মনে আছে ।

শুধু এইটুকু ?

শ্রীনাথ লজ্জিত হয়ে বলে, দরকার না হলে গায়ে পড়ে কথা বলার কি আছে ?

শত হলেও সে তোমার জামাই । ছেলের মতো ।

জামাই কথাটা হঠাৎ খুব অদ্ভুত লাগল শ্রীনাথের কাছে । তার জামাই, ভারী নতুন কথা । একদা নিজের বিয়ের পর সে যখন জামাই হয়েছিল তখনো তার ভারী নতুন রকমের লাগত কথাটা ।

ফার্স্ট ক্লাস কামরায় এতক্ষণ কোনো ভীড় ছিল না । কিন্তু ক্রমে একটি দুটি স্টেশনে লোক উঠতে লাগল । লোকগুলোকে দেখেই মনে হয় বিনা টিকিটের যাত্রী ।

লোক ওঠায় কথাবার্তা কমে গেল । উল্টোদিকের সীটে জানালার পাশে বসা নিয়ে মঞ্জু; স্বপ্না আর সজল অনেকক্ষণ মৃদুস্বরে ঝগড়া করছে । অবশ্য সজলই জানালার ধার দখল করেছে শেষ পর্যন্ত । এপাশে জানালার ধারে শ্রীনাথ, পাশে তৃষা । সরিৎ, বৃন্দা, মংলু আর নিতাই অন্য কামরায় আছে ।

শ্রীনাথ বাইরের দিকে চেয়ে ছিল । বেশ কিছুক্ষণ বাদে বলল, আমার মতামত বড় কথা নয় । আমি জানি, চিত্রার ভাল বিয়েই হয়েছে । এসব ব্যাপারে তোমার সহজে ভুল হবে না ।

তৃষা চুপ করে থাকল কিছুক্ষণ । তারপর হঠাৎ একটু জ্বালাধরা গলায় বলল, চিত্রার বিয়েতে তোমার বাড়ির কেউ এল না । অস্তুত দীপু আসবে বলে আশা করেছিলাম । কত করে চিঠি দিলাম, সরিৎ গিয়ে দু'দিন মেসবাড়ি থেকে ফিরে এল দেখা না পেয়ে । সে এলে সম্প্রদানটা তাকে দিয়েই করানোর ইচ্ছে ছিল ।

বিয়ে যদি কলকাতায় দিতে তবে আসত । এলাহাবাদ কি সোজা দূর ? দীপু কাজের মানুষ ।

এমন কি বাবা পর্যন্ত আসতে রাজি হলেন না । ছোটো ছেলের কাছে গিয়ে বসে রইলেন । এসব সবাই লক্ষ করে ।

বুড়ো মানুষটাকে টেনে এনে খামোখা কষ্ট দেওয়া ।

তৃষা চুপ করে চেয়ে রইল সামনের দিকে ।

শ্রীনাথ নরম সুরে বলল, তুমি অকারণে ভাবছ । চিত্রার বিয়ে খুব ভাল হয়েছে । আমি বহুকাল এমন ধুমধামের বিয়ে দেখিনি ।

ধুমধাম তো মেজদির জন্য । কম করেও বিশ-ত্রিশ হাজার টাকা ও নিজেই খরচ করেছে । আমাদের গায়ে আঁচ লাগতে দেয়নি ।

শ্রীনাথ একটু অবাক হয়ে বলে, তাই নাকি ? আমি ভাবলাম—

তুষা একটা দীর্ঘশ্বাস ছেড়ে বলে, চিত্রার জন্য আমাদের কোনো দায়ই পোয়াতে হল না ।
ও যে আমার মেয়ে তা টেরও পেলাম না ।

শ্রীনাথ গভীর হয়ে বলে, সে তো তোমার জন্যে । আমি ওকে এলাহাবাদে রাখা পছন্দ করিনি ।

তুষা ছোট্টো একটা ধমক দেয়, এখন ওসব কথা থাক ।

ফাল্গুনের মাঝামাঝি এসব জায়গায় এখনো বেশ শীত আছে । খোলা জানালা দিয়ে হু-হু করে হাওয়া আসছে । শ্রীনাথ জানালাটা অর্ধেক নামিয়ে দিয়ে রূপার নাক ঢেকে ঢুলতে থাকে ।

শ্রেনের বড়ো মালিক কাশীতে বহুকাল আগে বাড়ি করে রেখে গেছেন । মালিকেব ছেলের কাছে চাইতেই চাবি দিয়ে দিলেন, সুপ্তে বাড়ির দারোয়ানকে লেখা চিঠি ।

কাশীতে এসে তাই কোনো অসুবিধেই হল না তাদের । দিন দুই ভারী অদ্ভুত সুন্দর কেটে গেল । বিশ্বনাথ গলিতে ঢুকে শতক গলির ধাঁধায় ঘুরে বেড়ানো, দশাশ্বমেধ ঘাট, বাজার, রাবড়ি, বেনারসীর কারখানা, জর্দা, কাশীর বিখ্যাত বেগুন সব মিলিয়ে রতনপুরের বন্ধ জীবন থেকে বিচিত্র এক মুক্তি । এ ক'দিন তাদের সম্পর্কের জটিলতাগুলো বোঝা গেল না, সবাই হাসিখুশি রইল ।

বেনারস থেকে রিজার্ভেশন না পেয়ে সরিৎ মোগলসরাই থেকে রিজার্ভেশন করিয়ে আনল । ফিরতেই হবে । চিত্রা আর তার বর দ্বিরাগমনে রতনপুর যাবে । তার আগেই পৌঁছানো দরকার ।

যাওয়ার দিন সকালে উঠে গঙ্গাস্নান করে এসে তুষা হঠাৎ শ্রীনাথকে বলল, কাশীতে একটা বাড়ি করবে ?

শ্রীনাথ অবাক হয়ে বলে, কাশীতে ?

ভারী ভাল জায়গা । বহু বাঙালীর বাস ।

শ্রীনাথ বলে, তা করতে পারো, যদি ইচ্ছে হয় ।

আমার খুব ইচ্ছে । এর আগের বার এসেই জায়গাটা এত পছন্দ হয়ে গিয়েছিল । এখন যদি তোমার মত থাকে ।

আমার মত ! শ্রীনাথ একটু বিরক্ত হয়ে বলে, সংসারে আবার আমার অনুমতির কথা উঠছে কবে থেকে ?

তুষা এই চিমটি গায়ে মাখল না । তার চোখ মুখ অন্যরকম । একটা অদ্ভুত উদাসীন আনন্দ তাকে বাস্তবতা থেকে অনেকটা দূরে ঠেলে দিয়েছে যেন । সে শান্তস্বরে বলল, তোমার অনুমতির কথা ওঠে, কারণ তোমাকেও এখানে এসে থাকতে হবে ।

আমি থাকব ? একা ?

তুষা মৃদু হেসে বলে, একা কেন ? আমিও থাকব ।

শ্রীনাথ হাঁ'করে চেয়ে থেকে বলে, কাশীবাসী হতে চাও ?

হলে দোষ কি ? সংসারে তো তোমার আমার মিল হল না, যদি কাশীতে থেকে হয় ।

মিল নিয়ে খুব মাথা ঘামাচ্ছে নাকি আজকাল ?

তুষা এলোচুলে গামছার ঝাপটা মেরে জল ঝরিয়ে কিছুক্ষণ জবাবটা এড়াল । তারপর বলল, তুমি বোধহয় মিল চাও না !

শ্রীনাথ মাথা নেড়ে বলে, আর মিল দিয়ে কি হবে ? নয়স চলে গেছে, সময় চলে গেছে ।

মিলের সঙ্গে বয়সের কী সম্পর্ক বলে তো ! মিলটা কি কেবল কম বয়সের ব্যাপার ?
তা নয় । বলছিলাম, মিল থাকলে জীবনটা এমন শয্যাকণ্টকী হয়ে উঠত না তৃষা । যা
হওয়ার তা হয়ে গেছে । আর মিল হওয়ার নয় । এখন মন থেকে গেছে, রুচি থেকে গেছে,
অভ্যাস থেকে গেছে, এখন আর কেউ কারো জন্য নিজেকে বদলাতে পারব না । আর
ছাড়কাট না করতে পারলে কি মিল হয় ?

আমার বিশ্বাস, এখানে এসে থাকলে আমরা দুজনেই বদলে যাবো ।

দরকার কি ? রতনপুরে তোমার বিষয় সম্পত্তি আছে, ছেলেপুলে আছে, সেসব ছেড়ে
আসতেও পারবে না । খামোখা স্বপ্ন দেখা ।

তোমার পিছুটান নেই ?

না । আমি বহুকাল আগে থেকেই আলাদা হয়ে যেতে চেয়েছিলাম ।

তোমার যদি পিছুটান না থাকে তবে আমাবও নেই ।

নেই ? হাসালে ।

তৃষা শ্রীনাথের পাশে বসে ক্লান্ত স্বরে বলে, আমি সংসারে সব কিছু ঘেঁটে দেখেছি ।
আমি জানি ও থেকে আমাব কিছু পাওয়ার নেই । একজনেবও মন পাইনি, কেউ আমার
জন্য একটু দুঃখ করে না, আমাকে নিয়ে ভাবে না ।

ছেলেমেয়েদেব কথা বলছ ?

তোমার কথাও ।

শ্রীনাথ হাসিমুখে বলে, কারো ভালবাসাটাসা তো তুমি কোনোকালে চাওনি । টাকা
চেয়েছো, ক্ষমতা চেয়েছো । প্রভুত্ব চেয়েছো । সব পেয়ে গেছ ।

প্রভুত্ব ! তাই বা পেলাম কোথায় ? আমার পেটের ছেলে আমাকে মানে না, জানো ?

শ্রীনাথ তৃষার দুর্দশার কথায় খুশি হচ্ছিল । হচ্ছে, হচ্ছে । কর্মের ফল ফলছে আস্তে
আস্তে । সে বলল, সজল তোমাকে মানে না বুঝি ? ঠিক আছে আমি শাসন করে দেবো ।

তৃষা করুণ করে একটু হাসে, ভারী আশ্চর্যের ব্যাপার, দুনিয়ায় সজল একমাত্র তোমাকেই
মানে । কিন্তু তোমার ওকে শাসন করার দরকার নেই । শাসনে ওর ভিতরটা তো বদলাবে
না ।

ও কি তোমাকে ভয় পায় না ?

ভয় পেতে বলিও না । কিন্তু আমাকে ঘেন্না করার মতো খারাপ কি আমি ? ওকে
কোনোদিন জিজ্ঞেস কোবো তো, কেন ও আমাকে ঘেন্না করে !

সজল তোমাকে ঘেন্না করে না । ভয় পায় ।

ভয় কবে কেটে গেছে ! তুমি জানো না । শুধু আমি জানি । হয়তো তুমিই আস্তে আস্তে
ওর মধ্যে এই বিষ ঢুকিয়ে দিয়েছো ।

বিষ ! শ্রীনাথের বুকে আচমকা খামচা দিয়ে ধরল এক ভয় । তাই তো ! বিষের কথা সে
ভুলে গিয়েছিল । প্রতিদিন তার খাবারে, তার জলে, তার শ্বাসবায়ুতে অল্প অল্প করে বিষ
মিশিয়ে দিয়েছে তৃষা । একটু একটু করে তার আয়ু কমে গেছে । বয়সের আগেই সে বৃড়িয়ে
গেছে কত ।

গলা খাঁকারি দিয়ে শ্রীনাথ বলে, বিষের কথা মনে করিয়ে দিলে । আমার সর্বাস্তে বিষ ।
কি করে যে বেঁচে আছি !

তৃষা একটা দীর্ঘশ্বাস ছেড়ে বলে, এইসব কথা বলেই না তুমি সজলকে বেয়াড়া তৈরি
করেছো । ওরও সন্দেহ আমরা তোমার খাবারে বিষ দিই । বেশ কয়েকবার ও তোমার

খাবার আর জলের নমুনা নিয়ে গিয়ে কেমিকেল টেস্ট করিয়েছে।

শ্রীনাথ উজ্জ্বল হয়ে বলে, কি পেয়েছে ?

কী পাবে ? বিষ তো তোমার মনে।

শ্রীনাথ চুপ করে থাকে।

তুষা আস্তে করে বলে, সজলকে কেন আমার শত্রু করে তুললে বলো তো !

শ্রীনাথ করুণ হেসে বলে, আমি কাউকেই কিছু করার মধ্যে রাখি না। সজল যদি তোমার শত্রু হয়ে থাকে তবে তা হয়েছে তোমার জন্যেই।

তুষা হঠাৎ আবার উদাস হয়ে বলল, তাই হবে। একটা দিকে বাঁধ দিতে গিয়ে আমার অন্য দিকটা ভেসে গেছে।

তুষা অনেকক্ষণ এলোচুলে বসে থাকে। তারপর বলে, কাশীতে বাড়ি করার কথাটা তাহলে কোথায় দাঁড়াল ?

বাড়ি কববে করো।

তুমি ?

আমি কি ? তোমার সঙ্গে এসে থাকব কি না ?

সেই কথাই তো বারবার জিজ্ঞেস করছি।

হঠাৎ কেন যে আমাকে তোমার দরকার হচ্ছে সেইটেই বুঝতে পারছি না।

তুমি কি বিশ্বাস করো যে, আমার কোনো আশ্রয় নেই ? কোনো অবলম্বন নেই ?

শ্রীনাথ হেসে ফেলল, তুমি নিজেই কি বিশ্বাস করো ? তুমি কত লোকের আশ্রয়দাত্রী, পালয়িত্রী ! তোমার ডালে ডালে কত পাখি বাসা করে আছে, মৌমাছি চাক বেঁধেছে।

তুষাও মৃদু হাসল। উঠে গরদের লালপেড়ে একটা শাড়ি পরতে পবতে বলল, চলো দুজনে বিশ্বনাথের পূজা দিয়ে আসি।

পূজায় আমার বিশ্বাস নেই। তুমি যাও।

আমারও নেই। কিন্তু কাশীতে এলে কেমন যেন হচ্ছে হয়।

তুষা বেরিয়ে যাচ্ছে। শ্রীনাথ সামনের দোতলার বারান্দায় দাঁড়িয়ে চুপিসাড়ে দেখল, লালপেড়ে গরদের শাড়ি পরা বয়স্ক সুন্দরী মহিলা রিকশায় উঠছে। একটু ঘোমটা টানল। হাতে তোয়ালে দিয়ে ঢাকা একটা পিতলের রেকাব। দশাটা খুবই অভিনব। খুবই অদ্ভুত।

ছেলেমেয়েরা সরিতের সঙ্গে ইউনিভারসিটি দেখতে গেছে। বাড়িতে থাকলে ওদের ডেকে দশাটা দেখাত শ্রীনাথ, দাখ, কর্মফল মানুষকে কত নরম-সরম করে তোলে। দাখ, চেয়ে দাখ।

ফাঁকা বড় বাড়িটায় শ্রীনাথ একা একা নিঃশব্দে অনেকক্ষণ হাসল। বৃন্দা আর মংলু রান্নার কাজে ব্যস্ত। ছাদে উঠে গেল শ্রীনাথ। মস্ত কৈদো এক বাদর ঠ্যাং ঝুলিয়ে বসে ছিল রেলিং-এ। একবার তাকাল শ্রীনাথের দিকে, তবে গ্রাহ্য করল না। শ্রীনাথ বাদরটার হাত দশেক দূরে দাঁড়িয়ে নীচের দৃশ্য দেখল অনেকক্ষণ। মনটা হালকা লাগছে। ফুরফুরে লাগছে।

রাতে পাঞ্জাব মেল ধরে কলকাতা হয়ে রতনপুর পৌঁছোনো পর্যন্ত এমনিই ফুরফুরে রইল মনটা।

সারাক্ষণ আড়াল আবডাল থেকে আজকাল সজলকে লক্ষ করে তুষা। এই বডসড়, শস্তসমর্থ, বুদ্ধিমান, রাগী, তেজী আর সাহসী ছেলেটিকে বুঝবার চেষ্টা করে। এই একটা

মানুষের কাছে এসে হৌঁচট খেয়েছে তৃষা ।

কবে সেই শিশু সজলের খোলস ছেড়ে বেরিয়ে এল এই অচেনা পুরুষ তা বুঝতে পারেনি তৃষা । বুঝতে পারলে আগে থেকে সাবধান হত, লাগাম টেনে ধরত । কিন্তু এখন আর সময় নেই, বড্ড বেশী দেবী হয়ে গেছে । বুদ্ধিমতী তৃষা জানে, এখন রাশ ধরতে গেলে যে বিশ্ফোরণ ঘটবে তা সামলানোর ক্ষমতা তার নেই । এই সংসারে নিশ্চিতভাবে তার আধিপত্যের দিন শেষ হয়ে এল ।

সজল তার নিজস্ব কুংফু ক্লাব তৈরি করেছে । তার দলটি বিশাল । দাপট সাজঘাতিক । একদিন সজল এসে বলে, মা, স্কুলবাড়ির জমিটা পড়ে আছে, ওটা ক্লাবকে দেবে ? তৃষা কঠিন হওয়ার চেষ্টা করে বলে, ক্লাবের জন্য জমির কি দরকার ?

আমরা ক্লাবের নিজস্ব বাড়ি করব ।

না, ওসব হবে না । স্কুলবাড়ির একটা ঘরে এমনিতে ক্লাব খোলো, নিজস্ব জমিটমির দরকার নেই ।

সজল কাকুতিমিনতি করল না । চুপ করে কিছুক্ষণ দাঁড়িয়ে রইল সামনে । ততক্ষণ তৃষা তাব মুখের দিকে চাইতে সাহস পেল না ।

নিজের সঙ্গে আজকাল এরকম লড়াই করছে তৃষা । অহর্নিশ । ভয় কাকে বলে সে এতকাল জানত না । এই পরিণত বয়সে সে নতুন ভয় পাওয়া শিখছে । তার এই অসময়ে এক দুপুরে এসে হাজির হল দীপনাথ । মুখে চওড়া অপরাধী হাসি, হাতে একটা শাড়ির প্যাকেট ।

তোমার সঙ্গে কথা বলব না দীপু ।

রাগ করেছো জানি । কিন্তু আমার অনেক কাজ ছিল ।

ভাইবির বিয়েটা কি কাজ নয় ?

তোমারই তো দোষ । কেন এলাহাবাদে বিয়ে দিলে । এখানে দিলে আমরা সবাই থাকতে পারতাম ।

উপায় ছিল না । চিত্রার মাসীই তো ওকে মানুষ করেছে । তার বড় ইচ্ছে, এখানেই বিয়ে হোক ।

যাক হয়ে যে গেছে এই বেশ ।

কিন্তু আমার ইচ্ছে ছিল, তুমি ওকে সম্প্রদান করো ।

কে করল ?

তোমার মেজদা । কিন্তু বাপকে নাকি সম্প্রদান করতে নেই ।

ওসব কুসংস্কার ছাড়ো তো । এখন দেখ এ শাড়িটা চিত্রাকে মানাবে কিনা ।

শাড়ি দেখে অবাক তৃষা বলে, এটার তো অনেক দাম ! এ যে খাঁটি কাতান বেনারসী, পাটা জরিব্র কাজ ! এক কাঁড়ি দাম নিয়েছে নিশ্চয়ই !

আর এইটে । বলে দীপনাথ তার ফোলিও ব্যাগ থেকে একটা গয়নার বাস্র বের করে । তাতে অস্ত্রত আড়াই ভরির একটা মটরদানা হার ।

কী পাকা যে হয়েছে দীপু ! তৃষা হাঁ করে চেয়ে থাকে । তারপর হঠাৎ গয়নার বাস্র, শাড়ির প্যাকেট সব সরিয়ে রেখে আকুল গলায় বলে, শোনো দীপু, তোমার সঙ্গে আমার ভীষণ জরুরী দরকার ।

ভাত-টাত খাওয়াবে তো ! নাকি আগেই প্যাণ্ডোরার বাস্র খুলে বসবে ।

খাওয়াবো গো, অত ভেবো না । কিন্তু তোমার কথাই যে আমি সারাক্ষণ ভাবি । আমার

যে আর কেউ নেই !

দীপনাথ একটু ম্লান হয়ে বলে, সবাই মোরে করেন ডাকাডাকি, কখন শুনি পরকালের ডাক ?

ছিঃ দীপু ! পরকালের ডাক আমিই শুনছি । তুমি ছাড়া আর কেউ আমাকে সাশ্বনা দিতে পারবে না ।

দীপনাথ একটু অবাক হয় । বউদিকে এরকম চঞ্চল, বিভ্রান্ত সে কোনোকালে দেখিনি ।

॥ অটম্বট্টি ॥

তুষা যখন তার জন্য চা করতে গেল তখন দীপনাথ সারা বাড়ি ঘুরে দেখতে বেরিয়ে পড়ল ।

তার মন ভাল নেই । এক জায়গায় বেশীক্ষণ বসে থাকতে পারে না । হাঁফ ধরে যায় । জীবন থেকে কী একটা হারিয়ে গেল হঠাৎ । মনের মধ্যে একটা আলো জ্বলত এতদিন । সেটা নিভিয়ে কে যেন একটা ঘুম-আলো জ্বালিয়ে দিয়েছে । একটা লাভণ্য ছিল, একটা উগ্র আগ্রহ ছিল দিন যাপনের, বেঁচে থাকার । সেসব আর মনেই হয় না । সকাল থেকে কেবল গড়িমসি ভাব । দিন গড়িয়ে গড়িয়ে কাটে ।

বোস সাহেবকে নারসিং হোমে ভর্তি করতে হয়েছে । মাইন্ড স্ট্রোক । বিপদ তেমন কিছু নয় । তবু ডাক্তাররা সাবধান হচ্ছেন । ডাক্তার সেনগুপ্ত বলেছেন, মাইন্ড স্ট্রোকের পরের স্টেজেই মেজর স্ট্রোক হতে পারে ।

মহ্যাকে আগে কখনো দেখিনি দীপনাথ । কাল নারসিং হোমে দেখল । বয়স ষাটশ-ছাব্বিশের বেশী নয় । খুব সেজে এসেছিল বলেই কিনা কে জানে, দারুণ সুন্দরী দেখাচ্ছিল । মহ্যা বোস সাহেবের কিরকম বোন তা জানে না দীপনাথ । রঞ্জন অতটা ভেঙে বলেনি । শুধু বলেছে, মহ্যাদির সঙ্গে অনেকদিনের আভারস্টিয়ান্ডিং । ফ্যামিলির ব্যাপার বলে আমরা ব,ইরে এ নিয়ে আলোচনা করি না ।

গস্তীরভাবে দীপনাথ জিজ্ঞেস করেছিল, মহ্যা কেমন মেয়ে ?

খার, বলে কিছু শুনিনি কখনো । কিন্তু এ ব্যাপারটা ডেভেলপ করার পব সবই অন্যরকম হয়ে গেছে । মহ্যাদিকে কি আর ভাল বলা যায় !

দুজনের মধ্যে কার ইনিশিয়েটিভ বেশী, জানো ?

রঞ্জন মাথা নেড়েছে, যা ঘটবার তা ঘটেছে আমাদের অজ্ঞাতে ।

দীপনাথ একটা দীর্ঘশ্বাস ফেলে বলেছে, আমি এই ভেবে অবাক হচ্ছি, এতদিনের ব্যাপার, তবু আমি জানতে পারিনি কেন !

রঞ্জন হেসে ফেলে বলেছে, দীপদা, এটা আপনার জ্ঞানার কথাই নয় । মহ্যাদি আমার সেজে পিসীর মেয়ে, ওদের বাড়িতে আমাদের ভীষণ যাতায়াত ; তবু আমরাই ভাল করে জানি না । ভাসা ভাসা শুনেছি মাত্র ।

মহ্যার ঠিকানাটা আমাকে দেবে ?

কেন, সেখানে যাবেন ? গিয়ে লাভ নেই । মহ্যাদি ভীষণ রিজার্ভ মেয়ে । একটি কথাও বের করতে পারবেন না ।

কাল নারসিং হোমেও খুব রিজার্ভ দেখাচ্ছিল বটে মহ্যাকে । বেশী হাসে না, কথা বলে না । এম এস-সি পাস করে পোকা-মাকড়ের ওপর শক্ত ধরনের রিসার্চ করছে বলে শুনেছে

দীপনাথ । মুখে চোখে পড়ুয়া ছাপটা আছে । বেশ লম্বা, ফর্সা, অভিজাত চেহারা । মুখখানা অসম্ভব মিষ্টি দেখতে । এই মেয়ে বোস সাহেবের প্রেমে কেন পড়বে তা বুঝতে পারছিল না দীপনাথ । রহস্যটা ভাঙতেই হবে ।

মণিদীপা নারসিং হোমে আসে সকালের দিকে । বিকেলে কখনোই নয় । বোধহয় বিকেলে দীপনাথ যায় বলেই । কিন্তু বিকেলে বোস সাহেবের বাড়ির লোক, আত্মীয়কুটুমরা আসে, আসে মণিদীপার বাড়ি থেকেও কখনো কেউ । বেশ ভীড় হয়ে যায় ঘরের মধ্যে । কালও ছিল এরকম ভীড়ের দিন ।

বোস সাহেবকে কয়েকটা কুশল প্রশ্ন করে এবং মছয়াকে খুব ভাল করে দেখে করিডোরে এসে অপেক্ষা করছিল দীপনাথ । মছয়ার জন্য ।

পৃথিবীর সব সমস্যারই সমাধান সে করতে পারবে, এমন কথা সে নিজেও ভাবে না । কিন্তু দীপনাথের এযাবৎকালের জীবন কেবল কতগুলি প্রয়াস এবং চেষ্টার সমষ্টি । চেষ্টা করতে দোষ কি ?

সবাই চলে যাওয়ার পরও আধ ঘণ্টা বেশী থেকেছিল মছয়া । যখন বেরিয়ে এল তখন খুব অনামনস্ক দেখাচ্ছিল তাকে । চোখ নীচুর দিকে, বটুয়াটা বুকের কাছে চেপে ধরা ।

সিড়ির কাছ বরাবর দীপনাথ তার সঙ্গ ধরে বলল, আপনিই কি মছয়া ? নমস্কার । আমার নাম দীপনাথ চ্যাটার্জি । আমি বোস সাহেবের—

মছয়া একটু থতমত খেয়ে অবাক হয়ে তাকায় । তারপর বলে, জানি । ওর কাছে শুনেছি ।

কোনদিকে যাবেন ?

মছয়া একটু হাসল, বলল, আমাকে এগিয়ে দেওয়ার দরকার নেই ।

মরিয়া দীপনাথ বলে, কিন্তু আপনার সঙ্গে যে আমার একটু জরুরী দরকার !

মছয়া বোধহয় দরকারটা জানে । বোস সাহেবের কাছেই শুনে থাকবে । সংক্ষেপে বলল, আসুন ।

বলে সিড়ি দিয়ে নামতে লাগল ।

নারসিং হোমের গায়েই মিস্টো পার্ক । মাঝখানে পরিষ্কার চৌকো জলাশয় । মছয়া বিনা ভূমিকায় পার্কে ঢুকল এবং প্রায় একবারও দীপনাথের দিকে না তাকিয়ে বলল, এইখানে কথা বলা যায় ।

হ্যাঁ । বলে দীপনাথ বসবার জায়গা খুঁজছিল ।

মছয়া ঘাসের ওপর বসে বলল, বলুন ।

দূরত্ব রেখে দীপনাথ বসে এবং কোনোরকম দ্বিধা সংকোচ এসে বাধা দেওয়ার আগেই বলে, আপনি ভুল করছেন ।

মছয়া ন্যাকামি করল না, বিশ্বাসের ভান করল না, কিংবা জানতেও চাইল না কোন কাজটার কথা জিজ্ঞেস করা হচ্ছে । একটু চুপ থেকে মৃদু স্বরে বলল, আপনি খুব উদ্যোগী পুরুষ শুনেছি ।

দীপনাথের স্বভাবে একটা ঠাট্টা-রসিকতার পুরোনো রোগ আছে । সে জিজ্ঞেস করল, অধাবসায় আর উদ্যোগ শব্দের অর্থ কি এক ?

না । একটু আলাদা ।

তা হলে আমি উদ্যোগী নই । তবে অধাবসায়ী ।

মছয়া একথাটা বাঁকাভাবে ধরল না । খুবই সিরিয়াস গলায় বলল, আমাকে আপনার

কথা বলুন ।

কেন বলুন তো ! আমার কথা জেনে কি হবে ?

আমি ধৈর্যশীল অধ্যবসায়ী লোকদের কথা পছন্দ করি ।

দীপনাথ মাথা নেড়ে বলে, আমার জীবনে তো তেমন কোনো কিছু ঘটেনি !

ও আপনাকে খুব পছন্দ করে ।

বোস সাহেব ? বলে দীপনাথ একটু হেসে বলে, আগে হয়তো বা করতেন । এখন করেন না ।

আপনি কি রিজাইন করতে চেয়েছিলেন ?

চেয়েছিলাম । বোস সাহেব হঠাৎ অসুস্থ হয়ে না পড়লে হয়তো এর মধ্যেই কাজ ছেড়ে দিতাম । কিন্তু উনি নারসিং হোমে ভর্তি হওয়ায় আমাকেই সব সামলাতে হচ্ছে ।

জানি । সব শুনেছি । এও শুনেছি, ওর অসুখ সম্পর্কে আপনিই ওকে অনেকদিন আগে ওয়ার্নিং দিয়েছিলেন !

আমার মনে হয় ওর এই অসুখটা অনেকদিন ধরে পাকাচ্ছিল ।

মহুয়া মৃদু স্বরে বলল, এসব অসুখ অনেকদিন ধরেই তৈরী হয় । কিন্তু আমরা যারা ওকে ভালবাসি বলে ক্রম করি তারা কেউই এটা লক্ষ্য করিনি । আপনি করেছেন ।

দীপনাথ একটু লজ্জা পেয়ে বলে, সেটা কোনো ব্যাপার নয় । আমার ওয়ার্নিং উনি পাস্তা দেননি ।

পাস্তা দেয়নি নিজের সম্পর্কে ওর ভুল ধারণার ফলে । ও মনে করে ও খুব ফিট, খুব এফিসিয়েন্ট ।

আমি কিন্তু বোস সাহেবের স্বাস্থ্য নিয়ে কথা বলতে চাইছি না ।

মহুয়া একথাতেও রাগল না । বলল, আপনাকে বলতে হবে না । আপনি কি জানতে চান তা আমি জানি ।

দীপনাথ চুপ করে ছিল । মহুয়া উদাসভাবে কিছুক্ষণ জলের দিকে চেয়ে থেকে বলে, ভুল করছি তাও জানি । কিন্তু তবু তো এরকম কিছু ঘটে যায় । যাকে ঠেকানো যায় না !

ভুল কথাটা খুব নরম । এক্ষেত্রে শব্দটা হওয়া উচিত অন্যায় । আপনি তাও কি জানেন ?

জানি । কিন্তু আমার দিক থেকেও কিছু বলার আছে ।

বলুন । আমি শুনতেই চাইছি ।

কিছু করতেও চাইছেন । ঠিক তো ?

সম্ভব হলে ।

মহুয়া মৃদু হেসে বলল, আমিও আপনাকে হেল্প করতে চাই । কিন্তু পারব কিনা জানি না ।

আপনার কথাটা বলুন ।

আমার কথা হল, ও খুব হেলপ্লেস্ । দীপা বউদি ওকে কমপ্যানিয়নশীপ দিতে পারেনি । ওর দিক থেকেও একই রকম । যদি ওরা পারত তবে আমি সরেই দাঁড়াতাম ।

আপনি সরে দাঁড়ালে কি পারবে ?

বোধহয় না । আমি সরেই ছিলাম । বুধোদার সঙ্গে বহুকাল আমার কোনো সম্পর্কই ছিল না । অতীতে যে সফ্টনেস ছিল সেটা আমি জোর করে মন থেকে সবিয়ে রাখতাম । খুব কাজ করতাম । তারপর একদিন, খুব রিসেন্টলি, বুধোদা আমার কাছে গিয়ে বলল, জীবনের

আর মোটে ক'টা দিন আমার অবশিষ্ট আছে । এ ক'টা দিন আমাকে একটু শান্তি দাও । আমি কিছুতেই শান্তি পাচ্ছি না ।

সঙ্গে সঙ্গেই কি আপনি প্রস্তাবটা মেনে নিলেন ?

না । বৃথোদার কাছে সব আগে শুনলাম । অনেক ভেবে, বিশ্লেষণ করে বুঝলাম, বৃথোদা হয়তো ঠিক কথাই বলেছে । একটা কথা বলে রাখি, ও কিন্তু দীপাবউদির কোনো নিন্দে করেনি আমার কাছে । বউদি কেমন তা আমরাও জানি ।

কেমন বলুন তো !

একটু হেডস্ট্রিং । একটু বেপরোয়া । খুব অহংকারী । বৃথোদার দরকার ছিল ধীর স্থির বিবেচক একটি মেয়ে ।

দীপনাথ সামান্য উদ্ভার সঙ্গে বলে, কিন্তু বোস সাহেবই যে কিছুদিন আগে মিসেস বোসকে ডিভোর্স দিতে রাজি ছিলেন না !

মহুয়া শাস্ত গলায় বলে, এখনো ঠিক রাজি নয় । ডিভোর্স মানেই পাবলিসিটি । ও তা পছন্দ করে না । তাই চায়নি । আর তাতেই প্রমাণ হয়, বৃথোদার দিক দিয়ে চেষ্টার ত্রুটি ছিল না ।

দীপনাথ গুম হয়ে থেকে কিছুক্ষণ বাদে জিজ্ঞেস করে, আপনারা কোনো ফাইনাল ডিসিশন নিয়েছেন ?

ওর অসুখ না হলে নিতাম । অসুখের জন্যই এখনো নিইনি ।

ডিসিশনটা কি পজিটিভই হবে ?

মহুয়া হেসে ফেলে বলে, আমি সিরিয়াসলিই আপনাকে হেলপ্ করতে চাই । বিশ্বাস করুন ।

কথাটার মধ্যে কোনো বিদ্রূপ বা প্রচ্ছন্ন চ্যালেঞ্জ ছিল না । মহুয়া যে ভাল জাতের মেয়ে তাতে কোনো সন্দেহ করেনি দীপনাথ । সে শুকনো মুখে বলল, আপনি যদি চেষ্টা করেন তবে সব ঠিক হয়ে যাবে ।

মহুয়া ন্মান হেসে বলে, আমি তো এ ব্যাপারে একজন পাটি । আমার চেষ্টায় আন্তরিকতা থাকবে না । বরং আপনার মাথায় যদি কোনো সাজেশন আসে তবে আমাকে বলবেন ।

আপনি যদি বিয়ে করেন ?

মহুয়া এ কথায় চটে উঠল না : তবে একটু গম্ভীর হয়ে বলল, ও প্রসঙ্গটা থাক । মানুষ তো পুতুল নয় ।

দীপনাথ লজ্জিত হয়ে বলল, মাপ করবেন, আমার বুদ্ধিসুদ্ধি একটু গুলিয়ে যাচ্ছে ।

মহুয়া উঠল । বলল, আজ আসি ।

সেই থেকে দীপনাথ আনমনা, বিমর্ষ । একা একা মেসবাড়িতে ফেরার সময় তার মনের মধ্যে নানা আবেগ, রাগ, হতাশা খেলা করে গেল । কিছু করার নেই তার ? কিছু করা যাবে না ?

ঘুরতে ঘুরতে দীপনাথ বাবার ঘরে এসে দাঁড়ায় । দরজাটা খোলা । বাবা অবশ্য এখানে নেই, সোমনাথের কাছে আছে । ফাঁকা ঘরটার দিকে শূন্য চোখে চেয়ে থাকে সে কিছুক্ষণ । তারপর ধীরে ধীরে হেঁটে এসে রান্নাঘরের দরজায় দাঁড়ায় ।

বউদি !

তুবা চা ছাঁকতে ছাঁকতে ফিরে চেয়ে বলল, কিছু বলছ ?

বলছি, হারটা বাবার নাম করে চিত্রাকে আশীর্বাদী দিও ।

তোমার নামে নয় ?

না, বাবার নাম করেই দিও । বাবা হয়তো তেমন কিছু দিতে পারবে না । চিত্রার শ্বশুরবাড়িতে এ নিয়ে কথা হতে পারে ।

তুষা মুখ টিপে একটু হাসল । বলল, সংসারী বুদ্ধি তো দিবা টনটনে, বিয়ে না করলে কি হবে !

দীপনাথ একটা শ্বাস ছেড়ে বলে, বিয়ে তো আর তোমরা দিলে না !

বিয়ে দিতে কি ইচ্ছে করে বলো ! এমন ভাল দেওরটিকে কোন টগবগে মেয়ে এসে দখল করে নেবে, দেওর আর ফিরেও চাইবে না আমাদের দিকে । এখনই চায় না, বিয়ে হলে তো আরো ।

মনে থাকবে তো বউদি ? বাবার নাম করে দিও ।

থাকবে গো, থাকবে । তোমার মতো বুদ্ধি বিবেচনা বাপু আমারও নেই । কথাটা আমার মাথাতেও খেলেনি ।

দীপনাথ স্নান হেসে বলে, বাবাও যে সংসারের একজন এবং খুবই ইমপারট্যান্ট একজন সে কথা মনে না রাখাটা আমাদের পক্ষে গৌরবের নয় বউদি । ইন ফ্যাক্ট, আমিও ভুলে গিয়েছিলাম । তুমি তো পরের মেয়ে ।

এইখানে চা খাবে ? না ঘরে ?

এই তো বেশ । দাও উঠোনে দাঁড়িয়ে খাই ।

বন্দাকে মোড়া পেতে দিতে বলি । দাঁড়াও ।

বন্দা মোড়া দিয়ে যায় । দীপনাথ আর তুষা চায়ের কাপ নিয়ে মুখোমুখি বসে ।

দীপু !

বলো ।

তোমাকে এবকম দেখাচ্ছে কেন বলো তো আজ ?

মন ভাল নেই বউদি ।

কেন ?

সব কি বলা যায় ?

আমাকে যায় । আমি তোমার পুরোনো বন্ধু ।

দীপনাথ একটু হেসে বলে, তোমাদের সংসার-টংসার অনেক দেখলাম বউদি । কিছু ভাল লাগে না, একদিন পাহাড়ে চলে যাবো দেখো ।

আবার পাহাড় ? ওটা যে তোমার মাথায় একটা কী ঢুকেছে ?

দীপনাথ চায়ে চুমুক দিতে দিতে বারবার অন্যমনস্ক হয়ে যাচ্ছিল । সেটা লক্ষ করে তুষা আজ খুব নরম গলায় জিজ্ঞেস করে, কী হয়েছে দীপু ?

দীপনাথ একটা দীর্ঘশ্বাস ছেড়ে বলে, সংসারে কারো সঙ্গেই খুব একটা মাথামাখি করতে নেই বউদি, তা হলে দুঃখ পেতে হয় । যত জড়াবে তত অশান্তি । এই অশান্তির ভয়েই কত লোক সাধুসন্ন্যাসী হয়ে পালিয়ে যায় ।

তুমিও কি সাধু হওয়ার কথা ভাবছ ?

প্রবল একটা শ্বাস ফেলে দীপনাথ মাথা নাড়ে, না বউদি, সাধু হওয়ার মতো পজিটিভ মেটেরিয়াল আমার ভিতরে নেই । তবে একটা কিছু করব । আর ভাল লাগছে না ।

দীপু, জিজ্ঞেস করতে সংকোচ হয় । ব্যাপারটা কি হৃদয়ঘটিত ?

আরে দূর ! তা নয় । অন্তত আমার হৃদয়ের ব্যাপার নয় ।

তবে কার হৃদয় ?

দীপনাথ মৃদু একটু হাসল, পেটের কথা বার করতে চাও ?

মুখে হতাশার ভাব দেখিয়ে তৃষা বলে, আমার কি সে সাধিা আছে ?

দীপনাথ হাসিমাখা মুখেই চেয়ে ছিল । হঠাৎ বলল, বরং তোমার কথা বল । তোমাকে আগের মতো দেবী চৌধুরানী মার্কা লাগছে না কেন বলো তো ? ব্রজেশ্বর কি তোমার ওপর ডাকাতি করেছে ? হৃদয় ছিনতাই ?

তু কুঁচকে তৃষা বলল, খুব রকবাজদের ভাষা শিখেছে তো ! তোমার ব্রজেশ্বরের বয়েই গেছে আমার হৃদয় নিয়ে টানাটানি করতে ।

তা হলে সেই দেবী চৌধুরানীর মুখচোখ হাবভাব এমন প্রফুল্লময়ীর মতো হয়ে গেল কেন ?

চেহারায লাভণ্য এসেছে বলছ ?

লাভণ্য তোমার বরাবর ছিল । ইয়ার্কি কোরো না । কী বলবে বলছিলে যে ।

তৃষা সত্যিই হয়তো আর আগের মতো নেই । নইলে তার হঠাৎ দীর্ঘশ্বাস আসবে কেন ? খানিকক্ষণ সে মুখ নিচু করে বসে রইল, তারপর বলল, দীপু, সংসার আর আমাকেও টানে না । তোমার দাদাকে বলেছি, কাশীতে বাড়ি করে দুজনে গিয়ে থাকব ।

দু'জনে ? বলে হাঁ করে থাকে দীপনাথ । বলে, এক বাড়িতে দুজনে থাকবে ? তাহলে যে দু'দিন বাদে বাড়ি থেকে দুটো লাশ পাওয়া যাবে । দুজনেই দুজনকে খুন করে ফেলেছে ।

আমরা দুজনে কি দুজনের অতটাই শত্রু দীপু ?

দীপনাথ হাসতে হাসতে দুলতে থাকে, তা একটু আছো তোমরা ।

একটু যে আছি তা অস্বীকার করছি না তো ! তা বলে খুন করার মতো ?

আরে না, না ! ঠাট্টা করলেও দেখছি বিপদ !

তোমার দাদাও ওরকম কথা বলে প্রায়ই । তার খাবারে নাকি বিষ মিশিয়ে দেওয়া হচ্ছে । স্নো পয়জন ।

শ্রীনাথ চাটুজ্জ্ব একটু বায়ুগ্রস্ত, জানোই তো ! রাগ করো কেন ?

আজকাল রাগ হয় না । সজলও বাবার কথা বিশ্বাস করে ।

সজল ! সজল কি তার বাপের ভক্ত হয়েছে নাকি আজকাল ?

ভীষণ ! বাপের জন্য সব পারে । দরকার হলে পরশুরামের মতো মাকে মেরে ফেলতেও, শুধু বাপ যদি হুকুম করে ।

আচ্ছা ! বলে দীপনাথ খুব অবাক হয়ে ব্যাপারটা ভাবতে থাকে । যত ভাবে ততই অবিশ্বাস্য মনে হয় ।

সজলের হাতেই একদিন আমি খুন হয়ে যাবো, দেখো ।

॥ উনসত্তর ॥

দীপনাথ কিছুক্ষণ হাঁ করে থেকে বলে, সজল তোমাকে মারবে ! কী যে বলো তুমি বউদি ! তোমার মাথাটাই গেছে ।

তৃষা হাসে না, বিষণ্ণ আর্তি মাখানো মুখে দীপনাথের দিকে চেয়ে বলে, আমার অবস্থায় না পড়লে কেউ আমার সমস্যা বুঝবে না জানি । কিন্তু আমার ভরসা ছিল, আর কেউ না

বুঝুক, তুমি বুঝবে।

একটু অসহিষ্ণু গলায় দীপনাথ বলে, সেই যে কারা রাতে তোমাকে বোমা মেরে গেছে, সেই থেকে তুমি সবাইকে সন্দেহ করতে শুরু করেছো। আমি বলি, তুমি আরো কিছুদিন সংসার থেকে ছুটি নাও, দূরে কোথাও গিয়ে বেড়িয়ে এসো। তোমার ভীষণ স্ট্রেন যাচ্ছে।

নিবু নিবু গলায় তুষা বলে, যেখানেই যাই, কপাল আর কর্মফল তো সঙ্গেই যাবে।

দীপনাথ একটু হাসল, তোমার কপাল কি এতই খারাপ বউদি? বেশ তো আছে! জমজমাট তোমার সংসার। মেয়ের বিয়ে দিয়ে শাশুড়িও বনে গেছ।

তুষা মৃদু স্বরে বলে, সংসারে কোথায় যে দাঁডাবো এখন সেই জায়গাটাই খুঁজে পাচ্ছি না যে। আজকাল কেন যে কেবলই মনে হয়, এসব আমার নয়, এরা আমার নয়, এখানে আমার কোনো জায়গা নেই। একদিন যদি মেরে না-ও ফেলে, তবুও ঘাড় ধরে বের করে দেবে। এরা কেউ কেন আমাকে দেখতে পারে না বলো তো? আমি কী করেছি?

কারা দেখতে পারে না?

তোমার মেজদা, স্বপ্না, মঞ্জু, সজল, কেউ না।

অভিমান নয়, তুষার গলায় একটা সত্যিকারের আতঙ্ক স্পষ্ট হয়ে ধরা পড়ে দীপনাথের কাছে। সে টক করে কিছু বলল না। একটু ভাবল। তারপর একটু লঘু স্বরে বলল, তোমার দাপট কি একটু কমে আসছে বউদি?

তুষা মাথা নাড়ল। বলল, কমেনি দীপু। কমলে আজ এত ভাবনায় পডতাম না। আসলে আজকাল আমাকে ওরা কেউ ততটা সম্মিহ করে না, ভয় পায় না। বিশেষ করে সজল। ওর সঙ্গে কথা বলতে আজকাল আমারই ভয় ভয় করে। কী কথার কী জবাব দেবে তার ঠিক নেই।

দীপনাথ সোজা হয়ে জিজ্ঞেস করল, সজল কোথায়?

হিংস্র বন্য বিদ্রোহে ভরা দুটি চোখ একটু আড়াল থেকে লক্ষ রাখছিল তুষাকে। দীপনাথের শূন্য ঘরের দাওয়ার কাছ ঘেঁষে মস্ত এক নারকেল গাছ। তারই পাশে নিঃশব্দে দাঁড়িয়ে সজল। সে দূর থেকেই টের পাচ্ছিল, তার মা বড়কাকার কাছে চুকলি কাটছে। কিসের চুকলি তা সে জানে না। কিন্তু মায়ের যে সবসময়েই কিছু গোপন করার আছে তা সে জানে। মা বড়কাকাকে কী বলছে তা জানার জন্য সজল ছটফট করছিল। বলতে কি, বড়কাকাকে তার ভীষণ ভাল লাগে। মা যদি তার সম্পর্কে বড়কাকাকে আজীবনে কথা বলে বিষিয়ে দেয় তবে সে মাকে ছেড়ে দেবে না। বড়কাকার কাছে মা'র সম্পর্কে সব বলে দেবে। যা জানে সব।

সজল নিজেও টের পায়, তার শরীরে রাগ বড় বেশী। এত রাগ যে, সারা গায়ে বিষ-বিছুটির জ্বালা ধরে যায় মাঝে মাঝে। আর তার বেশীর ভাগ রাগই মায়ের ওপর। বাবার খাবারে মা বিষ মেশায় কিনা তা সে সঠিক জানে না। কিন্তু বাবাকে রামলাখনের আড্ডায় নিয়ে যাওয়ার জন্য মা যে রঘু স্যাকরাকে লাগিয়ে দিয়েছিল তা সে জানে। লোকমুখে ছেলেবেলাতেই সে শুনেছে, জ্যাঠামশাইয়ের এইসব বিষয়-সম্পত্তি মা খুব সংভাবে পায়নি। ছোটো কাকা কে মা যে গুণ্ডা লাগিয়ে মার দিয়েছিল এও তার অজানা নয়। সবচেয়ে বড় হয়ে যে প্রপন্নি তার মনে দেখা দেয় মাঝে মাঝে, তা হল, তার বাবা কে?

বড় হয়ে একদিন সে মাকে এই প্রশ্নটা করবে।

সজল দেখে, মা উঠে রান্নাঘরের দিকে চলে গেল। বড়কাকা একটু ভ্রু কঁচকে বসে বসে

কী যেন ভাবছে। মুখটা গম্ভীর। তারপর বড়কাকা দাঁড়িয়ে চারদিকে চেয়ে দেখে। আস্তে আস্তে হাঁটতে থাকে বারবাড়ির দিকে।

সজল গাছের আড়াল ছেড়ে ক্ষেতের মধ্যে নেমে দৌড়োতে থাকে। ঘুরপথে গিয়ে মুখোমুখি হবে।

খুব তাড়াতাড়িই চলে এল সজল। বড়কাকা সদা ভাবন-ঘরের কাছ বরাবর পৌঁছেছে।

তাকে দেখে খুব ক্ষীণ একটু হাসল বড়কাকা।

সজল ভালমানুষের মতো জিজ্ঞেস করে, কখন এলে ?

অনেকক্ষণ। তুই কোথায় ছিলি ?

এইখানেই।

দীপনাথ হাত বাড়িয়ে তার কাঁধটা ধরে। বলে, কত লম্বা হয়েছিস !

এই কাঁধে একটু হাত রাখা আর কত লম্বা হয়েছিস প্রশ্নটুকুর মধ্যে এক অথৈ সমুদ্রের গভীরতা। সজল এইটুকু এ বয়সে বুঝতে পারে, কোনটা স্নেহ, কোনটা স্নেহ নয়। দীপনাথের হাতের স্পর্শটুকু আর গলার নবম কোমল লাগণ্য অনেকক্ষণ তার শরীর আর শ্রবণে কাজ করবে। সজল মুখ টিপে হেসে বলে, এখনো তোমার সমান হইনি।

দীপনাথ মুগ্ধ চোখে হাড়সার প্রাণবান চেহারার সজলকে দেখছিল। দেখে তার চোখ আর মন ভরে গেল। চোখে বুদ্ধির ঝিলিমিলি খেলা করছে, বেড়ে ওঠা শরীরে এখনো শিশুর লাগণ্য ও মুখশ্রীতে পৌরুষ সত্ত্বেও এক বিস্ময় মাখানো সরলতা দেখে ভারী খুশি হল। এই তাদের বংশধর, এখনো পর্যন্ত একমাত্র বংশধর। কাঁধে সম্মেহে হাতের ভর রেখে দীপনাথ বলে, আয় এ বারান্দায় বসি।

ভাবন-ঘরের বারান্দায় পাশাপাশি বসে দীপনাথ বলে, খুব ইচ্ছে ছিল কলকাতায় একটা ফ্ল্যাট ভাড়া করে তোকে নিয়ে যাবো। ভাল ইন্সুলে পড়াবো। কিন্তু সে আর হল না।

কেন কাকা ?

দীপনাথ একটা মন্ত শ্বাস ছেড়ে বলে, অনেক অসুবিধে রে। আমাকে মাঝে মাঝে লম্বা টুয়েন্টে হয়ে। রামবাবার লোক, কাজের লোকও বড় পাওয়া যায় না। তার চেয়ে ভাবছি তোকে নরেন্দ্রপুরে ভর্তি করে দিলে কেমন হয়।

সেখানে জিমনাসিয়াম আছে ?

থাকারই কথা। তুই কি ব্যায়াম করতে ভালবাসিস ?

সজল মুখ বিকৃত করে বলে, না। শরীর সাজাতে আমার ভাল লাগে না।

তবে ?

আমি মাবশাল আর্টস শিখতে চাই। আব বক্সিং।

সেসব ওখানে বোধ হয় নেই। দেখব খোঁজ কবে। ওসব শিখতে চাস কেন ? সেলফ ডিফেন্স, না গুণ্ডামি করবি ?

সজল হাসল, যারা অন্যায় করে আমি তাদের শিক্ষা দিতে চাই।

করণ একটু হাসি ফোটে দীপনাথের মুখে। খুব ধীরে ধীরে সে বলে, সব অন্যায় কি শুধু গায়ের জোরে ঠেকানো যায় ? আগে নিজে ন্যায়বান হতে হয়, সাহসী হতে হয়, মানুষকে ভালবাসতে হয়। মানুষ কোথা থেকে জোর পায় জানিস ? ভালবাসা থেকে। মা-বাবাকে যদি ভালবাসিস, দিদিদের যদি ভালবাসিস, সবাইকে যদি ভালবাসিস তা হলে দেখবি গায়ের জোরের তত দরকার হয় না।

তোমার গায়ে কি খুব জোর বড়কাকা ?

আমার গায়ে ? দীপনাথ প্রথমে অবাক হয়, পরে হাসে। বলে, দূর বোকা ! আমি কি ব্যায়ামবীর, না বক্সার ? আমার কোনো জোরই নেই। তবে তুই জোরওয়ালা মানুষ হলে আমাদের আর দুঃখ থাকবে না। তবে সেটা শুধু গায়ের জোর নয় কিন্তু।

গায়ের জোর কি খারাপ ?

তানয়। তবে বেশী গায়ের জোরের কথা মনে রাখলে মনটা শরীরমুখী হয়ে যায়। তখন আর মাথায় সূক্ষ্ম চিন্তা আসতে চায় না।

সজল মাথা নীচু করে চটির ডগা দিয়ে একটা কাঁকরকে মেঝেতে ঘষছিল। হঠাৎ বলল, তুমি আমাকে খারাপ ভাবো না তো বড়কাকা ?

দীপনাথ অবাক হয়ে বলে, তোকে খারাপ ভাবব কেন ?

কেউ যদি তোমার কাছে কিছু লাগায় তাহলে তো ভাববে !

তোর নামে আবার কি লাগাবে ?

লাগাতে পারে। বলে সজল একটু হাসল, কিন্তু তুমি বিশ্বাস করো না। বরং বাবাকে জিজ্ঞেস করে দেখো, আমি খারাপ কি না।

দীপনাথ সন্মোহে হাসে। বলে, তোকে কেউ খারাপ ভাবে না।

সজল একটু হুঁকুচে কি ভাবে। তারপর বলে, আমি বোর্ডিং-এ যাবো না।

কেন রে ? বোর্ডিং-এ কত মজা জানিস ?

জানি। আমার যেতে ইচ্ছেও করে। কিন্তু আমি চলে গেলে বাবাকে দেখবে কে ?

কেন, তোর বাবাকে দেখার লোকের অভাব আছে নাকি ?

বাবা আমাকে ছাড়া থাকতে পারে না।

দীপনাথ একটু অন্যমনস্ক হয়ে গেল। সজল কি মেজদার ছেলে ? না বড়দার ? লোকে নানা কথা বলে। সে সব কি সত্যি ? তবু শ্রীনাথের প্রতি সজলের এই প্রগাঢ় টান বড় ভাল লাগল দীপনাথের। শ্রীনাথের ছেলে যদি নাও হয়ে থাকে সজল, তাহলেও এই বংশেরই ছেলে। দীপনাথ আর একবার মায়াভরে সজলের লম্বা চিকন চুলে ভরা মাথাটা একটু নেড়ে দেয়। বলে, ঠিক আছে। কিন্তু এখানে থাকলে শুধু বাবাকে নিয়ে থাকলেই তো হবে না, মা তো ভেসে আসেনি। মাকে দেখবে কে ?

বাঃ, মার তো বাবার মতো অবস্থা নয়। মাকে দেখার কি আছে ?

সজলের চোখে হঠাৎ যে ঝলকানি দেখা দিয়েই মিলিয়ে গেল তা বেশ লক্ষ করল দীপনাথ। ঘৃণা, বিদ্বেষ, আক্রোশ সব দগদগ কবছে ভিতরে। কিন্তু ঐটুকু বাচ্চা ছেলের মন এত বিধিয়ে গেল কি করে তা ভেবে পেল না দীপনাথ। আবার সজলের জন্ম-রহস্য নিয়ে প্রশ্ন উকি দেয় মনের মধ্যে। বড়দা মল্লিনাথের ছিল বুনো শুয়োরের মত গোঁ, ক্ষাপা রাগ, ভয়ঙ্কর সাহস। যার ওপর রেগে যেত তাকে পারলে খুন করে। সজলের চেহারায় এবং স্বভাবে নির্ভুল সেই বড়দার ছাপ।

দীপনাথ একটা দীর্ঘশ্বাস ফেলে উঠল। মন ভাল নেই। কোথাও বেশীক্ষণ বসে থাকতে পারে না।

সন্ধ্যাবেলা বউদিব কাছ থেকে বিদায় নিয়ে সে ফেবার ট্রেন ধরল। তৃষা অনেকবার তাকে আটকাতে চাইল, কিন্তু দীপনাথ থাকতে রাজি হল না। অনেক ভাঙচুরের টুকরো চারিদিকে ছড়ানো। জোড়া লাগানোর এক বৃথা চেষ্টা কবে যাচ্ছে সে। তবু চেষ্টাই তো জীবন !

হাওড়া থেকে সে সোজা চলে এল নারসিং হোমে।

বোস সাহেব অনেকটা ভাল। ঘরে ভিজিটর কেউ নেই। একা বোস সাহেব আধশোয়া হয়ে একটা প্রিলার পড়ার চেষ্টা করছে।

আজকাল দেখা হলে বোস আর তেমন খুশি হয় না। কেবল শূন্যগর্ভ এক দৃষ্টিতে দীপনাথের দিকে তাকিয়ে থাকে। ঐ ভাবলা দৃষ্টির অর্থ বোঝে না দীপনাথ। কিন্তু এটা টের পায়, বোসের ভিতরে খুব বড় রকমের একটা ভূমিক্ষয় ঘটে যাচ্ছে।

আজ কেমন আছেন?

তেমন কিছু খারাপ নয়। তবে এত ওষুধ খাওয়াচ্ছে যে, মুখটা বিস্বাদ।

এবার কিছুদিন কোথাও বেড়িয়ে আসুন।

কোথায় যাবো? হতাশার গলায় বোস বলে।

যে কোনো স্বাস্থ্যকর জায়গায়।

বোস করুণ মুখ করে বিশাল জানালা দিয়ে বাইরে আদিগন্ত কলকাতার আলো-অন্ধকারের দিকে চেয়ে থাকে। তারপর বলে, কোথাও যেতে ইচ্ছে করে না। গিয়ে লাভ নেই।

দীপনাথ কী বলবে, চুপ করে থাকে।

বোস সাহেব দূরের দিকে চেয়ে থেকেই বলে, আপনি আমার ভাল করতে চাইছেন, সে কথা শুনেছি। কিন্তু আমার কিসে ভাল হয় তা আপনার দৃষ্টিকোণ থেকে বিচার করাটা ঠিক নয়। তাতে ভাল না হয়ে খারাপও হতে পারে।

দীপনাথ আস্তে করে বলল, মণিদীপাকে আমি বিয়ে করলে যে ভাল হবে সেটাই বা আপনি তা হলে ধরে নিয়েছিলেন কেন?

বোস একটু হাসল। তবে কিছু বলল না বা দীপনাথের দিকে তাকালও না।

জুয়াড়ির মতো মুখ কবে দীপনাথও চুপ করে বসে থাকে।

অনেক অনেকক্ষণ বাদে বোস বলে, আপনারা দুজনে হয়তো সুখী হতে পারতেন।

দীপনাথ দীর্ঘশ্বাস ফেলে বলল, যার ভালবাসা এক পাত্র থেকে অন্য পাত্রে শিফট করে তাকে আমি ভয় পাই বোস সাহেব।

বোস তেমন দূরের দিকে চেয়ে বলে, দীপা আপনাকে সত্যিই ভালবাসে।

স্নিগ্ধদেবকেও বাসত।

ইউ আর বিয়িং ফ্রয়েল।

আই অ্যাম সামটাইমস্ টুথফুল।

আপনাকে অ্যাভয়েড করতেই বোধ হয় দীপা বিকেলের দিকে আসে না।

উনি কি রোজ আসেন?

বোস সাহেব একটা বড় শ্বাস ফেলে মাথা নেড়ে বলে, তা আসে। মেকস্ মি টি, সার্ভস্ ব্রেকফাস্ট, সিগনিফাইং নাথিং।

দীপনাথ শেক্সপীয়রের ভাঙা উদ্ধৃতির অপব্যবহার শুনে একটু হাসল। বলল, আপনার কাজিনটি একসেপশনাল। কিন্তু তাকে বিয়ে করলেই যে আপনার সমস্যা মিটে যাবে এমন নয়। দেয়ার আর মোর দীপনাথস্।

তার মানে?

আপনার যে বয়স এবং স্বাস্থ্যের যা অবস্থা তাতে অত্যন্ত যুবতী কোনো মেয়েকে তেমন কিছুই দেওয়ার নেই আপনার। কথাটা ভেবে দেখবেন।

বোস রাগল না । কিন্তু ঘাবড়ানো মুখে আবার ক্যাবলা চোখে তাকিয়ে রইল দীপনাথের দিকে ।

নিঃশব্দে একজন কালো প্রায়-কিশোরী নার্স ঘরে আসে । মৃদু ভদ্র স্বরে বলে, ভিজিটিং আওয়ার ইজ ওভার । প্লীজ...

দীপনাথ ওঠে । দরজার কাছ বরাবর গিয়ে ফিরে তাকায় । নার্স বড় ব্যতি নিভিয়ে দিয়েছে । সবুজ আলোর এক অপ্ৰাকৃত পরিমণ্ডলে বোস এখনো আধশোয়া । এই সবুজের মধ্যেও তার মুখের ফ্যাকাসে রং দেখা যাচ্ছে ।

বোস অনুচ্চ স্বরে বলল, ইট ওয়াজ এ নক আউট ।

দীপনাথ বেরিয়ে আসে ।

পেল্লায় বড়লোকদের এই নারসিং হোমের পিছল মেঝের ওপর দিয়ে লিফটের দিকে হাঁটতে হাঁটতে তার মনে হয় সুখের এত উপকরণ সাজিয়েও মানুষকে সুখী করা যায় না তা হলে ? অ্যাঁ !

অঞ্জু টেলিফোন করল সকালে, হ্যালো দীপা ! তোমার জন্য একটা খবর আছে । ঢাকুরিয়া ব্রিজের ওপাশে একটা ঘর পাওয়া যাচ্ছে । নেবে ? দু' লাখ সেলামী ।

দু' লাখ ! বলে মণিদীপা টৌক গেলে ।

দু' লাখ চাইছে । বাট উই মে ট্রাই টু বারগেন । দেড় লাখের নীচে নামবে না ধরে রাখো ।

তা হলে ইনিশিয়াল ইনভেস্টমেন্ট যে অনেক পড়বে !

এখন তো সব কিছুই কস্টলি । ইন্ট্রিরির ডেকোরেটবরা এক-একটি কাটথ্রোট । তবে আমাব চেনা শান্তিনিকেতনের একটি ছেলে আছে । সে অনেক কমে দোকান সাজিয়ে দেবে ।

কম মানে কতো ?

হাজার কুড়ির মধ্যেই । তোমার তো বাপু কেবল শাড়ি বেচা নিয়ে কথা । আমাদের মতো ঝামেলার ব্যাপার তো নয় ।

স্টক কিনতে কত লাগবে তোমার কোনো আইডিয়া আছে ?

তুমি তো বাপু যোধপুরের বড়লোকদের ঘোল খাওয়াতে চাও । তা হলে কস্টলি শাড়ি বা এক্সক্লুসিভ চাই । দ্যাট উইল কস্ট ইউ মোর ।

তবু শুনি ।

আমার কোনো আইডিয়া নেই । রাফ্লি অ্যানাদার লাখ । সবশুদ্ধ আড়াই নিয়ে নেমে পড়ো ।

আমি তোমার সঙ্গে শীগগীরই দেখা করব ।

শীগগীর নয় । কালই । কোনো স্পেস পড়ে থাকছে না । দেয়ার আর পিপল টু পে টু লাখস্ ফর দ্যাট শপ । ভাল কথা, তোমার হাজব্যান্ড কেমন ?

ভাল ।

কবে আনছ নারসিং হোম থেকে ?

দু-এক দিনের মধ্যেই ।

আজ ছাড়ছি । কাল সকালের দিকেই চলে এসো ।

আচ্ছা । বলে ফোন ছাড়ে মণিদীপা । তারপর সম্পূর্ণ বে-খেয়ালে সে একটা চেনা নম্বর ডায়াল করে ।

হ্যালো ! বলেই জিভ কাটে মণিদীপা । মনে ছিল না, বিব্রম । নইলে দীপনাথের সঙ্গে যে এখন তার টকিং টার্মসই নেই ।

ওপাশ থেকে গভীর গমগমে সেই কণ্ঠস্বর বলে ওঠে, হ্যালো । চ্যাটার্জি স্পিকিং, হ্যালো ।

মণিদীপার গায়ে কাঁটা দেয় । বুক টিপটিপ করে । সর্বোপরি গলা কেঁপে যায় । একটু সময় নিয়ে সে বলে, হ্যালো !

দীপনাথ হঠাৎ বুঝি গলাটা চিনতে পারে । একটু হেসে বলে, কি হল ? বলুন ! আমি সেই দীন সেবক দীপনাথ ।

বাজে বকবেন না ।

কোনো প্রবলেম নাকি ?

হঁ । কিন্তু আপনাকে বলে লাভ কি ?

এখনো কি মাথায় ব্যবসা ঘুরে বেড়াচ্ছে ?

বেড়াচ্ছে ।

কি করতে হবে আমাকে ? টাকার জোগাড় ?

পারবেন ?

কত ?

ওঃ সে অনেক । থাক, বলব না ।

॥ সন্তর ॥

অ্যাপয়েন্টমেন্ট ছিল বিকেলে । অফিসেব পর্ব দীপনাথ সোজা চলে আসে নিউ আলিপুরের ফ্ল্যাটে । আজ বোস সাহেব নেই । মণিদীপা একা রয়েছে । দীপনাথের আজ বুক কীপল না ।

দরজা হাট করে খোলা । পর্দা সরিয়ে দীপনাথ অতি পরিচিত বাসস্থানটিতে ঢুকল । আপাতদৃষ্টিতে মনোরমভাবে সাজানো, শান্ত ও সুন্দর এই বাসাটির ভিত ভিতরে ভিতরে কত ক্ষয়ে গেছে তা তার মতো নির্মমভাবে আর কে জানে !

তবু কয়েক দিনের অবিরল বিচ্ছিন্ন চিন্তা ও দৃষ্টিভঙ্গি করে আর একটি জটিল সমস্যার সমাধান খুঁজতে খুঁজতে দীপনাথ বুঝি কিছু প্রবীণ হয়েছে । বয়ঃসন্ধির সেই আবেগ আর নেই । বয়ঃসন্ধি ! এই বয়সে কথাটা তার ক্ষেত্রে আর চলে না । তবে ভেবে দেখলে তার কৈশোরের বয়ঃসন্ধি তো আজও ঠিক মতো কাটেনি ।

সাদা খোলের কালো নকশাপাড় একটা শাড়ি গায়ে আঁট করে জড়ানো, মিশমিশে কালো ব্লাউজ অসর এলো খোঁপায় মণিদীপাকে আজ দুঃশ্রম ভাল দেখাল ভিতরের ঘর থেকে বসবার ঘরে ঢুকবার সময় । দীপনাথ মণিদীপার প্রবেশ থেকে বসা পর্যন্ত অত্যন্ত মনোযোগ দিয়ে দেখল ।

আজ দুজনেই অস্বাভাবিক শান্ত ।

দীপনাথ বিনা ভূমিকায় মৃদু স্বরে বলে, কী ঠিক করলেন ?

মণিদীপা ততোধিক মৃদু স্বরে অপরাধী মুখে বলে, আমার এ ছাড়া উপায় নেই । গড়িয়াহাটা ব্রিজের ওপাশে একটা দোকান ঘর পাওয়া গেছে । অনেক টাকা সেলামী চাইছে ।

কত টাকা ?

শুনলে আপনি বকবেন।

দীপনাথ একটা দীর্ঘশ্বাস ছেড়ে বলে, তা হলে নাই বললেন। কারণ, আপনার সোর্স অফ ক্যাপিটাল খুবই লিমিটেড।

মণিদীপা হাল ছাড়তে চায় না। তাই করুণ গলায় বলে, আমার কিছু গয়না আছে। বেচলে কিছু টাকা পাওয়া যাবে। বাকিটা কোনো ব্যাংক বা কেউ দেবে না ?

আমি ঠিক বলতে পারব না। তবে এটুকু জানি, সেলামীর খাতে কোনো লেজিটিমেট লোন থেকে টাকা পাওয়া অসম্ভব। আপনি সেলামীর জন্য টাকা চাইছেন শুনলে কোন ব্যাংকার খুশি হবে বলুন !

আমি আপনার পরামর্শই চাইছি। শুধু শুধু কেন নেগেটিভ সাজেশন দিচ্ছেন !

আপনার দোকান যদি না চলে তা হলে টাকা পেলেও শোধ দেবেন কেমন করে ? চলবে। আমি জানি চলবে।

দীপনাথ মাথা নেড়ে বলে, আপনি জানেন না যে আপনি আসলে স্বপ্ন দেখছেন। এই হাড্ডাহাড্ডি কমপটিশনের বাজারে আপনার মতো অনভিজ্ঞের পক্ষে দোকান চালানো কত শক্ত জানেন ?

আমি পারব দেখবেন।

দীপনাথ আর একটা দীর্ঘশ্বাস ছেড়ে বলে, আপনি আপনার না-হওয়া দোকানটাকে ইতিমধ্যেই ভালবেসে ফেলেছেন দেখছি।

আমার বাপের বাড়ি ঐ এলাকায়। দরকার হলে আমার ভাইরাও হেলপ করতে পারবে। যোধপুর পার্কে আমার চেনাজানা অনেকে আছেন, তাঁরাও পেট্রনাইজ করবেন। দোকানটা চলবে। আপনি ভাববেন না।

দীপনাথ আচমকা জিজ্ঞেস করে, স্নিগ্ধদেব এখন কোথায় ?

মণিদীপা একটু অবাক হয়ে বলে, কেন, অ্যামেরিকায় ! আপনাকে তো বলেছি।

দীপনাথ একটু হাসল, জানি। শুধু আপনাকে মনে করিয়ে দিলাম। এক বিপ্লবী অ্যামেরিকায় দেদার টাকা কামাচ্ছে, আর এক বিপ্লবিনী যোধপুরে শাড়ির দোকান খুলতে সেলামীর টাকা জোগাড় করছে। বিপ্লবকে একদম ডুবিয়ে দিলেন মিসেস বোস !

মণিদীপা একটু গম্ভীর হয়, শুনুন, কি একটা কথা আছে না ! হাতি ফাঁদে পড়লে...

দীপনাথ শব্দ করে হাসল। আমিই সেই চামচিকে তা হলে ! যাকগে, নো অফেন্স টেকন। আমি বলতে চাইছিলাম, টাকাটা তো অনায়াসেই স্নিগ্ধদেব আপনাকে পাঠাতে পারে। ধার হিসেবেই দিক। পরে দেশে এলে শোধ দিয়ে দেবেন।

স্নিগ্ধর টাকা নেবো ?

কেন নয় ? এক সময়ে তাকে আপনি বিস্তর টাকা দিয়েছেন। কত টাকা তার হিসেব আছে ?

মণিদীপা খুব গম্ভীর রইল কিছুক্ষণ। তারপর বলল, স্নিগ্ধকে আমি যত টাকা দিয়েছি তা হিসেব করলে হয়তো এই সেলামীর টাকার চেয়ে বেশী দাঁড়াবে। কিন্তু টাকাটা তো স্নিগ্ধ নেয়নি, পারটির কাজে লেগেছে।

ঠিক জানেন ?

মণিদীপা মাথা নেড়ে বলল, না। তবে স্নিগ্ধকে অবিশ্বাস করারও কিছু নেই।

পারটির সঙ্গে আপনার ডাইরেক্ট যোগাযোগ ছিল না ?

না। কোথায় ওদের আগারগাউণ্ড সেন্টার তাও আমি জানি না।

টাকার কোনো রসিদ পেয়েছেন কখনো ?

না। সেরকম নিয়ম নেই।

দীপনাথ আবার অন্য দিক থেকে সওয়াল শুরু করে, স্নিগ্ধদেব যখন অ্যামেরিকায় গেল তখন ধরে নিতে হবে সে পাটির আদর্শে অনুগত ছিল না। সে যে টাকাটা পাটির ফান্ডেই জমা দিয়েছে এমন কথাও মনে করা যায় না। মোর ওভার, সে ছিল দরিদ্র স্কুলমাস্টার।

মণিদীপা তীক্ষ্ণ চোখে দীপনাথকে ভ্রম করে দেওয়ার চেষ্টা করতে কবতে বলল, মানছি স্নিগ্ধ ইজ নাউ এ ফলেন গাই। কিন্তু বরাবরই সে এ রকম ছিল না।

আপনি কি করে জানেন, বোকা মেয়ে ? স্নিগ্ধদেবের মতো সুপার ইনটেলিজেন্সের লোককে বুঝতে পারা কি সহজ ?

আপনি বিচার করছেন কিছু না জেনেই। স্নিগ্ধদেবকে আপনি চোখেও দেখেননি কখনও।

আমি অভিজ্ঞতা থেকেই জানি।

মণিদীপা তার ঘাড় অত্যন্ত দৃঢ়ভাবে নেড়ে বলে, না জানেন না। স্নিগ্ধ নিজের দরকারে টাকা চাইলেও আমি দিতাম। স্নিগ্ধ নিজের জন্য কখনো ভাবত না। তার ধ্যানজ্ঞান ছিল পাটি এবং আদর্শ। বিপ্লবের জন্য অনেক টাকা দরকার। স্নিগ্ধদেব গরীব হলেও নিজের মাইনে থেকে একটা পারসেনটেজ বরাবর পাটিতে ভোনেট করত।

ওঁর পতনের শুরু করে থেকে তা কি আপনি জানেন ?

না। ওর স্বভাব ভীষণ চাপা।

এমনও তো হতে পারে স্নিগ্ধদেবের পতন অনেক আগে থেকেই শুরু হয়েছিল, কিন্তু আপনি টের পাননি। আপনি ওঁর বাইরের ছদ্মবেশেই মুগ্ধ ছিলেন, আব তখন স্নিগ্ধদেব পাটির নাম করে আপনার কাছ থেকে টাকা আদায় করে নিজের ঘর গোছাতো !

এ রকম হতে পারে না তা বলছি না। কিন্তু হয়নি।

আপনি এখনো স্নিগ্ধদেবের প্রতি দুর্বল।

মণিদীপা মৃদু হেসে বলে, যেমন আপনি এখনো স্নিগ্ধ সম্পর্কে ভীষণ ভীষণ জেলাস।

দীপনাথ গাভীর ঝেড়ে হেসে ফেলে। অত্যন্ত সরল প্রাণখোলা হাসি। তারপব বলে, তবু বলি স্নিগ্ধদেবের খল্পরে পড়ে আপনি অর্ধেকটা জীবন নষ্ট করেছেন।

মুহূর্তে মণিদীপা জবাব দেয়, বাকি অর্ধেকটা নষ্ট করেছে কে জানেন ? যে মূর্তিমানটি এখন আমার সামনে বসে জ্বালাচ্ছে।

দীপনাথ হাসল, লাল হল। তারপর একটু গভীর হয়ে বলল, স্নিগ্ধদেব কিন্তু সত্যিই টাকাটা আপনাকে ধার হিসেবে দিতে পারেন। একটা চিঠি লিখে দেখুন না !

কিন্তু আমি যে স্নিগ্ধর টাকা চাই না। না খেতে পেয়ে মরলেও না।

কেন বলুন তো ! দীপনাথ সন্দেহের গলায় জিজ্ঞেস করে।

দ্যাট ইজ মাই কনসেশন অফ সেলফ্রেসপেক্ট। যাকে আমি এক সময়ে টাকা দিয়েছি, তার কাছে হাত পাততে আমার আত্মমর্যাদায় লাগে। থ্যাংক ফর দি সাজেশন, বাট ইট ইজ নট অ্যাকসেপটেবল।

দীপনাথ মৃদু হাসে। বলে, আমি অবশ্য জানতাম।

কি জানতেন ?

আপনি স্নিগ্ধদেবের টাকা নেবেন না। অনেক দিন আগে আপনি একবার বলেছিলেন,

বোস সাহেব ছাড়া অন্য কারো টাকা নিতে আপনার ঘেমা করে ।

মণিদীপা একটা দীর্ঘশ্বাস ছেড়ে বলল, হ্যাঁ । আজও করে । আফটার হোয়াট হাজ গন বিটউইন আস । কিন্তু আমরা প্রসঙ্গ থেকে দূরে সরে যাচ্ছি ।

প্রসঙ্গটা কি যেন ?

সেলামীর টাকা ।

কত তা এখনো বলেননি ।

দুই লাখ ।

দীপনাথ হাঁ করে চেয়ে থেকে হঠাৎ চাপা আত্মস্বরে বলে উঠল, জল ! জল ! বাতাস !

মণিদীপা তড়িঘড়ি উঠতে গিয়েও থেমে হেসে ফেলে, খুব প্রাকটিক্যাল জোক শিখেছেন !

বাস্তবিকই আমার মাথা ঘুরছে ।

ইয়ার্কি মারবেন না । ইট ইজ এ কোর্শেন অফ মাই একজিস্টেন্স ।

দু' লাখ ! আমি ভুল শুনি নি তো !

না । আর আপনি এও জানেন যে, দু-তিন লাখে আজকাল কিছুই হয় না । আপনি এখন একটি বড় বিজনেস ফার্মের প্রায় হর্তাকর্তা । আপনার না জানার কথা নয় ।

দীপনাথকে আজ দীর্ঘশ্বাসে পেয়েছে । খুব জোরালো একটা শ্বাস ফেলে সে বলে, আমরা হচ্ছি চিনির বলদ । কিন্তু মিসেস বোস, আমি আপনাকে খুশি করতে আমার যা সাধ্য তা করব ।

কববেন ?

কবব । আমার নিজেব বোধ হয় হাজার ত্রিশেক টাকা ব্যাংকে আছে । এল আই সি থেকেও কিছু রেইজ করতে পারি । অফিসও কিছু অ্যাডভান্স দেবে । সব মিলিয়ে পঞ্চাশ-ষাট হাজার হয়ে যেতে পারে । কিন্তু এর বেশী নয় ।

আপনি দেবেন ? খুব অবিশ্বাস নিয়ে চেয়ে থাকে মণিদীপা ।

দিলে আপনি নেবেন না ?

মণিদীপা জবাব দিতে পারে না অনেকক্ষণ । দীপনাথ—দীপনাথই হয়তো তার সত্যিকারের সর্বনাশের মূল । তবু বহুকাল ধরে গোপনে গোপনে নদীর ভূমিক্ষয়ের মতো মণিদীপার সব অহংকার ভাসিয়ে নিয়েছে যে অনভিপ্রেত ভালবাসা তারই মোহনা ঐ দীপনাথ । কোনোদিনই আর দীপনাথকে ভালবাসার কথা বলবে না মণিদীপা । কিন্তু ভাল না বেসেও তার উপায় নেই । কিন্তু দীপনাথের টাকাও যে নেওয়া যায় না । কিছুতেই না ।

মণিদীপা ঠোঁট উলটে বলল, একজন প্লেভের টাকা নিয়ে তাকে নিঃশ্ব করে দিতে চাই না ।

প্রশ্নটা তা নয় । প্রশ্ন হল আমার টাকা নিতে আপনাব কোনো শুচিবায়ু আছে কিনা !

হয়তো আছে ।

একটা স্বস্তির নিঃশ্বাস ফেলে দীপনাথ বলে, বাঁচলাম । পৃথিবীতে এখনো এইজনাই বুঝি চন্দ্র-সূর্য ওঠে ।

কথাটার মানে কি ?

মানে বুঝে আপনার দরকার নেই । আই ওয়াজ জাস্ট থিংকিং অ্যালাউড । কিন্তু টাকা না নিলে আপনার দোকানের কি হবে ?

মণিদীপা হঠাৎ বসে বসে ছেলেমানুষের মতো ঠ্যাং দুটি নাচাল একটু । তারপর নিপাট

ভালমানুষের মতো মুখ করে বলল, হবে না।

হবে না?

না। কেউ যখন চাইছে না তখন না হওয়াই ভাল।

দীপনাথ ভুঁকুচকে একটু কি যেন ভাবে। তারপর হঠাৎ একটু সরল হাসি হেসে বলে, কথটা ঠিক হল না।

কোন কথটা?

কেউ চাইছে না এমন কিন্তু নয়। অন্তত বোস সাহেব চেয়েছিলেন যে আপনি দোকান-টোকান কিছু করে সেলফ-সাফিসিয়েন্ট হোন।

বটে? বলেনি তো কখনো!

আমাকে বলেছিলেন। আমি তাঁকে অন্য পরামর্শ দিই।

মণিদীপাকে এই স্বীকারোক্তি খুব একটা স্পর্শ করে না। তবু আলগা গলায় জিজ্ঞেস করে, তারপর?

তারপর আর কথটা এগোয়নি। তবে ভাবছি, এখন একবার বোস সাহেবকে অ্যাপ্রোচ করলে উনি হয়তো টাকাটা দিয়ে দেবেন আপনাকে।

দিয়ে দেবে ঠিকই। বাট হি উইল বাই হিজ লিবাটি বাই দ্যাট মানি।

কিন্তু আপনিও লিবাটি দিতেই চান।

চাই। কিন্তু সেটা টাকার বিনিময়ে নয়। আই উইল গিভ হিম লিবাটি আউট অফ পিট, আউট অফ হেট্টেড। টাকা নয়।

দীপনাথ আবার একটা দীর্ঘশ্বাস ছেড়ে বলে, বড্ড গোলমালে ফেললেন।

আমাকে নিয়ে আপনার অনেক গোলমাল চলছে, সরি দীপনাথবাবু।

এই সময়ে বেয়ারা ট্রে ভর্তি খাবার আনে এবং ক্ষুধার্ত দীপনাথ খেতে খেতে গোটা সমস্যাটাই ভুলে যায়।

॥ একান্তর ॥

বহুদিন বাদে ছবির কাছে একটা আয়না চাইল প্রীতম, আয়নাটা দে তো ছবি, আজ আমি নিজেই দাড়িটা কামাবো।

কেন বড়দা, হারু নাপিত তো কামাতে আসবেই।

না, আজ একটু সেলফ সারভিস করে দেখি।

ছবি দাড়ি কামানোর সরঞ্জাম এনে দেয়। আয়নাটা ভারী অদ্ভুত। প্লাস্টিকের ফ্রেমে বাঁধানো ছোটো আয়নাটার দু-পিঠেই মুখ দেখা যায়। একপিঠে ম্যাগনিফাইং উত্তল কাচ থাকায় মুখটা বিরাট বড় দেখায়। এ জিনিসটা এই প্রথম দেখল প্রীতম। তার অসুস্থতার অবকাশে কত নতুন জিনিস বেরিয়ে গেছে। নিজের চার-পাঁচ গুণ বড় মুখের দিকে চেয়ে রইল প্রীতম। সে কতটা শীর্ণ, কতটা ফ্যাকাসে তা ঠিক বুঝতে পারল না। তবে সে যে দৈত্যের মতো প্রকাণ্ড এবং বিপুল শক্তিমান সেকথা আয়নাটা তাকে বোঝাবার চেষ্টা করতে লাগল। সেই সঙ্গে একথাও মনে করিয়ে দিতে লাগল যে, দু-তিন বছর আগেও সে যেমন ছিমছাম স্মার্ট চেহারার মানুষ ছিল এখনো সেই-রকমই আছে।

বিনা দুর্ঘটনায় দাড়ি কামিয়ে ফেলে প্রীতম বারান্দায় তার প্রিয় চেয়ারে গিয়ে বসে। হাতে আয়নাটা। আরো স্পষ্ট আলোয় আয়নাটা মুখের সামনে ধরে সে নিজেকে

মিথো মিথো করে বলে, তুমি আগের চেয়ে ভাল আছ। তোমার উন্নতি হচ্ছে। তুমি মরবে না।

নিজেকে সে প্রশ্ন করতে লাগল :

জীবগুণের কোলাহল ?

নেই। বহুকাল শুনিনি।

সেই নিঃসঙ্গতার বাঘটা ?

ডাকছে না।

মৃত্যুভয় ?

একটু আছে। এত সামান্য যে ঠিক ভয় বলা যায় না। মৃত্যু-চিন্তাই হবে হয়তো।

তবে যাও প্রীতম, তুমি মুক্ত। যেখানে খুশি চলে যাও।

যাবো ?

যাও।

মরমের সাইকেলটা বারান্দায় ঠেস দিয়ে দাঁড় করানো। লক করা, কিন্তু চাবিটা খুলে নেয়নি মরম।

কিছু না ভেবেই প্রীতম চেয়ার ছেড়ে ওঠে। বারান্দা থেকেই উবু হয়ে চাপে সাইকেলের সীটে। লকটা খুলে নেয়। শরীর কাঁপে, পা কাঁপে। তবে খুব বেশী নয়। সীটে বসে সামান্যক্ষণ দম নেয় সে। প্যাডেলে ডান পা রেখে বাঁ পায়ে যতদূর সম্ভব জোরে একটা চাড়া দেয় সে। হ্যান্ডেলটা বার দুই প্রচণ্ডভাবে ডাইনে বাঁয়ে ঘুরে গিয়ে আচমকা সোজা হয়।

একটু ঢালু মতো জায়গাটার ওপর দিয়ে হঠাৎ সাইকেলটা গড়িয়ে যেতে থাকে। ভীষণ কাঁপছে হাতল, ভীষণ দুলাচ্ছে প্রীতম। কিন্তু চেষ্টাই তো জীবন। প্রাণপণে সে পা দিয়ে প্যাডল করতে চেষ্টা করে।

রাস্তার ধারে ড্রেনের ওপর পাতা কংক্রিটের অপ্রশস্ত সাঁকেটা শুধু কপালজোরে পেরোতে পারে সে। তারপর রাস্তা...বিপজ্জনক...ভয়ংকর...তবু মুক্তি!

আশ্চর্য এই টেলোমলো সাইকেলটা পড়েও গেল না। চৌপাখী ছাড়িয়ে গড়গড়িয়ে চলতে লাগল। চলন্ত সাইকেলে প্যাডল করতে খুব বেশী কষ্ট নেই। কিন্তু কষ্ট হ্যান্ডেল সোজা রাখায়। এ পাড়ায় কচিং কদাচিং এক-আধটা মোটরগাড়ি আসে। রিকশা অবশ্য অনেক। আর সাইকেল। প্রীতমের ভয় করছিল, হয় কোনো সাইকেল বা রিকশার সঙ্গে ধাক্কা খাবে, নয়তো রাস্তা ছেড়ে পাশের নর্দমায় গিয়ে পড়বে।

কিন্তু পড়ছিল না। চৌপাখী ছাড়িয়ে মাঠের ধার অবধি চলে এল সে। পিছনে একটা হইচই শোনা যাচ্ছে। আশেপাশের লোক অবাক হয়ে দেখছে। আনন্দধামের বারান্দা থেকে পিনুর মা অবাক গলায় চোঁচাচ্ছেন, ওরে শম্ভু! ও তারক! শিগগির গিয়ে প্রীতমকে ধর। দেখ, কী সর্বনেশে কাণ্ড করছে ছেলেরা!

হ্যাঁ, এটা ঠিকই যে, সে একটা সর্বনেশে কাণ্ডই করছে আজ। কিন্তু এই আধখানা বেঁচে থাকার নিরন্তর বন্দি থেকে মুক্তি আর খুব দূরে নয়। অনেকদিন তার জীবনে মৃত্যুর শাসন বড় গুরুভার হয়ে চেপে বসে আছে। সে তো জানে, মরবেই, তাই মৃত্যুর হাত থেকে এই ছুটি নেওয়া।

ওবা তাকে ধরে ফেলবে। পিছনে ছুটন্ত পায়ের আওয়াজ আসছে। কারা চোঁচিয়ে ডাকছে, প্রীতমদা! প্রীতমদা! থামুন! আমরা আসছি।

প্রীতম তার সর্বশ্ব দিয়ে ভর দিল প্যাডেলে। তার দুর্বল পায়ে তেমন জোর নেই যে সাইকেলকে এরোপ্লেনের মতো ছোটাবে। তবু এই অবস্থায় যতখানি জোরে সম্ভব সাইকেল ছুটে থাকে। হ্যান্ডেলের আঁকাবাঁকা হয়ে যাওয়াটা একটু কমে এল। স্থির হল। সৰু রাস্তায় যথাসাধ্য ধার ঘেঁষেই প্রীতম চালিয়ে নিতে পারছে। উষ্টোদিকের চারটি রিকশা অনেকটা তফাত দিয়ে পেরিয়ে গেল তাকে। একটা মোটরগাড়িও। উত্তরাভিমুখী প্রীতমের সাইকেল রইল বহমান। কিন্তু এ পাড়ার শতকরা পঞ্চাশজনই তাকে চেনে। অচেনারাও সাইকেলে রুগুণ্ণচেহারার লোকটাকে দেখে অবাক হয়। সুতরাং সে প্রবলভাবে সকলের দৃষ্টি আকর্ষণ করতে থাকে। পিছন দিক থেকে একটা দুটে স্বাস্থ্যবান ছেলে বেগবান সাইকেলে এসে এঙ্কনি তাকে ধরে ফিরিয়ে নিয়ে যাবে, তাও জানে প্রীতম। তাই সে যতদূর সম্ভব চেনা পরিচয়ের গভী পেরিয়ে যাওয়ার জন্য দুটো বাঁক ফিরল। কিন্তু বৃকে হাঁফ ধরে আসছে, গায়ে ঘাম, হাত-পায়ের প্রতিটি সন্ধিতে খিল-ধরার যন্ত্রণা। প্রচণ্ড রোদে তার চোখ ঝলসে যাচ্ছিল। চোখের দৃষ্টিও কিছুটা আবছা এখন।

তবু সব বাধাকে ছাড়িয়ে প্রীতম চলতে থাকে। খানিকটা অঙ্কের মতো, খানিকটা যন্ত্রের মতো। রাস্তা খুবই সৰু। এত সৰু যে একটা রিকশা উষ্টোদিক থেকে এলেই সে বিপদে পড়বে। সাইকেলের ওপর তার এত নিয়ন্ত্রণ নেই যে, অল্প জায়গা দিয়ে গলে যেতে পারবে। তবু বেপরোয়া প্রীতম প্রবল শ্বাস ফেলতে ফেলতে হেলে প্যাডেলে চাপ দিয়ে সাইকেলটাকে যথাসাধ্য বেগবান রাখছিল।

আর একটা মোড় ঘুরতে গিয়ে প্রীতম পডল। পড়বে, প্রীতম জানতও। কিন্তু তার জন্য কোনো প্রস্তুতি নেয়নি সে, সাবধান হয়নি। তাই জানা সম্বন্ধেও পড়াটা হল আচমকা।

বাঁ হাতে আর একটা পাথরকুচির রাস্তায় বাঁক নিয়েই সে দেখতে পায় সামনে ইট বোঝাই এক টাটা মারসিডিস লরি থেকে মাল খলাস হচ্ছে। নীরঙ্ক অবরোধ। প্রীতমের সাইকেলে ব্রেক ছিল বটে, কিন্তু সেটাকে যথেষ্ট জোরে চেপে ধবাব মতো শক্তি ছিল না তার হাতে। সুতরাং শুকনো একটা নর্দমার খাতে সাইকেল সন্ধু নেমে খানিকদূর গড়িয়ে গেল সে। তারপর ধাক্কা মারল ইটের পাঁজায়। বেকে গেল সাইকেল। আবার একটু নিয়ে গেল তাকে। ফাঁকা ঘাসজমির ওপর ঢলে পড়ে গেল প্রীতমকে নিয়ে।

বাথা-বেদনা টের পেল না প্রীতম। তবে চোখে অঙ্কার নেমে এল। গভীর শ্বাস ফেলে তৃপ্তিতে চোখ বুজল সে। মথিত ঘাস আর ভেজা মাটির গন্ধ, রোদের সূর্য্যাণে ভরে গেল তার শ্বাস। ঘাসপোকাদের শব্দ শুনতে শুনতে সে চেতনা হারাল।

খুব বেশীক্ষণের জন্য অবশ্য নয়। চোখেমুখে প্রথম জলের ঝাপটা পড়তেই চোখ মেলে সে। হাত তুলে ওদের বারণ করে আর জল দিতে। হাসিমুখে ঘাসে শুয়ে থেকে সে উজ্জ্বল আলোয় মাখা অনেকখানি আকাশকে চেয়ে দেখে। এতখানি স্বাধীনতা বহুকাল ভোগ করেনি সে।

পাড়ার ছেলেরা তাকে ধরে তোলে, প্রীতমদা, এবার বাড়ি চলুন।

ওরা তাকে একটা রিকশায় তোলে। একজন তার পাশে বসে তাকে ধরে থাকে।

পাড়া ভীড়ে ভীড়াকার। ভারী লজ্জা করছিল প্রীতমের। আর তার মুখের ওই লাজুক হাসিটি দেখে অনেকেই অবাক মানল, তাহলে কি প্রীতম ভাল হয়ে উঠছে?

মা প্রীতমকে শোওয়ার ঘরে নিয়ে যেতে চাইছিল, শতম বলল, থাক মা। দাদা যা চাইছে তাই করো।

প্রীতম আবার বারান্দায় বসে। কেউ তাকে কিছু জিজ্ঞেস করে না, অভিযোগ করে না,

শাসন করে না। বোধহয় শতম সবাইকে বারণ করেছে।

খুবই ক্লান্ত ছিল প্রীতম। দুপুরে অনেকক্ষণ ঘুমোলো। বিকেলে মনোরম আলোয় বারান্দায় এসে বসল আবার। ছবি চা দিতে এসে সহসা ফিরে গেল না। চেয়ারের পাশটিতে বসে উর্ধ্বমুখী হয়ে একগাল হেসে বলল, তোমার আর কলকাতার জন্য মন খারাপ হয় না, না দাদা ?

প্রীতম কথাটা ভেবে দেখল। কলকাতার কথা তার খুব মনে পড়ে। কিন্তু না, প্রথম প্রথম যেমন হত, ফিরে যেতে ইচ্ছে করত, তেমনটা আর হয় না। সে মাথা নাড়ল।
তুমি কলকাতার লোক হয়ে যাওয়ার পর আমবা ধরেই নিয়েছিলাম তুমি আমাদের পর হয়ে গেছ। এভাবে যে অনেকদিন আমাদের কাছে থাকতে পারবে তা কখনো ভাবতেই পারতাম না।

প্রীতম হেসে গভীর শ্বাসও ফেলল সেইসঙ্গে।

ছবি বলল, বউদির চিঠি আজও এসেছে। তোমার নামে। তুমি বউদির চিঠিগুলো কেন পড়েও দেখ না বলো তো ! আগের চিঠিটাও আঁটা খামে তোমাব টেবিলে পড়ে আছে। জবাব না দিলে, পডতে দোষ কি ?

প্রীতম উদাসমুখে চুপ করে থাকে। কি জবাব দেবে ? বিলুর চিঠি তার পডতে ইচ্ছে করে না। মনে হয়, বিলুব চিঠিব মধ্যে অনেক মিথ্যে সাজানো কথা থাকবে। ঐসব কথা তার এখন সহ্য হয় না।

প্রীতম বলে, তোদেব কাছে তো চিঠি দেয়ই।

তা দেয়। তবু, তোমাব কাছে তো আলাদা করে কিছু বলাব থাকতে পারে।

থাকলে কি কবব ? আমাব তো এখন আর ওব জন্য কিছু কবাব নেই।

তুমি ভীষণ অন্যাকম হয়ে গেছ।

কিরকম রে ?

কেমন যেন। তোমাকে বাপু আজকাল ভয় করে।

ভয় পাস ?

ভয় পাই তোমাকে ঠিক বুঝতে পারি না বলে। লাবুসোনার জন্যও তুমি আজকাল ভাবো না দাদা ?

প্রীতম চট করে একথাব জবাব দিল না। সাবা গায়ে একটু ব্যথার টাটানি রয়েছে এখনো। তাব অবশ প্রায় অনুভূতিহীন শরীরে এই ব্যথাটুকু খুব উপভোগ করছিল সে। দূরের দিকে খানিকক্ষণ চেয়ে থেকে বলল, লাবুকে নিয়ে ভাববার কিছু তো নেই। যদি কোনো অ্যাকসিডেন্ট বা অকালমৃত্যু না ঘটে তাহলে ওর জীবন তো নিরাপদই। ওর মা ভাল চাকরি করে, আমারও কিছু টাকা রয়ে গেছে। তার চেয়ে বরং স্বার্থপরের মতো এখন আমার নিজেকে নিয়েই চিন্তা করতে বেশী ভাল লাগে।

বলে প্রীতম একটু হাসল।

কথাটার অর্থ ছবি খুব ভাল ধরতে পারল না, কিন্তু কিছু জিজ্ঞেস করল না। বলল, কিন্তু বউদি যে আমাদের কথা বিশ্বাস করে না, তার কি করবে ? প্রতি চিঠিতেই আমরা লিখি, দাদা ভাল আছে। কিন্তু বউদির সন্দেহ, তুমি ভাল নেই। ভাল থাকলে নিজের হাতেই চিঠি লিখতে।

খুব চিন্তা করে বুঝি ?

খুব। লেখে, তোমরা আমাকে সব কথা জানাচ্ছে না।

এবার লিখে দিস, দাদার জন্য তোমাকে চিন্তা করতে হবে না। দাদার তো আয়ু বেশী নয়, তাই বেঁচে থাকার প্রতিটি মুহূর্ত, প্রতিটি সেকেন্ড সে নিংড়ে নেয়। তার সময় কই যে তোমাকে চিঠি লিখবে ?

ছবি হেসে বলে, এসব কথা লেখা যায় বুঝি !

প্রীতমও হাসে, তাহলে কিছুই লিখিস না।

বউদিকে নিজের হাতে তোমার একটু লেখা উচিত। একটিবার লেখো। ওই যা যা সব বললে তাই না হয় লেখো। অত ভাষা তো আর আমাদের কলমে আসবে না।

তোর বউদি যদি আমাকে নিয়ে ভাবনায় পড়ে থাকে তবে একটু ভাবতে দে না। ভাবলে ভালবাসা বাড়ে।

সন্ধ্যাবেলা ঘরে এসে টেবিলের ওপর বিলুর চিঠিটা পড়ে থাকতে দেখল প্রীতম। কিন্তু একবারও খুলে পড়তে ইচ্ছে হল না তার।

আগের মতো প্রীতম এখন ঘরবন্দী থাকে না। সকলের সঙ্গে একসঙ্গে বসে খায়। অনেক রাত অবধি পারিবারিক আড্ডায় জেগে অংশ নেয়। মাঝে মাঝে মনে হয়, সে সেই শৈশবের শিলিগুড়িকে পেয়ে গেছে বুঝি। এখন আর তাই বিলুকে মনে পড়ে না, লাবুর জন্য চিন্তা নেই, মন কেমন করে না তেমন।

টেলিগ্রামটা এল বেশ রাতে। অ্যারাইভিং টুয়েলভথ্ অ্যাটেন্ড। বিলু।

টেলিগ্রামটা পিওনের হাত থেকে নিয়ে ঘরে এসেই মরম চোঁচায়, বউদি কাল আসছে। হব্বরে।

খবরটা মরমেব মুখ থেকে বেরোতে না বেরোতেই বাড়িতে একটা আনন্দের কোলাহল পড়ে যায়। মা খুশি, বাবা খুশি, ছবি খুশি। শুধু প্রীতমই এই খবরে তেমন উত্তেজনা বোধ করে না। বরং তার একটা ভূঁ একটু উর্ধ্বমুখী হয়। বিলু, কে বিলু ?

রাতে ঘুমঘোরে প্রীতমের মনে হয়, তাব কোনো অভাব নেই। তার কিছু প্রয়োজন নেই। আর কাউকে ছাড়াও তার চলে যাবে। সকালে বাচ্চা নিয়ে যে মহিলাটি সামনে এসে দাঁড়াবে সে এই পৃথিবীর আর হাজার হাজার মহিলার মতোই একজন। তার বেশী কিছু নয়। কিন্তু লাবু ! লাবু তো তার মেয়ে ! প্রীতম আধোঘুমেই ভাবে, তাই বা ভাবছি কেন ? লাবু আমারই বা কেন হবে ? লাবু এই পৃথিবীতে আসার একটি মাধ্যম খুঁজেছিল। প্রীতম সেই মাধ্যম মাত্র। সে তো লাবুর সৃষ্টিকর্তা নয়। লাবুর প্রকৃত সৃষ্টিকর্তা যে, লাবু তারই। প্রীতম শুধু এক বিভ্রম এক মায়াবশে ভাবে, লাবু আমার মেয়ে। কিন্তু সত্য ঘটনা তো তা নয়।

খুব সকালেই স্কুটার হাঁকিয়ে বউদিকে আনতে নিউ জলপাইগুড়ি চলে গেল শতম। বাড়িতে গোছগাছ করতে লাগল ছবি আর মা।

গোছগাছের জন্যই সাতসকালে বিছানা ছাড়তে হয়েছে প্রীতমকে। ছবি তাকে ঠেলে তুলে বিছানা টানটান করে ভাল বেডকভার দিয়ে ঢেকে দিয়েছে। টেবিলে পেতেছে নিজের হাতে কাজ করা সবুজ ঢাকনা। আজ সব জানালায় দরজায় টানটান পর্দা।

একটু বিরক্তমুখে কাচা ধূতি পরতে হয়েছে প্রীতমকে। গায়ে সাদা কটকটে গেঞ্জি। চুল পাট করে সেজেগুজে বসে আছে বারান্দায়। ছবি চা দিতে এলে তেতো মুখে বলল, আজ কি পাত্তীপক্ষ আমাকে দেখতে আসছে রে ? তোরা যা শুরু করেছিস !

আসছেই তো দেখতে। যা অগোছালো হয়ে থাকো, বউদি দেখে গিয়ে আমাদের নিন্দে করবে।

এমনিতে বুঝি করে না ?

করলে করে । তবু যতদূর পারি মন রাখার চেষ্টা করি ।

তোর বউদি হল কলকাতাই মাল । কলকাতাইরা অত সহজে খুশি হয় না ।

কী যে সব বলো না দাদা !

প্রীতম বু কুঁচকে চা খায় । তারপর হঠাৎ উদাসী এক হাওয়া আসে । প্রীতম চরাচরের দিকে সম্মোহিতের মতো চেয়ে আলো আর ছায়া, সবুজ আর নীল, প্রাণ আব জীবনের খেলা দেখতে থাকে । সামনের মাঠে খেঁটায় বাঁধা গরুব পাশে ছাগল চরছে । ঘাস পতঙ্গ পাখি, তুচ্ছ সব ওডাউডি, অস্তিত্ব, শব্দ তাকে এক গভীর প্রাণের রাজ্যে নিয়ে যেতে থাকে । সেখানে নামহীন অস্তিত্ব আর বুদ্ধির জগৎ । বিলু নেই, লাবু নেই, কেউ নেই ।

এই গভীর ধ্যানের মধ্যে স্কুটারে পি শব্দ হঠাৎ হানা দেয় । স্কুটারের পিছু পিছু গুড়গুড় করে আসে একটি অটোরিকশা । বাড়ির সামনে থামে ।

লাবু চেঁচিয়ে ডাকে, বাবা !

ভোরের সুন্দর আলোয়-ধোয়া মুখে একটু হাসে প্রীতম । হাত বাড়িয়ে স্নিগ্ধ স্বরে বলে, আয় ।

লাবুকে কোলের মধ্যে টেনে নিয়ে প্রীতম টের পায়, আজ এরকমই সন্মোহে সে একটি ছাগলছানাকেও কোলে নিতে পারে । তাব স্নেহ অনেকটাই নৈর্ব্যক্তিক হয়েছে এখন ।

লাবু অনেকটা লম্বা হয়েছে । অনেক বেশী সুন্দরও । তার মুখে এখন নিখুঁতভাবে প্রীতমেব মুখের আদল চেপে বসেছে । খুব দামী আর সুন্দর একটা ফ্রক তার পরনে । দুহাতে লাবুর মুখখানা তুলে নিবিষ্ট চোখে দেখছিল প্রীতম ।

লাবুও মুগ্ধ চোখে চেয়ে আছে বাবার দিকে । বলল, তুমি ভাল আছ বাবা ?

ভালই মা । তুমি ?

আমিও ভাল আছি বাবা ।

বাড়িসুদ্ধ লোক বেরিয়ে এসেছে বাইরে । মা বাবা ছবি মরম রূপম । ভাইরা স্টুকেস, বাসকেট, বিছানা নামাচ্ছে অটোরিকশা থেকে । ছবি গিয়ে বউদির হাত ধরে টেনে আনছে ।

ভারী সুন্দর এই দৃশ্য । কিন্তু প্রীতম নড়ল না । এক হাতে মেয়েব হাতটা ধরে নির্বিকার বসে রইল । বিলুর দিকে চেয়ে সে স্পষ্টই বুঝতে পাবে, বিলু সেই আগের মতো নেই । সামান্য মেদবৃদ্ধির ফলে তার চেহারাটা পরিপূর্ণ শ্রীময়ী । মুখে ক্লান্তির আস্তরণের নীচে তৃপ্তির চিহ্ন । বিলু আর তার নেই ।

প্রীতমের দীর্ঘশ্বাস এল না । দুঃখ হল না । উদাসীনতার এক গৈরিক রং আজ তার মন ছেয়ে আছে । সে দেখল । মনে মনে ক্ষমা করল । সবাইকে ।

ঘণ্টাখানেকেরও বেশী সময় কেটে যাওয়ার পর বিলু শাড়ি পাল্টে, মুখ হাত ধুয়ে বারান্দায় আসে । আর একটা চেয়ার টেনে নিয়ে বসে বলে, আমার একটা চিঠিরও জবাব দাওনি ।

আমি ভাল আছি বিলু ।

সে কথাটাও তো জানাতে পারতে !

তুমি কেন এত জানতে চাও ?

চাইব না ! বিলু অবাক হয়, রোগা মানুষটাকে এতদূরে ফেলে রেখে কলকাতায় থাকি, জানতে চাইব না ?

প্রীতম বিরক্ত হয় না, কিন্তু গভীর বিষণ্ণতার গলায় বলে, বেশ তো আছি ।

বেশ আছো জানি । মাঝে মাঝে অ্যাডভেঞ্চার করতে বেরিয়ে পড়ো, তাও শুনেছি । কিন্তু আমি কেমন ছটফট করি, তা জানো ?

প্রীতম কৌতূহলভরে বিলুর দিকে তাকায় । সন্দেহ নেই, প্রীতমের জন্য বিলুর উদ্বেগ আছে, দায়িত্ববোধ আছে, দুঃখ আছে । কিন্তু এও জানে প্রীতম, বিলুর জীবনের ঠিক কেন্দ্রস্থলে সে নেই । বিলুকে চাকরির ঘানিতে ঘোরাচ্ছে কে ? বিলুকে কলকাতার জালে আটকে রেখেছে কে ? সে কি এক শূন্যগর্ভ নিরাপত্তার বোধ ? বিলু কি জানে না, কেউই কোথাও কখনোই নিরাপদ নয় ?

প্রীতম বলল, চিঠি লিখতে ইচ্ছে করে না ।

পড়তেও নয় ? শুনলাম আমার চিঠি এলে তুমি নাকি তা খুলে পড়তেও চাও না ।

ছবি বলেছে বুঝি ! আসলে ভুলে যাই । মনে রাখলে কষ্ট পাবো বলে জোর কবে ভুলে যাই । নইলে তোমার চিঠি পড়তে লোভ হয় খুব । কিন্তু পড়লেই দুর্বল হয়ে যাবো যে ।

এ কথায় বিলু বোধহয় একটু ভিজ়ে যায় । তবু বলে, ও কথাব মানে হয় না । চিঠিতে কত জরুরী কথাও থাকতে পারে তো ।

জরুরী ! কি আর এমন জরুরী থাকতে পারে বলো তো জীবনে । ঘর-সংসার সম্পর্ক সবই তো ছেলেখেলা বিলু ।

সন্নিহিত ঠাকুর, আমার মুখ চেয়ে না হয় একটু ছেলেখেলাই করলে । তোমার অসুখটা তো আমার কাছে ছেলেখেলা নয় । মেয়েটাও দিনের মধ্যে দশবার বাবার চিঠি এসেছে কিনা জানতে চায় । ওকে কী বলি বলো তো !

তুমি বেশ সুন্দরী হয়েছেো বিলু ।

আচমকা এ প্রশংসায় একটু ঝুঁকড়ে গিয়ে বিলু বলে, যাক বাবা, আমাকে দেখেছো তাহলে । আমি তো ভাবলাম, সন্নিহিত বুঝি বউয়ের মুখ দেখাও বারণ ।

প্রীতম ক্ষীণ একটু হাসল । তারপর বলে, বেশ লাগে এখন তোমাকে দেখতে ।

থাক, আর বলতে হবে না । নিজের দোষ ঢাকতে এখন এরকম অনেক মিথ্যে কথা তোমাকে বলতে হবে ।

প্রীতম গভীর মুখে হঠাৎ বলে, একটা কথা বলব বিলু ?

বলো ।

তোমার এখনো সব শেষ হয়ে যায়নি । আমার গেছে । কেন আমার স্মৃতি নিয়ে তোমার নিজের জীবনকে নষ্ট করছো ?

বিলু নড়ে বসল । তারপর বলল, ওরকম একটা কথা তুমি আগেও বলেছো । আর বোলো না ।

শোনো, আমি অভিমান থেকে বলছি না । আমার একটুও ঈর্ষা হবে না, অধিকারবোধেও লাগবে না । আমি তোমাকে সুখী দেখতে চাই ।

যদি সুখী না হই ? তুমি চাইলেই কি সুখের পাখি এসে আমার কোলে বসবে ?

তবু আমি চাইছি ।

বোলো না । আমি এখনো অত আত্মকেন্দ্রিক নই ।

বিলু, তুমি বড় পাপবোধে কষ্ট পাচ্ছে । কিন্তু যাকে পাপ বলে ভাবছ তা পাপ নাও হতে পারে ।

প্রীতম নিজে থেকেই মাস দুই আগে অ্যালোপ্যাথি চিকিৎসা বন্ধ করে দিয়েছে। ইদানীং ওষুধের প্রতিক্রিয়া হচ্ছিল তার। পিঠের দিকে আর মাজায় ক্ষত দেখা দিচ্ছিল। মাঝে মাঝে হাঁফানির মতো শ্বাসকষ্ট হত। অ্যালোপ্যাথি ওষুধের বেশির ভাগই কমবেশি বিষ জাতীয় জিনিস। ডাক্তারকে সে একদিন বলল, আমি আর ওষুধ খাবো না।

ডাক্তার অবাক হয়ে বললেন, খাবে না? তা হলে কি করবে?

আমার ড্যাগ রিঅ্যাকশন হচ্ছে।

ডাক্তার নিজেও সেটা জানেন। বিচক্ষণ প্রবীণ ডাক্তার। একটু ভেবে বললেন, খেও না। ভগবানকে ডাকো। তাঁর চেয়ে বড় ডাক্তার আর কে আছেন?

পরদিন থেকেই একজন হোমিওপ্যাথ প্রীতমকে দেখছে। বেশ সাধু-সাধু চেহারার দাড়িওলা হাসিখুশি মানুষ। বলার চেয়ে শোনের বেশী, আর তার চেয়েও বেশী হাসেন। লোকটাকে পছন্দ হল প্রীতমের। লোকটা একটু বাঙাল আর বাহে টানে খাঁটি উত্তরবঙ্গীয় বুলিতে শুধু বলে গেলেন, ভাল হইয়া যাইবেন গিয়া।

ছোটো ছোটো মিষ্টি গুলির ওষুধ খেতে আপত্তি নেই প্রীতমের। উপকার হোক না হোক, অপকারও নেই। ডাক্তার বড় একটা আসেন না, শতম গিয়ে অবস্থার বিবরণ দিয়ে ওষুধ নিয়ে আসে। তাতে কাজ হয় কিনা বোঝা যায় না, কিন্তু শতম খুব নিয়ম করে ওষুধ খাওয়ায়। ওষুধের মাত্রা খুবই অবিশ্বাস্য রকমের কম। সাতদিনে মাত্র একদিন একটি ডোজ, খালিপেটে এবং সকালে।

এই চিকিৎসার ব্যবস্থায় মোটেই খুশি হল না বিলু। পরের দিনই সে নিজে দাড়িওলা ডাক্তারের বাড়িতে হানা দিল।

ডাক্তারবাবু, এই ওষুধে কি কাজ হবে?

ডাক্তারবাবু এই সাজগোজ করা বুদ্ধিমত্তী মেয়েটিকে দেখে একটু তটস্থ হয়ে বললেন, হবে। একটু ধৈর্য ধরতে হবে। একটু দেহীতে ক্রিয়া হয়।

বিলু ভূ কঁচকে বলে, আপনার কি মনে হয় না ওর এখনই অ্যালোপ্যাথি চিকিৎসা বন্ধ করাটা ঠিক হয়নি।

ডাক্তার একটু ফাঁপরে পড়ে বলেন, ওই চিকিৎসাতেও বিশেষ উপকার হইতেছিল না। আপনি কি পারবেন?

ডাক্তার খুব হেসে বলেন, রোগীর এখন-তখন অবস্থা না হইলে কেউ তো আর হোমিওপ্যাথের কাছে আসে না। আমার সব রোগীই তাই মকুইন্যা। তাগো ভালো কবতে সময় তো একটু লাগেই, মা। আপনে নিচ্ছিন্তে যান গিয়া।

ডাক্তারের পশার বেশী নয়, তা বাইরের ঘরে বসেই টের পেল বিলু। সকালবেলার দিকেও রুগী বলতে ডাক্তারের বাইরের ঘরে প্রায় কেউই নেই। ডাক্তার নিজেও তার ক্ষেত্রের কাজ দেখছিল। খবর পেয়ে মাটিমাখা হাতেই উঠে এসেছে। দুটো ভাঙা আলমারিতে রাজ্যের পুরোনো হোমিওপ্যাথের বই আর জারনাল। দুটো ছোটো পুরোনো আলমারিতে হাজারখানেক শিশি আর বোতল। দেয়ালে মহাত্মা হ্যানিম্যানের ছবিতে ঝুল পড়েছে। ডাক্তার গা-আদুড়, ধুতি হাঁটু অবধি তোলা। দাড়ির ফাঁকে হাসি।

বিলু খুশি হচ্ছিল না। বলল, কলকাতায় ওকে বড় বড় স্পেশালিস্ট দেখছিল। তারাই কিছু করতে পারল না।

ডাক্তার শুধুই হাসছিলেন ।

বিলু অগত্যা উঠল । তার ইচ্ছে করছিল, এক্ষুনি প্রীতমকে কলকাতায় ফেরত নিয়ে যায় । এরকম অব্যবস্থায় বিনা চিকিৎসায় লোকটা মরেই যাবে ।

বেরোনোর মুখে বিলু বাঁ হাতে ডাক্তারের বাগানটা দেখল । চোখ জুড়িয়ে যায় । কী সবুজ ! কী সবুজ !

ওটা কি শশা নাকি ?

শশাই, মা । খাইবেন ? লইয়া যান কয়টা । বলে ডাক্তার গিয়ে মাচান থেকে কয়েকটা দুধকচি শশা পেড়ে এনে বিলুর হাতে দেয় ।

বিলু শশাগুলো নিয়ে এসেছিল বটে, কিন্তু বাড়িতে পা দিয়েই প্রীতমকে বলল, এবারই আমার সঙ্গে তোমাকে ফিরে যেতে হবে ।

কেন ? প্রীতম অবাক হয়ে জিজ্ঞেস করে ।

এসব কী হচ্ছে শুনি ! এ কি চিকিৎসা ? লোকটা তো তেমন উঁচুদরের ডাক্তারও নয় । প্র্যাকটিসই নেই ।

প্রীতম থম ধরে থেকে কিছুক্ষণ বাদে বলে, এর ওষুধে আমার কাজ হচ্ছে ।

ছাই হচ্ছে ! হাতি ঘোড়া গেল তল, এখন মশা বলে কত জল । আমি এসব পছন্দ করছি না । এবারই আমি তোমাকে নিয়ে যাবো ।

নিয়ে কি করবে ?

যদি হোমিওপ্যাথিই করাও তবে তার জন্যেও কলকাতায় ঢের বড় ডাক্তার আছে । এ লোকটা কিছু জানে না ।

কি করে বুঝলে ?

রুগীই নেই । কেমন ক্যাবলার মতো সবসময়ে হাসে ।

ওগুলো যুক্তি নয়, বিলু ।

কোনটা যুক্তি নয় ?

ডাক্তারের বিচার করতে যেও না । আমার রোগের কোনো চিকিৎসা এখনো আলোপ্যাথিতে নেই । কলকাতার ডাক্তাররা সেকথা আকারে ইংগিতে বলেই দিয়েছে । হোমিওপ্যাথিতে আছে কিনা আমি জানি না । জানি না বলেই ভরসা করতে পারছি । এ লোকটা শতমের চেনা । ক্যাবলা হলে শতম ওকে দিয়ে আমার চিকিৎসা করাতো না ।

বিলু সাময়িকভাবে চুপ করে গেল বটে, কিন্তু যুক্তিটা মেনে নিল না ।

বিকেলেরি সে শতমকে বলল, এখানে তোমার দাদার ভাল চিকিৎসা হচ্ছে না । আমি ভাবছি ওকে কলকাতায় নিয়ে যাবো ।

একথায় একটু থতমত খেয়ে যায় শতম । সত্য বটে, দাদার দায়দায়িত্ব সে নিজের ঘাড়ে নিয়েছে, কিন্তু একথাও অস্বীকার করার উপায় নেই যে, দাদার ওপর অধিকার তার চেয়েও বউদিরই বেশী । পুরুষ মেয়ে উভয় পক্ষই বিয়ের পর আত্মীয়স্বজনের কাছে একটু পর হয়ে যায় । দাদা মরলে বউদিরই তো সবার আগে শাঁখা ভাঙবে, সিদুর মুছবে । কাজেই বউদির যতটা অধিকার তার ততটা নয় ।

সে বলল, আবার কলকাতা !

কলকাতাই ভাল । এখানে কেউ তোমরা ওর ওপর ঠিক নজরও রাখতে পারছ না । শুনলাম, দুদিন ও ঘর থেকে বেরিয়ে গেছে । আমি আসবার আগের দিনই সাইকেল নিয়ে বেরিয়ে পড়েছিল । যদি গাড়ির সঙ্গে ধাক্কা খেত ?

শতম একটু হাসল, আমাদের পাড়াটা তেমন কনজেস্টেড নয়, তাই রক্ষা। যদি এ কাণ্ড দাদা কলকাতায় করে তা হলে কি হবে বউদি, বলো তো ! তুমি আফিসে থাকো, লাবু ইন্সুলে, দুজন মাইনে-করা লোক কতক্ষণ নজর রাখবে ?

দরকার হলে আমিই ছুটি নিয়ে বাসায় থাকব।

ছুটি নেবে ? কেন, চাকরিটা ছেড়ে দাও না !

দরকার হলে তাও ছাড়ব। কয়েকমাস আগে শতম যে জ্বরদস্তিতে দাদাকে নিয়ে এসেছিল সেই অপমানটা ভোলেনি বিলু। আজ বহুদিন বাদে সেই শুষ্ক ক্ষত থেকে রক্তক্ষরণ টের পায় সে। বাঘিনীর মতো জিভ দিয়ে সেই রক্তের স্বাদ নেয় সে।

শতম বউদির চেহারা বিদ্রোহের আভাস পাচ্ছিল। তাই কথা বাড়াল না। মৃদুস্বরে বলল, নিয়ে যেতে হয়, যাবে। তার আর কথা কি !

এত সহজে দুরন্ত শতম বাগ মানবে তা ভাবেনি বিলু। একটু ক্লান্ত স্বরে সে বলল, তিনটে ফাস্ট ক্লাসের টিকিট করে দাও তাহলে।

দেবো। মাকে আগে একটু জানিয়ে নাও।

নিজের ঘরে বা বারান্দায় বসে প্রীতম সবই টের পায়। কলকাতায় যাওয়ার ব্যাপারে তার কোনো মতামত আর চাইছে না বিলু। অর্থাৎ প্রীতমের মতামত এখন উপেক্ষা করলেও তার চলে। বাড়ির কেউই বিলুর প্রস্তাবে বাধা দিচ্ছে না। তার মানে কি, প্রীতমকে এরা কেউ চায় না ? ঠাণ্ডা লড়াইটা বিলু জিতে গেছে তা হলে ?

শতম একদিন একটা ফাস্ট ক্লাস কুপে রিজার্ভ করে এসে তিনটে টিকিট বউদির হাতে দিয়ে বলল, আগামী রবিবার।

বিলু টিকিট তিনটে তার ভ্যানিটি ব্যাগে রেখে দিল।

এ সবই ঘটল প্রীতমের চোখের সামনেই।

বাড়িতে আজকাল হইচই কমে গেছে। রাতে খাওয়ার পর আড্ডা নেই। ডাক্তার ওষুধ দেওয়া প্রায় বন্ধ করেছে।

একদিন সকালবেলা বারান্দায় বসে গোটা ব্যাপারটা ভেবে মৃদু মৃদু একটু হাসল প্রীতম। তার কেবলই মনে হচ্ছিল বিলু কোনোরকমে টের পেয়েছে যে, প্রীতম ভাল হয়ে উঠবে। আর যদি তাই হয় তবে সে কেন প্রীতমের আরোগ্যের যোঁলো আনা কৃতিত্ব নিজে দাবি করবে না !

এত গভীরভাবে কথাটাকে বিশ্বাস করল প্রীতম যে সকালে প্রথম বিলুর সঙ্গে দেখা হতেই সে বলল, তাই না বিলু ?

অবাক বিলু, বলে, কিসের তাই না ?

এই যে তুমি আমাকে কলকাতায় নিয়ে যেতে চাইছো, এর মূলে আছে একটা অন্য কথা।

কি কথা ?

তুমি জানো যে, আমি ভাল হয়ে উঠছি। আর সেই ভাল হয়ে ওঠার জন্য তুমি নিজের কৃতিত্ব দাবি করতে চাও।

বিলু খানিকক্ষণ চেয়ে থেকে কঠিন মুখ করে বলে, তুমি ভাল হয়ে উঠছো, একথা কে বলল ?

আমি টের পাই, তুমিও টের পাচ্ছে।

আমি পাচ্ছি না, তা ছাড়া অত ধোরপ্যাঁচ আমার মনের মধ্যে ছিল না। তুমি এসব

ভাবলে কি করে ?

প্রীতম হতাশার শ্বাস ফেলে বলে, ছেড়ে দাও ওসব কথা । আইডল ব্রেন ইজ ডেভিলস্ ওয়ার্কশপ ।

তাই দেখছি । কিন্তু ওসব নিয়ে ভাববার সময় আমার নেই । আমি তোমাকে নিয়েই কলকাতা যাবো ।

প্রীতম জবাব দিল না ।

পরদিন সকালে মরম চুঁচিয়ে উঠল, দাদা নেই ! দাদা কোথায় গেল ?

সারা বাড়ি তৎক্ষণাৎ জেগে উঠল । তারপর খোঁজ খোঁজ ।

কিন্তু আশেপাশে কোথাও প্রীতমকে পাওয়া গেল না । এক ঘণ্টা গেল, দু ঘণ্টা গেল । সারাদিনটাই চলে গেল । প্রীতম ফিরল না ।

বিলু ক্রমেই গম্ভীর আর থমথমে হয়ে উঠছিল । তারপর নিজের বাক্স-টাক্স গোছাতে লাগল আপনমনে ।

দুপুরের মধ্যেই সম্ভাব্য অসম্ভাব্য সব জায়গা থেকে ঘুরে আসতে লাগল লোক । কোথাও প্রীতম নেই । থানা হাসপাতাল কোথাও না । ধারেকাছে জলপাইগুড়ি আর খোকসাদাডায় প্রীতমের এক পিসী আর এক দূর সম্পর্কের জ্যাঠা থাকে । সেখান থেকেও খবর এল প্রীতম যায়নি ।

বিলুর মুখে দৃষ্টিস্তা নেই, উদ্বেগ নেই, শুধু কঠোর লাভগাহীন একটা আক্রোশ জ্বলছে । উদ্বেগে ব্লাডপ্রেসার বেড়ে যাওয়ায় মা বিছানায় শোয়া । বাবা ঘর-বার করছে । ছবি দুপুরে ডালসেদ্ধ আর ভাত নামিয়ে রাখল কোনোক্রমে । কেউ খেল, কেউ খেল না, তবে কেউ কাউকে খাওয়ার জন্য সাধাসাধি করল না । বিলু অবশ্য মেয়েকে নিয়ে খেতে বসল । খেতে খেতেই ছবিকে বলল, ওরা অত খোঁজাখুঁজি না করলেই পারত ।

ছবি চমকে উঠে বলে, কেন বউদি ?

তোমার দাদা তো আর অচেনা জায়গায় নেই । পাছে আমি কলকাতায় নিয়ে যাই সেই ভয়ে ওকে সরিয়ে দেওয়া হয়েছে । তবে এতটা না করলেই হত । তেমন আপত্তি থাকলে আমি না হয় ওকে নিয়ে যেতাম না ।

ছবি অবাক হয়ে বলে, সরিয়ে দেওয়া হয়েছে ! কে সরাল ? আমরা ?

তাও তোমরাই জানো । ওর মতো পঙ্গু লোকের পক্ষে খুব দূরে তো যাওয়া সম্ভব নয় ।

ছবি অল্প বয়সের ধমেই একটু মুখিয়ে উঠে বলে, দাদাকে পঙ্গু বলছ কেন ? যে হাঁটতে পারে, সাইকেল চালাতে পারে সে কি পঙ্গু মানুষ ?

মোটাই পারে না । ওসব ও করে মরার জন্যে । একদিন এভাবেই একটা অ্যাকসিডেন্ট করে মরবে, -তোমরা তখনো চোখ বুজে থাকো ।

একথার জবাব এল না ছবির মুখে । অসহায়ভাবে খানিকক্ষণ চেয়ে থেকে ডালের হাতটা মেঝেয় রেখে সে দৌড়ে নিজের ঘরে গিয়ে কাঁদতে বসল ।

ছবির মুখ থেকে কথাটা ছড়িয়ে পড়তেও বেশী দেরী হল না । দুপুরে খেয়ে নিয়ে ঘুমিয়ে বিকেলের দিকে বিলু যখন উঠল তখন তিন ভাই স্বশানফেরৎ চেহারা নিয়ে বারান্দায় বসে আছে । দুপুরে ডাক্তার ঘুমের ইঞ্জেকশান দিয়ে যাওয়ায় মা অঘোরে ঘুমোচ্ছে । বাবা বাড়ি নেই । ছবি চা করছে ।

বিলুকে দেখে শতম উঠে এল । বিলুকে ঘরে ডেকে এনে বলল, তোমার সঙ্গে একটু

কথা আছে, বউদি।

বলো। খুব নিশ্চই স্বরে বিলু বলে।

তোমার মনে যত সন্দেহই থাক, দাদাকে আমরা কিন্তু সত্যিই লুকিয়ে রাখিনি।

বিলু একথার জবাব দিল না। কিন্তু মুখটা আরো গম্ভীর আর কঠিন হল।

দাদা শেষরাতে বেরিয়ে গেছে। কোথায় গেছে জানি না। ব্যাপারটা হালকাভাবে দেখো না। এর মধ্যে লুকোচুরি নেই।

বিলু নীরস গলায় বলে, প্রীতমকে খুঁজে বের করা খুব শক্ত কাজ নয় শতম, কোথায় কোথায় যেতে পারে তা তোমাদের অজানা থাকার কথা নয়।

আমরা সব জায়গায় খুঁজেছি। দাদার সব বন্ধুর বাড়িতে গেছি। কোথাও পাইনি।

বিলু তবু বিশ্বাস করল না। মৃদু বিষগলায় বলল, একটা কথা তো মানবে। প্রীতম মোটর নিউবে ডিজেনারেশনের রুগী। তার পক্ষে স্বাভাবিক মানুষের মতো চলার ফেরা সম্ভব নয়। সে কতদূর যেতে পারে?

তা তো জানি না।

এটাও আমাকে বিশ্বাস করতে বলো?

বলি। কাবণ, কথটা সত্যি। এমন কি আমরা স্বেললাইন ধরেও খুঁজেছি, যদি সুইসাইড করে থাকে। ধারেকাছে পুকুর-টুকুর নেই, থাকলে জলে লোক নামাতাম। খুঁজে দেখেছি, দাদা তার একটা হাতব্যাগ সঙ্গে নিয়ে গেছে। সেই হাতব্যাগে দাদার সব টাকাপয়সা থাকত।

বিলু চুপ করে রইল।

শতম মিনতি করে বলল, বিশ্বাস করো বউদি, লুকিয়ে রাখলে এতক্ষণে স্বীকার করতাম।

বিলু মৃদুস্বরে বলে, তাহলে ও নিজেই হয়তো লুকিয়ে আছে। তোমাদের আর খুঁজতে হবে না। আমি চলে গেলে ঠিক ফিরে আসবে।

শতম ভীষণ উদ্বেগের গলায় বলে, তুমি এ অবস্থায় চলে যাবে? দাদা ফিরে না এলেও?

আমি না গেলে যে ও ফিরবে না।

শতম একটু অবিশ্বাসভরে বউদির দিকে চেয়ে থাকে। তারপর বলে, যদি দাদা না ফেরে?

ফিরবে। যে সুইসাইড কবতে যায় সে সঙ্গে টাকা নেয় না।

মানছি। কিন্তু দাদা তো সুস্থ সবল নয়। হয়তো রাস্তায় বিপদে পড়ে যাবে।

বিরক্ত বিলু বলে, তার আমি কি করব বলো তো?

কিছু করতে হবে না। আমরা চারদিকে হাল্লাক ফেলে দিয়েছি। দু-চারদিনের মধ্যেই খবর এসে যাবে। যতদিন খবর না পাই ততদিন তুমি থাকো। নইলে পাঁচজনের চোখেই যে খাবাপ দেখাবে।

লোকনিম্নার কথটা রাগের মাথায় ভেবে দেখিনি বিলু। এখন ভাবল। লুকিয়েই থাক, আর যাই হোক, এই অবস্থায় তার কলকাতায় চলে যাওয়াটা খুবই বিসদৃশ।

বিলু অসহায় মুখে বলে, আমার যে ছুটি নেই!

ছুটি বউদি! খুব অবাধ হয়ে তাকিয়ে থেকে হঠাৎ শতম হেসে ফেলে, ছুটি নেই! হায় ঠাকুর, দুনিয়ায় ছুটি নেইটাই সবচেয়ে বড় কথা হল? দাদা যে নেই সেটা কিছু নয়?

বিলু এইসব খোঁচালো কথা সহ্য করতে পারে না। তবে এ সময়ে ঝগড়াও করল না

সে। সে চুপচাপ চলে এল নিজের ঘরে।

লাবু ঘুম থেকে উঠে কেমন পাথরের মতো বসে আছে। অস্বাভাবিক একটা স্থিরতা। চোখ দুটোর পলক পড়ছে না। দাঁত দিয়ে খুব জোরে নিচেব ঠোঁটটাকে কামড়ে রেখেছে। চোখের দৃষ্টি খানিকটা শূন্যতায় ভবা। কিছু দেখছে না।

বিলু তাড়াতাড়ি কাছে গিয়ে লাবুকে কোলে টেনে নিয়ে বলে, কি হয়েছে লাবু, শরীব খারাপ নয়তো!

লাবু অবাক হয়ে মাকে একটু দেখল। তারপরেই হঠাৎ শরীবে ঢেউ দিল তার। ঠোঁট কেঁপে উঠল। ফোঁপাতে ফোঁপাতে হিঁক্কা তুলে সে বলল, বাবার জন্য ভীষণ মন কেমন করছে মা।

॥ তিয়াস্তর ॥

এক একটা সর্বনাশের সময় আসে যখন সবকিছুকেই মনে হয় ভস্মাবশেষ ছাই। দীপনাথের কাছে তেমনি চারদিকটা ছাইবঙা হয়ে গেল।

বিলু প্রীতমের কথা শেষ করে মুখ নীচু করে কাঁদছে বিছানায় বসে। প্রীতমেরই বিছানা। কলকাতায় শেষদিন পর্যন্ত সে এই বিছানায় শুয়ে গেছে।

দীপনাথের কান্না আসছিল না। তার ভিতরটা বড় বেশী শুকনো, অনুভূতিহীন। তার চোখের সামনে সমস্ত ঘরটা তার জিনিসপত্র সমেত ছাই হয়ে গেছে। পৃথিবীর আর কোনো বর্ণ নেই, অর্থ নেই।

বিলু ফোঁপাতে ফোঁপাতে বলল, তুমি ওকে কত ভালবাসতে তা আমি জানি সেজদা। দুঃখ পাবে বলে শিলিগুড়ি থেকে ফিরে প্রথমে খবরটা দিইনি। কিন্তু আমি একা আর পারছি না। আজই শতমের চিঠি এল। এখনো কোনো খোঁজ নেই।

দীপনাথের আজ আবার দৃশ্যটা মনে পড়ে। বাচ্চা প্রীতম রোগাভোগা, নিরীহ, জীবনে কোনোদিন কারো কাছে মার খায়নি। সেই প্রীতমকে শিলিগুড়ির হাকিমপাড়ার রাস্তায় মারছে দীপনাথ। ভীষণ মারছে।

গলার কাছে একটা বাতাসের বল কিছুতেই গিলতে পাবে না দীপনাথ। অববোধ ঠেলে অতি কষ্টে সে বলতে পারল, তুই চলে এলি কেন?

বিস্মিত বিলু বলে, বাঃ, আমার যে চাকরি।

তাই তো! ওঃ হ্যাঁ, এইরকম অর্থহীন কয়েকটা শব্দ উচ্চারণ করে দীপনাথ।

বিলু একটু ভয়ের গলায় বলে, তোমাকে কেমন ফ্যাকাসে দেখাচ্ছে সেজদা! কী হল বোলা তো তোমার? পায়ে পড়ি, ওরকম নাভাস হয়ো না। তাহলে আমি দাঁড়াবো কোথায়?

এটা হাসির সময় নয়। তবু দীপনাথ তার ঠোঁট রবারের মতো প্রসারিত করে বীভৎস একটু হাসবার চেষ্টা করল। বলল, ও কিছু নয়। এক গ্লাস জল দে।

বিলু তাড়াতাড়ি উঠে গিয়ে জল আনে।

দীপনাথ জলের গ্লাসটার অর্থহীনতার দিকে চেয়ে সেটাকে হাতে নিয়ে বসে থাকে। তারপর আপনমনে বলে, তোর মতো সাহসী ক'জন ছিল রে? তবে পালালি কেন?

একথা কাকে উদ্দেশ্য করে বলা তা জানে বিলু। তাই ফের ভয়ের গলায় বলে, তুমি ওরকম ভেঙে পোড়ো না সেজদা!

আবার রবারের ঠোঁট টেনে হাসে দীপনাথ । তারপর মাথা নেড়ে বলে, না । ভেঙে পড়ার কি আছে ?

তবে ওরকম করছ কেন ?

দীপনাথ গ্লাস থেকে জল হাতের কোষে ঢেলে নিয়ে নিজের চোখ কান ভিজিয়ে নেয় । কয়েক টোক খায়ও । তারপর আস্তে করে বলে, প্রীতম ! ওঃ ! প্রীতম !

হয়তো হঠাৎই কান্নার বড় আসত, ভেসে যেত দীপনাথ । কিন্তু হঠাৎ খুব রুঢ় এক অটকায় সে উঠে দাঁড়াল ।

কোথায় যাচ্ছে ? আর্তস্বরে জিজ্ঞেস করে বিলু ।

দার্জিলিং মেল । প্রায় সাংকেতিক শব্দটা উচ্চারণ কবেই সে ঘর থেকে বাইরের ঘরে চলে আসে ।

পিছু পিছু বিলু এসে পথ আটকায়, পাগল হয়েছো ! এখনই তো সাড়ে সাতটা বাজে । কখন দার্জিলিং মেল চলে গেছে ।

তাই তো । আবার সোফায় বসে পড়ে দীপনাথ, তোর কি মনে হয় প্রীতম বেঁচে নেই ? আমার বিশ্বাস ও কোথাও লুকিয়ে আছে গিয়ে ।

কিন্তু কোথায় ?

আমি তো শিলিগুড়ি বা নর্থ বেঙ্গলের সব চিনি না । কোথায় কোথায় ওর চেনা লোক আছে তাও জানি না । সেইজন্যই বলছি তুমি ঠাণ্ডা মাথায় ভেবে দেখ । তুমি হয়তো ওকে খুঁজে বের করতে পারবে । রোগা শরীরে ও বেশীদূর যেতেই পারে না ।

রোগা শরীর ! বলে একটু অবাক হয়ে তাকিয়ে থাকে দীপনাথ । তারপর মাথা নেড়ে বলে, প্রীতমের যা মনের জোর তাতে রোগকে ও বহুদূর ছাড়িয়ে গেছে । রোগ ওকে রুখবে কি করে !

তবুও তো প্রীতম আর অতিমানুষ নয় ।

তা নয় । কিন্তু আমি জানি ঐ রোগটা খুব ভুল লোককে বেছে নিয়েছিল—যে লোক কখনো রোগের কাছে হার মানছে না । মরার দিন পর্যন্ত প্রীতম ঠিক হাসিমুখে বলে যাবে, ভাল আছি । খুব ভাল আছি ।

বলতে বলতে প্রতিরোধ ভেঙে যাচ্ছিল । গলা কেঁপে উঠল দীপনাথের । ঠিক যেমন করে বমি আসে তেমনি অপ্রতিরোধ্য গতিতে কান্না উঠে আসছিল চোখে । দীপনাথ কয়েকবার টোক গিলল, হাতের মুঠো পাকিয়ে রইল শক্ত করে । কয়েকবার কেঁপে স্থির হল । বিপদের সময় স্থির থাকতে হয় ।

দীপনাথের কথায় হঠাৎ প্রীতমের জন্য নতুন করে শোক উত্থাল-পাথাল হয়ে উঠল বুকে । বিলু সোফায় বসে কাঁদতে থাকে ।

পাশের ঘরে দরজা বন্ধ করে টিউটরের কাছে পড়ছিল লাবু । নিঃশব্দে দরজা খুলে পদা সরিয়ে মুখে একটা আঙুল পুরে সে চেয়ে রইল । প্রীতমের মেয়ে । দীপনাথ কিছু না ভেবেই দু'হাত বাড়িয়ে দিল । ঠিক ছুটে এল না লাবু, কিন্তু একটু জড়তার সঙ্গে পায়ে পায়ে এল কাছে । একটু শক্ত হয়ে দাঁড়িয়ে থাকল কাছ ঘেঁষে । নিঃশব্দে তাকে জড়িয়ে ধরে থাকে দীপনাথ । এই ছোটো মেয়েটার মধ্যে একটা বিদ্রোহ টের পাচ্ছিল ।

বাবা আবার ফিরে আসবে লাবু । ভাবিস না ।

লাবু কথা বলল না । শরীরের শক্ত ভাবটাও নরম হল না ।

লাবু, বাবার কথা বুঝি সব সময় ভাবিস ?

না, তোমরা কাঁদছিলে কেন ?

কই আমি তো কাঁদিনি ।

মা কাঁদছিল কেন ?

এমনি । ব্যথা-ট্যাথা পেয়েছে বোধ হয় ।

লাবু ফের চুপ করে যায় ।

তোর টিউটর চলে গেছে ?

না । আমি বাথরুমে যাবো বলে এসেছি ।

তাহলে যাও । বাথরুম সেরে পড়তে চলে যাও ।

লাবু তেমনি নিঃশব্দে গুটগুট করে চলে গেল ।

ও কি বাবার কথা বলে রে বিলু ?

বিলু লাল চোখ তুলে তাকাল । মুখে কথা এল না । মাথা নেড়ে জানাল, না । একটু সামলে নিয়ে বলল, মেয়েটা কেমন হয়ে গেছে । কথা বলে না, হাসে না । সব সময় শব্দ হয়ে থাকে । খুব ভাবে ।

আমি কাল শিলিগুড়ি যাচ্ছি । বলে দীপনাথ উঠে দাঁড়ায় ।

আমি কি করব বলে যাও সেজদা ।

তুই ! তোর আর কি করার আছে ?

বিলু আবার থানিকক্ষণ আঁচলে মুখ ঢেকে রেখে বলল, সবাই বোধ হয় ভাবছে আমার জন্যই প্রীতম নিখোঁজ হল ।

দীপনাথ আস্তে করে বলল, ওকে কলকাতায় আনার জন্য জোরাজোরি না করলেও পারতিস ।

তুমিও কি ভাবো যে, প্রীতম সেজন্য পালিয়েছে ?

অসম্ভব নয় । তবে ওর দেখা না পেলে তো সত্যি কথটা কখনো জানা যাবে না । তুই ভেঙে পড়িস না । মেয়েটাকে দেখিস ।

রুদ্ধ স্বরে বিলু বলে, ওকে নিয়েই তো আছি । এখন ওই আমার সব ।

দীপনাথ বেরিয়ে পড়ে । বড় শূন্য লাগে আজ । চারদিক ছাইবর্ণ । প্রীতমের জন্য এতটা হবে বলে ভাবেনি কখনো । বলতে কি, প্রীতমের মৃত্যুর জন্য মনে মনে প্রস্তুতও ছিল সে একসময় । প্রীতম বেঁচে নেই এমন কথা এখনো বলা যায় না । তবু বুকটা ধক ধক করে । বেঁচে থাকলে প্রীতম অস্তুত তাকেও কি জানাত না যে, সে বেঁচে আছে !

মেসে ফিরে দেখল সুখেন বসে আছে তার জন্য । মুখটা কিছু করুণ, শুকনো । তাকে দেখে একটু চমকে উঠে বলে, কোনো খারাপ খবর নাকি দাদা ?

দীপনাথ মাথা নাড়ল, খারাপ । খুব খারাপ ।

কি হয়েছে ?

জুতো মোজা ছাড়তে ছাড়তে সংক্ষেপে প্রীতমের ঘটনাটা বলল দীপনাথ । সুখেন মন দিয়ে শোনে । শুনতে শুনতে দুঃখের ভাব ফুটে ওঠে মুখে ।

হাতমুখ ধুয়ে এসে দীপনাথ যখন নিজের বিছানায় চিৎপাত হয়ে শোয় তখন সুখেন খুব সন্তপণে বলে, আমার একটা কথা ছিল ।

কি কথা ?

বীথি বছদিন আপনার জন্য অপেক্ষা করছে ।

বীথি ? বলে বিরক্তির ভাব দেখায় দীপনাথ, কেন ?

ওর বাসায় একবার পায়ের ধুলো...

সুখেন ! বলে একটা ধমক দেয় দীপনাথ ।

সুখেন ঝুঁকড়ে যায় । রুমমেট ছাত্রটি পরীক্ষার পর চলে গেছে । সীটটায় নতুন বোর্ডার আসেনি এখনো । তবে কাল বা পরশুই আসবে । তাই বাঁচোয়া ।

সুখেন মুখখানা কাঁচুমাচু করে বলে, অন্য কিছু নয় । কেবল একটু ভাল খাওয়া-দাওয়া ।

আমার মন ভাল নেই ।

জানি । কিন্তু সেজনা ঘরে বসে থেকেই বা কি হবে ? বীথি আমাকে বলে দিয়েছে, আপনাকে আজই ধরে নিয়ে যেতে । ওর ছেলে আজ থাকছে না । আমরা তিনজন ।

না সুখেন । একটু দুর্বল গলায় বলে দীপনাথ । কিন্তু এক শূন্যতাবোধ, নিরবলম্ব সময়ের এই ফাঁকটুকু তার একাও থাকতে ইচ্ছে করে না । প্রীতমের খবর বুকে পাথর হয়ে জমে আছে । আজ সারা রাত ঘুম হবে না । দৃশ্চিন্ধ্য কুণ্টকিত হয়ে থাকবে সে । তাই বীথির নিমন্ত্রণ এক জটিল মানসিকতার ধাঁধার ভিতর দিয়ে তাকে টানে । বস্তৃত বীথির কাছে কিছু পাওয়ার নেই তার । তাই বোধহয় যেতে ইচ্ছে করে । সেখানে শোক নেই । যা আছে তা তাৎক্ষণিক । দাগ কাটবে না ।

সুখেন আরো মিনিট পাঁচেক ঘ্যান ঘ্যান করার পর দীপনাথ ওঠে । খুব বিরক্তি আর অনিচ্ছার ভাব দেখিয়েই ওঠে । এবং পোশাক পরে ।

বেরোবার সময় সুখেন বলে, আজ রাতে আমরা নাও ফিরতে পারি ।

কথাটা শুনেও শুনল না দীপনাথ । গা তবু শিউরে উঠল একটু । টানা রিকশায় বসে সারা রাস্তা সে একটাও কথা বলল না ।

বহুদিন পর বীথির সঙ্গে মুখোমুখি । যেমনি সুন্দরী, তেমনি ক্ষুরধার বুদ্ধির সঙ্গে মেশানো নষ্টামি । দু'হাত বাড়িয়ে বলল, আজ যে কোনদিকে সূর্য উঠেছে !

দীপনাথ উদাস মুখে একটু হাসল ।

আজ বৈঠকখানার সাজসজ্জা অনারকম । চমৎকার একগুচ্ছ ধূপকাঠি জ্বলছে । টাটকা রজনীগন্ধার গন্ধ । বীথির রান্নার লোকও আজ হাজির । দুর্দান্ত মাংসের গন্ধে পাড়া মাং । খুব আস্তে করে চালানো রেকর্ড প্লেয়ারে সময়োচিত “এসো এসো আমার ঘরে এসো, আমার ঘরে...” বেজে যেতে থাকল । রবীন্দ্রনাথ সকলের জন্য লিখেছেন, তা জানে দীপনাথ, তা বলে বীথির ঘরে তার এই আগমনের জন্যও কি রবীন্দ্রনাথের কলম ধরার দরকার ছিল ?

আগে চা । কেমন ? বলে বীথি উড়ে গেল ঘর থেকে ঠিক প্রজাপতির মতোই । শাড়িখানা দূরকম ছাপা এবং খুবই নতুন ধরনের । বীথিকে মানিয়েছে এবং বয়সটাকে বছর দশেক কমিয়ে ফেলেছে ।

সুখেন বীথির সঙ্গে সঙ্গে ভিতরে গিয়েছিল । কিছু বলে থাকবে । চায়ের ট্রে নিয়ে বীথি যখন ফের ঘরে ঢুকল তখন তার মুখে করুণা । বলল, আহা রে ! আমার ধারণা আপনার ভগ্নীপতি কোথাও গিয়ে পালিয়ে আছে ।

দীপনাথ এ কথায় কোনো রা কাড়ল না ।

বীথি বলল, অত মন খারাপ করবেন না তো । আপনার ঐ ভগ্নীপতির কথা সুখেন আমাকে বলেছে । ও মানুষ সহজে মরবার নন ।

দীপনাথ এ কথাটা বিশ্বাস করে । তাই একটা দীর্ঘশ্বাস ফেলল ।

বীথি চা বানিয়ে কাপ হাতে তুলে দিয়ে মৃদুস্বরে বলল, আগে জানলে আজ আপনাকে কষ্ট দিতে টেনে আনতাম না।

দীপনাথ বলল, আজ বোধহয় আমার একটু অনামনস্ক হওয়াও দরকার ছিল। সত্যি বলছেন?

সত্যিই।

কী যে কদিন ছুটফট করেছি আপনার জন্য। কেবলই মনে হত, আপনি আর আসবেন না। ভীষণ রাগ করেছেন।

দীপনাথ মুখ নীচু করে চায়ে চুমুক দেয়।

বীথি আস্তে একটা হাত বাড়িয়ে দীপনাথের কপাল থেকে একটা চুলের গুচ্ছ সরিয়ে দিয়ে বলে, শরীরের দিকে একদম নজর দিচ্ছেন না।

দীপনাথের কাপের চা একটু চলকে যায়। সে চোখ বোজে। আর সঙ্গে সঙ্গে তার চোখের সামনে বন্য জেদী একরোখা কিশোরীপ্রতিম মণিদীপা এসে দাঁড়ায়।

চোখ খুলে দীপনাথ বলে, খুব খাটুনি যাচ্ছে।

জানি। আপনি এখন বড় চাকবি করেন। আরো বড় চাকরিতে জয়েন করতে যাচ্ছেন।

সবই জানেন তাহলে!

বীথি একটা দীর্ঘশ্বাস ফেলে বলে, এও জানি এরপর বীথির ঘরে আর কখনো পায়ের খুলো পড়বে না আপনার।

দীপনাথ এই ঘনিষ্ঠতাটা উপভোগ কবছিল এবং সেজন্য অবাকও হচ্ছিল কম নয়। সে বলল, কেন ডেকেছেন বলুন তো।

ও মা! বীথি চোখ কপালে তুলে বলে, সেসবও কি খুলে বলতে হবে নাকি?

দীপনাথ একটু রূঢ় স্বরে বলে, কেন?

আপনার মেজাজ আজ ভাল নেই। আমি কিন্তু একেবারে হৃদয়হীন নই। কোনো কোনো মানুষকে আমি সত্যিই ভালবেসে ফেলি। আপনি বিশ্বাস করবেন না, তবু বলছি, কথটা সত্যি।

দীপনাথ জানে, সে এক ভিখিরি। বহুকাল ধরে তাকে কেউ সত্যিকারের ভালবাসেনি। বীথির কাছেও সেই ভালবাসা নেই। তবু ভান তো আছে। তাৎক্ষণিক? পুরো জীবনটাই তো আপেক্ষিকভাবে তাই।

বীথির ঘরেই খুব ভোরে ঘুম ভাঙল দীপনাথের। জাগা মাত্রই শঙ্করধ্বনির মতো বৃকে ঢাক বেজে উঠল—প্রীতম।

আর কোনোদিকে তাকাল না দীপনাথ। ছেড়ে রাখা পোশাক পরে নিয়ে তড়িৎ পায়ে নেমে এল নীচে। তারপর মেসবাড়ি। দাড়ি কামানো, স্নান।

সাড়ে নটায় সে বোস সাহেবের চেম্বারে ঢুকল।

আজই আমাকে শিলিগুড়ি যেতে হচ্ছে বোস সাহেব।

বোস একটু অবাক হয়। তারপর হেসে বলে, আপনি তো আমাদের ছেড়ে চলেই যাচ্ছেন। আবার এই উটকো ছুটি কেন?

ব্যক্তিগত জরুরী দরকার।

খারাপ কিছ?

খুব।

দেন মেক ইট অ্যান অফিসিয়াল ট্যুর।

তা হয় না ।

হয় । মর্থবেঙ্গলে আমাদের একটু কাজও আছে । কবে যাচ্ছেন ?

আজকের ফ্লাইটে । আমি ব্যাগ গুছিয়ে এনেছি ।

অফিসের গাড়ি নিয়ে চলে যান । মেক ইট অফিসিয়াল । মর্থ বেঙ্গলে আমাদের কী কাজ আছে তা আপনি তো জানেনই ।

সময় পাবো কিনা সেটাই প্রশ্ন ।

টেক ইওর টাইম । ফিরে এসে বিল করবেন ।

দীপনাথ হাসল । বলল, জানি বোস সাহেব ।

ভূ কুঁচকেও বোস হাসল । সত্যিই তো । এই অফিসের দু'নম্বর লোকটা কি এসব প্রিলিমিনারিজ জানে না !

বোস বলল, চার্জটা কাকে বুঝিয়ে দিয়ে যাবেন ?

যাকে বলবেন ।

বোস একটু ভেবে বলে, থাকগে । আপনার অত সময়ও হবে না । আমি দেখে নেব । পারবেন ?

পারব । আই ফিল বেটার ।

তাহলে যাই ?

আসুন ।

ঘণ্টা চারেক বাদে দীপনাথ শীতাপনয়িত্রিত সুগন্ধী বোয়িং-এব অভ্যন্তরে বসে গভীব ক্লান্তিতে চোখ বুজল । ভিতরটা কতখানি শূন্য তা টের পেল এতক্ষণে ।

॥ চুয়াত্তর ॥

প্রীতমের বাবা মা আরো বুড়ো হয়ে গেছেন । ভাইবোনদের চেহারা শ্রীহীন । বাড়িটায় জমিট বেধে আছে এক শোকের শূন্যতা ।

দীপনাথকে যা বলবার তা বলল শতম, দাদা নিখোঁজ হওয়ার পর প্রায় একমাস কেটে গেছে । আমরা সম্ভব অসম্ভব সব জায়গায় খুঁজেছি । এখন আপনিই বলুন আর কী করা যায় ?

দীপনাথের মন এখন স্থির হয়েছে । মাথা ঠাণ্ডা । সে ধীর গলায় বলল, অসুখে প্রীতম বাঁধা পড়েনি । রোগা শরীরেও ও বহুদূর চলে যেতে পারে । কিন্তু বাধা হবে টাকা-পয়সা । কোথাও গিয়ে বেশীদিন থাকতে হলে টাকা চাই । প্রীতম কত টাকা সঙ্গে নিয়ে গেছে জানিস ?

না । ওর কাছে কত টাকা ছিল তা জানি না ।

দীপনাথ মাথা নাড়ল, জানলে ভাল হত । তবে আমার মনে হয় লুকিয়ে থাকলে একদিন না একদিন হাতের টাকা ফুরাবে । তখন ঠিক খবর দেবে ।

কোথায় দাদা যেতে পারে বলে আপনি মনে করেন ?

কোনো চেনা লোকের কাছে নয় । ওর এই রোগা শরীরে কোনো লোকই ওকে লুকিয়ে রাখবে না । চেনা লোক হলে খবর দেবেই ।

আমাদের কি আর কিছু করার নেই দীপুদা ?

দীপনাথ মৃদু একটু হেসে বলে, তোর তো ঠাকুরের ওপর অগাধ বিশ্বাস । তুই কেন তবে

ভেঙে পড়ছিস ? বিশ্বাসের জোর নেই ?

এ কথায় হঠাৎ কেমন হয়ে গেল শতম । মুখের অসহায় ভাবটা আস্তে আস্তে কেটে গেল । চোয়াল শক্ত হল । কপালে কিছু কুঞ্জন দেখা গেল । চোখ দুটো জ্বলে উঠল ধক করে । একটা বড় মাপের শ্বাস ফেলে বলল, মাঝে মাঝে একটু ভেঙে পড়ি ঠিকই । কিন্তু ভেবো না । আমার মন বলছে, দাদার কিছু হবে না ।

দীপনাথ এরকম সরল বিশ্বাস আজকাল কারো মধ্যে দেখে না । তার নিজের কোনো বিশ্বাসের জমি নেই । শতমের এই রূপান্তর দেখে সে বুঝি একটু খুশি হল । বলল, আমি একবার বীনাগুড়ি চা বাগানে যাবো । সেখানে আমাদের এক পুরোনো বন্ধু আছে । দেখি যদি তার কাছে গিয়ে থাকে ।

শতম গম্ভীর স্বরে বলল, দেখুন গিয়ে ।

বীনাগুড়ি বেশী দূর নয় । পরদিন দুপুরেই সেখানে পৌঁছে গেল দীপনাথ ।

শুভব্রত তাকে দেখে খুব অবাক হল না । বলল, আয় । প্রীতমের খোঁজে তুই যে আসবি তা প্রীতমই বলেছিল । আমার কথা আর কেউ না জানলেও তুই জানিস ।

প্রীতম কোথায় ?

তা কে জানে । মাসখানেক আগে দুজন রাস্তার লোক ওকে পৌঁছে দিয়ে যায় । দিন চারেক ছিল । আমি ওর বাড়ি খবর পাঠাবো বলে ঠিক কবলাম । পরদিন সকালেই হাওয়া । অনেক ঝুজেও পাইনি । আব পাইনি বলে খবরও পাঠাইনি । কি জানি ওবা হয়তো আমাকে ভুল বুঝবে ।

যে চারদিন তোর কাছে ছিল সেই কয়দিন কী করত ?

কিছুই না । বারান্দায় বসে থাকত । আমার বউয়ের সঙ্গে গল্প করত ।

তোর বউকে ডাক ।

শুভব্রতের বউ এল । মিষ্টি দেখতে । দীপনাথের জেরার মুখে পড়ে বলল, কোথায় যেতে পারে কিছু আন্দাজ করতে পারছি না । তবে কলকাতায় যাবে না নিশ্চয়ই । কলকাতার ওপর খুব রাগ ।

এখানে থাকার সময় ওর শরীর কেমন ছিল ?

যা রোগা ! আমি তো ভয়ই পেতাম ।

হাঁটাচলা করত ?

করত । শরীরে কুলোতো না, তবু মনের জোরেই বোধ হয় খুব স্বাভাবিক চলাফেরার চেষ্টা করত ।

কী নিয়ে কথা বলত ?

ধর্ম নিয়ে । সব সময় কেবল ধ্যানের কথা বলত । গীতার অনেক শ্লোক ব্যাখ্যা করত । বেশ লাগত শুনতে । ক'দিন ওর সঙ্গে পেয়ে আমারও একটু ধর্মভাব এসে গিয়েছিল । বলে শুভব্রতের বউ একটু হাসল । তারপর হঠাৎ খুব নিশ্চিন্তের মতো গলায় বলল, এরকম মানুষের কোনো ক্ষতি হবে বলে মনে হয় না আমার ।

দীপনাথ দাঁতে দাঁত চেপে বলে, ক্ষতি ওদেরই সব চেয়ে বেশী হয় । ও কখনো ওর বউ আর বাচ্চার কথা বলত না ?

নিজে থেকে নয় । তবে আমি ঝুঁচিয়ে ঝুঁচিয়ে জিজ্ঞেস করলে একটু-আধটু বলত ।

দীপনাথের আর কিছু করার ছিল না । অসহায়তায় তার সমস্ত শরীর অবশ । একটা রাত সে শুভব্রতের কাছে থেকে পরদিন কুচবিহার রওনা হল । যদি দিলীপের কাছে গিয়ে থাকে ।

দিলীপ তাদের হারিয়ে যাওয়া এক বন্ধু। এই সব বন্ধুর কথা আর কেউ জানে না। হঠাৎ হঠাৎ বন্ধু হয়ে হারিয়ে গেছে কবে। দিলীপ ছবি আঁকত। কিন্তু যশ প্রতিষ্ঠা কিছুই পায়নি। পাগলা মতো। অনেকদিন যোগাযোগ নেই।

মড়াপোড়াদীঘির কাছে দিলীপের ডেরায় যখন পৌঁছোলো দীপনাথ তখন বেলা বেশী হয়নি। দিলীপ বাড়িতে ছিল। ভারী রোগা হয়ে গেছে। চুলগুলো পেকে একশা। আঁটিস্ট হলেই মদ খেতে হয়, এ রকম একটা শ্রান্ত ধারণার বশবর্তী হয়ে সেই স্কুলে থাকতেই মদ ধরেছিল। এখনো ধরে আছে। তবে শিল্প প্রায় ছেড়েই গেছে তাকে।

দিলীপ একটু সময় নিল চিনতে। তারপর বলল, ওঃ দীপু! তাই বল। না রে প্রীতম আসেনি। তবে আসবে বলে বহুকাল আগে একটা চিঠি দিয়েছিল।

কথাটা দীপনাথ বিশ্বাস করল না। কারণ, এত কাল বাদে দেখা হওয়া সত্ত্বেও দিলীপ তাকে ঘরে নিয়ে যেতে চাইছে না। দরজা জুড়ে দাঁড়িয়ে আছে।

দীপনাথ ভারী ক্লান্ত। কাজেই কথার মারপ্যাঁচে গেল না। একটুক্ষণ চেয়ে রইল দিলীপের দিকে। তারপর বলল, তুই আজকাল কি করিস?

বাচ্চাদের ছবি আঁকা শেখাই। একটা স্কুল করেছি।

চলে সেটা?

চলে যায়।

এই বাড়িতে?

এই বাড়ি আর কোথায়! একখানা মোটে ঘর আমার।

বসতে বললি না?

বসবি? খুব অনিচ্ছার সঙ্গে দিলীপ বলে, আয় তা হলে।

দিলীপ দরজা ছেড়ে ভিতরে সরে যাওয়ায় খুব হতাশ হল দীপনাথ। দরজা যখন ছেড়ে দিল তখন প্রীতম নেই। ঠিকই নেই।

প্রীতম ছিলও না। ঘরে এলোমেলো রঙের পাত্র, তুলি, ভাস্মা গ্লাস আর কাপ, ক্যানভাস, ইজেল ছড়ানো। সরু চৌকিতে নোংরা বিছানা। একধাবে জনতা স্টোভ, অ্যালুমিনিয়াম আর কলাই করা বাসন। দারিদ্র্যের গভীর ক্ষতচিহ্নগুলি চারদিকে ছড়ানো। একটা দেশী মদের বোতলের মুখে একটা রক্তজবা গুঁজে রেখেছে দিলীপ। বোধ হয় প্রতীক।

কোমরে হাত রেখে আশাহীন চোখে চারদিকে চেয়ে দেখে দীপনাথ। প্রীতম এলেও এখানে বেশীদিন থাকতে পারত না। এই পরিবেশ সহ্য করার সাধা প্রীতমের নেই।

ভদ্রতাবশে খানিকক্ষণ বসে উঠে পড়ে দীপনাথ। পুবানো বন্ধুদের সঙ্গে যোগাযোগ ছিড়ে গেছে কবে। এখন দেখা হলে কথা আসে না। কোনো আবেগ বোধ করে না।

দীপনাথ দুপুরে একটা বাস ধরে সন্ধ্যাবেলা শিলিগুড়ি ফিরে এল। প্রীতমের বাড়িতে গেল না। পিসীব বাড়িতে ফিরে একটু খেয়ে সন্ধ্যা থেকে ভোর অবধি ঘুমোলো। পরদিন একটা জীপ ভাড়া করে বেরিয়ে পড়ল অফিসের কাজে। দার্জিলিং জলপাইগুড়ি গ্যাংটক ছুটে বেড়াল দিন দুই। কিন্তু সারাক্ষণ মনটা 'প্রীতম প্রীতম' করে যায়। একবারও একটুক্ষণের জন্যও ভুলতে পারে না।

রঙা হওয়ার দিন সকালে প্রীতমের বাড়িতে একবার গেল দীপনাথ। বিমর্ষ মুখ। হতাশায় মনটা বড় ভারী।

শতম দরজা খুলে চুপ করে রইল ।

দীপনাথ বলল, আজকের ফ্লাইটে চলে যাচ্ছি । কোনো খবর পেলে জানাস ।

শতম মাথা নাড়ল । জানাবে ।

শতমের মুখ-চোখে বিমর্ষতা ভেদ করে একটা দৃঢ়তা দেখা যাচ্ছিল । স্নায়ু খুব টান টান ।

সজাগ ।

দীপনাথ বলল, বীনাগুড়িতে শুভ্রতর বাড়িতে কয়েকদিন ছিল, জানিস ?

শুনে চমকে ওঠে শতম, সত্যি ?

সত্যি । শুভ্রতর বউ বলল, খুব নাকি ধর্মের কথা বলত ।

বলত ? শতমের মুখে ভোরের মতো স্নিগ্ধ প্রসন্নতা ।

সেখান থেকে কোথায় গেল ?

মাথা নাড়ে দীপনাথ, জানি না । তবে পুলিশকে খবরটা দিলে ওরা হয়তো ট্রেস করতে পারে ।

পুলিস ! শতম বিরক্ত হয়ে বলে, ওরা কিছু করবে না । ওদের অনেক পলিটিক্যাল ঝামেলা সামলাতে হচ্ছে । দাদা তো আমার দাদা, সরকারের কে ?

শুভ্রতর ঠিকানাটা সোজা । বীনাগুড়িতে গিয়ে শুভ্রতর মজুমদারের নাম বললেই হবে । পারলে তুই একবার যাস ।

আজই যাবো ।

দীপনাথ দুপুরে বাগডোগরা থেকে প্লেন ধরল । বড় শূন্যতা বুক জুড়ে । প্রীতম নেই । পুরোনো চাকরি ছেড়ে নতুন কোমপানিতে চলে যাচ্ছে সে । জীবন থেকে অনেক কিছুই কি হারিয়ে যাচ্ছে না ? প্রীতম, মণিদীপা, বোস সাহেব !

প্লেন যখন উডছিল তখন উত্তরের মহামহিম পর্বতমালার দিকে নিস্তব্ধ বিশ্বয়ে চেয়ে ছিল দীপনাথ । পাহাড় অবিরল তাকে ডাকে । আয় আয় আয় আয় । যাওয়া হয় না যে !

যখন চাকরি ছিল না দীপনাথের, তখন বোস সাহেবের ফাই-ফরমাশ খেটে চাকরি রাখতে হয়েছে । কিন্তু আজকাল এ-বেলা ও-বেলা চাকরির টোপ ফেলে বিভিন্ন কোমপানি । সে কলকাতায় ফেরার পরদিনই অফিসে টেলিফোন এল ।

চ্যাটার্জি ? আমি সান-ফ্রাণ্সিসকো এজেন্সির মিত্র বলছি ।

আরে বলুন, কী খবর ?

অনেকদিন খবর নেন না । কেমন চলছে ?

ঐ এক রকম ।

শুনুন, একটু কথা আছে । জরুরী ।

ফোনে বলা যাবে ?

না । ছুটির পর ক্যালকাটা ক্লাবে চলে আসুন । আই উইল বি দেয়ার ।

দীপনাথ জানে কী কথা । আরো ভাল অফার । আরো বেশী দায়-দায়িত্ব । তার বড় ক্লাস্তি লাগে ।

তবে মিত্র ভারী খুশি হল দীপনাথকে পেয়ে । ডিনারের পর গাড়িতে পৌঁছে দিল এসপ্ল্যান্ডে অবধি । গাড়িতেই কথা হয় ।

আমাদের কোমপানি ইন্টার-ন্যাশনাল, জানেনই তো ।

জানি । সব কোমপানিকেই জানি । দীপনাথ ক্লাস্তি গলায় বলে ।

রজার্স আপনাকে যা দিতে চায় আমরা তাই দেবো ।

কিন্তু রজার্স আগে কনটাক্ট করেছে।

কথাটা আমি শেষ করিনি চ্যাটার্জি। রজার্স যা আপনাকে দিতে পারে না তা হল ছ'মাস নিউ ইয়র্কে পোস্টিং।

নিউ ইয়র্ক! দীপনাথ সত্যিই চমকায়।

নিউ ইয়র্ক। ফর এ নমিনাল ট্রেনিং। অবশ্য তার জন্য একটা বন্ডও সই করতে হবে। তিন বছর কোম্পানিকে সার্ভ করবেন। রাজি?

রজার্সের খবর আপনাকে কে দিল?

মিত্র হাসে, খবর পাওয়া যায়। কিন্তু কথাটা হল, সান-ফ্রান্সিস্কোয় আপনাকে চায়। ভেবে দেখি।

দেখুন। আমরা একমাস অপেক্ষা করব।

মিস্টার মিত্র, আমি খুব টায়ার্ড ফিল করি আজকাল। আমার মন ভাল নেই। পারসোনাল কিছু ঘটনার জন্য। গিভ মি সাম'মোর টাইম।

মিত্র খুবই ভদ্রলোক। তবু হঠাৎ বলে ফেলল, দ্যাট অ্যাফেয়ার উইথ মিসেস বোস?

আবার চমকায় দীপনাথ। কিন্তু কথা বলতে পারে না কিছুক্ষণ। তারপর মাথা নেড়ে না জানায়।

মিত্র একটু লজ্জা পেয়ে বলে, সরি। কথাটা আনগার্ডেড মোমেন্টে বেরিয়ে গেছে। কিছু মনে করবেন না। বাট দ্যাট ইজ দা টক অফ দি টাউন। অল বোগাস স্ক্যান্ডাল। যাকগে, ডিসিশন নিতে আপনার কত সময় লাগবে?

মে বি টুমরো, মে বি টু ম্যান্থ্‌স্‌। আমার এক প্রিয়জন নিকদ্দেশ। আমাকে খুঁজতে হবে।

ও বাবা! সে যে ইনডেফিনিট ব্যাপার। কে বলুন তো!

আমার ভগ্নীপতি। হি ওয়াজ ডেডলি সিক।

খবরের কাগজে দিয়েছেন?

না তো!

সেইটেই সবার আগে দিন। অ্যান্ড মিসিং পার্সনস্‌ স্কোয়াড।

মাথায় খেলেনি তো কথাটা!

বাট ইউ হ্যাভ এ ফার্স্ট ক্লাস ব্রেন। ডোন্ট ওয়ারি। খবর পাবেন। বাট ডোন্ট মেক ইট অ্যান ইস্যু।

জয়েন করার ক'দিন পর আপনারা আমাকে অ্যামেরিকায় পাঠাবেন?

ছ'মাসের মধ্যে। মে বি আরলিয়ার।

দীপনাথ মাথা হেলিয়ে চোখ বুজে একটু ভাবল। তারপর হঠাৎ চোখ খুলে বলল, দি ডিসিশন ইজ মেড। আমি রাজি।

এসপ্লানেডের মোড়ে গাড়িটা দাঁড় করিয়ে মিত্র সত্যিকারের খুশির হাসি ছেঁসে হাত বাড়িয়ে দীপনাথের হাত ধরল, ওয়াইজ ম্যান।

দীপনাথ স্নান একটু হাসে। কথা বলে না।

মিত্র মৃদুস্বরে বলে, রজার্স আপনাকে দিয়ে অনেক নোংরা কাজ করাত। সান-ফ্রান্সিস্কোয় তা করা হবে না। বিলিভ মি, ইউ হ্যাভ ডান দি রাইট থিং। কালই অ্যাপয়েন্টমেন্ট চলে যাবে আপনার ঠিকানায়। ঠিক আছে?

আছে।

বাই ।

বাজারে কোনো কথাই গোপন থাকে না ।

দিন তিনেক বাদে বোস সাহেব তার চেম্বারে ডাকে দীপনাথকে ।

আমেরিকায় পাঠাচ্ছে সান-ফ্রাণ্সিসকো ?

দীপনাথ শুধু মাথা নাড়ে ।

আপনার রেজিগনেশন নোটিশ পেয়েছি । পাশপোর্টের জন্য অ্যাপ্লাই করেছেন ?
করব ।

করে আমাকে বলবেন । যাতে তাড়াতাড়ি হয়ে যায় দেখব ।

দীপনাথ একটু হাসে । পাশপোর্টের জন্য বোস সাহেবের সাহায্য তার বিশেষ দরকার
নেই । তার নিজেরও চেনাজানা এতদিনে কিছু কম হয়নি । তবে সে কিছু বললও না ।

বোস সাহেব গম্ভীর মুখে বলে, কাল দীপাকে খবরটা দিলাম ।

কোন খবরটা ?

আপনার খবর । দীপা খুব রিঅ্যাক্ট করল ।

তাই নাকি ? গলাটা নিম্প্রহ রাখার চেষ্টা করে দীপনাথ ।

ভীষণ । বলল, সবাই কেন আমেরিকায় যায় বলো তো !

একটু হাসে দীপনাথ । তাই তো ! সবাই কেন আমেরিকায় যায় । কি আছে সেখানে ?

বোস সাহেব বলে, আপনি চলে গেলে আই শ্যাল ফিল্ম লোনলি । বাট দীপা উইল বি
লোনলিয়ার ।

প্রসঙ্গটা থাক বোস সাহেব ।

বোস মাথা নাড়ে, না চ্যাটার্জি । কথাটা স্পষ্ট করে বলাই ভাল । আমি আপনাকে বলতে
চাই, ইউ আর এ গ্রেট ম্যান । বি অলওয়েজ এ গ্রেট ম্যান ।

দীপনাথ রাঙা হয়ে ওঠে । অশ্রুট গলায় বলতে চেষ্টা করে, আমি কেন গ্রেট হবো বোস
সাহেব ?

রিয়েলি ইউ আর গ্রেট । বড় চাকরি অনেকেই করে, সেটা কথা নয় । আপনি একটা বড়
চাকরি যে একদিন করবেন তা আমারও জানা ছিল । বাট দেয়ার ইজ সামথিং মোর ইন
ইউ ।

দীপনাথ মাথা নীচু করে থাকে ।

বোস একতরফাই বলে, আপনি নাকি মাঝে মাঝে একটা পাহাড়ের কথা বলেন । দীপা
বলছিল । আপনি বোধ হয় একটা পাহাড়ে চলে যেতে চান, তাই না ?

ও একটা চাইলডিশ ফ্যান্টাসি ।

বোস মাথা নাড়ে, মে বি । মে বি নট । কে জানে ? আমার তো মনে হয়, আপনি সত্যিই
একদিন একটা মস্ত পাহাড়ে একা উঠে যাবেন । উই উইল রিমেম্বার বিহাইন্ড উইথ আওয়ার
লিটল পেট থিংস । আই উইশ ইউ ক্লাইম্ব দ্যাট হিল । ক্লাইম্ব ইট ।

থ্যাংক ইউ । বলে দীপনাথ উঠে পড়ে ।

আকাশে অনেক ওপরে এক টুকরো অস্বাভাবিক মেঘকে দেখতে পেল শ্রীনাথ । মেঘটা গোল বলের মতো । রঙ লালচে । নীল আকাশ থেকে অনেকগুলো টুকরো মেঘের ভিতর থেকে এই অস্বাভাবিক গোল মেঘটা খুব দ্রুত বেগে নীচে নেমে আসছে ।

খুব সঙ্গত কারণেই শ্রীনাথ বিপদের গন্ধ পাচ্ছিল । সে জানে এটা পৃথিবীর মেঘ নয় । এর জন্ম দূর মহাকাশে । আবহমান কাল ধরে মানুষের যত শত্রু পৃথিবীতে এসেছে এ তা থেকে আলাদা । খুব নিঃশব্দ যে মেঘ বা মেঘের ভ্রম নীচে আসছে তা আসলে একটা অতিকায় জলের ফোঁটা । ফোঁটা নয়, আসলে এক বিপুল জলের পিণ্ড । ঠিক আকাশের এক ফোঁটা অশ্রুর মতো দেখাচ্ছে ।

দেখ-না-দেখ সেই জলপিণ্ড চলে এল কাছে ! কী বিশাল তার ব্যাস ! কী বিপুল তার আকার ! স্তম্ভিত মূক হয়ে থাকতে হয় দৃশ্যটা দেখে । সর্বনাশ বটে, কিন্তু সেই সর্বনাশের বিশালতা দেখে কে না অতীত ভবিষ্যৎ ভুলে যায় । বড় বিপদেরও এক প্রচণ্ড সম্মোহনশক্তি আছে ।

জলের পিণ্ড এগিয়ে এল আরো কাছে । শ্রীনাথ ভেবেছিল খুব কাছেই কোথাও পড়বে । তা পড়ল না । যতক্ষণ ধরে শূন্য পেরোচ্ছিল ততক্ষণে আঁহিক গতির বশে পৃথিবী একটু ঘুরে গেছে । তবু, খুব দূরে নয়, কাছেই কোথাও ঝম করে সেটা পড়ল । একটু কৈপে উঠল কি পৃথিবী ?

শ্রীনাথ চোখ বুজল । সমস্ত পৃথিবীকে ডুবিয়ে দেওয়ার পক্ষে ঐ এক ফোঁটা জলই কি যথেষ্ট নয় ? তবু চোখ খুলে সে দেখতে পায়, আকাশের সেই ঠিক একই জয়গায় আবার সেই একই রকম আর এক ফোঁটা জল জন্ম নিল । নেমে আসতে লাগল ।

ভাগ্যক্রমে শ্রীনাথ দাঁড়িয়ে আছে এক পাহাড়ের কোলে । দ্বিতীয় জলের ফোঁটা পৃথিবীতে পড়ার আগেই সে হামাগুড়ি দিয়ে উঠে যেতে লাগল ওপরের দিকে । পাহাড়চূড়ায় কয়েকটা খোড়ো ঘর, কিছু অসহায় মানুষ । শ্রীনাথ চূড়ার কাছাকাছি পৌঁছে ফিরে চেয়ে দেখল, এর মধ্যেই এত উঁচু পাহাড়টার অর্ধেকেরও বেশী জলের গ্রাসে চলে গেছে । আর এক ফোঁটা জল পড়লে বাকি অর্ধেকও যাবে ।

বাকি অর্ধেকও যাচ্ছিল । শ্রীনাথ চেয়ে থাকতে থাকতেই ঝম করে দ্বিতীয় জলপিণ্ডটাও নেমে আসে । অমনি নীচের জলরাশি বিপুল গর্জনে, ফেনায়িত অসম্ভব উঁচু ঢেউ তুলে ধেয়ে আসে ওপরের দিকে । নোংরা ঘোলা ক্ষুদ্র ক্রুদ্ধ জলে ভাসছে মানুষের শব, ঘর, বাড়ি, তৈজসপত্র ।

তবু শাস্ত ধ্যানমগ্ন নিলীমায় ফের আর এক ফোঁটা জল জন্ম নেয় । দেখে শ্রীনাথ । আর আতঙ্কে নীলবর্ণ হয়ে চেঁচাতে থাকে, কী হল ? কী হচ্ছে অ্যা !

ঠিক এই সময় তাকে ঠেলে তোলে সজল, বাবা ! ও বাবা ! কী হয়েছে ?

ঘুম ভেঙে শ্রীনাথ উঠে বসে তড়াক করে । স্বপ্নেব ঘোর এখনো কাটেনি ।

বাইরে কি ব্যুটি হচ্ছে ? সে জিজ্ঞেস করে ।

সজল অবাক হয়ে বলে, হচ্ছে তো । রাত থেকেই হচ্ছে । একটানা । তোমাকে বোবায় ধরেছিল বাবা ?

শ্রীনাথ অনেকক্ষণ চুপ করে বসে থাকে । কথা বলতে পারে না । বাইরে প্রচণ্ড ব্যুটির শব্দ । লক্ষণ ভাল নয় । বছর পাঁচেক আগে এ-রকম সাংঘাতিক একটানা ব্যুটির পর

এ-বাড়িতে কোমরসমান জল দাঁড়ায়। পোটলা-পুটলি নিয়ে সপরিবারে অন্যত্র আশ্রয় নিতে হয়েছিল তাকে। এই বৃষ্টিটাকে তাই শ্রীনাথ খুব সন্দেহ করে। স্বপ্নটাও জলেরই স্বপ্ন। কি হয় কে জানে।

শ্রীনাথ বলল, যা তো, উঠোনে কতটা জল জমেছে দেখে আয়।

সজল টর্চ হাতে উঠে দরজা খোলে, উঃ বাস! খুব জল জমেছে গো বাবা। অনেক। কতটা? উদ্বিগ্নে শ্রীনাথের গলা সরু হয়ে যায়।

দু'ফুট হবে।

দু'ফুট মানে অনেক জল। হাঁটির ওপর হবে। শ্রীনাথ উত্তেজিত গলায় বলল, তা হলে এখনি আমাদের অন্য কোথাও চলে যাওয়া দরকার। ভিতরবাড়িতে ওরা কেউ কিছু টের পাচ্ছে না নাকি? তোর মাকে একটা খবর দে।

সজল বেশির ভাগ সময়েই শ্রীনাথের অকারণ উদ্বেগ দেখে হাসে। কিন্তু এখন হাসল না। বারান্দায় ফিরে গিয়ে উঠোনের জলে টর্চের আলো ফেলে সে দেখতে পেল শ্রেত চলছে। শ্রোতা আসছে নদীর দিক থেকে। মাটির বাঁধটা যদি ভেঙে গিয়ে থাকে তবে ব্যাপারটা আর হাসিঠাট্টার নয়।

স্বপ্নটা এখনো শ্রীনাথকে তাড়া করছে। সে বিছানা ছেড়ে বাইরে এসে সজলের পাশে দাঁড়ায়।

ও বাবা। এ যে ভীষণ জল রে!

সজল বলে, তুমি অত ভেবো না তো বাবা।

তোর মাকে অনেক দিন আগেই আমি বলেছিলাম, দাদার ঘরের ওপর একটা দোতলা তুলতে। দোতলা হলে বানের জলে তেমন ভয় নেই।

এখন আর সে কথা বলে কি হবে?

জলটা বাড়ছে না? টর্চটা জ্বালা তো!

সজল টর্চ জ্বালল। জল বাড়ছে কিনা বোঝা গেল না। তবে জল যে পাক খাচ্ছে, শ্রোত চলছে তা বোঝা যাচ্ছিল।

ঘরের পিছন দিক থেকে বৃষ্টির শব্দের ভিতর দিয়েও একটা চোঁচামেচির শব্দ আসছিল। কান পেতে শব্দটা বোঝার চেষ্টা করছিল শ্রীনাথ। বলল, নিতাই চোঁচাচ্ছে না?

নিতাই বটে। একটু বাদে অঙ্ককার ফুড়ে বৃষ্টি ভেদ করে দুই মূর্তি উঠে এল বারান্দায়। মাথায় পোটলা, হাঁড়ি, টিনের বাস্ক।

নিতাই একগাল হেসে বলল, আগেই বুঝেছিলাম, এবারও খরা হবে। তাই সেই বোশেখ মাসে একটা বরুণ বাণ মেরে রেখেছিলাম। তাজ্জব কাণ্ড! সেই বাণে যে এতটা হবে তা বুঝতে পারিনি।

সজল টর্চটা ঘুরিয়ে নিতাইয়ের মুখে ফেলতেই নিতাই সামলে গেল। ঢৌক গিলে বলল, ছোটো কর্তা নাকি? হেঃ হেঃ, ভিজ্ঞে একেবারে ঢোল হয়ে গেছি দেখুন।

গুল মারটা বন্ধ করবে এবার থেকে?

নিতাই আবার ঢৌক গিলল। বলতে নেই, কর্তামাকে সে ভয় খায় বটে, কিন্তু বুকের মধ্যে ততটা গুড়গুড়নি ওঠে না। কিন্তু এই ছোকরার মুখোমুখি পড়লেই তার আজকাল পায়ের তলায় ভূমিকম্প হতে থাকে।

নিতাইয়ের বউ কথা বলছে না। ভেজা কাপড়ে বারান্দার এক ধারে জড়োসড়ো হয়ে বসে আছে।

শ্রীনাথের কষ্ট হল। জিজ্ঞেস করল, তাদের শুকনো জামাকাপড় নেই ?

মেয়েটা মাথা নাড়ল, নেই।

ভেজা কাপড়ে এই হাওয়ায় বসে থাকলে ঠাণ্ডা লেগে যাবে যে !

এ-কথায় নিতাই আর তার বউ হেসে ফেলে। নিতাই বলে, বাবুর যেমন কথা ! কোন্ দালানকোঠাওলা বাড়ির মেয়ে যে ঠাণ্ডা লাগবে ? বরাবর বৃষ্টি হলেই ভিজছে। ও সব সয়ে গেছে ওর।

তোর ঠাণ্ডা লাগে না ?

সজল সামনে না থাকলে নিতাই এ-কথায় হেসে উঠত। শোনো কথা ! মহাযোগী নিতাই খাপার নাকি ঠাণ্ডা লাগবে ? কিন্তু সজল খোকা থাকায় নিতাই অতটায় গেল না। বিজ্ঞের মতো একটু হেসে বলল, আজ্ঞে, আমিও রোদে-জলে মানুষ। আপনি ভাববেন না।

কিন্তু শ্রীনাথ ভাবে। আগে পৃথিবীর সম্পর্কে খানিকটা উদাসীনতা ছিল তার। আজকাল সব কিছু নিয়ে উদ্বেগ। বলল, খুব বাহাদুর তোরা বুঝছি। এখন ঘরে গিয়ে আলনায় দেখ, গোটা কয়েক জলে কাচা ধুতি আছে। পুরোনোই। দুজনে পরে নে। যা।

বউটা মৃদুস্বরে বলে, না বাবা, আপনার পরনের ধুতি পরতে পারব না। বড় পাপ হবে।

তোর মাথা হবে ! গুরুজনদের কথা শুনতে হয়। যা। শ্রীনাথ ধমক দেয়।

সজল টর্চের আলোটা নিতাইয়ের বউয়ের দিকে তাক করে বলল, যাও না ভৈরবীদি। বাবা বলছে যখন, যাও।

ভৈরবী ওর নাম নয়। কিন্তু নিতাইয়ের বউয়ের এ নামটাই চালু হয়ে গেছে। তান্ত্রিকের বউ বলেই বোধ হয়।

টর্চের আলোয় লজ্জা পেয়ে বউটি তার তেলে কাপড়ের যোমটার তলায় মুখ আড়াল করে বসে, আমার শীত লাগছে না।

নিতাই অবশ্য বাবুর দু-দুটো ধুতি হাতানোর এই মণ্ডকাটা ছাড়তে চাইছিল না। বউয়ের দিকে চেয়ে বলল, বাবু হল ভগবানের মতো। তা ভগবানের দেওয়া আলোটা বাতাসটা কলাটি মূলোটা নিলে আর দোষের কি ? যাও কাপড়টা ছেড়ে ফেল গিয়ে।

বউটা জেদী আছে। রাজী হল না। চক্ষুলজ্জায় নিতাইও গেল না।

টর্চ জ্বলেই রেখেছে সজল। জল ইঞ্চিখানেক বেড়ে গেছে দেখতে না দেখতেই।

নিতাই বলে, মাটির বাঁধটা গেছে। এই সেদিনও দেখি, পরাশর ঘর তুলবে বলে বাঁধ থেকে মাটি কাটিয়ে আনছে। পইপই করে বললুম, বাপু, তোমরা সবাই যদি বাঁধের মাটি চুরি করো তাহলে কিন্তু একদিন বিপদ আছে। এই নদীর চেহারা এমনিতে ভালমানুষের মতো কিন্তু খেপলে সমুদ্রের।

ভিতরবাড়ির দিকে এতক্ষণে বাতি দেখা গেল। ইলেকট্রিক অনেকক্ষণ নেই। কয়েকটা হ্যারিকেন আর টর্চ যোরাফেরা করছে। দুটো ছাতা হাতে নিয়ে দুটির মধ্যে একটা গামছা মাথায় মাংলু খপাং খপাং করে জল ভেঙে এসে বলল, মা বলছেন আপনারা সব ভিতরবাড়ির বড় ঘরটায় চলে আসুন। ওটার ভিত উঁচু আছে।

শ্রীনাথ হতাশ গলায় বলে, কত আর উঁচু ? এই জলে যে সৃষ্টি ভেসে যাবে। এই হারে বাড়লে সকাল নাগাদ ঘরের চালে উঠেও রক্ষা পাওয়া যাবে না।

তবু যতটা পারা যায়। আমি আপনার ঘরের কিছু জিনিসপত্র পাটাতনে তুলে রাখি গে। আয় রে নিতাই, একটু হাত লাগাবি। বলে নিতাইকে নিয়ে মংলু ঘরে গিয়ে ঢোকে।

সজল বাবার দিকে হাত বাড়িয়ে বলে, চলো বাবা। সজলের হাতটা অবশ্য ধরল না

শ্রীনাথ কিন্তু জলে নেমে পড়ল। বলল, চল। দোতলাটা তুলে রাখলে আজ এই বিপদে কিছু হত না।

তৃষা তার ঘরের দাওয়ায় মস্ত টর্চ হাতে দাঁড়িয়ে। পাশেই সরিৎ। তৃষার শাড়ি সপসপে ভেজা, চুল থেকে জল পড়ছে।

সজল জিজ্ঞেস করে, তুমি ভিজলে কি করে?

দুটো হাঁস বেরিয়ে গিয়েছিল। ধরে আনলাম।

ধরার লোক ছিল না?

কাকে ডাকব, কে শুনবে এই বৃষ্টিতে। বলে তৃষা শ্রীনাথের দিকে চেয়ে বলে, বারান্দার ঐ কোণে বালতিতে ভাল জল তোলা আছে। হাত-পা ধুয়ে ভাল করে জল মুছে বিছানায় গিয়ে বোসো। আমি চায়ের জল চড়িয়ে এসেছি। মঞ্জু চা করে দেবে। সজলও যা।

শ্রীনাথ লম্বাছেলের মতো তাই করল। সজল শুধু টোঁট উপেটে বলে, ঘরে বসে থাকার মানোই হয় না। আমি বরং আশপাশটা দেখে আসি, কে কি করছে।

তৃষা চাপা গলায় বলল, না। এই বৃষ্টিতে যাবে না। কাল সকালে সব খবর নিও।

সজল তর্ক করল না। কিন্তু কোমরে হাত রেখে বারান্দায় বেপরোয়া এক ভঙ্গীতে দাঁড়িয়ে রইল।

ভিতরে কেরোসিনের স্টোভে মঞ্জু চা করছে। বিছানায় পা তুলে বসল শ্রীনাথ। অল্প আলোতেও ঘরে মেলা ঘুরঘুরে পোকাকে ঘুরে বেড়াতে দেখা যাচ্ছে। বাইরে জল জমলেই এরা ঘরে ঢুকে পড়ে। বৃষ্টিটা কিছুতেই ধরছে না।

বাইরে বৃন্দাই বোধ হয় চৈঁচিয়ে জানান দিল, পশ্চিমের ঘরে জল ঢুকছে।

তৃষা ঘরে আসে। তার মুখে কোনো উদ্বেগ নেই, তবে একটা কাঠিন্য আছে। ঘরের পাটাতনের সঙ্গে একটা কাঠের মই লাগানো। একটা বাস্ক হাতে তৃষা তরতর করে পাটাতনে উঠে বাস্কটা রেখে নেমে এল আবার।

শ্রীনাথ বিরক্ত হয়ে বলে, কবেই তো তোমাকে বলেছিলাম, এবার দোতলাটা করো। এসব জায়গায় জল হবেই। রাতে আমি জল নিয়ে একটা বিচ্ছিরি স্বপ্ন দেখেছি।

তৃষা তার বড় বড় চোখে চেয়ে বলে, দোতলা? দোতলা দিয়ে কি হবে? আমরা তো এখানে চিরকাল থাকব না।

থাকব না! তা হলে কোথায় যাবো?

তা জানি না। তবে এখানে নয়।

এখানে নয় কেন?

এ জায়গা আমার আর ভাল লাগছে না।

শ্রীনাথ খিচিয়ে ওঠে, তোমার ভাল না লাগলেই হবে! আমরা কি সব তোমার হাতের পুতুল!

আমিও পুতুল। রাগ করো না। আমার মনে হয়, এখানে থাকলে আমাদের কারো ভাল হবে না।

সে তো এখন বলছ। কিন্তু এক সময়ে এখানে শেকড় গেড়ে বসার জন্য তুমিই জমিজমা কিনে গেছ অঙ্কের মতো, দোকান দিয়েছো, ধানকল করেছো, সেগুলোর কি হবে?

শাস্ত স্বরেই তৃষা বলে, আমিই যখন করেছি তখন সে দায়ভারও আমার। তুমি তো খবর রাখো না, ধানকল বেচে দিচ্ছি শীগগীরই। দোকানটার ভাল দাম পেলেই ছেড়ে দেবো। জমিজমাও কিছু কিছু করে বিলি বন্দোবস্ত হচ্ছে।

শ্রীনাথ বিরক্ত হয়ে বলে, যা খুশি করো। আমার কি ? আমার সম্পত্তি তো নয়।
তৃষা একটু হেসে বলল, না হলে কি হয়, খুব চিন্তায় তো পড়েছো দেখছি। অত চিন্তা
করো না। লোকে আমার যত বদনামই করুক, কেউ অস্ত্র আমাকে বোকা ভাবে না।
শ্রীনাথ হঠাৎ বলল, কিন্তু আসলে তো তুমি বোকাই।

তাই নাকি ?

বোকা নও ? বোকা না হলে আজ তোমার সংসার এত সৃষ্টিছাড়া কেন ? মেয়েমানুষের
একটা সীমা আছে, গম্ভীর আছে। সেটা যে ডিঙিয়ে যায় সে নিশ্চয়ই বোকা।

তৃষার তর্ক আসে না। ঝগড়া করতে সে ভালবাসে না। উপরন্তু সে দেখতে পায়, সজল
দরজায় এসে দাঁড়িয়ে আছে। চৌকাঠে ঠেসান, কোমরে হাত, চোখ দুখানায় ঝলমলে
কৌতুক। ওর পায়জামাটা উরু পর্যন্ত ভেজা, মাথার ঘন চুলে অজস্র ফোঁটা লেগে আছে।

তৃষা সজলের দিকে এক পলক চেয়ে চোখ ফিরিয়ে নিয়ে বলে, পায়জামাটা পাণ্টে
নাও। ঠাণ্ডা লাগবে।

আমার পায়জামা-টায়জামা সব পশ্চিমের ঘরে।

আমার একটা শাড়ি পাঁচ দিয়ে পরে থাক। ঐ আলনায় আছে।

সজল কাঁধ ঝাঁকিয়ে বলল, আমরা এ জায়গা ছেড়ে কোথায় যাবো মা ?

কোথাও যাবো।

এ জায়গা আমি ছাড়ব না।

তোমার ইচ্ছেয় সব হবে নাকি ?

এ জায়গায় যে আমরা সেট করে গেছি। অন্য কোথাও গেলে পুরোনো বন্ধুদের কোথায়
পাবো ?

নতুন বন্ধু হবে।

নতুন বন্ধু চাই না।

তৃষা একটা দীর্ঘশ্বাস ফেলে বলে, না যেতে চাইলে তোমরা এখানেই থেকো।

তুমি থাকবে না ?

না। আমি চলে যাবো।

একা ?

দরকার হলে একাই।

সজল হঠাৎ একটু হাসল, মেয়েরা একা থাকতে পারে নাকি ? তোমার বাজার করে
দেবে কে ?

তৃষা ক্লান্ত মুখে ছেলের দিকে চেয়ে বলে, ওসব কথা এখন থাক। পায়জামাটা ছাড়বি
কিনা ! ক'বার বলতে হবে ?

আমি শাড়ি পরব না।

তা হলে মংলুকে বল, পশ্চিমের ঘর থেকে পায়জামা এনে দেবে।

আগে বলো তুমি কোথায় যাবে !

আমি তোদের সঙ্গে থাকব না। এখানেও থাকব না।

আমাদের কি তুমি দেখতে পারো না মা ?

তৃষা এ কথার জবাব দিল না। খাটের ভলা থেকে তোরঙ্গ টেনে বের করে ডালা খুলে
জিনিসপত্র ঘাঁটতে লাগল।

সজল কিছুক্ষণ জবাবের জন্য অপেক্ষা করে বলল, বৃষ্টি কমে এসেছে। কেন ঝামোখা

জিনিসগুলো ওপরে তুলছ ?

বাস্তবিকই বাইরে বৃষ্টির ঝমাঝম শব্দ স্তিমিত রিমঝিম হয়ে বাজছে । কিন্তু তুয়া আপন মনে তার কাজ করে যেতেই লাগল ।

মঞ্জু বাবাকে চা দিয়ে মায়ের কাপটা পাশে মেঝেয় রেখে বলল, মা, তোমার চা ।

ভারী অস্বস্তি বোধ করছিল তুয়া । চায়ের কাপ তার অবলম্বন হল একটা । মেঝেয় বসে চায়ে চুমুক দিয়ে ছেলের দিকে চেয়ে বলল, বড়দের সব কথার মধ্যে থাকো কেন ? বড়দের কথা আবার কি ? এখান থেকে চলে যাওয়ার কথা বলছিলে, কানে এল, তাই বললাম ।

তুয়া ভারী হতাশ ও বিষন্ন মুখে বসে থাকে । এই সংসার ছেড়ে তার কি সত্যিই যাওয়ার সময় হল ?

॥ ছিযান্তর ॥

অন্ধকারে জল ভেঙে পোটলা-পুঁটলি মাথায় কিছু লোক এসে জড়ো হয়েছে এ-বাড়ির উঠানে । মংলু তাদের পূর্বের ঘরের দাওয়ায় উঠিয়ে দিচ্ছে । তাদের মধ্যে একজন বলল, এ বৃষ্টির জল নয় গো । বেনো জল । শ্রোতটা দেখ ।

মৃতপ্রায় নদীটার বৃকে পলিমাটি জমে এত উঁচু হয়েছে যে, ফি বর্ষাতেই জল উপচে আসে । এবারেও বৃষ্টিতে পুরোনো মাটির বাঁধটা যে গেছে তাতে সন্দেহ নেই । উঠানের জল দাওয়া প্রায় গিলে ফেলেছে । কয়েক ইঞ্চি বাকি ।

ঘরের মধ্যে উদ্বিগ্ন শ্রীনাথ বলে, অবস্থা তো ভাল দেখছি না । জিনিসপত্র এইবেলা পাটাতনে তোলো ।

এতক্ষণ তাই করছিল তুয়া । কিন্তু এখন হঠাৎ তার মুখ পার্থিব বিষয় সম্পর্কে খুব নিরাসক্ত হয়ে গেছে । জানালার পাটায় বসে বাইরের দিকে চেয়ে আছে চুপচাপ ।

শ্রীনাথ জানে, সজলের সঙ্গে তার মায়ের সম্পর্ক ভাল নয় । তাতে এক সময়ে সে বেশ খুশিই বোধ করত । কিন্তু আজ অস্বস্তি হয় তার । চারদিকে এই জলের বিপদ, আর ঘরের মধ্যে মা-ছেলের মধ্যে থমথমে ভাব ।

শ্রীনাথ একবার রাগের চোখে দরজায় দাঁড়ানো ছেলের দিকে চেয়ে বলে, তোর পায়েজামাটা বদলাতে কি হয় ? বড় ব্যাদড়া বাঁদর তৈরি হচ্ছিস তো ! যা ছেড়ে ফেল গিয়ে ।

শাড়ি পরব ?

বিপদের দিনে অত বাছাবাছি কি ? এটা কি বাবুয়ানির সময় ? যা শিগগীর ।

সজল মার কথা শোনেনি, কিন্তু বাবার কথা শুনল । হয়তো ইচ্ছে করেই । পাটাতনের সিঁড়ির নীচে আলো গিয়ে পৌঁছোয়নি ভাল করে । সেইখানে দাঁড়িয়ে সে একটা সাদা খোলের শাড়ি জড়াল কোমরে ।

শ্রীনাথ বলল, জামাটাও ভিজেছে, ছেড়ে ফেল । মাথা মোছ ।

সজল সবই ধীরেসুস্থে করে এবং তার মধ্যেই মায়ের দিকে মাঝে মাঝে চেয়ে দেখে । মুখ টিপে মাঝে মাঝে একটু হাসেও বোধ হয় ।

তারপর লক্ষ্মীছেলের মতো সে শ্রীনাথের পাশটিতে এসে বসে ।

এ সব মুখ না ঘুরিয়েও টের পায় তুয়া । তার সমস্ত অনুভূতি সজাগ । সে লক্ষ রাখছে । স্বপ্না আর মঞ্জুও বাপের পিছন দিকে বিছানায় শুয়ে মৃদুস্বরে কথা বলছে । বৃন্দা কেরোসিন

ভরছে স্টোভে । বাড়ির কাজের লোকেরা ভিজে সাঁতা, তাদের জন্য চা হবে ।

সরিং ঘরে ছিল না । বারান্দা থেকে এইমাত্র ঘরে এসে বলল, মেজদি, দোকানে নিশ্চয়ই জল ঢুকেছে ।

তুষা তার কঠিন মুখখানা এবার ফেরায়, কে বলল ?

কে বলবে ? ভিতটা তো নীচু । গতকালই নতুন মাল এসেছে । সব পড়ে আছে মেঝেয় । তোলার সময় হয়নি ।

তুষা একটা শ্বাস ফেলে মৃদুস্বরে বলল, থাকগে ।

অবাক সরিং বলে, থাকবে মানে ? অন্তত চার পাঁচ হাজার টাকার জিনিস । জল ঢুকলে একদম বরবাদ । আমি বরং গিয়ে একটা ব্যবস্থা করে আসি । চাবিটা দাও ।

তুষা আঁচলের গেরো থেকে চাবির গোছাটা মেঝেয় ঝুড়ে দিয়ে বলে, লোহার আলমারিতে আছে । নিয়ে যা ।

মেজদির মেজাজ দেখে সরিং অবাক হলেও কিছু বলল না । আলমারি খুলে দোকানের চাবি নিয়ে তুষার হাতে আবার চাবিব গোছাটা ফেরত দিয়ে নিঃশব্দে বেরিয়ে গেল । বারান্দা থেকে বলল, মংলু আর নিতাইকে নিয়ে যাচ্ছি । অনেক মাল, ভুলতে লোক লাগবে ।

তুষা একথাও জবাব দিল না ।

ঘরে একটা অস্বস্তিকর নীরবতা ঘনিয়ে উঠছে । ছেলেমেয়েবা অবশ্য অতটা খেয়াল করল না । স্বপ্না, মঞ্জু আর সজল কোথা থেকে একটা লুডো বের করে হারিকেনের আলোয় খেলতে বসে গেল । অস্বস্তিটা শুধু টের পাচ্ছিল শ্রীনাথ । তুষার কোনো বিস্তারণ নেই, চৈচামেচি নেই, কিন্তু তার ঠাণ্ডা রাগ নানা পন্থায় শোধ নেয় । শোধ নিতে তুষা কখনও ভুল করেনি ।

খুব চিন্তিত উদ্বিগ্ন মুখে সে তাই সজলের দিকে একবার তাকায় । বড় অবাধ্য হয়েছে ছেলেটা । একদিন ওর খাদ্যে পানীয়েও না অজানা বিষ এনে মেশায় । এত সাহস কি ওর ভাল ?

একটু ভাবল শ্রীনাথ । তারপর নিঃশব্দে উঠে তুষার কাছে জানালায় এসে দাঁড়াল । তুষা একবার দেখল তাকে, তারপর উঠবার চেষ্টা করতেই শ্রীনাথ বলে, বোসো, বোসো । বলছিলাম কি, সজল নিতান্ত ছেলেমানুষ ।

আমি তো সেটা জানি । তুষা অবাক হয়ে বলে ।

শ্রীনাথ তুষার মুখের কঠিন আন্তরগটা লক্ষ করে এই আবছা আলোতেও । মনে মনে প্রমাদ গুণে গলাটা পরিষ্কার করে নিতে বার দুই গলা খাঁকারি দেয় । তারপর বলে, ওর ওপর রাগ পুষে রেখো না । এই বয়সটা বাঁধ ভাঙারই বয়স । আমি জানি, ও তোমাকে খুব ভালবাসে ।

তুষা জবাব দিল না । শ্রীনাথ জবাবের আশায় একটু সময় ফাঁক দিয়ে বলল, আর মায়ের শাসনকে একটা বয়সের পর ছেলেপুলেরা বড় একটা মানতে চায় না । আমরাই তো দেখ না, দশ-বারো বছর বয়স থেকে মাকে আর ভয়-টয় পেতাম না । মায়ের সঙ্গে ছেলেপুলেদের সম্পর্কটাই ও রকম যে !

বলে শ্রীনাথ একটু মনভোলানো হাসি হাসল ।

তুষা চূপ করে যেমন বসে ছিল তেমনি বসে রইল ।

শ্রীনাথ ভরসা দিল তাকে, তুমি ভেবো না । আমি ওকে শাসন করে দেবো । আর যেন কখনো তোমার অবাধ্য না হয় ।

তৃষার মুখের কঠিন আস্তরগাটা যেমন ছিল রয়েই গেল। চারদিকের প্রাকৃতিক বিপদের কথা আর খেয়াল রইল না শ্রীনাথের। তৃষার মুখের দিকে চেয়ে বুকটা গুড়গুড় করছিল তার।

বাইরে থেকে কে চটেিয়ে বলল, বড় ঘরে জল ঢুকছে গো।

ঝিরঝর করে আবার বৃষ্টি নেমেছে। বাইরে এসে শ্রীনাথ দেখে দাওয়ার কানায় কানায় জল। আর একচুল বাকি। কিন্তু দৃশ্যটা সে খুব নিস্পৃহভাবে দেখে। কোনো প্রতিক্রিয়া হয় না। মুখ ঘুরিয়ে সে ঘরের ভিতরে চেয়ে দেখে, হ্যারিকেনের আলোয় তিন ভাই-বোন লুডো খেলছে। সজলের মুখ দেখা যাচ্ছে না। এদিকে পিছন ফেরানো। তার চওড়া কাঁধ, চুলে ভর্তি মাথার একটা ছায়া-শরীরের দিকে চিন্তিত ভাবে চেয়ে থাকে শ্রীনাথ। চারদিকের অনেক বিপদের মধ্যে এ ছেলেকে বাঁচিয়ে রাখাই এক সমস্যা। ওকে কি বঁচে থাকতে দেবে ?

এক বলক জল এসে পা ভিজিয়ে দিয়ে গেল শ্রীনাথের।

বড় ঘরও ডুবছে তা হলে ! ডুবক, ডুবে যাক, ভেসে যাক। শ্রীনাথ তার কোমর থেকে বিড়ির বাণ্ডুল আর দেশলাই বের করে বিড়ি ধরিয়ে নেয়। বারান্দায়, ঘরে মেলা পোকামাকড় ঘুরঘুর করছে। টর্চের আলোয় সে চারদিকটা দেখার চেষ্টা করে। বেনো যোলা জল তোড়ে ঢুকছে বিশাল উঠানে। ঝোপঝাড় সব জলের তলায়। পূর্বের ঘরে বারান্দায় যারা এসে উঠেছে তারাও এখন গোড়ালি-ডুব জলে দাঁড়িয়ে বেকুবের মতো চূপ করে আছে।

বৃষ্টি এখন তেড়ে পড়ছে। টিনের চালে জোর শব্দ। গুপুস করে একটা নারকোল জলে পড়ে ভেসে গেল। চৌকাঠ ডিঙিয়ে কয়েক কোষ জল ঢুকল ঘরে।

লুডো থেকে মুখ তুলে স্বপ্না ভয়ের গলায় ডাকল, মা !

তৃষা তেমনি জানালায় বসে। জবাব দিল না, তবে মুখ ঘুরিয়ে কঠিন চোখে তাকাল। স্বপ্না দরজার দিকটা দেখিয়ে বলে, জল ঢুকছে।

তৃষা মৃদু স্বরে বলল, দেখেছি।

সজল লুডোর ঘুঁটি চুরি করল এই ফাঁকে। একটা কাঁচা ঘুঁটি আঙুল দিয়ে পাকা ঘরে চালিয়ে দিয়ে সে নিশ্চিন্তের গলায় বলে, ঢুকছে তো ঢুকছে। সাঁতার জানিস না ?

বেশী পাকামি করিস না তো ভাই। শুধু সাঁতার জানলেই বুঝি হবে ? ঘরদোর ডুবে গেলে কোথায় থাকব আমরা ?

ডুবতে দে না।

মঞ্জু চুরি ধরতে পেরে সজলের কান টেনে একটা থান্নাড মেরে বলল, খুব না ! চোর কোথাকার ! ডাকাত।

সজল হি হি করে হাসে।

তৃষা কুঁট চোখে দৃশ্যটা লক্ষ করে। ছেলেটা ভয় পায় না। ভয় কাকে বলে জানে না। কিন্তু তৃষা রাগ চেনে। সে জানে, সজলের এই সাহস কোনো ভাল কাজে লাগবে না।

ঘরে হিলহিল করে জল ঢুকে পড়ছে এবার। এ ঘরের ভিত অনেক উঁচু। তবু ঢুকছে। তার অর্থ, কোথাও বোধ হয় আর ডাঙা জমি নেই।

পূর্বের ঘরের বারান্দায় দাঁড়ানো পুরুষ, মেয়ে, বউ বাচ্চারা ঘরের চালে উঠবার আয়োজন করছে। পাঁচ সাতজন উঠেও গেছে, বাকিদের টেনে তুলছে ঢালু টিনের ওপর। অঝোর বৃষ্টির মধ্যে ঐ শিহল ঢালু টিনের ওপর কতক্ষণ কাটাতে হবে কে জানে। লক্ষণ ভাল নয়।

চারদিকে টর্চ মেরে দেখছিল শ্রীনাথ ।

ঘরে এসে সে দেখে, খাটের বিছানা গুটিয়ে তার ওপর কিছু বাস্তব প্যাটরা তুলছে বৃন্দা ।
জলে ভিজ়ে মালি আর দুটো কাজের লোক ঘরে এসে গেল ।

তৃষা জানালা থেকে জলের মেঝেয় পা রেখে দাঁড়াল । বিশেষ কাউকে নয়, কিন্তু সকলকে উদ্দেশ করেই বলল, তোমরা আস্তে আস্তে পাটাতনে উঠে যাও ।

সজল কাঁধ ঝাঁকিয়ে বলল, এখনই কি ! আগে ঘরে গলা জল হোক, তারপর দেখা যাবে ।

স্বপ্না আর মঞ্জু সভয়ে কাঠের মই বেয়ে ওপরে ওঠে । তাদের আগে আগে বৃন্দা ।

শ্রীনাথ ইতস্তত করে বলে, আর একটু দেখি । তুমি বরং উঠে পড়ো ।

তৃষা টেবিল ল্যাম্প জ্বেলে শিষটা বাড়িয়ে চারদিক দেখল একটু । তারপর বলল, পাটাতনে বিছানা পাতা আছে, খাওয়ার জল রাখা আছে । খাবার-দাবারও আছে । চিন্তা কোরো না । আমি যাচ্ছি । বলে তৃষা মইয়ে পা রাখে ।

শ্রীনাথ জানে, তৃষা দূরদর্শী । অনেক আগে থেকেই সে সব কিছুর জন্য প্রস্তুত থাকে ।
তৃষার আধিপত্য মেনে নিলে কারো কোনো ভয় নেই, কষ্ট নেই । শ্রীনাথ উর্ধ্বমুখ হয়ে তৃষার মই বেয়ে উঠে যাওয়া দেখছিল ।

পিছনে সজল হঠাৎ বলে ওঠে, আরে ! ওটা কি ?

মাঝ সিঁড়িতে হঠাৎ স্থির হয়ে দাঁড়িয়ে যায় তৃষাও ।

শ্রীনাথ ঘুরে তাকায় । আর তাকিয়েই দেখতে পায় । তৃষা যে জানালার পাটায় এতক্ষণ বসেছিল ঠিক সেইখানে মস্ত এক চিত্রল কেউটে । চতুর, হিংস্র ফণাটা মাঝে মাঝে তুলে আবার মুখ নামিয়ে নিচ্ছে । লেজের খানিকটা এখনো বাইরে ।

সম্মোহিতের মতো চেয়ে ছিল শ্রীনাথ । সাপের যে এক ধরনের সম্মোহন আছে তা সে ছেলেবেলায় শুনেছিল । আসলে আচমকা সাপ দেখা দিলে মানুষ বিমূঢ় হয়ে যায় । সেটাই কি সেই সম্মোহন ? শ্রীনাথ হাঁ করে চেয়ে ছিল শুধু ।

সবার আগে তৎপর হল সজল । হাত বাড়িয়ে সে খাটের ছতরি থেকে একটা আড়কাঠ তুলে নেয় ।

আর তখনই সংবিৎ পেয়ে শ্রীনাথ বলে ওঠে, না ! না ! সজল, খবরদার !

বাপের একথাটা শুনল না সজল । ডাঙাটা তৎপর হাতে তুলেই বিদ্যুৎবেগে বসিয়ে দিল । কিন্তু ছত্রির অত লম্বা কাঠ দিয়ে এই ঘরের মতো অপরিসর জায়গায় লাঠির কাজটা হল না । ছাদের একটা কড়িকাঠে সেটা খটাং করে শব্দ করল, তারপর যদিও বা জানালার পাটা পর্যন্ত নামল তো সেটা সাপটার গায়ে লাগলই না । কিন্তু এই আক্রমণে ভয়ংকর সাপটা দূরন্ত ফণার ছোবল তুলল ।

করছিস কি গাধা কোথাকার ! বলে হঠাৎ শ্রীনাথ জাপটে ধরে সজলকে, কামড়াবে তোকে । উঠে যা পাটাতনে । যা !

সজল মুখ ঘুরিয়ে বাবার দিকে চেয়ে হাসল, ছাড়ো বাবা, একটা সাপকে এত ভয় কি ! দেখ না, মেরে ঠাণ্ডা করে দিচ্ছি ।

এক পলকের এই সর্বনাশা অমনোযোগ, ঐ সুযোগেই সাপটা হড়হড় করে নেমে এল মেঝেয় । তীব্র ফৌসানির শব্দে সচকিত সজল চেয়ে দেখে, মাত্র তিন হাত দূরে সাপটার ফণা, আর তার পাল্লায় সে দাঁড়িয়ে । তাকে জাপটে আছে বাবা ।

গোয়ালঘরে, বাগানে অনেক সাপ মেরেছে সজল । সাপে তার ভয় প্রায় নেই-ই । কিন্তু

ঠিক এই অবস্থায় সাপের মুখোমুখি সে কখনো পড়েনি। তার ওপর বিপদ, বাবা তাকে জড়িয়ে ধরে একটা অদ্ভুত গৌ-গৌ শব্দ করছে।

কিন্তু সজলের কাছে সাপের কোনো সম্মোহন নেই। তার মাথা পরিষ্কার। সহজেই সে সিদ্ধান্ত নিতে পারে। হাতের বিশাল ডাঙটা ফেলে গায়ের আসুরিক জোরে সে এক ঝটকায় বাবাকে ছিটকে ফেলে দিল।

সাপটা ছোবল দিতে একটু দেরী করেছিল। তারও তো অগ্রপশ্চাৎ বিবেচনা করার আছে। বেনোজল থেকে মানুষের ঘরে উঠে এসে সেও একটু অপ্রতিভ।

সজল তাই এ যাত্রায় বেঁচে গেল। বাবাকে সরিয়ে দিয়েই সে এক লাফে সরে গিয়ে খাটের ওপর ভাঁই করা বাল্ল-প্যাঁটরা থেকে হাত বাড়িয়ে প্রায় অন্ধের মতো একটা মাঝারি ট্রাঙ্ক দু হাতে তুলে নিল চোখের পলকে। তুলেই সেটাকে মেঝেয় ফেলে লম্বালম্বি তড়িৎগতিতে ঠেলে নিয়ে গেল সাপটার দিকে। মেল ট্রেনের মতো দ্রুতগামী সেই ট্রাঙ্ক সাপটাকে নড়ার সময় দিল না। সোজা দেয়ালের সঙ্গে চিড়ে চাপটা করে দেয়। দেয়ালে সাপটাকে ট্রাঙ্ক দিয়ে দুমদুম করে ঠুসতে থাকে সজল। প্রবল সেই প্রহারে সাপটার হাড়গোড় ভেঙে দ হয়ে যায়, চামড়া ছিড়ে যেতে থাকে। সজল সাপটাকে ঠুসতে ঠুসতে অশ্রুট স্বরে বলতে থাকে, মর! মর! মর!

কিছুক্ষণ আগেকার ভয়ংকর কেউটে যখন প্রায় ছিবড়ে হয়ে এসেছে তখন তাকে ছাড়ল সজল।

শ্রীনাথ উঠে বসেছে। হাঁ করে দেখছে দৃশ্যটা। সিঁড়ির মাঝখানে স্থির স্ট্যাচুর মতো দাঁড়িয়ে আছে তৃষা। নির্নিমেষ চোখ। এতক্ষণ সে একটাও শব্দ করেনি।

সজল ট্রাঙ্কটা আবার খাটে তুলে রাখে, তারপর বাবার দিকে ফিরে একগাল বাহাদুর হাসি হেসে বলে, তুমি যা ভীতু না! তোমার জন্যই আর একটু হলে সাপটার ছোবল খেতাম। বলে সে বাবাকে টেনে তোলে।

শ্রীনাথ কাঁপছিল। হাত পায়ে বশ নেই। কিছুক্ষণ স্তম্ভিতের মতো সজলের মুখের দিকে চেয়ে থেকে হ্যাদানো গলায় বলল, তোর প্রাণের ভয় নেই হারামজাদা! ফের যদি কোনোদিন...

সজল একটু হেসে বলে, আমার চেয়ে মার বিপদ অনেক বেশী ছিল। ঐ জানালায় মা বসে ছিল একটু আগে।

তা বটে। কিন্তু তৃষাকে সাপে কামড়াতে পারে এটা যেন বিশ্বাস হয় না শ্রীনাথের। এ বাড়ির সাপও হয়তো তৃষার অনুগত। এমনও হতে পারে যে, এই কেউটেটা তৃষার মনোবাঞ্ছা পূর্ণ করতেই সজলকে ছোবল তুলেছিল।

পাটাতনের ওপর থেকে এ সময়ে মুখ বাড়িয়ে মরা সাপটা দেখে স্বপ্না চৈতন্যে উঠল, উঃ বাবাগো! ভাই, তুই মারলি?

তৃষা কোনো কথা না বলে এতক্ষণ চুপ করে দাঁড়িয়ে ছিল। এবার বলল, বৃন্দা, সাপটাকে বাইরে ফেলে দিয়ে আয়।

কৌচকানো ভূ আর কঠিন মুখ নিয়ে তৃষা আস্তে আস্তে পাটাতনে উঠে গেল। সাপটা তাকে কামড়াতে পারত, আর একটুক্ষণ যদি সে বসে থাকত জানালার পাটায়। কিন্তু সেজন্য কোনো দৃষ্টিভঙ্গি হচ্ছিল না তৃষার। এ বাড়িতে আসার পর বিস্তর সাপ বিছে পাগলা শেয়ালের সঙ্গে বসবাস করতে হয়েছে। কিন্তু এখন আরো বুদ্ধিমান, আরো হিংস্র, আরো তৎপর মানুষের সঙ্গে বসবাস করতে হবে তাকে, যাদের ওপর কিছুতেই আধিপত্য বিস্তার

করা যাবে না ।

বড় ঘরটা বেঁচে গেল শেষ পর্যন্ত । জল ঢুকল বটে, কিন্তু এক দেড় ইঞ্চির বেশী উঠল না । ভোর হতে না হতেই সেই জল নেমে যাচ্ছিল আস্তে আস্তে ।

সরিং সকালবেলা খবর আনল, নদীর ওপারের বাঁধ এপাড়ের লোক গিয়ে কেটে দিয়ে এসেছে । ফলে জলটা আর বাড়তে পারেনি ।

সকালে অগোছালো ঘরে সকলে জড়ো হয়ে বসে চা খাচ্ছিল ।

পূর্বের ঘরের চাল থেকে লোক নেমে দাওয়ায় বসে আছে । বৃন্দা তাদের জন্য ধামাভর্তি চিড়ে বের করে দিচ্ছিল । বৃষ্টি এখনো হচ্ছে । রোদ ফোটেনি ।

তৃষা একদমই কথা বলছে না রাত থেকে । এটা লক্ষ করেছে শ্রীনাথ । কথা বলানোর জন্য সে বলল, কাল রাতে তোমারও খুব ফাঁড়া গেছে । উঃ, যা একখানা সাইজ সাপটার !

তৃষা চাযের কাপ নামিয়ে রেখে মৃদুস্বরে বলল, ফাঁড়া এখনো যায়নি ।

শ্রীনাথ চমকে উঠে বলে, তার মানে ?

মানে কি তা তোমার বোঝা উচিত ছিল । বলে তৃষা উঠে পড়ে । অনেক কাজ ।

॥ সাতাশ ॥

মাল্টি-ন্যাশনাল কোম্পানির যত দোষ আছে সান-ফ্লাওয়ার তার কোনোটা থেকেই মুক্ত নয় । দীপনাথকে সান-ফ্লাওয়ারে গুরুবার আগে একটা বন্ড সই করে দিতে হয় । সে যে শর্ত দিয়েছিল তার কোনোটাই কোম্পানি মানল না । তবে বেতনটা ঠিক রাখল । যাতায়াতের জন্য অফিসারদের নিজস্ব গাড়ি থাকলে ভাল কথা, নইলে চমৎকার একটা বাস সার্ভিস আছে । শহরের বিভিন্ন জায়গা থেকে অফিসারদের নিয়ে আসা বা পৌঁছে দেওয়া হয় । দীপনাথ সেই সুবিধাটুকু পেল । কোম্পানি কোনো বাড়ি দেবে না । তবে কালক্রমে বাড়ি বা ফ্ল্যাট কেনার টাকা ঋণ দেবে ।

এর চেয়ে রজার্স ভাল ছিল হয়তো । কিন্তু রজার্স দেশী কোম্পানি । সে টোপ ফেলে দীপনাথকে গেঁথে নিয়ে তাকে দিয়ে দু-নম্বরী কারবার করাতো । তার চেয়ে সান-ফ্লাওয়ার ঢের ভাল । ছ'মাস বাদে অ্যামেরিকায় ট্রেনিংয়ে পাঠাবে । সেটাও দীপনাথের প্রতি বিশেষ দাক্ষিণ্যবশে নয়, বেশির ভাগ অফিসারকেই তারা অ্যামেরিকায় নিয়ে একটু স্ট্রিমলাইনড করিয়ে আনে ।

এত বড় কোম্পানিগুলি ভাত ছড়িয়ে বসে তু বলে ডাকলেই দীপনাথের মতো ঝাঁকে ঝাঁকে কেজো লোক এসে জড়ো হয়ে লেজ নাড়ে । সুতরাং দীপনাথকে ডেকে চাকরি দেওয়ার দরকার ছিল না এদের । তবু দিয়েছে কেন সেটা দীপনাথ ভাল বুঝল না । প্রথম কয়েকটা দিন নতুন ধাঁচের কাজকর্ম বুঝতে সে হিমসিম খেল । অটোমেশন জিনিসটারও মুখোমুখি সে কখনো হয়নি । এখানে হল ।

গুজরাটি কোম্পানি বোস সাহেবের যোগ্যতা অনুযায়ী তাকে কাজে লাগাতে পারেনি । কিন্তু বোস সাহেব কাজের লোক । সান-ফ্লাওয়ারে ঢোকানোর আগে মাসখানেক বোস সাহেব দীপনাথকে অটোমেশন বুঝিয়েছে । চেনা বিভিন্ন কোম্পানিতে ইনট্রোডাকশন দিয়ে পাঠিয়েছে আই বি এম এবং অন্যান্য যন্ত্রপাতির কাজ দেখতে । সেই ঘরোয়া ট্রেনিংটা খুব কাজে লাগল দীপনাথের । হিমসিম খেলেও নতুন কাজে সে হাস্যকর কিছু করল না ।

সাতদিন পর এক ছোকরা সাহেব তার টেবিলের সামনে এসে জিজ্ঞেস করল, লাইক দি

জব ?

ইয়াঃ । অনায়াসে বলতে পারল দীপনাথ ।

আট্টা বয় । বলে সাহেব হেসে চলে গেল ।

বোস সাহেব মাঝে মাঝে ফোন করে খবর নেয়, কোনো অসুবিধে হচ্ছে না তো, চ্যাটার্জি ?

না । চালিয়ে নিচ্ছি ।

আপনার হিসেবটা হয়ে গেছে । একদিন এসে টাকাটা নিয়ে যাবেন ।

গুজরাটি কোমপানিতে দীপনাথের কিছু পাওনা টাকা পড়ে আছে । খুব বেশী হবে না । বলল, যাবো ।

দেবী করবেন না । টাকাটা ব্যাংকে রাখলে সুদ পাবেন, এখানে খামোখা ফেলে রেখে লাভ কি ?

দীপনাথ মৃদু হেসে বলে, সময় পাচ্ছি না যে । এই অফিস থেকে সহজে বেরোনো যায় না ।

জানি । সান-ফ্লাওয়ার ইজ বিগ । ভেরী-বিগ । আপনিও এখন বিগ । তবে আপনি যদি একটা ডেট বলেন তবে অফিস আওয়ারসের পর আমি টাকাটা রেডি রেখে দেবো । ইউ জাস্ট ড্রপ ইন অ্যান্ড কালেক্ট ।

আচ্ছা । মিসেস বোসের খবর কি ?

নাথিং নিউ । নাইদার হ্যাপী নর আনহ্যাপী ।

আপনি ?

আমি ? আমি জাস্ট ওকে ।

কোমপানি ?

বুঝতে পারছি না । রিয়েলি বুঝতে পারছি না । ডুয়িং বিজনেস নো ডাউট । কিন্তু একস্পানশান নেই ।

আচমকই দীপনাথ বলে, আপনি সান-ফ্লাওয়ারে আসবেন ?

বোস বোধ হয় অবাক হয়, তারপর হেসে বলে, ও ! নো ।

কেন বোস সাহেব ?

বোস সাহেব একটা ছোট শ্বাসের শব্দ করে বলে, সান-ফ্লাওয়ার অনেক আগেই আমাকে পিক করেছিল । কিন্তু কোনো বড় কোমপানিতে আমার যাওয়ার উপায় নেই চ্যাটার্জি ।

কেন ?

কারণ আমি যে কনসার্নে কাজ করব আই মাস্ট বি দেয়ার নামবার ওয়ান ম্যান । আমি নাথার ওয়ান বা হয়ে কোনো কোমপানিতেই কাজ করিনি । বড় কোমপানি আমাকে মন্ত পোস্ট দেবে, অনেক মাইনেও, কিন্তু প্রথমেই নামবার ওয়ান জায়গাটা ছাড়বে না । তাই আমার কপালে বড় কোমপানি নেই ।

এবার দীপনাথও একটু হাসে । বলে, আপনি যদি কখনো কোনো নিজস্ব কোমপানি খোলেন তবে আমাকে ডাকবেন ।

বোস আবার শ্বাস ছেড়ে বলে, সে সব আরো কম বয়সে শখ ছিল । এখন নেই । এখন আমি কিজিক্যালি আনফিট । সাইকোলজিক্যালিও । কিন্তু আপনাকে একটা আডভাইস দিয়ে রাখি । চট করে কোনো লোভে পড়ে সান-ফ্লাওয়ার ছাড়বেন না । ইউ আর উইথ গুড পিপল । দে উইল ডু ইউ গুড । কম্পিটিটর কোমপানি অনেক সময় সাবোটাজ করার জন্য

বড় কোমপানি থেকে লোক ভাঙিয়ে নিয়ে আসে। যারা লোভে পা দেয় জেনারেলি এন্ড ইন দি গাটার। সান-ফ্লাওয়ারে থাকুন। দে উইল মেক ইউ ভেরি ভেরি এফিসিয়েন্ট।

ঠিক আছে। কথটা মনে রাখব।

আই অলওয়েজ উইশ ইউ গুড।

সান-ফ্লাওয়ারে আসার মাস দুয়েক বাদে একদিন মণিদীপা ফোন করল।

গলাটা চেনা লাগছে—দীপনাথবাবু?

দীপনাথ মৃদু হেসে বলে, যে ভোলে ভুলুক কোটি মন্বন্তরে আমি ভুলিব না, আমি তারে ভুলিব না। কেমন আছেন?

চমৎকার। আপনি?

চমৎকার।

একটা চাকরি দেবেন আপনার কোমপানিতে? আপনার পি-এ করে নিন না!

আমার পি-এ বলে কিছু নেই।

তা হলে আপনি কিসের বড় চাকরি করেন?

বড় চাকরি নয়। কিন্তু এই কোমপানির বেয়ারাও এত বেশী মাইনে পায় যে অনেক সরকারী অফিসারও পাল্লা দিতে পারবে না।

তা হলে বেয়ারার চাকরিই দিন না।

কেন, ব্যবসার কী হল?

কী আবার হবে? টাকা কই? ঢাকুরিয়ার এই দোকানটা এখন পঞ্চাশ হাজার সেলামীতেও বাজি। কিন্তু তাই বা আমাকে দেবে কে?

দু লাখ থেকে পঞ্চাশ হাজারে নেমেছে? বলেন কি!

এমনিতে নামেনি মশাই, দোকানের মালিককে বেশ কয়েকটি কটাক্ষ উপহার দিতে হয়েছে।

তা হলে আরো গোটাকয় দিন। বিনি পয়সায় দিয়ে দেবে।

না। এখন দোকানের মালিক আর কটাক্ষে খুশি নয়। হি ওয়ান্টস সামথিং টানজিবল্। হয় টাকা না হয় কাইন্ডস্।

কাইন্ডেনেস নয় তো!

না। কাইন্ডস্, একস্ট্রিমলি ফেমিনিন কাইন্ডস্।

কুপ্রস্তাব করেছে বলছেন?

নট ইন সো মেনি ওয়ার্ডস্। তবে আমরা মেয়েরা ঠিক বুঝতে পারি।

ওর কাছে আর যাবেন না।

গিয়ে লাভও নেই। লোকটা বুঝে গেছে, আমি ক্যাশ বা কাইন্ডস্ কোনোটাই দিতে পারছি না। শুনুন, আমরা একটু পাহাড়ে বেড়াতে যাচ্ছি। যে বি নৈনীতাল। না হয় সিমলা। আপনি কি ছুটি পাবেন?

পেলেও যাবো না।

কেন? টু অ্যাভয়েড মি?

সেটাও হয়তো কারণ। তবে আমার ভয়, এবার বড় পাহাড়ের কাছে গেলে আমি হয়তো ফিরতে পারব না।

ওমা! সে কি?

জানেন তো, প্রীতম আজও ফেরেনি?

জানি ।

প্রীতম আমার কতটা ছিল তা তো আর জানেন না !

অনেকটা আন্দাজ করতে পারি ।

অনেকটা, তবু সবটা নয় । প্রীতম ছিল এই পৃথিবীর সঙ্গে আমার সম্পর্কের সব চেয়ে বড় কারণ, এখন তাই আমার কোনো পিছুটান নেই । বড় চাকরি, অনেক টাকা, এ সব কিছুই আমাকে টেনে রাখতে পারবে না । মাঝে মাঝে আজকাল নিশুত রাতে পাহাড় ডাকে ।
যাঃ ! কী যে কিস্তুত একটা খেয়াল আছে আপনার মাথায় !

দীপনাথ তা জানে । কিন্তু কথাটা তো মিথ্যেও নয় । সারাদিন সান-ফ্লাওয়ার যতক্ষণ পারে মেদ মজ্জা মাংস মস্তিষ্ক চিবিয়ে ছিবড়ে করে দেয় । কিন্তু তারপর যখন ক্লাস্ত দীপনাথ তার হোটেল ফিরে আসে তখনই আসে প্রীতমের শূন্যতা । বড় ভারহীন, বন্ধনহীন লাগে নিজেকে ।

সব ক'টা বড় খবরের কাগজে দিনের পর দিন নিজের পয়সায় প্রীতমের ছবি সহ নিরুদ্দেশের খবর বের করেছে সে । শিলিগুড়িতে শতমণ্ড দাদাকে ঝুঁজতে তোলপাড় করছে আজও । কোথাও কোনো হৃদিশ মেলেনি ।

হয়তো প্রীতম আছে । হয়তো নেই ।

বিলুর হাবভাব একদম ভাল লাগে না দীপনাথের । বিলু চাকরিতে একটা লিফট পেয়েছে । বাসটা সাজিয়েছে অনেক টাকা খরচ করে । প্রতি রবিবার অরুণ ওর বাসায় খায় । মাঝে মাঝে বেড়াতে যায় অরুণের সঙ্গে ।

এ সব এক রকম চলছিল । খুব সম্প্রতি সে খবর পেয়েছে, বিলু একজন উকিলের পরামর্শ নিচ্ছে । খবরটা দিয়ে গিয়েছিল শতম । মাসখানেক আগে সে একটা টেন্ডার ধরতে কলকাতায় এসে দুদিন বিলুর কাছে থেকে গিয়েছিল ।

স্বামী নিরুদ্দেশ বলে একসপাটি ডিভোর্স পেতে অসুবিধে হবে না বিলুর । কিন্তু ডিভোর্সই বা চাইবে কেন ? প্রীতম মরে গেলেই কি সব শেষ হয়ে গেল ?

কথাটা সরাসরি বিলুকে জিজ্ঞেস করতে তার লজ্জা করে । কিন্তু ভাবলেই লজ্জায় ঘেমায ভিতরটা অস্থির হয়ে ওঠে তার । আর তখনই মনে হয়, এই জীবনটা নেহাতই একটা অর্থহীন প্রলাপ মাত্র । এর চেয়ে সব ছেড়েছুড়ে বেরিয়ে পড়া ভাল ।

পাহাড় তো ডাকছেই । অবিরল ডাকে । এসো, চলে এসো দীপনাথ । এখানে নীরব মহান এক প্রশ্নানপথ খোলা আছে । এখানে দীনতা নেই, নিম্নগতি নেই । স্বর্গের এই সিঁড়ির কাছে এসো । আমি কোলে তুলে নেবো ।

দীপনাথ বোস সাহেবের কাছে খবর পেল; ডাক্তারের পরামর্শে মণিদীপা আর বোস সাহেব নৈনীতাল বেড়াতে যাচ্ছে । যাক । ওরা এত সহজে মিশ খাবে না, তা জানে দীপনাথ । দুজনের মধ্যে এখনো কাঁটাতারের বেড়া । তবু এভাবেই হয়তো একদিন একটু বেশী বয়সে পরস্পরকে আঁকড়ে ধরবে অসহায়ের মতো । শেষ পর্যন্ত তো মানুষ অসহায়ই । সে বোসই হোক, মণিদীপাই হোক ।

নৈনীতাল গেলেও হত । পাহাড়ের মতো আর একটা দুর্নিবার ডাকও আছে দীপনাথের জীবনে । এখনো তার মূলসুঁদ কেঁপে ওঠে যদি মণিদীপা ডাকে ।

দিনের মোটা একটা সময় কাজ কাজ খেলা দিয়ে তাকে ভুলিয়ে রেখেছে বলে সান-ফ্লাওয়ারের প্রতি বড় কৃতজ্ঞতা বোধ করে দীপনাথ । আরো ভাল হত যদি সে সারা রাত ধরে আর একটা চাকরি করত । একমাত্র কাজই তাকে ভুলিয়ে রাখতে পারে । টাকা
৫২৬

নয়, প্রতিষ্ঠা নয়, প্রোমোশন নয়, কেবল ভুলিয়ে রাখে বলে যত দিন যায় তত আরো বেশী কাজ-পাগল হয়ে ওঠে দীপনাথ ।

অফিসের পর এই শূন্যতা এত অসহ্য লাগত যে, বেশ কিছুদিন তাকে বীথির কাছে যেতে হয়েছে । একটা কুৎসিত বদ অভ্যাস তৈরী হয়ে যাচ্ছিল তার । হঠাৎ একদিন সুখেন মেসে ফিরল হাতে আর মাথায় ব্যান্ডেজ নিয়ে । মুখে করুণ হাসি ।

চমকে উঠে দীপনাথ জিজ্ঞেস করল, কী হয়েছে ?

ঘরে আর কেউ ছিল না । সুখেন কিছুক্ষণ গম্ভীর হয়ে বসে থেকে বলল, বীথির ছেলেকে দেখেছেন তো ?

এক কি দুই দিন ।

বীথি ভাল নয়, কিন্তু ছেলেটা মেরিটেরিয়াম্স । পলিটিক্স করে, সোসাল ওয়ার্ক করে । জানি ।

এতদিন কোনো ঝামেলা করেনি । বীথি ডিভোর্স পেয়ে গেছে, সুতরাং এখন যদি সে বিয়ে করে তা হলেও ছেলের আপত্তি নেই । কিন্তু আপত্তি আমাকে বিয়ে করায় । ছেলেটি মনে করে, আমি করাপটেড সরকারী কর্মচারী । আমাকে বিয়ে করা মানে সোস্যাল ইনজাসটিসকে প্রশ্রয় দেওয়া ।

তারপর ? এই রক্তারক্তি কাণ্ডটা কখন হল ?

আজ । উই হ্যাড অলটারকেশনস । আমার পেটে একটু মাল ছিল । ঘড়াম করে মেরে দিয়েছিলাম এক ঘুঁষি । ছোকরাও পাণ্টে ঘুঁষি ঝেড়েছে । সিঁড়ি দিয়ে পড়ে গিয়ে এই কাণ্ড ।

তারপর ?

তারপর আর কি । ক্ষমা চাওয়াচাওয়াই হল । কাল বীথির সঙ্গে আমার বিয়ে ।

কালই ?

কালই । শুভস্য শীঘ্রম ।

রেজিস্ট্রি না সোস্যাল ?

সোস্যাল হলে বিস্তী দেখাবে । রেজিস্ট্রি আর তারপর কালীঘাট ।

আপনি বীথির সঙ্গে ঘর করতে পারবেন ?

পারব ।

নোয়িং ফুললি যে, আমার সঙ্গেও বীথির... !

আমিই তো আপনাকে নিয়ে গেছি, সুতরাং জানব না কেন ? শরীরের কোনো দোষ নেই । মনটা ঠিক থাকলেই হল ।

এ সব মেয়েদের মনও কি ঠিক থাকে ?

সে সব পরে ভাবব । আমিও কিছু ভাল লোক নয় । বীথিও নয় । সুতরাং ভেবে লাভ কি ?

তা বটে ।

তা হলে কাল । আপনি তৈরী থাকবেন । সাক্ষী দিতে হবে ।

পরদিন রাতে বাস্তবিকই ঘটনাটা দীপনাথের চোখের সামনে বীথির ড্রয়িংরুমে ঘটে গেল । দীপনাথ সাক্ষী ছিল ।

এই বিয়েতে এক রিকশায় বসে সুখেনের সঙ্গে গিয়েছিল দীপনাথ । ফিরল একা ।

সুখেন রয়ে গেল । আর ফেরেনি । ফিরবেও না । হোটেলের ম্যানেজার নতুন বোর্ডার

খুঁজছে। সুখেন চলে যাওয়ার পর এখন আরো বেশী একা লাগে দীপনাথের। নতুন বোর্ডার আসবে, সে কী রকম লোক হবে কে জানে! দীর্ঘদিন মেসে হোটেল থেকে নতুন লোকের সঙ্গে সমঝোতা করার অভ্যাস হয়ে গেছে তার। তবু ইদানীং তার এ রকম হাটবাজারের মতো জায়গায় থাকতে ভাল লাগে না।

তার জিনিসপত্র খুব বেশী নেই। সামান্যই। ফ্ল্যাট ভাড়া করলে তা সাজানো গোছানোর ব্যাপার আছে। তার ওপর আর কিছুদিন পরই তাকে আমেরিকা যেতে হচ্ছে। খামোখা ফ্ল্যাট ভাড়া করার মানে হয় না। ফাঁকা পড়ে থাকবে। অথচ এই ভারাক্রান্ত হৃদয়টিকে রাখার জন্য একটু সুন্দর নির্জনতা খুঁজছে সে মনে মনে।

অনেক হিসেব করে সে দেখল, তার বয়স এখন তেত্রিশ বা চৌত্রিশ। জন্মের সঠিক তারিখ জানা নেই। এই বয়সে প্রকৃতপক্ষে তার কোনো আপনজন নেই। ঘনিষ্ঠ বন্ধু নেই। এখন তার এই তেত্রিশ বা চৌত্রিশ বছর বয়সে একাকিত্বের ভূত কাঁধে চেপে ঠ্যাং দোলাচ্ছে আর রগড় দেখছে।

মাঝরাতে মাঝে মাঝে ঘুম ভেঙে যায় দীপনাথের। আর ঘুম আসতে চায় না। বরং আসে প্রীতম, মণিদীপা, শিলিগুড়ি, আসে সেই অচেনা মহান পর্বত। বিরহের এক শুষ্ক বাতাস বয়ে যায় বুকের পাজির ভেদ করে। তখন আলো ছেলে একটু বইটাই কিছু পড়তে ইচ্ছে করে তার। কিন্তু রুমমেটদের ঘুম ভেঙ্গে যাবে ভেবে পারে না। একটু পায়চারি করলেও হয়তো ভাল লাগে। কিন্তু সেই পরিসর নেই।

মেস বদলাবে, একটা সিংগল সীটেড ঘর দেখে চলে গেলে কেমন হয়?

এ সব ছেঁড়া টুকরো সমস্যা যখন তাকে বিব্রত করছিল তখনই রতনপুর থেকে বউদির চিঠি এল, ...আমি মরলে খাটে কাঁধ দেওয়ার জন্যও কি আসবে না?

সান-ফ্রাওয়ারে ফাইভ ডেজ উইক। শনি রবি ছুটি। কিন্তু প্রায়দিনই শনিবারে অফিস করতে হয় দীপনাথকে। তার জন্য মোটা ওভারটাইম আছে, কিন্তু সেজন্য নয়। দীপনাথ কাজ করার আগ্রহের বশে ফী শনিবার অফিসে চলে যায়। ইচ্ছে করলে এক শনি বা রবিবার সে চলে যেতে পারে রতনপুরে। কিন্তু তার ইচ্ছে হয় না। মেজদা ক্রমে এক জড়-ভরত হয়ে যাচ্ছে। বউদি এতদিনে সংসারের পান্টা মার খেতে শুরু করেছে। একমাত্র আকর্ষণ সজল। কিন্তু সজলকে তো নিজের মতো করে মানুষ করতে পারবে না দীপনাথ। অত সময় কোথায়? সজলও ক্রমে রতনপুরের প্রভাবে অন্য রকম হয়ে যাবে, যাকে ভালবাসা যাবে না। একমাত্র উপায় সজলকে বোর্ডিং-এ দেওয়া, মা-বাবার কু-প্রভাব থেকে দূরে সরিয়ে রাখা।

এক শনিবার শ্রীনাথের প্রেসে হানা দেয় দীপনাথ।

মেজদা!

আরে, কেমন আছিস?

তুমি কেমন?

ঐ এক রকম।

দীপনাথ দেখে, গত এক বছরে শ্রীনাথের চেহারা য় বুড়ো মানুষের ছাপ বড় বেশী পড়ে গেছে। সে বলে, আমি তোমাকে একটা কথা বলতে এসেছি।

বল না।

সজলের ব্যাপার কী ঠিক করলে?

সজলের কী হয়েছে? একটু উদ্বিগ্ন হয়ে জিজ্ঞেস করে শ্রীনাথ।

কিছু হয়নি। কিন্তু রতনপুরে থাকলে ছেলেটা মানুষ হবে না।

তা হলে কোথায় থাকবে ?

যদি বলো তা হলে বাইরে কোনো ভাল হোস্টেলে দিয়ে দিই।

হোস্টেল ! বলে শ্রীনাথ একটু ভাবে। তারপর অসহায় একটা মুখের ভাব করে করুণ গলায় বলে, সজল চলে গেলে আমার কী হবে বল তো !

তোমার আবার কী হবে ?

তুই তো ঠিক বুঝবি না। বলতে কি, সজলই আমার একমাত্র অঙ্কের নড়ি। ও যদি চলে যায় তবে আমার আয়ু চট করে ফুরিয়ে যাবে।

কত বাপ তাদের ছেলেকে হোস্টেলে দেয়, তারা থাকে কী করে ?

আমাদের ব্যাপারটা তো অন্য সকলের মতো নয়। চারদিকে ষড়যন্ত্র, কুটকচালি। একমাত্র সজলই আমাকে বুক দিয়ে আগলে রাখে। যেই ও সরে যাবে অমনি আমাকে ছিড়ে খাবে সবাই।

কেন, তুমি কি করেছো যে ছিড়ে খাবে ?

সে অনেক কথা। তোকে তো বছর বলেছি। তবে যদি সজলকে সরিয়ে দিতে চাস তা হলে আমাকেও সরিয়ে দে। ওখানে সজলও খুব নিরাপদ নয়।

কেন, কী হয়েছে ?

তুষার সঙ্গে ওর বনিবনা হয় না। তুষা ওকে মেরে ফেলার চেষ্টা করছে।

তোমার মাথাটা একদম গেছে। মা হয়ে কেউ ছেলেকে মেরে ফেলার চেষ্টা করে ?

তুষা তো আর পাঁচজন মায়ের মতো নয়। তুই সব বুঝবি না।

বউদিকে আমিও কম চিনি না মেজদা। অনেক দোষ থাকলেও বউদি অমানুষ নয়।

শ্রীনাথ কিছু বলল না।

দীপনাথ বুঝল সজলকে এখন সরিয়ে নিলে শ্রীনাথ সন্দেহে আর ভয়েই মরে যাবে। তার মনে পড়ল, সজলও তাকে একবার বলেছিল যে, সে বাবাকে ছেড়ে কোথাও যেতে চায় না।

একটা দীর্ঘশ্বাস ফেলে দীপনাথ উঠে পড়ল। পৃথিবীর লক্ষ লক্ষ পরিবার লক্ষ লক্ষ রকমের নিজস্ব জীবনযাপন ও সম্পর্কের ছক তৈরি করে নিয়েছে। দীপনাথ আগন্তকের মতো গিয়ে সেই সব ছক ভেঙে ফেলতে চাইলেই তো হবে না।

তুষার চিঠিটার একটা এলোবোলে জবাব দিয়ে দিল সে। নিজে রতনপুরে গেল না। ইস্টে করল না। তার নিজের নানা রকম নিজস্ব ব্যথা-বেদনা রয়েছে। এখন মনকে আরো ভারী করার মানে হয় না।

দীপনাথ তার নতুন চাকরির কথা আত্মীয়স্বজনকে জানায়নি ভাল করে। সে কত মাইনে পায় তাও কারো জানার কথা নয়।

তবু গঞ্জে গঞ্জে একদিন সোমনাথ এসে হাজির।

সেজদা, আরেবাস, তুমি তো একখানা পেগ্লাম চাকরি বাগিয়েছো।

দীপনাথ এ ধরনের কথায় বিরক্ত হয়। গম্ভীর মুখে বলে, বাবা কেমন আছে ?

সেই কথাই বলতে এলাম। বাবার চোখটা এবার না কাটালেই নয়।

চোখ কাটানোর কথা অনেক আগে হয়ে গেছে। তখন কাটাসনি কেন ?

টাকা ছিল না।

বাজে কথা। আমরা টাকা দিয়েছিলাম।

সেজদা, তুমিও আজকাল অন্য রকম হয়ে গেছ। কেবল টাকার কথা তুলে আমাকে খোঁটা দাও। আমার অবস্থা কি জান না ?

অবস্থা যাই হোক, স্বভাবটা ভাল কর। বাবার চোখ কাটানোর ব্যবস্থা কর, খরচ সব আমি দেবো। কিন্তু সেটা আগাম তোর হাতে দেবো না।

সোমনাথ গম্ভীর হল। তারপর ক্ষুণ্ণ স্বরে বলল, তুমি চার হাজার টাকার ওপর বেতন পাও। অনেক ক্ষমতা। তোমার মুখে সবই মানায়। ঠিক আছে, তাই হবে।

সোমনাথ চলে যাওয়াব পর দীপনাথ ভাবল, আমি কি একটু নিষ্ঠুর হয়ে গেছি !

॥ অর্ডিনার ॥

আজকাল প্রায়ই সান-ফ্লাওয়ারের শীততাপনিয়ন্ত্রিত বিশাল রিসেপশন ঘরে বুলু অর্থাৎ সোমনাথ এসে বাসে থাকে দীপনাথের জন্য। কেন আসে তা জানে বলেই দীপনাথ বিরক্ত হয়। বুলু টাকার গন্ধ পেয়েছে। প্রায়ই বাবার নাম করে টাকা চায়। বলে, বাবার পুরোনো চশমাটায় চলছে না। আমার অবস্থা তো জানোই। বাবা তোমারও। নিতি নতুন অজুহাত।

বুলুর বয়স বেশী নয়। ত্রিশের মধ্যেই। কিন্তু এর মধ্যেই জুলপি পেকেছে। চেহারা সুস্পষ্ট মধ্যবয়সের ছাপ। দীপনাথের চেয়ে বয়সে চার-পাঁচ বছরের বড় বলে মনে হয়। কম বয়সে বিয়ে করলে কি মানুষ তাড়াতাড়ি বুড়োটে মেরে যায় ?

বসে থেকে একটা শর্ট কোর্সের ট্রেনিং সেরে ফিরে এসে প্রথম দিন অফিসে পা দিয়েই রিসেপশনে বুলুকে দেখতে পায় দীপনাথ। বিরক্ত হতে গিয়েও হল না। থমকে দাঁড়িয়ে চেয়ে রইল। বুলুর পোশাক আজ অনারকম। পরনে খড়ি, চুল এলোমেলো, গালে অল্প একটু দাড়ি। দীপনাথকে দেখে উঠে কাছে এল।

আবেগহীন গলায় দীপনাথ বলে, বাবা ?

বুলু মাথা নাড়ে, আজ সাত দিন।

দীপনাথ কোনো শোক বোধ করে না, বুকে কোনো কান্নার ঢেউ ভাঙল না, হাহাকারে ভরে গেল না ভিতরটা। তবু একটা কিছু হল। হঠাৎ বড় খাঁ খাঁ লাগল চারদিক। শিলিগুড়ির কলেজপাড়ায় মস্ত একটা গাছের তলায় তারা আড্ডা মারত। সেই গাছটা কেটে ফেলার পর জায়গাটা অদ্ভুত ন্যাড়া আর ককণ দেখাত। চারদিকটা এখন অনেকটা ওইরকম। কী যেন ছিল, এখন নেই। তবে দীপনাথ কোনোদিনই বটবৃক্ষের মতো তাঁর সন্তান-সন্ততিকে আড়াল করে ছিলেন না। গাছের কথাটা দীপনাথের মনে এল শুধু ওই থান্না না-থাকার তফাৎটুকুর জন্য।

বুলু কাপড়ের খুঁট তুলে চোখে চাপা দিয়ে ফুঁপিয়ে উঠল। সান-ফ্লাওয়ারের দুজন যুবতী রিসেপশনিস্ট দৃশ্যটা দেখছিল। বুলুর কান্না দেখে দীপনাথেরও চোঁট একটু কঁপে উঠেছিল অজান্তে। সেটা প্রিটেনশনও হতে পারে। মা-বাপ মরলে কাঁদা উচিত এই সংস্কার থেকে। কিন্তু রিসেপশনিস্ট দুজনের দিকে চেয়ে সামলে গেল দীপনাথ। গলার স্বর নামিয়ে প্রশ্ন করল, সবাইকে খবর দেওয়া হয়েছে ?

বুলু পাঁজি হতে পারে, কিন্তু বাবার শোকে তার কান্নায় কোনো প্রিটেনশন নেই। ক'দিনে সে যে অনেক কৈদেছে তার সুস্পষ্ট ছাপ তার ফোলা মুখে। এখনো চোখ দুটি জলে ভরা, লাল। কথা না বলে মাথা নাড়ল সে, খবর দিয়েছে।

বিলুকে ?

হ্যাঁ।

তুই একটু বোস। আসছি।

সান-ফ্রাওয়ারে দীপনাথের কোনো চেয়ার নেই। বড় হলঘরের মধ্যে একটু উঁচু কাঠের পাটাতনেব মতো আয়লাগু। অফিসারদের জন্য। এরকম আয়লাগুের একটা দীপনাথের। সে তার দ্বীপটিতে উঠে চারদিকে একবার তাকাল। ভারী নিস্তর্র পরিচ্ছন্ন আধুনিক অফিস। রোজই সে এই অফিসটার আভিজাত্য লক্ষ করে এবং খুশি হয়। আজ এই শোকের দিনেও হল। নিজের চেয়ারে মিনিট দুয়েক নিস্তর্র হয়ে বসে রইল সে। তারপর ব্রিফকেস খুলে কিছু জরুরী কাগজপত্র ফাইলে রেখে ডসন নামে তার ওপরওয়ালা সাহেবকে একটা ফোন করল। না, লম্বা ছুটি চাইল না সে। শুধু আজকের দিনটা। শ্রাদ্ধ আর ঘাট-কাজের জন্য আরও দুদিন নেবে সেটাও জানিয়ে রাখল।

ডসন তার অদ্ভুত গভীর কণ্ঠস্বরে মার্কিন উচ্চারণে বলল, ইটস ওকে। আই সিমপ্যাথাইজ।

ফোন করার পরও কিছুক্ষণ বসে থাকে দীপনাথ। সে এত স্বাভাবিক কেন তা বুঝতে পারছিল না। সে তো আলাবেয়ার কামুর নিস্পহ নায়ক নয়। ভেতো ভাবপ্রবণ বাঙালী। সত্য বটে, সে মানুষ হয়েছে পিসির কাছে, বাবার সঙ্গে ঘনিষ্ঠতা ছিল না, তবু বাবা তো! বুলুর মতো সে কেন কেঁদে উঠছে না?

নিজের জন্য নিজের কাছেই লজ্জা করছিল তার। অ্যাসিস্ট্যান্টকে ডেকে কাজকর্মের কিছু পরামর্শও দিল সে। খুবই স্বাভাবিকভাবে। বাবার মৃত্যু সংবাদটা সে অবশ্য প্রচার করল না।

বাইরে এসে দেখে, বুলু বসে সিগারেট ফুকছে। তাকে দেখেই তটস্থ হয়ে পেতলের স্ট্যাণ্ডওয়ালা ডাবরের মতো মস্ত অ্যাশট্রেতে সেটা ফেলে উঠে দাঁড়াল।

দীপনাথ শোক টের পাচ্ছে না ঠিকই। কিন্তু চারদিকে খাঁ খাঁ ভাবটা রয়েছে এখনো। ট্যাকসিতে বসেও সেটা টের পাচ্ছিল। ভীষণ বৃষ্টি গেছে কদিন। উজ্জ্বল রোদ। ভাপসা গরম। বুলুর গা থেকে কোরা কাপড়ের গা-গোলানো গন্ধ আসছে। বাবা নেই। প্রীতমও আর একভাবে নেই। মণিদীপাকে সে নিজেই দূরের মানুষ করে দিয়েছে। এই তো ভাল দীপনাথ! আস্তে আস্তে ঝরে যাচ্ছে পাতা। রিক্ত হয়ে যাচ্ছে। এবার একদিন পাহাড়ের দিকে মুখ ঘোরাবে। তারপর চলতে থাকবে। পর্বতের তো মৃত্যু নেই। নিরুদ্ধেশও হয় না।

বুলুর দু-ঘরের বাসটা খুবই ছোটো। ভারী ঘিঞ্জি। বাইরের ঘরে একটা চৌকির ওপর শ্রীনাথ বসে আছে। চেহারাটা ভেঙেচুরে বিচ্ছিন্ন হয়েছে। ফর্সা গালে কাঁচা পাকা দাঁড়ি। চোখের কোলে জল ছিলই, দীপনাথকে দেখে 'বাবা নেই রে' বলে ডুকরে কেঁদে উঠল। বুলু চাপা গলায় বলে, মেজদা খুব ভেঙে পড়েছে। গত তিনদিন ধরে এখানেই আছে। সমানে কাঁদছে।

বউদি আসেনি ?

প্রথম দিন খবর পেয়ে এসেছিল।

দীপনাথ জুতো ছাড়ল, তারপর গিয়ে শ্রীনাথের পাশে বসে গায়ে হাত রেখে বলে, কেঁদো না। কান্নার কী আছে! বুড়ো বয়সে বেঁচে থাকাও তো কষ্টের।

এই বলতে বলতেই দীপনাথের চোখে জল এসে গেল। এইটুকুর ভারী দরকার ছিল,

নইলে 'ওরা' ভাবত, দীপনাথ বাবার জন্য দুঃখ পায়নি। চোখের জলটা সে ক্রমালে মুছল না। সবাই দেখুক।

কিন্তু কঁদতে কঁদতেও দীপনাথের যুক্তিবাদী মনে প্রশ্ন আসে। মেজদা শ্রীনাথ কি বাবাকে এতই ভালবাসত! কই, কখনো তো মনে হয়নি। বরং নিজের বাবা সম্পর্কে শ্রীনাথের ছিল নিষ্ঠুর উদাসীনতা। তবে এই কান্না আসছে কোথা থেকে? কেন এত শোক?

আসলে দুর্বলচিত্তরা অন্যের দুর্দশা, ব্যথা বা মৃত্যু দেখে নিজের দুর্দশা, ব্যথা বা মৃত্যুর ভয়ে ভেঙে পড়ে, কেঁদে আকুল হয়। এর সঙ্গে শোক বা ভালবাসার সম্পর্কই নেই। সবটাই আত্মকেন্দ্রিক।

কঁদতে কঁদতে হিক্কার মতো অদ্ভুত শব্দ করছিল শ্রীনাথ। মাঝে মাঝে 'বাবা, বাবা গো' বলে আর্তনাদ। একবার মনে হল শ্বাস বন্ধ হয়ে যাবে বুঝি!

শমিতাকে খুব ভাল করে কখনো লক্ষ করেনি দীপনাথ। দেখাও হয়েছে কম। বেশ টান টান শ্যামলা।

এই রকম একটা সংকট সময়ে শমিতা একটা ছবি আঁকা টিনের ট্রেতে চা নিয়ে এল। কিশোরী চেহারা। মুখটার মধ্যে শ্রী আছে বটে, তবে বড্ড রোখা-চোখা মনে হয়। বুদ্ধি রাখে, কিন্তু হয়তো সবটাই সংবুদ্ধি নয়। দীপনাথ শুনেছে এই মেয়েটাই নেপথ্যে থেকে সোমনাথকে পরিচালনা করে। মেয়েটির মুখচোখ দেখে কথটা অবিশ্বাস্য মনে হয় না। মেজবউদির সঙ্গে এদের তুলল আড়াআড়ি। কিন্তু দীপনাথ বুঝল, শমিতা যতই চালাক চতুর হোক, মেজবউদির সঙ্গে পাল্লায় কিছুই নয়। বুদ্ধি ছাড়াও মেজবউদির আর যে জিনিসটা আছে তা হল প্রবল ব্যক্তিত্ব। তা শমিতা কোথায় পাবে?

শমিতা ভারী যত্নে চা হাতে তুলে দিল। মাথায় ঘোমটাটি ঠিক মতোই টানা। ট্রেটা একটা টেবিলে রেখে আঁচলে মুখ ঢেকে একটু কঁদল। এই কান্নাটাকে খুব ফাঁকি বলে মনে হল না দীপনাথের। বাবা তো এরই হেফাজতে ছিল বহু দিন। বেড়াল পুষলেও মায়া হয়, দাননাথের মতো ঝামেলাহীন সাদামাটা মানুষের ওপর মায়া পড়তেই পারে।

কিন্তু এই সব কান্নাকাটি আর সহ্য হচ্ছিল না দীপনাথের। সংসার থেকে দূরে সরে থাকায় এইসব শোকদুঃখের সঙ্গে তার বেশী পরিচয় নেই। ভারী অস্বস্তিকর। গরম চায়ে তাড়াতাড়ি চুমুক দিতে দিতে সে বলল, শমিতা, আমি স্নান করব। তোমাদের বাথরুমে জল আছে?

আছে। সব ব্যবস্থা করে দিচ্ছি।

আর কোরা কাপড় চাই। কাছাকাছি দোকান-টোকান থাকলে বুলু বরং গিয়ে কিনে আনুক। টাকা দিচ্ছি।

বুলু বলল, ঘরের কাছেই দোকান।

দীপনাথ একশ টাকার নোট বের করে দিয়ে বলল, কী কী লাগে জানি না। সব আনিস। আর বিলুকে খবর দেওয়া হয়েছে তো?

হয়েছে। বিলু আসে প্রায় বোজাই।

শ্রদ্ধ কোথায় হবে?

বুলু কাঁচুমাচু মুখ করে বলল, আমার অবস্থা তো জানো। আমি কালীঘাটেই করব ভাবছিলাম।

আলাদা করবি?

বলু একটু হতচকিত হয়ে অসহায় গলায় বলে, একসঙ্গে করার কথা কেউ তো বলেনি।
দীপনাথ একটু বিরক্ত হয়ে বলে, এই তো আমিই বলছি।

তুমি বলছ! বলে চোখে প্রশ্ন নিয়ে তাকিয়ে থাকে বলু।

শ্রীনাথ কান্না সামলে ধরা ভাঙা গলায় বলে, রতনপুরে যদি সবাই মিলে করি? বলুর কি
আপত্তি হবে?

বলু ক্ষীণ একটু হাসির চেষ্টা করে বলে, তুমি বরং বউদির মতটা নাও। আমি গরীব
মানুষ, তার ওপর তোমাদের ছোটো, যা বলবে তাই করব।

অত লক্ষ্মী ছেলে অবশ্য বলু নয়। তবু সে মত দেওয়ায় খুশি হল দীপনাথ। কিন্তু বলু
একটু চুপ করে থেকে আর একটি যে কথা বলল তাতে খুশিটা কেটে গেল।

শমিতার দিকে একবার চেয়ে নবম গলাতেই বলু বলল, রতনপুর তো আমাদের
সকলেরই জায়গা। বাবারও খুব ইচ্ছে ছিল, সবাই মিলে সেখানে গিয়ে থাকি।

দীপনাথ গভীর মুখে স্নান কবতে গেল। ফিরে এসে ধড়া পড়ল। আসন পেতে বিছানায়
বসল শ্রীনাথের পাশে। কিছুই আর করার নেই।

শমিতা এসে জিজ্ঞেস করে, সেজদা কি ভাত খেয়ে বেরিয়েছেন?

না। শুধু ব্রেকফাস্ট। দুপুরে অফিসেই খাওয়াব কথা।

তা হলে সকলের জন্যই হরিষা চাপিয়ে দিই।

দীপনাথ মাথা নেড়ে বলল, না। আমার খেতে ইচ্ছে করছে না।

তা হলে ফল কেটে দিই।

পরে দিও।

স্নান করে এলেন, এখন তা হলে একটু কফি খান।

দীপনাথের এত আপ্যায়ন ভাল লাগছিল না। উদাস গলায় বলল, দাও।

কফি খাওয়াব সময় বলু কথাটা তুলল, সেজদা, তুমি তো একসঙ্গে কাজ করার কথা
বললে। কিন্তু কাব কি রকম শেয়াব হবে, কাজই বা কেমন করা হবে সে সব তো জানা
দরকার। আমার অবস্থা তো জানোই।

দীপনাথ খুবই বিরক্ত বোধ করল। কিন্তু নিজের ওপর তার শক্ত নিয়ন্ত্রণ আছে বলেই
রাগ দেখাল না। শান্ত স্বরে বলল, বাবার খবরটা এইমাত্র পেয়েছি, এখনই ওসব কথা
ভাবতে ভাল লাগছে না। পরে বলিস। খরচের জন্য ভাবনা নেই। বাবার জন্য তো আমি
তেমন কিছু করিনি।

এ কথায় বলুর শোকাভূত মুখেও কিছু উজ্জ্বলতা ফুটল।

শমিতা বলল, সেজদা তো মেসে থাকেন। সেখানে এ সব নিয়ম পালনের অসুবিধা।
আমি বলি, এই কটা দিন আপনি এখানেই থাকুন।

দীপনাথ মাথা নেড়ে বলল, না। রতনপুরেই যদি বাবার কাজ করতে হয় তবে আমাদের
সকলেরই রতনপুরে চলে যাওয়া দরকার আজই।

বলু বলে, কিন্তু বউদির মতামত?

বউদি অমত করবে না। বরং খুশি হবে।

এ কথায় শমিতা বা বলু খুব সন্তুষ্ট হল না। নিজেদের মধ্যে একটা তাকাতাকি করে চুপ
করে রইল।

সংসারের এই সব পরস্পর-বিমুখ চোঁরাশ্রোত থেকে সরে থাকবার জন্যই দীপনাথ
সারাটা দুপুর পড়ে ঘুমলো। ঘুমটার খুবই দরকার ছিল তার।...

তার শ্রদ্ধা যে এত ঘটা কবে হবে তা লোভ হয় দীননাথ সঙ্গেও ভাবেনি। দীপনাথ আর তৃষা মিলে খুব কম করেও হাজার দশেক টাকা খরচ কবেছে। 'বলু' শ' দুই টাকা দিতে চেয়েছিল, নেয়নি। বাচ্চা ষাঁড় থেকে শুক কনে খাট বিছানা ছাতা লাঠি কিছুই বাদ রইল না দানসামগ্রীতে। অন্তত সাতশ লোক নিমন্ত্রিত ছিল। দীননাথের ভাগা ভালই যে, আজ বৃষ্টিও হয়নি। সন্জের কিছু পবে ফুটফুটে জ্যোৎস্নাও উঠেছে।

অনেক বাতে ক্লাস্ত তিন ভাই আব বিলু ভাবন-ঘরে বসেছে। বহুকাল বাদে চার ভাই-বোনে এই এক হওয়া। বিলু স্বভাবতই গম্ভীর, অথবা গম্ভীর হওয়াব চেষ্টা করছে। কিন্তু দীপনাথের মনে হয়, প্রীতম নিকৃদ্দেশ হওয়ায় যতটা দুর্ভাবনা বা উদ্বেগ থাকার কথা ছিল বিলুব ততটা নেই। অফিস করছে, অকণ্ঠে সঙ্গে ঘনিষ্ঠ সম্পর্ক বেখে চলছে। শুধু লোকের সামনে একটা গম্ভীরের মুখোশ এটে নেয় মাত্র।

ছোটো ভাই বলু অনেক সুযোগ খোঁজার পর এই প্রায় রাত বারোটোর কাছাকাছি সময়ে সুযোগ পেয়ে বলছিল, দাদার সম্পত্তি দাবি করে আমি হয়তো ঠিক কাজ করিনি। বউদির কাছে মাপ চাইতেও রাজি আছি। কিন্তু আমার অবস্থার কথা বিবেচনা করে যদি তোমরা সবাই মিলে একটা অংশ আমাকে দেওয়ার ব্যবস্থা করো তা হলে আমাব খুব উপকার হবে।

দীপনাথ এই ব্যবস্থার ঘোর বিবোধী। সে মাথা নেড়ে বলে, তোর যখন যা দরকার আমাদের কাছে বলিস। সাধ্য মতো মেটানোর চেষ্টা করব। কিন্তু দাদার সম্পত্তির অংশ চাস কেন? দাদা যাকে ভাল বুঝেছে তাকে দিয়ে গেছে। এর ওপর আমাদের কোনো দাবি খাটে না।

দাবি করছি না তো। আব সব সময়ে তোমাদের গিয়ে ডিস্টার্ব কবাও কি ভাল? মানুষ বিবস্ত্র হয়, খুশি মনে দেয় না। সে মাঘের পেটের ভাই হলেই কি।

এ সব কথায় শ্রীনাথ বা বিলু যোগ দিচ্ছে না। চুপ কবে বসে আছে।

দীপনাথ জিজ্ঞেস করে, তুই কী চাস? তোরা তো অল্প বয়সের দুটি স্বামী-স্ত্রী, বাচ্চাকাচ্চাও নেই, এখনই তোর এত অভাব কেন?

অভাব হলে কী করব বল? বড়দা বেঁচে থাকতে আমাকে একবার বলেছিল, তুই রতনপুরে এসে থাক। তখন বিয়ে করিনি। ভাবলাম, গায়ে এসে থাকার মানেই হয় না। কিন্তু যদি থাকতাম তা হলে এই গোটা বিষয়সম্পত্তি আমারই হত।

দীপনাথ জানে, মল্লিনাথ বোকা ছিল না। সে আর যাকেই হোক কিছুতেই বলুকে এই সম্পত্তি লিখে দিয়ে যেত না। তবে কথটা বলল না দীপনাথ। ঘুরিয়েই বলল, তা যখন দিয়ে যায়নি তখন নিজের ভাগ্যকে মেনে নেওয়াই তো পুরুষের কাজ।

বলু তবু ঘ্যান ঘ্যান করতে থাকে, আমি বেশী কিছু চাই না। বিয়ে দশেক ধানী জমি, একটু বাস্তজমি আর কয়েক হাজার টাকা। তা হলেই আমার হয়ে যাবে।

দীপনাথ একটু হেসে বলে, সেটাই কি এই বাজারে কিছু কম?

দাদার সম্পত্তির তুলনায় কিছুই নয়। এটুকু বউদি অনায়াসে ছাড়তে পারে।

দীপনাথ ধীরে ধীরে রেগে উঠছিল। সে হয়তো এ কথার একটা কড়া জবাব দিত। কিন্তু ঠিক এই সময়ে বাইরে একটা চোঁচামেচি শোনা গেল। সেই সঙ্গে খুব দৌঁড়াদৌঁড়ি।

পুরোনো ইস্কুলবাড়ির দিকে তৃষা যে তিনতলা বাড়িটা তুলছে সেই দিকেই টর্চ আর লম্ফের আলো দেখা যাচ্ছে অনেক। খুব ভীড়ও।

পুরোনো ইস্কুলবাড়ির কাছেই মল্লিনাথ একটা তিনতলা বাড়ির ভিত গেঁথে রেখেছিল। বর্ডাটা করে যেতে পারেনি। প্ল্যান স্যাংশন করাই ছিল। ক্রমে সেটা আগাছায় ঢেকে যায়

আর লোকে ভুলেও যায় সে কথা । ভোলেনি তৃষা । আচমকা সেই বন্যার পরই সে জঙ্গল সাফ করিয়ে খুব তাড়াতাড়ি বাড়ির কাজ শুরু করে দেয় । তিনতলা পর্যন্ত ছাদ ঢালাই হয়ে গেছে । এখন পলেক্তারা পড়বে, দরজা জানালা বসবে, মেঝেয় টালি পাতা হবে । অনেক কাজ বাকি । জ্যোৎস্নারাতে সেই অতিকায় অন্ধকার কাঠামোটা দাঁড়িয়ে থাকে পোড়ো বাড়ির মতো ।

পরশু এখানে আসার পর থেকেই এই অসমাপ্ত বাড়িটা সম্পর্কে অসীম কৌতূহল শমিতার । বহুবাব সে এসে ঘুরঘুর করে বাড়িটা দেখে । প্রতি তলায় তিনখানা করে শোওয়ার ঘর, ডাইনিং, ড্রয়িং, দুটো কবে বাথরুম । একদম কলকাতার বডলোকদের ফ্ল্যাটবাড়ির মতো বাবস্থা । কত টাকা যে খরচ হচ্ছে ।

নিতাই স্ক্যাপা আবাব তার মধোই ইন্ধন জুগিয়ে এক ফাঁকে চুপি চুপি বলে গেল, ওই বাড়ির ভিতের নিচেই যে মল্লিবাবুর মেলা টাকা পোতা ছিল ' বউদিমাণি মাটি খুঁড়ে টাকা বের করেছে ।

খুব বিশ্বাস না হলেও শমিতা জিজ্ঞেস করল, কত টাকা ?

পাঁচ লাখ শুনেছি । মস্ত কাঠের বাগ্ন ভবা ।

হতেও পারে । জমির দাম না ধরলেও এত বড় একটা বাড়ি করতে যে অনেক টাকার দরকার তা শমিতা জানে । এত সুন্দর ডিজাইন, এত ভাল প্ল্যানিং-এর বাড়িও বড় একটা দেখা যায় না । কাজ শেষ হলে বাড়িটা দেখতে হবে স্বপ্নের মতো ।

এ-বাড়ির তারা দুটি মাত্র বউ । এই সম্পত্তি তাদের কারো স্বামীই অর্জন করেনি । মুফতে সম্পত্তিটা হাতিয়ে নিয়েছে মেজো জন । শমিতার সারা গা জ্বলে যায় । মাটির নীচে থেকে যদি সত্যিই এত টাকা পেয়ে থাকে তবে সেটা আরো একটা জ্বলুনির কারণ ।

কাজের বাড়ির ভিড় পাতলা হওয়ার পর আবাব কৌতূহলবশে হাঁটতে হাঁটতে জ্যোৎস্নায় এই স্বপ্নের বাড়িটার কাছে চলে এসেছিল শমিতা । এই রকম একটা বাড়ি যদি তার হত ।

জ্যোৎস্নায় খোয়া বাড়িটার চারদিকে বালি, পাথরের স্তুপ, ইটের পাজা, বাঁশ, কাঠ । তার মধ্যে দাঁড়িয়ে বাড়িটার দিকে মোহাচ্ছন্ন দৃষ্টিতে চেয়ে ছিল সে ।

এই সময় হঠাৎ সে দেখতে পেল, তিনতলাব আলসের ওপর কে যেন দাঁড়িয়ে আছে । কে ? খুবই স্পষ্ট জ্যোৎস্না পড়েছে তার মুখে । তার চেয়েও বড় কথা, লোকটা মস্ত লম্বা, বিশাল চওড়া । পরনে সাদা পাজামা, বড় কুলের পাজাণি, বাবরি চুল ।

প্রথমে বোবা হয়ে গিয়েছিল শমিতা । তারপর এক বিকট বিকারের গলায় চৈচিয়ে উঠল, ভূত ! ভূত ! ভূত !

॥ উনআশি ॥

শমিতা চিৎকার করেই অজ্ঞান হয়ে পড়ে গিয়েছিল । লোকজন যখন এসে তাকে তুলল, তখন দাঁতে দাঁত লেগে গেছে, দু'হাতে শক্ত মুঠো, গৌ গৌ আওয়াজ বেরোচ্ছে গলা থেকে ।

'ভূত ! ভূত !' চিৎকারটা শুনেছিল অনেকেই । কিন্তু কী দেখে ভয় পেয়েছে তা কেউ বুঝতে পারছিল না ।

চামচের উল্টো দিক চুকিয়ে শমিতার দাঁত আলগা করে দিল বৃন্দা । গরম লোহার ছাঁকা দেওয়া নুন খাওয়ানো হল । জলের ঝাপটা চলছিলই ।

সকলেই উদ্বিগ্ন। কিন্তু সোমনাথ ক্রুদ্ধ। সে বার বার সেজদার কাছে মৃদুস্বরে নালিশ করছে, কনস্পিরেসি ! ওকে কেউ ভয় দেখিয়েছে। আমি এর শোধ নেবো সেজদা।

মিনিট পনেরো কুড়ির মধ্যেই চোখ খুলল শমিতা। তবে চোখের দৃষ্টি বোবা, শূন্য। প্রকৃত চেতনা ফিরতে আরো অনেকটা সময় নিল সে।

সোমনাথ যত আস্তেই বলুক তার কথাগুলো কানে গেছে তুষার। তার মুখ থমথমে। শমিতাকে প্রথম প্রশ্ন করল সে-ই, কাকে দেখেছিলি বল তো ছুটকি ঠিক করে ? কী হয়েছিল ?

শমিতা একটু শিউরে উঠে চোখ বুজল। তারপর চোখ খুলে বলল, নতুন বাড়ির আলসেয় বড়দা দাঁড়িয়েছিলেন।

বড়দা ?

পায়জামা-পাঞ্জাবি পবা। খুব লম্বা-চওড়া। বাবরি চুল।

স্পষ্ট দেখলি ?

একদম স্পষ্ট।

তুষা কাউকে কিছু বলল না। নিঃশব্দে গিয়ে নিজের বড় টর্চটা নিয়ে বেরিয়ে পড়ল। নতুন বাড়ির ভিতরে পাতলা অন্ধকার। তুষা টর্চটা জ্বালল না। নিঃশব্দে সিঁড়ি বেয়ে ওপরে উঠতে থাকে। এ-বাড়িতে এককাল থেকেও সে কোনদিন মল্লিনাথের ভূতকে দেখেনি। শমিতা ভাগ্যবতী, তাই দেখেছে। তবে ভূত নয়।

ছাদ পর্যন্ত উঠতে দমে টান পড়ল তুষার, সিঁড়ির চাতালে দাঁড়িয়ে একটু দম নিল সে। ছাদের একধারে জলের ট্যাংক সদা বসানো হয়েছে। বেশ বড় ট্যাংক।

তুষা নিঃশব্দে এগিয়ে যায়। তার বুকটা সামান্য দুরদূর করে। সে তো জানে কে আছে আড়ালে। এই পৃথিবীতে একমাত্র একজনেরই মুখোমুখি হতে সে অস্বস্তি বোধ করে।

ডাকতে হল না। তুষার নিঃশব্দ উপস্থিতি টের পেয়েই জ্যোৎস্নায় অকপটে বেবিয়ে এসে ভূতটা দাঁড়ায়। জ্যোৎস্নাতে তাকে আজ মল্লিনাথ বলে ভুল কবতে ইচ্ছে হল তুষারও।

তুষা কিছু বলার আগেই সজল বলল, আমি কি করে জানব যে কাকীমা ওরকম ভয় পাবে ?

তুই এখানে কী করছিলি ?

হাওয়া খাচ্ছিলাম।

তুষা জ্যোৎস্নায় তাব সামনেব বিভ্রমেব দিকে চেয়েছিল। মল্লিনাথ যেন রূপ ধবে সামনে দাঁড়িয়ে আছে। সে মা, তবু তার চোখেও ধাঁধা লেগে যায়।

তুষা একটু তেতো গলায় বলে, তোর হঠাৎ পায়জামা-পাঞ্জাবি পরার শখ হল কেন ? বাঃ, এখন লম্বা হয়েছি না ! হাফ প্যান্ট পরলে সবাই স্ক্যাপায়।

কথাটা ঠিক।

তুষা মৃদুস্বরে বলল, আস্তে করে নেমে যা। সকলের চোখের সামনে যাওয়ার দরকার নেই। বিপ্লবীদের বাসায় গিয়ে পোশাক পাল্টে শুয়ে থাক।

সজল একটু মাথা উঁচু করে তেজী গলায় বলল, লুকোচুরির কী আছে ? আমি তো কোনো খারাপ কাজ করিনি !

তুষা তেতো গলায় বলে, খারাপ কাজ করিসনি তো কাকীমা যখন চৈতন্যে অজ্ঞান হয়ে গেল তখন নেমে গিয়ে ধরিসনি কেন ?

আমি বুঝতে পারিনি যে, কাকীমা আমাকে দেখে ভয় পেয়েছে। আমি বরং চৈতন্যে চিৎকার করেছিলাম।

শুনে চারদিকে ভূতটাকে খঁজলাম।

কথাটা পুরো সত্যি নয়, তৃষা জানে। তবে সে তর্ক না করে শুধু বলল, তবু এখন লোকের সামনে না যাওয়াই ভাল। সোমনাথের সন্দেহ, ছুটকিকে ইচ্ছে করে ভয় দেখানো হয়েছে।

সিঁড়িতে পায়ের শব্দ হচ্ছিল। কথার আওয়াজ। একাধিক লোক ছাদে তদন্ত করতে আসছে।

তৃষা ছেলের দিকে চেয়ে বলল, কী কববি?

বিরক্ত গলায় সজল বলে, যাচ্ছি।

তারপরই অত্যন্ত লম্বা অভ্যন্ত হাতে-পায়ে সে ছাদের পিছন দিকের বাঁশের ভারা বেয়ে চোখের পলকে নেমে হাওয়া হয়ে গেল। তৃষা ন্যাড়া ছাদটার পাশে গিয়ে উঁকি মেরে নিশ্চিত হয়। তারপর টর্চ জ্বেলে চাবদিকে দু-তিনটে সিগারেটের অবশিষ্ট টুকরো কুড়িয়ে নিয়ে ফেলে দেয়।

দীপনাথ আর সোমনাথ ছাদে এসে দাঁড়ায়।

দীপনাথ বলে, সাহস বটে তোমার। এইমাত্র একজন ভূতের ভয় পেল যেখানে সেখানে তুমি একা এলে কোন সাহসে?

তৃষা গম্ভীর মুখ করে বলে, আমবা তো গাঁয়ের লোক, অত ভয় থাকলে আমাদের চলে না।

সোমনাথ জিজ্ঞেস করে, কাউকে দেখলে?

তৃষা একটা দীর্ঘশ্বাস ছেড়ে বলে, ছুটকিটা ভুল দেখেছে।

সোমনাথ একটু রাগের গলায় বলে, ভুল তো বটেই। তবে দেখেছে না দেখানো হয়েছে সেইটাই প্রশ্ন।

গত দুদিন ধরে সোমনাথ আর শমিতা এ বাড়িতে আছে বটে, কিন্তু তারা এখনো সজলকে দেখেনি, তৃষা জানে। পরীক্ষার পড়ার ক্ষতি হবে বলে শ্রাদ্ধের তিন-চারদিন আগেই সজল গিয়ে তার বন্ধু বিল্টুদের বাড়ি উঠেছে। সজল বেশী লোকজন সহ্য করতে পারে না। তাই কদিন বাড়ি মুখে হয়নি। কী খেয়ালে আজ হঠাৎ যে চুপি চুপি এসে ছাদে উঠেছিল। সিগারেট খেতেই কি? ছোট্ট সজল যে খোলস ছেড়ে কতটা অন্য রকম হয়েছে তা দেখে তৃষাই চমকে যায়, শমিতা বা সোমনাথ তো যাবেই। কিন্তু সজলের কথাটা এখন ভাঙারও মানে হয় না।

তৃষা মৃদুস্বরে বলল, ছুটকিকে কে ভয় দেখাতে যাবে বলো তো? তুমি সব সময়ে অন্য রকম ভাবো কেন? স্বাভাবিক কিছু ভাবতে পারো না?

সোমনাথ তৃষার গলার স্বরে মৃদু ইম্পাতের স্পর্শ টের পেল ঠিকই। সেই মারের স্মৃতি সে ভুলে যায়নি। এখানে বউদির লোক তাকে মেরে পুতে ফেলালেও কেউ কিছু করতে পারবে না। সোমনাথ সামলে গেল।

দীপনাথ চারদিকটা ঘুরে ঘুরে দেখছিল। হঠাৎ বলল, যেই হোক, এই সন্ধ্যা কার্নিশের ধারে তার দাঁড়িয়ে থাকাটা খুবই দুঃসাহসের কাজ।

কথাটার মানে সোমনাথ বুঝল না। তৃষা বুঝল।

দীপনাথ কি যেন একটা কুড়িয়ে নীচে ছুঁড়ে ফেলে দিল। তারপর বলল, না, কেউ ছিল বলে মনে হয় না। শমিতা উপোস-টুপোস করে দুর্বল হয়ে পড়েছে। ভুলই দেখেছে। জ্যোৎস্নার আলোয় নানা রকম দেখা যায়।

তিনজন নেমে এল আস্তে আস্তে ।

সোমনাথ তার ঘরে চলে গেল । দীপনাথ একটু পিছিয়ে তুষার দিকে চেয়ে একটু রাগের গলায় বলল, ওকে ওরকম কার্নিশের ধারে দাঁড়াতে বারণ কোরো । পড়ে গেলে কী হত ?

তুষা বলে, বারণ শোনে নাকি ?

কোন বাড়িতে গিয়ে পালিয়ে আছে যেন ?

বিন্টুদের বাড়ি । কাছেই ।

বলু আর শমিতা কাল চলে যাবে । তাব আগে যেন এ-বাড়িতে না আসে, খবর পাঠিয়ে দিও ।

দেবো ।

সিগারেট খায় নাকি ?

তাই তো দেখছি ।

একটা টুকরো কুড়িয়ে পেলাম কার্নিশের ধারে ।

আমিও পেয়েছি ।

এ কথার পর দুজনেই পরস্পরের দিকে চেয়ে হেসে ফেলে ।

দীপনাথ হাসতে হাসতেই ডাইনে বাঁয়ে মাথা নেড়ে বলে, আজকালকাব ছেলে । যাই হোক, ওকে বোলো এই বয়সে সিগারেট ধরলে আর বস্ত্রার বা কুং-ফু মাস্টার হওয়ার আশা নেই । এ কথাটা বললে কাজ হবে ।

তুষা বলল, তার চেয়ে বেশী কাজ হবে বডকাকা বারণ করে গেছে বললে ।

তবে তাই বোলো ।

তুষা আচমকাই বলে, আমেরিক্য কবে যাচ্ছে ?

খুব শিগগির । হয়তো সামনের মাসে ।

ছ' মাস থুকবে ?

তাই কথা আছে । তবে বেশী দিনও থাকতে হতে পারে ।

চিরদিনের জন্য থেকে যাবে না তো ?

থাকলে দোষ কি ? আমার তো পিছুটান নেই ।

তোমার নেই জানি । তোমার মায়া-মমতাও বড কম । কিন্তু আমাদের তো তা নয় । তুমি গেলে আমার মনটা ভারী খারাপ হবে ।

জানি বউদি । বলে দীপনাথ হঠাৎ একদম চুপ হয়ে গেল ।

মাঝরাতে সোমনাথের ঘরে আবার হানা দিল ভূত ।

মাথা গরম ছিল বলে সোমনাথের ঘুম গাঢ় হচ্ছিল না । মাঝে মাঝে জেগে উঠে জল আর সিগারেট ধরায় । আবার খানিকক্ষণ বিমুনির মতো আসে । তুষার অন্যান্য বিষয়সম্পত্তি, শমিতার ভূত দেখা থেকে শুরু করে অতীতের সব স্মৃতি তাকে বড় জ্বালাচ্ছিল ।

মাঝরাতে যখন বেশ লম্বা একটা বিমুনি এসেছে তখনই সে মৃদু ডাক শুনল, বলু ! এই বলু !

চটকা ভেঙে চাইল সে । অবিকল বড়দার গলার স্বর । অবিকল । শিয়রের জানালায় শেষ রাতের একটু অবশিষ্ট জ্যোৎস্না ছিল । চোখ গেল সেদিকেই ।

পাঞ্জাবি পুরা বড়দা দাঁড়িয়ে আছে । মুখটা ছাইয়ের মতো সাদা ।

সোমনাথ কাঠের মতো শক্ত হয়ে গেল ভয়ে । এমন কি চোখেব পাতটা পর্যন্ত ফেলতে পাবল না । সারা গায়ে কঁটা দিয়ে উঠল ।

বড়দা বলল, দাবি ছাড়িস না । এই সম্পত্তিতে তোরও অধিকার ।

ব্যস, তারপরই বড়দা মিলিয়ে গেল জ্যোৎস্নায় ।

যখন মিনিট দশেক পর সে শমিতাকে ডেকে তুলল তখন তার কথাবার্তা অসংলগ্ন । চোখ অস্বাভাবিক ।

স্বামী-স্ত্রী বাকি রাতটা আর ঘুমোলো না । বাতি জ্বলে পরস্পর গা ঘেঁষে বসে রইল ।

সোমনাথ বলল, বড়দা আজ আমাদের দুজনকেই দেখা দিয়েছে ।

শমিতা বড় অবাক এখনো । বলে, কেন বলো তো ? আমার ভীষণ ভয় করছে ।

বড়দা দাবি ছাড়তে বারণ করে গেল ।

সে তো বুঝলাম । কিন্তু এখন আমরা কী করব ? দিদির হাতে যে অনেক গুণা ।

তা হোক । বড়দা যখন বলে গেছে তখন আমরা একদিন না একদিন সম্পত্তি পাবোই ।

সকাল হতেই সোমনাথ সবিস্তারে রাতের ঘটনা জনে জনে রটিয়ে বেড়াতে থাকে । কিন্তু বলতে বলতেও সে বুঝতে পারে, কথাটা কেউ খুব একটা বিশ্বাস করছে না ।

সকালের চায়ের আসরে ঘটনাটা শোনার পর দীপনাথ একটু হেসে বলল, বড়দা যে কেন তোদের দুজনকেই সম্পত্তির দাবি ছাড়তে বারণ করল সেটাই তো বুঝছি না । ভাইয়ের সম্পত্তিতে যদি ভাইয়ের দাবি থাকে তবে আমিও তো বাদ যাই না ।

তোমার তো দরকার নেই সেজদা । তুমি চার হাজার টাকা মাইনে পাও ।

মাইনের সঙ্গে দাবির কী সম্পর্ক ত বুঝল না দীপনাথ । তবে আড়ালে গিয়ে তৃষাকে বলল, সজলটা বড্ড বাড়াবাড়ি করছে । ওর সঙ্গে একটু কথা বলা দরকার ।

পরে বোলো । ওরা চলে যাক ।

আমাকেও যে সকালের গাড়িতেই যেতে হবে । ছুটি নেই ।

রবিবারেও কাজ ?

আমাকে রবিবারেও যেতে হয় ।

দেবী করে যেও । আমি সকালে ওর কাছে গিয়েছিলাম । মুখে গুচ্ছের পাউডার মেখে সাদা করেছিল রাতে । সেই পাউডার তখনো লেগে আছে ।

কী বলল ?

কিছু না । কোনো জবাব দিল না ।

ও 'কি সোমনাথকে তোমার বিরুদ্ধে লাগিয়ে দিতে চায় ?

তৃষা একটা দীর্ঘশ্বাস ফেলে বলে, বোধ হয় তাই ।

কেন বলো তো বউদি ?

তৃষা এক অদ্ভুত ক্লান্ত চোখে দীপনাথের দিকে চেয়ে বলল, তোমাকে অনেকদিন আগেই তো বলেছি, আমার আপনজনেরা কেউই আমার বন্ধু নয় । তার মধ্যে ছেলোটো আরো বেশী শত্রু । আমি মরলে ও খুশি হয় ।

দীপনাথ একথার জবাব দিল না । চেয়ে রইল ।

আমেরিকা যাচ্ছে যাও । এসব নিয়ে চিন্তা করো না । আমারই পাপের শাস্তি । একদিন হয়তো খবর পাবে, বউদি নেই ।

সেক্টিমেন্টাল হয়ে যাচ্ছে বউদি ।

না গো । আমি অত সহজে ভেসে যাই না । সহজে ভেসে যাবোও না ।

আমি সজলের সঙ্গে একটু কথা বলতে চাই। কিন্তুদের বাড়ি কোন দিকে ?
সঙ্গে লোক দিয়ে দিচ্ছি। কিন্তু গিয়ে লাভ হবে না। এতক্ষণে হয়তো বাসা থেকে
বেরিয়েই গেছে।

সজলকে তুমি সামলাতে পারছো না, না বউদি ?

না। এই একটি জায়গায় আমি হেরে যাচ্ছি।

ও একটু ওয়াইল্ড। কিন্তু ওর মধ্যে জিনিস আছে।

সে তোমরাই বুঝবে।

হি হ্যাজ পারসোনালিটি।

হবে বোধহয়।

দীপনাথ একটু হাসল। আর কিছু বলল না। সাত-পাঁচ ভেবে সে কিন্তুদের বাড়িতেও
হানা দিল না। দুনিয়ার সব বিবাদই যে অশুভ এমন নয়। হঠাৎ তার মনে হল আজ, এই
যে বউদির সঙ্গে সজলের অ-বনিবনা এর মধ্যেও একটা অস্তিত্বাচক কিছু আছে।
একনায়কতন্ত্রের বিস্তার ঠেকাতে যেমন শক্ত বিরোধীদের দরকার হয়। এও হয়তো তাই।
‘তুষার “পাপের শাস্তি” কথাটা সারাক্ষণ কানে লেগে আছে দীপনাথের। পাপ ! কিরকম
পাপ ? পাপ বলতে কি মল্লিনাথের সঙ্গে সেই অবৈধ প্রণয় ? সজল সেই প্রণয়ের মূর্তিমান
জলজ্যান্ত প্রমাণ ! আজ সজলের দিকে তাকালে, যারা মল্লিনাথকে চিনত তাদের আর
কোনো সন্দেহ থাকবে না।

সেই পাপের একটু শাস্তি তো তুষারও হওয়া দরকার। দীপনাথ তাই সজলের সঙ্গে
দেখা কবার চেষ্টা করল না। যা হচ্ছে হোক। হয়তো ভালই হবে তাতে।

কয়েক দিনের মধ্যেই সোমনাথ একটা বেনামা চিঠি পেল : মহাশয়, আমি গোপনসূত্রে
জানি মল্লিনাথ চট্টোপাধ্যায় তাঁহার সম্মুদয় সম্পত্তি তিন ভাইয়ের মধ্যে সমভাবে বণ্টন করিয়া
একটি উইল রাখিয়া গিয়াছেন। শ্রীনাথবাবুর স্ত্রীর সিন্দুকে সেই উইল লুকানো আছে। তিনি
একটি জাল উইল দ্বারা সম্পত্তি দখল করিয়াছেন। মল্লিনাথবাবুর প্রেতাত্মা আপনাকে যে
দেখা দিয়াছিলেন তাহা আমরা সম্পূর্ণ বিশ্বাস করি.....ইত্যাদি।

সেই চিঠি নিয়ে সেদিনই সোমনাথ হাজির হল দীপনাথের অফিসে।

দেখ সেজদা, কী বলেছিলাম !

দীপনাথ বৃ কঁচকে চিঠিটা পড়ল। বুঝল, ঘটনা অনেকদূর এগিয়ে গেছে। আদালতে এই
চিঠি বা ভূতের গল্প টিকবে না বটে, কিন্তু লোভী সোমনাথ বিস্তর ঝামেলা পাকাবে। তার
ফলে সোমনাথই নিঃশ্ব হয়ে যাবে, হেরে যাবে। তুষারও শাস্তি থাকবে না। সজল এ কেমন
প্রতিশোধ নিচ্ছে ?

দীপনাথের গলা ধরে গেল দুঃখে, হতাশায়। কথা বলতে কষ্ট হচ্ছিল তার। ‘তবু খুব দীন
আন্তরিকতায় সে বলল, বুলু, ওসব ভুলে যা—। সম্পত্তির লোভে ছট করে কিছু করে বসিস
না। তোর ক্ষতি হবে।

সোমনাথ গভীর মুখে খানিকক্ষণ ভাবল। তারপর বলল, মামলায় অনেক টাকা চলে
গেছে। আবার মামলা জিইয়ে তোলার মতো টাকাও আমার নেই।

মামলা করিস না বুলু। শেষ হয়ে যাবি।

এত বড় অন্যায়ে মেনে নেবো ?

মেনেই নে। ওই সম্পত্তি তুই রোজগার করিসনি। দুঃখের কি ?

সোমনাথ একটা দীর্ঘশ্বাস ফেলে উঠে বলল, সেজদা, কেন যে বরাবর তুমি বউদির পক্ষ নাও তা কিছুতেই আমার মাথায় ঢোকে না। লোকে বলে বউদি মারণ উচাটন বশীকরণ জানে। তোমাকে কি বউদি বশীকরণই করেছে ?

দীপনাথ করুণ চোখে এই স্বার্থে অন্ধ ভাইটির দিকে চেয়ে রইল। তাদের জন্মসূত্র এক, তবু তারা কত আলাদা রকমের ! সোমনাথের মতো সেও একটা দীর্ঘশ্বাস ফেলল।

সোমনাথ চলে যাওয়ার পর অনেকক্ষণ কাজে মন দিতে পারল না সে। অনেকক্ষণ বসে বসে সে শ্রীনাথ, সোমনাথ আর বিলুর কথা ভাবল। একজন পাগল, একজন স্বার্থপর আর একজন দ্বিচারিণী। এদের পাশে নিজেকেও দাঁড় করাল সে। নিজেকে কি সে ভাল ? বীথির কথা মনে নেই ? সুতরাং তার তিন ভাই-বোনের পাশে নিজেকেও দিবি মানিয়ে যেতে দেখল সে।

বহুদিন এত ভার হয়নি মন। আজ বিষণ্ণতার বাতাসে ভরে গেল তার পৃথিবী। এই কুৎসিত পৃথিবী থেকে যদি প্রীতম বিদায় নিয়ে থাকে তবে ভালই করেছে। এখানে তাকে মানাত না প্রীতম। একদম মানাত না।

পাশপোর্ট ভিসা প্লেনের টিকিট সবই তার হাতে এসে গেছে। ভেবেছিল রওনা দেওয়ার তারিখটা দিন সাতেক পিছিয়ে দেবে। একবার শিলিগুড়ি ঘুরে আসবে। কিন্তু আজ সে মত পরিবর্তন করল। তারিখ পিছানোর কোনো মানেই হয় না। বরং যত তাড়াতাড়ি পালানো যায় ততই ভাল। আর কখনো এদেশে ফিরে আসতে না হলে আরো ভাল।

লাঞ্ছন পর বোস সাহেবের ফোন এল।

চ্যাটার্জি, কবে ফ্লাইট ?

তেরো।

আনলাকি ডেট। শুনুন, হাউ অ্যাবাউট এ ফেয়ারওয়েল ডিনার ? সময় করতে পারবেন ?

করে ?

আজ বললে আজই। আমার বাসায়।

বাসায় ?

হ্যাঁ। দীপা নিজে রাঁধবে।

উনি রাঁধতে জানেন ?

বোস খুব হাসল হোঃ হোঃ করে। বলল, জানে। তবে ভয় পাচ্ছে, আপনি বামুন হয়ে কায়েতের হাতে খাবেন কিনা !

আগে খাইনি নাকি ?

ওর রান্না তো খাননি !

আপনি খেয়েছেন ?

আমি ! ও আগে তো রাঁধত। খেয়েছি। কেন বলুন তো ?

না, জিজ্ঞেস করছিলাম, ওর রান্না খাওয়া যায় তো ?

দাঁড়ান ওকে গিয়ে বলব।

রক্ষ করুন।

তবে কি আজ আসবেন ? আপনি গ্রীন সিগন্যাল দিলে আমি ওকে টেলিফোন করব।

শী উইল অ্যারেনজ।

আজ থাক। কাল হবে।

ও কে ।

বোস সাহেব, আপনার গলা শুনে মনে হচ্ছে শরীর এখন বেশ ভাল আছে ।
আছে । একজন যোগীর কাছে আসন করা শিখছি ।

কাজকর্ম কেমন চলছে ?

কমপ্যানি লিকুইডেশনে যায়নি এখনো । ভাল কথা, সান-ফ্রাণ্সিসকোয় আপনার কাজকর্মের
খুব সুখ্যাতি হয়েছে শুনলাম ।

কে বলল ?

বাতাসে শোনা যায় । আই অ্যাম প্লীজড ।

ধন্যবাদ ।

সুখ্যাতি আপনার পাওনাই ছিল । দেন টিল টুমরো ।

টিল টুমরো ।

ফোন রেখে দেয় দীপনাথ । এবং হঠাৎ টের পায়, পৃথিবী থেকে বিষণ্ণতার বাতাস বিদায়
নিয়েছে । চারদিকে যেন অজস্র আলো, প্রজাপতি, সুগন্ধ ।

কাল মণিদীপার সঙ্গে দেখা হবে । কাল মণিদীপার সঙ্গে দেখা হবে । কাল মণিদীপার
সঙ্গে...

॥ আশি ॥

ঘুম থেকে উঠে বিলুর হাতে বড় একটা সময় থাকে না । লাবু সকালে ইঙ্গলে চলে
যায় । অথচ অবসর পেয়ে বিলু দ্বিতীয় দফা ঘুমিয়ে পড়ে । যখন ওঠে তখন আটটা সাড়ে
আটটা । তাই তখন খুব তাড়াহুড়ো করে অফিসের জন্য তৈরি হয়ে নেয় সে ।

বলতে কি এই সকালের অতিবিক্ত ঘুম, মুক্ত বিহঙ্গের মতো অফিসে বেরিয়ে পড়া,
চাকরি—এই সবটাই তার কাছে ভারী উপভোগ্য । ভারী স্বাধীন, একলা-একলি জীবন ।
দায়-দায়িত্ব উদ্বেগ দুঃশিষ্টা বা কারো ভার বওয়া নেই । ফুরফুরে হালকা দিন কাটানো ।
বলতে নেই, তার অটেল যৌবন আছে এখনো । ইদানীং তার শরীর একটু ফিরেছেও ।
ঢলঢলে লাভ্য এসেছে রুদ্ধ মুখটায় ।

আজ সকালে স্নান সেরে এসে চুল আঁচড়ানোর সময় সে আয়নায় নিজেকে দেখছিল ।
নিজেকে দেখে আজকাল সে নিজেই মুগ্ধ হয় । আজেকাজে সিদুর দেওয়ায় সিঁথিতে চুলকুনি
থেকে ঘা হয়েছিল । সেই থেকে সিদুরের বদলে একটু কুমকুম দিত সে সিঁথিতে । আজকাল
সামান্য লিপস্টিক ছোঁয়ায় মাত্র । আসলে তো সবটাই কুসংস্কার এবং অন্ধ বিশ্বাস ।

প্রীতমের কথা প্রায় সারাক্ষণই তার মনে পড়ে । কিন্তু সে ঘটনাকে মেনে নিয়েছে ।
পৃথিবীতে কারো সঙ্গেই তো চিরস্থায়ী সম্পর্ক নয় । প্রীতমের নিরুদ্দেশের জন্য দায়ীও নয়
সে । কাজেই অকারণ নিজেকে ভারাক্রান্ত করে লাভ কি ?

একদিক দিয়ে দেখতে গেলে প্রীতম তাকে মুক্তি দিয়ে গেছে । যতদিন কাছে ছিল
ততদিন উদ্বেগ উৎকর্ষা পরিশ্রমে বিলু শুকিয়ে গিয়েছিল । প্রীতম শিলিগুড়িতে থাকলেও
তাকে কর্তব্যবশে মাঝে মাঝে ফেতে হত সেখানে । এখন সে সব বালাই গেছে । সত্য বটে,
প্রীতমের জন্য আজও তার কান্না পায়, কিন্তু সেই সঙ্গে বহুদিনের আকাজিকত এক মুষ্টির
আনন্দও ঘিরে ধরে তাকে ।

সেই আনন্দেই সে গুনগুন করে গান গায় ।

অসুস্থ স্বামী নিরুদ্দেশ, বেঁচে আছে কিনা ঠিক নেই, এই অবস্থায় তোমার কি আর একটু বিষণ্ণ হওয়া উচিত নয় ? এই বলে সে নিজেকে মাঝে মাঝে মৃদু ধমকও দেয় । কিন্তু তাতে কাজ হয় না । আজকাল এক আনন্দই তাকে ভাসিয়ে নেয় যে ! সে কি অবৈধ আনন্দ ?

বিলু খেতে বসতে যাচ্ছিল ঠিক এই সময়ে দরজায় কেউ মৃদু কড়া নাড়ল । রোজ না হলেও মাঝে মাঝেই অরুণ এসে তাকে তুলে নিয়ে পৌঁছে দেয় অফিসে । কিন্তু অরুণের কড়া নাড়ার ধরন আলাদা । তাতে আত্মবিশ্বাস থাকে । এ রকম মৃদু ভীকু আওয়াজ তার নয় ।

দেখ তো কে । অচলাকে বলল বিলু ।

লাবুকে ইঞ্চুল থেকে আনতে যাওয়ার জন্য পোশাক পরছিল অচলা । একটু সময় নিল । কিন্তু এই ফাঁকটুকুতে আর একবারও কড়ায় নাড়া পড়ল না । অরুণ নয় । সে হলে এর মধ্যে আরো বার চারেক কড়া নাড়ত ।

অচলা দরজা খুলে অবাক গলায় বলল, ও-মা ! শতম দাদাবাবু !

বিলু একটু থমকে গেল খাওয়ার মাঝখানে । বুকেটা কেঁপে উঠল জোরে । ধড়াস ধড়াস করতে লাগল । খিদে ছিল খুব, কিন্তু হঠাৎ খিদের মাথায় জল ঢেলে দিল কে যেন ।

উঠতে যাচ্ছিল, কিন্তু হাত পা একটু কাঁপছিল বলে টক করে উঠতে পারল না । তার আগেই শতম এসে ঢুকল । তেমনি দাড়িওলা মুখ । ক্লষ্ণ জোয়ান শরীর । ব্যাগটা মেঝেয় রেখে একটু শুকনো হেসে বলল, কেমন আছো বউদি ?

বিলু খানিকক্ষণ শতমের দিকে চেয়ে থাকে । খারাপ খবর থাকলে শতমের মুখ দেখেই বোঝা যাবে ।

কিন্তু কিছুই বুঝতে পারল না বিলু ।

মাঝখানের ঘরে প্রীতমের চোঁকিটা এক কোণে সরিয়ে দিয়ে ডাইনিং টেবিলটা পাতা হয়েছে । চোঁকিটায় আজকাল অচলা শোয় । শতম বিছানায় বসে একটা ক্লাস্তির শ্বাস ছাড়ল । বলল, খাওয়া থামালে কেন ? খাও ।

বিলু অপলক চোখে শতমকে দেখছিল । হাত-পা শরীরে ঢুকে আসবে যেন । বলল, কোনো খবর পেলে ?

শতম মাথা নাড়ল, না । তবে হাল ছাড়িনি ।

বিলু মাথা নীচু করে প্লেটে আঙুল দিয়ে কয়েকটা দাগ কাটল । খিদে মরে গেছে । বলল, তোমাকে আচমকা দেখে এত ভয় পেয়েছিলাম !

শতম বিষণ্ণ মুখে বলে, বুঝতে পেরেছি । কিন্তু কোনো খবর পেলে টেলিগ্রাম বা ট্রাংককল করতাম । নিজে এসে সময় নষ্ট করতাম না । আমি এসেছি কাজে । আজই সন্দের গাড়িতে চলে যাবো ।

আজই ?

আজই । বাড়ি ছেড়ে থাকার উপায় নেই । মা-বাবার অবস্থা তো জানো । কেউই বেশীদিন বাঁচবে বলে মনে হয় না ।

খুব ভেঙে পড়েছেন ?

তোমাকে জানাইনি ইচ্ছে করেই । বাবার সেরিব্রেল অ্যাটাক হয়ে গেছে একটা । মার প্রেসার দু'শোর নীচে নামছেই না । মরম একটা চাকরি পেয়ে গৌহাটি চলে গেছে । রূপমকে আমার অ্যাসিস্ট্যান্ট করে নিয়েছি । সে বেলকোবার সাইটে রয়েছে ক্যাম্প করে । বাড়িতে শুধু ছবি ।

ছবির বিয়ের কিছু হল ?

সেই কথাই বলতে আসা । বিয়ে ঠিক হয়েছে ।

যদিও প্রীতমের বাড়ির সঙ্গে বিলুর সম্পর্ক খুবই ক্ষীণ তবু একটা গিট তো কোথাও আছে । ছবির যে বিয়ের আর দেবী করা উচিত নয় সেটা মাঝে মাঝে তারও মনে হয় । ছবি দেখতে সুন্দরী নয় । ভাল পাত্র পেলে সেটা কপাল । বিলু জিজ্ঞেস করল, পাত্র কেমন ?

খুব কিছু নয় । দাদারই এক বন্ধু ।

দাদার বন্ধু ? তা হলে তো বয়সে অনেক বড় হবে ।

শতম হাসল, আমরা পিঠোপিঠি ভাই-বোন । বয়সের ফারাক খুব একটা নয় । বড় জোর বছর দশেক ।

দশ বছর ! বলো কি ? সে তো ছবির জ্যাঠামশাই ।

শতমেব মুখ থেকে হাসি গেল না, দশ বছরও আমার মতে কম । স্বামী আব স্ত্রীর মধ্যে বয়সের অনেকটা পার্থক্য না থাকলে ইয়ার-বন্ধুর মতো সম্পর্ক হয় । স্বামীর প্রতি শ্রদ্ধাভক্তিও থাকে না । জান তো, পতি আর পিতা একই ধাতু নিষ্পন্ন শব্দ !

ও বাবা, তুমি তো আবার শাস্ত্র পড়া মানুষ ! কার সঙ্গে কী বলছিলাম !

শতম মাথা নেড়ে বলল, আমি হাওয়ায় ভেসে যেতে পছন্দ করি না । যা ভাল যা মঙ্গলপ্রদ সেটা লোকে উড়িয়ে দিলেও আমি পরীক্ষা করে দেখতে ভালবাসি ।

বিয়েটা কি করে ঠিক হল ?

আচমকা । দাদা নিরুদ্দেশ হওয়ায় আমরা ছবির বিয়ের কথা ভুলেই গিয়েছিলাম । হঠাৎই দাদার আর এক বন্ধু সম্বন্ধটা আনল ।

পাত্র কি করে ?

ইনজিনিয়ার । জলঢাকা প্রজেক্টে আছে ।

বলো কি ? তা হলে তো খুব ভাল পাত্র ।

আমাদের তুলনায় ভালই । পাত্র এতদিন বিয়ে না করার প্রতিজ্ঞা নিয়ে ছিল । কিন্তু দাদার খবর এবং আমাদের পরিবারের অবস্থা শুনে নিজেই ঠিক করে যে, ছবিকে বিয়ে করবে ।

বাঃ, খুব ভাল লোক তো !

খুবই ভাল । কোনো ডিমাণ্ড নেই । বরং আমাদের সাফ জানিয়ে দিয়েছে কিছু দিলেও সে নেবে না ।

তুমি চেনো ভদ্রলোককে ?

ছেলেবেলায় দেখেছি । তারপর উনি বাইরে চলে যান ।

বাইরে বলতে বিদেশে নাকি ?

না । রাউরকেল্লা, দুর্গাপুর আরো কোথায় যেন ।

দেখতে কেমন ?

কালো । তবে বেশ স্বাস্থ্যবান । লম্বাও অনেকটা ।

মা-বাবা আছে ?

মা আছে ।

ভাইবোন ?

অনেকগুলি । চারজন বিয়ের যুগি় মেয়ে রেখে বাবা মারা যান । শিবেনদা চাকরি করে বোনদের বিয়ে দিয়েছেন । তিনটি ভাইও ভাল চাকরি করছে এখন ।

ঘরবাড়ি ?

কোন্‌গরে বাড়ি করেছে ইদানীং ।

ছবিকে কোথায় রাখবে ?

অতশত জানি না । জিজ্ঞেস করিনি ।

নামটা কী বললে ? শিবেন ?

হ্যাঁ ।

বড্ড পুরোনো নাম । অবশ্য নামে কীই বা এসে যায় ! ছবি খুশি ?

খুশি হওয়ার মতো মনের অবস্থা নয় । মা-বাবা এখন-তখন, দাদা নিরুদ্দেশ, এই অবস্থায় আর কতটা খুশি হওয়া যায় বলো । বিয়েই করতে রাজি হচ্ছিল না । ওকে রাজি করাতেই বিস্তর খকল গেছে ।

বিয়ে না হলেই বা কী করত ?

ওর ধারণা বিয়ে হয়ে গেলে আমাদের আর দেখার কেউ থাকবে না ।

বিলু মৃদুস্বরে বলল, কথটা তো মিথ্যে নয় । বাড়িতে আর মেয়েমানুষ বলতে কে রইল বলো !

শতম মাথা নেড়ে বলে, ওসব ভাবলে চলবে কেন ? ছবি না থাকলেও দেখো আমরা ঠিক চালিয়ে নেবো ।

কি ভাবে নেবে ? দুই ভাই বাইরে, তুমিও মাঝে মাঝে বেরোও, মা-বাবাকে দেখবে কে ? লোক রাখব ।

লোক পাওয়াই কি সোজা ' এখন বরং সংসারের দিকে তাকিয়ে ছবির পর তোমারও একটা বিয়ে করা উচিত ।

আমার বিয়ে ! বলে খুব হোঃ হোঃ করে হাসে শতম ।

সেই হাসি শুনে অচলার চা চলকে গেল । এক ফাঁকে সে শতমের জন্য এক কাপ চা করে নিয়ে আসছিল ।

প্লেটের চাটুকু বেসিনে ঢেলে অচলা কাপটা এনে শতমের হাতে দেয় । বলে, আপনি কড়া লিকার পছন্দ করেন । তাই দিয়েছি ।

শতম চায়ে একটা চুমুক দিয়ে বলে, বাঃ । অট্টহাসির রেশটা তখনো তার শ্মিতমুখে লেগে আছে । সে নিজেরা কবাজির ঘড়িটার দিকে চেয়ে বলল, তোমার তো আজ অফিসের দেবীই হয়ে যাবে দেখছি । তো এক কাজ কর না !

কী কাজ ?

আজ কামাই দাও ।

দিয়ে ?

ছবির নেকলেস আর বেনারসীটা এখন থেকে কিনে নিয়ে যাবো ভাবছিলাম । দুজনে মিলে চলো জিনিস দুটো কিনে ফেলি ।

এককথায় উজ্জ্বল হল বিলু । শাড়ি বা গয়না কেনার ব্যাপারে কোন মেয়েই বা খুশি না হয় ? সে উঠে বেসিনে মুখ ধুয়ে বলল, শীগগির স্নান করে দুটো খেয়ে নাও আগে ।

তা হলে কামাই করছ ?

করছি । কিন্তু বিয়ে কবে সেটা তো বললে না ?

সেটা বলতেই আসা । চিঠি দিলে সময়মতো পেতে না হয়তো । বিয়ের আর ঠিক ছ-দিন বাকি ।

এত তাড়া ?

তাড়া পাত্রপক্ষেরই। শিবেনদার এক বোন আমেরিকায় থাকে। সে ছুটি কাটাতে এসেছে। যাওয়ার সময় হয়ে এল। সে দাদার বিয়ে দিয়েই রওনা হবে। শ্রাবণের ঠাণ্ডা তরিখের পর আর দিনও নেই।

আমেরিকার কথায় বিলুর মুখটা স্নান হল, সেজদা আমেরিকায় যাচ্ছে জানো ? দীপুদা ?

হ্যাঁ। অফিসের কাজে। সেজদা না থাকলে কি যে একা লাগবে আমার। আর তো বাপের বাড়ির কেউ খোঁজ নেয় না সেজদা ছাড়া।

দীপুদা একটা দারুণ চাকরি পেয়েছে শুনলাম।

হ্যাঁ। চার হাজার টাকা মাইনে।

বলো কি ! ভাল মানে এত ভাল তা তো জানতাম না।

চাকরি তো ভাল কিন্তু কার জন্য ? বিয়েব কথা বললেই রেগে যায়।

সেই যে কী একটা কেস হয়েছিল সেটা মিটে গেছে ?

ও বাবা, কে জিজ্ঞেস করবে ? যা সিরিয়াস মানুষ।

কেসটা কী ?

আগের কোম্পানির বসের বউয়ের সঙ্গে জড়িয়ে একটা কথা রটেছিল। আমার মনে হয় সেটা তেমন বেশীদূর গড়ায়নি। সেজদা তো ভীষণ মরালিস্ট।

দীপুদা ভীষণ মরালিস্ট আমি জানি। তাই ঘটনাটা শুনে বিশ্বাস হয়নি।

কিছু একটা হয়েছিল। তুমি স্নানে যাও তো।

জামা-কাপড় পান্টাতে পান্টাতে শতম জিজ্ঞেস করে, তুমি করে রওনা হবে বলো তো ! দেখি। কালই ছুটির অ্যাপলিকেশন দেবো।

কিন্তু ট্রেনের রিজার্ভেশন কি এত অল্প সময়ে পাবে ?

পেয়ে যাবো। নইলে প্লেন তো আছেই। ছবির বিয়েতে যেতে তো হবেই।

দীপুদাকেও নিয়ে যেতে হবে। আজই যাবো একবার অফিসে। কোথায় বলো তো ?

সানফ্রান্সিস্কোয় বোধহয় রাসেল স্ট্রিটে। ঠিক জানি না। খুব বড় কোম্পানি।

বিলু বউদিকে বহুকাল পর আবার খুব ভাল লাগল শতমের। কোনো মানুষই আগাপাশতলা নিষ্ঠুর বা খারাপ হতে পারে না। এই যে বউদি ছবির বিয়েতে যেতে আগ্রহ দেখাচ্ছে এতেই ভারী খুশি শতম। শিলিগুড়ি থেকে আসার সময় বউদি খুব খারাপ ব্যবহার করে এসেছিল। সেই মনোভাবটা কেটে গেছে।

শতম স্নান করল, খেল। তারপর পোশাক পরে বউদির সঙ্গে যখন বেরোলো তখন মেঘলা কেটে রোদ উঠেছে।

বিলু বলল, কাল রাতেও বৃষ্টি হয়েছে। আজ তোমার ভাগ্যে রোদ উঠল।

শতম হাসল, হ্যাঁ, আমাদের ভাগ্য কত ভাল তা তো জানোই !

দুপুরবেলা কাজের খুব একটা চাপ ছিল না আজ। বস্তুতপক্ষে লাঞ্চার পর নিজের আরামদায়ক চেয়ারখানায় গা ছেড়ে কয়েক মিনিটের জন্য চোখ বুজে ছিল দীপনাথ। এমন সময় শতমের টেলিফোন এল।

ছবির বিয়ে শুনে ভীষণ তটস্থ হয়ে ওঠে সে, ছবির বিয়ে ! তাই তো ! এ তো আমারও কর্তব্যের মধ্যে পড়ে।

সে জিঙ্কস করল, তুই কোথা থেকে ফোন করছিস ?

গড়িয়াহাটা থেকে । সঙ্গে বউদিও আছে ।

বিলু ! বলে হাঁফ ছাড়ল দীপনাথ । যাক তা হলে বিলু স্বশ্রবণবাড়ির সঙ্গে সম্পর্ক এখনো চুকিয়ে ফেলেনি । সে বলল, আমাকে কিছু করতে হবে ? বল তো ।

না, না । আপনাকে শুধু একবার যেতে হবে ।

যাবো ! ছুটি যে এখনো পাওনা হয়নি ।

ট্যুর নিয়ে নিন না ।

দূর পাগলা ! ট্যুর নেওয়া যেত আগের কোমপানিতে । এখানে ওরকম নিজের ইচ্ছেয় ট্যুর নেওয়া যায় না ।

তা হলে কী হবে ? ছবির বিয়েতে আপনি যাবেন না ? আমাদের দাদা নেই— শেষ দিকটায় গলা কেঁপে বেঁধে গেল শতমের । কিন্তু দীপনাথকে পাগল করার পক্ষে ওইটুকুই যথেষ্ট । সে চাপা ক্রুদ্ধ গলায় ধমক দিল, দূর বোকা । যাবো না কি রে ? ছবির বিয়েতে যাবোই । ভাবিস না ।

শতমের হাত থেকে টেলিফোন নিয়ে বিলু বলে, সেজদা, তুমি কবে যাবে ?

আর তো মোটে ছ’দিন সময় ।

আমি তাহলে তোমার সঙ্গে যাবো ।

যাবি ?

যাবো না ?

প্রীতমের কোনো খবর ?

না, নেই ।

ও । আচ্ছা তা হলে আমার সঙ্গে যাস ।

রিজার্ভেশন কি তুমিই করবে ?

হ্যাঁ । প্লেনে । তোর টিকিট আমি করে রাখব ।

বাঁচলাম । ট্রেনে বাচ্চা নিয়ে একা যাওয়া যে কী ঝকমারি !

তা তোর বাচ্চাটা কেমন আছে ?

ভাল । খুব পড়াশুনোয় মন হয়েছে ।

গান শেখা, নাচ শেখা ।

শিখছে ।

শতমকে আবার টেলিফোনটা দে ।

দিচ্ছি ।

শতম ফোন ধরলে দীপনাথ চাপা গলায় বলে, হ্যাঁরে, কিছু টাকা দিতে পারি । নিবি ?

না, তার দরকার নেই ।

অনেক খরচ তো বিয়ের ।

সে তো বটেই, কিন্তু হয়ে যাবে । আমি গোটা দুয়েক বড় পেমেন্ট পেয়েছি ।

অসুবিধে হলে কিন্তু বলিস ।

বলব ।

আমার কাছে হার্ড ক্যাশ আছে । পাত্র কিরকম ?

আপনি বোধহয় চেনেন ।

কে বল তো ?

আপনাদেরই বন্ধু। শিবেন চৌধুরি।

শিবেন ! শিলিগুড়ির শিবেন নাকি ?

হ্যাঁ। আগে ঠাঁরা শিলিগুড়িতেই থাকতেন।

খুব লম্বা ? কালো ?

হ্যাঁ, সেই।

দীপনাথ একটা স্বাস ছেড়ে বলল, প্রীতমের সঙ্গে গলাগলি ভাব ছিল। খুব ভাল ছেলে।

আপনি যাচ্ছেন তো ?

যাচ্ছি।

: একাশি ॥

পৃথিবীর রং অনেকটাই পাল্টে গেছে। এখনো বিবর্ণ নয়, তবে বহু গাঢ় রং এখন ফিকে হয়ে আসছে দীপনাথের চোখে। এ কি বয়সের দোষ ?

বয়সও কম হলো না। বোধহয় ঐয়ত্রিশের এপাবে বা ওপারে। সঠিক হিসেব জানত মা বা পিসিমা। তাঁরা কেউ নেই। তবু বয়সেরই সব দোষ হয়তো নয়। দোষ আছে জীবনযাপনেরও। এ কেমন এক নির্ভেজাল ঘটনাহীন জীবন বয়ে যাচ্ছে তার ? কলকাতায় আজও তার সত্যিকারের বন্ধু হয়নি কেউ। তার কোনো আড্ডা নেই, অবসর বিনোদন নেই। সে শুধু এক কোমপানি থেকে আর এক কোমপানিতে ব্যক্তিগত গুডউইল নিয়ে গড়িয়ে পড়ছে। সে কাজ জানে, আর কিছু জানে না। বৈধভাবে কোনো মেয়ের প্রেমেও সে পড়েনি বহুকাল।

একমাত্র মণিদীপা, যাকে পাওয়ার নয় বা পেয়েও লাভ নেই। মণিদীপার দোরগোড়ায় অফিসের গাড়িটা থেকে নেমে সে ফুটপাথে দাঁড়িয়ে নিজের দামী জুতোজোড়ার চাকচিক্যেব দিকে চেয়ে নিজের অনুজ্জ্বলতাব কথা ভাবল।

সে জানে, আজ তাকে অনুজ্জ্বল, ক্লান্ত এবং খানিকটা বিষণ্ণ দেখাচ্ছে। কিছু করার নেই।

বালকনিতে কেউ ছিল না। কিন্তু ওপরে উঠে সে দেখে, বোস সাহেবের ফ্ল্যাটের দরজা খোলা। ভিতরে বেশ গমগমে আড্ডা হচ্ছে।

দোরগোড়ায় একটু দ্বিধাভরে দাঁড়ায় দীপনাথ। কথা ছিল, আজ তার একার নিমন্ত্রণ। কিন্তু তাই কি ? বোধহয় কথাটা রাখিনি বোসসাহেব। পাটিতে গিয়ে গিয়ে দীপনাথের অভোস হয়ে গেছে। ভালও লাগে না, মন্দও লাগে না। ওই একরকম। কিন্তু বোসের বাসায় আজকের নিমন্ত্রণটা একটু অন্যরকম হতে পারত।

দরজার এপাশ থেকেই অ্যালকোহলের গন্ধ পাওয়া যাচ্ছিল। কাচের সঙ্গে কাচের শব্দ।

বোস উচ্চৈঃস্বরে বলল, কাম ইন ! কাম ইন ! ইটস ইওর শো। আসুন দীপনাথবাবু। জয়েন দি ক্রাউড।

ভিতরে যারা বসে আছে তারা প্রায় সবাই দীপনাথের চেনা বা আধা-চেনা। একজন বোসের অ্যাসিস্ট্যান্ট ম্যানেজার মুরলী। অন্যরা অন্য সব মেজো সেজো কোমপানির গাধববোয়াল। মোট জনা দশেক। মৃদু স্বরে প্রায় সবাই দীপনাথকে স্বাগত জানায়।

বোসকে যতটা মাতাল ভেবেছিল, ততটা নয়। পাশে বসতেই বুঝল। বোস মৃদুস্বরে জানিয়ে দিল, এটা ককটেল মাত্র। ডিনারে কেউ থাকবে না।

দীপনাথের দিকে একটা গ্লাস এগিয়ে আসে। ইদানীং দীপনাথ মদ খায় কালেভদ্রে। খেতে খেতে অধিকাংশ লোকেরই স্পৃহা বাড়ে। দীপনাথের হয়েছে ঠিক উল্টো। মদ খেলে তার ভারী মাথা ধরে, মন ভার হয়, সব দুঃখের স্মৃতি এসে ঘিরে ধরে তাকে, চারিদিকটা ভারী বিমর্ষ হয়ে যায়।

ভদ্রতাবশে দীপনাথ গ্লাসটা হাতে নেয় মাত্র। তারপর এক ফাঁকে রেখে দেয়। কেউ তেমন লক্ষ করে না অবশ্য। অফিস নিয়ে তুলকালাম কুটকচালি গল্প হচ্ছে, এসব ককটেল মিট-এ যা সাধারণত হয়ে থাকে।

কাশ্মীরী এক্সপোর্টের গোস্বামী জিজ্ঞেস করল, আপনার গাড়িটা তো বিগ বিজনেস। সোমানি আছে না অ্যাকাউন্টসে?

দীপনাথ মাথা নাড়ল শুধু।

গোস্বামী বলল, সোমানি কৃষ্ণমূর্তিকে লাথি মেরে উঠে গেল কি করে জানেন?

দীপনাথ মৃদু হাসল শুধু। তারপর শুনে যেতে লাগল। কোমপানির ক্রোধ, কলঙ্ক, গুপ্ত সব পাপের কথা। অবশ্য কিছুই তাকে স্পর্শ করে না। বাইরে ভাল ঢাকনা দেওয়া কোমপানিগুলির ভিতবকার ঘা পাঁচড়া সে বহুকাল ধরে দেখে আসছে। তার অবাধ্য চোখ খুব সাবধানে, গোপনে মণিদীপাকে খুঁজছিল। কান সতর্ক। মনে হল, রান্নাঘর থেকে একবার মৃদু কণ্ঠস্বরটি শোনা গেল, দই-টা ভাল করে ঘোঁটা হয়নি সতীশ, গ্রেভিতে দইয়ের টুকরো ভেসে থাকবে। ঘুটে দাও।

একটু হাসল দীপনাথ। মণিদীপা বাঁধছে! সত্যিই বাঁধছে! সে এতটা আশা করেনি।

সাধারণত এসব ককটেল-মিলন ভারী একঘেয়ে আর বিরজিকব। বোস সাহেবের চামচা থাকাকালীন দীপনাথ বিস্তর ককটেল অ্যাটেণ্ড করেছিল। তখন সে এদের সমকক্ষ ছিল না, তাই তখন এদের সব কথা আব কুটকচালিকে ইমপট্যান্সি ভেবে হাঁ করে গিলত। আজ দীপনাথ এদের সমকক্ষ তো বটেই, বরং অনেকের চেয়ে তার পজিশন এবং বেতন ভাল।

লারেল-অশোক ভারী স্প্রিং তৈরিতে অগ্রণী কোমপানি। তার টেকনিক্যাল ম্যানেজার প্রসাদ জিজ্ঞেস করল, স্টেটসে আপনার কদিনের প্রোগ্রাম?

ছ'মাস আপাতত। তবে আবার বেশী দিন থাকতে হতে পারে।

ইউ আর লাকি। সানফ্রান্সিস্কোয় যাকে নেয় তার জন্য বহুৎ করে। আমাদের কোমপানির মতো হারামী নয়।

দীপনাথ একটু ক্ষীণ হেসে বলে, লাক ইজ এ রিলেটিভ টার্ম।

ও কথা কেন বলছেন? আর ইউ নট হ্যাপী দেয়ার?

দীপনাথ এবার আর একটু বড় করে হাসে, হ্যাপীনেসও রিলেটিভ।

আপনাকে নিয়ে মশাই পারা যায় না, ক্রনিক পেসিমিস্ট। সেই আগেও দেখেছি শুকনো মুখ, এখন সানফ্রান্সিস্কোর একজকিউটিভ বনে আমেরিকা পাড়ি দিচ্ছেন, তাও সেই শুকনো মুখ।

নিজের ভিতর হাসিখুশির অভাব দীপনাথও বড় বেশী টের পায়। সে হাসবার একটা চেষ্টা করে বলল, খুশি হওয়ার মতো কিছুই ঘটে না যে মিস্টার প্রসাদ।

কাট দ্যাট মিস্টার বিট। উই আর ফ্রেণ্ডস্। তা খুশি হওয়ার মতো কিছু ঘটিয়েই ফেলুন।

কী ঘটাব? বিয়ে?

দূর, দূর, বিয়েটা কোনো ফেনোমেনন নয়। টেক এ গার্ল, টেক এ লং ড্রাইভ টু

গোপালপুর অন সি অর ডালটনগঞ্জ, টেক টু স্কচ উইথ ইউ। দ্যাটস্ হ্যাপীনেস।
স্টিল রিলেটিভ। দীপনাথ হাসিটা ধরে রাখল।

বোস একটু অস্বস্তি নিয়ে চেয়ে ছিল দীপনাথের দিকে। সম্ভবত, দীপনাথ কেন সুখী বা খুশি নয় তার রহস্যময় কার্যকারণটা ধরার চেষ্টা করছিল আজ। বলল, লীভ চ্যাটার্জি অ্যালোন। কিছু লোক আছে তারা কিছুতেই খুশি হয় না।

এই নিয়ে বোসের সঙ্গে প্রসাদের একটা ডিসকাশন শুরু হয়ে গেল। এখনকার মানুষের অসুখী হওয়ার কারণ নিয়ে।

দীপনাথ একটা হাই গোপন করল।

ককটেল শেষ হল আটটার মধোই। সবাই বিদায় নেওয়ার পর বোস দরজা দিয়ে হঠাৎ নিস্তব্ধ হয়ে যাওয়া ঘরটার টেবিলে আর মেঝেয় বোতল আর গ্লাস আর ভুঙ্গাবশিষ্টের পিরিচগুলোর দিকে ভ্রূ কঁচকে চেয়ে রইল একটু। তারপর দীপনাথের দিকে চেয়ে একটু হেসে বলল, দি ককটেল ওয়াজ নট মাই আইডিয়া। আমি নিজে ড্রিঙ্ক খুব কমই করি আজকাল।

দীপনাথ একটু অবাক হয়ে বলে, তবে কার আইডিয়া?

ওদের। আপনার সঙ্গে ওরা নতুন করে ইনট্রোডিসড হতে চেয়েছিল।

তার কারণ?

বিজনেস ভালচারদের তো কারণ একটাই। দে ওয়ান্ট টু নো অ্যাবাউট সানফ্লাওয়ার। সানফ্লাওয়ার মিনস্ বিগ বিজনেস, সানফ্লাওয়ার মিনস্ মালটিন্যাশনাল। ইউ হ্যাভ অলরেডি বিকাম অ্যান ইমপর্ট্যান্ট ম্যান ইন সানফ্লাওয়ার। ওদের দুশ্চিন্তা, পাছে আপনি ওদের ভুলে যান। সে ইট ইজ নেসেসারি দ্যাট ইউ আর রিমাইণ্ডেড অফ দেম অ্যাক্সেস। রিনিউয়াল অফ রিলেশনশীপ। যা খুশি ভেবে নিতে পারেন। তবে আজকের এই সব আয়োজনের ট্যাগেট ছিলেন আপনিই। বুঝতে পারেননি?

দীপনাথ সততার সঙ্গেই ঘাড় নেড়ে বললে, না।

ইউ আর স্টিল অ্যান ইনোসেন্ট গায়। শুনলাম আপনি এখনো সেই পুরোনো মেসবাড়িতে আছেন।

মেস নয়, বোর্ডিং।

তা হবে। আপনাদের বিগ বসের স্টেনো মিহির চৌধুরীকে চেনেন তো! একই বাসে বোধহয় আপনার সঙ্গে অফিসে যায়। সে বলছিল, মিস্টার চ্যাটার্জি খুব বিচ্ছিরি একটা জয়েন্টে থাকেন।

দীপনাথ বলল, আছি তো মোটে আর কয়েকটা দিন। একদিনের জন্য আর ফ্ল্যাট নিয়ে কী হবে? বরং ফিরে এসে দেখা যাবে।

ফিরে এসেই তো আর ফ্ল্যাট পাবেন না। যদি বলেন তবে আপনার জন্য একটা ওনারশীপ ফ্ল্যাট বুক করে রাখতে পারি। আমার এক বন্ধু শঙ্কর লেক গার্ডেনসে অনেক ফ্ল্যাট তৈরি করছে। বলব তাকে?

দীপনাথ জাগতিক বিষয়-সম্পত্তি নিয়ে ভাবতে ভালবাসে না। একা মানুষ কোথাও পড়ে থাকলেই হয়। জবাব দিচ্ছিল না তাই। বোস বলল, কলকাতার হাউসিং প্রবলেমটা কোথায় গিয়ে দাঁড়িয়েছে তার খোঁজ বোধহয় রাখেন না।

আমি একটা পুরো অ্যাপার্টমেন্ট নিয়ে কীই বা করব! একা থাকলে রান্নাবান্নার ঝামেলা আছে। ফ্ল্যাট হলে আবার তার মেনটেনেন্স নিয়ে দুশ্চিন্তা আছে। ঘরদোর সাজাতেও হবে

একটু। আমার যা জিনিসপত্র আছে তা দিয়ে একটা ছোটো ঘরও ভরে না।

টিরকাল কি সমান যাবে ?

আমার বোধহয় এমনিই কেটে যাবে।

ইউ আর নট বিয়িং প্র্যাকটিক্যাল। কলকাতায় কয়েক বছর আগেও ওনারশীপ ফ্ল্যাটের নামে লোকে নাক সিটকোতো। আজকাল একটা ফ্ল্যাট বুক করাই টাফ জব। বুক করে রাখুন। ফিরে এসে সোজা নিরাপদ নিজস্ব ফ্ল্যাটে ঢুকে যাবেন। সানফ্লাওয়ারের একজিকিউটিভ কেন থার্ড গ্রেড বোর্ডিং-এ থাকবে !

দীপনাথ একটু ভেবে বলল, আমি ভেবেছিলাম ফিরে এসে একটু ভাল কোনো বোর্ডিং-এ উঠব। বোর্ডিং-এ আর যাই হোক লোনলি লাগে না। ঠিক আছে, আপনি যখন বলছেন, ফ্ল্যাটটা বুক করাই যাক।

বোস খুশি হয়, বলে, উইথ এ গ্যারেজ।

ওঃ বাবা !

ড্রেন্ট নাগ। ইউ ক্যান অ্যাফোর্ড এ কার নাউ। অফিস তো কার অ্যালাউন্স দেবেই, অ্যাডভান্সও দেবে।

দীপনাথ কিছু বলল না। বোস সাহেব তার ভালই চায় বোধহয়। এখনো চায়। মণিদীপার সঙ্গে তার বিয়ে দেওয়ার সেই পাগলাটে চেষ্টার পর্বও।

এতক্ষণ একবারও মণিদীপা দেখা দেয়নি। বহুকাল মণিদীপাকে দেখিনি দীপনাথ। বলতে নেই ওই পরবর্তী জন্য এখনো বুকের মধ্যে এক ছোট্ট শূন্যতা রয়ে গেছে। কোনোদিনই সেই শূন্যতা পূরণ হওয়ার নয়। মেয়েমানুষের মধ্যে শাস্ত্রত কিছুই পাওয়ার নেই, দীপনাথ জানে। রোমিও-জুলিয়েট, লায়লা-মজনু এসব হল ইমোশনাল একসেস্। অতিশয় বাড়াবাড়ি। নারীপ্রেম জীবনের কতটুকু ? ভাবপ্রবণ পুরুষেরা ব্যাপারটাকে যতদূর সম্ভব ফাঁপিয়ে ফুলিয়ে তুলেছে। তবে এও ঠিক, যাকে পাওয়া গেল না, যাকে পাওয়ার নয়, সেই মেয়েটির জন্য দীর্ঘকাল স্মৃতিগন্ধময় বেদনার মতো কিছু থেকে যায়। সেটা হয়তো সঠিক প্রেম নয়, বকলমে নিজেরই আহত পৌরুষ। পুরুষ যেটাকে দখল করতে পারে না সেটাকেই মহিমাষিত করে তোলার চেষ্টা কবে।

বোস সাহেব হঠাৎ বলে, প্রসাদ খুব ভুল বলেনি। আপনাকে আজকাল একটু বেশীই বিষয় দেখায়। সামথিং পারসোন্যাল ? সেই আপনার ভগ্নীপতির নিরুদ্দেশ হওয়ার ব্যাপারটাই কি ?

শুধু তা নয়। আসলে পৃথিবীটা আমি যেমন চাই, পৃথিবীটা তেমন নয়।

এ কথায় বোস হেসে উঠতে পারত কিন্তু হাসল না। কিছুক্ষণ চুপ করে থাকল। তারপর বলল, আপনি একটা পাহাড়ে চলে যাবেন বলে মাঝে মাঝে আমাদের শাসাতেন। এটা তারই প্রোবলগ নয় তো !

পাহাড় ! বলতেই দীপনাথের সামনে মহাকায় সেই উদ্ভঙ্গ শব্দের একটা ছায়া ভেসে ওঠে। হিম তুষারে ঢাকা, নির্জন, নিস্তব্ধ, প্রশান্ত। পৃথিবীতে তার কোনো তুলনা নেই। কোনোদিনই সেই পাহাড়ের চূড়ায় পৌছোবে না সে। শুধু আত্মত্যা আরোহণ করবে। সঙ্গে খাবার থাকবে না, জল থাকবে না, জাগতিক কোনো উপকরণ থাকবে না। সানফ্লাওয়ারের একজিকিউটিভের পায়ের তলায় জমি নড়ে উঠল হঠাৎ। মাঝে মাঝে সে যখন ডাকে তখন সব দড়িদড়া ছিড়ে যেতে চায় যে !

দীপনাথ মাথা নেড়ে বলে, না। সেটা হয়তো একটা রোমাণ্টিক চিন্তা। কিন্তু আমি সুখী

নই অন্য কারণে । মাঝে মাঝে মনে হয়, পৃথিবীর সঙ্গে আমার সম্পর্ক খুবই অগভীর ।
আপনি বরাবরই একটু ফিলজফার ধরনের । হাই থটস্ । আই রিয়ার লাইক ইট । কিন্তু
কথাটা হল, ফিলজফাররা জীবনে সুখী হয় খুব কমই । অবশ্য নন-ফিলজফাররাই যে সুখী
হয় তাও নয় ।

দীপনাথ একটু করুণভাবে হাসল । প্রসঙ্গটা পান্টানোর জন্য একটু নীচু স্বরে জিজ্ঞেস
করল, ইজ দি হোমফ্রন্ট ও. কে ?

বোস একটু অপ্রতিভ হয় । তারপর মৃদু মাথা নেড়ে বলে, সো সো । নাথিং হ্যাপেনস্ ।
তার মানে ?

তার মানে নাথিং । রিং-এর মধ্যে দুজন বস্কার, দুজনেই ডেনজারাস । ঘুরছে ঘুরছে
পরস্পরের দিকে সতর্ক চোখ রাখছে, কিন্তু কেউ কাউকে হঠাৎ আটাক করতে সাহস পাচ্ছে
না । দি আটমোসফিয়ার ইজ চার্জড উইথ হেট্রেড, ক্রুয়েলটি, রেজ, বাট দেয়ার অলসো
ইজ এ ভ্যাকুয়াম অফ নো অ্যাকশন । এ লাল্ ।

দীপনাথ একটু লজ্জা, সংকোচ আর ভয়ের সঙ্গে খুব মৃদুস্বরে জিজ্ঞেস করল, নো সেকস্
রিলেশন ?

বোস সামান্য অবাক হয় । তবে মৃদু গলায় সহজভাবেই বলে, আই অ্যাম নো শুড ফর
সেকস্ নাউ । ডাক্তারের বারণ । ফিজিক্যালিও আমি আনফিট । তবে ফিট থাকলেও
হয়তো সেকস রিলেশন হত না । সেকস্ তো শুধু শরীর নয়, অনেকটাই মন ।

দীপনাথ মাথা নাড়ল, বুঝেছে ।

বোস বলল, ডু ইউ থিংক উই শুড হ্যাভ সেকস্ টাইম টু টাইম ?

দীপনাথ একটু হাসল । তারপর বলল, দেয়ার ইজ এ পয়েন্ট টু পণ্ডার । ইট মে হ্যাভ
ইটস্ ইউসফুলনেস ।

বোস একটু দীর্ঘশ্বাস ফেলে বলে, বুঝলাম । কিন্তু হাউ টু অ্যাপ্রোচ ? শী মে রিফিউজ,
শী মে ইনসার্ট মি । বহুদিন আমাদের সম্পর্ক নেই । বহুদিন ।

পর্দার ওপাশ দিয়ে একটা সুগন্ধ হেঁটে গেল । দীপনাথ আর বোস চুপ করে যায় ।

একটু বাদেই সুগন্ধটা ফিরে আসে । দাঁড়ায় । তারপর পর্দা সরিয়ে নিঃশব্দে ভিতরে
আসে ।

এতদিনে সময় হল ?

দীপনাথ চোখ তোলে । কিন্তু ভাল করে তাকায় না । হঠাৎ তাব চোখ দুটো আবছা হয়ে
আসে ।

একটু হাসবার চেষ্টা করে সে বলে, এত কী রীধছেন ?

একজন বিগ একজিকিউটিভকে নেমন্তন্ন করলে তার উপযুক্ত আয়োজন তো করতে
হয় ।

আমি আজকাল খেতে পারি না ।

একজিকিউটিভরা খায় নাকি ? ফেলে দেয় তো । আর তারা ফেলে দিয়ে ধন্য করবে
বলেই তো, এত যত্ন করে রান্না ।

দীপনাথ মৃদু একটু হেসে বলল, ফেলব কেন ? এ বাড়িতে তো কোনোদিন পাত পেড়ে
খাইনি । আজ চেটেপুটে খেয়ে যাবো ।

এ কথায় লুকোনো ছিল চোরা মার । এ কথা ঠিক, দীপনাথ এ বাড়িতে অনেক ডিনার
দেখেছে, কিছু কিছু যোগানদারের কাজও করেছে একসময় । কিন্তু গরীব ও স্ট্যাটাসহীন
৫৫২

দীপনাথকে বোস সাহেব ডিনারে ডাকার সাহস পায়নি কখনো ।

হাসিখুশি হতে গিয়েও কেমন একটু ফ্যাকাসে হয়ে গেল মণিদীপা । কত লজ্জাজনক পরিস্থিতিতে দীপনাথের সঙ্গে জড়িয়ে গেছে সে । এই তো সেদিন তার সঙ্গে দীপনাথকে মিলিয়ে দিতে চেয়েছিল বুনু । কী লজ্জা ! কিন্তু আজ তার চেয়েও বেশী লজ্জা পায় মণিদীপা । সে মানুষের সমানাধিকারে বিশ্বাস করে ।

বোস সাহেব তার প্লাসের তলানী একটু হুইস্কী গলায় ঢেলে বলল, এটাকে ঠিক ফুল ফ্রেজেড ডিনার বলা চলে না । ইটস্ এ পারসোন্যাল অ্যাফেয়ার । ডিনার হল সোশ্যাল মিট । বলে একটু হাসল বোস । বলল, আপনি বহুদূর চলে যাচ্ছেন । আজ চোখেব জলে কিছু খাদ্যের সামনে বসে থাকা ।

বোস এভাবে কথা বলে না কখনো । এই কথাটুকুর মধ্যে কোনো কৃত্রিমতা ছিল না । গভীর ভালবাসা ছিল । তাই অস্বস্তিটা কেটে গেল আবহাওয়া থেকে ।

দীপনাথ সহজভাবে বসে বলল, মণিদীপা, আপনি কি এখনো একজিকিউটিভদেব যেমা করেন ?

আমি বর্ন হেটার অফ একজিকিউটিভস্ ।

ভালবাসা বা যেমা দুটোই দীর্ঘদিনের অভ্যাসে রপ্ত হয় । কেউ যেমা নিয়ে জন্মায় না । আপনাকে কেউ না কেউ যেমা করতে শিখিয়েছে ।

হবে । বলে মণিদীপা মুখোমুখি বসে । পরনে মোটা তাঁতের শাড়ি এবং সেটারও খুব চিক্ণতা নেই, ভাজ নেই । চুল এলোমেলো । মুখে ঘাম । আঁচলে মুখ মুছে বলল, কেউ হয়তো শিখিয়েছে ।

কিন্তু একজিকিউটিভদের যেমা করার কিছুই নেই । ববং তাবাই সবচেয়ে ককণার পাত্র । মালিকরা তাদের বেশী মাইনের লোভানী দিয়ে লেলিয়ে দেয় নিজেদের ইচ্ছাপূরণে । দে বিকাম ডগস্ অফ দি ক্যাপিটালিস্টস । তারা যে চাকর সেটা ভুলে গিয়ে কিছুদিন ভুল অভিনয় করে যায় মাত্র । লম্বা বেতন পায় ঠিক, কিন্তু মদে পাটিতে স্ট্যাটাসেব পেছনে এত উড়িয়ে দেয় বা দিতে হয় যে, শেষ পর্যন্ত দে বিকাম হ্যান্ডনটস্ । প্রলোভিত হয়েতস্ । বিশ্বাস করেন ?

আপনি কি তাই ?

আমি এ লাইনে নতুন । তবে অভিজ্ঞতা থেকে জানি ।

বোস সাহেব একটা দীর্ঘশ্বাস ফেলে বলল, কথাটা ঠিক ।

আসুন, খেতে দিই । বলে মণিদীপা উঠল ।

যখন খেতে বসার আগে বেসিনে হাতমুখ ধুচ্ছিল দীপনাথ তখন মণিদীপা কাছে এল আচমকা । মৃদুস্বরে বলল, অনেক দূর । কেন যাচ্ছেন ?

চাকরি ।

মণিদীপা ঠোঁট কামড়ে একটু হাসে, আমেরিকায় না গেলেও দূরই তো ছিলেন । এ থাউজ্যান্ড লাইট ইয়ারস্ ।

দূরই ভাল ।

ভুলে যাবেন ?

সব কি ভোলা যায় ? বোসকে দেখবেন । উনি খুব হেলপলেস্ ।

জানি । আমিও তো হেলপলেস্ ।

দুজনেই হেলপলেস্ হলে আশা আছে । ইউ ক্যান হেলপ্ ইচ আদার ।

ওসব থিওরি, থিওরি । জীবন ওরকম নয় ।

॥ বিরাশি ॥

কী খাচ্ছে, রান্না কেমন হয়েছে এসব টের পাচ্ছিল না দীপনাথ । খেতে হবে বলে মুখ নীচু করে খাচ্ছে মাত্র । বহুদিন বাদে মণিদীপার সঙ্গে এই দেখাটা না হলে বুকের মধ্যে পুরোনো ক্ষতের মুখ নতুন করে খুলে যেত না । কষ্ট হত না ।

সে বলেছিল, পাত্রী পছন্দ নয় । সেটা মিথ্যে কথা । মণিদীপাকে সে বহুকাল ধরে ভালবাসে । শুধু চৌকাঠ ডিঙায়নি । ইচ্ছে করলেই ডিঙানো যেত । আজও ওদের স্বামী-স্ত্রীর যা সম্পর্ক তাতে দীপনাথ এখনো চাইলে অনায়াসে মণিদীপাকে পেতে পারে । কিন্তু কোথায় একটা নৈতিক বাধা, বিবেকবোধ এসে পথ জুড়ে দাঁড়ায় । সজাগ হয়ে ওঠে নানা রকম যুক্তিবুদ্ধি, বিধিনিষেধের বোধ । এই জনোই কি মাঝে মাঝে তাকে ব্যক্তিত্বহীন বলে গাল দিত মণিদীপা ?

ডিনারটা যত আনন্দের হতে পারত ততটা হল না । বোস চুপ । মণিদীপা পরিবেশন করছে ।

দীপনাথ কথা খুঁজে পাচ্ছিল না । হঠাৎ একবার জিজ্ঞেস করল, আরোঁবকায় স্নিগ্ধদেবের ঠিকানাটা জানেন ?

মণিদীপা একটু শক্ত হয়ে গেল । বলল, কেন ?

ভদ্রলোক যখন এদেশে ছিলেন তখন দেখা হয়নি, এখন বিদেশে একবার দেখা করার চেষ্টা করব ।

দেখা করবেন কেন ?

দীপনাথ মুখে বিষ্ময় ফোটানোর চেষ্টা করে বলে, কেন বলিনি আপনাকে ? উনি যে আমারও লীডার ছিলেন ।

মণিদীপা মাথা নেড়ে বলে, দেখা করবেন না দয়া করে ।

কেন বলুন তো ?

কী লিখেছে আমাকে জানেন ?

কী ?

লিখেছে ভারতবর্ষের প্রোলেতারিয়েতদের চরিত্র আলাদা । তাদের দিয়ে কিছুই হওয়ার নয় । এত অপদার্থ এলিমেন্ট পৃথিবীর কোথাও নেই । প্রতি তিনজন ভারতবাসীর একজন চোর, অন্যজন অলস, তৃতীয় জন কাপুরুষ । আরো লিখেছে, ভারতবর্ষে বিপ্লবী আর অ্যাণ্টিসোস্যালের মধ্যে তফাত প্রায় নেই-ই । শুধু পারপাসটুকু আলাদা, নইলে দু-দলই একই কাজ করে । কিছু বুঝলেন ?

দীপনাথ হাসিমুখে বলে, এসবই তো কঠোর সত্য । আমিও এ রকমই ভেবে রেখেছিলাম । এখন লীডারের মুখে শুনে আরো পেতায় হল ।

যাদের নিয়ে রসিকতা করা যায় স্নিগ্ধ তাদের দলে পড়ত না । আজ অবশ্য আপনি সবই বলতে পারেন ।

আমি রসিকতা করছি না মিসেস বোস ।

করলেও দোষ নেই । শুধু প্লীজ, ওর সঙ্গে দেখা করবেন না ।

আমি শুধু ভাবছি এই তিনজনের মধ্যে আমি কোন জনা !

কে তিন জন ?

ওই যে স্নিগ্ধ লিখেছেন একজন চোর, একজন অলস, একজন কাপুরুষ ।

বোস সাহেব নিপাট ভালমানুষী মুখে শুনতে শুনতে এতক্ষণ একটা মাছের মাঝের কাঁটা চিৰোচ্ছিল । হঠাৎ বোস বলে, তৃতীয় জন ।

দেন কাওয়ার্ড । বলে দীপনাথ বোস সাহেবের মুখের দিকে তাকায় ।

বোস মাথা নাড়ে, দি টার্ম স্যুট্‌স্ ইউ, স্যুট্‌স্ মি, স্যুট্‌স্ এভরিবডি ।

মণিদীপা একটু ফ্যাকাশে হয় । এই কথার খেলার মধ্যে গোপনে একটু হল দেওয়ার চেষ্টাও কি নেই ! দীপনাথকে বunu কেন কাওয়ার্ড বলবে ?

মুদুম্বরে মণিদীপা বলে, না, দীপনাথবাবু, আপনি কাওয়ার্ড নন ।

নই ' বলেন কি ?

নন । আমি বলছি ।

আপনিই তো এতকাল উল্টো বলতেন ।

মত পাল্টেছি ।

পাল্টালেন কেন ? কোনো বীরত্বের কাজ করেছি নাকি ?

তাও করেন নি ।

তা হলে ?

কিছু লোক থাকে -- তারা কাওয়ার্ডও নয়, হীরোও নয় । নিম্পুহ । নিম্পুহদের কি কাওয়ার্ড বলা যায় ?

নিম্পুহ মানে কি ইন-অ্যাকটিভ ?

পুরোপুরি নয় । কোনো কোনো ব্যাপারে ইন-অ্যাকটিভ ।

একজ্যাকটিল । বলে বোস সাহেব একটু হাসে, আপনি নিজের কর্মক্ষেত্রে অসুস্থের মতো বলবান । কিন্তু আজ রিগ্যারডস্ আদার আরথলি ম্যাটারস্ আপনি এক নম্বরের প্রাচীনপন্থী ।

প্রাচীনপন্থী মানে কি ইন-অ্যাকটিভ ?

তা নয় । কিন্তু এই বাঁধনছেঁড়া যুগে প্রাচীনপন্থীরা তো কিছুই করতে পারে না । তাই বাধা হয়ে তাবা জীবনের স্রোত থেকে সরে গৌঁজ হয়ে দাঁড়িয়ে থাকে । দ্যাট ইজ ইন-অ্যাকটিভনেস ।

দীপনাথ মণিদীপার দিকে চেয়ে বলে, আমার আর কী কী ডুবাক আছে বলবেন ?

অনেক । কিন্তু বunu যা বলল তা আমার কথা নয় । আমি প্রাচীনপন্থীদের পছন্দ করি ।

আপনি সেই হিসেবে প্রাচীনপন্থীও নন ।

তা হলে ?

আপনি নিজেই জানেন না কোনটা ভাল । রক্ষণশীলতা না প্রগ্রেসিভনেস । তাই আপনার গোটা লাইফ-স্টাইলটাই দ্বিধায় জড়িত ।

এটা কি আমার ফেয়ারওয়েল ডিনার, না অন্য কিছু ?

এটা আপনার ফেয়ারওয়েল ডিনার নয় । ফেয়ারওয়েল আবাব কি ? ছ'মাসের জন্য যাচ্ছেন তো !

ছ'মাসের জন্য যাচ্ছি বটে, কিন্তু অফার পেলে সারা জীবন থেকে যাবো ।

কেন ?

আমার তো পিছুটান নেই । দায়দায়িত্ব নেই ।

আর কিছু ?

এই দেশ আমার ভালও লাগে না। স্নিগ্ধদেব তো মিথ্যে কথা লেখেননি। তবু তো স্নিগ্ধদেব এ-দেশের মুক্তির জন্য কিছু করার চেষ্টা করেছিলেন। আমি তাও করিনি। এখন জানি, করলেও কিছু হবে না। দিনের পর দিন মতলববাজদের পলিটিকস্, মানুষের তৈরি করা মানুষের দুর্ভোগ, সব রকম অনিয়ম আর বিশৃঙ্খলা সহ্য করে থেকে যেতে হবে। তার চেয়ে সেই দেশ ভাল। সাদা মানুষরা সেখানে একটা মোটামুটি ভাল জায়গা তৈরি করে রেখেছে।

স্নিগ্ধদেব আর কী লিখেছে জানেন ?

কী লিখেছে ?

উনি আপনার লীডার তো ?

একশ বার। স্নিগ্ধদেব লাল সেলাম।

শুনুন। স্নিগ্ধ লিখেছে, আমেরিকা প্রথম এক মাস বিস্ময়কর, দ্বিতীয় মাসে উপভোগ্য, তৃতীয় মাসে চমৎকার, চতুর্থ মাসে মৃদু উদ্বেগজনক, পঞ্চম মাসে আরো উদ্বেগজনক, ছ-মাসে বিরক্তিকর, এক বছর পর আমেরিকার মধ্যে একটা আফ্রিকার জঙ্গলের চেহারা ধরা পড়ে যায়।

ওঃ, ওসব কে না জানে ! আমেরিকা হচ্ছে পৃথিবীর সর্বাধিক আলোচিত দেশ। সবাই আমেরিকার সব খবর রাখে।

তবু কথাটা কিন্তু আপনার লীডারের।

তা বটে। কিন্তু আমি এমন কথা বলিনি যে, উনি এখনো আমার লীডার। আমি বলেছি, উনি আমাব লীডার ছিলেন।

মণিদীপা একটু ছটাকে হাসি হেসে বলে, উনি কখনো আপনার লীডার ছিলেন না। কেউ কখনো আপনার লীডার ছিল না। থাকলে আপনার আজ এত দ্বিধা দেখা দিত না জীবনে। কমিটমেন্ট না থাকলে মানুষের যেমন ফ্লোটিং নেচার হয় আপনার ঠিক তেমনি।

দীপনাথ একটু হেসে বলে, আপনি আজ সেই পুরোনো ফর্মে আছেন।

কিন্তু আপনি তো সেই বেকার ভালমানুষ দীপনাথটি নেই। পালটে গেছেন, অনেক পালটে গেছেন।

খারাপ হয়ে গেছি নাকি ?

ভাল কি ছিলেন ?

বোস সাহেবের বিশাল দেহ থেকে একটি উদ্গার বেরিয়ে এল। রেফারির দায়িত্বটা নেওয়া উচিত মনে করে বোস বলল, রিসেস রিসেস। পরের রাউণ্ড দীপার খাওয়ার পর।

মণিদীপার মুখচোখ থমথমে। বন্ধ রাগে আক্রোশে ফেটে পড়ছে।

দীপনাথ উঠে পড়ল। সঙ্গে বোস সাহেবও।

সামনের বারান্দায় চেয়ার পাতা ছিল। বোস আর দীপনাথ এসে বসল মুখোমুখি।

চুপচাপ অনেকটা সময় কেটে যাওয়ার পর বোস বলল, স্টেটসে আমি গিয়েছিলাম বছর দশেক আগে। এখন অনেক কিছু পালটে গেছে।

তাই হবে। উদাসীন জবাব দেয় দীপনাথ।

একটা কথা বলব ?

কী ?

উই আর গ্রেটফুল টু ইউ ফর মেনি থিংস। কিন্তু আমি বা দীপা কেউই অকৃতজ্ঞ নই।

ধ্যাংস ফর এভরিথিং ইউ হ্যাভ ডান অর ট্রায়েড টু ডু ফর আস।

দীপনাথ মদু হেসে বলে, আমার জীবন কিছু চেষ্টারই সমষ্টি মাত্র। কিন্তু কিছুই আমার দ্বারা হয়নি।

সব চিড় কি জোড় খায়? চেষ্টা কি আমরাও কম করেছি?

কী হবে বোস সাহেব?

আই অ্যাম প্যাসিভলি ওয়েটিং ফর সামথিং টু হ্যাপেন। কিন্তু সেটা যে কী তাও জানি না। হয়তো কিছু একটা হবে। হয়তো হবে।

হোক বোস সাহেব, হোক। আমি আজ উঠি।

দাঁড়ান, দীপা খেয়ে আসুক।

দীপনাথ মাথা নাড়ে, না। আমার একটু কাজ আছে।

বোস সাহেব বুঝদারের মতো মাথা নেড়ে বলে, জানি, ইটস্ এ বিট সাফোকেটিং ফর ইউ। গুডনাইট দেন।

গুডনাইট।

লেক গার্ডেন্সের ফ্ল্যাটটা বুকড্ হয়ে গেছে কিন্তু।

ধন্যবাদ।

বেরিয়ে আসার সময় খাওয়ার ঘরে থমকে দাঁড়িয়ে পড়ে দীপনাথ। সে জানত মণিদীপা এখন থাকে না। হয়তো আজ রাতেই থাকে না। ঠিক তাই। মণিদীপা নেই।

মুখ ঘুরিয়ে মণিদীপার ঘরের দরজাটা দেখল দীপনাথ। আঁট করে বন্ধ।

যা ত্যাগ করতে হবে তার দিকে আকৃষ্ট না হওয়াই ভাল। দীপনাথ নেমে আসে দোতলা থেকে। গাড়িতে ওঠে। তারপর মণিদীপার কাছ থেকে বহু দূরের পার্থক্য রচনা করার জন্য মনে মনে প্রস্তুত হয়।

একদিন সকালবেলা হঠাৎ দীপনাথের মনে হল, কেমন আছে সুখেন্দু আর বীথি?

সেইদিনই অফিসের পর তার গাড়ি এসে থামল গডপাড়ে বীথির বাসার সামনে।

তাকে দেখে যেরকম হইচই পড়ে যাবে বলে ভেবেছিল দীপনাথ, তা হল না। যথার্থ্যিতি দবজা খুলে বীথি বলল বটে “ওমা! কী ভাগ্যি!” কিন্তু গলায় সেই উত্তাপ এল না। সেই প্যাশন তো নয়ই।

সামনের ঘরেই লুপ্তি পরে সুখেন বসে। মুখে ভারী অমায়িক হাসি। কিন্তু তা অমায়িকতার বেশী কিছু নয়। দীপনাথের মনে হল, এখন এ বাড়িতে চৌকাঠের গভীরে ঢোকা তার বারণ।

বীথি খাবার নিয়ে এল। মেলাই খাবার। মিষ্টি, কেক, ওমলেট। সেসব ঝুলই না প্রায় দীপনাথ।

সুখেনকে জিজ্ঞেস করল, কেমন আছেন?

একটু আগেই বোধ হয় বড় করে এক ডোজ টেনেছে সুখেন। মুখটা বিকৃত করে বলল, আর দাদা ভাল-মন্দ! সব সমান।

বীথি ঘরে ছিল না। দীপনাথ নীচু গলায় জিজ্ঞেস করল, বিয়ে করে ভাল লাগছে না?

বিয়ে আবার কী! দাদার যে কথা। এসব আবার বিয়ে নাকি? একসঙ্গে থাকা, কনট্রাক্ট। আজ আছি, কালই যে যার পথ দেখব হয়তো।

বীথির স্বামীর খবর কি?

খবর গুণগোলের। ছেলেও বিগড়েছে।

আপনি তা হলে সুখে নেই বলুন।

খুব সুখে আছি দাদা। খুব সুখে। বলে সোফার পাশে মেঝেয় আড়ালে রাখা একটা বোতল ভুলে অল্প একটু গলায় ঢেলে ছিপি আটকে সরিয়ে রাখে সুখেন। তারপর বলে, হারামীর বাচ্চা জেল থেকে বেরিয়ে অবধি কেবল টাকা ঝাঁকছে।

কে বলুন তো?

বীথির হাজব্যাণ্ড।

টাকা কেন?

বলছে টাকা না পেলে কেস করবে।

ডিভোর্স হয়নি?

না। মামলা সব কোর্টে উঠেছিল। ভেবেছিলাম, ব্যাটা যখন ঘানি টানছে তখন আর চিন্তা কি? কিন্তু শালা তিন তিনটে কেসে কী করে যে প্যারোল পেয়ে গেল! এদিকে আমরা আহাম্মকের মতো কাগজে সইসাবুদ করে বসে আছি।

লোকটা কি ভয় দেখাচ্ছে?

খুব দেখাচ্ছে। বীথিকে নয়, আমাকে। বলছে কী ওই ইংরিজি কথাটা—অ্যাডালটরি না কী যেন, তাইতে ঘানিতে ঘোরাবে।

ছেলে কী বলছে?

সে তো আর এক কেলা। ছেলে আর বাপ হাত মিলিয়ে ফেলেছে।

হঠাৎ সন্দিহান দীপনাথ প্রশ্ন করে, শুধু ছেলে আর বাপ? ছেলের মাও নেই তো?

কে, বীথি? কী যে বলেন!

শুনুন সুখেন। আমি আমেরিকা চলে যাচ্ছি। বহুদিন আপনার সঙ্গে দেখা হবে না। সারাজীবনেও না হতে পারে। তাই বলে যাচ্ছি, আপনি সবাইকে অতটা বিশ্বাস করবেন না।

বীথিকে বিশ্বাস না করে উপায় নেই।

একটা দীর্ঘশ্বাস ফেলল দীপনাথ। বীথি তাকে দেহ দিয়েছিল। সেটা বড় কথা নয়। সেজন্য বীথির কাছে তার কোনো ঋণ নেই। কিন্তু সুখেনের কাছে আছে। সুখেন তাকে বড় ভালবাসত। এই লোকটা ছিবড়ে হয়ে যাক তা সে চায় না।

হাসির একটা বার্থ চেষ্টা করে দীপনাথ বলল, লোকটা এ পর্যন্ত কত টাকা নিয়েছে?

হাজার পাঁচেক।

আরো কত চায়?

তার কিছু ঠিক নেই। আমার সঙ্গে দেখা হয় না। বীথিকে এসে শাসায়।

শাসাক না। কোর্টে অ্যাডালটরি প্রমাণ করা কি খুব সোজা? আপনি টাকা দেওয়া বন্ধ করুন।

রান্নাঘরে কাপ ডিশের শব্দটার দিকে কান রেখেছিল দীপনাথ। শব্দটা বন্ধ হতেই মুখে কুলুপ আঁটল। বীথি আসছে।

চা নিয়ে বীথি ঘরে ঢুকতে তার মুখের দিকে খুব ভাল করে চেয়ে দেখে দীপনাথ। তার জীবনের প্রথম নষ্ট মেয়েমানুষ। এরই সঙ্গে তার জীবনের প্রথম আনন্দ। একে সে কখনো বিশ্বাস করেনি। করা যায়ও না। সুখেন অন্ধ, তাই বিশ্বাস করে।

কিন্তু এই খপ্পর থেকে সুখেনকে বের করে নেওয়ারও কোনো উপায় নেই। বোকাটা ছিবড়ে হবে।

চা খেয়ে উঠে দাঁড়ায় দীপনাথ । বলে, সুখেন, একটু এগিয়ে দেবেন নাকি শেষবারের মতো !

বীথি হাসল, এগিয়ে দেওয়ার মতো অবস্থা আছে কিনা দেখুন । বিকেল থেকে টানা দু' ঘণ্টা ড্রিংক করেছে ।

ওর ড্রিংক করা আপনি কমাতে পারেন না ? বীথিকে খুব হালকা গলায় জিজ্ঞেস করে দীপনাথ ।

কথা শুনলে তো !

ঠিকমতো বারণ করুণ, শুনবে ।

বীথি কথাটা নিল না । মোড় ফিরে বলল, আমাদের জন্য কী পাঠাবেন ওখান থেকে ?

কী পাঠালে খুশি হবেন ?

যা আপনার খুশি । মনে রাখতে পারি এমন কিছু ।

কেন, এমনিতে মনে থাকবে না ?

কী যে বলেন ! থাকবে না আবার ! সুখেন তো এখনো সারাদিন আপনার কথা বলে ।

বলে ?

ভীষণ বলে ।

সুখেন টপ করে উঠে গিয়ে লুঙ্গি ছেড়ে একটা প্যান্ট আর হাওয়াই শার্ট পরে বেরিয়ে এল, চলুন দাদা । বীথি, আমার ফিরতে রাত হবে ।

কোথায় চললে ?

দাদা দূর দেশে চলে যাচ্ছেন । কোথাও গিয়ে বসে একটু সুখদুঃখের কথা বলে আসি ।

সে তো এখানে বসে বললেই হয় ।

না গো, সে আমাদের আলাদা জায়গা আছে ।

বলে দেবী না করে দীপনাথকে একদম ঠেলতে ঠেলতে বেরিয়ে আসে সুখেন । তারপর অভ্যাসবশে টানা রিকশা ভাড়া করে ।

একটু হেসে দীপনাথ বলে, মোড়ে আমার গাড়ি দাঁড়িয়ে আছে । চলুন ।

গাড়ি ! ওঃ বাব্বাঃ !

অবাক হওয়ার কিছু নেই । অফিসের গাড়ি ।

পাশাপাশি হাঁটতে হাঁটতে সুখেন বলে, আমার টানা রিকশার মতো ভাল আর কিছুকে লাগে না ।

গাড়িতে উঠে দীপনাথ জিজ্ঞেস করে, কোথায় যাবেন ?

সেই চীনে রেস্তোরাঁয় চলুন ।

আমার যে খিদে নেই ।

খিদে নেই ! তার মানে দাদার এখন টাকা হয়েছে ।

তা নয় । খিদের সঙ্গে টাকার সম্পর্ক কি ?

আছে । সে পরে হবে'খন । আপনার সঙ্গে আমার কিছু কথা আছে ।

তা হলে চলুন । কথাটা কি ?

ওঃ সে অনেক কথা । আমি জীবনে আর কোনো আনন্দ পাচ্ছি না । পাওয়ার কথাও নয় যে !

সুখেনের সঙ্গে সঙ্কেটা কাটল একই সঙ্গে আনন্দে বিষাদে । সুখেন একটু মাতাল ছিলই, আরো হল । ফেব্রার সময় গাড়িতে বসে বলল, আমি আজ আর বীথির কাছে ফিরব না দাদা । আপনার কাছে থাকতে দেবেন ?

বীথি চিন্তা করবে না ?

কিসের চিন্তা ! আমি নেশাখোর মানুষ, আমার জন্য চিন্তা কি ?

নেশা করেন কেন ?

নেশা করে ভাল আছি । কোনো ঝামেলায় মনটা জড়ায় না ।

আপনার কি খুব ঝামেলা ?

মেলা । গায়ে মাখি না বলে ।

বীথিকে এখন কেমন লাগছে ?

ভাল নয় । আপনার কথাই বোধ হয় ঠিক । টাকা খেঁচবার ব্যাপারটায় বীথিও থাকতে পারে । তবে মুখে মাখন ।

যদি বীথির নেশা কেটে গিয়ে থাকে, তবে এবার কেটে পড়ুন না !

সুখেন অসহায়ভাবে নিজের কোলে মুখের এক দলা নাল ফেলে বলে, কোথায় যাবো ? পড়ে থাকার একটা জায়গা চাই তো । একটা মেয়েছেলে দেখাশোনাও করছে ।

কিন্তু টাকার ব্যাপারটা ?

সে বীথির স্বামী ছেলে নেয়, অন্যোও নিত । আমার তো সব ঘুষের পয়সা, যায় যাক । ঘুষের পয়সা এমনিতেও থাকে না ।

সুখেন, ইউ আর ইন এ ট্রাপ, সেটা কি জানেন ?

সুখেন পার্কা মাতাল । অনেকটা টেনেও যুক্তিবুদ্ধি হারায়নি । দীপনাথের দিকে চেয়ে বলে, খানিকটা টের পাচ্ছি ।

সেই ট্রাপে আপনি আমাকেও ফেলতে চেয়েছিলেন, বিয়িং এ ফ্রেণ্ড ।

সুখেন মাথা নাড়ল । বলল, তা নয় । আমি দেখতে চেয়েছিলাম, মেয়েমানুষের অভিজ্ঞতা না থাকার ফলেই আপনার একটা ভালমানুষী রোগ হয়েছে কিনা ।

কী দেখলেন ?

তা নয় । আপনার ভালমানুষীটা খাটি । কিন্তু তবু একটা খটকা ।

কিসের খটকা ?

আপনি দাদা ভালমানুষ বটে, কিন্তু বীথির সঙ্গে শুলেন কেন ?

দীপনাথ মদ খায়নি । তবু যেন মাথাটা ঝিম করল হঠাৎ । কপালটা চেপে ধরে বলল, তা আমিও জানি না । হয়তো বীথি সুন্দরী বলে ।

সুখেন গম্ভীর হয়ে বলে, আপনি অত সস্তা লোক নন । অন্তত আমার মতো তো নন । বীথির মতো সুন্দরী গুণায় গুণায় আছে । তো কী ?

দীপনাথ ড্রাইভারকে সোজা মেসে ফিরতে বলেনি । ময়দানে গাড়ি ঘুরপাক খাচ্ছে নানা পথে । ড্রাইভার এসব কথা শুনে পাচ্ছে বলে লজ্জা করল দীপনাথের । ভিক্টোরিয়া মেমোরিয়ালের কাছে গাড়ি থামিয়ে তারা নামে এবং মাঠের ঘাসে বসে পাশাপাশি । এ সময়টুকু দীপনাথ তার পদস্থলনের কথা ভাবল । কিছু ভেবে পেল না । এত সহজে অচেনা এক মেয়েমানুষের সঙ্গে যে সে শুতে পারে, তাও জীবনের প্রথম মহিলা সংসর্গ, তা তার ৫৬০

বিশ্বাস ছিল না। নিজের ওপর তার আর একটু নিয়ন্ত্রণ থাকার কথা। বীথি সুন্দরী বলে নয়, বীথি তাকে আমন্ত্রণ জানিয়েছিল বলেও নয়, খুব সম্ভব সেই সময়টায় মণিদীপা তাকে প্রায়ই গা-জ্বালানো কথা বলত। হয়তো সেই সময়টায় তার হতাশা এবং ব্যর্থতার কথা সে বড় বেশী ভাবত।

সুখেন মদ খেলেও নিজেকে চমৎকার রাশ টেনে রেখেছে। প্রায় স্বাভাবিক গলায় বলল, বীথির সঙ্গে যা করেছেন সেটা এমন কিছু সাংঘাতিক কাণ্ড নয়। রোজ হাজারে হাজারে লোক প্রাকৃতিক কাজ সারতে মেয়েছেলের কাছে যায়, দরাদরি করে, একেবারে বাজারহাট করার মতো ইজি জিনিস। কিন্তু আপনি যেই কাণ্ডটা করলেন অমনি আমার ভিতরে কী যে একটা হল!

কী হল বলুন তো?

একটা বিশ্বাস ভেঙে গেল। মনে হল সবাই তা হলে রক্তমাংসের মানুষ। আমার মতোই।

আমি তো তাই-ই।

সে তো জানি। তবু কাউকে একটু ওপরের মানুষ ভাবতে ভাল লাগে তো। পৃথিবীর সবাই আমার মতো দোষেগুণে মানুষ এটা যদি সত্যিও হয় তা হলেও বিশ্বাস করতে হচ্ছে যায় না।

পৃথিবীর সবাই আপনার আমার মতো নয় সুখেন। ওপরের মানুষ অনেক আছে। কিন্তু সে দলের আমি নই।

কেন হলেন না দাদা? বলে সুখেন দীপনাথের একটা হাত আলতো করে ধরে। বলে, পরদিন আমার এমন রাগ হয়েছিল বীথির ওপর যে, খামোকা একটু কথা কাটাকাটি লাগিয়ে একটা থান্ড কষিয়েছিলাম গালে।

বীথির তো সব দোষ নয়।

জানি। কিন্তু আমার বিশ্বাসটা যে চলে গেল তার জন্য কারোর ওপর তো ঝাল ঝাড়তে হবে।

দীপনাথ একটা বড় শ্বাস ছেড়ে বলে, সেই সময়ে আমি স্বাভাবিক ছিলাম না।

আপনাকে আমার এখনো ভক্তি হয়। বীথি আর আমি আপনার কথা অনেক বলি। আপনি বীথির সঙ্গে শুয়েছেন বলে হিংসে-টিংসে করব এমন বাংলাই আমার নেই। মাতাল মানুষ, আমার কোনো টানও তেমন নেই। বীথি যে এখনো কেবল আমাকে নিয়েই আছে তা নয়।

বীথি কি এখনো—? কথাটা শেষ করল না দীপনাথ। একটু বিহ্বল হয়ে তাকিয়ে রইল।

সুখেন বলে, নয় কেন? মেলা টাকা, মেলা সুযোগ, মেলা প্রভাব রোজগার করছে বীথি। ওর হাড়ে-হারামজাদা স্বামী কি এমনি এমনি ছাড়া পেল জেল থেকে? বীথি কলকাঠি না নাড়লে?

আপনি চুপ করে থাকেন?

আমার কিছু করার নেই। কী করব, কেনই বা করব? আমার তো পড়ে থাকার একটা জায়গা আর একটা দেখাশোনার একজন মানুষ—তা পেয়ে গেছি। বাদবাকিটা আনুইমপেরট্যান্ট।

আমি আপনার মতো নির্বিকার মানুষ দেখিনি।

নির্বিকার ? না ঘোর বিকার ? ব্রহ্মজ্ঞানীরা দুনিয়ার সব কিছুকে মায়ার খেলা বলে মনে করে, আমার মতন লোকদের ফিলিংও তাই প্রায় । আমার কাছে সবটাই তামাশার মতো লাগে ।

কিন্তু বীথি কি চিরকাল আপনার দেখাশোনা করবে ? টাকা যখন বন্ধ হবে তখন ? ওঃ, সে অনেক পরের কথা । এখনো আমি দু'হাতে রোজগার করি, চার হাতে ওড়াই । বীথি আমাকে এখনো কিছুদিন যত্নআন্তি করবে । তার পর তাড়াবে একদিন বোধ হয় । আবার নাও তাড়াতে পারে ।

বীথির ওপর আপনার এখনো একটা বিশ্বাস আছে তা হলে ।

সুখেন মাথা নেড়ে বলে, না । তবে বীথির বয়স চল্লিশ পার । দিনে দিনে বুড়ো তো হচ্ছে । তারপর স্বভাবগুণে বাজারটা এমনই কবে ফেলেছে যে, কেউ ওকে বিশ্বাস কবে না । এসব মেয়েছেলে বুড়ো বয়সে ভারী একা আর অসহায় হয়ে পড়ে । তখন আর কাউকে না পেলে হয়তো আমাকেই আঁকড়ে ধরে থাকবে ।

সেই আশা ?

না, আশা-টাশা নয় ! আমি সব কিছুব জন্যই প্রস্তুত । যা হওয়ার হবে । ও নিয়ে ভেবে লাভ নেই ।

চলুন মেসে ফিরি ।

চলুন । আমার ঘুম পাচ্ছে ।

আমার ওখানেই যাবেন ?

সুখেন হাসল, ইচ্ছে করলে আপনিও আমার ওখানে আসতে পারেন । আমেরিকা যাওয়ার আগে বীথির সঙ্গে যদি আর একবার ঘনিষ্ঠতা করতে চান ।

সুখেন ! একটা ধমক দিল দীপনাথ ।

সুখেন খুব হেসে নিয়ে বলল, যাঁহা বাহান্ন তাঁহা তিলান্ন ।

এ কথায় রেগে যেতে পারত দীপনাথ । কিন্তু রাগল না । সত্যিই তো ; যাঁহা বাহান্ন তাঁহা তিলান্ন ভেবেই কি প্রথমবারের পরও আরো বার কয়েক বীথির কাছে যায়নি ! প্রথমবারই খিলটা খুলে দিতে যা বাধা ছিল । তারপর অব্যবহৃত দ্বার । রাগল না বটে, কিন্তু দীপনাথের একটু দুঃখ হল । সুখেনের কাছে সে এক সময়ে অতিমানব ছিল, আজ আর নেই । না রেগে তাই সে একটু করুণ করে হাসল ।

পরদিন সকালে সুখেন ঘুম থেকে উঠে গদাই লঙ্করী চালে চা খেল, প্রাতঃকৃত্য সারল । তারই ফাঁকে ফাঁকে বলল, তার কোনো দুঃখ নেই । দীপনাথ যেন তার জন্য চিন্তা না করে ।

দীপনাথ তার পুরোনো বিলিতি কন্সলটা আর কিছু বই, একটা পুরোনো পার্কার কলম উপহার দিতে চাইল সুখেনকে । সুখেন নিল না । বলল, ও তো আমি নিলেও রাখতে পারব না । বীথির স্বামী বা ছেলে এসে এক ফাঁকে নিয়ে যাবে । এই সেদিন ষ্ট্যানবই টাকা দিয়ে এক জোড়া চম্পল কিনেছিলাম । হাপিস ।

দীপনাথের অফিসের গাড়িতে উঠেই এসপ্লানেড অবধি এল সুখেন । তারপর নেমে গেল । দীপনাথের মনে হল, সুখেনের সঙ্গে এই শেষ দেখা । আর হয়তো দেখা হবে না । ওরকম অদ্ভুত জীবনযাপন করতে করতে সুখেন শেষ অবধি কোথায় পৌঁছোবে তা ভাবতে ভাবতে বড় ভারাক্রান্ত হয়ে গেল দীপনাথের মন ।

জীবনে প্রথম প্রেনে উঠতে ভয় পাচ্ছিল বিলু । মুখ শুকনো, চোখে দৃষ্টিহীন ।

প্যাসেনজার লাউনজে আনমনে বসে থেকেও দীপনাথ বিলুকে লক্ষ করল। একটু হাসল। প্লেনে প্রথম প্রথম উঠতে একটু ভয় সকলেরই করে। অস্বাভাবিক নয়। তবে বিলুর তো ভয় থাকার কথা নয়। যার অসুস্থ রোগা স্বামী নিরুদ্দেশ, জীবনে তার আর ভয় পাবার কী আছে!

লাবু লাউনজের কাছে মুখ লাগিয়ে এয়ারোড্রমে দাঁড়ানো প্লেন দেখছিল। মাঝে মাঝে ছুটে এসে দীপনাথকে জিজ্ঞেস করছে, এত বড় প্লেনগুলো সব ওড়ে? কি করে ওড়ে মামা, পড়ে যায় না?....ওই সাদা প্লেনটা বিলেতে যাবে?....আমেরিকায়?.... আমরা কখন উঠবো?

অবশেষে প্লেন যখন আকাশে উঠল তখন ভয় অনেকটা কেটে গেছে বিলুর। লাবুকে খাবার খাওয়াতে ব্যস্ত হয়ে পড়ল।

দীপনাথ চা ছাড়া কিছুই ঠূল না।

বিলু হঠাৎ জিজ্ঞেস করল, ছবির জন্য কী নিলে?

একটা হার।

কত পড়ল?

হাজার চারেক বোধ হয়।

বাব্বাঃ। কিরকম হার?

নেকলেস।

তা বলবে তো! হার আর নেকলেস কি এক?

ওই হল।

তোমাকে নিয়ে আর পারি না। চার হাজার দাম নিল, সোনা কতটা আছে?

জিজ্ঞেস করিনি। তবে ভাল দোকান থেকে কেনা। ঠিকায়নি।

তোমাকে তো টাকা কামড়ায়। আমাকে নিয়ে গেলে পারতে। পছন্দ করে দিতাম। খেয়াল হয়নি।

কী হয়েছে বলো তো! অমন কাঠ কাঠ জবাব দিচ্ছে কেন?

কলকাতার আকাশ পেরিয়ে প্লেন উত্তর বাংলায় ঢুকে গেছে এই খানিকক্ষণ হল। আকাশের গায়ে নীলাভ পাহাড়ের পর পাহাড়। একটু পিছনে কাঞ্চনজঙ্ঘা। রূপালি মৃত্যুহিম মহান পর্বত। জনবসতি নেই, গাছপালা নেই, হাজার হাজার বছরের জমাট তুষার রয়েছে। গ্র্যানাইট স্তরের মতো কঠিন। পরতে পরতে ঢাকা পড়ে আছে ছোট্ট পাখি, পতঙ্গ, বা শীতের দেশের পশুদের জীবাশ্ম।

স্বপ্নাচ্ছন্ন চোখ ফিরিয়ে বিরক্তির গলায় দীপনাথ বলে, কী বলছিলে?

দীপনাথের মুখ দেখে কথটা আবার বলতে সাহস হয় না বিলুর। মাঝে মাঝে সেজদাকে ভূতে পায়, বিলু জানে।

একটা জীপ নিয়ে এয়ারপোর্টে হাজির ছিল শতম। লাবুকে বকে তুলে নিল।

অনেকদিন বাদে প্রীতমদের বাড়িটা গমগম করছিল উৎসবে। কাল বিয়ে। আজ ম্যারাপ বাঁধা শেষ। টুনি বালবের মালা সর্বাস্থে জড়ানো বাড়িটার। রঙিন কাপড়ের ফটক। লাইডলম্পিকারে সানাই বাজছে।

বিলুকে পৌঁছে দেওয়ার পর পিসির বাড়িতে দীপনাথকে পৌঁছে দেওয়ার জন্য জীপের মুখ ঘোরানো হলে শতম বলল, পাত্রকে একবার দেখে যাবেন নাকি? কাছেই বাড়ি।

আপনাদের বন্ধু যখন ।

দীপনাথ হাসল । বলল, চল । তবে বদুকে আমার মনে আছে । ঐ সেলফ-মেড ম্যান । সেলফ-মেড ম্যানরা বেশীর ভাগ সময়েই ভাল হয় ।

জীপ এসে হাকিমপাড়ায় একটা বাড়ির সামনে দাঁড়ায় ।

বাইরের ঘরেই বদু । বিয়ের জন্য বাড়ি ভাড়া করা হয়েছে, কাজেই আসবাবপত্র নেই । একটা বড় শতরঞ্চির একধারে বসল দীপনাথ ।

বদুর চেহারাটা কালোর মধ্যে বেশ । বয়সটা বোঝা যায় না তেমন । খুব জোয়ান । চোখের দৃষ্টি আশ্চর্য ।

কংগ্যাচুলেশনস্ বদু ।

একটু হেসে বদু নিরাভরণ ভাষায় বলে, দূর ! এতে কী আছে । বিয়ে তো একটা করতে হতই । না হয় প্রীতমের বোনকেই করলাম । বেচারী !

প্রীতম থাকলে 'বেচারী' কথাটা সহ্য করতে পারত না । নিজেকে কখনো বেচারী ভাবেনি প্রীতম । লড়েছে, লড়তে লড়তে হয়তো নেপথ্যে গিয়ে হেরেছে এতদিনে ।

পুরোনো দিনের কথা উঠে পড়ল অনেক । কিন্তু সারাক্ষণ দীপনাথের মনে হতে লাগল, যে সাহস বদু দেখাল সেই সাহস তো সে নিজেও দেখাতে পারত । ছবিকে বিয়ে করার কথা তার কখনো মনে হয়নি । দেখতে সুন্দর নয় ছবি আবার হ্যাক ছি করার মতোও কিছু নয় । বোধ হয় প্রীতমের এই বোনটিকে তারই বিয়ে করা উচিত ছিল নৈতিক দিক দিয়ে । যা হোক, বদু—মহৎ বদু তো করছে !

বদুর মা ভাই বোন সব কোল্লগর আর অন্যান্য জায়গা থেকে এসেছে । তাদের সঙ্গে গল্পগুজব করে অনেকটা সময় কাটাল দীপনাথ ।

বদু নিজের পরিবারের সবাইকে ডেকে হৈঁকে শুনিয়ে দিল, আমরা ইনজিনিয়ার হয়ে যা চাকরি করছি লীপুদা তার চেয়ে ঢের বড় চাকরি করে । আমেরিকা যাচ্ছে, জানো ?

খুবই নির্ঝঞ্ঝাটে বিয়েটা হয়ে গেল ছবির । স্বশুরবাড়ি রওনা হওয়ার সময় শুধু কাঁদতে কাঁদতে বেহেড পাগলের মতো আচরণ করল কিছুক্ষণ ছবি । দু-দুবার অজ্ঞান হয়ে গেল । কেবল বিলাপ করে “আমার দাদা কোথায় গেল ?...আমার মা বাবাকে কে দেখবে ?”

বিলু কুড়ি দিনের ছুটি নিয়ে এসেছে । দীপনাথের থাকার উপায় নেই । বউভাতের পরদিন ফেরার প্লেনে বসে জানালা দিয়ে পাহাড়ের দিকে তৃষিতের মতো চেয়ে থেকে সে ভাবল, প্রীতমের পর্ব কি শেষ হয়ে গেল তবে ? আর কি প্রীতমের জন্য আমার কোনো দায় থাকল না ? শুধু ঈষদুষ্ট কিছু স্মৃতি ছাড়া ?

কোথায় গেলি ? এই দীর্ঘশ্বাস আর একবার বুক ভেঙে বেরিয়ে এল, ঠিক এক মাস পর যখন রাত্রি কলকাতা-বোম্বাই ফ্লাইটে আমেরিকার পথে পাড়ি দিল দীপনাথ । নীচে অন্ধকার ভারতবর্ষ । বিশাল এবং বিপুল । এই দেশের সীমা আগে কখনো ডিঙায়নি দীপনাথ । এখন ডিঙাতে চলেছে । এই দেশকে সে কখনো আপন বলে ভাবতে পারেনি, এখানে তার কোনো পিছুটানও নেই । তবু বুকের মধ্যে এক-একটা পাক দেয় মাঝে মাঝে ।

কী ফেলে যাচ্ছে সে ? কাকে রেখে যাচ্ছে ? ছেলোবেলা থেকে সে পিসির কাছে মানুষ । নিজের মা-বাপকে ভাল করে চেনেনি । ভাই-বোনের সঙ্গে সে রকম সম্পর্ক গড়ে ওঠেনি । না ছিল গভীর কোনো অবিচ্ছেদ্য ভালবাসা । মণিদীপা ? তাকে সে নতুন করে কি সম্প্রদান করে আসেনি বোস সাহেবের হাতে ?

অনেক হিসেব কষল দীপনাথ । না, কেউ নেই, যার জন্য আবার তাব এই দেশে ফিরে আসতে হবে । তবে কেন এই বৃক্ষে মধ্যে অন্ধকার উথাল-পাথাল ?


পূব থেকে পশ্চিম প্রান্তে পাড়ি দিতে দিতে অন্ধকার ভারতবর্ষের দিকে চেয়ে ছিল দীপনাথ । দক্ষিণে সমুদ্র, পশ্চিমে সমুদ্র, উত্তরে সেই হিম পাহাডেব ঢেউ । মাঝখানে মোটা থেকে স্কক হয়ে আসা এক দেশ । এ দেশ তো তাব নয় । সে যেখানেই বীজ বপন করবে সেইখানেই বৃক্ষেব উৎপত্তি দেখবে । তবে ?

সব মানুষই এক অসমাপ্ত কাহিনী । কোনো মানুষই তাব জীবনের সব ঘটনা, সব কাজ শেষ করে যায় না তো । তাব নিজেব জীবন এখনো অনেকখানি বাকি । অনেকখানি বাকি ছিল শ্রীতমেবও ।

ওই নীচে অন্ধকার ভুখণ্ডে আবো কত কাহিনী বচিত হচ্ছে, যাব সবটুকু শেষ হওয়াব নয় । জীবনেব অনেকটা বাকি থাকতে থাকতেই অনেকে খেলাব মাঠ ছেড়ে চলে যাবে । সেনা-পাওনাব হিসেব মিলবে না । এই খেলাব একজন খেলুড়ি তো সেও । কারো জন্যই গর দুঃখ কবাব কিছু নেই ।

তবু বৃক্ষেব মধ্যে মৃদু ঢেউ । দোল দিচ্ছে । ঘা মাবছে । বলছে, কপাট খোলো । উত্তরে এই অন্ধকাবে কিছুই দেখা যায় না । পাহাডও বহু বহু দূর । তবু দীপনাথ টেব পায়, স্বদেশ নয়, শেষ পর্যন্ত এক মহা পর্বতই বোল পেতে বসে থাকবে তাব জন্য । যেদিন তাব কোলে যাবে দীপনাথ, সেই দিন পবম পিতাব মতো সেই পাহাড নিজেব তুষাবস্তূপেব পরতে পবতে দীপনাথকে মিশিয়ে নেবে । আদবে সোহাগে । দুঃখ, দৈন্য, দুর্দশা, অপমান, ঋতিভাব থেকে শীতল মুক্তি ।

কাগজেব ন্যাপকিনটা হাতে ধবা ছিল দীপনাথেব । সন্তর্পণে সেইটে তুলে দু'চোখেব কোল মুছে নিল ।



জন্ম : ২ নভেম্বর, ১৯৩৫।



দেশ—ঢাকা জেলার বিক্রমপুর। মোক্তার দাদু আইন ব্যবসা জমাতে দেশ ছেড়ে গিয়েছিলেন ময়মনসিংহে। সেখানে, ব্রহ্মপুত্র নদীর ধারে, জন্ম। শৈশব কেটেছে নানা জায়গায়। পিতা রেলের চাকুরে। সেই সূত্রে এক যাযাবর জীবন। দ্বিতীয় বিশ্বযুদ্ধের সময় কলকাতায়। এরপর বিহার, উত্তরবাংলা, পূর্ববাংলা, আসাম। শৈশবের স্মৃতি ঘুরে-ফিরে নানা রচনায় উঁকি মেরেছে। পঞ্চাশ দশকের গোড়ায় কুচবিহার। মিশনারি স্কুল ও বোর্ডিং-এর জীবন। ভিকটোরিয়া কলেজ থেকে আই-এ। কলকাতার কলেজ থেকে বি.এ। স্নাতকোত্তর পড়াশুনা কলকাতা বিশ্ববিদ্যালয়ে।

স্কুল-শিক্ষকতা দিয়ে কার্যজীবনের শুরু। এখনও বৃত্তি—সাংবাদিকতা। আনন্দবাজার পত্রিকার সঙ্গে যুক্ত। ছাত্রজীবনের ম্যাগাজিনের গভী পেরিয়ে প্রথম গল্প—দেশ পত্রিকায়। প্রথম উপন্যাস ‘ঘুণপোকা’। ‘দেশ’ শারদীয়া সংখ্যায় প্রকাশিত। প্রথম কিশোর উপন্যাস—‘মনোজদার অদ্ভুত বাড়ি’।

কিশোর সাহিত্যে শ্রেষ্ঠত্বের স্বীকৃতিরূপে ১৯৮৫ সালে পেয়েছেন বিদ্যাসাগর পুরস্কার। এর আগে পেয়েছেন আনন্দ পুরস্কার।

পরেও আরেকবার ‘দূরবীণ’এর জন্য। খেলায় তাঁর উৎসাহ অদম্য। বকসিং, টেনিস, ক্রিকেট, ফুটবল, টেবিল টেনিস সম্পর্কে যেমন, অ্যাথলিটিক্‌সেও তেমনই আগ্রহী।

জীবনের এক সংকটময় মুহূর্তে তিনি জীবনের প্রতি আস্থা ফিরে পান শ্রীশ্রীঠাকুর অনুকূলচন্দ্রের সান্নিধ্যে এসে। নিরামিষাশী। ঠাকুরের মন্ত্রশিষ্য। তাঁর রচনাতেও ঘুরে-ফিরে আসে আধ্যাত্মিক অন্বেষণ। পাঠক হিসেবে সর্বগ্রাসী। ধর্মবিষয়ক গ্রন্থ প্রিয়, প্রিয় থ্রিলার এবং কল্পবিজ্ঞানও।



9 788170 661344